

**NÜXÍRAXÜXÛ I**  
**TUPANAARÜ ORE**  
**(Selecciones)**

Selecciones del  
Antiguo Testamento  
de las Sagradas Escrituras  
en el idioma  
ticuna



**LA LIGA BIBLICA**

LAS SAGRADAS ESCRITURAS PARA TODOS

Selecciones del Antiguo Testamento  
en el idioma ticuna  
(tca)

Primera edición, 2006  
Segunda edición, 2008

Publicado por  
© La Liga Bíblica 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

# PRÓLOGO

Estas selecciones del Antiguo Testamento de las Sagradas Escrituras se publican con el fin de ponerlas al alcance de los hablantes del idioma ticuna quienes residen en la selva a orillas del río Amazonas y su afluentes



## CONTENIDO

Génesis	7
Éxodo	73
Levítico	117
Números	124
Deuteronomio	145
Josué	154
Jueces	174
Rut	190
1 Samuel	197
2 Samuel	234
1 Reyes	248
2 Reyes	281
1 Crónicas	309
2 Crónicas	323
Esdras	330
Nehemías	343
Ester	352
Job	364
Salmos	381
Proverbios	507
Eclesiastés	517
Cantares	523
Isaías	525
Jeremías	541
Lamentaciones	562
Ezequiel	565
Daniel	577
Oseas	598
Joel	605
Amós	609
Abdías	614
Jonás	616

Miqueas . . . . . 620  
Nahúm . . . . . 625  
Habacuc . . . . . 627  
Sofonías . . . . . 630  
Hageo . . . . . 633  
Zacarías . . . . . 636  
Malaquías . . . . . 642

# GÉNESIS

## (Naanearü ügüchiga)

**Guxüma ga yema Tupana ngoxëëxüchiga**

**1** <sup>1-2</sup>Noxriarü ügügu rü Tupana nanaxü i guxüma i daxüwa ngëxmaxü rü ñaa naane. Natürü ñaa naane ga noxri rü taxüta aixcüma mea inanu rü dexátüüwa nayexma rü naxëanemare. Rü nüma ga Tupanaãxë rü naétügu nachüxü. <sup>3</sup>Rü yexguma ga Tupana rü ñanagürü: —iNangexmax i ngóonexü! —ñanagürü. Rü ningóone. <sup>4</sup>Rü Tupana rü yema ngóonexümaxã nataãxë rü yemaçax nüxrwama nanayexmaxëxë ga yema ngóonexü nüxna ga yema éanexü. <sup>5</sup>Rü yema ngóonexü rü ngunexügu nanaxüéga rü ga éanexü rü chütaxügu. Rü yemaacü ningu ga nüxíraxüxü ga ngunexü. <sup>6</sup>Rü yemawena rü ñanagürü ga Tupana: —Name nixí i ngëma dexá i cherena ixíxü rü nachüxnagü nax tama ngëma dexá i ñaxtüwa ngëxmaxüna yaxúxüçax rü ngëmaäcü nax naxächicaanexüçax i norü ngãxüwa —ñanagürü. Rü yemaacü nixí. <sup>7</sup>Rü yemaacü Tupana nanaxüchicaane ga yexguma yaxügachixëëxüga ga yema cherena nüxna ga yema dexá ga ñaa naanewa yexmaxü. Rü daxüwa nayexma

ga caixanexü rü natüüwa ga dexá. <sup>8</sup>Rü Tupana rü naanetüwemaxã nanaxu ga yema daxüwa yexmaxü. Rü yemaacü ningu ga norü taxre ga ngunexü. <sup>9</sup>Rü yexguma ga Tupana rü ñanagürü: —iÑaa dexá i waixümüétüwa ngëxmaxü rü wüxiwa naxü nax ngëmaäcü nangóxüçax i paanexü! —ñanagürü. Rü yemaacü nixí. <sup>10</sup>Rü yema paanexü rü waixümügu nanaxüéga ga Tupana. Rü yema dexá ga wüxiwa üxüchiüxü rü mármamaxã nanaxu. Rü Tupana nüxü nadau ga nax namexü ga guxüma ga yema. <sup>11</sup>Rü ñanagürü: —iNaxtügü i waixümüwa i naguxüraüxü i nanetügü rü natüanegü i äxchiréxü rü naigü i oóxü! —ñanagürü. Rü yemaacü nixí ga nangóxü. <sup>12</sup>Rü yexguma yema waixümüwa narüxügü ga naguxüraüxü rü nanetügü rü natüanegü ga äxchiréxü rü naigü ga mexü nax nangóxü i norü o. Rü Tupana nüxü nadau ga nax namexü ga guxüma ga yema nangoxëëxü. <sup>13</sup>Rü yemaacü ningu ga norü tomaepüx ga ngunexü. <sup>14-15</sup>Rü yexguma ga Tupana rü ñanagürü: —iNangexmax i omügü i daxüwa nax naanexü nangóonexëëxüçax rü nax nangemaxüçax i ngunexü rü chütaxü, rü ngëmaäcü nüxü icuáxüçax i

wüichigü i ngunexü rü taunecü rü mucü! —ñanagürü. Rü yemaacü nixí.

<sup>16</sup>Rü yemaacü nanaxü ga yema taxre ga ngóonexēeruxü ga üaxcü rü tauemacü, rü ngēma rütamaexü nax ngunecü inabáxixüçax rü ngēma rüxíramaexü nax chütacü inabáxixüçax. Rü nanaxü ta ga woramacurigü. <sup>17-18</sup>Rü daxüwa nanayexmagüxēxē nax ñaa naanegu nabáixgüxüçax i ngunecü rü chütacü. Rü yemaacü yema éanexüna nayaxügachixēxē ga ngóonexü. Rü Tupana nüxü nadau ga nax namexü ga guxüma ga yema. <sup>19</sup>Rü yemaacü ningu ga norü ägümücü ga ngunexü. <sup>20</sup>Rü ñuxüchi Tupana rü ñanagürü: —iDexáwa nangó rü yamu i naguxüraüxü i choxnigü rü naguxüraüxü i taxacü i to i dexáwa maxēxü! iRü ngēxgumarüxü ta nangó i naguxüraüxü i werigü i ñaa naaneétigu ixüüxü! —ñanagürü. Rü yemaacü nixí.

<sup>21</sup>Rü yexgumarüxü ta Tupana nanaxü ga naexügü i taxüchixü i márwa maxēxü. Rü nanaxü ta ga naguxüraüxü ga choxnigü i dexáwa maxēxü, rü naguxüraüxü ga werigü i äpexátüxü. Rü Tupana nüxü nadau ga nax namexü ga guxüma ga yema naxüxü. <sup>22</sup>Rü mexü ga ore namaxá naxuegu ga yema naxüxü, rü ñanagürü: —iPexáxacügü rü pimu rü penapagüxēxē i taxtügü rü már! iRü pema i werigü, rü penapaxēxē i ñaa naane! —ñanagürü.

<sup>23</sup>Rü yemaacü ningu ga norü wüiximēxpüx ga ngunexü. <sup>24</sup>Rü yexguma ga Tupana rü ñanagürü: —iNangexmāx i naanewa i naguxüraüxü i naexügü i naxüna ixígüxü, rü naexügü i naixnecüwa maxēxü, rü naexügü i waixümüanegu nügü itügüxü! —ñanagürü. Rü yemaacü nixí. <sup>25</sup>Rü

yemaacü Tupana nanaxü ga naguxüraüxü ga naexügü ga naixnecücüāx ga idüraexü, rü naexügü i naxünaügü ixígüxü, rü naexügü i waixümüanegu nügü itügüxü. Rü nüxü nadau ga nax namexü ga guxüma ga yema. <sup>26</sup>Rü yexguma ga Tupana rü nügümaxá ñanagürü: —iNgíxā yígüraxüācü tanaxü ya yatü! Rü nüma rü taxrüxü tá naāxēxü nacüax nax namaxá inacuáxüçax i guxüma i ngēma dexáwa maxēxü, rü ngēma werigü, rü ngēma naxünaügü, rü ngēma naexügü i naixnecüwa maxēxü —ñanagürü. <sup>27</sup>Rü yemaacü Tupana rü nügüraxüācü nanaxü ga duü, yatüxü rü ngexü. <sup>28</sup>Rü yexguma ga Tupana rü mexü ga ore namaxá naxuegu rü ñanagürü nüxü: —iPixáxacügü rü pimu! iRü penapaxēxē i ñaa naane, rü namaxá ipecuá i choxnigü, rü werigü, rü guxüma i naexügü rü ngēma waixümüanegu ixüxü! —ñanagürü. <sup>29</sup>Rü yemawena rü ñanagürü ta nüxü: —Dücax, marü pexna chanaxá i guxüma i nanetü i äxchirēxü rü guxüma i naigü i äarüxoóxü. Rü guxüma i ngēma rü perü ngōxrxü tá nixí.

<sup>30</sup>Natürü guxüma i ngēma naexügü i naixnecücüāx rü naxünaügü rü ngēma waixümüanegu nügü itügüxü rü ngēma werigü, rü maxē rü nanetü nüxna chaxá nax ngēmamaxá naxāwemügüxüçax —ñanagürü. Rü yemaacü nixí. <sup>31</sup>Rü Tupana nüxü nadau nax namechixü ga guxüma ga yema naxüxü. Rü yemaacü ningu ga norü 6 ga ngunexü.

**2** <sup>1</sup>Rü yemaacü ningu i ngēma daxüwa ngēxmagüxü rü ñaa naane rü guxüma i nawa ngēxmagüxü. <sup>2</sup>Rü yexguma norü 7 ga ngunexüwa



nanguxgu rü Tupana rü marü  
 nayanguxëxë ga guxüma ga yema  
 naxüxü. Rü inarüngü. <sup>3</sup>Rü yexguma ga  
 Tupana rü mexü namaxã naxuegu ga  
 yema 7 ga ngunexü. Rü nüxü nixu nax  
 noxrü yixüxü ga yema ngunexü yerü  
 nagu inarüngü nawa ga guxüma ga  
 yema puracü ga naxüxü. <sup>4</sup>Rü yemaacü  
 nixü ga naxüxü i ngëma daxüwa  
 ngëxmagüxü rü ñaa naane rü guxüma i  
 nawa ngëxmagüxü.

#### Naane ga Edéüwa nayexma ga yatü

<sup>5</sup>Rü yexguma Cori ya Tupana noxri  
 naxüxgu i ngëma daxüwa ngëxmagüxü  
 rü ñaa naane, rü nataxuma ga nanetügü  
 rü taxüta narüxügü ga natüanegü yerü  
 Tupana rü taxüta naaneétügu  
 nanapuxëxë. Rü nataxuma ga duüxü ga  
 nüxna daxüxü ga nanetügü. <sup>6</sup>Natürü ga  
 yema naane rü nanaxaiyaxächü nax  
 guxüwama yawaianaxüçax. <sup>7</sup>Rü  
 yexguma Cori ya Tupana naxüxgu ga  
 guma yatü, rü waixümütëxewa nanaxü.  
 Rü naraügu nacue rü yemaacü maxü  
 nüxna naxã. Rü yexguma namaxüçax ga  
 yatü. <sup>8</sup>Rü yemawena ga Cori ya Tupana  
 rü inanatö ga wüxi ga mexechixü ga  
 naane ga Edéüwa ga üaçcü  
 írügoxüwaama yexmaxü. Rü yemagu  
 nanamu ga guma yatü ga nüma naxüaçcü.  
<sup>9</sup>Rü yemawa nanaxügüxëxë ga  
 naguxüraüxü ga mexechixü ga nanetügü  
 ga chixégaarü oóxü. Rü yema naanearü  
 ngäxügu nanato ga yema nanetü ga  
 maxü nawa yexmaxü. Rü inanatö ta ga  
 yema nanetü ga nawa nüxü icuáxü i  
 mexü rü chixexü. <sup>10</sup>Rü yema naane ga  
 Edéügu äégaxüwa ne nada ga wüxi ga  
 natü ga yawaimüanexëxü ga yema

naane. Rü yéma Edéüwa nixü ga  
 inaxügüxü ga nax naxägümüçüchacüxü.  
<sup>11</sup>Rü yema wüxi ga nachacüxü rü  
 Pisóügu naxäxéga, rü yema nachacüxü  
 nixü ga yawaimüanexëxü ga Abílaane ga  
 úiru nawa yexmaxü. <sup>12</sup>Rü yema úiru ga  
 yema naanewa yexmaxü rü namexechü.  
 Rü ngëxgumarüxü ta i ngëma naanewa  
 rü nayima ya yima nai ya pumára  
 nagüwa ixixüne. Rü nayima ta ya nuta  
 ya ngaxäerüxü ya ónichegu äégacü. <sup>13</sup>Rü  
 yema to ga nachacüxü rü Guixóügu  
 naxäéga, rü yema natü rü Cús-arü  
 naanegu nipogüchigü. <sup>14</sup>Rü yema norü  
 tomaepüx ga nachacüxü rü Tígrigu  
 naxäéga, rü Achíriaarü naanewaama  
 nada i üaçcü ne üxüwa. Rü yema norü  
 ägümüçü ga nachacüxü rü Eufrátegu  
 naxäéga. <sup>15</sup>Rü yexguma Cori ya Tupana  
 yema naane ga Edéüwa nayexmaxëégu  
 ga guma yatü, rü nanamu nax mea  
 nüxna nadauxüçax ga guxüma ga yema  
 naanewa yexmaxü. <sup>16</sup>Rü nüma ga Cori  
 ya Tupana rü nanaxucüxë rü ñanagürü  
 nüxü: —Marü name i cunangöx i  
 guxüma i ñaa naanewa ngëxmaxü i  
 nanetügiarü o. <sup>17</sup>Natürü ngëma nanetü i  
 cuçax i mexü rü cuçax i chixexü nawa  
 ngëxmaxü, rü taxütáma cunangöx i norü  
 o. Erü ngëxguma tá cunangöxgux rü  
 cumaxã nüxü chixu rü tá cuyu  
 —ñanagürü. <sup>18</sup>Rü yexguma ga Cori ya  
 Tupana rü ñanagürü: —Tama name nax  
 nüxica nangexmaxü ya yatü. Rü  
 ngëmacax tá chanaxü i wüxi i namüçü  
 nax norü ngüxëerüxü i nüxü mexü  
 yixüçax. <sup>19</sup>Rü nüma ga Cori ya Tupana  
 rü waixümütëxewa nanaxü ga  
 naguxüraüxü ga naexügü rü werigü. Rü  
 guma yatüxütawa nanagagü nax nüma

yaxüégaãxüçax. Rü nüma ga guma yatü rü nayaxüéga ga guxüma ga yema naexüğü ga naxünagü ixüğüxü rü yema naexüğü ga idüraexü rü guxüma ga werigü. Rü yema naéga ga namaxã yaxüégaxü rü ngématama nixi i naéga i ñuxma namaxã nüxü icuáxü. <sup>20</sup>Rü yemaacü nüma ga yatü rü nayaxüéga ga guxüma ga yema naexüğü ga naxüna ixüğüxü, rü guxüma ga yema naexüğü ga naixnecüçax, rü guxüma ga yema werigü. Natürü yemataniwa rü nataxuma ga namücü ga guma yatü ga nüxü mexü nax norü ngüxëeruxü yixüxü. <sup>21</sup>Rü yemaçax ga Tupana rü poraäcü nanapexëxë ga guma yatü. Rü yexguma napeyane rü nanayaxu ga wüxi ga nagá, rü wenaxarü nayaxëxëxë ga namachi. <sup>22</sup>Rü guma nagáwa rü Cori ya Tupana rü ngixü naxü ga wüxi ga nge. Rü ñuxüchi guma yatüxütawa ngixü naga. <sup>23</sup>Rü yexguma ngixü nadauxgu ga guma yatü, rü ñanagürü: —Ñaa nge rü chauxchinaxátama rü chomachitama ngixçax iyixi. Rü ngëmacax ngexügu tá ixáéga erü chowa nixi i ngixü yaxixichixëxü —ñanagürü. <sup>24</sup>Rü ngëmacax ya yatü, rü tá nanatüna rü naéna nixügachi nax naxmãxmaxã wüxiwa namaxëxüçax, rü ñoma wüxitama i duüxürüxü yixüğüxüçax i ngëma taxre. <sup>25</sup>Rü nüma ga guma yatü rü ngima ga naxmãx rü nangexchirugü. Natürü ga yema taxre rü tama naxãnee ga woo nax nangexchirugüxü.

**Adáü rü Éba rü tama Tupanaga naxinüe**

**3** <sup>1</sup>Rü natanüwa ga guxüma ga yema naexüğü ga idüraexü ga Cori ya Tupana üxü, rü yema äxtape nixi ga

guxüarü yexera womüxëxü cuáxü. Rü yema nixi ga ngixna caxü ga yema nge, rü ñanagürü ngixü: —čËxna aixcüma yixüxü i Tupana pemaxã nüxü ixuxü nax tama penangóxüçax i norü o i ngëma nanetü i ñaa naanewa ngëxmagüxü? —ñanagürü. <sup>2</sup>Rü ngima ga yema nge rü inangãxü rü ngigürügü: —Ngëmaacüx tanangõx i ngexürüüxümare i nanetüarü o i ñaa naanewa rüxügüxü. <sup>3</sup>Natürü ngëma nanetü i ñaa naanearü ngãxüwa rüxüüarü oxicatama nixi i Tupana toxna chuxuxü nax tanangóxüçax, rü bai i nüxü tingógümarexü. Erü ngëxguma ngëmaacü tanaxüxgu rü tá tayue, ñanagürü toxü —ngigürügü nüxü. <sup>4</sup>Natürü ga nüma ga äxtape rü ngixü nangãxü rü ñanagürü ngixü: —Tama aixcüma nixi i ngëma. Rü taxütáma peyue. <sup>5</sup>Erü Tupana rü meama nüxü nacuax ega penangõxgux i ngëma nanetüarü o rü tá nüxü pecuax i taxacü nixi i mexü, rü taxacü nixi i chixexü, rü Tupanarüxü tátama pixigü —ñanagürü ngixü. <sup>6</sup>Rü yexguma ga yema nge rü nüxü idawenü ga yema nanetüarü o rü ngixü nangüchaü ga nax nangóoxü nax yemaacü cuax ngixü yexmaxüçax. Rü iyacawe ga wüxipüxü ga norü o rü inangõx. Rü ñuxüchi ngitemaxã ingau rü nüma rü ta nanangõx. <sup>7</sup>Rü yexgumatama ningoxnaxetügü rü nüxü nicuaxächitanü ga nax yangexchiruxü. Rü yemaçax igueraátü nangaixcu nax yemamaxã nügü yadüxpëxëgüxüçax. <sup>8</sup>Rü yáuanecü ga yexguma yabuuchigu ga buanecü, rü guma yatü rü yema nge rü Tupanaxü naxinüe nax yema naanegu yaxügüchigüxü. Rü nibuxmü rü naxchaxwa nanetüneçigu nicuxgü.

<sup>9</sup>Naturü nüma ga Cori ya Tupana rü guma yatüçax naca. Rü nüxna naca rü ñanagürü: —¿Ngextá cungexma? —ñanagürü. <sup>10</sup>Rü nüma ga guma yatü rü nanangãxü rü ñanagürü: —Cuxü chaxĩnũ nax ñaa naanegu quixũgũxü, rü chamuũ erũ changexchiru. Rü ngẽmacax ichicux —ñanagürü. <sup>11</sup>Rü yexguma ga Tupana rü nüxna naca rü ñanagürü: —¿Texé cumaxã nüxü tixu nax cungexchiruxü? ¿Ëxna cunangõx i ngẽma nanetüarü o i cuxna chachuxuxü nax tama cunangõxüçax? —ñanagürü. <sup>12</sup>Rü nüma ga guma yatü nanangãxü rü ñanagürü: —Ngẽma nge ga choxna ngĩxü cumucü chomücũxü rü chomaxã ingau i ngẽma nanetüarü o i toxna cuchuxuxü rü choma rü chanangõx —ñanagürü. <sup>13</sup>Rü yexguma ga Cori ya Tupana rü ngĩxna naca ga yema nge rü ñanagürü ngĩxü: —¿Tüxcüü ngẽma cuxü? —ñanagürü. Rü ngĩma rü inangãxü rü ngĩgürügü: —Ngẽma äxtape choxü nawomüxëxë rü ngẽmacax chanangõx —ngĩgürügü. <sup>14</sup>Rü yexguma ga Cori ya Tupana rü ñanagürü nüxü ga yema äxtape: —Ñaa cuxüçagü rü natanüwa i guxüma i naexügü rü tá cuchixe. Rü ñuxmax rü cuxtanecamaxã tá iquixü rü äxtexeanexümaxã tá cuxãwemü ñuxmatáta cuyux. <sup>15</sup>Rü ñuxma rü pemaxã chanaxuegu nax cuma rü ngẽma nge rü pegümaxã perüxuanügũxü. Rü ngëxgumarüxü tá ta i cuxacügü rü ngĩxacügü nügümaxã narüxuanügü. Rü yimá ngĩne rü tá cuxü nipúmüeru rü cuma rü tá cunangõxchinécutü —ñanagürü. <sup>16</sup>Rü yexguma ga Tupana rü yema ngexü ñanagürü: —Tá chanayexeraguxëxë nax

cuxü nangüxü i ngëxguma cuxãxacügux. Rü cuxü nangüãcü tá cuxíraxacü. Naturü taxütáma nüxü curüxo nax cute cuxü ngüchaüxü. Rü nüma rü tá cumaxã inacuax —ñanagürü. <sup>17</sup>Rü yexguma ga Tupana rü Adáxü ñanagürü: —Ngẽma ngĩga nax cuxĩnũxü i ngẽma cuxmax rü ngẽma nax cunangõxü i ngẽma orix i cuxna chachuxuxü nax tama cunangõxüçax, rü ngẽmacax i ñuxma rü cugagu tá chixexüwa nangexma i ñaa naane. Rü poraãcü tá cupuracü nax naxüxüçax i cunetü ñuxmatáta cuyux. <sup>18</sup>Rü ñaa naane rü tá tuxugü rü natüanegümaxãmare narüxü. Rü nanetü i naixnecüçaxarü omamaxãmare tá cungãxü. <sup>19</sup>Rü poraãcü tá cupuracü rü cuxaiya nax cuxü nangexmaxüçax i cuwemü ñuxmatáta cuyux rü ngẽmaãcü wena tá waixümüçax cutáegu, yerü yemawa cuxü chaxü ga noxrix, rü waixümü quixü rü wena táxarü ngẽmaxü quixü —ñanagürü ga Tupana. <sup>20</sup>Rü guma yatü rü Ébazu ngĩxü naxüéga ga yema naxmax. Yerü ngĩma iyixü naé ga guxüma i duüxügü. <sup>21</sup>Rü nüma ga Cori ya Tupana rü naexüçaxmümaxã nayaxüxchiru nax yemamaxã yaxãxchiruxüçax ga guma yatü rü yema nge. <sup>22</sup>Rü ñuxüchi ga Tupana rü nügümaxã ñanagürü: —Ñuxma ya daa yatü rü taxrüütama nixü nax nüxü nacuãxü i mexü rü chixexü. Rü ngẽmacax ngĩxã tayamugachi nax tama nüxü nadáxüçax i ngẽma nanetüarü o i maxëeruxü. Erü ngürüächü tá nüxü nadáuxgu rü tá nanangõx rü guxügutáma namaxëcha —ñanagürü. <sup>23</sup>Rü yemacax nixü ga Cori ya Tupana ga guma yatüxü Edéüwa ínataxüchixü rü

nagu namuaxũ nax nawa napuracũxũcax ga waixũmũ ga noxri nawa naxũãxũ. <sup>24</sup>Rũ yexguma ínataxũchĩãxguwena rü Edéũmaũgu nanamugũ ga ñuxre ga daxũcüãx ga ixãxpeãtũxũ, rü yexma nanaxũ ta ga wũxi ga tara ga iyãuxracũũxũ ga guxũcüwagu yawexemaãchiũxũ nax nũxna nadaugũxũcax ga yema nama ga nanetũ ga maxẽerũũwa nadaxũ.

### Caí rü Abéchiga

**4** <sup>1</sup>Rũ yexguma ga guma yatũ rü naxmaç ga Ébamaxã namaxũ. Rũ ixãxacũ namaxã ga ngĩne ga Caí. Rũ ngĩgürũgũ: —Marũ choxũ nangexma ya chaune ya Cori ya Tupana choxna namucũ —ngĩgürũgũ. <sup>2</sup>Rũ yexgumawena rü wena ixãxacũ namaxã ga Abé ga Caíenexẽ. Rũ guma Abé rü carnéruarũ yaexẽẽwa napuracũ rü Caí rü naanewa napuracũ. <sup>3</sup>Rũ yexguma marũ ñuxre ga taunecũ ngupetũxgu rü wũxi ga ngunexũgu rü Caí rü Tupanacax nayagu ga norũ ãmare ga nanetũarũ o. Rũ yemamaxã Tupanaxũ nicuãxũxũ. <sup>4</sup>Rũ yexgumarũxũ ta ga Abé rü Tupanana nayaxã ga nũxfrãxũxũ ga norũ carnéruxacũ ga rümemaexũ rü yemamaxã Tupanaxũ nayarũcuãxũxũ. Rũ nũma ga Cori ya Tupana rü Abémamaxã rü norũ ãmaremaxã nataãxẽ. <sup>5</sup>Natürũ ga Tupana rü tama Caímaxã rü woo norũ ãmaremaxã nataãxẽ. Rũ yemacax ga Caí rü porãcũxũchima nanu rü nanuchametũ. <sup>6</sup>Rũ yexguma ga Cori ya Tupana rü ñanagürũ nüxũ: —¿Tũxcũũ cunu rü cunuchametũ? <sup>7</sup>Rũ ngẽxguma chi aixcũma mexũ cuxũxgu

rü chi cutaãxẽchametũ. Natürũ ngẽma nax tama mexũ cuxũxũ, rü ngẽma chixexũ rü ínamemare nax cuxũ naporamaexũ. Natürũ ega cuma rü tama naga cuxĩnũgu rü tá nüxũ curiũyexera i ngẽma chixexũ —ñanagürũ. <sup>8</sup>Rũ wũxi ga ngunexũgu rü Caí rü naenexẽ ga Abéna naxu nax naanegu naxĩaneãxũcax. Rũ yexguma marũ naanewa nayexmagũgu, rü Caí rü naenexẽ ga Abéna nayuxu rü nayamaç. <sup>9</sup>Rũ yexguma ga Cori ya Tupana rü Caína naca rü ñanagürũ: —¿Ngecũ nixĩ ya cuenexẽ ya Abé? —ñanagürũ. Rũ Caí nanangãxũ rü ñanagürũ: —Tama nüxũ chacuãx nax ngextã nangexmaxũ. ¿Ëxna cuma nagu curũxĩnũgu rü chaueneearũ dauruxũ chixĩ? —ñanagürũ. <sup>10</sup>Natürũ ga Cori ya Tupana rü ñanagürũ nüxũ: —¿Tũxcũũ cueneexũ quimaç? Erũ yima nagũ ya waixũmũgu bacũ rü ñoma nũmatama ya cuenexẽ choxna cagũxũrũũtama nixĩ i choxna nacagũxũ nax cuxũ ínaxuaxũxũ nax cuxũ chapoxcuxũcax. <sup>11</sup>Rũ ngẽmacax i ñũxma rü marũ cuchixexũgu rü tá ícutãxũchi nawa i ñaa nachica i cueneegũ nagu cubaxẽxũ. <sup>12</sup>Rũ woo tá naanewa cupuracũ, natürũ taxuxũtãma i nanetũ cuxũ nixo. Rũ tá ñaa naanegu cunaxũpetũanemare rü tagutãma curũngũ —ñanagürũ. <sup>13</sup>Rũ yexguma ga Caí rü Cori ya Tupanaxũ nangãxũ rü ñanagürũ: —Nataxũchi i ñaa poxcu i choxna cuxãxũ rü tama yaxna namaxã chaxĩnũ. <sup>14</sup>Ñũxma rü marũ choxũ ícutãxũchi nawa i ñaa nachica rü ngẽmacax tá curũ yãxũguxũchima chanaxũpetũanemare, rü tagutãma icharũngũ. Rũ ngẽmaãcũ

ngexürüüxümare i choxü iyangauxü rü tá choxü nimax —ñanagürü. <sup>15</sup>Natürü nüma ga Cori ya Tupana rü nanangäxü rü ñanagürü: —Ngëxguma chi texé cuxü imaxgu rü 7 expüxcüna tá curü yexera tapoxcu —ñanagürü. Rü yexguma ga Cori ya Tupana rü Caígu nanaxü ga wüxi ga cuaxruxü nax tama tayamáxücax ga guxema nüxü iyangauxe. <sup>16</sup>Rü nixü ga Caí nawa ga yema nachica ga Tupana nawa namaxä idexaxü. Rü Edéüwa inaxüächi rü üaxcü ne üxüwaama naxü ga Nóxanewa. Rü yexma naxächiü.

.....

#### Norü tomaepüx ga nane ga Adáü rü Éba

<sup>25</sup>Rü nüma ga Adáü rü wenaxarü naxmāxmaxā namaxü rü ngīma rü wenaxarü ixāxaciü. Rü guma nane rü Chéxgu nanaxüéga rü ngīgürügü: —Tupana choxna nanamu ya nai ya chaune nachicüxü ga Abé ga Caí yamacü —ngīgürügü. <sup>26</sup>Rü yexguma nayaxgu ga Chéx rü naxāne rü Enóxgu nanaxüéga ga guma nane. Rü yexgumacürüwa inanaxügüe ga duüxügü ga Cori ya Tupanaarü ngüxēēcax ínacagüxü.

.....

#### Adáütaagüchiga

**5** <sup>3</sup>Rü nüma ga Adáü rü nüxü nayexma ga 130 ga taunecü ga yexguma nabuxgu ga nane ga Chéx ga nanaraüxüchicü. <sup>4</sup>Rü yemawena ga Adáü rü 800 ga taunecü namaxü. Rü nüxü nayexma ga naigü ga nanegü rü naxacügü. <sup>5</sup>Rü yemaacü 930 ga taunecüwa nangu nax namaxüxü. Rü

yexgumaepüx ga taunecügu nayu. <sup>6</sup>Rü Chéx rü nüxü nayexma ga 105 ga taunecü ga yexguma nabuxgu ga nane ga Enó. <sup>7</sup>Rü yemawena ga Chéx rü 807 ga taunecü namaxü. Rü nüxü nayexma ga naigü ga nanegü rü naxacügü. <sup>8</sup>Rü yemaacü 912 ga taunecüwa nangu nax namaxüxü. Rü yexgumaepüx ga taunecü nüxü yexmagu nayu. <sup>9</sup>Rü Enó rü nüxü nayexma ga 90 ga taunecü ga yexguma nabuxgu ga nane ga Caináü.

.....

<sup>12</sup>Rü Caináü rü nüxü nayexma ga 70 ga taunecü ga yexguma nabuxgu ga nane ga Mararéx.

.....

<sup>15</sup>Rü Mararéx rü nüxü nayexma ga 65 ga taunecü ga yexguma nabuxgu ga nane ga Yaréx.

.....

<sup>18</sup>Rü Yaréx rü nüxü nayexma ga 162 ga taunecü ga yexguma nabuxgu ga nane ga Enóx.

.....

<sup>21</sup>Rü Enóx rü nüxü nayexma ga 65 ga taunecü ga yexguma nabuxgu ga nane ga Matucharéü. <sup>22</sup>Rü nüma ga Enóx rü guxüguma Tupanaarü ngüchaüäcüma namaxü. Rü Matucharéü buxguwena rü 300 ga taunecü namaxü ga Enóx. Rü nüxü nayexma ga togü ga nanegü rü naxacügü. <sup>23</sup>Rü yemaacü 365 ga taunecüwa nangu nax namaxüxü. <sup>24</sup>Rü yema nax guxüguma Tupanaarü ngüchaüäcüma namaxüxü ga Enóx, rü wüxi ga ngunexügu ngürümare inarütaxu yerü Tupana nayaga. <sup>25</sup>Rü Matucharéü rü nüxü nayexma ga 187 ga taunecü ga yexguma nabuxgu ga nane ga Laméx. <sup>26</sup>Rü yemawena ga

Matucharéũ rü 782 ga taunecü namaxũ.  
Rü nüxú nayexma ga naigü ga nanegü  
rü naxacügü. <sup>27</sup>Rü yemaacü 969 ga  
tauneciwa nangu nax namaxũxü ga  
Matucharéũ. Rü yexgumaepüx ga  
tauneciü nayu. <sup>28</sup>Rü Laméx rü nüxú  
nayexma ga 182 ga taunecü ga  
yexguma nabuxgu ga nane ga Noé.

.....

<sup>32</sup>Rü Noé rü yexguma nüxú  
nayexmagu ga 500 ga taunecü rü nüxú  
nayexma ga tomaepüx ga nanegü ga  
Chéũ rü Cáũ rü Yaféx.

#### Chixexũ naxügü ga duũxügü

**6** <sup>1</sup>Rü yexguma ga duũxügü rü  
inanaxügü ga nax yamuxü ga guxü  
ga naanewa.

.....

<sup>5</sup>Natürü ga Cori ya Tupana rü nüxú  
nadau nax poraäcü chixexũ naxügüxü  
rü chixexüguxicatama naxĩnüexũ. <sup>6</sup>Rü  
yemaçax ga Tupana rü poraäcü  
nangechaũ rü nüxú nangux nax  
naxüáxü ga guma duũ. <sup>7</sup>Rü poraäcü  
nangechaũäcüma ñanagürü: —Tá  
ichayanaxoxëxë i ngëma duũxügü i  
changoxëëxü, rü ngëxgumarüxü tá ta  
ichayanaxoxëxë i ngëma naxünagü, rü  
naexügü, rü ngëma naexügü i  
waixümüanegu nügü itügüxü, rü werigü  
erü choxü nangux nax chanangoxëëxü  
—ñanagürü. <sup>8</sup>Natürü ga Noé rü mexü  
Tupanapexewa naxü rü yemaçax ga  
Tupana rü poraäcü Noémaxã nataãxë.

.....

#### Noéweü

<sup>13</sup>Rü yemaçax ga Tupana rü Noéxü  
ñanagürü: —Ñuxma rü marü tá chanaxü

nax chayanaxoxëëxü i guxüma i  
duũxügü erü nagagu nangexma i taxü i  
máeta i ñaa naanewa. Rü ngëmaçax tá  
chanaguxëxë i ngëma duũxügü wüxigu  
namaxã i guxüma i ñoma i naanewa  
ngëxmaxü. <sup>14</sup>iRü naxü ya wüxi ya  
wapuru nawa ya nai ya ägüne! iRü  
yaxüarü ucapuãx i naxmachiãgüwa! iRü  
oxwümaxã nawa i nacuchitagü i  
aixepewa rü düxëtiwa nax tama  
yachuruxüçax! <sup>15</sup>Rü ñaa tá nixi i norü ta  
ya yima wapuru: rü 135 métru tá nixi i  
norü maç, rü 22 métruarü ngãxü tá nixi  
i norü taxmachiã, rü 13 métruarü ngãxü  
tá nixi i norü máxchane. <sup>16</sup>iRü  
tomaepüxgu tá cunaxünagüchixü! iRü  
guxücüwawa i naáxüarü ngaicamána tá  
cunaxü i norü beütánaacügü! iRü  
wüxicüwawa tá cunaxü i naãx! <sup>17</sup>Erü  
núma tá chanamu ya taxüchicü ya mucü  
guxüwama inanguanexüçax rü  
nayuxüçax i guxüma i taxacü i  
maxüáxü i guxü i naanewa. Rü  
guxütáma nayue. <sup>18</sup>Natürü cumaxã  
ichaxuneta rü yima wapuruwa tá cuxü  
chamaxëxë tümamaxã ya cuxmaç rü  
cunegü rü cuneãxgü. <sup>19</sup>Rü  
ngëxgumarüxü tá ta wapurugu  
cuyamuü i taxrechigü i naguxüraũxü i  
naexügü i ñoma i naanewa  
ngëxmagüxü, rü wüxi i yatüxü rü wüxi i  
ngexü nax cuxrüxü namaxëxüçax. <sup>20</sup>Rü  
ngëmaäcü tá wapurugu nichoü i  
taxrechigü i naguxüraũxü i naexügü, rü  
naxünagü, rü werigü, rü ngëma  
naxtanecamaxã waixümügu itügüxü nax  
ngëmaäcü namaxëxüçax. <sup>21</sup>iRü  
ñuxmachi nanutaquexë i naguxüraũxü  
i nawemü rü namaxã nanguxü nax  
cuma rü guxüma i ngëma naexügü rü

ngēmamaxã pexãwemüxüçax!  
—ñanagürü. <sup>22</sup>Rü nüma ga Noé rü  
nayanguxëxë ga guxüma ga yema  
Tupana namaxã nüxü ixuxü.  
.....

### Mucü ga taxüchicü

**7** <sup>6</sup>Rü yexguma inanguxgu ga ñaa  
naane namaxã ga guma mucü ga  
taxüchicü, rü nüma ga Noé rü nüxü  
nayexma ga 600 ga norü taunecü. <sup>7</sup>Rü  
Noé rü wüxigu nanegümaxã rü  
naxmaxmaxã rü naneãxgümaxã guma  
wapurugu nichoü nax tama dexá nax  
nadaixüçax. <sup>8-9</sup>Rü yexgumarüxü ta  
guma wapurugu nichoü ga yema  
naxünagü ga imexü nax Tupanaxü  
namaxã yacuaxüügüxüçax rü yema  
naexügü ga tama yemawa mexü, rü  
yema werigü, rü yema nextanecamaxã  
nügü itügüxü. Rü taxrechigü nichoü rü  
wüxi ga yatüxü rü wüxi ga ngxü yema  
Tupana Noémaxã nüxü ixuxürüxü. <sup>10</sup>Rü  
marü 7 ga ngunexü nawena ga guma  
wapurugu nax yachoüxü, rü inaxügü ga  
nax inanguxü ga ñaa naane. <sup>11</sup>Rü  
yexguma Noéaxü yanguxgu ga 600 ga  
taunecü rü wüxi ga tauemacü rü 17 ga  
ngunexü, rü yema ngunexügutama nixí  
ga yawáixüchiügüxü ga dexá ga  
mártamawa rü yawãxnaxügüxü ga dexá  
ga daxügüxü i naanewa. <sup>12</sup>Rü 40 ga  
ngunexü rü 40 ga chütaxü napuecha ga  
ñaa naanewa. <sup>13</sup>Rü marü 7 ga ngunexü  
naxüpa nax inanguxü ga ñaa naane rü  
yematama ngunexüga nixí ga Noé ga  
yaxüexü nagu ga guma wapuru  
tümamaxã ga naxmax rü namaxã ga  
guma tomaepüx ga nanegü ga Chéü rü  
Cáü rü Yafé rü tümamaxã ga guxema

tomaepüx ga naneãxgü. <sup>14</sup>Rü yexguma  
nagu yachoügu ga guma wapuru, rü  
nichoü ta ga naguxüraüxü ga naexügü  
ga naixnecücüãx, rü naexügü i naxüna  
ixügüxü, rü naguxüraüxü ga naexügü ga  
waixümüanegu nügü itügüxü rü  
naguxüraüxü ga werigü. <sup>15</sup>Rü guxüma  
ga yema naexügü rü wüxigu Noémaxã  
guma wapurugu nichoü. Rü taxrechigü  
nichoü ga yema naguxüraüxü ga  
naexügü rü werigü. <sup>16</sup>Rü nawüxiraxüxü  
ga naexügüwa rü nichoü ga taxrechigü  
rü wüxi ga yatüxü rü wüxi ga ngxü,  
yerü yemaacü nixí ga Tupana ga  
Noémaxã nüxü yaxuxü. Rü yemawena  
rü nüma ga Cori ya Tupana rü  
nanawãxta ga ñax. <sup>17</sup>Rü 40 ga ngunexü  
nixí ga napuxü. Rü narübai ga dexá rü  
yexguma ga guma wapuru rü  
inayangüãchi. <sup>18</sup>Rü yema nax yexeraãcü  
nabaichigüxü ga dexá rü guma wapuru  
rü ningünagüchigü. <sup>19</sup>Rü poraãcü  
narümaxüchi ga dexá rü yemacax ga  
guma maxpünegü rü woo  
máchanexüchigüne rü inayi. <sup>20</sup>Rü  
yexguma marü yabaixüxgu ga  
guxünema ga maxpünegü, rü naétü 7 ga  
métru nabainagü. <sup>21</sup>Rü yemaacü nayue  
ga guxüma ga duüxügü ga ñoma ga  
naanewa maxëxü. Rü yexgumarüxü ta  
nayue ga werigü, rü naxünagü, rü  
naexügü ga naixnecücüãx, rü yema  
nextanecamaxã nügü itügüxü. <sup>22</sup>Rü  
yemaacü nayue ga guxüma ga taxacü ga  
dauxchitawa yexmagüxü rü maxüáxü rü  
ingüãcüxü. <sup>23</sup>Rü Noé rü guxüma ga  
guma wapuruwa yexmagüxüicatama  
namaxë. Natürü guxüma ga yema togü  
ga tama wapuruwa yexmagüxü rü  
nayue ga duüxügü, rü naexügü, rü

naxũnagü, rü werigü, rü naexũgü ga  
naxtanecamaxã waixümüanegu ixĩxũ.  
24Rü 150 ga ngunexũ rü guxũwama  
inangu ga naane.

### Inayacuax ga mucü rü ínixe

**8** 1Natürü ga Tupana rü tama Noéxũ  
inayarüngüma, rü tama nüxũ  
inayarüngüma ga guxũma ga yema  
naexũgü ga wüxigu Noémaxã  
wapuruwa yexmagüxũ. Rü yemaçax ga  
Tupana rü nayabuanexẽ, rü yema  
dexá rü inanaxügü ga nax íyaxexũ. 2Rü  
narüwãxtaxũgü ga dexá ga mártamawa  
yagoxũchiügüxũ rü dexá ga daxüwa  
iwãxnaxũgüxũ rü ínayachaxãchi ga nax  
napuxũ. 3-4Rü yexguma ga yema dexá  
rü ínixeçigü. Rü 150 ga  
ngunexũguwena rü marü poraãcũtura  
ínixeçigü ga dexá. Rü meama norü 7  
ga tauemaciãrü 17 arü ngunexũgu rü  
guma wapuru rü maçpüne ga Araráxwa  
nayaxũx rü yexma ínixeçũ. 5Rü  
ínixeçigü ga dexá rü 3 ga  
tauemaciãguwena rü nangox ga  
maçpünetapexegü. 6Rü 40 ga  
ngunexũguwena rü Noé nayawãxna ga  
wüxi ga norü íãx ga guma wapuru. 7Rü  
ínanamuxũchi ga wüxi ga ngurucu,  
natürü yema ngurucu rü nu ne  
nanañamare yerü taũta nipaane. 8Rü  
yemawena ga Noé rü wüxi ga  
muxtucuxũ ínámuxũchi nax nüxũ  
nacuáxũcãx rü ngoxi marü yapaane.  
9Natürü ga guxema muxtucu rü  
wenaxarü wapuruçax tatáegu yerü  
taxuguma tayarüwãxéga, yerü taũtama  
aixcũma ínixeçechi ga dexá. Rü  
yemaçax ga Noé rü tümacaç  
ínaxuxuchimeçẽ rü wenaxarü wapuru

tüxũ nimucuchi. 10Rü to ga 7 ga  
ngunexũ ínánanguxẽxẽ, rü yemawena  
rü wenaxarü muxtucuxũ ínámuxũchi.  
11Rü yexguma marü nachũtachaũgu rü  
ítangu ga guxema muxtucu. Rü  
tümápaguegu wüxi ga orĩbuchacũxü  
yéma ne tange. Rü yemawa nüxũ  
nacuax ga Noé ga marü nax  
yapaaneçigüxũ. 12Rü wenaxarü 7 ga  
ngunexũ ínánanguxẽxẽ rü yemawena rü  
wenaxarü tüxũ ínámuxũchi ga guxema  
muxtucu. Natürü ga guxema muxtucu  
rü marü tama tatáegu. 13Rü yexguma  
Noéaxũ nayexmagu ga 601 ga norü  
taunecü, rü marü nipaane. Rü 29 ga  
ngunexũ ngupetũxguwena rü Noé  
ínánangegü ga guma wapuru nax yéma  
ínadaxuchixũcãx. Rü nüxũ nadau ga  
marü nax yapaanexũ. 14Rü norü taxre  
ga tauemaciãrü 27 arü ngunexũgu rü  
marü aixcũma nipaane. 15-16Rü  
yexguma ga Tupana rü Noéxũ  
ñanagürü: —Íñaxüe ya yima wapuruwa  
tümamaxã ya cuxmaç rü cunegü rü  
cuneãxgü! 17iRü ngẽxgumarixũ ta i  
guxũma i naexũgü, rü naxũnagü, rü  
werigü, rü ngẽma naxtanecamaxã  
waixümügu ixĩxũ i cumaxã  
ngẽxmagüxũ, rü ínamuũ nax guxũwama  
naxĩxũcãx rü ngẽmaãcü nügü nax  
yamuxẽxũcãx rü napaxẽgüaxũcãx i  
naane! —ñanagürü. 18Rü yexguma ga  
Noé rü naxmaç rü nanegü rü naneãxgü  
rü ínachoxũ nawa ga guma wapuru.  
19Rü yexgumarixũ ta ínachoũ ga  
guxũma ga naxũnagü, rü naexũgü ga  
naixnecücüãx, rü werigü, rü guxũma ga  
yema naxtanecamaxã ixĩxũ. 20Rü  
yemawena ga Noé rü Tupanacaç nanaxü  
ga wüxi ga ãmarearü guchicaxũ. Rü



nayayaxu ga ñuxre ga yema naxũnagü rü werigü ga mexũ nax namaxã nüxũ yacuaxũũũcax. Rü Cori ya Tupanacax nanadai rü yema ãmarearü guchicawa ñnanagu. <sup>21</sup>Rü yexguma Cori ya Tupanaxũ napaxgu ga yema naema rü nüma rü namaxã nataãxë. Rü ñnanagürü: —Tagutãma wena chixexũ namaxã chaxuegu i ñaa naane nagagu i ngẽma duũxũgü woo yexguma noxritama chanangoxëëgu i ngẽma duũxũgü rü chixexũguxicatama narüxinüe. Rü ngëxgumarüxũ ta tagutãma wena chanadai i guxũma i naexũgü i ngẽma ñuxma namaxã chaxüxürüxũ. <sup>22</sup>Rü ñuxma i ñaa naane nangexmaxũ rü tagutãma inarüxo nax natoegüxũ i duũxũgü rü yaxoxũ i nanetügü. Rü tá nangexma i naianexũ rü gáuanexũ, rü tá nayima ya mucü rü taunecü, rü ngunexũ rü chütaxũ —ñnanagürü.

**Tupana rü Noémaxã nanaxuegu  
nax tagutãma wena mucũmaxã  
napoxcueãxũ i duũxũgü**

**9** <sup>1</sup>Rü Tupana rü ñaa mexũ ga dexa Noémaxã rü nanegũmaxã naxuegu, rü ñnanagürü: —iPimu rü penapaxëxë i ñaa naane! <sup>2</sup>Rü guxũma i naexũgü i ñoma i naanewa ngëxmagüxũ rü tá pexũ namuũe. Rü pexmëxwa chanangexmagüxëxë i guxũma i ngẽma ixüxũ, rü ngẽma waixümügu ixixũ, rü ngẽma márwa maxëxũ. <sup>3</sup>Rü guxũma i naexũgü i ñaa naanewa ngëxmagüxũ rü nanetügü rü name nax penangóxũ. Erü choma rü marü pexna chanaxuaxũ i ngẽma. <sup>4</sup>iNatürü taxütãma penangõx i ngẽma namachi i ägüxũ! Erü yima nagüwa nixi i

nangexmaxũ i maxũ. <sup>5-6</sup>Rü tá nüxna chaca i ngẽma duũxũ i texëxũ imáxũ rü ngẽma naexũ i wüxixëxũ imáxũ. Rü wüxichigü i duũxũ rü tá nüxna chaca naxcax i tümaarü maxũ ya namüci. Rü ngëxguma texë wüxi ya duëxëxũ imaxgu, rü nüma rü tá to i duũxũ nayamax erü tüxũ nimax ya yixema Tupana nügüraxũãcü tüxũ úxe.

<sup>7</sup>Natürü i pemax irü pimuxacü rü penapaxëxë i ñaa naane namaxã i pexacügü rü petaagü! —ñnanagürü. <sup>8</sup>Rü yexguma ga Tupana rü Noéxũ rü nanegüxũ ñnanagürü: <sup>9-11</sup>—Dücax, choma rü pemaxã rü petaagũmaxã chanaxuegu, rü guxũma i ngẽma werigü rü naxũnagü rü naexũgü i pemaxã yima wapuruwa íchoũxũmaxã chanaxuegu rü tagutãma wena mucũmaxã chanadai i guxũma i taxacü i ñaa naanewa maxëxũ. Rü ngẽmacax tagutãma wena nangexma ya wüxi ya mucü ya taxüchicü ya nadaicü i guxũma i taxacü i ñoma i naanewa maxëxũ. Rü ngẽma chorü uneta rü tagutãma naxüchicüxü. <sup>12</sup>Rü ñaa tá nixi i norü cuaxruxũ i ngẽma chorü uneta i guxũgutãma ngëxmaechaxũ i pemaxã rü guxũma i naexũgũmaxã chaxueguxũ. <sup>13</sup>Rü dücax, rü caixanexüwa tá chanangoxëxë ya yima chorü chirapa nax yimawa nüxũ pecuáxũcax nax aixcũma yixixũ i ngẽma pemaxã rü guxũma i ñoma i naanewa maxëxũmaxã chaxueguxũ. <sup>14</sup>Rü ngëxguma daxüwa chanangoxëëgu i caixanexũ, rü yima chirapa rü ngẽma tá nangox. <sup>15</sup>Rü ngëxguma tá nüxna chacuaxãchi ga yema pemaxã rü guxũma i naexũgũmaxã chaxueguxũ nax tagutãma wena nangexma ya wüxi ya mucü ya taxüchicü ya pexũ daicü —ñnanagürü.

.....

**Torre ga máchanexüchine ga  
Babéwa naxügüne**

**11** <sup>1</sup>Rü yexguma ga guxüma ga duüxügü rü wüxitama ga nagawa nidexagü. <sup>2</sup>Rü ínachoxü nawa ga yema naane ga üaxcü ne üxüwaama yexmaxü. Rü nawa nangugü ga wüxi ga nachica ga metachinüxü ga Chináxanewa yexmaxü. Rü yexma naxächüügü. <sup>3-4</sup>Rü wüxi ga ngunexügu rü nügümaxã nidexagü rü ñanagürügü: —iNgixã tanaxü ya wüxi ya ñane rü wüxi i torre i máchanexüchixü i daxüguxü i naanewa ngxü! Rü ngëmaäcü tá nata i tachiga rü wüxiwa tangexmagü rü taxütáma yigüna tixígachi —ñanagürügü. Rü yemaçax nutachicüxü mucüma ga ladríyu nanaxügü rü ñuxüchi ínanagu. Rü ceméütucharachicüxü rü oxwüchara nixí i norü ladríyuarü ñaxcuruxü. Rü yemaacü ladríyumaxã nanaxügü ga yema torre ga daxüguxü ga naanewa nguxchaxüxü. <sup>5</sup>Natürü nüma ga Cori ya Tupana rü ínarüxí nax íyadauäxüçax ga guma ñane rü yema torre ga duüxügü íxügüxü. <sup>6</sup>Rü nügüäëwa ñanagürü: —Ñaa duüxügü rü wüxiwatama nangexmagü rü wüxitama i nagawa nidexagü. Rü ngëmaçax nixí i naxügüäxü i ñaa puracü. Rü ñuxma rü nataxuma i taxacü i tá íyachaxächigüxëxü nax nüxü naxoexüçax i ngëma. <sup>7</sup>iRü ngixã ítarüxígü nax naguxüraüxü i nagawa yadexagüxëchigüxüçax nax tama nügüga nacuxgüxüçax i ngëma duüxügü! —ñanagürü. <sup>8</sup>Rü yemaacü nixí ga Cori ya Tupana ga guxü ga

naanegu nawooneäxü ga yema duüxügü. Rü yemaacü nüxü narüxoe ga nax naxügüäxü ga guma ñane. <sup>9</sup>Rü guma ñane rü Babégu naxäéga yerü yema nachicawa nixí ga Cori ya Tupana nangoxëxü ga muxüma ga toraxüxü ga naga nax to ga nagawachigü yadexagüxü ga ñoma ga naanecüäx ga duüxügü. Rü yemaacü guxü ga naanegu Tupana nanawoone.

**Chéütaagüchiga**

<sup>10</sup>Rü ñaagü nixí ga nataagü ga Chéü ga Noé nane. Rü taxre ga taunecü nawena ga guma mucü ga taxüchicü ga yexguma Chéü nüxü yexmagu ga 100 ga taunecü, rü nabu ga nane ga Arfacháx. <sup>11</sup>Rü yemawena ga Chéü rü 500 ga taunecü namaxü rü nüxü nayexma ga togü ga nanegü rü naxacügü ga ingexü. <sup>12</sup>Rü Arfacháx rü nüxü nayexma ga 35 ga taunecü ga yexguma nabuxgu ga nane ga Chéla.

.....

<sup>14</sup>Rü Chéla rü nüxü nayexma ga 30 ga taunecü ga yexguma nabuxgu ga nane ga Ebéx.

.....

<sup>16</sup>Rü Ebéx rü nüxü nayexma ga 34 ga taunecü ga yexguma nabuxgu ga nane ga Peréx.

.....

<sup>18</sup>Rü Peréx rü nüxü nayexma ga 30 ga taunecü ga yexguma nabuxgu ga nane ga Réu.

.....

<sup>20</sup>Rü Réu rü nüxü nayexma ga 32 ga taunecü ga yexguma nabuxgu ga nane ga Cherúx.

.....

<sup>22</sup>Rü Cherúx rü nüxúú nayexma ga 30 ga taunecü ga yexguma nabuxgu ga nane ga Nacóx.

.....

<sup>24</sup>Rü Nacóx rü nüxúú nayexma ga 29 ga taunecü ga yexguma nabuxgu ga nane ga Taréx.

.....

<sup>26</sup>Rü Taréx rü nüxúú nayexma ga 70 ga taunecü ga yexguma nabuxgu ga nane ga Abráú. Rü gumawena nabue ga nanegü ga Nacóx rü Aráú.

### Taréxtaagü

<sup>27</sup>Rü ñaa nixí ga nataagü ga Taréx. Rü nüma ga Taréx rü nüxúú nayexma ga tomaepüx ga nanegü. Rü Abráú rü Nacóx rü Aráú nixí. Rü nüma ga Aráú rü Loxnatü nixí. <sup>28</sup>Rü guma Aráú rü ñane ga Ur ga Cadéaanewa yexmanegu nayu. Rü nanatüxüpa nayu nagutama ga guma ñane ga nagu nabuxüne. <sup>29</sup>Rü Abráú rü Saraímaxá naxáxmáx rü Nacóx ga Mílcamaxá. Rü ngíma ga Mílca rü Aráúacü ga Íscaeyax iyixí. <sup>30</sup>Natürü ga Saraí rü taguma ixáxacü. <sup>31</sup>Rü Taréx rü ñane ga Urwa ínaxüxü ga Cadéaanewa nax Canaáúanewa naxüxüçax. Rü yéma nanaga ga nane ga Abráú rü nataxa ga Lox rü naneãx ga Saraí. Rü yexguma guma ñane ga Aráúwa nangugügu rü yexma naxächüügü. <sup>32</sup>Rü guma íanegu nixí ga nayuxü ga Taréx ga yexguma 205 ga taunecü nüxúú yexmagu.

### Tupana rü Abráúçax naca

**12** <sup>1</sup>Rü wüxi ga ngunexügu ga Cori ya Tupana rü Abráúxüú ñanagürü: —Ínaxüxü nawa i ngéma curü naane, rü ngéma nawogü i

cutanüxügü! iRü ngéma natax ya cunatüpata nax ngéma naane i choma tá cuxü chawéxüwa cuxüxüçax! <sup>2</sup>Erü tá nüxü charüngüxéxé i cutaagü nax yamuxüçax rü wüxi i taxü i nachixüane nawa ngóxüçax. Rü tá mexü cumaxá chaxuegu rü tá cuxü chatachigaxéxé. Rü cugagu tá mexü nayauxgü i togü. <sup>3</sup>Rü mexü namaxá tá chaxuegu i ngéma duüxügü i mexü cumaxá uegugüxü. Rü chixexü tá namaxá chaxuegu i ngéma duüxügü i chixexü cumaxá uegugüxü. Rü cugagu tá nixí i mexü namaxá chaxueguxü i guxüma i duüxügü i ñoma i naanewa ngéxmagüxü —ñanagürü. <sup>4</sup>Rü yemaacü ga nüma ga Abráú rü ínaxüxü ga Aráúwa, yema Cori ya Tupana namaxá nüxü ixuxüãcúma. Rü nüma rü nüxúú nayexma ga 75 ga taunecü ga yexguma yema naanewa ínaxüxüxgu nax Canaáúanewa naxüxüçax. <sup>5-6</sup>Rü ngíxü niga ga naxmáx ga Saraí, rü namágü ga Lox rü ta niga. Rü nayagagü ta ga norü duüxügü ga Aráúwa nüxü yangaüxü. Rü yexgumarüxü ta nayana ga guxüma ga norü yemaxügü. Rü yexguma Canaáúanewa nanguxgu ga Abráú, rü naxüpetü ñüxmata Chiquéü ga ñanewa nangu. Rü yema castáñanecü ga uxtüxü ga Móregu áegaxügu naxüchüü. Rü yexguma rü yema naanegu naxächüügü ga Canaáútanüxügü. <sup>7</sup>Rü yema nachicawa rü Cori ya Tupana rü Abráúçax nangox. Rü ñanagürü nüxü: —Ñaa naane tá nixí i cutaagüna chaxáxü —ñanagürü. Rü yexguma ga Abráú rü yexma Tupanaégagu nanaxü ga wüxi ga ámarearü guchicaxü yerü yéma naxçax nangox. <sup>8</sup>Rü yemawena rü

ñuxūchi yema ínamáxpūxanexūwaama naxū ga Betélarū íanearū éstewaama, rü yexma naxāchiū. Rü yema nachica rü íane ga Betél rü íane ga Áiarū ngāxūwa nayexma. Rü yexma nanaxū ga wūxi ga āmarearū guchica rü yéma nayumūxē rü Tupanaarū ngūxēēcax ínaca. <sup>9</sup>Rü inaxūāchi ga Négueanewa rü inape ga ínachūtāxūwa rü yemaacū ínixū ñuxmata Négueanewa nangu.

### Equítuanewa nayexma ga Abráū

<sup>10</sup>Rü yexgumaūcūxū rü nangebūane ga guxū ga yema naanewa. Rü yemaçax ga Abráū rü Equítuanewa naxū nax yexma yaxāchiūxūcax. Yerū ga noxri ínayexmaxūwa rü poraācū taiya nūxū nangux. <sup>11</sup>Rü yexguma marū Equítuanewa nanguxchaūgu ga Abráū rü naxmāx ga Saraíxū ñanagürü: —Dūcax, choma rü meama nūxū chacuax rü wūxi i nge i mechatetūxūchicū quixī. <sup>12</sup>Rü ngēxguma ngēma Equítuanecūāx cuxū daugūgu rü ñanagürügū tá: “Ñaa nge rü daa yatūmāx iyixī”, ñanagürügū tá. Rü ngēxguma rü tá choxū nimāxgū rü naxmāxū tá cuxū nigagū. <sup>13</sup>Rü ñuxma nax mexū choxū ngupetūxūcax rü tama cugagu choxū yamāxgūxūcax irū namaxā nūxū ixu nax chaueyax nax quixixū! —ñanagürü. <sup>14</sup>Rü yexguma Equítuanewa nanguxgu ga Abráū, rü ga yēmacūāxgū rü Saraíxū nadaugū ga nax namechatetūxūchixū. <sup>15</sup>Rü yexgumarūxū ta ga yema nachixūanearū āēxgacūarū ngūxēēruūgū rü ngīxū nadaugū. Rü norū āēxgacū ga Faraóūmaxā ngīxū nayarūxugū ga nax namechatetūxūchixū ga yema nge. Rü

ñuxūchi naxūtawa ngīxū nagagū. <sup>16</sup>Rü Saraígagu rü meama Abráūxū nayaxu ga guma āēxgacū. Rü Abráūna nanamugūmare ga carnérugū, rü wocagū, rü búrugū, rü caméyugū, rü puracūtanūxū ga yatūxūgū rü ngexūgū. <sup>17</sup>Natürü ga Cori ya Tupana rü Saraígagu taxū ga daaweane naxçax ínanguxēxē ga guma āēxgacū ga Faraóū rü natanūxūgū. <sup>18</sup>Rü yemaçax ga Faraóū rü Abráūcax nangema rü ñanagürü nūxū: —Tūxūcūū tama mea cugū quixu rü tama chomaxā nūxū quixu nax cuxmāx yixixū i ñaa nge? <sup>19</sup>Rü cuma nūxū quixuxgu rü cueyax iyixī. ¿Rü taxacū chi ngupetūxū ega choxmāxū ngīxū chixixēēxgu? Rü ngēma iyixī. ¡Rü ngīxū iga rü ínaxūxū i nua! —ñanagürü. <sup>20</sup>Rü yexguma ga nūma ga Faraóū rü norū duūxūgūxū namu nax Equítuanewa ínamuxūchigūāxūcax ga Abráū wūxigu ngīmaxā ga naxmāx rü guxūma ga norū yemāxūgū.

### Nūgūna nixīgachi ga Abráū rü Lox

**13** <sup>1</sup>Rü yexguma Equítuanewa ínaxūxūxgu ga Abráū naxmāxmaxā rü guxūma ga norū yemāxūmaxā, rü wenaxarū Négueanecax natáegu. Rü namágū ga Lox rü nawe narūxū. <sup>2</sup>Rü Abráū rü poraācū namuarū yemāxūgūāxūchi ga úiru rü diērumū rü muxūma ga naxūnagū. <sup>3</sup>Rü inaxūāchi ga Négueanewa rü ínayapechigūaxūācūma nixū ñuxmata íane ga Betélwa nangu. Rü wenaxarū ūpaacū nagu naxāchiūxū ga nachica ga Betél rü Áiarū ngāxūwa yexmaxūwa nangu. <sup>4</sup>Rü yema nixī ga yema nachica ga ūpaacū āmarearū

guchicaxũ nagu naxũxũ. Rũ yéma nayumũxẽ rũ Cori ya Tupanaarũ ngũxẽcax ínaca. <sup>5</sup>Rũ yexgumarũxũ ta ga Lox rũ nanepũ ga Abráũrũxũ namuarũ yemaxũãxũchi. Rũ nũxũ nayexma ga muxũma ga carnérugũ, rũ wocagũ, rũ norũ duũxũgũ ga naxũtagu pegũxũ. <sup>6</sup>Natũrũ ga yema nachica ga nawa nayexmagũxũ rũ tama ningu ga nabũ naxçax ga yema muxũma ga naxũnagũ. Rũ yemaçax ga Abráũ rũ Lox rũ taxucũrũwama wũxiwa nayexmagũ, yerũ ga naxũna rũ nayangechica. <sup>7</sup>Rũ yemaçax ga Abráũarũ carnéruarũ dauruũgũ rũ Loxarũ carnéruarũ dauruũgũ rũ tama nũgũmaxã nataãxẽgũ, rũ nũgũ nadaiũxũ. Rũ yexgumarũxũ ta yema naanegu naxãchiũgũ ga Canaãũcũãxgũ rũ Ferechéutanũxũgũ. <sup>8</sup>Rũ yemaçax ga Abráũ rũ wũxi ga ngunexũgu Loxmaxã nidexa rũ ñanagũrũ: —Cuma rũ choma rũ yigũtanũxũ tixĩgũ rũ ngẽmacax tama name nax yigũchi ixaixũ. Rũ tama name nax taxũnaarũ dauruũgũ rũ nũgũ nax nadaiechaxũ. <sup>9</sup>Rũ dũcax, rũ ngẽma nixĩ i guxũma i ñaa naane nax cuma nũxũ quidaugũxũcax rũ cunayaxuxũcax i ngẽma cuxũ ngũchaũxũ. Rũ ngẽmaãcũ tá yigũna tixĩgachi. Rũ ngẽxguma cuma nórtewaama cuxũchaũgu, rũ choma rũ tá sũrwaama chaxũ. Natũrũ ngẽxguma cuma sũrwaama cuxũchaũgu, rũ choma rũ tá nórtewaama chaxũ —ñanagũrũ. <sup>10</sup>Rũ yexguma ga Lox rũ natũ ga Yudáũpechinũgu nidau, rũ nũxũ nadau ga nax nabacaxũ ga maxẽgũ ñoma Tupana inatoxũrũxũ, rũ poraãcũ nadexáãxũ ga yema naane ñyxmata guma ñanexacũ ga Choáwa nangu. Rũ

Equítuanerũxũ nixĩ ga nax nameanexũchixũ. (Rũ yemaacũ nixĩ ga noxri taxũta Cori ya Tupana ñaguxgu ga guma ñanegũ ga Chodóma rũ Gomóra.) <sup>11</sup>Rũ yexguma ga Lox rũ nanayaxu ga guxũma ga yema naane ga Yudáũpechinũwa iuxũ. Rũ yemaacũ yema naane ga noxri nawa nayexmagũxũarũ éstewaama naxũ. Rũ yemaacũ nixĩ ga Abráũ rũ Lox ga nũgũna yaxĩgachixũ. <sup>12</sup>Rũ nũma ga Abráũ rũ yexmatama Canaãũgu naxãchiũ, rũ Lox rũ guma ñanegũ ga Yudáũpechinũwa yexmagũnegu nayaxãchiũ ga Chodómaarũ ngaicamána. <sup>13</sup>Rũ guma ñanewa nixĩ ga guxũma ga duũxũgũ ga yachixecũmaxũchixũ rũ poraãcũ chixexũ naxũgũxũ ga Tupanapexewa. <sup>14</sup>Rũ yexguma marũ yaxũgachixgu ga Lox, rũ Cori ya Tupana rũ Abráũmaxã nidexa rũ ñanagũrũ: —iNgẽma ícuchixũwatama rũ mea guxũgu nadawenũ i nórtegu rũ sũrgu rũ éstegu rũ oéstegu! <sup>15</sup>Rũ choma rũ tá cuxna chanaxã i guxũma i ngẽma naane i nũxũ cudauxũ. Rũ guxũgutáma cuxrũ rũ cutaagũarũ tá nixĩ. <sup>16</sup>Rũ choma rũ tá chayamuxẽxẽ i cutaagũ rũ ñoma naxnũcũtexerũxũ tá namuxũchi. Rũ ngẽmaãcũ taxwéxetáma tayaxugũ i ngẽma cutaagũ. <sup>17</sup>iRũ inachi rũ nagu rũxũ i guxũma i norũ max rũ norũ tatachinũ i ñaa naane! Erũ choma rũ tá cuxna chanaxã —ñanagũrũ. <sup>18</sup>Rũ yexguma ga Abráũ rũ inaxũãchi. Rũ Máũrearũ castãñanecũgu nayaxãchiũ ga ñane ga Ebróũarũ ngaicamána. Rũ yexma nanaxũ ga wũxi ga ãmarearũ guchica nax yéma Cori ya Tupanaxũ yacuãxũũxũcax.

**Abráú rü Loxü nayapu**

**14** <sup>1</sup>Rü yexguma Máüregu naxächüügu ga Abráú, rü Aürafé rü ñane ga Chináxarü äëxgacü nixí, rü Arióx rü ñane ga Eracháxarü äëxgacü nixí, rü Quedoraumé rü ñane ga Eláüarü äëxgacü nixí, rü Tidá rü ñane ga Goíarü äëxgacü nixí. <sup>2</sup>Rü guxüma ga yema äëxgacüü rü nügu nadai namaxã ga Berá ga ñane ga Chodómaarü äëxgacü, rü Bícha ga ñane ga Gomóraaru äëxgacü, rü Chiná ga ñane ga Ádmaarü äëxgacü, rü Chemebéx ga ñane ga Chebofúaru äëxgacü, rü norü äëxgacü ga ñane ga Belá ga Choágu áégane.

.....

<sup>11</sup>Rü yema rüporamaegüxü ga äëxgacüü rü nayana ga guxüma ga Chodóma rü Gomóracüäxgüaru nabü rü yemaxüü. Rü yemaacü ínixí. <sup>12</sup>Rü guma Lox ga Abráümagüxü rü ta nigagü wüxigu namaxã ga guxüma ga norü yemaxüü, yerü nüma rü ta Chodómacüäx nixí. <sup>13</sup>Natürü nayexma ga wüxi ga yatü ga íñaxü rü Abráü ga Ebréutanüxü ixícümaxã nüxü nayarüxu ga yema ngupetüxü. Rü nüma ga Abráü rü Máüre ga Amaréu ixícüaru castañanecügu naxächüü ga yexguma. Rü nüma ga Máüre rü Ecúenexë rü Anéxenexë nixí. Rü nümagü rü Abráüétüwa naxüü. <sup>14</sup>Rü yexguma Abráü nüxü cuäxgux ga namágü ga Loxü nax yayauxgüxü, rü nanaxítaquexexë ga norü duüxüü rü naxütawa yaexü. Rü 318 ga yatüü nixí ga guxüwama. Rü yemamaxã inaxüächi nax yema äëxgacüüwe nax nangëgüxüçax. Rü guma ñane ga Dáügu

nüxü nayangau. <sup>15</sup>Rü yemaaru chütaxüü rü Abráü rü norü duüxüümaxã yema äëxgacüü inayabaixgü. Rü nawe ningëxütanü ñuxmata Óbaaru ñane ga Damácuaru nórtewa yexmanewa nangüü. <sup>16</sup>Rü nüxna nanapuxü ga guxüma ga yema yanaxü. Rü yemaacü ga Abráü rü namágü ga Loxü nayapu wüxigu namaxã ga guxüma ga norü yemaxüü. Rü yexgumarüxü ta tüxü napuxü ga guxema ngexegü rü guxema toxguäx ga duëxëü.

**Melquisedé rü mexü Abráümaxã naxuegu**

<sup>17</sup>Rü yexguma Abráü yabuxmüxëügu ga Quedoraumé rü yema togü ga namücügü ga äëxgacüü, rü nüma ga Abráü rü napataçax natáegu. Rü yexguma Chabéaru doxrae ga Äëxgacüaru Doxraegu áégaxüwa nanguxgu ga Abráü rü guma Chodómaarü äëxgacü rü Abráüçax yéma niña nax norü taäxëmaxã nayauxäxüçax. <sup>18</sup>Rü Melquisedé ga ñane ga Charéuarü äëxgacü ga Tupana ya guxüétüwa ngëxmacüaru chacherdóte rü yematama namawa Abráüna nanaxã ga paü rü bínu. <sup>19-20</sup>Rü ñaa oremaxã mexü Abráümaxã naxuegu rü ñanagürü: —iTupana ya guxüétüwa ngëxmacü i daxüguxü i naanearü üruxü rü ñoma i naanearü üruxü rü poraäcü mexü cuwa naxüx! iRü namecümäxüchi ya Tupana ya guxüétüwa ngëxmacü ya curü uanügüxü cuxü rüporamaexëëxcü! —ñanagürü. Rü yexguma ga Abráü rü Melquisedéna nanaxã ga norü diézmo natanüwa ga yema yemaxüü ga wenaxarü napuxüxü. <sup>21</sup>Rü yexguma ga

guma Chodómaarü ãëxgacü rü Abráúxũ ñanagürü: —iChoxna namugü i ngëma chorü duúxügü, natürü ngëma ngëmaxügü rü cuxrúxũ yixí! —ñanagürü. <sup>22-23</sup>Natürü ga Abráú rü nanangãxũ rü ñanagürü: —Choma rü marü Cori ya Tupana ya guxúétüwa ngëxmacü i daxüguxũ i naanearü üruxũ rü ñoma i naanearü ürúumaxã nüxũ chixu rü taxuxútama i taxacü choxrúxũ chayaxu i ngëma cuxrü ixíxũ, rü bai ya wüxi ya tünüta, rü bai i wüxi i chapatutúxü, nax tagutáma choxũ quixuxúçax nax cugagu yixíxũ nax chamuarü ngëmaxúáxũ —ñanagürü. ....

**Tupana rü Abráúmaxã inaxuneta rü tá poraäcü nüxũ narüngüxë**

**15** <sup>1</sup>Rü yemawena rü wüxi ga chütaxügu rü Cori ya Tupana rü Abráúxũ nüxũ nadauxëxë ga wüxi ga ëxüguxũ ga taguma nüxũ nadauxũ rü namaxã nidexa rü ñanagürü nüxũ: —iTaxuçaxma cumuú, Pa Abráú! Erü choma nixí i curü poxüruxũ. Rü ngëma ngüxëë i tá cuxna chaxãxũ rü tá nataxúchi. <sup>2-3</sup>Natürü ga Abráú rü Cori ya Tupanaxũ nangãxũ rü ñanagürü nüxũ: —¿Taxacüwa choxú name i ngëma ngüxëë i chomaxã nüxũ quixuxü? Erü meama nüxũ cucuax nax nataxuxüma ya chaune. Rü ngëmacax i ngëma tá chowena nayaxuxũ i chorü ngëmaxügü rü yimá chorü ngüxëëruxũ ya Erieché ya Damácucüãx tá nixí —ñanagürü. <sup>4</sup>Natürü nüma ga Tupana rü nanangãxũ rü ñanagürü: —Ngëma tá cuwena nayaxuxũ i curü ngëmaxügü rü cunexüchi tá nixí rü tama wüxi i duúxũ

i to i nachixüanecüãx ixíxũ —ñanagürü. <sup>5</sup>Rü ñuxüchi ga Cori ya Tupana rü düxétüwa Abráúxũ naga, rü ñanagürü nüxũ: —iDücac, mea daxügu nadawenü rü yaxugü ya ëxtagü ega cuxú natauxchaxgu nax cuyaxugüxü! Rü ngëxgumarüxũ tá ta nixí nax namuxü i cutaagü —ñanagürü. <sup>6</sup>Rü Abráú rü Cori ya Tupanaaxũ nayaxõ, rü yemaçax nixí ga Tupana ga namaxã naxuegüãx nax aixcümacu yixíxũ. <sup>7</sup>Rü Tupana rü ñanagürü nüxũ: —Choma nixí i Cori ya Tupana chixíxũ. Rü choma nixí ga cuxü íchamuxüchixü ga Urwa ga Cadéucüãxgüarü ñanewa nax cuxna chanaxãxüçax i ñaa naane nax guxügutáma cuxrü yixíxüçax —ñanagürü. <sup>8</sup>Rü yexguma ga Abráú rü Cori ya Tupanaxũ nangãxũ rü ñanagürü: —¿Ñuxäcü tá nüxũ chacuáxü nax aixcüma choxrü tá yixíxü i ñaa naane? —ñanagürü. <sup>9</sup>Rü Tupana nanangãxũ rü ñanagürü: —iNua naga i wüxi i woca rü wüxi i cábra rü wüxi i carnéru i tomaepüxaru taunecüãxchigüxü! iRü nua naga ta i wüxi i muxtucu rü ñuxüchi wüxi i naxacü! —ñanagürü. <sup>10</sup>Rü yexguma ga Abráú rü yéma Tupanapexewa nanagagü ga guxüma ga yema naxünagü. Rü ngãxügu nanadategü rü ñuxüchi nügügu nanangaxgüchipanü. Natürü ga muxtucugü rü tama nanadategü. ....

<sup>13</sup>Rü yexguma ga Cori ya Tupana rü ñanagürü nüxũ: —Cumaxã nüxü chixu rü ngëma cutaagü rü to i nachixüanewa tá namaxë. Rü ngëmacüãxgü rü tá norü puracütanüxü nayaxígüxëxë. Rü ngëmaäcü tá chixri namaxã nachopetü i

400 ya taunecü. <sup>14</sup>Natürü choma rü tá ta chanapoxcu i ngēma nachixüānecüāxgü i chixri cutaagümaxā chopetüxü. Rü ngēmawena rü tá íchananguxüxēxē i cutaagü, rü tá namuarü ngēmāxüāxgü i ngēxguma ngēma ínachoxügu.

.....

<sup>16</sup>Rü ngēxguma 400 ya taunecüguwena rü cutaagü rü tá ñaa naanecax nawoegu. Erü ñuxma rü taüta nawa nangu nax chanapoxcuexü i ngēma duüxügü i Amoréutanüxü i ñuxma ñaa naanegu āchiüügüxü —ñanagürü ga Tupana. <sup>17</sup>Rü yexguma marü nachütagu rü guxüwama naxēanegux, rü ngürüāchi yéma nangox ga wüxi ga buetare ga üxüāxü ga yéma icaixquexü. Rü nangox ta ga wüxi ga üxüema ga iyāuxraxü ga yema naxüna ga rüdategüxüarü ngāxümachatexewa gopetüemāxü. <sup>18</sup>Rü yematama ga ngunexügu rü Abráümaxā inaxuneta rü ñanagürü nüxü: —Choma tá cutaagüna chanaxā i guxüma i ñaa naane i Equítuanearü natüwa inaxügü rü ñuxmatáta ngēma natü i Eufrátewa nangu —ñanagürü.

.....

#### Agá rü ngīne ga Ismaé

**16** <sup>1</sup>Rü Saraí rü taguma nüxü íxāxacü ga guma ngīte ga Abráü. Natürü ngīxü iyexma ga wüxi ga ngīxütaxü ga Equítuanecüāx ga Agágu āégacü. <sup>2-3</sup>Rü yemacax ga Saraí rü Abráüxü ngīgürügü: —Dücax, Pa Chomücux, Cori ya Tupana rü tama nanaxwaxe nax chaxāxacüxü. Rü ngēmācax cumaxā nüxü chixu nax

ngīmaxā cumaxüxü i ngēma chauxütaxü i Agá. Rü bexmana ngēmawa tá choxü nangexma i chaunegü —ngīgürügü. Rü Abráü rü Saraíaxü nanayaxu ga yema namaxā nüxü yaxuxü. Rü yexguma ga Saraí rü yema Equítuanecüāx ga Agácax ica rü Abráüna ngīxü imu naxmaxü. Rü marü 10 ga taunecü Canaáüanewa nayexmagü ga yexguma yema ngupetügu. <sup>4</sup>Rü yexguma ga Abráü rü Agámaxā namaxü rü nüxü íxāxacü. Natürü yexguma ngīgü yacuāxāchigu ga nax naxāxacüxü rü ngīrü chiürapexewa ngīgü fírüta rü tama ngīrü chiüraga íxīnūchaü. <sup>5</sup>Rü yemacax ga Saraí rü Abráüxü ngīgürügü: —Cugagu nixí i Agá i tama chauga naxīnūxü rü ngīgü ínataxü. Chomatama nixí ga cuxna ngīxü chamuxü rü ñuxma nax naxāxacüxü rü choxü irüyexerachaü. Rü Cori ya Tupana tá nixí ya nüxü ixucü rü texégagu yixixü nax ngēma ngupetüxü rü cugagu rüexna chaugagu —ngīgürügü. <sup>6</sup>Rü yexguma ga Abráü rü ngīxü nangāxü rü ñanagürü: —Dücax, cuxmexwa ingexma i ngēma cuxütaxü. iRü cuma cunaxwaxexüācūma ngīmaxā naxü! —ñanagürü. Rü yexguma ga Saraí rü inaxügü ga Agáxü nax yamāxüüxü. Rü yemachaxwa ga Agá rü düxwa iyaxü. <sup>7</sup>Natürü wüxi ga Tupanaarü orearü ngeruxü i daxücüāx rü ínachianexügu ngīxü nangau naxütagu ga guma bairawe ga chianexü ga Chúwa daxü ga namacüwawa yexmacü. <sup>8</sup>Rü ngīxna naca rü ngīxü ñanagürü: —¿Pa Agá i Saraíxütaxüx, ngextá ne cuxü rü ngextá cuxü i ñuxmax? —ñanagürü. Rü ngīma rü inangāxü rü ngīgürügü: —Chixü ngīxna i chorü chiūra i Saraí



—ngīgürügü. <sup>9</sup>Rü yexguma ga yema Tupanaarü orearü ngeruxü i daxücüãx rü ñanagürü ngĩxü: —iCurü chiüracax nataégu rü ngĩga naxĩnü i guxüma i taxacü i cuxü namuxüwa! —ñanagürü. <sup>10</sup>Rü ñanagürü ta ngĩxü: —Rü tá yexera chayamuxëxë i cutaagü rü ngëmaäcü düxwa taxucürüwa texé tayaxugü. <sup>11</sup>Ñuxma rü cuxãxacü rü yatüxü tá nixĩ. Rü Ismaégu tá cunaxüéga, erü Cori ya Tupana rü marü nüxü nacuax i ngëma guxchaxü i cuxü üpetüxü —ñanagürü. ....

<sup>13</sup>Rü yexguma yema daxücüãxmaxã yadexaxguwena rü Agá rü ngīgümaxãtama ngīgürügü: —Tupana ya choxü daucü nixĩ. Rü woo choxü nax nadauxü rü ñuxma rü ta chamaxü —ngīgürügü. ....

<sup>15</sup>Rü yemawena rü Abráúaxü íxíraxacü ga Agá rü Ismaégu nanaxüéga. <sup>16</sup>Rü Abráú nüxü nayexma ga 86 ga taunecü ga yexguma nabuxgu ga Ismaé.

#### Tupana rü Abráúmaxã inaxuneta

**17** <sup>1</sup>Rü yexguma Abráú 99 ga taunecü nüxü yexmagu rü Cori ya Tupana naxcax nangox rü ñanagürü nüxü: —Choma nixĩ ya Tupana ya guxüétüwa ngëxmacü chixixü. Rü chanaxwaxe i mea cumaxü i chopexewa. <sup>2</sup>Choma rü tá cumaxã ichaxüga rü tá chayamuxëxë i cutaagü. Rü tá namuxüchi —ñanagürü. <sup>3-4</sup>Rü yexguma ga Abráú rü waixümüanegu nanangücuchi. Rü yoxni ga Tupana rü nidexachigüama rü ñanagürü: —Ñãäcü tá nixĩ i cumaxã nax ichaxügaxü. Rü cuma tá nixĩ i norü oxĩ quixixü i

muxütama i nachixüanecüãx i duüxügü. <sup>5</sup>Rü marü taxütama Abráú nixĩ i cuéga. Rü ñuxmacürüwa rü tá Abráú nixĩ i cuéga erü muxütama i nachixüanecüãx i duüxügüarü oxĩ tá cuxü chixixëxë. <sup>6</sup>Rü tá chayamuxëxë i cutaagü rü tá namuxüchi. Rü ngëma cutaagü rü muxütama i nachixüanegü nangoxëëgü. Rü ngëma cutaagütanüwa tá nangexma i äëxgacügü ixīgüxü. <sup>7</sup>Rü ngëma ñuxma tá cumaxã rü cutaagümaxã chaxueguxü rü ñaa nixĩ: “Rü choma rü guxügutama curü Tupana chixĩ rü cutaagüarü Tupana chixĩ. <sup>8</sup>Choma rü cuxna rü nüxna tá chanaxã i guxüma i ñaa Canaáüane i ñuxma nawa cumaxüxü. Rü tá guxügutama norü naane nixĩ i cutaagü. Rü choma rü tá norü Tupana chixĩ”, ñanagürü. <sup>9-10</sup>Rü Tupana rü Abráúxü ñanagürü ta: —iNatürü i cumax rü cutaagü rü guxügutama peyanguxëxë i ngëma pemaxã nüxü chixuxü! Rü dücax, chanaxwaxe nax guxãma ya iyatüxe i petanüwa rü ípewíechaxmüüpexechiraü- güxü. <sup>11</sup>iRü pegü ípewíechaxmüüpexechiraügü! Rü ngëmawa tá nangox nax aixcüma peyanguxëxë i ngëma yigümaxã nüxü ixuxü. <sup>12</sup>Rü ñuxmaücüxü rü guxãma ya iyatüxe ya ngexwacax íxíraxë i petanüwa rü 8 i ngunexü tüxü ngëxmagu rü name nixĩ i ítawíechaxmüüpexechiraü. Rü ngëxgumarüütama penaxwaxe i ngëmaäcü penaxü namaxã i guxüma i perü puracütanüxü i to i nachixüanecüãxütawa naxcax petaxegüxü rü woo nanegü. <sup>13</sup>Rü ngëmaäcü ya guxãma i pema rü perü duüxügü, rü chanaxwaxe i pegü

ípewíechaxmüüpechiraüğü. Rü ngēmaācü guxügutáma pexenewa nangox nax aixcüma peyangüēēxü i ngēma yigümaxā nüxü ixuxü. <sup>14</sup>Natürü ya yixema tama tügü íwíechaxmüüpechiraüxe rü name nixí i noxtacüma pegütanüwa tüxü ípetaxüchi erü tama tayangüēē i ngēma yigümaxā ixunetaxü —ñanagürü. <sup>15</sup>Rü Tupana rü Abraáüxü ñanagürü ta: —Rü ngēma cuxmax i Saraí, rü marü taxütáma ngēma nixí i ngíéga. Rü ñuxmaücüxü rü Sára tá nixí i ngíéga. <sup>16</sup>Rü choma rü tá mexü ngímaxā chaxuegu rü tá cuxü íxāxacü. Rü aixcüma ngēmaācü tá ngíxü charüngüxēē. Rü muxüma i nachixüanegüarü noxē tá iyixí. Rü ngēma ngítaagü rü ñanagüarü äēxgacügü tá nixíğü —ñanagürü. <sup>17</sup>Rü yexguma ga Abraáü rü waixümüanegu nanangücuchi. Natürü nüxü nacugüäcüma nügüäēwa ñanagürü: “¿Éxna wüxi ya yatü ya 100 ya taunecü nüxü ngēxmacü rü tá naxāxacüxü nax papá yixixüçax? ¿Rü Sára rü tá naxāxacüxü nax marü 90 ya taunecü ngíxü ngēxmaxü?” ñaxügu narüxñü ga naāxēwa. <sup>18</sup>Rü yexguma ga Abraáü rü Tupanaxü ñanagürü: —Chierü mexü Ismaémaxā cuxueguxgu —ñanagürü. <sup>19</sup>Rü Tupana nanangāxü rü ñanagürü nüxü: —Pa Abraáüx, aixcüma nixí i ngēma cumaxā nüxü chixuxü, rü cuxmax i Sára rü tá cuxü íxāxacü. Rü cuma rü Ichaágu tá cunaxüéga. Rü yimawa tá ningu ga yema cumaxā nüxü chixuxü, rü ngēmaācü tá guxügutáma nüxü charüngüxēē i nataagü. <sup>20</sup>Rü ngēxgumarüxü ta i Ismaéçax rü marü

cuxü chaxñü rü yimá rü tá ta mexü namaxā chaxuegu. Rü tá nüxü charüngüxēē nax yamuxüchixüçax i naxacügü rü nataagü. Rü yimá Ismaé tá nixí i nanatü i 12 i äēxgacügü i poraexü. Rü nataagümaxā tá ichanachixēē i wüxi i taxü i nachixüane. <sup>21</sup>Natürü yema chorü uneta ga cumaxā nüxü chixuxü rü tá ichayadaxēē nawa ya cune ya Ichaá i cuxmax i Sára ngíne ya domarüüxcü ya tauemacügu tá bucü i nai ya taunecügu —ñanagürü. <sup>22</sup>Rü yexguma marü nüxü nachauxgu ga Abraáümaxā nax yadexaxü ga Tupana, rü Abraáüna nixügachi. <sup>23</sup>Rü yematama ngunexügu nixí ga Abraáü ga nane ga Ismaéxü ínawíechaxmüüpechiraüxü. Rü yexgumarüxü ta ínanawíüchaxmüüpechira- ügü ga guxüma ga norü puracütanüxü ga naxütagu buexü rü guxema tümacax nataxexe. Rü yemaacü guxāma ga yatüxe ga nachíüwa yexmagüe ga nüxü puracüexe rü tüxü ínawíüchaxmüüpechiraü yema Tupana namaxā nüxü ixuxürüxü. ....

**Tupana rü Abraáümaxā inaxuneta rü tá nüxü nangexma ya wüxi ya nane**

**18** <sup>1</sup>Rü wüxi ga ngunexügu meama tocuchigu rü Cori ya Tupana rü Abraáüçax nangox ga Máürearü castañanecüwa ga yexguma napataaxwa natoyane ga Abraáü. <sup>2</sup>Rü nadaunagü ga Abraáü rü nüxü nadau ga tomaepüx ga duüxü ga napexegu chigüxü. Rü yexguma ga nüma rü inachi rü paxa naxçax nixü rü napexegu waixümügu nanangücuchi. <sup>3</sup>Rü

ñanagürü: —Pa Corix, cuxũ chacaxũ rü taxú i yaxtacüma íquixũ. <sup>4</sup>Rü ngëxguma cuxũ namexgu rü tá íxraxũ i dexácax íhaca nax pegü piyaxgücutügüxũçax. iRü nua castáñapechitagu paxaáchi perüngügü! <sup>5</sup>Rü ñuxma nax nua chopatawa pengugüxũ, rü tá pexũ chachibüexëxë nax ngëmaácü peporaexüçax i namawa ega ipexíxgu —ñanagürü. Rü nümagü nanangãxũ: —Marü name —ñanagürügü. <sup>6</sup>Rü yexguma ga Abraáũ rü napatagu nangaxi rü naxmãx ga Sáraxũ ñanagürü: —iPaxa, Pa Ngex, rü 20 i quíru i mexechixũ i arína ta nayaxu, rü paũ ta naxü! —ñanagürü. <sup>7</sup>Rü ñuxüchi ga Abraáũ rü wocapúxüwa naña. Rü naxçax nadau ga yema rümemaexũ ga wocaxacü. Rü wüxi ga norü puracütanüxũxũ namu, rü nüma rü paxa nanaxü ga yema ñna. <sup>8</sup>Rü yexgumarüxũ ta ga Abraáũ rü yema duüxügü ga naxütawa ngugüxüna nanaxã ga quésu rü léche. Rü nüma rü ínamemare ga nüxna nax naxãxũ ga taxacü ga nanaxwaxegüxũ ga yexguma castáñatüüwa nachibüeyane. <sup>9</sup>Rü yexguma marü yangugügu ga nax nachibüexũ, rü Abraáũna nacagüe rü ñanagürügü: —¿Ngecü iyixi i cuxmãx i Sára? —ñanagürügü. Rü nüma nanangãxũ: —Ngéa chauchiüwa ingexma —ñanagürü. <sup>10</sup>Rü yexguma ga wüxi ga yema naxütawa ngugüxũ rü ñanagürü: —Nai ya taunecügu rü wena cuxütagu tá chanaxüane, rü ngëxguma i cuxmãx i Sára rü tá marü íxíraxacü —ñanagürü. Rü ngíma ga Sára rü yoxni bexma nüxũ íxínü ga yemaacü nax yadexaxũ, yerü ngíma rü bexma

Abraáũçaxwegu ichi ga íxwxa. <sup>11</sup>Natürü ga nüma ga Abraáũ rü naxmãx ga Sára rü marü nayae. Rü ngíma ga Sára rü marü ngíxna inayarüxo ga nax nachixewexünexũ. <sup>12</sup>Rü yemaçax ga Sára rü tama yaxna namaxã íxínü ga nax nacugüxũ, yerü ñaxügu irüxínü: “¿Ñuxãcü tá ichaxãxacüxũ, erü choma rü chaute rü marü tayaexüchi?” ñaxügu irüxínü ga ngíaxëwa. <sup>13</sup>Natürü nüma ga Cori ya Tupana rü Abraáũxũ ñanagürü: —¿Tüxcüü ngíxũ naxãüchiga i Sára? ¿Ëxna tama iyaxö rü tá nax naxãxacüxũ i woo nax nayaxüchichiréxü? <sup>14</sup>¿Ëxna nangexma i taxacü i Cori ya Tupanaaxũ guxchaxũ nax naxüãxũ? Rü nai ya taunecügu rü aixcüma tá nuxã cuxütagu chanaxüane. Rü ngëxguma i Sára rü tá marü íxíraxacü —ñanagürü. <sup>15</sup>Natürü ga Sára rü yemaxũ naxínügu rü imuũ rü iyaxãxchaũ nax ngíxũ naxãüchigaxũ. Rü yemaçax ngígürügü: —Tama nixi i chacugüchiréxũ —ngígürügü. Natürü nüma ga Cori rü ngíxũ nangãxũ rü ñanagürü: —Ngëmáacüx, nüxũ chacuaxama nax cucugüxũ —ñanagürü ngíxũ.

**Abraáũ rü Tupanana nachogü nax tama napoxcuãxüçax ga Chodóma rü Gomóra**

<sup>16</sup>Rü yexguma ga yema duüxügü ga Abraáũxütawa ngugüxũ, rü inachigü rü inaxíachi ga Chodómawaama nax naxíxũ. Rü Abraáũ rü paxaáchi ínayaxümücü. <sup>17</sup>Rü yexguma ga Cori ya Tupana rü ñaxügu narüxínü: “Name nixi i Abraáũmaxã nüxũ chixu i ngëma tá chaxüxũ. <sup>18</sup>Erü nüma tá nixi i norü oxu i wüxi i nachixüane i taxü rü poraxũ. Rü marü namaxã chanaxuegu

nax nagagu tá nüxũ charüngũxẽẽxũ i guxũtáma i nachixũanegü i ñoma i naanewa ngẽxmagũxũ. <sup>19</sup>Rü chomatama marü chanayaxu nax nanegũmaxã rü nataagũmaxã nüxũ yaxuxũcax i ngẽma chorü mugü nax nũmagü i nataagü naga naxĩnüexũcax rü mexũ naxügũxũcax nax ngẽmaãcü choma chayanguxẽẽxũcax i guxũtama ga yema namaxã nüxũ chixuxũ”, ñaxũgu narüxĩnü ga Tupana. <sup>20</sup>Rü yemacax ga Cori ya Tupana rü Abraáũxũ ñanagürü: —Ngẽma duũxũgü i Chodómacũãx rü Gomóracũãx, rü nüxũ chaxĩnü i nachiga nax nachixexüchixũ rü poraãcü pecádu naxügũxũ. <sup>21</sup>Rü ngẽmacax tá ngẽma chaxũ nax íchayadauxũcax rü aixcũma yixĩ i poraãcü chixexũ naxügũxũ ngẽma chomaxã nüxũ yaxugüexũrũxũ, rü ngẽmaãcü tá nüxũ chacuax —ñanagürü. <sup>22</sup>Rü taxre ga yema duũxũgü rü yoxni inaxĩ nax Chodómawa naxĩxũcax. Natürü ga Abraáũ rü Cori ya Tupanamaxã yexma nayachigüãchitanü. <sup>23</sup>Rü naxcax nixü rü Cori ya Tupanana naca rü ñanagürü: —¿Cunadaixũ tá ta i ngẽma duũxũgü i mea maxẽxũ wüxigu namaxã i ngẽma chixexũ ügũxũ? <sup>24</sup>Rü ngẽxguma chi nangexmagu i 50 i duũxũgü i mea maxẽxũ nawa ya yima ñane ¿rü chi cunadaimaxũ rü taxüchima nüxũ cungechaũxũ i ngẽma ñanecũãx nagagu i ngẽma 50 i duũxũgü i mea maxẽxũ? <sup>25</sup>Chãuxcax rü tama name nax cunadaixũ i ngẽma mea maxẽxũ i duũxũgü wüxigu namaxã i ngẽma chixexũ ügũxũ, ñoma chi guxũtama naxügũxũrũxũ i ngẽma chixexũ. Rü taxucürüwama ngẽma cuxü erü tama ngẽmagu curüxĩnü. Rü cuma nixĩ i

guxãaru maxũmaxã icucuáxũ ¿rü tama ẽxna i ngẽma 50 i mea maxẽxũgagu nüxũ icurüngũmaxũ nax cunadaixũcax rü ya yima ñane? —ñanagürü. <sup>26</sup>Rü yexguma ga Cori ya Tupana rü Abraáũxũ nangãxũ rü ñanagürü: —Ngẽxguma chi yima Chodómaaru ñanewa nüxũ ichayangauxgu i 50 i duũxũgü i mea maxẽxũ, rü ngẽmagagu taxũtáma chanapoxcue i ngẽma ñanecũãx —ñanagürü. <sup>27</sup>Natürü ga Abraáũ rü wenaxarü nüxna nacaama rü ñanagürü nüxũ: —iChoxũ nangechaxũ nax cuxna chicachigüamaxũ! Erü cuma rü Tupana quixĩ rü choma rü wüxi i duũxũmare chixĩ. <sup>28</sup>Natürü ngẽxguma chi tama mea yanguxgu i 50 wa nax nanguxũ i ngẽma duũxũgü i mea maxẽxũ, rü chi 45 icatama i mexũ i duũxũgü ngẽxmagu ¿rü ngẽma nax tama mea 50 wa nanguxũcax rü tá cunapoxcuxũ ya yima ñane? —ñanagürü. Rü Cori ya Tupana nanangãxũ rü ñanagürü: —Ngẽxguma chi 45 i duũxũgü i mea maxẽxũ ngẽma ichayangauxgu, rü taxũtáma chanapoxcu —ñanagürü. <sup>29</sup>Natürü ga Abraáũ rü wenaxarü nüxna nacaama rü ñanagürü: —¿Natürü ngẽxguma chi 40 icatama ngẽxmagu? —ñanagürü. Rü nüma ga Cori rü nanangãxũ rü ñanagürü: —Ngẽma 40 cax rü taxũtáma chanapoxcue —ñanagürü. <sup>30</sup>Natürü ga Abraáũ rü wenaxarü Tupanana nicachigü rü ñanagürü nüxũ: —Cuxũ chacãxũ nax tama chomaxã cunuxũcax naxcax i ngẽma nax yexüürü cuxũ chachixewexũ ¿natürü ngẽxguma chi 30 icatama ngẽxmagu? —ñanagürü. Rü nüma ga Cori ya Tupana nanangãxũ rü

ñanagürü: —Woo 30 i duñxügü i mexü ngëxmagu rü taxütáma chanapoxcu —ñanagürü. <sup>31</sup>Natürü ga Abraáü rü nüxü nicaaxüchigiüama, rü ñanagürü: —Pa Corix, marü changupetüxüchiamá nax cuxü chacaaxü ¿natürü ngëxguma chi 20 icatama i duñxügü i mea maxëxü ngëxmagu? —ñanagürü. Rü nüma ga Cori ya Tupana nanangäxü rü ñanagürü: —Ngëma 20 i mea maxëxügagu rü taxütáma chanapoxcu ya yima ñane —ñanagürü. <sup>32</sup>Natürü ga Abraáü rü wena nüxna nacaama rü ñanagürü: —Pa Corix itaxü i chomaxá cunuxü! Ñuxica wena cuxna chacaxcháü, rü ngëmawena rü marü taxütáma cuxü chachixewe. ¿Rü taxacü chi cuxüxü i ngëxguma 10 icatama i duñxügü i mea maxëxü ngëxmagü? —ñanagürü. Rü nüma ga Cori ya Tupana rü ñanagürü: —Ngëma 10 gagu rü taxütáma chanapoxcu ya yima ñane —ñanagürü. <sup>33</sup>Rü yexguma marü Cori ya Tupana nüxü rüchaxgu ga Abraáümaxá nax yadexaxü rü ínixü. Rü nüma ga Abraáü rü napataçax natáegu.

#### Tupana nayagu ga Chodóma rü Gomóra

**19** <sup>1</sup>Rü yexguma marü nachütachaxügu rü yéma Chodómaarü ñanewa nangugü ga yema taxre ga Tupanaarü oearü ngeruxü i daxüciäx. Rü guma ñanearü iäxwa narüto ga Lox ga ngextá duñxügü íngutaqexexüwa. Rü yexguma yema taxre ga duñxügüxü nadauxgu, rü inachi ga nax nayauxäxüçax. Rü napexegu waixümügu nanangücuchi. <sup>2</sup>Rü ñanagürü nüxü: —Pa Corigüx, rü choma nax perü duñxü chixixü rü pexna chaxu

nax chauchiügu pepegüxü. Rü ngéma tá pegü piyaxgücutügü, rü marü name i moxü paçmama ipexiächi —ñanagürü. Natürü nümagü rü nanangäxü rü ñanagürü: —Tamoxëxüchi, rü nuxá iäxtügumare tá tapegü —ñanagürü. <sup>3</sup>Natürü nüma ga Lox rü nüxü nicaaxüchigiüama, rü yemaçax ga nümagü rü düxwa naga naxínüe nax napatawa naxixüçax. Rü yexguma ipatawa nangugügu, rü Lox rü norü ñna ga mexü namexëxë. Rü paü ga ngearü puxëeruüäxü ta naxü. Rü nümagü ga yema naxütawa ngugüxü rü nachibüe. <sup>4</sup>Rü yexguma taüta yachocuxgu, rü yéma naxi ga guxüma ga Chodómacüäx ga yatügü. Rü ngextüxüxügüwa inaxügü rü ñuxmata iyaxüwa nangu. Rü nüxü ínachoeuächi ga guma Loxpata. <sup>5</sup>Rü aita naxüeäcúma Loxna nacagüe rü ñanagürü: —¿Ngexügü nixi i ngéma yatügü i ngewax nua cupatawa ngugüxü? ¡Rü ínamuxü, erü namaxá tamaxëchaü! —ñanagürü. <sup>6-7</sup>Rü yexguma ga Lox rü ínaxüxü ga namaxá nax yadexaxü natürü meama naxçaxwa nanawäxta ga norü iäx. Rü ñanagürü nüxü: —Pa Chomücügüx itaxü i taxacürü chixexü pexügüxü! <sup>8</sup>Düçax, choma rü choxü íngexma i taxre i chauxacü i taguma yatüxü cuäxcü. Rü ngéma tá pexna ngixü chamugü nax pema penaxwaxexü ngímaxá pexüxüçax. Natürü tama chanaxwaxe nax taxacürü chixexü namaxá pexü i ñaa taxre i yatügü i nüxna chaxuxü nax nua chopatawa nangugüxü —ñanagürü. <sup>9</sup>Rü yexguma ga nümagü rü Loxü nangäxüga rü ñanagürü: —¡Ixügachi i ngéma! ¿Rü

ñuxãcü i cuma nax to i nachixüaneciãx quixixü rü nua toxü cuyamuchaüxü? Rü ñuxma rü ngẽma taxre i nua toxna quinuxuxüarü yexera tá cumaxã taxü —ñanagürügü. Rü yexguma rü Loxna nayuxgü nax iãxgu napogüexüçax. <sup>10</sup>Natürü nümagü ga yema taxre ga daxüciãx ga Loxpatawa ngugüxü rü nachiügu nanayauxcuchigü, rü ñuxüchi nanawãxta ga iãx. <sup>11</sup>Rü nayangexetügüxëxë ga guxüma ga yema duüxügü ga iãxtüwa yexmagüxü, rü yema ingextüxüxüwa inaxügü ñuxmata yema iyaxüwa nangu. Rü yemaaci düxwa nipaemare ga nax iãxcax nadaugüxü. <sup>12</sup>Rü yexguma ga yema taxre ga orearü ngeruxü i daxüciãx rü Loxna nacagüe rü ñanagürügü: —¿Nangemaxü i togü i cutanüxügü i núma daa ñanewa? iRü ngëxguma chi nangexmagu ya cunegü rüexna cuxacügü rüexna cuxãxtegü rü ñnagaxü i nua wüxigu namaxã i guxüma i taxacü i cuxü ngëxmaxü ya daa ñanewa, rü yáxüwa namaxã naxü! <sup>13</sup>Erü tá tayagu ya daa ñane. Erü Cori ya Tupana rü marü tama yaxna namaxã naxinü i ñaa duüxügü i daa ñanewa maxëxü, rü ngëmacax toxü namu nax tayaguxüçax —ñanagürügü. <sup>14</sup>Rü yexguma ga Lox rü naxütawa naxü ga yema naxãxtegüchaü ixigüxü rü ñanagürü nüxü: —iIpechigü rü ípechoxü i nua! Erü Cori ya Tupana rü tá nayagu ya daa ñane —ñanagürü. Natürü ga yema naxãxtegüchaü ixigüxü rü tama aixcüma nayaxögü ga yema namaxã nüxü yaxuxü. <sup>15</sup>Rü yema marü nax yangunechaüxü, rü Loxü napaxagü ga yema taxre ga daxüciãx i orearü ngeruügü. Rü ñanagürügü: —iPaxama,

inachi rü tüxü iga ya cuxmaç rü ngẽma taxre i cuxacügü ega cumáxchaxügu ngëxguma tayaguxgu ya daa ñane! —ñanagürügü. <sup>16</sup>Natürü ga Lox rü nanuxcüãxë, rü yemaçax ga yema taxre ga daxüciãx i orearü ngeruügü rü naxmëx nayayauxãchigü rü namaxã nixü, yerü Cori ya Tupanaaxü nangechaütümüxü. Rü yexgumarüxü ta ga guxema naxmaç rü naxacügü rü tüxü ínamuxü ga guma ñanewa nax tama tayüxüçax. <sup>17</sup>Rü yexguma marü guma ñanearü yáxüwa nayexmagügu, rü wüxi ga yema daxüciãx i orearü ngeruxü rü ñanagürü: —iÍña nax tama peyüexüçax! iRü taxütama cügü íquidau rü taxucaxtáma icuyachiãchi i nua! iRü yéa maçpúneanewa naña ega tama cuyuxchaxügu! —ñanagürü.

.....

<sup>24</sup>Rü yexguma ga Cori ya Tupana rü Chodóma rü Gomóraétügu üxüema ga asúfremaxã äéüxü nayixëxë. <sup>25</sup>Rü yemaaci ínanagu ga guma ñanegü wüxigu namaxã ga guxüma ga duüxügü ga yéa maxëxü rü yema nanetügü ga yéa rüxügüxü. <sup>26</sup>Natürü guxema naxmaç ga Lox ga naweama ne ñaxe, rü tügü ítidau rü yexgumatama yuxcürapütaxü tanacaxichi.

.....

### Ichaáarü buxchiga

**21** <sup>1</sup>Rü nüma ga Cori ya Tupana rü yema ngímaxã nüxü yaxuxüãcü Sárugu narüxinü, rü nayanguxëxë ga yema ngímaxã naxueguxü. <sup>2</sup>Rü yemaaci ga Sára rü ixãxaci nüxü ga Abraáü ga yexguma marü yaxguãx yixixgu. Rü gumatama

tauemacü ga Cori ya Tupana nagu unetacügu nabu. <sup>3</sup>Rü nüma ga Abraáü rü Ichaágu nanaxüéga ga guma nane ga Sárawaücü. <sup>4</sup>Rü yexguma 8 ga ngunexü nüxü yexmagu ga nax naxíraxü, rü Abraáü ínanawíechaxmüüpechiraü yema Tupana namuxürüxü. <sup>5</sup>Rü Abraáü rü nüxü nayexma ga 100 ga taunecü ga yexguma Ichaá íxíraxgu. <sup>6</sup>Rü yexguma ga Sára rü ngíaxéwa ngígürügü: “Tupana choxü nataãxéxé. Rü guxāma ya nüxü цаxgüxe nax chaxāxácüxü rü tá wüxigu chomaxā tataãxégü. <sup>7</sup>¿Texé nagu rüxínüxü ga Abraáüaxü tá nax chaxāxácüxü? Natürü marü nüxü chaxāxácü i ñuxma i woo nax marü nayaxüchixü i nümax”, ñaxügu irüxínü ga ngíaxéwa.

**Agá rü ngíne ga Ismaémaxā  
ítaxüchi ga Abraáüpatawa**

<sup>8</sup>Rü ga õxhana ga Ichaá rü niyachigü, rü nayamaiegü. Rü yema ngunexügu rü wüxi ga taxü ga peta naxü ga Abraáü. <sup>9</sup>Natürü ga Sára rü nüxü idau ga Ichaágu nax yadauxcüraxüxü ga Ismaé ga Abraáü nane ga Agá ga Equítuanecüãxwaücü. <sup>10</sup>Rü yexguma ga Sára rü Abraáümaxā nüxü iyarüxu rü ngígürügü: —iDücax, ínamuxüchi i ngēma taxütaxü nanemaxā! Erü yimá chaune ya Ichaá rü taxucaxma i ngēma taxütaxü nanemaxā nangau i curü ngēmaxügü —ngígürügü. <sup>11</sup>Rü yema dexa rü poraäcü nüxü nangux ga Abraáü, yerü nanechiga nixí ga yema. <sup>12</sup>Natürü ga Tupana rü Abraáümaxā nüxü nixu rü ñanagürü: —iTaxü i cuxoégaãxéxü naxçax ya curü bucü rü ngíçax i ngēma cuxütaxü! iRü naxü i

ngēma Sára cumaxā nüxü ixuxü! Erü cutaagü ga cumaxā chaxueguxü rü Ichaáwa tá nixí i ne naxíxü. <sup>13</sup>Natürü ngēma cuxütaxü ngínewa rü tá ichanachigüxéxé i wüxi i taxü i duüxügütücumü, erü cune nixí —ñanagürü ga Tupana. <sup>14</sup>Rü moxüäcü ga paçmamaxüchi rü Abraáü rü Agána nanaxā ga paü rü dexá ga naxchaxmüügu ibacuchixü. Rü Agáétügu nananugü rü yemaacü ngíne ga Ismaémaxā ngíxü nimu. Rü yéma ngürüanewa ixümare ga chianexü ga Bechébawa. <sup>15</sup>Rü yexguma naguxgu ga dexá rü guma ngíne rü wüxi ga naitüügu inamu. <sup>16</sup>Rü norü yáxüwaxüra iyarüto, yerü tama nüxü idauchaxü ga ngíxütama nax nayuxü. Rü yexguma yéma natõxgu rü guma ngíne rü inanaxügü ga nax naxaxuxü. <sup>17</sup>Natürü ga Tupana rü nüxü naxínü ga guma bucü ga nax naxaxuxü. Rü wüxi ga daxücüãx i orearü ngeruxü rü daxüwa Agána nacagü rü ñanagürü: —¿Taxacü cuxü nangupetü, Pa Agáx? iTaxü i cumuüxü! Erü Tupana rü marü nüxü naxínü i norü axu ya yimá curü bucü i ngēma ínaxáüxüwa. <sup>18</sup>iInachi rü íyadau ya yimá bucü, rü naxmexgu iyauxāchi! Erü choma rü nawa tá ichanachixéxé i wüxi i taxü i nachixüane —ñanagürü. <sup>19</sup>Rü yexguma ga Tupana rü Agáxü nanawex ga wüxi ga puchu. Rü ngíma rü yéma ixü, rü inaxüäcu ga yema ngürü dexāchiü ga naxchaxmüünaxçax. Rü ñuxüchi inaxaxéxé ga Ismaé. <sup>20-21</sup>Rü Tupana rü nüxü narüngüxéxé ga guma bucü. Rü nüma rü niyachigü. Rü chianexü ga Paráügu nanapexütanüane. Rü meama maxgütaexü cuäcü nixí. Rü

yexguma nayaxgu, rü naé rü wüxi ga Equítuanecüãxmaxã inaxüxmax.

.....

### Tupana rü Abraáüarü öxü naxü

**22** <sup>1</sup>Rü yemawena ga Tupana rü Abraáüarü öxü naxü. Rü naégamaxã nüxna naca. Rü nüma ga Abraáü nanangãxü rü ñanagürü: —Daxe chixí, rü nua changexma —ñanagürü. <sup>2</sup>Rü Tupana rü ñanagürü nüxü: —Íyaga ya cune ya Ichaá ya nügümaxã wüxicacü rü poraäcü nüxü cungechaücü! ¡Rü yéa Moríaanewa namaxã naxü! Rü ngëxguma ngéma cunguxgu rü chanaxwaxe i ngëxma chauxcax cuyamax rü cuyagu nagu ya yima maxpúne ya choma tá cumaxã nüxü chaxunetane —ñanagürü. <sup>3</sup>Rü moxüäcü ga paxmaxaxüchi rü Abraáü ínarüda. Rü üxüta nadaü nax yemamaxã Tupanacax yaguaxüçax ga guma nane. Rü ñuxmachi nanamexëxë ga norü búru rü ínayaga ga nane ga Ichaá rü taxre ga norü duüxü. Rü inaxüächi nax yema nachica ga Tupana namaxã ixunetaxüwa naxüxüçax. <sup>4</sup>Rü yexguma marü tomaepüx ga ngunexü iyaxüxgu ga Abraáü, rü yáxügu nüxü nadau ga yema nachica ga nawa naxüxü. <sup>5</sup>Rü yexguma ga Abraáü rü norü duüxügüxü ñanagürü: —iNuxã perücho namaxã i ñaa búru! Rü daa bucü rü choma rü tá yéamaxüra taxí. Rü ngéma tá Tupanaxü tarücuaxüxügü, rü ngémawena rü pexcax tawoegu. <sup>6</sup>Rü Abraáü nanayauxcüta ga üxü ga Tupanacax ámare tá nawa yaguxü rü Ichaáétügu nanaxüinagücüta. Rü ñuxüchi ngixü nayaxu ga cüxchi rü wüxi ga üxü ga naixüne. Rü wüxigu guma

maxpúnewa naxí. <sup>7</sup>Natürü yixcüamaxüra rü Ichaá rü nanatüna naca rü ñanagürü: —Pa Papáx —ñanagürü. Rü Abraáü nanangãxü rü ñanagürü: —¿Taxacü cunaxwaxe, Pa Chaunex? —ñanagürü. Rü Ichaá nanatüxü nangãxü rü ñanagürü: —Dücax, tüxü nangexma i üxü rü tüxü nangexma ya üxü ya naixüne ¿natürü ngexü i ngéma carnéru i tá iguxü? —ñanagürü. <sup>8</sup>Rü nanatü nanangãxü rü ñanagürü: —Pa Chaunex, nüma ya Tupana tá nixí ya nüxü cuácü nax nangexmaxëëãxü i wüxi i carnéruxacü nax naxcax yaguxü —ñanagürü. Rü yemaacü wüxigu inaxí. <sup>9</sup>Rü yexguma nawa nanguxgu ga yema nachica ga Tupana namaxã nüxü ixuxü, rü Abraáü rü yexma nanaxü ga wüxi ga naxünaarü guchica. Rü yemaétügu nananutanü ga üxü. Rü ñuxüchi nane ga Ichaáxü ninax rü yema üxüétügu nanaxüinagü. <sup>10-11</sup>Natürü yexguma cüxchi ngixü nayauxgu ga nanexü tá nax yamáxü, rü Cori ya Tupanaarü duüxü rü daxüwa nüxna nacagü rü ñanagürü: —Pa Abraáü, Pa Abraáü —ñanagürü. Rü nüma ga Abraáü nanangãxü rü ñanagürü: —Daxe chixí rü nua changexma —ñanagürü. <sup>12</sup>Rü yexguma ga yema daxücüãx i orearü ngeruxü rü ñanagürü nüxü: —iTaxü i taxacürü chixexü namaxã cuxüxü ya yimá bucü! Erü marü nüxü chacuax nax aixcüma Tupanaga cuxínüxü rü tama choxna cunachuxu ya yimá cune ya nügümaxã wüxicacü —ñanagürü. <sup>13</sup>Rü yexguma ga Abraáü rü nadauegu, rü nüxü nadau ga wüxi ga carnéru ga nachataxcuremaxã chuchuxüchapaxagu choxü. Rü ínayadau, rü nayayaxu. Rü yema nimax



rü nayagu nanechicüxü. <sup>14</sup>Rü yemawena ga Abraáü rü nanaxüéga ga yema nachica ñaxümaxá: “Cori ya Tupana rü tüxna nanaxá i ngéma inaxwaxexü”, ñaxümaxá. Rü ngëmacax i ñuxma rü ta duüxügü nüxü nixu rü ñanagürügü: “Yima mąxpúnewa Tupana tüxna nanaxá i ngéma inaxwaxexü”, ñanagürügü. <sup>15</sup>Rü yexguma ga yema Tupanaarü oreatü ngeruxü i daxücüax rü wenaxarü daxüwa Abraáüna nacagü. <sup>16-17</sup>Rü ñanagürü nüxü: —Dücax, rü Cori ya Tupana rü ñanagürü: “Ngéma cuxüüwa nüxü chacuax nax aixcüma chauga cuxinüxü, erü tama choxna cunachuxu ya yimá cune ya nügümaxá wüxicacü. Rü ngëmacax chauégagutama cumaxá nüxü chixu rü tá poraäcü cuxü charüngüxêê. Rü ngéma cutaagü rü tá chayamuxêxê. Rü êxtagüexpüx rü naxnücütexe ya taxtüpechinüwa ngëxmacüexpüx tá nixi i norü mu. Rü nümagü rü guxügutama norü uanügüxü narüporamaegü. <sup>18</sup>Rü cutaagügagu tá nixi i nüxü charüngüxêêxü i guxüma i nachixüanegü, erü aixcüma mea chauga cuxinü”, ñanagürü cuxü ya Cori ya Tupana —ñanagürü ga yema Tupanaarü duüxü. <sup>19</sup>Rü nüma ga Abraáü rü norü duüxüçax natáegu rü wüxigu nawoegu nachixüwa ga Bechébawa. Rü yexma nixi ga naxächüxü ga Abraáü.

.....

**Abraáü rü norü duüxüxü namu nax wüxi  
ga pacüçax yadaxüçax nax  
Ichaámąxruxü yixüçax**

**24** <sup>1</sup>Rü nüma ga Abraáü rü marü nayaxüchi ga yexguma. Rü Cori ya Tupana rü guxüwama poraäcü

nüxü narüngüxêê. <sup>2-3</sup>Rü wüxi ga ngunexü ga Abraáü rü naxçax naca ga yema norü duüxü ga rüyamaexü ga norü yemaxümaxá icuäcü. Rü ñanagürü nüxü: —iChoperematüügu naxüxmex, rü Tupana ya daxüguxü i naane rü ñoma i naanearü yoraégaugu chomaxá inaxuneta rü taxütama chaune ya Ichaáçax ngixü cuyaga i wüxi i pacü i ñaa naane i Canaäücüax ixícü nax naxmąx yixüçax! <sup>4</sup>Natürü chanaxwaxe i yéa chauchiüanewa cuxü nax ngëxma chautanüxügütanügu ngixçax cuyadauxü i wüxi i nge nax ngëmamaxá naxámąxüçax ya chaune ya Ichaá —ñanagürü. <sup>5</sup>Rü nüma ga guma norü duü rü Abraáüxü nangäxü rü ñanagürü: —Natürü ngëxguma ngéma nge tama chowe rüxüchaügu írü taxacü tá chaxüxü i ngëxguma? ¿Ëxna cunaxwaxexü nax yema naane ga nawa ícuxüxüüwa chanagaxü ya cune? —ñanagürü. <sup>6</sup>Rü Abraáü nanangäxü rü ñanagürü: —Tama chanaxwaxe nax ngéma cunagaxü ya chaune. <sup>7</sup>Erü yimá Cori ya Tupana ya daxüguxü i naanearü yora ga chaunatüchiüwa rü chautanüxüarü naanewa choxü ímuxüchicü, rü chomaxá inaxuneta nax chautaaüna naxääxüçax i ñaa naane i nawa changexmaxü. Rü ngëxgumarüxü ta rü nümatama ya Cori rü cupexegu tá nayamu i norü oreatü ngeruxü i daxücüax nax wüxi ya pacü ngéma ngixü cuyagaxüçax i naxmąxü ya chaune. <sup>8</sup>Natürü ngëxguma chi ngéma nge rü tama cuwe naxüxchaügu rü taxuçaxma nagu curüxinü i ngéma cuxü chamuxü, erü marü cuyangüxêê i ngéma cumaxá nüxü chixuxü. Natürü

taxucaḡma tüxcüü ngēma cunaga ya chaune —ñanagürü. <sup>9</sup>Rü yexguma ga guma norü duü rü norü cori ga Abraáũperematüügu naxúxmex, rü namaxã nüxü nixu rü tá nax yanguxēãxü ga yema namuaxü. <sup>10</sup>Rü yemawena ga guma norü duü rü amarexü nanade ga yema rümemaegüxü ga norü coriarü ngaxãerüügü. Rü inayagagü ga 10 ga norü caméyugü rü inaxüãchi nax guma ñane ga Nacóx ga Mechopotámiaanewa yexmanewa naxüxüçax. <sup>11</sup>Rü ñuxre ga ngunexüguwena yexguma nachütachaxügu rü guma ñane ga Nacóxpechinüwa nangu naxütawa ga wüxi ga puchu. Rü guma pucharü ngaicamagu nanangüxëxë ga norü caméyugü. Rü yema ora nixi ga ngexügu guma puchuwa dexáwa naxixü. <sup>12</sup>Rü nüma ga Abraáũarü duü rü inanaxügu ga nax nayumüxëxü rü ñanagürü: —Pa Tupana ya Chorü Cori ya Abraáũarü Tupanax, rü icuxü nangechaütümüxü ya chorü cori ya Abraáũ, rü ecü mea inanguxuchixëxë i ngēma naxçax núma choxü namuxü! <sup>13</sup>Rü dücax, rü ñuxma rü daa puchuxütagu charüxãüx, rü daa ñanecüãx i pacügu rü nua dexáwa tá ixí. <sup>14</sup>Rü ñuxma rü curü ngüxëe chanaxwaxe, rü ngëxguma dexácax wüxi i ngēma pacüna chacaxgu rü ñaacü choxü nangãxügu: “iEcü, naxaxe! Rü ngëxgumarüxü tá ta chayaxaxegüxëxë i curü caméyugü”, ñaxümaxã choxü nangãxügu, rü ngēmawa tá nüxü chacuax nax ngēma yixixü i cuma ngixü cuxunetacü naxçax ya yimá curü duü ya Ichaá. Rü

ngēmawa tá nüxü chacuax nax cuma rü aixcüma nüxü cungechaüxü ya yimá chorü cori ya Abraáũ —ñanagürü ga norü yumüxëwa. <sup>15</sup>Rü yexguma tauta nüxü nachauxgu ga nax nayumüxëxü, rü ngixü nadau ga wüxi ga pacü ga yéma ne ücü ga ngürü tüxü ngiätügu ngixü ingecü. Rü ngīma rü Rebéca iyixí ga Betuéacü. Rü nüma ga Betué rü Abraáüenexë ga Nacóx nane nixi, rü Mílca iyixí ga naé. <sup>16-17</sup>Rü ngīma ga Rebéca rü imechametüxüchi rü taguma ñuxgu wüxi ga yatü ngīmaxã namaxü. Rü guma puchuwa ixü rü yéma ngixü ixüãcu ga ngürü tüxü. Rü yexguma natáeguchaügu, rü nüma ga guma Abraáũarü duü rü ngixçax niña, rü ñanagürü ngixü: —Pa Pacüx çtaxüchima cuxü namexü ega curü tüxüwa choxü cuxaxexëegu i ixraxü i curü dexá? —ñanagürü. <sup>18</sup>Rü yexguma ga ngīma rü inangãxü rü ngīgürügü: —iEcü naxaxe, Pa Corix! —ngīgürügü. Rü yexgumatama naxãxgu ngixü icax ga ngürü tüxü nax naxaxexüçax. <sup>19</sup>Rü yexguma marü naxaxeguwena ga guma Abraáũarü duü, rü ngīma ga Rebéca rü ngīgürügü nüxü: —Paxa dexá tá chayaxu naxçax i curü caméyugü nax nümagü rü ta mea naxaxegüxüçax —ngīgürügü. <sup>20</sup>Rü yexguma ga ngīma rü paxa yema caméyugüarü axepãügu ngixü ibaãcu ga ngürü tüxü. Rü muçpüxcüna paxa nawa iña ga yema dexá ga puchuwa ñuxmata naxüãcuã ga dexapaü naxçax ga guxüma ga yema caméyugü. <sup>21</sup>Rü nüma ga guma Abraáũarü duü rü yoxni ngixü inangugü yerü nüxü nacuáxchaü rü aixcüma ngīma yixí ga Tupana ngixü unetacü.

<sup>22</sup>Rü yexguma marü mea naxaxegügu ga yema norü caméyugü, rü nüma ga guma Abraáüarü duü rü ñuxüchi ngíxna ngíxü naxâ ga wüxi ga ãnera ga úirungíxçax ga 6 grámu yacü rü ngíxmarauwa ngíxü nichocuchi. Rü yexgumarüxü ta ngíxna nanana ga taxre ga ngaxcupüxmexëxü ga 100 grámu yaxü ga wüxichigü. <sup>23</sup>Rü ñanagürü ngíxü: —Pa Pacüx ichomaxâ nüxü ixu rü texeacü quixî! ¿Rü nangemaxü i nachica i cunatüpatawa nax ngëxma chorü duüxügümaxâ tapegüxüçax i ñoma i chütaxügu? —ñanagürü. <sup>24</sup>Rü ngíma rü inangâxü rü ngígürügü: —Choma rü naxacü chixî ya Betué. Rü Mílca iyixî i chorü noxë rü Nacóx nixî ya chorü oxî. <sup>25</sup>Rü ngéma tochiüwa rü nangema i nachica nax ngëxma pepegüxüçax i ñoma i chütaxügu. Rü ngëxgumarüxü ta nayima ya maxë i perü caméyugarü ngoxuruxü rü maxë i paxü i norü caruxü —ngígürügü. <sup>26</sup>Rü yexguma ga guma Abraáüarü duü rü yexma nacaxápüxü rü Tupanaxü nicuaxüxü. <sup>27</sup>Rü ñanagürü: —Cumecümaxüchi, Pa Cori ya Chorü Cori ya Abraáüarü Tupana, erü aixcüma cuyanguxëxë i ngéma chorü cori ya Abraáümaxâ nüxü quixuxü. Erü namaxâ cumecüma rü poraäcü nüxü curüngüxë rü ngémaäcü natanüxügütanüwa mea choxü cunguxëxë—ñanagürü. <sup>28</sup>Rü yexguma ga ngíma ga Rebéca rü ngíchiüwa íña, rü ngítanüxügümaxâ nüxü iyarüxu ga yema ngíxü ngupetüxü. <sup>29</sup>Ngíma rü ngíxü nayexma ga wüxi ga ngítenexë ga Labáügu áégacü. Rü guma nixî ga puchuwa ñacü nax naxçax yadauxüçax ga guma yatü. <sup>30</sup>Yerü ngíxü

nadau ga yema ãnera ga ngíxmarauwa rütucü rü yema ngaxcupüxmexëxügü, rü nüxü naxínü ta ga yema nüxü yaxuxü nax ñuxü ñaxü ga guma yatü. Rü yexguma yéma nanguxgu ga Labáü, rü Abraáüarü duüçax nixü ga yématama puchuxütawa norü caméyumaxâ yexmacü. <sup>31</sup>Rü ñanagürü: —iPa Yatü ya Cori ya Tupana Cuxü Rüngüxëçüx, rü chowe rüxü! ¿Rü ñuxäcü nuxâ ñanearü düxétügu curüxäüx ega tochiüwa marü cuxçax tanamexëgu i wüxi i ucapu nax ngëxma cupexüçax? Rü ngëxgumarüxü ta marü tanamexëxë i wüxi i nachica naxçax i curü caméyugü —ñanagürü. <sup>32</sup>Rü ñuxüchi ga guma Abraáüarü duü rü nawe narüxü. Rü yexguma íxwa nangugügu, rü Labáü caméyutawa ínananuü ga norü yemaxügü rü ñuxüchi yema caméyugüxü nachibuexëxë. Rü yemawena rü dexá ta nayayaxu nax nügu yayauxgücutügüxüçax ga Abraáüarü duü rü namücügü. <sup>33</sup>Rü yexguma õnamaxâ naxúpegegüäxgu, rü nüma ga Abraáüarü duü rü ñanagürü: —Taxucürüwa chachibü ega tama pemaxâ nüxü chixuxíraxgu i ngéma pemaxâ nüxü chixuxchaüxü —ñanagürü. Rü yexguma ga Labáü rü ñanagürü: —iÉcü, idexa! —ñanagürü. <sup>34</sup>Rü yexguma ga Abraáüarü duü rü ñanagürü: —Choma rü Abraáüarü duü chixî. <sup>35</sup>Rü Cori ya Tupana rü poraäcü nüxü narüngüxëxë ya chorü cori ya Abraáü, rü nanamuarü ngëmaxüäxëxë. Rü ngëmacax i ñuxma rü namuxüchi i norü carnérugü, rü wocagü rü caméyugü, rü búrugü, rü úirugü, rü díerümügü, rü duüxügü i yatüxü rü ngexü. <sup>36</sup>Rü naxmāx i Sára rü nüxü

iyatüne ga woo marü nax  
 nayaxüchichiréxü. Rü nüma ya choriü  
 cori ya Abraáü rü yimá nanena  
 nanaxuaxü i guxüma i norü ngëmaxüğü.  
<sup>37</sup>Rü yexguma núma choxü  
 namuxchaügu, rü nüma ya chorü cori  
 ya Abraáü rü choxna naxāga nax  
 Tupanaégagu namaxā ichaxunetaxü, rü  
 ñanagürü choxü: “iTaxütáma  
 cunaxwaxe ya yimá chaune ya Ichaá rü  
 wüxi i pacü i nua Canaáücüāxmaxā  
 naxāmaxü! <sup>38</sup>iRü yéa chorü  
 papátanüxütanüwa naxü rü ngëxma  
 ngüxcax yadau i wüxi i pacü i  
 chautanüxü ixücü nax chaunemax  
 yixüxcax!” ñanagürü ga chorü cori.  
 .....

<sup>42-44</sup>Rü ngëmaäcü i ñuxma rü núma  
 changu naxütawa ya yima puchu. Rü  
 ngéma chayumüxë rü chorü cori ya  
 Abraáüarü Tupanamaxā nüxü chixu rü  
 ñacharüğü: “Ega aixcüma choxü  
 curüngüxëchaügu nax mea choxü  
 ínanguxuchixüxcax i ngéma chorü cori  
 nawa choxü muxü, rü chanaxwaxe i  
 choxü cungāxüga i ñuxma nax  
 puchuxütawa changexmaxü. Rü ngéma  
 pacü i dexáwa nua ücü rü dexácax  
 ngüxna chacacü nax choxü  
 naxaxexëxüxcax rü choxü ngāxüxcü:  
 ‘iÉcü naxaxe! Rü ngëxgumarüxü tá ta  
 chayaxaxegüxëxë i curü caméyugü’,  
 ñaxümaxā choxü ngāxüxcü, rü  
 ngémawa tá nüxü chacuax nax ngéma  
 yixüxü i cuma ngüxü cuxunetacü naxcax  
 ya chorü cori nane ya Ichaá”,  
 ñacharüğü ga chorü yumüxëwa. <sup>45</sup>Rü  
 yexguma taüta nüxü charüchaxgu ga  
 nax chayumüxëxü, rü ngüxü chadau ga  
 Rebéca ga tüxü ngüätügu yéma ngüxü ne

ngecü. Rü puchucax irüxüe, rü  
 dexámaxā ngüxü ixüäcu ga ngüxü tüxü.  
 Rü yexguma ga choma rü ngüxna chaca  
 rü ñacharüğü ngüxü: “Pa Pacüx  
 ¿Taxüchima cuxü namexü ega choxü  
 cuxaxëëgu i curü dexá?” ñachagürü.  
<sup>46</sup>Rü yexguma ga ngéma rü ngüxü irüxüe  
 ga ngüxü tüxü rü ngügürüğü choxü:  
 “iÉcü, naxaxe, Pa Corix! Rü  
 ngëxgumarüxü tá ta chayaxu i dexá  
 naxcax i curü caméyugü nax nümagü rü  
 ta naxaxegüxüxcax”, ngügürüğü. Rü  
 yexgumatama choxü ixaxëxë rü  
 yaxaxegüxëxë ga chorü caméyugü rü ta.  
 .....

<sup>49</sup>Rü ñuxma rü chanaxwaxe nax  
 chomaxā nüxü pixuxü ¿rü aixcüma tá  
 mea penayaxuxü i naga ya yimá chorü  
 cori rü ëxna tama? Rü chanaxwaxe i  
 chomaxā nüxü pixu nax nüxü  
 chacuáxüxcax i taxacü tá chaxüxü  
 —ñanagürü. <sup>50</sup>Rü yexguma ga Labáü rü  
 Betué rü nanangāxügagü, rü  
 ñanagürüğü: —Guxüma i ngéma nüxü  
 quixuxü rü Cori ya Tupanawa ne naxü.  
 Rü ngëmacax taxucüruwa ñuxü  
 ñatagürü. <sup>51</sup>Rü dücax, rü ngëmama iyixü  
 i Rebéca. iRü ëcü, ngüxü iga nax  
 naxmax yixüxcax ya nane ya yimá curü  
 cori, ngéma Tupana naxwaxexüxüxü!  
 —ñanagürüğü. <sup>52</sup>Rü yexguma yemaxü  
 naxínügu ga Abraáüarü düü rü Cori ya  
 Tupanapexegu nacaxápüxü rü ñuxmata  
 waixümügu yangücuchix. <sup>53</sup>Rü  
 yemawena nanade ga ämaregü ga  
 úirunaxcax rü diërumünaxcax rü  
 naxchirüğü, rü Rebécana nanana. Rü  
 yexgumarüxü ta ga ngüenexë rü ngié rü  
 tüxü naxámareax. <sup>54</sup>Rü yemawena ga  
 nüma ga Abraáüarü düü rü namücüğü

rü meama nachibüe rü yexma napegü. Rü moxũãcü ga yexguma ínadağügü, rü guma Abraáũarü duũ rü ñanagürü: —iChoxũ pinge nax wenaxarü chorü corichiũcax chatáeguxũcax! —ñanagürü. <sup>55</sup>Natürü ga ngíenexê rü ngíe ga Rebéca rü ñatagürügü: —Name nixĩ i 10 i ngunexũ nua ingexma rü ngẽmawena rü marü name i cuwe irüxü —ñatagürügü. <sup>56</sup>Natürü ga guma Abraáũarü duũ rü ñanagürü tüxũ: —iTaxú i nuxã choxũ pechuxuxũ! Tupana rü mea ñnananguxuchixêxê i ngẽma naxcax nua chaxũxũ. Rü ngẽmacax name nixĩ i chorü corichiũcax choxũ pemuegu —ñanagürü. <sup>57</sup>Rü yexguma ga tümagü rü tanangãxü rü ñatagürügü: —iNgĩxã, ngĩxcax taca i Rebéca rü ngoxi ñuxãcü tüxũ nangãxũ! —ñatagürügü. <sup>58</sup>Rü ngĩxna tacagü rü ñatagürügü: —iCüx, nawe curüxüchaxũxü ya daa yatü? —ñatagürügü. Rü ngĩma rü tüxũ ingãxü rü: —Ngũ —ngĩgürügü. <sup>59</sup>Rü yexguma itayamugü ga guma Abraáũarü duũ rü namücügü, rü nawe irüxü ga Rebéca rü ñuxüchi ngĩxütaxü ga guxüguma ngĩxna dağxcü. <sup>60</sup>Rü mexũ Rebécamaxã taxuegügü rü ñatagürügü: —Pa Toeyax, êcü muxüchixü i duũxügüarü mamá tá quixĩ. Rü ngẽma cutaagü rü tá narüporamaegü nüxü i norü uanügü —ñatagürügü. <sup>61</sup>Rü yexguma ga Rebéca rü ngĩxütaxügümaxã caméyugüétügu ixaugü. Rü nawe irüxĩ ga guma Abraáũarü duũ. Rü yemaacü nixĩ ga ngĩxü yagaxü ga Rebéca, rü ngĩmaxã inixü. <sup>62</sup>Rü yoxni nüma ga Ichaá rü yexwacaxtama guma puchu ga Yimá Maxücü Rü Choxũ Daucügu áegacüwa ne naxü, yerü yexma Négueanegu

naxãchiũ. <sup>63</sup>Rü yáuanecü ga yexguma marü nayaanegu rü nüma ga Ichaá rü yeacü nanaxüane. Rü yáxũgu nüxü nadau ga ñuxre ga caméyugü ga ingaixcaetanüxü. <sup>64</sup>Rü ngĩma rü ta ga Rebéca rü yáxũgu nüxü idau ga Ichaá, rü íixüe ga caméyüétüwa. <sup>65</sup>Rü guma Abraáũarü duũxüna ica, rü ngĩgürügü: —iTexe nixĩ ya yimá yatü ya meanexüwa taxcaxama ixücü? —ngĩgürügü. Rü nüma rü ngĩxü nangãxü rü ñanagürü: —Nüma rü chorü cori ya Ichaá nixĩ —ñanagürü. Rü yexguma ga ngĩma rü ngĩrü tüeruxü iyaxu, rü namaxã ngĩgü iyadüxchiwe. <sup>66</sup>Rü guma Abraáũarü duũ rü Ichaámaxã nüxü nixu ga guxüma ga yema nüxü ngupetüxü. <sup>67</sup>Rü yexguma ga Ichaá rü norü mamá ga Sárachiüwa Rebécaxü naga, rü ngĩmaxã naxãmãx. Rü nüma ga Ichaá rü poraãcü ngĩxü nangechaũ, rü yemaacü nüxü inarüxo ga naécax nax nangechaũxü. ....

#### Nayu ga Abraáũ rü inanaxgü

**25** <sup>7</sup>Rü Abraáũ rü namaxü ga 175 ga taunecü. <sup>8</sup>Rü nüma ga Abraáũ rü nayu yerü marü nayaxüchi, rü natanüxügü ga yuexütanüwa naxü. <sup>9-10</sup>Rü nanegü ga Ichaá rü Ismaé rü yema naxmaũ ga Maxpérxütawa naxcax nataxexügu nayanaxüchigü. Rü yema naxmaũ rü ñane ga Máũrearü éstewa nangexma ga Efóũarü naanewa. (Rü nüma ga Efóũ rü Itítatanüxü ga Choá nane nixĩ.) Rü yema naxmaxügu nixĩ ga Abraáũxü yanaxüchigüxü ngĩxütagu ga naxmãx ga Sára. ....

<sup>20</sup>Rü Ichaá rü 40 ga taunecü nüxǘ nayexma ga yexguma naxãxmaꝑgu ngĩmaxã ga Rebéca ga Betuécacü ga Labáũeyax ga Aramécüĩaxgü ga Padáũ-aráũanegu áchiũgüxü. <sup>21</sup>Rü yexguma Ichaá ñuxre ga taunecü Rebécaxütawa nayexmagu, rü tama nüxǘ ixãxacü. Rü yemaçax ga Ichaá rü Cori ya Tupanana naca nax naxãxacüxüçax ga naxmaꝑ. Rü nüma ga Tupana rü nüxǘ naxĩnü ga norü yumüxë rü ixãxacü. <sup>22</sup>Natürü nataxreexpüx ga ngĩxacü ga ngĩanügu nügü daixü. Rü yemaçax ñaxũgu irüxĩnü: “Ngëxguma tá ngëmaäcü yaxĩgügu i ñaa buxügu çrü taxacüruxü ichamaxüxü?” ñaxũgu irüxĩnü. Rü yemaçax ga ngĩma ga Rebéca rü Cori ya Tupanana ica yemachiga. <sup>23</sup>Rü Tupana rü ngĩxǘ nangãxǘ rü ñanagürü: —Nataxreexpüx nixĩ i ngëma cunegü i cuanüwa ngëxmagüxü. Rü nüma i taxre rü wüxichigü tá nachĩũanemaxã inacuaꝑ. Rü naxüpa nax nabuexǘ rü nügü nadai. Rü wüxi tá nixĩ i rüporamaexü. Rü ngëma rübumaexǘ rü ngëma rüyamaexǘarü yexera tá nixĩ —ñanagürü. <sup>24</sup>Rü ngĩrü ngunexǘwa nangu ga nax naxĩraxacüxǘ ga Rebéca. Rü nataxreexpüx. <sup>25</sup>Rü guma ngĩne ga nüxĩra bucǘ rü nadauyáe rü naxãtaxaxǘne. Rü Echaúgu nanaxüéagü. <sup>26</sup>Rü yemawena nabu ga naenexë. Rü Echaúmextüxügu yangĩácüma nabu. Rü yemaçax Acóbugu nanaxüéagü. (Rü ngëma naéga rü Iyauwxaxexǘ, ñaxüchiga nixĩ.) Rü nüma ga Ichaá rü 60 ga taunecü nüxǘ nayexma ga yexguma nabuegu ga guma ngĩnegü ga Rebéca. <sup>27</sup>Rü yema taxre ga

bucügu rü nayae. Rü Echaú rü naixnecü norü me nixĩ rü würawa ãëxücü nixĩ. Natürü ga Acóbu rü norü me nixĩ ga ĩarü ngaicamána nax nayexmaxü. <sup>28</sup>Rü nüma ga nanatü ga Ichaá rü yexera Echaúxü nangechaü yerü norü me nixĩ ga nax nangóõxǘ ga yema naexümachi ga Echaú imáxü. Natürü ga naxmaꝑ ga Rebéca rü yexera Acóbuxǘ ingechaü. <sup>29</sup>Rü wüxi ga ngunexǘ, ga yexguma Acóbu íxüwemüxgux, rü nüma ga Echaú rü maxneewa ne naxü rü poraäcü nipaxüchi. <sup>30</sup>Rü Acóbuxǘ ñanagürü: —çTaxüchima cuxǘ namexǘ i chomaxã cungaungu i ngëma curü õna i dautanüxü? Erü ngëmatáma taiyamaxã chayü —ñanagürü. (Rü yemaçax ga Echaú rü Edóũmaxã rü ta nanaxugü yerü norü me nixĩ ga yema õna ga dautanüxü.) <sup>31</sup>Rü yexguma ga Acóbu rü nanangãxǘ rü ñanagürü: —Nangexma i ngëma cuxna üxǘ erü tanatünane ya yacü quixĩ, rü chanaxwaxë i ñaa õnacax choxna cunaxã i ngëma cuxna üxǘ —ñanagürü. <sup>32</sup>Rü yexguma ga Echaú rü ñanagürü: —çTaxacüwa chi choxǘ namexǘ i ngëma nüxǘ quixuxǘ i choxna üxǘ? Erü choxǘ cudau nax taiyamaxã chayuxchaüxǘ —ñanagürü. <sup>33</sup>Rü yexguma ga Acóbu rü ñanagürü: —iTupanaégagu chomaxã nüxǘ ixu nax aixcüma tá choxna cunaxãxǘ i ngëma cuxna üxǘ! —ñanagürü ga Acóbu. Rü yexguma ga Echaú rü Tupanaégagu Acóbuna nanaxã ga yema naxçax ínacaxaxü. <sup>34</sup>Rü yexguma ga Acóbu rü Echaúna nanaxã ga paü rü guma purutuarü dautanüne. Rü yexguma marü chibüwa rü axewa yanguxgu ga Echaú, rü inachi rü ínixü. Rü tama nagu

narüxĩnũ ga yema norũ yamaecax  
nũxna üxũ ga naeneena naxãxũ.

.....

### Echaú naxmãxgũchiga

**26** <sup>34</sup>Echaú rü 40 ga taunecü nũxũ  
nayexma ga yexguma ngĩmaxã  
naxãxmaxgu ga Yudí ga Itítatanũxũ ga  
Béríxacü. Rü yexgumarüxũ ta ngĩmaxã  
naxãxmax ga Bachemá ga nai ga  
Itítatanũxũ ga Elóüacü. <sup>35</sup>Natürü ga  
Ichaá rü Rebéca rü taguma yema  
naneãxgũmaxã nataãxëgũ.

### Ichaá rü Acóbumaxã rü Echaúmaxã mexũ naxuegu

**27** <sup>1</sup>Rü Ichaá rü marü nayaxüchi  
rü nangexetü. Rü wüxi ga  
ngunexũgu rü nane ga rüyamaecü ga  
Echaúcxax naca. Rü ñanagürü nũxũ:  
—Pa Chaunex —ñanagürü. Rü Echaú  
nanangãxũ rü: —¿Ñuxũ ñacuxũ, Pa  
Papáx? —ñanagürü. <sup>2</sup>Rü yexguma ga  
Ichaá rü ñanagürü: —Cuma choxũ  
cudau nax marü chayaxüchixũ rü  
ngexürüxũ i ñaa ngunexũgũgu rü tá  
chayu. <sup>3</sup>Rü ngẽmacax chanaxwãxe i  
cunayaxu ya curü würa rü naixnecüwa  
cuxũ rü cuyamaxnee rü naexũta quimãx.  
<sup>4</sup>iRü ñuxüchi chauxcxax naxü i õna i  
dexechitanũxũ i chauaxwa chĩxũ! iRü  
nua nange nax chanangóxũcxax! Rü  
ñuxüchi tá Tupanaéagagu mexũ cumaxã  
chaxuegu naxüpa nax chayuxũ  
—ñanagürü. <sup>5-6</sup>Natürü yexguma nane  
ga Echaúmaxã yadexaxgu ga Ichaá, rü  
Rebéca rü bexma yéma irüxĩnũ. Rü  
yemacax, yexguma Echaú nanatüicax  
daxchitawa maxneewa naxüyane, rü  
ngĩma ga Rebéca rü naxcxax ica ga

Acóbu ga guma ngĩne ga rübumaecü.  
Rü ngĩgürügü nũxũ: —Dücac, tüxũ  
chaxĩnũ ya cunatü nax cuenexë ya  
Echaúmaxã nax ítídexaxũ. Rü ñatagürü  
nũxũ: <sup>7</sup>“iMaxneewa naxü rü chauxcxax  
naexũta imãx! iRü naxü i õna i  
dexechitanũxũ i chauaxwa chĩxũ! iRü  
nua nange nax chanangóxũcxax! Rü  
ñuxüchi tá Tupanaéagagu mexũ cumaxã  
chaxuegu naxüpa nax chayuxũ”,  
ñatagürü nũxũ. <sup>8</sup>iRü dücac, Pa  
Chaunex, choxũ irüxĩnũ i ñaa cumaxã  
nũxũ chixuxũ! <sup>9</sup>iRü yéa cábrapüüwa  
naxü rü ngẽma rümemaxũtanüwa  
nayaxu i taxre i cábraxacügü! Rü choma  
rü ngẽmawa tá tümacax chanamexëxë i  
õna i dexechitanũxũ i tümaaxwa chĩxũ.  
<sup>10</sup>Rü cuma tá nixĩ i tümacax ngẽma  
cungexũ nax tachibũxũcxax, rü  
ngẽmaãcü tá Tupanaéagagu mexũ  
cumaxã taxuegu naxüpa nax tayuxũ  
—ngĩgürügü. <sup>11</sup>Natürü nüma ga Acóbu  
rü naëxũ nangãxũ rü ñanagürü:  
—Chauenexë rü naxãxtaxaxũne, natürü  
choma rü tama ngẽxgumarüxũ chixĩ.  
<sup>12</sup>Rü ngẽxguma Papá choxũ ingógũxgu  
rü choxũ tacuaxgu, rü nagu tá tarüxĩnũ  
nax tümagu chidauxcüraxũxũ. Rü  
ngẽxguma rü taxütãma mexũ chomaxã  
taxuegu, rü chixexũ tá chomaxã taxuegu  
—ñanagürü. <sup>13</sup>Natürü ga ngĩma ga naé  
rü inangãxũ rü ngĩgürügü: —Pa  
Chaunex, rü ngẽxguma chixexũ cumaxã  
taxueguxgu irü chaugu nangu! Natürü i  
cumax, rü chanaxwãxe i cunaxü i  
ngẽma cumaxã nũxũ chixuxũ. iRü paxa  
nawa naxü i ngẽma cábraxacügü!  
—ngĩgürügü. <sup>14</sup>Rü yexguma ga Acóbu  
rü nawa naxü ga yema cábraxacügü rü  
naécax yéma nanagagü. Rü ngĩma ga

naé rú inamexēxē ga ñna ga  
 idexechitanüxü ga Ichaáxwa chíxü.  
 15Rü yemawena inayaxu ga rümemaexü  
 ga Echaúchiru ga ípatagu namaxā  
 nanguxüxü. Rü yemagu iyacuxēxē ga  
 guma ngīne ga rübumaecü ga Acóbu.  
 16Rü ñuxüchi yema  
 cábraxacüchaxmüxümaxā  
 inaxüchiüchacüxü ga Acóbu. Rü  
 ínangextaxaremüxüwa rü ta inaxü ga  
 yema naxchaxmü. 17Rü nüxna inaxā ga  
 yema idexechitanüxü ga ñna rü paü ga  
 namexēxē. 18Rü nüma ga Acóbu rü  
 tümaxütagu naxücu ga nanatü ga  
 ítayexmaxüwa, rü ñnanagürü tüxü: —Pa  
 Papáx, marü íchangu —ñnanagürü. Rü  
 tüma rü ítaca, rü ñnatagürü:  
 —¿Ngexcürüücü ya chaune quixixü?  
 —ñnatagürü. 19Rü yexguma ga Acóbu rü:  
 —Choma rü cune ya yacü ya Echaú  
 chixí. Rü marü chanaxü i ngēma  
 chomaxā nüxü quixuxü. iRü írúda rü  
 írúto nax cunangóxcax i ñna  
 naexümachi i cuxcax chimáxü, rü  
 ñuxüchi mexü chomaxā naxuegu!  
 —ñnanagürü. 20Rü yexguma ga Ichaá rü  
 nüxna taca, rü ñnatagürü: —¿Ñuxācü  
 paxa cuxāéxü, Pa Chaunex? —ñnatagürü.  
 Rü nüma ga Acóbu rü tüxü nangāxü, rü  
 ñnanagürü: —Nüma ya Cori ya curü  
 Tupana choxü narüngüxē rü ngēmācax  
 paxama nüxü ichayangau —ñnanagürü.  
 21Natürü ga nüma ga Ichaá rü ñnanagürü  
 nüxü: —iCax nua naxü! Rü cuxü  
 chingógüchaü rü aixcüma chaune ya  
 Echaú quixí —ñnanagürü. 22Rü Acóbu rü  
 nanatüxütawa naxü nax nüxü  
 tingógüxcax. Rü yexguma ga Ichaá rü  
 ñnanagürü: —Cuga rü Acóbuga nixí  
 natürü cuchacüxü rü Echaúchacüxü nixí

—ñnanagürü. 23-24Rü yemaacü tama  
 Acóbuxü tacuax, yerü poraäcü  
 naxāxtaxachacüxü naenexē ga  
 Echaürüxü. Natürü yexguma marü tá  
 mexü namaxā taxueguchaxügu rü  
 wenaxarü nüxna taca, rü ñnatagürü  
 nüxü: —¿Aixcüma yixixü i chaune ya  
 Echaú quixixü? —ñnatagürü. Rü nüma ga  
 Acóbu rü tüxü nangāxü, rü: —Ngü,  
 Echaú chixí —ñnanagürü. 25Rü yexguma  
 ga nanatü rü ñnatagürü nüxü: —iCü,  
 choxü nachibüxēxē, Pa Chaunex, nax  
 chanangóxcax i ngēma cuexü! Rü  
 ngēmawena tá mexü cumaxā chaxuegu  
 —ñatarügü. Rü nüma ga Acóbu tüxü  
 nachibüxēxē ga nanatü rü bínu rü ta  
 tüxna nanaxā. Rü nüma ga Ichaá rü  
 nachibü rü naxaxe. 26Rü yexguma ga  
 Ichaá rü ñnanagürü nüxü: —iChorü  
 ngaicamānaxüra naxü, Pa Chaunex, rü  
 choxü nachúxu! —ñnanagürü. 27Rü  
 yexguma Acóbu nanatüna  
 ngaicamagu nax nachúxcax, rü  
 nüma ga Ichaá rü nanechirugu nawíxí.  
 Rü yexguma ga Ichaá rü mexü namaxā  
 naxuegu, rü ñnanagürü: —Ñna nixí i  
 naema ya chaune ya Echaú. Rü ngēma  
 naema rü ñoma wüxi i naane i  
 chixemaxü i Tupana mexü namaxā  
 uxeguxürüxü nixí. 28iRü Tupana cuxna  
 naxā ya pucü rü mea naxügü i cunetügü  
 nax namüxcax i curü trígu rü curü  
 bínu! iRü muxüchixü i duüxügü cuxü  
 puracüe! 29iRü cuxmexwa nangexmagü  
 i muxü i nachixüanegü! iRü  
 cueneegümaxā inacuax rü cupexegu  
 nacaxápüxügü! Rü yíxema chixexü  
 cumaxā uegugíxe, rü Tupana rü tá  
 chixexü tümamaxā naxuegu. Rü yíxema  
 mexü cumaxā uegugíxe rü Tupana rü tá



mexũ tũmamaxã naxuegu —ñanagürü. <sup>30</sup>Rü yexguma Ichaá nüxũ rüchaxuggu ga Acóbumaxã nax mexũ naxueguxũ, rü ñnaxũxũ ga Acóbu. Rü nawe ñnanguama ga Echaú ga maxneewa ne naxũxũ. <sup>31</sup>Rü nüma rü ta ga Echaú rü nanatũcax nanaxũ ga ñna ga idexechitanũxũ ga chianexũ. Rü nanatũxũtawana nanange. Rü ñnanagürü tüxũ: —Pa Papáx írřüda rü nangõx i ñna naexũmachi i choma cuxcax chimáxũ, rü ññuxũchi mexũ chomaxã naxuegu! —ñnanagürü. <sup>32</sup>Rü nüma ga Ichaá rü nüxna naca rü ñnanagürü: —¿Texé quixĩ? —ñnanagürü. Rü nüma ga Echaú rü tüxũ nangãxũ rü ñnanagürü: —Choma nixĩ i cune ya yacũ ya Echaú chixĩxũ —ñnanagürü. <sup>33</sup>Rü nüma ga Ichaá rü poraãcü nabajãxãchiãxẽ, rü niduxruga, rü ñnanagürü: —¿Ëxna texé tixĩ ya yixema maxneewa ùxẽ rü chauxcax nua nangexe i ngẽma ñna i idexechitanũxũ? Choma rü marũ chanangõx i guxũma i norũ ñna cuxũpa nax ícunguxũ. Rü marũ mexũ namaxã chaxuegu, rü ññuxma i nüma rü marũ nanayaxu i ngẽma mexũ —ñnanagürü. <sup>34</sup>Rü yexguma ga Echaú yema nanatũ namaxã nüxũ ixuxũxũ naxĩnũgu, rü poraãcü naxaxu. Rü aita naxũãcũma ñnanagürü: —Pa Papáx ichomaxã rü ta mexũ naxuegu! —ñnanagürü. <sup>35</sup>Natürü nüma ga Ichaá rü nanangãxũ rü ñnanagürü: —Marũ nua naxũ ya cuenexẽ rü choxũ nawomũxẽxẽ, rü ngẽmacax mexũ namaxã chaxuegu, rü nüma nanayaxu i ngẽma mexũ i cuxcaxchirex ixĩxũ —ñnanagürü. <sup>36</sup>Rü yexguma ga Echaú rü tüxũ nangãxũ, rü ñnanagürü: —Yemacax yixĩxũ ga Acóbugu

naxũégagũãxũ. Rü marũ norũ taxre nixĩ nax yadoraxũ rü choxũ nawomũxẽxẽ. Rü noxri rü marũ choxna nayapu i ngẽma nax charũyamaexũcax choxna ùxũ. Rü ññuxma rü choxna nayapu i ngẽma mexũ i chomaxã cuxueguchaũchiréxũ. ¿Rü nataxuxũma i to i mexũ i choxũ ícuyaxũxẽxẽ? —ñnanagürü. <sup>37</sup>Rü yexguma ga Ichaá rü nanangãxũ, rü ñnanagürü: —Dũcax, choma rü marũ Acóbumaxã chanaxuegu nax naxmexwa cungexmaxũ rü namaxã nüxũ chixu nax guxũma i natanũxũgũ rü ta naxmexwa nangexmagũxũ. Rü ngẽxgumarũxũ ta namaxã chanaxuegu nax namuxũ i norũ trĩgu rü norũ bĩnuchiũ. Rü ññuxma Pa Chaunex ¿rũ tãxacũ tá cuxcax chaxũxũ? —ñnanagürü. <sup>38</sup>Rü nüma ga Echaú rü nanatũxũ nacãaxũama, rü ñnanagürü: —¿Ëxna wũxixicatama i mexũ nixĩ i cuxueguxũ? iRü chomaxã rü ta mexũ naxuegu! —ñnanagürü. Rü aita naxũãcũma naxaxu. <sup>39</sup>Rü yexguma ga nanatũ ya Ichaá, rü ñnanagürü nüxũ: —Cuma rü ngẽma naane i mexũarũ yáxũwa tá cumaxũ i ngextá taguma ínapuxũwa. <sup>40</sup>Rü curũ taramaxã tá cugũ ícupoxũ, rü cuenexẽarũ duũxũ tá quixĩ. Natürü ngẽxguma cumuarũ duũxũãxgu, rü tá cuenexẽna ícunguxuchi —ñnanagürü.

#### Acóbu rü Echaúchaxwa nixũ

<sup>41</sup>Rü yexgumacürũwa ga Echaú rü Acóbuchĩ naxai naxcax ga yema mexũ ga Acóbumaxã taxueguxũ ga nanatũ. Rü nüma ga Echaú rü ñnaxũgu narũxĩnũ: “Rü Papá rü paxa tá tayu, rü tũmawena rü tá chayamãx ya chauenexẽ ya Acóbu”, ñnaxũgu narũxĩnũ. <sup>42</sup>Rü

yexguma yema Echaú nagu rüxînüxü nacuaꝯgu ga Rebéca, rü Acóbucax ingema, rü ngîgürügü nüxü: —Dücax, cuenexê ya Echaú rü nanu rü cuxü nimáxchaü naxcax i ngêma mexü i cunatü cumaxâ ueguxü. <sup>43</sup>Rü ngêmacax, Pa Chaunex irü choxü irüxînü, rü ñuxmatama Aráüanewa naxü i chauenexê ya Labáüchiüwa! <sup>44-45</sup>iRü ngêma nangexma i ñuxre ya taunecü ñuxmatáta nangüxmü ya cuenexê rü nüxü iyanangüma ga yema namaxâ cuxüxü! Rü ngêxguma marü nüxü iyanangümagu, rü cuxcax tá ngêma chamuga nax cutáeguxücax. Erü tama chanaxwaxe i wüxitama i ngunexügu nax choxü peyuxü i pema i taxre i chaunegü —ngîgürügü. <sup>46</sup>Rü yemawena ga Rebéca rü Ichaámaxâ iyadexa, rü ngîgürügü: —Düxwa nüxü charüchau i nacüma i ngêma taxre i Itítatanüxü i Echaú namaxâ ámaxü. Rü ngêxguma chi Acóbu rü wüxi i ngêma númacüax i Itítatanüxümaxâ naxáxmaꝯgu, rü narümemae nixi i noxtacüma chayuxü —ngîgürügü.

**28** <sup>1</sup>Rü yexguma ga Ichaá, rü nane ga Acóbucax naca rü mexü namaxâ naxuegu. Rü ñuxüchi nanaxucuxê, rü ñanagürü nüxü: —Tama chanaxwaxe i nuxma Canaáüciüax i ngexümaxâ cuxáxmaꝯ. <sup>2</sup>iRü yéa Padáü-Aráüarü naanewa naxü i nachiüwa ya curü oxí ya Betué, rü ngêxma yaxáxmaꝯ wüxi i naxacümaxâ ya cuta ya Labáü! <sup>3</sup>iRü Tupana ya guxáétüwa ngêxmacü rü cuxü rüngüxêxê rü namuxüchixêê i cutaagü nax ngêmaäcü muxüma i nachixüane cuwa nangóxücax! —ñanagürü.

.....

### Tupana rü Acóbucax nangox ga Betélwa

<sup>10</sup>Rü nüma ga Acóbu rü inaxüächí ga Bechébawa. Rü Aráüwa daxü ga namawa naxü. <sup>11</sup>Rü yexguma wüxi ga nachicawa nanguxgu, rü yexma nape yerü nachüta. Rü wüxi ga nuta nanayaxu, norü cüxeruxü. Rü inaca rü nape. <sup>12</sup>Rü yéma naxânegü. Rü yema nanegüwa rü nüxü nadau ga wüxi ga toxóone ga ñaa naanegu caxüne rü daxüguxü ga naanewa ngxüüne. Rü gumawa ínarixigü rü naxigü ga Tupanaarü orearü ngeruxü i daxücüax. <sup>13</sup>Rü yexgumarüxü ta nüxü nadau ga Cori ya Tupana ga naxütagu chicü. Rü nüma ga Tupana rü ñanagürü nüxü: —Choma nixi i curü oxí ya Abraáüarü Tupana, rü cunatü ya Ichaáarü Tupana chixixü. Rü tá cuxna chanaxâ i ñaa naane i nawa cupexü, nax cuxrü rü cutaagüarü yixixücax. <sup>14</sup>Rü nümagü i cutaagü rü tá namuxüchi ñoma waixümüchicutexerüxü, rü guxü i naanewa tá nangugü ñuxmatáta nórtewa rü súrwa rü éstewa rü oéstewa nangugü. Rü cugagu rü cutaagügagu tá nüxü charüngüxêê i guxütáma i duüxügü i ñoma i naanecüax. <sup>15</sup>Rü choma rü cumaxâ changexma. Rü ngextá ícuxüxüwa tá cuxna chadau. Rü ñaa naanecax tá wena cuxü chatáeguxêxê. Rü tagutáma cuxna chixügachi, rü aixcüma tá chayanguxêxê i guxüma i ngêma cumaxâ chaxueguxü —ñanagürü. <sup>16</sup>Rü yexguma yema nanegüwa nabajixächigu ga Acóbu, rü ñaxügu narüxînü: “Aixcümaxüchi Cori ya Tupana nanuxma i ñaa nachicawa, rü choma rü

tama nüxü íchacuax”, ñaxügu narüxîniü. <sup>17</sup>Rü poraäcü namuü. Rü ñaxügu narüxîniü: “Rü ñaa nachica rü naxüünexüchi. Rü daa nixí ya Tupanachiü. Rü daxüguxü i naanearü íäx nixí i ñaa nachica”, ñaxügu narüxîniü. <sup>18</sup>Rü moxüäcü paçmamaxüchi ínarüda ga Acóbu. Rü nanayaxu ga guma nuta ga namaxã nacüxeruüáci. Rü ínanatoxëxë nax wüxi ga cuaxruxü yixixüçax, rü chixü naétü naba yerü naxüüne ga yema nachica. <sup>19</sup>Rü yema nachicawa rü nüxcüma rü nayexma ga wüxi ga íane ga Lúxgu áégane. Natürü nüma ga Acóbu rü nanaxüchicüxü ga naéga ga yema nachica, rü Betélgu nanaxüéga. <sup>20-21</sup>Rü yema nachicawa rü Acóbu inaxuneta rü ñanagürü: —Ngëxguma Tupana choxü íxüümücügu, rü choxna nadauxgu i chorü namawa, rü choxna naxãxgu i chorü ñna rü chauxchiru, rü wena mea chaunatüçax choxü natáeguxëxgu, rü aixcümamaxüchi chorü Cori ya Tupana tá nixí. <sup>22</sup>Rü daa nuta ya cuaxruüxü nua chatoxëécü, rü Tupanapata tá nixí. Rü dücax, Pa Tupanax, rü guxüma i chorü ngëmaxügü i choxna cuxãxüwa rü guxügutáma cuxna chanaxã i ngëma diézmo i cuxna üxü —ñanagürü.

#### Acóbu rü Aráüanewa nangu

**29** <sup>1</sup>Rü Acóbu rü inixüchigü, rü düxwa yema duüxügü ga üaxcü ne üxüwaama yexmagüxüarü naanewa nangu. <sup>2</sup>Rü yema naanewa nüxü nadau ga wüxi ga puchu. Rü gumaxütagu narüngügü ga tomaepüxtücumü ga carnérgü, yerü guma puchuwa nixí ga naxaxegüxüxü. Rü guma puchu rü wüxi

ga nuta ga tacümaxã narüxüta. <sup>3</sup>Rü yexguma yexma naxítaquexegügu ga carnérgü, rü yema norü dauruügü rü ínanaxügachigüxü ga guma nuta nax norü carnérgü yaxaxegüxëxüçax. Rü ñüxüchi wenaxarü nanaxütaügüxü ga guma puchu. <sup>4</sup>Rü nüma ga Acóbu rü yema carnéruarü dauruügüna naca, rü ñanagürü: —¿Ngextáciäx pixígu i pemax, Pa Duüxügüx? —ñanagürü. Rü nümagü nanangãxügü rü ñanagürügü: —Toma rü Aráüanecüäxgu tixígu —ñanagürügü. <sup>5</sup>Rü yexguma ga Acóbu rü ñanagürü: —¿Nüxü pecuáxü i pema ya Labáü, ya Nacóxtaxa ixícu? —ñanagürü. Rü nümagü rü nanangãxügü rü: —Ngü, ngëmáacü nüxü tacuax —ñanagürügü. <sup>6</sup>Rü yexguma ga Acóbu rü wena ínicachigü rü ñanagürü: —¿Ñuxäcü yixixü i nümax? ¿Rü tama yadaawexü? —ñanagürü. Rü nümagü rü nanangãxügü rü ñanagürügü: —Tama nidaxawe rü taxuxüma nüxü naxüpetü. iRü dücax, rü yéa nadau! Rü yea iyixí i naxacü i Raqué l i ngürü carnérgümaxã ngéma ne ixü —ñanagürügü.

.....

<sup>9</sup>Rü yexguma yema carnérgüarü dauruügümaxã íyadexayane ga Acóbu, rü yéma ingu ga Raqué l namaxã ga ngínatüarü carnérgü, yerü ngíma nixí ga nüxna nadauxü.

.....

<sup>12</sup>Rü yexguma Acóbu ngímaxã nügü ixuxgu rü nüma rü Rebéca ngíne nax yixixü rü Labáütaxa nax yixixü, rü ngíma ga Raqué l rü íñaächí nax ngínatümaxã nüxü yanaxuxüçax. <sup>13</sup>Rü yexguma Labáü nüxü ínüchigagu ga

yéma nax nanguxĩ ga Acóbu ga naeyax ngĩne, rü paxa inañãchi nax íyadauãxĩ. Rü nüxna nanaixãchiãcũma nüxĩ narũmoxẽ, rü nüxĩ nachúxu. Rü nachiũwa nanaga. Rü yixcüamaxũra rü Acóbu nüxĩ nixu ga guxũma ga yema nanatũchiũwa nüxĩ ngupetũxĩ. <sup>14</sup>Rü Labáũ rü ñanagürü nüxĩ:  
—Aixcüamaxũchi cuma rü chautanũxũxĩchi quixĩ —ñanagürü. Rü wüxi ga tauemacü Labáũxũtawa nayexma ga Acóbu.

**Acóbu rü Raquélçax rü Léacax napuracü**

<sup>15</sup>Rü marü guma tauemacü ngupetũxguwena, rü Labáũ rü Acóbuxĩ ñanagürü: —Ngẽma nax chautanũxũ quixĩxũ, rü taxũtãma ngẽmacax ngetanũãcũma choxũ cupuracüechamare. iRü chomaxã nüxĩ ixu rü ñuxregu i cunaxwaxexũ nax cuxũ chanaxütanũxũ! —ñanagürü. <sup>16</sup>Rü nüma ga Labáũ rü nüxũ iyexma ga taxre ga naxacü. Rü yema rüyamaecü rü Léa nixĩ ga ngĩéga. Rü yema rübumaecü rü Raquél nixĩ ga ngĩéga. <sup>17</sup>Rü ngĩma ga Léa rü ingechaũetücüraxũ, natürü ga Raquél rü guxũwama imexechi. <sup>18</sup>Rü nüma ga Acóbu, rü Raquél iyixĩ ga yema ngĩxũ nangẽxẽecü. Rü yemacax Labáũxũ nangãxũ rü ñanagürü: —Ngẽma cuxacü i irübumaecü i Raquélçax rü tá 7 ya taunecü cuxũtawa chapuracü —ñanagürü. <sup>19</sup>Rü yexguma ga Labáũ rü nanangãxũ rü ñanagürü: —Narũmemae nax cuxna ngĩxũ chamuxũ rü tama i wüxi i duũxũ i tama nüxũ chachuáxũna. iRü nua chauxũtawa nangexma! —ñanagürü. <sup>20</sup>Rü yemaacü ga Acóbu rü 7 ga taunecü ngĩxcax napuracü ga Raquél. Natürü

Acóbuçax rü guma 7 ga taunecü rü tama nüxcücüraxũ nixĩ yerü poraãcü nüxĩ ingúchaũxũchi. <sup>21</sup>Rü yexguma marü yanguxgu ga guma 7 ga taunecü, rü nüma ga Acóbu rü Labáũmaxã nidexa rü ñanagürü: —iChoxna ngĩxũ namu i Raquél nax ngĩmaxã chaxãmaxũçax, erü marü chayanguxẽxẽ ya yima taunecügü ya nagu cumaxã chaxunetacü nax ngĩxcax chapuracüxũ! —ñanagürü. <sup>22</sup>Rü yexguma ga Labáũ rü naxacüxũ naxũchixü ga nax naxãtéxũ. Rü yemacax nüxna naxu ga guxũma ga duũxũgü ga norü ngaicamagu pegũxũ. <sup>23</sup>Natürü yema chũtaxũgu ga Labáũ, rü naxacü ga Léaxũ nayaga rü Acóbuxũ ngĩxũ napexẽxẽ. Rü yemaacü ga Acóbu rü ngĩmaxã namaxũ. ....

<sup>25</sup>Rü moxũãcü ga Acóbu rü nüxũ nacuax nax Léa yixixũ ga yema ngĩmaxã inapecü. Rü nuãcũma Labáũna nayaca, rü ñanagürü: —¿Taxacü chomaxã cuxü? ¿Tama ẽxna Raquélçax yixixũ ga cuxũ chapuracüxũ? ¿Rü tũxcüũ i ñuxma i choxũ cuwomüxẽxũ? —ñanagürü. <sup>26</sup>Rü Labáũ rü nanangãxũ rü ñanagürü: —Düçax, tama tocũma nixĩ nax ngẽma rübumaecüxĩra taxũtéxũ. <sup>27</sup>iËcü ínanguxẽxẽ i wüxi i yüxü nax yagüxũ i ngẽma ngĩchixü i Léa! Rü ngẽmawena tá nixĩ i cuxna ngĩxũ tamuxũ i Raquél, ega cuma rü curü me yixĩgu nax nai ya 7 ya taunecü choxũ cupuracüxũ —ñanagürü ga Labáũ. <sup>28</sup>Rü nüma ga Acóbu rü nanayaxu ga yema Labáũ namaxã nüxũ ixuxũ. Rü yexguma marü yagüegu ga Léachixü, rü nüma ga Labáũ rü Acóbuna ngĩxũ namu ga Raquél nax ngĩmaxã naxãmaxũçax. ....

<sup>30</sup>Rü yexguma ga Acóbu rü Raquélmāxā namaxũ. Rü woo nai ga 7 ga taunecü ngĩcax napuracü, natürü poraäcü ngĩxũ nangechaũama, Léaarü yexera.

### Acóbu nanegü

<sup>31</sup>Rü nüma ga Cori ya Tupana nüxũ nadau nax tama Léamaxā nataäxũ ga Acóbu. Rü yemaçax ga Tupana rü nanaxwaxe nax Acóbuaxũ naxāxacüxũ ga Léa. Natürü ga Raquéel rü ngĩxũ nangexacüxēxē. <sup>32</sup>Rü yemaçü ga Léa rü Acóbuaxũ ixāxacü, rü Rubéügu inaxüéga. (Rü ngēma naéga rü “Tupana choxũ nadau nax changechaũxũ”, ñaxũchiga nixĩ.) Rü yemagu inaxüéga yerü ñaxũgu irüxĩnũ: “Rü Tupana choxũ nadau nax changechaũxũ, rü ñuxma ya yimá chaute rü tá choxũ nangechaũ”, ngĩgürügü ga ngĩāxēwa. <sup>33</sup>Rü guma ngĩnewena rü wena ixāxacü ga Léa, rü guma rü Chimeúgu inaxüéga. (Rü ngēma naéga rü “Tupana choxũ naxĩnũ”, ñaxũchiga nixĩ.) Rü yemagu inaxüéga yerü ñaxũgu irüxĩnũ: “Tupana rü marü nüxũ naxĩnũ nax tama chomaxā nataāxēxũ ya chaute, rü ngēmaçax wena chaxāxacü”, ngĩgürügü ga ngĩāxēwa. <sup>34</sup>Rü wenaxarü ixāxacü, rü guma rü Lebígu inaxüéga. (Rü ngēma naéga rü “Chauxütawaama ngēmaxũ”, ñaxũchiga nixĩ.) Rü yemagu inaxüéga yerü ñaxũgu irüxĩnũ: “Rü ñuxma ya chaute rü chomaxā tá inarüxāũx, erü marü tomaepüxcüna nüxũ chaxāxacü”, ngĩgürügü ga ngĩāxēwa. <sup>35</sup>Rü wenaxarü Acóbuaxũ ixāxacü ga Léa, rü guma rü Yudágu inaxüéga. (Rü ngēma naéga rü “Tupanaxũ chicuaxũxũ”, ñaxũchiga

nixĩ.) Rü yemagu inaxüéga yerü ñaxũgu irüxĩnũ: “Rü ñuxma rü tá Tupanaxũ chicuaxũxũ”, ñaxũgu irüxĩnũ. Rü yemawena rü iyangeyexacti.

.....

**30** <sup>22</sup>Natürü ga Tupana rü ngĩxna nacuaxāchi ga Raquéel, rü nüxũ naxĩnũ ga ngĩrü yumüxē. Rü yemaçax ga Tupana rü ngĩxũ naxāxacüxēxē. <sup>23-24</sup>Rü yexguma naxāxacügu namaxā ga guma nüxĩraxücü ga ngĩne rü ngĩgürügü: —Tupana rü marü choxna nanayaxu ga yema guxchaxũ ga noxri namaxā changexacüxũ. Rü chierüna choxũ nangexmagu ya nai ya chaune —ngĩgürügü. Rü yemaçax Yúhegu inaxüéga. (Rü ngēma naéga rü “Chierüna choxũ nangexmagu ya nai”, ñaxũchiga nixĩ.)

### Guxchaxũgü nügümaxā naxüe ga Acóbu rü Labáũ

<sup>25</sup>Rü yexguma Yúchemaxā nadoxmexguwena ga Raquéel, rü Acóbu rü Labáũxũ ñanagürü: —iChoxũ ingex nax wena chauchiüanecax chatáeguxũcax! <sup>26</sup>Rü ngēmaçax chanaxwaxe i choxna cuxāga nax chayagagüxũcax i chaunegü rü choxmaxgü yerü yemagüçax nixĩ ga cuxütawa chapuracüxũ. Rü cuma rü meama nüxũ cucuax nax ñuxäcü mea chayangüxēxũ ga yema puracü ga cuxũ chaxüxũ —ñanagürü. <sup>27</sup>Natürü nüma ga Labáũ rü nanangāxũ rü ñanagürü: —¿Taxüchima cuxũ namexũ nax nua chauxütawa cungexmaxũ? Erü meama nüxũ chacuax nax cugagu yixĩxũ i Cori ya Tupana poraäcü choxũ rüngüxēxēxũ. <sup>28</sup>iRü chomaxā nüxũ i xu i ñuxre nixĩ i

cunaxwaxexũ nax cuxũ chanaxütanũxũ!  
 Rũ ngẽma cuma naxçax ícuçaxaxũexpũx  
 tá nixĩ i cuxũ chanaxütanũxũ  
 —ñanagürü. <sup>29</sup>Rũ yexguma ga Acóbu rü  
 nanangãxũ, rü ñanagürü nüxũ: —Cuma  
 rü meama nüxũ cucuax nax ñuxãcü  
 poraãcü cuxũ chapuracũxũ rü meama  
 cuxũ nüxna chadauxũ ga cuxũnagũ. <sup>30</sup>Rũ  
 yema noxretama ga cuxũnagũ ga cuxũ  
 yexmaxũ ga yexguma noxri nua  
 changuxgux, rü ñuxma rü  
 poraãcüxüchima cuxũ nimu. Yerü  
 yexguma noxri nua changuxgucürüwa  
 nixĩ ga Tupana ga poraãcü cuxũ  
 nangũxẽxũ. ¿Natürü ñuxgu tá nixĩ i  
 chauxacügüçaxicatama chapuracũxũ?  
 —ñanagürü. <sup>31</sup>Rũ yexguma ga Labáũ rü  
 nüxna nicachigüama rü ñanagürü:  
 —¿Ñuxre nixĩ i cunaxwaxexũ nax cuxũ  
 chanaxütanũxũ? —ñanagürü. Rũ  
 yexguma ga Acóbu rü nanangãxũ, rü  
 ñanagürü: —Tama chanaxwaxe i choxũ  
 cunaxütanũ. Rũ choma rü wena tá nüxna  
 chadau i cuxũnagũ ega curü me yixĩgu i  
 ñaa tá cumaxã nüxũ chixuxũ. <sup>32</sup>iRũ  
 choxũ imucuchi natanügu i cuxũnagũ  
 nax chayadexechixũçax i guxũma i  
 ngẽma carnéruxacügü i wẽxẽxũ, rü  
 guxũma i cábraxacügü i ãmatũxũ rü  
 murutagũxũ! Rũ ngẽmamaxã tá nixĩ i  
 choxũ cunaxütanũxũ. <sup>33</sup>Rũ ngẽmaãcü  
 ega yixcũra chauxütawa ícuyadauxgu i  
 ngẽma choxũ ngẽmaxũ rü nüxũ  
 ícuyangauxgu i carnéru i cómũxũ,  
 rüxna cábra i tama ãmatũxũ, rü  
 ngẽmawa tá nüxũ cucuax nax cuxũ  
 changĩxũ —ñanagürü. <sup>34</sup>Rũ Labáũ  
 nanangãxũ rü ñanagürü: —Marü name  
 nixĩ i ngẽma nüxũ quixuxũ —ñanagürü.

.....

<sup>43</sup>Rũ yemaacü ga Acóbu rü nimuarü  
 yemaxũãx. Rũ nimu ga norü carnérugü  
 rü caméyugü rü búrugü rü norü  
 duũxũgü ga nüxũ puracũxũ ga yatũxũ  
 rü ngexũ.

**Acóbu nagu narüxinũ nax  
 bexma Labáũna yaxũxũ**

**31** <sup>1</sup>Natürü nüma ga Acóbu rü  
 nüxũ nacuáchiga ga Labáũ  
 nanegü rü nachiga nax yadexagũxũ rü  
 ñagũxũ: —Acóbu rü nügũxũ nanade i  
 guxũma ga tanatüarü íxixũ, rü  
 ngẽmamaxã nixĩ i ñuxma i namuarü  
 ngẽmaxũãxũ —ñanagürügü. <sup>2</sup>Rũ  
 yexgumarũxũ ta ga Acóbu, rü nüxũ  
 nacuaxama rü Labáũ rü tama  
 noxrigurũxũ namaxã nataãxẽ. <sup>3</sup>Rũ  
 yemaçax ga Cori ya Tupana rü Acóbuxũ  
 ñanagürü: —iNatáegu naxçax i ngẽma  
 cunatüarü naane i ngextã  
 ínangexmagũxũwa i cutanũxũgü! Rũ  
 choma rü tá cuxũ íchixümücü  
 —ñanagürü. <sup>4</sup>Rũ yexguma ga Acóbu rü  
 ngĩxçax nangema ga Raquél rü Léa nax  
 naxütawa naxĩxũçax ga yema norü  
 carnérugüna ínadauxũwa. <sup>5</sup>Rũ ñanagürü  
 ngĩxũ: —Nüxũ chicuaxãchi rü yimã  
 penatü rü marü tama noxrürũxũ mea  
 choxũ nadawenü. Natürü ya  
 chaunatüarü Tupana rü guxũguma  
 nachauxütagu. <sup>6</sup>Pema rü meama nüxũ  
 pecuax nax ñuxãcü penatüaxũ meama  
 chapuracũxũ. <sup>7</sup>Rũ nüma rü  
 muexpũxcũna choxũ nawomũxẽxẽ rü  
 guxũguma nayaxüchicüüchigü ga chorü  
 natanü. Natürü ga Tupana rü tama nüxũ  
 nanaxwaxe nax taxacürü chixexũ  
 chomaxã naxũxũ.

.....

<sup>13</sup>Rü ngēmacax ya Tupana rü norü orearü ngeruxü i daxücüāxwa choxü ñanagürü: “Choma nixi ya Tupana ga cuxcax changóxü ga BetéIwa ga yéma chíxümaxā ícunabaétüüwa ga guma nuta rü chomaxā ícuxunetaxüwa. iRü ngixā, rü inachi, rü natáegu naxcax ga yema naane ga nagu cubuxü!” ñanagürü choxü ga Tupana. <sup>14</sup>Rü yexguma ga RaquéI rü Léa rü inangāxügü, rü ngīgürügügü: —Toma rü marü nataxuma i taxacü i toxna üxü i tonatüxütawa —ngīgürügügü. ....

#### Acóbu rü Padáü-aráüwa ínaxüxü

<sup>19</sup>Rü yexguma toxnamana norü carnérugüarü yoütaxawa naxüyane ga Labáü, rü ngíma ga RaquéI rü yoxni naxcax ingix ga ngínatüarü tupanachicünaxägü ga nutagünaxcax. <sup>20</sup>Rü nüma ga Acóbu rü tama naxtümamaxā nüxü nixu ga nax yaxüxchaüxü. Rü yemaacü nixi ga naxtü ga Labáü ga Araméutanüxüxü nawomüxëxü ga Acóbu. <sup>21</sup>Rü nixümare namaxā ga guxüma ga yema nüxü yexmaxü. Rü paxama nawa nangu ga yema natü ga Euférate. Rü nixüie rü nixüchigü ñuxmata ga maxpúneanexü ga Garaáxgu áégaxüwa nangu.

#### Acóbuwe nangé ga Labáü

<sup>22</sup>Rü tomaepüx ga ngunexüguwena rü Labáü rü nüxü nacuáchiga ga nax yaxüxü ga Acóbu. <sup>23</sup>Rü yemacax ga Labáü rü natanüxügümaxā Acóbuwe nangé. Rü 7 ga ngunexügüguwena nüxü inayangau nagu ga yema máxpüxanexü ga Garaáxgu áégaxü. <sup>24</sup>Natürü yema

chütaxügu rü Tupanagu naxānegü ga Labáü ga Araméutanüxü. Rü Tupana rü ñanagürü nüxü: —iDücax, choxü irüxínü! Rü tama chanaxwaxe i nuäcü namaxā quidexa ya Acóbu —ñanagürü. <sup>25</sup>Rü Labáü rü Acóbuxü inayangau nagu ga yema máxpüxanexü ga Garaáxgu áégaxü ga Acóbu nagu rüngüxü. Rü yematama máxpüxanexüarü tuächigu nixi ga nangügüxü ga Labáü rü natanüxügü. <sup>26</sup>Rü Labáü rü poragaäcü Acóbuna naca, rü ñanagürü: —¿Taxacü ícuxü? ¿Rü tüxcüü choxü cuwomüxëxé? ¿Rü tüxcüü ñoma curü uanü ícuyauxüürüxü chauxacügüxü quigagü? <sup>27</sup>¿Rü taxacüçax choxü cuwomüxëxé rü bexma cúäcü quixü? Rü yexguma chi mea nüxü chacuaxgu nax íquixüxchaüxü rü chi taāxëäcü cuxü ichamuächü rü cuxü chi chapaxpüne tutumaxā rü árpamaxā. <sup>28</sup>Rü woo ga yema chauxacügü rü chautagü rü bai nüxü chachüxácüma namaxā quixümare. Rü ñoma wüxi i duüxü i naechitamare maxüürüxü quixi. <sup>29</sup>Rü taxuxüma choxü naguxcha ega chi chanaxwaxegu nax pexü chadäixü. Natürü ngewax chütacü rü cunatüarü Tupana chomaxā nidexa, rü ñanagürü choxü: “iDücax, choxü irüxínü! Rü tama chanaxwaxe i nuäcü Acóbumaxā quidexa”, ñanagürü choxü. <sup>30</sup>Natürü ngëxguma cunaxwaxexüchixgu nax cunatüçax cutáeguxü rü ngēmacax yixüga nax quixüxü i ñuxma çrü tüxcüü i chorü tupanachicünaxägüçax cungixü? —ñanagürü. <sup>31</sup>Rü yexguma ga Acóbu rü Labáüxü nangāxü rü ñanagürü: —Tama cumaxā nüxü chixu yerü chamüü, rü choma nüxü chacuaxgu rü choxna chi

ngĩxũ cupuxũéga ga cuxacügü. <sup>32</sup>Natürü ngëxguma chi wüxi i ñaa chorü duũxũgüxũtawata nüxũ icuyangauxgu i ngëma curü tupanachicünaḡägü, rü name nixĩ i noxtacüma nayu. Rü ñaa tatanüxũgü nixĩ i tüxũ ñnüxũ. iRü chomaxã nüxũ ixu rü taxacü nixĩ i ngëma curü ngëmaxũ i chauxũtawata ngëxmaxũ! iËcü yange ega nüxũ icuyangauxgu! —ñanagürü. Natürü nüma ga Acóbu rü tama nüxũ nacuxḡ ga Raquél yixĩxũ ga naxcḡ ngĩxcü ga yema ngĩnatüarü tupanachicünaḡägü. <sup>33</sup>Rü nüma ga Labáũ rü Acóbutatagu naxücu nax naxcḡ nadauxũcḡ ga norü tupanachicünaḡägü. Rü yexgumarüxũ ta Léapatagu rü yema taxre ga naxũtaxũgüpatagu naxücu, natürü taxuxũma inayangau. Rü yexguma Léapatatawata ínaxũxũxgu rü Raquélpatagu nayaxücu. <sup>34</sup>Natürü ngĩma ga Raquél rü inada ga yema ngĩnatüarü tupanachicünaḡägü rü caméyutawaarü tochicaxũtüũgu iyacuxgü. Rü naétüwa irüto. Rü Labáũ rü ngĩpatachiägu naxcḡ nadau, natürü taxuxũma inayangau. <sup>35</sup>Rü yexguma ga Raquél rü ngĩgürügü nüxũ: —Pa Papáx itaxú i cunuxũ ega tama ichachixgu i cupexewa! Erü ñuxma rü chorü daawewa changexma —ngĩgürügü. Rü yemaacü ga Labáũ rü naxcḡ nidauchigüama ga norü tupanachicünaḡägü, natürü taxuguma nüxũ inayangau. ....

**Acóbu rü Labáũ nügümaxã inaxügagü**

<sup>43</sup>Rü yexguma ga Labáũ rü Acóbuxũ nangãxũ rü ñanagürü: —Ngëma

cuxmaxgü rü chauxacügü iyixĩ, rü ngëma cuxacügü rü chautaaügü nixĩ. Rü ngëma carnérugü rü choxrügü nixĩ rü guxũma i nua nüxũ cudauxũ rü choxrügü nixĩ. ¿Natürü ñuxácü taxacürü chixexũ namaxã chaxü i chauxacügü rü ngĩnegü? <sup>44</sup>iRü ñuxma rü nua naxü rü ngĩxã mea yigümaxã tanamexëxë nax ngëxma yanaxoxũcḡ i guxũma i guxchaxũgü! —ñanagürü. <sup>45</sup>Rü yexguma ga Acóbu rü nanayaxu ga wüxi ga nuta ga tacü rü yéma nanatoxëxë. <sup>46</sup>Rü nüma ga Acóbu rü natanüxũgüxũ ñanagürü: —iGuxãma rü nuta ne penade rü wüxigu penaxãuxchita! —ñanagürü. Rü nüma ga natanüxũgü rü nuta ne nanade rü yexma nanaxãuxchita. Rü ñuxũchi guma nuta ga yexma ãuxchitacüxũtawata nachibüe ga Acóbu rü Labáũ. ....

<sup>52</sup>Rü nüma ga Labáũ rü ñanagürü Acóbuxũ: —Dücaḡ, daa nutagü rü wüxi i cuḡxruxũ nixĩ i cuxcḡ rü chauxcḡ nax taxucürüwa yimã nutaxũ ichopetüxũcḡ nax taxacürü chixexũ yigümaxã ixüxũcḡ. <sup>53</sup>Rü curü oxü ya Abraüarü Tupana rü chorü oxü ya Nacóxarü Tupana ta ixĩcü rü tüxũ poxcúxe ya ngexerüxúxe i yixema ega tama yanguxëxgu i ñaa yigümaxã ixunetaxũ —ñanagürü ga Labáũ. Rü yexguma ga Acóbu rü yimã Tupana ga nanatü ga Ichaã nüxũ icuḡxũxũcügëgagu inaxuneta. <sup>54</sup>Rü ñuxũchi ga Acóbu rü yexma guma maxpúnegu nanadai ga ñuxre ga naxũnagü rü ñuxũchi Tupanacḡ ínanagu. Rü guxũma ga natanüxũcḡ naca nax nachibüexũcḡ. Rü yemaacü guxũma nachibüe rü



yexma maxpúnegu napegü ga yema chütaxügu. <sup>55</sup>Rü moxüãcü paɣmamaxüchi rü Labáü ínarüda rü nataagü rü naxacügü tüxü nimeãxëgü. Rü ñuxüchi Tupanaégagu mexü tümamaxã naxuegu. Rü yemawena nachixüanecax natáegu.

**Acóbu rü Echaú nügümaxã inarüxi**

**32** <sup>1</sup>Rü nüma ga Acóbu rü inixüchigüama. Rü namagu nüxü nangau ga ñuxre ga daxücüãx ga Tupanaarü orearü ngeruügü. <sup>2</sup>Rü yexguma Acóbu nüxü daxuɣu rü ñanagürü: —Ñaagü rü Tupanaarü churaragü nixí —ñanagürü. Rü yemacax Maanaígu nanaxüéga ga yema nachica. <sup>3</sup>Rü Acóbu rü inanamuãchitanü ga ñuxre ga norü duüxügü nax Cheíarü naanewa ga Edóüwa naxixücax nax naenexë ga Echaúmaxã nüxü yanaxugüxücax ga yéma tá nax nanguxü. <sup>4</sup>Rü ñaa dexamaxã yéma nanamugü: “Ñapegürü tá nüxü ya chauenexë ya Echaú: ‘Cuenexë ya Acóbu ya curü duüxü ixícü rü cuxü narümoxë. Rü marü ñuxre ya taunecü rü tóru tutü ya Labáüxütawa chayexma. Rü ñuxma rü marü nüxna íchaxüxü. <sup>5</sup>Rü choxü nangexma i chauxünagü i wocagü rü búrugü rü carnérugü rü chorü duüxügü iyatüxügü rü ingexügü. Rü ngëmacax chaugüpeɣegu cuxcax ngëma chanamugü i chorü duüxügü nax cumaxã nüxü yanaxugüxücax i ñaa chorü ore nax marü chatáeguxü. Rü chierüna mea choxü cuyauxgu i ngëxguma cuxütawa changuxgu’, ñapegürü tá”, ñanagürü ga Acóbu. <sup>6</sup>Rü yexguma marü Acóbucax nawoeguxgu

ga norü duüxügü, rü ñanagürügü: —Marü naxütawa tangugü ya cuenexë ya Echaú. Rü nüma rü tá nua naxü nax nümatama cuxü íyadauxücax namaxã i 400 i norü duüxügü —ñanagürügü. <sup>7</sup>Rü yexguma yemaxü naxínigu ga Acóbu, rü poraacü namuü rü naxoegaãxë. Rü yemacax taxregu nayatoye ga norü duüxügü rü norü carnérugü rü wocagü rü caméyugü. <sup>8</sup>Yerü ñaxügu narüxínü: “Ngëxguma Echaú nua nguxgu rü ngürüächi nadaiãxgu i ngëma wüxíticumü i duüxügü, rü ngëma totíticumü rü yoxni nibuxmü”, ñaxügu narüxínü. <sup>9</sup>Rü ñuxüchi inanaxügü ga nax nayumüxëxü, rü ñanagürü: “Pa Cori Pa Tupana ya Chorü Oxi ya Abraáüarü Tupana rü Chaunatü ya Ichaáarü Tupanax, cuma rü marü chomaxã nüxü quixu nax chorü naanecax rü chautanüxügücax chatáeguxü rü cuma rü tá mea choxna cudauxü. <sup>10</sup>Choma rü taxuwama chame nax ngëmaãcü chomaxã cumecümamaxü rü aixcüma mea choxü curüngüxëxëxü. Rü yexguma noxri chaunatüna íchaxüxüɣux rü ñaatama Yudáü i natüwa chixüegu rü taxuxüma choxü nayexma rü chorü naixmenãxãicatama. Natürü i ñuxma nax chatáeguxü rü choxü nangexma i taxreticumü i muxü i duüxügü. <sup>11</sup>Rü ñuxma rü cuxna chaca rü chanaxwaxe i choxü ícupoxü nüxna ya chauenexë ya Echaú. Rü nüxü chamuü erü ngürüächi nuxã toxü nayadai rü ngëmaãcü tüxü nadai ya choxmaxgü rü chauxacügü. <sup>12</sup>Cuma rü marü meama chomaxã nüxü quixu rü tá choxna nax cudauxü nax ngëmaãcü taxuxüma choxü üpetüxü rü ngëmaãcü i chautaaü rü ñoma

taxtūpechinūwa ngēxmacū ya naxnūcūtēxerūxū namuxūchixūcax, rü ngēmaācū düxwa taxucūriwa texé yaxugūxūcax”, yemaacū nayumūxē. <sup>13</sup>Rü yema chūtaxūgu rü Acóbu rü yexmatama nape. Rü nüxū nidaugū ga naxūnagū rü yematanūwa nayadexechi ga naenexē ga Echaúarū āmareruxū. <sup>14-15</sup>Rü nayamugū ga 200 ga chībugū ga ingexū, rü 20 ga chībugū ga iyatūxū, rü 200 ga carnérugū ga ingexū, rü 20 ga carnérugū ga iyatūxū, rü 30 ga caméyugū ga yexwacax buexacūxū, rü 40 ga wocagū, rü 10 ga wocaxacūgū ga yexwacax yaexū, rü 20 ga búrugū ga ingexū rü 10 ga búrugū ga iyatūxū. <sup>16</sup>Rü ñuxūchi norū duūxūgūna nanamugū ga wūxitūcumūchigū, rü ñanagürü nüxū: —iCū, chopēxegu namaxā pexī, rü pegūna tá piyáxūguetanūxū namaxā i wūxitūcumūchigū! —ñanagürü. <sup>17-18</sup>Rü yema nüxíra inamuāchixū ga norū duūxū, rü nanaxucuxē, rü ñanagürü nüxū: —Ngēxguma tá cuxū iyangauxgu ya chauenexē ya Echaú, rü cuxna nacaxgu: “Rü texe nixī ya curū cori, rü ngextā cuxū, rü texéarūgū nixī i ñaa naxūnagū i quigagūxū”, rü cuma rü tá ñaācū cunangāxū: “Pa Chorū Cori ya Echaúx, rü ñaa rü wūxi i curū āmare nixī i cuxcax nua namuxū ya curū duū ya Acóbu. Rü nüma rü toweama ne naxū” ñacurūgū tá —ñanagürü ga Acóbu. <sup>19</sup>Rü yexgumarūxū ta ga yema togū ga duūxūgū ga inamuāchigūxū rü ñanagürü nüxū: —iNgēxguma tá pexū inangauxgu ya Echaú, rü ngēmatama orexū namaxā pixu! <sup>20</sup>Rü ñapegū nüxū: “Acóbu ya cuenexē ya cuxū ngechaūcū

rü toweama ne naxū”, ñapegū nüxū! —ñanagürü ga Acóbu. Rü yemaacū nayaxucuxē ga yema duūxūgū, yerū ñaxūgu narūxínū: “Ñaa āmaregū i chopēxegu chimugūxūmaxā tá chanangūxmūxēxē ya chauenexē. Rü ngēmawena rü chomaxūchi tá nüxū chadau. Rü bexmana ngēmaācū tá mea choxū nayaxu”, ñaxūgu narūxínū. <sup>21</sup>Rü yemaacū ga yema āmaregū rü nüxíra nūgūpēxegu nayamugū. Rü nüma ga Acóbu rü yexmatama nape ga yema chūtaxūgu.

**Acóbu rü wūxi ga Tupanaarū orearū ngeruxū i daxūcūāxmaxā nūgū nawogū**

<sup>22-23</sup>Rü yematama ga chūtaxūgu rü inarūda ga Acóbu, rü tüxū namuāchitanū ga guxema taxre ga naxmax rü yema taxre ga naxūtaxū, rü guma 11 ga nanegū. Rü wūxigu, namaxā ga guxūma ga norū yemaxūgū, tüxū nimuū nawa ga yema natū ga Yudáuarū nuxtamaxū ga Yabógu āégaxū. <sup>24</sup>Rü yexguma Acóbu nüxicatama yéma yaxūāchigu, rü wūxi ga duūxū namaxā nūgū nawogū rü ñuxmata yangunemare. <sup>25</sup>Natürü yema duūxū rü nüxū nacūcax ga tama Acóbuxū nax naporamaexū. Rü yemacax düxwa Acóbutacugu nidagū, rü nanatūxūchitacu ga yexguma nūgū inawogūgu. <sup>26</sup>Rü yexguma ga yema duūxū rü ñanagürü Acóbuxū: —iChoxū ingex erū marū ningóonechaū! Rü yexguma ga Acóbu rü nanangāxū rü ñanagürü: —Ngēxguma taxūtáma mexū chomaxā cuxuegūxgu, rü taxūtáma cuxū chingex —ñanagürü. <sup>27</sup>Rü Acóbuna naca ga yema duūxū rü ñanagürü:

—¿Taxacü nixí i cuéga? —ñanagürü. Rü Acóbu nanangāxũ, rü ñanagürü:

—Acóbu nixí i chauéga —ñanagürü.

<sup>28</sup>Rü yexguma ga yema duũxũ ga nügü namaxā inawogüxũ, rü ñanagürü nüxũ:

—Ñuxma rü marü taxütáma Acóbu nixí i cuéga. Rü Iraé tá nixí i cuéga i

ñuxmax, erü Tupanamaxā rü

duũxũgümaxā cugü icuwogü rü tama

choxũ quingex ñuxmata mexũ cumaxā

chaxuegu —ñanagürü. <sup>29</sup>Rü yexguma ga

Acóbu rü nüxí nüxna naca rü ñanagürü:

—Ñuxma chanaxwaxe i chomaxā nüxũ quixu ¿rü taxacü nixí i cuéga?

—ñanagürü. Natürü ga yema duũxũ rü

nanangāxũ rü ñanagürü: —¿Tüxcüü

nüxũ cucuáxchaxũ i chauéga?

—ñanagürü. Rü ñuxüchi ga yema duũxũ

rü yexgumatama Acóbumaxā mexũ

naxuegu. <sup>30</sup>Rü yexguma ga Acóbu rü

Penuégu nanaxüéga ga yema nachica.

Rü ngéma naéga rü “Tupanachiwexũ

chadau”, ñaxüchiga nixí. Rü yemagu

nanaxüéga yerü ñanagürü: —Rü woo

Tupanachiwexũ chadau, natürü

chamaxama —ñanagürü.

.....

**Acóbu rü Echaú nügümaxā narüngüxmüe**

**33** <sup>1</sup>Rü yexguma Acóbu rü Echaúxũ nadauxgu ga yéma

nax ne naxüxũ namaxā ga 400 ga norü

duũxũgü, rü nüma ga Acóbu rü tüxũ

nitoye ga guxema naxacüxägü ngímaxā

ga Léa rü Raquéel rü guxema taxre ga

naxütaxügü. <sup>2</sup>Rü wixpexewa tüxũ

naxügüxexē ga naxütaxügü

tümaxacügümaxā, rü guxemagüwe ga

Léa ngíxacüãxmaxā. Rü Léawe naxāxũ

ga Raquéel namaxā ga ngíne ga Yúche.

<sup>3</sup>Rü nüma ga Acóbu rü norü

duũxũgüpegegu nixũ. Rü 7 expüxcüna

waixümügu nayangücuchi ñuxmata

naenexëarü ngaicamána nangu. <sup>4</sup>Natürü

ga Echaú rü Acóbucax niña rü nüxna

nayanaixächi rü nüxũ nachúxu. Rü

nügümaxā naxauxe.

.....

<sup>18</sup>Rü Acóbu, rü yexguma

Padáũ-Aráüanewa ne naxüxgu, rü

taxuxüma nüxũ naxüpetü rü mecü

Canaáüanewa nangu. Rü íane ga

Chiquéüarü toxmaxtawa nangu rü yéma

nayexma. <sup>19</sup>Rü 100 tachinü ga diëru

naxcax nataxe ga wüxi ga naane

naxütawa ga Amúru nanegü. Rü nüma

ga Amúru rü Chiquéü nanatü nixí. Rü

nüma ga Acóbu rü yexma naxächiügü.

<sup>20</sup>Rü ñuxüchi nanaxü ga wüxi ga

ãmarearü guchicaxũ rü Erué-Iraé ga

Iraéarü Tupanagu nanaxüéga.

.....

**Tupana rü íane ga Betélwa mexũ**

**Acóbumaxā naxuegu**

**35** <sup>1</sup>Rü yexguma ga Tupana rü íane ga Chiquéüwa rü Acóbuxũ

ñanagürü: —iCugü namexëxē rü

inaxüãchi nax Betélgu cuyaxächiüxücax!

iRü ngëxma chauxcax naxü i wüxi i

ãmarearü guchicaxũ nagu ga yema

nachica ga nawa cuxcax changóxũ ga

yexguma cuenexē ga Echaúchaxwa

quixüxgu! —ñanagürü. <sup>2</sup>Rü yexguma ga

Acóbu rü naxmaxgümaxā rü guxüma ga

norü duũxũgümaxā nidexa, rü ñanagürü

nüxũ: —iÍpenanúxüx i guxüma i perü

tupanachicünaxägü rü nua penana nax

ínawogüxücax! iRü ñuxüchi pegü

pexaiyagü rü to i pexchiru i

ngēmataxũgu picuxgũ! <sup>3</sup>iRũ ngĩxã rü paxa itaxĩachi nax Betélwa ixĩxũ! Erü ngëxma tá chanaxü i wüxi i ãmarearü guchicaxũ naxçax ya Tupana ga guxũwama ga ngextá íchaxũxüwa choxũ íxümücücü rü choxũ rüngũxëxëxcü ga yexguma guxchaxüwa chayexmagu —ñanagürü. <sup>4</sup>Rü yexguma ga yema duũxũgü, rü Acóbuxütawa nanana ga guxũma ga norü tupanachicünaxãgü rü yema naxmachinügü ga norü tupanagüarü cuaxruũgü ixĩgũxũ. Rü ñane ga Chiquéũarü ngaicamána rüxüxüne ga castáñatüũgu Acóbu inanataxgü ga yema tupanachicünaxãgü. <sup>5</sup>Rü yexguma inaxĩachigu ga Betélwa nax naxĩxũçax, rü Tupana rü guxũma ga yema ñanegücüãx ga namawa yexmagüxüãëwa ínananguxëxë ga muũ nax tama Acóbu nanegüwe nangëgüxũçax. <sup>6</sup>Rü Acóbu rü guxũma ga yema duũxũgü ga namaxã ixĩxũ, rü meama Canaáũanewa yexmane ga ñane ga Lúxgu áeganewa nangugü. Rü to ga naéga rü Betél nixĩ. <sup>7</sup>Rü yexma nanaxü ga wüxi ga ãmarearü guchica rü El-Betélgu nanaxüéga, yerü yexguma naeneechaxwa yaxũxgu, rü yéma nixĩ ga Tupana naxçax ngóxũ.

.....

<sup>9</sup>Rü yexguma Padáũ-aráũanewa ne naxũxgu ga Acóbu, rü Tupana rü Betélwa wenaxarü naxçax nangox, rü mexũ namaxã naxuegu. <sup>10-11</sup>Rü ñanagürü: “Cuma rü Acóbu nixĩ i cuéga. Natürü i ñuxma rü marü taxütáma ngëma nixĩ i cuéga erü ñuxmacürüwa wü Irae tá nixĩ i cuéga”, ñanagürü. Rü yemawena ga Tupana rü ñanagürü:

“Choma nixĩ ya Tupana ya guxũétüwa changexmaxũ. iRü yamu ya cunegü rü cutaagü! Rü cuwa tá nangox i wüxi i nachixũane rü muxũnetáma ya ñanegü. Rü cutaagütanüwa tá nangexma i ãëxgacügü. <sup>12</sup>Rü ñaa naane ga Abraáũ rü Ichaána chaxãxũ, rü cuxna rü ta chanaxã. Rü cuwena rü tá cutaagüna chanaxã”, ñanagürü ga Tupana.  
.....

### Iyu ga Raquél

<sup>16</sup>Rü yemawena rü Betélwa inaxĩachi nax ñane ga Efrátawa naxĩxũçax. Natürü yexguma Efrátaxũ yangaicagügu rü ga Raquél rü ixíraxacüama. Rü tama mexũ ngĩxũ nangupetü. <sup>17</sup>Rü yexguma tama paxa yéma naxíraxacüxgu rü düxwa ngĩma ga yema ngĩrü dauruxũ rü ngĩxũ ngĩgürügü: —iYaxna naxĩnü erü to i yatüxũ i cuxacü cuxũ naxíra! —ngĩgürügü. <sup>18</sup>Natürü ngĩma ga Raquél rü marü ituraxüchi rü yaxna irüngü rü: —Benóni nixĩ ya yimá õxchana —ngĩgürügü. Natürü ga nanatü ga Acóbu rü Bëyamígu tanaxüéga. <sup>19</sup>Rü yemaacü nixĩ ga nayuxũ ga Raquél. Rü yema nama ga Efrátawa nadaxũgu ngĩxũ nataxgü. (Rü guma ñane ga Efráta rü ñuxma rü Beréügu naxáéga.)

.....

### Acóbu nanegü

<sup>22-23</sup>Rü Acóbu nanegü rü 12 nixĩgü. Rü guma Léawaũgücü rü Rubéũ nixĩ ga Acóbu nane ga yacü. Rü naeneegü rü Chimeú, rü Lebí, rü Yudá, rü Ichacá, rü Chaburóũ nixĩgü. <sup>24</sup>Rü guma Raquélwaũgücü rü Yúche rü Bëyamí nixĩgü. <sup>25</sup>Rü guma Raquélütaxũ ga

Bírawaũgücü rü Dáũ rü Netarí nixĩgü.  
 26Rü guma Léaxũtaxũ ga  
 Chípawaxũgücü rü Gáx rü Aché nixĩgü.  
 Rü gumagü nixĩ ga Acóbu nanegü ga  
 Padáũ-aráũanegu buexũ.

### Ichaáaru yuxchiga

27Rü nüma ga Acóbu rü nanatü ga  
 Ichaáxũ inayadau ga Máũrewa. Rü  
 guma ñane rü namuéga. Rü Árba nixĩ ga  
 wüxi rü Ebróũ nixĩ ga to. Rü yexma nixĩ  
 ga naxáchiũgüxũ ga Abraáũ rü Ichaá.  
 28Rü nüma ga Ichaá rü nüxũ nayexma  
 ga 180 ga taunecü ga yexguma  
 nayuxgux. 29Rü yexguma marü  
 nayaxüchigu nixĩ ga nayuxũ rü  
 natanüxũgütanüwa naxuxũ. Rü nanegü  
 ga Echaú rü Acóbu rü inanaxgü.

.....

**37** 1Rü nüma ga Acóbu rü  
 Canaáũanegu naxáchiũ ga  
 ngextá nanatü ga Ichaá ũpaacü  
 itaxáchiũxũgu.

### Yúche rü naeneegü

2Rü ñana nixĩ i nachiga i Acóbutanüxũ.  
 Rü yexguma nane ga Yúche 17 ga  
 taunecü nüxũ yexmagu, rü nüma rü  
 carnérugüaru dauruxũ nixĩ wüxigu  
 namaxã ga naeneegü ga  
 nanatüxũtaxũgü ga Bira rü  
 Chípawaxũgüxũ. Rü nüma ga Yúche rü  
 nanatümaxã nüxũ nayarüxugüxũ ga  
 naeneegüchiga nax chixexũ naxügüxũ.  
 3Rü nüma ga Acóbu ga Iraégu áegacü,  
 rü poraacü Yúchexũ nangechaũ guxüma  
 ga togü ga nanegüaru yexera yerü  
 yexguma marü nayaxgu ga Acóbu nixĩ  
 ga nabuxũ ga Yúche. Rü yemaçax ga  
 nanatü rü nüxũ tanaxü ga wüxi ga

naxchiru ga mápaxũ ga mexechixũ.  
 4Natürü yexguma naeneegü nüxũ  
 icuaxáchitanügu nax norü yexera  
 Yúchexũ tangechaũxũ ga nanatü, rü  
 yemaçax Yúchechi naxaie, rü tama nüxũ  
 narümoxégüchaũ. 5-6Rü wüxi ga  
 chütaxũ ga Yúche, rü naxãnegü, rü  
 naeneegümaxã nüxũ nixu ga yema  
 nanegü. Natürü ga naeneegü rü  
 yexeraãcü naxchi naxaie, yerü ga Yúche  
 rü ñanagürü nüxũ: —Iperüxinüe rü tá  
 pemaxã nüxũ chixu i ngéma chaunegü!  
 7Rü nagu chaxãnegü nax guxãma i  
 yixema rü wüxi i tríguncüwa  
 ingexmagüxũ rü inagoxüçütaxũ. Natürü  
 i ngéma choxrü cüta rü ngürü  
 nüechama inachicüta rü meama inarüto.  
 Natürü i ngéma pexrü cütagü rü ngéma  
 choxrüxũ inachomaeguãchi, rü ngéma  
 choxrü cütapexegu  
 nayarümaxgütanüãchi rü choxrüxũ  
 nicuaxüxũgü —ñanagürü. 8Rü yexguma  
 ga naeneegü rü nanangãxũgagü rü  
 ñanagürügü: —¿Ëxna cuma nagu  
 curüxinügu rü cuma tá nixĩ i torü  
 áëxgacü quixixũ rü tomaxã tá icucuáxũ?  
 —ñanagürügü. Rü yemaacü yexeraãcü  
 naxchi naxaie naxçax ga yema nanegü  
 ga nüxũ yaxuxũ. 9Rü yemawena ga  
 Yúche rü wenaxarü naxãnegü. Rü yema  
 rü ta naeneegümaxã nüxũ nixu, rü  
 ñanagürü: —Pemaxã tá nüxũ chixu rü  
 wena chaxãnegü. Rü ngéma  
 chaunegüwa nüxũ chadau ya ũaxcü rü  
 tauemacü rü 11 ga éxtagü rü chopexegu  
 nanangücuchitanü rü choxũ  
 nicuaxüxũgü —ñanagürü. 10Rü  
 yexguma Yúche nanatümaxã rü  
 naeneegümaxã nüxũ ixuxgu ga yema  
 nanegü, rü nanatü rü ítanangaxüchi. Rü

ñatagürü nüxü: —¿Taxacüchiga nixí i ngéma cunegü i tomaxã nüxü quixuxü? ¿Ëxna cuma rü nagu curüxínügu rü cué rü cueneegü rü choma rü tá cupexegu tanangücuchitanü nax cuxü ticuaxüügüxüçax? —ñanagürü. <sup>11</sup>Rü yemaçax ga naeneegü rü yexeraäcü nixãüächie. Natürü ga nanatü rü bexma tüxica nagu tarüxínü ga yema nanegüchiga.

### Yúchemaxã nataxegü ga naeneegü

<sup>12</sup>Rü wüxi ga ngunexügu rü ñane ga Chiquéüarü ngaicamána naxí ga Yúcheeneegü nax yexma maxé ne yadaugüxüçax naxçax ga nanatüarü carnérugü. <sup>13</sup>Rü yemaçax ga nanatü ga Iraé, rü Yúchexü ñatarügü: —iPaxa cueneegüwe rüxü rü íyadau i yéa Chiquéüwa i carnérugüna ínadaugüxüwa! —ñatagürü. Rü nüma ga Yúche rü tüxü nangãxü rü ñanagürü: —Marü name, Pa Papáx, rü taãxëácüma tá ngéma chaxü —ñanagürü. <sup>14</sup>Rü tüma ga Iraé rü tanangãxü, rü ñatagürü: —iËcü íyadau ya cueneegü rü ngéma carnérugü! iRü ñuxüchi natáegu nax chomaxã nüxü quixuxüçax nax ñuxäcü ínangupetüxü! —ñatagürü. Rü yemaacü Ebróüwa inaxüächie ga Yúche ga Chiquéüwa nax naxüxü. <sup>15</sup>Natürü yexguma Chiquéüwa nanguxgu, rü tama nüxü nacuax ga ngextá nax nayexmagüxü ga yema naeneegü. Rü wüxi ga yémacüax yexma nüxü nangau, rü nüxna naca rü ñanagürü: —¿Taxacüçax cudau? —ñanagürü. <sup>16</sup>Rü yexguma ga Yúche rü nanangãxü, rü ñanagürü: —Chaueneegüçax chadau. ¿Tama nüxü cucuáxü nax ngextá yixüxü

i carnérugüna nadaugüxü? —ñanagürü. <sup>17</sup>Rü nüma ga yema duüxü rü nanangãxü rü ñanagürü nüxü: —Marü nixígachi i nua. Rü nüxü chaxínügu rü Dotáüwa nixí nax naxixü —ñanagürü. Rü yexguma ga Yúche rü naeneegüwe narüxü nax naxçax yadauxüçax. Rü Dotáügu nüxü inayangau. <sup>18</sup>Rü nüma ga naeneegü rü yáxügu nüxü nadaugü, rü naxüpa ga natanüwa nax nanguxü rü nügü nixugüçaxé ga nax yamaçgüãxüçax. <sup>19</sup>Rü nügümaxã ñanagürügü: —iDüçax! Yéa nixí rü ngéma ne naxü i ngéma ñnegüechaxü. <sup>20</sup>iRü ngíxã tayamaçgü, rü ñuxüchi wüxi ya puchugu tayataçcuchigü! Rü ngéxguma Papá tüxna çaxgu, rü ñatagürügü tá: “Rü wüxi ya ai nanangõx”, ñatagürügü tá. Rü ngémaäcü tá nüxü tacuax rü ngoxi aixcüma tá yangugü i ngéma nanegügü —ñanagürügü. <sup>21-22</sup>Rü yexguma yemaxü naxínügu ga Rubéü, rü Yúchexü ínapoxü nüxna ga naeneegü. Rü ñanagürü nüxü: —Tama name nax yamáxü rü nagu ipenabaxëëxü. iRü ñaa äxmaxügu peyataçcuchimare, rü taxü i peyamáxü! —ñanagürü. Rü yema ñanagürü ga Rubéü, yerü Yúcheéüwa nachogü nax tama yamaçgüaxüçax rü nanatüçax nax natáeguxëëãxüçax. <sup>23</sup>Natürü yexguma naeneegütanüwa nanguxgu ga Yúche, rü nüxna nanapugü ga yema naxchiru ga mexechixü ga nagu yacúxü. <sup>24</sup>Rü nayayauxgü, rü yema äxmaxügu nayataçcuchigü. <sup>25</sup>Rü yemawena rü ínarütogü rü nachibüe. Rü yexguma nachibüeyane rü yáxügu nüxü nadaugü ga Ismaétanüxügü ga Garaáxanewa ne íxü. Rü norü

caméyutagu nayana ga pumáragü rü tuxuneruüügü rü pumára ga míra ga Equítuanewa nanaxü. <sup>26</sup>Rü yexguma ga Yudá rü naeneegüxü ñanagürü: —¿Taxacüwa tüxü namexü nax yamáxü ya taenexé rü nax yacúxü i norü yu? <sup>27</sup>Rü narümemae nixí nax Ismaétanüxügüxü namaxá itaxegüxü rü tama nax yamáxü, erü taeneexüchi nixí —ñanagürü. Rü guxüma ga yema togü ga naeneegü rü marü norü me nixí ga yema. <sup>28</sup>Rü yexguma yema taxetanüxü yéma chopetüxgu, rü Yúchexü ínatüxuchigü ga áxmaxüwa. Rü yema Ismaétanüxügüxü namaxá nataxegü ga 20 tachinü ga diêrucax. Rü yemaacü Yúchexü Equítuanewa nagagü. <sup>29</sup>Rü yexguma ínanguxgu ga Rubéü rü íyadauxgu ga yema áxmaxüwa, rü marü nataxuma ga Yúche ga yéma aixepewa. Rü nüma ga Rubéü rü norü ngechaümaxá nügüchirugu nagágü. <sup>30</sup>Rü naeneegütanüwa naxü, rü ñanagürü nüxü: —Ngéma buxü rü marü nataxuma i ngéma áxmaxüwa. ¿Rü taxacü tá chaxüxü i ñuxmax? —ñanagürü. <sup>31</sup>Rü yexguma ga yema naeneegü rü nanayauxgü ga Yúchechiru. Rü wüxi ga carnéru tüxü nimaxgü rü guxemagümaxá nanaduchara ga Yúchechiru. <sup>32</sup>Rü nanatüxütawa nanamugü ñaxü ga dexamaxá: “Nüxü itayangau i ñaa naxchiru. iRü mea nüxü nadau rü bexmana ngéma yixí i cunechiru!” ñanagürügü. <sup>33</sup>Rü yexguma Acóbu nüxü dāuxgu ga nanechiru nax yixixü, rü ñanagürü: —Ngémáacü chaunechiru nixí. Rü wüxi i ai i dūraxü nagu nawagü rü nanangōx —ñanagürü. <sup>34</sup>Rü yexguma ga Acóbu rü nügü

narügáutechiru, rü norü ngechaümaxá nanecax naxaure. Rü ñuxre ga yüxü naxauxecha. <sup>35</sup>Rü guxüma ga nanegü rü naxacügü rü nanataāxēxēgütaax. Natürü ga nüma rü tama nüxü nanayaxu. Rü nanecax naxauxama, rü ñanagürü: —Chaunecax tá chaxaure ñuxmatáta chayux rü naxütawa changu —ñanagürü.  
.....

### Yúchechiga rü Potifámaxchiga

**39** <sup>1</sup>Rü yexguma Yúchexü Equítuanewa nagagüga ga yema Ismaétanüxügü, rü wüxi ga Equítuanecüāx ga Potifágu āégacü naxcax nataxe. Rü nüma ga Potifá rü Equítuanecüāxaru āēxgacü ga Faraóuarü dauruügüeru nixí. <sup>2</sup>Natürü ga Cori ya Tupana rü Yúchemaxá nayexma. Rü yemacax meama nüxü nangupetü ga norü cori ga Potifáchüüwa. <sup>3</sup>Rü yema norü cori rü nüxü nicuāxachi nax Yúchexütawa nayexmaxü ga Tupana, yerü guxüma ga yema naxüxü, rü meama inixü. <sup>4</sup>Rü yemacax ga norü cori rü porācü namaxá nataāxē. Rü düxwa norü ngüxēēruüxü nayaxixēxē, rü naxmexgu nanaxü ga guxüma ga napatawa yexmaxü nax namaxá inacuāxücax. <sup>5</sup>Rü yexguma Yúchemexēgu naxüāxgu ga napata rü norü yemaxügü, rü Cori ya Tupana rü porācü Potifáxü narüngüxēē ga napatawa rü naanewa rü naxünagüwa. <sup>6</sup>Rü yexguma Yúche marü nüxna dāuxgu ga norü yemaxügü, rü nüma ga Potifá rü marü taxucax naxoegaāxē, rü chibüguxicatama narüxínü. Rü Yúche rü wüxi ga ngextüxücü ga mechametücü

nixĩ rü yemaçax nangúchaũ. <sup>7</sup>Rü yemaçax ga naxmaç ga Potifá rü düxwa ngĩxũ nangúchaũ. Rü wüxi ga ngunexũgu rü ngĩgürügü nüxũ: —iChomaxã namaxũ! —ngĩgürügü.

<sup>8</sup>Natürü nüma ga Yúche rü ngĩxũ naxo. Rü ngĩxũ nangãxũ rü ñanagürü: —Dücaç, chorü cori marü choxmexwa nanangexmaxëxë i guxũma i norü ngëmaxũgü nax namaxã ichacuáxũçax. Rü ñuxma choma nax chanuxmaxũ, rü taxucaçma naxoegaãxë i nümax. <sup>9</sup>Rü daa napatawa rü taxüema ya toguxe rü chorü yexera tixĩ. Rü nüma ya chorü cori rü taxuxũma i taxacü choxna nachuxu. Rü cuxicatama nixĩ i tama nanaxwaxexũ nax cuxũ chadáuxũ erü naxmaç quixĩ i cumax. ¿Rü ngëmaçax ñuxücürüwa i taxacürü chixexũ chaxuxũ i nua napatawa ya chorü cori rü Tupanapexewa? —ñanagürü.

<sup>10</sup>Natürü ga ngĩma rü guxũ ga ngunexũgu rü Yúchexũ ichixeweeca nax ngĩxũtagu naxáúxũçax rü ngĩmaxã namaxũxũçax, natürü ga nüma rü tama nanangĩãxëraxũ. <sup>11-12</sup>Natürü wüxi ga ngunexũ ga Yúche rü ipatagu naxücu nax yéma puracü naxüxũçax. Rü yéma aixepewa rü nataxuma ga to ga duũxũ. Rü ngĩma rü naxchiruwa iyachüxü, rü ngĩgürügü nüxũ: —iChomaxã namaxũ! —ngĩgürügü. Natürü ga nüma ga Yúche rü inayago, rü ngĩxmexwa nayaxũãchi ga naxchiru ga nüxna yapuxũ. <sup>13-14</sup>Rü yexguma nüxũ nadauxgu ga naxchiru ga ngĩxmexwa nax yaxũãchixũ, rü ngĩrü duũxũgücax ica. Rü ngĩgürügü nüxũ: —iDücaç! Chaute nua nanaga i wüxi i duũxũ i Ebréutanüxũ, rü ñuxma rü tagu nua nidauxcüraxũ. Rü nüma rü nuxã

ixgu chauxçax naxücu rü chomaxã taax namaxũ, natürü i choma rü poraãcü aita chaxüama. <sup>15</sup>Rü ngëxguma poraãcü aita chaxüxgu, rü inayago. Rü ngëmaçax nua nanataç i ñaa naxchiru —ngĩgürügü. <sup>16</sup>Rü ñuxüchi ga ngĩma rü namaxã inguxũ ga Yúchechiru ñuxmata yéma ixwa nangu ga ngĩte. <sup>17</sup>Rü yexguma yéma nanguxgu ga ngĩte, rü namaxã nüxũ iyaxu rü ngĩgürügü: —Rü ngëma duũxũ i Ebréutanüxũ i nua cungexmaxëxëxũ, rü chorü ucapugu naxücu rü chomaxã taax namaxũ.

<sup>18</sup>Natürü ngëxguma poraãcü aita chaxüxgu rü inayago, rü nua nanataç i ñaa naxchiru. <sup>19</sup>Rü ngëmaãcü chomaxã nixĩ i ngëma curü duũxũ i Ebréutanüxũ —ngĩgürügü. Rü yemaxũ naxĩnügu ga nüma ga Potifá rü poraãcü nanu. <sup>20-21</sup>Rü norü duũxũgüxũ namu nax Yúchexũ yayauxgüxũçax. Rü ñuxüchi ãëxgacü poxcuexũ ga duũxũgütanügu nayataçxuchigü. Natürü woo ga poxcupataüwa nax nayexmaxũ ga Yúche rü Cori ya Tupana rü naxütawa nayexma, rü nüxũ narüngüxëë. Rü nüxũ nanatauxchaxëxë nax yema poxcupataüarü ãëxgacü namaxã taãxëxũçax. <sup>22</sup>Rü yemaçax ga nüma ga poxcupataüarü ãëxgacü rü Yúchemexëwa nanangex ga guxũma ga yema poxcuexũ nax namaxã inacúáxũçax. Rü Yúche nixĩ ga namaxã icuáxũ ga guxũma ga puracü ga yéma. <sup>23</sup>Rü nüma ga yema poxcupataüarü ãëxgacü rü taxucaçma tüxcüũ inayadauxũ ga yema Yúchemexëwa yexmaxũ, yerü ga Cori ya Tupana rü Yúchexũ narüngüxëë nax guxũma mea iyaxũxũçax ga yema poxcupataüwa.



**Yúche rü nüxũ nixu nax taxacũchiga  
yixĩxũ ga taxre ga poxcuexũ nagu  
ãnegũexũ**

**40** <sup>1</sup>Rü yexguma Yúche poxcupataũwa yexmayane rü wüxi ga ngunexũgu rü Equítuanearu ãëxgacũxũ nanuxëëgũ ga yema norũ bínuarũ baeruxũ rü norũ paũaru úruxũ. <sup>2</sup>Rü yemaçax nüma ga ãëxgacũ rü poraãcü namaxã nanu ga yema taxre ga norũ ngũxëëruũgũ ga yema bínunaxã baegũxũaru ãëxgacũ rü yema paũaru úruũgũaru ãëxgacũ. <sup>3</sup>Rü yemaçax yema poxcupataxũ ga Potifápatawa yexmaxũwa nanamugũ. Rü yematama nixĩ ga Yúche nagu poxcuxũ. <sup>4</sup>Rü nüma ga poxcupataũaru ãëxgacũ rü Yúchexũ namu nax namaxã inacuáxũçax ga yema taxre ga ãëxgacũaru ngũxëëruũgũ. Rü nümagũ rü marũ muxũma ga ngunexũgu yexma napoxcue. <sup>5</sup>Rü wüxi ga chũtaxũgu rü yema taxre ga poxcuexũ rü wüxichigũ rü naxãnegũgũ. Rü wüxichigũ ga yema nanegũ rü nüxũ nayexma ga taxacũchiga nax yixĩxũ. <sup>6</sup>Rü moxũãcü paçmama ga yexguma Yúche natanũwa íyadaçuxgu, rü nüxũ nadau ga nax poraãcü naxoegaãëgũxũ ga yema taxre. <sup>7</sup>Rü yemaçax nüxna naca, rü ñanagürü: —¿Taxacũçax pemaçhiwe? —ñanagürü. <sup>8</sup>Rü nümagũ rü nanangãxũgagũ, rü ñanagürügũ: —Ngewax chũtacũ rü taxãnegũe. Rü tataxuma ya texé ya tomaxã nüxũ ixuxe nax taxacũchiga yixĩxũ i ngëma nagu taxãnegũgũxũ —ñanagürügũ. Rü yexguma ga Yúche rü ñanagürü: —¿Taux ëxna i Tupana yixĩxũ ya yimã nangoxëëcü nax taxacũchiga yixĩxũ?

iRü chomaxã nüxũ pixu i ngëma penegü! —ñanagürü. <sup>9</sup>Rü yexguma ga yema bínunaxã baegũxũaru ãëxgacũ rü nüxĩra Yúchemaxã nüxũ nixu ga nanegũ, rü ñanagürü: —Chaunegũwa rü nüxũ chadau ga wüxi ga úbamaxũ. <sup>10</sup>Rü yema úbamaxũ rü narũxũ rü niyachigũ rü tomaepũx nixĩ ga nachacũxũ. Rü naxãchacu rü yema nachacuwa rü naxo rü nixãxyaxa rü nidau. <sup>11</sup>Rü choma rü chanange ga naxpáxũ ga Faraóũ. Rü úbata chicawe, rü yema naxpáũgu chanamaixgütũxũ. Rü ñuxũchi chomatama nüxna chayaxãweũ ga Faraóũ —ñanagürü. <sup>12</sup>Rü yexguma ga Yúche rü ñanagürü nüxũ: —Ngëma cunegũ rü ñaxũchiga nixĩ: “Rü ngëma tomaepũx i nachacũxũ rü tomaepũx i ngunexũchiga nixĩ. <sup>13</sup>Rü tomaepũx i ngunexũwa nanguxgu rü nüma ya Faraóũ tá cuxçax nangema rü tá cuxna naca nachiga i curũ poxcu. Rü ngëmawena rü wena ngëma puracũwatátama cuxũ napuracũxëxë. Rü cuma rü tá wena cunaxaxëxë ya Faraóũ ngëma noxri cunaxũxürũütama”, ñaxũchiga nixĩ. <sup>14</sup>Rü ngëxguma ngëmaãcü tá yanguxgu rü chanaxwaxe i cuxũ changechaũtũmũxũ. iRü choxna nacuãxãchi, rü Faraóũmaxã choxũ ixu nax choxũ ínamuxũchixũçax i nua! <sup>15</sup>Rü choma i Ebréutanũxũ rü chauchixũanewa nixĩ ga choxũ yagagũxũ rü nuxã chomaxã yataxegũxũ. Rü taxuçaxma tũxcũũ nua poxcupataũwa changexma, yerũ taxuxũma ga chixexũ chaxũ —ñanagürü. <sup>16</sup>Rü yexguma yema paũaru úruũgũaru ãëxgacũ nüxũ ínũgu ga mexũchiga nax yixĩxũ ga yema

Yúche ngoxêêxũ ga nanegũchiga rü ñanagürü: —Choma rü nagu chaxãnegü nax chauerugu chayangexũ ga tomaepũx ga pexchiãcu ga paũ ga maixcuraxũ. <sup>17</sup>Rü guma pexchi ga düxétüwaama ücüwa rü nayexma ga naguxũraũxũ ga paũ ga maixcuraxũ ga Faraóũçax ixĩxũ. Natürü ñanagugü ga werigü, rü guma pexchi ga chauerugu chingecüwa tanacũxgü ga paũ —ñanagürü ga yema paũarü üruũgüarü ãêxgacü. <sup>18</sup>Rü yexguma ga Yúche rü nanangãxũ rü ñanagürü: —Rü ngẽma cunegü rü ñaxũchiga nixĩ: “Rü yima tomaepũx ya pexchi rü tomaepũx i ngunexũchiga nixĩ. <sup>19</sup>Rü tomaepũx i ngunexũwa nanguxgu, rü Faraóũ tá nanangugü nax taxacũçax cupoxcuxũ. Rü tá nanamu i norü purichãfagü nax cuxũ nawẽxnaxãgũxũçax. Rü naixtanüwa tá cuxũ narütuxêêgü. Rü ngurucugü tá nanangõxgü i cuxunẽ”, ñaxũchiga nixĩ —ñanagürü ga Yúche. <sup>20</sup>Rü tomaepũx ga ngunexũgüwena rü ninguarü taunecũãx ga Faraóũ. Rü nanaxü ga wüxi ga peta naxçax ga guxũma ga norü ngũxêêruũgü. Rü yema düũxũgü ga nüxna naxugũxũpexewa, rü Faraóũ nanamu nax napexewa nagagũaxũçax ga yema bínuarü baeruũgüarü ãêxgacü rü yema paũarü üruũgüarü ãêxgacü. <sup>21</sup>Rü yema baeruũgüarü ãêxgacü, rü wenaxarü yematama puracüwa nanamu. Rü wenaxarü noxrürüütama Faraóũxũ nayaxaxexêêxũ. <sup>22</sup>Natürü ga yema paũarü üruũgüarü ãêxgacü, rü nüma ga Faraóũ rü norü purichãfagũxũ namu nax nawẽxnaxãgũaxũçax yema Yúche nüxũ ixixürüxũ. <sup>23</sup>Natürü ga yema bínuarü

baeruũgüarü ãêxgacü rü tama Yúchena nacuaçãchi.

**Yúche rü nüxũ nixu nax taxacũchiga  
yixĩxũ ga yema Faraóũnegü**

**41** <sup>1</sup>Rü yemawena rü taxre ga taunecü nangupetü. Rü wüxi ga chütaxũgu rü naxãnegü ga Faraóũ. Rü nanegüwa rü taxtü ga Nírucutügu nachi.

.....

<sup>8</sup>Rü moxũãcü ga paçmama rü poraãcü naxoegaãxẽ naxçax ga yema nanegü. Rü naxçax nangema ga guxũma ga yema iyüxũ rü düũxũgü ga nüxũ cuaxũchigüxũ ga Equítuanecũãx. Rü nüma ga Faraóũ rü namaxã nüxũ nixu ga nanegü, natürü taxuxũma ga yema yuüexũ nüxũ nacuaçax nax taxacũchiga yixĩxũ ga yema nanegü. <sup>9-10</sup>Rü yexguma ga guma baeruũgüarü ãêxgacü rü Faraóũmaxã nüxũ nixu rü ñanagürü: —Pa Chorü ãêxgacũx, rü ñuxchaama nüxna chacuaçãchi nax ñuxãcü chixexũ chaxtũxũ yerü taguma cumaxã nüxũ chixuchiga ga wüxi ga ngextũxücü ga poraãcü choxũ rüngũxêêcü. Rü yexguma namaxã cunuxgu ga yema paũarü üruũgüarü ãêxgacü rü chomaxã rü ta cunu, rü yema curü purichãaarü capitãũpatawa yexmaxũ ga poxcuchicaxũgu toxũ cumugü. <sup>11</sup>Rü wüxi ga chütaxũgu ga paũarü üruũgüarü ãêxgacü rü naxãnegü, rü choma rü ta chaxãnegü. Rü wüxichigü ga yema nagu taxãnegũxũ rü tama nüxũ tacuaçax nax taxacũchiga yixĩxũ. <sup>12</sup>Rü yema poxcupataũwa tomaxã nayexma ga wüxi ga ngextũxücü ga Ebréutanüxũ ixĩcü. Rü nüma rü poxcupataũarü ãêxgacüarü puracütanüxũ nixĩ. Rü namaxã nüxũ tixu

ga tonegü. Rü nüma rü nüxü nacuax ga taxacüchiga nax yixüxü ga wüxichigü ga yema nagu taxänegüexü. <sup>13</sup>Rü guxüma ga yema tomaxä nüxü yaxuxüüüäcütama ningü. Rü choma rü wenaxarü chorü puracücax chatáegu, natürü ga yema chomücü rü purichíagü nanawëxnaxägü —ñanagürü. <sup>14</sup>Rü yexguma ga nüma ga Faraóü rü Yúchecax nangema. Rü yexgumatama Yúchexü poxcupataüwa ínamuxüchigü. Rü mea niyoeru rü mexü ga naxchirugu ínacuxuchi. Rü yemaacü Faraóüpëxewa naxü. <sup>15</sup>Rü nüma ga Faraóü rü ñanagürü nüxü: —Ngewaxarü chütaxügu rü choxü nangexma i wüxi i chaunegü. Natürü tataxuma ya texé yangoxexéxé nax taxacüchiga yixüxü. Rü nüxü chaxínüchigagu rü cuma rü nüxü cucuax nax cunangoxëëxü i nanegü nax taxacüchiga yixüxü —ñanagürü ga Faraóü. <sup>16</sup>Rü yexguma ga Yúche rü nanangäxü rü ñanagürü: —Pa Chorü Äëxgacüx, ngëma rü tama chowa nangexma, natürü Tupana tá nixí ya cuxcax nangoxëëcü —ñanagürü. <sup>17</sup>Rü yexguma ga Faraóü rü Yúchexü ñanagürü: —Chaunegüwa rü taxtü ga Nírucütügu chachi. <sup>18</sup>Rü yéma taxtüwa ínachõõchi ga 7 ga woca ga ingüexüchixü rü imexechixü. Rü taxtüanacüwa maxëne nanangõxgü. <sup>19</sup>Rü yemawena ínachõõchi ga to ga 7 ga woca i chixemarexü rü íxaexüchixü. Rü taguma ñuxgu nüxü chadau i woca i nangexgumaraxüxü i chixexü i guxüma i nua Equítuanewa. <sup>20</sup>Rü yema wocagü ga íxaexüchixü rü ichixemarexü, rü yema 7 ga woca ga ingüexüxü ínagagü. <sup>21</sup>Natürü ga woo yema woca ga ingüexüxü nax ínagagüxü, rü aixrügumarüütama nixaexüchi. Rü yexguma rü chabaxüchächi.

<sup>22</sup>Rü yemawena rü wena chaxänegü. Rü yema chaunegüwa rü nüxü chadau ga 7 yaxa ga trígu ga íxäacuxü rü imexyaxaxü ga wüxínewatama nguxüxü. <sup>23</sup>Rü yemawena yemanawatama nanguxü ga to ga 7 yaxa ga trígu ga ingeäcuxü rü buanecümaxä ipagüxü. <sup>24</sup>Rü yema 7 yaxa ga ipagüxü, rü yema imexyaxaxüxü ínagagü. Rü ñaa taxre i chaunegü, rü ngëma chorü duüxügü i iyüüexümaxä nüxü chixu, natürü taxuxüma i ngëma yuüexü rü nüxü nacuax nax nangoxëëxü nax taxacüchiga yixüxü i ngëma taxre i chaunegü —ñanagürü. <sup>25</sup>Rü yexguma ga Yúche rü Faraóüxü nangäxü, rü ñanagürü: —Pa Chorü Äëxgacüx, ngëma taxre i cunegügü rü wüxitama i ínüchiga nixí. Rü Tupana rü cumaxä nüxü nixu i ngëma tá naxüxü rü tá ínguxü i yixcüamaxüra. <sup>26</sup>Rü ngëma 7 i wocagü i imexechixü, rü 7 ya taunecüchiga nixí. Rü ngëmachigatama nixí i ngëma 7 yaxa i trígu i mexechixü. Rü ngëma taxre i cunegü rü ngëmachigatama nixí. <sup>27</sup>Rü ngëma 7 i woca i íxaexüchixü rü ichixemarexü ga yema togüarü wixweama íchõõchixü, rü 7 ya taunecüchiga nixí. Rü ngëmachigatama nixí i ngëma 7 yaxa i trígu i buanecümaxä ipagüxü. Rü ngëma rü nüxü nixu nax 7 ya taunecü tá nangebüanexü, rü tá taiya ngüxü. <sup>28</sup>Rü ngëmachiga nixí i Tupana cumaxä nüxü íxuxü, Pa Chorü Äëxgacüx. Rü ngëmaäcü tá nanaxü ya Tupana. <sup>29</sup>Rü 7 ya taunecü tá naxäbüane i guxüma i Equítuanewa. <sup>30</sup>Rü ngëmawena rü 7 ya taunecü tá nangebüane. Rü ngëma nax ñuxre ya taunecü tá poraäcü taiya ngüxügü, rü duüxügü rü tá düxwa nüxü narüngümae ga guma taunecügü ga

nagu naxābūanecū ga Equítuanewa. Rū ngēma taiyagagu rū guxūwatáma guxchaxū ínangu ya ñaa nachixūanewa. ....

<sup>33</sup>Rū ngēmacax Pa Chorū ãĕxgacūx, rū name nixī nax naxcax cudauxū ya wūxi ya yatū ya nūxū cuaxūchicū nax naxmexgu cunaxūxūcax i ñaa nachixūane.

<sup>34</sup>Rū name nixī nax nūxū cuxunetaxū i togū i ãĕxgacūgū nax guxū i ñaa nachixūanegu yaxīāgūtanūxūcax, rū ngēmaācū guxū i duūxūgūtanūwa yadeetanūāxūcax i trīgu. Rū ngēxguma texē 5 wetaxū i trīgu tūxū ngēxmagux, rū wūxi tá nixī i cuxcax nayauxgūxū rū namaxā nanguxūgūxū. Rū ngēxguma yexera nūxū ngēxmagu i duūxūgū rū yexera tá cuxcax nayauxgū. <sup>35</sup>Rū ngēmaācū tá nixī i nanutaquexeaxū i trīguwetaxū i nagu ya yima 7 ya taunecū ya nagu namucū i trīgu. Rū ñuxūchi name i wūxichigū ya íanewa ngēxmaxū i trīgupataūgu namaxā nanguxūgū nax ngēma cuma namaxā icucuáxūcax nax duūxūgū tayauxgūxūcax i ngēxguma taiya íngxgu. <sup>36</sup>Rū ngēmaācū i ngēma trīgu rū tá mea namaxā nanguxūgū naxcax i cuchixūane nax tama taiyamaxā nayuexūcax i duūxūgū i ngēxguma ínanguxgu ya yima 7 ya taunecū ya nagu tá nangebūanecū i nua Equítuanewa —ñanagürū ga Yúche.

**Yúche rū ãĕxgacūxū ningucuchi  
ga Equítuanewa**

<sup>37</sup>Rū yema Yúhearū ucuxē rū Faraóūcax name, rū norū ngūxēēruūgū rū ta norū me nixī. <sup>38</sup>Rū yemacax ga Faraóū rū ñanagürū norū duūxūgūxū: —¿Ngextá chi nūxū iyarūngauxū i to i

yatū i ñaa Yúcherūxū Tupanaāxē nawa ngēxmaxū? —ñanagürū. <sup>39</sup>Rū yexguma ga Faraóū rū Yúchexū ñanagürū: —Dūcax, rū nataxuma i cuxū rüyexeraxū nax nūxū nacuáxū, erū cuma nixī i Tupana cuxū nūxū cuaxēēxū i guxūma i ngēma nagu chaxānegūxū. <sup>40</sup>Rū cuma tá nixī i chopatamaxā icucuáxū. Rū guxūtáma i chorū duūxūgū rū tá cuga naxīnūe. Rū chaxica tátama nixī i cuxū charüyexeraxū erū choma rū ñaa nachixūanearū ãĕxgacū chixī. <sup>41</sup>Dūcax, ñuxma rū choma rū cuxū chaxuneta nax cuma tá ãĕxgacū quixīxū i guxūma i ñaa Equítuanewa —ñanagürū. <sup>42</sup>Rū yexguma yema ñaxgu ga Faraóū rū nūgūmexēwa ngīxū nanangoxochi ga norū ānera ga cuaxruxū ngīwa yexmacū, rū Yúchemexēwa ngīxū ningucuchi. Rū ñuxūchi norū duūxūgūxū namu nax mexechixū ga naxchirugu yacuxēēgūaxūcax, rū úirumaxā naxūchagūgūaxūcax. <sup>43</sup>Rū yemawena rū ñuxūchi nayamue nagu ga guma cáru ga Faraóūarū cáruweama úxūne ga cowaru itúchigūne. Rū duūxūgūxū namu nax napexewa ñaxūmaxā aita naxūexū: “iPenaxūchica!” ñaxūmaxā. Rū yemaacū nixī ga Yúche ga guxūma ga Equítuanemaxā inacuáxū. <sup>44</sup>Rū ñuxūchi ga Faraóū rū ñanagürū Yúchexū: —Choma nax Equítuanearū ãĕxgacū chixīxū, rū cuxna chaxāga nax cuxmexwa nangexmaxū i guxūma i Equítuane —ñanagürū. <sup>45</sup>Rū yexguma ga Faraóū rū Equítuanecūāxégamaxā Yúchexū naxūéga. Rū Cháfa- panéagu nanaxūéga. Rū ñuxūchi nanaxūmāx ngīmaxā ga Achená ga chacherdóte ga

Potiféraxacü. Rü nüma ga ngīnatü rü ĩane ga Óũarü chacherdóte nixĩ. Rü yemaacü nixĩ ga Yúche ga Equítuanearü ãëxgacü yixixũ. <sup>46</sup>Rü nüma ga Yúche rü 30 ga taunecü nüxũ nayexma ga yexguma Faraóũ ga Equítuanearü ãëxgacüpepexewa nagagüãgu rü nüma ga Faraóũ namücũxũ yangucuchixëëgu. Rü nüma ga Yúche rü Faraóũxũ narüimoxë rü inaxũãchi. Rü guxũma ga Equítuanegu nixũãgũchigü. <sup>47</sup>Rü 7 ga taunecügu rü meama nayae ga trĩgu rü poraãcü naxãbüane ga guxũwama ga Equítuanewa. <sup>48</sup>Rü nüma ga Yúche rü 7 ga taunecügu nananutaquexe ga guxũma ga yema trĩguwetaxũ ga ãëxgacüna üxũ ga Equítuanewa. Rü wüxichigü ga ĩanewa yexmane ga ãëxgacüarü trĩgupataũgu namaxã ninguxũchigü ga yema trĩgu ga guma ĩanena ngaicamaxũ ga naanewa nabuxgũxũ. <sup>49</sup>Rü Yúche rü nananutaquexe ga trĩgu, rü ñoma taxtũpechinüwa ngëxmacü ya naxnücütexewarixũ ixixũ ga nax namuxũchixũ. Rü yema nax namuxũchixũgagu rü düxwa tama nixugü. <sup>50</sup>Rü naxũpa ga nax inaxügũxũ ga nax nangebüanexũ, rü marü Yúcheaxũ itaxrexacü ga naxmãx ga Achená. <sup>51</sup>Rü guma yacü ga nane rü Manachégu nanaxüéga yerü ñanagürü: “Tupana rü choxũ nüxũ inayarüngümaxëxë i guxũma ga yema guxchaxũgü ga choxũ ngupetüxũ rü ñuxma rü marü tama chautanüxũgücãx changechaũ”, ñanagürü. <sup>52</sup>Rü guma rübumaecü ga nane rü Efraĩgu nanaxüéga, yerü ñanagürü: “Tupana rü ñaa nachixũane i nawa ngúxũ

chingexũwa choxna nanamu ya chaune”, ñanagürü. <sup>53</sup>Rü nangupetü ga guma 7 ga taunecü ga nagu trĩgu muxũchicü ga Equítuanewa. <sup>54</sup>Rü inaxügü ga guma 7 ga taunecü ga nagu ngebüane íngucü, yematama Yúche nüxũ ixuxũrũxũ. Rü guxũma ga togü ga nachixũanewa rü poraãcü taiya nangux. Natürü ga Equítuanewa rü tama taiya nangux, yerü nayexma ga nabü ga namaxã nanguxũgũxũ. <sup>55</sup>Rü yexguma yema Equítuanecüãx marü iguxbügügu, rü Faraóũxũtawaxã naxĩ nax trĩgu nüxna tayacagũxũcãx. Rü yexguma ga nüma ga Faraóũ rü guxũma ga Equítuanecüãxmaxã nüxũ nixu rü ñanagürü: —iYéa Yúchexũtawaxã pexĩ, rü penaxũx i ngëma nüma pemaxã nüxũ yaxuxũ! —ñanagürü. <sup>56</sup>Rü yexguma marü guxũma ga Equítuanewa nangebüanegu, rü nüma ga Yúche rü nayawãxnagü ga guma trĩgupataũgü nax yema Equítuanecüãxgũxũ namaxã nataxexũcãx, yerü niyexeraguchigü ga nax nataiyaxũ ga duũxũgü. <sup>57</sup>Rü guxũma ga nachixũanegüwa ne naxĩ ga duũxũgü nax Equítuanewa naxcãx nataxegũxũcãx ga norü trĩgu ga Yúchexũtawaxã. Yerü taxuxũma ga to ga nachixũanewa nayexma ga nabü.

#### Equítuanewa naxĩ ga Yúcheeneegü

**42** <sup>1</sup>Rü yexguma Acóbu nüxũ cuãxchigagu ga Equítuanewa nax nayemaxũ ga trĩgu, rü nanegũxũ ñanagürü: —¿Taxacü nua pexüe i pegü nua perüdaunümarexũ? <sup>2</sup>Rü chomaxã nüxũ nixugügu rü Equítuanewa nax nangemaxũ i trĩgu. iRü ngëma pexĩ nax trĩguta peyataxegũxũcãx nax ngëmaãcü

tama iyuexũcax! —ñanagürü. <sup>3</sup>Rü ñuxũchi 10 ga Yúcheeneegü rü Equítuanewa naxĩ nax tríguta yataxegũxũcax. <sup>4</sup>Natürü ga Acóbu rü tama nanaxwaxe ga nane ga Bëyamí ga Yúcheenexē yéma nax naxũxũ, yerü nagu narũxĩnũ rü ngürũachi taxacürü chixexũ yexma nüxũ nayaxüpetü. <sup>5</sup>Rü nanegü ga Acóbu ga Iraégu áégacü rü togü ga taxetanũxũtanügu naxágü, yerü guxũma ga Canaáũanewa rü taiya nangux. <sup>6</sup>Rü Yúche nixĩ ga áëxgacü ixĩcü ga Equítuanewa, rü nüma nixĩ ga duũxũgü ga togü ga nachixũanewa ne ixũxũ namaxã nataxexũ ga trígu. Rü yexguma naeneegü naxũtawana ngugügu, rü napexegu ñaxtũanegu nanangücuchitanü. <sup>7</sup>Rü nüma ga Yúche rü naeneegũxũ nacuax ga yexguma nüxũ nadaxuxgu, natürü tama nügü nüxũ nacuaxcēneta. Rü nugaácü naeneegüna naca, rü ñanagürü: —¿Rü pemax, rü ngextá ne pexĩ? —ñanagürü. Rü nümagü rü nanangãxũgü rü ñanagürügü: —Toma rü Canaáũanewa ne taxĩ, rü trígu nuata tayataxegü —ñanagürügü. <sup>8</sup>Rü nüma ga Yúche rü naeneegũxũ nacuax, natürü ga naeneegü rü tama Yúchexũ nacuaxgü. <sup>9</sup>Rü yexguma ga Yúche rü nüxna nacuaxãchi ga yema ũpa nagu naxãnegũxũ ga naeneegüchiga ixĩxũ. Rü ñanagürü nüxũ: —Pemax rü tochixũanearü ngugütaeruũgü pixĩgü. Rü pema rü nua ngugütaewa pexĩ nax naxcax pedaugũxũcax nax ngextá pexũ natauxchaxũ nax toechita pichocuxũcax nawa i ñaa naane —ñanagürü. <sup>10</sup>Rü nüma ga naeneegü rü nanangãxũgü rü ñanagürügü: —Tama nixĩ, Pa Corix.

Toma i curü duũxũgü rü tríguarü taxewa nua taxĩmare. <sup>11</sup>Rü guxãma i toma rü wüxitama nixĩ ya tonatü. Rü duũxũgü i mexũ tixĩgü. Rü taguma ngugütaeruxũ tixĩgü —ñanagürügü. <sup>12</sup>Natürü ga Yúche rü ñanagürüama: —Rü tama aixcüma nixĩ i ngēma. Rü pema rü nua pexĩ nax naxcax pedaugũxũcax i ngextá pexũ natauxchaxũ nax toechita pichocuxũcax nawa i ñaa naane —ñanagürüama. <sup>13</sup>Natürü nümagü rü nanangãxũgü rü ñanagürügü: —Toma i curü duũxũgü rü 12 tixĩgü i togüenexē. Rü wüxitama tixĩ ya tonatü, rü Canaáũanegu nixĩ i taxãchiũgũxũ. Rü yimá toenexē ya rübumaecü rü ngēxma tonatũxũtagu narũxãũx, rü guma nai ga toenexē rü marü nataxuma i toxũtawana —ñanagürügü. <sup>14</sup>Natürü nüma ga Yúche rü wena ñanagürüama: —Pema rü ngugütaewa nua pexĩ. <sup>15</sup>Rü ñuxma rü tá pexũ chaxü, rü Faraóũégagu pemaxã nüxũ chixu rü taxũtáma nua powoegu ega tama nua penagáragu ya yimá peenexē ya rübumaecü. <sup>16</sup>Rü wüxixe táegu nax tayagaxũcax! Rü yixema nuxã rüchoxe rü tá tapoxcue. Rü ngēmawa tá nüxũ chacuax rü aixcüma yixĩ i ngēma chomaxã nüxũ pixuxũ. Rü ngēxguma taxũtáma aixcüma yixĩxgu, rü ngēmawa tá nüxũ chacuax nax ngugütaewa nua pexĩmarexũ. Rü Faraóũégagu pemaxã nüxũ chixu i ngēma —ñanagürü. <sup>17</sup>Rü yexguma ga Yúche rü poxcupataũgu nanawocu tomaepũx ga ngunexũ. <sup>18</sup>Natürü yema tomaepũx ga ngunexũguwena rü ñanagürü nüxũ: —Choma rü Tupanaxũ chamuũ. iĒcũ ñaácü tá penaxü! Rü ngēxguma tá nixĩ i

taxútama pexũ chadaixũ. <sup>19</sup>Rũ ngëxguma aixcũma mexũ i duũxũgũ pexĩgũgu, rũ chanaxwaxe i wũxi i peenexẽ nua poxcupataũwa petax. Rũ ñuxũchi i pema i tama poxcuexũ rũ marũ name i petanũxũgũcax pewoegu namaxã i perũ trĩgu nax ngẽma nangõxgũxũcax. <sup>20</sup>Rũ nua penaga ya yimã peenexẽ ya rũbumaecũ! Rũ ngẽmaãcũ tá nũxũ chachuax rũ aixcũma yixĩ i ngẽma nũxũ pixuxũ. Rũ ngëxguma taxútama nua penagaxgu, rũ tá peyue —ñanagũrũ. Rũ yexguma ga nũmagũ rũ: —Ngũ —ñanagũrũgũ. <sup>21</sup>Natũrũ ga wũxichigũ rũ nũgũmaxã ñanagũrũgũ: —Aixcũmaxũchi poraãcũ chixexũ namaxã taxũ ga taenexẽ ga Yũche. Yerũ woo nũxũ nax idauxũ nax ngũxũ yangexũ, natũrũ tama naga taxĩnũe ga yexguma tũxũ nacaaxũgu nax tũxũ nangechaũtũmũũxũcax. Rũ ngẽmacax nixĩ i ñuxma taxcax ínguxũ i ñaa guxchaxũ —ñanagũrũgũ nũgũmaxã. <sup>22</sup>Rũ nũma ga Rubéũ rũ naeneegũxũ ñanagũrũ: —Choma rũ marũ pemaxã nũxũ chixu nax tama chixexũ namaxã pexũgũxũcax ga guma bucũ, natũrũ tama chauga pexĩnũechaũ. Rũ ngẽma nixĩ i tóru natanũ ga nax nayuxũ —ñanagũrũ. <sup>23</sup>Natũrũ ga nũmagũ rũ tama nũxũ nacuaxgũ nax Yũche rũ bexma nũxũ naxĩnũxũ, yerũ ga Yũche rũ Equítuanecũãxgawa namaxã nidexa rũ to ga duũxũ rũ Ebréugawa naeneegũmaxã nũxũ nixuchigũ ga yema Yũche namaxã nũxũ ixuxũ. <sup>24</sup>Rũ yexguma ga Yũche rũ nũxna nixũgachi rũ yẽma nayaxaxu. Rũ yexguma wenaxarũ naeneegũtanũwa naxũxgu, rũ namaxã nidexa. Rũ Chimeũxũ nigagachi

rũ naeneegũpexewa purichíaxũ namu nax yanaxgũaxũcax. <sup>25</sup>Rũ yemawena norũ duũxũgũxũ namu nax trĩgumaxã yaxũãcugũaxũcax ga naeneegũarũ chacugũ. Rũ yema diẽru ga naeneegũ nũxna ngĩxũ ãgũcũ, rũ nanamu nax yexmatama norũ chacugũgu ngĩxũ yaxũchigũxũcax. Rũ ñuxũchi norũ duũxũgũmaxã nũxũ nixu nax naeneegũarũ namawaũ ga õna nũxna ta naxãgũxũ. Rũ yemaacũ nanaxũgũ ga norũ duũxũgũ. <sup>26</sup>Rũ yexguma ga nũmagũ ga naeneegũ rũ norũ búruétũgu nananugũ ga norũ trĩgupũũgũ, rũ ínixĩ. <sup>27</sup>Rũ yexguma nawa nangugũgu ga yema nachica ga nagu napegũchaũxũ, rũ wũxi ga natanũwa rũ nayawẽxãxũ ga norũ chacu nax norũ búruxũ nachibũxẽẽxũcax. Rũ yema chacuaxgu ngĩxũ nayangau ga norũ diẽru. <sup>28</sup>Rũ naeneegũmaxã nũxũ nixu, rũ ñanagũrũ: —Dũcax, choxũ ngĩxũ natãeguxẽẽgũ i chorũ diẽru. Rũ nua chorũ chachuwa ingexma —ñanagũrũ. Rũ yexguma ga yema togũ rũ guxũma poraãcũ nabaxãchiãẽgũ. Rũ muũmaxã niduxrue, rũ nũgũmaxã ñanagũrũgũ: —¿Taxacũ nixĩ i tamaxã naxũxũ ya Tupana? —ñanagũrũgũ. <sup>29</sup>Rũ yexguma Canaãũwa nangugũgu, rũ nanatũ ga Acóbumaxã nũxũ nixugũe ga guxũma ga yema nũxũ ngupetũxũ.

.....

<sup>36</sup>Rũ yexguma ga Acóbu ga Iraégu ãégacũ rũ nanegũxũ nangãxũ, rũ ñanagũrũ: —Pema rũ ngẽmama choxũ peguxnexẽxẽ. Rũ Yũche rũ marũ nataxuma i tatanũwa. Chimeũ rũ ta marũ nataxuma. Rũ ñuxma rũ ngẽmatãma peyaga ya Bẽyamĩ. Rũ

guxũguma rü choma nixĩ i ngúxũ  
chingexũ —ñanagürü ga Acóbu.

.....

### Equítuanewa Bëyamíxũ nagagü

**43** <sup>1</sup>Rü Canaáũanewa rü niyexeraguchigü nax taiya ngúxũ. <sup>2</sup>Rü yexguma marü nüxũ naguxgu ga norü trígu ga Equítuanewa ne nangegüxũ, rü nüma ga Acóbu rü nanegüxũ ñanagürü: —iWenaxarü ngéma Equítuanewa pexĩ nax wenaxarü to i tórü tríguçax peyataxegüxũçax! —ñanagürü. <sup>3</sup>Natürü ga guma nane ga Yudá rü nanangäxũ, rü ñanagürü: —Pa Papáx, natürü ga guma äëxgacü rü ngóxũwama toxna naxäga rü ñanagürü: “Rü ngëxguma taxütáma nua penagaxgu ya yimá peenexë ya rübumaecü, rü noxtacüma ngexrüma i nua nax pexĩxũ”, ñanagürü toxũ. <sup>4</sup>Rü ngëmacax tanaxwaxe i Bëyamí towe cunamu. Rü ngëxguma towe cunamuxgu, rü marü name nax ngéma tríguwa taxĩxũ. <sup>5</sup>Natürü ngëxguma taxütáma ngéma cunamuxgux, rü taxütáma ngéma taxĩ. Yerü meama tomaxä nüxũ nixu, rü ñanagürü: “Rü ngëxguma taxütáma nua penagaxgu ya yimá peenexë ya rübumaecü, rü noxtacüma ngexrüma i nua nax pexĩxũ” —ñanagürü toxũ. <sup>6</sup>Rü yexguma ga nüma ga Acóbu ga Iraëgu äëgacü, rü ñanagürü: —¿Tüxcüü poraäcü chixexü chomaxä pexüe? ¿Rü tüxcüü ga namaxä nüxũ pixuxũ ga yema yatü ga pexũ nax nangexmaxũ ya nai ya peenexë? —ñanagürü. <sup>7</sup>Rü nüma ga nanegü rü nanangäxũgagü rü ñanagürügü: —Yerü nümatama nixĩ ga tochigacax rü tatanüxũgüchigacax

ínacaxũ. Rü ñanagürü toxũ:

“¿Tamaxũxũ ta ya penatü? ¿Rü pexũ nangexmaxũ ya nai ya peenexë?”

ñanagürü toxũ. Rü toma rü tanangäxũ ga yema toxna nax nacaxũ. ¿Rü

ñuxücüruwa chi i nüxũ tacuáxũ nax nüma rü: “Nua penaga ya peenexë”, ñaxũmaxä toxũ nangäxũxũ?

—ñanagürügü. <sup>8</sup>Rü yexguma ga Yudá rü nanatü ga Iraëxũ ñanagürü: —Rü ngëxguma tama taiyamaxä

iyuechaxũgu, rü ëcü itowe namu ya yimá toenexë! Rü choma tátama nüxna chadau, rü ñuxma tátama itaxĩächi. Rü ngémaäcü taxütáma taiyamaxä tayue i yixema rü toxocügü. <sup>9</sup>Rü choma tátama nixĩ i nüxna chadauxũ ya Bëyamí. Rü ngëxguma taxacü nüxũ ngupetüxgux, rü choma tátama nixĩ i chanangenagüxũ i ngéma guxchaxũ. Rü ngëxguma

taxütáma cuxçax chanatägexëëxgux, rü guxũgutáma cupexewa chachixexũgu. <sup>10</sup>Rü ngëxguma chi taxũ nua toxũ cunüxcüxëëgu, rü marü chi taxreexpüxcüna ngéma taxĩ rü tawoegu —ñanagürü ga Yudá. <sup>11</sup>Rü yexguma ga nüma ga nanatü, rü nanangäxũ rü ñanagürü: —Ngëxguma nataxuxgu nax taxacümaxä penangüxmüxëëxü ya yimá äëxgacü ega Bëyamí tama pewe rüxüxgu, rü ñaäcü tá penaxü: iRü perü chacügügu norü ämare ngéma tá pingel!

iRü ngéma penana i ngéma ngëmaxũgü i mexügu i tórü naanewa ixixũ, ngëxgumarüxũ i tuxuneruxũ, rü pumára, rü míra, rü ira, rü castaña rü alméüdraarü o! <sup>12</sup>iRü ngéma diëru ga noxri yéma ngixũ pengecü rü wenaxarü ngéma ngixũ pingel nax nüxna ngixũ pexäxũçax! Yerü ngürüächi ínatië rü



yemacax perü chacugügu ngixũ  
 nanucucüraxũ. iRü naétü nai i  
 ngëxgumaepüx i diëru ngéma ngixũ  
 pinge nax to i trígucax petaxegüxũcax!  
 13iRü ecü ipexiächi rü ípeyaga ya  
 peenexë rü wenaxarü ípeyadaux i  
 naxütawa i ngéma äëxgacü! 14Rü  
 chanaxwaxe ya Tupana ya guxüma  
 nüxũ tauxchacü nüxna naxinü ya yimá  
 äëxgacü nax nüxũ  
 pengechaütümüxũgüxũcax, rü  
 ínanguxuchixëëäxũcax ya yimá peenexë  
 ya Chimeú, rü taxuxüma nüxũ  
 ngupetüxũcax ya Bëyamí. Rü ngëxguma  
 Tupana naxwaxegu nax changenexü, rü  
 marü name nax ngémaäcü yixixũ  
 —ñanagürü ga Acóbu. 15Rü yexguma ga  
 nanegü rü nanade ga yema ämaregü rü  
 guxüma ga yema diëru ga  
 íyangegüchaũxũ. Rü inayagagü ga  
 Bëyamí rü yemaacü Equítuanewa naxí.  
 .....

19Rü yexguma guma í ga Yúche nawa  
 puracünewa nangugügu, rü yema yatü  
 ga napatamaxá icuáxümaxá nidexagü,  
 rü ñanagürügü nüxũ: 20—Rü yexguma  
 noxri nua taxixgu, Pa Corix, rü aixcüma  
 tríguwa nua taxí. 21Natürü yexguma  
 tawoegugu rü yema ítayapegüxüwa  
 tangugügu, rü ítayawëgü ga torü  
 chacugü rü wüxichigü ga torü chacugu  
 ngixũ itayangaugü ga yema diëru. Rü  
 guxcüma iyexma. Rü ñuxma rü nua  
 ngixũ tange nax ngixũ tataëguxëëxũcax.  
 22Rü ñuxma rü yexeracü i diëru nua  
 ngixũ tange nax to i trígucax  
 tataxegüxũcax. Natürü tama nüxũ  
 tacuax ga texé torü chacugügu nax  
 ngixũ nucuxũ ga yema diëru ga noxri  
 nua ngixũ tangedü. 23Rü yema

Yúchepataarü dauruxũ rü nanangãxũ rü  
 ñanagürü: —iPerüchianegü, rü taxü i  
 pemuüexũ! Rü yimá perü Tupana ya  
 penatiarü Tupana ixícü nixí ga perü  
 chacugügu ngixũ nucü. Yerü  
 chomatama ngixũ chayaxu ga yema  
 diëru ga ngixũ pexägücü ga yexguma  
 nua pexixgu —ñanagürü. Rü yexguma  
 ga guma yatü rü Chimeúxũ ínamuxüchi  
 rü yema naeneegü íyexmagüxüwa  
 nanaga. 24Rü ñuxüchi Yúchepatawa  
 nanagagü ga guxüma ga yema  
 naeneegü. Rü dexá nüxna tanaxã nax  
 yayauxgücütüxũcax. Rü norü búrugü rü  
 ta nayaxüwemügü. 25Rü yexguma ga  
 yema naeneegü rü nanamexëxë ga  
 ämaregü, rü Yúchexũ ínananguxëëgü ga  
 norü puracüwa nax ne naxüxũ. Yerü  
 nüxũ nacuaxgü nax tocuchigu tá  
 namaxã nachibüxũ. 26Rü yexguma  
 napatawa nanguxgu ga Yúche, rü nüma  
 ga naeneegü rü napexegu ñaxtüanegu  
 nanangücuchitanü. Rü ñuxüchi nüxna  
 nanana ga yema ämaregü ga yéma nüxũ  
 nangegüxũ. 27Rü nüma ga Yúche rü  
 nüxna naca, rü ñanagürü: —¿Ñuxäcü  
 pexü naxüpetüxũ? ¿Rü ñuxäcü tüxũ  
 naxüpetüxũ ya penatü ya yáxe ga  
 chomaxã tüxũ pixuchigaxe? ¿Ñuxma rü  
 ta tamaxüxũ? —ñanagürü. 28Rü  
 naeneegü rü wenaxarü napexegu  
 nanangücuchitanü, rü ñanagürügü: —Pa  
 Torü Äëxgacüx, tüma ya tonatü rü  
 taxuxüma tüxũ naxüpetü. Rü tamaxü ta  
 nixí —ñanagürügü. 29Rü yexguma ga  
 Yúche rü nügücüwaguama nadawenü,  
 rü nüxũ nadau ga Bëyamí ga  
 naeneexüchi ixícü ga naéwaücü. Rü  
 ñanagürü: —¿Rü yimá yixixũ ya  
 peenexë ya rübumaecü ga chomaxã

nüxũ pixucü? iRü Tupana cuxĩ  
rüngũxëxë, Pa Chaunex! —ñanagürü.

.....

<sup>33</sup>Rü yexguma ga Yúche rü  
naeneegüxũ ínarütogüxëxë. Rü guma  
rüyamaecüwa inanaxügü nax  
ínatogüxëxëxũ rü ñuxmata guma  
rübumaecüwa nangu. Rü guxũma ga  
naeneegü rü poraãcü nabaxãchiãëgü rü  
nügü narüdaunütanüãchi.

.....

#### Yúchepáũ ga nawa naxaxexũchiga

**44** <sup>1</sup>Rü yemawena ga Yúche rü  
bexma yema yatü ga  
napatamaxã icuáxũxũ namu, rü  
ñanagürü: —iTrígumaxã mea nüxũ  
yaxũãcugü i norü chacugü i ngëma  
duũxũgü! iRü ngëxmatama  
wüxichigüarü chacugüaxgu ngĩxũ nanu  
i norü diëru! <sup>2</sup>Rü ngëxgumarüxũ ta i  
chorü axepáũ i diërumünaxçax, rü  
ngëma rübumaexũ i naeneearü  
chacuaxgu tá cuyaxúcuchi ngĩmaxã i  
ngëma diëru i trígutanü ngĩxũ  
inaxãgücü —ñanagürü. <sup>3</sup>Rü moxũãcü ga  
yexguma noxri iyanagóxgu ga üaxcü, rü  
Yúche inanamuãchitanü ga naeneegü  
namaxã ga norü búrugü. <sup>4-5</sup>Rü yexguma  
taũta yáxũwa nangugügu, rü Yúche rü  
norü duũxũxũ namu, rü ñanagürü nüxũ:  
—iNawe nangë i ngëma duũxũgü! Rü  
ngëxguma nüxũ icuyangauxgu, rü  
ñacugürü tá nüxũ: “¿Rü tüxcüü i  
chixexũmaxã penatáeguxëxë i ngëma  
mexũ i chorü cori pexçax üxũ? ¿Rü  
tüxcüü naxçax pengĩxũ i ngëma chorü  
coriarü axepáũ i diërumünaxçax i nawa  
naxaxexũ rü nawa nüxũ nacuáxũ ega  
taşacü i ëxũguxũ ngupetüxgux? Rü

ngëmaãcü poraãcü chixexũ pexüe”,  
ñacugürü tá nüxũ —ñanagürü ga Yúche.

<sup>6</sup>Rü yexguma Yúchearü duũxũ  
naeneegüxũ iyangauxgu, rü yematama  
ore ga Yúche namaxã nüxũ  
ixuxũãcütama nüxũ nixu. <sup>7</sup>Rü nümagü  
rü nanangãxũgü, rü ñanagürügü:  
—¿Tüxcüü ngëma ñacurügü toxũ? Rü  
toma rü taguma ngëma taxü. <sup>8</sup>Rü  
yexguma noxri nua taxĩxgu, rü yema  
diëru ga torü chacugügu ngĩxũ  
ítayangaugücü, rü marü pexũ ngĩxũ  
tawoeguxëxë. ¿Rü ñuxücürüwa nagu  
perüxínüexũ nax perü coripatawa  
naxçax tangĩxũ i norü diërumü rüexna  
norü úiru? <sup>9</sup>iRü ëcü tayux ya yíxema  
tümaarü chacuwa nüxũ icuyangauxe i  
ngëma axepáũ! Rü woo i toma rü ta  
perü puracütanüxũ tá tixĩgü  
—ñanagürügü. <sup>10</sup>Rü yexguma ga yema  
Yúchearü duũxũ rü ñanagürü: —Ngëma  
pema nüxũ pixuxũãcüma tá pemaxã  
chanaxü. Natürü ya yíxema tümaxütawa  
nüxũ ichayangaxe i ngëma axepáũ, rü  
yixexica tátama tixĩ ya chorü duũxũxũ  
ixíxe. Rü yíxema taxuxũma i chixexũ  
ügüxe rü tá tüxũ chingëxgü —ñanagürü.  
<sup>11</sup>Rü yexguma ga wüxichigü rü paxa  
ínananuũ ga norü trígupüxũ, rü  
nayawëgü. <sup>12</sup>Rü yexguma ga yema  
Yúchearü duũxũ rü wüxichigüarü  
chacugu nidaugüchigü. Rü yema  
rüyamaexũarü chacuwa inanaxügü  
ñuxmata rübumaexũarü chacuwa  
nangu. Rü Bëyamíarü chacugu nixĩ ga  
nüxũ iyangauxũ ga yema axepáũ. <sup>13</sup>Rü  
yexguma ga guxũma ga yema  
nügüeneegü rü norü ngechaũmaxã nügü  
narügáutechirugü. Rü ñuxüchi  
wüxichigü norü búruëtügu nananugü ga

norü trígupüüggü, rü gumatama ñane ga Yúche nawa yexmanecax nawoegu.

<sup>14</sup>Rü yexguma Yúchepatawa nangugügu ga Yudá namaxá ga naeneegü, rü nüma ga Yúche rü napatawatama nayexma.

Rü ga naeneegü rü napexegu

ñaxtüanegu nanangücuchitanü. <sup>15</sup>Rü

yexguma ga Yúche rü nüxna naca, rü

ñanagürü: —¿Taxacü nixí i pexüxü i

pemax? ¿Tama êxna nüxü pecuax nax

tüxü chacuaxamaxü ega taxacü

ixüxgu? —ñanagürü. <sup>16</sup>Rü yexguma ga

Yudá rü nanangäxü, rü ñanagürü:

—¿Taxacüxü chi cumaxá tixugüxü? ¿Rü

ñuxäcü chi cuxcax tanangoxêêxü nax

toxü cuyaxôxüçax nax tama toma yixixü

nax cuxü tangixü? Bexmana Tupana rü

torü chixexügagu toxü napoxcue. Rü

daxegü tixigü, rü guxäma i toma rü curü

duüxügüxü toxü ixigüxêxê wüxigu

namaxá ya yimá axepáxü naxütawa

nüxü ipeyangaxcú —ñanagürü.

<sup>17</sup>Natürü ga Yúche rü nanangäxü rü

ñanagürü: —Taxucaxma guxäma nua

tariücho. Rü yimá axepáxü naxütawa

nüxü iyangaucüxicatama tá nixí ya

chorü puracüruxü ixücü. Rü pema rü

marü name i penatüçax pewoegu. Rü

taxúetáma pexü tachixewe —ñanagürü.

#### Yudá rü Bëyamíétüwa nachogü

<sup>18</sup>Rü yexguma ga Yudá rü Yúchecax

nixü, rü ñanagürü nüxü: —Pa Chorü

Corix, rü cuxü chacaxü irü choxü

irüxínü! iRü taxü i chomaxá cunuxü,

erü nüxü chacuax nax cuma rü marü

Faraóürüütama quixixü!

.....

<sup>24</sup>Rü yexguma noxri nua

tayawoeguxgu, rü tonatümaxá nüxü

tixu ga guxüma ga yema tomaxá nüxü

quixuxü. <sup>25</sup>Natürü yexguma marü

naguxgu ga torü trígu rü tonatü rü

wenaxarü nua toxü tamugü nax nua

tríguçax tayataxegüçax. <sup>26</sup>Natürü ga

toma rü tümamaxá nüxü tixu ga yema

cuga, rü ñatagürügü: “Taxuacüma

ngéma taxí ega tama towe naxüxgu ya

yimá toenexê ya rübumaecü ya Bëyamí.

Erü ngëxguma tama towe naxüxgu, rü

taxucürüwatáma âëxgacüxütawa

tangugü”, ñatagürügü tüxü. <sup>27</sup>Rü tüma

ga tonatü rü ñatagürü toxü: “Pema rü

meama nüxü pecuaxgü ga yema

çoxmax ga Raquél rü taxrexicatama

nixí ga ngíne. <sup>28</sup>Rü wüxi rü marü

choxna inayarütaxu, rü yexgumacürüwa

marü taguma nüxü chadau. Rü nüxü

chacuax rü aixcüma nixí ga ai nax

nangóxü. <sup>29</sup>Rü ñuxma ega choxna

peyagaxgu ya yimá chaune ya Bëyamí,

rü ngürüächí taxacürü chixexü nüxü

üpetüxgu, rü pegagu tá nixí nax

ngechaümaxá nayuxü i ñaa yaxguax”,

ñatagürü ga tonatü. <sup>30-31</sup>Rü ngëmacax

cumaxá nüxü chixu ya torü papá rü

poraacüxüchima nüxü tangechaü ya

yimá tümane ya bucü. Rü ngëmacax i

ñuxma ega tama tomaxá natáeguxgu, rü

tüma ya tonatü rü tá tayu ega tama

tomaxá ínanguxgu. Rü ngëmaacü

togagu tá nixí i ngechaümaxá nayuxü

ya yimá yacü ya tonatü. <sup>32</sup>Rü choma rü

tümamaxá nüxü chixu ga chorü papá rü

choma tátama nüxna chadau ya yimá

toenexê ya rübumaecü. Rü ñachagürü ta

tüxü: “Rü ngëxguma tama cuxcax

chanatáeguxêégux, rü choma tá nixí i

guxügütáma chayangexü i ngéma

guxchaxü”, ñachagürü tüxü. <sup>33</sup>Rü

ngēmacaḅ cuxũ chacaḅxũ, Pa ãĕḅgacũ, nax choma waxi nuxã cuxũtagu charũxãũxũ nachicũxũ ya yimã chauenexẽ ya rũbumaecũ. iRũ ĕcũ íyamu i nũma nax naeneegũmaxã natãeguxũcaḅ! —ñanagũrũ ga Yudã.

.....

**Yũche rũ naeneegũmaxã nũgũ nixu**

**45** <sup>1</sup>Rũ dũxwa ga Yũche rũ marũ tama yaxna namaxã naxĩnũ ga nax naxauxchaũxũ ga norũ duũxũgũpexewa. Rũ yemacaḅ norũ duũxũgũxũ tagaãcũ ñanagũrũ: —iGuxãma i pemax, rũ ípechoxũ i nua! —ñanagũrũ. Rũ nũxicatama naeneegũmaxã yẽma nayaxũãchitanũ. <sup>2</sup>Rũ poraãcũ naxaxu. Rũ yema nax poraãcũ naxaxuxũ, rũ guxũma ga Equítuanecũãḅ ga ãĕḅgacũpatawa yexmagũxũ rũ nũxũ naxĩnũe. Rũ dũxwa Faraóũxũtawa nanguchiga ga yema. <sup>3</sup>Rũ ñũxũchi ga Yũche rũ naeneegũxũ ñanagũrũ: —Choma chixĩ i Yũche. ėRũ tamaxũxũ ya papã? —ñanagũrũ. Rũ nũma ga naeneegũ rũ poraãcũ nabaĩxãchiãẽgũ, rũ taxuxũmaama nanangãxũgũgẽga. <sup>4</sup>Natũrũ ga Yũche rũ naeneegũxũ ñanagũrũ: —iĒcũ númaxũra pexĩ! —ñanagũrũ. Rũ yexguma ga yema naeneegũ rũ naxũtawaama naxĩ. Rũ nũma rũ ñanagũrũ nũxũ: —Choma nixĩ i peenexẽ ya Yũche chixĩxũ ga pema Equítuanegu chomaxã petaxegũxũ. <sup>5</sup>Natũrũ tama chanaxwãxe i penaxĩxãchiãẽtanũ rũ pegũchitama pexaie naxcaḅ ga yema chomaxã nax petaxegũxũ. Yerũ Tupana nixĩ ga woetama pepexegu nua choxũ mucũ nax tama taiyamaxã peyuexũcaḅ.

<sup>6</sup>Rũ ñũxma rũ marũ taxre ya taunecũ nixĩ nax taiya ngũxũ i ñaa nachixũanewa. Rũ ñũxma rũ 5 ya taunecũama ínayaxũ i nagu taxuxũtãma i nanetũ rũxũxũ ega woo itoegu.

<sup>7</sup>Natũrũ Tupana nixĩ ya pepexegu choxũ imucũ nax ngẽmaãcũ tama taiyamaxã peyuexũcaḅ rũ íyaxũgũxũcaḅ i petaagũ i ñoma i naanewa. Rũ ngẽmaãcũ tama nagu íperũxĩnũeyane rũ Tupana chaugagu pexũ namaxẽxẽ.

.....

<sup>9</sup>iĒcũ, paxa pewoegu i tũmaxũtawa ya papã, rũ ñapegũ tũxũ: “Rũ cune ya Yũche rũ ñanagũrũ: ‘Tupana rũ ãĕḅgacũxũ choxũ ningucuchixẽxẽ nax Equítuanemaxã ichacuãxũcaḅ! iRũ paxa nua naxũ rũ choxũ íyadaḅx! <sup>10</sup>Rũ Gochẽũanewa tá cingu wũxigu namaxã i cunegũ rũ cutaagũ rũ cuxũnagũ rũ guxũma i ngẽma cuxũ ngẽxmaxũ. Rũ ngẽmaãcũ tá chorũ ngaicamãna cunxexma. <sup>11</sup>Rũ nua rũ tá õna pexna chaxã i cuma rũ guxũma i cutanũxũgũ nax taxuxũma pexũ taxuxũcaḅ. Erũ 5 ya taunecũama ínayaxũ nax taiya tá ngũxũ’”, ñapegũ tũxũ ya papã. <sup>12</sup>Rũ chauenexẽ ya Bẽyamĩ rũ guxãma i pema nixĩ i nũxũ pexĩnũexũ nax chomatama ngẽma ñachaxũ pexũ. <sup>13</sup>iRũ papãmaxã nũxũ pixu nax choma chixĩxũ i ãĕḅgacũ i nua Equítuanewa! iRũ tũmamaxã nũxũ pixu i guxũma i nua nũxũ pedauxũ nax ñuxãcũ chauga naxĩnũexũ i duũxũgũ! iRũ paxa pewoegu rũ tũxũ peyaga ya papã! —ñanagũrũ. <sup>14</sup>Rũ yexguma ga Yũche rũ naenexẽ ga Bẽyamĩna nanaĩxãchi rũ naxaxu. Rũ yexgumarũxũ ta ga Bẽyamĩ rũ naxaxu rũ Yũchena nanaĩxãchi. <sup>15</sup>Rũ ñũxũchi ga Yũche rũ

guxũma ga naeneegũxũ nachũxu, rũ naxauxãcũma nũxna nanaxĩxãchichigũ. Rũ yemawena ga naeneegũ rũ marũ tama namuũeãcũma namaxã nidexagũ. <sup>16</sup>Rũ dũxwa Faraóũxũtawana nanguchiga nax yẽma Yũchexũtawana nax nangugũxũ ga naeneegũ. Rũ nũma ga Faraóũ rũ norũ ngũxẽeruũgũ rũ poraãcũ nataãxẽgũ. <sup>17</sup>Rũ yexguma ga Faraóũ rũ ñanagũrũ Yũchexũ: —iNamaxã nũxũ ixu i cueneegũ rũ norũ búrugũ yamexẽẽgũ rũ paxa nachixũianecax nawoegu i Canaãũwa! <sup>18</sup>iRũ paxa nua tũxũ nagagũ ya penatũ rũ guxũma i petanũxũgũ! Rũ choma rũ tá tũxna chanaxã i ngẽma rũmemaexũ i naane i Equítuanewa ngẽxmaxũ. Rũ nua rũ tá mexũ tangõxgũ rũ taxuxũtãma tũxũ nataxu. <sup>19</sup>iRũ namaxã nũxũ ixu i cueneegũ rũ númacũãx ya cárugũ ya búrugũ itũgũne ne yangegũ nax yimagũgu nua tũxũ nagagũxũcax ya naxmaxgũ rũ naxacũgũ rũ penatũ! <sup>20</sup>iRũ taxũ i norũ naanecax naxoegaãẽgũxũ! Erũ nua Equítuanewa rũ ngẽma rũmemaexũ i naane rũ noxrũgũ tá nixĩ —ñanagũrũ. <sup>21</sup>Rũ yexguma ga Yũche rũ nanaxũ ga yema Faraóũ namaxã nũxũ ixuxũ. Rũ naeneegũna nanaxã ga cárugũ rũ naxchirugũ rũ õnagũ ga norũ namawaũ. <sup>22</sup>Natũrũ guma naenexẽ ga Bẽyamĩna rũ nanaxã ga 5 ga naxchiru rũ 300 tachinũ ga diẽru. <sup>23</sup>Rũ nanatũcax yẽma nanamugũ ga 10 ga búrugũ ga yema Equítuanewa rũmemaexũ ga yemaxũmaxã ixãxwetaxũ, rũ 10 ga búru ga trígupũũmaxã ixãxwetaxũ, rũ naguxũraũxũ ga õna ga nanatũarũ namawaũ. <sup>24</sup>Rũ ñyxũchi naeneegũxũ inamuãchitanũ. Rũ nayaxucyxẽgũ rũ

ñanagũrũ nũxũ: —iRũ taxũ i pegũ ipeyaxũáxũ i namawa! —ñanagũrũ. <sup>25</sup>Rũ nũma ga naeneegũ rũ inaxĩãchi, rũ Canaãũanecax nawoegu ga nanatũxũtawana. <sup>26</sup>Rũ yexguma ñnangugũgu, rũ nanatũmaxã nũxũ nixugũgũ rũ ñanagũrũgũ: —Yũche rũ namaxũ. Rũ nũma nixĩ i Equítuanemaxã inacuáxũ —ñanagũrũgũ. Natũrũ ga nũma ga Acóbu ga Iraẽgu ãẽgacũ rũ tama nũxũ nayaxõ, yerũ marũ tama Yũchegu narũxinũ. <sup>27</sup>Natũrũ yexguma tũmamaxã nũxũ yaxugũgũgu ga yema Yũchearũ dexa, rũ nũxũ tadaũxgu ga guma cárugũ ga ixããcune namaxã ga yema õnagũ ga Yũche tũmacax yẽma mugũxũ, rũ tayaxõ rũ tataãxẽxũchi. <sup>28</sup>Rũ yexguma ga nũma ga Acóbu rũ ñanagũrũ: —Rũ aixcũmaeca nixĩ ya chaune ya Yũche i namaxũxũ. Rũ ngẽma tá chaxũ rũ tá nũxũ chadau naxũpa nax chayuxũ —ñanagũrũ.

#### Acóbu rũ Equítuanewa naxũ

**46** <sup>1</sup>Rũ yexguma ga Acóbu ga Iraẽgu ãẽgacũ rũ inaxũãchi namaxã ga guxũma ga natanũxũgũ rũ norũ yemaxũgũ. Rũ yexguma Bechẽbawana nanguxgu, rũ yẽma nanatũ ga Ichaáarũ Tupanacax naxũnagũ nadai rũ ñnanagu. <sup>2</sup>Rũ yema chũtaxũgu rũ Cori ya Tupana rũ Acóbuxũ nũxũ nadauxẽxẽ ga wũxi ga õxũgũxũ, rũ namaxã nidexa rũ ñnanagũrũ: —Pa Acóbux, Pa Acóbux —ñnanagũrũ. Rũ nũma ga Acóbu rũ nanangãxũ, rũ ñnanagũrũ: —Daxe chixĩ, Pa Corix —ñnanagũrũ. <sup>3</sup>Rũ nũma ga Tupana rũ ñnanagũrũ: —Choma nixĩ i Tupana chixĩxũ i cunatũarũ Tupana. iRũ taxũ i

cumuũxũ nax Equítuanewa cuxũxũ! Erü ngéma tá nixĩ i cutaagũwa chachixẽxũ i wũxi i duũxũgütücumu i taxũ. <sup>4</sup>Rü choma rü tá cuwe charũxũ i Equítuanewa. Rü choma tátama nixĩ i wena chanawoeguxẽxũ i cutaagũ. Natürü i cuma rü Equítuanegu tá cuyu, rü Yúche rü tá nacuxũtagu i ngẽxgumax —ñanagürü ga Tupana. <sup>5</sup>Rü yexguma ga Acóbu rü inaxũãchi ga Bechébawa. Rü nanegü rü guma cárgü ga Faraóũ yéma mugünegu Equítuanewa nanagagü wũxigu tímamaxã ga nataagü rü naneãxgü.

.....

<sup>28</sup>Rü yexguma Equítuanewa nanguxgux ga Acóbu, rü nane ga Yudáxũ nügüpepe nimu nax Yúchemaxã nüxũ yanaxuxũcax nax naxũtawa naxũxũcax ga Gochéũanewa. <sup>29</sup>Rü nüma ga Yúche rü norü duũxũxũ namu nax norü cáru namexẽxũcax nax Gochéũanewa nanatũxũ íyadauxũcax. Rü yexguma tüxũ nadaxgu rü tüxna nanãxãchi, rü tümaatügu yangücuchiácüma yéma naxauxecha. <sup>30</sup>Rü yexguma ga nüma ga Acóbu ga Iraégu áégacü rü Yúchexũ ñanagürü: —Ñuxmata waxi nixĩ i marü namexũ nax chayuxũ, erü wena cuxũ chadau rü nüxũ chacuax nax aixcüma cumaxũxũ —ñanagürü.

.....

**47** <sup>1</sup>Rü nüma ga Yúche rü Faraóũmaxã nüxũ nayarüxu nax nanatü rü naeneegü rü marü Canaáũanewa ne naxĩxũ rü marü Gochéũanewa nangugũxũ namaxã ga naxũnagü ga carnérgü rü wocagü rü guxũma ga norü yemaxũgü. <sup>2</sup>Rü

Faraóũxũtawa nanagagü ga 5 ga naeneegü nax Faraóũ nüxũ dauxũcax. <sup>3</sup>Rü nüma ga Faraóũ rü Yúchexeneegüna naca rü ñanagürü: —¿Taxacü nixĩ i perü puracü i pemax? —ñanagürü. Rü nümagü ga Yúchexeneegü rü nanangãxũgü rü ñanagürü: —Pa Áẽxgacüx, toma i curü puracütanũxũ nax tixĩgũxũ, rü carnérgüarü dauruũgü tixĩgü i torü oxigürüütama. <sup>4</sup>Rü ñuxma rü nua taxĩ nax nuxã ñaa nachixũanegu taxãchiũgũxũcax, erü poraacü taiya nangux i Canaáũanewa. Rü nataxuma ya maxẽ naxcax i torü carnérgü. Rü ñuxma, Pa Áẽxgacüx írü taxũchima cuxũ namexũ nax Gochéũanegu taxãchiũgũxũ? —ñanagürü. <sup>5</sup>Rü yexguma ga Faraóũ rü Yúchexũ ñanagürü: —Yimá cunatü rü cueneegü rü nua naxĩ nax wũxiwa cumaxã nangexmagũxũcax. <sup>6</sup>Rü ñaa Equítuane rü noxrü nixĩ. Iẽcũx, nüxna naxã i ngéma Gochéũane! Erü ngéma nixĩ irümemaexũ i naane i nua Equítuanewa nax ngẽmagu naxãchiũgũxũcax. Rü ngẽxguma cunangugũgügu nax ngẽmatanüwa nangexmagũxũ i yattügü i aixcüma carnérgüarü dauxũ cuaxgũxũ, rü chanaxwaxe i chauxũnagũmaxã rü ta inacuaxgü —ñanagürü.

.....

#### Acóbuarü yuxchiga

**49** <sup>29-30</sup>Rü wũxi ga ngunexũ ga Acóbu ga Iraégu áégacü rü nayaxucuxegü ga nanegü, rü ñanagürü: —Marü íxraxũ nataxu nax chayuxũ. Rü chanaxwaxe i chorü oxigũxũtagu choxũ peyatax i Canaáũanewa. Rü ngéma

naxmaxũ i Mapérawa i Máũrearũ  
toxm̄xtawa ngẽxmaxũgu tá nixĩ i  
choxũ petaxgũxũ, yerũ yemagu nixĩ ga  
nataxgũxũ ga chautanũxũgũ. Rũ yema  
nachica nixĩ ga Abraáũ naxcax taxexũ  
naxũtawa ga Itítatanũxũ ga Efoũ nax  
yexma ngĩxũ natáxũcax ga chorũ noxẽ  
ga Sára. <sup>31</sup>Rũ yexma chorũ noxẽ ga  
Sáraxũtagu nixĩ ga natáxũ ga chorũ oxi  
ga Abraáũ, rũ chaunatu ga Ichaá rũ  
chaué ga Rebéca. Rũ yexma ta nixĩ ga  
ngĩxũ chatáxũ ga choxm̄ax ga Léa  
—ñanagürũ.

.....

<sup>33</sup>Rũ yexguma Acóbu igúegagu ga  
nanegũxũ nax naxucyxẽxũ, rũ  
inayacaãchi rũ nayu.

.....

**50** <sup>7</sup>Rũ nũma ga Yúche rũ  
nanattixũ inayatax nagu ga  
yema naxmaxũ ga Canaãũanewa  
yexmaxũ. Rũ nawe narũxi ga muxũma  
ga Faraóũarũ ngũxẽeruũgũ ga  
ãẽxgacũwa ugũxũ ga Equítuanewa. <sup>8</sup>Rũ  
Yúcheeneegũ rũ guxũma ga natanũxũ  
ga Acóbu, rũ Yúchewe narũxi. Rũ  
buxũgũ rũ naxũnagũxicatama yéma  
Gochéũwa nayaxũãchitanũ.

.....

<sup>14</sup>Rũ yexguma marũ nanatũxũ  
inataxguwena, rũ Equítuanecax natáegu  
ga Yúche wũxigu namaxã ga naeneegũ  
rũ guxũma ga yema togũ ga  
iyaxũmücũgũxũ.

#### Yúche nanataãxẽxẽxẽ ga naeneegũ

<sup>15</sup>Rũ Acóbu marũ yuxguwena, rũ  
Yúchexũ namuũe ga naeneegũ, rũ  
nũgũmaxã ñanagürũgũ: —Ñuxmata  
waxi nixĩ i Yúche inaxũtanũxũ naxcax

ga guxũma ga yema chixexũ ga namaxã  
ixũxũ —ñanagürũgũ. <sup>16-17</sup>Rũ yemacax  
naxũtawa namugagũ, rũ ñanagürũgũ:  
“Naxũpa ga nax tayuxũ ga papá, rũ toxũ  
tamu nax cumaxã nũxũ tixuxũcax i  
tũmaarũ ore i ñaxũ: ‘Rũ cuxna chaca nax  
cueneegũaxũ nũxũ curũngũmaxũcax ga  
yema chixexũ ga cumaxã naxũgũxũ ga  
yexguma chixri cumaxã nachopetũgũ’,  
ñanagürũ. Rũ ngẽmacax i toma nax  
tanatũarũ Tupanaarũ duũxũgũ tixĩgũxũ,  
rũ cuxna taca nax toxũ nũxũ  
curũngũmaxũcax ga yema chixexũ ga  
cumaxã taxũxũ”, ñaxũmaxã yéma  
namugagũ. Rũ yexguma Yúche nũxũ  
ĩnũgu ga yema dexa, rũ nũxũ  
nangechaũtũmũxũgũ ga naeneegũ, rũ  
naxaxu. <sup>18</sup>Rũ yemawena yéma  
Yúchexũtawa nangugũ ga naeneegũ. Rũ  
napexegu nanangũcuchitanũ rũ  
ñanagürũgũ: —Rũ daxegũ tixĩgũ nax  
curũ duũxũgũxũ toxũ quixĩgũxẽẽxũcax  
—ñanagürũgũ. <sup>19</sup>Natürũ nũma ga Yúche  
rũ nanangãxũ, rũ ñanagürũ: —iTaxũ i  
choxũ pemuũexũ! ¿Rũ ñuxũcürũwa i  
choma rũ Tupanachicũxũ chaugũ  
chixĩxẽẽxũ nax ngẽmaãcũ pexũ  
chapoxcuxũcax? <sup>20</sup>Pema nagu  
perũxĩnũegu rũ chixexũ chomaxã  
pexũxũ, natürũ Tupana rũ mexũxũ  
nananguxuchixẽxẽ ga yema chixexũ ga  
chomaxã pexũxũ. Rũ yemacax  
ãẽxgacũxũ choxũ ningucuchixẽxẽ i nua  
nax ngẽmaãcũ namaxẽxũcax i muxũma i  
duũxũgũ. <sup>21</sup>Rũ ngẽmacax tama  
chanaxwaxẽ i choxũ pemuũe. Choma rũ  
tá mea pexna chadau wũxigu namaxã i  
pexacũgũ —ñanagürũ. Rũ yemaacũ ga  
Yúche rũ naeneegũxũ nataãxẽxẽxẽ yerũ  
nũxũ nangechaũãcũma namaxã nidexa.

### Yúcheärü yuxchiga

22-23Rü nüma ga Yúche rü naeneegü rü yexmatama Equítuanegu naxächíüügü. Rü nüma ga Yúche rü nawa nangu nax nüxü nadauxü ga nane ga Efraítaagü. Rü yexgumaruxü ta nüxü nadau ga nataxa ga Maquí ga Manaché nane. Rü nüxü nadau ta ga Maquí nanegü. Rü yexguma 110 ga taunecü nüxü yexmagu ga Yúche rü nayu. 24Rü wüxi ga ngunexü naxüpa ga nax nayuxü ga Yúche rü naeneegüxü ñanagürü: —Marü taxütáma nüxcü chayü. Natürü Tupana tá nixí ya pexü rüngüxëxcü. Rü nüma tá nixí i pexü ínachoxüxëxü i

ñaanachixüanewa nax yema naane ga tórü oxigü ga Abraáüna, rü Ichaána, rü tanatü ga Acóbuna naxuaxüxüwa pexíxücax —ñanagürü. 25Rü yexguma ga Yúche rü naeneegüxü ñanagürü: —Aixcüma Tupana tá pexü narüngüxëxë nax ípechoxüxü nawa i ñaanachixüane. Rü ngëxguma tá ípechoxügu rü chanaxwaxe i chomaxá ipexuneta nax peyangexü i chauxune —ñanagürü. 26Rü nüma ga Yúche rü nüxü nayexma ga 110 ga taunecü ga yexguma Equítuanegu nayuxgux. Rü tama nawa iyixixü ga ätexexümaxá nanatuxunegü. Rü ñuxüchi wüxi ga naxchixügu nayaxücuchigü ga naxüne.



# ÉXODO

## (Ínachoxũxũchiga)

### Iraétanũxũ rü ngũxũ ningegũ ga Equítuanewa

**1** <sup>1-4</sup>Rü ñaa nixĩ i naégagũ ga Acóbu nanegũ ga wũxigu guxũma ga naxmaxgũ rü naxacũgũmaxã Equítuanewa namaxã nangugũxũ. Rü Rubéũ nixĩ ga wũxi rü Chimeú nixĩ ga to, rü Lebĩ, rü Yudá, rü Ichacá rü Chaburóũ rü Bëyamĩ rü Dáũ, rü Netarĩ, rü Gáx, rü Aché. <sup>5</sup>Rü guxũma ga yema Acóbutanũxũgũ ga Equítuanewa ngugũxũ rü 70 nixĩ. Rü nũma ga Yúche rü woetama marũ Equítuanewa nayexma. <sup>6</sup>Rü nũma ga Yúche rü nayu, rü naeneegũ rü guxũma ga yema togũ ga natanũxũgũ ga yexguma maxẽxũ, rü nayue. <sup>7</sup>Natürũ ga yema Iraétanũxũ rü nimuxacũ. Rü yemaacũ paxama nimu, rü pora nüxũ nayexma yerũ namuxũchi. Rü nanapáxẽegũ ga guxũma ga Gochéũane ga Equítuanewa yexmaxũ. <sup>8-9</sup>Natürũ yemawena ga Equítuanewa rü nixũcu ga wũxi ga ãẽxgacũ ga tama Yúchexũ cuácũ. Rü nũma rü norũ duũxũgũmaxã ñanagürũ: —Ngẽma duũxũgũ i Iraétanũxũgũ rü namuxũchi rü tüxũ narũporamaegũ. <sup>10</sup>iRü

ngẽmacax, ngĩxã naxçax tadaugũ nax ñuxãcũ íyachaxãchixẽẽxũ nax yamuxũ! Erũ ngẽxguma chi ngürũachi to i nachixũane tamaxã nügũ dajxgu, rü nũma i Iraétanũxũ rü tá tórũ uanũgũtanũgu naxãgũ nax tüxũ nadajxũçax rü ñuxũchi ngẽmaacũ nayoxniegũ nax tüxna naxĩgũxũ —ñanagürũ. <sup>11</sup>Rü yemaçax ga yema Equítuanecũãxgũ rü nüxũ naxuneta ga ñuxre ga yatũgũ ga puracũmaxã icuaxgũxũ nax poraacũ yema Iraétanũxũgũxũ napuracũexẽẽxũçax. Rü nüxũ nanaxũxẽxẽ ga taxre ga ñanegũ ga Pitóũgu rü Raũchégũ ãégane. Rü guma ñanegu nixĩ ga namaxã nanguxũxũ ga naxnegũ rü churaragũarũ õnagũ ga Equítuanecũãxarũ ãẽxgacũ ga Faraóũ. <sup>12</sup>Natürũ yexguma yexeraacũ chixriãcũ namugũãxgu, rü yexeraacũ nimuetanũama ga Iraétanũxũgũ. Rü yemaçax nixĩ ga Equítuanecũãxgũ ga poraacũ nüxũ namuũexũ. <sup>13-14</sup>Rü nũma ga Equítuanecũãxgũ rü yexeraacũ chixri namaxã nachopetũ rü poraacũ nanapuracũexẽẽxũchi. Rü yemaacũ yema Iraétanũxũgũxũ nachixẽaxgũ. Rü mairaxũarũ puxmũcharawa nanamugũ

nax ladríyune naxügüxcax rü dexámañarü üwa nanapuracüexêxê nax naanewa nayáxcax ga taxtúarü dexá. Rü yemaacü nixí ga yema Iraétanüxcümaxá chixeácüma namaxêxü. <sup>15-16</sup>Rü nüma ga Equítuanecüãxaru ãêxgacü rü ngímaxá nidexa ga Chífa rü Fúa ga Iraétanüxcügarü buexacüxêêruxü. Rü ñanagürü ngíxü: —Ngêxguma penaxíraxacüxêêxgu i ngêma Iraétanüxcügarü ngexü, rü ega nayatüxcüxgu rü tá peyamaç i ngêma naxacü, natürü ega nangexgu rü taxütáma peyamaç —ñanagürü. <sup>17</sup>Natürü ga ngímagü ga yema buexacüxêêruügü rü Tupanaxü imuê. Rü yemaçax tama inaxü ga yema Equítuanecüãxaru ãêxgacü ngímaxá nüxü ixuxü. Rü tama tüxü idai ga guxema õxchanagü ga iyatüxe. <sup>18</sup>Rü yexguma ga guma ãêxgacü ga Equítuanecüãx rü ngíxcax nangema, rü ñanagürü ngíxü: —¿Tüxcüü penamaxêxêxê i ngêma buxügü i yatüxü? —ñanagürü. <sup>19</sup>Rü yexguma ga ngímagü rü inangãxü rü ngígürügügü: —Erü ngêma Iraétanüxcü i ngexügü rü tama Equítuanecüãx i ngexügürüxü iyixígü. Rü ngexügü i paxama írxaxacügüxü nixígü, rü tauxtama ngêma ngíxütawa tangugügu rü marü íxíraxacügü —ngígürügügü. <sup>20-21</sup>Rü yemaacü ga yema Iraétanüxcügarü rü nimuetanüama, rü wüxichigü ga taunecügu rü niyexeragüchigü nax naporaexü. Rü yema nax Tupanaxü namuêxü ga yema buexacüxêêruügü, rü Tupana rü ngíxü narüngüxêxê nax ngímagü rü ta yamuxácügüxcax. <sup>22</sup>Rü

yemaçax ga nüma ga Faraóü rü norü duüxcügüxü namu nax taxtü ga Níruwa tüxü nawoüxcax ga guxema Iraétanüxcügarü õxchanagü ga iyatüxe. Natürü ga guxema ingexe ga õxchanagü rü tama tüxü nadai.

### Moichéarü buxchiga

**2** <sup>1</sup>Rü wüxi ga yatü ga Lebítanüxcü ixícü rü wüxi ga nge ga natanüxcütama ixícümaxá naxáxmaç. <sup>2</sup>Rü ngíma ga yema ngecü rü nüxü ixáxcü, rü yema ngíxcü rü nayatü. Rü yexguma tüxü nadaçxgu ga guxema ngíne ga nax tamexechixü, rü tomaepüx ga tauemacü tüxü iyacux, <sup>3</sup>natürü taxucürüwa yexücürü tüxü iyacúecha. Rü yemaçax inayaxu ga wüxi ga pexchi ga dexnenaxçax rü õxwümaxá inawacuchita nax tama dexá ixücüxcax. Rü ñüxüchi yexma tüxü iyamue ga guxema ngíne, rü dexnecügu tüxü iyangütaüxêxê ga taxtü ga Nírupechinüwa. <sup>4</sup>Rü yemawena ga tümaé rü wüxi ga tümaeyaxü imu nax yéma yáxüwaxüra tüxü nadawenüxcax rü taxacü tüxü ngupetü ga guxema õxchana. <sup>5</sup>Rü yixcüamaxüra Faraóüacü rü iyarüxüe ga taxtüpechinüwa nax yaxaiyaxüxcax. Rü ngíxütaxügümaxá yexma taxtüpechinügu iyarüxü, rü yéma dexnecüwa nüxü idau ga guma pexchi ga yexma ngücü. Rü ngíma ga Faraóüacü rü wüxi ga ngíxütaxüxü imu ga nax yayauxáxcax ga guma pexchi rü ngíxütawa nax nangeaxüxcax. <sup>6</sup>Rü yexguma ínangegüãxgu ga guma pexchi, rü yexma tüxü iyangau ga wüxi ga õxchana ga ixaxúe. Rü ngíma ga

Faraóüaciü rü poraäcü ngĩxü tangechaütümüxü, rü ngĩgürügü: —Ñaa õxhana rü wüxi i Iraétanüxüaciü nixĩ —ngĩgürügü. <sup>7</sup>Rü yexguma ga tümaeyax ga guxema õxhana, rü Faraóüaciüna ica rü ngĩgürügü: —¿Namexü chi wüxi i ngexü i Iraétanüxü i ägüneníüxüçax chacaxgu nax tüxü namaüxüçax ya daxe õxhana? —ngĩgürügü. <sup>8</sup>Rü yexguma ga ngĩma ga Faraóüaciü rü ngĩxü ingãxü rü ngĩgürügü:—iËcü, tayadau! —ngĩgürügü. Rü yexguma ga yema bucü rü tümaéxü iyaga ga guxema õxhana. <sup>9</sup>Rü ngĩma ga Faraóüaciü rü ngĩgürügü ngĩxü: —iËcü cugüxütawa naga i ñaa õxhana rü choxü nayaxêxê! Rü choma rü tá cuxü chanaxütanü naxçax i ngẽma curü puracü —ngĩgürügü. Rü ngĩma ga tümaé rü tüxü iyaga rü tüxü iyaxêxê. <sup>10</sup>Rü yexguma marü tayaxüragu, rü Faraóüaciüna tüxü imu. Rü ngĩma rü ngĩnexü tüxü iyaxíxêxê. Rü Moichégu tüxü ixuéga rü ngẽma naéga rü “dexáwa chayaxuxü” ñaxüchiga nixĩ.

#### Equítuanewa nixü ga Moiché

<sup>11</sup>Rü yexguma marü nayaxgu ga Moiché, rü wüxi ga ngunexü rü natanüxügütanüwa ínayadau. Rü yéma nüxü nadau ga ñuxäcü poraäcü chixri natanüxügüxü namuxü ga Equítuanecüãxgü. Rü yexgumatama nüxü nadau ga wüxi ga Equítuanecüãx nax wüxi ga Iraétanüxüna nax nacuaüxcaãxü. <sup>12</sup>Rü nüma ga Moiché rü nanadauáane. Rü yexguma marü taxuxüma ga duüxüxü nadaxgux, rü yema Equítuanecüãxü, rü nimax rü

naxnecütexegu inanatax ga naxüne.

<sup>13</sup>Rü moxüäcü rü wenaxarü inaxüxü, rü natanüxügütanüwa ínayadau. Rü nüxü nadau ga taxre ga Iraétanüxügü ga nügü idaüxü. Rü yexguma ga Moiché rü yema namücüxü imáxüna naca, rü ñanagürü: —¿Tüxcüü cuyamaçax i ngẽma cutanüxütama ixixü? —ñanagürü. <sup>14</sup>Rü nüma ga yema Iraétanüxü rü nanangãxü rü ñanagürü: —¿Texé cuxü tamu nax cuma rü torü äëxgacü i guxchaxüaru mexëeruxü quixixüçax? ¿Ëxna cuma nagu curüxínügu rü choxü rü tá ta quimáxü ga yema Equítuanecüãx ga ñne quimáxürüxü? —ñanagürü. Rü yexguma yemaxü naxínügu ga Moiché, rü namuü, yerü marü nüxü nacuaüxgüama ga duüxügü ga nax yema Equítuanecüãxü yamáxü. <sup>15</sup>Rü yexguma Faraóü nüxü cuaxgu ga Moiché rü wüxi ga Equítuanecüãxü nax yamáxü, rü norü churaragüxü namu nax Moichéçax yadaugüxüçax nax yamaüxgüaxüçax. Natürü ga nüma ga Moiché rü Madiáüanewa naña nax yexma yaxächüxüçax.

.....

<sup>21</sup>Rü yemaacü ga Moiché rü Madiáüaru chacherdóte ga Reuépatawa nangu, rü yexma naxächüü. Rü nüma ga Reué rü nanaxüxmaçax naxacü ga Chéfuramaxä. <sup>22</sup>Rü ngĩma ga naxmaçax ga Chéfura rü nüxü ixäxacü. Rü nüma ga Moiché rü Yersóügu nanaxuéga ga guma nane. Rü ngẽma naéga rü “Choma rü tama númacüãx chixĩ”, ñaxüchiga nixĩ. <sup>23-24</sup>Rü yexgumayane ga Equítuanecüãxaru äëxgacü rü yoxni nayu. Natürü ga yema Iraétanüxügü rü guxchaxüwa nayexmagüecha, rü

Tupanapexewa naxauxe naxcaç ga yema ngúxũ nax yangegũxũ. Rũ yemacax ga Tupana rũ nüxũ nüxũ naxĩnũ ga norũ axu, yerũ nüxna nacuaçãchi ga norũ uneta ga Abraáũmaxã rũ Ichaámaxã rũ Acóbumaxã naxueguxũ. <sup>25</sup>Rũ nüxũ nadau ga ñuxãcü ngúxũ nax yangegũxũ ga yema Iraétanũxũgũ, rũ yemacax namaxã nixãũãchi.

### Tupana rũ Moichécaç naca

**3** <sup>1</sup>Rũ nüma ga Moiché, rũ naçtũ ga Yéturuarũ carnéruguarũ daruxũ nixĩ. Rũ guma naçtũ ga Yéturu ga Reuégu áégacũ rũ chacherdóte nixĩ ga Madiáũanewa. Rũ wũxi ga ngunexũ ga yexguma maxẽ ga mexũcaç namaxã nadaçuxgux ga naçtũarũ carnérugũ, rũ ínachianexũarũ tocũwawa nangu ga maçpũne ga Oréxgu áéganearũ ngaicamána. Rũ guma maçpũnewa nixĩ ga Moichémaxã yadexaxũ ga Tupana. <sup>2</sup>Rũ yéma rũ wũxi ga chuchuxũeta ga iyaçuxraxũwa nixĩ ga Moichécaç nangóxũ ga Cori ya Tupanaarũ orearũ ngeruxũ ga daxũcüãç. Rũ nüma ga Moiché rũ mea nüxũ nadawenũ rũ nüxũ nicuaçãchi ga yema chuchuxũeta ga nax yayaçuxraxũ, natürũ tama nixa. <sup>3</sup>Rũ yemacax nagu narũxinũ nax taçacũcaç tama yaxaxũ ga yema chuchuxũeta, rũ ínayadau. <sup>4</sup>Rũ yexguma Cori ya Tupana nüxũ daçxgu ga yema chuchuxũeta ga iyaçuxraxũcaç nax yaxũxũ ga Moiché, rũ nüma ga Cori ya Tupana rũ yema chuchuxũetawa Moichéna naca, rũ ñanagürũ: —Pa Moichéx, Pa Moichéx —ñanagürũ. Rũ nüma ga Moiché rũ nanangãxũ, rũ: —Daxe chixĩ

—ñanagürũ. <sup>5</sup>Rũ yexguma ga Tupana rũ ñanagürũ nüxũ: —iTaxũ i nüxna cungaicamaxũ! iRũ ínacuãxichi i curũ chapatu! Erũ ñaa nachica i nawa cungexmaxũ rũ naxũüne —ñanagürũ. <sup>6</sup>Rũ ñanagürũ ta: —Rũ choma nixĩ ga curũ oxiguarũ Tupana chixĩxũ. Rũ choma nixĩ ga Abraáũarũ rũ Ichaáarũ rũ Acóbuarũ Tupana chixĩxũ —ñanagürũ. Rũ yexguma ga Moiché rũ nügũ nidũxchiwe, yerũ namuũ nax Tupanaxũ nadawenũxũ. <sup>7</sup>Natürũ nüma ga Cori ya Tupana rũ ñanagürũama nüxũ: —Meaxũchima nüxũ chadau nax ñuxãcü ngúxũ yangegũxũ i ngẽma chorũ duũxũgũ i Equítuanewa ngẽxmagũxũ. Rũ norũ yumũxẽwa nüxũ chaxĩnũ nax ñuxãcü norũ dauruũgũxũ nax ínaxuaxũgũxũ. Rũ ngẽmaãcü meama nüxũ chacuãç nax ñuxãcü ngúxũ yangegũxũ. <sup>8</sup>Rũ ngẽmacax nixĩ i ñuxma ícharũxĩxũ nax Equítuanecũãçmexẽwa íchananguxũxẽxũcaç i ngẽma chorũ duũxũgũ. Rũ ngẽma naane i nawa tá chanagagũxũ, rũ wũxi i naane i taxũ rũ mexũ nixĩ. Rũ ngẽma rũ meama narũxũgũ i naguxũraũxũ i nanetũgũ. Rũ õna taguma nataxu. Rũ ngẽma naanegu nixĩ i naxãchiũgũxũ i Canaáũtanũxũgũ rũ Itítatanũxũgũ, rũ Amoréutanũxũgũ, rũ Ferechéutanũxũgũ, rũ Ebéutanũxũgũ rũ Yebuchéutanũxũgũ. <sup>9</sup>Rũ dücax, rũ marũ nüxũ chaxĩnũ nax ñuxãcü ngẽma Equítuanecũãçxũgũ ínaxuaxũgũxũ i ngẽma Iraétanũxũgũ, rũ nüxũ chadau nax ñuxãcü poraãcü chixri namaxã nachopetũxũ. <sup>10</sup>Rũ ngẽmacax irũ paxa cugũ namexẽxẽ! Erũ Faraóũpexewa tá cuxũ chamu nax Equítuanewa ícunamuxũxũcaç i ngẽma chorũ

duũxũgũ i Iraétanũxũgũ —ñanagürũ.  
 11Rũ yexguma ga Moiché rü Tupanaxũ  
 nangãxũ rü ñanagürũ: —¿Ëxna  
 taxacũwa chame i chomax i  
 Faraóũpexewa chaxũxũ nax  
 Equítuanewa íchangũxũêêxũcax i  
 ngẽma Iraétanũxũgũ? —ñanagürũ. 12Rũ  
 nũma ga Tupana rü nanangãxũ, rü  
 ñanagürũ: —Choma rü tá chacuxũtagu.  
 Rũ ñaa tá nixĩ i cuaxruxũ nax  
 chomatama cuxũ ngẽma chamuxũ. Rũ  
 ngẽxguma tá marũ Equítuanewa  
 ícunamuxũgu i chorũ duũxũgũ, rü  
 guxãma i pema rü daa tátama  
 maxpũnewa choxũ peyarũcuaxũxũgũ  
 —ñanagürũ. 13Natürũ nũma ga Moiché  
 rü Tupanaxũ nangãxũ rü ñanagürũ:  
 —Naturũ ngẽxguma chi natanũwa  
 chaxũxgu rü ñachaxgu namaxã: “Yimá  
 perũ oxigũarũ Tupana nua petanũwa  
 choxũ namu”, ñachaxgu namaxã, rü  
 nũmagũ rü tá choxna nacagũama rü:  
 “¿Taxacũ nixĩ i naéga ya yimá Tupana  
 ya tomaxã nüxũ quixucũ?” ñanagürũgũ  
 tá choxũ. ¿Rũ taxacũmaxã tá  
 chanangãxũxũ i ngẽxguma? —ñanagürũ  
 ga Moiché. 14Rũ nũma ga Tupana rü  
 nanangãxũ rü ñanagürũ: —Chomatama  
 chixĩ i guxãétũwa changexmaxũ, rü  
 woetama changexma. Rũ ngẽmacax  
 Choma ya Woetama Ngẽxmacũ nixĩ i  
 chauéga. Rũ ngẽmamaxã tá cunangãxũ i  
 ngẽma Iraétanũxũgũ. iRũ namaxã nüxũ  
 ixu, rü ñacugürũ tá nüxũ: “Yimá  
 Woetama Ngẽxmacũ nixĩ ya petanũwa  
 choxũ mucũ”, ñacugürũ tá nüxũ!  
 —ñanagürũ. 15Rũ ñanagürũ ta ga  
 Tupana Moichéxũ: —iRũ namaxã nüxũ  
 ixu i ngẽma Iraétanũxũ, rü ñacugürũ tá:  
 “Rũ nũma ya Cori ya Tupana ya perũ

oxigũarũ Tupana ya Abraáũarũ rü  
 Ichaáarũ rü Acóbuarũ Tupana, rü guma  
 nixĩ ga petanũwa choxũ mucũ”,  
 ñacugürũ tá nüxũ! Rũ Cori ya Tupana  
 nixĩ i chauéga i tagutãma iyagũxũ. Rũ  
 ngẽma chauégamaxã tá nixĩ i  
 guxũgutãma duũxũgũ choxũ cuaxũ.  
 16iRũ ngẽma naxũ rü nangutaquexexẽ  
 i guxũma i Iraétanũxũgũarũ ãêxgacũgũ,  
 rü namaxã nüxũ ixu rü ñacugürũ nüxũ!:  
 “Rũ nũma ya Cori ya Tupana ya perũ  
 oxigũarũ Tupana ya Abraáũarũ rü  
 Ichaáarũ rü Acóbuarũ Tupana, rü guma  
 nixĩ ga chaũxcax ngócũ. Rũ gumatama  
 nixĩ ga chomaxã nüxũ ixucũ nax pegu  
 naxĩnüxũ rü nüxũ nacuaxũ nax ñuxácũ  
 chixri pemaxã nachopetũxũ i ngẽma  
 Equítuanecũãxgũ. 17Rũ yimá Tupana  
 nixĩ ya chomaxã nüxũ ixucũ rü tá pexũ  
 ínangũxũxexẽ nawa i perũ guxchaxũgũ i  
 Equítuanewa pingegũxũ. Rũ Canaáũarũ  
 naanewa tá pexũ nagagũ i ngexta  
 ínaxãchiũgũxũgu i Canaáũtanũxũgũ, rü  
 Itítatanũxũgũ, rü Amoréutanũxũgũ, rü  
 Ferechéutanũxũgũ, rü Ebéutanũxũgũ rü  
 Yebuchéutanũxũgũ. Rũ ngẽmaacũ  
 ngẽma naane i ngextá mexũ i õna rü  
 léche rü ira taguma ítaxuxũwa tá pexũ  
 chagagũ” —ñanagürũ ya Tupana.  
 .....

#### Tupana rü Moichéxũ nataãxexexẽ

**4** 1Rũ nũma ga Moiché rü Cori ya  
 Tupanaxũ nangãxũ, rü ñanagürũ:  
 —Naturũ i ngẽma chautanũxũgũ rü  
 taxũtãma choxũ nayaxögũ, rü taxũtãma  
 chauga naxĩnũe. Rũ tá ñanagürũgũama  
 choxũ: “Rũ nũma ya Cori ya Tupana rü  
 tama nixĩ i aixcũma cuxcax nangóxũ”,  
 ñanagürũgũama tá choxũ —ñanagürũ.

<sup>2</sup>Rü nüma ga Cori ya Tupana rü Moichéna naca, rü ñanagürü: —¿Rü taḡacú nixí i ngēma cuxmēxwa ngēxmaxũ? —ñanagürü ga Cori. Rü Moiché nanangāxũ rü ñanagürü: —Wüxi ya naixmenaxā nixí —ñanagürü. <sup>3</sup>Rü yexguma ga Cori ya Tupana rü ñanagürü nüxũ: —iRü ñaxtúanegu naña! —ñanagürü. Rü nüma ga Moiché rü inanaña ga guma naixmenaxā. Rü yexgumatama äxtapexũ nananguxuchi. Rü nüma ga Moiché rü naxchaxwa niña. <sup>4</sup>Natürü ga nüma ga Cori ya Tupana rü ñanagürü nüxũ: —iNaréügu yayaxu! —ñanagürüama. Rü yexguma yayauxāxgu rü wenaxarü naixmenaxāxũ nananguxuchi. <sup>5</sup>Rü nüma ga Cori ya Tupana rü ñanagürü: —Rü ngēma cuxũ chawéxũ, rü ngēma nixí i cuaxruxũ nax cuxũ yaxögiāxũcax i ngēxguma namaxā nüxũ quixuxgu nax aixcuma cuxcax changóxũ i chomax nax curü oxigüarü Tupana chixixũ rü Abraúüarü, rü Ichaáarü, rü Acóbuarü Tupana nax chixixũ —ñanagürü. <sup>6</sup>Rü ñanagürüama ga Tupana: —iRü cugüchiruremügu ixuxmēxēx! —ñanagürü. Rü yexguma ga nüma ga Moiché rü nügüchiruremügu nixuxmēx. Rü yexguma ínaxuxuchimēxēgu, rü nüxũ nadau ga naxmēx nax chaxünemaxā nax yadaḡawexũ, rü nachoxochixũ. <sup>7</sup>Rü yexguma ga Tupana rü ñanagürü nüxũ: —iRü wena cugüchiruremügu ixuxmēxēx! —ñanagürü. Rü yemaacü nanaxü ga Moiché. Rü yexguma ínaxuxuchimēxēgu, rü nüxũ nadau ga naxmēx ga marü noxrirüxũ nax namēxũ. <sup>8</sup>Rü ñuxüchi ga Cori ya Tupana rü ñanagürü nüxũ: —Rü ngēxguma chi

tama ngēma nüxíraxüxũ i cuaxruüḡagu cuxũ yaxögiāxgu, rü ngēma to i cuaxruüḡagu tá nixí i cuxũ yaxögiāxũ. <sup>9</sup>Natürü ngēxguma tama ngēma taxre i cuaxruüḡagu cuxũ yaxögiāxgu irü dexáta nayauxũ i taxtüwa, rü ñaxtúanegu naba! Rü ngēxguma tá ngēma dexá ñaxtúanegu cubaxgu, rü tá nagüxũ nanaxixíchi i ngēma dexá —ñanagürü. <sup>10</sup>Rü yexguma ga Moiché rü Tupanaxũ nangāxũ, rü ñanagürü nüxũ: —Achaxa, Pa Corix, choma rü choxũ naguxcha nax chidexaxũ. Rü taguma choxũ natauxcha woo ga üpa rü woo i ñuxma rü ta ngēxgumarüütama chixí —ñanagürü. <sup>11</sup>Natürü ga nüma ga Cori ya Tupana rü nanangāxũ rü ñanagürü: —¿Texé tixí ga guxema duüxüxũ úxe? ¿Rü texé tixí ga guxema yadexaxeéxē rü nangegaxeéxē rü nangauxchixéxē rü naxüxchixéxē rü nangexetüxe rü naxüxétüxe? ¿Tama ěxna ga choma yixixũ? <sup>12</sup>Rü ngēmacax irü paxa ngēma naxü rü nüxũ yarüxu! Rü choma rü tá cuxũ charüngüxéxē i ngēxguma quidexaxgu. Rü tá cuxũ changuxéxē i ngēma tá nüxũ quixuxũ —ñanagürü. <sup>13</sup>Rü yexguma ga Moiché rü ñanagürü: —Achaxa, Pa Corix, chierü to i duüxüxũ ngēma cumuxgux —ñanagürü. <sup>14</sup>Rü yexguma ga Cori ya Tupana rü Moichémaxā nanu, rü ñanagürü: —Dücax, rü yimá nixí ya cuenexē ya Aróü ya Lebítanüxũ. Rü choma nüxũ chacuax i nüma rü meama nidexa. Rü ñuxüchi i nüma rü nuxā tá cuxũ nayangau, rü poraäcü tá nataāxē i ngēxguma cuxũ nadaḡuxgux. <sup>15</sup>iRü yimámaxā idexa, rü namaxā nüxũ ixu i guxüma i ngēma cuma nüxũ

quixuxchaxũũ! Rũ choma rũ tá pexũtawã changexma i ngẽxguma pidexagũgu. Rũ tá pexũ changuxẽxẽ nachiga i ngẽma tá pexũũ. <sup>16</sup>Rũ cuma rũ tá Aróũmaxã nũxũ quixu i ngẽma chorũ ore, ñoma chomatama nũxũ chixuxũrũxũ. Rũ nũma ya Aróũ rũ tá chorũ duũxũgũmaxã nũxũ nixu i ngẽma cuma tá namaxã nũxũ quixuxũ. <sup>17</sup>iËcü, yange ya daa naixmenaxã! Erũ yimamaxã tá cunaxũ i taxacũ i taguma nũxũ nadaugũxũ —ñanagũrũ.

#### Moiché rũ Equítuanecax natáegu

<sup>18</sup>Rũ yemawena ga Moiché rũ naxtũ ga Yéturuchiũcax natáegu, rũ ñanagũrũ tũxũ: —Tupana nanaxwaxẽ nax Equítuanecax chatáeguxũ nax íchayadauxũcax i chautanũxũgũ rũ ngoxi namaxẽ —ñanagũrũ. Rũ naxtũ ga Yéturu tanangãxũ, rũ ñatagũrũ nũxũ: —iËcü ngẽma naxũ, rũ mea cuxũ naxũpetũ! —ñatagũrũ. <sup>19</sup>Rũ yexguma taũta Madiáũanewa inaxũachigu ga Moiché, rũ Cori ya Tupana rũ ñanagũrũ nũxũ: —iNatáegu Equítuanecax, erũ guxũma i ngẽma duũxũgũ i cuxũ imaxgũchaũxũ, rũ marũ nayue! —ñanagũrũ. <sup>20</sup>Rũ yexguma ga Moiché rũ inaxũachi rũ tũxũ niga ga naxmax rũ nane. Rũ buruétũgu tũxũ namugũ, rũ yemaacũ Equítuanecax natáegu. Rũ nũgũmexẽgu nayange ga guma naixmenaxã ga Tupanaarũ porã nawa yexmane.

.....

<sup>27</sup>Rũ yoxni ga Cori ya Tupana rũ Moichéenexẽ ga Aróũmaxã nidexã, rũ ñanagũrũ: —iRũ yéã ínachianexũwa naxũ! Rũ ngẽxma tá nũxũ icuyangau ya

Moiché —ñanagũrũ nũxũ. Rũ nũma ga Aróũ rũ yéã ínachianexũwa naxũ, rũ yexma guma maxpũne ga Oréxgu Moichéxũ nayangau. (Rũ guma maxpũnewa nixĩ ga Moichémaxã yadexaxũ ga Tupana.) Rũ taãxẽacũma nũxũ narũmoxẽ. <sup>28</sup>Rũ nũma ga Moiché rũ Aróũmaxã nũxũ nixu ga guxũma ga yema ore ga Cori ya Tupana namaxã nũxũ ixuxũ. Rũ yexgumarũxũ ta namaxã nũxũ nixuchiga ga yema mexũgũ ga Tupana namuxũ nax naxũgũaxũcax. <sup>29</sup>Rũ ñuxũchi ga nũmagũ rũ inaxĩachi nax yangutaquexexẽẽãxũcax ga yema Iraétanũxũgũarũ ãẽxgacũgũ. <sup>30</sup>Rũ nũma ga Aróũ rũ yema duũxũgũmaxã nũxũ nixu ga guxũma ga yema ore ga Tupana Moichémaxã nũxũ ixuxũ. Rũ yexgumarũxũ ta napexewa inanawex ga yema mexũgũ ga Tupana nũxũ iuxẽxũ. <sup>31</sup>Rũ nũma ga duũxũgũ rũ aixcũma nayaxõgũ. Rũ yexguma nũxũ yacuaxãchitanũgu nax Cori ya Tupana rũ nũxũ nũxũ naxĩnũxũ ga norũ yumũxẽ rũ nũxũ nax nadauxũ ga ñuxacũ ngũxũ nax yangegũxũ, rũ yemaçax ga nũma ga duũxũgũ rũ nataãxẽgũ, rũ ñaxtũanegu nanangũcuchitanũ, rũ Tupanaxũ nicuaxũxũgũ.

#### Moiché rũ Aróũ rũ Faraóũmaxã nidexagũ

**5** <sup>1</sup>Rũ yemawena ga Moiché rũ Aróũ rũ Faraóũxũtawã naxĩ nax namaxã yadexagũxũcax. Rũ ñanagũrũgũ: —Cori ya Iraétanũxũarũ Tupana rũ ñanagũrũ: “iYangexgũ i ngẽma chorũ duũxũgũ nax ngextã ínachianexũwa naxĩxũcax nax ngẽma naxũchigagũaxũcax nax choxũ yacuaxũũgũxũ!” —ñanagũrũgũ. <sup>2</sup>Natũrũ ga nũma ga Faraóũ rũ nanangãxũ, rũ

ñanagürü: —¿Texé tixí ya yíxema Cori íxíxe, rü taxacüçax tá naga chaxínü rü chayangexgü i ngéma Iraétanüxü i duüxügü? Choma rü tama nüxü chacuax i ngéma Tupana i nachiga pidexagüxü rü taütáma chayangexgü i ngéma Iraétanüxügü —ñanagürü.

.....

<sup>6</sup>Rü yematama ga ngunexügü rü Faraóü nanamu ga norü duüxügü ga puracümaxã icuaxgüxü rü yema naerugü ga wüxitücumümaxächigü icuaxgüxü, rü ñanagürü: <sup>7</sup>—Ngéma Iraétanüxügü i ladríuarü üwa puracüexü irü marü taxütáma noxrirüxü maxë nüxna pexã norü ladríyuéü! iRü êcü nümatama nawa naxí ya norü maxê! <sup>8</sup>Natürü tá penamu nax noxritama naxügüãcü ya ladríyuexpüx nax naxügüãxü, rü bai tá nanoxremaexü ya yimá ñuxma tá naxügüãcü ya ladríyu. Rü wüxi i duüxügü i oexü nixígü. Rü ngëmacax nixí i nügüçax ínacagüxü nax ínachianexüwa naxíxüçax nax ngéma norü Tupanaxü yanacuaxüügüxüçax. <sup>9</sup>iRü yexeraãcü penapuracüexë i ngéma duüxügü, rü ngëmagu ipenachoxëxë nax tama Moiché rü Aróüarü doragügu naxínüexüçax! —ñanagürü. <sup>10</sup>Rü yexguma ga yema Faraóüarü duüxügü ga puracümaxã icuaxgüxü rü yema naeruchigü ga wüxitücumümaxã icuaxgüxü, rü inaxiãchi, rü duüxügümaxã nüxü nayarüxugüe, rü ñanagürügü nüxü: —Faraóü rü toxna naxãga nax pemaxã nüxü tixuxüçax nax marü taxütáma maxë pexna tanaxãxüçax perü ladríyuéxüxü. <sup>11</sup>Rü ñuxma rü pema

tátama marü nawa pexí i ngextã ínayimaxüwa ya maxë. iNatürü taxütáma yima noxrixüçüxü penanoxremaexëxë i norü mu ya yima ladríyu! —ñanagürügü. <sup>12</sup>Rü yexguma ga yema Iraétanüxügü, rü guxüma ga Equítuanegu nügü ninu nax maxëne nadaugüxüçax norü ladríyuéü. <sup>13-14</sup>Rü guxüma ga ngunexügügu rü yema Faraóüarü duüxügü ga puracümaxã icuaxgüxü, rü Iraétanüxüxü namu nax noxriexpüxtama ga ladríyu naxügüaxüçax. Rü naétü tüxü nicuaxüxgü ga guxema Iraétanüxügü ga tümatanüxümaxã icuaxgüxe. Rü ñanagürügü tüxü: —¿Ñuxãcü ga ñne rü ñuxma rü tama noxriexpüxwa penanguxëxü ya ladríyu? —ñanagürügü. <sup>15</sup>Rü guxema Iraétanüxügü ga tümatanüxümaxã icuaxgüxe, rü Faraóüxütawa tügüçax tayarüdexagü, rü ñatagürügü: —Pa Torü Ñëxgacüx çtüxcüü ngëmaãcü tomaxã quixí? <sup>16</sup>Marü tama noxrirüxü toxçax icunaxü ya maxë, natürü toxü cumuama nax noxriexpüxtama ya ladríyu tanaxüxü. Rü ngëmaétüwa rü toxü nicuaxüxgü i curü duüxügü. Rü ngéma curü duüxügügagu nixí i ngéma, Pa Ñëxgacüx —ñatarügügü. <sup>17</sup>Natürü ga nüma ga Faraóü rü tüxü nangãxü, rü ñanagürü: —Pema rü wüxi i oemarexü pixígü. Rü ngëmacax naxçax ípecagü nax ínachianexüwa pexixü nax ngéma perü Tupanaxü peyarücuaxüügüxüçax. <sup>18</sup>iPeyawoegu rü peyapuracüe waxi! Rü woo marü tama pexçax ichanaxüxgu ya maxë rü chanaxwaxe i penaxü i noxriexpüxtama ya ladríyu —ñanagürü. ....



<sup>20</sup>Rü yexguma Faraóuxütawa ítachoxügü, rü Moiché rü Aróúmaxã tügü itayangaugü ga íāxwa tüxü nanguxēēgüxü. <sup>21</sup>Rü namaxã nüxü tixugügü, rü ñatagürügü: —iRü Tupana nüxü ðaux i ngēma ñuxma tomaxã pexüxü, rü pexü napoxcue! Erü pegagu nixi i ñuxma i Faraóü rü norü duüxügü rü chixri toxü nadauxü. Rü pegagu nixi i ñuxma i tá toxü nadaixü —ñatagürügü.

### Moichéarü yumüxēchiga

<sup>22</sup>Rü yexguma ga Moiché rü nayumüxē, rü ñanagürü Cori ya Tupanaxü: —Pa Corix ðrü tüxcüü i chixexü naxçax ícunguxēēxü i ñaa curü duüxügü? ¿Rü taxacuwa yixixü ga nua choxü cumuxü? <sup>23</sup>Rü yexguma noxri cuégagu Faraóúmaxã chidexagu, rü nüma rü yexeraäcü curü duüxügümaxã chixexü naxü. Rü cuma rü taxuxüma cuxü nax naxmexwa ícunanguxüxēēxüçax —ñanagürü.

**6** <sup>1</sup>Rü nüma ga Cori ya Tupana rü Moichéxü nangãxü, rü ñanagürü: —Ñuxma rü tá nüxü cudau i ngēma Faraóúmaxã chaxüxü. Erü nüma rü taxütãma ngēmaümare nayangexgü i chorü duüxügü. Rü guxchaxü naxçax íchanguxēēguxicatama tá nixi i yangexgüãxü. Rü ngēmagagu i nüma rü tá düxwa ínanawoxü i chorü duüxügü i ñaa Equítuanewa —ñanagürü.

.....

<sup>10</sup>Rü nüma ga Cori ya Tupana rü wenaxarü Moichémaxã nidexa, rü ñanagürü nüxü: <sup>11</sup>—iĒcü, Faraóuxütawa naxü rü namaxã nüxü ixu rü ínamuxüã i Equítuanewa i ngēma Iraétanüxügü! —ñanagürü. <sup>12</sup>Natürü ga Moiché rü

Cori ya Tupanaxü nangãxü, rü ñanagürü: —¿Ñuxäcü tá chauga naxĩni i Faraóü ega woo chautanüxü i Iraétanüxügü rü tama chauga naxĩnüegu, erü choxü naguxcha nax mea chidexaxü? —ñanagürü.

.....

### Aróúarü naixmenaxã rü äxtapexü nayanguxuchi

**7** <sup>8</sup>Rü nüma ga Tupana rü Moichéxü rü Aróúxü ñanagürü: <sup>9</sup>—Ngēxguma Faraóü pexna naxçax çaxgu nax penaxüxü i wüxi i mexü i chorü poramaxã üxü, rü tá Aróúmaxã nüxü quixu nax Faraóúpexegu nañaaxüçax ya norü naixmenaxã nax äxtapexü nanguxuchixüçax —ñanagürü. <sup>10</sup>Rü yexguma ga Moiché rü Aróü rü Faraóuxütawa naxi, rü nanaxü ga yema Cori ya Tupana namuxü. Rü nüma ga Aróü rü Faraóúpexegu rü norü ngüxēēruügüçax nanaña ga guma norü naixmenaxã rü ätapexü nananguxuchi. <sup>11</sup>Rü nüma ga Faraóü, rü norü duüxügü ga nüxü icuaxüchixüçax rü norü yuüxügüçax nangema. Rü nümagü ga yema norü duüxügü rü norü yuüxügümaxã nanaxügüama ta ga yema Aróü üxü. <sup>12</sup>Rü wüxichigü ga yema yuüxü rü ñaxtãanegu nanaña ga norü naixmenaxã. Rü wüxichigü ga guma norü naixmenaxã rü äxtapexü nananguxuchi. Natürü guma Aróúarü naixmenaxã, rü yema iyüüxüarü naixmenaxãxü ínagagü. <sup>13</sup>Natürü woo yemaxü nax nadauxü ga Faraóü, rü nügü ínanataiãchiarü maxüãxēxē rü tama inaxĩnüchaü yema Tupana nüxü íxuxürüxü nixi.

**Faraóüchaxwa nagüxü  
nayanguxuchi ga dexá**

<sup>14</sup>Rü yemawena rü nüma ga Cori ya Tupana rü ñanagürü Moichéxü: —Nüma i Faraóü rü tá nanuama, rü taxütáma Iraétanüxügüxü ínamuxüchaü.

<sup>15</sup>iNatürü möxü päxmamaxüchi rü naxütawa íyadau! iRü ngëxguma tá türewa yanaxüegu, rü ngéma natüanaciüwa tá cunanguxëxë! iRü íyange ya yima naixmenaxá ya äxtapexü yanguxuchine! <sup>16</sup>Rü ñacugürü tá nüxü: “Rü yimá Cori ya Iraétanüxügüarü Tupana rü choxü namu nax wena cumaxá nüxü chixuxüçax nax cuyangexgüxüçax i norü duüxügü nax nüxü yanacuaxüügüxüçax i ngextá ínachianexüwa. Natürü i ñuxma rü ta tama naga cuxínüchaü. <sup>17</sup>Rü ngëmacax ya Cori ya Tupana rü ñanagürü cuxü: ‘Ñuxma rü tá nüxü cudau nax aixcüma Cori ya Tupana chixixü. Erü Moichéxü chamu nax norü naixmenaxá yanangexünemaxá ñaa taxtüchiüwa nacuaixcaaxüçax nax ngéma dexá rü nagüxü yanguxuchixüçax. <sup>18</sup>Rü ngéma choxnigü rü tá nayue. Rü ngëmaäcü i ngéma dexá rü poraäcü tá nayixchixü. Rü ngëmacax taxütáma nawa naxaxegüchaü i ngéma Equítuanecüäxgü’”, ñanagürü cuxü ya Tupana.

.....

<sup>20</sup>Rü nüma ga Moiché rü Aróü, rü yema Cori ya Tupana namuxüäcü nanaxügü. Rü nüma ga Aróü rü nanayaxu ga norü naixmenaxá rü Faraóüpexewa dexächiiüwa namaxá nanacuaixca. Rü yexgumatama ga dexá

rü nagüxü nayanguxuchi. <sup>21</sup>Rü nayue ga choxni. Rü poraäcü nanayixächichixü ga dexá. Rü yemacax ga yema Equítuanecüäxgü rü taxuacüma nawa naxaxegü. Rü guxüma ga Equítuanewa rü nagüxü nananguxuchi ga dexá. <sup>22</sup>Natürü ga yema Faraóüarü duüxügü ga iyuüxü, rü yexgumarüütama norü yuümaxá nanaxügü. Rü yemaacü yema Cori ya Tupana nüxü ixuxürüxü rü nüma ga Faraóü rü nanuama rü nügü ínanataiächiarü maxüäxëxë rü tama ínaxínüchaü ga yema Moiché rü Aróü namaxá nüxü ixuxü. <sup>23</sup>Rü nüma ga Faraóü rü nüxü nax nataxuraxümare ga yema íngupetüxü, rü napataçax natáegu. <sup>24</sup>Rü yema nax taxucürüwa taxtüxüchiüwa nax naxaxegüxüçax rü guxüma ga Equítuanecüäxgü rü norü puchune ínanaxüxü ga taxtüanaciüwa nax yéma naxaxegüxüçax.

.....

**Tupana rü Faraóüçax  
cururugü ínangugüxëxë**

**8** <sup>1</sup>Rü yexguma ga Cori ya Tupana rü Moichéxü ñanagürü: —iPaxa Faraóüxütawa naxü rü ñacugürü tá nüxü: “Rü Cori ya Tupana rü ñanagürü cuxü: ‘Rü nüxü íngex i ngéma chorü duüxügü nax choxü yacuaxüügüxüçax! <sup>2</sup>Erü ngëxguma taxütáma nüxü quíngexgu, rü tá cururugümaxá chanapoxcu i ñaa guxüma i cuchixüane. <sup>3</sup>Rü taxtü rü cururugümaxá tá niñúmichixü. Rü ngéma rü tá cuxçax ínachôochi, rü cupatagu tá naxigü. Rü curü ucapugu rü curü ngürücaregu tá nachocu. Rü curü ngüxëruügü i äëxgacügüpatagu, rü guxüma i curü

duïxügüpatagu, rü curü paüpuügu, rü curü batáü ya paücharaarü númüruügu tá nachocu. <sup>4</sup>Rü ngëma cururugü rü tá cuxna niyuxgüetanü. Rü curü ngüxëeruügu i äëxgacügüna rü guxüma i curü duïxügüna tá niyuxgüetanü”, ñanagürü cuxü ya Cori ya Tupana. <sup>5</sup>Rü yexguma ga Cori ya Tupana rü ñuxüchi Moichéxü ñanagürü: —iRü namaxä nüxü ixu i Aróü nax natügüétügu, rü natüxacügüétügu, rü nahtaagüétügu namaxä nawéxmexüçax ya norü naixmenaxä! Rü ngëma tá ínachoxü i cururugü nax guxüma i Equítuane namaxä napaxüçax —ñanagürü. <sup>6</sup>Rü yexguma ga Aróü rü Equítuane yexmagüxü ga dexächüüétügügu namaxä nawéxmex ga norü naixmenaxä. Rü guxüma ga Equítuane rü yema cururugü ga dexáwa íchoxüxümaxä nanapá.

.....

<sup>8</sup>Rü yexguma ga nüma ga Faraóü rü Moichéçax rü Aróüçax nangema, rü ñanagürü nüxü: —iCori ya Tupanana naxçax pecaxa nax yanaxoxëëaxüçax i ngëma cururugü i toxütawa! Rü choma rü tá chayangexgü i curü duïxügü nax Cori ya Tupanaçax nadaiaxüçax i naxünagü rü ngëmamaxä nüxü yacuaxüügüxüçax —ñanagürü. <sup>9</sup>Rü nüma ga Moiché rü Faraóüxü nangäxü, rü ñanagürü nüxü: —iChomaxä nüxü ixu i ñuxgu tá nixü i cunaxwaxexü nax cuxçax rü curü ngüxëeruüçax, rü guxüma i curü duïxügüçax Tupanana chacaxaxü nax cuxna rü cupatana yaxígachixüçax i ngëma cururugü rü dexáwaxicatama nax nangexmagüxüçax! —ñanagürü. <sup>10</sup>Rü nüma ga Faraóü rü

Moichéxü nangäxü, rü ñanagürü: —Moxütama nixü i chanaxwaxexü nax nataxuxü i ngëma cururugü —ñanagürü. Rü Moiché rü nüxü nangäxü, rü ñanagürü nüxü: —Marü name. Rü ngëmaäcü tá chanaxü nax nüxü cucuaxüçax nax nataxuxüma ya texé ya torü Cori ya Tupanarüxü ixixü. <sup>11</sup>Rü ngëma cururugü rü tá nixígachi nawa ya cupata. Rü taxtüwaxica tátama nangexmagü. Rü ngëmaäcü marü taxütáma cuxü nachixewe, rü taxütáma nanachixewe i curü ngüxëeruügu rü curü duïxügü —ñanagürü. <sup>12</sup>Rü yexguma ga Moiché rü Aróü rü ínachoxü ga Faraóüpatawa. Rü ñuxüchi ga Moiché rü Cori ya Tupanana naca nax yaxígachitanüxëëaxüçax ga yema cururugü ga noxri Faraóüçax yéma namugüxü. <sup>13</sup>Rü nüma ga Cori ya Tupana rü nanaxü ga yema Moiché nüxna naxçax çaxaxü. Rü nayue ga yema cururugü ga napatagüwa rü naaxtügüwa rü naanegüwa yexmagüxü. <sup>14</sup>Rü ga duïxügü rü nanade ga yema yuexü ga cururugü, rü nananutaquexe. Rü guxüwama namaxä nayipetüane. <sup>15</sup>Natürü yexguma yema guxchaxügüwa ínanguxuchigu ga Faraóü, rü yema Cori ya Tupana nüxü ixuxürüxü rü wenaxarü nanuama ga Faraóü, rü tama Moiché rü Aróüga naxínüchaü.

#### **Tupana rü Faraóüçax naxchigü ínangugüxëxë**

<sup>16</sup>Rü yexguma ga nüma ga Cori ya Tupana rü ñanagürü Moichéxü: —iAróümaxä nüxü ixu nax ñaxtüçax naxaxüçax ya norü naixmenaxä nax ngëmaäcü naxchixü

nanguxũxũcax i ñaxtütexe i guxũma i Equítuanewa! —ñanagürü. <sup>17</sup>Rü yemaacü nanaxügü ga Moiché rü Aróũ. Rü nüma ga Aróũ rü norü naixmenaxã nawexnagü, rü ñaxtúanewa namaxã nanacuaixca. Rü guxũma ga yema ñaxtütexe ga Equítuanewa yemaxũ, rü naxchixũ nananguxuchitanü. Rü yema naxchigü rü poraãcü yema duũxũgũxũ rü naxũnagũxũ nachixewe. <sup>18</sup>Rü yema Faraóũarü yuũxũgü rü norü yuũmaxã nüxũ naxügü nax naxchi yamuxẽegũxũ, natürü tama nüxũ nananguxuchi. Rü yoxni ga yema naxchigü rü poraãcü yema duũxũgũxũ rü naxũnagũxũ nachixewe. <sup>19</sup>Rü yexguma ga yema yuũxũgü rü Faraóũxũ ñanagürü: —Ñaa guxchaxũ rü aixcüma Tupanawa ne üxũ nixĩ —ñanagürü. Natürü ga nüma ga Faraóũ rü yema Cori ya Tupana nüxũ ixuxũrũxũ nanuama rü tama inaxĩnüchaũ.

**Tupana rü Faraóũcax murenü  
inangugũxẽxẽ**

<sup>20</sup>Rü yexguma ga Cori ya Tupana rü Moichéxũ ñanagürü: —Nüma i Faraóũ rü moxũ paɣmamaxũchi rü tá türewa narũxüe nax taxtütütüwa naxũxũcax. Rü ngẽmacax chanaxwaxe nax ngunetũxũ icurüdaxũ nax namaxã nüxũ cuyarũxũcax i ñaa chorü dexa. iRü ñacuxũ tá nüxũ!: “Rü ngẽma ñanagürü ya Cori ya Tupana: ‘iNüxũ ingex i chorü duũxũgü nax choxũ yacuaxũgũxũcax! <sup>21</sup>Erü ngẽxguma taxütáma nüxũ quingexgux, rü cuxcax rü curü ngũxẽerũcax rü guxũma i curü duũxũgũcax rü tá murenügü ngẽma chamugü. Rü ngẽmaãcü tá

murenügümaxã nanapágü ya guxũne ya Equítuanecũxgüpata. Rü woo i ñaxtúanewa rü tá ta murenügümaxã naxãanemare. <sup>22</sup>Natürü ngẽxguma petanüwa ngẽma inguxgux, rü Gochéũanewa i chorü duũxũgü íxãchiũgũxũwa rü taxütáma ngẽmaãcü nangupetü. Erü ngẽma rü bai tá i wüxi i murenü ingexmaxũ nax ngẽmaãcü nüxũ cucuáxũcax nax choma ya Cori ya Tupana rü aixcüma naanearü yora chixixũ. <sup>23</sup>Rü tá cuxũ chanawex nax nüxũ chaxunetaxũ i ngẽma Iraétanũxũgü rü tama i pexũ. Rü moxũ tá nixĩ i ngẽmaãcü chanaxũxũ’, ñanagürü cuxũ ya Tupana” —ñanagürü. <sup>24</sup>Rü yemaacü nanaxü ga Cori ya Tupana. Rü ñoma wüxi ga caixanexũrũxũ Faraóũpatawa nangugü ga murenügü. Rü norü ngũxẽerũgũpatawa rü ta rü guxũma ga Equítuanewa nangugü. Rü yema murenügü rü guxũwama nanachixexẽ ga yema nachixũane.

.....

<sup>28</sup>Rü yexguma ga Faraóũ rü ñanagürü: —Tá pexũ chingexgü nax perü Cori ya Tupanacax peyadaixũcax i pexũnagü. iNatürü taxütáma yáxũwaxũchi pexĩ! iRü chauxcax rü ta perü Tupanana pecagüe! —ñanagürü. <sup>29</sup>Rü yexguma ga Moiché rü nanangãxũ rü ñanagürü: —Ñuxma nua ne chaxũxgu tátama nixĩ i Cori ya Tupanana chacaxũ nax moxütama cuxna rü curü ngũxẽerũgũna rü curü duũxũgũna yaxĩgachixẽẽaxũcax i ngẽma murenügü. Natürü tama tanaxwaxe i toxũ cuwomũxexẽ nax nüxna nax cunachuxxũ i ngẽma Iraétanũxũgü nax

norü Cori ya Tupanaçax nadaiãxũçax i naxũnagü —ñanagürü. <sup>30</sup>Rü yexguma Faraóũpatawa ínaxũxguwena ga Moiché, rü Cori ya Tupanana naca nax yaxígachixũçax ga murenü. <sup>31</sup>Rü nüma ga Cori ya Tupana rü nanaxü ga yema Moiché naxçax icaxaxũ. Rü yema murenügü rü Faraóũna rü norü ngũxẽeruũgüna rü guxũma ga norü duũxũgüna nixígachitanü ga yema murenügü. <sup>32</sup>Natürü nüma ga Faraóũ rü yemawena rü nanuama, rü tama nayangexgü ga Iraétanüxũgü.

**Tupana rü Equítuanecüãxaru  
naxũnagüçax daaweane ínanguxẽxẽ**

**9** <sup>1</sup>Rü yexguma ga Cori ya Tupana rü Moichéxü ñanagürü: —iPaxa Faraóũxütawa naxü, rü nüxü ña: “Rü Cori ya Iraétanüxũgüaru Tupana, rü cuxçax nua namuga rü ñanagürü cuxü: ‘Rü nüxü ingex i ngẽma chorü duũxũgü nax choxü yanacuãxũũgũxũçax! <sup>2-3</sup>Erü ngẽxguma taxütáma nüxü quingexgux rü cunachuxamagu, rü nüma ya Cori ya Tupana rü ngẽma nachitaxüwa ngẽxmagüxü i cuxũnagüétügu tá nananguemaxẽxẽ i daaweane i poraxũ. Rü nayue tá i muxũma i cowarugü rü caméyugü rü wocagü rü carnérugü. <sup>4</sup>Natürü ya Cori ya Tupana rü taxütáma guxãũnawa nananguxẽxẽ i ngẽma daaweane, erü ngẽma Equítuanecüãxaru naxũnagüxica tátama nayue, natürü ngẽma Iraétanüxũaru naxũnagü rü taxütáma nayue’” —ñanagürü. <sup>5</sup>Rü yexguma ga Cori ya Tupana rü Moichémaxã inaxuneta nax ñuxgu tá yixĩxü i ngẽma, rü ñanagürü nüxü: —Choma rü moxü tá nixĩ i chanaxüxü

—ñanagürü. <sup>6</sup>Rü yemaarü moxüãcü rü Cori ya Tupana nanaxü ga yema. Rü muxũma ga Equítuanecüãxaru naxũnagü rü nayue. Natürü yema Iraétanüxũgüaru naxũnagü rü taxuxũma nayue, rü bai ga wüxi. <sup>7</sup>Rü nüma ga Faraóũ rü norü duũxũgüxü namu nax íyadaugüãxũçax rü aixcüma yixĩ nax taxuxũma yuexü ga Iraétanüxũgüaru naxũna. Rü woo yemaxü nax nacuãxchigaxü, rü nanuama rü tama tüxü ningexgü ga guxema Iraétanüxũgü.

**Tupana rü taixnamaxã duũxũgüxü rü  
naxũnagüxü nidaxawexẽxẽ**

<sup>8</sup>Rü yexguma ga Cori ya Tupana rü ñanagürü nüxü ga Moiché rü Aróũ: —iRü paũpũxüwa wüxi ya cuxmexãcu ya tanimaca nayaxu, rü ñuxüchi cuma Pa Moichéx, rü Faraóũpexewa nagünagütexe ya yima tanimaca! <sup>9</sup>Rü ngẽmaãcü ya yima tanimaca rü tá narücaxi, rü guxũma i Equítuanewa tá nanguema. Rü ngẽmaãcü tá taixnagü naxũnawa inariüyi i guxũma i duũxũgü rü naxũnagü i Equítuanewa ngẽxmagüxü —ñanagürü. <sup>10</sup>Rü nüma ga Moiché rü Aróũ rü wüxi ga paũpũxüwa tanimaca ne nanayauxtẽxegü, rü yemamaxã Faraóũxütawa naxĩ. Rü yéma Faraóũpexewa rü Moiché nanagünagütexe ga guma tanimaca. Rü guxũma ga duũxũgü rü naxũnagü rü taixnamaxã nixãxũneãchi. <sup>11</sup>Rü yema Faraóũaru yuũxũgü rü taxucürüwama Moichépxewa nayexmagü, yerü nümagü rü ta rü nitaixnaxũnegü naxrüütama ga yema togü ga Equítuanecüãxgü. <sup>12</sup>Natürü nüma ga Cori ya Tupana rü nanayexrü ga Faraóũ

nax nügütama nataiächiarü  
maxũãxêxũcax nax yemaacü tama  
Moiché rü Aróũga naxñüxũcax, yema  
nüma ga Cori ya Tupana Moichémaxã  
nüxũ ixuxürüxũ.

**Tupana rü gáuxũ narüiyixêxê**

<sup>13</sup>Rü yexguma ga Cori ya Tupana rü  
ñanagürü Moichéxũ: —iMoxũ  
paxmaxaxũchi írúda rü Faraóũmaxã  
nüxũ yarüxu, rü ña nüxũ: “Rü Cori ya  
Iraétanüxũgüaru Tupana rü cuxcax nua  
namuga rü ñanagürü cuxũ: ‘Rü nüxũ  
ingexgü i ngêma chorü duũxũgü nax  
choxũ yanacuaxũũgüxũcax!

.....

<sup>16</sup>Rü ñuxmarüta cuxũ chamaxêxê rü  
tama cuxũ chimax, erü cuxũ nüxũ  
chadauxêêchaũ nax ñuxãcü  
chaporaxüchixũ. Erü chaugü nüxũ  
chacuaxêêchaũ i guxũma i duũxũgü i  
ñaanewa maxêxũ. <sup>17</sup>Natürü woo  
nax cuxũ chamaxêxê, rü cuma rü  
tama icuxñüchaũ rü tama  
cuyangexgüchaũ i chorü duũxũgü.  
<sup>18</sup>Rü dücax, rü moxũ i ñoma i oragu  
rü tá chanayixêxê i gáuxũ ga taguma  
ñuxgu ngêxgumarüxũ Equítuanegu  
yixũ. <sup>19</sup>Rü ngêmacax, rü name nixĩ  
nax ĩpatatũũgu cunachocxêxũ i  
guxũma i curü duũxũgü rü cuxũnagu i  
düxétüwa ngêxmagüxũ. Erü  
ngêxguma tá nayixgu i ngêma gáuxũ,  
rü tá nanadai i guxũma i ngêma  
duũxũgü rü naxũnagu i tama  
ĩpatatũũwa ngêxmagüxũ’”  
—ñanagürü. <sup>20</sup>Rü nümaxũ ga yema  
Faraóũaru ngũxêeruũgü, rü naxcax  
namuê ga yema Cori ya Tupanaaru  
ucuxê. Rü yemacax ĩpatatũũgu tüxũ

namugü ga norü duêxêgü rü  
naxũnagu. <sup>21</sup>Natürü nayexma ga togü  
ga nüxũ natakuraxũxũma ga yema  
Cori ya Tupanaaru ore, rü yemacax  
düxétüwa nanawogümare ga norü  
duũxũgü rü naxũnagu. <sup>22</sup>Rü yexguma  
ga Cori ya Tupana rü Moichéxũ  
ñanagürü: —iNaxunagüchacüxü nax  
ngêma gáuxũ rü guxũma i  
Equítuanegu nayiixũcax naétügu i  
duũxũgü rü naxũnagu rü nanetügü!  
—ñanagürü. <sup>23</sup>Rü Moiché  
naxunagüchacüxü, rü nüma ga Cori  
ya Tupana rü ĩnananguxêxê ga  
duruane rü ãêmacü rü gáuxũ ga yema  
naanewa. Rü yemaacü guxũma ga  
Equítuanewa narüyi ga gáuxũ. <sup>24</sup>Rü  
yema gáuxũ rü guma ãêmacügü rü  
tama ĩnayachaxãchi. Rü taguma  
ñuxgu yemaacü poraãcü gáuxũ  
narüyixũ ga Equítuanewa ga  
nüxcüma. <sup>25</sup>Rü yema gáuxũ rü  
poraãcü nanachixexêxê ga guxũma ga  
taxacü ga Equítuanewa yexmagüxũ.  
Rü nanadai ga duũxũgü rü naxũnagu  
rü guxũma ga nanetügü ga  
naanegüwa. Rü guxũma ga naigü ga  
Equítuanewa yexmagüxũ, rü yema  
gáuxũmaxã nabũüchacüxü. <sup>26</sup>Rü woo  
nax yema ngupetüxũ ga Equítuanewa,  
natürü yema Iraétanüxũ nawa  
yexmagüxũ ga naane ga Gochéüwa rü  
taxuxũma ga gáuxũ yexma nayi rü bai  
ga wüxi.

.....

<sup>35</sup>Natürü ga nüma ga Faraóũ, rü  
nanuama rü tama nayangexgü ga yema  
Iraétanüxũgü, yema Cori ya Tupana  
Moichéwa nüxũ ixuxürüxũ.

.....

**Tupana rü Faraóũcax munügu  
ínangugüxêxê**

**10** <sup>3</sup>Rü Moiché rü Aróũ rü Faraóũxütawa naxĩ, rü ñanagürügü nüxũ: —Cori ya Iraétanüxügüarü Tupana rü cucxax nua namuga rü ñanagürü cuxũ: “¿Ñuxguxüratáta i nüxũ curüxoxũ nax choxna cugü quinuxuxũ? ¡Rü yangexgü i chorü duũxügü nax choxũ yanacuaxüũgüxũcax!” ñanagürü.

.....

<sup>6</sup>Rü ngêma Tupanaarü poxcu nax munügü tá cucxax ínangugüxêxũ rü yima cuchiũ rü munümaxã tá nanapá. Rü ngêxgumarüxũ tá ta i ngêma curü ngüxêeruüügüchiüügü rü munümaxã nanapágü rü guxũma i Equítuanecüãxchiüügü rü tá namaxã nanapágü. Rü ngêma guxchaxũ i ñuxma tá nüxũ cudaduxũ rü cunatü rü nüxcümaxũgüxe ya curü oxigü rü taguma nüxũ tadaugü rü ñuxmata ñoma i ngunexüwa nangumare —ñanagürügü. Rü yema ñaxguwena rü nüma ga Moiché rü nadaueguãchi rü Faraóũchiüwa ínaxüxũ. <sup>7</sup>Rü yexguma ga Faraóũarü ngüxêeruüügü rü ñanagürügü nüxũ: —Pa Æëxgacüx ¿cuyadaxêëamatama i ñuxma nax guxchaxũ nua tüxna naxãxũ i ngêma yatü i Moiché? ¡Yangexgü i ngêma duũxügü nax norü Cori ya Tupanaxũ yanacuaxüũgüxũcax! ¿Ëxna, ñuxma rü ta tama nüxũ cudadu i ñaa tórü naane i Equítuane rü poraãcü nax nachixexũ? —ñanagürügü. <sup>8</sup>Rü yexguma ga nüma ga Faraóũ rü wenaxarü Moichécax rü Aróũcax nangema. Rü ñanagürü nüxũ:

—Marü name i perü Cori ya Tupanaxũ peyarücuaxüxügü. Natürü chanaxwaxe i chomaxã nüxũ pixu nax texégü tá tixixũ ya yíxema ngêma íxe —ñanagürü. <sup>9</sup>Rü yexguma ga Moiché rü nanangãxũ rü ñanagürü: —Rü ngêma tá taxĩ namaxã i guxũma i torü buxügü, rü torü yaxguãxgü, rü tonegü rü toxocügü rü torü carnérugü rü torü wocagü. Erü ngêma tá taxüxũ, rü wüxi i taxũma i torü Coriarü cuaxüxũchiga nixĩ —ñanagürü. <sup>10</sup>Natürü ga nüma ga Faraóũ rü ñanagürü nüxũ: —Rü nangoxochiama i ngêma chixexũ i nagu perüxinüexũ. ¿Ëxna pema nagu perüxinüegu rü perü Cori ya Tupana rü tá pexũ íyaxümücüxũ? ¿Rü ëxna nagu perüxinüegu rü choma rü tá pexũ chingexgüxũ nax perü buxügümaxã ngêma pexüxũcax? <sup>11</sup>Rü dücax, rü taxütáma ngêmaãcü nixĩ. ¡Ëcü, ngêma pexĩ ya guxãma i yatüxe i yáxe, rü perü Cori ya Tupanaxũ peyarücuaxüxügü! Erü ngêma nixĩ i penaxwaxexũ —ñanagürü. Rü yexguma ga nüma ga Faraóũ rü norü duũxügüxũ namu nax napexewa tüxũ ínawoxüxũcax. <sup>12</sup>Natürü nüma ga Cori ya Tupana rü Moichéxũ ñanagürü: —¡Equítuaneétügu nawéxmex nax ngêmaãcü nua naxüxũcax i munügü! Rü ngêma munügü rü tá nayawa i guxũma i nanetü i ñaa nachixüanewa íyaxügüxũ nawena ga yema gáxũ ga dauxüwa rüyixũ —ñanagürü. <sup>13</sup>Rü yexguma ga Moiché rü Equítuaneétügu nawéxmex. Rü nüma ga Cori ya Tupana rü nanamu ga wüxi ga buanecü ga éstewaama ne ücü ga guxũ ga chütaxü rü ngunexü yema nachixüaneétügu icuecü. Rü

moxũãcü rü guma buanecü ga éstewaama ne ñemacügu ínangugü ga munügu. <sup>14</sup>Rü yema munügu rü guxũwama nanapáxêxê ga yema nachixũane. Rü nüxcüma rü taguma yemaacü namuxüchi ga munü, rü tagutáma wena ngêxgumarüxü nixí. <sup>15</sup>Rü ga ñaxtüane rü munümaxã nanapá, rü marü taxucürüwa ñaxtüanegu tadau, yerü namuxüchi. Rü nayawa ga guxüma ga nanetü rü norü o ga íyaxügüxü nawena ga yema gáxü ga dauxüwa rüyixü. Rü nataxuma ga nanetü ga ngextá áátüxü ga guxüma ga Equítuanewa, rü bai ga naanewa rü bai ga naixnecüwa.

.....

<sup>20</sup>Natürü nüma ga Cori ya Tupana rü nanayexrü ga Faraóũ nax nügütama nataiácharü maxũãxêxêxüçax nax yemaacü tama yangéãxüçax ga yema Iraétanüxügu.

**Tupana rü Faraóũçax waanexü ínanguxêxê**

<sup>21</sup>Rü yexguma ga Cori ya Tupana rü Moichéxü ñanagürü: —iNawexnagüchacüxü nax guxüma i Equítuanewa nawaanexüçax! —ñanagürü. <sup>22</sup>Rü nüma ga Moiché rü nawexnagüchacüxü rü poraãcü nawaane ga guxüma ga Equítuanewa. <sup>23</sup>Rü tomaepüx ga ngunexü rü taxúema tümamücüxü tadau, rü taxúema tümachicawa tixügachi. Natürü yema Iraétanüxügüpatagüwa rü guxüwama nangóone. <sup>24</sup>Rü nüma ga Faraóũ rü norü duũxügüxü namu nax Moichéçax yacagüxüçax, rü ñanagürü: —iËcü Cori ya Tupanaxü peparüçaxüxügu, rü

ípeyagagü ta i pexacügü! iNatürü i ngêma perü carnérugü rü perü wocagü rü nua penawogü! —ñanagürü.

<sup>25</sup>Natürü nüma ga Moiché nanangãxü rü ñanagürü nüxü: —Natürü nüma ya Cori ya Tupana nanaxwaxe nax toxü cuyagagüxêxêxü i ngêma toxüna nax ngématanüwa ta timáxüçax rü tayagüxüçax rü ngêmamaxã nüxü ticuaxüügüxüçax. <sup>26</sup>Rü ngêmacax i ngêma toxünagü rü tá ítayagagü. Rü bai i wüxi i toxüna tá nua nayaxü, erü ngématanüwa tá tayadexechi i ñuxre nax ngêmamaxã nüxü ticuaxüügüxüçax ya torü Cori ya Tupana. Rü ñuxma nax taüta ngêma ínachianexüwa tangugüxü, rü tama nüxü tacuax nax ngexürüüxümaxã tá nüxü ticuaxüügüxüçax ya torü Cori ya Tupana —ñanagürü.

<sup>27</sup>Natürü nüma ga Cori ya Tupana rü nanayexrü ga Faraóũ nax nügütama nataiácharü maxũãxêxêxüçax nax yemaacü tama yangexgüaxüçax ga yema Iraétanüxügu. <sup>28</sup>Rü yemaétüwa ga Faraóũ, rü Moichéxü ñanagürü: —iÍnaxüxü i nua, rü mea cügüna nadau nax tama wena nua chauxütawa cuxüxüçax! Erü ngêxguma wena chauxütawa cuxüxü rü tá cuyu —ñanagürü. <sup>29</sup>Rü nüma ga Moiché nanangãxü rü ñanagürü: —Marü mea nüxü quixu. Rü aixcüma tagutáma wena nua cuxütawa íchayadau —ñanagürü. ....

**Tupana nanaxunagü rü tá nayue i Equítuanecüãxgü nanegü ga nüxíra buexü**

**11** <sup>4-5</sup>Natürü naxüpa ga nax ínaxüxüxü ga Faraóũpatawa ga Moiché rü Faraóũxü ñanagürü: —Cori ya



Tupana rü ñanagürü cuxü: “Yixcü ngäxücüxü rü guxütáma i Equítuanegu tá chixügüchigü. Rü ngëxguma rü tá nayu i ngëma nane i nüxíraxüxü i wüxichigü i Equítuanecüãxpatawa. Rü cumax, Pa Faraóüx, rü cune ya nüxíraxücüwa tá inaxügü rü ñuxma tá ta ngëma nge i ngëma taxmarecü ngíne ya nüxíraxücüwa nangu. Rü ngëxgumarüxü tá ta nayue i guxüma i naxünaxacügü i yatüxü i nüxíraxügüxü. <sup>6</sup>Rü guxüwatáma i Equítuanewa i duüxügü rü tá naxauxe erü ngúxü ningegü. Rü nüxcüma rü taguma yemaacü ngúxü ningegü ga duüxügü, rü tagutáma wenaxarü ñuxgu nangexma”, ñanagürü ga Cori ya Tupana. <sup>7</sup>Natürü ngëma Iraétanüxü nawa ngëxmägüxü i naane rü taxuxüma i ngëma chixexü nawa nangu. Rü natanüwa rü tá nachianemare, rü woo i airügü rü taxuxütáma narüngüxtanüxü. Rü ngëmaäcü, Pa Faraóüx, rü tá nüxü pecuax nax yimá Cori ya Tupana nüxü naxunetaxü i ngëma Iraétanüxügü rü tama i pexü. <sup>8</sup>Rü ñuxüchi guxüma i ñaa curü ngüxëëruügü rü chauxütawa tá naxí. Rü düxwa chopexegu nacaxápxügüäcüma tá choxna nacagü, rü ñanagürügü tá: “iRü ípechoxü i nua namaxá i guxüma i cutanüxügü!” ñanagürügü tá. Rü naxüpa i ngëma, rü taxütáma nua chixügachi —ñanagürü ga Moiché. Rü yexguma nüma ga Moiché rü nanuácüma Faraóüpxewa ínaxüxü. <sup>9</sup>Rü yemawena ga Cori ya Tupana rü Moichéxü ñanagürü: —Nüma i Faraóü rü taxütáma pega naxínü, rü ngëmacax i nua Equítuanewa rü yexeraäcü tá chanaxü i taxacü i taguma nüxü idauxü —ñanagürü. ....

### Üpetüchiga

**12** <sup>1</sup>Rü nüma ga Cori ya Tupana rü Moichémaxá rü Aróümaxá nidexa ga Equítuanewa, rü ñanagürü: <sup>2</sup>—Rü daa tauemacü ya taunecü namaxá ixügücü, rü yimá rü gucüma ya tauemaciáru yexera tá nixí nax nagu choxü picuaxüügüxü. <sup>3</sup>iRü guxüma i Iraétanüxügümaxá nüxü pixu, rü ñapegürü tá nüxü: “Doma tauemacügu rü norü 10 i ngunexügu, rü Tupana nanaxwaxe i wüxíxechigü i pema rü peyamax i wüxi i carnéru rüexna wüxi i chíbuxacü i wüxichigü ya ípatawa! <sup>4</sup>Rü ngëxguma wüxi ya ípatacüãx i duüxügü rü noxretama yixíxgu rü tama nüxü naguxgux i ngëma carnéruxacü, rü name nixí i namücü i nüxna ngaicamaxüna naxu nax ngëmamaxá wüxigu nangöxgüaxüçax. Rü name nixí i düxüxügüexpüxgu inanachexügü nax wüxichigü mea nüxü yanguxüçax i guxüma i ngëma nüxna naxuxü. <sup>5</sup>Natürü ngëma naxüna rü chanaxwaxe nax nayatüxü rü wüxi ya taunecü nüxü ngëxmaxü rü taxuwama nachixexü. Rü name nax wüxi i carnéruxacü rüexna wüxi i chíbuxacü nax yixíxü. <sup>6</sup>Rü namaxá tá penguxü ñuxmatáta doma ya tauemaciáru 14 i ngunexüwa nangu. Rü ngëma ngunexüaru yáuanecü rü guxáma i pemax i Iraétanüxügü rü wüxichigü tá peyamax i ngëma pexüna. <sup>7</sup>Rü tá penayaxu ya nagü i ngëma naxüna. Rü yimá nagümaxá tá ípenachaegu i perü íãxcüwawa i wüxichigü ya yima í ya nawa penangóxüne i ngëma naxüna. <sup>8</sup>Rü ngëma chütaxügu tá penangöxgü i namachi i iguxü ya maxë ya üxücümaxá

aéxũxũ. Rũ namaxã tá penaxũxbũxũ i paũ i ngearũ puxẽerũũáxũ. <sup>9</sup>iRũ bai i íxraxũ i ngẽma namachi rũ tá ngáxũraxũ rüexna muxraxũ tá pengóxũ! iRũ guxũma i namachi rũ naeru rũ naparagũ rũ naxũnũtagũ, rũ ípenagu! <sup>10</sup>iRũ taxuxũtãma ípeyaxũxexẽ i perũ moxũãcũruxũ! Rũ ngẽxguma chi íyaxũxgu i ngẽma namachi rũ name i noxtacũma peyagu. <sup>11</sup>Rũ tá peyange ya perũ naixmenaxã, rũ meama pengaxãẽgũãcũma rũ pichapatuãxgũãcũma tá pepaxaãxẽ nax penangõxgũxũ i ngẽma namachi. Rũ ngẽma chũtaxũ rũ Coriarũ Üpetũchiga tá nixĩ i naéga. <sup>12</sup>Erũ choma rũ ngẽma chũtaxũ rũ nua Equítuanewa tá chaxũpetũ. Rũ wũxichigũ ya Equítuanecũãxaru ípatawa tá chayamaç ya yimá nüxíraxũcü ya nanegũ rũ nüxíraxũxũ i naxũnaxacũgũ i yatũxũ. Rũ tá ngẽma Equítuanecũãxgũxũ nüxũ chadauxexẽ nax ngẽma namaxã natupanaáxũ rũ yangearũ poraáxũ nax naétũwa nachogũxũ. Erũ chomatama ya Tupana nixĩ i chanaxuegũxũ i ngẽma chaxũxũ. <sup>13</sup>Natũrũ ngẽxguma yimá nagũmaxã ípeyachaegugũgũ i perũ íãxcũwa, rũ ngẽmawa tá nüxũ chacuax nax aixcũma chauga pexĩnũexũ. Rũ ngẽxguma nüxũ chadauxgu ya yimá nagũ i perũ íãxwa, rũ tá nüxũ chaxũpetũmare rũ taxũtãma chayamaç ya yimá nüxíraxũcü ya pene i ngẽxguma chanapoxcuegu i ngẽma Equítuanecũãx i duũxũgũ. <sup>14</sup>Rũ pema rũ guxcũma ya taunecũgũ tá penaxũchiga i ngẽma ngunexũ nax ngẽmaãcü nüxna pecuaxãchiexũcax i ngẽma chũtaxũ i nagu chanadaixũ i nüxíraxũgũxũ i

nanegũ i Equítuanecũãxgũ. <sup>15</sup>Rũ ngẽma Üpetũchiga rũ 7 i ngunexũ tá penaxũchiga. Rũ guxũma i ngẽma 7 i ngunexũgũ rũ paũ i ngearũ puxẽerũũáxũxĩcatama tá pengõxgũ. Rũ ngẽmacax i guxũma i ngẽma 7 i ngunexũgũ rũ tama penaxwaxe nax pepatawa pexũ nangexmaxũ i ngẽma paũaru puxẽerũxũ. Rũ yíxema paũ i puxẽerũũáxũ ngóxe i ngẽma 7 i ngunexũgũ rũ yíxema rũ tá petanũwa tũxũ ípetaxũchi”, ñanagũrũ ga Cori ya Tupana.

.....

<sup>21</sup>Rũ yexguma ga Moiché rũ naxcax nangema ga guxũma ga yema Iraétanũxũgũaruã ãẽxgacũgũ, rũ ñanagũrũ nüxũ:

.....

<sup>25</sup>—Rũ ngẽxguma nawa pengugũgũ i ngẽma naane i Cori ya Tupana pexna ãxchaũxũ ga yema pemaxã inaxunetaxũrũxũ, rũ pema rũ tá guxcũma ya taunecũgũ penaxũchiga i ngẽma Üpetũchiga. <sup>26-27</sup>Rũ ngẽxguma pexacũgũ tá pexna caxgu rũ taxacũchiga nax yixĩxũ i ngẽma pexũchigaxũ, rũ pema rũ tá penangãxũ, rũ ñaperũgũgũ tá: “Rũ ñaa naxũna rũ tayamaç naxcax i Cori ya Tupanaaru Üpetũchiga nax ngẽmaãcü nüxũ icuaxũũgũxũcax. Rũ yexguma nadaiaxgu ga Equítuanecũãx nanegũ ga nüxíraxũgũxũ, rũ nüxũ naxũpetũmare ga yema Iraétanũxũ nanegũ ga Equítuanewa yexmagũxũ, rũ taxuxũma nimaç. Rũ yemaacũ ga tatanũxũ rũ taxũema tayu” —ñanagũrũ ga Moiché. Rũ yexguma ga yema Iraétanũxũgũaruã ãẽxgacũgũ rũ ñaxtũanegu nanangũcuchigũ, rũ Cori ya Tupanaxũ nicuaxũxũgũ. <sup>28</sup>Rũ ñuxũchi

ínixĩ, rü nanaxü ga yema Cori ya Tupana Moichémaxã rü Aróúmaxã nüxü ixuxürüxü.

**Nayue ga Equítuanecüãx nanegü ga nüxíraxüügüxü**

<sup>29</sup>Rü meama ngäxücüxü, rü nüma ga Cori ya Tupana rü norü orearü ngerüxü namu nax wüxichigü ga Equítuanecüãxgüpatawa nadaiaxüçax ga nanegü ga nüxíraxüügüxü. Rü yexgumarüxü ta ga Equítuanecüãxaru äëxgacü ga Faraóú nane ga nüxíraxücü rü nayamaç, rü woo naxünaxacügü ga iyatüxü ga nüxíraxüxü, rü nanadai. <sup>30</sup>Rü nüma ga Faraóú rü norü ngüxëëruügü rü guxüma i Equítuanecüãxgü rü ínariüdagü ga yema chütaxügu. Rü poraäcü aita naxüe rü naxauxe ga guxüma ga Equítuanewa, yerü guxünema ga Equítuanecüãxpatawa rü nayu ga wüxi. <sup>31</sup>Rü yematama chütaxügu rü nüma ga Faraóú rü Moichéçax rü Aróúçax nangema, rü ñanagürü nüxü: —iÍpechoxü i nua natanüwa i ñaa chorü duüxügü! iRü nüxü peyarücuaxüxügü ya yimá perü Cori ya Tupana, ngëma pema nagu perüxínüexürüxü! <sup>32</sup>iRü ëcü peyagagü i perü carnérugü rü perü wocagü ngëma penaxwaxerüxü! iRü ípechoxü i nua! iRü perü Tupanana chaüçax pecagüe! —ñanagürü. <sup>33</sup>Rü nüma ga Equítuanecüãxgü rü Iraétanüxügüxü nipaxagü nax Equítuanewa ínachoxüçax, yerü nügügu narüxínüe nax guxütáma yuexü. <sup>34</sup>Rü nümagü ga yema Iraétanüxü rü nanayauxcharagü ga yema paüchara ga ngearü puxëëruüáxü. Rü guxünema ga norü tauxtamaxã naxchirugu

nananuquegü rü nügüätügu nayanagü. <sup>35</sup>Rü ñüxüchi yema Equítuanecüãxgüxütawa naxçax ínacagü ga naxchirugü rü norü ngaxãëruügü ga úirunaxçax rü diërumünaxçax. <sup>36</sup>Rü nüma ga Cori ya Tupana rü yema Equítuanecüãxgüaxü nanatauxchaxëxë nax norü ngüchaümaxã yema Iraétanüxügüna naxägüaxüçax ga yema nüxna naxçax nacagüxü. Rü yemaacü ga yema Iraétanüxügü rü nayana ga yema Equítuanecüãxaru yemaxügü.

**Equítuanewa ínachoxü ga Iraétanüxügü**

<sup>37</sup>Rü Rächéwa ínachoxü ga yema Iraétanüxügü, rü Chúcowa naxí. Rü 600,000 ga yatügü ga churarawa imexü nayexmagü. Rü naétiwa nayexmagü ga ngexügü rü buxügü ga tama ixugüxü. <sup>38</sup>Rü nawe narüxĩ ga muxüma ga togü ga duüxügü, rü nayagagü ta ga norü carnérugü rü wocagü. <sup>39</sup>Rü yema nax nangechicagüxügüga rü taxucürüwama norü ónata namexëëgü, yerü ga Equítuanecüãxgü rü nachixüanewa chixri ínanawoxü. Rü yemaçax paü ga ngearü puxëëruüáxü naxügü nawa ga norü paüchara ga ngearü puxëëruüáxü ga Equítuanewa yangegüxü. <sup>40</sup>Rü 430 ga taunecü nixĩ ga Equítuanewa nayexmagüxü ga Iraétanüxügü. <sup>41</sup>Rü yematama ngunexü ga nagu 430 ga taunecüwa nax nanguxügu nixĩ ga yema nachixüanewa ínachoxüxü ga guxüma ga Cori ya Tupanaarü duüxügü ga Iraétanüxügü. <sup>42</sup>Rü nüma ga Cori ya Tupana rü yema chütaxüxü naxuneta nax ínamuxüáxüçax ga norü duüxügü ga Equítuanewa. Rü yemaçax nanaxwaxe nax gücü ya taunecügu naxüchigagüaxüçax

ega nawa nanguuxũgu i ngẽma ngunexũ, nax yemaacũ nũxna nacuaãxãchixũcax ga ñuxãcũ Cori ya Tupana ínanguxũxẽẽxũ ga Equítuanewa.

**Ñuxãcũ tá nanaxũchiga i Üpetũchiga**

<sup>43</sup>Rũ nüma ga Cori ya Tupana rü Moichẽmaxã rü Aróũmaxã nidexa rü ñanagürü: —Ñuxma rü tá pemaxã nũxũ chixu i ñuxãcũ tá penaxũchiga i Üpetũchiga. Rũ tama name i ngẽma duũxũgũ i tama Iraétanũxũ íxũgũxũ rü nax nangóõxũ i ngẽma naxũna i chauxcax imáxũ. <sup>44</sup>Nattürü ngẽma perü duũxũ i diêrumaxã naxcax petaxexũ rü ñuxũchi marü íwíechaxmũũpexechiraũxũ, rü marü name i nanangõx i ngẽma naxũna. <sup>45</sup>Natürü ngẽma to i nachixũanecũãx i duũxũ i petanũgu naxũanexũ rüexna petanũwa puracũxũ diêrucax, rü taxuacũma nanangõx i ngẽma naxũna i chauxcax pemáxũ. <sup>46</sup>Rũ ngẽma naxũna i chauxcax pimáxũ rü penaxwaxe i wũxichigũ ya ípatawa penangõx. iRũ taxũtãma ípatawa ípenangexechi rü bai i íxraxũ i namachi, rü taxũtãma peyapuxẽxẽ ya naxchinaãxã! <sup>47</sup>Rũ ngẽmaãcũ tá penaxũchiga i guxũma i pema ya Iraétanũxũgũ —ñanagürü ga Cori ya Tupana.

.....

**Tupana rü wũxi ga caixanexũgu rü ùxũxemagu ínayaxũmũcũ ga Iraétanũxũgũ**

**13** <sup>17</sup>Rũ yexguma Faraóũ yema Iraétanũxũgũxũ ingexgux, rü Tupana rü tama yema nama ga Piritéutanũxũgũarü naanewa daxũgu nayagagũ, woo yema nax yixĩxũ ga nama

ga wexwa Canaáũanewa daxũ. Yerü nüma ga Tupana rü nagu narũxĩnũ ga yema Iraétanũxũgũ rü chi yema Piritéutanũxũgũmaxã nügu nadaixgu, rü ngürüãchi yemacax Equítuanecax nawoegu. <sup>18</sup>Rũ yemacax ga Tupana rü yema nama ga Már ga Dauchiũxũanacũgu idaxũguama namaxã ínayaxũegu ñuxmata yema ínachianexũwa nachopetü. Rũ nüma ga Iraétanũxũgũ rü ñoma churagarürũxũ meama nichima ga yexguma Equítuanewa ínachoxũxgu. <sup>19</sup>Rũ nüma ga Moiché rü nayana ga Yúchechinaãxãgũ, yerü Yúche rü naeneegũna naxãga ga nax yanaãxũcax ga naxchinaãxãgũ ga yexguma tá Equítuanewa ínachoxũxgu. Yerü nüma ga Yúche rü nayaxõ nax Tupana rü aixcũma tá ínanguxũxẽẽxũ ga yema Iraétanũxũgũ ga Equítuanewa. <sup>20</sup>Rũ nüma ga Iraétanũxũgũ rü Chũcowa inaxĩãchi, rü Etãũgu nayapegũ ga ngextá yema chianexũ íxũgũxũwa. <sup>21</sup>Rũ ngunecũ rü nüma ga Tupana rü wũxi ga caixanexũgu yema Iraétanũxũgũxũ ínixũmũcũ rü napexegu nixũema ga nũxũ nax nacuaãxgũxũcax ga ngextá tá nax naxĩxũ. Rũ chũtacü rü Tupana rü wũxi ga ùxũemagu nayaxũmũcũ nax nangóonexũcax. Rũ yemaacũ nũxũ natauxcha ga ngunecũ rü chũtacü nax inaxĩxũ. <sup>22</sup>Rũ yema caixanexũ rü napexegu nixũema ga ngunecũ, rü yema ùxũema rü nayabáixmaũ ga chũtacü.

.....

**Már ga Dauchiũxũwa nichoũ ga Iraétanũxũgũ**

**14** <sup>5</sup>Rũ nüma ga Equítuanearü ãẽxgacü rü nũxũ naxĩnũchiga nax yema Iraétanũxũgũ rü marü

naxĩgũxũ. Rũ yemaçax ga nũma ga Faraóũ rũ norũ ngũxẽerũgũ rũ naxũchicũxũarũ ĩnũãgũ, rũ ñanagũrũgũ nũgũmaxã: —¿Tũxcũũ nũxũ ĩngexgũxũ ĩ ngẽma Iraétanũxũgũ nax ngẽmaãcũ taxũema tũxũ puracũexũçax ĩ ñũxmax? —ñanagũrũgũ. <sup>6</sup>Rũ yemaçax ga Faraóũ rũ yexgumatama norũ duũxũgũxũ namu nax namexẽãxũçax ga naweũ ga daiwa namaxã naxũxũne. Rũ ĩnayagagũ ga guxũma ga norũ churaragũ. <sup>7</sup>Rũ nanamexẽxẽ ta ga 600 ga norũ churaragũweũ ga daiwa mexũne. Rũ naétũ nayexma ga norũ churaragũarũ ãẽxgacũgũweũ ga guxũma ga Equítuanewa ne ĩxũne. <sup>8</sup>Rũ woo nũma ga Faraóũ nũxũ nax nadauxũ ga ñuxãcũ Tupanaarũ poramaxã ĩnachoũxũ ga Iraétanũxũ, natũrũ tama ĩnaxĩnũchaũ rũ yema Iraétanũxũwe ningẽchĩgũama. Yerũ ga Tupana rũ nanayexrũ nax yemagu naxĩnũxũçax ga Faraóũ. <sup>9</sup>Rũ nũmagũ ga Equítuanecũãxgũ rũ guxũma ga norũ churaragũmaxã rũ naweũgũmaxã rũ norũ cowarũgũmaxã ĩnaxĩãchi nax nawe nangẽgũxũ ga yema Iraétanũxũgũ. Rũ Már ga Dauchiũxũcutũgu nũxũ ĩnayangagũ ga yema ĩyapegũxũgu ga Piaxĩruarũ ngaicamagu ga Baachefóũarũ tũxmaxtagu. <sup>10</sup>Rũ yexguma yema Iraétanũxũgũ rũ yãxũgu nũxũ nadaugũgu ga Faraóũ rũ norũ churaragũ, rũ norũ cowarũgu ga yema ne naxĩxũ, rũ poraãcũ namũie. Rũ Cori ya Tupanana nacagũ nax nũxũ nangũxẽxũçax. <sup>11</sup>Rũ yexguma ga yema duũxũgũ rũ Moichéxũ ñanagũrũgũ: —¿Tũxcũũ nua ĩnachianexũwa toxũ cugagũ nax nuxã tayuexũçax? ¿Ëxna cuxçax rũ Equítuanewa rũ tama ningu ĩ tauque nax

ngexta tataxgũxũçax? ¿Rũ tũxcũũ ngexũ tomaxã cuwagũ? ¿Rũ tũxcũũ Equítuanewa toxũ ĩcugaxũ? <sup>12</sup>Rũ yema nixĩ ga cumaxã nũxũ tixugũexũ ga Equítuanewa ga yexguma ñatagũgu: “Rũ nüétama ega Equítuanecũãxaxũ tapuracũegu”. Rũ narũmemae toxũ nax norũ puracũtanũxũ nax tixĩgũxũ rũ tama nuxã ĩnachianexũgu nax tayuemarexũ —ñanagũrũgũ. <sup>13</sup>Rũ yexguma ga Moiché rũ nanangãxũ rũ ñanagũrũ nũxũ: —¿Taxuçaxma pemũe! ĩRũ mea ĩperũchomare rũ naxçax perũdaunũ nax ñuxãcũ pexũ tá nax ĩnapoxũxũ ya Cori ya Tupana! Erũ ngẽma Equítuanecũãxgũ ĩ ñũxma nũxũ pedauxũ, rũ tagutãma wena nũxũ pedaugũ. <sup>14</sup>ĩRũ pema rũ taxuçaxma pexoegaãxẽgũ! Erũ nũma ya Cori ya Tupana rũ tá pexũ ĩnapoxũ —ñanagũrũ. <sup>15</sup>Rũ yexguma ga Cori ya Tupana rũ Moichéxũ ñanagũrũ: —¿Tũxcũũ chorũ ngũxẽẽçax ĩcuca? ĩRũ marũtama nax cuyumũxẽxũ! ĩRũ cũ namu ĩ ngẽma Iraétanũxũgũ rũ ĩnaxĩamãx! <sup>16</sup>ĩRũ cuma rũ nayaxu ya curũ naixmenãxã, rũ márchixũétũgu nawex! Rũ ngẽma márchixũ rũ tá nũgũna nixĩgachichixũ nax ngẽmaãcũ ngẽma Iraétanũxũgũ rũ paanexũwa nax yachoũxũçax. <sup>17</sup>Rũ choma rũ tá chanangexrũ ĩ ngẽma Equítuanecũãxgũ nax tama pega naxĩnũexũçax rũ pewe yangẽxũtanũxũçax. Rũ ngẽmaãcũ tá chanangoxẽxẽ ĩ chorũ pora. Rũ pema tá nũxũ pedau ĩ ngẽma namaxã ngupetũxũ ĩ Faraóũ, rũ guxũma ĩ norũ churaragũ ĩ nacutũgu ĩmarexũ, rũ ngẽma norũ churaragũ ĩ cowaruétũgu ĩxũ, rũ ngẽma norũ churaragũ ĩ cowaru itũgũxũ ĩ cárgu ĩxũ. <sup>18</sup>Rũ ngẽxguma Faraóũpexewa rũ

guxũma i ngẽma norũ churaragũpexewa chaugũ chawexgu nax ñuxãcũ chaporaxũ, rũ nũma i Equítuanecũãxgũ rũ tá nũxũ nicuãxãchitanũ nax aixcũma Cori ya Tupana chixixũ —ñanagũrũ. <sup>19</sup>Rũ yexgumatama ga yema Tupanaarũ duũxũ ga daxũcũãx rũ yema caixanexũ ga noxri Iraétanũxũpexegu ixĩxũtanũchiréxũ rũ nixĩgachitanũ rũ wixweama naxãgũ. <sup>20</sup>Rũ yemaacũ ga yema caixanexũ rũ Equítuanecũãxgũ rũ Iraétanũxũgũarũ ngãxũmachatexewa nixiãchi. Rũ yema Equítuanecũãxgũcax rũ nanaxẽanexẽ natũrũ Iraétanũxũgũcax rũ nanangóonexẽxẽ. Rũ yemaçax nixĩ ga Equítuanecũãxgũ ga taxucũrũwama Iraétanũxũgũxũ iyangaugũxũ ga yema chũtaxũgu. <sup>21</sup>Rũ yexguma ga Moiché rũ már-étũgu nawexchacũxũ. Rũ nũma ga Cori ya Tupana rũ yema chũtaxũgu rũ inanaxũxẽxẽ ga wũxi ga poracũ ga buanecũ ga éstewaama ne ũcũ ñuxmata yangunexũmare. Rũ yemaacũ ga yema már rũ taxregu niyauyexũchixũ. Rũ yemaacũ nixĩ ga Cori ya Tupana ga yapayechitamaxẽẽaxũ ga már. <sup>22</sup>Rũ yemaacũ paanexũwa nichoũ ga Iraétanũxũgũ, yerũ taxregu niyauyexũchixũ ga dexá. Rũ naxmachatexewa nichoũ, rũ ñoma wũxi i taxacũ i ãxtapũxũrũxũ nixĩgũ ga norũ tũgũnecũwawa rũ norũ toxwecũwawa ga dexá. <sup>23</sup>Rũ guxũma ga churaragũ ga icowaruáxũ rũ yema churaragũ ga cowaru itũgũxũ i cárgu ixũ rũ Iraétanũxũgũwe nangégũ ñuxmata yema már- arũ ngãxũtũwa nangugũ. <sup>24</sup>Natũrũ yexguma marũ ngunetũxũwa nangugũ, rũ nũma ga Cori ya Tupana rũ yema caixanexũ ga ũxiemarũxũ ixĩxũwa

Equítuanecũãxgũarũ churaragũxũ nadawenũ. Rũ nanatoõxégũ nax nũgũmaxátama nanuexũcax. <sup>25</sup>Rũ yema norũ cárgũ ga cowaru itũgũxũ rũ ñnayichũcũgũ, rũ ngechĩcuãcũ ñaxtũanegu nitũgũmare. Rũ yemaçax ñanagũrũgũ: —iNgĩxã tibuxmũ i nua! Erũ Tupana rũ naétũwa ñayuxu i ngẽma Iraétanũxũgũ rũ tamaxã nanu i yixema —ñanagũrũgũ. <sup>26</sup>Rũ yexguma marũ guxũma ga Iraétanũxũgũ inguũgu, rũ Tupana rũ Moichéxũ ñanagũrũ: —iËcũ ngẽma már-arũ dexáétũgu nawexchacũxũ nax ngẽma dexá rũ nũgũna wena naxũxũchiũxũcax rũ ngẽmaacũ ngẽxma nayixũcax i ngẽma Equítuanecũãxgũ namaxã i norũ cárgũ rũ norũ cowarugũ! —ñanagũrũ. <sup>27</sup>Rũ nũma ga Moiché rũ yema Tupana namaxã nũxũ ixuxũãcũma nanaxũ. Rũ már- arũ dexáétũgu naxuchacũxũ rũ yemaçax ga moxũãcũ nax yangunexũ rũ nũgũna naxũxũchixũ ga dexá. Rũ yemachaxwa nũgũ ñnibuxmũchaũ ga Equítuanecũãxgũ. Natũrũ yexguma nũgũ iyabuxmũxgux, rũ már-arũ dexámaxã narũbuxmũama, rũ yexma nayi. Rũ yemaacũ Tupana yexma márgu nanayixẽxẽ ga yema Equítuanecũãxgũ. <sup>28</sup>Rũ yexma nayi ta ga norũ cárgũ, rũ norũ churaragũ ga icowaruáxũ, rũ guxũma ga yema churaragũ ga ichoũxũ ga yema márwa nax Iraétanũxũgũwe nangégũxũcax. Rũ guxũma ga yemagũ rũ yexma nayue rũ taxuxũma ñayaxũ ga yexguma nũgũna naxĩxgu ga yema márchixũ.  
.....

**15** <sup>1</sup>Rũ yexguma ga Moiché rũ yema Iraétanũxũgũ rũ Cori ya Tupanaxũ nicuãxũxũgũ namaxã ga ñaa

wiyae rü ñanagürügü: “Choma rü tá chawiyae rü nüxü chicuaxüxü ya Cori erü nüxü narüporamae i tórü uanügü rü ngëmacax márgu nanayixëxë i ngëma churaragü rü norü cowarugü. <sup>2</sup>Corixü nax chicuaxüüxüçax nixi i chawiyaexü erü nüma nixi i choxü naporaxëxü rü choxü namaxëxü. Rü nüma nixi i chorü Tupana yixixü rü ngëmacax guxügutáma nüxü chicuaxüxüecha. Rü nüma rü chaunatiarü Tupana nixi, rü ngëmacax guxügutáma chanataxëxë.

.....

<sup>11</sup>Pa chorü Cori ya Tupanax, rü ngëma duüxügü namaxá tupanaáxütanüwa rü nataxuma i taxacü i cumaxá wüxiguxü. Rü nataxuma i taxacü i cuxrüxü üünexü rü nüxü cuaxüchixü. Erü taxucürüwama togü nanaxü i ngëma taxü i mexügü i toxçax cuxüxü. Rü ngëmacax name nax cuxü ticuaxüügüxü. <sup>12</sup>Rü icunawex ga curü pora rü yemaçax torü uanügüétügu nayagoxüchixü ga dexá ñoma waixümü inagagüxürüxü. <sup>13</sup>Rü ngëma toxü nax cungechaüxügüga mea tomaxá icucuax nax Equítuanecüãxgümexëwa toxü ícunguxüxëxü. Rü curü poramaxá tá toxü quigagü nawa i ngëma naane i mexü i tomaxá icuxunetaxü”, ñanagürü ga norü wiyaeawa.

.....

### Dexá i üxchiüxüchiga

<sup>22</sup>Moiché rü yema Iraétanüxügümaxá yema Már ga Dauchiüxüna nixigachi rü nachica ga chianexü i Chúgu áégaxüwa naxi. Rü tomaepüx ga ngunexü inaxi rü tama dexáxü inayangaugü. <sup>23</sup>Rü yexguma Márawa nangugügu, rü yexma dexáxü inayangaugü natürü taxucürüwama nawa

naxaxegü yerü naxüxchiü. Rü yemaçax nixi ga Máragu naxüégaüãxü ga yema nachica. (Rü yema naéga rü Naxüxü ñaxüchiga nixi.) <sup>24</sup>Rü nüma ga duüxügü rü chixri Moichéchigagu nidexagü rü nüxna nacagüe: —¿Taxacüwa tá itaxaxegüxü? —ñanagürügü. <sup>25</sup>Rü yexguma ga Moiché rü Cori ya Tupanaarü ngüxëçax ínaca. Rü nüma ga Tupana rü Moichéxü nanawex ga wüxi ga naixacü ga metanüxü. Rü nüma ga Moiché rü nanawoochi ga yema naixacü rü natüchiüwa nanatáe. Rü yemamaxá nüxü inayarüxo ga nax naxüxchiüxü ga dexá. Rü yéma nixi ga Tupana ga Iraétanüxügüxü naxüxü rü nüxna naxãaxü ga norü mugü nax yemaacü tá mea naxçax namaxëxüçax. <sup>26</sup>Rü Tupana rü ñanagürü nüxü: —Ngëxguma chi ipexñüegu i ngëma pemaxá nüxü chixüxü, rü penaxüxgu i ngëma namaxá chataãxëxü, rü naga pexñüegu i ngëma chorü ucuxëgü, rü peyanguxëxgu i ngëma mugü, rü taxuxütáma núma pexçax chanamu i ngëma daaweanegü ga Equítuanecüãxgüçax yéma chamuxü. Erü choma nixi i perü Cori ya Tupana i pexü charümexëxü chixixü —ñanagürü. <sup>27</sup>Rü yemawena rü wüxi ga nachica ga Elíüwa nangugü. Rü yéma nayexma ga 12 ga puchu rü 70 ga moru. Rü yexma dexáxütágu napegü.

### Öna ga Tupana duüxügüna äxü

**16** <sup>1</sup>Rü guxüma ga Iraétanüxügü rü inaxiächi ga Elíüwa. Rü yema chianexü ga Chíügu áégaxüwa nangugü. Rü ngëma chianexü i Chífü, rü Elíü rü maxpüne ya Chinaímachatexewa nangexma. Rü yexguma yéma

nangugügu rü marü wüxi ya tauemacüarü ngãxü ningeüga Equítuanewa nax ínachoxüxü. <sup>2</sup>Rü yema nachica ga chianexü i Chíüwa nixí ga guxüma ga yema duüxügü rü Moichémaxã rü Aróümaxã wena nanuexü. <sup>3</sup>Rü ñanagürügü nüxü: —Narümemaē chi nixí ga Cori ya Tupana rü noxtacüma Equítuanegu toxü nadajüxü. Yéma rü buetaregü ga namachimaxã ixãäcugücütanüwa tarütogü rü meama tachibüe, natürü pema rü nua ínachianexüwa toxü pegagü nax taiyamaxã nuxã toxü pedajüxüçax —ñanagürügü. <sup>4</sup>Rü yexguma ga Cori ya Tupana rü Moichéxü ñanagürü: —Ñuxma rü tá chanaxü nax òna naxçax charüiyixëxü i daxüguxü i naanewa. Rü nüma i duüxügü rü wüxichigü i ngunexügu rü tá nawa naxüxü nax nayauxgüäxüçax i ngëma wüxi i ngunexüçax inguxü. Rü ngëmawa tá nüxü chaxü i ngëma duüxügü ngoxi chauga naxínüe rüçxna tama —ñanagürü.

.....

<sup>8</sup>Rü yexguma ga nüma ga Moiché rü yema duüxügümaxã nidexa rü ñanagürü nüxü: —Rü yicü yáuanecü rü Cori ya Tupana rü tá pexna nanaxã i namachi nax penangóxüçax, rü paçmama rü tá pexna nanaxã i muxütama i paü, erü nüma ya Tupana rü pexü naxínü nax nachigagu chixri pidexagüxü. ¿Rü texégü tixígü i tomax? Pema rü tama tochiga nixí i chixri pidexagüxü, natürü Cori ya Tupanachiga nixí —ñanagürü.

.....

<sup>23</sup>Rü nüma ga Moiché rü namaxã nüxü nixu rü ñanagürü: —Cori ya

Tupana rü tüxü namu nax irüngüxü i moxüarü ngunexügu. Natürü ngëma nax irüngüxü rü naguxicatama irüxínüexüçax nixí. Rü ngëmacax name nixí i ñuxmatama penaxü i ngëma pewemü i pexüxchaüxü rü penamuxra i ngëma perü òna i pemuxrachaüxü, rü namaxã penguxügü i guxüma i ngëma pexü íyaxüxü perü moxüäcüruxü —ñanagürü. <sup>24</sup>Rü yema Moiché namaxã nüxü ixuxürüüäcü nanaxügü. Rü namaxã nanguxügü ga yema norü òna ga íyaxügüxü norü moxüäcüruxü. Rü yemaacü tama nüxü niyixe rü tama nüxü nixöxmiäç ga yema norü ònagü. ....

<sup>31</sup>Rü nüma ga Iraétanüxügü rü manámaxã nanaxügü ga yema òna ga nadexü. (Rü ngëma naéga rü “¿Taxacü nixí i ñaa?” ñaxüchiga nixí.) Rü yema maná rü ñoma chicurichirerüxü nixí natürü nachox, rü naaca rü ñoma paü i beruremaxã äacaxürüxü nixí. ....

<sup>35</sup>Rü 40 ga taunecü nixí ga Iraétanüxügü ga manámaxã naxäwemügüxü ñuxmata naane ga Canaäüwa nangugü. ....

**Dexá ga nutawa nagoxüchiüxüchiga**

**17** <sup>1</sup>Rü guxüma ga Iraétanüxügü rü ínachoxü nawa ga yema nachica ga chianexü ga Chíügu äégaxü, rü meama inaxí yema Cori ya Tupana namaxã nüxü ixuxürüxü. Rü yemawena rü wüxi ga nachica ga Refidüwa nangugü rü yexma napegü. Natürü yéma rü nataxuma ga dexá nax duüxügü nawa axegüxüçax. <sup>2</sup>Rü



yemacax Moichémaxã narüxutagagü rü ñanagürügü: —iËcü toxü ixaxegüxëxë i ñuxmax! —ñanagürügü. Rü yexguma ga Moiché rü nanangãxü rü ñanagürü: —¿Tüxcüü chomaxã perüxutagagü? ¿Rü tüxcüü Tupanaxü pexügü? —ñanagürü. <sup>3</sup>Natürü nüma ga duüxügü rü nitaxawae rü yemacax Moichémaxã narüxutagagüama rü ñanagürügü: —¿Tüxcüü ga toxü ícugaxüxü ga Equítuanewa? ¿Ëxna taxawamaxã toxü cudaxüçax wüxigu tümamaxã ya toxocügü rü toxünagü? —ñanagürügü. <sup>4</sup>Rü yexguma ga Moiché rü nayumüxë rü Tupanaxü ñanagürü: —¿Taxacü tá chaxüxü namaxã i ñaa duüxügü? Erü marü íxraxü nataxu nax nutamaxã choxü yamaxgüxü —ñanagürü. <sup>5</sup>Rü nüma ga Cori ya Tupana rü nanangãxü rü ñanagürü: —iËcü inachi rü duüxügüpexegu ixü namaxã i ñuxre i ngëma Iraétanüxügüarü äëxgacügü! iRü yange ta ya yima curü naixmenaxã ga namaxã márchüüwa cunacuajxcane, rü inaxüächi namaxã i ngëma duüxügü! <sup>6</sup>Rü choma rü tá yima maxpüne ya Oréxgu äéganewa cuxü charüngüxëxë yima maxpünetapüxwa. Rü yima maxpünetapüxwa tá cunacuajxca rü ngëma tá nanagoxüchixü i dexá nax duüxügü nawa axegüxüçax —ñanagürü. Rü nüma ga Moiché rü yema Tupana nüxü ixuxüächü nanaxü napexewa ga yema Iraétanüxügüarü äëxgacügü. <sup>7</sup>Rü yema nachica rü Meríbagu nanaxüéga, yerü ga Iraétanüxügü rü yema nachicawa Moichémaxã narüxutagagü. Rü to ga naéga ga nagu naxüégaügüxü nixí ga Mácha, yerü yéma nixí ga Tupanaxü naxügüxü ga yexguma

ñagügu: “¿Ëxna nanuxmaxü yixixü ya Tupana rü Ëxna taxucüma i nua tatanüwa?” ñagügu.

#### Amaléxtanüxügümaxã nügü nadai ga Iraétanüxügü

<sup>8</sup>Rü yema Amaléxtanüxügü rü yema nachica ga Refidügu äégaxüwa naxí nax Iraétanüxügümaxã nügü nadaxüçax. <sup>9</sup>Rü yemacax nüma ga Moiché rü Yochuéxü ñanagürü: —iYadexechi i ñuxre i yatügü rü ñuxüchi inaxüächi nax namaxã pegü pedaxüçax i ngëma Amaléxtanüxügü! Rü chomax i moxü rü tá maxpünetapexewa changexma namaxã ya yima naixmenaxã ya Tupana norü pora nawa ngoxexéne —ñanagürü. <sup>10</sup>Rü nüma ga Yochué rü nanaxü ga yema Moiché namaxã nüxü ixuxü. Rü inaxüächi nax nügü namaxã nadaxüçax ga yema Amaléxtanüxügü. Rü yoxni ga Moiché rü Aróü rü Úru rü maxpünetapexegu naxígü. <sup>11</sup>Rü yexguma Moiché unagüchacüügu rü Iraétanüxügü nixí ga rüporamaegüxü ga daiwa, natürü yexguma naxuechacüügu rü Amaléxtanüxügü nixí ga rüporamaegüxü. <sup>12</sup>Natürü nüma ga Moiché rü nipachacüxü rü yemacax wüxi ga nuta nanayauxgü nax gumawa natoxüçax. Rü ñuxüchi ga Aróü rü Úru rü nanangenagüchacüxügü rü wüxichacüüwa naxü ga wüxi rü norü naichacüüwa naxü ga to. Rü yemaacü ga Moiché rü taguma narüxuechacüxü ñuxmata yanaxücumare ga üaxcü. <sup>13</sup>Rü nüma ga Yochué rü Amaléxtanüxügüarü churaragüxü narüporamae, rü taramaxã nanadai. <sup>14</sup>Rü yemawena ga Cori ya

Tupana rü ñanagürü Moichéxü:  
—Chanaxwaxe i wüxi i poperagu  
cunaxümatü i ñaa daichiga nax  
guxüguma ngēmawa duüxügü nüxna  
cuaxächie xücax. iRü namaxä nüxü iXu  
ya Yochué nax choma rü tá  
ichayanaxoxēxü i ngēma  
Amaléxtanüxügü! —ñanagürü. <sup>15</sup>Rü  
nüma ga Moiché rü yexma nanaxü ga  
wüxi ga amarearü guchicaxü rü “Cori  
ya Tupana rü chorü cuaxruxü nixi”  
ñaxügu nanaxüéga.

.....

#### Iraétanüxügü rü Maxpüne ga Chinaíwa nangugü

**19** <sup>1-2</sup>Rü yema Iraétanüxügü rü  
yexguma Equítuanewa  
ínachoxügu rü düxwa Refidfüwa  
nangugü rü yexma nayapegü. Rü yéma  
inaxíachi rü maxpüne ga Chinaíarü  
chianexüwa nangugü. (Rü yima  
maxpüne rü Oréxgu rü ta naxáéga.) Rü  
yexguma rü marü tomaepüx ga  
tauemacü ningegü nax Equítuanewa  
ínachoxüxü. Rü guma maxpúnearü  
toxmaxtagu napegü. <sup>3</sup>Rü guma  
maxpúnegu nixi ga naxínagüxü ga  
Moiché nax yexma Tupanamaxä nügü  
nangaugüxücax. Rü guma maxpúnewa  
nixi ga Moichémaxä yadexaxü rü ñaxü  
nüxü: —iRü ñaatama orexü namaxä iXu  
i ngēma Iraétanüxügü i  
Acóbutanüxügü!: <sup>4</sup>“Rü pema rü marü  
nüxü pedau ga yema  
Equítuanecüäxmaxä chaxüxü rü ñuxäcü  
chaugüxütawa pexü chagagüxü ñoma  
wüxi i İyü i mea naxacü tüxü igaxürüxü.  
<sup>5</sup>Rü ngēxguma aixcüma guxüwama  
chauga pexínüegu rü peyanguxēxgu i

ngēma pemaxä ichaxügaxü, rü guxüma i  
nachixüanetanüwa rü tá pexüama nixi  
icharüngüxēxü, erü guxüma i ñaa  
naane rü choxrü nixi. <sup>6</sup>Rü pema tá nixi i  
chorü orearü uruügü i chopexewa  
duüxügüétüwa pidexagüxü, rü wüxi i  
chorü duüxügü i chaugaxicatama  
ixínüexü tá pixígü.” Rü guxüma i ñaa  
cumaxä nüxü chixuxü rü inamaxä nüxü  
ixu i ngēma Iraétanüxügü! —ñanagürü.  
<sup>7</sup>Rü nüma ga Moiché rü natáegu nawa  
ga guma maxpüne rü  
nanangutaquexexēx ga yema  
Iraétanüxügüarü äxgacügü. Rü namaxä  
nüxü nixu ga guxüma ga yema ore ga  
Tupana namaxä nüxü ixuxü. <sup>8</sup>Rü  
yexguma ga yema Iraétanüxügü rü  
wüxigu Moichéxü nangaxügü rü  
ñanagürügü: —Tá tayanguxēx i  
guxüma i ngēma Cori ya Tupana toxü  
muxü —ñanagürügü. Rü nüma ga  
Moiché rü Tupanamaxä nüxü narüxu ga  
yema Iraétanüxügüarü ngaxü. <sup>9</sup>Rü  
nüma ga Cori ya Tupana rü ñanagürü  
Moichéxü: —Dücax, cumaxä nüxü  
chixu, rü wüxi i caixanexü i  
pamüemaxüwa tá chaugü cuxü chawex  
nax ngēmaäcü i ngēma duüxügü rü  
choxü nax naxínüexücax nax cumaxä  
chidexaxü rü ngēmaäcü guxüguma cuxü  
yaxögüaxücax —ñanagürü. Rü nüma ga  
Moiché rü wenaxarü Cori ya  
Tupanamaxä nüxü nixu ga yema  
duüxügüarü ngaxü. <sup>10</sup>Rü nüma ga Cori  
ya Tupana rü ñanagürü Moichéxü:  
—iËcü, namaxä nüxü yarüxu i ngēma  
duüxügü nax nügü yamexēgüxücax i  
ñuxmax rü moxü nax ngēmaäcü choxü  
yacuaxüügüxücax! Rü name i nügü  
niyauxgüchirugü. <sup>11</sup>Rü ëcü nügü

namexēēgü naxçax i paçmaacıarı  
 ngunexü, erü ngēma ngunexügu tá nixī i  
 ícharüxixü nagu ya yima maçpúne ya  
 Chinaí napexewa i guxüma i ngēma  
 duüxüğü. <sup>12</sup>iRü inaxü i cuaxruüğü i  
 norü guxücüwawa ya yima maçpúne  
 nax tama nachopetüxüçax i duüxüğü!  
 iRü namaxā nüxü ixu nax tama nagu  
 naxígüxü ya yima maçpúne, rü bai tá ta  
 nüxna nangaicamagüxü! Erü guxāma ya  
 yíxema nüxna ngaicamaxe rü tá tayu.  
<sup>13</sup>Rü yíxema maçpúnegu ínagüamáxe rü  
 taxütáma tüxü pingóğü, natürü  
 nutagümaxā rü würagümaxā tá nixī i  
 tüxü pimāxgüxü. Rü nüétama nixī ega  
 wüxi i duüxü yixígu rüexna wüxi i  
 naxüna yixígu, rü taxütáma  
 penamaxēxē. Natürü nüma i duüxüğü erü  
 ngēxguma marü nüxü naxínüegu nax  
 yacueāxü i carnéruchatacure, rü marü  
 name nax yima maçpúneçax naxixü  
 —ñanagürü. <sup>14</sup>Rü nüma ga Moiché rü  
 ínarüxí nawa ga guma maçpúne nax  
 duüxüğüxü yaxucüxēgüxüçax nax  
 ñuxácü Tupanaxü yacuaxüüğüxüçax. Rü  
 nüma ga duüxüğü rü nügü  
 niyauxchirugü. <sup>15</sup>Rü nüma ga Moiché rü  
 ñanagürü nüxü: —iPegü pimexēēgü  
 naxçax i paçmaacıarı ngunexü! iRü  
 naxüpa i ngēma rü taxütáma  
 pexmaçmaxā pemaxē! —ñanagürü. <sup>16</sup>Rü  
 yexguma noxri yangunegu ga  
 paçmaacıarı ngunexügu rü  
 naxāemacüane rü niduruane. Rü wüxi  
 ga caixanexü ga pamüemaxü guma  
 maçpúneétügu ínarüxí. Rü wüxi ga  
 tagaxü ga nacornétagaraxüxü yéma  
 inanaxü, rü yexguma yemaxü naxínüegu  
 ga duüxüğü rü muümaxā niduxrue. <sup>17</sup>Rü  
 yemawena rü nüma ga Moiché rü yéma

ínapegüxüwa duüxüğümaxā ínaxüxü  
 nax Tupanaxü íyadaugüxüçax. Rü guma  
 maçpúnepechinüwa nayachaxāchitanü.  
<sup>18</sup>Rü guxüwama ga guma maçpúne ga  
 Chinaí rü narüçaxi yerü Tupana rü  
 üxüemamaxā yexma ínarüxí. Rü yema  
 caxixü rü ñoma wüxi ga üxüemarüxü  
 nixī. Rü yexgumatama ga guma  
 maçpúne rü poraäcü nixíāxcüxü. <sup>19</sup>Rü  
 yema naga ga nacornétagaraüxü rü  
 yexeraäcü nitagachigü. Rü nüma ga  
 Moiché rü Tupanamaxā nidexa, rü  
 nüma ga Tupana rü nanangāxü. Rü  
 yema naga ga Tupana rü ñoma  
 duruanexürüxü nixī. <sup>20</sup>Rü nüma ga Cori  
 ya Tupana rü yexeraäcü maçpúne ga  
 Chinaítapexegu nixī ga ínaxixü, rü yéma  
 Moichéçax naca nax naxütagu  
 naxínagüxüçax. Rü nüma ga Moiché rü  
 yexma naxínagü. <sup>21</sup>Rü Cori ya Tupana  
 rü ñanagürü nüxü: —iEcü íruxí rü  
 namaxā nüxü ixu i duüxüğü nax tama  
 nawa nachopetüxüçax i ngēma  
 cuaxruxü i pexüxü! Rü tama  
 chanaxwaxe nax naxínüexü nax  
 choxü nadaugüxü, erü ngēxguma choxü  
 nadaugügu rü tá nayue. <sup>22</sup>Rü woo i  
 ngēma chacherdótegü i chopexewa  
 duüxüğüétüwa chogügüxü rü  
 nanaxwaxegü i nügü namexēēgü nax  
 tama natanüwa rü ta chanadaixüçax.  
<sup>23</sup>Rü nüma ga Moiché rü Cori ya  
 Tupanaxü nangāxü rü ñanagürü:  
 —Ngēma duüxüğü rü taxütáma nagu  
 naxígüama ya daa maçpúne ya Chinaí,  
 erü cuma toxü cumu nax  
 tayapoxyeanexü nax tama  
 nachopetüxüçax i duüxüğü, rü ñuxüchi  
 tomaxā nüxü quixu rü daa maçpúne nax  
 naxüünexü —ñanagürü. <sup>24</sup>Natürü nüma

ga Cori ya Tupana rü ñanagürü: —IËcü íruxĩ rü ñuxũchi Aróũmaxã naxĩnagü! Natürü ngẽma chacherdótegü rü ngẽma duũxügü rü tama chanaxwaxe i nüxũ nachopetü i ngẽma cuaxruũgü nax chauxõtawa naxĩxũcax, erü tá ngürüãchi natanüwa rü tá chanadai —ñanagürü. <sup>25</sup>Rü nüma ga Moiché rü ínaruxĩ rü yema Iraétanũxügũmaxã nüxũ nixu ga yema Tupana namaxã nüxũ ixuxũ.

### Ngẽma 10 i Tupanaarü mugüchiga

**20** <sup>1</sup>Rü nüma ga Tupana rü nidexa rü nüxũ nixu ga guxũma ga ñaa mugü rü ñanagürü: <sup>2</sup>—Choma nixĩ i curü Tupana ga Equítuanewa cuxĩ íchanguxuchixẽxũ, naxmexwa ga Equítuanecüãxgü ga nüxũ cupuracũmarexũ. <sup>3</sup>Rü ñuxma nax curü Tupana chixĩxũ, rü tama chanaxwaxe i chaupexewa taxacürü ucaxũmaremaxã cutupanaãx. <sup>4</sup>iRü taxuxõtáma i taxacü cugüçax cuxũchicünaxã nax ngẽmamaxã cutupanaãxũcax, rü bai i taxacü i daxüguxũ i naanewa nüxũ cudaduxũ, rü bai i taxacü i ñoma i naanewa ngẽmaxũ, rü bai i taxacü i márwa ngẽmaxũ tá cuxũchicünaxã nax ngẽmamaxã cutupanaãxũcax! <sup>5</sup>iRü taxõtáma taxacürü naxchicünaxãpexegu cucaxápũxü rü nüxũ quicuaxũxũ! Erü choma ya curü Cori ya Tupana ya poracü rü poraãcü cuxũ chinuxũ, rü ngẽmacax tümaarü chixexũcax tá tüxũ chapoxcu ya yíxema chauxchi aixe, rü ñuxmata tümaxacügüwa, rü tümataagüwa chananguxẽxẽ i ngẽma poxcu. <sup>6</sup>Natürü ya yíxema choxũ ngechaũgũxe rü naga ñniexe i ngẽma chorü mugü, rü tüxũ

changechaũ, rü tá nüxũ changechaũ i tümataagü ega woo 1,000 expũxcũna yamuxgu. <sup>7</sup>iRü taxõtáma chauéga cunaxuxuchi ega taxacürü chixexũ cuxũxgu! Erü choma ya curü Cori ya Tupana rü taxõtáma tüxũ chaxüpetũmare nax tüxũ chapoxcuxũ ya yíxema chauégamaxã tügü ipoxũnetaxe ega taxacürü chixexũ taxũxgu. <sup>8</sup>iRü nüxna nacuaxãchi i ngẽma ngũchigaarü ngunexũ nax chauxçaxicatama nax ícunaxũxuchixũcax! <sup>9</sup>Rü 6 i ngunexũgu tá nixĩ i cunaxũxũ i guxũma i curü puracü i cuxũxchaũxũ. <sup>10</sup>Natürü ngẽma norü 7 i ngunexũgu rü tá icurüngü rü nagu tá choxũ quicuaxũxũ. iRü taxuxõtáma taxacürü puracü nagu cuxü i ngẽma ngunexũ, rü woo cunegü, rü woo cuxacügü, rü woo curü puracütanũxügü, rü woo cuxũtaxügü, rü woo cuxũnagü rü woo i ngẽma duũxũ i to i nachixũanecüãx i cuxũtawa ngẽmaxũ! <sup>11</sup>Yerü choma i Cori ya Tupana rü 6 ga ngunexũgu nixĩ ga chanaxũxũ ga daxüguxũ ga naane, rü ñoma ga naane rü taxũ ga már, rü guxũma i taxacü i nawa ngẽmagũxũ. Rü ñuxũchi icharüngü ga norü 7 ga ngunexũgu. Rü yemaçax mexũ namaxã chaxuegu ga yema ngunexũ, rü cuxna chanachyxu nax nagu cupuracũxũ. <sup>12</sup>iRü tüxũ nangechaxũ ya cunatü rü cué nax ngẽmaãcü namáxũcax i curü maxũ i ñaa naane i choma i Cori ya Tupana cuxna chaxãxũwa! <sup>13</sup>iRü taxõtáma cumáeta! <sup>14</sup>iRü cuma nax cuxãmagũxũ rü cuxãtegũxũ rü taxõtáma cugüechita nai i nge rüexna nai ya yatũmaxã cumaxũ! <sup>15</sup>iRü taxõtáma cungĩxtaxa! <sup>16</sup>iRü taxõtáma doraxũ quixu i cumücũchiga! <sup>17</sup>iRü taxõtáma cugũxũ

cunangúchaũxêxê ya cumücüpata, rüexna naxmaç, rüexna norü puracütanüxũ, rüexna naxũtaxũ, rüexna norü wocagü, rüexna norü burugü, rü bai i taxacü i noxrü ixixũ! —ñanagürü ga Tupana.

**Nüma ga Iraétanüxügü rü  
Tupanaxũ namuüe**

<sup>18</sup>Rü guxũma ga yema Iraétanüxügü rü nüxũ naxĩnüe ga yema duruanexũ rü guma cornétagüga. Rü nüxũ nadaugü ga yema ãëmacü rü guma maçpúne ga caixanexũ nagu ngxũne. Rü yexguma yemaxũ naxĩnüegu rü nüxũ nadaugügux, rü namuüe rü nüxna nayáxügugü ga guma maçpúne. <sup>19</sup>Rü yemaçax Moichéxũ ñanagürügü: —Tama tanaxwaxe i Tupana tomaxã nidexa erü ngürüächi tá tayue. Rü narümemae nixi nax cumatama tomaxã nüxũ quixuxũ i ngëma Tupana cumaxã nüxũ ixuxũ rü toma rü tá naga taxĩnüe —ñanagürügü. <sup>20</sup>Rü nüma ga Moiché rü nanangãxũ rü ñanagürü nüxũ: —iTaxú i pebajxãchiexũ! Erü nüma ya Tupana rü núma naxũ nax pexũ nawéaxũçax i norü pora nax nüxũ pemuüexũçax rü guxüguma naga pexĩnüexũçax rü tama chixexũ pexügüxũçax —ñanagürü. <sup>21</sup>Rü yexguma yema Iraétanüxügü rü guma maçpúnearü yáxüwa yachaxãchitanüyane, rü yoxni ga nüma ga Moiché rü yema waemaxũ ga caixanexũçax nixü ga Tupana nawa yexmaxũ.  
.....

**Mugü i máetagüxũçax ueguxũ**

**21** <sup>12</sup>Rü Tupana rü ñanagürü Moichéxũ: —Texé ya tümamücüxũ imáxe irü tüma rü ta

noxtacüma tüxũ pimax! <sup>13</sup>Natürü ngëxguma tama woetama tüxũ yamáxchaũchirexgu rü tüxũ yamáxcüraxũmaregu, rü tá cumaxã nüxũ chixu nax taxacürü nachicagu yanacüxũ nax tama nüma rü ta nayuxũçax. <sup>14</sup>Natürü ngëma namücümaxã nuxũ rü woetama tüxũ imáxchaũxũ, rü tá noxtacüma cuyamaç woo ãmarearü guchicaxũpechitagu yanacüxgux. <sup>15</sup>Rü ngëma nanatüxũ rüexna naéxũ napixêxũ, rü name i noxtacüma poxcu i yu namaxã taxuegu. <sup>16</sup>Rü ngëma wüxi i duüxũçax ngĩxũ rü tüxũ icüxũ rü tá cuyamaç woo naxütawa tangexmagu rüexna marü tümamaxã nataxegu. <sup>17</sup>Rü ngëma nanatümaxã rüexna naémaxã chixexũ ixügüxũ rü noxtacüma cuyamaç.  
.....

<sup>22</sup>Rü ngëxguma taxre i yatigü nügü dajxgu rü ngĩxũ yanguxêegu i wüxi i nge i äxácüxcü rü ngëmacax nayuxacüxgu, rü yíxema ngĩxũ yuxacüxêxê rü tanaxwaxe i tanaxütanü i ngëma diëru i ngíte ngĩxçax ícacüexpüx rü ãëxgacü nangugüxgu nax marü namexũ nax ngëxgumaepüx nax yixixũ. <sup>23</sup>Natürü ngëxguma texé wüxi ya ngexexũ yuxêegux, rü tümaarü maxũmaxã tanaxütanü. <sup>24-25</sup>Rü ngëxguma texé wüxíxũ ticháixetüxêegu, rü cháixetümaxã tá ta tüxũ naxätanü. Rü ngëxguma texé wüxíxũ tibüepütaxêegu, rü büepütamaxã tá ta tüxũ naxätanü. Rü ngëxguma texé wüxíxũ tipoyemëxëgux, rü poyemëxëmaxã tá ta tüxũ naxätanü. Rü ngëxguma texé wüxíxũ tipoyecutügu rü poyecütümaxã tá ta tüxũ naxätanü. Rü ngëxguma texé wüxíxũ tiguxgu, rü gumaxã tá ta tüxũ

naxātanū. Rū ngēxguma texé wūxíexū tapixēēgu, rū pīxēēmāxā tá ta tūxū naxātanū. Rū ngēxguma texé wūxíena tanacuāixcagu, rū cuāixcamāxā tá ta tūxū naxātanū.

.....

**Mugū i nūxū ixuxū nax ñuxācū  
namexēēxū i guxchaxūgū**

**22**<sup>5</sup>—Rū ngēxgumachi texé tūmaxūnagū ngūrūanegumare mugūgu nax ngextámare nachibūexūcax rū ngēmāgagu toxguāxarū naanewa yachibūiegu, rū yíxema norū yora i ngēma naxūnagū, rū tanaxwaxe i tanaxūtanū namāxā i tūmanetūarū o i rūmemaexū. <sup>6</sup>Rū ngēxgumachi texé wūxi i taxaciwa nangixichigu rū togueanewa nanáiegu rū ngēxma yaxaegu i tūmaarū nanetūgū i marū idauxū, rūexna ngexwacax rūxūgūxū, rū yíxema yaguanexe rū tanaxwaxe nax norū yoraaxū tanaxūtanūxū naxcax i ngēma tūmanetūgū nax itaguxcūraxūxū.

.....

<sup>29</sup>Rū ngēma penetūgiarū o i choxna ūxū, rū name nixī i paxa choxna penaxā. Rū ngēxgumarūxū ta i perū úbachiūwa rū chanaxwaxe i paxa choxna penaxā i ngēma choxna ūxū. Rū yimá nūxíraxūcū ya pene ya woetama choxna ūcū, rū name nixī i chopatawa naxcax penaxūtanū i ngēma choma nāgu chaxunetaxūexpūx.

.....

**Mugū i guxchaxūgiarū mexēēxūchiga**

**23**<sup>4</sup>—Ngēxguma nūxū icuyangūxgu i curū uanūarū woca rūexna norū búru iyarūtāxuxū, rū name nixī i nūxū cunatāeguxēxē. <sup>5</sup>Rū

tama name i nūxū cuxo nax nūxū curūngūxēēxū i ngēma cuxchi aixū. Rū ngēxguma chi nūxū cūdaūxgu i norū búru nax naxwetaarū yamāxā ngēxma yanguxū irū nūxū rūngūxēxē nax ícunanugūxū i ngēma naxweta i naétūwa ngēxmaxū! <sup>6</sup>Rū ngēxguma wūxi i duūxū i ngearū diēruāxū āēxgacūpexewa guxchaxū cumāxā mexēēgu, rū tama name i cunatopetū i ngēma guxchaxū. <sup>7</sup>Rū nūxū rūxo nax doramāxā ícunaxūāxūxū i wūxi i duūxū! Rū tama name i natūcaxma cugagu nax yamāxgū i wūxi i duūxū i taxuxūma i chixexū ūxū. Erū choma rū taxūtāma nūxū chaxūpetūmare i ngēma duūxū i nagagu íyixīxū nax tayuxū. <sup>8</sup>Rū cuma nax āēxgacū quixīxū, rū tama name i wūxiāxū cunayauxtanū, nax naétūwaama cuxūxūcax ega taxacūrū guxchaxū cuxūtāwa yamexēēgūgu. Erū ngēma āēxgacū i nayauxtanūxū, rū inayacux i ngēma aixcūma ixīxū, nax tama nūxū nacūāxūcax i duūxūgū, rū ngēmaācū ya yíxema duūxē ya taxuxūma i chixexū ūchiréxe, rū nitūmaguāchi i ngēma chixexū.

.....

**Nūxíraxūxū i norū o i nanetūgiarūchiga**

<sup>19</sup>Rū ngēma nūxíraxūxū i norū o i ngēma cunetūgiūwa quibuxgūxū, rū name nixī i Tupanapatawa cunana i ngēma rūmemaegūxū —ñanagūrū ga Cori ya Tupana.

.....

**Tupana rū aixcūma  
Iraétānūxūgūmaxā inaxūga**

**24**<sup>3</sup>Rū nūma ga Moiché rū natanūwa naxū ga yema

Iraétanüxügü rü namaxã nüxü nixu ga guxüma ga yema ore ga Cori ya Tupana namaxã nüxü ixuxü. Rü nümagü ga Iraétanüxügü rü guxüma wüxigu Moichéxü nangäxügü rü ñanagürügü: —Ngëmáacü tá tayanguxêxê i guxüma i ngëma mugü i Tupana toxü muxü —ñanagürügü. <sup>4</sup>Rü nüma ga Moiché rü nanaxümatü ga guxüma ga yema ore ga Cori ya Tupana nüxü ixuxü. Rü moxüãcü paçmama ínarüda rü maçpúnepechinügu nanaxü ga wüxi ga ãmarearü guchicaxü. Rü 12 ga nutamaxã nanaxü naégagu ga yema 12 ga Iraétücumügü. <sup>5</sup>Rü ñuxüchi nanamu ga ñuxre ga ingextüxü ga Iraétanüxügü nax nadaiaxüçax ga wocagü ga iyatüxü rü Tupanaçax nax ínaguaxüçax. Rü yemawa inanawexgü nax aixcüma tá wena Tupanaga naxñüexü. <sup>6</sup>Rü nüma ga Moiché rü ngäxügu nayabaye ga guma nagü. Rü guma wüxiarü ngäxü rü ñuxre ga naxpáügu nanabacu. Rü guma naiarü ngäxü rü ãmarearü guchicaxü namaxã namaxcu. <sup>7</sup>Rü yemawena rü nanayaxu ga yema popera ga Tupanaarü üga nagu ümatüxü, rü yema duüxügüçax tagaãcü nüxü nadaumatü. Rü nümagü rü ñanagürügü: —Guxüma i ngëma Cori ya Tupana nüxü ixuxü rü aixcüma tá mea tayanguxêxê —ñanagürügü. <sup>8</sup>Rü yexguma ga Moiché rü nanayaxu ga guma nagü ga togü ga naxpáügu nabacuãcü rü gumamaxã duüxügüxü nimacutanü, rü ñanagürü: —Ñuxma nax pexna naxãxü i norü mugü rü daa nagü nixí ya perü cuaxruxü nax aixcüma yixü i guxüma i ngëma Cori ya Tupana pemaxã nüxü ixuxü —ñanagürü.

.....

### Moiché rü maçpúne ga Chinaígu naxínagü

<sup>12</sup>Rü Cori ya Tupana rü ñanagürü Moichéxü: —iËcü naxínagü nawa ya daa maçpúne ya nawa changexmane rü ngëma choxü nanguxêxê! Erü tá cuxna chanaxã i nutatachinügü i chorü mugü rü ucuxêgü nagu chaxümatüxü nax ngëma Iraétanüxügüxü nawa nangüexêxêxüçax —ñanagürü. <sup>13</sup>Rü nüma ga Moiché rü inachi rü guma maçpúne ga Tupana nawa yexmanegu naxínagü wüxigu namaxã ga namücü ga Yochué. <sup>14</sup>Rü nüma ga Moiché rü yema Iraétanüxügüarü ãexgacügüxü ñanagürü: —iNúatama ñaa nachicawa toxü penanguxêxê rü ñuxmatáta pexçax tawoegu! Rü Aróü rü Úru rü tá pemaxã nuxã narücho. Rü ngëxguma chi texé guxchaxü tüxü ngëxmagux rü name nixí i Aróümaxã rü Úrumaxã nüxü tixu —ñanagürü. <sup>15</sup>Rü yexguma yema orexü namaxã yaxuxguwena, rü nüma ga Moiché rü guma maçpúne naxínagü. Rü wüxi ga caixanexü nayadüxü. <sup>16</sup>Rü Cori ya Tupanaarü üüne rü guma maçpúne ga Chinaígu ínarüxí. Rü 6 ga ngunexü rü yema caixanexü nayadüxü ga guma maçpúne. Rü yema norü 7 ga ngunexügu rü nüma ga Cori ya Tupana rü yema caixanexüwa Moichéçax naca. <sup>17</sup>Rü yema Cori ya Tupanaarü üüne rü yema Iraétanüxügüçax nangox nawa ga guma maçpúne ga ngextá yexeraãcü ínachuchitaeruüwa. Rü ñoma wüxi ga üxüema ga nawa ixaxürüxü nixí. <sup>18</sup>Rü nüma ga Moiché rü naxínagü nawa ga guma maçpúne rü yema caixanexügu nayaxücu. Rü yéma nayexma ga 40 ga ngunexü rü 40 ga chütaxü.

**Āmaregü naxçax ya Tupanapata**

**25** <sup>1</sup>Rü nüma ga Cori ya Tupana rü Moichémaxã nidexa rü ñanagürü nüxü: <sup>2</sup>—iNamaxã nüxü ixu i ngëma Iraétanüxügü nax çaxçax nanutaquexeaxüçax i norü āmaregü! iRü nadea naxütawa i ngëma duüxügü i aixcüma norü ngüchaümaxã inaxägüchaüxü! <sup>3</sup>Rü ñaa tá nixi i ngëma pedexü: úrumü, rü diërumü, rü cobremü, <sup>4</sup>rü naxchiru i dauxraaci wëxcharaxü, rü naxchiru i dauxrachaxü, rü naxchiru i línuchi i mexechixünaxçax, rü cábrataçagü, <sup>5</sup>rü carnéruchaxmüxügü i dauxümaxã ichagüxü, rü togü i naxçaxmüxü i mexechixü, rü mürapewagü i acáchianaxçax, <sup>6</sup>rü chíxü i omüxüüwa mexü, rü pumára i chíxüéü i chacherdóte ya chorü puracütanüxüeru namaxã rüngégüxü, rü pumáratexë i guwa mexü, <sup>7</sup>rü nutagü ya cornalínanaxçax rü naigü ya nutagü ya ngaxãerüxü nax chacherdótegiarü äëxgaciärü türemüchiruarü meruxü yixixüçax. <sup>8</sup>iRü çaxçax penaxü ya wüxi ya chopata nax yimawa duüxügütanüwa changexmaxüçax! <sup>9</sup>Natürü yima chopata ya nawa tá changexmane, rü guxüma i norü ngëmaxügü rü tá ngëma cuxü nüxü chadauxëëxüäcü cunaxü.

**Baú i Tupanaarü mugüchixü**

<sup>10</sup>iËcü naxü i wüxi i baú i acáchianaxçax i mürapewawa, i wüxi ya métru rü centímetru i norü max rü 65 centímetru i norü tachiã, rü

ngëxgumarüxü ta 75 centímetru i norü máchane! <sup>11</sup>iRü naxümaxa rü úirumaxã natüxüma! Rü norü düxétüwa rü ngëxgumarüxü tá ta úirumaxã cunatüxüne. Rü naberawa rü tá úirumaxã ícunaxüáegubera. <sup>12</sup>iRü naxü i ägümücü i bochicuxü i úirunaxçax, rü wüxichigü ya naparawa nanucu! <sup>13</sup>iRü ngëxgumarüxü ta naxü ya taxremenaxã ya nai ya acáchianaxçax, rü ñuxüchi úirumaxã yatümenaxã! <sup>14</sup>iRü yima naxpaweru i ngëma baú i bochicuxümaxetüwa yawexgü nax yimamaxã nachüxnagüxüçax i ngëma baú! <sup>15</sup>Rü yima naxpaweru rü marü taxütáma cunade. Rü ngëma baúarü bochicuxümaxetüwa tátama nangexmagüecha. <sup>16</sup>iRü ngëma baúgu yaxúcuchi i ngëma nutatachinügü i nagu naxümatüxü i ngëma mugü i tá cuxna chaxaxü! <sup>17</sup>iRü ëcü naxü i wüxi i naxátaxü i úirunaxçax ixixü! Rü norü max rü wüxi ya métru rü 10 centímetru tá nixi, rü norü tatachinü rü 75 centímetru tá nixi. <sup>18</sup>Rü úirümüwa tá cunaxüxüchi i taxre i daxücüäxchicünaxã i ixäpexátüxü i norü wüxichigüpexewa ngëmaxü i ngëma baúátaxü. <sup>19</sup>Rü ngëma daxücüäxchicünaxã i ixäpexátügüxü rü naxátáüwa tátama cunaxüxüchigü. Rü wüxi rü tá norü wüxipexewa nangexma rü ngëma to rü norü topexewa nangexma. <sup>20</sup>Rü ngëma taxre rü tá nügiärü toxmaxtawa nangexmagü. Rü naxátáüétügu tá narüdaunü. Rü yima naxpexátü rü tá nayadüxü i ngëma naxátaxü. <sup>21</sup>iRü ngëxma baúgu nanucu i ngëma nutatachinügü i chorü mugü i nagu ümatüxü! iRü ñuxüchi



yaxúciátaxú! <sup>22</sup>Rü ngēmawa tá nixī i changemaxú i naxátaúétúwa i norú ngāxúwa i ngēma taxre i daxúciáxchicūnaxā i ixāpexátúxú. Rü ngēma tá nixī i cumaxā nüxú chixuxú i ngēma chorú ucuxégú naxçax i ngēma Iraétanüxúgü.

#### Mecha i paü i üünegüxúarü nuchicaxú

<sup>23</sup>iRü naxü i wüxi i mecha i acáchianaxçax i mürapewawa! Rü 90 centímetru tá nixī i norú maç, rü 45 centímetru i norú tatachinü rü 65 centímetru i norú máchane. <sup>24</sup>Rü úirumamaxā tá cunatütachinü, rü úirumaxā tá ícunaxúáegupechinü. <sup>25</sup>Rü ngēma mecha rü tá cunaxúbera i naétúwa rü 7 centímetru tá nixī i norú tatachinü i ngēma naberagü. Rü ngēma naberaétúwa rü tá úirumaxā ícunaxúáegubera. <sup>26</sup>iRü naxü i ágümücü i bochicuxú i úirunaxçax, rü wüxichigü ya naparacúwawa nanucu! <sup>27</sup>Rü ngēma naberaxútawa tá cunanucu i bochicuxú nax ngēmawa yawexgüáxúçax ya yima naxpaweru ya norú ngetaxúruxú. <sup>28</sup>Rü ngēma norú ngetaxúruxú rü nai ya acáchiamenaxā tá nixī, rü guxúwama úirumaxā tá cuyatümenaxāgü. <sup>29</sup>Rü úiruwa tá cunaxü i ngēma norú poratugü rü cuyeragü rü baeruügü rü axepáügü i ngēma áchiüxú i ámarearü axruxú. <sup>30</sup>Rü ngēma mechaétügu tá cunanu i ngēma paü i üünexú nax guxútáma chopexewa ngēxmaxúçax.

#### Omüpaweru i úirunaxçax

<sup>31</sup>iRü ngēxgumarüxú ta naxü i wüxi i omüpaweru i úirunaxçax i pomüxú! Rü ngēma nachipatü rü namenaxā rü

ngēma nachacüügü rü ngēma nanágugü i napatüragüraxúxú, rü wüxiwatama tá cunaxúxuchigü. <sup>32</sup>Rü ngēma omü rü wüxichigü i nactuwwa rü tá nüxú nangexma i tomaepüxchigü i nachacüügü.

.....

#### Tupanapatachiga

**26** <sup>1</sup>—iËcü naxü ya chopata i 10 tachinü i mexú i línuchiarü mutachinüxúwa! Rü ngēma línuchi rü tá nadaunüta rü nayaxnúta rü nawexranüta. Rü ngēma línuchimaxā tá cunamutachinü, rü taxre i daxúciáxchicūnaxāgü tá nagu cuxü.

.....

<sup>14</sup>Rü ngēma nañx ya yima í rü tá carnéruchaxmüxú i dauxúmaxā ichagüxú tá nixī. Rü ngēmaétüwaama üxú rü tá cábrachaxmüxú tá nixī. <sup>15</sup>Rü ngēma naxtapüx ya yima í rü acáchianaxçax i mürapewa tá nixī. Rü ngēma rü mea tá icunanu.

.....

<sup>30</sup>Rü yima chopata rü guma maçpúnewa cuxú chawéxúneäcü tá cunaxü.

.....

#### Ámarearü guchica i bróüchenaxçax

**27** <sup>1</sup>—iRü naxü i wüxi i ámarearü guchicaxú i norú guxúcüwawa wüxigumarexú! Rü taxre ya métru rü 25 centímetru tá nixī i wüxichigü i nacúwawa. Rü mürapewa i acáchianaxçax tá nixī. Rü ngēma norú máchane rü wüxi ya métru rü 25 centímetru tá nixī. <sup>2</sup>Rü ngēma ámarearü guchicaxú, rü guxúma i norú

ãgümücüpexewa rü tá cunachunagüxêxê rü ngêma rü tá naxünewatama cunaxüuchi. Rü bróüchemaxã tá cunatüxüne i guxüwama. <sup>3</sup>Rü guxüma i norü ngêmaxüügü i ngêma âmarearü guchicaxü rü tá bróüchenaxçax nixîgü. Rü ngêma norü tanimacapáüügü rü ngêma norü páragü, rü norü yaxmexüpáüügü, rü ngêma norü choxbüruüügü, rü ngêma naxtaxmüxü rü bróüchenaxçax tá nixîgü.

.....

**Tupanapataarü iãxtüchiga**

<sup>9</sup>Rü yima chopata rü tá cunaxüãxtü. Rü ngêma norü súrcüwawaama rü tá línuchi i mutachinüxümaxã ícunapoxegu. Rü ngêma norü max i ngêma ícupoxeguxü rü 45 ya métru tá nixî. <sup>10</sup>Rü ngêma poxeguxüarü caxtagü rü 20 tá nixî rü bróüchenaxçax tá nixî. Rü ngêma 20 i caxtamaüügü rü ngêgumarüxü tá ta bróüchenaxçax nixî. Rü ngêma línuchitachinügiarü choruüügü rü ngêma naxpaweru i nagu nachoxü rü tá diêrumünaxçax nixîgü. <sup>11</sup>Rü ngêma norü nórtécüwawaama rü tá línuchi i mutachinüxümaxã ícunapoxegu. Rü ngêma ícupoxeguxü rü 45 ya métru tá nixî. Rü yima 20 ya norü caxtagü rü ngêma 20 i caxtamaüügü rü bróüchenaxçax tá nixî. Rü ngêma línuchitachinügiarü choruüügü rü ngêma naxpawerügü i nagu nachoxü rü tá diêrumünaxçax nixîgü. <sup>12</sup>Rü ngêma naãxtüarü tatachinü i oêstecüwawaama üxü rü 22 ya métruarü ngãxü tá nixî i ícunapoxeguxü namaxã i línuchi i mutachinüxü. Rü 10 tá nixî ya norü caxtagü rü naxmaüügü. <sup>13</sup>Rü ngêma

naãxtüarü tatachinü i éstewaama üxü rü ngêgumarüxü ta 22 ya métruarü ngãxü tá nixî i ícupoxeguxü namaxã i línuchi i mutachinüxü. <sup>14</sup>Rü ngêma naãxtüpexewa i norü ücuchicawaama üxü rü ngêma i norü ücuchicaarü wüxicüwawa rü 7 ya métru tá nixî i ícupoxeguxü namaxã i línuchi i mutachinüxü. Rü 3 tá nixî ya norü caxtagü rü naxmaüügü. <sup>15</sup>Rü ngêma ücuchicaarü tociwawa rü ngêgumarüxü ta rü 7 ya métru tá nixî i ícupoxeguxü namaxã i línuchi i mutachinüxü. Rü 3 tá ta nixî ya norü caxtagü rü naxmaüügü. <sup>16</sup>Rü ngêma naãxtüarü iãx rü 9 ya métru naguxü i línuchi i mutachinüxü tá nixî. Rü ngêma iãx rü naxchiru i dauxraacü wêxcharaxü, rü naxchiru i dauxraraxaxü, rü naxchiru i daucharaxünaxçax tá nixî. Rü ngêma rü tá mea penaxümatüchira. Rü 4 tá nixî ya norü caxtagü rü naxmaüügü i ngêma iãx. <sup>17</sup>Rü guxüma i naãxtüarü caxtamaüügü rü bróüchenaxçax tá nixî. Rü ngêma norü caxtagüarü Baal waxächata nagu üxüne rü diêrumünaxçax tá nixî. <sup>18</sup>Rü ngêma naãxtü rü 45 ya métru tá nixî i norü max rü 22 ya métruarü ngãxü tá nixî i norü tatachinü. Rü norü poxeguxü rü 2 ya métru rü 25 centímetru tá nixî i norü máchane, rü línuchi i mutachinüxünaxçax tá nixî. Rü ngêma norü caxtagümaüügü rü bróüchenaxçax tá nixî. <sup>19</sup>Rü guxüma i chopataarü ngêmaxüügü rü bróüchenaxçax tá nixî. Rü ngêma norü poxeguxütüxü nagu ngagüxü, rü naãxtüarü poxeguxütüxü nagu ngagüxü rü tá ta bróüchenaxçax

nixí. <sup>20</sup>iRü namu i ngêma Iraétanüxügü nax orfbuarü chixü cuxütawa nangegüxüçax nax ngêmaäcü guxüguma yanaigüxüçax i chopataarü omügü! <sup>21</sup>Rü nüma ya Aróü rü nanegü tá nixí i nüxna nadaugüxü i ngêma omügü, nax ngêmaäcü guxüma i chütaxü chopexewa nanaigüechaxüçax nawa ya yima chopata. Rü ngêma baú i mugüchíuarü tüyepexewaama tá nixí i inanaigüechaxü i ngêma omügü. Rü ñaa mu rü chanaxwaxe i guxügutáma ngêma Iraétanüxügü rü nataagü naxü.

#### Chacherdótegüchiruchiga

**28** <sup>1</sup>—iRü chorü puracüçax nüxü naxuneta ya cuenexé ya Aróü rü nanegü ya Nadáx, rü Abiú, rü Ereachá, rü Itamá! Rü nümagü tá nixí i chopexewa duüxüguétüwa nachogügüxü. <sup>2</sup>iRü cuenexé ya Aróüaxü naxü i wüxi i naxchiru i taxüechirumaxá wüxigüxü! Rü ngêma naxchiruwa tá nixí i duüxügü nüxü nacuxgüxü nax aixcüma choma chorü puracü i üünexüçax nüxü chaxunetaxü. <sup>3</sup>iRü cuma tümamaxá idexa ya yíxemagü tüxna chanaxâxé i cuax nax guxüraxüxü ítixüxügüxü! Rü yíxemagü tá tixí ya naxügüxe i ngêma naxchiru ya Aróü nax ngêmaäcü choxü napuracüxüçax.  
.....

Ámaregü i wüxichigü i ngunexügu ixâxü

**29** <sup>38</sup>—Rü wüxichigü i ngunexügu rü tá çauxçax cunadai i taxre i carnéruacügü i wüxi ya taunecü nüxü ngêmaxü. Rü ngêma ámarearü

guchicaxüwa tá ícunagu. <sup>39</sup>Rü wüxi tá nixí i paçmama quiguxü rü to rü tá yáuanecü cuyagu. <sup>40</sup>Rü ngêma nüxíra quiguxü i carnéru rü taxre i quíru i arína i mexechixü i orfbuarü chixümaxá aéüxümaxá tá cuyagu. Rü naétü wüxi ya lítru ya bínu naxü cuba. <sup>41</sup>Rü ngêmaäcü tátama cunaxü namaxá i ngêma to i carnéru i yáuanecü quiguxü nax arínamaxá rü orfbuarü chixümaxá rü bínunaxá cuyaguxü. Rü ngêmaäcü tá chauaxégu nayatâxü i ngêma naema. <sup>42</sup>Rü ngêma ámaregü i çauxçax piguxü rü pexacügüwa rü petaagüwa tá naxüe nax guxügutáma çauxçax naxügüaxü i chopataarü íaxarü ngaicamána. Rü choma rü ngêma tá changexma nax cumaxá chidexaxüçax. <sup>43</sup>Rü ngêxma tá nixí i choxü iyangaugüxü i ngêma Iraétanüxügü. Rü ngêma nachica rü tá naxüüne erü ngêma tá changexma. <sup>44</sup>Rü yima chopata rü ngêma naxünaarü guchicaxü rü tá chanaxüünexéxé. Rü ngêxgumarüxü tá ta i nüma ya Aróü rü nanegü rü tá chanaxüünexéxé nax naxügüaxüçax i chorü puracü. <sup>45</sup>Rü choma rü tá natanüwa chamaxü i ngêma Iraétanüxügü, rü norü Tupana tá chixí. <sup>46</sup>Rü ngêmaäcü tá nixí i nüxü nacuxgüxü nax choma chixixü i norü Cori ya Tupana ga Equítuanewa nax íchangüxüxéxü nax natanüwa chamaxüxüçax. Rü choma nixí i norü Cori ya Tupana.

#### Pumáratexearü guchicaxüchiga

**30** <sup>1</sup>—iRü ngêxgumarüxü ta naxü i pumáratexearü guchicaxü nawa i acáchianaxçax i mürapewa! <sup>2</sup>Rü norü maç rü norü tatachinü rü tá

nawüxigumare, rü 45 centímetru tá nixĩ. Rü norü máchane rü 90 centímetru tá nixĩ. Rü ngêma nacüwapexegü i ngêma pumáratexearü guchica rü nawa tátama cunaxüxichigü. <sup>3</sup>Rü naétüwaama rü ngêma norü ágümücü i nacüwawa rü ngêma norü ágümücüpexewa rü úirumaxá tá cunatü. Rü úirumaxá tá ícunaxüáegupechinü —ñanagürü ga Tupana.

.....

**Bachía ya bróúchenaxcaxchiga**

<sup>17</sup>Rü yexguma ga nüma ga Cori ya Tupana rü nayadaxêxê ga Moichémaxã nax yadexaxü, rü ñanagürü nüxü: <sup>18</sup>—iRü naxü ya wüxi ya bachía ya yauxmexüpáú i bróúchenaxcax! Rü ngêma norü üchicaxü rü narüxü bróúchenaxcax tá nixĩ. Rü yima chopata rü ngêma naxünaarü guchicaxüarü ngãxümachatexegu tá cunaxú ya yima bachía. Rü dexámamaxá tá cunaxüácu. <sup>19</sup>Rü nüma ya Aróü rü nanegü rü ngêma tá nixĩ i dexá tá nayauxgüxü nax ngémawa nayauxcutügüxücax rü nayauxmexgüxücax. <sup>20</sup>Rü ngêxguma chopatagu nachocuxgu, rü ngêxguma chauxcax ínaguãxgu i ãmaregü rü tá nügü nayauxcutügü rü nügü nayauxmexgü nax tama nayuexücax —ñanagürü.

.....

**Tupanapataarü meruüarü üruügü**

**31** <sup>1</sup>Rü nüma ga Cori ya Tupana rü Moichémaxã nidexa rü ñanagürü nüxü: <sup>2</sup>—Dücax, rü Yudáataaniwa rü chanayaxu ya Becharé ya Úri nane ya Úrutaxa ixícü.

<sup>3-5</sup>Rü marü nüxna chanaxã i Chauãxê i Üünexü, rü nüxna chanaxã i cuax nax paxama nüxü nacuáxücax i taxacüarü ü, rü nüxü natauxchaxücax nax guxüraxüxü i meruügü naxüxü i úiruwa, rü diërumüwa, rü bróúchewa, rü naiwa. Rü nüxna chanaxã i cuax nax nüxü nacuáxücax nax nuta ya ngaxãeruxü nangoraxêãxücax rü chacherdótegüchiruwa nañauxcuãxü rü guxüma i meruügü naxüxücax. <sup>6</sup>Rü ngêxgumarüxü ta nüxü chaxuneta ya Becharéarü ngüxêeruxü ya Aoriáx ya Ichamá nane, ya Dáütanüxü ixícü. Rü guxüma i ngêma yatügü i nüxü icuaxüchigüxü rü yexeraãcü cuax nüxna chaxã nax naxügüaxücax i guxüma i ngêma cuxü chamuxü nax cunaxüxü. ....

**Ngüchigaarü ngunexüchiga**

<sup>12</sup>Rü yexguma ga nüma ga Cori ya Tupana rü nayadaxêxê ga Moichémaxã nax yadexaxü, rü ñanagürü nüxü: <sup>13</sup>—iRü namaxã nüxü ixu i ngêma Iraétanüxügü rü ñacurügü tá nüxü! “Rü name nixĩ i nagu perüngügü i ngêma ngunexü i chauxcax ípexüxüchixü. Erü ngêma nixĩ i guxügütáma tóru cuaxruxü i yigümaxã ixüxü nax ngémaãcü guxüma nüxü nacuáxücax nax choma pexü chadexü. <sup>14</sup>Rü ngêma ngüchigaarü ngunexü rü nachuxu nax nagu pepuracüexü, rü ngémaçax penaxwaxe i mea penaxaure. Rü yíxema tama naxaurexe i ngêma ngunexü rü tá tayu. Rü yíxema ngüchigaarü ngunexügu puracüxe rü name nixĩ noxtacüma petanüwa tüxü ipeyarüxoxêxê. <sup>15</sup>Rü marü name i 6 i ngunexü pepuracüe,

natürü ngēma norü 7 i ngunexũgu rü nagu tá iperüngũgü rü çauxçax tá ípenaxüchi. Rü texé ngēma ngunexũgu puracũxe rü tá tayu. <sup>16</sup>Rü ngēmacax i pema i Iraétanüxũgü rü penaxwaxe nax penaxaurexũ i ngēma ngũchigaarü ngunexũ erü ngēma nixĩ i chorü üga i guxũgutáma nüxna pecuaxächixü. <sup>17</sup>Rü ngēma ngunexũ nixĩ i guxũgutáma tórü cuaxruxũ i yigümamaxã ixüxũ i pema i Iraétanüxũgü rü chomax. Yerü choma ya perü Cori ya Tupana rü 6 ga ngunexũgu chayanguxēxē ga nax chanaxüxü ga daxüguxü i naane rü ñoma i naane. Rrü yema norü 7 ga ngunexũgu rü nüxũ charüchau ga nax chapuracüxü, rü icharüngü” —ñanagürü ga Tupana.

#### Nutatachinügu i Tupanaarü mugü nagu ümatüxũchiga

<sup>18</sup>Rrü yexguma Cori ya Tupana nüxũ rüchaxgu ga Moichémaxã nax yadexaxü ga maxpúne ga Chinaíwa, rü nüxna nanaxã ga taxre ga nutatachinügu ga nümatama ga Tupana naxmexmaxã norü mugü nagu naxümatüxü.

#### Úirunaxçax i wocaxacüchiga

**32** <sup>1</sup>Rrü yexguma tama paxa ínaxixgu ga Moiché ga guma maxpúnewa, rü yema Iraétanüxũgü rü Aróuçax naxĩ rü ñanagürügü nüxü: —Tanaxwaxe i toxũ cunaxü i wüxi i naxchicünaxã nax namaxã tatupanaáxüçax erü tama nüxü tacuax nax taxacü nüxü ngupetüxü i ngēma Moiché ga Equítuanewa toxü ígaxüxü —ñanagürügü. <sup>2</sup>Rrü nüma ga Aróü

nanangãxũ rü ñanagürü: —iËcü pexmaxgüna rü pexacügüna penade i ngēma naxmachinügu i úirunaxçax, rü nua chauxütawa penana! <sup>3</sup>Rrü guxüma ga yema ngexũgü rü ínanachoxü ga naxmachinügu ga úirunaxçax rü Aróüxütawa nanana. <sup>4</sup>Rrü nüma ga Aróü rü nananutaquexe rü nanadexēxē ga yema naxmachinügu ga úirunaxçax. Rrü yemawa purumúmaxã nanaxüchi ga wüxi ga wocaxacüchicünaxã. Rrü guxüma ga duüxũgü rü tagaãcü ñanagürügü: —Pa Iraétanüxũgüx, rü daa nixĩ ya curü tupana ga Equítuanewa cuxü ínguxuchixēcü —ñanagürügü. <sup>5</sup>Rrü yexguma yemaxü nadauxgu ga Aróü, rü nanaxü ga wüxi ga naxünaarü guchicaxü naxütagu ga yema wocaxacüchicünaxã. Rrü ñuxüchi tagaãcü ñanagürü: —Moxü tá Cori ya Tupanaégagu tataãxégü —ñanagürü. <sup>6</sup>Rrü moxüãcü ga paçmama rü ínarüdagü rü Tupanaçax nanadai rü ínanagu ga carnérugü nax yemaacü Tupanapexewa nügu yamexēgüxüçax. Rrü yemawena ga duüxũgü rü ínarütogü nax nachibüexüçax rü naxaxegüxüçax, rü ñuxüchi inachigü ga nax nataãxēgüxüçax. <sup>7</sup>Rrü yexguma ga Cori ya Tupana rü Moichéxü ñanagürü: —iËcü, íruxĩ rü natáegu! Erü ngēma curü duüxũgü ga Equítuanewa ícunguxüxēxü rü marü chixexügu nügu nayixēxē. <sup>8</sup>Rrü paxama nüxü inarüngümae ga yema namaxã nüxü chixuxü nax nagu naxixüçax. Rrü nügüçax nanaxügu i wüxi i wocaxacüchicünaxã i úiru i dexexüwa, rü ñuxma rü nüxü ínicuaxüxügü rü naxçax nanadai rü ínanagu i naxünagü,

rü nügümaxã ñanagürügü: “Pa Iraétanüxügüx, daa nixí ya curü tupana ya Equítuanewa cuxü ínguxuchixëécü”, ñanagürügü —ñanagürü ga Tupana. <sup>9</sup>Rü ñanagürü ta ga Cori ya Tupana Moichéxü: —Rü meama chanangugü i ñaa duüxügü rü nüxü chicuaxãchi nax tama inaxínüechaüxü. <sup>10</sup>Rü ñuxma rü tama chanaxwaxe i choxna cuchogü erü poraãcü chanuxüchi namaxã i ngëma duüxügü rü noxtacüma tá ichayanaxoxëxë. Natürü cuwa tá chanangoxëxë i wüxi i nachixüane i poraxü —ñanagürü. <sup>11</sup>Natürü nüma ga Moiché rü ñaa dexamaxã Cori ya Tupanaxü narüngüxmüxëéchaü: —Pa Corix òtüxcüü poraãcü namaxã cunu i ngëma curü duüxügü ga cumatama curü poramaxã ícunguxüxëxü ga Equítuanewa? <sup>12</sup>¿Rü ñuxáãcü icunaxüchicaxü i ngëma Equítuanecüãxgü nax chixri cuchiga yadexagüxüçax rü ñagüxü: “Rü Tupana rü Equítuanewa ínananguxüxëxë i Iraétanüxügü nax maxpúneanegu nadaiaxüçax rü iyanaxoxëéãxüçax i ñoma i naanewa”, ñanagürügü tá? ¡Rü ngëmacax taxü i cunuxü, rü nagu curüxínüxü i norü chixexü i ngëma curü duüxügü! <sup>13</sup>¡Rü nüxna nacuaxãchi ya yimá curü duü ya Abraáü, rü Ichaá, rü Iraé ga Acóbugu äégacü! Rü gumagümaxã nixí ga cugüéagutama cunaxueguxü nax nüxü curüngüxëxë rü ñacuxü: “Rü tá nüxü charüngüxëxë i cutaagü rü tá namuxüchi ëxtagürüxü, rü guxüma i ñaa naane i pemaxã chaxueguxü rü tá pexrü nixí i guxügutáma”, ñacuxü —ñanagürü ga Moiché. <sup>14</sup>Rü nüma ga Cori ya Tupana

rü ínayachaxãchi nawa ga yema poxcu ga norü duüxügümaxã naxüxchaüxü. <sup>15</sup>Rü yemawena ga Moiché rü guma maxpúnewa ínarüxí namaxã ga yema taxre ga nutatachinü ga norü guxütachinüwa amatüxü namaxã ga Tupanaarü mugü. <sup>16</sup>Rü nümatama ga Tupana nixí ga naxüãxü ga yema taxre ga nutatachinü, rü naxümatüãxü namaxã ga yema norü mugü. <sup>17</sup>Rü guma Yochué ga Moichémücü ga namaxã maxpúnegu naxínagücü, rü yexguma duüxügüxü naxínügu ga nax íyaxáixchaü, rü Moichéxü ñanagürü: —Nüxü chaxínü i duüxügü ícuxcuxü rü ñoma nügü nadaixürüxü íxígüxü i ngëma ínapegüxüwa —ñanagürü. <sup>18</sup>Natürü nüma ga Moiché rü nanangãxü rü ñanagürü: —Ngëma wiyaegü i nagu nawiyaegüxü, rü tama ngëma nax naporamaegüxüçax nixí, rü tama ngëma nax naturamaegüxüarü wiyaé nixí. Natürü tomare i wiyaé nixí i ngëma nüxü chaxínüxü —ñanagürü. <sup>19</sup>Rü yexguma nüma ga Moiché yema ínapegüxüwa nanguxgu, rü nüxü nadau ga yema wocaxacüchicünaxã, rü nüxü nadau ga nax ínapetaegüxü rü íyaxüächitanüxü ga duüxügü. Rü yemaçax nanuxüchi ga Moiché rü norü numaxã inayachix ga yema taxre ga nutatachinü ga Tupanaarü mugü nagu ümatüxü. Rü maxpúnepechinügu nawoonetüchimare. <sup>20</sup>Rü ñuxüchi nüma ga Moiché rü nanayaxu ga yema wocaxacüchicünaxã rü üxüxetüwa nayataxcuchi. Rü yemawena ga marü yagauxgu rü nanawaxi rü ñuxmata naxãtexemare. Rü yema natëxe rü dexáwa nanagüe rü ñuxüchi yema

Iraétanüxügüxü namu nax yema dexáwa naxaxegüxüçax. <sup>21</sup>Rü Aróúxü ñanagürü: —¿Taxacü cumaxã naxü i ñaa duüxügü rü ngëmacax i ñaa taxü i chixexügu cunayixëxü? —ñanagürü nüxü. <sup>22</sup>Rü nüma ga Aróú rü Moichéxü nangãxü rü ñanagürü: —Pa Chorü Corix itaxú i chomaxã cunuxü! Cuma rü meama nüxü cucuçax i ñaa duüxügü nax norü me yixixü nax chixexü naxügüxü. <sup>23</sup>Rü nümagü ga duüxügü rü ñanagürügü choxü: “iËcü wüxi i naxchicünaxã toxü naxü nax namaxã tatupanaãxüçax, erü tama nüxü tacuçax nax taxacü nüxü üpetüxü i ngëma Moiché ga Equítuanewa toxü ígaxüxü!” ñanagürügü choxü. <sup>24</sup>Rü yexguma ga choma rü chanangãxü, rü ñachagürü: “Rü yíxema tüxü nangexmaxe i úiru rü ëcü ítanaxüchixjx”, ñachagürü. Rü nümagü rü choxna nanaxãgü ga norü úirugü, rü choma rü chayagu. Rü yemawa nixí ga ínanguxuchixü ga ñaa wocaxacüchicünaxã —ñanagürü. <sup>25</sup>Rü nüma ga Moiché nüxü nadau ga yema duüxügü ga marü nax nangupetüxüchixü ga naxünearü ngúchaü ga chixexü nax naxügüxü, rü yemaacü norü uanüaxü nanatauxchaxëxë nax nüxü nacugüexü, yerü ga Aróú rü tama aixcüma mea nüxna nadau. <sup>26</sup>Rü yexguma ga Moiché rü ínapegüxüarü ücuchicagu nachi rü ñanagürü: —iYíxema Tupanawaama ügüxe rü nua chauxütawa taxí! —ñanagürü. Rü guxüma ga Lebítanüxü naxütawa naxí. <sup>27</sup>Rü yexguma ga Moiché rü yema Lebítanüxüxü ñanagürü: —Tóru Cori ya Tupana rü ñanagürü pexü: “iËcü wüxichigü i

pemax rü penayaxu i perü tara, rü ngëma duüxügü i noxrütama ngúchaü i chixexü ügüxüxütawa pexí wüxichigü ya íwa rü penadai i ngëma duüxügü woo peeneegü yixígu rüexna pemücügü yixígu rüexna perü ngaicamagu pegüxü yixígu!” —ñanagürü. <sup>28</sup>Rü yema Lebítanüxü rü nayanguxëëgü ga yema Moiché namaxã nüxü ixuxü, rü yema ngunexügu rü nayue ga 3,000 ga yatügü. <sup>29</sup>Rü yexguma ga Moiché rü ñanagürü: —Ñuxmawaxi nixí i aixcüma Tupanaga pexínüexü, erü penaxü nax penadaixü i woo penegü rü peeneegü. Rü ñuxma i nüma ya Tupana rü mexü tá pemaxã naxuegu —ñanagürü. <sup>30</sup>Rü moxüácü ga Moiché rü duüxügüxü ñanagürü: —Pema rü poraäcü chixexü pexügü. Rü ñuxma rü tá wena daxü chaxí nawa ya yima maxpúne ya Tupana nawa ngexmane nax nüxna chayacaxüçax rü marü pexü nüxü iyanangüma i ngëma chixexü i pexüxü —ñanagürü. <sup>31</sup>Rü yemacax ga Moiché rü wena daxü naxí nawa ga guma maxpúne ga Tupana nawa yexmane. Rü Tupanaxü ñanagürü: —Aixcümaxüchi i ngëma duüxügü rü poraäcüxüchi chixexü naxügü erü nügüçax nanaxügü i wüxi i naxchicünaxã i úirunaxçax nax namaxã natupanaãxgüxüçax. <sup>32</sup>Rü ngëmacax cuxna chaca rü cuxü chachixewe nax nüxü nüxü cuyarüngümaxüçax i ngëma norü chixexü. Natürü ngëxguma tama nüxü nüxü icuyarüngümagux irü noxtacüma ínapí i ngëma chauéga nawa i curü popera i nagu cuxümatüxü! —ñanagürü. <sup>33</sup>Natürü nüma ga Cori ya Tupana rü nanangãxü rü ñanagürü: —Yíxema tama

chauga ññuxexicatama tá tixí ya tüxü  
íchapiégaxe nawa i ngéma chorü popera  
—ñanagürü.

.....

**Cori ya Tupana rü Moichéxü  
nanawex i norü mexü**

**33** <sup>12</sup>Rü nüma ga Moiché rü Cori  
ya Tupanaxü ñanagürü:  
—Dücax, cuma choxü cumu nax ñaa  
duüxügümaxá ichacuáxüçax, natürü  
tama chomaxá nüxü quixu nax texé tá  
chowe tüxü curümuxü nax chomücü  
tixüçax. Rü ngëxgumarüxü ta  
chomaxá nüxü quixu nax choxü  
cuyaxöxü rü ngëmacax chomaxá  
cutaãxê. <sup>13</sup>Rü ngëxguma chi aixcüma  
yixixgux i ngéma irü choxü nüxü  
nacuaxêxê i ngéma nagu curüxññüxü,  
nax ngëmaãcü cuxü chayaxöxüçax, rü  
ngëmaãcü taguma iyanaxoxüçax nax  
chomaxá cutaãxêxü! iRü nagu rüxññü rü  
cuxrü nax yixixü i ñaa duüxügü!  
—ñanagürü. <sup>14</sup>Rü yexguma ga Tupana  
rü Moichéxü nangäxü rü ñanagürü:  
—Choma tátama cuxü chaxümücü, rü tá  
cuxü charüngüxêxê —ñanagürü.  
<sup>15</sup>Natürü nüma ga Moiché rü nanangäxü  
rü ñanagürü: —Ngëxguma cuma tama  
toxü íquixümücügux, rü itaxü i toxü  
ícuchoxüxêxê i nua! <sup>16</sup>Erü ngëxguma  
cuma tama toxü íquixümücügux çrü  
ññuxääcü tá nüxü tacuax nax cuma rü  
tomaxá cutaãxêxü? Natürü ngëxguma  
toxü íquixümücügux rü choma rü ñaa  
curü duüxügü rü aixcüma tá nüxü  
tacuax nax cupexewa tama ngéma togü  
i ñoma i naanecüçxññüxü tixigüxü  
—ñanagürü. <sup>17</sup>Rü yexguma ga Cori ya  
Tupana rü nanangäxü rü ñanagürü:

—Ngéma ññuxma nüxü quixuxü rü tá  
chanaxü, erü cugu chayaxö rü marü  
cumaxá chataãxê. Rü aixcüma nixí i  
ngéma cumaxá nüxü chixuxü  
—ñanagürü ga Cori ya Tupana. <sup>18</sup>Rü  
yexguma ga Moiché rü Tupanaxü  
nacuaxü rü ñanagürü: —Pa Corix,  
chanaxwaxe i choxü cugü cuwex nax  
nüxü chadauxüçax i ngéma curü mexü  
—ñanagürü. <sup>19</sup>Natürü nüma ga Cori ya  
Tupana rü Moichéxü nangäxü rü  
ñanagürü: —Ññuxma rü tá cuxü  
chanawex nax ññuxcü  
chamecümäxüchixü rü cupexewa tá  
chaugü chixu. Rü choma rü tá choxü  
tangechaütümüxügü ya yixema  
woetama chatümawaxexe. Rü tá tüxü  
charüngüxêxê ya yixema woetama tüxü  
charüngüxêxêchaüxe. <sup>20</sup>Natürü cumaxá  
nüxü chixu rü taxucürüwatama  
chauchiwe cudau, rü yixema chauchiwe  
dáuxe rü taxucürüwama tamaxü  
—ñanagürü. <sup>21</sup>Rü ñanagürü ta ga  
Tupana: —Dücax, nua chauxütawa  
nangexma ya wüxi ya nuta. iRü êcü  
yima nutaétügu nachinagü! <sup>22</sup>Rü  
ngëxguma ngéma chaxüpetüxgux, rü  
yima nutaarü äxmaxügu tá cuxü  
chimucuchi. Rü choxmexmaxá tá cuxü  
charütütaxü ññuxmatáta changupetü.  
<sup>23</sup>Rü ngëmawena rü tá chixügachi nax  
chaxüçaxwexü cüdauxüçax. Natürü  
chauchiwe rü taxucürüwama nüxü  
cudau —ñanagürü.

**Ngexwacaxüxü i nutatachinügü i  
Tupanaarü mugü nagu ümatüxü**

**34** <sup>1</sup>Rü nüma ga Cori ya Tupana  
rü Moichéxü ñanagürü: —iËcü,  
cumatama naxü i taxre i nutatachinügü



i ngēma nanoxriraxūxūutama, nax ngēmagu chanaxūmatūxūcax i ngēma chorū mugū ga yema quipuexēēxūgu chaxūmatūxū! <sup>2</sup>iRū ngēxgumarūxū ta cugū namexēxē nax moxū paxmama daxū cuxūcax nawa ya daa maxpūne ya Chinaí! iRū ngēma yexeraācū ínachuchitaeruūwa naxū nax ngēma chopexewa cungemaxūcax! <sup>3</sup>iRū taxúetáma cuwe daxū taxí! Rū tama chanaxwaxe nax texé nūxna ngaicamaxū ya daa maxpūne, rū woo carnérugū, rū woo wocagū rū tama chanaxwaxe nax norū ngaicamána maxē nangōxgūaxū —ñanagürü ga Tupana. <sup>4</sup>Rū nūma ga Moiché rū nanaxū ga yema taxre ga nutatachinügū. Rū moxūācū paxmama rū nanade ga yema taxre ga nutatachinügū rū namaxā daxū naxí nawa ga guma maxpūne ga Chinaí, yema Cori ya Tupana namaxā nūxū ixuxūrūxū. <sup>5</sup>Rū nūma ga Cori ya Tupana rū wūxi ga caixanexūgu ínartūxí rū Moichémaxā yéma nayexma, rū naégaxū nixu. <sup>6</sup>Rū Moichépexewa naxūpetū rū tagaācū ñanagürü: —Chomax rū Cori chixí. Chomax rū Cori chixí. Rū choma nixí ya Tupana ya mecūmaxūchicū, rū ngechaūwaxecū, rū yaxna ñnūwaxecū, rū aixcūma tūxū ngechaūcū rū aixcūmaxū ixucū chixíxū i chomax. <sup>7</sup>Rū choma rū guxūguma tūxū changechaū rū tūxū nūxū ichayarūngūma ya tūmaarū pecádu rū tūmaarū chixexū ya yíxema aixcūma chauga ñnūexe. Natürü taxútáma tūxū chaxūpetūmare ya yíxema chixexū ügūxe. Rū tá tūxū chapoxcue ñuxmata tūmanegūwa rū tūmataagūwa nangu —ñanagürü. <sup>8</sup>Rū yemacax ga Moiché rū

yexma ñaxtūanegu nanangücuchi rū Tupanaxū nicuaxūxū. <sup>9</sup>Rū ñanagürü: —iPa Corix, Pa Corix, rū ngēxguma aixcūma yixíxgu nax chomaxā cutaāxēxū rū ēcū toxū íxūmücū! Rū aixcūma nixí i taxūegama naxīnūechaūxū i ñaa duūxūgū. iNatürü toxū nūxū nangechaū i torū pecádugū rū chixexūgū, rū toxū nade nax curū duūxūgū tixīgūxūcax! —ñanagürü. ....

### Moiché rū nanaxūmatū ga Tupanaarū mugū

<sup>28</sup>Rū nūma ga Moiché rū 40 ga ngunexū rū 40 ga chūtāxū Corimaxā nayexma ga guma maxpūnewa. Rū taguma nachibū rū taguma naxaxe. Rū yexguma nixí ga Moiché naxūmatūxū ga yema 10 ga Tupanaarū mugū nagu ga yema nutatachinügū. <sup>29</sup>Rū yemawena ga Moiché rū guma maxpūne ga Chinaíwa ínartūxí namaxā ga yema taxre ga nutatachinügū ga Tupanaarū mugū nagu ūmatūxū. Natürü yexguma ínaxíxgu, rū tama nūgū nacuax ga nax bexma yayauxrachametūcūxūxū yema nax Tupanaxā yadexaxūcax. <sup>30</sup>Rū yexguma ga Aróū rū guxūma ga Iraétanūxūgū nūxū daugūga ga Moiché ga nax yayauxrachametūcūxūxū, rū namuūe, rū tama nūxna nangaicamagūchaū. <sup>31</sup>Natürü nūma ga Moiché rū naxcax naca. Rū nūma ga Aróū rū guxūma ga yema duūxūgūarū āēxgacūgū rū Moichécax naxí. Rū nūma rū namaxā nidexa. <sup>32</sup>Rū yemawena rū guxūma ga Iraétanūxūgū rū Moichécax naxí. Rū nūma ga Moiché rū namaxā nūxū nixu ga yema mugū ga Cori ya

Tupana namaxã nüxũ ixuxũ ga maꝑúne ga Chinaíwa. <sup>33</sup>Rü yexguma marũ nüxũ nachauxgu nax duũxũgũmaxã yadexaxũ, rü nügũ natüchametü. <sup>34</sup>Rü yexguma Tupanamaxã yadexaxũgu ga Moiché rü nügũ ínangegüchametü rü yemaacü namaxã nidexa ñuxmata ínaxũxũ. Rü ñuxũchi yema Iraétanüxũgũmaxã nüxũ nixu ga yema mugü ga Tupanaxũtawa nayaxuxũ. <sup>35</sup>Rü yexguma yema Iraétanüxũgũ nüxũ daugügu ga nax yayaꝑrachametücüxũxũ, rü nüma ga Moiché rü nügũ natüchametü. Rü yemaacü nügũ nixĩxëxë ñuxmata wena Tupanamaxã yanadexa.

.....

#### Ămaregü i Tupanapatacaꝑ ixĩxũ

**35** <sup>4</sup>Rü nüma ga Moiché rü guxũma ga Iraétanüxũgũmaxã nüxũ nixu rü ñanagürü: —Ñaa nixĩ i ngëma Tupana tüxũ muxũ nax naxüxũcaꝑ. <sup>5</sup>iRü êcü pegüitanüwa penade i âmaregü i Cori ya Tupanacaꝑ ixĩxũ! Rü guxãma ya yíxema inaxãgũxe rü name nixĩ i tümaarü ngúchaũmaxã itanaxãgü. iRü nua penana i úiru, rü diêrumü rü bróũche, <sup>6</sup>rü naxchirugü i weꝑracharaãcü yáuxũ, rü naxchiru i dauxũ i weꝑracharaxũ, rü naxchiru i dauxcharaxũ, rü naxchiru i línuchi i mexechixũnaxcaꝑ, rü cábrataꝑagü, <sup>7</sup>rü carnéruchaxmüxũgü i dauxũmaxã ichagüxũ, rü togü i naxchaxmüxũ i mexechixũ, rü mürapewagü i acáchianaxcaꝑ, <sup>8</sup>rü chíxũ i omüxũwa mexũ, rü pumára i chíxũéũ i chacherdóte chorü puracütanüxũeru namaxã rüngógüxũ, rü pumáratexe i

guwa mexũ, <sup>9</sup>rü nutagü ya cornalína naxcaꝑ, rü naigü ya nutagü ya ngaxãêruxũ nax chacherdótegüaru äêxgacüaru türemüchiruarü meruxũ yixĩxũcaꝑ! —ñanagürü ga Moiché.

.....

#### Duũxũgüaru âmaregü rü ínaxüxũchi

**36** <sup>1</sup>Rü nüma ga Moiché rü ñanagürü: —Ñuxma nax mea yanguxũcaꝑ ya yima Tupanapata rü norü ngëmaxũgü, rü pema i Becharé rü Aoriáx tá nixĩ i ngëma puracũmaxã ipecuáxũ. Rü guxãma ya texé ya tüxũ natauxchaxe nax taxacürü ngëmaxũgüaru üxũ cuáxe rü guxãma ya texé ya Tupana ngëma puracücaꝑ cuax tüxna äxë, rü yíxema tá tixĩ ya pexũ rüngũxëêgũxe i norü üwa —ñanagürü. <sup>2</sup>Rü nüma ga Moiché rü naxcaꝑ naca ga Becharé rü Aoriáx, rü guxãma ga guxema tüxũ natauxchaxe nax taxacürü ngëmaxũgüaru üxũ cuáxe. Rü guxãma ga guxema Tupana yema puracücaꝑ cuax tüxna äxë rü tümaarü ngúchaũmaxã tügü tixu. <sup>3</sup>Rü nümagü ga yema puracütanüxũ rü Moichéxũtawa nanayauxgü ga yema yemaxũgü ga Iraétanüxũgü ixãgüxũ nax naxüguaxũcaꝑ ga guma Tupanapata rü norü yemaxũgü. Rü nüma ga Iraétanüxũgü rü guxũma ga ngunexũgu norü ngúchaũmaxã yema puracütanüxũna nayaxãgüxũ ga norü âmaregü. <sup>4</sup>Rü nümagü ga yema puracütanüxũ ga guma Tupanapata ügüxũ rü ínayachaxãchitanü ga nax napuracüexũ. <sup>5</sup>Rü Moichémaxã nüxũ nayarüxugüe rü ñanagürügü: —Ngëma duũxũgü rü marü nanangupetüxëxũchi

nax toxūtawa nanaaxũ i norũ ãmaregũ naxçax ya yima Tupanapataarũ puracũ ga Cori ya Tupana nagu unetaxũ —ñanagũrũgũ. <sup>6-7</sup>Rũ yexguma ga Moiché rũ duũxũgũxūtawa namuga nax marũ yanguxũ ga ãmaregũ, rũ yemaçax marũ tama nanaxwaxe nax inaxãgũãxũ ga norũ ãmaregũ ga iyatũxũ rũ ngexũgũ naxçax ga guma Tupanapata. Rũ yemaacũ duũxũgũxũ ñayachaxãchitanũxẽxẽ ga Moiché yerũ yema ãmaregũ rũ meama ningu ñuxmata ñaxũxũchimare.

.....

**39** <sup>42</sup>Rũ nũma ga Iraétanũxũgũ rũ nanaxũgũ ga guxũma ga yema Cori ya Tupana Moichéxũ muxũrũxũ. <sup>43</sup>Rũ yexguma Moiché nũxũ dauxgu ga nax meama yanguxẽẽgũãxũ ga yema Tupana nũxũ ixuxũ, rũ duũxũgũmaxã mexũ naxuegu.

.....

#### Moiché nanaxũ ga Tupanapata

**40** <sup>17</sup>Rũ yexguma marũ taxre ga taunecũwa yachocuxgux nawena ga Equítuanewa nax ñachoxũxũ, rũ guma nũxĩraxũcũ ga tauemaciãrũ ügũgu, rũ yexguma nixĩ ga naxũgũãxũ ga guma Tupanapata. <sup>18</sup>Rũ nũmatama ga Moiché nixĩ ga naxũãxũ ga guma Tupanapata, rũ ñanãnuãxũ ga natapũxmaũpara. Rũ yemawa nixĩ ga nangucuãxũ ga natapũxarũ caxtaparagũ. Rũ yemaétũwa nananucu ga norũ wãxchataxũ. Rũ yemawena nananucu ga guma norũ caxtagũ ga ngãxũwa ügũne. <sup>19</sup>Rũ ñuxũchi nanatũétũ ga guma Tupanapata namaxã ga yema

aixepewaama üxũ ga naãxũ. Rũ yemaétũgu nanatũ ga yema dũxétũwaama üxũ ga naaxũ yema Cori ya Tupana namaxã nũxũ ixuxũãcũ. <sup>20-21</sup>Rũ yemawena ga Moiché rũ nanade ga yema taxre ga nutatachinũgũ ga Tupanaarũ mugũ nagu ñmatũxũ rũ yema baũgu nayanũcu. Rũ ñuxũchi nanawexcupaweru rũ nayaxũcuchi ga naxãtaxũ rũ Tupanapataarũ aixepegu nayaxũ. Rũ ñuxũchi nayatũyepexe rũ yemamaxã nayadũxũ ga yema baũ yema Cori ya Tupana namaxã nũxũ ixuxũãcũ. <sup>22</sup>Rũ yema mecha ga paũarũ nuruxũ rũ Tupanapatagu nayaxũcuchi norũ tũgũnecũwaguama ga norũ tũyemachiãarũ dũxétũwaama. <sup>23</sup>Rũ yema mechaétũgu Tupanapexegu meama nayanuma ga paũ yema Cori ya Tupana nũxũ ixuxũãcũma. <sup>24</sup>Rũ yema omũ ga úirunaxçax rũ ta yema Tupanapatagu nayaxũcuchi norũ toxoxwecũwagu ga mecharũ toxmaxtawã. <sup>25</sup>Rũ Cori ya Tupanapexewa nananaigũxẽxẽ ga yema omũ yema Cori ya Tupana namaxã nũxũ ixuxũãcũ. <sup>26</sup>Rũ yema úirunaxçax ga pumãratexearũ guchicaxũ rũ tũyemachiãpexegu nanaxũ ga guma Tupanapatawa. <sup>27</sup>Rũ yemawa nayagu ga pumãratexẽ ga yixixũ yema Cori ya Tupana namaxã nũxũ ixuxũãcũ. <sup>28</sup>Rũ yemawena ga Moiché rũ nanatũemũ ga guma Tupanapataarũ tũxãxũ. <sup>29</sup>Rũ ñuxũchi yema naxũnagũarũ guchicaxũ ga Tupanaarũ ãmaregũ nawa íguxũ rũ guma Tupanapatapexeguama nayaxũ. Rũ yema Tupanaçax ñanãgu ga naxũnagũ rũ trígutẽxe ga mexechixũ, yema Cori ya Tupana namaxã nũxũ

ixuxũãcüma. <sup>30</sup>Rü yemawena ga Moiché rü guma Tupanapata rü ãmaregüarü ngãxũmachatexegu nayaxú ga guma bachía ga yaxmexúpáxũ. Rü dexámaxã nanaxüäcu yaxmexüruxũ.

<sup>31</sup>Rü yema bachíawa nixí ga dexá nayauxügüxũ ga Moiché rü Aróũ rü nanegü nax yemawa nügü yayauxmexgüxũcax rü nügü yayauxgücutüxũcax. <sup>32</sup>Rü nügü nayauxmexgü rü nügü nayauxcutügü ga yexguma Tupanapatagu nachoxcuxgux rü yexguma ãmaregüarü guchicaxũna nangaicamagügu, yerü yemaacü nixí ga Cori ya Tupana ga Moichémaxã nüxũ yaxuxũ. <sup>33</sup>Rü yemawena ga Moiché rü ínanapoegu ga yema naaxtü ga guma Tupanapata rü yema ãmaregüarü

guchicaxũ. Rü ñuxũchi nayaxücuchi ga naaxarü türuxũ. Rü yemagu nixí ga yacuáxũ ga yema puracü.

**Yema caixanexũ rü  
Tupanapataétügu ínarüxí**

<sup>34</sup>Rü yexguma Moiché yanguxẽëgu ga guma Tupanapata rü yema caixanexũ ga noxri Iraétanüxũgüpehexegu íxũchigüxũ, rü guma Tupanapataétügu ínarüxí, rü Tupanaarü ngóonexũmaxã nanapá.

<sup>35</sup>Rü nüma ga Moiché rü taxucürüwama yexma naxücu yerü yema caixanexũ rü Tupanapatagu ínarüxí rü norü ngóonexũmaxã nanapá ga guma Tupanapata.

.....

# LEVÍTICO

## (Lebítanüxüarü puracüchiga)

### Āmaregüarü guchicaxüchiga

**1** <sup>1</sup>Rü nüma ga Cori ya Tupana rü napatawa Moichéçax naca, rü ñanagürü nüxü: <sup>2</sup>—İĒcü namaxā nüxü ixu i ngēma Iraétanüxügü rü ngëxguma texé āmare choxna āxgu rü name nixī i tümaarütama wocagüwa rüçxna tümaarütama carnérugüwa choxna tanamu! <sup>3</sup>Rü ngēma tümaarü āmare i tümaxünatama ixixü rü woca iyatüxü i taxuwama chixexü tá nixī. Rü ngēma nax tüxü namaxā chataāxëxüçax rü chopataāxtüwa ngëxmaxü i guchicaxüwa tá nixī i itayaguxü. <sup>4</sup>Rü naerugu tá nixī i taxúmëxü nax tüxü chanayaxuxüçax i ngēma tümaarü āmare, rü tüxü nüxü icharüngümamaxüçax i tümaarü chixexügü. <sup>5</sup>Rü ngēma woca i yatüxü rü chopëxegu tá nixī i tayawiyenaaxü. Rü ngēma Aróü nanegü i chacherdótegü tá nixī i choxna naxuaxügüxü ya yimá nagü. Rü ngēma chopataarü iāxtüwa ngëxmaxü i guchicaxü rü yimá nagümaxā tá nanamaçcuétü rü tá inanamaçcuegu. <sup>6</sup>Rü yimá chacherdóte ya çauççax yagücü i ngēma āmare rü tá

nanacauxçaxmüxü i ngēma naxüna rü tá nanachexügü. <sup>7</sup>Rü ngēma chacherdótegü tá nixī i yanaixëëgüxü ya üxü nawa i ngēma guchicaxü. <sup>8</sup>Rü yima üxüwa tá nixī i ínaguxü i ngēma naxünaarü chexügüxü rü naeru rü ngēma naünütaarü chíxü. <sup>9</sup>Rü yíxema çauççax ínaguxe i ngēma namachi rü name nixī i meama dexámaxā tayayauxgüxü i naünüta rü naparagü. Rü nüma ya chacherdóte rü ngēma guchicaxüwa tá ínanagu i guxüma nax choma namaxā chataāxëxüçax i ngēma naema i ngēma āmare —ñanagürü ga Cori ya Tupana.

.....

### Chixexügüarü ütänüruxü i āmaregü

**6** <sup>1</sup>Rü nüma ga Cori ya Tupana rü Moichémaxā nidexa rü ñanagürü nüxü: <sup>2</sup>—Ngëxguma texé chopëxewa chixexü üxgux rü wüxi i taxewa tümamücüxü tawomüxëëxgux, rüçxna wüxi i diëru i tümamücü tüxü namaxā nguxüxëëxüçax tümamücüxü tawomüxëëxgux, rü chixexü taxü. Rü ngëxgumarüxü ta ega texé tümamücüxütawa taxacüçax tangixgu,

rüexna taxacüçax tüxü tachixewegu nax tüxna tanaxäxüçax rü ñüxüchi tama tanatáeguxêegu, rü chixexü taxü. <sup>3</sup>Rü ngëxgumarüxü ta ega texé wüxi i toxguaxarü ngëmaxü i iyarütaxuxü itayangauxgux rü itayacuxgu rü ñüxüchi nüxü tixuxgu nax tama nüxü itayangauxü, rü chixexü taxü. Rü ngëxgumarüxü ta ega natüçaxma tümamüçümaxä itaxunetagu natürü tama tayanguxêegu i ngëma nüxü tixuxü, rü chixexü taxü. <sup>4-5</sup>Rü ngëmacax ega texé ngëmaäcü chixexü üxgux, rü tá tanawoeguxêxê i guxüma i ngëma naxçax tangixü, rü ngëma toxguaxna tanapuxü, rü ngëma wüxi i taxewa tümamüçüxü tawomüxêxü, rü ngëma iyarütaxuxü i nüxü itayangauxü, rü ngëma womüxêêäcü tayaxuxü. Rü naétü i ngëma naxçax tangixü rü tá norü yorana tanaxä i ngëma naxçax tangixüarü yexera, rü ngëmaäcü ñüxüchi chopexewa tá tanaga i tümaxüna i tümäärü chixexüçax choxna tayamuxü. <sup>6</sup>Rü ngëma tümaxüna i çauxçax timáxü rü tanaxwaxe i wüxi i carnéru i taxuwama nañuxraxüxü nixí. Rü cumax, Pa Moichéx, rü tá cunangugü nax nañuxraxüxü i tümäärü chixexü rü ngoxi tümaxüna i cuxütawa tagaxü rü marü tümäärü chixexütanügu name. Rü ngëma naxüna rü tümaxünantanüwa tá nixí i tanayaxuxü rü chacherdótxütawa tanagaxü nax chopexewa tümäärü chixexüçax tayaguxü. <sup>7</sup>Rü ngëmaäcü ya yimá chacherdóte rü tá choxna nachogü nax tüxü nüxü icharüngümaxüçax i tümäärü chixexü. Rü choma rü aixcüma tá tüxü nüxü icharüngüma —ñanagürü ga Cori ya Tupana.

**Uçuxê nax ñuxäcü yagugüäxü  
i ngëma ämaregü**

<sup>8</sup>Rü nüma ga Cori ya Tupana rü Moichémaxä nidexa rü ñanagürü nüxü: <sup>9</sup>—iAróümaxä rü nanegümaxä nüxü i xu nax ñuxäcü tá yagugüäxü i ngëma naxünagü i çauxçax nadaixü! iRü ngëma naxünagü i yagugüxü rü guxüma i ngëma chütaxü rü ngëma ämarearü guchicaxüarü áxwe ya naicüétügu nananu nax ngëxma yaxaexüçax! <sup>10</sup>Rü moxüäcü paçmama rü nüma ya chacherdóte rü tá nicuxcuchi i naxchiru i línuchinaxçax rü natüüchiru i ngëmarüütama ixixü. Rü ngëmawena rü ngëma guchicaxüwa tá nanayaxu i ngëma naxünaarü tanimaca, rü ngëma ämarearü guchicaxüçüwagu tá nanagütaquexe. <sup>11</sup>Rü ngëmawena rü tá ínacuxuchi rü to i naxchirugu tá nicux. Rü ngëmaäcü wüxi i nachica i mexü i íanearü íxpemawa tá nayagü ya yimá tanimaca. <sup>12</sup>Rü yima üxü ya ngëma naxünaarü guchicaxüwa naixüne rü tama name nax yaxoxü. Rü nüma ya chacherdóte rü nanaxwaxe nax naxüxüxüäxü i guxüma i paçmama. Rü ngëxma üxüétügu tá nanaxünagü i ngëma naxüna i tá yaguxü. Rü ngëxgumarüxü ta rü ngëma tá nayagu i norü chíxü i ngëma naxünagü i duüxügü choxna äxü nax namaxä icharüngüxmüxüçax. <sup>13</sup>Rü ngëmaäcü ya yima üxü i ämarearü guchicaxüwa naixüne rü tagutáma peyaxoxêxê —ñanagürü ga Cori ya Tupana.

.....

**Moiché rü duúxügüpexewa  
chíxúmaxá Aróúxü nabaeru**

**8** <sup>1</sup>Rü nüma ga Cori ya Tupana rü Moichémaxá nidexa rü ñanagürü: <sup>2</sup>—İĒcü naxçax naca ya Aróú rü nanegü! İRü nanutaquexe i ngēma chacherdótegüchiru, rü ngēma chíxü i baeruruxü, rü ngēma wocaxacü i yatixü i chixexüarü ütanuçax imáxü, rü ngēma taxre i carnérugü rü yimá pexchi i paü i ngearü puxēerüúáxü nagu nucü! <sup>3</sup>İRü ñuxüchi chopataāxtüarü ücuchicagu nangutaquexexēxē i guxüma i duúxügü! —ñanagürü ga Tupana. <sup>4</sup>Rü nüma ga Moiché rü nanaxü ga yema Cori ya Tupana nüxü ixuxü. Rü nümagü ga duúxügü rü guma Tupanapataāxtüarü ücuchicagu nangutaquexegü. <sup>5</sup>Rü nüma ga Moiché rü ñanagürü duúxügüxü: —Ñaa i ñuxma tá chaxüxü nixi i ngēma Tupana choxü muxü nax chanaxüxü —ñanagürü. <sup>6</sup>Rü nüma ga Moiché rü Aróúçax rü nanegüçax naca rü Tupanapexewa dexámaxá nayayauxgü. <sup>7</sup>Rü yemawena rü wüxi ga maxpáxü ga naxchirugu Aróúxü nicüxcuchi rü mea nayachota ga norü goyexü. Rü nayacüxcuchi ga yema düxétüwa üxü ga naxchiru. Rü yemaétüwa nayacüxcuchi ga naxchiru ga nuxüxü ga ngechacüüxü ga İnuchinaxçax. Rü yema rü meama nayagota norü goyexümaxátama. <sup>8</sup>Rü ñuxüchi nayangaxcuchi ga yema norü türemüxü. Rü yema norü türemüxüarü chocagu nananuxcu ga guma nutagü ga Uríü rü Tumíü. <sup>9</sup>Rü ñuxüchi nayangaxcuchipatexe. Rü yema napatexecatüwa nayaxúcuchi ga wüxi ga úiru ga botachinüxü ga nawa nüxü

nacuaxgüxü nax chacherdótegüarü āēxgacü yixixü, yerü yemaacü nixi ga Cori ya Tupana ga Moichéxü namuxü. <sup>10</sup>Rü yemawena rü nüma ga Moiché rü nanayaxu ga yema chíxü ga baeruruxü rü nanamaxcütü ga guma Tupanapata rü norü yemaxügü nax yemaacü Tupanacaxicatama yaxigüxüçax. <sup>11</sup>Rü yematama chíxümaxá nanamaxcu 7 expüxcüna ga yema āmaregüarü guchicaxü. Rü ñuxüchi yema chíxümaxá nanabaétü ga yema āmaregüarü guchicaxü, rü guxüma ga norü yemaxügü, rü guma bachía ga yaxumexüpáxü. Rü yemaacü Tupanacaxicatama nayaxigüxēxē. <sup>12</sup>Rü ñuxüchi ga Moiché rü Aróúerugu nanaba ga yema chíxü, rü yemaacü Tupanaarü puracüçax nüxü naxuneta. ....

**Nadáx rü Abiúarü chixexü**

**10** <sup>1</sup>Natürü Aróú nanegü ga Nadáx rü Abiú rü wüxichigü nanayaxu ga noxrütama áxwepáü. Rü ngexcürüücumare ga áxwe ga tama Tupana naxwaxecümaxá nanaxüácugü. Rü guma áxweétüga nanagü ga norü pumarátexe rü ñuxüchi Tupanapexewa nanangegü nax yemamaxá nüxü yacuaxüügüxüçax. Rü yemaacü tama nayanguxēgü ga yema Tupana namaxá nüxü ixuxü. <sup>2</sup>Rü yemaçax Tupanaxütawa İnaxüxü ga üxüema ga İnaguxü. Rü Tupanapexegu nayue. <sup>3</sup>Rü nüma ga Moiché rü Aróúxü ñanagürü: —Ñaachiga nixi ga yema Cori ya Tupana nüxü ixuxü ga yexguma ñaxgux: “Rü yixema choxna ngaicamachaüxe rü choma rü tá tüxü chanawex nax aixcüma chaxüünexü. Rü

guxúma i Iraétanüxügüpexewa tá ichanawex i chorü pora”, ñaxgu —ñanagürü ga Moiché. Rü nüma ga Aróú rü yéma nangeaxmare. <sup>4</sup>Rü ñuxüchi nüma ga Moiché rü naxçax naca ga Michaé rü Echapá ga Aróú nanepü ga Uchié nanegü, rü ñanagürü nüxü: —iYéa Tupanapatawa ípeyadaux i ngéma petanüxügü rü peyato i naxünegü! iRü ñanearü íxpemagu peyataxgü! —ñanagürü. <sup>5</sup>Rü nümagü ga Michaé rü Echapá rü yéma naxí, rü yema naxchirugümaxátama nananuquegü. Rü yemaacü nayato ga naxünegü rü nayataxgü, yema Moiché namaxá nüxü ixuxürüxü.

#### Chacherdótegüarü puracüchiga

<sup>6</sup>Rü yemawena ga Moiché rü nayaxucuxé ga Aróú rü nanegü ga Ereachá rü Itamá rü ñanagürü: —iTaxütáma pegü pexixerugüxéxé rü pegüchirugu pegáugüe nax ngémaacü ipenawéxüçax i perü ngechaü naxçax i ngéma yuexü! Erü ngëxguma ngémaacü penaxüxgux rü ngürüiächi pema rü tá ta peyue rü guxütáma i duüxügümaxá tá nanu ya Tupana. Natürü name nax guxüma i ngéma togü i Iraétanüxügü naxçax naxauxexü i ngéma taxre i norü chixexügüga Cori ya Tupana daixü. <sup>7</sup>Natürü i pemax i chacherdótegü nax pixígüxü irü taxütáma nüxna pixígachi ya yima Tupanapata nax tama peyuxüçax! Erü pema rü woetama Tupanaarü puracüçax pexü naxuneta, rü yemaçax chíxü i üünexümaxá pexü chibaeru —ñanagürü ga Moiché. Rü yema Moiché namaxá nüxü ixuxüacü nanaxügü. <sup>8-9</sup>Rü yemawena ga nüma ga Cori ya Tupana rü

nüxí Aróúmaxá nidexa rü ñanagürü nüxü: —Ngëxguma cuma rüexna cunegü ngëxma chopatagu pechocüxgux rü tama name ya bínu ya ngücü rüexna taxacü i to i ngúxü pixaxgü. Rü ñaa pemaxá nüxü chixuxü, rü ngéma nixí i wüxi i mu i guxügütáma nagu pexíxü i cuma rü cunegü rü cutaagü. <sup>10-11</sup>Rü penaxwaxe i nüxü pecuax i ngéma aixcüma üünexü rü ngéma tama üünexü, rü ngéma aixcüma mexü rü ngéma tama mexü. Rü ngémaacü tá meama penangüxéxé i duüxügü nax nagu naxíxü i guxüma i chorü mugü i Moichéwa pemaxá nüxü chixuxü —ñanagürü ga Tupana.

.....

#### Naxünagü i mexü rü naxünagü i tama mexü nax nangóxü

**11** <sup>1</sup>Rü nüma ga Cori ya Tupana rü Moichémaxá rü Aróúmaxá nidexa rü ñanagürü nüxü: <sup>2-3</sup>—iNamaxá nüxü pixu i ngéma Iraétanüxügü rü marü name i nanangóxgü i guxüma i naxünagü i wenaxarü iyóxmüwemügüxü rü taxrepatüxü! <sup>4</sup>Natürü ngéma naxünagü i wena iyóxmüwemügüxü natürü tama taxrepatüxü irü taxütáma penangóx! Rü ngëxgumarüxü ta i ngéma naxünagü i taxrepatüxü natürü tama wena iyóxmüwemügüxü irü taxütáma penangóx! Rü ngémaçax i ngéma caméyu rü woo wena niyóxmüwemü natürü taxütáma penangóx, erü tama nataxrepatü. Rü ngéma rü wüxi i naxüna i tama mexü nixí nax nangóxü. <sup>5</sup>Rü ngëxgumarüxü i ngéma naxüna i teyóü. Rü ngéma rü wena niyóxmüwemü natürü tama nataxrepatü rü ngémaçax tama naxüna i ngóxwa mexü nixí. <sup>6</sup>Rü



ngëxgumarüxü i ngëma naxüna i conejo rü wena niyóxmüwemü natürü tama nataxrepatü. Rü ngëmacax wüxi i naxüna i tama mexü nixi nax nangóxü. <sup>7</sup>Rü ngëxgumarüxü i cuchi rü woo nataxrepatü natürü tama wena niyóxmüwemü rü ngëmacax tama name nax nangóxü. <sup>8</sup>iRü taxütáma penangóx i ngëma naxünagü i chachuxuxü, rü bai nüxü pingógümare ega nayuxgu! Erü naxüna i tama mexü nixigü nax penangóxü. <sup>9</sup>Rü natanüwa i ngëma choxnigü i dexáwa maxëxü i márwa rüexna natügüwa rü tá penangóx i ngëma äpexátücaxwegüxü rü ächicuxü.

<sup>10</sup>Natürü ngëma choxnigü i ngexpexátücaxwegüxü rü ngechicugüxü irü taxütáma penangóx ega woo márcüax yixigu, rüexna natügücüäx yixigu, rüexna choxni i íxraxü yixigu, rüexna choxni i taxü yixigu, rü taxütáma penangóx! <sup>11</sup>iRü taxütáma penangóx i ngëma choxnigü i ngexpexátücaxwegüxü rü ngechicugüxü erü choxni i tama ngóxwa mexü nixigü! Rü ngëxguma nayuxgu irü taxütáma nüxü pingógü erü naxäüachi! <sup>12</sup>Rü ngëmaäcü i guxüma i ngëma dexáwa maxëxü i ngexpexátücaxwegüxü rü ngechicugüxü irü taxütáma penangóx! <sup>13</sup>Rü ngëma werigütanüwa irü taxütáma penangóx i ngëma iyü rü dawü, rü dawü i márcüäx! —ñanagürü.

.....

**Ngunexü i nagu ínaguxü i ämaregü i chixexüarü ütänürüüchiga**

**16** <sup>2</sup>Rü Cori ya Tupana rü ñanagürü Moichéxü: —iNamaxä nüxü ixu ya cuenexë ya Aróü rü tama name i ngexürüüxü i

ngunexügumare nixücu nagu i ngëma nachica i üünexü i tüyemachiücaxwena ngëxmaxü rü bai nüxna nangaicama i ngëma baúátaxü nax tama nayuxücax! Erü choma rü ngëma baúataüétüwa tá changexma i ngëma caixanexüwa. <sup>3</sup>Rü nüma ya Aróü rü name nixi i wüxi i wocaxacü i yatüxümaxä ngëxma chopataaxtügu naxücu nax ngëxma yamáaxücax noxrütama chixexütanü. Rü ngëxgumarüxü tá ta ngëma nanaga i wüxi i carnéru nax chaüxcax yaguaxücax. <sup>4</sup>Natürü naxüpa nax ngëxma naxücuxü rü name nixi i naxaiyaxíra rü nagu nicux i naxchiru imáxpaxü i línuchinaxcax i woetama ngëmacax ixixü, rü ngëma natüüchiru i línuchinaxcax. Rü tá nügü nigoye rü nayangaxcuchi i napatexe i línuchinaxcax. Erü ngëma nixi i naxchirugü i woetama ngëmaruxü ixigüxü. <sup>5</sup>Rü ngëma Iraétanüxügütanüwa rü taxre i chfbuxacü tá niyaxu, rü ngëma tá nixi i duüxügüarü pecáducax choxna namuxü. Rü ngëxgumarüxü tá ta ngëma nanaga i wüxi i carnéru nax ngëma yaguaxücax. ....

<sup>11-12</sup>Rü nüma ya Aróü rü tá chaüxcax nayagu i ngëma wocaxacü i noxrütama chixexüarü ütänüruxü nax nüxü nüxü icharüngümaxücax i noxrütama rü napatacüäxarü chixexügü. Rü ñuxüchi nüma ya Aróü rü naxünaarü guchicaxüwa tá nanayaxu ya äxwe ya naicü rü yimamaxä tá nanaxüäcu i ngëma pumáratexearü guruxüpáü. Rü naétü tá nanayaxu i taxreäcumexë i pumáratexe i yixichixü. Rü ngëmamamaxä tá tüyemachiücaxwegu naxücu. <sup>13</sup>Rü ngëma

pumáratexe rü tá chopexewa nayagu nax ngēma norü caxixü i ngēma pumára rü ngēma baúátaüétügu nacaixnagüxüçax. Rü ngēmaäcü tá nixi i taxútama nayuxü ya Aróü. <sup>14</sup>Rü yimá nagü i ngēma wocaxacü rü tá íxracü ngēma nanange rü naxmexmaxá tátama yimá nagümaxá nanamaxcuétü i ngēma naxátaxü i ngēma baú i norü tügüneciwawaama. Rü ñuxüchi tá nanamaxcuétü i 7 expüxcüna i ngēma naxátaüpexewaama. <sup>15</sup>Rü ngēmawena rü tá nayamax i ngēma chíbu i duüxügüarü chixexütanü ixixü. Rü yimá nagü rü tá ngēma tüyemachiüçaxwena nanange. Rü ngēma aixepewa rü yimá nagümaxá tá nanamaxcuétü rü nanamaxcupexe i ngēma baúátaü ngēma wocaxacügümaxá namaxcuäxürüxü. <sup>16</sup>Rü ngēmaäcü tá nixi i Aróü ngēma nachica i üünexüwa iyanaxoxëäxü i ngēma chixexügü i Iraétanüxügü nagü maxëxü rü ngēma nax tama chauga naxñüexü, rü guxüma i ngēma togü i chixexü i naxügüxü. Rü ngēmaäcü tátama nixi i chopexewa namexëäxü ya yima chopata i duüxügüpataarü ngäxütanüwa ngexmane.

.....

<sup>20</sup>Rü ngëxguma Aróü chopexewa marü namexëëgu i ngēma nachica i üünexü rü yima chopata rü ngēma ämarearü guchicaxü, rü ngëxgumawena tá wüxíexü namu nax yagaaxüçax i ngēma chíbu i maxüxü. <sup>21</sup>Rü ngēma chíbuerugu nanuxmexäcúma tá nüxü nixu i guxüma i ngēma Iraétanüxügüarü chixexügü, rü norü nuxwaxegü, rü norü pecádugü. Rü ngēmaäcü tá ngēma chíbuwa tá nayaxüächü i guxüma i ngēma duüxügüarü chixexügü. Rü

ngēmawena rü tá nüxü naxuneta i wüxi i duüxü nax ínachianexüwa yatáäxüçax i ngēma chíbu. <sup>22</sup>Rü ngëxguma ngēma chianexügu yanataxuxgu, rü ngēma chíbu rü tá nayange i guxüma i Iraétanüxügüarü chixexügü nax ngēma chianexüwa yawogüaxüçax.

.....

<sup>29</sup>Rü ñaa tá nixi i wüxi i mu i guxügütama nagü pexixü i pemax. Rü ngëxguma yimá 7 ya tauemaciärü 10 i ngunexüwa nanguxgu tá nixi i pexaureexü. Rü tá ípeyachaxächigüxü i perü puracüwa i guxäma i pemax i Iraétanüxügü. Rü ngëxgumarüxü tá ta nanaxügü i ngēma duüxügü i to i nachixüanecüäxgü i petanügu ächiügüxü. <sup>30</sup>Rü ngēma ngunexügu tá nixi i pexü nüxü icharüngümaxü i perü chixexügü, rü ngēmaäcü tá nixi i chopexewa pengearü pecáduäxgüxü. <sup>31</sup>Rü ngēma tá nixi i wüxi i mu i guxügütama nagü pexixü. Rü pema i ngēma ngunexügu rü tá iperüngügü rü pexauree —ñanagürü ga Cori ya Tupana. ....

#### Ngunexügü ga Tupanaarü cuaxüxü nagü naxügüxü

**23** <sup>1</sup>Rü nüma ga Cori ya Tupana rü Moichémaxá nidexa rü ñanagürü nüxü:

.....

<sup>4</sup>—Ñaaü tá nixi i ngunexügü i chauxçax ípexüxüchixü i guxcüma ya taunecügu. Rü ngēma ngunexügügu tá nixi i pengutaquexegüxü nax choxü i picuaxüügüxüçax. <sup>5</sup>Rü yimá nüxíraxücü ya tauemaciärü 14 arü yáuanecü, rü tá chauégagu penaxüchiga i ngēma

Üpetüchiga. <sup>6</sup>Rü ngēmaarü moxiãcütama rü tá chauégagu penaxü i paü i ngearü puxēerüáxü. Rü 7 i ngunexü tá nixi i ipenangóxü i ngēma paü. <sup>7</sup>Rü ngēma nüxíraxüxü i ngunexügu rü tá chauxçax pengutaquexegü. iRü taxuxütama i puracü pexüe! <sup>8</sup>Rü 7 i ngunexü tá nixi i chauxçax peyaguxü i perü ämaregü. Rü ngēma norü 7 i ngunexügu rü tá chauxçax pengutaquexegü. iRü taxuxütama i puracü pexüe! —ñanagürü ga Tupana.

**Tupanaana nanaxá ga  
nüxíraxüxü ga norü tríguarü o**

<sup>9</sup>Rü yema ñaxguwena rü nüma ga Cori ya Tupana rü Moichéxü ñanagürü:  
<sup>10</sup>—Ñaa ore tá nixi i namaxá nüxü quixuxü i ngēma Iraétanüxügü: “Rü ngēxguma nagu pechocuxgux i ngēma naane i choma tá pexna chaxáxü, rü ngēxguma peyabuxgügu i ngēma perü trígu, rü tá perü chacherdótēna penaxá i ngēma nüxíra pebuxuxü i norü o i ngēma trígu.  
.....

<sup>15-16</sup>Rü ngēma ngunexü i nagu ngēma chacherdótēxütawa penanaxü i ngēma nüxíra pebuxuxü i trígu i perü ämareruxü, rü ngēma ngüchigaarü ngunexüwéxaxü i ngunexüwa tá ipenaxügü nax peyaxugüxü i ngunexügü ñuxmata 50 i ngunexüwa nangu. Rü ngēmawena tá nixi i wena choxna penaxáxü i perü ämaregü i perü trígutanüwa” —ñanagürü.  
.....

**Tupanaégagu nanaxüchigagü ya  
naixatünaxçax ya düxenügü**

<sup>33</sup>Rü yema ñaxguwena rü nüma ga Cori ya Tupana rü Moichéxü ñanagürü:

<sup>34</sup>—iNamaxá nüxü i xu i ngēma Iraétanüxügü i ñaa ore: “Rü yimá 7 ya tauemaciärü 15 i ngunexügü tá nixi i penaxüchigaxü nax chauégagu penaxüxü ya perü düxenügü ya naixatünaxçax! Rü 7 i ngunexü tá ngēxma nagu pepegü.  
.....

<sup>41</sup>Rü wüxichigü ya taunecügu rü ngēxguma norü 7 ya tauemaciwa nanguxgux, rü tá chauégagu 7 i ngunexü penaxüchiga nax naixatünaxçax ya perü düxenügüne pixügüxü. Rü ngēma nixi i wüxi i mu i guxügütama nagu pexixü, rü pexacügüwa rü petaagüwa rü tá ta naxüe. <sup>42</sup>Rü ngēma 7 i ngunexügügu rü guxáma i pema i Iraétanüxügü rü naixatünaxçax ya perü düxenügüwa tá pengexmagü. <sup>43</sup>Rü ngēmaäcü tá nixi i penegü rü petaagü i nüxü nacuxgüxü ga yexguma Equítuanewa pexü íchanguxüxēxgux, rü naixatünaxçax ya perü düxenügüwa nax pexü chamaxēxēxü i pema i Iraétanüxügü. Erü choma nixi i perü Cori ya Tupana chixixü” —ñanagürü ga Tupana. <sup>44</sup>Rü yemaacü nixi ga Moiché ga Iraétanüxümaxá nüxü yaxuxü nachiga ga yema ngunexügü ga Tupanaçax tá ínaxüxüchigüxü.  
.....

**27** <sup>30</sup>—Rü ngēxguma 10 wetaü i penetiärü o pexü ngēxmagu, woo trígu rüxna woo taxacürü orix yixi, rü wüxi rü Tupanaarü nixi, erü marü nümatama nügüçax ínanaxüxüchi —ñanagürü ga Tupana.  
.....

# NÚMEROS

## (Iraétanüxüarü muxchiga)

Nixugü ga Iraétanüxügü ga Chinaíwa

**1** <sup>1</sup>Rü yexguma norü taxre ga taunecüwa nanguxgu nax Equítuanewa ínachoxüxü, rü gumáarü taxre ga tauemacügu nixí ga Tupana ga Moichémaxā yadexaxü ga guma Tupanapatawa ga Chinaíarü chianexüwa. <sup>2-3</sup>Rü Moichéxü namu rü ñanagürü: —iPeyaxugü i guxüma i Iraétanüxügü i nügütanüxüchigü, rü wüxi ya ĩpatacüâxchigü, nüxü pecuáxüçax i naéga rü norü mu i guxüma i ngēma yatüxügü i 20 ya taunecü nüxü ngēxmagüxü rüexna yexeraarü taunecüâxgüxü rü marü mexü nax churaragü yixígüxü! Rü natanüxütücumüchigüga tá cunawüéga. Rü Aróü tá nixí ya cuxü rüngüxēēcü nawa i ngēma puracü. <sup>4</sup>Rü ngēxgumarüxü ta rü wüxitücumüwachigü rü tá naxçax peca i wüxi i yatü i woetama ngēmatücumüwa âëxgacü ixixü nax pexü nangüxēēxüçax. <sup>5</sup>Rü ñaagü nixí i naéga i ngēma âëxgacügü i tá pexü rüngüxēēgüxü. Rü Rubéütanüxüwa rü Erichú ya Chedeú nane tá nixí. <sup>6</sup>Rü Chimeütanüxüwa rü

Cherumié ya Yurichadáí nane tá nixí. <sup>7</sup>Rü Yudátanüxüwa rü Nachóü ya Aminadá nane tá nixí. <sup>8</sup>Rü Ichacátanüxüwa rü Natanaé ya Chuá nane tá nixí. <sup>9</sup>Rü Chaburóütanüxüwa rü Eriá ya Elóü nane tá nixí. <sup>10</sup>Rü Yúche nane ga Efraítanüxüwa rü Ericháma ya Amiú nane tá nixí. Rü Yúche nane ga Manachétanüxüwa rü Gamarié ya Pedachú nane tá nixí. <sup>11</sup>Rü Bēyamítanüxüwa rü Abidáü ya Guedeóni nane tá nixí. <sup>12</sup>Rü Dáütanüxüwa rü Aiyeché ya Amichadáí nane tá nixí. <sup>13</sup>Rü Achétanüxüwa rü Paguíé ya Ocráü nane tá nixí. <sup>14</sup>Rü Gáxtanüxüwa rü Eriachá ya Reué nane tá nixí. <sup>15</sup>Rü Netarítanüxüwa rü Aíra ya Enáü nane tá nixí —ñanagürü ga Cori ya Tupana. <sup>16</sup>Rü yemagü nixí ga yema norü âëxgacüchigü ga nadexü nax natanüxügümaxā inacuaxgüxüçax. ....

<sup>20-21</sup>Rü yexguma marü nügütanüxüchigü rü wüxi ya ĩpatacüâxchigü yaxugüâxgu rü nayawúgüéga ga yema yatüxügü ga 20 ga taunecü nüxü yexmagüxü rüexna yexeraarü taunecüâxgüxü rü marü

mexũ nax churragũ yixĩgũxũ. Rũ norĩ mu rũ ñaa nixĩ: Rũ Rubéũ ga Iraé (ga Acóbu) nane ga yacũtanũxũwa rũ 46,500 ga yatũxũgũ nixĩ ga churarawa mexũ. <sup>22-23</sup>Rũ Chimeũtanũxũwa rũ 59,300 nixĩ. <sup>24-25</sup>Rũ Gáxtanũxũwa rũ 45,650 nixĩ. <sup>26-27</sup>Rũ Yudátanũxũwa rũ 74,600 nixĩ. <sup>28-29</sup>Rũ Ichacátanũxũwa rũ 54,400 nixĩ. <sup>30-31</sup>Rũ Chaburóũtanũxũwa rũ 57,400 nixĩ. <sup>32-35</sup>Rũ Yúche nanegũtanũxũwa rũ Efraítanũxũwa rũ 40,500 nixĩ. Rũ Manachétanũxũwa rũ 32,200 nixĩ. <sup>36-37</sup>Rũ Bēyamítanũxũwa rũ 35,400 nixĩ. <sup>38-39</sup>Rũ Dáũtanũxũwa rũ 62,700 nixĩ. <sup>40-41</sup>Rũ Achétanũxũwa rũ 41,500 nixĩ. <sup>42-43</sup>Rũ Netarítanũxũwa rũ 53,400 nixĩ. <sup>44-46</sup>Rũ yexguma Moiché rũ Aróũ yaxugũgũgu wũxigu namaxã ga yema 12 ga norũ ngũxēeruũgũ ga wũxitũcumũarũ ãēxgacũchigũ ixĩgũxũ, rũ guxũwama rũ 603,550 wa nixĩ ga nanguxũ ga yema yatũxũgũ ga 20 ga taunecũwa ngugũxũ rũ churarawa imexũ.

#### Lebítanũxũarũ puracũchiga

<sup>47</sup>Natũrũ yexguma yaxugũgũgu ga yema yatũgũ ga marũ churarawa imexũ rũ yema Lebítanũxũgũ rũ tama nixugũ ga natanũwa. <sup>48</sup>Yerũ ga Cori ya Tupana rũ marũ Moichémaxã nũxũ nixu rũ ñanagũrũ nũxũ: <sup>49</sup>“Ngēxguma tá cuyaxugũgu i Iraétanũxũgũ irũ taxũtãma cuyaxugũ i ngēma Lebítanũxũ ixĩgũxũ! <sup>50</sup>Rũ ngēma Lebítanũxũgũ rũ chopatawaarũ puracũtanũxũ tá cuyaxĩgũxēxē nax nũxna nadaugũxũcax ya yima chopata rũ norũ ngēmaxũgũ. Rũ ngēxguma ngextã penangegũgu ya yima chopata, rũ nũmagũ tá nixĩ i

ĩnangexechigũãxũ namaxã i guxũma i norũ ngēmaxũgũ i namaxã chaũxcax napuracũxũ. Rũ nũmagũ rũ tá chopataxũ ĩnapemaeguãchi”, ñanagũrũ ga Cori ya Tupana.

.....

#### Caixanexũ ga Tupanapataétũgu ĩrũxĩxũchiga

**9** <sup>15</sup>Rũ yexguma yanguxgu ga guma Tupanapata, rũ yema ngunexũgu rũ wũxi ga caixanexũ naétũgu ĩnarũxĩ. Rũ yáuanecũ rũ naétũwa nangoxoxũ ga ũxũemarũxũ ixĩxũ, rũ nayexmaecha ñũxmata yangóonexũmare. <sup>16</sup>Rũ guxũguma yemaacũãxũ nixĩ, rũ yexguma ngunecũ rũ caixanexũ nixĩ ga naétũgu ĩrũxĩxũ ga guma Tupanapata, rũ chũtacũ rũ ñoma ũxũemarũxũ nixĩ ga naétũwa ngoxoxũxũ. <sup>17</sup>Rũ yexguma guma Tupanapataétũwa iyachũxũãchixũgũ ga yema caixanexũ, rũ nũma ga Iraétanũxũgũ rũ inaxĩãchixũ ga nax inaxĩxũ. Rũ yema íyachaxãchixũwa ga yema caixanexũ, rũ yema nayachaxãchitanũ, rũ yexma napegũ. <sup>18</sup>Rũ yexguma Cori ya Tupana namaxã nũxũ ixuxgu ga nax inaxĩãchixũ rũ inaxĩãchi. Rũ yexguma namaxã nũxũ yaxuxgu ga nax inachoxũ rũ yexma narũcho. Rũ yexguma yema caixanexũ Tupanapataétũwa yexmaechagu rũ tama inaxĩ.

.....

#### Tupana rũ Iraétanũxũgũmaxã nanaxuegu nax namachi tá nũxna naxãxũ

**11** <sup>4</sup>Rũ yema Iraétanũxũgũ rũ ñuxre ga Equítuanecũãxgũmaxã narũxũcutanũ, rũ

yema duïxũgũ nixĩ ga nũxna  
cuaxãchixũ ga yema ña ga  
Equítuanewa nangõxgũxũ. Rũ nũma ga  
Iraétanũxũgũ rũ dũxwa yemaga naxĩnũe  
rũ yemacax nidexagũ rũ ñanagũrũgũ:  
—Chierũ tũxũ nangexmagu i namachi  
nax nangõxũcax. <sup>5</sup>Rũ ñuxãcü nũxna  
tacuaxãchie ga yema choxni ga chíxũ ga  
ngetanũãcũma ingõxgũxũ ga  
Equítuanewa. Rũ ngẽxgumarũxũ ta  
nũxna tacuaxãchie ga ñuxãcü nangõxũ  
ga pepĩnu, rũ meráũ, rũ chabúragũ rũ  
áyu. <sup>6</sup>Natũrũ i ñuxma rũ taiyamaxã nua  
tayuechaũ, erũ nataxuma i to i taxacũ i  
nũxũ idaũxũ rũ manáxicatama  
—ñanagũrũgũ. <sup>7</sup>Rũ yema maná rũ  
nanachicúrichereraxũ rũ nadexra ñoma  
taxacũ i dextragũxũrũxũ. <sup>8</sup>Rũ nũma ga  
duïxũgũ rũ nanade ga yema maná ga  
dauxũwa rüyixiixũ. Rũ ñuxũchi  
nayacamũgũ rũ nanamuxragũ rũ  
ñuxũchi nayaxũtachinũ. Rũ yema maná  
rũ ñoma chíxũwa ínaguxũrũxũ nixĩ ga  
naaca. <sup>9</sup>Rũ chũtacũ ga yexguma  
nanguxgu ga cherena ga yema  
ínapegũxũétũgu, rũ yexguma ta nixĩ ga  
nayixũ ga maná. <sup>10</sup>Rũ nũma ga Moiché  
rũ nũxũ naxĩnũ ga Iraétanũxũgũ ga  
naãxpatawachigũ nax yema ñnacax  
yadexagũxũ. Rũ nũma ga Cori ya  
Tupana rũ yemacax poraãcü nanu rũ  
yexgumarũxũ ta ga Moiché. <sup>11</sup>Rũ nũma  
ga Moiché rũ Tupanaxũ ñanagũrũ:  
—Choma nax curũ duïxũchirex chixĩxũ  
¿rũ taxacũcax tama chomaxã cutaãxẽ rũ  
ngẽmacax chauxchaama choxũ  
cunangenagũxẽxẽ i ñaa duïxũgũarũ  
guxchaxũgũ? <sup>12</sup>¿Ëxna chauxacũgũ  
nixĩgũ rũ ngẽmacax choxũ cumuxũ nax  
ñoma õxchanagũrũxũ chayagagũxũ i

nawa i ngẽma naane ga nũxcũma torũ  
õxigũmaxã nũxũ quixuxũ? <sup>13</sup>¿Rũ ngextá  
tá namachi choxũ ta iyangauxũ nax  
chanachibũexẽxũcax i guxũma i ñaa  
duïxũgũ? Rũ auxẽacũma nixĩ i choxũ  
yacaaxũgũechaxũ rũ ñagũxũ choxũ:  
“iRũ torũ ngõxrxuxũ i namachi toxna ta  
naxã!” ñagũxũ. <sup>14</sup>Rũ choma rũ marũ  
tama choxũ natauxcha nax chaxica  
namaxã ichacuáxũ i ñaa duïxũgũ. Erũ  
ngẽma puracũ rũ nata rũ ngẽmacax  
taxucũrũwa chaxica chanaxũ. <sup>15</sup>Rũ  
ngẽxguma tá ngẽmaãcü chomaxã  
quixĩxgu irũ noxtacũma choxna nayaxu  
i ñaa chorũ maxũ, ega choxũ  
cungechaũxgu! Rũ ngẽmaãcü tá marũ  
taxũtãma chauxchaama chayangenagũ i  
ñaa duïxũgũarũ guxchaxũgũ  
—ñanagũrũ ga Moiché. <sup>16</sup>Natũrũ nũma  
ga Cori ya Tupana rũ Moichẽxũ  
nangãxũ rũ ñanagũrũ: —iËcü  
nanutaquexe i 70 i norũ ãẽxgacũgũ i  
Iraétanũxũgũ i duïxũgũ naga ñnũexũ, rũ  
chopatawa nagagũ! iRũ ngẽma choxũ  
namaxã yarũnguxẽxẽ! <sup>17</sup>Rũ choma rũ tá  
ngẽxma ícharũxĩ, rũ ngẽma tá cumaxã  
chidexa. Rũ tá ngẽma ãẽxgacũgũna  
chanaxã i ngẽma chauãxẽ i cuwa  
ngẽxmaxũ nax nũmagũ cuxũ  
nangũxẽẽgũxũcax nax namaxã  
inacuaxgũxũ i ñaa duïxũgũ. Rũ  
ngẽxguma rũ marũ taxũtãma cuxica  
namaxã icucuax. <sup>18</sup>iRũ ñuxũchi namaxã  
nũxũ ixu i duïxũgũ nax nũgũ  
yamexẽẽgũxũcax naxcax i moxũarũ  
ngunexũ, rũ ngẽmaãcü tá nixĩ i namachi  
tá nangõxgũxũ! Erũ marũ nũxũ chaxĩnũ  
nax auxẽacũma ñagũxũ: “¿Ñuxcũ ngexũ  
yixĩ i namachi rũ ta ingõxgũ? Rũ  
narũmemaẽ nixĩ ga Equítuanewa

iyexmagügu”, ñagüxü. Rü marü name rü choma tá namachi nüxna chaxã nax nangõxgüaxüçax. <sup>19</sup>Rü taxütama wüxitama i ngunexü nanangõxgü rü bai i taxre, rü bai i 5, rü bai i 10, rü bai i 20 i ngunexüguxicatama tá nanangõxgü.

<sup>20</sup>Rü wüxi ya tauemacüxüchi tá nixi i namachi nangõxgüxü ñuxmatáta naemamaxã yangüãtanüçüxü rü nawa naxoégagü erü choxü naxoe i chomax i Cori ya Tupana nax natanüwa changexmaxü. Rü naxauxeäcuma rü chopexewa ñanagürügü: “¿Rü taxacüçax ga Equítuanewa íchoxüxü?”

ñanagürügü —ñanagürü ga Cori ya Tupana. <sup>21</sup>Rü yexguma ga Moiché rü Tupanaxü nangäxü rü ñanagürü: —Rü ngëma duüxügü i chowe rüxixü rü 600,000 i yatügü nixigü. ¿Rü ñuxäcü nüxü quixuxü rü wüxi ya tauemacü tá nixi i namachi toxü cungõxëëxü? <sup>22</sup>¿Rü

ngextá nangema i ngëma muxü i carnérugü rü wocagü nax ngëma tadjüçax rü guxaxü

yangumachixüçax? Rü woo chi guxüma i choxni i taxü i taxtüçüãx nüxna ixãxgu rü taxüchima nüxü ningu —ñanagürü.

<sup>23</sup>Natürü nüma ga Cori ya Tupana rü nanangäxü rü ñanagürü: —¿Cuma nagu curüxínügu i ngëma chorü pora rü naxíraxü? Rü ñuxma tá nüxü cudau nax aixcüma tá yanguxü i ngëma nüxü chixuxü —ñanagürü.

.....

<sup>31</sup>Rü nüma ga Cori ya Tupana rü ínananguxëxë ga wüxi ga tacü ga buanecü ga márwa ne buemacü. Rü gumaemagu ínangugü ga muxüchixü ga ngugagü rü yema ínapegüxügu nayi rü namaxã naxãanemare ñuxmata wüxi i

ngunexü itixü ga nax namaxã naxãanemarexü. Rü wüxi ga métruwa nangu ga norü yaxcü ga nüguétügu nax nayixü. <sup>32</sup>Rü guxüma ga yema ngunexügu, rü guxüma ga yema chütaxügu rü moxüäciarü ngunexügu rü nüma ga duüxügü rü nanade ga yema ngugagü. Rü guxema rü noxremaexü dexe rü 10 chita tüxü nayexma. Rü yema ínayexmagüxüãxtügu tayapagü.

<sup>33</sup>Natürü yexguma yexwacax nüxü nangõxnetagügu ga namachi ga yema ngugagü, rü nüma ga Cori ya Tupana rü duüxügümaxã nanu, rü nanayuxëxë ga muxüma. <sup>34</sup>Rü yemacax nixi ga Quíbu-atábamaxã naxüégagüãxü, yerü yexma nixi ga nataxgüxü ga yema duüxügü ga õnaguxicatama rüxínüxü. ....

### Moiché rü Canaáüanewa nanamugü ga 12 ga ngugütaeruügu

**13** <sup>1</sup>Rü nüma ga Cori ya Tupana rü Moichémaxã nidexa rü ñanagürü: <sup>2</sup>—iËcüx, Canaáüanewa namugü i 12 i yatügü nax ngëma yangugütaegüçax, erü ngëma naane tá nixi i pexna chaxãxü i pema i Iraétanüxügü! iRü wüxíticümüwachigü rü namuächi i ngëma norü äëxgacü ixixü! —ñanagürü ga Tupana. <sup>3</sup>Rü nüma ga Moiché rü yema chianexü ga Paráügu äégaxüwa ínanamuächitanü ga yema äëxgacügü yematama Tupana namaxã nüxü ixuxürüxü. Rü guxüma ga yema 12 rü natanüxügü ga Iraétanüxügü nüxü ngechaüügüxü nixigü.

.....

<sup>17</sup>Rü nüma ga Moiché rü nayamugü ga yema yatügü nax Canaáñanewa naxixũcax rü yéma yangugütaegüxũcax. Rü ñanagürü nüxü —iNgëma chianexü i Négueguma pexi rü ñnamáxpüxanexüwa pechopetü! <sup>18</sup>Rü tá penangugü i ngëma naane, rü yima ñane rü ngoxi naporae i ngëma duũxũgü i ngëxma ãchiũgüxü rüexna tama, rü ngoxi namu rüexna tama. <sup>19</sup>Rü tá penangugügü ya yima norü ñane rü ngoxi düxenügümare yixi rüexna mea ñnapoxegügü, rü ngëma naane i nawa nangexmagüxü rü ngoxi mexü i waixümü yixi rüexna tama. <sup>20</sup>Rü tá penangugü rü ngoxi nawaxmüane rüexna tama. Rü ngëxgumarüxü ta penangugü rü ngoxi nanaixneciá rüexna tama. iRü taxü ipemuñexü! Rü nua tá penge i ngëmacüñax i nanetüarü o —ñanagürü ga Moiché. Rü yema naanewa rü meama nüxíraxüxü ga norü úbaarü o idauxgu nixi ga yexguma Moiché yéma namugüga ga yema yatügü ga ngugütaewa yéma ixü. <sup>21</sup>Rü yema yatügü rü yéma naxi rü nayangugügü ga yema nachixüane. Rü sürwaama ga chianexü ga Chfũ íyexmaxüwa inanaxügüe ga nax nangugügüaxü ga yema naane rü ñuxmata ñane ga Debúwa nangugü ga nórtewaama ga ñane ga Amáxarü ngaicamána. <sup>22</sup>Rü yema chianexü ga Néguewaama nachocu rü ñuxmata ñane ga Ebróüwa nangugü. Rü guma ñanegu nixi ga naxächüügüxü ga Aimáütanüxügü, rü Checháitanüxügü rü Tamáitanüxügü ga Anáxtaagü ixigüxü. Rü guma ñane ga Ebróü rü marü nüxcüma naxü. Rü marü 7 ga taunecü

nüxíra naxü naxüpa ga guma ñane ga Choáñ ga Equítuanewa yexmane. <sup>23</sup>Rü yema ngatexü ga Ecúwa nangugü, rü yéma nayadaegü ga wüxi ga úbamaxüchacüxü ga taxyaxaarü oóxü. Rü wüxi ga naiwa nayawexgü rü yemaacü nügümaxá nayangetaügü. Rü orix ga ígu rü orix ga boxra rü ta ningegü. <sup>24</sup>Rü yema ngatexü rü Ecúgu nanaxüégagü naxcax ga yema úbayaxa ga yéma yadaegüxü ga yema Iraétanüxügü. <sup>25-26</sup>Rü 40 ga ngunexü ningegü ga nax nangugüanegüaxü. Rü yemawena rü naxcax nawoegu ga yema nachica ga Cåde ga Paráñarü chianexüwa yexmaxü yerü yéma nixi ga nayexmagüxü ga Moiché rü Aróñ rü guxüma ga Iraétanüxügü. Rü nüma ga yema ngugütaewa ne ixü rü nüxü nixugügü ga guxüma ga yéma nüxü nadaugüxü. Rü nüxü nanawexgü ga yema nanetüarü o ga yema nachixüanewa ne nangegüxü. <sup>27</sup>Rü Moichémaxá nüxü nixugüe rü ñanagürügü: —Marü nawa ne taxí i ngëma naane i nawa toxü cumugüxü. Rü aixcüma nixi i ngëma naanewa rü guxüwama nangexmaxü i nabüane i mexü rü taguma nataxuxü. Rü ñaagü nixi i ngëma nanetügü i ngëma muxü. <sup>28</sup>Natürü ngëma duũxũgü i ngëxma ãchiũgüxü rü nipora, rü yima norü ñanegü rü nita rü ñnapoxegügü. Rü to ga yéma nüxü tadauxü nixi ga guma Anáxtaagü i narüütama imáchanexüchixü. <sup>29</sup>Rü ngëma Négueanewa rü ngëxma naxächüügü i ngëma Amaléxtanüxügü. Rü ngëma ñnamáxpüxanexügu rü naxächüügü i ngëma Itítatanüxügü rü



Yebuchéutanüxügü rü Amaréutanüxügü. Rü márcutügu rü natü i Yudáücutügu nixí i naxáchiüügüxü i Canaáüanecüãxgü —ñanagürügü. <sup>30</sup>Rü yexguma ga wüxi ga yema ngugütaeruxü ga Caréx rü nanachianexëxë ga yema duüxügü ga Moichépepewa yexmagüxü rü ñanagürü: —iNgíxá tóxrüxü tayaxíxëxë i ngëma naane, erü yixema rü tüxü natauxcha nax tóxrüxü yaxíxëxë! —ñanagürü. <sup>31</sup>Natürü ga yema togü ga namücügü rü nanangãxügü rü ñanagürügü nüxü: —Tama nixí i namexü nax namaxã yigü idaixü i ngëma duüxügü, erü nüma rü tá tüxü narüporamaegü —ñanagürügü. <sup>32</sup>Rü yexguma ga yema togü ga Caréxmücügü rü nüxü nixugüe nax nachixexü ga yema naane rü ñanagürügü: —Rü ngëma nachixüane i nawa ngugütaewa ne taxíxü rü tama mexü nixí. Rü ngëma naane ga tayangugüxü rü nachuxu rü ngëmagagu muxüma i ngëma naanegu áchiüügüxü i duüxügü rü nayue. Rü ñuxüchi guxüma ga yatüxügü ga yéma nüxü tadauxü rü nitaxüchi. <sup>33</sup>Rü nüxü tadaugü ga Anáxtanüxü ga itaxüchixü rü máchanexüchixü. Rü yemaçax ga toma ga naxütawa nax togü tadaugüxü rü tanamunügüraxümare. Rü nümagü rü ta yemaacütama toxü nadaugü —ñanagürügü.

Nüma ga Iraétanüxügü rü tama  
Cori ya Tupanaga naxínuechaü

**14** <sup>1</sup>Rü yexguma yema ngugütaewa ne íxüarü orexü naxínuegu ga yema Iraétanüxügü rü aita naxüe, rü yema chütaxü rü axugu ningunexügü. <sup>2</sup>Rü guxüma ga nümagü

rü chixri Moiché rü Aróüchigagu nidexagü, rü ñanagürügü: —Narümema chi nixí ga Equítuanegu nax iyuexü rüexna nuxã ínachianexügü rü tama ngëma naane i yangugügüxügü nax iyuexü. <sup>3</sup>¿Rü taxacüwa ya Cori ya Tupana i ngëma nachixüanewa tüxü nagagüxü nax ngëxma daigu iyuexüçax, rü taxmãxgü rü taxacügü rü tóru uanügümexëgu tayixüçax? Rü narümema nixí i Equítuanecax tawoegu —ñanagürügü. <sup>4</sup>Rü yexguma ga wüxichigü nügümaxã ñanagürügü: —Ngíxá nüxü taxuneta i wüxi i tóru ãëxgacü nax tamaxã inacuéxüçax rü ngëmamaxã Equítuanecax iwoeguxüçax —ñanagürügü. <sup>5</sup>Rü yexguma ga Moiché rü Aróü rü ñaxtúanegu nanangücuchitanü napexewa ga guxüma ga duüxügü. <sup>6</sup>Rü nüma ga Yochué rü Caréx ga yema naane ngugügüxü rü norü ngechaümaxã nügü narügáutechirugü. <sup>7</sup>Rü ñanagürügü nüxü ga guxüma ga yema Iraétanüxügü: —Ngëma naane ga itayadaugüxü rü naane i mexü nixí. <sup>8</sup>Rü nüma ya Tupana rü tá tüxü narüngüxëxë rü tüxü nanatauxchaxëxë nax ngëma naanegu ichocuxü. Rü tá tüxna nanaxã nax tóxrüxü yixíxüçax. Rü ngëma nachixüanewa rü ñoma dexárixü taguma nataxu i öna i mexü. <sup>9</sup>Natürü i pemax rü tama name nax Cori ya Tupanamaxã penuexü rü tama name i nüxü pemuë i ngëma nachixüanecüãx i duüxügü. Erü nümagü rü tá ñoma paü i ngóxürüxü tá tüxü nixígü i taxçax erü nataxuma i texé nax nüxna dauxü. Natürü i yixema rü tüxü nangexma ya Cori ya Tupana ya tüxna daucü. iRü

taxú i pemuñexú! —ñanagürügü. <sup>10</sup>Rü woo yemaxú nax naxñüexú ga duñxügü rü nanueama rü nutamaxã ínanamuxúchigüchañ. Natürü ga Cori ya Tupanaarü üüne rü yéma nangox ga guma Tupanapatawa napexewa ga guxúma ga Iraétanüxügü. <sup>11</sup>Rü yexguma ga nüma ga Cori ya Tupana rü Moichéxú ñanagürü: —¿Ñuxguxüratáta nixí i choxú inaxñüexú i ñaa duñxügü? ¿Rü ñuxguxüratáta nixí i nüxú naxoexú nax tama choxú yaxögüaxú rü woo nüxú nax nadaugüxú ga yema mexügü ga chaxüxú? <sup>12</sup>Rü naxçax tá núma chanamu i wüxi i daweanne i nawa nayuexú nax ngémaacü tama nawa nangugüxüçax i ngéma naane. Natürü cuwa tá nixí i ichanangoxëëxú i to i duñxügü i ñaa duñxügüxú rümumaexú rü rüporamaegüxú —ñanagürü. <sup>13-14</sup>Natürü nüma ga Moiché rü Cori ya Tupanaxú nangäxú rü ñanagürü: —Natürü ngéma Equítuanecüãxgü rü meama nüxú nacuaçgü ga curü poramaxã nax ícunguxüxëëxú ga ñaa duñxügü. Rü ngëxguma ngéma Equítuanecüãxgü nüxú cuaxgügu i ngéma ñaa duñxügümaxã cuxüxchañxú rü tá Canaáüanecüãxgümaxã nüxú nixügüe, rü nümagü rü tá ta nüxú nacuaçgü. Rü nümagü i ngéma Canaáüanecüãxgü rü marü nüxú naxñüe nax cuma rü natanüwa cunxexmaxú i ngéma Iraétanüxügü, rü cugü naxçax cunxoxëëxú, rü cuma i guxüguma ngéma caixanexüwa naétüwa cunxexmaxú, rü ngéma caixanexügu napexë quixüxú i ngunecü rü üxüemagu i chütacü. <sup>15</sup>Natürü ngëxguma tá cunadaixgu i ñaa chautanüxügü rü

ngéma torü uanügü i cuxú cuáchigagüxú rü tá ñanagürügü: <sup>16</sup>“Rü nüma ya Cori ya Tupana rü nüxú naguxcha nax nawa nangugüxëëäxú i ngéma naane ga namaxã inaxunetaxú, rü ngëmacax nixí i ínachianexügu tüxú nayuexëëäxú”, ñanagürügü tá. <sup>17</sup>Rü ngëmacax nixí, Pa Corix, i namexú nax icunawëxú i curü pora yema tomaxã nüxú quixuxürüütama. <sup>18-19</sup>Rü woo nüxú quixu nax tama nüxú cuxüpetümarexú i ngéma chixexú ügüxú rü cunapoxcuxú i ngéma nanegü rü nataagü nagagu i nanatügüarü chixexú, natürü nüxú quixu ta nax tama cunuxwaxexú rü nataxüchixú i curü ngechañ rü toxú nüxú cungechañxú i torü chixexú. Rü ngëmacax cuxú chacaçaxú nax nüxú nüxú curüngümaxú i ñaa duñxügüarü chixexú, yerü marü yaxna namaxã cuxñü ga yexguma Equítuanewa ínachoxügütama ñuxmata nua ñaa nachicawa nangugü —ñanagiürü ga Moiché.

**Cori ya Tupana rü tama nayanaxoxëë ga duñxügü natürü taxütáma nawa nangugü ga yema naane ga namaxã inaxunetaxú**

<sup>20</sup>Rü nüma ga Cori ya Tupana rü Moichéxú nangäxú rü ñanagürü: —Marü name. Choma rü tá nüxú nüxú charüngüma i ngéma duñxügüarü chixexú ngéma cuma choxna naxçax cuçaçxürüxú. <sup>21-23</sup>Natürü ngéma nax aixcüma yixüxú nax chamaxüxú rü guxú i ñoma i naanewa nax changexmaxú, rü ngëxgumarüxú tá ta aixcüma nixí nax taxúetáma ya yíxema Iraétanüxügü ga nüxú daugüxe ga yema chorü üüne rü yema mexügü ga chaxüxú ga

Equítuanewa rü nua ínachianexũwa, rü bai tá ya wüxíxe ya yíxema duëxëgü nüxũ daugüxũ i ngëma naane ga túmaaru oxigümaxã nüxũ chixuxũ. Rü bai tá ya wüxíxe ga choxũ ügümarexe rü choxũ oexe rü tama chauga ínüexe nüxũ tadau i ngëma naane. Rü bai tá ya wüxíxe. <sup>24</sup>Rü yimá chorü duũ ya Caréxícátama nixĩ ya mexũgu rüxínücü rü aixcúma chauga ínücü. Rü ngëmacax yimáxũxicátátama nixĩ i ngëxma chaxücuxëxũ nawa i ngëma naane ga yangugüxũ. Rü ngëma nataagü rü ngëxma tá naxächüügü.

.....

<sup>27</sup>Natürü ngëma togü i Iraétanüxügü i chixri chauchiga idexagüxũ ñrü ñuxguxüratáta yaxna namaxã chaxínüxũ nax chauga naxínüexüçax? <sup>28</sup>Rü ngëmacax i ngëma duũxügü i naxçax ícagüxũ nax nua ínachianexũgu nayuxü írü namaxã nüxũ ixu rü choma ya Cori ya Tupana rü ngëma nümatama naxçax ínacagüxũäcü tá naxçax chanaxü! <sup>29</sup>Rü guxũma i ngëma duũxügü i 20 ya taunecüwa ngugüxũ i chixri chauchiga idexagüxũ rü tá nuxã ínachianexũgu nayue. <sup>30</sup>Rü bai tá i wüxi i ngëma duũxügü nagu nachocux i ngëma naane i pemaxã nüxũ chixuxũ. Rü Caréx rü Yochuéxícátama tá nixĩ i ngëma ngugüxũ —ñanagürü ga Cori ya Tupana.

.....

**Iraétanüxügüxũ narüporamae  
ga norü uanügü**

<sup>39</sup>Rü yexguma yema Iraétanüxügümaxã nüxũ yaxuxgu ga Moiché ga yema Cori ya Tupana namaxã nüxũ ixuxũ, rü guxũma ga nüma rü poraäcü nangechaügü. <sup>40</sup>Rü yema ga ngunexüaru

moxũäcü rü paçmamaxüchi ínarüdagü rü inaxĩächi nax ínachõöchixüçax ga yema ínamáxpüxanexüwa. Rü ñanagürügü: —Marü núma tangugü. Rü aixcúma nixĩ nax chixexũ taxüxũ, natürü i ñuxma rü marü ítamemare nax nawa ixixũ i ngëma naane ga Cori ya Tupana tamaxã nüxũ ixuxũ —ñanagürügü. <sup>41</sup>Natürü ga Moiché rü ñanagürü nüxũ: —ÍTüxcüü tama naga pexínüe i Cori ya Tupanaaru mu? Rü ngëma nagu perüxínüexũ rü taxütáma mea pexũ ínanguxuchi. <sup>42</sup>Rü tama name nax ipexĩamaxũ, erü ya Cori ya Tupana rü tama napexütágu. Rü ngëma perü uanügü rü tá pexü narüporamaegü. <sup>43</sup>Rü yéa pepexewa rü ngëma pexü nananguxëëgü i Amaléxtanüxügü, rü Canaáüanecüäçgü nax pemaxã nügü nadaixüçax rü pexü nayuxëëxüçax. Erü pema rü nüxna pixígachi ya Cori ya Tupana rü ngëmacax i nüma rü marü tama pexütawa nangexma —ñanagürü. <sup>44</sup>Rü nüma ga Moiché rü yema ínapëgüxügutama narüxäx namaxã ga yema baü ga Tupanaaru mugü nawa yexmaxũ. Natürü ga nümagü ga Iraétanüxügü rü ínachõöchiamá ga maçpüneanewa. <sup>45</sup>Natürü yexguma yéma nangugügu rü nümagü ga Amaléxtanüxügü rü Canaáüanecüäçgü ga yexma ächiügüxũ rü nanadai. Rü nawe nangëgü rü ñuxmata Ómawa nayawogü. Rü yemaacü nüxũ narüporamaegü.

.....

**Tama Moichéga naxínü ga Coré**

**16** <sup>1-2</sup>Rü Moichémaxã nanu ga wüxi ga Lebítanüxũ ga Corégu äégaxũ. Rü nüma ga Coré ga Ichá nane rü Coátaxa nixĩ. Rü Coréwa naxügü ta

ga tomaepūx ga yatūgū ga Rubéūtanūxū, ga Datáú rü Abiráú ga Eliá nanegū, rü Óú ga Peréx nane. Rü yemawaama nügū naxūgūxēxē ga 250 ga Iraétanūxūgū ga āēxgacūgū ixīgūxū ga duūxūgūmaxā icuaxgūxū rü duūxūgū mea naga ĩnūexū. <sup>3</sup>Rü guxūma ga yemagū rü nangutaquexegū rü Moichémaxā rü Aróūmaxā narūxutagagū rü ñanagürügū: —Marü tama nixī nax pexica tomaxā ipecuáxū. Yerü ga Tupana rü guxāxūma nixī ga nadexū rü ngēmacax ya Cori ya Tupana rü tamaxā nanuxma i guxāma i yixemax. ¿Rü tūxcūū i pemax i Tupanaarū duūxūgūétūwa pegū pexūgūxēxēchaū? —ñanagürügū. <sup>4-5</sup>Rü yemaxū naxīnūgu ga Moiché rü ñaxtūanegu nayangūcuchi rü Coréxū rü yema nawe rüxīxūxū ñanagürü: —Moxū paxmama rü nūma ya Cori ya Tupana rü tá tūxū nüxū nacuaxēxē rü texé tixī ya noxrü ixīxe rü tūxū naxunetaxe nax napexewa tayaguxūcax i āmaregū —ñanagürü.

.....

<sup>12</sup>Rü ñuxūchi ga Moiché rü naxcax nangema ga Datáú rü Abiráú ga Eliá nanegū ixīgūcū. Natürü ga nūmagū rü Moichéxūtawa namugagū rü ñanagürügū: —Tama cuxūtawa taxīxchaū. <sup>13</sup>¿Ēxna cuxcax rü wūxi ga ĩnūca nixī ga toxū nax ícugaxūxū nawa ga Equítuane ga mexū ga ñna taguma ítaxuxūwa nax nuxā ĩnāchianexūgu toxū cuyuexēxūcax? ¿Rü ngēmaacū i cunaxwaxexū nax torū āēxgacū quixīxū? <sup>14</sup>Rü tama aixcūma nixī i nawa toxū cugagūxū i ngēma naane i mexū i ñna taguma ítaxuxūwa, rü tama toxna

cuyaxāchigū i torū naane rü úbanecūgū. ¿Rü cuma nax curixīnūgu rü ñaa duūxūgū rü ningexetū nax cuma ícunaxwaxexūwa cunagagūxūcax? Rü taxūtāma cuxūtawa taxī —ñanagürügū. <sup>15</sup>Rü yexguma ga Moiché rü poraācū nanu, rü Cori ya Tupanaxū ñanagürü: —Tama chanaxwaxe i nüxū cunayaxu i ngēma duūxūgūarū āmaregū. Erü choma rü taguma ñuxgu wūxi i norü búru nüxna chayaxu, rü bai i ñuxgu wūxixemaxā chixexū chaxū —ñanagürü. <sup>16</sup>Rü ñuxūchi Coréxū ñanagürü: —Moxūarū ngunexūgu rü chanaxwaxe i nua Cori ya Tupanapexewa pexī namaxā i cutanūxūgū. Rü Aróū rü tá ta nangexma. <sup>17</sup>Rü guxāma i pema i 250 i duūxūgū pixīgūxū, rü name nixī i wūxichigū nua penange i perü pumáratexearū guruxū i pumáratexemaxā pexūācuxū. Rü Aróū rü ta ngēxgumarūxū tátama nanaxū —ñanagürü. <sup>18</sup>Rü yemaacū wūxichigū nanayauxgū ga norü pumáratexearū guruxū. Rü áwe ga naicūmaxā nayaxūācu rü ñuxūchi pumáratexenaétü nagūgū. Rü yemaacū Tupanapataarū ĩāxgu nayachigū namaxā ga Moiché rü Aróū. <sup>19</sup>Rü nūma ga Coré rü Moichémaxā rü Aróūmaxā nananuxēxē ga duūxūgū. Rü yemacax Tupanapatapexegu nangutaquexegū ga guxūma ga yema duūxūgū. Rü Tupanaarū ütine rü naxcax nangox. <sup>20-21</sup>Rü nūma ga Cori ya Tupana rü Moichémaxā rü Aróūmaxā ñanagürü: —iPixīgachi natanūwa i ngēma duūxūgū! Erü ñuxmatátama chanadai —ñanagürü. <sup>22</sup>Natürü nūma ga Moiché rü Aróū rü Tupanapexegu ñaxtūanegu

nanangücuchitanü rü ñanagürügü nüxü: —Pa Tupanax, cuma nax cunamaxēxēxü i guxüma i duüxügü, rü tama name i wüxitama i duüxüarü chixexügagu rü guxüma i duüxügümaxã cunu —ñanagürügü. <sup>23-24</sup>Rü nüma ga Cori ya Tupana rü Moichéxü nangãxü rü ñanagürü: —iNamaxã nüxü i xu i guxüma i Iraétanüxügü rü ñachoxü nawa ya yima napatagü ya Coré rü Datáü rü Abiráü nawa ngëxmagüne! —ñanagürü. <sup>25</sup>Rü yexguma ga Moiché rü inaxüãchi. Rü nawe narüxí ga Iraétanüxügüarü ãëxgacügü. Rü Datáü rü Abiráü iyexmagüxüwa naxí. <sup>26</sup>Rü nüma ga Moiché rü duüxügümaxã nüxü nixu rü ñanagürü: —iNüxna pixígachi ya napatagü i ñaa duüxügü i chixexügu rüxünüexü! iRü taxütáma nüxü pedáu i norü ngëmaxügü nax tama naxrüxü norü chixexügagu peyuexüçax! —ñanagürü.

.....

<sup>31</sup>Rü yexguma Moiché rüchianegu ga nax yadexaxü, rü ga waixümü rü ningex napatatüüwa ga yema duüxügü. <sup>32</sup>Rü yexma nayicu ga guxüma ga yema duüxügü ga Coréweama rüxixü, wüxigu namaxã ga naxacügü rü naxmaxgü rü guxüma ga norü yemaxügü. <sup>33</sup>Rü maxëxüma yema waixümü ga ingéxügu nayicu namaxã ga norü yemaxügü. Rü ñuxüchi ga yema waixümü rü nügüna naxü. Rü yemaacü yema Iraétanüxügütanüwa inayarüxo ga yema duüxügü.

.....

<sup>41</sup>Rü yemaarü moxüãcü rü guxüma ga yema Iraétanüxügü rü inanaxügü ga Moiché rü Aróüchiga nax chixri

yadexagüxü. Rü ñanagürügü: —Pema rü penadaimare i ñaa Cori ya Tupanaarü duüxügü —ñanagürügü. <sup>42</sup>Rü guxüma ga yema duüxügü rü Moichéxü rü Aróüxü ñachomaeguãchi rü yema ninuügatanücüxü. Natürü ga nüma ga Moiché rü Aróü rü Tupanapatawaama naxí. Rü yexgumatama yema caxixü ga Cori ya Tupana nawa yexmaxü rü napataéttügu ñarüxí, rü norü üüinemaxã nayadüxü. <sup>43-44</sup>Rü nüma ga Moiché rü Aróü rü Tupanapataarü ücuchicawa nangugü rü yexma nayachigü. Rü nüma ga Cori ya Tupana rü Moichéxü ñanagürü: <sup>45</sup>—iPixígachi natanüwa i ngëma duüxügü, erü ñuxma tátama chanadai! —ñanagürü. Rü nüma ga Moiché rü Aróü rü yexgumatama ñaxtüanegu nayangücuchitanü. <sup>46</sup>Rü nüma ga Moiché rü Aróüxü ñanagürü: —iNua nange i curü pumáratexearü guruxü, rü áxwe i naxüinagüarü guruxüwa cuyaxucümaxã naxüacu, rü ñuxüchi pumáratexë ngëxma ta nagü! iRü ñuxüchi paxa duüxügü íngexmagüxüwa naxü rü ngëma duüxügüçax nüxna nachogü ya Tupana nax nüxü nüxü nangümaxüçax i norü chixexügü! Erü nüma ya Cori ya Tupana rü poraãcü nanuxüchi, rü ngëma daaweane i namaxã nadaiaxü rü marü inaxügü —ñanagürü. <sup>47</sup>Rü nüma ga Aróü nanaxü ga yema Moiché namaxã nüxü ixuxü. Rü paxa inañaãchi rü yema duüxügü íngutaquexexüwa naxü. Rü yema daaweane ga Tupana yema muxü rü marü natanüwa nangu ga duüxügü rü marü poraãcüma ta nayue. Rü yexguma ga nüma ga Aróü rü yema pumáratexearü guruxügu nanagü ga

pumáratexe, rü Tupanana naca nax duũxũgüaxũ nüxũ yanangũmaxũcaç ga norü chixexũgü. <sup>48</sup>Rü ñuxũchi ga nũma ga Aróũ rü yema maxẽxũ rü yema marũ yuexũmachatexegu nachi. Rü yexguma ínayachaxãchi ga yema daaweane.

<sup>49</sup>Natürü marũ 14,700 ga duũxũgü nixĩ ga yuexũ namaxã ga yema daaweane. Rü naétü nixĩ ga yema nüxĩra marũ yuexũ ga Coréwe rüxĩxũ ga tama Moichéga ínüechaũxũ. <sup>50</sup>Rü yexguma marũ iyanaxoxgu ga yema daaweane, rü nũma ga Aróũ rü wenaxarũ Tupanapatacaç natáegu ga Moiché iyexmaxũwa.

.....

**Nutawa nichuxchu ga dexá ga Meribawa**

**20** <sup>1</sup>Rü taunecüarü ügüarü tauemacũgu nixĩ ga Iraétanüxũgü ga chianexũ ga Chífũgu áégaxũwa nangugũxũ. Rü nachica ga Cádegu áégaxũgu narücho. Rü yexma nixĩ ga nayuxũ ga Moiché naeyax ga María rü ngixũ nataçgũxũ. <sup>2</sup>Natürü ga duũxũgü rü nüxũ nataxuma ga dexá, rü yemacax nangutaquexegü rü Moichémaxã rü Aróũmaxã narüxutagagü. <sup>3</sup>Rü ñanagürügü Moichéxũ: —Narümemeae chi nixĩ ga wüxigu namaxã tayuexũ ga yema tatanüxũgü ga Cori Tabéragu dajixũ. <sup>4</sup>¿Rü tüxücüü nixĩ i nua toxũ pegagũxũ i toma i Cori ya Tupanaarü duũxũgü nax tixigũxũ? ¿Ëxna penaxwaxe nax nua tayuexũ wüxigu namaxã i toxũnagü? <sup>5</sup>¿Rü tüxücüü ga toxũ ípegaxũxũ ga Equftuanewa nax ñaa nachica i chixexũ rü ãücümaxũwa toxũ pegagũxũcaç? Erü nua rü taxucürüwama tãxacü nuxã tato,

rü nataxuma i iguéra, rü úba, rü boxra. Rü dexá rü nataxu i nawa ixaxexũ —ñanagürügü. <sup>6</sup>Rü nũma ga Moiché rü Aróũ rü nüxna nixĩgachi ga yema duũxũgü, rü Tupanapataarü ücuchicawa naxĩ, rü yexma nanangücuchitanü. Rü yéma nixĩ ga Tupanaarü üüne ga naxcaç nangóxũ. <sup>7-8</sup>Rü nũma ga Cori ya Tupana rü ñanagürü Moichéxũ: —iNayaxu ya yima curü naixmenaxã rü ñuxũchi cuenexẽ ya Aróũarü ngũxẽẽmaxã nangutaquexexẽ i duũxũgü! iRü ñuxũchi guxũpexewa rü yimá ngéma ngẽxmacü ya nutamaxã nüxũ ixu nax dexá pexna naxãxũcaç! Rü tá nüxũ cudau nax yimá nutawa tá dexá yagoxũchiüxũ nax ngẽmawa naxaxegũxũcaç i nümagü i duũxũgü rü naxũnagü —ñanagürü. <sup>9</sup>Rü nũma ga Moiché rü Cori ya Tupanapatawa nanayaxu ga guma naixmenaxã yema nümatama namuaxũrũxũ. <sup>10</sup>Rü ñuxũchi ga Moiché rü Aróũ rü gumá nutaxũtagu nanangutaquexexẽ ga duũxũgü, rü ñanagürü nüxũ: —iIperüxĩnüe, Pa Duũxũgü i Tama Ixĩnüechaũxũx! ¿Rü taxütá ãxna i ñuxma i nüxũ pedauxũ nax daa nutawa dexá pexcaç ngóxũ nax nawa pexaxegũxũcaç? —ñanagürü. <sup>11</sup>Rü yema ñaxguwena ga Moiché rü guma naixmenaxãmaxã naxunagüchacüxü, rü taxrexpüxcüna guma nutawa nanacuajxca. Rü taxũ ga dexá yéma inayagoxũchixü. Rü yemaacü ga duũxũgü rü naxũnagü rü naxaxegü. <sup>12</sup>Natürü nũma ga Cori ya Tupana rü Moichéxũ rü Aróũxũ ñanagürü: —Ñuxma nax tama mea chaugu peyaxögũxũ rü tama choxũ picuaxũügũxũ i napexewa i ngéma

Iraétanüxügü, rü ngëmacax i pema rü marü taxütáma ñaa duüxügümaxã nawa pengugü i ngëma naane i pexna chaxãxü —ñanagürü ga Tupana.

.....

#### Äxtapechicünaxã ga bróuchenaxçax

**21** <sup>4</sup>Rü nüma ga Iraétanüxügü rü ínachoxü nawa ga guma maçpüne ga Oréx ga Chinaígu áégane, rü már ga Dauchiüxüwaama naxí. Rü yexmaama ínayachoege nax tama Edóüanewaama nachopetüxüçax. Rü yexguma namagu naxíyane ga duüxügü rü marü tama Moichéga naxínüechaü.

<sup>5</sup>Rü yemaçax inanaxügüe ga Moichéchiga rü Tupanachiga nax yadexagüxü. Rü ñanagürügü: —¿Tüxcüü ga pema ga Equítuanewa ga toxü ípegaxüxü? ¿Ëxna nua toxü pegagü nax ñaa nachica i chianexü i taxüema íxãpataxügu toxü peyuxëëxüçax? Ñuxma rü toxü nataxu i dexá rü ñna. Rü ñaa ñna i chixemarexü i tangóxü rü marü düxwa nüxü tarüchaue —ñanagürügü. <sup>6</sup>Rü yemaçax ga nüma ga Cori ya Tupana rü naxçax yéma nanamugü ga äxtapegü nax duüxügüxü nangõxgüxüçax. Rü yemamaxã rü muxüma ga Iraétanüxügü rü nayue. <sup>7</sup>Rü nüma ga duüxügü rü Moichéçax naxí rü ñanagürügü nüxü: —Aixcüma chixexü taxügü yerü chixri cuchiga rü Corichiga tidexagü. iRü nüxna naxçax naca ya Cori ya Tupana nax toxna yaxígachixëëaxüçax i ñaa äxtapegü! —ñanagürügü. Rü nüma ga Moiché rü Cori ya Tupanana naca nax Iraétanüxügüaxü nüxü nangümaxüçax ga norü chixexügü. <sup>8</sup>Rü nüma ga Cori

ya Tupana rü Moichéxü nangãxü rü ñanagürü nüxü: —iËcü wüxi i äxtapechicünaxã naxü rü ñuxüchi wüxi i naimaxã napuxpaweru, rü ngëxma nachonagünüta! Rü ngëxguma texéxü nangõxgux i wüxi i äxtape, rü nüxü tadawenü i ngëma äxtapechicünaxã i ngëxma chonagüxü, rü ngëmaäcü taxütáma tayu —ñanagürü. <sup>9</sup>Rü nüma ga Moiché rü nanaxü ga wüxi ga äxtapechicünaxã ga bróuchenaxçax. Rü naimaxã nanapuxpaweru rü yexma nanachonagünüta. Rü yexguma texéxü nangõxgux ga äxtape, rü yema bróuchenaxçax ga äxtapexü tadawenü, rü yemaacü tama tayu.

.....

#### Baláx rü Balaáüçax nangema

**22** <sup>1</sup>Rü nüma ga Iraétanüxügü rü inaxí rü Moáanearü metachinüxügu nayapegü ga natü ga Yudáüarü éstegu ga ñane ga Yericúarü toxmãxtagu. <sup>2</sup>Rü nüma ga Moáanearü äëxgacü ga Baláx ga Chipúru nane rü nüxü nacuáchiga ga ñuxäcü yema Iraétanüxügü rü Amoréutanüxügüxü naporamaegüxü. <sup>3</sup>Rü yexgumarüxü ta ga yema norü duüxügü ga Moáanecüãxgü, rü namüë ga yexguma yema Iraétanüxügüxü nadaugügu ga nax namuxüchixü. <sup>4-5</sup>Rü yemaçax ga yema Moáanecüãxgü rü Madiáüanecüãxgüarü äëxgacügümaxã nidexa rü ñanagürügü nüxü: —Guxüma i ñaa duüxügü i Iraétanüxügü rü tá nanapáxëxë i tóru naane, ñoma wüxi i woca i maxë naguxëëxüxü —ñanagürügü. Rü yemaçax ga nüma ga Moáanearü äëxgacü ga Baláx rü

Tupanaarü orearü uruxû ga Balaáû ga Beú nanecax nangema. Rü nüma ga Balaáû rü ñane ga Pétucüãx nixî rü taxtû ga Eufrátëarü ngaicamagu naxächîû ga Amáxchixüanewa. Rü nüma ga Baláx rü norü duûxügüxü namu nax Balaáûmaxâ rü ñagüxüçax: “Equítuanewa ne naxî i duûxügü i chauchixüane yapaxêêgüxü. Rü ñuxma rü marü chorü toxmáxtagu napegü. <sup>6</sup>Rü paxa nua naxü rü chaugagu chixexü namaxâ naxuegu i ngêma duûxügü! Erü tá toxü narüporamaegü. Rü bexmana ngêmaäcü tá choxü natauxcha nax nüxü charüporamaexü rü íchawoxüxü i nua chauchixüanewa. Rü choma rü meama nüxü chacuax rü ngêxguma taxacümaxâ mexü cuxueguxgu rüçna chixexü namaxâ cuxueguxgu, rü guxüguma aixcüma ningü” ñanagürü. <sup>7</sup>Rü yexguma ga yema orearü ngeruügü ga Moáanecüãxgü rü Madiáüanecüãxgü rü diêrumaxâ Balaáûxütawa naxî nax naxütanügüaxüçax ga chixexü Iraétanüxügümaxâ naxueguxüçax. Rü yexguma Balaáûxütawa nangugügu, rü namaxâ nüxü nixugügü ga Baláxarü ore. <sup>8</sup>Rü nüma ga Balaáû rü nanangâxü rü ñanagürü nüxü: —iËcü nuxâ pepegü i ñaa chütaxü! Rü moxü paçmama tá pexü changâxü i ngêma Tupana chomaxâ nüxü ixuxüäcüma —ñanagürü. Rü yemaäcü ga yema Moáanearü äêxgacüarü orearü ngeruügü rü yexma napegü.

.....

<sup>12</sup>Rü nüma ga Tupana rü Balaáûmaxâ nüxü nixu rü ñanagürü: —Tama chanaxwaxe i nawe curüxü rü chixexü namaxâ cuxuegu i ngêma Iraétanüxügü,

erü ngêma duûxügü rü chomatama marü mexü namaxâ chaxuegu —ñanagürü. <sup>13</sup>Rü moxüäcü paçmama ínadaxgu ga Balaáû rü namaxâ nüxü nixu ga yema duûxügü ga Baláx yéma mugüxü rü ñanagürü nüxü: —iËcü pewoegu pechixüanecax! Rü Cori ya Tupana rü tama nanaxwaxe nax pewe charüxüxü —ñanagürü. <sup>14</sup>Rü yema duûxügü ga Moáanecüãxgü rü nawoegu ga Baláx íyexmaxüwa, rü namaxâ nüxü nixugüe rü ñanagürügü: —Nüma i Balaáû rü tama towe narüxü —ñanagürügü. <sup>15</sup>Natürü nüma ga Baláx rü tama inaxînü, rü wenaxarü togü ga norü duûxügü yéma Balaáûxütawa namugü. Natürü yemagü rü yema nüxíra yéma namugüxüxü narünumae rü ñuxüchi yemaétüwa ügüxü nixîgü. <sup>16</sup>Rü nüma ga yema äêxgacügü rü Balaáûxütawa naxî rü ñanagürügü nüxü: —Nüma ya Baláx ya Chipúru nane rü moxê cuxçax nua namu rü ñanagürü: “iTaxü i cuxoxü nax chauxütawa cuxüxü! <sup>17</sup>Rü choma rü poraäcü cumaxâ chataâxê rü mea tá cuxü chayaxu. Rü tá cuxna chanaxâ i guxüma i taxacü i naxçax ícuçaxaxü. iËcü nua naxü rü choxü rüngüxêxê nax chixexü namaxâ cuxueguxüçax i ñaa Iraétanüxügü!” ñanagürü i nüma i Baláx —ñanagürügü. <sup>18</sup>Natürü nüma ga Balaáû rü nanangâxü rü ñanagürü: —Woo chi Baláx choxna naxâxgu i guxüma i úiru rü diêru i napatawa ngêxmaxü natürü i choma rü taxucürüwa taxacü chaxü, rü woo taxü rü woo íxraxü, ega tama Cori ya Tupanaarü mu yixîgu. <sup>19</sup>Natürü name nixî i pema rü ta rü nuxâ pepegü i ñaa chütaxü, erü ñaa chütaxügu tá nüxü



chacuax rü ngoxi ñuxmagu rü taxacüxü tá chomaxã yaxu ya Cori ya Tupana —ñanagürü. <sup>20</sup>Rü yema ga chütaxügu rü nüma ga Tupana rü Balaáüçax nangox rü ñanagürü nüxü: —Ñuxma nax cuxçax nua naxixü i ngëma yatügu rü iëcü, írüda rü nawe rüxü! Natürü ngëma choma cumaxã nüxü chixuxüxica tátama nixi i cuxüxü —ñanagürü.

**Tupanaarü orearü ngeruxü i  
daxücüax rü Balaáüçax nangox**

<sup>21</sup>Rü moxüäcü paçmama rü ínarüda ga Balaáü rü norü búru naxüxmaçwexe rü nawe narüxü ga yema äëxgacügü ga Moáanecüäxgü. <sup>22</sup>Rü nüma ga Balaáü rü norü búruétügu nixü, rü taxre ga norü duüxügü ínayaxümüçügü. Natürü ga Tupana rü nanu. Rü yemaçax nixi ga Tupanaarü orearü ngeruxü i daxücüax ga Balaáüarü búruçü yachiyepeexü nax taxuacü naxüpetüxüçax. <sup>23</sup>Rü yema búru rü nüxü nadau ga yema Tupanaarü orearü ngeruxü ga norü taramaxã namagu chixü. Rü yemachaxwa namana ínaxücu rü ínangemaanexüwa naxümare. Natürü nüma ga Balaáü rü tama nüxü nadau ga yema Tupanaarü orearü ngeruxü rü yemaçax nanacuaxi ga norü búru nax namawa naxüxüçax. <sup>24</sup>Rü yemaçax nüma ga Tupanaarü orearü ngeruxü i daxücüax rü yema nama íxäxtapüxanexügu rü íyaxixyemaxügu nayachi ga úbanecü íyixüxüwa. <sup>25</sup>Rü yema búru rü wenaxarü nüxü nadau ga yema Tupanaarü orearü ngeruxü i daxücüax rü yemaçax naçtapüxwaama naxüxpetü rü Balaáüxü yéma nayaxüxtüpara. Rü nüma ga Balaáü rü wenaxarü nanacuaxi.

<sup>26</sup>Natürü nüma ga Tupanaarü orearü ngeruxü i daxücüax rü nüxü íra napexewaama naxü rü yema poraäcü íyaxixyemaxügu nayachi ga ngextá taxuwama ínaxüpetüxüwa. <sup>27</sup>Rü yema búru rü wenaxarü nüxü nadau ga yema Tupanaarü orearü ngeruxü i daxücüax, rü yemaçax narüñuächi yerü taxuwama naxüpetüéga. Rü yexguma ga Balaáü rü nanu, rü poraäcü nanacuaxi. <sup>28</sup>Rü yemaçax ga Tupana rü nayadexaxëxë ga yema búru nax Balaáümaxã yadexaxüçax, rü ñanagürü: —¿Taxacü cumaxã chaxü? Rü ñaamaxã rü marü tomaepüxcüna nixi nax choxü cucuaxixü —ñanagürü. <sup>29</sup>Rü nüma ga Balaáü nanangäxü ga norü búru rü ñanagürü nüxü: —¿Tüxcüü i chaugu quidauxcüraxüxü? Rü ngëxguma chi chaxäarü cüxchiäxgux rü ñuxma chitama nixi i nuxã cuxü chimáxü —ñanagürü. <sup>30</sup>Natürü ga yema búru rü ñanagürü nüxü: —Choma nixi i curü búru i guxüguma chautagu cuxaunagüaxü ega ngextá cuxüüxgu. Cuma rü meama nüxü cucuax rü taguma ñuxgu ñuxmarüxü cumaxã chixi —ñanagürü. Rü nüma ga Balaáü rü nanangäxü rü: —Aixcüma nixi i ngëma —ñanagürü. <sup>31</sup>Rü yemaçax ga Cori ya Tupana rü Balaáüxü nüxü nadauxëxë ga yema norü orearü ngeruxü i daxücüax ga namaarü ngäxügu chixü norü taramaxã. Rü yemaxü nadaçuxgu ga Balaáü rü ñaxtüanegu nanangücuchi. <sup>32</sup>Natürü ga Tupanaarü orearü ngeruxü i daxücüax rü Balaáüxü ñanagürü: —¿Tüxcüü tomaepüxcüna cuyamaç i ngëma curü búru? Rü choma nixi i cuxü chichiyepexü, erü ngëma ngëma nax

cuxũũ rü tama chorü me nixĩ. <sup>33</sup>Rü ngẽma curü búru rü choxũ nadau rü ngẽmacax tomaepũxcüna choxũ ínaxüeguãchi. Rü ngẽxguma chi taxüchima choxũ ínaxüeguãchigu, rü marü chi cuyũ chimax natürü ngẽma curü búru rü chi chanamaxẽxẽ —ñanagürü. <sup>34</sup>Rü nüma ga Balaáũ rü Tupanaarü orearü ngeruũxũ nangãxũ rü ñanagürü: —Chixexũ chaxü erü tama nüxũ chacuax nax cuma yixĩxũ i choxũ quichiyepẽxũ. Rü ngẽxguma cuyçax nachixegu nax ngẽma chaxũxũ rü tá chatáegu —ñanagürü. <sup>35</sup>Natürü ga Tupanaarü orearü ngeruxũ i daxücüax rü nanangãxũ rü ñanagürü: —Marü name i nawe curüxü i ngẽma yatügü, natürü ngẽma cumaxã nüxũ chixuxũxica tátama nixĩ i nüxũ quixuxũ —ñanagürü. Rü yemaçax ga Balaáũ rü nawe narüxü ga yema ãẽxgacügü ga Baláx yéma mugüxũ.

#### Baláx rü Balaáũxũ mea nayaxu

<sup>36</sup>Rü yexguma Baláx nüxũ cuáchigagu ga Balaáũ nax yangaicaxũ, rü inaxüãchi rü wüxi ga ñane ga Moáanecüãxgüarügu nüxũ nayangau. Rü guma ñane rü natü ga Anóücutüwa nayexma ga Moáchixüanearü üyeanewa. <sup>37</sup>Rü ñanagürü nüxũ: —Muexpũxcüna chanamu nax cuyçax yacagüxũçax. ¿Rü taxacüçax i tama nua cuyxüchaxũxũ? ¿Ëxna nagu curüxĩnũ rü taxüchima mea cuyũ chayaxu? —ñanagürü. <sup>38</sup>Rü nüma ga Balaáũ rü nanangãxũ rü ñanagürü: —Düçax, marü nua chaxü nax cuyũ íchayadauxũçax. Natürü i choma rü choxũ nataxu i pora nax chauechamatama taxacürü orexũ

chixuxũçax. Erü choma rü ngẽma Tupana chomaxã nüxũ ixuxũxicatama tá nixĩ i nüxũ chixuxũ —ñanagürü. <sup>39</sup>Rü Tupanaarü orearü uruxũ ga Balaáũ rü ãẽxgacü ga Baláxwe narüxü ñuxmata Quiriáx-uchúwa nangugü. <sup>40</sup>Rü yéma ga Baláx rü norü duũxũgüxũ namu nax wocagü rü carnérugü nadaixũçax. Rü ñuxüchi Balaáũxütawa rü yema togü ga ãẽxgacügü ga íyaxümücügüxütawa nanamugü ga ñuxre ga namachi nax nüxna naxãgüaxũçax. <sup>41</sup>Rü moxüãcü rü nüma ga Baláx rü Balaáũxũ ínayadau. Rü maçpüne ga Bamó-baágu nanaxĩnagüxẽxẽ nax yéma nüxũ nadauxũçax ga Iraétanüxügü ipegüxüwa.

**23** <sup>1</sup>Rü yexguma ga nüma ga Balaáũ rü ñanagürü nüxũ: —İËcü 7 i ãmarearü guchicaxü nuxã naxü, rü ínayauxũ i 7 i wocaxacügü rü 7 i carnérugü nax çauxçax ínamemarexũçax! —ñanagürü. <sup>2</sup>Rü nüma ga Baláx rü nanaxü ga yema Balaáũ namaxã nüxũ ixuxũ. Rü wüxigu nügümaxã rü nayamaçgü rü nayagugü ga wüxi ga wocaxacü rü wüxi ga carnéru ga wüxichigü ga naxünaarü guchicaxüwa.

#### Balaáũ rü mexü

##### Iraétanüxügümaxã naxuegu

<sup>3-4</sup>Rü ñuxüchi Balaáũ rü ñanagürü Baláxũ: —İËcü nuxã naxünaarü guchicagüxütagu rüxãx! Rü choma rü tá cuyna chixügachi nax íchayadauxũçax ngoxi ngẽma çauxçax naxü ya Cori nax ngẽxma choxũ nangauxũçax. Rü ñuxüchi tá cumaxã nüxũ chixu i ngẽma chomaxã nüxũ

yaxuxũ —ñanagürü. Rũ nüma ga Balaáũ rũ wüxi ga maḡpúne ga chianenewa naxũ, rũ yéma nixĩ ga Tupana naxcaḡ ngóxũ. Rũ nüma ga Balaáũ rũ ñanagürü Tupanaxũ: —Marü chanaxü i 7 i ãmarearü guchicaxũ, rũ wüxichigü i ngêma guchicaxüwa rũ chayagu i wüxi i wocaxacü rũ wüxi i carnéru —ñanagürü. <sup>5</sup>Rü yexguma ga Cori ya Tupana rũ Balaáũmaxã nüxũ nixu ga wüxi ga ore ga Baláxcax ixixũ, rũ ñuxüchi ñanagürü nüxũ: —iËcü natáegu i naxütawa i Baláx rũ namaxã nüxũ ixu i ngêma ore i cumaxã nüxũ chixuxũ! —ñanagürü. <sup>6</sup>Rü nüma ga Balaáũ rũ natáegu rũ Baláxũ inayangau ga yexma naxünaarü guchicagüxütagu chigüxũ namaxã ga guxüma ga ãëxgacügü ga Moáanecüãxgü. <sup>7</sup>Rü nüma ga Balaáũ rũ nüxũ nixu ga ñaa ore rũ ñanagürü: —Yéama yáxüwa ínamḡxpúneanexüwa i Aráũwa choxũ ne naxüxëxë ya Baláx ya Moáanecüãxgüarü ãëxgacü. Rũ ñanagürü choxũ: “iRü nua naxü rü chixexũ namaxã naxuegu i ngêma Iraétanüxügü nax ngêmaäcü chixexũ namaxã ngupetüxücaḡ!” ñanagürü choxũ. <sup>8</sup>¿Natürü ñuxäcü tá chixexũ namaxã chaxuegu i ngêma duüxügü i Tupana tama chixexũ namaxã ueguxũ? ¿Rü ñuxäcü tá chixexügü namaxã charüxínü i ngêma duüxügü i Cori ya Tupana tama chixexügü namaxã rüxínüxũ? <sup>9</sup>Rü nua daa maḡpúnechitaeruwa rü meama nüxũ chadau i ngêma Iraétanüxügü. Rũ daa maḡpúnetapexewa rü meama nüxũ chadawenü. Rũ chanangugü rü duüxügü i nügütanüxügüxicatama ixächüügüxũ nixigü. Rũ tama togü i duüxügümaxã

nawüixigu erü tama togü i duüxügümaxã nügü narüxücu. <sup>10</sup>Rü ñoma taḡxacü i ätexexürüxũ namuxüchi ¿rü texé tá tayaxugü? ¿Rü texé tá nüxũ cuáxũ i norü mu? Chierü ngêma duüxügü i mexürüxũ chixixgu ñuxmatáta chayux, rü ngêmawena rü Tupana ngêma duüxügüxũ nadauxürüxũ, choxũ nadaux nax chamexũ —ñanagürü. <sup>11</sup>Rü yexguma ga Baláx rũ Balaáũxũ namuama yerü ga Balaáũ rü tama nanaxü ga yema nüxna naxcaḡ nacaxaxũ, rü ñanagürü: —¿Taḡxacü nixĩ icuxüxũ? Rũ choma rü cuxcaḡ nua changema nax chixexũ namaxã cuxuegüxücaḡ i ñaa chorü uanügü, natürü i cuma rü mexũ namaxã cuxuegu —ñanagürü. <sup>12</sup>Rü nüma ga Balaáũ rü nanangäxũ rü ñanagürü: —¿Tama ëxna nüxũ cucuax nax cumaxã nüxũ chixuxũ rü ngêma Tupana chomaxã nüxũ ixuxüxicatama tá yixixũ i ngêma nüxũ chixuxũ? —ñanagürü. <sup>13</sup>Natürü nüma ga Baláx rü Balaáũxũ nicaxaxüchigüama rü ñanagürü: —iËcü nua toxnamana chowe rüxü, rü ngêma tá nixĩ i naxpechinügüxica tátama cudauxü ya yima norü íane i ngêma duüxügü, natürü taxütáma guxügü cudauane i norü íanewa! Rũ chanaxwaxe nax ngêma chixexũ namaxã cuxuegüxũ —ñanagürü. <sup>14</sup>Rü nüma ga Baláx rü wüxi ga naane ga dauxütaechica ga Chopífügu äégaxüwa nanaga ga maḡpúne ga Pígatapexewa. Rũ yexma nanaxü ga 7 ga ãmarearü guchicaxũ. Rũ wüxichigüwa nayagu ga wüxi ga wocaxacü rü wüxi ga carnéru. <sup>15</sup>Rü yema nachicawa rü nüma ga Balaáũ rü ñanagürü Baláxũ: —iËcü nua

ñaa naxũna íguxũxũtagu ruxãũx! rü choma rü tá yoxni Tupanamaxã charüdexa —ñanagürü. <sup>16</sup>Rü nüma ga Cori ya Tupana rü yexma Balaáũxũ nayangau, rü namaxã nüxũ nixu ga yema ore ga Baláxmaxã tá nüxũ yaxuxũ. Rü ñanagürü ta nüxũ: —İĒcü natáegu naxũtawa i Baláx rü namaxã nüxũ ixu i ngẽma cumaxã nüxũ chixuxũ! —ñanagürü. <sup>17</sup>Rü nüma ga Balaáũ rü natáegu. Rü Baláxũ inayangau ga naxũna íguxũxũtagu chixũ namaxã ga ãĕxgacũgũ ga Moãanecũãxgũ. Rü nüma ga Baláx rü Balaáũna naca rü ñanagürü: —ĈRü ñuxũ ñaxũ cuyũ ya Cori ya Tupana? —ñanagürü. <sup>18</sup>Rü yexguma ga nüma ga Balaáũ rü nüxũ nixu ga ñaa ore, rü ñanagürü: —Pa Baláx ya Chipúru Nane İxícũx idúcax, mea choxũ irũxĩnũ! <sup>19</sup>Rü Tupana rü tama duũxũgũ nagu rũxĩnũxũgu narũxĩnũ, rü taguma nidora rü taguma nanaxũchicũxũ i norũ ĩnũ. Rü ngẽxguma taxacũxũ yaxuxgu rü aixcũmama nanaxũ. Rü ngẽxguma taxacũcax inaxunetagu rü aixcũmama nayanguxẽxẽ. <sup>20</sup>Rü choma rü choxũ namu ya Tupana nax mexũ namaxã chaxueguxũcax i ngẽma duũxũgũ i İraétanũxũgũ erũ nümatama ya Tupana rü mexũ namaxã naxuegu rü ngẽmacax i choma rü taxucürũwa chixexũ namaxã chaxuegu. <sup>21</sup>Rü taguma texéxũ nawomũxẽẽgũ i ngẽma duũxũgũ rü taguma texémaxã chixexũ naxũgũ i ngẽma İraétanũxũgũ i Acóbuari duũxũgũ ixĩgũxũ. Rü Cori ya norũ Tupana rü natanũwa nangexma, rü nümagũ rü norũ ãĕxgacũãcü nüxũ nacuxgũ —ñanagürü ga Balaáũ.

.....

<sup>25</sup>Rü yexguma ga Baláx rü ñanagürü Balaáũxũ: —Ñuxma nax tama cuyũ natauxchaxũ nax chixexũ namaxã cuyueguxũ i ngẽma İraétanũxũgũ, rü ngexrũma noxtacũma nax mexũ namaxã cuyueguxũ —ñanagürü. <sup>26</sup>Rü nüma ga Balaáũ rü nanangãxũ rü ñanagürü: —ĈTama ĕxna nagu curũxĩnũ nax marũ cumaxã nüxũ chixuxũ rü ngẽma Tupana chomaxã nüxũ ixuxũixicatama tá yixĩxũ i ngẽma nüxũ chixuxũ? —ñanagürü. <sup>27</sup>Rü yexguma ga Baláx rü ñanagürü nüxũ: —İĒcü, nua toxnamana chowe rũxũ! Rü bexmana ega ngẽma nachicawa chixexũ namaxã cuyueguxgu i ngẽma İraétanũxũgũ rü taxũtãma nanu ya Tupana —ñanagürü. <sup>28</sup>Rü yemaacũ ga Baláx rü maxpũne ga Peúgu áeganewa Balaáũxũ naga. Rü yéma nixĩ ga meama naétũ idauxũ ga guxũma ga yema chianexũ. <sup>29</sup>Rü yexguma ga nüma ga Balaáũ rü ñanagürü nüxũ: —İĒcü 7 i ãmarearũ guchicaxũ nuxã naxũ, rü ĩnayauxũ i 7 i wocaxacũgũ rü 7 i carnérugũ nax chauxcax ĩnamemarexũcax! —ñanagürü. <sup>30</sup>Rü nüma ga Baláx rü nanaxũ ga yema Balaáũ namaxã nüxũ ixuxũ. Rü nayamaç rü nayagu ga wũxi ga wocaxacũ rü wũxi ga carnéru ga wũxichigũ ga yema naxũnaarũ guchicaxũwa.

**24** <sup>1</sup>Natürü nüma ga Balaáũ rü marũ nüxũ nicuxãxãchi rü Cori ya Tupana rü tagutãma chixexũ İraétanũxũgũmaxã naxuegu. Rü yemaçax marũ tama wena Tupanaxũtawa naxũ nax ore yayaxuxũcax noxrirũxũ. Rü yema İraétanũxũgũ İpegũxũgu nadawenũmare.

**Ore i mexũ i Tupana  
Balaáũaxwa nũxũ ixuxũ**

<sup>2</sup>Rũ yexguma nũxũ nadauyane ga yema Iraétanũxũgũ nax nũgũtanũxũchigiũaciũma naxãpatagũxũ, rũ Tupanaãxẽ ya Üünexũ rũ Balaáũna nangu rũ namaxã inacuaçx. <sup>3</sup>Rũ yemacax ga nũma ga Balaáũ rũ nũxũ nixu ga ñaa ore nachiga ga Iraétanũxũgũ, rũ ñanagũri: —Ñaa nixĩ i chorũ ore i choma i Peũ nane i mearũ daweniúacũ chixĩxũ. <sup>4</sup>Rũ ngẽxguma Tupana choxũ nũxũ dauxẽẽgux, rũ nũma ya guxũétũwa ngẽxmacũ meama choxũ nũxũ nacuaçxẽxẽ i ngẽma nax ñuxacũ tá yixĩxũ i ngẽma Iraétanũxũgũ. <sup>5</sup>Rũ pemax, Pa Acóbutanũxũgũx rũ nĩmexechi ya pepatagũ. Rũ pemax, Pa Iraétanũxũgũx, rũ namexechi i ngẽma ípepegũxũwa. <sup>6</sup>Rũ pepatagũ rũ ñoma temagũ i máxchimũxũxũxũxũ nixĩgũ. Rũ ngẽma ípepegũxũwa rũ ñoma orĩxneçũ i natũpechinũgu togũxũrũxũ nixĩgũ. Rũ pema rũ ñoma naigũ i mexechixũ i Tupanatama itogũxũrũxũ pixĩgũ, rũ ñoma ocayiwagũ i natũpechinũwa rũxũgũxũrũxũ pixĩgũ. <sup>7</sup>Rũ pemax, Pa Iraétanũxũgũx, rũ tá pexũ nangexma i taxũtama i dexá nax nawa pexaxegũxũçax rũ penetũgũ namaxã pimegũxũçax. Rũ perũ ãẽxgacũgũ rũ tá guxũ i togũ i ãẽxgacũgũétũwa nangexmagũ, rũ pechixũane rũ tá naporaxũchĩ. <sup>8</sup>Rũ guma Tupana ga Equítuanewa pexũ ínguxũxẽecũ rũ yimá tá nixĩ ya pora pexna acũ. Rũ pema i Iraétanũxũgũ rũ tá penadai i guxũma i nachixũãneçũãxgũ i perũ uanũgũ ixĩgũxũ. Rũ tá ipenapóũgũchinaxã, rũ tá

pexnemaxã penadai. <sup>9</sup>Rũ ngẽxguma ípecagũgux nax pepeexũçax rũ ñoma wũxi i ai i pexũrũxũ tá pixĩgũ nax taxũtama tũgũ írũporaxũ nax pexũ ítabaĩxgũxũçax. iRũ mexũ tũxũ ngupetũ ya yĩxema mexũ pemaxã ueguxe, Pa Iraétanũxũgũx, rũ chixexũ tũxũ ngupetũ ya yĩxema chixexũ pemaxã ueguxe! —ñanagũri ga Balaáũ. <sup>10</sup>Rũ yemaxũ naxĩnũgu ga Baláx rũ poraãcũ nanuxũchi Balaáũmaxã, rũ napéxmxẽãcũmaxã ñanagũri: —Choma rũ cuxçax changema nax chixexũ namaxã cuxueguxũçax i ngẽma chorũ uanũgũ, natũrũ marũ tomaepũxçũna nixĩ nax mexũ namaxã cuxueguxũ. <sup>11</sup>Rũ narũmemae nixĩ nax cuchiũçax cutáeguxũ. Choma rũ marũ ichaxuneta nax mexũmaxã cuxũ chatachigaxẽẽxũ, natũrũ nũma ya Cori ya Tupana rũ tama nanaxwaxe nax ngẽma mexũ cumaxã chaxixũ —ñanagũri.

.....

**Moáanecũãxgũarũ tupana ga Baá-peũxũ  
nicuaçxũxũgũ ga Iraétanũxũgũ**

**25** <sup>1</sup>Rũ yexguma Chitĩũgu naxãchiũũgũga ga Iraétanũxũgũ, rũ yema norũ ngextũxũcũgũ rũ inanaxũgũe ga Moáanecũãxgũarũ paxũgũmaxã nax namaxẽxũ. <sup>2</sup>Rũ dũxwa ga nũma ga paxũgũ rũ norũ tupanagũçax ínangutaquexegũxũwa yema ngextũxũcũgũxũ nagagũ. Rũ nũma ga Iraétanũxũgũ rũ natanũwa nachibũe rũ ñuxũchi yema Moáanecũãxgũarũ tupanaxũ nicuaçxũxũgũ. <sup>3</sup>Rũ yemaacũ muxũma ga yema Iraétanũxũgũ rũ nũgũ inaxãgũ

nax Baá-peúxũ nax yacuaxũũgũxũ. Rũ yemacax ga Cori ya Tupana rũ poraãcü Iraétanũxũgũmaxã nanu. <sup>4</sup>Rũ yemacax Moichéxũ ñanagürũ: —iËcü nangutaquexexẽ i guxũma i ngẽma Iraétanũxũgũarũ ãẽxgacũgũ i nayauxgũxũ nax Baá-peúxũ yacuaxũũgũxũ! iRũ chopexegu nadai i ngunecũ rũ ñuxũchi naitanũwa nachũxũquegũxẽxẽ i naxũnegũ nax guxũma i duũxũgũ nũxũ nadaugũxũcax! Rũ ngẽxgumaxica tá nixĩ i charũngũxmũxũ namaxã i ngẽma Iraétanũxũgũ —ñanagürũ ga Tupana. <sup>5</sup>Rũ yexguma ga nũma ga Moiché rũ nanamu ga norũ ngũxẽerũũgũ ga ãẽxgacũgũ ga wũxítũcumũchigũ ga Iraétanũxũgũmaxã icuaxgũxũ, rũ ñanagürũ nũxũ: —Rũ wũxichigũ i pema rũ tá penadai i ngẽma petanũxũgũchigũ ixĩgũxũ i nũgũ ixãgũxũ nax Baá-Peúxũ yacuaxũũgũxũ —ñanagürũ. <sup>6</sup>Natürũ yexguma Moichémaxã Tupanapataaxtũwa nangutaquexegũgu ga Iraétanũxũgũ ga íauxexũ, rũ yexgumayane rũ wũxi ga Iraétanũxũ rũ wũxi ga ngexũ ga Madiáũanecũaxmaxã yéma naxũpetũ nax napatawa nagaaxũcax. <sup>7</sup>Rũ yexguma yema yatũxũ nadãuxgu ga Finée ga Erechá nane ga chacherdóte ga Aróũtaxa, rũ nixũgachi ga yema Iraétanũxũgũ íngutaquexegũxũwa. Rũ nanayaxu ga norũ wocae. <sup>8</sup>Rũ nawe nangẽ ga yema yatũ ga chixexũ üxũ ñuxmata norũ pechicawa. Rũ yexma nayatopetũtanũ ga yema taxre norũ wocamaxã. Rũ yemaacũ inarũxo ga yema dawean. <sup>9</sup>Natürũ 24,000 ga Iraétanũxũgũ nixĩ ga yema chixexũgagu namaxã yuexũ. <sup>10</sup>Rũ

yemawena ga Cori ya Tupana rũ Moichémaxã nũxũ nixu rũ ñanagürũ: <sup>11</sup>—Yimá Finéegagu nixĩ i charũngũxmũxũ namaxã i ngẽma Iraétanũxũgũ erũ nũma ga Finée rũ chauxrũxũ poraãcü nayanuxũ i ngẽma Iraétanũxũgũ. Rũ ngẽmacax nixĩ i yaxna ngẽma duũxũgũmaxã chaxĩnũ, rũ tama chanadaxichixũ. <sup>12-13</sup>iRũ Finéemaxã nũxũ ixu rũ tá nũxũ chaxuneta nax nũma rũ nataagũ nax Iraétanũxũgũarũ chacherdótegũ yixĩgũxũcax i guxũgutáma! Erũ nũma rũ chauxcax nayanuxũ rũ yemagagu nixĩ ga choxũ nangũxmũxẽxũ namaxã i ngẽma Iraétanũxũgũ —ñanagürũ.  
.....

#### Madiáũanecũaxgũxũ nadai

**31** <sup>1</sup>Rũ nũma ga Cori ya Tupana rũ Moichémaxã nidexa rũ ñanagürũ nũxũ: <sup>2</sup>—iËcü naxũtanũ i Iraétanũxũgũ rũ nadai i ngẽma Madiáũanecũaxgũ erũ chixexũgu Iraétanũxũgũxũ nayixẽxẽ! Rũ ngẽmawena, Pa Moichéx, rũ marũ name nax cuyuxũ —ñanagürũ. <sup>3</sup>Rũ yexguma ga nũma ga Moiché rũ duũxũgũxũ ñanagürũ: —iÑuxre i pema rũ penamexẽxẽ i pexnegũ nax Cori ya Tupanaégagu peyadãixũcax i Madiáũanecũaxgũ nax ngẽmaacũ yixĩ ixũtanũxũcax naxcax ga yema chixexũ ga Tupanapexewa naxũgũxũ! <sup>4</sup>Rũ ngẽmacax rũ wũxítũcumũwachigũ tá ngẽma penamugũ i 1000 chigũ i churaragũ i daiwa íxũ. <sup>5</sup>Rũ ngẽmacax name nixĩ i wũxítũcumũwachigũ peyadexechixũ i 1000 i churaragũ nax ngẽmaacũ guxũwama 12,000 wa

nanguxũcax. Rũ ngẽmagũ rũ mea tá nixãxne nax daiwa naxĩxũcax — ñanagũrũ. <sup>6</sup>Rũ nũma ga Moiché rũ inanamuãchitanũ nax daiwa naxĩxũcax. Rũ nũma ga chacherdóte ga Ereachá nane ga Finée nixĩ ga íyaxũmücũxũ. Rũ nũma nixĩ ga namaxã inacuáxũ ga yema Tupanapataarũ yemaxũgũ ga iünexũ ga íyangegũxũ rũ cornétagũ ga yacuegũne. <sup>7</sup>Rũ yexguma ga yema Iraétanũxũgũ rũ guxũma ga yema yatũgũ ga Madiáũanecũãxgũxũ nadai yema Cori ya Tupana Moichémaxã nüxũ ixuxũrũxũ. <sup>8</sup>Rũ nanadai ga yema 5 ga Madiáũanecũãxgũarũ ãẽxgacũgũ ga Éwi, rũ Requéũ, rũ Chux, rũ Úrux, rũ Réba. Rũ yexgumarũxũ ta nayamaxgũ ga Balaáũ ga Beú nane. <sup>9</sup>Rũ nũma ga Iraétanũxũgũarũ churaragũ rũ ínanayauxũ ga yema Madiáũanecũãxgũarũ ngexũgũ rũ norũ buxũgũ. Rũ yexgumarũxũ ta nayagagũ ga norũ wocagũ rũ togũ ga naxũnagũ rũ nayana ga norũ yemaxũgũ. <sup>10</sup>Rũ ñuxũchi ínanagu ga norũ íanegũ ga taxũne rũ norũ íanexacũgũ. <sup>11-12</sup>Rũ guxũma ga yema ngexũgũ rũ buxũgũ ga ínayauxũxũ rũ wocagũ rũ togũ ga naxũnagũ ga yagagũxũ, rũ Moichéxũtawa rũ chacherdóte ga Ereacháxũtawa nanagagũ ga ngextá yema togũ ga Iraétanũxũgũ íyexmagũxũwa ga Moáanearũ metachinũxũwa ga natũ ga Yudáũarũ éstewa ga íane ga Yericúarũ toxmaxtawa. <sup>13</sup>Rũ nũma ga Moiché rũ chacherdóte ga Ereachá rũ guxũma ga togũ ga ãẽxgacũgũ, rũ yema churaragũcax nibuxmũ nax yéma ínapegũxũpemagu nüxũ yangaugũxũcax.

<sup>14-15</sup>Natürũ nũma ga Moiché rũ yema churaragũerugũmaxã nanu rũ ñanagũrũ nüxũ: —¿Tũxcũũ penamaxẽxẽxẽ i ngẽma ngexũgũ? <sup>16</sup>Erũ nũmagũ nixĩ i Balaáũarũ ucuxẽ inaxĩnüexũ rũ yemamaxã nachixexẽẽgũaxũ ga tatanũxũ nax Baá-peúxũ yacuaxũũgũxũcax. Rũ yema chixexũgagu nixĩ ga Tupana nadáixũ ga tatanũxũ. <sup>17</sup>IRũ ñuxmatama penadai i ngẽma buxũgũ i yatũxũ rũ guxũma i ngẽma ngexũgũ i marũ yatũmaxã maxẽxũ! <sup>18</sup>Natürũ ngẽma paxũgũ i taguma yatũmaxã maxẽxũ, rũ ngexrũma nax penadáixũ. Rũ pexũtaxũxũ penayaxu ega penaxwaxegu —ñanagũrũ.

.....

Tupana nüxũ nixu nax ñuxãcü tá nügũ yanuãxũ i Canaáũane

**33** <sup>50</sup>Rũ nũma ga Cori ya Tupana rũ Moichémaxã nidexa ga yexguma Moáanearũ metachinũxũwa nayexmagu ga natũ ga Yudáũcutiwa ga Yericúarũ toxmaxtawa. Rũ ñanagũrũ nüxũ: <sup>51-52</sup>—ÍËcü ngẽma Iraétanũxũgũmaxã nüxũ ixu i ñaa dexa! “Ngẽxguma pema tá pichóũgu i ngẽma natũ i Yudáũ rũ nawa pichocũxgux i ngẽma Canaáũcüãxgũarũ naane, rũ íecũ ípenawoxũ i guxũma i ngẽma duũxũgũ nawa i ngẽma naane! iRũ nagu pepogũe i guxũma i norũ tupanachicũnaãxãgũ i nutanaxcax rũ úirunaxcax rũ diêrumünaxcax! iRũ ngẽxgumarũxũ ta nagu pepogũe i guxũma i norũ ãmaregũarũ guchicaxũgũ i maxpúnetapepegũwa ngẽxmagũxũ! <sup>53</sup>iRũ pema namaxã ipecuá i ngẽma

nachixũane! iRü ngẽxma nagu  
 pexãchiũgü erü chomatama pexna  
 chanaxã nax pema nawa pemaxẽxũcax!  
<sup>54</sup>Natürü ngẽxguma pegü peyanúxgu i  
 ngẽma naane rü wüxitücumüwachigü tá  
 nanayaxu i ngẽma nagu nanguxũ. Rü  
 ngẽma natücumü i rümumaexũ rü tá  
 nanayauxgü i rütamaexũ i naane. Rü  
 ngẽma natücumü i rünoxremaexũ rü tá  
 nanayauxgü i ngẽma rüxframaexũ i  
 naane. Rü ngẽmaãcü  
 wüxitücumüwachigü tá nanayaxu i  
 ngẽma nagu nanguxũ. <sup>55</sup>Natürü i pema  
 rü ngẽxguma ngẽma naane peyauxgux

nax nagu pexãchiũgüxũcax rü name nixĩ  
 i ípenawoxũ i guxũma i ngẽma duũxũgü  
 i ngẽxma ãchiũgüxũ. Erü ngẽxguma  
 taxũtáma ípenawoxũgu i guxũma i  
 ngẽma duũxũgü, rü ngẽma ngẽma  
 yaxüxũ rü tá pexũ ngẽma nachixewe  
 ñoma wüxi i naitüchi pexetügu  
 nguxgurüxũ, rü ñoma wüxi ya tuxugu  
 penguxgurüxũ tá nixĩ. <sup>56</sup>Rü ngẽxguma i  
 choma rü tá pexũama chapoxcu namaxã  
 i ngẽma poxcu i ngẽma  
 duũxũgücxchirex ixixũ”, ñanagürü ga  
 Cori ya Tupana.  
 .....



# DEUTERONÓMIO

## (Wenaxarü naxümatü ga Tupanaarü mugü)

Moichéarü ore ga Iraétanüxügümaxã  
nüxü yaxuxü

**1** <sup>1</sup>Rü ñaagü nixí ga yema ore ga Moiché nüxü ixuxü namaxã ga guxüma ga Iraétanüxügü ga yexguma Arabáarü chianexüwa nayexmagügu ga natü ga Yudááiarü éstewa ga Súxarü toxmãxtawa. Rü yema Arabáarü chianexü rü Paráü rü Topére rü Labáü rü Acherü rü Dichaáarü ngãxüwa nayexma.

.....

<sup>3-4</sup>Rü 40 ga taunecü marü nangupetü ga maxpüne ga Oréx i Chinaígu áégacüwa nax ínachoxüxü ga yema Iraétanüxügü. Rü Moiché rü marü nüxü narüporamae ga guma Amoréutanüxügüiarü áëxgacü ga Seú ga Ebóügu áchiücü rü guma Bachááiarü áëxgacü ga Ox ga Atarúgu áchiücü ga Edréanewa. Rü yexguma norü 40 ga taunecüwa nanguxgu ga norü 11 ga tauemaciáarü ügügu, rü yexguma nixí ga Moiché Iraétanüxügümaxã nüxü yaxuxü ga guxüma ga yema ore ga Tupana namaxã nüxü ixuxü naxcãx ga yema natanüxügü.

.....

Yema 12 ga ngugütaetanüxügü  
rü inaxíachi

<sup>19</sup>Rü nüma ga Moiché rü ñanagürü: —Yexguma Oréxwa ítachoxügu, rü guma maxpünegü ga Amoréutanüxügü nagu áchiügünewaama taxí, yerü yemaacü nixí ga tórü Cori ya Tupana ga nanaxwãxexü. Rü nagu taxí ga yema nachica ga chianexü ga áücümaxü ga pema marü nüxü pedauxü, rü ñuxmata nawa tangugü ga Cadé-banéa. <sup>20</sup>Rü yéma nixí ga pemaxã nüxü chixuxü rü ñachaxü: “Rü marü nawa tangugü i ñaa Amoréutanüxügü nawa ngëxmagüxü i máxpüxanexü i Cori ya tórü Tupana tüxna áxü. <sup>21</sup>Rü nüma ya Cori ya tórü Tupana ixícü, rü marü pexna nanaxã i ñaa naane. iRü ëcü nawa pexí rü nagu pexãchiügü ngëma Cori ya perü oxígüarü Tupana nüxü ixuxürüxü! iRü taxú i pemuëxü, rü bai tá ípeyachaxãchitanüxü!” ñacharügü.

<sup>22</sup>Natürü ga pema rü choxna peyacagü rü ñapegürügü: “¿Tau ëxna inamexü i ñuxre i tamücügü i nüxíra ngëma íxü nax yangugüaneãxüçax i ngëma naane rü ñuxüchi taxcãx nawoeguxü nax

tamaxã nüxũ yaxugũxũcax rü ngexũrüüxũ i namagu tá ixĩxũ rü ngexnerüxüne ya ñanegügu tá tachocuxũ?” ñaperügügü. <sup>23</sup>Rü yema pema chomaxã nüxũ pixuxũ rü çauxçax rü name. Rü yemacax petanüwa chanade ga 12 ga yatügü. Rü wüxi tücumüwachigü nüxũ chaxuneta ga wüxi. <sup>24</sup>Rü yema yatügü rü inaxĩächi rü ñnamaxpüanexũwaama naxĩ rü Ecüarü ngatewa nangugü rü meama nagu nixĩägütanü ga yema naane. <sup>25</sup>Rü yemawena rü yema naanecũax ga nanetüarü o tanabuxgü rü taxçax nua nanangegü, rü tamaxã nüxũ nixugü rü ñanagürügü: “Rü ngẽma naane i tórü Cori ya Tupana tüxna äxũ, rü mexechixũ nixĩ”, ñanagürügü. <sup>26</sup>Natürü ga pema rü tama yema pexĩxçau rü tama naga pexĩnie ga yema tórü Cori ya Tupana pemaxã nüxũ ixuxũ. <sup>27</sup>Rü pechiũgüwa rü naxçax pidexagü rü ñaperügügü: “Nüma ya Cori rü tama aixcuma tüxũ nangeçau, rü tüxũ ñnagaxũ ga Equítuanewa nax Amoréutanüxügüna tüxũ yamugũxũcax nax tüxũ nadaixũcax”, ñaperügügü. <sup>28</sup>Rü ñaperügügü ta: “Rü ñuxma çrü ngexta tá taxĩ? Rü tatanüxũgü rü nüxũ nixugügü rü ngẽma nax nangemaxũ i duũxũgü i tüxũ rüporamaegüxũ rü tüxũ rümáchanemaegüxũ, rü nangexmaxũ ya ñanegü ya itaxũne ya imáchanearü poxeguãxgüne, rü nüxũ nadaugüxũ ga Anáxtanüxũ ga imáchanexũchixũ. Rü guxũma ga yema nixĩ ga toxũ íyaxoetanüächixẽexũ”, ñaperügügü. <sup>29</sup>Rü yexguma ga choma rü pexũ changãxũ rü ñachagürü: “¡Taxũ i pexoégaãegüxũ rü nüxũ pemuẽexũ!

<sup>30</sup>Rü yimá tórü Cori ya Tupana rü tá pepexegu nixũ, rü nüma rü tá namaxã nügü nadai erü pexçax nanu yema Equítuanewa pexũ naxütanügürüxũ. <sup>31</sup>Rü yexguma nachica ga chianexũwa pichopetüxgu rü nüma ga perü Cori ya Tupana rü ñoma wüxi i papá naxacixe nügüchacüügu tüxũ igaxũrüxũ meama pexũ nigagü rü ñuxmata ñaa nachicawa pengugü”, ñachagürü. <sup>32</sup>Rü woo yemaacü pexũ nayagagüxũ, natürü ga pema rü tama nagu peyaxögü. <sup>33</sup>Rü nüma nixĩ ga pemaxã inacuãxũ rü pepexegu yaxũxũ nax nüxũ naxunetaxũcax ga nachica ga nagu tá pipegüetanüxũ. Rü yexguma çütacü ipexĩxgu rü üxüemamaxã pexũ nüxũ nacuaçexẽ ga nama ga nagu tá pexĩxũ, rü ngunecü rü wüxi ga caixanexũmaxã pexũ nüxũ nacuaçexẽ.

**Cori ya Tupana rü  
Iraétanüxügümaxã nanu**

<sup>34</sup>Rü yexguma nüxũ naxĩnügü ga Cori ya Tupana ga chixri nachiga nax pidexagüxũ, rü poraãcü nanu, rü ñaa ore pemaxã naxuegu: <sup>35</sup>“Rü bai i wüxi i ñaa duũxũgü i chixecümagüxũ rü tá nüxũ nadaugü i ngẽma naane i mexũ ga norü oxigümaxã nüxũ chixuxũ. <sup>36</sup>Natürü ya Caréx ya Yefüne nanexica tá nixĩ ya nüxũ daucü, rü nüxna rü nanegüna tá nixĩ i chanaxãxũ i ngẽma naane ga marü nawa nangaxũ, yerü nüma rü aixcuma mea chauga naxĩnü”, ñanagürü ga Tupana. <sup>37</sup>Rü pegagu nixĩ ga Cori ya Tupana ga chomaxã nanuxũ rü ñaxũ choxũ: “Woo i cuma rü taxütáma nawa cungü i ngẽma naane. <sup>38</sup>Rü cuchicüxü tá ngẽma nangu ya

yimá curü ngüxêëruxü ya Yochué ya Núü nane. iRü nüxü nangúchaüxêxê erü nüma tá nixí i Iraétanüxügüna naxããxü i ngêma naane!” ñanagürü ga Cori ya Tupana.

.....

**Ngêma mu i guxüétüwa ngêxmaxü**

**6** <sup>1</sup>Rü ñanagürü ga Moiché: —Nüma ga Cori ya Tupana rü choxü namu nax pexü changüxêxêxüçax i ñaa mugü nax nagu pexüçax nawa i ngêma naane i tá pexna naxãxü. <sup>2</sup>Rü ngêmaäcü i pema rü penegü rü petaagü rü tá aixcüma nüxü pengechaü ya perü Cori ya Tupana, rü tá peyangüxêxê i ngêma norü ore ñuxmatáta peyuemare. Rü ngêmaäcü ya Tupana rü tá poraäcü pexü narüngüxêxê rü tá nanamãxêxê i perü maxü i ngêma naanewa. <sup>3</sup>Rü ngêmacax, Pa Iraétanüxügüx, rü name nixí i mea nagu pemaxê i ngêma mugü. Erü ngêxguma mea nagu pemaxêgu rü tá mexü pexü nangupetü, rü tá pimu nawa i ngêma naane i ngextá nabügü i mexü rü ñoma léche rü ira taguma itaxuxüwa yema Cori ya Tupana perü oxigümaxã nüxü ixuxürüxü. <sup>4</sup>iRü dücax, iperüxînüe, Pa Iraétanüxügüx! Rü nüma ya Cori ya tórü Tupana rü nüxicatama nixí i Cori yixü. <sup>5</sup>iRü nüxü pengechaxügü ya perü Tupana i guxüne ya perü maxünemaxã, rü guxü i peãxêmaxã, rü guxü i perü poramaxã! <sup>6</sup>iRü pegüãxêgu namaxã penguxü i guxüma i ñaa ore i ñuxma pemaxã nüxü chixuxü! <sup>7</sup>iRü guxügutáma namaxã penangüxêxê i pexacügü! Rü nachigagu tá namaxã pidexagü i pepatagüwa rü ngextá ípexüüwa, rü

ngêxguma pepeechaügu rü ngêxguma íperüdagügu. <sup>8</sup>Rü ngêma nax tama nüxü iperüngümaexüçax i ñaa mugü irü pegümexêwa rü pegücatüwa peyangaxcuchix nax ngêxma peyangexüçax perü cuãrxuxü! <sup>9</sup>iRü êcü pepataarü caxtagügu rü peãxpatagu penawümatü i ngêma mugü!

.....

<sup>14</sup>iRü taxütáma nawe perüxí i ngêma togü i duüxügü i pexna ngaicamagüxüarü tupanagü! <sup>15</sup>Erü yimá perü Cori ya Tupana rü nüxü pexüxü rü ngürüächí pemaxã nanuxgu rü noxtacüma pexü nadai rü pexü nayarüxoxêxê. <sup>16</sup>Rü tama name nax nüxü pexüxü ya perü Cori ya Tupana ga yexguma nachica i Máchawa nüxü pexüxgurüxü. <sup>17</sup>iRü aixcüma mea nagu pemaxê i ngêma Cori ya perü Tupanaarü mugü rü norü ucuxêgü ga pemaxã nüxü yaxuxü! <sup>18</sup>iRü penaxüx i ngêma mexü i Cori ya Tupana namaxã taãxêxü nax ngêmaäcü mea pexü nangupetüxüçax rü aixcüma penayaxuxüçax i ngêma mexü i naane ga perü oxigümaxã nüxü yaxuxü! <sup>19</sup>Rü ngêmaäcü ya Cori ya Tupana rü yema pemaxã nüxü yaxuxürüxü rü tá nayabuxmüxêxê i guxüma i perü uanügü i ngêma naanewa ngêxmagüxü. <sup>20-21</sup>Rü ngêxguma wüxi i ngunexü pexacügü pexna caxgux rü ñagügu: “¿Taxacüchiga nixí i ñaa mugü rü ñaa ucuxêgü i tamaxã nüxü yaxuxü ya tórü Cori ya Tupana?” ñagügu, rü pema rü tá penangãxü rü ñapegürügü tá: “Toma ga nüxcüma rü ãëxgacü ga Equítuanecüãx ga Faraóümexêwa tayexmagü. Natürü ga nüma ya tórü Cori ya Tupana rü

norü poramaxã toxũ ínanguxũxêxê.  
 22Rü toma rü nüxũ tatau ga yema  
 ãñcũmaxũ ga Tupana norü poramaxã  
 Equítuanewa üxũ napexewa ga Faraóũ  
 rü guxũma ga norü duũxũgü. 23Natürü  
 ga toma rü toxũ ínagaxũ ga yema  
 Equítuanewa, rü mea toxũ nigagü  
 ñuxmata yema naane ga tórü  
 oxigũmaxã nüxũ yaxuxũwa toxũ  
 nangugüxêxê. 24Rü ñuxũchi ga nüma ya  
 Cori ya Tupana rü toxũ namu nax mea  
 tayanguxêxũ i guxũma i ñaa norü  
 mugü rü nüxũ ticuaxũüügüxũcax nax  
 mea tüxũ naxüpetüxũcax rü nüma tüxũ  
 namaxêxêxũcax ñuxmata ñoma i  
 ngunexũwa nangu. 25Rü ngêmacax i  
 yixema i ñuxma rü name nixĩ i tórü Cori  
 ya Tupanapexewa mea yanguxêxũ i  
 ngêma norü mugü, yema tomaxã nüxũ  
 yaxuxũrũxũ”, ñapegürügü tá  
 —ñanagürü ga Moiché.

**Tupana rü nüxna nachogü  
 nax tama Canaáñanecüãxgüarü  
 tupananchicüñaxägüwe  
 naxĩxũ ga Iraétanüxũgü**

**7** 1Rü ñanagürü ga Moiché: —Rü  
 nüma ya Cori ya perü Tupana rü tá  
 pexũ nachocuxêxê nawa i ngêma naane  
 i tá pexrü ixĩxũ. Rü pepexewa tá  
 ínanawoxũ i ngêma duũxũgü i 7 i  
 natücumügü i pexũ rümumaegüxũ rü  
 pexũ rüporamaegüxũ i Itftatanüxũgü, rü  
 Yerguechéutanüxũgü, rü  
 Amoréutanüxũgü, rü Canaáñtanüxũgü,  
 rü Ferechéutanüxũgü, rü Ebéutanüxũgü  
 rü Yebuchéutanüxũgü. 2Rü ngêxguma  
 Cori ya perü Tupana pexmexgu  
 nayixêëgu i ngêma natücumügü i  
 duũxũgü, rü ngêxguma pema rü marü

nüxũ perüporamaegügu irü noxtacüma  
 tá penadai rü taxütáma taxacümaxã  
 pexũ narüngüxmüexêxê rü bai tá i pexũ  
 nax nangechaütümüxũgüxũ! 3Rü  
 ngêxgumarüxũ tá ta irü taxütáma  
 namaxã pixãxmaxgü i ngêma norü  
 ngexũgü, rü bai tá i penegü rü  
 naxacügümaxã peyaxüxmaxgüxũ rü  
 pexacügü rü nanegümaxã  
 peyaxütegüxũ! 4Eri ngêxguma tá  
 ngêmaãcü penaxüxgu rü nümagü i  
 ngêmacüãx rü tá penegüxũ rü  
 pexacügüxũ Cori ya Tupanana  
 nixĩgachixêxê. Rü ngêmaãcü tá tomare i  
 tupanaxũ nicuaxüxüügü, rü ngêmacax tá  
 poraãcü pemaxã nanu ya Cori ya  
 Tupana, rü noxtacüma tá pexũ nadai, rü  
 ngêxma tá ipeyarüxo. 5Rü ngêmacax tá  
 penaxwaxe i noxtacüma nagu pepogüe i  
 ngêma nachicagü i ngextã ngêma  
 duũxũgü norü tupanagücax naxünagü  
 nawa ínaguxũ. Rü ngêxgumarüxũ tá ta  
 nagu pepogüe ya yimá norü nutagü rü  
 naigü i namaxã natupanaãxgüxũ. Rü tá  
 ípenagu i norü tupanachicüñaxägü. 6Eri  
 pema rü wüxi i duũxũgü i woetama  
 Tupanacax ixĩgüxe pixĩgü. Rü  
 nümatama ya Tupana rü guxũma i  
 nachixũanecüãxgütanüwa pexũ  
 naxuneta nax noxrütama i duũxũgü  
 pixĩgüxũcax —ñanagürü ga Moiché.  
 .....

**Moiché nanaxucuxê i Iraétanüxũgü**

**8** 1Rü ñanagürü ga Moiché: —iËcü  
 nagu pexĩ i ngêma mugü i ñuxma  
 pexna chaxãxũ nax namáxũcax i perü  
 maxũ rü pimuxũcax, rü ngêmaãcü  
 penayaxuxũcax i ngêma naane ga perü  
 oxigũmaxã nüxũ yaxuxũ ga Tupana!

<sup>2</sup>iRü nüxna pecuaxāchie ga ñuxācü Cori ya Tupana pexna nadauxũ ga namawa ga yexguma 40 ga taunecü yema nachica ga chianexũ ga taxúema íxāpataxũgu pexixgu! Rü yéma nixĩ ga pexũ naxāneexēēxũ rü pexũ naxũxũ nax yemaacü nüxũ nacuáxūcax ga taxacügu perüxinüexũ rü tá aixcüma peyanguxēēxũ i norü mugü. <sup>3</sup>Rü woo ngũxũ pexũ ningexēxē rü taiya pingegü, natürü ga yixcüama rü nüma ga Tupana rü daxücüāx ga paũ ga manámaxã pexũ nachibüexēxē woo i pema rü perü oxigü rü nüxcüma rü taguma nüxũ pedauxũ ga yema. Natürü yemawa pexũ nüxũ nadauxēxē rü tama õnaxica nixĩ i namaxēēxũ i wüxi i duũxũ, natürü ngēma ore i Tupanaaxwa íxũxũxũ nixĩ i aixcüma namaxēēxũ. <sup>4</sup>Rü guxcüma ga guma 40 ga taunecügu rü tama pengauechiru rü bai ga nax perüchaecutüxũ. <sup>5</sup>iRü nüxna pecuaxāchie rü yimá perü Cori ya Tupana rü pexũ inayarüwexāchitanüxēxē ñoma wüxi i papá nanexũ inayarüwexāchixēēxürüxũ! <sup>6</sup>iĒcü mea naga pexinüe i ngēma norü mugü ya yimá Cori ya Tupana, rü nüxũ picuaxüxügü rü mea nagu pexĩ i ngēma nguxēētae i pexna naxāxũ! <sup>7</sup>Erü nüma ya Cori ya Tupana rü wüxi i naane i mexüwa tá pexũ nagagü i ngextá namu i natüxcügü, rü puchugü, rü bairawegü i ma xpúnearü doxraewa ichuxchugüxũ. <sup>8</sup>Rü ngēma naanewa rü nangema i trügu, rü chebáda, rü úba, rü iguéra, rü boxra, rü orĩbu rü ira. <sup>9</sup>Rü ngēma nachixüanewa rü taxütáma pexoégaāxēgü naxcax i perü õna, rü taxütáma pexũ nataxu. Rü norü

ma xpúnegüwa rü namu i fiérumü rü cóbre. <sup>10</sup>Natürü ngēxguma pechibüegu wena rü pengāxpütüwegügu, rü name nax nüxũ picuaxüüxũ ya Cori ya Tupana naxcax i ngēma mexũ i naane i pexna naxāxũ. <sup>11</sup>iRü pegüna pedaugü nax tama nüxũ perüngümaexücax ya perü Cori ya Tupana! iRü taxũ i nüxũ perüxoexũ i ngēma norü mugü rü norü ucuxēgü i ñyxma pexna chaxāxũ! —ñanagürü ga Moiché.

.....

**Tupana rü mexũ namaxã  
naxuegu i Iraétanüxügü**

**11** <sup>13-14</sup>Rü ñanagürü ga Moiché: —Ngēxguma tá pema mea peyanguxēēxgu i ñaa mugü i ñoma i ngunexügu pexna chaxāxũ, rü ngēxguma aixcüma nüxũ pengechaüügü ya Cori ya perü Tupana, rü ngēxguma nüxũ picuaxüüügü guxüne ya perü maxünemaxã, rü guxũ i peāxēmaxã, rü ngēxguma i nüma ya Tupana rü tá ípetoexügu nanapuxēxē rü ngexwacax yaxoxgu i penetü rü tá wena nanapuxēxē nax mea pexũ nayaxücax rü yaxoxücax, rü pexũ nangemaxücax i perü trügu, rü perü úbachixü, rü perü chíxũ. <sup>15</sup>Rü ngēxgumarüxũ tá ta ya Cori ya Tupana rü nanaxügüxēxē ya maxēgü perü wocagücax. Rü ngēmaacü tá nimu rü tagutáma pengewemü. <sup>16</sup>Natürü name nixĩ i pexüāēgü nax tama texé Tupanana pexũ íxigachixēēxũ nax tomare i tupanaxũ picuaxüüügüxücax, rü napexē pecaxápüxügüxücax. <sup>17</sup>Erü ngēxguma tá ngēmaacü penaxüxgux, rü Cori ya Tupana tá pemaxã nanu rü

taxūtáma pexçax nanapuxêxê. Rû ngêma naane rû taxuxūtáma nawa narûxü, rû pema rû tá paxaxüchi nagu peyue i ngêma naane i mexü i pexna naxâxü. <sup>18</sup>iRû pegüâxêgu namaxâ penguxü i ñaa ore, rû nagu perüxînüeecha! iRû pegüchacüüwa, rû pegücatüwa peyangaxcuchix i ngêma mugü nax ngêmaâcü tama nüxü iperüngümaexüçax! <sup>19</sup>iRû ñaa oremaxâ penangüexêxê i pexacügu, rû nachigagu namaxâ pidexagü i pepatawa, rû namagüwa, rû ngêxguma pepechaügu rû íperüdagügu! —ñanagürü ga Moiché. ....

**Moiché rû Iraétanüxügüxü naxucuxê  
nax tama ngêma togü i  
duüxügücümagu naxixüçax**

**18** <sup>9</sup>Rû ñanagürü ga Moiché: —Ngêxguma marü nagu pechocuxgux i ngêma nachixüiane i perü Cori ya Tupana tá pexna äxü, rû tama name i naxçax pedauxütae i ngêma nacümagü i chixexü i ngêma duüxügü. <sup>10</sup>Rû tama name i texé i petanüwa rû tümanexü itamu nax ngêma duüxügüarü tupanacax tayaguxü, rû bai i naxçax tangüxü i ngêma nawa nüxü nacuáxü i ngêma êxügüxü, rû bai tá i tüxü nangüchaüxü nax nüxü tacuáxü i ngêma yixcûra ngupetüxü, rû bai tá i naxçax tangüxü nax tayuüxü. <sup>11</sup>Rû tama name i naxçax tangux nax duêxêgüxü tatoöêxü, rû bai i naxütawa taxü nax nüxna tayacaxüçax i ngêmawa yuüexü nax êxügüxüxü nacuáxü, rû bai tá i nüxna tayaca i ngêma naâxêgümaxâ puracüexü, rû bai i nüxna tayaca i ngêma yuetaâxêçax ngêmagüxü. <sup>12</sup>Erü

ya Tupana rû tama namaxâ nataâxê i ngêma duüxügü i ngêma nacümagügu maxêxü. Rû ngêmacax nixí ya Cori ya perü Tupana i pepeçewa tá ínawoxüâxü i ngêma nachixüanecüâxgü, erü nümagü rû ngêma nacüma i chixexügu nixí i namaxêxü. <sup>13</sup>Rû ngêmacax i pemax rû name nixí i aixcüma mea naga pexínüe ya Cori ya perü Tupana. <sup>14</sup>Erü ngêma duüxügü i tá ípewoxüxü nawa i ngêma naane rû naga naxínüe i ngêma iyüüexü, natürü i pema rû tama pexü nanaxwaxe ya perü Tupana nax ngêma nacümagu pexixü —ñanagürü ga Moiché.

**Orearü uruxü i Moichéwena  
tá ingucuchixü**

<sup>15</sup>Rû ñanagürü ta ga Moiché: —Nüma ya Cori ya perü Tupana rû tá petanüwa nanangoçêxê ya wüxi ya chauxrüxü orearü uruxü, rû pema rû name nixí i naga pexínüe. <sup>16</sup>Rû yema nixí ga Cori ya Tupanana naxçax peçaxü ga maçpüne ga Oréxwa ga yema ngunexü ga guxâma ga pemax nagu yéma pengutaquexegüxü rû ñapegügüxü: “Tama tanaxwaxe i wena nüxü taxínüe i naga ya Cori ya tórü Tupana, rû bai i nüxü tadauxchaüxü ya daa üxü nax tama tayueüçax”, ñaperügügü. <sup>17</sup>Rû yexguma ga Cori ya Tupana rû ñanagürü: “Choxü rû marü name i ngêma nüxü pixuxü. <sup>18</sup>Rû choma rû tá ngêma Iraétanüxütanüwa chanangoçêxê ya wüxi ya curüxü orearü uruxü. Rû nüma rû wüxi ya natanüxü ixíxcü tá nixí. Rû nüma rû tá mea duüxügümaxâ nüxü nixu i ngêma choma namaxâ nüxü chixuxü, rû tá namaxâ nüxü nixu i

ngêma choma chanamuxũ. <sup>19</sup>Rũ guxãma ya yíxema tama nũxũ íruxínüexe ya yimá orearũ uruxũ chauégagu nũxũ íxuxũ, rü choma rü tá tüxna chaca rü tãxaciũçax tama itaxínüxũ”, ñanagürũ choxũ ga Cori ya Tupana —ñanagürũ ga Moiché.

.....

**Tupana rü Iraétanüxũgũmaxã  
inaxuneta rü tá nũxũ narüngũxêxê  
ega naga naxínüegu**

**30** <sup>1</sup>Rũ ñanagürũ ga Moiché: —Ngêxguma tá pexçax ínanguxgux i guxũma i ngêma ñuxma pemaxã nũxũ chixuxũ i Tupanaarũ ngũxêê rü ngêxgumarũxũ ta i norũ poxcu, rü ngêxguma ngêma perũ chixexũgagu Cori ya perũ Tupana rü togü i nachixũianegu pexũ nawoonegu, rü ngêma tá nixĩ i nũxna pecuãxãchiexũ i ñaa ore i ñuxma pemaxã nũxũ chixuxũ. <sup>2-3</sup>Natürũ ngêxguma ñuxma pemaxã nũxũ chixuxũrũxũ aixcũma naxçax pewoeguxgux ya Cori ya Tupana, rü aixcũma naga pexínüegu i guxũne ya perũ maxũnemaxã rü guxũ i peãxẽmaxã i pema rü pexacũgü, rü ngêxguma i nũma ya Cori ya perũ Tupana rü tá inanaxoxêxê i ngêma poxcu i naga pemaxã naxínüxũ, rü tá nũxũ pengechaũtümüxũ. Rũ pexũ tá nade nawa i ngêma nachixũianegũ ga naga pexũ nawoonexũ nax wena wũxiwa pengexmagũxũçax. <sup>4</sup>Rũ woo ngêma petanüxũgü i yãanegu woonexũ, rü nũma ya perũ Cori ya Tupana rü tá ngêxma naxçax nayadau rü tá nanawoeguxêxê. <sup>5</sup>Rũ nũma ya Cori rü tá wena pexũ nawoeguxêxê naxçax i

ngêma naane ga perũ oxigü nawa yexmagũxũ. Rũ pema rü tá wena nawa pengexmagü rü nũma ya Tupana rü tá pexũ narüngũxêê, rü tá pexũ nimuxêxê perũ oxigüarũ yexera. <sup>6</sup>Rũ nũma ya perũ Cori ya Tupana rü peãxêwa rü petaagũãxêwa tá nayanaxoxêxê i ngêma perũ chixexũ nax ngêmaacü aixcũma nũxũ pengechaũgũxũçax perũ maxũnemaxã rü peãxẽmaxã nax wenaxarũ perũ naanewa pemaxêxũçax.

.....

<sup>19</sup>Rũ ñoma i ngunexũgu rü Tupanapexewa rü duũxũgüpexewa rü pexna chaca nax pematama nũxũ pixunetaxũçax i ñngexũrũüxũ tá yixĩxũ i penaxwãxexũ, rü ngêma maxũ rü êxna ngêma yu? ¿Rũ ngêma Tupanaarũ ngũxêxê rü êxna norũ poxcu? iËcü penayaxu i maxũ nax pema rü petaagü rü ta namaxêxũçax! <sup>20</sup>iËcü nũxũ pengechaxũ ya Cori ya perũ Tupana, rü naga pexínüe, rü aixcũma peyanguxêxê i ngêma pexũ namuxũ! Erũ nũma nixĩ i pexna naxããxũ i perũ maxũ rü namuxêããxũ i perũ ngunexũgü nawa i ngêma naane ga tóru oxigü ga Abraãũ rü Ichaã rü Acóbumaxã naxueguxũ —ñanagürũ ga Moiché.

.....

**Moiché rü Yochuêxũ naxuneta nax nũxĩ  
Iraétanüxũgũmaxã inacuãxũçax**

**31** <sup>7</sup>Rũ yemawena ga Moiché rü Yochuêçax nangema, rü ñanagürũ nũxũ napexewa ga guxũma ga Iraétanüxũgü: —iËcü namaxã napora rü wüxigutama rüxínü! Erũ cuma tá nixĩ i cuyagagũxũ i ñaa duũxũgü nawa i ngêma naane ga Cori ya Tupana tóru

oxigümaxã nüxũ ixuxũ. Rü cuma tá nixĩ i namaxã quixücuxũ. <sup>8</sup>Rü nümatama ya Cori ya Tupana rü cupexegu tá nixũ, rü guxũgutáma nacuxũtagu rü tagutáma cuxũ nangemücü. Rü ngëmacax tama name nax cumuũxũ —ñanagürü ga Moiché.

**Moiché rü Iraétanüxügüarü äëxgacügüxũ namu nax duũxügümaxã nüxũ nadaumatüxũ ga Tupanaarü mugü**

<sup>9</sup>Rü nüma ga Moiché rü nanaxümatü ga yema Tupanaarü mugü rü ñuxüchi nüxna nanaxã ga yema chacherdótegü ga Lebítanüxügü ga Tupanaarü mugüchixũ ingegüxũ. Rü yexgumarüxũ ta rü guxüma ga Iraétanüxügüarü äëxgacügü ga itaxüna nanaxã ga yema mugü ga ümatüxũ. <sup>10-11</sup>Rü yexguma ga nüma ga Moiché rü yema äëxgacügüxũ naxucuxë, rü ñanagürü: —Guxüguma i ngëxguma norü 7 ya taunecüwa nanguuxügu nax pegüxũ nüxũ pengechaügüxũ i perü ngetanügü, rü ngëxguma tá nixĩ i guxüma i duũxügüpexewa nüxũ pedamatüxũ i ñaa mugü. Rü ngëma tá nixĩ i duũxügüpexewa pexüxũ i ngexguma düxenügüchigaarü tauemacüwa nanguuxügu rü guxüma i Iraétanüxügü Tupanapexegu ngutaquexegüxügu nawa i ngëma nachica i nümatama tá nüxũ naxunetaxũ. <sup>12</sup>Rü ngëma ngunexügu rü tá guxütáma i duũxügü i yatüxügü, rü ngexügü, rü buxügü, rü duũxügü i to i nachixüanecüãx i petanügu ächiügüxũ, rü tá nangutaquexegü nax nüxũ naxĩnüexüçax i ngëma Tupanaarü mugü nax ngëmaãcü nangüexüçax nax nüxũ nangechaügüxũ ya tóru Cori ya Tupana,

rü nagu namaxëxüçax i guxüma i ngëma mugü i nüxũ yaxuxü ya Cori ya Tupana —ñanagürü ga Moiché.

.....

### Moichéarü yuxchiga

**34** <sup>1</sup>Rü Moáanearü chianexüwa inaxüãchi ga Moiché ga maçpüne ga Nébuwa nax naxüxũ. Rü yéma natapexe ga Píçagu äégaxügu naxĩnagü. Rü guma maçpüne rü Yericüarü toçmaçtawá nayexma. Rü yéma nixĩ ga Cori ya Tupana nüxũ nawéxü ga guxüma Garaáxane rü ñuxmata Dáüarü naanegu nüxũ nadauxëxë. <sup>2</sup>Rü yexgumarüxũ ta nüxũ nanawëx ga naane ga Netaríarü, rü Efraíarü, rü Manachéarü, rü guxüma ga Yudáarü naane rü ñuxmata Már ga Mediteráneuwa nangu. <sup>3</sup>Rü nüxũ nanawëx ta ga Néguearü chianexü, rü natü ga Yudáüarü naane ga metachinüxũ, rü ñane ga Yericü ga cucunecügü nawa yexmaxü rü ñuxmata ñane ga Chuágu nadau. <sup>4</sup>Rü nüma ga Cori ya Tupana rü ñanagürü Moichéxü: —Ñaa nixĩ i ngëma nachixüane ga perü oxigü ga Abraáü, rü Ichaá, rü Acóbumaxã nüxũ chixuxü rü tá nataagüna chaxãxü. Rü ngëmacax nixĩ i chanaxwaxe nax cuxetümaxãxüchi nüxũ cudauxü, rü woo i cuma rü taxütáma nawa cingu —ñanagürü. <sup>5</sup>Rü yemawena ga Moiché ga Tupanaarü duü rü nayu nagu ga yema Moáane, yema Cori ya Tupana namaxã naxueguxürüxü. <sup>6</sup>Rü wüxi ga Moáanearü ngatexügu nixĩ ga Tupana natáxü ga Bexpeúarü toçmaçtawá, nagu ga wüxi ga nachica i ñuxmarüta



taxúema nüxũ cuáxũ. <sup>7</sup>Rü nüma rü nüxũ nayexma ga 120 ga norü taunectü rü yexguma rü ta meama tüxũ nadau rü napora. <sup>8</sup>Rü nüma ga Iraétanüxũgü rü 30 ga ngunexũ naxçax naxauxe ga Moáanearü chianexũwa, rü yemaacü nayanguxẽegü ga nax naxaurexũ naxçax ga Moichéarü yu. <sup>9</sup>Rü nüma ga Yochué ga Núũ nane rü marü Moichéxũtawa nanayaxu ga çax yerü

nüma ga Moiché rü naétügu naxúxmex. Rü yemaçax nixĩ ga Iraétanüxũgü ga naga naxĩnüexũ rü naxüğüãxũ ga yema Cori ya Tupana Moichémaxã nüxũ ixuxũ. <sup>10</sup>Rü Moichéwena rü taguma nayexma ga to ga orearü uruxũ ga Iraétanüxũgütanüwa ga Moichéruxũ ixícü ga Cori ya Tupana namaxãxũchi idexacü.  
.....

# JOSUÉ

## (Yochué)

---

Yochuéxū naxuneta ga Tupana nax nūxí  
Iraétanūxūgūmaxā inacuáxūcax

**1** <sup>1</sup>Rū guma Tupanaarū duŕi ga Moiché yuxguwena, rū nūma ga Cori ya Tupana rū Moichéarū ngūxēeruxū ga Yochué ga Nūŕi nanemaxā nidexa, rū űanagūrū nūxū: <sup>2</sup>—Rū űuxma nax marū nayuxū ya yimá chorū duŕi ya Moiché, rū cuma tá nixí i guxūma i ngēma Iraétanūxūgūmaxā quixūexū nawa i ngēma natū i Yudáŕi, nax nagu pichocuxūcax i ngēma naane i pexna chaxāxū. <sup>3</sup>Rū yema marū Moichémaxā nūxū chixuxūrūxū, rū choma rū tá pexna chanaxā i guxūma i ngēma naane i marū nawa pengagūxū. <sup>4</sup>Rū ngēma naane i tá pexna chaxāxū, rū ngēma chianexū i sūrwaama ngēxmaxūwa inaxūgū rū űuxmata Líbanuarū maxpūnewa nangu i nórteawaama. Rū ngēma naane rū taxtū i Eufrátewa inaxūgū i éstewaama rū Itítatanūxūgūchixūanemaxā tá nangau űuxmata már i Mediteráneuwa nangu i oéstewaama. <sup>5</sup>Rū guxūma i ngunexūgū i nagu cumaxūxūgu rū taxuxūtáma cuxū narūporamae. Rū choma rū tá cuxūtawa changexma, yema Moichéxūtawa

chayexmaxūrūxū. Rū tagutáma ngextá cuxū chatax, rū tagutáma cuxū chaxo. <sup>6</sup>iRū cugū frūpora rū taxū i cugū cutáeguxū! Erū cuma tá nixí i nūxna cuyaxāchigūxū i norū naane i űaa duŕixūgū, yerū yema nixí ga perū oxigūmaxā nūxū chixuxū. <sup>7</sup>Rū wūxixicatama nixí i cumaxā nūxū chixuxū, rū ngēma nixí nax tama cumuŕixū rū wūxiguxicatama curūxīnūxū rū aixcūma cunaxūxū i ngēma cumaxā nūxū chixuxū. Rū chanaxwaxe i cuyanguxēxē i guxūma i ngēma mugū ga chorū duŕi ga Moiché cuxna āxū. iRū ēcū mea yanguxēxē nax mea cuxū ínanguxuchixūcax i guxū i taxacū icuxūxūwa! <sup>8</sup>iRū guxūgutáma duŕixūgūna namaxā nacuaxāchi i ngēma nūxū chixuxū i chorū mugūpanewa! Rū name nixí i cuma rū chūtacū rū ngunecū rū nagu curūxīnū i ngēma chorū ore nax ngēmaācū mea cunaxūxūcax i ngēma cumaxā nūxū chixuxū, rū mea cuxū ínanguxuchixūcax i guxūma i taxacū icuxūxū. <sup>9</sup>Rū choma nixí i cuxū chamuxū nax cugū cuporaxēxūcax rū wūxigutama curūxīnūxūcax. Rū tama name icumuŕixū rū icuyarūmaāchi, erū choma ya curū

Cori ya Tupana rü tá chacuxütägu i ngextá cuma ícuxüxüwa —ñanagürü ga Tupana. Rü nüma ga Yochué rü nügü namexëxë nax nayauxäxüçax ga yema naane. <sup>10</sup>Rü yexguma ga nüma ga Yochué rü nanamu ga yema Iraétanüxügüarü äëxgacügü, rü ñanagürü nüxü: <sup>11</sup>—iRü guxüma i ñaa duüxügütanügu pixiägütanü, rü namaxä nüxü pixu rü nanutaquexegüä i ðna! Erü tá tomaepüx i ngunexüwa nanguxgu rü tá tichoü i natü i Yudäüwa nax tóxrüxü yixixüçax i ngëma naane i tóru Cori ya Tupana tá tüxna äxü —ñanagürü ga Yochué.

.....

#### Yochué rü Yericüwa nanamugü ga ngugütaeruügü

**2** <sup>1</sup>Rü yexguma nachica ga Chitüüwa nayexmagügu, rü yéma bexma inanamuächitanü ga taxre ga ngugütaeruxü, rü ñanagürü nüxü: —iËcü peyangugügü i ngëma naane i natü i Yudäüarü tocutüwa ngëxmaxü rü ñuxmata yima ñane ya Yericüwa pengugü! —ñanagürü. Rü nüma ga yema taxre rü yéma naxi rü wüxi ga ngexü ga ngeäëxü ga Raáxgu äégaxüpatawa nangugü ga Yericüwa. Rü ngïma rü ngïpatagu inapegüxëxë ga yema chütaxü. <sup>2</sup>Natürü nayexmaama ga wüxi ga duüxü ga Yericüarü äëxgacümaxä nüxü ixuxü, rü ñanagürü nüxü: —Ñuxre i Iraétanüxügü nua nangugü i ngewaxarü chütaxügu nax yangugüguaxüçax i ñaa naane —ñanagürü. <sup>3</sup>Rü yemacax ga guma äëxgacü rü yema nge ga Raáxütawa namuga rü ñanagürü: —Ínamuxü i ngëma yatügü i cuxütawa ngugüxü erü ngëma rü

ngugütaewa nua naxi! —ñanagürü. <sup>4</sup>Natürü ga ngïma rü inangäxü rü ngïgürügü: —Aixcüma nixi i taxre i yatü i chauxütawa nangugüxü, natürü tama nüxü chacuax i ngextäcüäx yixigüxü. <sup>5</sup>Rü marü noxri nachütägu nawoegu, erü ngëma oragu nixi i nawäxtaxü ya daa ñanearü poxeguxüarü iäx, rü tama nüxü chacuax i ngextá nax naxixü. Natürü ngëxgumachi ñuxmatama nawe pengëgügu rü chi nüxü peyangaugü —ngïgürügü. <sup>6</sup>Natürü ga ngïma rü dauxnagu inaxigüxëxë ga yema taxre, rü yexma pagixü ga línuchitüxügu iyacuxgü. <sup>7</sup>Rü guma ñanearü äëxgacüarü churaragü rü yema taxre ga ngugütaeruüçax nadaugü nagu ga yema nama ga natü ga Yudäü inuxtamaxüwa nadaxü. Rü yexguma yema churaragü íchoxüguwenatama, rü nanawäxtagü ga norü iäx ga guma ñanearü poxeguxü. <sup>8</sup>Rü naxüpa ga nax napeexü ga yema ngugütaeruügü, rü ngïma ga Raáx rü nawe daxü ixü, rü ngïgürügü nüxü: <sup>9</sup>—Choma nüxü chacuax ya Cori ya Tupana rü pexna nanaxä i ñaa naane, rü ngëmacax i nüma rü toxna naxinü nax pexü tamuüexüchixüçax. Rü ñuxma rü guxüma i duüxügü i nuxma pegüxü rü poraäcü pexü namuüe. <sup>10</sup>Rü nüxü tacuax ga yexguma Equítuanewa ípengüxügu, rü Tupana nixi ga yapayexëëxü ga Már i Dauchiüxü nax yéma pichoüxüçax. Rü ngëxgumarüxü ta nüxü tacuax nax ñuxäcü penadajüxü ga Cheóü rü Ox ga Amorëutanüxügüarü äëxgacügü ga natü ga Yudäüarü tocutüwa yexmagüxü. <sup>11</sup>Rü yexguma yemaxü tacuaxgügu rü poraäcü tamuüe, rü taxüema tügü ítarüpora nax pemaxä tügü tadajüxüçax. Erü yimá Cori ya perü Tupana rü guxäéüwa nangexma i

daxūguxū i naanewa rü ñoma i naanewa.  
 12Rü ngēmacax pexna chaca rü  
 ñuxmatama chanaxwaxe i Tupanaégagu  
 chomaxá nüxū pixu rü mea tá namaxá  
 pechopetü i chautanüxūgü, ngēxgumarüxü  
 i choma nax meama pexū chayaxuxūrüxū.  
 iRü choxna penaxá i wüxi i cuaxruxū nax  
 ngēmawa nüxū chacuáxūcax nax  
 aixcūmaxū chomaxá pixuxū! 13Rü  
 chanaxwaxe i guxūma i tümaaru  
 ngēmāxūgūmaxá tüxū pengechaū ya chori  
 papá, rü chorü mamá, rü chaueneegü, rü  
 chaueyaxgü. iRü taxú i toxū pedaxū!  
 —ngīgürügü. 14Rü nūmagü rü ngīxū  
 nangāxūgagü rü ñanagürügü ngīxū:  
 —Toma tátama pexū ítapoxū rü pexna  
 tadau nax taxuxūma pexū ípetüxūcax, ega  
 cuma rü tama toxū quixuxgu. Rü  
 ngēxguma Cori ya Tupana toxna naxāxgu i  
 ñaa naane rü aixcūma tá mea cuxna tadau  
 —ñanagürügü. 15Rü ngīma ga Raax rü  
 wüxi ga í ga íanearü poxeguxūwa  
 yaxúxūnegu ipe. Rü yema poxeguxūaru  
 íāxwa wüxi ga napanāxagu ínachüxüe ga  
 yema taxre ga ngugütaeruügü. 16Rü  
 ngīgürügü nüxū: —iĒcü māxpúneanewa  
 pexi rü ngēxma peyarücxgü nax tama  
 pexū yayaugūcxax i ngēma pexcax  
 daugūxū! iRü tomaepüx i ngunexū tá  
 ngēxma picücxgü, rü ñuxmatáta íanecax  
 nawoegu i ngēma pexcax daugūxū! Rü  
 ngēmawena rü marü name i ípixi  
 —ngīgürügü. 17Rü nūmagü rü ngīxū  
 nangāxūgagü rü ñanagürügü: —Toma rü  
 tá tayanguxēxē i ngēma Tupanaégagu  
 toxna naxcax cuçaxaxū. 18Natürü  
 ngēxguma marü ñaa naanegu tachocuxgu,  
 rü ñaa íāx ga nawa toxū curüchüxüexūwa  
 tá cunatanütaxēxē i ñaa napanāxá i  
 dáunütaxū. Rü daa cupatagu tá tüxū

cungutaquexexēxē ya cunatü rü cué rü  
 cueneegü rü guxāma ya cunatütanüxūgü.  
 19Natürü ngēxguma chi ngexerüüxe  
 cuchiüwa íxüxüxgux rü tümagagutátama  
 nixi ega tayuxgux, rü marü taxütāma  
 togagu nixi. Natürü ngēxgumachi  
 ngexerüüxe cuchiüwa ngēxmaxexū  
 yamāxgügu, rü ngēxguma rü tá togagu  
 nixi. 20Natürü ngēxguma chi toxū  
 quixuxgux, rü taxucaxma tayanguxēxē i  
 ngēma Tupanaégagu cumaxá nüxū tixuxū  
 —ñanagürügü. 21Rü ngīma rü inangāxūga,  
 rü —Marü name —ngīgürügü. Rü  
 yexguma ga ngīma rü nüxū irümoxē, rü  
 nūmagü rü ngīxna nawoegu. Rü  
 yemawena rü yema ngīrü íāxwa iyanax  
 ga napanāxá ga dáunütaxū. 22Rü yema  
 taxre ga ngugütaeruügü rü  
 ínamāxpúneanexūwa naxi rü tomaepüx ga  
 ngunexū yexma narücxgü. Rü yoxni ga  
 churaragü rü guxūanegu naxcax nadaugü  
 rü taxuguma nüxū nayangaugü, rü düxwa  
 Yericúaru íanecax nawoegumare. 23Rü  
 yexguma ga nūma ga yema taxre ga  
 ngugütaeruügü rü māxpúneanewa  
 narüchoū rü natü ga Yudáuarü tocutüwa  
 naxi ga Yochué íyexmaxūwa. Rü namaxá  
 nüxū nixugüe ga guxūma ga nüxū  
 ngupetügüxū. 24Rü ñanagürügü: —Nūma  
 ya Cori ya Tupana rü marü tüxna nanaxá i  
 guxūma i ngēma naane. Rü ngēmacax i  
 guxūma i ngēma nachixūanecüāx i  
 düxūgü rü porācü tüxū namuē  
 —ñanagürügü.

**Iraétanüxūgü rü natü  
 ga Yudáüwa nichoü.**

**3** 1Rü moxūācü paxmamaxūchi rü  
 nūma ga Yochué rü guxūma ga  
 Iraétanüxūgūmaxá rü Chitüüwa inaxíachi

ñuxmata natü ga Yudaúíanaciüwa nangugü. Rü naxüpa ga nax yachoüxü rü yexmatama napegü. <sup>2-3</sup>Rü yexguma tomaepüx ga ngunexü ngupetüguwena rü yema Iraétanüxügüariü äëxgacügü rü norü duüxügütanü nixiägüetanü rü namaxã nüxü nixu rü ñanagürügü: —Ngëxguma nüxü pedaxüxu i chacherdótegü i Lebítanüxü nax nua nachopetüxü namaxã i ngëma baú i Cori ya Tupanaarü mugüchixü irü ípechoxü i ngextá ípengexmagüxüwa rü nawe perüxü! <sup>4</sup>Rü ngëmaãcü tá nüxü pecuax nax ngextáama pexixü yerü ga üpa rü taguma texé i petanüwa nagu tixü i ngëma nama. iNatürü taxúetáma nüxna tangaicama i ngëma baú! iRü guxügütáma wüxi i quirümetru tá nixí i norü yáxü i nawe nax pixixütanüxü! —ñanagürügü. <sup>5</sup>Rü yexguma ga Yochué rü yema Iraétanüxügüxü ñanagürü: —iTupanapexewa pegü pimexëëgü! Eri moxü rü núma ya Cori ya Tupana rü tá pexü nüxü nadauxëxë i wüxi i mexü i taxü i norü poramaxã naxixü —ñanagürü. <sup>6</sup>Rü yexguma ga núma ga Yochué rü yema chacherdótegüxü ñanagürü: —iËcü wixpexegu peyangetaxü i ngëma baú i Tupanaarü mugü nawa ngëxmaxü rü topexe namaxã pexí nawa i ngëma natü i Yudaúí! —ñanagürü. Rü yexguma ga núma ga chacherdótegü rü duüxügüpexegu nayangetaügü ga yema baú. <sup>7</sup>Rü yexguma ga Cori ya Tupana rü ñanagürü Yochuéxü: —Ñuxmacürüwa tá cuxü chataxëxë rü yexeraãcü tá cuxna cuax chaxã i napexewa i ñaa Iraétanüxügü. Rü ngëmaãcü tá nüxü nadaugü nax choma rü aixcüma chacuxütaxüxü yexgumarixü

ga Moichéxütawa chayexmagurixü. <sup>8</sup>iËcü ngëma chacherdótegüxü namu nax yangetaügüäxüçax i ngëma baú i chorü mugü nawa ngëxmaxü! Rü ngëxguma natü i Yudaúíwa nangugügu irü nachixüwa nachoü rü ngëxma yachigütanüächi! —ñanagürü. <sup>9</sup>Rü yexguma ga Yochué rü yema Iraétanüxügüxü ñanagürü: —iNua pexí rü iperüxínüe i ngëma ore i Cori ya tóru Tupana nüxü ixuxü! <sup>10</sup>Rü ngëmawa tá nixí i nüxü picuáxü ya Tupana ya maxücü rü petanüwa nax nangexmaxü. Rü núma ya Cori rü tá ínanawoxü i Canaáütanüxügü, rü Itítatanüxügü, rü Ebéutanüxügü, rü Ferechéutanüxügü, rü Yerguechéutanüxügü, rü Amoréutanüxügü rü Yebuchéutanüxügü nawa i ngëma naane nax pema nawa pingugüxüçax. <sup>11</sup>iRü nüxü perüdaunü i ngëma baú i Cori ya Tupana i guxü i naanearü yora ixücüariü mugüchixü nax ñuxácü pepexewa yaxüexü i natü i Yudaúíwa! <sup>12</sup>Rü ngëmacax, Pa Duüxügüxü irü nüxü pexuneta i 12 i yati! Rü ngëma 12 i peticumüwachigü, rü tá nüxü pexuneta i wüxi. <sup>13</sup>Rü ngëxguma ngëma chacherdótegü i ngëma baú i Cori ya Tupanaarü mugüchixü ingegüxü rü natü i Yudaúíchiüwa nachiüügu, rü ngëxguma tá nixí i ngëma natü rü taxregu yayauxyexüchiüxü, rü ngëma dexá i clauxquena ne yaxü rü tá ínayachaxächi, rü ñoma yapoxyepexexürüxü tá nixí —ñanagürü. <sup>14-16</sup>Rü núma ga yema Iraétanüxügü rü inaxiächi ga yema ínapegüxüwa ga natü ga Yudaúíwa nax yachoüxüçax. Rü nanetüariü buxgüariü tauemacü nixí ga yexguma, rü yema natü ga Yudaúí rü poraãcü narübai. Rü

nümagü ga chacherdótegü rü duüxügüpe\_xegu naxí namaxá ga yema baú ga Tupanaarü mugü nawa yexmaxü. Rrü yema chacherdótegü ga baú ingetaügüxü rü yexguma yema natü ga Yudaüchiüwa nachoügu, rü yema dexá ga dauxquena ne yaxü rü ngürüächi ínayachaxächi. Rrü guma dauxquenaxüchi yexmane ga ñane ga Adáü ga dauxütaechica ga Charetáüarü ngaicamána, rü ngürü nabainagü ga dexá ga yéma, ñoma yapoxyepexexürüxü. Natürü yema íyachoüxüarü tawaama ga dexá rü niyax ñuxmata már ya Ngearü Maxüáxüwa nangu. Rrü yemaacü ga yema natü ga Yudaü rü taxregu niyauxye, rü yema Iraétanüxügü rü nichoü ga ñane ga Yericúarü toxmaxtawa. <sup>17</sup>Rrü yemaacü ga guxüma ga yema duüxügü rü paanexüwa nichoü nawa ga yema natü ga Yudaü. Rrü yexgumayane ga yema chacherdótegü ga yangegüxü ga yema baú ga Cori ya Tupanaarü mugüchixü rü natüarü ngäxüchiteewa namaxá nayachaxächitanü ga paanexüwa.

**Guma 12 ga nutagü ga natü  
ga Yudaüarü ngäxütamawa nadeäcü**

**4** <sup>1</sup>Rrü yexguma guxüma ga duüxügü ichoügu ga natü ga Yudaüwa, rü nüma ga Cori ya Tupana rü Yochuéxü ñanagürü: <sup>2</sup>—Ngéma 12 i Iraétanüxügüttücumüwa rü iécü wüxitücumüwachigü rü nüxü naxuneta ya wüxi ya yatü! <sup>3</sup>iRrü namaxá nüxü ixu rü wüxichigü i ngéma yatü rü wüxipúta ya nuta yayauxchigüä i ngéma natüarü ngäxütamawa i ngéma chacherdótegü íchigüxüwa, rü ñoma i chütaxügu

ípeyapegüxüwa nax nanaaxüçax rü ngëxma yanupútaäxüçax! —ñanagürü. <sup>4-5</sup>Rrü yexguma ga nüma ga Yochué rü naxçax naca ga yema 12 ga yatü ga nüxü naxunetaxü rü ñanagürü nüxü: —iÉcü, wüxichigü i pemax i 12 i pexü chaxunetaxe rü natü i Yudaüarü ngäxütamawa pexí! iRrü ngéma baú i Cori ya tóru Tupanaarü mugüchixüpe\_xewaama rü wüxichigü i pema rü penayaxu ya wüxi ya nuta nax na\_xpüx yixüçax i ngéma 12 tütücumügü i tatanüxügü! iRrü peätügu peyange! <sup>6-7</sup>Rrü yimá nutagü rü wüxi i cuaxruxü tá nixí i petanüwa. Rrü ngëxguma penegü pexna çaxgu, rü ñagügu: “¿Taxacüchiga nixí ya daa nutagü?” ñagügu, rü pema rü tá penangäxüga rü ñapegürügü tá: “Rrü daa nutagüwa nixí i nüxna icuaxächixü ga yema ngupetüxü ga yexguma natü ga Yudaüwa yangeetaxügu ga yema baú ga Cori ya Tupanaarü mugüchixü, rü yema natüchixü rü taxregu niyauxye napexewa ga yema baú”, ñapegürügü tá —ñanagürü ga Yochué. <sup>8</sup>Rrü nümagü ga yema 12 ga yatügü rü nanaxügü ga yema Yochué namaxá nüxü ixuxü. Rrü wüxichigü, rü wüxipúta niyaxchigü naégagu ga yema natücumü ga nawa naxüxü. Rrü yemaacü nanayauxgü ga 12 ga nutagü ga Yudaüchitamawa. Rrü yema ínapegüxüwa nanana, rü yexma nayanu, yema Cori ya Tupana nüxü ixuxürüxü. <sup>9</sup>Rrü yexgumarüxü ta ga nüma ga Yochué rü nai ga 12 ga nuta nanayaxu rü natüchitamagu nayanu ga yema chacherdótegü ga baú ingetaügüxü íchigüxügu. Rrü yimá nutagü rü ñuxmarüta ngéma

nangexmagü. <sup>10</sup>Rü yema chacherdótegü ga baú ga Tupanaarü mugüchixü ingegüxü rü natü ga Yudáüchitamagu narücho, rü yoxni ga nüma ga Iraétanüxügü rü meama nayangüxëëgü ga guxüma ga yema Yochuéwa Tupana namaxã nüxü ixuxü. Rü guxüma mea naxügü yema Moiché Yochuémaxã nüxü ixuxürüxü. Rü ñuxãëäcü nichoü ga duüxügü. <sup>11</sup>Rü yexguma guxüma ga duüxügü marü inguügu, rü nichoü ga yema chacherdótegü ga baú ga Tupanaarü mugüchixü ingegüxü. Rü duüxügüpexegu naxägü.

.....

<sup>18</sup>Rü yexguma marü yanguügu ga yema chacherdótegü ga Yudáüwa nax yachoüxü rü paanexüwa nangugügu, rü yema dexá rü wenaxarü nanagoxüchixü rü noxrirüütama nanapá ga natü.

.....

**Tupana nüxü nixu nax ñuxäcü yapugüäxüçax ga Yericü**

**6** <sup>1</sup>Rü taxucürüwama texé Yericúarü ñanegu taxücu rüxna ítaxüxü, yerü ga norü poxeguxüarü ñaxgü rü narüwãxtagü nax yemaacü taxuwama nachocuxüçax ga Iraétanüxügü. <sup>2</sup>Natürü nüma ga Cori ya Tupana rü Yochuéxü ñanagürü: —Choma rü marü cuxna chanaxã ya Yericü i guxüma i norü äëxgacümaxã rü norü churaragümaxã. <sup>3</sup>Rü curü churaragü i Iraétanüxügü rü 6 i ngunexü tá yima ñanexü ñayachoegu. Rü wüxi i üeguächí tá naxügü i wüxichigü i ngunexügu. <sup>4</sup>Rü ngëma baú i chorü mugü nawa ngëxmaxüpexegu tá naxí i 7 i chacherdótegü i carnéruchatacuxremaxã icornétaáxü. Rü ngëxguma norü 7 i

ngunexüwa nanguxgu, rü 7 expüxcüna tá yima ñanexü ñayachoegu i curü churaragü, rü ngëxgumayane i ngëma chacherdótegü rü tá norü cornétagügu nicuegü. <sup>5</sup>Rü ngëxguma nüxü pexinüegu nax poraäcü yacuegüäxü ya cornétagü rü tá tagaäcü aita pexüe. Rü ngëxguma i norü poxeguxü ya yima ñane rü tá nangiächí. Rü ngëxgumayane rü wüxichigü i pemax rü tá nagu pichocu ya yima ñane —ñanagürü ga Tupana. <sup>6</sup>Rü yexguma ga nüma ga Yochué rü chacherdótegüçax naca rü ñanagürü nüxü: —iPeyange i ngëma baú i Cori ya Tupanaarü mugüchixü! Rü 7 i pemax rü ngëma baúpexegu tá pexí namaxã ya cornéta i carnéruchatacuxrenaxçax ixígüne —ñanagürü. <sup>7</sup>Rü yema duüxügüxü rü ta ñanagürü ga Yochué: —iËcü nüxü ípeyachoegu ya daa ñane! Rü pemax i churaragü rü tá baú i Cori ya Tupanaarü mugüchixüpexegu tá pexí —ñanagürü. <sup>8</sup>Rü guxüma ga duüxügü rü yema Yochué namaxã nüxü ixuxüäcü nanaxügü. Rü yema 7 ga chacherdótegü rü norü cornétagu yacuegüäcüma yema baú ga Cori ya Tupanaarü mugüchixüpexegu naxí. Rü yema baú rü yema chacherdótegüwe namaxã nixixütanü. <sup>9</sup>Rü yema churaragü rü chacherdótegüpexegu naxí, rü yema togü ga churaragü ga baúarü dauruxü rü wixweama naxägü. Rü nüma ga chacherdótegü rü norü cornétagu nicuegüecha rü taguma inarüchianegü. <sup>10</sup>Natürü guxüma ga yema churaragü, rü Yochué nüxna naxãga ga bexmamare inaxixüçax ñuxmatáta nüma namuã nax guxüma wüxigu poraäcü aita naxüexüçax.

**Iraétanüxügü nanapugü ga íane ga Yericú**

<sup>11</sup>Rü yema nüxíraxû ga ngunexûgu rü nüma ga Yochué rü nanamu ga chacherdótegü rü churaragü nax wüxicana guma íanexû nax íyangeegutaügüâxû ga yema baú ga Cori ya Tupanaarü mugüchixû. Rü yemawena ga yema duüxügü rü nawoegu naxçax ga yema ínapegüxûwa. Rü yexma nüxû nanangupetüxêxê ga chütaxû. <sup>12</sup>Rü moxûâcü ga nüma ga Yochué rü paxmamaxûchi ínarüda, rü nüma ga chacherdótegü rü nanayauxtaügü ga yema baú ga Cori ya Tupanaarü mugüchixû. <sup>13</sup>Rü yema 7 ga chacherdótegü rü baú ga Cori ya Tupanaarü mugüchixûpexegu naxí rü nagu yacuegüâcüma ga guma norü cornétagü. Rü yema churaragü rü wixpexegu naxí, rü yema togü rü baúweama naxágü. Rü ga cornétagü rü taguma inarüchianegü. <sup>14</sup>Rü moxûâcü rü wena guma íanexû ínayachoegu, rü ñuxmachi yema ínapegüxûçax nawoegu. Rü 6 ga ngunexû nixí ga yemaacü naxügüâxû. <sup>15</sup>Rü yexguma norü 7 ga ngunexûwa nanguxgu, rü ngunetüxû ínarüdagü. Rü guma íanexû ínichoeguâchitanücüxü yema nüxíra naxügüâxgurüxû, natürü yema ngunexûgu rü 7 expüxcüna nüxû ínichoeguâchitanücüxü. <sup>16</sup>Rü yexguma ga yema chacherdótegü rü 7 expüxcüna norü cornétagu yacuegügu, rü Yochué rü yema duüxügüxû namu rü ñanagürü: —íAita pixüe! Rü nüma ya Cori ya Tupana rü marü pexna nanaxá ya daa íane. <sup>17</sup>Rü daa íane, rü guxûma i taxacü i nawa ngëxmaxûmaxá, rü tá

peyanaxoxêxê, erü ngëmaâcü nixí i Cori ya Tupana i nüxû yaxuxû. Rü ngëma Raáxicatátama iyixí i taxútama ngíxû pimaxcü namaxá i ngëma duüxügü i ngíchiüwa ngëxmagüxû. Erü ngíma iyixí ga iyacüxgüâxû ga yema taxre ga yatügü ga ngugütaewa yéma imugüxû. <sup>18</sup>iRü ñuxma i pemax rü pegüna pedaugü nax tama penayaxuxû i taxacü i norü ngëmaxû ya yima íanewa ngëxmaxû! Erü nüma ya Cori ya Tupana rü namaxá nanaxuegu ya daa íane nax peyanaxoxêxêxûçax rü penadaíacuxûçax. Rü ngëxguma taxútama ngëmaâcü penaxüxgux, rü nüma ya Tupana rü tá chixexû tamaxá naxuegu rü tá chixexû taxçax ínanguxêxê. <sup>19</sup>Natürü ngëma úiru rü diérumü rü guxûma i ngëmaxügü i bróüchenaxçax rü fiérunaxçax, rü Cori ya Tupanaçax tá nixí rü norü ngëmaxügüitanügu tá penanú —ñanagürü ga Yochué. <sup>20</sup>Rü yexguma ga nüma ga yema duüxügü rü aita naxüe rü ga cornétagü rü naxáatanü. Rü yexguma guma cornétagagüxû naxínüegu ga nüma ga Iraétanüxügü rü inanaxügüe nax poraâcü aita naxüexû. Rü yexguma ga guma íanearü poxegüxû rü napuxáchi. Rü yexguma ga nüma ga Iraétanüxügü rü tauxchaâcü yexma nachocu, rü noxrüxû nayaxígüxêxê. <sup>21</sup>Rü yemawena rü taramaxá tüxû nadai ga yatüxe, rü ngexe, rü ngextüxügüixe, rü yaxguâxgü, rü wocagü, rü carnérugü, rü búrugü. Rü noxtacüma guxûma nadai. <sup>22</sup>Rü nüma ga Yochué rü yema taxre ga yatügü ga ngugütaewa íxüxû ñanagürü: —íEcü ngípatawa pexí i ngëma nge i Raax rü guxûma i ngítanüxûmaxá nua ngíxû



pega, yema ngĩmaxã ipexunetaxũrũxũ!  
—ñanagürü. <sup>23</sup>Rü nūmagü rü ngĩchiũgu  
nachocu. Rü Raáxũ ñinagaxũchigü  
tūmamaxã ya ngĩnatü, rü ngĩé, rü  
ngĩeneegü, rü guxũma ga  
ngĩtanũxũmaxã. Rü wüxi ga nachica ga  
mexũ ga Iraétanũxũgü ñpegũxũarü  
düxétüwaama yexmaxũgu ngĩxũ  
nayamugü.

.....

<sup>27</sup>Rü nūma ga Cori ya Tupana rü  
Yochuéxũ narüngũxēē, rü yemacax  
guxũma ga yema naanewa nangu ga  
nachiga.

#### Acáũarü chixexũchiga

**7** <sup>1</sup>Rü wüxi ga Yudátanũxũ ga  
Acáũgu ãégaxũ ga Cármi nane ga  
Cháditaxa rü Cháratata ixĩxũ, rü nanade  
ga ñuxre ga yemaxũgü ga Tupana  
chuxuxũ. Rü yemacax ga guxũma ga  
Iraétanũxũgü rü naxiétũũgü ga Cori ya  
Tupanapexewa yerü ga Acáũ rü  
nanayaxu ga yema Tupana chuxuxũ. Rü  
yemacax ga Cori ya Tupana rü  
Iraétanũxũgũmaxã nanu.

#### Acáũarü chixexũgagu rü Iraétanũxũgũ narüporamaegü ga ñane ga Áixarü duũxũgü

<sup>2</sup>Rü nūma ga Yochué rü Yericúwa  
inanamuãchitanü ga ñuxre ga yatügu  
nax ñane ga Áixwa yangugütaegũxũcax,  
rü ngoxi nũxũ natauxcha nax guma ñane  
rü tá nagu nachocuxũcax. Rü guma ñane  
rü ñane ga Betélarü éstewaama nayexma  
ga chianexũ ga Betawéũarü  
ngaicamána. Rü nūmagü rü yéma naxĩ  
rü nayangugütaegü. <sup>3</sup>Rü yexguma  
nawoegugu, rü Yochuéxũ ñanagürügi:

—Tama tanaxwaxe i guxũ i  
churaragũmaxã naxcax ítayachõõchi ya  
yima ñane ya Áix, erü 2,000 rüexna  
3,000 i churaragũmaxã nixĩ i marü  
yanguxũ nax yapuxuxũ ya yima ñane.  
iRü taxütáma guxũ i churaragü ngẽma  
cumugü! Erü tama namu i ngẽma  
duũxũgü ya yima ñanena daugũxũ  
—ñanagürügü. <sup>4</sup>Rü yemaacü 3,000 ga  
churaragü nixĩ ga Áixcax íyachõõchixũ.  
Naturü nūma ga yema duũxũgü rü  
Iraétanũxũgũxũ narüporamaegü rü  
nayabuxmũxēē. <sup>5</sup>Rü 36 ga  
Iraétanũxũgũxũ nadai, rü guxema  
toxogũx rü tūmawe nangēgü ñuxmata  
guma ñanearü ñpēmawa nangugü, rü  
ínatũãchianexũgu tũxũ nayadai. Rü  
yemacax ga Iraétanũxũgü rü  
narũmaãchitanü rü namuũe. <sup>6</sup>Rü nūma  
ga Yochué rü yema Iraétanũxũgũarü  
ãēxgacügü rü norü ngechaũmaxã  
nügũchirugu nagáugüe rü  
waixũmütexemaxã nügü nigügüeru. Rü  
ñuxmachi yema baú ga Tupanaarü  
mügũchixũpexegu nanangücuchitanü  
ñuxmata nayáuane. <sup>7</sup>Rü nūma ga  
Yochué rü ñanagürü: —Pa Corix  
¿tũxcũũ cuyachoũxēē ga ñna duũxũgü  
ga natü ga Yudáũwa? ¿Ēxna  
Amoréutanũxũgũmexēgu toxũ  
cuyixēxũcax nixĩ i nua toxũ cugagũxũ  
nax ngẽmaacü toxũ nadajũcax? Rü  
narümemae chi nixĩ ga natü ga  
Yudáũarü tocutü chitama tarũchoxũ.  
<sup>8</sup>Pa Corix. ¿Taxacü tá chaxũxũ i  
ñuxmax? Erü nūma i Iraétanũxũgü rü  
marü norü uanũchaxwa nibuxmü. <sup>9</sup>Rü  
nūma i Canaáũtanũxũgü rü guxũma i  
duũxũgü i ñna naanegu pegũxũ rü tá  
nũxũ nacuãchigagü i ngẽma toxũ

ngupetüxü. Rü nüma rü tá wüxigu toxçax ínayachõõchi nax toxü nadajüçüçax, rü taxúetáma ítayaxü i totanüwa. ¿Rü texé tá cuxü ticuaxüxü rü cuxü tataxëxë i ngëxguma? —ñanagürü ga Yochué. <sup>10</sup>Rü nüma ga Cori ya Tupana rü Yochuéxü nangãxüga rü ñanagürü: —¡Inachi! ¿Taxacü ngéma cuxü i ñaxtüanegu cunangüchichü? <sup>11</sup>Rü nüma i Iraétanüxügü rü chixexü naxügü. Erü nümagü rü tama nayanguxëxë i ngéma mugü ga namaxã nüxü chixuxü. Rü nanayauxgüama i ngéma ngëmaxügü i nüxna chachuxuxü. Rü meama nüxü nacuaxgüácüma naxçax nangixgü i ngéma choxrü ixixü, rü norü ngëmaxügütanügu nayacuxgü. <sup>12</sup>Rü ngëmacax i pemax i Iraétanüxügü rü taxucürüwama nüxü perüporamae i perü uanügü. Rü naxçaxwa tá pibuxmü rü pegagutama nixi i namexü i noxtacüma peyuexü. Rü ngëxguma i pema i ñuxma rü tama paxa ípenaguxgu i ngéma pexna chachuxuxü, rü marü taxütáma petanüwa changexma. <sup>13</sup>iRü ñuxma rü inachi, rü nangutaquexëxë i duüxügü! iRü namaxã nüxü ixu nax moxüçax nügü yamexëëgüxü nax ngémaäcü chopexewa ínangugüçax! Erü choma i Cori ya perü Tupana rü ñacharügü: “Pemax, Pa Iraétanüxügüx, rü penayaxu i ngéma ngëmaxügü i pexna chachuxuxü. Rü ngëxguma taxütáma ípenaguxgu rü pegüwa nüxü pexoxçgux i ngéma chixexü, rü taxucürüwatáma perü uanügüxü perüporamae”, ñacharügü. <sup>14</sup>Rü moxü paxmama rü petücumümaxächigü tá chopexewa pengugü i guxãma i pema i Iraétanüxügü. Rü choma i perü Tupana

nax chixixü rü tá nüxü chaxuneta i ngéma natücumü i nawa naxüxü i ngéma yatü i chixexü üxü. Rü ñuxüchi ngéma natücumüwa rü tá nügütanüxüäcü chopexewa nangugü. Rü choma rü tá nüxü chaxuneta i ngéma nügütanüxütücumü i nawa nangexmaxü i ngéma yatü. Rü ngëmaxwena rü tá ngéma nügütanüxütücumüwa rü tá nüxü chaxuneta ya yima ípata ya nawa nangexmane i ngéma chixexü üxü. Rü ñuxüchi yima ípataçüçxtanüwa rü tá nüxü chaxuneta i ngéma yatü i chixexü üxü. <sup>15</sup>Rü yíxema tümaxütagu nüxü iyangaugüxe i ngéma ngëmaxügü ga chachuxuxü, rü tá tüxü nigugü namaxã i tümaxacügü rü guxüma i tümaarü ngëmaxügü, erü tümagagu chixexü naxçax ínangu i Iraétanüxügü, erü tama naga taxínü i chorü mu —ñanagürü ga Tupana.

#### Acáüarü poxçuchiga

<sup>16</sup>Rü moxüäcü ga Yochué rü paxmamaxüchi ínarüda rü duüxügüxü namu nax natücumümaxächigü Tupanapexewa nangugüxü. Rü nüma ga Cori ya Tupana rü Yudátücumüxü naxuneta. <sup>17</sup>Rü yexguma ga Yochué rü Yudátücumümaxã nüxü nixu nax nügütanüxütücumüäcü rü Tupanapexewa nax naxixü. Rü Tupana rü Cháratánüxüxü naxuneta. Rü yema Cháratánüxüwa rü guma Chádipataxü naxuneta. <sup>18</sup>Rü yema yatixügü ga Chádipataçüçxgü rü Tupanapexewa nangugü, rü Tupana nüxü naxuneta ga Acáü ga Cármi nane ga Cháditaxa ga Yudátanüxü ixücü. <sup>19</sup>Rü yexguma ga Yochué rü Acáüxü ñanagürü: —Pa

Chaunex, rü name nixí i cunataxêxê rü nüxü quicuaxüxü ya Cori ya tórü Tupana. iRü chomaxã nüxü i xu i taxacü nax cuxüxü! iRü taxú icuyacúxü! —ñanagürü. <sup>20</sup>Rü Acáü nanangäxüga rü ñanagürü: —Aixcüma nüxü chixu, rü chixexü chaxü namaxã ya Cori ya tórü Tupana. Rü ñaa nixí i ngëma chaxüxü. <sup>21</sup>Rü Yericüwa nüxü chadau ga wüxi ga mexechixü ga naxchiru ga Babiróniacüãxgüarü ü rü 200 tachinü ga diërü, rü wüximenaxã ga úiru ga ngäxü ga quíruarü yexera yaxü. Rü choxü nangúchaü ga yema yemaxügü, rü yemaçax chaugüxü chanade, rü chauchiümachiaüga chanataxgü. Rü ngëma diërutachinügü rü aixepeguama chananu —ñanagürü. <sup>22</sup>Rü yexgumatama ga Yochué rü Acáüchiüwa nanamugü ga ñuxre ga yatügü, rü yexma nüxü nayangaugü ga yema yemaxügü ga yexma icüxgüxü namaxã ga yema diëru ga natüüguama nuxü. <sup>23</sup>Rü nanade ga yema yemaxügü rü Yochuépexewa nanana napexewa ga guxüma ga Iraétanüxügü. Rü nümagü ga Iraétanüxügü rü Tupanapexegu nayanu. <sup>24</sup>Rü yemawena rü Acúarü ngatexüwa Acáüxü nagagü namaxã ga yema diëru, rü yema naxchiru, rü yema úirumenaxã, rü nanegümaxã, rü naxacügümaxã, rü norü wocagümaxã, rü norü búrugümaxã, rü norü carnérugümaxã, rü napatamaxã, rü guxüma ga taxacü nüxü yemaxümaxã. <sup>25</sup>Rü Yochué rü Acáüxü ñanagürü: —¿Tüxcüü chixexü tatanüwa ícunguxêxê? Rü ñuxma ya Cori ya Tupana rü ngëma chixexü tátama nixí i cuxna nanguxêxêxü —ñanagürü. Rü

yema ñaxgu ga Yochué, rü guxüma ga Iraétanüxügü rü nutamaxã Acáüxü rü natanüxügüxü nadai. Rü ñuxüchi natanüwa nanangüxichi. <sup>26</sup>Rü yemawena rü nutagü naéüwa nanawogü. Rü gumá nutagü rü ñuxma rü ta ngëma naxäüxchita. Rü ngëmacax i ñuxmax i ngëma nachica rü Acúarü Ngatexügu naxäéga. Rü yemaacü Iraétanüxügümaxã narüngüxmü ga Cori ya Tupana.

### Íane ga Áixü nanapugü ga Iraétanüxügü

**8** <sup>1</sup>Rü nüma ga Cori ya Tupana rü Yochuéxü ñanagürü: —iTaxucaçma cumüü rü icurümaächí! iRü inaxüächí naxçax ya yima íane ya Áix, namaxã i guxüma i curü churaragü! Erü choma rü tá pora cuxna chaxã nax yima íane ya Áixarü äëxgacüxü rü norü duüxügüxü curüporamaexüçax. Rü yima norü íane rü norü naane rü cuxrü tá nixí. <sup>2</sup>Rü guma Yericümaxã rü norü äëxgacümaxã cuxüxüxüxü tátama cunaxü namaxã ya yima íane ya Áix rü norü äëxgacü. Natürü i ñuxmagu rü marü name i pegüxü penade i norü ngëmaxügü rü naxünagü. Rü tá ípenabaxgü, rü norü íanecaçwenaama tá pixíchi —ñanagürü. <sup>3-4</sup>Rü yexguma ga Yochué rü nügü namexêxê guxüma ga norü churaragümaxã nax íane ya Áixçax íyachööchixüçax. Rü nayadexechi ga 30,000 ga churaragü, rü chütacü yéma nanamugü. Rü nayaxucuxëgü rü ñanagürü nüxü: —iMea iperüxínüie! iRü ipexíächí rü norü íanecaçwexguama peyarücuxgü! iRü ípememare nax yima íanegu pechocuxüçax! <sup>5</sup>Rü ngëma togü i duüxügü rü chomaxã tá yima íanecaç

ínayachõõchi. Rú ngëxguma yima ïanecüãx toxçax yayixgux nax toxü nadaixüçax, rü toma rü tá tibuxmü ga to ga ngunexügurüxü. <sup>6</sup>Rü ngëxguma i nümagü rü tá towe nangëgü erü tá nagu narüxînie nax noxrirüxü naxchaxwa ibuxmüxü i yixema i Iraétanüxügü. <sup>7</sup>Rü ngëxguma i pema rü tá peyayi i ngëma ípicuxgüxüwa rü yima ïanegu tá pichocu, erü Cori ya tórü Tupana rü pexna tá nanaxã ya yima ïane. <sup>8</sup>Rü ngëxguma marü nagu pichocuxgu, rü tá nawa penangixichi, ngëma Cori ya Tupana nüxü ixuxürüxü. Rú ngëmaãcü nixi i pexü chamuxü —ñanagürü ga Yochué. <sup>9</sup>Rü yexguma ga Yochué rü inanamuächitanü ga yema churaragü. Rú nümagü rü inaxĩachi rü Betél rü Áixarü ngãxümachatexegu nicuxgü ga Áixçaxwenaama. Natürü nüma ga Yochué rü yema ínapegüxüwatama nanangupetüxëxë ga chütaxü. <sup>10</sup>Rü moxüãcü noxri yangunechaüxgu rü ínarüda ga Yochué rü norü duüxügüxü nidaugü. Rú ñuxüchi tümapexegu naxã namaxã ga Iraétanüxügüarü ãëxgacügü rü ïane ga Áixçax inaxĩachi. <sup>11</sup>Rü guxüma ga norü churaragü rü guma ïanepexewaama ne naxi rü nüxü ningaicaetanü, rü wüxi ga ngatexüpechinüwa nayachaxächitanü ga guma ïanearü tügü necüwawaama. <sup>12</sup>Rü nüma ga Yochué rü ïane ga Betél rü Áixarü ngãxümachatexegu nayacuxgü ga to ga 5,000 ga yatügü ga guma ïanearü toxoxwecüwawaama. <sup>13</sup>Rü yemaacü ga Iraétanüxügüarü churaragü rü taxregu niyauxyetücumü. Rú yema wüxitücumü rü ïanearü toxoxwecüwagu nicuxgü, rü yema totücumü rü yema

íyachaxächitanüxüwa nayexmagü ga ïanearü tügü necüwawaama. Rú yema chütaxügü ga Yochué rü nanaxüpexe rü nüxíra yema ngatexüarü ngãxüwa nangu. <sup>14</sup>Rü yexguma Iraétanüxügüxü nadauxgu ga Áixarü ãëxgacü, rü norü churaragümaxã nayayi nax nügü nadaixüçax namaxã ga yema Iraétanüxügü ga ngatexüarü tocutüwa yexmagüxü. Natürü tama nüxü nacuçax rü yema togü ga Iraétanüxügü nax bexma norü ïanecaxwëxgu nayacuxgüxü. <sup>15</sup>Rü nüma ga Yochué rü norü churaragümaxã nibuxmüneta. Rú yema nama ga chianexüwa nadaxügü nixü naxchaxwa ga yema Áixarü churaragü. <sup>16</sup>Rü guxüma ga churaragü ga guma ïane ga Áixcüãxgü ixigüxü rü Yochuéwe nangëgü. Rú yexguma Yochuéwe nangëgügu rü yema norü ïanena niyáxüetanü. <sup>17</sup>Rü guxüma ga churaragü ga Áixcüãx rü Betélcüãx rü Iraétanüxügüwe nangëgü, rü taxuxüma ïanewa nayaxü. Rú yema Iraétanüxügüwe nax nangëgüxügagu rü guma ïane rü taxüema nüxna tadau rü nangeenümare ga norü íãx. <sup>18</sup>Rü yexguma ga nüma ga Cori ya Tupana rü Yochuéxü ñanagürü: —iËcü, cuaxruxü nüxna naxã i ngëma curü churaragü i ïanecaxwëxgu icuxgüxü nax nagu nachocuxüçax ya yima ïane ya Áix, erü tá cuxna chanaxã ya yima ïane! —ñanagürü ga Tupana. Rú nüma ga Yochué rü cuaxruxü inaxã nax nagu nachocuxüçax ga guma ïane. <sup>19</sup>Rü yexguma ga yema icuxgüxü ga churaragü rü paxama ínaxüxü rü guma ïanegu nachocu rü nawa nanangixichigü. <sup>20</sup>Rü yexguma nügü

fyadaugügu ga yema duïxügü ga Áíxcüãxgü rü nüxü nadaugü ga nax ínatüxünagüétüxü ga guma norü ïane. Rü yemaçax taxuwama naxüéga, yerü nüma ga Iraétanüxügü ga noxri naxçaxwa chianexüwa buxmüchiréxü rü nügü nawoegu nax nadaiaxüçax. <sup>21</sup>Rü yexguma Yochué nüxü dauxgux ga yema Iraétanüxügü ga icuxgüxü rü marü guma ïanegu nax nachocuxü rü nawa nax nangixichigüãxü, rü nügü nawoegu rü Áíxcüãxmaxã nügü nadai. <sup>22</sup>Rü ñuxmachi ga yema Iraétanüxügüarü churaragü ga ïanegu chocuxü rü ínachoxü. Rü yemaacü ga yema taxretücumü ga Iraétanüxügü rü nügüwa tüxü naxüxëxë rü tüxü ínayauxü. Rü guxãma tüxü nadai. ....

**Yochué rü ma xpúne ga Ebáwa  
duïxügüçax nüxü nadaumatü ga  
Tupanaarü mugü**

<sup>30-31</sup>Rü yexguma ga Yochué rü ma xpúne ga Ebágu rü Cori ya Iraétanüxügüarü Tupanaçax nanaxü ga wüxi ga ãmarearü guchicaxü, yema Moiché nüxü ixuxürüxü nawa ga yema mugüarü popera ga ñaxü: “ÍËcü wüxi i ãmarearü guchicaxü naxü nawa ya nuta ya tama imexëëpütägücü!” ñaxü. Rü yexguma ga yema Iraétanüxügü rü yema guchicaxüwa nayagu ga naxünagü Tupanaarü ngüxmüçëerüxü. <sup>32</sup>Rü yemawena ga nüma ga Yochué rü Iraétanüxügüpexewa gumá nutagü ga ãmare nawa ínagucüpütagu nanaxümatü ga Tupanaarü mugü ga Moiché nüxna ãxü. <sup>33</sup>Rü yexguma ga guxüma ga Iraétanüxügü norü

ãëxgacügümaxã rü yema togü ga tama Iraétanüxügü ixígüxü ga natanüwa maxëxümaxã, rü taxregu niyauxye. Rü wüxitücumü rü ma xpúne ga Ebáwaama naxügü rü yema totücumü rü ma xpúne ga Guerachüüwaama naxügü. Rü yema taxretücumüarü ngãxümachatexegu nachigü ga yema chacherdótegü namaxã ga yema baü ga Tupanaarü mugüchixü. Rü yema chacherdótegü rü ínamemaregü nax duïxügümaxã mexü naxuegüxü. Rü guxüma ga yema naxüxü rü Moiché namaxã nüxü ixuxüãcüma nanaxü. <sup>34</sup>Rü yemawena ga Yochué rü duïxügüçax tagaãcü nüxü nadaumatü ga Tupanaarü mugü, rü ñuxãcü Tupana rü mexü namaxã naxuegu i ngëma duïxügü i naga ínüexü, rü chixexü namaxã naxuegu i ngëma tama naga ínüexü. <sup>35</sup>Rü guxüma ga yema mugü ga Moiché nüxna ãxü rü Yochué nüxü nadaumatü naxçax ga guxüma ga duïxügü ga iyatüxü, rü ingexü, rü buxügü, rü yema togü ga tama Iraétanüxügü ixígüxü ga natanüwa maxëxü.

**Iraétanüxügümaxã inaxügagü ga  
Gabaóicüãxgü**

**9** <sup>1</sup>Rü gumá Íftatanüxügüarü ãëxgacü, rü Amoréutanüxügüarü ãëxgacü, rü Canaáutanüxügüarü ãëxgacü, rü Ferechéutanüxügüarü ãëxgacü, rü Ebéutanüxügüarü ãëxgacü, rü Yebuchéutanüxügüarü ãëxgacü, rü nüxü nacuáchigagü ga yema Yericüwa rü Áixwa ngupetüxü. (Rü yema ãëxgacügü rü natü ga Yudáüarü oéstege nixí ga naxãchiüügüxü, rü nümaxü rü ínamãxpüxanexügu rü togü rü

ínametachinüanexügu, rü togü rü már i Mediteráneucutügu rü ñuxmata Líbanuarii naanewa nangu.) <sup>2</sup>Rü yexguma ga guxüma ga yema ãëxgacügü rü nügümaxã nagu narüxínüie nax nügü nangüxëëgüxüçax, rü Yochuémaxã rü Iraétanüxügümaxã nügü nadaïxüçax. <sup>3</sup>Natürü nüma ga Ebéutanüxügü ga ïane ga Gabaóügu ächiügüxü rü ta nüxü nacuáchigagü ga yema Yochué üxü namaxã ga guma ïanegü ga Yericü rü Áix. <sup>4-5</sup>Rü nagu narüxínüie nax ñuxäcü womüxëëäcüma nügü ïnapoxügüxü. Rü yemacax Yochuéxütawa naxi ga ñuxre ga norü duüxügü ga ingauxchiruxü, rü ingauarü chapatuáxü, rü norü tochicaxü ga búrutawa rü ningau. Rü norü bínuchixü rü marü ñuxgumaxügüxü nixügü, rü norü paü rü nichúe. Rü yemagu nügü nicüxgü nax ñoma yáxüwa nax ne naxüxürüxü yixügüxüçax. <sup>6</sup>Rü yexguma yema nachica ga Iraétanüxügü ïpegüxü ga Yirigágu äégaxüwa nangugügu, rü Yochuéxü rü Iraétanüxügüxü ñanagürügü: —Yáxügüxü i naanewa ne taxí rü tanaxwaxe nax tomaxã ipexügagüxü nax tama yigü idaxüçax —ñanagürügü. <sup>7</sup>Rü nüma ga Iraétanüxügü rü Ebéutanüxügüxü nangäxügü rü ñanagürügü: —Bexmana i pemax rü torü ngaicamagutama pipegü rü ñuxäcü tá i pemaxã mexü i ñnüwa tangugüxü —ñanagürügü. <sup>8</sup>Natürü ga nümagü rü Yochuéxü nangäxügagü rü ñanagürügü: —Toma rü tá pexmexwa togü tangexmagüxëxë nax pexü tapuracüexüçax —ñanagürügü. Rü nüma ga Yochué rü nüxna naca rü ñanagürü: —¿Texé pixügü i pemax? ¿Rü ngextá ne pexí? —ñanagürü. <sup>9-10</sup>Rü nümagü rü

Yochuéxü nangäxügagü rü ñanagürügü: —Rü yáxüwa ne taxí, erü nachigaxü taxínüie ya Cori ya perü Tupana. Rü nüxü tacuáchiga ga yema Equítuanewa naxüxü, rü ñuxäcü natü i Yudáüaru tocutiwa pexü nangüxëëxü nax penadaïxüçax ga yema taxre ga ãëxgacü ga Amoréutanüxügüaru ga Cheóü ga Ebóüwa ãëxgacü ixücü, rü Ox ga Bacháüwa ãëxgacü ixücü. <sup>11</sup>Rü ngëmacax i torü ãëxgacügü rü tomücügü rü ñanagürügü toxü: “iPewemü tá ípinge i perü namawaxü rü Iraétanüxügütanüwa ípeyadaugü, rü ñapegüxü tá nüxü: ‘Rü pexmexwa togü tangexmagüxëxë rü mexü i ñnüwa pemaxã tangugüchaü, ñapegü ta!’ ñanagürügü toxü. <sup>12</sup>Rü yexguma itaxíächigu nax pexçax tayadauxüçax rü ga paü rü nanai, natürü i ñuxma rü marü nichüx rü nipamare. <sup>13</sup>Rü yexgumarüxü ta i ñaa naxchaxmüxü ga úbachiümaxã tanaxüäcu rü nimexechichirex ga noxri itaxíächigu, natürü i ñuxma rü marü narügáugü. Rü ngëxgumarüxü ta namaxã nangupetü i toxchiru rü torü chapatugü, erü yáxüwama ne taxí —ñanagürügü. <sup>14</sup>Rü nüma ga Iraétanüxügü rü yema Gabaóücüäxgüwemüxü nangöxnetagü, natürü tama Cori ya Tupanana nacagüexíra ga taxacü tá namaxã naxüexü ga yema duüxügü. <sup>15</sup>Rü yexguma ga Yochué rü yema Gabaóücüäxmaxã mexü ga ñnüwa nangu, rü namaxã nüxü nixu nax taxütama nadaiaxü. Rü yema togü ga Iraétanüxügüaru ãëxgacügü rü Tupanaégagu Yochuérüütama mexügu yema Gabaóücüäxmaxã narüxínüie. <sup>16</sup>Rü tomaepüx ga ngunexü ngupetüxguwena rü nüma ga Iraétanüxügü rü nüxü nacuxgü nax norü ngaicamagutama naxächüügüxü ga yema Gabaóücüäxgü.

<sup>17</sup>Rü yexguma ga ñuxre ga Iraétanüxügüaru churagü rü inaxĩachi nax yema Gabaóücüãxgüaru ñanegücax yadaugüxücax. Rü tomaepüx ga ngunexügu norü ñanegüwa nangugü. Rü guma norü ñanegü rü Gabaóü nixĩ, rü Cafıra nixĩ, rü Berúx nixĩ rü Quiriáx-yearü nixĩ. <sup>18</sup>Natürü nüma ga Iraétanüxügü rü tama yema Gabaóücüãxgüxü nadai yerü yema norü ãëxgacügü rü Cori ya Iraétanüxügüaru Tupanaégagu nüxü nixugüe nax taxütáma nax nadaiaxücax. Rü yemacax ga Iraétanüxügü ga duüxügü rü tama norü ãëxgacügümaxã nataãxëgü, rü nachigagu nidexagü. <sup>19</sup>Natürü nümagü ga yema ãëxgacügü rü ñanagürügü: —Toma rü Cori ya tóru Tupanaégagu namaxã nüxü tixu nax taxütáma tanadaixü. Rü ngëmacax i ñuxma rü taxucürüwa tanadai. <sup>20</sup>Rü nüé namáxë, erü ngëxguma chi taxüchima tayanguxëëgu i ngëma Tupanamaxã nüxü tixuxü rü nüma ya Tupana rü tomaxã chi nanu —ñanagürügü. <sup>21</sup>Rü yemaacü ga yema ãëxgacügü ga Iraétanüxügü rü norü duüxügümaxã nüxü nixu nax tama nadaiaxücax ga yema Gabaóücüãxgü. Natürü nüma ga Iraétanüxügü rü norü dexáaru tooxüwa rü üxiaru tooxüwa nanapuraciüexë. Rü yemaacü tama nanadai ga yema Gabaóücüãxgü. ....

**Amoréutanüxügüxü  
narüporamae ga Iraétanüxügü**

**10** <sup>1-2</sup>Rü Adonichedé ga Yerucharéüaru ãëxgacü nüxü naxĩnü ga ñuxãcü Yochué rü Áixü narüporamae, rü nayamaç ga norü ãëxgacü rü nayanaxoxëxë ga norü ñane.

Rü yexgumarüxü ta nüxü naxĩnü ga ñuxãcü Yericúxü narüporamae rü nayamaç ga norü ãëxgacü. Rü ñuxüchi nüxü nacuáchiga nax Gabaóücüãxgü rü Iraétanüxügümaxã mexü ga ñnüwa nangugüxü nax tama namaxã nügü nadaixücax. Rü yemacax ga nüma ga Yerucharéüaru ãëxgacü rü poraãcü namüü yerü Gabaóü rü wüxi ga ñane ga taxüne rü porane ga Áixaru yexera ixixüne nixĩ, rü norü duüxügü rü nipora rü tama namüewaxë. <sup>3</sup>Rü yemacax ga nüma ga Adonichedé rü yéma namuga naxcaç ga Yoáü ga ñane ga Ebróüaru ãëxgacü, rü Pireáü ga ñane ga Yamúxaru ãëxgacü, rü Yafia ga ñane ga Láquiari ãëxgacü, rü Debí ga ñane ga Egóüaru ãëxgacü. <sup>4</sup>Rü ñanagürü: —iNua pexĩ nax choxü peyarüngüxëëgüxücax nax Gabaóücüãxgümaxã yigü idaxücaç! Yerü Yochuémaxã rü guxüma ga Iraétanüxügüaru ãëxgacügümaxã mexü ga ñnüwa nangugüe nax tama nügü nadaixücaç —ñanagürü. <sup>5</sup>Rü yemacax ga yema 5 ga ãëxgacügü ga Amoréutanüxügü ga Yerucharéüaru ãëxgacü, rü Ebróüaru ãëxgacü, rü Yamúxaru ãëxgacü, rü Láquiari ãëxgacü, rü Egóüaru ãëxgacü, rü wüxigu naxítaquexë. Rü norü churagümaxã Gabaóüaru ñanecax inaxĩachi nax namaxã nügü nadaixücaç. <sup>6</sup>Rü yemacax ga yema Gabaóücüãxgü rü Yirigáwa ga Yochuéxütawa namugagü, rü ñanagürügü: —iTaxü ipexoexü nax toxü peyarüngüxëëxü i toma i perü puracütanüxü nax tixigüxü! iRü paxa nua pexĩ nax toxü peyarüngüxëëxü rü toxü ípexoxüxücaç! Erü guxüma i ngëma ãëxgacügü i Amoréutanüxügü i

māxpúíneaneciūāxgū rü wüixigu toxçax  
 naxítaquexe nax toxū nadāixūcāç  
 —ñanagürügü. <sup>7</sup>Rü yexguma ga Yochué  
 rü Yirigáwa inaxūāchi namaxā ga  
 guxūma ga norü churaragü. <sup>8</sup>Rü nüma ga  
 Cori ya Tupana rü ñanagürü nüxū:  
 —iTaxū i nüxū cumuūxū! Erü choma rü  
 tá cuxmēxgu chanayixēxē i ngēma  
 Amoréutanüxūgü. Rü bai i tá i wüxi i  
 cuxū rüporamaexū —ñanagürü. <sup>9</sup>Rü  
 Yirigáwa inaxūāchi ga Yochué namaxā ga  
 norü churaragü, rü chütacü inixū. Rü  
 yemaacü Amoréutanüxūgüxū  
 ínayabāixgü rü nanadai. <sup>10</sup>Rü nüma ga  
 Cori ya Tupana rü Iraétanüxūgüpexewa  
 poraācü yema Amoréutanüxūgüxū  
 namuüexēxē. Rü yemaçax ga Yochuéarü  
 churaragü rü ñane ga Gabaóūgu nanadai  
 ga muxūma. Rü ñyxūchi Bex-oróūarü  
 namagu nawe ningēxūtanü ga yema  
 ibuxmüxū. Rü nayadaietanü ga yema  
 Amoréutanüxūgü ñyxmata ñanegü ga  
 Achéca rü Machédawa nangugü. <sup>11</sup>Rü  
 yexguma Iraétanüxūgüchaxwa  
 yabuxmügu ga yema Amoréutanüxūgü  
 nawa ga yema tuāchixū ga Bex-oróūwa  
 daxū, rü nüma ga Cori ya Tupana rü  
 ixāpütaxū ga gáuxū naétügu nayixēxē. Rü  
 Iraétanüxūgü dāixūarü yexera yema  
 gáuxūmaxā nayue ga Amoréutanüxūgü.  
<sup>12</sup>Rü yexguma nüma ga Cori ya Tupana  
 rü Iraétanüxūgümēxēgu nayixēēgu ga  
 yema Amoréutanüxūgü, rü nüma ga  
 Yochué rü duūxūgüpexewa Cori ya  
 Tupanamaxā nidexa rü ñanagürü: —Pa  
 Tupanax, chanaxwaxē i  
 ícuyachaxāchixēēxū ya üāxcü  
 Gabaóūétüwa. iRü ngēxgumarüxū ta ya  
 tauemacü rü íyachaxāchixēxē i  
 Ayaróūarü ngatexūétüwa! —ñanagürü.

<sup>13</sup>Rü gumá üāxcü rü gumá tauemacü rü  
 yéma nayachaxāchigü ñyxmata ga  
 Iraétanüxūgü norü uanügüxū nadai. Rü  
 ngēmacax i Yacháarü poperawa rü  
 ñanagürü: “Rü yimá üāxcü rü wixgutaçax  
 24 ora ninge ga nax tama yanaxücuxū”,  
 ñanagürü. <sup>14</sup>Rü yemaacü Tupana  
 ínayachaxāchixēxē ga üāxcü rü tauemacü  
 nagagu ga wüxi ga yatüiarü yumüxē. Rü  
 ũpaacü rü taguma yemaacü nangupetü,  
 rü woo nawena ga yema rü taguma  
 yemaacü nangupetü yerü woetama  
 Iraétanüxūgüétüwa naxü ga Tupana.  
 .....

<sup>40</sup>Rü Yochué rü norü churaragümaxā  
 nanadaiācu ga guxūma ga yema  
 nachixūanegü. Rü nüxū narüporamae ga  
 yema āēxgacügü ga māxpúíanewa  
 yexmagüxū, rü yema ínachianexūwa  
 yexmagüxū, rü yema ínadoxonexūwa  
 yexmagüxū, rü yema māxpúínearü  
 tuāchixūwa yexmagüxū. Rü yemaacü  
 nanadai ga guxūma ga yema duūxūgü. Rü  
 bai ga wüxi ga íyaxüxü yema Tupana  
 namaxā nüxū ixuxürüxū. <sup>41-42</sup>Rü yemaacü  
 wüxicana guxūma ga yema āēxgacügüxū  
 nadai rü nanapu ga guxūma ga norü  
 naanegü ga Cadé-banéawa inaxügü rü  
 ñyxmata Gáchawa nangu, rü Gochéüwa  
 inaxügü rü ñyxmata Gabaóūwa nangu.  
 Yerü woetama Iraétanüxūgüétüwa naxü  
 ga Tupana. <sup>43</sup>Rü yemawena ga Yochué rü  
 guxūma ga norü churaragümaxā rü  
 ínapegüxūcāç nawoegu ga Yirigáwa.  
 .....

**Caréxarü naane**

**14** <sup>6</sup>Rü yema Iraétanüxūgü ga  
 Yudátücumüwa ügüxū rü  
 Yirigáwa naxi nax Yochuémaxā



yanadexagüxüçax. Rü nüma ga Caréx ga Chenécheutanüwa ücü ga Yefúne nane, rü Yochuéxü ñanagürü: —iNüxna nacuxächí ga yema ore ga Cori ya Tupana norü duü ga Moichémamaxá nüxü ixuxü ga tachiga ga chianexü ga Cadé-banéawa! <sup>7</sup>Rü choma rü 40 ga taunecü choxü nayexma ga yexguma Moiché Cadé-banéawa choxü imuächigu nax chayangugüxüçax ga ñoma Canaáüane. Rü yexguma chatáegugu rü meama namaxá nüxü chixu rü ñachagürü nüxü: “Rü ngëma naane rü name rü natauxcha nax nagu ichocuxü”, ñachagürü nüxü. <sup>8</sup>Natürü ga yema togü ga chomücügü rü nüxü nixu nax naxäücümaxü, rü yemaacü duüxügüxü namuüexëxë, rü yemacax ínayaxoetanüächí ga nagu nax nachocuxü ga ñaa naane. Natürü ga choma rü tama nüxü icharüngüma ga Tupanaarü uneta rü nagu charüxínüecha. <sup>9</sup>Rü yexguma ga nüma ga Moiché rü meama chomaxá naxüga rü ñanagürü choxü: “Yema naane ga nawa cunguxü rü cuxrütátama nixí rü cutaagüarü tá nixí, erü aixcüma naga cuxínü ya tórü Cori ya Tupana”, ñanagürü. <sup>10</sup>Rü ñuxma rü marü 45 ga taunecü nangupetü nax Cori ya Tupana rü Moichémamaxá nüxü yaxuxü ga yema ore ga yexguma ínachianexüwa iyexmagügu. Rü yema chomaxá inaxunetaxüçax rü ñuxma rü ta chamaxü woo 85 ya taunecü choxü ngëxmaxü. <sup>11</sup>Rü ñuxma rü ta chapora yexguma Moiché ñaa naanearü ngugüwa choxü muxürüütama, rü yexgumarüütama choxü natauxcha i ñuxma nax ichaxüächixü nax daiwa

chaxüxü. <sup>12</sup>Rü ngëmacax i ñuxmax rü cuxna naxçax chaca nax choxna cunaxäxüçax i ngëma naane i maxpúneáxü ga nümatama ga Cori ya Tupana chomaxá namaxá ixunetaxü nax choxna naxäxüçax. Rü cumax, Pa Yochuéx, rü meama nüxü cucuxax nax ñuxma rü ta nangexmagüxü i ngëma nataagü ga guma Anáx ga taxüchicü rü máchanexüchicütanüxü. Rü ngëma norü ñanegü rü nita rü meama ínápoxegügü. Natürü i chomax rü nüxü chacuax nax Cori ya Tupana rü tá choxü nangüxëxü nax ngëma ínawoxüächüçax, yema chomaxá nüxü yaxuxürüütama —ñanagürü ga Caréx. <sup>13</sup>Rü yexguma ga nüma ga Yochué rü Tupanaégagu mexü Caréxmaxá naxuegu. Rü nüxna nanaxá ga Ebróüarü naane nax noxrü yixixüçax rü nataagüarü yixixüçax. <sup>14</sup>Rü yemaacü nixí ga Ebróüarü naane ga Caréxarü yixixü, rü ñuxma rü ta rü nataagüarü yixixü. Yerü nüma ga Caréx rü aixcüma Cori ya Iraétanüxügüarü Tupanaga naxínü.

.....

#### Iraétanüxügümaxá nidexa ga Yochué

**23** <sup>1</sup>Rü mucüma ga taunecü nangupetü nax Tupana rü Iraétanüxügüxü nangüxëxü nax norü uanügüxü naporamaegüxüçax. Rü yexguma ga Yochué rü marü naya. <sup>2</sup>Rü nüma ga Yochué rü guxüma ga Iraétanüxügüarü äëxgacügüçax nangema. Rü yema wüxütücumüchigüarü äëxgacügüçax nangema, rü yema äëxgacügü ga guxchaxügüarü mexëeruüçax nangema, rü yema churagarüerügüçax rü ta

nangema. Rü ñanagürü nüxũ: —Marü chipa erü marü chaya. <sup>3</sup>Pema rü marü nüxũ pedau ga yema naxüxũ ga Cori ya Tupana ga yexguma nadaiägu ga yema duüxügü ga perü uanügü ixigüxũ. Yerü nüma ga Cori ya Tupana rü peétüwa naxü. <sup>4</sup>Choma rü wüxütücumüchigüna chanaxã ga yema naane ga nagu pinguchigüxũ. Rü tama yema naane ga marü penapuxüica nixĩ ga pexũ chinüxũ, natürü namaxã chanangauxëxë i ngëma naane i taxüta penapuxũ i natü i Yudãüwa naxügü i éstewa, rü ñuxmata már i Mediteráneuwa nangu i oéstewaama. <sup>5</sup>Rü ngëma duüxügü i ñuxma ngëma naanegu ächiügüxũ, rü Cori ya Tupana rü tá nawa ínanawoxũ. Rü pema rü tá pegüxũ penayaxu ngëma Cori ya Tupana nüxũ ixuxürüxũ. <sup>6</sup>iRü mea peyanguxëxë i ngëma mugü i Moichéarü poperagu ümatüxũ! iRü ngëma naxümatüxüãcü nagu pemaxë! <sup>7</sup>iRü taxütáma namaxã pixãxmaḡgü rü pixãtegü i ngëma togü i duüxügü i ñuxma rü ta petanügu ächiügüxũ! iRü taxütáma norü tupanaxü picuãxüxügü, rü bai tá i naga pexĩnüexũ, rü bai tá i norü tupanaéga penaxuxuchixũ, rü bai tá i norü tupanaégagu mexü pexueguxũ! <sup>8</sup>iRü ñuxmarüütama rü guxügutáma Cori ya tórü Tupanawe perüxĩ! <sup>9</sup>Rü nüma ga Cori ya Tupana rü marü pepexewa ínanawoxüãcu ga íanegü ga itaxüne rü iporane. Rü ñuxmata ñoma i ngunexüwa nangu rü taxüema pexũ tarüporamae. <sup>10</sup>Rü wüxietama i pema rü pexũ natauxcha nax 1,000 i duüxügüxũ pixüxëxũ, erü Cori ya perü Tupana rü peétüwa naxü rü pexcaḡ nügü namaxã nadai, yema nümatama

pemaxã inaxunetaxürüxũ. <sup>11</sup>iRü pexüãëgü rü pegüna pedaugü i perü maxüwa nax tama nüxũ iperüngümaexüçax ya tórü Cori ya Tupana! <sup>12-13</sup>Rü choma rü chanaxwaxe i nüxũ nax pecuáxũ rü ngëxguma tá Tupanana pixigachigu rü ñaa duüxügü i petanüwa ngëxmagüxümaxã pexãmücügu, rü namaxã pixãxmaḡgügu, rü pixãtegügu, rü nüma ya Cori ya perü Tupana rü taxütáma pexũ narüngüxëxë nax ípenawoxüxüçax i ngëma duüxügü i petanüwa ngëxmagüxũ. Rü nüma ya Tupana rü perü guxchaxürüxũ tá nayaxigüxëxë i ngëma duüxügü nax ngëmaäcü naxmexgu peyxüçax. Rü ngëmaäcü ñoma texë pexcaḡwena nacuaixcaxürüxũ tá nixĩ ñuxmatáta taxütáma petanüwa íyaxü nawa i ñaa mexü i naane ya tórü Cori ya Tupana pexna äxũ. <sup>14</sup>Choma rü marü paxa tá chayü. Natürü naxüpa nax chayuxũ rü chanaxwaxe i meama nüxna pecuãxãchie rü Cori ya Tupana rü marü nayanguxëxë ga guxüma ga yema pemaxã nüxũ yaxuxũ. Rü bai ga wüxi ga yema norü uneta ga nüxũ naxüpetüxũ ga tama yanguxëëxũ. <sup>15-16</sup>Natürü ngëxgumarüxũ nax yanguxëëxãxũ i guxüma i ngëma mexü ga pemaxã inaxunetaxũ, rü ngëxgumarüxũ tá ta pexcaḡ ínananguxëxë i naguxüraüxũ i guxchaxũ i ngëxguma tama aixcüma naga pexĩnüegu i ngëma uneta ga pemaxã nüxũ yaxuxũ. Rü ngëxguma to i tupananeltagu perüxĩnüegu rü naxcaḡ pemaxëgu, rü nüma ya Cori ya Tupana rü tá pemaxã nanu, rü paxaxüchi tá pexũ inayarüxoxëxë nawa i ñaa naane i

mexũ i nũma pexna naxãxũ. Rũ bai tá ya wũxíe ípeyaxũãchi —ñanagürũ ga Yochué.

**Yochué rũ duũxũgũxũ naxucuxê  
rũ nüxũ narũmoxê**

**24** <sup>1-2</sup>Rũ yexguma ga Yochué rũ Chiquéũgu nanangutaquexexêxê ga guxũma ga duũxũgũ ga Iraétanũxũgũ, wũxigu namaxã ga yema wũxiticumũchigüarũ ãẽxgacügũ ga yaxguãxgũ, rũ ãẽxgacügũ ga guxchaxũarũ mexêeruxũ, rũ yema churaragüarũ ãẽxgacügũ. Rũ yéma Tupanapexewa ñanagürũ: —Yimã tórũ Tupana i yixema i Iraétanũxũgũ rũ ñanagürũ: “Nũxcũma ga nũma ga Taréx rũ nanegũ ga Abraáũ rũ Nacóx ga perũ oxigũ ixĩgũcũ, rũ taxtũ ga Eufrátcutũgu naxãchiũgũ. Rũ yéma nixĩ ga togũ ga tupanaxũ yacuaxũũgũxũ. <sup>3</sup>Natürũ ga choma ya Tupana rũ yéma taxtũ ga Eufrátcutũwa chanayaxu ga Abraáũ, rũ Canaáũanegu chayaxũgũchigũxêxê. Rũ yéma nixĩ ga nane ga Ichaá nüxna chanamuxũ nax yemaacũ yamuxũcax ga nataagũ. <sup>4</sup>Rũ Ichaána chanamugũ ga taxre ga nane ga Acóbu rũ Echaú. Rũ Echaúna chanaxã ga naane ga máxpũxanexũ ga Cheígu ãégaxũ. Natürũ ga Acóbu rũ nanegũ rũ Equítuanewa naxĩ. <sup>5</sup>Rũ yexguma ga choma ga Tupana rũ Equítuanewa chanamu ga Moiché rũ Aróũ. Rũ chanadai ga yema Equítuanecũãxgũ rũ ñũxmata naxmexwa pexũ íchanguxũxêxê. <sup>6</sup>Rũ yexguma perũ oxigũ Equítuanewa íchoxũgu rũ nũma ga Equítuanecũãxgüarũ churaragũ rũ

tũmawe nangêgũ namaxã ga norũ cowa rugũ, rũ naweũgũ ga cowa rũ itũgũne, rũ ñũxmata már ga Dauchiũxũwa nangugũ. <sup>7</sup>Rũ nũma ga perũ oxigũ rũ chaũcax nacagũ, rũ yema cax ga naweama rũ chanaxêanexêxê naxchaxwa ga Equítuanecũãxgũ. Rũ yexgumarũxũ ta chanaxũ nax már naétũgu íñaxũchiũxũcax ga yema Equítuanecũãxgũ nax yexma nayĩxũcax. Rũ pematama nixĩ i nüxũ pedauxũ ga yema chaxũxũ ga yexguma. Rũ ñũxũchi ga pemax ga Iraétanũxũgũ rũ yema ínachianexũ ga taxũema íxãpataxũwa peyexmagũ mucũma ga taunecũ. <sup>8</sup>Rũ yemawena nixĩ ga pexũ chichocuxêxũ nawa ga yema naane ga Amoréutanũxũgũ nawa yexmagũxũ ga natũ ga Yudáũarũ tocutũwa. Rũ nũma ga Amoréutanũxũgũ rũ pemaxã nügũ nadai, natürũ ga choma rũ pexũ charũngũxêxê nax nüxũ perũporamaegũxũcax rũ pexmexêgu nayĩxũcax. Rũ yemaacũ penayaxu ga yema naane. <sup>9</sup>Rũ nũma ga Baláx ga Chipú nane ga guma Moáanearũ ãẽxgacũ rũ pemaxã nügũ nadai. Rũ nũma ga Baláx rũ Balaáũ ga Beú nanecax nangema nax chixexũ pemaxã naxuegũxũcax. <sup>10</sup>Natürũ ga choma ya perũ Tupana rũ nüxna chanachũxu ga Balaáũ nax chixexũ pemaxã naxuegũxũcax. Rũ yemaacũ peétũwa chachogũ. <sup>11</sup>Rũ yemawena ga pema rũ pichoũ nawa ga yema natũ ga Yudáũ ñũxmata Yericúarũ íanewa pengugũ. Rũ yema duũxũgũ ga guma íanegu ãchiũgũxũ rũ pemaxã nügũ nadai. Rũ yexgumarũxũ ta ga yema duũxũgũ ga

Amoréutanüxügü, rü  
 Ferechéutanüxügü, rü Canaáütanüxügü,  
 rü Itítatanüxügü, rü  
 Yerguechéutanüxügü, rü Ebéutanüxügü,  
 rü Yebuchéutanüxügü rü pemaxã nügü  
 nadai. Natürü ga chomax, rü pexü  
 charüngüxë nax nüxü  
 perüporamaegüxüçax. <sup>12</sup>Rü tama pema  
 nixĩ ga perü taragümaxã rü perü  
 würagümaxã nüxü perüporamaexü ga  
 yema taxre ga äëxgacügü ga  
 Amoréutanüxügüarü. Natürü choma  
 nixĩ ga yéma chanamugüxü ga máxegü  
 nax namüxüçax rü yabuxmüxüçax  
 naxüpa nax yéma pengugüxü. <sup>13</sup>Rü  
 choma rü marü pexna chanaxã ga  
 naanegü ga tama pema pexüxü, rü  
 ñanegü ga tama pema pexügüne. Rü  
 ñuxma rü yimagu pexächüügü, rü  
 penangõxgü i úbagü rü orfbugü ga  
 tama pema ipetogüxü”, ñanagürü ga  
 Tupana. <sup>14</sup>Rü nüma ga Yochué rü  
 ñanagürü ta: —Guxüma i ngëma  
 pemaxã nüxü chixuxüçax rü name nixĩ i  
 mea Cori ya Tupanaga pexĩnüexü rü  
 noxrütama ngüchaü pexüxü. Rü name  
 nixĩ i nüxna pexĩgachixü i ngëma  
 nüxcüma ga perü oxigüarü tupanagü ga  
 taxtü ga Eufrátcutüwa rü Equítuanewa  
 nüxü yacuaxüügüxü. <sup>15</sup>Natürü  
 ngëxguma tama Cori ya Tupanawe  
 perüxixchaügüx irü ñuxmatama nüxü  
 pixu i taxacürü tupanawe tá perüxixü,  
 rüexna ngëma tupanagü ga nüxcüma ga  
 perü oxigü nüxü icuaxüügüxü ga taxtü  
 ga Eufrátcutüwa, rüexna ngëma norü  
 tupanagü i Amoréutanüxügü i ñaa  
 naanegu ächiügüxü! Natürü i chomax,  
 rü chauxacügü rü Cori ya Tupanawe tá  
 nixĩ i tarüxixü —ñanagürü ga Yochué.

<sup>16</sup>Rü yexguma ga nüma ga duüxügü rü  
 ñanagürügü: —Tagutáma nüxna  
 tixĩgachi ya tórü Cori ya Tupana, rü bai  
 tá i ñuxgu togümare i tupanagüwe  
 tarüxixü. <sup>17</sup>Yerü nüma nixĩ ya tórü Cori  
 ya Tupana ga tüxü ñanguxüxëxü  
 naxmexwa ga yema Equítuanecüxgü.  
 Rü nüma nixĩ ga tapexewa naxüaxü ga  
 yema muxüma ga mexügü ga  
 noxrütama poramaxã naxüxü. Rü nüma  
 nixĩ ga tüxna nadauxü rü tüxü  
 ñapoxüxü nüxna ga tórü uanügü ga  
 yexguma norü naanewa ichopetügu.  
<sup>18</sup>Rü nüma ga Cori ya Tupana nixĩ ga  
 tapexewa ñawoxüaxü ga  
 Amoréutanüxügü rü yema togü ga  
 duüxügütücumügü ga ñaa naanegu  
 ächiügüxü. Rü ngëmacax tá nawe  
 tarüxü, erü nüma nixĩ i tórü Tupana  
 yixixü —ñanagürügü. <sup>19</sup>Natürü ga  
 nüma ga Yochué rü duüxügüxü  
 nangaxü rü ñanagürü: —Pema rü  
 taxütáma pexü natauxcha nax Cori ya  
 Tupanaarü ngüchaü pexügüxü, erü  
 nüma ya Tupana rü naxüüne rü  
 poracü nüxü tachuxu. Rü taxütáma  
 pemaxã yaxna naxĩnü ega tama naga  
 pexĩnüegu rü chixexü pexügügu. <sup>20</sup>Rü  
 ngëxguma tá nüxna pixĩgachigu rü togü  
 i tupanagüwe perüxixgu, rü nüma ya  
 Cori ya Tupana rü tá pemaxã nanu rü  
 tá pexü napoxcuc rü tá pexü  
 nayarüxoxëxë woo mucüma ga  
 taunecügu mea pexna nax nadauxü  
 —ñanagürü ga Yochué. <sup>21</sup>Rü nüma ga  
 duüxügü rü nanangaxü rü ñanagürügü:  
 —Toma rü tagutáma nüxna tixĩgachi ya  
 Cori ya Tupana, rü aixcüma norü  
 ngüchaü tá taxügü —ñanagürügü. <sup>22</sup>Rü  
 yexguma ga nüma ga Yochué rü

ñanagürü: —Ñuxma rü pematama nixĩ i nüxũ pixuxũ nax aixcũma tá norü ngúchaũ pexügüxũ ya Cori ya Tupana —ñanagürü. Rü nüma ga duũxũgü rü nanangãxũ rü ñanagürügü: —Ngẽmáacüx, tomatama nixĩ i nüxũ tixuxũ rü nagu tarüxĩnüexũ nax aixcũma Coriwe tarüxĩxũ —ñanagürügü. <sup>23</sup>Rü yexguma ga nüma ga Yochué rü ñanagürü: —iËcü ípenawogü i ngẽma togü i tupanachicünaxãgü i petaniwa ngẽxmagüxũ, rü aixcũma naxçax pewoegu ya yimá Cori ya tórü Tupana ya yixema i Iraétanüxũgü! —ñanagürü. <sup>24</sup>Rü nüma ga duũxũgü rü nanangãxũ rü ñanagürügü: —Toma rü aixcũma tórü Cori ya Tupanaarü ngúchaũ tá taxügü, rü ngẽma tomaxã nüxũ yaxuxũ rü tá tanaxü —ñanagürügü. <sup>25</sup>Rü yema ga ngunexũgutama rü Chiquéüarü ñanewa, rü nüma ga Yochué rü duũxũgümaxã wüxigu Tupanamaxã inaxügae nax guxũgutáma naga naxĩnüexũçax. Rü ñuxüchi yema duũxũgümaxã nüxũ nixu ga Tupanaarü mugü rü norü ucuxëgü. <sup>26</sup>Rü guxũma ga yema mugü ga duũxũgümaxã nüxũ yaxugüxũ, rü nanaxümatü nagu i Tupanaarü mugüpane. Rü yemawena ga Yochué rü nanayaxu ga wüxi ga tacü ga nuta rü yema castaña ga Tupanapataciwawa rüxüxütüügu

nayaxü. <sup>27</sup>Rü guxũma ga yema duũxũgümaxã nüxũ nixu rü ñanagürü: —Daa nutawa tá nixĩ i nüxna pecuaxächieixũ i guxũma i ngẽma Cori ya Tupana pemaxã nüxũ ixuxũ. Rü ngëxgumarüxũ ta rü daatama nuta nixĩ ya cuaxruxũ ixĩcü i ngëxguma pema rü taxütáma peyanguxëëxgu i ngẽma Tupanamaxã nüxũ pixuxũ —ñanagürü ga Yochué. <sup>28</sup>Rü yemawena ga nüma ga Yochué rü ñanayamugü ga yema duũxũgü nax wüxichigü norü naanecax nawoeguxũçax.

#### Yochuéarü yuxchiga

<sup>29</sup>Rü yemawena rü noxre ga ngunexũgu namaxũ ga Yochué ga Núü nane ga Tupanaarü duü. Rü nayu ga yexguma 110 ga taunecü nüxũ yexmagu. <sup>30</sup>Rü norü naanegutama nayataxgü ga Tima-chéaraarü ñanewa. Rü yima ñane rü Efraíarü naanearü máxpüxanexüwa nangexma rü Gaáxarü máxpünearü nórtewa naxü. <sup>31</sup>Rü yexguma Yochué maxũxgu rü nüma ga yema Iraétanüxũgü rü mea Cori ya Tupanaga naxĩnüe. Rü woo ga Yochuéwena rü mea naga naxĩnüe ga yexguma tauta nayueyane ga yema Iraétanüxũgüarü yaxguãxgü ga nüxũ icuáxũ ga guxũma ga yema Cori ya Tupana nüxcũma naxçax üxũ. ....

# JUECES

## (Ãexgacügü i guxchaxügiarü mexëeruügi)

.....

### Nayu ga Yochué

**2** <sup>6</sup>Rü yexguma Yochué íyamugü ga yema Iraétanüxügi, rü wüxichigü ga natücumü rü ínixi nax nayauxgüäxücax ga yema norü naane ga nüxna üxü. <sup>7</sup>Rü yexguma Yochué maxüxgu rü nüma ga yema Iraétanüxügi rü mea Tupanaga naxínüe rü naxcax namaxë. Rü woo ga Yochuéwena rü mea naga naxínüe ga yexguma tauta nayueyane ga yema Iraétanüxügiarü yaxguäxgü ga nüxü daugüxü ga yema taxü ga mexügi ga Cori ya Tupana naxcax üxü. <sup>8</sup>Natürü nüma ga Yochué rü nayu ga yexguma 110 ga taunecü nüxü yexmagu. <sup>9</sup>Rü norü naanegutama nayataxgü ga Tima-Chéaarü íanewa ga Gaáxarü maxpünearü nórtewa üxü ga Efraíarü naane ga máxpüxanexüwa. <sup>10</sup>Rü yexgumarüxü ta nayue ga yema Iraétanüxügi ga Yochué maxüxgu maxëxü. Rü yemaacü ga yema wixweama buexü rü tama Cori ya Tupanaxü nacuaçgü rü tama nagu narüxínüe ga yema mexügi ga Iraétanüxügiacax naxüxü.

### Iraétanüxügi rü Cori ya Tupanaxü narüngümae

<sup>11</sup>Rü nüma ga Iraétanüxügi rü Tupanapexewa chixëxü naxügi, yerü inanaxügie ga Baáchicünaçaxü nax yacuaxüügiçax. <sup>12</sup>Rü yema duüxügi rü norü oxigüarü Tupana ga Equítuanewa tüxü ínguxüxëcixü ínataçgü nax yema duüxügi ga norü ngaicamagu pegüxüarü tupanagüxü yacuaxüügiçax. Rü yemaacü Cori ya Tupanaxü nanuxëëgi. <sup>13</sup>Rü yema duüxügi ga Iraétanüxügi rü Cori ya Tupanana nixigachi nax yema togü ga duüxügiarü tupananetagi ga Baá rü Astartéhicünaçagüxü yacuaxüügiçax. <sup>14</sup>Rü yemaçax ga nüma ga Cori ya Tupana rü poraäcü yema Iraétanüxügiamaxä nanu rü nüxna nixü nax yema ingítaçgüxü rü norü yemaxügiçax nangüxgüxüçax, rü yema norü uanügi ga norü ngaicamagu pegüxü rü guxüguma nüxü naporamaegüxüçax. Rü nüma ga Iraétanüxügi rü taxucürüwama nügi ínapoxügi. <sup>15-16</sup>Rü yexguma norü uanümaxä nügi yadaixchaüxgu ga Iraétanüxügi, rü nüma ga Cori ya Tupana rü tama nüxü

narüngüxêê, rü yemaçax chixri nüxü ínananguxuchi yema nümatama ga Cori namaxã naxueguxürüxü. Natürü woo yema Iraétanüxügüçax ínananguxêê ga guxchaxügü, natürü yemaétüwa rü nüma ga Tupana rü Iraétanüxügütanüwa nanangucuxêê ga ãëxgacügü nax yema ínapoxügüxüçax norü uanügüna.

<sup>17</sup>Natürü nümagü ga Iraétanüxügü rü tama yema ãëxgacügüga naxínüe. Rü yexgumarixü ta tama Cori ya Tupanaga naxínüe, yerü togümare ga tupanagixü nicuaxüxügü. Rü woo nüxcüma ga guxema norü oxigü rü Tupanaarü mugüga taxínüe, natürü ga nümagü rü tama norü oxigücümagu naxíxchaü. <sup>18</sup>Rü yexguma Cori ya Tupana naporaxêëxgu ga guma Iraétanüxügüarü ãëxgacü, rü nüma ga ãëxgacü rü norü duüxügüxü narüngüxêê, rü tüxü ínananguxüxêê naxmëxwa ga yema tümaarü uanügü. Yerü nüma ga Tupana rü yexguma tüxü naxínügu ga nax taxauxexü nagagu ga yema nax tapoxcuexü, rü nüxü tangechaütümüxügü. <sup>19</sup>Natürü yexguma nayuxgu ga guma norü ãëxgacü, rü nümagü ga Iraétanüxügü rü wena chixexüçax nawoegu rü nanatügüarü yexera chixexü naxügü rü togümare ga tupanagnetagixü nicuaxüxügü. Rü tama nüxü narüxoechaü ga yema chixexü naxügüxü, rü tama ínanataxgüchaü ga nacüma ga chixexü.

.....

**Débora rü Bará rü Chícharaxü narüporamaegü**

**4** <sup>1</sup>Rü yexguma Iraéanecüãxgüarü ãëxgacü ga Aóx yuxguwena, rü nüma ga Iraéanecüãxgü rü wenaxarü Cori

ya Tupanapëxewa chixexü naxügü. <sup>2</sup>Rü yemaçax ga nüma ga Cori ya Tupana rü Iraéanecüãxgüxü wüxi ga Canaáütanüxü ga ãëxgacü ga Yabfügu áégaxümëxëwa nanayexmagüxêê. Rü nüma ga Yabfü rü íane ga Achúarü ãëxgacü nixí. Rü yema norü churaragüarü ãëxgacü rü Chícharagu naxáéga. Rü nüma ga Chíchara rü Aroché-goíügu nixí ga naxáchiüxü. <sup>3</sup>Rü nüma ga Yabfü rü nüxü nayexma ga 900 ga nawexü ga fiérunaxçax ga dajxwa mexüne (ga cowaru ítügüne). Rü 20 ga taunecü poraäcü Iraéanecüãxgüchü naxai rü chixri namaxã inacuax. Rü yemaçax ga yema Iraéanecüãxgü rü düxwa Cori ya Tupanaarü ngüxêëçax ínacagüe. <sup>4</sup>Rü yema ngunexügügu rü wüxi i nge ga Déboragu áégacü iyixí ga Iraéanecüãxgümaxã icuaxcü. Rü ngüma rü Tupanaarü orearü uruxü iyixí rü Lapidóx naxmãx iyixí ga ngüma. <sup>5</sup>Rü ngüma ga Débora rü wüxi ga cucutüüwa irütooxü, rü yemaçax ga yema cucu rü Déboraarü cucu nixí ga naéga. Rü yema cucu rü Efraíanearü mæxpúneanewa nayexma ga Ramá rü Betélarü ngäxüwa. Rü yéma nixí ga ngüçax naxüxüxü ga Iraéanecüãxgü nax norü guxchaxügü namexêëgüxüçax. <sup>6</sup>Rü wüxi ga ngunexü ga Débora rü naxçax ingema ga wüxi ga yatü ga Barágu áégacü ga Abínuáü nane ixcü. Rü nüma ga Bará rü naxáchiü nagu ga wüxi ga íane ga Chedégu áégane ga Netaríanewa yexmane. Rü ngígürügü nüxü: —Cori ya tórü Tupana rü cuxü namu rü ñanagürü cuxü: “iRü Netarítanüxüwa rü Chaburóütanüxüwa nade i 10,000 i yatügü, rü yima mæxpúne ya Tabúgu nangutaquexexêê! <sup>7</sup>Rü choma rü tá

nüxna chaxĩnü i Chíchara ya Yabíuarü churaragüarü ãëxgacü nax Chichóüarü ngatexüwa naxüxüçax nax ngëmaacü norü churaragümaxã rü nawexüğü (ya cowaru itúgünemaxã) cuxçax nax íyaxüächixüçax. Natürü i choma ya Cori ya Tupana rü tá cuxü chanatauxchaxëxë nax cunadaixüçax”, ñanagürü cuxü ya Tupana —ngígürügü. <sup>8</sup>Rü nüma ga Bará nanangãxüga rü ñanagürü ngĩxü: —Ngëma tá chaxü ega cuma rü ta ngëma cuxüxgu. Natürü ngëxguma tama ngëma cuxüxgu i cumax, rü taxütáma ngëma chaxü —ñanagürü ngĩxü. <sup>9</sup>Rü yexguma ga ngíma ga Débora rü inangãxüga rü ngígürügü: —Marü name rü cuxü tá íchixümücü. Natürü ngëma nax Chíchara xü nax quimáxü rü taxütáma cuma nixĩ erü ya Tupana rü wüxi i ngexümexëgu tá nixĩ nax naxüãxü nax yamáaxüçax —ngígürügü. Rü yexguma ga ngíma ga Débora rü Bará xü íyaxümücü ga íane ga Chedéwa. <sup>10</sup>Rü yexguma Chedéwa nangugügu, rü nüma ga Bará rü naxçax nangema ga Chaburóütanüxügü rü Netarítanüxügü ga yatügü nax churarawa naxixüçax. Rü yemaacü nanangutaquexëxë ga 10,000 ga yatügü. Rü Débora rü íyaxümücü. <sup>11</sup>Rü Chedéarü ngaicamagu ga Chanafüarü castañatüügu naxächiü ga Ebéx ga wüxi ga Quenéutanüxü ga natanüxüna ixügachixü rü nüxica tóxmagu áchiüxü. Rü nüma ga Ebéx rü guma Moichéna xüti ga Obátanüxü nixĩ. <sup>12-13</sup>Rü yexguma Chíchara nüxü cuaxgu ga Bará rü ma xpüne ga Tabúwa nax naxüxü, rü nüma ga Chíchara rü nanangutaquexëxë ga guxüma ga norü churaragü rü guma 900 ga nawexü ga

fiérunaxçax (ga cowaru itúgüne). Rü yemagümaxã Aroché-gofüwa inaxüächi rü ñuxmata ngatexü ga Chichóüwa nangugü. <sup>14</sup>Rü yexguma ga ngíma ga Débora rü Bará xü ngígürügü: —Ñuxmawaxi nixĩ name xü nax Chícharaçax quixüxü, erü nüma ya Cori ya Tupana rü curü churaragüpe xegu tá nixü, rü tá cuxü nanatauxchaxëxë nax Chíchara xü curüporamaexü —ngígürügü. Rü nüma ga Bará rü guma ma xpüne ga Tabúwa nayarüxüe namaxã ga yema 10,000 ga norü churaragü. <sup>15</sup>Rü yexguma ga nüma ga Cori ya Tupana rü yema Chícharaarü churaragü ga ixímarexügütanüwa, rü yema churaragü ga ixáwexüxütanüwa, rü ínananguxëxë ga muü ga yexguma Barámaxã nügü nadaixgu. Rü nümatama ga Chíchara rü nawexüwa ínaxüe, rü yemaacü niña. <sup>16</sup>Rü yexgumayane ga nüma ga Bará rü yema Chícharaarü churaragüwe rü yema churaragü ga ixáwexüxüwe nange ñuxmata Aroché-Gofüwa nangu. Rü yema ngunexügu rü taxuxüma ga Chícharaarü churaragü ínayaxü. Rü guxüma nayue. <sup>17</sup>Rü yexgumayane ga nüma ga Chíchara rü Yaé ga Ebéx naxma xchiüçax niña, yerü nüma ga Ebéx ga Quenéutanüxü rü Achúarü ãëxgacü ga Yabíümaxã namecüma rü nügü narüngüxëëgü. <sup>18</sup>Rü ngíma ga Yaé rü Chícharaçax iyagó, rü ngígürügü nüxü: —iNuxã chauchiügu nangaxi, Pa Corix, rü taxuçaxma cumuü! Erü tá cuxna tadaugü —ngígürügü. Rü nüma ga Chíchara rü ngíchiügu nangaxi. Rü yexma wüxi ga düxruümaxã iyadüxü. <sup>19</sup>Rü nüma ga Chíchara rü ñanagürü ngĩxü: —Ílrxaxü i dexá choxna naxã, erü chitaxawaxüchi! —ñanagürü. Rü



yexguma ga ngĩma ya Yaé rü léche nüxna ixã. Rü wenaxarü iyadüxü. <sup>20</sup>Rü nüma ga Chíchara rü ñanagürü ngĩxü: —Iĩxgu rüxãüx! Rü ngëxguma duĩxü ngéma ne üxgu, rü cuxna nacaxgu rü: “iNataxuma nixi i taxaciü”, ñacuxü tá nüxü! —ñanagürü. <sup>21</sup>Natürü nüma ga Chíchara rü poraäcü nipa rü yemaçax napexechi. Rü yexgumayane ga ngĩma ga Yaé rü inayaxu ga wüxi ga poruxü rü wüxi ga nai ga ämaguxü ga ngĩpatacuna nagu ngaxü. Rü bexma Chíchara iyexmaxüwa ixü. Rü naerugu inacaxü rü yema poruümaxã yéma iyapocuchi ñuxmata yatopetüxeru rü mairaxüanewa nangu. Rü yemaacü nayu ga Chíchara. <sup>22</sup>Rü yexguma Bará yéma nguxgu ga Chícharaçax nax nadauxü, rü ngĩma ga Yaé rü ngĩchiüwa iyagó ga Baráxü nax nayaxuxüçax. Rü ngĩgürügü nüxü: —iNua naxü nax cuxü chanawéxüçax i ngéma naxçax cudauxü! —ngĩgürügü. Rü nüma ga Bará rü ngĩchiügu naxücu. Rü yexma Chícharaçaxü nayangau ga yexma üxü ga mairaxüanewa ipotüeruxü namaxã ga yema nai ga ämaguxü. <sup>23</sup>Rü yemaacü ga yema ngunexügu rü Cori ya Tupana nüxü narüngüxëë ga Iraéanecüãxgü nax Canaáütanüxüarü äëxgacü ga Yabfüxü naporamaegüxüçax. <sup>24</sup>Rü yexgumacürüwa ga Iraéanecüãxgü rü yexeraäcü äëxgacü ga Yabfüxü narüporamaetanü rü ñuxmata yamaçgüã rü nadaia ga guxüma ga norü duĩxügü. ....

#### Tupana rü Yedeóüçax naca

**6** <sup>1</sup>Natürü nüma ga Iraéanecüãxgü rü wena Cori ya Tupanapexewa chixexü naxügü, rü yemaçax ga nüma

ya Tupana rü 7 ga taunecü Iraéanecüãxgüxü rü Madiáüanecüãxgümexëwa nayexmagüxëxë. <sup>2</sup>Rü nüma ga Madiáüanecüãxgü rü niyexeragutanü nax chixri Iraéanecüãxgümamaxã inacuaxgüxü. Rü yemaçax ga yema Iraéanecüãxgü rü Madiáüanecüãxü namüie, rü maxpünegü ga guxchaxãcü nawa inguxünearü äxmaxügu nicüxgü. <sup>3</sup>Rü yexguma Iraéanecüãxgü toegügu, rü nüma ga Madiáüanecüãxgü rü Amaléxtanüxügü rü yema duĩxügü ga éstewa ne ixü, rü naxçax inayaxüächü. <sup>4</sup>Rü Iraéanecüãxgüarü naanewa nangugü rü guxüma ga tümanetügügu nidaugü rü tümaxünagü nanadai ñuxmata Gáchaarü naanewa nangu. Rü taxuxüma ga Iraéanecüãxgüarü ngöxruuxü inayaxügüxëxë, rü bai ga carnérugü, rü bai ga wocagü, rü bai ga búrugü ga iyaxügüxü. <sup>5</sup>Rü yema duĩxügü rü muxüchixü ga norü caméyügümaxã inangugü, ñoma munügü i nanetüarü chixexëwa ixürüxü. Rü yexma nachocu namaxã ga norü wocagü, rü napatagü ga naxchaxmünaxçax. Rü guxüma ga yema Iraéanewa yexmaxü ga nanetügü rü nanagüxëxë. <sup>6</sup>Rü yemaacü ga yema Madiáüanecüãxgügüga rü Iraéanecüãxgü rü taxü ga guxchaxüwa nayexmagü. Rü düxwa Cori ya Tupanaarü ngüxëëçax inacagü. <sup>7-8</sup>Rü yexguma Iraéanecüãxgü rü Cori ya Tupanaarü ngüxëëçax inacagügu nax Madiáüanecüãxgümexëwa inanguxüxüçax, rü nüma ga norü Tupana rü yéma nanamu ga wüxi ga norü orearü uruxü ga ñaxü: —Ñanagürü

ya Cori ya Tupana: “Choma nixí ga Equítuanewa pexû íchagaxûxû ga ngextá norû puracûtanûxûxû pexû íyaxígûxêêxûwa. <sup>9</sup>Rû yema Equítuanecûâxmexêwa nax pexû íchanguxûxêêxûrûxû, rû pexû íchanguxûxêxê naxmexwa ga yema togû ga perû uanûgû ga pexû daxchaûxû. Rû pepexewa íchanawoxû ga yema duûxûgû, rû pexna chanaxã ga norû naane. <sup>10</sup>Rû pemaxã nüxû chixu nax choma yixixû ya perû Cori ya Tupana chixixû, rû ngêmacax taxucaxma norû tupanagûxû pemuêe i ngêma Amoréutanûxûgû i ñuxma perû ngaicamagu âchiûgûxû. Natürü ga pema rû tama chauga pexînuê —ñanagürü. <sup>11</sup>Rû wüxi ga ngunexûgu rû Tupanaarû orearû ngeruxû i daxûcüâx rû yéma nangu rû gumá castaña ga Ófarawa yexmanetüüwa narüto. Rû gumá castaña rû Yoá ga Abiechétanûxûarû nixí. Rû nüma ga Yedeóû ga Yoá nane rû cúácüma trígu ínabugütexê nawa ga yema nachica ga úba íyapumügûxûwa nax bínu naxûgûxûcax. Rû yéma napuracû nax yemaacû taxucürüwa Madiáüanecûâxgû nüxû daugûxûcax. <sup>12</sup>Rû nüma ga Tupanaarû orearû ngeruxû i daxûcüâx rû Yedeóúcax nangox rû ñanagürü nüxû: —Cori ya Tupana rû cuxûtawa nangexma, Pa Yatü ya Poracû rû Tama Muûwaxecûx —ñanagürü. <sup>13</sup>Rû nüma ga Yedeóû rû nanangâxûga rû ñanagürü: —iChoxû nangechaxû, Pa Corix! Rû ngêxguma chi Cori ya Tupana toxûtawa ngêxmagu ðtûxcüü toxû nangupetü i ñaa guxchaxûgû i ñuxma ngêxmaxû? ¿Rû ngexû nixí i ngêma norû pora ga

namaxã naxûxû ga yema mexûgû ga taxûgû ga torü oxigû nüxû íxugûchigagûxû ga yexguma Equítuanewa tûxû ínanguxûxêegu? Rû nüma ya Cori rû toxna nixûgachi i ñuxmax, rû Madiáücüâxgûna toxû namugû —ñanagürü. <sup>14</sup>Rû nüma ga Cori ya Tupana rû Yedeóûxû nadawenü rû ñanagürü: —Choma tá cuxû chaporaxêxê. iRû ngêma naxû rû Madiáüanecûâxmexêwa ínanguxûxêxê i ngêma Iraéanecûâxgu! Rû choma nixí i ngêma cuxû chamuxû —ñanagürü. <sup>15</sup>Natürü ga Yedeóû rû wena Cori ya Tupanaxû nangâxûga rû ñanagürü: —iÑuxmarica choxû nangechaxû, Pa Corix! ¿Natürü ñuxacü tá íchananguxûxêxê i Iraéanecûâxgu? Erü guxûma i Manachétücumüwa rû chautanûxûgû rû guxûma i ngêma togüarü ñaxtûmaewa taxûgû i torü ngêmaxûgûwa. Rû choma rû guxûma i chautanûxûgüarü yexera taxuwama chame —ñanagürü. <sup>16</sup>Rû nüma ga Cori ya Tupana rû nanangâxûga rû ñanagürü: —Choma i Tupana rû cuxûtawa tá changexma. Rû taxuchaácüma tá cunadai i ngêma Madiáüanecûâxgüarü churaragû —ñanagürü.

.....

<sup>25</sup>Rû yematama chütaxûgu rû Cori ya Tupana rû Yedeóûxû ñanagürü: —Chanaxwaxê i cuyayaxu i wüxi i cunatiarü woca i yatûxû rû ngêma to i woca i yatûxû i 7 ya taunecû nüxû ngêxmaxû. iRû ngêma taxre i wocamaxã yatúxuchi rû nagu napogû i ngêma Baáarü âmarearü guchicaxû i cunatü nawa Baácax yaguxû i âmaregû!

iRü ngëxgumarüxü ta natúxuchi rü yawaxëxë i ngëma tupananeta i Achérachicünaxã i nainaxçax i ngëma Baáarü ãmarearü guchicaxütawa ngëxmaxü! <sup>26</sup>Rü ñuxüchi chanaxwaxe i yima maxpúnetapexegu çauxçax cunaxü i wüxi i ãmarearü guchicaxü. iRü ngëmawena rü yamaçax i ngëma woca i 7 ya taunecü nüxü ngëxmaxü rü çauxçax yagu! iRü ngëma tupananetachicünaxã i cutúxüxümaxã naxüxüxü! —ñanagürü ga Tupana. <sup>27</sup>Rü yexguma ga Yedeóü rü gumeçpux ga norü duüxüçax naca, rü nanaxü ga guxüma ga yema Cori ya Tupana namaxã nüxü ixuxü. Natürü chütacü nanaxü yerü nanatütanüxüxü namuü, rü nüxü namuü ga yema duüxügü ga guma ñanecüãx ixügüxü. <sup>28</sup>Moxüãcü ga paçmama ga yexguma duüxügü írüdagügu, rü nüxü inayangaugü ga yema Baáarü ãmarearü guchicaxü ga yexma ñaxtúanegu yapuãchixü rü yexgumarüxü ta ga yema Achérachicünaxã ga yema yexmaxü rü nax yawáxü. Rü ñuxüchi yema nachicawa nayexma ga wüxi ga yexwacaxüxü ga ãmarearü guchicaxü, rü yemaétiwa nigu ga wüxi ga woca ga yatüxü. <sup>29</sup>Rü nügüina nacagüe rü ñanagürügü: —¿Texë tixí ya yíxema ngexü wagüxe? —ñanagürügü. Rü yexguma muxüguma yadaugüetanügu, rü iyacagüetanüguwena, rü nüxü nacuaxgü ga Yedeóü ga Yoá nane nax yixixü. Rü Yoáxütawa naxí rü ñanagürügü nüxü: <sup>30</sup>—ÍInamuxüchi ya cune erü tá tayamaç! Erü ñaxtügü nanatáe i ngëma Baáarü ãmarearü guchicaxü rü ñuxüchi nayawaxëxë i

torü tupana i Achérachicünaxã —ñanagürügü. <sup>31</sup>Natürü nüma ga Yoá rü yema duüxügüxü nangãxüga rü ñanagürü: —¿Ëxna pema rü tá ípenapoxü i Baá rü naxçax tá pegü pedai? Rü naxüpa nax yangunexü rü name nixí nax tayuxü i yíxema Baáxü ípoxüxe. Rü ngëxguma chi aixcüma tupana yixíxgu i Baá írü nügütama ínapoxü rü tüxü yamá ya yíxema nagu pogüxe i ngëma nachica i nawa naxçax ítanaguxü i ãmaregü! —ñanagürü. ....

<sup>33</sup>Rü yexguma ga nüma ga Madiáüanecüãxgü rü Amaléxtanüxügü rü yema duüxügü ga éstewaama ne íxü, rü wüxiwa naxí. Rü natü ga Yudáü nichoü rü ngatexü ga Yerégu nayapegü. <sup>34</sup>Natürü ga Cori ya Tupanaãxë i Üünexü rü Yedeóümaxã inacuax. Rü nüma ga Yedeóü rü carnéruchataçuxregu nicue nax yemaacü naxütawa naxíxüçax ga Abiechétanüxü nax íyaxüümüçügüãxüçax. <sup>35</sup>Rü ñuxmachi duüxügüxü namu nax Manachéticumüçax yacagüexüçax nax nüxü nangüxëgüxüçax. Rü yexgumarüxü ta duüxügüxü namu nax Achéticumü rü Chaburóüticumü rü Netaríticumüçax yacagüexüçax. Rü nümagü rü yéma naxí rü yexma naxítaquexe. <sup>36</sup>Rü Yedeóü rü Tupanana naca rü ñanagürü: —¿Taxacüwa tá nüxü chacuax nax aixcüma choxü curüngüxëxü nax Iraéanecüãxgüxü íchangüxüxëxü, yema cuma chomaxã nüxü quixuxürüxü? <sup>37</sup>Rü dücax, rü ngëma nachica i trígu nawa púxügu tá chanachaxa i wüxi i carnéruchaxmüxü i

ãḡxmüxü. Rü ngëxguma moxü  
 paḡmama cherenamaxã yawaiḡgu i  
 ngëma carnéruchḡxmüxü, natürü  
 waixümü rü napaanegu i naciwawa rü  
 ngëmawa tá nüxü chacuḡ nax aixcüma  
 tá choxü curüngüxëxü nax  
 Iraéanecüḡgüxü íchangüxüxëxü, yema  
 cumatama chomaxã nüxü quixuxürüxü  
 —ñanagürü. <sup>38</sup>Rü yemaacüxüchi ningü.  
 Rü yexguma paḡmama ínadaxgu ga  
 Yedeóü, rü ínanaxãx ga yema  
 naxchḡxmüxü ga ãḡxmüxü rü wüxi ga  
 ngáxweäcu yema nanamaḡ ga dexá ga  
 cherenawa ne üxü. <sup>39</sup>Natürü ga Yedeóü  
 rü Tupanaxü ñanagürüama:  
 —iTaxütáma chomaxã cunu nax wena  
 cuxü chacḡḡxüxü! Natürü ñuxmarica  
 chanaxwḡxe i to i cuḡxruxü. Rü ñuxma  
 rü chanaxwḡxe i ngëma  
 carnéruchḡxmüxü rü tá  
 cunapaxëxëmare natürü i naciwawa rü  
 cherenamaxã tá cunawaianexëxë  
 —ñanagürü. <sup>40</sup>Rü yema ga chütaxügu  
 rü Tupana rü yema Yedeóü naxcḡ  
 ícaxüäcü nanaxü. Rü moxüäcü  
 paḡmama rü yema carnéruchḡxmüxü rü  
 napamare, natürü ga naciwawa rü  
 cherenamaxã nawaiane.

#### Yedeóü nayadexechi ga 300 ga yatügu

**7** <sup>1</sup>Rü Yedeóü i ñuxma Yerubaágu  
 naxüégagüäcü rü wüxigu namaxã  
 ga guxüma ga yema duüxügu ga  
 naxütawa yexmagüxü rü ngunetüxü  
 ínarüdagü. Rü inaxíachi, rü bairawe ga  
 Aróxwa yexmacüxütagu nayapegü. Rü  
 yema nachica ga yema  
 Madiáüanecüḡxgü nagu pegüxü rü  
 Yedeóüarü duüxügu íyapegüxüarü  
 nórtewaama nayexma ga maḡpüne ga

Mórearü tuächiwa. <sup>2</sup>Rü Tupana rü  
 Yedeóümaxã nidexa rü ñanagürü:  
 —Ngëma duüxügu i nua cugagüxü rü  
 namuxüchi. Rü taxucürüwa guxü i  
 ngëma duüxügu Madiáüanecüḡxgümaxã  
 pegü pedai, erü nüma i ngëma duüxügu  
 rü tá nagu narüxínüe nax noxrütama  
 poramaxã nügu ínangüxüxëxü  
 Madiáüanecüḡxgümaxã. <sup>3</sup>iRü  
 ngëmacḡ namaxã nüxü i xü i ngëma  
 duüxügu rü texé ya muüxe rü  
 tümachiücḡ tawoegu! —ñanagürü ga  
 Tupana. Rü yexguma nüma ga Yedeóü  
 rü yema duüxügümaxã nüxü nixu. Rü  
 22,000 nachíicḡ nawoegu, rü 10,000  
 yéma nayaxüächí. <sup>4</sup>Natürü nüma ga  
 Cori ya Tupana rü Yedeóümaxã nüxü  
 nixuchigüama rü ñanagürü:  
 —Namuxüchiamatama. íEcü dexáarü  
 axwa nagagü! Rü ngëma tá cumaxã  
 nüxü chixu i ngexürüxü tá nixí i cuwe  
 rüxüxü, rü ngexürüxü tá nixí i  
 napatacḡ cumuegutanüxü —ñanagürü.  
<sup>5</sup>Rü nüma ga Yedeóü rü dexáarü axwa  
 nanagagü ga yema duüxügu. Rü nüma  
 ga Cori ya Tupana rü Yedeóüxü  
 ñanagürü: —Ngëma duüxügu i  
 naxmexwa axegüxü ñoma airügü  
 nadexcuxüchiüxürüxü rü chanaxwḡxe i  
 nüxrüguma cunachigüxëxë nüxna i  
 ngëma duüxügu i iyarücaxgütanüächíxü  
 rü dexáchiügu ñäüxgüäcüma axegüxü  
 —ñanagürü. <sup>6</sup>Rü yema naxmexwa  
 axegüxü ñoma airügü  
 nadexcuxüchiüxürüxü rü 300 nixí. Rü  
 guxüma ga yema togü rü dexáchiügu  
 nañäüxgüäcü naxaxegü. <sup>7</sup>Rü yexguma  
 ga nüma ga Cori ya Tupana rü  
 Yedeóüxü ñanagürü: —Ñaa 300 i  
 yatügümaxã tá pexü íchangüxüxëxë, rü

tá chanadai i Madiáúanecüâxgü. Rü guxúma i ngêma togü rü marü name ínixí —ñanagürü.

.....

**Yedeóú rü Madiáúanecüâxgüxú narüporamae**

<sup>9</sup>Rü yema ga chütaxúgu rü nüma ga Cori ya Tupana rü Yedeóúxú namu rü ñanagürü: —iĒcü curü churaragümaxã Madiáúanecüâxgüçax ípeyaxüâchi! Rü choma rü tá pexú charüngüxêe nax nüxú perüporamaegüxüçax —ñanagürü. ....

<sup>16</sup>Rü yexgumatama ga nüma ga Yedeóú rü tomaepüxtücumügu nayatoye ga yema 300 ga norü duüxügü. Rü carnéruchatacuxre nüxú ninu, rü ñuxüchi tüxügü ga aixepewa ixomúáxü nüxú ninu. <sup>17</sup>Rü nüma ga Yedeóú rü ñanagürü nüxú: —Ngëxguma ngêma tórü uanügü ípegüxüarü tocüwawa changuxgu irü mea choxú perüdaunü! Rü ngêma chowa nüxú pedauxü rü ngêma tátama nixí ípexüxü. <sup>18</sup>Rü ngëxguma choma rü ngêma chowe rüxüxümaxã carnéruchatacuxregu ticuegügu, rü ngëxguma tá nixí i pema i peyacuegüxü i perü carnéruchatacuxregü naxpechinüwa i ngextá ínapegüxü i ngêma tórü uanügü. íRü ñaäcü tá aita pexüe: “Rü Cori ya Tupanaçax rü Yedeóúçax yigü tadaí”, ñapegüxü tá! —ñanagürü. <sup>19</sup>Rü yemaacü ga Yedeóú rü yema 100 ga yatügümaxã rü ngäxüçüxü yema Madiáúanecüâxgü ípegüxüarü tocüwawa nangugü, ga yexguma nügü ínaxüchicüügüyane ga yema dauxütaegüxü. Rü ñuxmachí ga Yedeóú

rü namüçügü rü nagu nicuegü ga norü carnéruchatacuxregü rü nayapuexêe ga yema tüxügü nax nangóúçax ga yema omüemagü ga yanaxú. <sup>20</sup>Rü yexgumatama ga yema tomaepüxtücumü rü nagu nicuegü ga yema carnéruchatacuxregü rü nayapuexêe ga tüxügü. Rü norü toxoxwemexêgu nayana ga norü omügü ga iyaxuratanüxü, rü norü tügünemexêgu nayana ga carnéruchatacuxregü. “Rü Cori ya Tupanaçax rü Yedeóúçax yigü tadaí”, ñaxúmaxã aita naxüe. <sup>21</sup>Rü nüma ga Iraéanecüâxgü rü Madiáúanecüâxgü ípegüxüpechinüwatama nayachaxächitanü, rü guxúma ga yema Madiáúanecüâxgüarü churaragü rü aita naxüeäcüma nibuxmü. <sup>22</sup>Rü yexgumayane ga yema 300 ga Iraéanecüâxgü rü yexeraäcü carnéruchatacuxregu nicuegü, rü nüma ga Cori ya Tupana rü Madiáúanecüâxgüxü yemagu ínatüexêe nax nügütanüwatama nügü nadaixüçax. Rü yáxüwa nabuxmü ñuxmata Bexchítarü íanewa nangugü ga Cheréaarü íanearü ngaicamána rü togü rü ñuxmata Abemeúraarü üyeaneewa nangugü ga Tabáarü ngaicamána. ....

**8** <sup>22</sup>Rü nümagü ga Iraéanecüâxgü rü Yedeóúxü ñanagürügu: —Ñuxma nax toxú ícunguxüxêeü i Madiáúanecüâxgümexêwa, rü tanaxwaxe i cuma rü cune rü cutaagü rü tomaxã nax ípecuaxgüxü —ñanagürügu. <sup>23</sup>Natürü nüma ga Yedeóú rü nanangäxü rü ñanagürü: —Tama chanaxwaxe i choma rüexna chaunegü

nax pemaxã itacuáxũ. Rũ Cori ya Tupana tá nixĩ ya pemaxã icuácuti —ñanagürü.

.....

<sup>28</sup>Rũ yemaacü nixĩ ga Madiáũanecüãxgü ga Iraéanecüãxgümexëwa nayexmagüxũ rü taguma wena daigu naxĩnüexũ. Rũ yexguma namaxüxgu ga Yedeóũ, rü guxũma ga yema naanewa nayexma ga taãxë ga 40 ga taunecü, yerü ga Iraéanecüãxgüarü uantügü rü namuïe nax namaxã nügü nadaixũ.

.....

<sup>33</sup>Rũ yexguma Yedeóũ yuxguwena, rü nümagü ga Iraéanecüãxgü rü wena Tupanana nixĩgachi. Rũ naguxüraxüxũ ga Baáchicünaxãxũ nicuaxüxügü, rü norü tupanaxũ nayaxixëëgü ga Baá-berí.

.....

**Chaũchóuarü buxchiga**

**13** <sup>1</sup>Natürü nüma ga Iraéanecüãxgü rü Cori ya Tupanapexewa wena chixexũ naxüe, rü yemaçax ga Cori ya Tupana rü Piritéutanüxügümexëgu nanayixëxë ga 40 ga taunecü. <sup>2</sup>Rü Chóraarü ñanewa nayexma ga wüxi ga yatü ga Dáũtanüxũ ixĩcü ga Manóagu áegacü. Rũ guxema naxmãx rü taguma taxãxacü yerü woetama tangexacüecha. <sup>3</sup>Natürü Cori ya Tupanaarü orearü ngeruxũ i daxücüãx rü ngĩççax nangox rü ñanagürü ngĩxũ: —Cuma rü cungexacüecha, natürü i ñuxma rü tá cuxãxacü rü tá cuyatüxacü. <sup>4</sup>iNatürü taxütáma bínu quixaxü rüexna to i axchiü i ngüchíáxũ, rü taxütáma taxacü i Tupanapexewa ãũãchixũ cungõx! <sup>5</sup>Erü

cuxũ tá nangexma i wüxi i cune i tagutáma texé iyoeruxũ, erü ngëma õxchana i naxũpa nax nabuxũ rü woetátama Tupanaçax ínaxüxüchi. Erü yimá cune tá nixĩ i inaxügücü nax Iraéanecüãxgüxũ ñanguxüxëëxũ naxmexwa i ngëma Piritéutanüxügü —ñanagürü. <sup>6</sup>Rü ngĩma ga yema nge rü ngĩtemaxã nüxũ iyarüxu rü ngĩgürügü: —Wüxi i Tupanaarü orearü ngeruxũ çãxçax nangox. Choma nagu charüxĩntügu rü Tupanaarü orearü ngeruxũ i daxücüãx nixĩ erü nana Tupanaarü orearü ngeruüraxüxüchi. Rü tama nüxna chaca nax ngextá ne naxüxũ, rü woo i nüma rü tama chomaxã nüxũ nixu i taxacü nax yixixũ i naéga. <sup>7</sup>Natürü ñanagürü choxũ: “Cuxũ tá nangexma i wüxi i cune. iRü ñuxmacürüwa rü marü taxütáma bínu quixaxü rüexna axchiü i ngüchíáxũ, rü taxütáma taxacü i Tupanapexewa ãũãchixũ cungõx! Erü ngëma õxchana rü woetátama Tupanaçax íxüxüchixũ nixĩ i naxũpa nax nabuxũ rü ñuxmatáta nayux”, ñanagürü choxũ —ngĩgürügü. <sup>8</sup>Rü yexguma ga Manóa rü nayumüxë rü Cori ya Tupanaxũ ñanagürü: —Cuxũ çacaçaxũ, Pa Corix, nax wena nua toxçax cunamuxüçax i ngëma curü orearü ngeruxũ i daxücüãx nax tomaxã nüxũ yaxuxüçax i taxacü tá namaxã taxü i ngëma õxchana íxíraçaũxũ —ñanagürü. <sup>9</sup>Rü nüma ga Tupana rü Manóaxũ nangãxüga, rü wenaxarü naxmãxçax nangox ga yema Tupanaarü orearü ngeruxũ i daxücüãx ga yexguma tümaanewa tayexmayane. Rü nüma ga Manóa rü nataxuma ga yéma. <sup>10</sup>Rü yemaçax ga tüma rü itañaãchi, rü

tümatecax tayadau rü ñatagürü nüxü:  
 —Yema to ga ngunexügu nüxü  
 chadauxü ga Tupanaaru orearü ngeruxü  
 i daxücüâx rü wenaxarü chauxcax  
 nangox —ñatagürü. <sup>11</sup>Rü nüma ga  
 Manóa rü inachi rü naxmaxmaxā yema  
 daxücüâx i Tupanaaru orearü ngeruxü  
 íyexmaxüwa nabuxmü. Rü nüxna naca  
 rü ñanagürü: —¿Cuma quixixü ga to ga  
 ngunexügu choxmacax cungóxü?  
 —ñanagürü. Rü nüma ga yema  
 daxücüâx rü nanangäxüga rü ñanagürü:  
 —Ngü, choma chixí —ñanagürü. <sup>12</sup>Rü  
 yexguma ga Manóa rü ñanagürü:  
 —Ngëxguma yanguxgu i ngëma tomaxā  
 nüxü quixuxü ¿rü ñuxäcü tá  
 itanayaxëëxü i ngëma buxü? ¿Rü taxacü  
 tá namaxā taxüxü? —ñanagürü. <sup>13</sup>Rü  
 nüma ga Tupanaaru orearü ngeruxü i  
 daxücüâx rü Manóaxü nangäxü rü  
 ñanagürü: —Ngëma cuxmaxmaxā nüxü  
 chixuxü irü naxü i guxüma!  
 —ñanagürü.

.....

<sup>19</sup>Rü nüma ga Manóa rü wüxi ga  
 chíbuxacü niyaxu rü ñuxre ga trígu  
 nayaxu, rü ñuxüchi wüxi ga nutaétügu  
 nananugü nax Tupanana ämare  
 naxäxücax. Rü yéma Cori ya Tupanacax  
 nayagu. Rü yexguma ga nüma ga  
 Tupana rü Manóapexewa rü  
 naxmaxpexewa nüxü nüxü nadauxëxë  
 ga wüxi ga cuaxruxü ga mexechixü.  
<sup>20</sup>Yerü yexguma yema naxünaarü  
 guchicaxüwa napuxnagüemagu ga üxü,  
 rü Manóa rü naxmaxmaxā nüxü  
 nadaugü ga yema Tupanaaru orearü  
 ngeruxü i daxücüâx rü guma üxüemagu  
 daxüwa nax naxüxü. Rü yexguma  
 yemaxü nadaugügu, rü yexma

nanangücuchitanü. <sup>21</sup>Rü yema nixí ga  
 nawa iyacuáxü ga nüxü nax nadaugüxü.  
 Rü yexgumatama ga nüma ga Manóa rü  
 düxwa nüxü nicuaxächí ga Tupanaaru  
 orearü ngeruxü i daxücüâx nax yixixü.  
<sup>22</sup>Rü nüma ga Manóa rü naxmaxü  
 ñanagürü: —Ñuxmawaxi rü aixcüma tá  
 tayue erü Tupanaxü tadaugü  
 —ñanagürü. <sup>23</sup>Natürü ga tüma rü  
 tanangäxüga rü ñatarügü: —Ngëxguma  
 chi Cori ya Tupana tüxü daixchaüxgu rü  
 taxüchima tüxü nanayaxu i ngëma tóru  
 ämare i naxcax iguxü, rü taxüchima  
 tüxü nanawex i ngëma nüxü idaugüxü,  
 rü bai chi i tamaxā nüxü yaxuxü i  
 ngëma ñuxma tamaxā naxunagüxü  
 —ñatarügü. <sup>24</sup>Rü yexguma nabuxgu ga  
 yema buxü rü Chaüchóügu nanaxüéga.  
 Rü yexguma yayaxchigügu, rü Tupana  
 rü poraäcü nüxü narüngüxëë. <sup>25</sup>Rü wüxi  
 ga ngunexügu ga Chaüchóü ga yexguma  
 Dáütanüxüaru churaragüaru  
 pegüchicawa naxüxgu ga íanegü ga  
 Chóra rü Estaúaru ngäxüwa, rü  
 Tupanaäxë i Ünexü inanaxügü nax  
 Chaüchóümaxā inacuáxü.

#### Chaüchóüaru äxmaxchiga

**14** <sup>1</sup>Rü wüxi ga ngunexügu ga  
 Chaüchóü rü íane ga Tináxwa  
 naxü rü yéma ngixü nadau ga wüxi ga  
 nge ga Piritéutanüxü ixücü. <sup>2</sup>Rü  
 yexguma nachücax natáeguxgux rü  
 nanatümaxā rü naémaxā nüxü nixu rü  
 ñanagürü: —Wüxi i nge i Piritéutanüxü  
 ya íane ya Tináxwa ngixü  
 chadauxcümaxā chingixchaü, rü  
 chanaxwaxe i nginatümaxā penamexëxë  
 nax ngímaxā chaxāmaxücax  
 —ñanagürü. <sup>3</sup>Natürü tüma ga nanatü rü

naé rü ñatagürügü: —¿Tüxcüü i cuxmaḡ ngĩxne cuyadau natanügu i ngẽma Piritéutanüxügü i tama Tupanaxü cuaxgüxü? ¿Ëxna itaxuma i nge i nua tatanüwa rü natanüwa i guxüma i ñaa Iraéaneciüḡxgü nax ngĩmaxã cuxãmaxücaḡ? —ñatagürügü. Natürü ga nüma ga Chaüchóü rü tüxü nangãxüga rü ñanagürü: —Natürü ngẽma pacü yixĩ i choxü ngüchaücü rü changĩxwaxecü nax choxmaḡ yixĩxücaḡ —ñanagürü. <sup>4</sup>Rü tüma ga nanatü rü naé rü tama nüxü tacuḡxgü nax Cori ya Tupana rü woetama yemaacü naxueguãxü, yerü naxcaḡ nadau ga ñuxãcü Piritéutanüxügüna guxchaxü nax naxãxü. Rü yexguma nixĩ ga Iraéaneciüḡxgü ga Piritéutanüxügümexẽwa nayexmagüxü. <sup>5</sup>Rü yemaacü ga Chaüchóü rü nanatü rü naé rü ñane ga Tinãxwa taxĩ. Rü yexguma Chaüchóü guma ñanearü úbanecüwa nanguxgu ga guma ñanepemawa, rü wüxi ga ai ga yexwaca yaxü rü yéma nüxna nayuxu. <sup>6</sup>Rü yexgumatama ga Cori ya Tupanaãxẽ rü Chaüchóüxü naporaxẽxẽ. Rü ñoma wüxi ga chfbuxacüxü yamáxürüxü rü ngexneãcüma yema aixü nimãx. Natürü ga yema nüxü ngupetüxü rü tama nanatümaxã rü naémaxã nüxü nixu. <sup>7</sup>Rü ñuxmachĩ ga Chaüchóü rü yema pacü ga nüxü ngüchaücüxütawa naxü rü ngĩmaxã nayarüdexa. <sup>8</sup>Rü marü ñuxre ga ngunexü ngupetüxguwena, rü yexguma ga Chaüchóü rü wena natáegu nax ngĩmaxã yangĩxücaḡ ga yema pacü, rü ñnidau ga yema ai íyamãxüwa. Rü yexma nüxü nayangau ga yema aixüne ga berure nagu üxchiaüxü. <sup>9</sup>Rü

nanayauxcuchixü ga guma berure, rü nayawechigü. Rü yexguma tüxü iyangauxgu ga nanatü rü naé rü tümamaxã nangau rü tanawegü. Natürü tama tümamaxã nüxü nixu ga yema ai ga yamáxüxünewa nax nayauxãxü. <sup>10</sup>Rü tüma ga nanatü ga Chaüchóü rü ngĩxü ítayadau ga yema pacü nax ngĩmaxã tayamexẽegüxücaḡ ga ngĩrü ngĩchiga. Rü nüma ga Chaüchóü rü nügu naxüchiü naxcaḡ ga ñuxre ga ngextüxücü ga Piritéutanüxügü yerü woetama yema nixĩ ga nacümagü. <sup>11</sup>Natürü nüma ga Piritéutanüxügü rü Chaüchóüxü namuüe rü yemaçax yéma nanagagü ga 30 ga namücügu. <sup>12</sup>Rü yexguma ga nüma ga Chaüchóü rü yema 30 ga ngextüxücüguxü ñanagürü: —Wüxi i dexa i ëxügüxü tá pexna chaxã nax pema chomaxã nüxü pixuxücaḡ nax taxacüchiga yixĩxü. Rü 7 i ngunexü tá natai i ñaa peta. Rü ngëxguma ñaa 7 i ngunexügu chomaxã nüxü pixuxgu i taxacüchiga yixĩxü i ngẽma ore i ëxügüxü, rü wüxichigü i pema rü tá pexna chanaxã i wüxi i naxchiru i mexü i línuchinaxcaḡ, rü naétü wüxi i perü petachiru i mexü. <sup>13</sup>Natürü ngëxguma tama mea chomaxã nüxü pixuxgu nax taxacüchiga yixĩxü i ngẽma dexa i ëxügüxü rü wüxíechigü i pema rü choxna tá penaxã i wüxi i naxchiru i mexü i línuchinaxcaḡ, rü naétü wüxi i petachiru i mexü —ñanagürü. Rü nümagü rü Chaüchóüxü nangãxügagü rü ñanagürügü: —iËcü tomaxã nüxü ixu i ngẽma dexa i ëxügüxü! Rü toma rü tá mea itarüxĩnue —ñanagürügü. <sup>14</sup>Rü Chaüchóü rü nüxü nixu ga yema dexa ga ëxügüxü rü ñanagürü: —Rü guxema



chibüewa ínaxúxü ga òna, rü yíxema poraxewa ínaxúxü i maixcuraxü —ñanagürü. Rü tomaepüx ga ngunexüguwena rü nümagü rü tama nüxü nacuaḡgü ga taḡacüchiga nax yixüxü ga yema dexa ga êxüguxü. <sup>15</sup>Rü yemaacü ga norü ägümücü ga ngunexügu rü Chaüchóümaxü ñanagürügü: —iPora naxü nax yimá cute toxü natauxchaxêëxüçax i ngëma dexa i êxüguxü i tomaxâ nüxü yaxuxü! Rü ngëxguma taxütâma tomaxâ nüxü quixuxgu i taḡacüchiga nax yixüxü, rü tá cuxü tigu rü itanagu i cunatü rü guxüma i cutanüxügü. Pema rü perü petawa toxna pexu nax toxna penapuxüxüçax i torü ngëmaxügü —ñanagürügü. <sup>16</sup>Rü yemaacü ga ngîma rü Chaüchóüxütawa ixü rü auxâcuma ngîgürügü nüxü: —Cuma rü tama cuchoxwaxe rü chauxchi cuxai. Rü chautanüxüna cunaxâ i wüxi i dexa i êxüguxü, natürü tama chomaxâ nüxü quixu nax ñuxü ñaxü i ngëma orearü ngâxüga —ngîgürügü. Rü nüma ga Chaüchóü rü ngîxü nangâxüga rü ñanagürü: —Woo chaunatümaxâ rü chauémaxâ rü tama nüxü chixu, rü yexera i cumaxâ rü taxütâma nüxü chixu —ñanagürü. <sup>17</sup>Natürü ga ngîma rü yema 7 ga ngunexü ga nagu napetaexü rü naxütawa íxauxecha, rü nüxü ícaḡxü. Rü yexguma norü 7 ga ngunexüwa nanguxgu, rü düxwa ngîmaxâ nüxü nixu ga yema dexa ga êxüguxüarü ngâxüga. Rü yexguma ga ngîma rü ngîtanüxümaxâ nüxü iyarüxu. <sup>18</sup>Rü yema norü 7 ga ngunexügu ga tauta yanaxücuxgu ga üaxcü, rü nüma ga Piritéutanüxügü rü Chaüchóümaxâ

nüxü nayarüxügü, rü ñanagürügü: —Curü ore i êxüguxü rü ñaxüchiga nixü, “Rü ngëma maixcuraxü rü berurechiga nixü. Rü ngëma poraxü rü aichiga nixü” —ñanagürügü. Rü nüma ga Chaüchóü rü nanangâxü rü ñanagürü: —Choxmax pemaxâ nüxü iyaxu, rü ngëmacax nixü i nüxü pecuâxü i norü ngâxüga —ñanagürü. <sup>19</sup>Rü yexgumatama ga Cori ya Tupanaâxê ya Üünexü rü Chaüchóümaxâ inacuaḡ. Rü nüma ga Chaüchóü rü íane ga Acaróüwa naxü rü 30 ga yatü yexma nayadai. Rü yema napuxüxü ga naxchirumaxâ nüxü nanaxütanü ga yema yatügü ga dexa ga êxüguxüarü ngâxügaxü cuaxgüxü. Rü yemawena ga Chaüchóü rü nuâcuma nanatüchiüçax natáegu. <sup>20</sup>Rü yema naxmax ga ngîmaxâ iyangîcü rü ngînatü rü wüxi ga Chaüchóümicüna ngîxü namu.

**Chaüchóü rü búrchicüramaxâ  
Piritéutanüxügüxü nadai**

**15** <sup>1</sup>Rü ñuxre ga tauemacü nawena ga yema guxchaxü, rü Chaüchóü rü wenaxarü naxmaxçax natáegu ga yexguma tríguarü buxguwa nanguxgu. Rü wüxi ga chibuxacü ngîxü tüxü yéma naga. Rü yexguma yéma nanguxgu rü naḡtixü ñanagürü: —Ngîrü ucapugu chaxücu nax ngîxü íchayadauxüçax i choxmax —ñanagürü. Natürü ga guxema naḡtü rü tama tayaxücuxêë. <sup>2</sup>Rü ñatarügü nüxü: —Choma nagu charüxinügu rü marü tama cungîxwaxe rü ngëmacax wüxi i cumücüna ngîxü chamu. Natürü ingexma i ngîeyax i rübumaecü i cumaxü rümemaecü. iRü ngîmaxâ

naxāxmaḡ! —ñatagürü. <sup>3</sup>Natürü ga nūma ga Chaũchóũ rü nanu. Rü naḡtũxũ nangāxũ rü ñanagürü tüxũ: —Ñuxma rü taxütáma chaugagu nixĩ i ngēma chixexũ i cutanũxũ i Piritéutanũxũgümaxā chaxũxũ —ñanagürü. <sup>4-5</sup>Rü yema ñaxguwena rü ñuxũchi 300 ga ngowagü ínayauxũ rü taxrechigü nügürexũwa nayanaixgü. Rü yemagürexũwa nayangacuchigü ga üxü ga iyauxrane. Rü ñuxũchi Piritéutanũxũgüarü tríguchitaxũwa nayangexgü ga yema ngowagü. Rü yemaacü nixae ga yema trígu ga marü yexma nutaquexexũ rü yema taxüta ibuxgũxũ. Rü ñuxmata norü úbanecügü rü orĩbunecügü rü ta nixae. <sup>6</sup>Rü nūma ga Piritéutanũxũgü rü naxcaḡ ínicaetanü nax texé tixĩxũ ga guxema yexũ wagüxe. Rü düxwa nüxũ nacuaḡxgü ga Chaũchóũ nax yixĩxũ ga norü numaxā yexũ wagũxũ naḡtügagu, yerü ga naxmaḡ ga Chaũchóũ rü wüxi ga namücüna ngixũ tamu. Rü yemaçax ga nūma ga Piritéutanũxũgü rü tüxũ ínagu ga guxema naḡtũ ngĩmaxā ga yema Chaũchóũ naxmaḡ. <sup>7</sup>Rü yexguma ga nūma ga Chaũchóũ rü Piritéutanũxũgüxũ ñanagürü: —Ñuxma nax ngexũ pewagũxũ ngĩmaxā i choḡmaḡ rü taxütáma pemaxā icharüngüxmü. Rü yexeraäcü tá pemaxā chanu rü pexũ chadai naxcaḡ i ngēma choḡmaḡmaxā pexũxũ —ñanagürü. <sup>8</sup>Rü yexgumatama norü numaxā nanadai, rü muxũma ga yema Piritéutanũxũgü rü nayue. Rü yemawena ga Chaũchóũ rü nixũ, rü maḡpüne ga Etáũarü äxmaxũwa nayamaxũ. <sup>9</sup>Rü nūma ga Piritéutanũxũgü rü nanamu ga ñuxre ga

norü churaragü nax Chaũchóũxũ yanayauxgüxũcaḡ. Rü Yudáarü naanegu nayapegü rü yexma nügü ninu ñuxmata maḡpüneane ga Léiwa nangugü. <sup>10</sup>Rü yema Yudátanũxũ rü nüxna nacagüe rü ñanagürügü: —¿Taxacuwa nua pexĩ? —ñanagürügü. Rü nūma ga Piritéutanũxũgü rü nanangāxũgagü rü ñanagürügü: —Chaũchóũwe tangēgü nax tayayaxuxũcaḡ nax naxütanũxũcaḡ ga yema tomaxā naxũxũ —ñanagürügü. <sup>11</sup>Rü yemaxũ naxĩnuegu rü 3,000 ga yatügü ga Yudátanũxũ rü Chaũchóũcaḡ nayadaugü nagu ga yema äxmaxũ ga guma maḡpüne ga Etáũwa yemaxũ. Rü Chaũchóũxũ ñanagürügü: —¿Tama ěxna nüxũ cucuaḡ i ngēma Piritéutanũxũgü rü toxũ nax naporamaegüxũ? ¿Rü tüxciũ guxchaxũwa toxũ cungexmagüxēxē? —ñanagürügü. Rü Chaũchóũ nanangāxũga rü ñanagürü: —Choma rü chaxütanü naxcaḡ ga yema chomaxā naxügũxũ —ñanagürü. <sup>12-13</sup>Rü nümagü ga Yudátanũxũgü rü nanangāxũgagü rü Chaũchóũxũ ñanagürügü: —Toma nua taxĩ nax cuxũ tarüyauxgüxũcaḡ, rü Piritéutanũxũgüna cuxũ tamügüxũcaḡ —ñanagürügü. Rü nūma ga Chaũchóũ rü nanangāxũga rü ñanagürü: —Marü name. iNatürü chomaxā ipexüga nax taxütáma choḡũ pimáxũ! —ñanagürü. Rü taxre ga napanaxāmaxā nayanaixgü rü yemaacü nayagagü. <sup>14</sup>Rü yexguma Léiwa nangugüga ga yema Chaũchóũxũ iyauxgũxũ, rü nūma ga Piritéutanũxũgü rü taäxēmaxā aita naxüe. Natürü Cori ya Tupanaäxē rü Chaũchóũmaxā inacuḡ, rü yema napanaxā ga namaxā yanaixgüaxũ rü ñoma tünütarüxũ

inacaũgũ rü napũxmexẽwa ínai. <sup>15</sup>Rü yexguma ga Chaũchóũ rü nanayaxu ga wüxi ga búruchicũra ga yexma üxũ ga tauta mea ipaxũ. Rü yemamaxã tüxũ nadai ga 1,000 ga Piritéutanüxũgũ.

.....

### Chaũchóũ rü Daríra

**16** <sup>4</sup>Rü yemawena ga Chaũchóũ rü wüxi ga nge ga Daríragu ãégacixũ nangẽxẽ. Rü ngĩma rü Choréxarü tuãchigu ixãchiũ. <sup>5</sup>Rü nümagü ga yema Piritéutanüxũgüarü ãëxgacügü rü Daríraxütawa naxí rü ñanagürügü ngĩxũ: —iChaũchóũxũ nawomüxẽxẽ, rü nüxna naca nax ngextá ne naxũxũ i ngẽma norü pora, nax ngẽmaãcü nüxũ tariporamaegüxũcax, rü tayayauxgüxũcax, rü tayanajixgüxũcax! Rü wüxichigü i toma rü tá cuxna ngĩxũ taxã i 1100 tachinü i diëru ega cunaxüxgux i ngẽma —ñanagürügü ngĩxũ. <sup>6</sup>Rü yexguma ga ngĩma rü Chaũchóũxũ ngĩgürügü: —iChomaxã nüxũ ixu nax ngextá ne naxũxũ i ngẽma curü pora! ¿Rü ñuxãcü cuxũ inajixgu nixí i taxuacü cugü íquiwxũ? —ngĩgürügü. <sup>7</sup>Rü Chaũchóũ ngĩxũ nangãxũga rü ñanagürü: —Ngëxguma chi 7 i würatüxü i naxchaxmüünaxcax i tauta mea ipagüxũmaxã choxũ yanajixgügu, rü tá íchanaturaãchi rü ngexürüümare tá chixí. <sup>8</sup>Rü nümagü ga Piritéutanüxũgüarü ãëxgacügü rü Daríraxütawa nanana ga 7 ga würatüxü ga naxchaxmüünaxcax ga tauta ipagüxũ, rü yemamaxã Chaũchóũxũ íyanajix ga Daríra ga yexguma ínapeyane. <sup>9</sup>Rü naxũpa ga nax yanáiãxũ rü wüxi ga

ucapugu iyacüxgü ga ñuxre ga Piritéutanüxũgü. Rü ñuxmachi aita ixü rü ngĩgürügü: —iPa Chaũchóũx, Piritéutanüxũgü rü cuxcax ínayaxüãchi! —ngĩgürügü. Rü yexguma ga Chaũchóũ rü nanacaũgü ga yema würatüxü ga naxchaxmüünaxcax, ñoma wüxi i napanaxã i marü ixaxürüxũ. Rü yemaacü ga Piritéutanüxũgü rü tama nüxũ nacuxgü ga ngextá nax ne naxũxũ ga norü pora. <sup>10</sup>Rü ga Daríra rü Chaũchóũxũ ngĩgürügü: —Choxũ cuwomüxẽxẽ rü chomaxã quidora. iNatürü i ñuxma rü aixcüma chomaxã nüxũ ixu rü ñuxãcü cuxũ inajixgu nixí i taxuacü cugü íquiwxũ! —ngĩgürügü. <sup>11</sup>Rü Chaũchóũ ngĩxũ nangãxũga rü ñanagürü: —Ngëxguma chi ngexwacaxxũxüchixü i napanaxãmaxã choxü pinajixgügu, rü tá íchanaturaãchi rü ngexürüüxü i duüxürüümare tá chixí —ñanagürü. <sup>12</sup>Rü yexguma ga Daríra rü wüxi ga ngexwacaxxũxü ga napanaxã iyaxu, rü yemamaxã Chaũchóũxũ íyanajix ga yexguma ínapeyane. Rü noxrirüütama rü wüxi ga ucapugu ñuxre ga Piritéutanüxũgüxũ iyacüxgü. Rü ñuxxüchi ga ngĩma rü aita ixü rü ngĩgürügü: —Pa Chaũchóũx, Piritéutanüxũgü rü cuxcax ínayaxüãchi —ngĩgürügü. Rü yexguma ga Chaũchóũ rü nagu nacaũgü ga yema napanaxã ñoma tünüta ga íxnütaxũgu icaügüxürüxü. <sup>13</sup>Rü yexguma ga Daríra rü Chaũchóũxũ ngĩgürügü: —Ñuxmarüta wena choxü cuwomüxẽxẽ rü wena chomaxã quidora. iRü chomaxã nüxũ ixu rü taxacü ixüxü nax cuxü ináixũcax! —ngĩgürügü. Rü nüma ga Chaũchóũ rü ngĩxũ nangãxũga, rü

ñanagürü: —Ngēma tá cuxüxü nixi i 7 cütagu choxü ícumuxüyaexü rü ngēma 7 cüta i chauyae tá ngēma naxchiruarü muruüwa meamatama cunawäxcu. Rü ngëxguma i choma rü tá íchanaturaächi rü ngexürüüxü i duüxürüümare tá chixi —ñanagürü. Rü yexguma ga Daríra rü Chaüchóüxü ipexëxë. Rü 7 cütagu ínamuxü ga nayae nawa ga yema naxchiruarü muruxü. <sup>14</sup>Rü yemawena rü meama inapu ga yema naxchiruarü muruxü. Rü ñuxmachi aita ixü rü ngígürügü: —Pa Chaüchóüx, Piritéutanüxügü rü cuxçax ínayaxüächi —ngígürügü. Rü yexguma nayuxnagü ga Chaüchóü rü nanapu ga yema naxchiruarü muruxü ga nayae nawa nadachapaxaxü. <sup>15</sup>Rü yexguma ga ngíma ga Daríra rü Chaüchóüxü ngígürügü: —Ídorataaxüchixü! ¿Rü ñuxäcü chomaxä nüxü quixu nax cuchoxwaxexü? Rü marü tomaepüxcüna nixi i choxü cuwomüxëxü rü ñomarüta tama chomaxä nüxü quixu nax ngextá ne naxüxü i ngēma curü pora. <sup>16</sup>Rü ngíma ga Daríra rü wüxichigü ga ora nüxü icaxüecha rü yemaçax ga nüma ga Chaüchóü rü nachixeäxë rü düxwa yuxgu nügümaxä narüxínü. <sup>17</sup>Rü düxwa Daríramaxä nüxü nixu rü ñanagürü: —Chorü bucürüwa taxüema choxü tiyoeru, yerü naxüpa ga nax chabuxü rü Tupanacaxtama woe íchaxüxüchi. Natürü ngëxguma chi choxü yayoerugü rü ngëxguma i choma rü tá íchanaturaächi rü ngexürüüxü i duüxürüümare tá chixi —ñanagürü. <sup>18</sup>Rü yexguma ga Daríra rü nüxü nax nacuáxü rü aixcümáxü ngímaxä nax yaxuxü ga Chaüchóü rü

Piritéutanüxügüarü äëxgacüçax íyacaxëxë, rü ngígürügü: —ÍÑuxmawaxi nua pexi! Erü Chaüchóü rü marü chomaxä nüxü nixu i taxacüwa nax ne naxüxü i norü pora —ngígürügü. Rü yexguma ga Piritéutanüxügüarü äëxgacügü rü yéma naxi ngímaxä ga yema diëru ga ngíxna ngíxü naxuaxügücü. <sup>19</sup>Rü yexguma ga Daríra rü Chaüchóüxü ngígüperemawa inapexëxë. Rü wüxi ga yatüçax ica nax yayoöxüçax ga yema 7 cüta ga nayae. Rü ñuxmachi ga ngíma rü inaxügü ga nax nacuaxüxü. <sup>20</sup>Rü aita ixü rü ngígürügü: —Pa Chaüchóüx, Piritéutanüxügü rü cuxçax ínayaxüächi —ngígürügü. Rü nüma ga Chaüchóü rü nabaxüächi rü nagu narüxínü ga yema togü ga ngunexügürüxü nügü nax ínapoxüxü, natürü tama nüxü nacuax ga Cori ya Tupana rü marü nüxna nax yaxügachixü. <sup>21</sup>Rü yexguma ga nümagü ga Piritéutanüxügü rü nayayauxgü rü nanacaxüxëtügü. Rü íane ga Gáchawa nanagagü ga ngextá cadéna ga bróüchenaxçaxmaxä ínangaxügüäxüwa. Rü poxcupataüarü caerüxüarü dixeguwa nanapuracüxëëgü. <sup>22</sup>Natürü ga yema nayae ga Chaüchóü rü paxama wena naya.

#### Chaüchóüarü yuxchiga

<sup>23</sup>Rü nümagü ga Piritéutanüxügüarü äëxgacügü rü nataaxëgü rü nanaxüchiügü ga Chaüchóüxü nax yayauxgüxü. Rü norü tupana ga Dagóüçax naxüna nadai rü ñuxüchi naxçax ínanagu. Rü ñaäcü nawiyaegü: —Tóru tupana rü taxmexgu nananguxëxë i tóru uanü i Chaüchóü

—ñanagürügü. <sup>24</sup>Rü yexguma yema togü ga Piritéutanüxügü nüxü daugügu, rü nümagü rü ta nawiyaegü rü norü tupanaxü nicuaxüxügü rü ñanagürügü: —Törü tupana rü taxmexgu nananguxêxê i törü uanü i Chaüchóü ga törü naanegü chixexêxü rü tamücügü tüxü daixü —ñanagürügü. <sup>25</sup>Rü poraâcüxüchi nataâxêgü, rü yemaçax Chaüchóüçax ínacagü nax napexewa nagagüaxüçax rü nagu nax yadauxcüraxügüçax. Rü poxcupataüwa Chaüchóüxü ínagaxüchigü rü norü tupanapatawa nanagagü. Rü taxre ga caxtaarü ngäxümachatexegu nanachixêxêgü. Rü yéma ínüçaxü nayaxixêêgü rü nagu nidauxcüraxügü. <sup>26</sup>Rü yexguma ga nüma ga Chaüchóü rü yema buxü ga yapuchigüxüxü ñanagürü: —iYima taxre ga caxtagü ya daa ngutaquexepataüarü ngäxüwa ngêxmagünegu choxü ingixêxê nax yimagü changüxüçax! —ñanagürü. <sup>27</sup>Rü guxüma ga Piritéutanüxügüarü âêxgacügü rü nawa nayexmagü ga guma ngutaquexepataxü ga yatüxügümaxä rü ngexügümaxä äâcune. Rü dauxnawa nayexmagü ga 3,000 ga duüxügü ga yéma nüxü rüdaunüxü ga yema Chaüchóügu idauxcüraxügüxü ga ñaxtüchiüwa. <sup>28</sup>Rü

yexguma ga nüma ga Chaüchóü rü Cori ya Tupanana naca rü ñanagürü: —iCuxü chacaçaxü, Pa Corix, rü ñuxmarica choxna nacuçaxächi rü pora choxna naxä nax chaugü chaxütanüxüçax naxçax ga guma taxre ga chauxetü ga Piritéugü choxü caxüne! —ñanagürü. <sup>29</sup>Rü ñuxüchi naxmexmaxä naxçax nangógü ga guma taxre ga caxta ga ngäxüwa ügüne ga guma ngutaquexepataxü nagu ütaxüne, rü gumagu ningügü ga naxmexgü. <sup>30</sup>Rü aita naxü rü ñanagürü: —iChomaxä wüxigu nayue i Piritéutanüxügü! —ñanagürü. Rü yexguma rü guxüma ga norü poramaxä nüxü nacuxneta ga guma taxre ga caxta. Rü guma ngutaquexepataxü rü naétügu nangu ga yema Piritéutanüxügüarü âêxgacügü, rü guxüma ga duüxügü ga yéma yexmagüxü. Rü yema namaxügu nadaixüarü yexera narümumae ga yema Piritéutanüxügü ga Chaüchóü daixü ga yexguma nayuxgu. <sup>31</sup>Rü yemawena rü ínangugü ga naeneegü rü natanüxügü ga Chaüchóü. Rü nanayauxgü ga naxüne. Rü nanatü ga Manóa ítáxügu nayataxgü ga Chóra rü Estaüarü ngäxüwa. Rü 20 ga taunecü nixi ga Chaüchóü ga Iraéanecüâxgümaxä inacuçaxü. ....

# RUT

## (Rux)

**Erimeré rü Moáanewa naxü ngímaxã ga naxm̄ax ga Noemí rü nanegü**

**1** <sup>1-2</sup>Rü yexguma Iraéaneciũxgümaxã inacuaxgügu ga yema ãëxgacügü ga guxchaxügiariü mexëëruügiü ga Tupana nüxü unetaxü, rü ínangu ga taxü ga taiya ga guxüma ga yema naanewa. Rü yexgumaüciüxü rü Yudáanewa nayexma ga wüxi ga yatü ga Erimerégu ãégacü ga Beréüariü ïanegu ächiücü. Rü nüma ga Erimeré rü naxm̄ax ga Noemímaxã rü nanegü ga Maróũ rü Querióũmaxã Beréüwa inaxiãchi nax Moáanewa naxiũcax. Rü nümagü rü Efrátaciũx nixigü yerü Efráta nixi ga to ga naéga ga Beréü. Rü Moáanewa nangugü rü yexma nayaxãchiügiü. <sup>3</sup>Natürü nüma ga Erimeré ga Noemí ngíte rü yexma Moáanegu nayayu. Rü ngíma ga nam̄ax ga Noemí rü ngíxicatama yéma iyaxü namaxã ga taxre ga ngíne. <sup>4-5</sup>Rü yixcüamaxürachigü rü nümagü ga yema taxre ga ngextiüxücü rü Moáaneciũx ga ngexügümaxã nixãx̄m̄ax. Rü wüxi rü Órfa nixi ga ngíéga, rü yema nai rü Rux nixi ga ngíéga. Natürü yexguma 10 ga taunecü ngupetüxguwena, rü nayue ta ga Maróũ rü Querióũ. Rü ngíma ga

Noemí rü ngíxica yéma itax, yerü marü nataxuma ga guma ngínegü rü ngíte.

**Beréüwa ixí ga Noemí rü Rux**

<sup>6</sup>Rü wüxi ga ngunexügu ga Noemí ga yexguma Moáanewa nayexmayane, rü nüxü ixínü ga guma ngírü ïane ga Beréüwa rü marü nax nataxuxüma ga taiya, yerü Tupana rü namaxã nixãũãchi. <sup>7</sup>Rü yemacax nagu irüxínü ga Yudáarü naanecax nax natáeguxü. Rü ngíma rü ngíneaxgümaxã nawa íchoxü ga yema nachica ga nagu naxächüüchiréxü ga Moáanewa nax ngíchiüane ga Yudáanewa naxüücax. <sup>8-9</sup>Natürü ga namawa rü ngíneaxgüxü ngígürügü: —iËcü pewoegu rü peéxütawa pexí! iRü Cori ya Tupana guxüguma mea pexü ngechaxü yema choxü rü chaunegüxü mea pengechaxüürüxü, rü pexü natauxchaxëã nax wena mea pixãtegüxü, rü ngëmaäcü petaãxëgüxücax! —ngígürügü. Rü ñuxmachi ga Noemí rü wüxi ga chúxumaxã ngíneaxgüxü irümomë. Natürü ga ngíma ga ngíneaxgü rü ixaxeama. <sup>10</sup>Rü ngígürügügü: —Tama. Rü toma rü tá cuchixüanewa cuwe

taruxĩama —ngĩgürügügü. <sup>11</sup>Rü ngĩma ga Noemĩ rü ngĩgürügüchigüãma: —iPewoegu, Pa Chauxacügüx! ¿Taxaciüwa chi chowe peruxĩxü? Choma rü marü tagutãma wena chaxãxacü nax wena chaunemaxã pixãtexũcax. <sup>12-13</sup>iËcü pechiũcax pewoegu! Choma rü marü chaya rü ngẽmacax taxütãma wena chaxãte. Rü woo chi ñomachitama i chütaxũgu chaxãtegu rü chingĩxgu rü choxũ nangexmagu ya chaunegü ¿rü pema rü chi ípenanguxuxẽẽgügü ñuxmachita nayae nax namaxã pingĩgüxũcax? Rü ngẽma nax ípenanguxuxẽẽgügü rü taguchima pixãtegu. Rü dücax, rü taxucürüwama nixĩ, Pa Chauxacügüx. Rü Cori ya Tupana rü ngúxü choxü ningexẽxẽ, natürü yexera chi changechaũ, rü ngúxü chinge ega chi pexü chadauxgu nax ngúxü pingegügü i pemax —ngĩgürügü. <sup>14</sup>Rü ngĩma ga ngĩneaxgü rü wenaxarü ixaxe. Rü düxwa ga Órfa rü ngĩxẽxü irümoxẽ wüxi ga chúxumaxã, rü ngĩchiũcax itãegu. Natürü ga Rux rü ngĩxẽxütatagutama irüxãũx. <sup>15</sup>Rü yexguma ga Noemĩ rü Ruxü ngĩgürügü: —Dücax i ngẽma nai i chaunex rü ngĩchiũcax rü ngĩrü tupanagücax itãegu. iËcü ngĩwe rüxü! —ngĩgürügü. <sup>16</sup>Natürü ngĩma ga Rux rü ngĩxü ingãxũga rü ngĩgürügü: —iTaxú i choxü cucaaxũxü nax cuxna chixügachixũcax, rü cuxna chatãeguxũcax! Erü ngextã ícuxũxüwa rü ngẽma tá chaxü, rü ngextã ícupexüwa rü ngẽxma tá chape. Curü ñane rü chorü ñane tá nixĩ, rü yimã curü Tupana, rü chorü Tupana tá nixĩ. <sup>17</sup>Rü ngextã ícuyuxũgu rü ngẽxma tá chayu, rü ngẽxma tá chatax. Rü Cori ya Tupana

choxü poxcu ega tauta chayuyane cuxna chixügachigu, erü yuxicatama nixĩ i yigüna tüxü ixĩgachixẽxũ —ngĩgürügü. <sup>18</sup>Rü yexguma Noemĩ nüxü cuaxgu ga Rux rü aixcüma ngĩwe nax naxũxchaũxü, rü marü tama yemamaxã ngĩxü ichixewe. <sup>19</sup>Rü yemaacü ga yema taxre rü ngĩgümaxã namagu ixĩ, rü ñuxmata Beréüwa nangugü. Rü yexguma Beréügu nachocuxgu, rü guxũma ga yema duũxũgü rü nabaixãchiãegü. Rü yema ñanecüãx ga ngexũgü rü ngĩgürügügü: —¿Tama ãna ñaa iyixĩ i Noemĩ? —ngĩgürügügü. <sup>20</sup>Natürü ga ngĩma rü inangãxü rü ngĩgürügü: —iTaxú i “Noemĩ” ñaperügü choxü! iRü name nixĩ i “Mára” ñapegürü choxü! Erü Tupana ya guxãtũwa ngẽxmacü rü taxü i guxchaxü choxna naxã. (Rü ngẽma naéga i Noemĩ rü Taãxẽcü ñaxũchiga nixĩ. Natürü ngẽma naéga i “Mára” rü Taguma Taãxẽcü ñaxũchiga nixĩ.) <sup>21</sup>Ãacumexãcüma nua íchaxũxü, rü ngeãcumexãcüma chatãegu, erü ngẽmaacü nanaxwaxe ya Cori ya Tupana. ¿Rü tüxcüü Noemĩmaxã choxü pixu, ega ngẽxguma Cori ya Tupana ya guxũxüma cuacü choxü poxcuxgu rü ngechaxü choxna ãxgu? —ngĩgürügü. <sup>22</sup>Rü yemaacü nixĩ ga Noemĩ ga Moáanewa natãeguxü ngĩmaxã ga ngĩneax ga Rux ga Moáanecüãx ixĩcü. Rü chebãdaarü buxüwa nangu ga yexguma Beréüwa nangugügu.

#### Rux rü Boáanewa iyexma

**2** <sup>1</sup>Rü Noemĩ rü ngĩxü nayexma ga wüxi ga ngĩtanũxü ga ngĩte ga Erimerétanũxü ixĩcü ga Boógu ãégacü.

Rü gumá rü wüxi ga diêruãxũchicü nixĩ rü guxãma nüxũ cuácü nixĩ. <sup>2</sup>Rü wüxi ga ngunexũgu ga Rux rü Noemíxũ ngĩgürügü: —Chebádachitaũwa tá chaxũ, rü ngürüächi ngêxma tá nüxũ chayangau i wüxi i buxetatanüxũ i choxũ nadexêxũ i ngêma chebáda i nawe iyietanüxũ —ngĩgürügü. Rü yexguma ga Noemí rü ngĩgürügü ngĩxũ: —Marü name Pa Chauxacüx. iÊcü ngêma naxü rü naxü i ngêma nüxũ quixuxũ! —ngĩgürügü. <sup>3</sup>Rü yexguma ga Rux rü wüxi ga naanewa ixü rü yema buxetatanüxũgüwe iyadeetanü ga chebádayaxa ga yéma iyietanüxũ. Rü megu ingu yerü yema naane rü Boó ga Erimerétanüxũarü nixĩ. <sup>4</sup>Rü yexguma Rux yéma yexmayane rü nüma ga Boó rü ínangu ga Beréüwa nax ne naxüxũ, rü yema naanewa ínayadau. Rü yema buxetatanüxũgüxũ narümoxê rü ñanagürü: —iCori ya Tupana pexütawa ngexmax! —ñanagürü. Rü nüma ga buxetatanüxũgü rü nanangãxũgagü rü ñanagürügü: —iCori ya Tupana cuxũ rüngüxêxê! —ñanagürügü. <sup>5</sup>Rü ñuxmachi ga Boó rü yema buxetatanüxũgüeruna naca, rü ñanagürü: —¿Texétanüxũ iyixĩ i ngéa pacü? —ñanagürü. <sup>6</sup>Rü nüma ga buxetatanüxũgüeru rü nanangãxũ rü ñanagürü: —Moáanecüãx iyixĩ, rü Noemímaxã Moáanewa ne íxü. <sup>7</sup>Rü choxna ica nax ngêma buxetatanüxũgüwe chebádayaxa nax yadeetanüxũcax. Rü paçmamacürüwa inaxügü nax napuracüxũ, rü ñuxmatama nixĩ i paxaãchi inangüxũ —ñanagürü. <sup>8</sup>Rü yexguma ga nüma ga Boó rü Ruxü ñanagürü: —Pa Chauxacüx iirüxinü, rü

tama chanaxwaxe i to i naanewa cuyabuxeta! iNuxãtama rüxãũx natanügu i chauxütaxügü! <sup>9</sup>iRü ñuxüchi nawe rüxü i ngêma buxetatanüxũgü ega ngêxguma nüxũ cudauxgu i ngextá nax napuracüexü! Erü marü nüxna chaxãga i ngêma chorü duũxügü nax taxuxüma cuxũ chixewexücax. Rü ngêxguma quitaxawaxgu irü ngêma dexapaũgüwa naxü rü ngêma dexá i nüma nayauxgüxüwa naxaxe! —ñanagürü. <sup>10</sup>Rü ngíma ga Rux rü Boópexegu inangücuchi rü nüxna ica, rü ngĩgürügü: —¿Taxacü chowa cudadu eçax chomaxã cumecümaxü i choma nax to i nachixüanecüãxmare nax chixixü? —ngĩgürügü. <sup>11</sup>Rü nüma ga Boó rü ngĩxũ nangãxũ, rü ñanagürü: —Choma rü meama nüxü chacuax ga ñuxãcü ngĩxũ nax cungechaũxü ga cuxé nawena ga cute ga cuxna yücü. Rü ngêxgumarüxü ta meama nüxü chacuax ga tüxna nax quixüxü ga cunatü rü cué, rü curü naane nax nuxã totanügu cuyaxãchiũxücax ga woo tama toxü cucuáxü ga cumax. <sup>12</sup>iRü Tupana cuxũ naxütanü i ngêma! iRü nüma ya Cori ya Iraéanecüãxgüaru Tupana ga norü ngüxêcax cudadü cuxü naxütanü naxcax ga guxüma ga yema mexü ga cuxüxü! —ñanagürü. <sup>13</sup>Rü ngíma rü inangãxũ rü ngĩgürügü: —Cuma rü poraãcü chomaxã cumecümaxüchi, rü ngêma curü ore rü choxü nataãxêxêxê. Erü cuma rü choxü cungechaũãcüma chomaxã quidexa nax woo tama wüxi i cuxütaxü chixixü —ngĩgürügü. <sup>14</sup>Rü yexguma chibüaru orawa nanguxgu, rü nüma ga Boó rü ngĩxcax naca ga Rux, rü ñanagürü ngĩxü: —iNua naxü rü tomaxã



nua nachibü! —ñanagürü. Rū ngīma ga Rux rü yema buxetatanüxügütanüwa irüto. Rū nüma ga Boó rü taxüma ga õna ngīpexegu naxú. Rū ngīma rü meama ichibü ñuxmata ngixú iyaxü. <sup>15</sup>Rü yexguma wenaxarü buxetawa naxixgu, rü nüma ga Boó rü norü duüxügüna naxāga rü ñanagürü: —Marü name nax ngīma rü ta chebádayaxa ta nadexü. iRü taxú i ngixna peyanuxüxü! <sup>16</sup>iRü woetama ngixcax ngéma peyayixetanüxëxë nax ngīma rü yadeetanüxüçax! iRü taxú i ngixna penachuxuxü! —ñanagürü. <sup>17</sup>Rü ngīma ga Rux rü Boóanewa chebádayaxa ta ide ñuxmata nachütamare. Rü norü yá ga yema chebáda rü 20 quíruarü yexera nixí ga yexguma marü nabuxāxgu. <sup>18</sup>Rü ñuxüchi guma ñanecax itáegu rü íyangepúxü ga yema chebáda rü ngixëxü iyawex. Rü yemawena rü inayaxu ga yema ngīwemü ga iyaxüxü rü ngixë ga Noemína inaxā. <sup>19</sup>Rü ngixë ga Noemí rü ngixna ica, rü ngīgürügü: —¿Ngextá nixí icuyapuracüxü i ngewax? ¿Rü ngextá nixí i muxü i chebádayaxa ta cudexü? iRü poraäcü Tupana nüxü rüngüxëxë ya yimá duü ya cuxü rüngüxëëcü! —ngīgürügü. Rü ngīma ga Rux rü ngixëxü ingāxü rü nüxü iyaxu ga Boóanewa nax yixixü ga chebádayaxa ta nadexü. <sup>20</sup>Rü ngīma ga Noemí rü ngixü ingāxü rü ngīgürügü: —iTupana nüxü rüngüxëxë ya yimá duü! Rü nüma ya Tupana rü tamaxā namecüma i ñuxmax rü guma cute ga marü yucümaxā rü ta namecüma. Erü yimá yatü ya Boó rü wüxi i tatanüxü nixí rü ngëmacax nixí i nagu nanguxü

nax tüxü nangüxëëxü rü tüxna nadauxü —ngīgürügü. <sup>21</sup>Rü ngīma ga Rux rü nüxü iyaxuchigüāma rü ngīgürügü: —Rü chomaxā nüxü nixu nax naxütaxügümaxā chapuracüxü ñuxmatáta nagú i buxetaarü puracü —ngīgürügü. <sup>22</sup>Rü yexguma ga Noemí rü ngīeaxü ingāxü rü ngīgürügü: —Marü name, Pa Chauxacüx, nax naxütaxügüxü curüngüxëëxü. Rü tama chanaxwaxë i togüanewamare cuxü nax taxuxüma cuxü chixewexüçax —ngīgürügü. <sup>23</sup>Rü yemacax ga ngīma ga Rux rü nawe irixü ga Boóxütaxügü nax chebádayaxa ta nadexü ñuxmata nagú ga nax yabuxgüāxü ga chebáda rü trígu. Rü yemaacü ipuracü ga yexguma ngixë ga Noemíxütawa nayexmayane.

#### Boó rü Ruxmaxā namecüma

**3** <sup>1</sup>Rü wüxi ga ngunexügu ga Noemí rü Ruxü ngīgürügü: —Pa Chauxacüx, choma rü tá cuxü naxcax chadau ya wüxi ya cute ya taaxë tá cuxna äcü. <sup>2</sup>Rü dücax, rü yimá tatanüxü ya Boó ya naxütawa cupuracücü, rü ñoma i chütaxügu rü tá naanewa naxü nax ngéma chebáda iyabuxuchitexexüçax. <sup>3</sup>Rü ñuxma rü chanaxwaxë i cunaxü i ngéma tá cumaxā nüxü chixuxü. iRü naxaiya rü cugü napumáraxüne rü nagu icux i ngéma cuxchiru rü rümemaxü, rü ngéma naanewa naxü! iNatürü taxütáma cugü nüxü cucuaxëxë nax texé quixixü naxüpa nax yanguxü nax nachibüxü rü naxaxexü i nüma i Boó! <sup>4</sup>iRü mea nangugü nax ngexta yixixü i nacaxü nax napexüçax! iRü ngéma ínacaxüwa naxü rü inangegücutü rü ngëxma naca

nacutüguama! Rû nümatátama nixí cumaxâ nüxü yaxuxü nax taxacü tá cuxüxü —ngîgürügü. <sup>5</sup>Rû ngîma ga Rux rû Noemíxü ingâxü rû ngîgürügü: —Marü tá chanaxü i guxüma i ngêma chomaxâ nüxü quixuxü —ngîgürügü. <sup>6</sup>Rû ngîma ga Rux rû naanewa ixü, rû inaxü ga guxüma ga yema ngîxê ngîmaxâ nüxü ixuxü. <sup>7</sup>Rû yexguma marü chibüwa yanguxgu ga Boó, rû inachi rû nataãxê rû ñuxüchi yexma äuxchitaxü ga chebádaxütägu nayaca nax yexma napexüçax. Rû yixcamaxüra rû ngîma ga Rux rû bexma naxçax iyaxü rû ínanangegücutü rû yexma ica. <sup>8</sup>Rû nüma ga Boó rû ngürüächi ngâxüçüxü pewa nabajxâchi. Rû yexguma nangüeguxgu rû ngîmaxâ nayarüña. Rû nüxü nicuaxâchi ga wüxi ga nge nacutüwaama yexmaxü. <sup>9</sup>Rû ngîxna naca rû ñanagürü: —¿Texê quixí i cumax? —ñanagürü. Rû ngîma rû inangâxü rû ngîgürügü: —Choma nixí i Rux, rû cuma nixí i chautanüxüxüchi quixíxü. Rû ngêmacax cugu nangu nax cumaxü choxü quixíxêxü ngêma Tupanaarü mugü nüxü ixuxürüxü —ngîgürügü. <sup>10</sup>Rû yexguma ga nüma ga Boó rû ñanagürü: —iCori ya Tupana cuxü rüngüxêxê! Rû ñuxmawaxi nixí i mea cunangoxêxê nax aixcüma nüxü cungechaüxü ga guma cute ga marü yucü, erü choxü cuyaxu cutexü i choma i cutetanüxü nax chixíxü. Rû tama naxçax cudau ya wüxi ya cute ya choxü rüngextüxümaecü ya diêruácü, rû woo tama diêruácü. <sup>11</sup>iRû taxú i cumuüxü, Pa Chauçacü! Erü guxüma i duüxügü i daa chorü íanecüçax rû marü nüxü nacuaxgu rû cuma rû wüxi i nge i mecü

nax quixíxü. Rû ngêmacax i choma rû tá chanaxü i ngêma choxna naxçax cucaxü. <sup>12</sup>Natürü nangexma i wüxi i guxchaxü. Rû aixcüma nixí i cutanüxü chixíxü i chomax, natürü nangexma i to i chorü yexera cutanüxüxüchi ixíxü. <sup>13</sup>iËcü nuxâ rüxâüx i ñoma i chütaxügu! Rû moxü paxmama rû tá ngêma to i cutanüxümaxâ chidexa rû ngoxi cumaxâ naxâxmaçhaü. Rû ngêxguma nanaxwaxegu nax cumaxâ naxâmaxü rû marü name nax ngêmaäcü yixíxü, erü nüma rû chorü yexera cutanüxüxüchi nixí. Natürü ngêxguma tama nanaxwaxegu, rû Tupanaégagu cumaxâ nüxü chixu nax choma tá cumaxâ chaxâmaxü. iËcü nape rû nuxâ ingunexü! —ñanagürü. <sup>14</sup>Rû ngîma ga Rux rû yexma ipe, rû Boócutüguama ica rû yexma iyangunexü. Rû moxüäcü taxütâma yangóonexüchigu rû íruda yerü yema ñanagürü ngíxü ga Boó: “Tama chanaxwaxe nax texê nüxü nacuáxü i nua chauanewa nax cuxüxü i chebáda íyabuxuchitexegüxüwa”, ñanagürü. <sup>15</sup>Rû yexguma marü inaxüächichaxüxgu ga Rux, rû nüma ga Boó rû ñanagürü ngíxü: —iËcü ínacuxuchi i ngêma curü deyuchiru rû mea nüxü ingí! —ñanagürü. Rû ngîma ga Rux rû mea nüxü iyangí ga yema ngírü deyuchiru, rû nüma ga Boó rû yema ngírü deyuchirugu ngíxü nanagü ga 40 quíru naguxü ga chebáda. Rû ñuxüchi ngíxü narüngüxê ga ngítétügu nax naxúnagüpüüxü. Rû ngîma rû yemamaxâ íanecax itáegu. <sup>16</sup>Rû yexguma ngíxêxütawa nanguxgu ga Rux, rû ngíxê ngíxna taca rû ngîgürügü: —¿Nuxäcü cuxü nangupetüxü, Pa

Chauxacüx? —ngĩgürügü. Rũ ngĩma ga Rux rü nüxũ iyaxu ga guxũma ga ñuxãcü ngĩxũ nax nangũxẽxũ ga gumá Boó. <sup>17</sup>Rũ ñuxũchi ngĩgürügü ta: —Rũ choxna nanaxã i guxũma i ñaa chebáda, rü ñuxũchi choxũ ñanagürü: “Tama name i ngeãcumexẽãcüma cuxẽcax cutãegu”, ñanagürü. <sup>18</sup>Rũ yexguma ga ngĩma ga Noemí rü ngĩgürügü: —Ñuxma Pa Chauxacüx, rü name nixĩ i mea ícunanguxẽxẽ nax ñuxãcü tá nangupetüxũ i ngẽma cumaxã nüxũ yaxuxũ. Erü nüma ya Boó rü taxütáma nanangexrü ega tama namexẽãgu i ngẽma cumaxã nüxũ yaxuxũ. Rũ nüma rü ñuxmatátama nixĩ i namexẽãxũ —ngĩgürügü.

#### Boó rü Ruxmaxã naxãxmaç

**4** <sup>1</sup>Rũ nüma ga Boó rü guma ñanearü ücuchicawa nayarüto yerü yéma nixĩ ga guxũma ga duũxũgü nachopetüxũ rü namexẽãxũ ga norü guxchaxũgü. Rũ yexguma yéma natoyane rü yéma naxüpetü ga guma natanücü ga Boó Ruxmaxã nüxũ yaxucü. Rũ nüma ga Boó rü naxcax naca rü ñanagürü nüxũ: —iDücaç, nua chauxütawa naxü rü írüto, rü paxaãchi tá tidexagü! —ñanagürü. Rũ nüma ga yema natanücü rü yéma naxü, rü naxütawa nayarüto. <sup>2</sup>Rũ nüma ga Boó rü naxcax naca ga 10 ga ãexgacügü ga guma ñanecüãx ixĩgüxũ, rü yemagü rü ta ñanatogüxẽxẽ nax nümagü rü ta ñnütanüxü yixĩgüxũcax. <sup>3</sup>Rũ nüma ga Boó rü gumá natanücüxũ ñanagürü: —Ngẽma Noemí ga Moánewa táegucü rü namaxã itaxechaũ i ngĩrü naane ga gumá tatanücü ga Erimeréarü ixĩxũ. <sup>4</sup>Rũ

cumaxã nüxũ chixu nax nüxũ cucuãxũcax i ngẽmachiga. Rũ ngẽxguma cuxũ nangüchaũgu nax naxcax cutaxexũ rü name nixĩ i ñuxmatama naxcax cutaxe napexewa i ñaa ãexgacügü i ñnütanüxüruxü ixĩgüxũ. Erü cuma nixĩ i chorü yexera natanücü quixĩxũ ya Erimeré, rü ngẽmacax cuxna naxü nax naxcax cutaxexũ i ngẽma naane. Natürü ngẽxguma cuma tama naxcax cutaxegu, rü ichomaxã nüxũ ixu! Erü choma nixĩ i cuweama chaxixũ nax choxna naxixũ i ngẽma naane —ñanagürü. Rũ yexguma nüma ga gumá natanücü rü nanangãxũ rü ñanagürü: —Ngẽmãacüx, naxcax chataxe tá —ñanagürü. <sup>5</sup>Rũ yexguma ga Boó rü ñanagürü: —Rũ ngẽxguma Noemíxütawa naxcax cutaxegu i ngẽma naane rü cuxna naxü ta nax Ruxmaxã cuxãmaxũ, nax ngẽmaãcü naxãxacüxũcax, rü yimã ngĩne rü tauxeta i ngĩtechicüxü nüxna naxüxũcax i ngẽma naane —ñanagürü. <sup>6</sup>Rũ yemaxũ naxĩnúgu ga guma natanücü rü nanangãxũ rü ñanagürü: —Ega ngẽmaãcü yixĩgu, rü taxuacüma naxcax chataxe, erü chi ngẽxguma naxcax chataxegu rü ngẽma choxna üxũ i naane rü chi ta ngĩnena naxüe. Rũ aixcüma cumaxã nüxũ chixu rü icuma naxcax nataxe! —ñanagürü. <sup>7</sup>Rũ woetama nüxcüma nixĩ ga Iraétanüxũgü rü yexguma taxacü ga nüxna üxũ natanüxũna naxãxgu, rü ínacuãxichi ga wüxicutü ga norü chapatu rü yema to ga natanüxũna nanaxã. Rũ yemawa nixĩ ga duũxũgüxũ nüxũ nacuãxẽxũ ga aixcüma nügüna nax naxãgüãxũ. <sup>8</sup>Rũ yemacax ga nüma ga Boótanücü rü ínacuãxichi ga wüxicutü ga norü

chapatu rü Boóna nanaxã rü ñanagürü nüxũ: —iCuma naxçax nataxe i ngẽma naane! —ñanagürü. <sup>9</sup>Rü yexguma nüma ga Boó rü ñanagürü nüxũ ga yema ãëxgacügü ga ñüetanüxüruxũ ixigüxũ, rü yema togü ga yema irüdaunüxũ: —Guxãma i pemagü i ñuxma nua rüdaunüxe, rü pema nixĩ i nüxũ pexĩnüexũ nax choma ngixũ naxçax chataxexũ i Noemí i ngẽma naane ga Erimeréarü, rü Querióüarü, rü Maróüarü ixixũ. <sup>10</sup>Rü ngëxgumarüxũ ta nüxũ pexĩnüe nax ngixũ chayaxuxũ i ngẽma yutecü i Moáanecüax i Rux nax ngẽmaäcü naxãxacüxüçax rü yimá ngĩne rü guma tauxeta ngĩte ga Maróüchicüxü nüxna naxüxüçax i ngẽma naane —ñanagürü. <sup>11</sup>Rü nüma ga yema ãëxgacügü rü guxüma ga yema duüxüügü ga yema irüdaunüxũ rü nanangãxüga rü ñanagürügü: —Aixcüma toma nixĩ i nua itarüdaunüxũ rü itarüxĩnüexũ. Rü nüma ya Tupana i ñuxma cuxna imucü i ñaa nge, rü tanaxwaxe i ngixũ narüngüxë nax naxãxacüxüçax ngixrüxũ ga Raquél rü Léa ga ngĩwa ne ixĩcü i guxãma i yixema i Iraétanüxüügü. Rü cumax, Pa Boóx irü Tupana cuxũ rüngüxëxë nax wüxi ya yatü ya duüxüügüpepexewa mecü quixixũ i nua Beréüwa i Efrátawa! <sup>12</sup>iRü Cori ya Tupana cuxna namugü i muxü i cunegü ngĩwa i ñaa nge, rü yamu i cutanüxüügü yexgumarüxũ ga nax yamuxũ ga nanegü ga guma Fáre ga Yudá nane ixĩcü ga Tamáwaücü! —ñanagürügü. <sup>13</sup>Rü yemaacü nixĩ ga

Boó rü Ruxmaxã naxãmaxũ. Rü Tupana rü ngixna nanamu ga wüxi ga ngĩne. <sup>14</sup>Rü yexguma ga yema ngexüügü ga guma ñanecüax rü Noemíxũ ngigürügügü: —Namecümaxüchi nixĩ ya Tupana erü marü cuxũ nanangexmaxëxë ya daa cutaxa. Rü chierü natáchigagu i Iraéanecüaxgütanüwa. <sup>15</sup>Rü nüma tá nixĩ i cuxũ nataãxëxëxü rü cuxna nadauxũ i ngëxguma cuyaxgu, erü ngẽma cuneax i cuxũ ngechaüxüchicü ngĩne nixĩ. Rü ngĩma rü cuxũ ime i norü yexera ya 7 ya cunegü ega chi ngëxgumaepüx cuxũ ngëxmaxgu —ngigürügügü. <sup>16</sup>Rü ngĩma ga Noemí rü tüxũ iyaxu rü tüxũ iyaxëxë ga guxema ngĩtaxa. <sup>17</sup>Rü yemaxü nadaugüga ga yema togü ga ngexüügü ga ngĩrü ngaicamagu ächiügüxũ rü ngigürügü: —Wüxi ya ngĩtaxa ngixü nabu i Noemí —ngigürügügü. Rü Obégu inaxüégagü. Rü guma Obé nixĩ ga Ichaí nanatü rü ãëxgacü ga Dabíarü oxĩ ixĩcü.

#### Äëxgacü ga Dabíarü oxigüchiga

<sup>18-22</sup>Ñaa oxigü nixĩ ga Boóarü oxigü ixigüxũ: Rü Fáre rü Eróü nanatü tixĩ, rü Eróü rü Ráü nanatü tixĩ. Rü Ráü rü Aminadá nanatü tixĩ, rü Aminadá rü Naachóü nanatü tixĩ. Rü Naachóü rü Chamóü nanatü tixĩ, rü Chamóü rü Boó nanatü tixĩ. Rü Boó rü Obé nanatü tixĩ, rü guma Obé rü Ichaí nanatü tixĩ, rü nüma ga Ichaí rü Dabí nanatü tixĩ.

# 1 SAMUEL

## (1 Chamué)

### Tupana rü Ánaxũ narüngũxêê nax naxãxacũcãx

**1** <sup>1</sup>Rü nayexma ga wüxi ga duũ ga Ercánagu ãégacü. Rü nüma rü Efraítanũxũ nixĩ rü ïane ga Ramágu naxãchiũ. Rü guma ïane rü máxpũxanexũ ga Efraíwa nayexma. Rü nüma ga Ercána rü Yeruáũ nane nixĩ, rü Yeruáũ rü Eriú nane nixĩ, rü Eriú rü Tóu nane nixĩ, rü Tóu rü Chúx nane nixĩ. <sup>2</sup>Rü guma Ercána rü nüxũ iyexma ga taxre ga naxmãx. Rü wüxi ga naxmãx rü Ána nixĩ ga ngíéga, rü yema nai ga naxmãx rü Peniná nixĩ ga ngíéga. Rü yema naxmãx ga Peniná rü ixãxacü, natürü ga yema naxmãx ga Ána rü ingexacü. <sup>3</sup>Rü guxcüma ga taunecügu rü nüma ga Ercána rü wüxi gu naxmãxgümaxã guma ïane ga Chíruwa naxũxũ nax Tupana ya guxãétüwa ngêxmacũxũ yacuãxũxũcãx, rü naxcãx yamáaxũcãx rü yaguaxũcãx ga norü ãmare. Rü guma ïanewa nayexma ga wüxi ga chacherdóte ga Eriú ãégacü. Rü nüma rü nüxũ nayexma ga taxre ga nanegü ga chacherdótegu ixĩgũxũ. Rü wüxi rü Oní nixĩ ga naéga, rü yema to

rü Finée nixĩ ga naéga. <sup>4</sup>Rü yexguma Ercána norü ãmare Tupanana naxãxgu, rü naxmãx ga Peniná rü ngĩxũ naxüarü ãmareãx, rü ga naxacügu rü ta nayaxüarü ãmareãx. <sup>5</sup>Natürü ga naxmãx ga Ána rü taxre ga ãmare ngĩxna naxã yerü poraãcü ngĩxũ nangechaũ woo Tupana ngĩxũ nax ngexacũxêxũ. <sup>6</sup>Rü yema nax nangexacũxũcãx ga Ána, rü ngĩma ga Peniná rü guxũguma Ánagu iyadauxcüraxũ rü ngĩxũ icugü. <sup>7</sup>Rü guxcüma ga taunecügu ga yexguma Tupanapatawa naxĩxũgu rü ngĩma ga Peniná rü yemaacü Ánaxũ icugüãxũ. Rü yemaçax ga Ána rü ngĩgümaxã ingechaũ rü ixaxu rü tama ichibüchaũ. <sup>8</sup>Rü nüma ga Ercána rü naxmãx ga Ánana naca rü ñanagürü ngĩxũ: —¿Taxacũcãx cuxaxu? ¿Rü taxacũcãx cungechaũ rü tama cuchibü? ¿Tama êxna i choma rü 10 ya cunearü yexera cuxũ chamexũ? —ñanagürü. <sup>9</sup>Rü yexguma ïane ga Chíruwa nayexmagügu, rü wüxi ga yáuanecü ga chibüwena rü ngĩma ga Ána rü Tupanapatawa ixü. Rü nüma ga chacherdóte ga Eriú rü norü tochicaxũ ga nawa natoouxüwa narüto ga Tupanapataarü ñãxarü ngaicamána.

<sup>10</sup>Rü ngîma ga Ána rü poraãcü ixaxu, rü ngîgûmaxã ingechaũ, rü yemaacü iyumüxê, rü Tupanana ica. <sup>11</sup>Rü ngîrû yumüxêwa rü Tupanamaxã ixuneta rü ngîgürügü: —Pa Tupana ya Daxüwa Ngêxmacüx, rü ngêxguma chi nüxü cucuaxgu nax ñuxãcü ngúxü nax chingexü naxçax i ngêma nax changexacüxü irü choxü nüxü naxînú i ñaa chorü yumüxê, rü choxna namu ya wüxi ya chaune! Rü yimá rü tá cuxna chanamu nax cuxrûxü yixîxüçax. Rü ngêma norü cuaxruxü nax aixcûma cuxna chanamuxü rü tagutáma niyoeru —ngîgürügü. <sup>12</sup>Rü ngîma ga Ána rü imáarü yumüxêãx nax Tupanamaxã yadexaxü, rü nüma ga Erí rü ngîãxgu nadawenü. <sup>13</sup>Rü ngîma rü ngîãxêwa iyumüxê, rü tama nüxü taxînú ga ngîga. Rü ngîãxicatama nixí ga ixîaxcüüxü. Rü yemaçax ga Erí rü nagu narüxînú ga nax nangãxüxü. <sup>14</sup>Rü ñanagürü ngîxü: —¿Ñuxãcü i ngãxãcü nua cuxüxü? iRü marütama nax cungãxechaxü! —ñanagürü ngîxü. <sup>15</sup>Rü ngîma ga Ána rü inangãxü rü ngîgürügü: —Tama nixí i changãxüxü, Pa Corix. Tama nixí i taxacü rü axchiü i ngúchiáxü rüexna bínu ya ngúchiacü chayaxaxüxü. Rü ngêma choxü ngupetüxü nixí nax changexacüxü rü ngêmacax changechaũ, rü Tupanamaxã nüxü chixuxü i ngêma guxchaxü. <sup>16</sup>iRü taxú i nagu curüxînúxü rü choma rü wüxi i nge i chixecü chixîxü! Rü guxüma i ñaa ngunexügiügu rü íchayumüxê naxçax i ngêma chorü oégaãxê rü íxachiãxê —ngîgürügü. <sup>17</sup>Rü yexguma ga Erí rü ngîxü nangãxü rü ñanagürü: —iËcü taãxêãcü natáegu! iRü nüma ya

Iraéanecüãxgiarü Tupana rü cuxna naxãã i ngêma nüxna naxçax cucaxaxü! —ñanagürü. <sup>18</sup>Rü ngîma ga Ána rü inangãxü rü ngîgürügü: —Moxêxüchi naxçax i ngêma dexa —ngîgürügü. Rü ñuxüchi itáegu rü iyachibü rü marü taguma wena ingechaũ. <sup>19</sup>Rü moxüãcü rü nangunetüxüegü ga Tupanapatawa nax naxîxü nax nüxü yanacuaxüügiüxüçax. Rü yemawena rü napataçax nawoegu ga ñane ga Ramáwa. Rü nüma ga Ercána rü naxmãx ga Ánaxü nape. Rü nüma ga Tupana rü nanangãxü ga ngîrû yumüxê. <sup>20</sup>Rü yemaçax ga Ána rü ixãxacü. Rü yexguma nawa nanguxgu ga nax nabuxü ga guma ngîne, rü inaxüéga rü Chamué nixí ga naéga yerü Tupanana naxçax ica. Rü ngêma naéga rü “Naxçax ínacaxacü”, ñaxüchiga nixí. <sup>21</sup>Rü guma nai ga taunecügu rü nüma ga Ercána rü naxmãx ga Peninámaxã rü guxüma ga naxacügiümaxã rü ñane ga Chíruwa naxí nax Tupanana yéma yaxããxüçax ga norü ámaregü, rü nüxü yanacuaxüügiüxüçax yema guxcüma ga taunecügu naxüüxürüxü. <sup>22</sup>Natürü ga naxmãx ga Ána rü tama yéma ixü, rü ngîgürügü nüxü ga ngîte: —Taxütáma ngêma chaxü i choma ñuxmatáta yamaie ya daa bucü. Rü ngêxgumaxica tá nixí i ngêma chanagaxü nax Cori ya Tupanana chayamuxüçax rü ngêxma nax yanaxãxüxüchixüçax —ngîgürügü. <sup>23</sup>Rü nüma ga ngîte ga Ercána rü ngîxü nangãxü rü ñanagürü: —iËcü naxü i ngêma cuma nagu curüxîniügu rümexü! Rü marü name i nuxã curüxãxü rü ñuxmatata cuyamaie ya yimá cune nax ngêmaãcü yanguxêãxüçax i norü

ngúchaũ ya Cori ya Tupana. Rũ yemaacũ ga ngĩma rũ yexma irũxãũx, rũ inayaxẽxẽ ga guma ngĩne rũ ñuxmatata yamaie. <sup>24</sup>Rũ yexguma marũ yamaieãguwena ga guma bucũ rũ Cori ya Tupanapatawa inaga ga ãane ga Chĩruwa. Rũ yexgumarũxũ ta yéma inagagũ ga tomaepũx ga wocaxacũ ga iyatũxũ, rũ wũxiwetaxũ ga trĩgu, rũ wũxi ga tũxũacu ga bĩnu. <sup>25</sup>Rũ yexguma wũxi ga wocaxacũ Tupanacax yamãxgũguwena, rũ chacherdóte ga Erĩna nayamugũ ga guma bucũ. <sup>26</sup>Rũ ngĩma ga Ána rũ ngĩgürügũ nüxũ ga guma chacherdóte: —Pa Corix ¿choxũ cucuaxũ yixĩxũ? Rũ choma nixĩ ga yema nge ga ũpa cupexewa Tupanana chacaxaxũ chorũ yumũxẽwa. <sup>27</sup>Rũ nüxna chacaxaxũ nax choxna namuaxũcax ya daa chaune, rũ nüma rũ marũ choxũ nangãxũ ga yema naxcax íchacaxaxũ. <sup>28</sup>Rũ ngẽmacax i ñuxma rũ nua cuxũtawá chana ga daa chaune nax nüxna chayamuxũchixũcax ya Tupana —ngĩgürügũ. Rũ ñuxũchi ga nüma ga Erĩ rũ ñaxtũanegu nayangũcuchi rũ Cori ya Tupanaxũ nicuaxũxũ.

#### Ánaarũ yumũxẽ

**2** <sup>1</sup>Rũ ñaãcũ iyumũxẽ ga Ána: —Pa Corix, rũ poraãcũ cumaxã chataãxẽ erũ choxna cunamu ya chaune. Rũ ñuxma rũ choxũ natauxcha nax chanangãxũgaxũ i ngẽma choxũ cugũexũ erũ cuma choxũ curũngũxẽ. Rũ ngẽmacax chataãxẽxũchi. <sup>2</sup>Rũ tataxuma ya texé ya curũxũ ũunexe, Pa Corix. Rũ tataxuma ya texé curũxũ duũxẽgũna dáuxe, Pa Torũ Tupanax. Rũ

nataxuma i taxacũ i cuxũ rüyexeraxũ —ngĩgürügũ.

.....

<sup>11</sup>Rũ ñuxũchi nüma ga Ercána rũ naxacũãxgũ rũ naxmãxgũmaxã napatacax nawoegu ga ãane ga Ramáwa. Natürũ nüma ga guma nane ga bucũ rũ yexma chacherdóte ga Erĩxũtagu narũxãũx nax yéma Cori ya Tupanaaxũ napuracũxũcax.

.....

#### Chamuéxũ nayaxu ga Cori ya Tupana

<sup>18</sup>Rũ nüma ga guma bucũ ga Chamué rũ niyachigũ rũ Cori ya Tupanaaxũ napuracũ. Rũ naxchiru rũ chacherdótegũchirurũxũ nixĩ nax línuchinaxcax yixĩxũ. <sup>19</sup>Rũ wũxichigũ ga taunecũgu ga yexguma norũ mamá tũmatemaxã guma Tupanapatawa taxĩxũgu nax Tupanacax yéma tanangegũxũcax ga tũmaarũ ãmaregũ, rũ Chamuécax rũ ta yéma tanangeexũ ga wũxi ga naxchiru ga nüxũ taxũxũ. <sup>20</sup>Rũ nüma ga guma chacherdóte ga Erĩ rũ Ercánamaxã rũ naxmãxmaxã mexũ naxuegu rũ ñanagürũ: —Nüma ya Cori ya Tupana rũ tá cuxũ nanaxũtanũ namaxã nax cuxũ nax yaxãxaciuchigũxũcax i ñaa nge natanũ ya yimá ngĩne ya Corina namuãcũ —ñanagürũ. Rũ yemawena ga Ercána rũ Ána rũ napatacax nawoegu. <sup>21</sup>Rũ nüma ga Cori ya Tupana rũ Ánaxũ narũngũxẽ rũ yemacax iyaxãxaciuchigũ. Rũ yemaacũ tomaepũxwa nangu ga ngĩne rũ taxre ga ngĩxaciũ. Rũ yoxni ga guma ngĩne ga Chamué rũ Tupanapexewa niyachigũ. <sup>22</sup>Rũ nüma ga guma chacherdóte ga Erĩ rũ marũ

poraãcü nayaxüchi. Natürü nüxü nacuaxama ga yema chixexü ga nanegü ixügüxü, rü ñuxãcü yema ngexügü ga Tupanapataarü ücuchicawa puracüexümaxã nax namaxëxü. <sup>23</sup>Rü yemaçax nanegüxü ñanagürü: —Guxüma i duüxügü rü chomaxã nüxü nixugügü nax ñuxãcü chixexü pexügüxü rü chixri pemaxëxü. ¿Rü tüxcüü ngëmaãcü pemaxë? <sup>24</sup>Rü dücax, Pa Chaunegüx, rü nachixexüchima nixi i ngëma ore i Tupanaarü duüxügü nüxü nixugügüxü i pechiga. <sup>25</sup>Rü ngëxguma wüxi i duüxü rü to i duüxümaxã chixexü üxgux rü nangexma i norü mexëeruxü. Natürü ngëxguma wüxi i duüxü Tupanamaxã chixexü üxgux ¿rü texe tá tanamexëxë i ngëma? —ñanagürü. Natürü ga nümagü ga nanegü rü tama naga naxinüechaü, yerü ga Tupana rü marü namaxã nanaxuegu ga nax nadaixaxü. <sup>26</sup>Rü yoxni ga nüma ga guma ngextüxcüci ga Chamué rü niyachigü. Rü Cori ya Tupana rü poraãcü namaxã nataãxë, rü duüxügü rü ta namaxã nataãxëgü.

.....

### Tupana rü Chamuéxü naca

**3** <sup>1</sup>Rü nüma ga ngextüxcüci ga Chamué rü Cori ya Tupanaaxü napuracü yema Erí namuxüãcüma. Rü yexguma ga Tupana rü ñuxguacürica texëmaxã nidexa. Rü ñuxguacürica texëçax nanangoxëxë ga ëxüguxü. <sup>2</sup>Rü nüma ga Erí rü marü naya rü yemaçax marü nixoxetü rü tama mea taxacüxü nadau. Rü wüxi ga chütaxügu rü norü ucapuwa ínape ga Tupanapatawa. <sup>3</sup>Rü nüma ga Chamué rü yema baü ga

Tupanaarü mugü nawa yexmaxüxütaguama nape. Rü yema norü omü ga guma Tupanapata rü nanaiecha. <sup>4</sup>Rü wüxi ga chütaxü rü nüma ga Cori ya Tupana rü Chamuéxü naca rü ñanagürü: —Pa Chamuéx, Pa Chamuéx —ñanagürü. Rü nüma ga Chamué rü nanangãxü: —Daxe chixi —ñanagürü. <sup>5</sup>Rü yexgumatama ínariwax ga yema ínaxexüwa rü Erí íyexmaxüwa naña, rü ñanagürü: —Daxe chixi rü nua changexma. ¿Rü taxacüçax çaxüçax cuca? —ñanagürü. Rü nüma ga Erí rü nanangãxüga rü ñanagürü: —Taguma nixi i cuçax çacaxü. iËcü natáegu rü yape! —ñanagürü. Rü yexguma ga nüma ga Chamué rü natáegu rü nayape. <sup>6</sup>Natürü nüma ga Cori ya Tupana rü wenaxarü Chamuéna naca rü ñanagürü: —Pa Chamuéx —ñanagürü. Rü nüma ga Chamué rü ínariwax, rü Erí íyexmaxüwa naña rü ñanagürü: —Daxe chixi rü nua changexma. ¿Taxacüçax çaxüçax cuca? —ñanagürü. Rü nüma ga Erí rü nanangãxüga rü ñanagürü: —Taguma nixi i cuçax çacaxü, Pa Chaunex. iËcü natáegu rü yape! —ñanagürü. <sup>7</sup>Rü nüma ga Chamué rü tama nüxü nacuax nax Cori ya Tupana yixixü ga namaxã idexaxü yerü ga aixrügumaãcü taguma namaxã nidexa. <sup>8</sup>Natürü yema chütaxügu rü nüma ga Cori ya Tupana rü norü tomaepüxcüna Chamuéna naca. Rü nüma ga Chamué rü ínariüda rü Eríxütawa naña rü ñanagürü: —Daxe chixi, rü nua changexma. ¿Rü taxacüçax çaxüçax cuca? —ñanagürü. Rü nüma ga Erí rü nüxü nicuaxãchi ga Cori ya Tupana nax yixixü ga guma Chamuéna çaxacü. <sup>9</sup>Rü nüma ga Erí rü



Chamuéxũ ñanagürü: —iËcü yape! Rü ngëxguma Cori ya Tupana wena cuxna caxgu irü nangãxũga rü ñacuxũ tá: “Rü idexa rü yimá curü duũ rü nüxũ naxínü nixĩ”, ñacuxũ tá! —ñanagürü. Rü yexguma nüma ga Chamué rü natáegu rü nayape. <sup>10</sup>Rü yemawena ga nüma ga Cori ya Tupana rü wenaxarü Chamuéxũ naca ga yema noxri nüxũ nacaxgurüütama, rü ñanagürü: —Pa Chamuéx, Pa Chamuéx —ñanagürü. Rü nüma ga Chamué rü nanangãxũga rü ñanagürü: —iDexa! Rü cuxũ naxínü nixĩ ya curü duũ —ñanagürü. <sup>11</sup>Rü nüma ga Cori ya Tupana rü ñanagürü: —Ñuxma rü Iraéanecüãxgütanüwa tá chanaxü i taxacu i guxátama namaxã bajãchiexũ. Rü guxãma ya nüxũ ñnuxe rü tá namaxã tanguxmachixẽ. <sup>12</sup>Rü ngëma ngunexũgu rü taxütáma chanangupetüxëxë i guxũma ga yema Erímaxã nüxũ chixuxũ ga nanegüchiga. <sup>13</sup>Rü namaxã nüxũ chixu rü tá chanapoxcue i ngëma nanegü naxçax i ngëma chixexũ i nüma marü nüxũ nacuáxũ. Yerü ga nanegü rü chixexũ chomaxã nixugüxe rü nüma rü tama nüxna nachogü naxçax ga yema chixexũ ga naxügüxũ. <sup>14</sup>Rü ngëmacax i ñuxma rü Erí nanegümaxã chanaxuegu nax taxütáma nüxũ nüxũ nax changechaũxũ i norü chixexũgü woo naxũnagü chauxçax ínaguxgu rüexna ãmaregü choxna naxuaũgügu —ñanagürü ga Tupana. <sup>15</sup>Rü yemawena ga Chamué rü nape ñuxmata moxüácü yangune. Rü yexguma ínadaxgu rü inanawãxã ga Tupanapataarü íãxgü. Natürü nüma ga Chamué rü namuũ ga Erímaxã nüxũ nax yaxuxũ ga yema dexa ga Tupana namaxã nüxũ ixuxũ. <sup>16</sup>Natürü

nüma ga Erí rü Chamuéçax naca rü ñanagürü nüxũ: —Pa Chaunex, Pa Chamuéx —ñanagürü. Rü nüma ga Chamué nanangãxũga rü ñanagürü: —Daxe chixĩ —ñanagürü. <sup>17</sup>Rü nüma ga Erí rü Chamuéna naca rü ñanagürü: —¿Ñuxü ñaxũ yixixũ cuxũ ya Cori ya Tupana? iRü guxũxütáma chomaxã quixu, rü taxuxütáma iquicux! Rü Tupana poraãcü cuxũ poxcux ega taxütáma guxũ i ngëma cumaxã nüxũ yaxuxũxũ chomaxã quixuxgu —ñanagürü. <sup>18</sup>Rü nüma ga Chamué rü guxũxũma Erímaxã nixu rü taxuũma iniicux. Rü nüma ga Erí rü nabaixãchi rü ñanagürü: —Nüma nixĩ i Cori ya Tupana yixixũ. iËcü naxüã i ngëma naxçax rümemaxũ! —ñanagürü. <sup>19</sup>Rü nüma ga Chamué rü niyachigü, rü Cori ya Tupana rü nanaxütágu. Rü guxũma ga duũxũgü rü meama nüxũ inarüxinüe ga norü ucuxëgü. <sup>20</sup>Rü Dãũwa inaxügü, rü ñuxmata Bechëbawa nangu ga Chamuéxũ nax nacuxgüxũ ga guxũma ga Iraéanecüãxgü ga nax aixcüma Tupanaarü orearü uruxũ nax yixixũ. <sup>21</sup>Rü nüma ga Cori ya Tupana rü inayadaxëxë ga Chamuémaxã nüxũ nax yaxuxũ ga norü ore nawa ga guma Tupanapata ga Chíruwa yexmane. Rü nüma ga Chamué rü ñuxüchi duũxũgümaxã nüxũ nixu ga yema norü ore ga Tupana.

**Piritéutanüxũgü rü nachixüanewa nanangegü ga yema baú ga Tupanaarü mugü nawa yexmaxũ**

**4** <sup>1</sup>Rü yema ga ngunexũgügu ga Iraéanecüãxgü rü Piritéutanüxũgümaxã nügü nadai. Rü ga

Iraéanecüâxgüarü churaragü rü ñane ga Ebenéhearü ngaicamána nayexmagü rü Piritéutanüxügüarü churaragü rü ñane ga Aféwa nayexmagü. <sup>2</sup>Rü nüma ga Piritéutanüxügü rü nügü namexêxê nax Iraéanecüâxgümaxâ nügü nadaixüçax. Rü yexguma nügü nadaixgu, rü nüma ga Piritéutanüxügü rü Iraéanecüâxgüxü narüporamaegü rü tüxü nadai ga 4,000 ga norü churaragü. <sup>3</sup>Rü yexguma yema ínapegüxüçax nawoeguxgu ga Iraéanecüâxgüarü churaragü rü yema namaxâ icuaxgüxü rü nügümaxâ niporagatanüçüxü nachiga ga yema nax Piritéutanüxügü nadaixü, rü ñanagürügü nügümaxâ: —¿Tüxcüü i ñuxma ya Tupana i Piritéutanüxügüxü naxüchicaxü nax tüxü nadaixüçax? ¡Rü ngîxâ Chíruwa taxí rü tayayaxu i ngêma baú i Cori ya Tupanaarü mugü nawa ngêxmaxü nax ngêmaaçü i nüma rü tatanüwa nangexmaxüçax rü tüxü ínapoxüxüçax nüxna i ngêma tóru uanügü! —ñanagürügü. <sup>4</sup>Rü yemaçax ga Iraéanecüâxgü rü ñuxre ga churaragü Chíruwa namugü. Rü yéma nayayauxgü ga yema baú ga nawa nayexmaxü ga norü mugü ga Cori ya Tupana ya guxüétiwa ngêxmacü. Rü Oní rü Finée ga yema taxre ga Erí nanegü rü yema baú ga Cori ya Tupanaarü mugü nawa yexmaxüxüta nixixütanü.

.....

<sup>10</sup>Natürü ga yema Piritéutanüxügü rü Iraéanecüâxgüxü nadai. Rü nüma ga Iraéanecüâxgü rü nixü, rü yema ínapegüxüwa nabuxmü. Rü nayue ga muxüma ga Iraéanecüâxgüarü churaragü, rü 30,000 wa nangu. <sup>11</sup>Rü yexgumarüxü ta nanapugü ga yema baú

ga Tupanaarü mugü nawa yexmaxü, rü nanadai ga Oní rü Finée ga yema taxre ga Erí nanegü. <sup>12</sup>Natürü wüxi ga churara ga Bëyamítanüxü íxixü rü niña ga yema nügü ínadaxüwa rü yematama ngunexügu Chíruwa nangu. Rü norü ngechaümaxâ nügü nayarügáutechiru, rü nügü nabuxeru, rü yemaacü ínangu. <sup>13</sup>Rü yexguma yéma nanguxgu ga yema churara rü nüma ga Erí rü íâxwa narütö nawa ga yema norü tochicaxü. Rü namagu ínadawenü yerü naxçax naxoegaâxê ga yema baú ga Tupanaarü mugü nawa yexmaxü. Rü yema yattü rü guma íanegu naxücu rü nüxü nixu ga yema ngupetüxü. Rü yexgumatama ga guxüma ga duüxügü rü inanaxügüe ga poraçü nax naxauxexü. <sup>14</sup>Rü yemaxü naxínügu ga Erí rü ínaca rü ñanagürü: —¿Taxacüchiga nixí i ngêma nax íyacuxcuxü? —ñanagürü. Rü nüma ga yema churara rü nañuxâxê ga Erímaxâ nüxü nax yanaxuxü ga yema ngupetüxü. <sup>15</sup>Rü nüma ga Erí rü nüxü nayexma ga 98 ga taunecü rü marü natauxetüxüchi ga yexguma. <sup>16</sup>Rü nüma ga churara rü ñanagürü: —Ñuxmatama íchangu i ngêma togü ítadaixüwa nax ne chañaxü. Rü ñuxmatama chiña i nawa i ngêma dai —ñanagürü. Rü nüma ga Erí rü nüxna naca rü ñanagürü: —¿Taxacü nangupetü, Pa Chaunex? —ñanagürü. <sup>17</sup>Rü nüma ga yema churara rü nanangâxüga rü ñanagürü: —Nüma i Iraéanecüâxgü rü Piritéutanüxüchaxwa nixü ñuxmachi muxema ya tatanüxexü nadai. Rü ngêmatanügu nayue ya yimá taxre ya cune ya Oní rü Finée, rü ngêma baú i Tupanaarü mugü nawa ngêxmaxü rü Piritéutanüxügü nanapugü

—ñanagürü. <sup>18</sup>Rü yexguma yemaxü naxínügu ga Erí, ga Piritéutanüxügü nax napuxü ga yema baú ga Tupanaarü mugüchixü, rü norü tochicaxüwa ínawax rü ñaxütagu nangu. Rü yema nax nayaxüchixü rü yangüxü, rü yemacax nibüyenaxá ga yexguma nanguxgu, rü yexma nayu. Rü nüma ga Erí rü 40 ga taunecü nixí ga Iraéanecüñxgümaxá inacuáxü.

.....

**Piritéutanüxügü rü nachixüanewa nanangegü ga yema baú ga Tupanaarü mugüchixü**

**5** <sup>1</sup>Rü yexguma marü yapugüñxgu ga yema baú ga Tupanaarü mugüchixü, rü nüma ga Piritéutanüxügü rü ñane ga Ebenéchewa nanayauxgü rü norü ñane ga Asdóxwa nanangegü. <sup>2</sup>Rü ñuxüchi norü tupana ga Dagóũpatawa nanangegü rü yema naxchicünaxäxütagu nanaxügü. <sup>3</sup>Rü moxüäcü ga yexguma inangugügu ga yema Asdóxcüñxgü, rü Dagóũchicünaxäxü inayangaugü ga ñaxtümüanegumare nguxü napexegu ga yema baú ga Tupanaarü mugü nawa yemaxü. Rü yexguma ga yema duüxügü rü nanayauxgü ga yema Dagóũchicünaxá rü wena nachicagu nanachixëégü. <sup>4</sup>Natürü yexguma moxüäcü paxmama yéma naxíxgu ga yema Asdóxcüñxgü, rü nüxü inayangaugü ga Dagóũchicünaxá ga wenaxarü ñaxtümüanegu ümarexü napexegu ga yema baú ga Tupanaarü mugü nawa yemaxü. Rü ga naeru rü guma taxre ga naxmex rü nabüü rü ñaxgu nayanümare. Rü yema naxünerica

nixí ga mexü. <sup>5</sup>Rü ngëmacax nixí i woo i ñuxma i ngëma Dagóũarü chacherdótegü rü ngëxguma yima tupauca ya Asdóxwa ngexmanegu nachocuxgu rü tama ngëma mürapewa i ñaxwa itoxexüwa nangagüxü. <sup>6</sup>Natürü nüma ga Cori ya Tupana rü nanapoxcye rü ínana**ba**ixgü ga yema duüxügü ga Asdóxcüñxgü, rü taixnamaxá nayada**x**aweexëxë. <sup>7</sup>Rü yemaxü nadaugügu ga yema duüxügü ga Asdóxcüñxgü rü ñanagürügü: —Ngëma baú ya Iraéanecüñxgüarü Tupanaarü ixixü rü tama tanaxwaxe i tatanüwa nax nangexmaxü erü ngëmagagu nixí i ngëma Tupana rü taxcax rü tórü tupana i Dagóũcax rü poraäcü guxchaxü inanguxëëxü —ñanagürügü. <sup>8</sup>Rü yemacax ga yema Asdóxcüñxgü rü guxüma ga Piritéutanüxügüarü ñëxgacügücax nangema nax namaxá nangutaquexegüxücax. Rü nüxna nacagüe rü ñanagürügü: —¿Taxacü tá namaxá ixügüxü i ngëma baú i ngëma Iraéanecüñxgüxüarü Tupanaarü mugüchixü? —ñanagürügü. Rü yema ñëxgacügü rü nanangäxüga rü ñanagürügü: —ÍËcü ñane ya Gáxwa penangegü! —ñaxümaxá nanangäxügü. Rü nüma ga yema Piritéutanüxügü rü yéma guma ñanewa nanangegü. <sup>9</sup>Natürü yexguma marü yéma nangegüñxguwena, rü nüma ga Cori ya Tupana rü yema ñanecüñxgüxü nayaxíxächiaëxëégü, yerü taixnamaxá nayada**x**aweexëxë ga guxüma ga duüxügü ga ibuxü rü iyaxü. <sup>10</sup>Rü yexguma ga nüma ga Piritéutanüxügü rü ñane ga Ecróüwaama nanangegü ga yema baú ga Tupanaarü mugüchixü.

Natürü yexguma Ecróúwa nanguxgu ga yema baú, rü yema duúxügü ga Ecróúcüâxgü rü nixaixcha rü ñanagürügü: —¿Tüxcüü nua penange i ngëma Iraéanecüâxgüarü Tupanaarü mugüchixü nax toxü nadâixüçax ya guxâma? —ñanagürügü. <sup>11</sup>Rü guma ñanewa rü guxüma ga duúxügü rü nanaxüxâchiâégü, yerü Tupana rü poraâcü nanapoxcue. Rü yemaçax ga yema ñanecüâxgü rü guxüma ga Piritéutanüxügüarü âëxgacügüçax nangema rü ñanagürügü nüxü: —iNua torü ñanewa ípenangexechi i ngëma baú i Iraéanecüâxgüarü Tupanaarü mugüchixü, rü nachixüñanecaxtama penatáeguxêxê nax tama toxü nadâixüçax i guxâma i tomax! —ñanagürügü. <sup>12</sup>Rü poraâcü naxauxe ga guma ñanecüâx, yerü yema tama yuexü rü guxüwama nataixnaxünegü.

**Piritéutanüxügü rü nanatáeguxêégü ga yema baú ga Tupanaarü mugüchixü**

**6** <sup>1</sup>Rü yema baú ga Tupanaarü mugüchixü rü 7 ga tauemacü Piritéutanüxügüarü naanewa nayexma. <sup>2</sup>Rü nüma ga Piritéutanüxügü rü nanangutaquexexêxê ga norü chacherdótegü rü yuüxügü nax yemagüna nacagüexüçax, rü ñanagürügü: —¿Taxacü tá namaxâ taxüxü i ngëma Iraéanecüâxgüarü Tupanaarü mugüchixü? ¡Tomaxâ nüxü pixu nax ñuxâcü tá wena nachixüñanecax tanatáeguxêxü! —ñanagürügü. <sup>3</sup>Rü nüma ga yema chacherdótegü rü yuüxügü rü nanangâxügagü, rü ñanagürügü: —Ngëxguma penatáeguxêëgu i ngëma baú i

Iraéanecüâxgüarü Tupanaarü mugüchixü, rü itaxütama ngëmaâcümare penatáeguxêxê! Rü name nixü nax nüxna penaxâxü i wüxi i âmare nax ngëmaâcü Iraéanecüâxgüarü Tupanaxü namaxâ perüngüxmüxêëxü. Rü ngëxguma i pema rü tá pexçax nitaanegü rü tá nüxü picuaxâchitanü nax ngëmagagu yixüxü i Tupana i pexü yadaçaweexêëxü —ñanagürügü. <sup>4</sup>Rü nüma ga duúxügü rü yema chacherdótegüna rü yuüxügüna nacagüe, rü ñanagürügü nüxü: —¿Taxacü tá nixü i nüxna taxâmarexü nax namaxâ tanangüxmüxêëxüçax? —ñanagürügü. Rü nümagü ga chacherdótegü rü yuüxügü nanangâxügü rü ñanagürügü: —Penaxwaxe i penaxü i 5 i naxchicünaxägü i úirunaxçax i nataixnapüxügüraxüxü. Rü ngëma naxchicünaxägü rü ngëma 5 i perü âëxgacügüexpüx tá nixü i penaxüxü. Rü ñuxüchi 5 i úcachicünaxâ i úirunaxçax tá pexü. Erü ngëma taixnagümaxâ nixü i Tupana i pexü yadaçaweexêëxü, rü úicagümaxâ nixü i guxchaxü pexna naxâxü i guxâma i pemax rü perü âëxgacügü. <sup>5</sup>Rü ngëmacax name nixü i ípenaxüxü i ngëma taixnaxchicünaxägü rü naxchicünaxägü i ngëma úicagü i guxchaxü pexna âxü i perü ñanewa. iRü nüxü picuaxüxü ya yimá Iraéanecüâxgüarü Tupana! Rü bexmana ngëmaâcü tá nüxü narüchau nax pexü yadaçaweexêëxü, rü pexü napoxcuexü i pemax rü perü tupanagü rü perü naane. <sup>6</sup>¿Rü tüxcüü pegü ípenataiâchiarü maxüâxgü narüxü ga yema Equítuanecüâxgü rü norü âëxgacü ga

Faraóú? Yerü yexguma Tupana düxwa guxchaxú naxcax ínguxêéguxicatama nixí ga Iraétanúxúgúxú yangexgúxú. 7 iRü ngexwacaxúne ya peweú ya áchicune pexúx! iRü yima peweú rü taxre i woca i áxacúxü rü taguma úpaacú ñuxgu taxacú i túgúxúwa peyangaxcuchúx! Natürü ngéma naxacúgü irü naxpúúgu namaxá penguxú nax tama naéwe nangegúxúcx! 8 iRü ñuxmachi yima peweúgu peyaxúe i ngéma baú i Cori ya Tupanaarü mugü nawa ngêxmaxú! iRü ngéma baúcúwagu peyaxúechixú i ngéma naxchicúnaxágü i úrunaxcax ixígúxú i norü Tupanaarü ngüxmüxêéruxú ixíxú! iRü ngémawena rü peyangexgü i ngéma wocagü nax núma ínanaxwaxexúwa naxíxcax namaxá i ngéma baú! 9 Rü pema rü mea tá penangugü rü ngextaama naxí i ngéma wocagü namaxá i ngéma baú. Rü ngêxguma Iraéanecúâxgüarü naanewaama naxíxgu i Becheméwaama, rü ngémawa tá nüxú tacuax nax yimá Iraéanecúâxgüarü Tupana yixíxú i taxcax ínanguxêéxü i ngéma daxaweane. Natürü ngêxguma tama ngémaama naxíxgu rü ngémawa tá nüxú tacuax nax tama Iraéanecúâxgüarü Tupana yixíxú ga túxú poxcucü rü woetama ngéma taxcax ínangumare —ñanagürügü. 10 Rü yemaacú nanaxügü ga yema yatügü. Rü taxre ga woca ga íxáxacúxü niyauxgü rü túmapúúgu túxú nawocu ga guxema naxacügü. Rü yemawena ga yema wocagü rü guma naweúwa nayangacuchigü. 11 Rü ñuxmachi guma naweúgu nayaxüegü ga yema baú ga Cori ya Tupanaarü mugü

nawa yexmaxú. Rü yexma nayaxüechixúgü ta ga yema úcachicúnaxágü ga úrunaxcax, rü yema taixnachicúnaxágü. 12 Rü yemawena ga yema wocagü rü íane ga Becheméwa nadaxú ga namagu naxí, rü nixáietanü, rü wexgu naxí rü taxuwama ínachocu. Rü núma ga Piritétanúxúgüarü âêxgacügü rü naweama nixíxútanü ñuxmata Becheméarü üyeanewa nangugü. 13 Rü yema duúxúgü ga Bechemécúâxgü ga naanegüwa tríguarü buxwa puracüexú, rü yexguma nüxú nadaugügu ga yema baú ga Cori ya Tupanaarü mugü nawa yexmaxú, rü nataâxégü. 14 Rü yexguma Yochuéarü naanewa nanguxgu ga Becheméwa, rü yéma nayachaxáchi. Rü yéma nayexma ga wüxi ga nuta ga tacü. Rü núma ga Bechemécúâxgü ga duúxúgü rü nagu napogüe ga guma naweú rü úxúxú nayaxíêégü. Rü ga yema wocagü rü Tupanacax nanadai rü ínanagu. 15 Rü númagü ga Lebítanúxú rü marü ínanaxüegü ga yema baú ga Tupanaarü mugúchixú rü yema caichaú ga nawa nayexmagúxú ga yema úcachicúnaxágü, rü yema úrupúxügü ga nataixnapúxügüraxíxú. Rü guma nuta ga tacüétügu nananugü. Rü yema ngunexúgu ga yema Bechemécúâxgü rü Cori ya Tupanacax ínanagu ga naxúnagü rü muxúma ga togü ga norü ámaregü. 16 Rü núma ga yema 5 ga âêxgacügü ga Piritétanúxúgü rü yáxúwa nüxú narúdaunü. Rü yexguma marü nüxú nadaugügu ga marü Iraéanecúâxgümexéwa nax nanguxú ga yema baú, rü yemawena rü Ecróúcx nawoegu ga yematama ngunexúgu.

<sup>17</sup>Rü yema 5 ga taixnachicünaxägü ga úirunaxçax ga Piritéutanüxügü Cori ya Tupanana naxuaxügüxü norü ngüxmüxēeruxü, rü yema rü guma ñanegü ga Asdóx, rü Gácha, rü Acarúü, rü Gáx, rü Ecróüarü ãmaregü nixi.

.....

<sup>19</sup>Naturü nüma ga Cori ya Tupana rü nanadai ga ñuxre ga duüxügü ga Bechemécüãxgü yerü yema Tupanaarü mugüchixü ga baúgu nadaucu. Rü 70 ga yatügü nixi ga yuexü. Rü nüma ga yema ñanecüãxgü rü poraãcücüchima naxauxe naxçax ga yema duüxügü ga Cori ya Tupana natanüwa dajixü. <sup>20</sup>Rü yemaçax ga nüma ga Bechemécüãxgü rü ñanagürügü: —¿Texé tame nax Cori ya Tupana ya üüneçüpexegu tachixü? ¿Rü ngextá tá ínamuxü i ngēma baú i ñuxmax? —ñanagürügü. <sup>21</sup>Rü yemaçax ñane ga Quiriáx-yearíücüãxgüçax yéma namugagü rü ñanagürügü: —Ngēma Piritéutanüxügü rü marü nanatæguxēégü i ngēma baú i Cori ya Tupanaarü mugüchixü. Rü ngēmaçax name i nua pexi rü peyayaxu —ñanagürügü.

**7** <sup>1</sup>Rü nüma ga Quiriáx-yearíücüãxgü rü Becheméwa nayayauxgü ga yema baú ga Cori ya Tupanaarü mugüchixü. Rü norü ñanewa nanangegü rü nayaxüchigü napatagu ga Abinadáx ga wüxi ga maçpúnegu áchiücü. Rü nane ga Ereacháxü naxunetagu nax nüxna nadauxüçax.

**Chamué rü Iraéanecüãxgümaxã inacuax**

<sup>2</sup>Rü 20 ga taunecü ningu ga yema Tupanaarü mugüchixü ga ñane ga Quiriáx-yearíüwa nax nayexmaxü. Rü

guxüma ga Iraéanecüãxgü rü poraãcü nangechaügü yerü nüma nagu naxínüegu rü nüma ga Cori ya Tupana rü marü ínanawogü. <sup>3</sup>Rü yemaçax nüma ga Chamué rü guxüma ga yema Iraéanecüãxgüxü ñanagürü: —Ngēxguma pema rü aixcüma Cori ya Tupanaçax pewoeguxgux, rü name nixi i ípenawogü i guxüma i ngēma tupananetagu ixügüxü, rü ngēma tupananeta i Astartéhicünaxã. Rü penaxwaxegü i Cori ya Tupanaguxicatama perüxínüe rü nüxü picuaxüxügü. Rü ngēxguma ngēmaäcü penaxüxgux, rü nüma ya Tupana rü tá pexü ínanguxüxēxē naxmexwa i ngēma Piritéutanüxügü —ñanagürü. <sup>4</sup>Rü nüma ga Iraéanecüãxgü rü ínanawogü ga naguxüraxüäcü üxü ga Baáchicünaxägü rü Astartéhicünaxägü. Rü Cori ya Tupanaxüxicatama nicuaxüxügü. <sup>5</sup>Rü yemawena ga Chamué rü Iraéanecüãxgüxü ñanagürü: —Íñane ya Míspagu pengutaquexegü i guxãma i pemax i Iraéanecüãxgü! Rü ngēma tá nixi i peétüwa nüxna chachogüxü ya Tupana —ñanagürü. <sup>6</sup>Rü nüma ga Iraéanecüãxgü rü Míspagu nangutaquexegü. Rü yéma puchuwa dexáta nayauxügü, rü Cori ya Tupanapexegu nanabagü norü ãmareruxü. Rü yema ga ngunexügu rü naxauree rü tama nachibüe. Rü guxüma ga duüxügü rü nüxü nixugüe nax chixexü naxügüxü ga Tupanapexewa. Rü yéma Míspawa nixi ga Chamué ga inaxügüãxü ga Iraéanecüãxgümaxã inacuáxü.

.....

<sup>15</sup>Rü yexguma namaxûgu ga Chamué rü Iraéanecüâxgümaxã inacuaç. <sup>16</sup>Rü gucüma ga taunecügu rü ñanegü ga Betélwa rü Yirigáwa rü Míspawa naxûxû nax yema Iraéanecüâxgüxû yanangûxêêxûcax nax ñuxácü inawexâchixêêâxûcax ga norü guxchaxûgü. <sup>17</sup>Rü ñuxmachi norü ñane ga Ramácax natáeguuxû, yerü yexma nixí ga naxâchiûxû. Rü yéma nixí ga Iraéanecüâxgümaxã inacuaç. Rü yexma nanaxü ga Cori ya Tupanaarü cuaxûxûchica ga nawa naxûnagü yaguxû.

**Iraéanecüâxgü rü nanaxwaxegü  
nax naxâxgacüâxgüxû**

**8** <sup>1</sup>Rü yexguma marü nayaxgu ga Chamué, rü nanegüxû naxuneta nax Iraéanecüâxgümaxã inacuaçgüxûcax. <sup>2</sup>Rü guma nüxíraxûcü ga nane rü Yoégu naxáega. Rü guma norü taxre ga nane rü Abíagu naxáega. Rü Bechébawa nixí ga âxgacü yixígüxû. <sup>3</sup>Natürü tama nanatürüxû nixígü, yerü norü yemaxûgüguama narüxînüe. Rü yexguma taxacürü guxchaxû namexêégügu rü nanayauxtanügü, rü tama aixcüma mea guxûma ga duûxûgüxû narüngüxêê. <sup>4</sup>Rü düxwa ga Iraéanecüâxgüarü âxgacügü rü nügümaxã nangutaquexegü, rü ñane ga Ramáwa naxí nax Chamuéxû íyadaugüxûcax. <sup>5</sup>Rü Chamuéxû ñanagürügu: —Cuma rü marü cuya, rü cunegü rü tama curüxû mea namaxê. Rü ngêmacax inüxû naxuneta i wüxi i torü âxgacü i réi nax tomaxã inacuaçcax ngêxgumarüxû i ngêma togü i nachixûanegü nax nüxû nangexmaxü i

norü âxgacü i réi! —ñanagürügü. <sup>6</sup>Rü yexguma ga nüma ga Chamué rü tama namaxã nataâxê yerü yema duûxûgü rü nanaxwaxegü nax nüxû nangexmaxü ya wüxi ya âxgacü ya réi nax namaxã inacuaçcax. Rü yemacax Tupanamaxã nüxû nixu norü yumüxêwa. <sup>7</sup>Natürü nüma ga Cori ya Tupana rü Chamuéxû nangâxûga rü ñanagürü: —iËcü naxü i ngêma cuxna naxcax nacagüxû! Erü tama cuxü nixí i naxoçxgüxû, rü choxû waxi nixí, erü tama nanaxwaxegü i norü âxgacü nax chixíxû. <sup>8</sup>Rü yexguma Equítuanewa íchangüxûêêxgücürüwa nixí ga choxna yaxígachixü nax togü i tupanawe nax naxíxûcax. Rü ngêmatama nixí i ñuxma cumaxã naxügüxû. <sup>9</sup>iËcü naxü i ngêma naxcax ínacagüxû! iNatürü mea namaxã nüxû íxu i ngêma duûxûgü i ñuxácü tá namaxã naporae ega nangexmagu i wüxi i norü âxgacü i poraacü namuxû! —ñanagürü. <sup>10</sup>Rü nüma ga Chamué rü yema duûxûgümaxã nüxü nixu ga yema Tupana namaxã nüxû ixuxû. <sup>11</sup>Rü ñanagürü nüxû: —Ngêxguma penaxwaxegu nax pexü nangexmaxü i perü âxgacü i réi rü ñaacü tá nixí i pemaxã inacuaçcax i ngêma âxgacü: Rü tümacax tá naca ya penegü nax churaragü tixígüxûcax, rü tümáxêgü rü churaragü i naweü ya dairümaxã icuaçgüxû nax tixígüxûcax, rü tümáxêgü rü cowarugü i dairümaxã icuaçgüxû nax tixígüxûcax, rü tümáxêgü rü churaragü i noxrütama dauruügü nax tixígüxûcax. <sup>12</sup>Rü ngêxgumarüxû tá ta tüxü naxuneta ya toguxegü nax 1000 i churaragüarü âxgacü nax tixígüxûcax, rü toguxegü

nax 50 i churaragüarü ãëxgacü nax tixigüxüçax. Rü pemagü, rü ngëma ãëxgacü rü tümáxëgü rü tá norü naanearü aimüanewa tüxü napuracüexëxë, rü toguxe rü tá norü nanetüarü buxgüwa tüxü napuracüexëxë, rü toguxe rü tá naxnegüarü üwa tüxü napuracüexëxë, rü toguxe rü tá naweü ya dairuüarü üwa tüxü napuracüexëxë. <sup>13</sup>Rü tá tüxü nade ya pexacügü nax nüxü taxüwemügüxüçax, rü norü paüarü üwa nax tapuracüexüçax, rü norü pumára nax taxügüxüçax. <sup>14</sup>Rü nügüxü tá nanayaxu i ngëma naanegü irümemaegüxü, rü ngëma rümemaegüxü i perü úbanecü rü orübnecü, rü ñuxüchi ngëma ãëxgacügü i natüüwa ügüxüna tá nanana. <sup>15</sup>Rü ngëma 10 wetaxü i perü tríguwa rü perü úbawa, rü ngëma ãëxgacü tá pexna nanayaxu i wüxiwetaxü, rü ñuxüchi ngëma ãëxgacügü i natüüwa ügüxüna tá nanana. <sup>16</sup>Rü ngëxgumarüxü tá ta pexna tüxü napuxü ya yíxema duëxëgü ya pexü puracüexe rü yíxema pexütaxügü. Rü ngëma rümemaexü i perü woca i puracüruügü, rü búrugü, rü tá pexna nanade nax nügüxü napuracüexëëxüçax. <sup>17</sup>Rü ngëma 10 i perü carnérugüwa rü tá pexna nanayaxu i wüxi nax noxrüxü yixüxüçax. Rü pema tátama nixí i ñuxmachí nüxü pepuracüexü. <sup>18</sup>Rü ngëma i ngunexügu i namaxá pechixeãëgügu i ngëma ãëxgacü i ñuxmax naxçax ípexaxü rü nüma ya Cori ya Tupana rü marü taxütáma pexü nacuáxchaü —ñanagürü ga Chamué. <sup>19-20</sup>Natürü nüma ga yema

duüxügü, rü tama inarüxünüechaü ga yema Chamué namaxá nüxü ixuxü. Rü ñanagürügüama: —Nüétama, rü tanaxwaxëgü i toxü nangexma i wüxi i ãëxgacü i réi nax ngëma togü i nachixüanerüxü tixigüxüçax. Rü nüma tá nixí i tóru ãëxgacü yixüxü, rü tá tomaxá inacuáxü ega ngëxguma togümaxá togü tadaixgux —ñanagürügüama. <sup>21</sup>Rü yexguma yema duüxügügaxü naxínüguwena ga Chamué, rü Cori ya Tupanamaxá nüxü nixu ga yema duüxügüga. <sup>22</sup>Rü nüma ga Cori ya Tupana rü Chamuéxü nangäxüga rü ñanagürü: —iNaxü i ngëma naxçax ínacagüxü rü nüxü naxuneta i wüxi i norü ãëxgacü i réi! —ñanagürü. Rü yexguma nüma ga Chamué rü yema Iraéanecüãxgüxü namu nax norü ñanegüçax nawoeguxü.

#### Chaü rü Chamuéxütawa nangu

**9** <sup>1</sup>Rü Bëyamítanüxüwa nayexma ga wüxi ga yatü ga Chíxgu áegacü. Rü nüma rü Abié nane nixí rü Cherótaxa nixí. Rü guxema toguxe ga norü oxí rü Becoráx ga Afá nane tixí. Rü nüma ga Chíx rü wüxi ga yatü ga guxáma nüxü ngechaücü nixí. <sup>2</sup>Rü nüma rü nüxü nayexma ga wüxi ga nane ga ngextüxücü ga guxüwama mexechicü ga Chaúgu áegacü. Rü guxüma ga yatüxü ga Iraéanecüãxgüarü yexera namexechi, rü norü máchanewa rü taxúema nüxü tangupetü ga naatüwa. <sup>3</sup>Rü wüxi ga ngunexügu rü Chíxarü búrugü rü inarütaxe. Rü yemacax nane ga Chaúxü ñanagürü: —iCügü namexëxë rü naxçax yadau i ngëma búrugü! iRü wüxi i tóru duüxümaxá íxámücü!



—ñanagürü. <sup>4</sup>Rü nüma ga Chaú rü inaxũachi. Rü Efraíarü naanearü máxpüxanexũwa nixüpetü, rü ñüxüchi Charicháarü naanewa rü ta naxüpetü, natürü tama nüxü inayangau ga norü búrugü. Rü yexgumarüxü ta Charíúarü naanewa rü Bëyamíarü naanewa naxüpetü, natürü yéma rü ta taxuxüma inayangau. <sup>5</sup>Rü yexguma Súxarü naanewa nanguxgu, rü nüma ga Chaú rü guxema norü duüxë ga íyaxümücüxexü ñanagürü: —iNgíxã tawoegu! Rü ñüxcü ya chorü papá rü ngëma búrugüçax nax taxoégaãxüarü yexera taxçax taxoégaãxë —ñanagürü. <sup>6</sup>Rü nüma ga yema norü duüxü rü nanangãxüga rü ñanagürü: —Daa íanewa nangexma i wüxi i Tupanaarü orearü uruxü i guxãma nüxü ngechaüügüxü, erü guxüma i nüxü yaxuxü rü ngëmaãcü ningu. iRü ngíxã naxütawa taxí! Rü nüma tá tamaxã nüxü nixu nax ngextá nangexmagüxü i ngëma búrugü —ñanagürü.

.....

<sup>14</sup>Rü yexguma ga Chaú rü yema duüxümaxã guma íanecax nixíama. Rü yexguma guma íanewa nangugügu, rü nüma ga Chamué rü yéma ne naxü ga ngutaquexepataüwa nax naxüxüçax.

.....

<sup>17</sup>Rü yexguma Chaúxü nadaüxgu ga Chamué, rü nüma ga Cori ya Tupana rü ñanagürü nüxü: —Ngëma nixí i ngëma yatü i cumaxã nüxü chixuxü, rü nüma tá nixí i chorü duüxügümaxã inacuáxü —ñanagürü. <sup>18</sup>Rü yexguma guma íanearü ücuchicawa nayexmagügu, rü nüma ga Chaú rü Chamuéçax nixü rü ñanagürü: —iTomaxã nüxü ixu rü

ngexta nixí i napexü ya yimá Tupanaarü orearü uruxü! —ñanagürü. <sup>19</sup>Rü nüma ga Chamué rü nanangãxüga rü ñanagürü: —Choma nixí i orearü uruxü chixixü. iRü ngíxã chowe rüxü i ngutaquexepataüwa, rü chauxütawa yachibü! Rü moxü paxmama tá cumaxã nüxü chixu i guxüma i ngëma choxna naxçax cucaxaxü, rü ñüxmachi tá cuxü íchimu. <sup>20</sup>iRü taxü i naxçax cuxoégaãxëxü i ngëma búrugü i tomaepüx i ngunexü marü iyarütaxexü! Erü marü nüxü inayangaugü. Rü naétü rü guxüma i Iraéanearü ngëmaxügü rü cuxmexwa nangexma i ñüxmax —ñanagürü. <sup>21</sup>Rü nüma ga Chaú rü nanangãxüga rü ñanagürü: —Natürü i choma rü Bëyamítanüxü chixí, rü ngëma totücumü rü guxüma i togü i Iraéanecüãxgütücumüxü narünoxremae. Rü ñüxmachi ngëma nügütanüxüchigü i Bëyamítücumüwa ügüxü, rü chautanüxü nixí i guxüarü yexera taxüema nagu rüxínüexü. Rü ngëmacax çtüxcüü chomaxã nüxü quixu nax guxüma i Iraéanearü ngëmaxügü rü choxmexwa nangexmaxü? —ñanagürü. <sup>22</sup>Rü yemawena ga Chamué rü chibüchicawa nanagagü ga Chaú rü norü duüxü. Rü yema rümemaexü ga nachicawa nanatogüxëxë natanüwa ga yema 30 ga duüxügü ga nüxna naxuxü. <sup>23</sup>Rü nüma ga Chamué rü yema üwemüxüxü namu nax Chaúna naxããxüçax ga yema rümemaexü ga namachi ga woetama naxçax ínaxüxüchixü. <sup>24</sup>Rü yexgumatama ga yema üwemüruxü rü wüxi ga naperema ga mexüne nayaxu rü Chaúpexegu

nayaxú. Rù nùma ga Chamué rù Chaúxũ ñanagürü: —Ngẽma nixĩ i woetama cuxú íchaxüxüchixũ. iRù nayaxu rù nangõx! Erü woetama cuxú íchanaxüxüchi naxũpa ga ñaa duũxũgüna nax chaxuxũ —ñanagürü. Rù nùma ga Chaú rù Chamuémaxã nachibü ga yema ngunexũgu. <sup>25</sup>Rù yexguma marü Tupanapatawa ínachoxũgu ga ñanewa nax naxĩxũ, rù ñpataarü daxüwa Chaúçax nanamexẽẽgü ga wüxi ga ngürücare. <sup>26</sup>Rù nùma ga Chaú rù yexma nape. Rù moxũãcü nùma ga Chamué rù Chaúxũ naca ga ñpataarü dauxnawa, rù ñanagürü nüxũ: —ífrüda rù marü name nax íquixüxũ! —ñanagürü. Rù nùma ga Chaú rù ínarüda. Rù yemawena rù ínachoxũ ga Chaú rù Chamué, rù namawa naxĩ. <sup>27</sup>Rù yexguma marü guma ñanewa ínachoxũgu, rù nùma ga Chamué rù Chaúxũ ñanagürü: —íËcü cugüpexe yamu i ngẽma curü duũxũ, rù cuma rù paxaãchi nuxã rüxãxũ! Erü cumaxã nüxũ chixuxchaü i ngẽma ore i Tupana chomaxã nüxũ ixuxũ —ñanagürü.

**Chamué rù chíxũmaxã Chaúxũ nabaeru nax Iraéanecüãxgüarü ãëxgacü yixixüçax**

**10** <sup>1</sup>Rù yexguma ga nùma ga Chamué rù wüxiwexũ ga chíxũ nayaxu, rù Chaúxũ namaxã nabaeru, rù ñanagürü nüxũ: —Cori ya Tupana cuxũ nayaxu nax norü duũxũgü i Iraéanecüãxgüarü ãëxgacü i réi nax quixixüçax i ñuxmax. Rù cuma tá namaxã icucuax rù norü uanügü i nüxũ íchomaeguãchixüwa tá ícunapoxũ. Rù ngẽma cuaxruxũ i nawa nüxũ cucuáxũ nax aixcüma Cori ya Tupana cuxũ

unetaxũ nax norü duũxũgü i Iraéanecüãxgüarü ãëxgacü nax quixixũ, rù ñããcü tá nixĩ: <sup>2</sup>Rù ñuxma nax choxna íquixüxũ rù Bëyamfarü naanewa i Chéchawa tá nüxũ icuyangau i taxre i yatügü i Raquélchiquexearü ngaicamagu chigüxũ. Rù nùmagü tá cumaxã nüxũ nixugü: “Rù marü nüxũ nax iyangauxũ i ngẽma búrugü i naxçax cudauxũ. Rù tuma ya cunatü rù marü tama naxçax taxoégaãxë i ngẽma búrugü, natürü pexçax nixĩ i taxoégaãxũ i ñuxmax, rù nagu tarüxinüxũ nax ñuxãcü tá pexũ itayangauxũ”, ñanagürügü tá cumaxã. <sup>3</sup>Rù ngẽma nax cuxüpetüxũ rù ngëxguma Tabúarü castaña íngexmaxüwa cunguxgu, rù tá ngëxma pegü namaxã peyangaugü i tomaepüx ya yatü i Betélwa íxũ nax Tupanaxũ yanacuaxüüügüxüçax. Rù ngẽma wüxi rù tomaepüx i chíbu niga, rù ngẽma to rù tomaepüx i paü ninge, rù ngẽma to rù wüxipüxüwexũ ya bínu ninge. <sup>4</sup>Rù nùmagü rù tá cuxũ narümoxëgü, rù tá cumaxã nangau i taxre i paü. Rù name nixĩ i nüxũ cunayaxu. <sup>5</sup>Rù ngëmapaxã rù tá Gabáa ya Tupanaarü Mäxpünegu ãéganewa cingu i Piritéutanüxüãgüarü dauxütaechica íngexmaxüwa. Rù ngëxguma yima ñanewa pichocuxgux, rù ngëxma tá nüxũ cungau i ñuxre i Tupanaarü orearü urüügü i Tupanaãxë i Üünexũ namaxã icuáxũ i Tupanaarü cuaxüüwa ne íxũ. Rù ngëmapexegu tá naxĩ i duũxũgü i paxetaetanüxũ i norü árpamaxã, rù árpaxacümaxã, rù paüderumaxã rù wowerumaxã. <sup>6</sup>Rù ngëxguma tátama cuxna nangu i Tupanaãxë i Üünexũ, rù tá cumaxã

inacuax narüxü i ngêma togü i Tupanaarü orearü uruüügü. Rü tá Tupanaarü oremaxã quidexa rü to i ñnü tá cuxú nangexma. <sup>7</sup>Rü ngëxguma ngêma cuxü ngupetüxgu irü naxü i ngêma cuxçax mexü! Rü Tupana tá cuxü narüngüxëë nax ngêma cuxüxü. <sup>8</sup>iRü ñuxüchi Yirigáwa naxü! iRü 7 i ngunexü ngêma choxü rüngüxëxë! Erü ngêma tá chaxü nax ngêma Cori ya Tupanaçax naxüna íchayagüxüçax, rü ãmargü nüxna chayanaxüçax nax nangüxmüxüçax. Rü ngêma tá nixí i cumaxã nüxü chixuxü nax taxacü tá cuxüxü —ñanagürü. <sup>9</sup>Rü nüma ga Chaú rü Chamuéxü narüimoxë nax íyaxüxüçax. Rü yemawena rü Tupana rü ngexwacaxüxü ga ñnü nüxna naxã. Rü guxüma ga yema ore ga Chamué namaxã nüxü ixuxü, rü ningu ga yema ngunexügu. <sup>10</sup>Rü yexguma Chaú rü yema norü duüxümaxã Gabáwa nangugügu, rü nüxü nadaugü ga yema orearü uruüügü ga yexma nügu namaxã yangaxü. Rü Tupanaãxë rü Chaúna nangu, rü nüma rü ta inanaxügu ga Tupanaarü oremaxã nax yadexaxü. ....

<sup>13</sup>Rü yexguma Chaúna iyachüxüxächigu ga Tupanaãxë ga yadexaxëxü, rü nüma ga Chaú rü nawa nangu ga guma maxpüne ga Tupanaarü cuaxüxüchica. <sup>14</sup>Rü nanepü rü nüxna naca rü ñanagürü: —¿Ngextá nixí ga pexíxü? —ñanagürü. Rü nüma ga Chaú rü nanangãxü rü ñanagürü: —Naxçax tayadaugü ga yema búrugü. Natürü yexguma tama nüxü itayangaugügu rü Chamuéxütawa ítayadaugü —ñanagürü. <sup>15</sup>Rü nüma ga nanepü rü nüxna

nacaama rü ñanagürü: —¿Rü ñuxü ñaxü pexü ga Chamué? iRü mea chomaxã nüxü ixu! —ñanagürü. <sup>16</sup>Rü nüma ga Chaú rü nanepüxü nangãxüga rü ñanagürü: —Meama tomaxã nüxü nixu ga marü nüxü nax iyangaüxgüxü ga búrugü —ñanagürü. Natürü tama nüxü nixu ga Chamué nax chíxümaxã nabáeruxü nax Iraéanecüãxgüarü ãëxgacü i réi yixüxüçax. <sup>17</sup>Rü yemawena ga Chamué rü Iraéanecüãxgüçax nangema nax Mispawa naxíxüçax rü yéma Cori ya Tupanaxü yanacuaxüüügüxüçax. <sup>18</sup>Rü yexguma yéma nangugügu rü nüma ga Chamué rü yema Iraéanecüãxgüxü ñanagürü: —Nüma ya Cori ya tórü Tupana rü ñanagürü: “Choma nixí ga Equítuanewa pexü íchagaxüxü, Pa Iraéanecüãxgüx. Rü choma nixí ga naxmexwa pexü íchangüxüxëxü ga yema Equítuanecüãxgü rü guxüma ga yema togü ga ãëxgacügu ga pexü chixeãxëgüxü. <sup>19</sup>Natürü i ñuxma i pemax rü nüxü pexo ya yimá perü Tupana ga guxüma ga perü guxchaxüguwa rü perü íxächíãëgüwa pexü íngüxüxëëcü. Rü ngëmacax wüxi i perü ãëxgacü i réicax ípeca nax pemaxã inacuáxüçax. Rü ngëmacax i ñuxma rü choma ya Cori ya Tupanapexewa ípengügu ya wüxitücumüchigü rü tügütanüxüchigü” —ñanagürü. <sup>20</sup>Rü yemawena ga nüma ga Chamué rü guxüma ga Iraéanecüãxgütücumüçax naca nax naxütagu nangutaquexgüxüçax nax naxçax nadaugüxüçax ga ngexürüüxütücumüwa tá ne naxüxü ga norü ãëxgacü. Rü Bëyamítücumügu nangu. <sup>21</sup>Rü yexguma

ga Chamué rü Bëyamítücumüçax naca nax naxütawa naxixüçax, rü yema Bëyamítücumüwa rü Matítanüxügu nangu. Rü yematanüwa rü Chaú ga guma Chix nane ixícügu nangu nax Iraéanecüâxgüarü âëxgacü yixixü. Natürü yexguma naxçax nadaugügu ga Chaú, rü tama nüxü inayangaugü. <sup>22</sup>Rü yemaçax wenaxarü Cori ya Tupanana nacagüe ga nüxü nax nacuaxgüxüçax ngoxi nayexma ga Chaú. Rü nüma ga Cori ya Tupana rü nüxü nixu ga yéma nax nayexmaxü, rü Iraéanecüâxgüarü yemaxütanügu nax yacüxü. <sup>23</sup>Rü yexgumatama naxçax nayadaugü rü nayagagü ga yema íyacüxüwa. Rü nüma ga Chaú ga yexguma duüxügüpexewa nanguxgu, rü nüxü nadaugü ga Iraéanecüâxgütanüwa rü taxúema naatüxü ngupetüxü ga tümaarü máchanewa. <sup>24</sup>Rü nüma ga Chamué rü guxána naca rü ñanagürü: —¿Marü nüxü pedauxü ya yimá Cori ya Tupana nüxü unetacü nax perü âëxgacü i réi yixixüçax? Rü nataxuma i wüxi i Iraéanecüâx i namaxâ wüxiguxü —ñanagürü. Rü nüma ga duüxügü rü: —iNamaxüx ya tórü âëxgacü ya réi! —ñaxümaxâ nanangâxügagüama. <sup>25</sup>Rü yexguma ga nüma ga Chamué rü duüxügümaxâ nüxü nixu ga yema mugü ga nagu tá yaxüxü ga gumá âëxgacü norü duüxügümaxâ. Rü ñuxüchi wüxi ga poperagu nanaxümatü ga yema mugü rü Tupanapatagu nayaxü. Rü yemawena ga Chamué rü ínayamugü ga guxüma ga yema Iraéanecüâxgü nax napatawa naxixüçax. <sup>26</sup>Rü yexguma ga nüma ga Chaú rü nachíüçax natáegu ga Gabáawa. Rü nawe narüxi ga ñuxre ga

yatü ga daiwa imexü ga Cori ya Tupana norü maxügu ingogügüxü nax íyacüxügüçax. <sup>27</sup>Natürü nayexmagü ta ga duüxü ga Chaúmaxâ chixexügu rüxínüexü rü ñagüxü: —¿Ñuxácü tá i ñaa yatü i tamaxâ inacuáxü? —ñagüxü. Rü yemaacü nüxü naxooxgü rü tama namaxâ nataâëxgü. Natürü nüma ga Chaú rü tama yemagu narüxínü.

### Chaú rü Amóütanüxügüxü narüporamae

**11** <sup>1</sup>Rü nüma ga Amóütanüxügüarü âëxgacü ga Naá rü norü churaragüxü nangutaquexexë nax yadaiacuâxüçax ga Iraéanecüâxgüarü ñane ga Yabé ga Garaáxanewa yexmane. Natürü ga yema duüxügü ga Yabécüâxgü rü ñanagürügü: —iTomaxâ naxü i wüxi i üga, rü ngëxguma tá nixi i cuxmexwa togü tangexmagüxëëxü! —ñanagürügü. <sup>2</sup>Rü nüma ga Amóütanüxügüarü âëxgacü ga Naá rü nanangâxü rü ñanagürü: —Marü name i pemaxâ ichaxüga ega chi pexü namexgu nax perü tügünexetü chayaxuxü i wüxichigü i pema nax ngëmaacü wüxi i cugüruxü pixígüxüçax i guxâma i pema i Iraéanecüâxgü —ñanagürü. <sup>3</sup>Rü nüma ga Yabéarü âëxgacügü rü nanangâxügü rü ñanagürügü: —iToxna naxâ i 7 i ngunexü nax naxçax tadauxüçax i ngüxëë i totanüxü i Iraéanegütanüwa! Rü ngëxguma chi nataxuguma i toeneegü i toxü rüngüxëëxü, rü marü name i tomaxâ cunaxü i ngëma cuma nagu curüxínüxü —ñanagürügü. <sup>4</sup>Rü ñuxre ga yema Yabécüâx rü guma ñane ga Gabáa ga Chaú nawa yexmanewa

nanangegü ga yema ore. Rü duüxügümaxã nüxü nixugüe ga yema Yabéwa ngupetüxü. Rü yexguma nüxü naxĩnüegu rü guxüma ga duüxügü rü poraäcü naxauxe. <sup>5</sup>Rü nüma ga Chaú rü naanewa ne naxü namaxã ga norü wocagü ga puracüruxü. Rü norü duüxügüna naca rü ñanagürü: —¿Taxacü nüxü nangupetü i duüxügü? ¿Taxacücax naxauxe? —ñanagürü. Rü nüma ga norü duüxügü rü Chaúmaxã nüxü nixugüe ga yema ore ga yatügü ga Yabécüãx yéma ngegüxü. <sup>6</sup>Rü yexguma yema orexü naxĩnügu ga Chaú, rü Tupanaãxë nüxna nangu rü poraäcü nanu ga Chaú. <sup>7</sup>Rü yexguma ga Chaú rü taxre ga woca niyaxu rü ägümücügu nagu nanachexcu. Rü ñuxüchi ñuxre ga orearü ngeruügümaxã guxü ga Iraéanecüãxgütanüwa nanamu ga yema namachigü. Rü yema orearü ngeruügü rü ñaa orexü nixuetanü: —Ñaatátama tümaarü wocamaxã taxü ya yíxema tama Chaúwe rü Chamuéwe rüxüchaüxe —ñanagürü. Rü nüma ga duüxügü rü poraäcü namüie rü ñoma wüxitama ga yatürüxü inaxĩachi, rü Chaúwe rü Chamuéwe narüxĩ. <sup>8</sup>Rü yexguma Bechéwa Chaú yaxugüxgu ga norü duüxügü ga yexma ngutaquexegüxü, rü nayexma ga 300,000 ga yatügü ga Iraéanecüãxgü rü naétü 30,000 ga Yudáwa ne ixü. <sup>9</sup>Rü yemawena rü yema duüxügü ga Yabécüãxgü ga orearü ngeruügüxü ñanagürü: —iNamaxã nüxü pixu i duüxügü i Yabécüãxgü rü moxü tocuchigu tá ngéma tangugü nax ítanapoxüxücax! —ñanagürü. Rü yema duüxügü rü natanüxü ga

Yabécüãxgümaxã nüxü narüxugüe ga yema ore. Rü nümagü rü poraäcü nataãxëgüxüchi. <sup>10</sup>Rü nüma ga yema Yabéarü äëxgacügü rü Amóütanüxügüarü äëxgacü ga Naámaxã nüxü nayarüxugü, rü ñanagürügü: —Moxü rü tá cuxna togü tana nax cuma cunaxwaxexü tomaxã cuxüxücax —ñanagürügü. <sup>11</sup>Rü moxüãcü rü nüma ga Chaú rü norü churaragüxü mea ininu, rü tomaepüxtücumügu nayayauxye. Rü naxüpa ga nax yangóonexü rü norü uanügü ípegüxügu nachocu. Rü tüxü nadai ga guxãma ga Amóütanüxügü ñuxmata tocuchiwa nangu. Rü guxema maxëxë, rü tügümaxã tanawoone, rü yemacax taxúema ämücüxe tiña. <sup>12</sup>Rü yemawena ga nümaxü ga duüxügü rü Chamuéxü ñanagürügü: —¿Texégü tixí ya yíxema tama yaxögüxe nax Chaú yixixü ya mecü nax tórü äëxgacü yixixü? iRü toxna penamugü i ngéma yatügü nax tanadäixücax! —ñanagürügü. <sup>13</sup>Natürü nüma ga Chaú rü naétüwa nachogü rü ñanagürü: —Noma i ngunexügu rü taxúetama tayu, erü Cori ya Tupana rü Iraéanecüãxgüxü narüngüxëë nax norü uanüxü nax naporamaegüxücax —ñanagürü. <sup>14</sup>Rü nüma ga Chamué rü guxüma ga Iraéanecüãxgüxü ñanagürü: —iNgixã rü Yirigáwa taxí nax ngéma yanangucuchixëëxücax ya tórü äëxgacü! —ñanagürü. <sup>15</sup>Rü yemacax guxüma ga duüxügü ga Iraéanecüãxgü rü Yirigáwa naxí. Rü yéma Cori ya Tupanapexewa Chaúxü ningucuchixëëgü nax norü äëxgacü yixixücax. Rü yemawena rü Tupanacax nayagugü ga ämaregü ga Tupanaarü ngüxmüxëëruügü ixigüxü.

Rü nüma ga Chaú rü guxúma ga nümagü ga Iraéanecüâxgü rü poraäcü nataâxëgü.

**Chamué rü Chaúmexëwa nanaxüexëxë nax Iraéanecüâxgüarü äëxgacü yixixüçax**

**12** <sup>1</sup>Rü yemawena ga Chamué rü guxúma ga Iraéanecüâxgüpeçewa ñanagürü: —Pema nüxü pecuax rü guxúma ga yema naxçax ípeçaxaxü rü pexçax chanaxü nax yangucuchixüçax ya yimá perü äëxgacü ya réi. <sup>2</sup>Daa nixí ya äëxgacü ya pemaxá tá icuáci. Choma rü marü chaya rü chataueru, rü chaunegü rü petaniwa nangexmagü. Choma nixí ga pemaxá ichacuáxü ga yexguma changextüxügücürüwa rü ñomamare. <sup>3</sup>Rü ñuxma rü daxe chixí. Ega ngëxguma chi texéarü wocaxax rüexna búruçax changixgux, rüexna texéchi chaxaixgu, rü chixri tümamaxá ichacuaxgu rüexna chanayauxtanügu ga taxacürü guxchaxü chamexëëxgu, rü marü name i Cori ya Tupanapexewa rü napexewa ya yimá äëxgacü ya Tupana nüxü unetacü, rü choxü ípexuaxü. Rü choma rü tá chanaxütanü i ngëma pexü changetanüxü —ñanagürü. <sup>4</sup>Rü nüma ga Iraéanecüâxgü rü nanangäxügagü, rü ñanagürügü: —Taguma toxchi cuxai rüexna chixri tomaxá icucuax, rü taguma cunayauxtanü ga torü guxchaxü cumexëëgu —ñanagürügü. <sup>5</sup>Rü nüma ga Chamué rü ñanagürü: —Ñuxma rü nüma ya Cori ya Tupana, rü nüma ya yimá äëxgacü ya nüma nüxü naxunetacü nixí ya nüxü ñnüecü nax pema rü taxuxüma i chixexü chowa ipeyangauxü —ñanagürü. Rü nüma ga

duüxügü rü ñanagürügü: —Aixcüma ngëmaäcü nixí —ñanagürügü. <sup>6</sup>Rü nüma ga Chamué rü ñanagürü ta nüxü ga yema Iraéanecüâxgü: —Rü nüma ga Cori ya Tupana nixí ga Moichéxü rü Aróüxü naporaexëëxü nax Equítuanewa perü oxigüxü ñnanguxüxëëxüçax.

.....

<sup>12</sup>Natürü ga pema ga yexguma Amóütanüxügüarü äëxgacüxü pexñüegu nax pexçax íyachoöchichaxüxü nax pexü nadaxüçax, rü choxna naxçax peca ga wüxi ga äëxgacü nax pemaxá inacuáxüçax woo nax Cori ya Tupanachirex nax yixixü ya perü äëxgacü. <sup>13</sup>Rü daa nixí ya yimá äëxgacü ya pematama naxçax ípeçaxacü. Rü nüma ya Cori ya Tupana rü marü pexna nanamu ya yimá äëxgacü ya naxçax ípeçaxacü. <sup>14</sup>Rü ñuxma i pema rü name nixí i aixcüma Tupanaxü pengechaügü, rü nüxü picuaxüxügü rü, naga pexñüe i guxüma i ngëma norü mugü. Rü wüxigu namaxá ya yimá perü äëxgacü rü penaxwaxe i Tupana naxwaxexüácüma pemaxë. Rü ngëxguma ngëmaäcü penaxüxgu rü guxütáma mea nixü. <sup>15</sup>Natürü ngëxguma taxütáma naga pexñüegu rü ngëxguma nüxü pexoxoxgu i ngëma norü mugü, rü nüma ya Tupana rü tá pexü rü perü äëxgacüxü napoxcu. <sup>16</sup>Rü dücax, iperüdaunü naxçax i ngëma taxü i mexü i Cori ya Tupana pepexewa tá üxü i ñuxmax! <sup>17</sup>Pema rü meama nüxü pecuax rü ñuxma nax tríguarü buxgüwa nanguxü rü taguma napu. Rü ngëmacax i ñuxma rü tá Tupanana chaca nax äëmacü rü pucü nua namuxüçax nax ngëmawa nüxü pecuaxächitanüxüçax i

ngēma chixexũ i taxũ i pexũxũ ga yexguma wũxi ya perũ ãẽxgacũcax ípecaxgu —ñanagũrũ. <sup>18</sup>Rũ yexguma ga nũma ga Chamué rũ Tupanana naca. Rũ yexgumatama nũma ga Cori ya Tupana rũ ãẽmacũ inanaxũxẽxẽ rũ nanapuxẽxẽ. Rũ yexguma ga guxũma ga yema duũxũgũ rũ poraãcũ Cori ya Tupanaxũ rũ Chamuẽxũ namuũe. <sup>19</sup>Rũ yemaçax guxũma ga yema duũxũgũ rũ Chamuẽxũ ñanagũrũgũ: —iCori ya curũ Tupanana toxçax naca nax tama tayueũçax! Erũ ñuxma rũ tanayexeraxẽxẽ i guxũma i torũ chixexũgũ nagagu nax wũxi i torũ ãẽxgacũ i refçax nax itaçaxaxũ —ñanagũrũgũ. <sup>20</sup>Rũ nũma ga Chamué rũ nanangãxũga rũ ñanagũrũ: —iTaxuçaxma pemuũe! Rũ aixcũma nixĩ ga chixexũ pexũxũ. Natũrũ i ñuxma rũ ipexuãxẽ nax tama Cori ya Tupanana pexĩgachixũçax, rũ aixcũma nũxũ pengechaũgũxũçax rũ nũxũ pecuçxũũgũxũçax! <sup>21</sup>Rũ tama name i nawe perũxĩ i ngēma tupanagiũneta i tama pexũ rũngũxẽxẽxũ rũ tama pexũ maxẽxẽxũ, erũ doragũmare nixĩ i ngēma. <sup>22</sup>Rũ nũmatama ya Cori ya Tupana rũ marũ pexũ nade yerũ yemaacũ nanaxwaxe, rũ nũxũ nixu nax norũ duũxũgũ pixĩgũxũ. Rũ ngēmacax tagutãma pexũ ínawogũ erũ tama nanaxwaxe i texẽ nũxũ tixu nax tama yanguxẽẽãxũ i norũ ore. <sup>23</sup>Rũ ñuxmawena i choma rũ tama chanaxwaxe i nũxũ charũchau nax pexçax chayumũxẽxũ, erũ ngēma rũ chixexũ nixĩ. Rũ ngēmacax tá pexũ changũxẽẽama nax mea Cori ya Tupanacax pemaxẽxũ rũ mea nawe nax perũxĩxũçax. <sup>24</sup>Rũ ñuxma i pema rũ

penaxwaxe i Tupanaaxũ peyaxõgũ rũ aixcũma nũxũ picuçaxũxũgũ. iRũ nagu perũxĩnũe nax ñuxãcũ poraãcũ pexũ nax nangũxẽẽxũ! <sup>25</sup>Natũrũ ngẽxguma chi chixexũ pexũgũamagu, rũ nũma ya Cori ya Tupana rũ tá poraãcũ pexũ rũ perũ ãẽxgacũxũ napoxcu —ñanagũrũ ga Chamué.

.....

### Cori ya Tupana rũ Chaúxũ naxo

**15** <sup>1</sup>Rũ wũxi ga ngunexũgu rũ Chamué rũ Chaúxũ ñanagũrũ: —Nũma ga Cori ya Tupana nixĩ ga choxũ namuxũ nax chíxũmaxã cuxũ chabaeruxũçax nax yemaacũ Iraeanecũãxgũarũ ãẽxgacũ quixĩxũçax. iRũ ngēmacax irũxĩnũ i ngēma Cori ya Tupana cumaxã nũxũ ixuxũ! <sup>2</sup>Rũ ñanagũrũ ya Cori ya Tupana ya guxãétiwa ngẽxmacũ: “Chanapoxcu tá i ngēma Amaléxtanũxũgũ naxçax ga yema Iraétanũxũgũmaxã naxũgũxũ, yerũ yexguma Equítuanewa ínachoxũgu rũ tama norũ naanewa nanachopetũxẽẽchaũ. <sup>3</sup>Rũ ngēmacax ingēma naxũ rũ nadai i guxũma i ngēma Amaléxtanũxũgũ iyatũxũ, rũ ingexũ, rũ buxũgũ, rũ õxchanagũ, rũ wocagũ, rũ carnérugũ, rũ caméyugũ, rũ búrugũ! iRũ bai tá i wũxi ícuyaxũxẽẽxũ!” —ñanagũrũ ga Cori ya Tupana. <sup>4</sup>Rũ nũma ga Chaú rũ guxũma ga duũxũgũçax nangema rũ Terafũgu nanangutaqexexẽxẽ. Rũ 200,000 ga churaragũ nixĩ ga ixĩmarexũ. Rũ yemaétiwa nayexma ga 10,000 ga yatũgũ ga Yudátanũxũ ixĩgũxũ ga yexma ngutaqexegũxũ.

.....

7Rü yemawena rü nüma ga Chaú rü nanadai ga yema Amaléxtanüxügü. Rü Abíraanewa inanaxügü rü nanadai ñuxmata Chúwa nangu ga Equítuanearü üyeanewa. 8Rü nayayauxgü ga guma norü ãëxgacü ga Agáx rü nanadai ga guxüma ga norü churaragü. 9Natürü nüma ga Chaú rü yema norü churaragü rü tama nayamaxgü ga guma Amaléxtanüxügüarü ãëxgacü ga Agáx, rü tama nanadai ga yema rümemaegüxü ga carnérugü, rü wocagü, rü wocaxacügü. Rü tama ínanagu ga yema Amaléxtanüxügüarü yemaxügü ga ítatanüxü. Rü yema yemaxügü ga taxuwama imexüxicatama nixí ga yema ínaguxü. 10Rü yemawena ga Cori ya Tupana rü Chamuémaxã nidexa rü ñanagürü: 11—Choxü nangux ya Chaú nax ãëxgacüxü nüxü nax chaxunetaxü, erü choxna nixügachi rü tama nayanguxëxë i ngëma chanamuxü —ñanagürü. Rü nüma ga Chamué rü poraãcü naãxëwa nangux ga yema. Rü Cori ya Tupanamaxã nidexa ga guxüma ga yema chütaxügu. 12Rü moxüãcü pařmama ga tauta yangóonegu, rü nüma ga Chamué rü inaxüãchi nax Chaúcař yadauxü. Natürü ga duüxügü rü Chamuémaxã nüxü nixugüe ga Chaú rü Maxpúne ga Carméxwa nax naxüxü nax yéma íyanadaxëãxücař ga wüxi ga nutapúta ga cuãxruxü nax norü uanügüxü naporamaexü, rü yemawena rü ñuxüchi Yirigáwa nax naxüxü. 13Rü yexguma yemaxü nacuařgu ga Chamué rü Chaúcař nayadau rü düxwa yema ínayexmaxüwa nangu. Rü nüma ga Chaú rü nüxü narümoxë rü ñanagürü nüxü: —iCori ya Tupana cuxü

rüngüxëxë! Rü marü chayanguxëxë i ngëma Cori choxü muxü —ñanagürü. 14Rü nüma ga Chamué nanangãxüga rü ñanagürü: —¿Texéarü nixí i ngëma carnérugü i ngëma iwáichaü, rü ngëma wocagü i ngëma icagüxü i nüxü chaxínüxü? —ñanagürü. 15Rü nüma ga Chaú rü nanangãxüga rü ñanagürü: —Ngëma chorü churaragü rü ínayaxügüxëxë i ngëma rümemaexü i carnérugü, rü wocagü. Natürü Cori ya curü Tupanacař tá tanadai. Rü guxüma i ngëma togü i naxünagü i Amaléxtanüxügüarü rü marü tanadai —ñanagürü. 16Rü nüma ga Chamué rü Chaúxü ñanagürü: —iDücař, irüxínü i ngëma ngewař chütacü Tupana chomaxã nüxü ixuxü! —ñanagürü. Rü nüma ga Chaú rü ínaca rü ñanagürü: —¿Nuxü ñaxü cuxü? —ñanagürü. 17Rü nüma ga Chamué rü nanangãxüga rü ñanagürü: —Yexguma cugügu curüxínügu ga taxuwama nax cumexü, rü nüma ga Tupana rü cuxü nayaxu ga Iraéanecüãřgüarü ãëxgacü nax quixücař. 18Rü yexguma rü cuxcař choxna naxãga nax cuyadařxücař i guxüma i ngëma Amaléxtanüxügü i chixexügu ímaxëxü rü taxuxütãma nax ícuyaxüxëëxücař, ñanagürü cuxü. 19¿Rü ñuxma taxacücař tama Tupanaga cuxínü? ¿Rü tüxcüü cuñuxãxë nax cunadexü i ngëma ngëmaxügü i Tupana cuxna chuxuxü, rü tama cunaxü i ngëma cuxü namuxü? —ñanagürü. 20Rü nüma ga Chaú rü nanangãxüga rü ñanagürü: —Choma rü Cori ya Tupanaga chaxínü, rü chayanguxëxë ga guxüma ga yema choxü namuxü. Rü guma Agáx ga Amaléxtanüxügüarü



ãêxgacü ga chiyaxucü rü nua chanaga, rü marü chanadai ga guxüma ga yema togü ga Amaléxtanüxügü. <sup>21</sup>Rü yema churaragü nixí ga nadexü ga yema rümemaegüxü ga carnérugü rü wocagü rü yemaxügü nax Yirigáwa Tupanacax ínaguaxüçax —ñanagürü. <sup>22</sup>Rü nüma ga Chamué rü ínaca rü ñanagürü: —¿Taxacü nixí i ngēma rümemaexü cuxçax? ¿Rü cuxçax rü ngēma naxünagü Tupanacax iguxü rü êxna Tupanaga nax ixínüexü? Rü dücax rü ngēma Tupana yexera namaxã taãxëxü nixí nax naga ixínüexü, rü tama carnérugüarü chíxü naxçax nax iguxü. <sup>23</sup>Rü yíxema tama Tupanaga ínuxe rü ñomatama tayuüxürüxü poraäcü chixexü taxü i Tupanapexewa. Rü yíxema chixri Tupanaga ínuxe rü ñomatama tupanaxetaxü ticuaxüürüxü chixexü taxü. Rü dücax, rü ñuxma nax nüxü cuxoxü i norü mugü, rü nüma ya Tupana rü cuxü naxo nax Iraéanecüãxgüarü ãêxgacü quixixü —ñanagürü ga Chamué.

.....

<sup>34</sup>Rü yemawena ga Chamué rü norü ñane ga Ramáwa naxü. Rü nüma ga Chaü rü nachüçax natáegu ga Gabáawa. <sup>35</sup>Rü nüma ga Chamué rü taguma wena Chaüxü nadau, natürü naxçax naxauxecha, yerü Tupanaaxü nangux ga Chaüxü Iraéanecüãxgüarü ãêxgacüwa nax nanguxëxü.

**Chamué rü chíxümaxã Dabíxü nabaeru nax Iraéanecüãxgüarü ãêxgacü yixixüçax**

**16** <sup>1</sup>Rü yemawena ga Tupana rü Chamuéxü ñanagürü: —Marütama nax Chaüçax nax

cungechaüechaxü, erü marü tama chanaxwaxe nax Iraéanecüãxgüarü ãêxgacü nax yixixü. iRü wüxi i carnéruchatacuxre nayaxu rü oríbuarü chíxümaxã naxüacu! iRü Beréüwa naxü rü ngëxma naxçax yadau ya wüxi ya yatü ya Ichaígu áégacü! Erü wüxi ya nane chanayaxu nax ngexwacaxücü ya Iraéanecüãxgüarü ãêxgacü nax yixixüçax —ñanagürü.

.....

<sup>4</sup>Rü nüma ga Chamué rü nanaxü ga yema Tupana namaxã nüxü ixuxü. Rü yexguma Beréüwa nanguxgu, rü guma ñanearü ãêxgacügü rü namuüeäcüma nanayauxgü, rü nüxna nacagüe rü ñanagürügü: —¿Taxacü nangupetü? ¿Rü taxacüwa nua cuxü? —ñanagürügü. <sup>5</sup>Rü nüma ga Chamué rü nanangãxüga rü ñanagürü: —Taxuxüma nixí i ngupetüxü. Rü nua chaxü nax Tupanacax wüxi i naxüna chimáxüçax. iRü ngëmacax Tupanacax pegü pemexëégü rü choxü ípixümücü nax ngēma naxünaarü maxwa rü Tupanaarü cuaxüüwa ipexägüxüçax! —ñanagürü. Rü yemawena ga Chamué rü nacümagüäcü Ichaíxü rü nanegüxü Tupanacax nimexëxë, rü nüxna naxu nax íyaxümücügüãxüçax ga Tupanaarü cuaxüüwa. <sup>6</sup>Rü yexguma Tupanaxü íyacuaxüügüchaxüüwa nangugügu ga Ichaí rü nanegü, rü nüma ga Chamué rü Ichaí nane ga Eriáxü nadawenü rü ñaxügu narüxínü: “Cuxá daa nixí ya yimá yatü ya Tupana nayaxucü nax Iraéanecüãxgüarü ãêxgacü yixixüçax”, ñaxügu narüxínü. <sup>7</sup>Natürü ga Tupana rü Chamuéxü ñanagürü: —Tama name i norü düxëtümare rü norü máchanemare

nax cungugũxĩ ya wũxi ya yatũ. Tama daa nixĩ. Choma rũ tama duũxũgũ nangugũũãcũma chanayaxu ya wũxi ya yatũ. Duũxũgũ rũ ngẽma dũxõtũxũnemare nixĩ inangugũgũxũ, natũrũ i choma rũ ngẽma norũ maxũ rũ norũ ãnũ nixĩ i ngẽma changugũxũ —ñanagũrũ. <sup>8</sup>Rũ yexguma ga Ichaĩ rũ nane ga Abinadãcax naca, rũ Chamuẽxũtawa nanaga. Natũrũ nũma ga Chamuẽ rũ nũxũ nixu ga tama gumã nax yixĩxũ ga Tupana nayaxucũ. <sup>9</sup>Rũ yemawena ga Ichaĩ rũ nane ga Chamãxũ Chamuẽxũtawa naga, natũrũ nũma ga Chamuẽ rũ ñanagũrũ: —Tama daa nixĩ ya Tupana nayaxucũ —ñanagũrũ. <sup>10</sup>Rũ nũma ga Ichaĩ rũ 7 ga nane Chamuẽpexewa nagagũ, natũrũ nũma ga Chamuẽ rũ nũxũ nixu nax taxucũma ga gumatanũwa Tupana nayaxuxũ. <sup>11</sup>Rũ nũma ga Chamuẽ rũ Ichaĩna naca rũ ñanagũrũ: —¿Nangexmaxũ ya nai ya cune? —ñanagũrũ. Rũ nũma ga Ichaĩ nanangãxũga rũ ñanagũrũ: —Yimã rũbumaecũxicatama nixĩ i yataxucũ, erũ yã naanewa carnẽrũgũna nadau —ñanagũrũ ga Ichaĩ. Rũ yexguma ga nũma ga Chamuẽ rũ ñanagũrũ: —Iẽcũ ñũxmatama wũxi i duũxũxũ ngẽma namu nax naxcax yacaxaxũcax! Erũ taxũtãma ãtarũtogũ nax ichibũexũcax ñũxmatãta ãnangu i nũmax —ñanagũrũ. <sup>12</sup>Rũ yexguma ga nũma ga Ichaĩ rũ wũxi ga duũxũ yẽma namu nax naxcax yacaxaxũcax. Rũ nũma ga guma ngextũxucũ rũ nachox, rũ nachoxyae rũ nidauũchametũcũxũ rũ namecũmachametũ. Rũ nũma ga Tupana rũ Chamuẽxũ ñanagũrũ: —Daa

nixĩ. iRũ ãcũ nabaeru! —ñanagũrũ. <sup>13</sup>Rũ nũma ga Chamuẽ rũ nanayaxu ga yema carnẽruchatacuxre ga chĩxũmaxã ããcuxũ, rũ Dabĩerugu nanaba ga naeneegũpexewa. Rũ yexgumatama ga Tupanaãxẽ rũ Dabĩna nangu rũ namaxã inacuãx. Rũ ñũxũchi ga nũma ga Chamuẽ rũ norũ ãane ga Ramãcax natãegu. <sup>14</sup>Rũ yexgumayane ga Tupanaãxẽ rũ Chaũna nixũgachi. Rũ nũxna nangu ga wũxi ga naãxẽ ga chixexũ ga naxĩxãchiãxẽxẽxũ ga Cori ya Tupana yẽma muxũ. <sup>15</sup>Rũ yemacax ga yema norũ duũxũgũ ga ngũxẽerũgũ ixĩgũxũ rũ ñanagũrũgũ nũxũ: —Pa ãxgacũx, wũxi i chixexũ i naãxẽ i Tupana nua muxũ cuxna nangu, rũ ngẽma nixĩ i cuxũ naxĩxãchiãxẽxẽxũ. <sup>16</sup>¿Rũ tũxcũũ tama toxũ cumu nax wũxi i meama paxetaxũ cuãxũcax nax tadauxũ rũ cupexewa áarpa nax napaxũxũcax ega ngẽxguma cuxna nanguuxũgu i ngẽma naãxẽ i chixexũ? Rũ ngẽma paxeta tá cuxũ nataãxẽxẽxẽ rũ mexũ tá cumaxã naxũ —ñanagũrũgũ. <sup>17</sup>Rũ nũma ga Chaũ rũ ñanagũrũ: —Marũ name iRũ naxcax choxũ pedãux i wũxi i paxetatanũxũ i áarpaarũ paxũxũ mea cuãxũ, rũ nua penaga! —ñanagũrũ. <sup>18</sup>Rũ yexguma ga wũxi ga norũ duũxũ rũ ñanagũrũ: —Choma nũxũ chadau i wũxi i Ichaĩ nane i Berẽũwa ngẽxmaxũ, rũ meama paxetaxũ nacuãx. Rũ ñũxmachi wũxi i poracũ nixĩ i daiwa rũ nũxũ cuãcũ nixĩ ega yadexagu. Rũ nũma rũ mecũ nixĩ rũ Cori ya Tupana nũxũ rũngũxẽẽcũ nixĩ —ñanagũrũ. <sup>19</sup>Rũ yexguma ga Chaũ rũ Ichaĩxũtawa nanamugũ ga norũ duũxũgũ nax nũxũ ñagũxũcax: “iNua namu ya cune ya

Dabí ya yimá carnérugüarü daruxĩ  
ixicü!” <sup>20</sup>Rü nüma ga Ichaí rü nane ga  
Dabíxũ Chaúxütawa namu. Rü guma  
nanemaxã Chaúçax yéma nanamu ga  
wüxi ga búru ga paúmaxã áxwetaxũ rü  
wüxiwexũ ga bínu rü wüxi ga  
chíbuxacü. <sup>21</sup>Rü yemaacü ga Dabí rü  
Chaúxütawa naxũ, rü yéma naxütawa  
nayexma. Rü nüma ga Chau rü Dabíxũ  
nangechaúxũchi, rü norü ngüixêruxũ  
nayaxixêxê. <sup>22</sup>Rü nüma ga Chau rü  
Ichaíxütawa namuga rü Dabíçax ínaca  
nax nügüxütawa nayexmaxêãxũçax,  
yerü poraacü norü me nixí. <sup>23</sup>Rü  
yexguma Chaúna nanguuxũgu ga yema  
naãxê ga chixexũ ga Tupana naxçax  
yéma muxũ, rü nüma ga Dabí rü  
nanayaxuxũ ga árpa rü nanapaxuxũ. Rü  
yemamaxã ga nüma ga Chau rü  
nataãxêãxũ rü naxçax nitaaneãxũ, rü  
nüma ga naãxê ga chixexũ rü nüxna  
nixügachiãxũ.

#### Dabí rü Goriáxũ nimax

**17** <sup>1</sup>Rü nüma ga Piritéutanüxũgü  
rü nananutaquexexêgü ga norü  
churaragü nax Iraéanecüãxgüarü  
churaragümaxã nügü nadajixũçax. Rü  
Efedamiũgu nayangutaquexegü ga  
Chocú rü Achecáarü ngãxũmachatexewa  
ga Yudáanewa. <sup>2</sup>Rü nüma ga Chau rü  
Iraéanecüãxgümaxã nügü  
nanutaquexegü ga Eláarü ngatexũgu. Rü  
yéma nügü namexêgü ga  
Piritéutanüxũgümaxã nügü nax  
nadajixũçax. <sup>3</sup>Rü nümagü ga  
Piritéutanüxũgü rü wüxi ga ma xpúnegu  
nügü ninu, rü yexgumarüxũ ta ga  
Iraéanecüãxgü, rü náí ga ma xpúnegu  
nügü ninu. Rü guma taxre ga

ma xpúneguarü ngate rü ngãxũwa naxü.  
<sup>4</sup>Rü yema Piritéutanüxũgütanüwa  
nixüxü ga wüxi ga churara ga 3 métrugu  
ixüchanexũ, rü yema ngatexũwa naxü.  
Rü Goriáx nixí ga naéga, rü íane ga  
Gáxcüãx nixí. <sup>5</sup>Rü napatexë rü  
bróüchenaxçax nixí. Rü naxünewa rü  
yexgumarüxũ ta bróüchemaxã natüxüne.  
Rü yema norü tüxünexũ rü 55 quíru nixí  
ga nayaxü. <sup>6</sup>Rü yema norü tüperemaxũ  
rü guma norü wocae ga nügüãtu  
yangeãcü rü bróüchenaxçax nixígü. <sup>7</sup>Rü  
guma norü wocae rü natamenãxã rü ga  
napexë rü fiérunaxçax nixí rü 6 quíru  
naya. Rü Goriáxpexegu nixüchigü ga  
yema norü poxüruüarü ngeruxũ. <sup>8</sup>Rü  
nüma ga Goriáx rü yema ngatexüarü  
ngãxũwa ínayachaxãchi rü yéma  
tagaãcü Iraéanecüãxgüarü churaragüxũ  
ñanagürü: —¿Taxacüçax mea pegü ipinu  
nax tomaxã pegü pedajixũçax? Erü  
choma rü wüxi i Piritéutanüxũ chixí rü  
name nixí i pema i Iraéanecüãxgü rü  
Cháuarü churaragütanüxũwa nüxũ  
pexuneta i wüxi nax nua naxüxũçax nax  
togü namaxã tadaajixũçax. <sup>9</sup>Rü ngoxi tá  
choxũ naporamae rü choxũ yamá nax  
ngêmaãcü pexmexwa nax  
tangexmagüxũçax. Natürü ngëxguma  
choma nüxũ charüporamaegu, rü pema  
tá nixí i toxmexwa pengexmagüxũ. <sup>10</sup>Rü  
ñoma i ngunexũgu, Pa Iraéanecüãxgüarü  
Churaragüx, rü pexçax chaca rü iécü  
nua penamux i wüxi i perü churara nax  
togü namaxã tadaajixũçax! —ñanagürü.  
<sup>11</sup>Rü yexguma yema Piritéutanüxüarü  
dexaxü naxínuegu ga Chau rü guxüma  
ga yema namücügü ga Iraéanecüãxgü,  
rü narümaächitanü rü namuüe. <sup>12</sup>Rü  
nayexma ga wüxi ga yatü ga Beréücüãx

ixïcü rü Ichaí nixí ga naéga. Rü nüma rü marü naya ga yexguma Chaú ãëxgacü ixíxgu. Rü nüma ga Ichaí rü nüxü nayexma ga 8 ga nanegü, rü wüxi ga nane rü Dabí nixí. <sup>13-14</sup>Rü guma tomaepüx ga nane ga rüyamaegüxü ga Eriá rü Abinadá rü Chamá rü marü Chaúwe narüxi ga daiwa. <sup>15</sup>Rü nüma ga Dabí ga rübumaecü rü Iraéanecüãxgüarü churaragü íyexmagüxüwa naxüxü rü ñuxüchi Beréüçax natáeguaxü nax nanatüarü carnérugüna yadauuuxüçax. <sup>16</sup>Rü yoxni yexguma yéma naxüxüyane ga Dabí, rü nüma ga yema Piritéutanüxü rü Iraéanecüãxgüxü nachixewe ga paxmama rü yáuanecü. Rü yemaacü tümamaxá nixí ñuxmata 40 ga ngunexüwa nangu. <sup>17</sup>Rü wüxi ga ngunexügu ga Ichaí rü nane ga Dabíxü ñanagürü: —iÉcü nayaxu i wüxiwetaxü i trígu i igoxtanüxü, rü ñaa 10 i paü rü yéa nügü ínadajxchaüxüwa cueneegüçax nana! <sup>18</sup>iRü ñuxmachi ngéma nana ta i ñaa 10 púta i quésu naxçax ya yimá churaragüarü ãëxgacü! iRü cueneegüxü íyadau rü ñuxácü nüxü nangupetügü, rü wüxi i norü popera nua nange nax ngémawa nüxü chacuáxüçax nax meama nüxü nax ínangupetügüxü! —ñanagürü ga Ichaí. <sup>19</sup>Rü nüma ga Chaú rü yema Iraéanecüãxgüarü churaragü rü yema ma xpúnearü tuächixü ga Elágu áégaxüwa nayexmagü. <sup>20</sup>Rü moxüácü ga nüma ga Dabí rü yexwacax yangóonechaxügu rü to ga daruümexëgu tüxü namugü ga guxema nanatüarü carnérugü rü inaxüächi. Rü nayana ga yema óna ga nanatü ga Ichaí nüxna naxü. Rü yéma naeneegü íyexmagüxüwa nangu ga yexguma inaxíächichaüxgux

ga Piritéutanüxügümaxá nügü nax nadajxüçax. <sup>21</sup>Rü nüma ga Iraéanecüãxgü rü ga Piritéutanüxügü rü nügüarü toxmaxtagu nügü ninu. <sup>22</sup>Rü nüma ga Dabí rü yema Iraéanecüãxgüarü churaragüarü yemaxügüarü daruüxütagu nananu ga yema trígu, rü paü, rü quésu ga yéma nanaxü, rü ñuxüchi nañaächíácüma Iraéanecüãxgüarü churaragütanügu nayangaxi nax naeneegüna naxçaxüçax rü ñuxácü nüxü nangupetügü. <sup>23</sup>Rü yexguma naeneegümaxá ídexayane, rü nüma ga yema Piritéutanüxü ga Goriáx ga Gáxcüãx ixíxü, rü Piritéutanüxügüarü churaragütanüwa nichixichi. Rü wenaxarü Iraéanecüãxgüçax naca rü tüxü naxáxüne rü yema aixrüguma naxüürüxüácüma nidexa. Rü nüma ga Dabí rü nüxü naxínü. <sup>24</sup>Rü nümagü ga Iraéanecüãxgü ga yexguma yema yatüxü nadaugügu rü poraacü namuñe, rü naxçaxwa nixü. <sup>25</sup>Rü nügümaxá ñanagürügü: —¿Marü nüxü pedauxü i ngéma yatü i ngéxma ichixichixü nax ñuxácü tüxü naxáxünexü i yixema i Iraéanecüãxgü? Rü texe ya yíxema nüxü rüporamaexe, rü nüma ya tóru ãëxgacü rü muxütama i ngémaxügü tá tüxna nana, rü naxacümaxá tá tüxü naxüxmaç rü taxütáma tüxü nanaxütanüxëxë i ngéma diëru i ãëxgacüna üxü —ñanagürügü. <sup>26</sup>Rü yexguma ga Dabí rü yema naxütawa yexmagüxüna naca rü ñanagürü: —¿Taxacümaxá tá nüxü naxátanü ya yimá yatü ya ñaa Piritéutanüxüxü imácü rü naxoxëcü nax ngéma Iraéanecüãxgümaxá taxacü nax yaxugüxü? ¿Erü taxacü nixí i ñaa Piritéutanüxü i tama Tupanaxü cuáxü

ecaḅ Tupana ya maxũcüariü  
 churaragümaxã taxacü yaxugüxũ?  
 —ñanagürü. <sup>27</sup>Rü nümagü ga  
 Iraéanecüãxgiarü churaragü rü Dabíxũ  
 nangãxũgü, rü yema noxri namaxã nüxũ  
 yaxugüexümaxãtama nanangãxũgagü,  
 rü namaxã nüxũ nixu ga taxacümaxã tá  
 nüxũ nax naxütanüãxũ i ngëma Goriãxũ  
 imãxũ. <sup>28</sup>Natürü nüma ga Eriã ga  
 Dabíenexë ga yacü, rü nüxũ naxĩnü ga  
 yema yatügümaxã nax íyadexãü ga  
 Dabí. Rü yemaçax naeneemaxã nanu rü  
 ñanagürü nüxũ: —¿Taxacüwa nua cuxũ?  
 ¿Rü texémaxã ngëma ínachianexũwa  
 cunawogü i ngëma tanatüarü carnérugü?  
 Choma rü marü nüxũ chacuax i ngëma  
 cucüma nax nua cuxũxũ nax  
 icuyadawenümarexũcax nax togü  
 tadiaxũ —ñanagürü. <sup>29</sup>Rü nüma ga Dabí  
 rü nanangãxũga rü ñanagürü: —¿Taxacü  
 ëxna chaxü ecaḅ ngëma ñacuxũ choxũ?  
 Rü nua chidexamare —ñanagürü. <sup>30</sup>Rü  
 yemawena ga Dabí rü naeeneena  
 nixügachi, rü to ga churarana naca. Rü  
 yemaacütama nanangãxũga. <sup>31</sup>Rü  
 nümaxũ ga Iraéanecüãxgiü ga Dabíxũ  
 ñnüexũ ga nax ínacaxũ, rü Chaúmaxã  
 nüxũ narüxugüe. Rü nüma ga Chaú rü  
 Dabíçax nangema. <sup>32</sup>Rü yexguma ga  
 Dabí rü Chaúxũ ñanagürü: —Tama  
 name nax texé oégaãxũ nagagu i ñaa  
 Piritéutanüxũ, erü chomax i cuxũ  
 puracüxe nax chixixũ, Pa Æëxgacüx, rü  
 ngëma tá chaxü rü namaxã tá togü tadaí  
 —ñanagürü. <sup>33</sup>Rü nüma ga Chaú rü  
 nanangãxũga rü ñanagürü: —Rü  
 taxuacüma cuxica ngëma  
 Piritéutanüxũmaxã pegü pedai. Erü  
 cuma rü cungextüxüxüchi, natürü i  
 nüma rü norü ngextüxügücürüwa

daixçax nangux —ñanagürü. <sup>34-35</sup>Rü  
 nüma ga Dabí rü nanangãxũga rü  
 ñanagürü: —Yexguma chaunatüarü  
 carnérugüna chadaxgu, rü wüxi ga ai  
 rüëxna wüxi ga ósu i düraxũ yéma ne  
 üxgu rü wüxi ga carnéru tüxũ yayaxugu,  
 rü choma rü nawe changë, rü naaxwa  
 tüxũ chanapu. Rü yexguma chauxçax  
 yañaxgu nax choxũ yayaxuxũçax, rü  
 nachicürawa chatüxüe rü chayachixgü  
 rü ñyxmata chayamaç. <sup>36</sup>Rü choma i  
 curü duũxũ, Pa Æëxgacüx, rü woo ai  
 yixügu rü ósu i düraxũ yixügu rü  
 chayamaç. Rü ñaa Piritéutanüxũ i tama  
 Tupanaxũ cuãxũ rü ngëmaãcü tá  
 namaxã chanaxü, erü Tupana ya  
 maxũcüariü churaragüxũ naxãxüne. <sup>37</sup>Rü  
 guma Cori ya Tupana ga aina rü ósu i  
 düraxũna choxũ ípoxücü, rü yimatátama  
 nixi i ñaa Piritéutanüxũmexëwa choxũ  
 ípoxücü —ñanagürü. Rü yexguma ga  
 Chaú nanangãxũga rü ñanagürü: —iËcü  
 ngëma naxü rü Cori ya Tupana cuxũ  
 íxümücü! —ñanagürü. <sup>38</sup>Rü yemawena  
 nanamu nax Dabíxũ yacüxcuchigüxũ  
 nagu ga yema naxchiru ga  
 bróüchenaxçax ga nümatama ga Chaú  
 nagu yacüxuuxũ. Rü bróüchenaxçax ga  
 napatëxemaxã nanaxüpatëxe. Rü  
 naremüarü poxüruxũ rü naxçaxwëxaru  
 poxürüügu nayacüxëëgü. <sup>39</sup>Rü  
 yemawena ga Dabí rü norü goyexũwa  
 norü tara ningaxcuchi. Rü nüxũ naxü ga  
 nax yaxũxũ namaxã ga yema  
 nügüxünewa nanucuxũ. Natürü tama  
 namaxã nixü ga guxüma ga yema  
 nügüxünewa nanucuxũ yerü taguma  
 yema nügü naxü. Rü yexgumatama  
 Chaúxũ ñanagürü: —Taxuacüma chixü  
 namaxã i ñaa chaxünewa ngëxmagüxũ

erü tama chomaxã nixü —ñanagürü. Rü yexguma rü nügü ñacuxüxüüne ga Dabí. <sup>40</sup>Rü yemawena rü nanayaxu ga guma norü naixmenaxã rü nixügachi. Rü yema ngatexüwa nanade ga 5 püxü ga nutaxacü ga ibáipüxücü rü norü choca ga yangechigüxügu nananucu. Rü ñüxüchi norü maxgütaexü ga naxmexëgu yangexümaxã yema Piritéutanüxüçax nixü. <sup>41</sup>Rü nüma ga Piritéutanüxü rü meamare Dabíçax nixüchigü. Rü napexegu nixüchigü ga yema norü poxüruüarü ngeruxü. <sup>42-43</sup>Rü yexguma Dabíxü nadaçxgu ga yema Piritéutanüxü nax wüxi ya ngextüxücü ga idauüchametücüücü nax yixixü rü mecü nax yixixü, rü tama nayaxaixcümaãxü nax nügü namaxã nadaçixü. Rü ñanagürü nüxü: —¿Ëxna cuxçax rü wüxi i airu chixí ecax naimaxã nua çaxçax cuxüxü? —ñanagürü. Rü yexgumatama Dabímaxã chixexü naxuegu norü tupanaégagu. <sup>44</sup>Rü ñüxüchi ñanagürü: —iNua naña rü ngurucugüna rü aigüna tá chanaxã i cumachi! —ñanagürü. <sup>45</sup>Rü nüma ga Dabí nanangãxüga rü ñanagürü: —Cuma rü çaxçax quixü taramaxã rü woçamaxã. Natürü i chomax rü cuxçax chixü naégagu ya yimá Iraéanecüãx i churaragüarü Tupana ya guxüétiwa ngëxmacü ya cuma norü churaragüxü cuxãxüüneáxücü quixí. <sup>46</sup>Rü ñüxma ya Cori ya Tupana rü tá choxmexgu cunanguxëxë nax cuxü chimáxüçax. Rü tá cuxü íchadaeeru rü ngëma curü churaragü i yuexü rü tá ngurucugüna rü aigüna chanana. Rü ngëmaäcü tá guxü i naanewa nüxü nacuçxgu nax Iraéanewa nangexmaxü ya wüxi ya Tupana. <sup>47</sup>Rü

guxãma ya yíxema núma ngëxmagüxe rü tá nüxü tacuçxgu ya Cori ya Tupana rü tama taramaxã, rüexna wocaxemaxã nixí i naxüãxü i ngëma nüma nagu naxínüxü. Erü nüma ya Tupana rü tama duüxügürüxü äxneäcü texémamaxã nügü nadai. Rü nüma tátama nixí i toxmexgu pexü nayixëëxü i ñüxmax —ñanagürü. <sup>48-49</sup>Rü yexguma ga nüma ga Piritéutanüxü rü nayuxnagu rü Dabíçax niña. Rü yexgumarüxü ta ga nüma ga Dabí rü paxama Piritéutanüxüçax niña. Rü norü chocagu nixu rü wüxi ga nuta nayaxu, rü norü maxgütaeruügu nanaxü. Rü yemamaxã Piritéutanüxüxü namaxü, rü meama nacatümaxã namexchinü. Rü guma nuta rü nacatüwa narüwax, rü nüma ga Piritéutanüxü rü nachametümaxã mairaxüanegu nayangu. <sup>50-51</sup>Rü yemaacü nixí ga Dabí ga Piritéutanüxüxü naporamaexü namaxã ga wüxi ga maxgütaexü rü wüxi ga nuta. Rü nüma ga Dabí rü nangearü taraãx, rü yemaçax yema Piritéutanüxüçax niña rü nanayaxu ga norü tara rü yemamaxãtama ñanadaeeru, rü yemaacü nayamaç. Rü yemaxü nadaugügu ga Piritéutanüxügü ga marü nax nayuxü ga yema norü churara ga namaxã poraxü, rü nibuxmü. <sup>52</sup>Rü yexguma ga Iraéanecüãxgüarü churaragü rü Yudátanüxü ga churaragü rü aita naxüe yerü marü Piritéutanüxügüxü narüporamaegü. Rü nawe nangëgü ñüxmata ñanegü ga Gáx rü Ecróüarü üüchiwa. Rü yema Piritéutanüxügüarü churaragü ga yuexü rü nanunquegü nawa ga yema nama ga Charafüwa ne daxü rü ñüxmata ñanegü ga Gáx rü Ecróüwa ngxü. <sup>53</sup>Rü nüma

ga Iraéanecüãxgü rü yema Piritéutanüxügwé nangëgüguwena, rü yema ñapegüxüwa naxí rü nanade ga guxüma ga norü yemaxügu ga yéma nüxna yabuxmüxü. <sup>54</sup>Rü yexguma ga nüma ga Dabí rü nanayaxu ga Goriáxeru rü Yerucharéüwa nanange. Natürü ga guma naxnegü rü norü pegüpataxügu nayanu. <sup>55</sup>Rü yexguma Dabí rü Piritéutanüxüçax ñaxgu, rü nüma ga Chaú rü norü churaragüeru ga Abnéna naca rü ñanagürü: —¿Texé tixí ya nanatü ya yimá ngextüxücü? —ñanagürü. <sup>56</sup>Rü nüma ga yema norü churaragüeru ga Abné rü nanangäxü rü ñanagürü: —Pa Æëxgacüx, tama nüxü chacuax nax texé nane yixíxü —ñanagürü. Rü nüma ga Chaú rü ñanagürü nüxü: —iËcü, naxçax ícagüchigü nax texé nane yixíxü! —ñanagürü. <sup>57</sup>Rü yexguma Dabí rü yema Piritéutanüxüarü maçwa ne üxgu, rü nüma ga Abné rü Chaúpexewa nanaga namaxá ga yema Piritéutanüxüeru ga yangechigüxü. <sup>58</sup>Rü nüma ga Chaú rü nüxna naca rü ñanagürü: —Pa Ngextüxücüx ichomaxá nüxü ixu rü texé nane quixíxü! —ñanagürü. Rü nüma ga Dabí nanangäxü rü ñanagürü: —Choma rü yimá curü duü ya Ichaí ya Beréücüãx nane chixí —ñanagürü.

**Yonatáü rü Dabí rü nügümaxá nanaxuegu nax nügümücügü yixígüxüçax**

**18** <sup>1</sup>Rü yexguma Dabí Chaúmaxá igüegagu ga nügümaxá nax yadexagüxü, rü nüma ga Chaú nane ga Yonatáü rü Dabímücüxü nügü nixíxëxë, rü nüxü nangechaüxüchi ñoma

nügütama nangechaüxüürüxü. <sup>2</sup>Rü nüma ga Chaú rü yematama ngunexügu Dabíxü nayaxu norü ngüxëëruüxü, rü tama nanatüçax nanamuegu. <sup>3</sup>Rü Yonatáü rü Dabí rü Tupanaégagu nügümaxá nanaxuegügü nax nügümücügü nax yixígüxüçax yerü ga Yonatáü rü Dabíxü nangechaü ñoma nügütama nangechaüxüürüxü. <sup>4</sup>Rü ñüxüchi nüma ga Yonatáü rü ínacuxuchi ga yema napax ga nagu yacuxuuxü rü Dabína nanaxá wüxigu namaxá ga yema norü tara rü norü würa rü norü goyexü. <sup>5</sup>Rü nüma ga Dabí rü Chaúarü ngüxëëruüxü nixí, rü guxüguma mea nayanguxëxë ga yema namuaxüwa. Rü yemaçax nüma ga Chaú rü norü churaragüarü ãëxgacüxü nayangucuchixëxë. Rü yema duüxügü rü churaragü rü naerügü rü namaxá nataãxëgü rü nanapépünegü.

**Nixäüxächi ga Chaú yerü ga duüxügü rü norü yexera Dabíxü nangechaügu**

<sup>6</sup>Natürü yexguma nawoegüxgu ga churaragü nawena ga yema Piritéutanüxüxü nax yamáxü ga Dabí, rü guxünema ga Iraéanecüãxgüarü ñanegüwa norü ãëxgacüçax ínachoxü ga ngexügü ga taãxëácüma rü iyaxüächitanüácüma rü wiyægüácüma rü paüđerügü rü árpa napagüácüma norü ãëxgacüxü rümöxegüxü. <sup>7</sup>Rü yexguma yema ngexügü wiyægügu rü íyaxüächitanüxügu, rü ñaxügu nawiyægü: “Chaú rü 1,000 i churaragü nadai, rü Dabí rü 10,000 i churaragü nadai”, ngögürügügü. <sup>8</sup>Rü yema wiyae nixí ga Chaúãxëwa ngüxü, rü poraäcü manuácüma ñanagürü: —Dabína

nanaxugüe nax 10,000 i churaragü nadajixũ, natürü choxna i 1,000 icatama. Rũ ñuxma ngëma taxuxũ nixĩ nax chauchicüxü ãëxgacüxũ yangucuchigüxëãxũ —ñanagürü. <sup>9</sup>Rũ yexgumacürüwa ga Chaú rü Dabíxũ namuũ. <sup>10</sup>Rũ moxũãcü ga Tupana rü Chaúcax yéma nanamu ga naãxë ga chixexũ rü nüxna nangu. Rũ nüma ga Chaú rü ñoma naxãũãëxürüxũ nixĩ ga nachiüwa. Rũ yexguma ga Dabí rü norü árpa napaxü to ga ngunexũgurüxũ. Rũ nüma ga Chaú rü guma norü wocae nange. <sup>11</sup>Rũ ngürüãchi Dabíxũ nanacux ga guma norü wocae nax íxapüxmaxã yamutanüãxücax, natürü nüma ga Dabí rü taxrexpüxcüna nügü ínapoxüama. <sup>12</sup>Rũ nüma ga Chaú rü Dabíxũ namuũ, yerü Cori ya Tupana rü Dabíxũ narüngüxë, natürü marü tama Chaúxũ narüngüxë. <sup>13</sup>Rũ yemacax ga nügüxütawa rü nayamugachi rü wüxütücü mü ga 1,000 icatama ga churaragüarü ãëxgacüxũ nayangucuchixëxë. Rũ yema churaragümaxã nixĩ ga Dabí ga daiwa naxüxüxũ rü natáeguaxüxũ. <sup>14</sup>Rũ guxüma ga taxacü ga naxüxüwa ga Dabí rü meama nüxü ínanguxuchi yerü Cori ya Tupana nüxü narüngüxë. <sup>15</sup>Rũ yemacax ga nüma ga Chaú rü nüxü namuũ, yerü nüxü nadau ga ñuxãcü norü yexera natachigamaexũ ga Dabí. <sup>16</sup>Natürü guxüma ga Iraéanecüãxgü rü Yudátanüxũ rü Dabíxũ nangechaügü, yerü nüma nixĩ ga namaxã inacüxũ ga yexguma daiwa naxüxüxgü. <sup>17</sup>Rũ nüma ga Chaú rü wüxi ga ngunexũ Dabíxũ ñanagürü: —Cuxna tá ngixũ chamu cuxmaxũ i ngëma chaucacü irüyamaecü

i Merá ega wüxi ya poracü quixixgu rü cunadaixgu i Cori ya Tupanaarü uanügü —ñanagürü. Rũ nüma ga Chaú nagu narüxínü nax tama nümatama Dabíxũ yamáxũ, natürü norü ínü chi nixĩ nax Piritéutanüxügü yamáxücax nagu i dai. <sup>18</sup>Natürü ga Dabí rü nanangãxũ rü ñanagürü: —Taxuxüma chixĩ i cupexewa, rü chautanüxügü rü taxuxüma nixigü i Iraéanegütanüwa nax cuxãxte nax chixixücax —ñanagürü. <sup>19</sup>Natürü yexguma nawa nanguxgu ga yema ngunexũ nax Dabína ngixũ namuxũ ga naxacü ga Merá, rü nüma ga Chaú rü ngixũ namu nüxna ga to ga yatü ga Meorácüãx ga Adriégu áëgaxũ. <sup>20</sup>Natürü ga yema nai ga Chaúxacü ga Micá, rü Dabímaxã ixãarüãx. Rũ yexguma Chaúmaxã nüxü yaxugügüga ga ngíchiga, rü nüma ga Chaú rü nataãxë. <sup>21</sup>Yerü nagu narüxínü ga Dabína ngixũ nax namuxũ nax Dabímax yixixücax rü ngíma Piritéutanüxügümexëgu nanguxëãxücax. Rũ yemacax ga nüma ga Chaú rü wenaxarü Dabíxũ ñanagürü: —Rũ ñuxma tá waxi nixĩ i chãüãxte quixixũ —ñanagürü. <sup>22</sup>Rũ yemawena rü nüma ga Chaú rü norü ngüxëëruügüxũ namu rü ñanagürü: —iPema rü pexicatama namaxã pidexagü i Dabí, rü namaxã nüxü pixu rü choma i ãëxgacü nax chixixũ rü poracü nüxü changechaü rü guxãma i pema i chorü ngüxëëruügü rü ta rü nüxü nax pengechaügüxũ rü penaxwaxexũ nax nüma rü chãüãxte yixixũ, ñapegürü tá nüxü! —ñanagürü. <sup>23</sup>Rũ nüma ga yema Chaúarü ngüxëëruügü rü yéma Dabíxütawa naxĩ rü namaxã nüxü



nixugü ga yema ore ga Chaú namaxã nüxü ixuxü. Natürü nüma ga Dabí rü nanangãxüga rü ñanagürü: ¿Ëxna pema nagu perüxñüegu i natauxchaxü nax wüxixe ya chauxrüxü ngearü diëruáxe rü taxuxüma ixixe nax ãëxgacüxãxte tixixü? —ñanagürü. <sup>24</sup>Rü nüma ga yema Chaúarü ngüxëëruügü rü Chaúmaxã nüxü nayarüxugüe ga yema ore ga Dabí namaxã nangãxüxü. <sup>25</sup>Natürü ga nüma ga Chaú ga nagu nax naxñüechaxü ga ñuxãcü Dabíxü Piritéutanüxügümexëgu nax nangxëëchaüxü, rü yemaçax yema norü ngüxëëruügümaxã ñanagürü: —iNamaxã nüxü pixu i Dabí rü tama chanaxwãxe i diëru choxna ngixü naxã ngïxçax i chauxacü! Natürü ngëma ngïtanü i chanaxwãxexü nixi i 100 i Piritéutanüxügüchaxmüpexechiraügü nax nua nanaxü nax ngëmaãcü nax chanayauxtanüxüçax i ngëma chorü uanügüarü chixexü i chomaxã naxügüxü —ñanagürü. <sup>26-27</sup>Rü nüma ga yema Chaúarü ngüxëëruügü rü Dabímaxã nüxü nayarüxugü ga yema Chaúarü ore. Rü nüma ga Dabí rü nataãxë namaxã ga yema Chaú naxçax íçaxaxü, yerü yemaacü nüxü nanatauxchaxëxëama nax naãxte yixixüçax. Rü naxüpa ga yema ngunexü ga Chaú namaxã ixunetaxü, rü nüma ga Dabí rü nananutaquexe ga norü churaragü rü inaxüãchi, rü 200 ga Piritéutanüxügü nayadaí. Rü yema Piritéutanüxügüchaxmüpexechiraügü rü Chaúna nayana nax yemaacü naãxte yixixüçax. Rü yexguma ga nüma ga Chaú rü yema naxacü ga Micá Dabína ngixü namu naxmãxü. <sup>28</sup>Natürü nüma ga Chaú rü nüxü nicuaxãchi nax nüma ga Cori ya Tupana rü Dabíxü

nangüxëëxü, rü naxacü ga Micá rü Dabíxü nangechaüxüchi. <sup>29</sup>Rü yemaçax yexeraãcü Dabíxü namuü rü naxchi naxai. <sup>30</sup>Rü yexguma Piritéutanüxügüarü churaragümaxã nügü nadaixügu, rü nüma ga Dabí nixi ga guxüma ga togü ga Chaúarü churaragüeruarü yexera norü uanügüxü narüporamaexü. Rü yemaçax nixi ga guxüma ga duüxügü nüxü ngechaügüxü.

### Chaú rü Dabíxü nimáxchaü

**19** <sup>1</sup>Rü nüma ga Chaú rü nane ga Yonataüxü rü guxüma ga norü churaragüxü namu ga Dabíxü nax yamãxgüxüçax. Natürü nüma ga Yonataü rü poraãcü Dabíxü nangechaü. <sup>2</sup>Rü yemaçax ga Yonataü rü Dabímaxã nüxü nixu ga yema nanatüarü ore, rü ñanagürü: —Chorü papá ya Chaú rü cuxü timáxchaü. Rü ngëmaçax i moxü paçmama irü naxuãxë rü nawa naxü i ngëma naane i taxúema nawa cuxü clauxü, rü ngëxma icux! <sup>3</sup>Rü choma rü ngëma naane i nagu quicúxüwa tá chaunatümaxã chaxü. Rü cuchigaxü tá tümamaxã chixu, rü ngoxi ñuxü ñatagü. Rü yixcama tá cuxü nüxü chacuaxëxë i ngëma chaunatüarü ore —ñanagürü. <sup>4</sup>Rü nüma ga Yonataü rü nanatü ga Chaúmaxã nidexa rü Dabítüwa nachogü rü ñanagürü: —Pa ãëxgacüx, tama name i chixexü cuxü namaxã i curü duüxü i Dabí, erü taxuxüma i chixexü cumaxã naxü. Rü guxüguma mea cuxü nariüngüxëë. <sup>5</sup>¿Ëxna marü nüxü curüngüma ga yexguma norü maxü äücümaxüwa nayexmaxëëgu ga Goriáxü yamãxgu, rü yemaacü ga Cori ya Tupana rü Iraëanecüãxgüxü guxchaxüwa ínangüxëxë? Cumax, Pa ãëxgacüx, rü

nüxü cudadu ga yema, rü cutaãxê. ¿Rü tîxücüü, Pa ãËxgacüx, i cuyamáxchaüxü i wüxi i duüxü i taxuxüma cumaxã üxü? ¿Rü taxacüçax tá cuyamáx ya Dabí? —ñanagürü. <sup>6</sup>Rü yexguma Chauü nüxü ñnügu ga yema Yonataü namaxã nüxü ixuxü, rü tagaãcü ñanagürü: —Cori ya Tupanaégagu nüxü chixu rü taxütáma chayamáx ya Dabí —ñanagürü.

.....

### Chauçaxwa ñña ga Dabí

**22** <sup>1</sup>Rü nüma ga Dabí rü Gáxwa ñaxüxü rü äxmaxü ga Aduráügu narüçux. Rü yexguma naeneegü rü guxüma ga natanüxügü nüxü cuaxgügu rü naxütawa naxí rü nayaxümücügü. <sup>2</sup>Rü yexgumarüxü ta naxütawa naxí ga yema duüxügü ga tama ãËxgacü nüxü rüngüxêëgüxü rü yema duüxügü ga nangetanügüxü rü yema duüxügü ga tama ãËxgacümaxã taãxëgüxü, rü nüma ga Dabí rü yema duüxügüeru nixí. Rü yema duüxügü ga Dabíwe rüxixü rü düxwa 400 ga yatügüwa nangu.

.....

<sup>5</sup>Rü wüxi ga ngunexügu ga Tupanaarü orearü uruxü ga Gáx rü Dabímaxã nüxü nixu nax nüxna yaxügachixüçax ga yema äxmaxü rü Yudaáru naanecax natáeguxüçax. Rü nüma ga Dabí rü naixnecü ga Árewa nangu.

.....

### Dabí rü ñnächianexü ga taxüema íxãpataxüwa nayexma

**23** <sup>14</sup>Rü nüma ga Dabí rü yema chianexü ga Chíwa naxü, rü yéma wüxi ga mǎxpúnearü äxmaxüwa norü duüxügümaxã nayexma. Rü nüma

ga Chauü rü guxüma ga ngunexügu naxçax nadau, natürü ga Tupana rü Dabína nadau, rü yemaçax ga Chauü rü taguma nüxü ñnyangau. <sup>15</sup>Natürü nüma ga Dabí rü Chauçax namuü, yerü naxçax nadau ga nax yamáaxüçax. Rü yemaçax ga Dabí rü naixnecü ga Óregu narüxãüx ga chianexü ga Chíwa. <sup>16</sup>Rü wüxi ga ngunexügu, rü nüma ga Yonataü ga Chauü nane rü Órewa naxü ga Dabí íyexmaxüwa. Rü nayataãxêxêxê rü pora nüxna nayaxã nax yexera Tupanaaxü yaxõõxüçax. <sup>17</sup>Rü Dabíxü ñanagürü: —Taxuçaxma cumuü erü chaunatü ya Chauü rü tagutáma cuxü itayangau. Cuma rü tá Iraéanecüãxgüarü ãËxgacü quixí, rü choma rü tá cutüüwa chaxü. Rü ngéma rü chaunatü ya Chauü rü marü nüxü tacuax —ñanagürü. <sup>18</sup>Rü yexguma ga nüma ga Dabí rü Yonataü rü Cori ya Tupanapexewa nügümaxã ñnaxügae. Rü yemawena ga Yonataü rü natáegu, rü nüma ga Dabí rü yexmatama Óregu narüxãüx. <sup>19</sup>Natürü yema nachica ga Chícüãx ga duüxügü, rü Gabáawa naxí rü Chauümaxã narüdexagü, rü ñanagürügü: —Dabí rü torü naanegu nicüx nagu i ngéma äxmaxügü i mǎxpúne ya Aquiráwa ngëxmagüxü i Órearü naixnecüwa i ngéma chianexü i nawa tangëxmagüxüarü sürwaama. <sup>20</sup>Rü ngëxguma curü me yixíxgu, Pa ãËxgacüx irü towe rüxü! Rü toma rü tá cuçax tayayauxgü rü cuxna tá tanamu —ñanagürügü. <sup>21</sup>Rü nüma ga Chauü rü nanangãxü rü ñanagürü: —iTupana pexü rüngüxêxê erü choxü pengechaü rü chaugu perüxñine! <sup>22</sup>iRu êcü pewoegu i ñüxmax, rü mea naxçax

peyadaux i ngēma nachica i nawa nangexmaxũ! Rũ ngēxguma nũxũ ipeyangauxgux rũ ichomaxã nũxũ peyarĩxu! Erũ nũma rũ naãxẽxũ nacuauxũchi. <sup>23</sup>iRũ mea nũxũ pidaugũ i guxũma i norũ cuxchicaxũ rũ ñuxũchi nua chomaxã nũxũ peyarĩxu! Rũ choma rũ tá pewe ngēma chaxũ. Rũ ega aixcũma ngēma naanewa nangexmagu, rũ choma rũ tá naxçax chadauama natanũgu i ngēma Yudatanũxũ —ñanagũrũ. <sup>24</sup>Rũ nũma ga yema Chĩcũãxgũ rũ Chaũxũ narũmoxẽgũ, rũ ñuxũchi norũ ñanecax nawoegu. Rũ nũma ga Dabĩ rũ norũ churaragũmaxã rũ chianexũ ga Maóũwa nayexmagũ ga yema chianexũarũ sũrwaama. <sup>25</sup>Rũ nũma ga Chaũ rũ norũ churaragũ rũ inaxĩãchi nax naxçax nayadaugũxũçax. Rũ yexguma yemaxũ nacuauxgu ga Dabĩ, rũ guma maçpũnearũ ãxmaxũwa nixĩgachi rũ toxnamana naxĩ ga Maóũarũ chianexũwa. Rũ nũma ga Chaũ rũ yema Maóũarũ chianexũgu naxũcu nax yexma Dabĩçax nadauxũçax. <sup>26-27</sup>Rũ nũma ga Chaũ rũ guma maçpũnecũwagu namaxã nixũ ga norũ churaragũ. Rũ nũma ga Dabĩ rũ norũ tocũwagu Chaũchaxwa nibuxmũ namaxã ga norũ churaragũ. Rũ yexguma marũ Chaũ norũ churaragũmaxã Dabĩxũ ñaxũexũgu nax yayauxgũaxũçax, rũ Chaũxũtawã nangu ga wũxi ga orearũ ngeruxũ ga namaxã nũxũ yarũxuxũ nax paxã nataæguxũçax yerũ ga Piritéutanũxũgũ rũ wenaxarũ Iraéanecũãxgũçax ñayaxũãchi. <sup>28</sup>Rũ yemaçax ga nũma ga Chaũ rũ ñanangẽx ga Dabĩwe nax yangẽchigũxũ, rũ nataėgu nax

Piritéutanũxũgũmaxã nũgũ yadaũxũçax. Rũ yexgumacũrũwa ga yema nachica ga Dabĩ nawa yexmaxũ rũ “Maçpũne ya Nawa Yigũna Ixĩgachitanũãchĩnegu” naxãėga. <sup>29</sup>Rũ yemawena ga Dabĩ rũ Egádiarũ chianexũwa naxũ nax yema maçpũnegũarũ ãxmaxũwa nayexmaxũçax.

#### Dabĩ rũ tama Chaũxũ nimax

**24** <sup>1</sup>Rũ yexguma nataėgugu ga Chaũ ga Piritéutanũxũgũmaxã nũgũ ñadaũxũwa, rũ namaxã nũxũ nixugũgũ ga Egádiarũ chianexũwa nax nayexmaxũ ga Dabĩ. <sup>2</sup>Rũ yexguma ga Chaũ rũ 3,000 ga churaragũ nidexechi ga guxũma ga Iraéanecũãxgũtaniũwa, rũ Dabĩçax nayadaugũ nagu ga guma maçpũnegũ. <sup>3</sup>Rũ yexguma namagu naxĩxgu ga Chaũ, rũ yexma nũxũ nangau ga ñuxre ga carnérutũcumũgũ norũ ngaicamagu ga wũxi ga maçpũnearũ ãxmaxũ ga nagu yacũxũ ga Dabĩ norũ churaragũmaxã. Rũ nũma ga Chaũ rũ yema ãxmaxũgu nangaxi nax yexma íyawoxẽxũçax. <sup>4</sup>Rũ nũma ga Dabĩarũ churaragũ rũ ñanagũrũgũ Dabĩxũ: —Ñuxmawaxi nixĩ i yanguxũ ga yema uneta ga Cori ya Tupana cumaxã nũxũ ixuxũ nax cuxmexgu nanguxẽããxũ i ngēma curũ uanũ. iRũ ěcũ yamaç cuma nagu curũxĩnũxũãcũma! —ñanagũrũgũ. Rũ nũma ga Dabĩ rũ bexma yamaçcũchigũãcũma yema naxũ rũ Chaũarũ deyuxũchiru íxraxũ niwĩpechinũ. <sup>5</sup>Natũrũ ga yixcũama ga Dabĩ rũ porãcũ nũxũ nangux ga yema naxũxũ. <sup>6</sup>Rũ ñanagũrũ norũ churaragũxũ: —iCori ya Tupana choxũ rũngũxẽxẽ nax tama taxacũ namaxã chaxũxũçax i ngēma

chorü ãëxgacü! Nüma rü ãëxgacü nixĩ yerü Cori ya Tupanatama nüxũ naxuneta —ñanagürü. <sup>7</sup>Rü yemaacü ga Dabí rü nüxna nachogü ga norü churaragü yerü tama nanaxwaxe nax Chaúxũ nax yamaɣgüxũ. Rü nüma ga Chaú rü ínaxũxũ ga yema ãxmaxũwa rü inaxĩ. <sup>8</sup>Natürü nüma ga Dabí rü Chaúwetama inayago ga yema ãxmaxũwa rü nüxna nacagü rü ñanagürü: —Pa ãëxgacüx, Pa ãëxgacüx —ñanagürü. Rü nüma ga Chaú rü nügü nadauegu. Rü nüma ga Dabí rü ñaxtãanegu yangücuchiãcuma nüxũ narümoxë. <sup>9</sup>Rü ñanagürü nüxũ: —¿Tüxcüü i naga cuxínxũ, Pa ãëxgacüx, i ngëma duũxũgü i cumaxã nüxũ ixuxũ nax choma rü naxçax chadauxũ nax cuxũ chimáxũ? <sup>10</sup>Pa Chorü ãëxgacüx, ñuxmawaxi nixĩ i aixcuma nüxũ cucuáxũ nax tama cuxũ chimáxchaũ. Rü woo Cori ya Tupana rü choxmexgu cuxũ nax nanguxëëchiréxũ i nua maxpúnearü ãxmaxũwa, natürü i choma rü tama cuxũ chimax, Pa ãëxgacüx. Erü nagu charüxñü nax cuma rü ãëxgacü quixixũ erü Cori ya Tupana rü marü ngëmacax cuxũ naxuneta. <sup>11</sup>iRü dücax, mea nuxã nadawenü, Pa ãëxgacüx, i ñaa choxmexwa ngëxmaxũ! ¿Tama ëxna curü gáuxũchirutüchi yixixũ i ñaa? Rü ngëmawa nüxũ cucuax nax marü chi cuxũ nax chimáxũ. Rü ngëmawa nüxũ cucuax, Pa ãëxgacüx, nax taxuxũma i chixexũ cumaxã chaxüxchaũxũ, rü tama chanaxwaxexũ nax chacuechitaexũ rü bai i ñuxgu taxacürü chixexũ cumaxã chaxüxũ. Natürü i cumax, Pa ãëxgacüx, rü chowe quingëchigü nax choxũ quimáxũcax. <sup>12</sup>iRü Tupana nangugü i ngëma

yigümaxã ixüxũ! Rü nüma nixĩ i nüxũ nacuáxũ i taxacü tá cumaxã naxüxũ, natürü i chomax, Pa ãëxgacüx, rü tagutáma taxacürü chixexũ cumaxã chaxü —ñanagürü.

.....

<sup>16</sup>Rü yexguma Dabí rü chianegu nax yadexaxũ, rü nüma ga Chaú rü tagaãcü nanangãxũga rü ñanagürü: —¿Ëxna cuma quixixũ, Pa Chaunex, Pa Dabíx, i chomaxã quidexaxũ? —ñanagürü. Rü ñuxüchi inanaxügü ga nax naxaxuxũ. <sup>17</sup>Rü ñanagürü Dabíxũ: —Ngëma cuma nüxũ quixuxũ nixĩ i aixcuma ixixũ. Erü cuma rü mexũ choxũ cudauxëxë nax woo chixexũ cumaxã chaxüxũ i chomax. <sup>18</sup>Rü ñuxma rü aixcümamaxüchi choxũ cunawex nax cuma rü naxçax cudauxũ nax mexũ chomaxã cuxüxũ. Erü nüma ya Cori ya Tupana rü marü cuxmexgu choxũ nanguxëëchirëx nax choxũ quimáxũcax, natürü tama choxũ quimax. <sup>19</sup>Rü aixcuma nixĩ i nataxuxũma i duũxũ i norü uanüxũ maxëëxũ ega naxmëxëgu nanguxgu. Rü ngëmacax i Tupana cuxũ naxütanü naxçax i ngëma mexũ i ñuxma chomaxã cuxüxũ! <sup>20</sup>Rü ñuxmawaxi nixĩ i aixcuma nüxũ chicuaxãchixũ nax cuma tá yixixũ i Iraéanecüãxgüarü ãëxgacü quixixũ. Rü cuma tá nixĩ i namaxã icucuáxũ, rü cuxmëxwa mea tá Iraéanecüãxgüxũ nangupetü. <sup>21</sup>iRü ëcü Tupanaégagu chomaxã nüxũ ixu rü tagutáma cuyanaxoxëxë i ngëma chautaaügü nax ngëmaãcü tagutáma iyanaxoxüçax i chauéga i chautanüxũgütanüwa! —ñanagürü. <sup>22</sup>Rü nüma ga Dabí rü Tupanaégagu Chaúmaxã inaxuneta. Rü yemawena ga nüma ga Chaú rü

napatacaḡ natáegu. Rú nůma ga Dabí rű norű churaragűmaxã wenaxarű yema maḡpűnearű äxmaxűwa naxű.

.....

**Dabí rű wenaxarű tama Chaűxű nimãx**

**26** <sup>1</sup>Rű yema duűxűgű ga İane ga Chígu ächiűgűxű rű Gabáawa naxĩ ga Chaű İyexmaxűwa rű ñanagűrűgű nüxű: —Dabí rű maḡpűne ya Aquirágu nicux i ngěma taxűema İxãchiűxűarű toḡmaḡtawa —ñanagűrűgű. <sup>2</sup>Rű yexguma ga Chaű rű inaxűãchi namaxã ga 3,000 ga Iraėanecűãxgiarű churaragű ga nüxű rűcuaxmaegűxű ga daiwa, rű Chíarű chianexűwa naxĩ nax Dabícax yadaugűxűcax. <sup>3</sup>Rű nůma ga Chaű rű norű churaragűmaxã maḡpűne ya Aquirá ga namacűwawa yexmanegu nayape ga yema chianexűarű toḡmaḡtawa. Natürű nůma ga Dabí ga yema chianexűwa nax nayexmaxű, rű nüxű nacuax ga Chaű nawe yema nax ngěxű. <sup>4</sup>Rű yemaçax ga Dabí rű ngugűtaeruűgű yema namugű nax nüxű nacuaxűcax ga ngextá nax nayexmaxű ga Chaű. <sup>5</sup>Rű yemawena ga Dabí rű Chaű İyexmaxűwa naxű, rű nayangugű nax ngexta napegűxű ga Chaű rű Abnéx ga Néx nane ga Chaűarű churaragiarű äëxgacű. Rú nůma ga Chaű rű norű duűxűgiarű ngãxűtanűgu nape. <sup>6</sup>Rű yexguma ga nůma ga Dabí rű nidexa namaxã ga Aimėre ga İtítatanűxű İxícű, rű Abichái ga Cheruá nane ga Yoáenexě. Rú yemagűna naca rű ñanagűrű: —İTexė ya İmemarexe nax chowe tarűxűxű nax Chaű İngexmaxűwa İxixű? —ñanagűrű. Rú nůma ga Abichái

nanangãxűga rű ñanagűrű: —Choma tá cuwe charűxű —ñanagűrű. <sup>7</sup>Rű yematama ga chűtaxűgu ga Dabí rű Abichái rű yema Chaű İyexmaxűwa naxĩ. Rú nůma ga Chaű rű norű churaragiarű ngãxűtanűgu nape rű norű wocae rű naeruxűtaguama napu. Rú nůma ga Abné rű norű churaragűmaxã nüxű İnacamaeguãchi. <sup>8</sup>Rű yexguma ga Abichái rű Dabixű ñanagűrű: —Ñuxma ya Tupana rű cuxű nanatauxchaxěxě nax cuyamáxűcax i curű uanű. Chayamaḡtaxax nixĩ, rű norű wocamaxátátama mairaxűanewa chayapaitű, rű marű ngėmamaxã tátama nayu —ñanagűrű. <sup>9</sup>Natürű nůma ga Dabí rű nanangãxűga rű ñanagűrű: —İTaxű i cuyamáxű! Erű texė ya yıxema yamáxe i ngěma äëxgacű i Tupana nüxű unetaxű, rű Tupana rű tautáma nanangupetűxěmare nax tűxű napoxcuxű. <sup>10</sup>Rű Cori ya Tupanaėgagu cumaxã nüxű chixu rű nůma ya Tupana tá nixĩ i norű maxű nüxna nayaxuxű, rű woetátama nayuxěmareã rűexna daigu nayuxěxě. <sup>11</sup>İRű Cori ya Tupana choxű rűngűxěxě nax tama nagu charűxĩnüxűcax nax chayamáxű ya yimá äëxgacű ya nűmatama ya Cori ya Tupana nüxű unetacű! İRű nayaxu ya yima wocae ya naeruxűtagu puxucű rű ngěma dexápaxű, rű ngixã İtixĩ! —ñanagűrű. <sup>12</sup>Rű yemaacű ga Dabí rű nanayaxu ga guma wocae rű dexápaxű ga Chaűeruxűtagu nuxű, rű İnixĩ. Rú taxuxűma nüxű nadau rű bai nüxű naxĩnü. Rú taxuxűma nabaixãchi. Rú guxűma napeexűchi, yerű Cori ya Tupana nanapeexěxěxűchi. <sup>13</sup>Rű yemawena ga Dabí rű naműcű rű yema

ngatexũarũ tocutũwa naxĩ rũ wũxi ga maḡpũnetapexegu naxĩgũ, rũ yemaacũ nũxna niyáxũtanũáchi. <sup>14</sup>Rũ yexguma ga Dabĩ rũ tagaãcũ Abnéna rũ norũ churaragũna nacagũ, rũ ñanagũrũ: —iPa Abnéx, choxũ nangãxũga! —ñanagũrũ. Rũ nũma ga Abné rũ nanangãxũga rũ ñanagũrũ: —¿Texé quixĩ i cumax ecaḡ tagaãcũ ãẽxgacũna cucaxaxũ? —ñanagũrũ. <sup>15</sup>Rũ Dabĩ nanangãxũga rũ ñanagũrũ: —¿Tama ẽxna cuma quixĩxũ i guxũma i Iraéanecũãxgũarũ churaragũmaxã icucuáxũ? ¿Rũ ñũxãcũ tama mea nũxna cudauxũ ya curũ cori ya ãẽxgacũx? Erũ wũxi i duũxũ ngẽxma naxũcu nax yamáaxũcax. <sup>16</sup>Rũ tama name i ngẽma cuxũxũ. Choma rũ Cori ya Tupanaégagu cumaxã nũxũ chixu rũ name nixĩ nax cuyuxũ, erũ tama mea nũxna cudau ya curũ ãẽxgacũ ya Cori ya Tupana nũxũ unetacũ. iNaxcax nadau ya norũ wocae rũ norũ dexapaũ ga naeruxũtaguama nuxũ, rũ ngoxita ngextá nũxũ cuyangaux! —ñanagũrũ. <sup>17</sup>Rũ yexguma Chaú nũxũ cuaxgu nax Dabĩ yixĩxũ ga yéma idexaxũ, rũ tagaãcũ yexma nacagũ rũ ñanagũrũ: —¿Ëxna cuma quixĩxũ, Pa Chaunex, Pa Dabĩx? —ñanagũrũ. Rũ nũma ga Dabĩ rũ nanangãxũga rũ ñanagũrũ: —Ngũ, Pa ãẽxgacũx, choma chixĩ. <sup>18</sup>¿Natũrũ tũxcũ chowe quingẽchigũ Pa ãẽxgacũx, i choma nax curũ duũxũ chixĩxũ? ¿Rũ taḡxacũ chaxũ? ¿Rũ taḡxacũrũ chixexũ cumaxã chaxũ? <sup>19</sup>Choma i curũ duũxũ nax chixĩxũ rũ cuxũ chacaxũ Pa ãẽxgacũx nax choxũ cuxĩnũxũ. Rũ ngẽxguma chi Tupana cuxna ñũgu, Pa ãẽxgacũx, nax chomaxã curũxuanũxũcax irũ nayaxu i chorũ

ãmare nax chomaxã curũngũxmũxũcax! Natũrũ ngẽxguma chi cumatama nax curũxĩnũgu nax chauxchi cuxaixũ, rũ Tupana tá nixĩ ya nũxũ cuácũ nax cuxũ naxũtanũáxũ naxcax i ngẽma. Yerũ cuma nixĩ ga Tupanaarũ duũxũgũarũ naanewa choxũ ícutaxũchixũ nax ngẽmaãcũ togũ i tupanaxũ chicuaxũxũcax. <sup>20</sup>Rũ tama chanaxwaxe i Tupanaarũ duũxũgũarũ naanearũ yáxũgu chayu i ngextá togũ i tupanaxũ íyacuaxũũgũxũwa. Natũrũ i cumax, Pa ãẽxgacũx, rũ ñoma wũxi i airuchicax idauxũrũxũ chauxcax cudau rũ ñoma wũxi i ngugacax idauxũrũxũ chowe quingẽchigũ i daa maḡpũnegũwa —ñanagũrũ. <sup>21</sup>Rũ yexguma ga Chaú rũ ñanagũrũ: —Pa Chaunex, Pa Dabĩx, rũ nũxũ chicuaxãchi nax chixexũ chaxũxũ. Rũ ñoma wũxi i duũxũ i ngeãẽmarexũrũxũ chamaxũ, rũ poraãcũ íchatũ. iËcũ natáegu, rũ taxuxũtáma i chixexũ cumaxã chaxũ! Erũ ñoma i ngunexũgu rũ nũxũ cungechaũ i chorũ maxũ, rũ tama choxũ quimax —ñanagũrũ. <sup>22</sup>Rũ nũma ga Dabĩ rũ nanangãxũga, rũ ñanagũrũ: —Daa nixĩ ya curũ wocae, Pa ãẽxgacũx irũ wũxi i curũ duũxũ nua ũ nax yayauãxũcax! <sup>23</sup>iRũ Tupana tũxũ naxũtanũ ya wũxiéchigũ naxcax i ngẽma mexũ nax taxũxũ rũ ngẽma nax tixaixcumaxũ! Erũ choma rũ ñoma i ngunexũgu rũ tama cuxũ chimáxchaũ ga yexguma Tupana choxũ natauxchaxẽegu ga cuxũ nax chimáxũcax. <sup>24</sup>Rũ ngẽma nax ñũxma curũ maxũxũ changechaũxũrũxũ rũ tama cuxũ nax chimáxũ, Pa ãẽxgacũx, rũ ngẽxgumarũxũ ta chanaxwaxe i Cori ya Tupana nũxũ nax ngechaũxũ i chorũ

maxũ rü nawa choxũ ínanguxuchixêêxũ  
i guxũma i ñaa guxchaxũgü —ñanagürü.  
25Rü yexguma nüma ga Chaú rü tagaãcü  
ñanagürü: —iTupana cuxũ rüngũxêxê,  
Pa Chaunex, Pa Dabíx! Rü taxũ i mexũ  
tá cuxü, rü guxũwatáma mea cuxũ  
ínanguxuchi —ñanagürü. Rü yemawena  
ga Chaú rü nachiũcax natáegu. Rü nüma  
ga Dabí rü Nixonchigüama.

.....

**Chaú rü Eüdüwa naxü ngixütawa  
ga wüxi ga ngecü ga yuücü**

**28** 3Rü yexguma ga Chamué rü  
marü nayu. Rü guxũma ga  
Iraéanecüãxgü rü naxcax naxauxe, rü  
yemawena rü guma íane ga nagu  
nabuxüne ga Ramágu nanatãxgü. Rü  
nüma ga Chaú rü ga ũpaacü marü  
ínanawoxũ ga guxũma ga yema  
êxũguxũxũ cuãxgũxũ rü yema  
yuetaãëgücax ngëmagũxũ. 4Rü nüma ga  
Piritéutanüxũgüarü churaragü rü  
nangutaquexegü rü Chunéüwa naxí rü  
yexma nayapegü. Rü nüma ga Chaú rü  
guxũma ga Iraéanecüãxgüarü  
churaragũxũ nangutaquexexêxê rü  
Yibóagu nügü ninu. 5-6Natürü nüma ga  
Chaú rü yexguma yema  
Piritéutanüxũgüarü churaragũxũ  
nadauxgu, rü poraãcü nabãixãchi rü  
namuũ. Rü Tupanana naca ga taxacü tá  
nax naxũxũ. Natürü nüma ga Tupana rü  
tama nanangãxũga woo nanegüwa, rü  
woo yema cuãxruxũ ga  
chacherdótegüarü ãëxgacü ingexũ ga  
Urfüwa, rü woo Tupanaarü orearü  
uruũgüwa. 7Rü yemaçax ga Chaú rü norü  
churaragũxũ namu rü ñanagürü: —IËcü  
ngĩcax pedãux i wüxi i nge i nüxũ

cuãxcü nax yuetacãx nangemaxũ, nax  
ngéma chaxũxũcãx, rü ngĩxna  
chayacãxaxũcãx! —ñanagürü. Rü nüma  
ga churaragü rü nanangãxũgü rü  
ñanagürügü: —Rü Eüdüwa ingexma i  
wüxi i nge i nüxũ cuãxcü nax yuetacãx  
nangemaxũ —ñanagürügü. 8Rü nüma ga  
Chaú rü nügü nanatoxchiruraxũxêxê, rü  
taxre ga namücügü ínigagü, rü chütacü  
yema ngexütawa naxü, rü ñanagürü  
ngĩxũ: —Namaxã chidexachaũ i wüxi i  
duũxũ i yuxũ. ¿Rü curũ natauxchaxũ i  
naãxêcãx nax cungemaxũ? —ñanagürü.  
9Rü ngĩma ga yema nge rü inangãxũ rü  
ngĩgürügü: —¿Taxacü nixí? ¿Ëxna  
cunaxwãxe nax choxũ yamaçgũxũ?  
Cuma nüxũ cucuãx ga Chaú rü guxũma  
ga yema êxũguxũxũ cuãxgũxũ rü duũxê  
ga yuetacãx ngëmagũxũ rü nanadai.  
Cuma rü wüxi i ngügütaeruümare quixí  
—ngĩgürügü. 10Natürü nüma ga Chaú rü  
Cori ya Tupanaégagu ñanagürü ngĩxũ:  
—Tupanaégagu cumaxã nüxũ chixu rü  
taxutáma i taxacü cuxũ nangupetü  
—ñanagürü. 11Rü ngĩma ga yema nge rü  
inangãxũga rü ngĩgürügü: —¿Rü texé  
cutümawãxe nax tũmacãx changemaxũ?  
—ngĩgürügü. Rü nüma ga Chaú rü ngĩxũ  
nangãxũga rü ñanagürü: —iChamuécãx  
nangema! —ñanagürü. 12Rü ngürüãchi  
ga yema nge rü Chamuéxũ idau, rü aita  
ixü. Rü ñuxüchi Chaúxũ ngĩgürügü:  
—¿Tüxcüü choxũ cuwomüxêxê? Cuma rü  
Chaú quixí —ngĩgürügü. 13Natürü nüma  
ga ãëxgacü rü ñanagürü ngĩxũ: —iTaxũ i  
cumuũxũ! ¿Taxacüxũ cudau?  
—ñanagürü. Rü ngĩma ga nge rü  
inangãxũga rü ngĩgürügü: —Nüxũ  
chadau i wüxi i tupana i ñoma i naanewa  
chüxnagũxũ —ngĩgürügü. 14Rü nüma ga

Cháu rü ñnaca rü ñnanagürü:  
 —¿Nañuxraxüxü? —ñnanagürü. Rü ngïma  
 ga yema nge rü inangãxüga rü ngïgürügü:  
 —Wüxi i yaxguax i maxpaxü nixi  
 —ngïgürügü. Rü nüma ga Chaú rü  
 yexgumatama nüxü nicuaxãchi ga  
 Chamué nax yixüxü. Rü ñnaxtúanegu  
 nanangücuchi. <sup>15</sup>Rü yexguma ga Chamué  
 rü ñnanagürü: ¿Taxacücax i choxü  
 cuchixewexü rü nua choxü cuxüxëxü?  
 —ñnanagürü. Rü nüma ga Chaú  
 nanangãxüga rü ñnanagürü: —Poraäcü  
 chaxoëgaãxë, erü nüma i Piritétanüxügü  
 rü toxçax ñnayaxüächi, natürü nüma ya  
 Tupana rü marü choxna nixügachi rü  
 tama choxü nacuáxchaü, rü tama choxü  
 nangãxüga i orearü uruügüwa rüexna  
 chaunegüwa. Rü ngëmacax nixi i cuxçax  
 changemaxü nax cuxna chacaxaxüçax  
 nax taxacü tá chaxüxü —ñnanagürü. <sup>16</sup>Rü  
 nüma ga Chamué nanangãxüga rü  
 ñnanagürü: —¿Tüxçü choxna cuca ega  
 Tupana rü marü cuxü naxoxgu rü curü  
 uanüxü nügü yaxixëëgu? <sup>17</sup>Rü Cori ya  
 Tupana cumaxã nayanguxëxë ga yema  
 chowa cumaxã nüxü yaxuxü. Rü cuxna  
 nanayaxu nax äëxgacü quixüxü rü yimá  
 naxchi cuxaicü ya Dabína nanaxã. <sup>18</sup>Rü  
 ngëmaäcü cumaxã naxüpetü ya Tupana,  
 yerü tama naga cuxinü ga yema cuxü  
 namuxüwa rü tama cuyanguxëxë ga  
 Amaléxtanüxügüxü nax cudaxü. <sup>19</sup>Rü  
 ngëmacax i nüma ya Tupana rü tá  
 Piritétanüxügümëxëgu pexü nayixëxë i  
 cuma rü cunegü rü guxüma i  
 Iraéanecüãxgüarü churaragü. Rü tá pexü  
 nadai rü ngëmacax i moxü i cuma rü  
 cunegü rü nua chauxütawa tá marü  
 pengexmagü. Rü ngëmawena rü ngëma  
 Piritétanüxügü rü tá pexna nanapuxü i

guxüma i taxacü pexü ngëxmaxü i cuma  
 rü curü churaragü —ñnanagürü. <sup>20</sup>Rü  
 yexguma yema Chamuéarü orexü  
 naxinügu ga Chaú, rü poraäcü namaxã  
 nabaixãchiãxë rü yexma niyuächi rü  
 ñnoma wüxi ya nai i wãxünerüxü niwax.  
 Rü naétü rü naturaxüne yerü taguma  
 nachibü ga wüxi ga ngunexü rü wüxi ga  
 chütaxü. <sup>21</sup>Rü yexguma Chaúxü  
 nadauxgu ga yema nge ga ñuxäcü nax  
 naxixãchiãxü, rü naxçax iyaxü rü  
 ngïgürügü nüxü: —Choma nax curü  
 duüxü chixüxü rü marü chanaxü i ngëma  
 naxçax icuçaxü. Rü woo äüctümaxüwa  
 nangexma i chorü maxü rü chanaxüama i  
 ngëma choxü cumuxü. <sup>22</sup>Rü ngëmacax i  
 ñuxma rü cuxna chaca nax choxü  
 icurüxünüxü. Rü írxaxü i ñna tá cuxna  
 chaxã nax ngëmaäcü cuporaxüçax nax  
 cutáeguxüçax —ngïgürügü. <sup>23</sup>Rü nüma  
 ga Chaú rü tama nachibüchãü, natürü ga  
 yema norü churaragü rü yema nge rü  
 nüxü içaxügüama, rü yemacax düxwa:  
 —Ngü —ñnanagürü. Rü yexgumatama  
 inachi ga ñnaxtúanegu nax nanguxü, rü  
 wüxi ga pechicaxüwa narüto. <sup>24</sup>Rü  
 yexgumayane ga ngïma ga yema nge rü  
 iyamax ga wüxi ga wocaxacü ga ingüxü  
 ga ngïchiüwa yexmaxü. Rü iyañumü ga  
 trígutëxe, rü paü ga ngearü puxëerüüxü  
 ta ixü. <sup>25</sup>Rü yemawena rü inaxüwemü ga  
 guma äëxgacü rü norü duüxügü. Rü  
 nümagü rü nachibüe, rü ñuxüchi  
 nawoegu yematama chütaxügu.  
 .....

#### Chaú rü nanegiarü yuxchiga

**31** <sup>1</sup>Rü nüma ga Piritétanüxügü  
 rü Iraéanecüãxgümaxã nügü  
 nadai, rü ga Iraéanecüãxgü rü



naxchaxwa nibuxmü. Rü namuxüchima ga Iraéanecüãxgü ga maxpúne ga Yibóagu yuexü. <sup>2</sup>Rü nüma ga Piritéutanüxügü rü Chaúwe rü nanegüwe nangégü rü tüxü nadai ga nanegü ga Yonatóü, rü Abinadá, rü Maquichúa. <sup>3-4</sup>Rü yemawena ga yema würotanüxü rü Chaúmaxã namechinügü, rü poraãcü nanapixëégü. Rü yemaçax ga Chaú rü norü poxüruüxü ñanagürü: —iCurü taramaxã choxü imax naxüpa nax choxü yayauxgüxü rü ngüxü choxü yangexëégüxü, rü choxü yamãxgüxü i ñaa Piritéutanüxügü i tama Tupanaxü

cuãxgüxü! —ñanagürü. Natürü nüma ga yema norü poxüruxü rü tama nayamáxchaü, yerü nüxü naxãücüma. Rü yemaçax ga nüma ga Chaú rü norü tara nayaxu rü yemamagugu nügü naña rü yemaacü nitoxpetü rü nayu. <sup>5</sup>Rü yexguma yemaxü nadãuxgu ga yema norü poxüruxü, rü nüma rü ta norü taramagugu nügü naña rü Chaürüxü yemaacü nayu. <sup>6</sup>Rü yemaacü yematama ga ngunexügu nayue ga Chaú rü norü poxüruxü rü guma tomaepüx ga nanegü rü muxüma ga norü churaragü.  
.....

## 2 SAMUEL

### (2 Chamué)

Dabí rü nüxũ nacuáchiga ga  
nax nayuxũ ga Chaú

**1** <sup>1</sup>Rü yexguma Chaú yuxguwena, rü nüma ga Dabí rü ñane ga Chicláxcax natáegu ga marü Amaléxtanüxügüxũ nadaixguwena. Rü taxre ga ngunexũ yexma narüxãũx. <sup>2</sup>Natürü norü tomaepüx ga ngunexũgu, rü yéma Dabíxütawa nangu ga wüxi ga yatü ga Chaú norü churaragümaxã íyexmaxũwa ne üxũ. Rü norü ngechaũmaxã nügüchirugu nagáugü rü waixümümaxã nügü nabuxeru, rü yemaacü ínangu. Rü yexguma Dabípxewa nanguxgu rü ñaxtúanegu nanangücuchi. <sup>3</sup>Rü nüma ga Dabí rü nüxna naca rü ñanagürü: —¿Ngextá ne cuxü? —ñanagürü. Rü nüma ga yema yatü rü nanangãxũga rü ñanagürü: —Iraéanecüãxgüarü churaragü íngexmagüxũwa chiña —ñanagürü. <sup>4</sup>Rü nüma ga Dabí rü nüxna naca, rü ñanagürü: —¿Taxacü nangupetü? iChomaxã nüxũ ixu! —ñanagürü. Rü nüma ga yema duũxũ nanangãxũga rü ñanagürü: —Ngẽma Iraéanecüãxgüarü churaragü rü nibuxmü i ngẽma nügü

ínadaixũwa, rü muxũma ngẽxma nayue. Rü ngẽxma ta nayu i Chaú rü nane i Yonatóũ —ñanagürü.

.....

<sup>11</sup>Rü nüma ga Dabí rü yema norü duũxũgü rü yexguma yema orexũ naxĩnüegu rü norü ngechaũmaxã nügüchirugu nagáugü. <sup>12</sup>Rü poraãcü nangechaũgü rü naxauxe naxcax ga Chaú rü nane ga Yonatóũ. Rü yexgumarüxũ ta naxcax naxauxe ga yema muxũ ga churaragü ga Iraéanecüãxgü ga yuexũ. Rü yemacax tama nachibüe ñuxmata nayáuanemare. ....

Dabíxũ naxunetagü nax  
Yudáanearü ãëxgacü yixĩxũcax

**2** <sup>1</sup>Rü yemawena rü nüma ga Dabí rü Cori ya Tupanana naca rü ñanagürü: —¿Yudáanecax tá chatáeguxũ? —ñanagürü. Rü nüma ga Cori ya Tupana nanangãxũga rü ñanagürü: —Ngĩ, name nixĩ i ngẽma cuxü —ñanagürü. Rü yexguma ga Dabí rü ínaca rü ñanagürü: —¿Ngextá tá chaxũxũ? —ñanagürü. Rü nüma ga Cori ya Tupana nanangãxũga rü ñanagürü:

—Īane ya Ebróŭwa —ñanagürü. <sup>2</sup>Rü yexguma ga Dabí rü yéma Ebróŭwa naxü ngĩmaxã ga yema taxre ga naxmaḡ ga Ainóañ ga ĩane ga Yerécüãx, rü Abigái ga Cármeciãx ga yutecü ga Nabá naxmaḡ ixĩchirexcü. <sup>3</sup>Rü yéma nanagagü ta ga norü churaragü natanüxügümaxã, rü Ebróŭgu nayaxãchiügü. <sup>4</sup>Rü yemawena ga Yudácüãxgüarü ãëxgacügü rü yéma nangugü, rü Dabíxü chíxümaxã nabaerugü rü Yudáanearü ãëxgacüxü nayangucuchixëëgü.

.....

**Dabí rü guxüma ga Iraéanecüãxgüarü ãëxgacüxü ningucuchi**

**5** <sup>1</sup>Rü moxüãcüamachigü rü wüxichigü ga Iraéanecüãxgütücumüarü ãëxgacü rü Ebróŭwa naxí, rü Dabímaxã narüdexagü rü ñanagürügü: —Toma rü cutanüxüxüchi tixigü. <sup>2</sup>Rü yexguma Chaú Iraéanearü ãëxgacü ixĩxgu, rü cuma nixí ga aixcümama tomaxã icucuáxü. Rü nüma ga Tupana rü nüxü nixu nax cuma tá quixixü i toxna cudauxü rü guxüma i Iraéanecüãxgüarü ãëxgacü tá quixixü —ñanagürügü. <sup>3</sup>Rü yemaacü ga yema duüxügü rü Dabímaxã nindexagü ga Ebróŭwa. Rü nüma ga Dabí rü Cori ya Tupanapexewa yema duüxügümaxã inaxüga. Rü nüma ga yema duüxügü rü Dabíxü chíxümaxã nabaerugü rü yemaacü guxüma ga Iraéanecüãxgüarü ãëxgacü nixí. <sup>4</sup>Rü nüma ga Dabí rü nüxü nayexma ga 30 ga taunecü ga yexguma ãëxgacüxü yangucuchigu. Rü 40 ga taunecü nixí ga ãëxgacü yixixü. <sup>5</sup>Rü Ebróŭwa rü 7 ga

taunecüarü ngãxü nixí ga Yudáanearü ãëxgacü yixixü. Rü yemawena rü nüma ga Dabí rü guxüma ga Iraéanearü ãëxgacü nixí ga 33 ga taunecü ga Yerucharéŭwa. <sup>6</sup>Rü nüma ga ãëxgacü ga Dabí rü norü churaragümaxã Yerucharéŭwa naxí nax naxcaḡ íyaxüãchixücãx ga yema Yebuchéutanüxügü ga yema naanegu ächiügüxü. Rü nüma ga Yebuchéutanüxügü rü nagu narüxĩnue nax taxütama Dabíaxü natauxchaxü ga guma ĩanegu nax naxücuxü. Rü yemaçax ñanagürügü nüxü: —Cuma rü taxütama nuxã cuxücu erü woo ngëma ingexetüxü rü ichixeparaxü rü ningu nax ĩnapoxügüãxü ya daa ĩane nax tama nagu cuxücuxücãx —ñanagürügü. <sup>7</sup>Natürü nüma ga Dabí rü norü churaragümaxã nagu naxigüama ga guma maḡpúne ga Chióŭ ga yema ĩanecüãxarü churaragü nagu ächiügüne rü nüxna nayapu. Rü ngëmacãx nixí i ñuxma i Dabíarü ĩane ñaäcü naxugüãxü. <sup>8</sup>Rü yexguma Dabí nüxü ĩnügu ga yema Yebuchéutanüxügü ga nüxü nax nacugüexü, rü norü churaragüxü ñanagürü: —Ngëma Yebuchéutanüxügü i chixri tachiga idexagüxü rü naxchi chaxai. iRü yima ĩanearü dexá nagu iyaxüwa pichocu rü penadaḡx i ngëma ĩanecüãxgü i Yebuchéutanüxügü i nügütama ixugüexü nax yangexetüxü rü yachixeparaxü! —ñanagürü. (Rü ngëma nixí i ne naxüxü i ngëma dexa i ñaxü: “Rü tama chanaxwãxe i ngëma ingexetüxü rü ichixeparaxü nax chopatagu nachocuxü”, ñaxü.) <sup>9</sup>Rü yemawena ga Dabí rü guma maḡpúne ga Chióŭwa ngexmane ga ĩanegu

nanaxü ga napata nax yéma norü churaragümaxã nayexmaxüçax. Rü guma ñane rü Dabíarü Ñanegu nanaxüéga. Rü nanaxütapüxgü ga guxüwama. Rü Míloarü dauxütaechicawa inanaxügü, rü ñanewaama nanadaxêxê ga naxtapüx ñuxmata ãëxgacüpatawa nangu. <sup>10</sup>Rü nüma ga Dabí rü yexeraãcü niporachigü yerü ga Tupana ya guxüétüwa ngëxmacü rü nüxü narüngüxê. <sup>11</sup>Rü yemacax ga Iráü ga ñane ga Tíruarü ãëxgacü ixícü rü Dabíxütawa nanamugü ga ñuxre ga norü ngüxêruüügü nax Dabímaxã yanadexagüxüçax. Rü ñuxüchi yéma nanamugü ta ga yatügü ga nüxü icuáxü ga nutaarü mexêcüwagü rü corapínagü. Rü yema duüxügü rü yéma nanana ga mürapewagü ga ocayiwanaxçax nax yemamaxã naxügüaxüçax ga guma Dabípata.

.....

**Tupana nüxü nixu nax  
Dabíxü tá nangüxêxü**

**7** <sup>1</sup>Rü yexguma nüma ga ãëxgacü ga Dabí nawa üxgu ga guma ípata ya ãëxgaciärü ixíxüne, rü Cori ya Tupana nanangüxmüxêxê namaxã ga guxüma ga norü uanügü ga Iraéanena ngaicamagüxü. <sup>2</sup>Rü nüma ga Dabí rü guma Tupanaarü orearü uruxü ga Natáüxü ñanagürü: —iDüçax i choma rü wüxi ya mexechine ya ípata ya ocayiwanaxçax ixínegu chape! Natürü ngëma baú i Tupanaarü mugü nawa ngëxmagüxü rü wüxi ya ípata ya naxchirunaxçaxwa nangexma —ñanagürü. <sup>3</sup>Rü nüma ga Natáü rü

ñanagürü: —iËcü naxü i ngëma nagu curüxínüxü! Erü Cori ya Tupana rü ínamemare nax cuxü nangüxêxêxü —ñanagürü. <sup>4</sup>Natürü yema chütaxügu ga Tupana rü Natáüxü ñanagürü: <sup>5</sup>—iChorü duü ya Dabímaxã idexa rü namaxã nüxü i xu i choma i Cori ya Tupana nax chixíxü rü ñacharügü: “Taxütáma nüma nixí i çaxçax naxüaxü ya yima ípata ya nawa tá changexmane! <sup>6</sup>Rü yexguma noxritama Equítuanewa íchanangüxüxêxügu ga Iraétanüxügü, rü yexgumacürüwa rü taguma wüxi ga ípata ga mürapewanaxçaxtüüwa chayexma, natürü ípata ga naxchirunaxçaxtüüwa nixí ga chayexmaxü. <sup>7</sup>Rü gucüma ga guma taunecügü ga nagu Iraétanüxügümaxã ichixücü, rü taguma nüxna chaca ga wüxi ga norü ãëxgacü nax çaxçax wüxi ga ípata ga ocayiwanaxçax naxüxü woo choma nax chayangucuchixêxê ga yema ãëxgacügü nax Iraétanüxügümaxã inacuáxüçax. <sup>8</sup>Rü ngëmacax inamaxã nüxü i xu ya chorü duü ya Dabí rü choma ya Cori ya Tupana ya guxäétüwa ngëxmacü, rü ñacharügü nüxü! ‘Yexguma carnérgüarü dauruxü quixíxgu rü yéa naanewa nüxna cudaxügu, rü choma cuxü chayaxu nax ñaa chorü duüxügü i Iraétanüxügüarü ãëxgacü nax quixíxüçax. <sup>9</sup>Rü cuxü íchixümücü ga ngextá ícuxüxüwa, rü cuxü nüxü charüporamaexêxê ga guxüma ga curü uanügü ga cumaxã nügü daxü. Rü cuxü chatachigaxêxê nax wüxi ya ãëxgacü ya aixcüma tacü quixíxü i ñoma i naanewa. <sup>10-11</sup>Rü ñuxmachi wüxi ga naane marü nüxna chaxã ga yema chorü duüxügü i

Iraétanüxügü. Rü yéma chanangugüxëxë nax noxrü yixüçax ga yema naane. Rü woo norü uanügü nagu nidauxcüraxügü, rü nanachixewegü ga yexguma Yochuéwena nüxü chaxunetagu ga äëxgacügü ga guxchaxüarü mexëëruügü, natürü i ñuxma rü cumexwa chanangexmaxëxë i ngëma Iraéanecüäxgü nax namaxä icucuáxüçax rü taxúema nagu idauxcüraxüçax rü taxúema nachixewexüçax. Rü marü nataxutáma i curü uanügü i cuxü rüporamaexü, rü ngëma cutaxagü tá nixí i ngëma chorü duüxügümaxä icuäxgüxü. <sup>12</sup>Erü ngëxguma cuma tá cuyuxgu, rü wüxi ya cune tá chanamu nax Iraéanecüäxgüarü äëxgacü yixüçax. Rü ngëma äëxgacü rü tá napora erü choma tátama chanaporaxëxë. <sup>13</sup>Rü nüma tá nixí i wüxi ya chopata naxüxü. Rü choma rü guxügütáma nüxü charüngüxëxë nax duüxügümaxä inacuáxüçax. <sup>14</sup>Choma rü tá nanatü chixí rü nüma rü tá chaune nixí. Rü ngëxguma nüma chixexü naxüxgu, rü choma rü tá to i nachixüanecüäxgüxü chamu nax napoxcugüaxüçax. <sup>15</sup>Natürü tagutáma nüxü charüchau nax nüxü changechaüxü, rü tagutáma nüxü chaxo yema Chaüxü chaxoxürüxü rü yemacax nachicüxü cuxü chimucuchi i cuma i Dabí' —ñanagürü ga Tupana. ....

#### Dabí rü Mepibochéxü narüngüxëxë

**9** <sup>1</sup>Rü wüxi ga ngunexügu ga Dabí rü ínaca rü ñanagürü: —¿Rü tayíxemaxü ya wüxíe ya Chaútanüxü i ñuxma rü ta ngextá maxüxe? Erü

ngëxguma tayíxemagu rü Yonatáüégagu tüxü charüngüxëxëchaü —ñanagürü. <sup>2</sup>Rü yexguma Dabí nüxü cuäxgu ga nax nayexmaxü ga wüxi ga yatü ga Chífbagu äëgacü ga Chaúarü duüxü ixícü, rü nüma ga Dabí rü naxcax nangema nax naxütawa naxüxüçax. Rü yexguma Chíba Dabíxütawa üxgu, rü nüma ga äëxgacü rü nüxna naca rü ñanagürü: —¿Cuma nixí i Chíba quixíxü? —ñanagürü. Rü nüma nanangäxüga rü ñanagürü: —Ngü, Pa Chorü Äëxgacüx —ñanagürü. <sup>3</sup>Rü yexguma ga nüma ga äëxgacü rü nüxna naca rü ñanagürü: —¿Tangexmaxü ya maxüxe ya Chaútanüxüwa íyaxüxe? Rü ngëxguma tangexmagu, rü Tupanaégagu chayangüxëxëchaü i ngëma nagu charüxínüxü nax ngëmaäcü nüxü chanawëxüçax nax choxü nangechaütümüxüxü —ñanagürü. Rü nüma ga Chíba rü nanangäxüga rü ñanagürü: —Nangexma nixí ya wüxi ya Yonatáü nane ya norü guxüneparawa chixecü —ñanagürü. <sup>4</sup>Rü nüma ga äëxgacü rü ñanagürü: —¿Ngextá inangexmaxü? —ñanagürü. Rü nüma ga Chíba nanangäxüga rü ñanagürü: —Lodebáwa nixí i nangexmaxü i Maquí ya Amié nanepatawa —ñanagürü. <sup>5</sup>Rü yexguma ga nüma ga äëxgacü ga Dabí rü nanamu ga yema ínayexmaxüwa nax yagagüaxüçax. <sup>6</sup>Rü yexguma Dabíxütawa nanguxgu ga nüma ga Mepiboché ga Yonatáü nane ga Chaútaxa ixícü, rü napexegu nanangücuchi ga nüxü nax namoxëxüçax. Rü nüma ga Dabí rü nüxna naca rü ñanagürü: —¿Ëxna cuma quixíxü, Pa Mepibochéxü? —ñanagürü.

Rü nüma nanangãxũga rü ñanagürü:  
—Cuxmexwa changexma Pa Ñëxgacüx  
—ñanagürü. <sup>7</sup>Rü nüma ga Dabí rü  
ñanagürü nüxũ: —iTaxucaxma cumuũ!  
Erü choma rü meatáma cumaxã  
ichacuax cunatu ga Yonataúëgagu. Rü  
tá chanamu nax cuxũ  
natáeguxëëgüaxũcax i guxũma i ngëma  
naane ga curü oxí ga Chaúarü ixixũ. Rü  
guxũgutáma chorü mecha i choma  
íchachibüxüwa tá cuchibü —ñanagürü.  
<sup>8</sup>Natürü nüma ga Mepiboché rü  
ãëxgacüpëxegu nanangücuchi rü  
ñanagürü nüxũ: —çTüxcüü chaugu  
curüxnü i choma i curü duüxũ chixixũ,  
Pa Ñëxgacüx, ega ngëxguma taxuwama  
cuxũ chamexgu? —ñanagürü.

.....

<sup>13</sup>Rü yemawena ga nüma ga  
Mepiboché ga guxũneparawa chixecü rü  
Yerucharéügu naxächüü, yerü guxũguma  
ãëxgacüarü mechawa nachibü.

.....

### Dabí rü Bechabé

**11** <sup>1</sup>Rü guma tauemacügu ga  
yexguma taunecüwa  
nanguxchaũgu, rü yexguma nixí ga  
ãëxgacügü ga ínachoxüxũ ga daiwa nax  
naxixũcax. Rü nüma ga Dabí rü norü  
churaragüarü ãëxgacü ga Yoáxũ namu  
nax yema norü churaragümaxã  
nadaiaxũcax ga Amóütanüxũgü. Rü  
guma Amóütanüxũgüarü ñane ga  
Rabáxũ ínachoeguächí. Natürü nüma ga  
Dabí rü Yerucharéügu narüxãũx. <sup>2</sup>Rü  
wüxi ga yáuanecü ga yexguma  
tocuchiguwena ngüwa ínadxgu ga  
Dabí, rü guma napataarü doétüxügu  
naxĩnagü rü yexma ínixüächixü. Rü

yexguma guma ñaneétü ínadawenügu,  
rü ngixũ nadau ga wüxi ga nge ga  
mexechicü ga yéma aiyacü. <sup>3-4</sup>Rü yema  
nge rü ngígü imexëxë, yerü yexwaca  
ngixcax nitaane ga ngírü  
daxawexũnewa. Rü nüma ga Dabí rü  
norü duüxũxũ namu nax ínacaxũcax  
nax texe yixixũ ga yema nge. Rü  
namaxã nüxũ nixugüe ga Bechabé ga  
Eriáüiacü ga Uría ga Itítatanüxũ naxmãx  
nax yixixũ. Rü yexguma ga Dabí rü  
ñuxre ga norü duüxũgüxũ namu nax  
ngixcax yacaxgüxũcax nax naxütawa  
naxüxũcax. Rü yexguma yéma  
naxütawa nanguxgu, rü nüma rü  
ngĩmaxã namaxũ. Rü yemawena ga  
ngĩma rü ngĩpatacax itáegu. <sup>5</sup>Rü ngĩma  
ga yema nge rü nüxũ ixãxaciü, rü  
yemacax Dabíxũ nüxũ icuaxëxë. <sup>6</sup>Rü  
yexguma ga Dabí rü wüxi ga poperagu  
Yoáxütawa nanamu ga ore ga ñaxũ:  
—iNua chauxütawa namu ya yimá  
Itítatanüxũ ya Uría! —ñaxũ. Rü  
yemaacü nanaxü ga Yoá. <sup>7</sup>Rü yexguma  
Uría Dabíxütawa nguxgu, rü nüma ga  
Dabí rü nüxna naca nax ñuxaciü nüxũ  
naxüpetüxũ ga Yoá rü yema norü  
churaragü, rü ñuxaciü iyaxüxũ ga yema  
nügü ínadaixüwa. <sup>8</sup>Rü yemawena ga  
Dabí rü ñanagürü: —iËcü, cuchiüwa  
naxü rü ngëxma yarüngü! —ñanagürü.  
Rü yexguma Dabíxütawa ínaxüxüxgu ga  
Uría, rü nüma ga Dabí rü Uríapatawa  
nanamu ga wüxi ga õna ga mexũ norü  
ãmarexü. <sup>9</sup>Natürü nüma ga Uría rü  
tama nachüüwa naxü. Rü  
ãëxgacüpataarü ñaxütagu nape naxütagu  
ga yema churaragü ga yéma  
daxütaegüxũ. <sup>10</sup>Rü yexguma Dabí  
nüxũ cuaxgu ga Uría rü tama nachüüwa

nax naxũxĩ, rü nüxna naca rü ñanagürü: —¿Taxacü cuxĩ nangupetü? ¿Tũxcüũ tama cuchiũgu cuyape woo nax ñuxre i ngunexũ ngextámare nax cungexmaxũ? —ñanagürü. <sup>11</sup>Rü nüma ga Uría nanangãxũga rü ñanagürü: —Ngẽma baú i Tupanaarü mugüchixũ rü Iraéanecüãxgüarü churaragü rü Yudáanearü churaragü rü düxenügütüũgumare napegü. Rü ngëxgumarüxũ ta ya Yoá ya chorü ãëxgacü, rü ngẽma ãëxgacügü i cutüũwa ügüxũ rü düxétüanegumare napegü. ¿Rü ñuxácü i choma rü chiarü chauxchiũgu chaxücuxũ, rü chachibüxũ, rü chaxaxexũ, rü chauxmãxũta chi chapexũ? Rü Tupanaégagu cumaxã nüxũ chixu rü tagutáma ngẽma chaxü —ñanagürü. <sup>12</sup>Natürü nüma ga Dabí rü nanamu ga yexmatama nax naxáũxũcãx rü ñanagürü: —iNuxmatama rüxãũx i ñuxmax rü chanaxwãxe i moxũ nax cutáeguxũ! —ñanagürü. Rü yemaacü ga Uría rü moxũácü rü ta Yerucharéũgu narüxãũx. <sup>13</sup>Rü nüma ga Dabí rü nüxna naxu nax namaxã nachibüxũcãx rü namaxã nax naxaxexũcãx, rü nanangãxëxë. Rü yexguma marü nachütagu ga Uría, rü ínaxüxü rü yema churaragü ga ídauxütaegüxũtanügu nayape, natürü tama nachiũwa naxü. <sup>14</sup>Rü moxũácü paãmama ga Dabí rü Yoáçãx popera naxümatü rü Uríamaxã yéma nanamu. <sup>15</sup>Rü yema poperawa rü ñanagürü: “iNgẽma napexegu ägüxũ i curü churaragümaxã yamu ya Uría i ngextá ngẽma tórü uanügüarü churaragü írüporamaegüxũwa nax naxũxũcãx! iRü ñyxũchi nüxica ngéma penatãx nax ngẽmaäcü

yapixëëgüaxũcãx rü ngëxma nayuxũcãx!” ñanagürü ga norü poperawa. <sup>16</sup>Rü yemaçãx ga Yoá ga yexguma guma íanexũ ínachoeguãchigu ga nügü nax nadaixũcãx, rü Uríaxũ namu nax ngextá norü uanügüarü churaragü írüporamaexũwa yaxũüchixũcãx. <sup>17</sup>Rü yexguma iyayixgu ga yema norü uanügü nax Yoáarü churaragümaxã nügü nadaixũcãx rü ínapoxũgüãxũcãx ga guma norü íane, rü yexma nayue ga ñuxre ga Dabíarü churaragüeru. Rü yematanüwa nayexma ga Uría. <sup>18</sup>Rü nüma ga Yoá rü Dabíxütawa nanamu ga popera ga nawa nüxũ yaxuxũ nax ñuxácü ínanguxuchixũ ga yema nügü ínadaixũwa. <sup>19</sup>Rü nanaxucuxë ga yema duũxũ ga orearü ngeruxũ, rü ñanagürü: —Ngëxguma quigüegagu nax ãëxgacümaxã nüxũ quixuxũ i nachiga nax ñuxácü ínanguxuchixũ nax yigü namaxã idãixũ i tórü uanügü, <sup>20</sup>rü ngürüãchi nüma ya ãëxgacü rü tá nanu rü cuxna tá naca rü ñanagürü tá: “¿Tũxcüũ nüxna pengaicamaxũchi ya yima íane? ¿Tama ëxna nüxũ pecuãx i norü poxeguruüétüwa nax pexũ ínamuxũchigüxũ namaxã ya nutagü i ngẽma tórü uanügü? <sup>21</sup>¿Tama ëxna nüxna pecuãxãchixũ ga yema nge ga Tébecüãx ga ãëxgacü ga Abimelé ga Yerubaá nanexũ imãxcü ga yexguma wüxi ga nuta ga caexũ naétü nañaxgu? Rü ngẽmacãx çtũxcüũ nüxna pengaicamaxũchi ya yima íanearü poxeguxũ?” ñaäcü tá cuxna naca. Rü ngëxguma i cuma rü tá cunangãxũga rü ñacurügü tá: “Ngëxma ta nixi i nayuxũ ya Uría ya Ítítatanüxũ ixicü, Pa Chorü

Āēxgacūx”, ñacurügü tá —ñanagürü ga Yoá. <sup>22</sup>Rü yema orearü ngeruxü rü yéma Dabíxütawa naxü. Rü yexguma yéma nanguxgu rü Dabímaxá nüxü nixu ga guxüma ga yema ore ga Yoá namaxá nüxü ixuxü. Rü nüma ga Dabí rü Yoámaxá nanu, rü yema orearü ngeruüxü ñanagürü: —¿Tüxcüü nüxna pengaicamaxüchi ya yima ñane? ¿Rü tama ēxna nüxü pecuax i norü poxeguruüētüwa nax pexü ínamuxüchigüxü namaxá ya nutagü i ngēma tórü uanügü? ¿Tama ēxna nüxna pecuaxächieüxü ga yema nge ga Tébecüāx ga Abimelé ga Yerubaá nanexü imāxcü ga yexguma wüxi ga nuta ga caexü naétü nañaxgu? Rü ngēmacax ¿tüxcüü nüxna pengaicamaxüchi ya yima ñanearü poxeguxü? —ñanagürü. <sup>23</sup>Rü nüma ga yema orearü ngeruxü rü nanangāxüga rü ñanagürü: —Nüma ga yema tórü uanügüarü churaragü rü inayai, rü tomaa nügü nadai. Natürü ga toma rü nügü ítayabuxmüxēxē rü ñuxmata ñanecax ixücuxüwa nangugü. <sup>24</sup>Rü yexgumayane ga yema tórü uanügü rü ñanearü poxeguxüarü daxüwa würamaxá curü churaragüxü nadai, Pa Chorü Āēxgacüx. Rü ngēxma nayue i ñuxre i churaragüeru rü ngēmatanügu nayu ya Uría ya Ítítanüxü ixücü —ñanagürü. <sup>25</sup>Rü yexguma ga Dabí rü yema orearü ngeruüxü nangāxüga, rü ñanagürü: —iYoámaxá nüxü ixu rü taxucaxma naxcax naxoegaāxē i ngēma, erü woetama ngēmaācü nangupetü i daiwa! iRü namaxá nüxü ixu nax yexera pora naxüxüçax nax nadaiācuāxüçax ya yima ñane —ñacurügü tá nüxü! Rü

cuma rü name nixí i yexeraācü pora Yoána cuxá —ñanagürü. <sup>26</sup>Rü yexguma nüxü nacuaçgu ga Uría naxmax ga marü nax nayuxü ga guma ngíte rü inaxaure. <sup>27</sup>Natürü yexguma marü nangupetüçgu ga nax naxaurexü, rü nüma ga Dabí rü nachiüwa ngíxcax nangema, rü naxmaxü ngíxü nixíxēxē, rü nüxü ixāxaci. Natürü nüma ga Cori ya Tupana rü tama namaxá nataāxē ga yema Dabí iüxü.

### Natáü rü Dabíxü naxoregü

**12** <sup>1</sup>Rü nüma ga Cori ya Tupana rü norü orearü uruxü ga Natáüxü namu ga Dabíxütawa nax naxüxüçax. Rü yexguma Natáü Dabíxütawa nguxgu, rü ñanagürü nüxü: —Wüxi ga ñanewa nayexma ga taxre ga yatü. Wüxi rü namuarü yemaxüāxüchi rü yema to rü nangearü yemaxüāx. <sup>2</sup>Rü yema muarü yemaxüāxü rü muxüma ga carnérugü rü wocagü nüxü nayexma. <sup>3</sup>Natürü ga yema ngearü yemaxüāxü rü wüxitama ga carnéruacü nüxü tayexma ga tümacax nataxexe. Rü nümatama tüxü nayaxēxē ga guxema carnéruacü, rü naxütawa rü nanegüxütawa taya. Rü yematama ñna ga tümaarü yora ngóxü tangōx rü naxpáxüwatama taxaxe, rü nügüxüta tüxü napexēxē. Rü nüma ga guma yatü tüxü nangechaü ñoma naxacüxü nangechaüxürüxü. <sup>4</sup>Rü wüxi ga ngunexü rü yema muarü yemaxüāxüxütagu nanaxüane ga wüxi ga duüxü ga toxnamana ne üxü. Natürü nüma ga yema duüxü ga muarü yemaxüāxü rü tama norü carnéruta rüēxna norü wocata nimáxchaü nax yemaacü naxcax nax naxüwemüxüçax ga yema naxütagu



naxūanexū. Rū guxema ngearū diēruáxearū carnéru niyaxu, rū yema yéma nguxūcax tūxū naxū —ñanagürü. <sup>5</sup>Rū yexguma yemaxū naxīnūgu ga Dabí, rū yema yatūmaxā poraācū nanu, rū Natáūxū ñanagürü: —Tupanaégagu cumaxā nūxū chixu rū texé ya ngēma úxe rū name nixī i tūxū nax imáxū. <sup>6</sup>Rū 4 expūxcūna tá tūxū naxūtānū ya yíxema carnéruacu, erū tama nūxū tangechaūtūmūxūācūma nanaxū i ngēma —ñanagürü. <sup>7</sup>Rū yexguma ga Natáū rū ñanagürü: —Cuma nixī i ngēma yatū quixīxū. Rū ñaa nixī i norū ore i Cori ya Iraéanecūāxgüarū Tupana cumaxā nūxū ixuxū. Choma cuxū chayaxu nax Iraéanecūāxgüarū āēxgacū nax quixīxū, rū Chaúmexēwa cuxū íchapoxū. <sup>8</sup>Rū napata cuxna chaxā, rū cuxmexwa tūxū changexmagūxēxē ga naxmāxgü, rū guxūma i Iraéane rū Yudáane rū cuxna chaxā. Rū ngēxguma chi cuxcax nanoxregu i ngēma, rū chi muxūma i togü i ngēmāxūgü chi cuxna chaxā. <sup>9</sup>¿Rū tūxcūū tama naga cuxīnū i chorū ore, rū cunaxū i ngēma tama chauāēwa mexū? Rū cuma rū Amóūtanūxūgüarū taramaxā cuyamāx ya Uría ya Itítatanūxū rū naxmāxcax cungīx. <sup>10</sup>Rū ngēma nax choxū cuxoxū, rū ngēmācax Uría ya Itítatanūxū naxmāx tūxū cuyapu rū cuxmāxū tūxū quixīxēxē. Rū ngēmāgagu rū guxūgutāma āūcūmaxūwa cungexma. <sup>11</sup>Rū choma i Cori ya Tupana rū cumaxā nūxū chixu rū choma rū tá chanaxū nax cutanūxū tátama yixīxū i guxchaxū cumaxā ūxū. Rū cupexewa tátama tūxū chade ya cuxmāxgü rū ngēma cutanūxūna tá tūxū chamugü, rū guxāpexewa tá tūmamāxā namaxē.

<sup>12</sup>Cuma rū cúācū cunaxū i ngēma chixexū, natürü i choma rū guxūma i Iraéanecūāxgüpexewa tá chanaxū i ngēma cumaxā nūxū chixuxū nax guxāma nūxū dauxūcax —ñanagürü. <sup>13</sup>Rū nūma ga Dabí rū Natáūxū nangāxūga rū ñanagürü: —Tupanamāxā chixexū chaxū —ñanagürü. Rū nūma ga Natáū nanangāxūga rū ñanagürü: —Ngēmāacu, natürü Tupana rū cuxū nangechaū, rū taxūtāma ngēma chixexūgagu cuyu. <sup>14</sup>Natürü ngēma chixexū icuxūxūgagu rū Tupanaarū uanūgūaxū cunatauxchaxēxē nax Tupanaxū naxoexū rū namaxā naguxchigagūxū. Rū ngēmācax ya yimá cune ya ngexwacax íxracū rū tá nayu —ñanagürü. <sup>15</sup>Rū yexguma Natáū nachīūcax táeguxgux rū nūma ga Cori ya Tupana rū poraācū nayadaḡawexēxē ga yema buxū ga Uría naxmāxwaūxū. <sup>16</sup>Rū nūma ga Dabí rū Tupanana naca naxcax ga yema buxū, rū naxaure rū ñaxtūanegumare naca rū yexma nūxū nangupetū ga ñuxre ga chūtāxū. <sup>17</sup>Rū yema āēxgacūgü ga norū ngūxēēruūgü ga yéma naxūtāwa yexmagūxū, rū nūxū nacāxūgü nax inachixūcax ga ñaxtūanewa. Natürü ga nūma ga Dabí rū tama inachixchaū rū tama natanūwa nachibūchaū. <sup>18</sup>Rū 7 ga ngunexū ngupetūxguwena rū tayu ga guxema buxe. Rū nūmagü ga yema Dabíarū ngūxēēruūgü rū namūē ga namaxā nūxū nax yaxugūexū, yerū ñaxūgu narūxīnūe: “Rū yexguma tamaxyane ga guxema buxe rū nūma ga āēxgacū rū tama taga naxīnūchaū rū tama nachibūchaū. Rū ngēmācax i ñuxma nax tayuxū rū ñuxācū tá namaxā nūxū tixu, erū tama nūxū tacuax nax ṡaxacū tá nūgūmaxā naxūxū”,

ñaxũgu narũxĩnũe. <sup>19</sup>Natũrũ nũma ga Dabĩ rũ nũxũ nadau ga yema norũ ngũxẽerũgũ ga bexma nũgũmaxã nax yadexagũxũ, rũ yemawa nũxũ nacuax ga guxema buxe rũ marũ nax tayuxũ. Rũ yemaçax nũxna naca rũ ñanagũrũ: —¿Marũ tayu ya yĩxema buxe? —ñanagũrũ. Rũ nũma ga yema norũ ngũxẽerũgũ rũ nanangãxũgagũ rũ ñanagũrũgũ: —Ngũ, marũ tayu —ñanagũrũgũ. <sup>20</sup>Rũ yexguma ga Dabĩ rũ inachi ga ñaxtũanewa, rũ naxaiya rũ nũgũ napumára rũ ínacuxuchi rũ to ga naxchirugu nicux. Rũ Tupanapatawa naxũ rũ yexma naxũcu rũ Cori ya Tupanaxũ nicuaxũxũ. Rũ yemawena rũ nachĩucax natáegu rũ ònacax ínaca rũ nachibũ. <sup>21</sup>Rũ yexguma ga yema norũ ngũxẽerũgũ rũ Dabĩna nacagũ rũ ñanagũrũgũ: —¿Natũrũ taxacũcax ngẽmaãcũ cunaxũ Pa Ñẽxgacix? Rũ yexguma tamaxũxgu ga guxema buxe, Pa Ñẽxgacũx, rũ cuxaure rũ tũmacax cuxaxu. Natũrũ i ñuxmax marũ nax tayuxũ ya buxe, Pa Ñẽxgacũx, rũ icuchi rũ cuchibũ —ñanagũrũgũ. <sup>22</sup>Rũ Dabĩ nanangãxũga rũ ñanagũrũ: —Yexguma tamaxũxgu ga guxema buxe rũ chaxaure rũ chaxaxu yerũ nagu charũxĩnũ chi ga Cori ya Tupanaaxũ nax changechaũtũmũxũxũ rũ tũxũ namaxẽexũ ga guxema buxe. <sup>23</sup>—Natũrũ i ñuxma nax marũ tayuxũ çrũ taxacũcax ichaxaurexũ ega taxucũrũwa wena tũxũ chamaxẽegu? Choma rũ tá tũmaxũtawa chaxũ, natũrũ i tũma rũ taxuacũma chauxçax tatáegu —ñanagũrũ.

### Charumóũarũ buxchiga

<sup>24</sup>Rũ yemawena ga Dabĩ rũ naxmãx ga Bechabéxũ nayataãxẽxẽ. Rũ

ngĩxũta nanaxũane rũ ngĩmaxã namaxũ, rũ nũxũ ixãxaci. Rũ nũma ga Dabĩ rũ Charumóũgu nanaxũega.

.....

### Acharóũ rũ nanatũ ga Dabĩxũ ínataxũchichaũ

**15** <sup>1</sup>Rũ wũxi ga ngunexũ rũ nũma ga Dabĩ nane ga Acharóũ rũ naxçax nataxe ga wũxi ga nawexũ ga mexechine ga cowarugũ itũxũne. Rũ naxçax nadau ga 50 ga norũ churaragũ. <sup>2-3</sup>Rũ paçmama ínaruãdãũxũ rũ namacũwagu nayachiixũ ga duũxũgũ ñanecax íhocuxũwa. Rũ guxãma ga guxema ãẽxgacũx dauxchaũgũxe nax tũmaarũ guxchaxũ tayamexẽegũxũçax, rũ nũma ga Acharóũ rũ tũmacax naca rũ ñuxũchi tũxna naca ga ngexnerũxne ga ñanewa nax ne taxũxũ. Rũ guxema tũgũ ixuxe nax wũxi ga Iraéanecũãxgũtũcumũwa nax taxũxũ, rũ nũma ga Acharóũ rũ ñanagũrũ tũxũ: —Rũ aixcũma nixĩ i ngẽma nũxũ quixuxũ, natũrũ nataxuma i ãẽxgacũarũ ngũxẽerũgũ i cuxũ rũngũxẽexũ —ñanagũrũ. <sup>4</sup>Rũ ñanagũrũ ta: —Chierũ ñaa nachixũanewa ãẽxgacũ i guxchaxũarũ mexẽerũxũ chixĩxgu nax ngẽmaãcũ guxãma chauxũtawa naxĩxũcax ya yĩxema guxchaxũgũ tũxũ ngẽxmaxe nax tũxũ chanamexẽexũçax —ñanagũrũ. <sup>5</sup>Rũ yexguma texé napexegu yacaxãpũxũgu, rũ nũma ga Acharóũ rũ tama nanaxwaxe ga yemaacũ nũxũ nax tarũmoxẽgũxũ, rũ tũmamexẽegu nayayauxãchi rũ tũxũ nachũxu. <sup>6</sup>Rũ yemaacũ ga nũma ga Acharóũ rũ tũmamaxã nũgũ namecũmaxẽxẽ ga guxãma ga

Iraéanecüâxgü ga âëxgacüxütawa üxchaüxe nax namexëëâxüçax ga tümaarü guxchaxügü. Rü yemaacü nixí ga nügüna tüxü yapuexëëxü ga guxema Iraéanecüâxgü. <sup>7</sup>Rü yexguma 4 ga taunecü ngupetüxgu, rü nüma ga Acharóü rü nanatü ga âëxgacüxü ñanagürü: —Cuxna chaca, Pa Äëxgacüx çrü marü curü me yixixü nax Ebróüwa chaxüxü nax chayanguxëëxüçax ga yema uneta ga Cori ya Tupanamaxã nüxü chixuxü? <sup>8</sup>Rü yexguma Chíríaanegu chaxächíügu ga Yechúarü íanewa, rü choma nax curü duüxü chixixü, rü yéma Cori ya Tupanamaxã nüxü chixu rü ngëxguma chi nüma choxü natauxchaxëëâgu ga Yerucharéüçax nax chatáeguxü rü chi nüxü chayarücuaxüxü namaxã i wüxi i chorü ãmare i naxçax chiguxü —ñanagürü. <sup>9</sup>Rü nüma ga âëxgacü rü nanangãxüga rü ñanagürü: —IMarü name rü mea ngéma naxü! —ñanagürü. Rü yexguma ga nüma ga Acharóü rü Ebróüwa naxü. <sup>10</sup>Rü yexguma Ebróüwa nayexmayane ga Acharóü rü ñuxre ga norü duüxügüxü namu nax guxü ga Iraéanecüâxgütücumüwa naxixüçax rü nüxü nax yanaxugüxüçax ga norü ore ga ñaxü: “Rü ngëxguma nüxü pexínüegu i cornétaga, rü ngémawa tá nüxü pecuax nax Ebróüwa yangucuchixü ya Acharóü nax Iraéanecüâxgüarü âëxgacü yixixüçax”, ñaxü. <sup>11</sup>Rü ñuxmachi ga nüma ga Acharóü rü nüxna naxu ga 200 ga yatügü ga Yerucharéüçax ga mexügu rüxínüexü. Rü nawe narüxí natürü tama nüxü nacuaxgü ga taxacü nax yixixü ga yema norü ínü. <sup>12</sup>Rü yexgumarüxü ta ga nüma ga Acharóü rü

naxçax nangema ga wüxi ga Dabíarü ucuxëxüxü ga Aitópegu âégacü ga norü íane ga Yirúgu áchiüçü. Rü namaxã nüxü nixu nax naxümücüaxüçax ga yexguma Tupanacax naxüna nadáixgu rü ínaguâxgu. Rü yemaacü ga yema Acharóüarü ínüwaama ügüxü ga yatügü rü nimuetanü ga yema nawe rüxixü.

#### Dabí rü Yerucharéüwa niña

<sup>13</sup>Rü wüxi ga duüxü rü Dabímaxã nüxü nayarüxu rü ga Iraéanecüâxgü rü Acharóüwe nax naxixü. <sup>14</sup>Rü yexguma nüma ga Dabí rü nanamu ga guxüma ga norü churaragüeru ga namaxã Yerucharéüwa yexmagüxü, rü ñanagürü: —iNgíxã ñuxmatama tibuxmü! Erü yixcama rü taxucürüwatama Acharóüchaxwa tibuxmü. iNgíxã, rü peporaãëgü! Erü ngürüächí tá tüxü nayangau rü chixexü tá tamaxã naxü, rü norü taramaxã tá tüxü nadai ya guxãma ya íanecüâx —ñanagürü.

.....

<sup>31</sup>Rü yexguma Dabímaxã nüxü yaxugüegu ga Aitópe rü Acharóüarü ínüwaama üxü, rü nüma ga Dabí rü Cori ya Tupanana naca ga nax natoóxëëxüçax ga yema Aitópe nagu rüxínüxü.

.....

#### Dabíarü churaragü rü Acharóüxü nimaxgü

**18** <sup>1</sup>Rü nüma ga Dabí rü norü churaragüxü nixugü. Rü wüxichigü ga 1000 ga churaragüçax rü nüxü naxuneta ga norü comaüdáüte. Rü wüxichigü ga 1000 wa rü 100 gu inananu. Rü wüxichigü ga 100 çax rü

nüxü naxuneta ga norü capitáü. <sup>2</sup>Rü yemawena rü tomaepüxtücumügu nayayauxye ga norü churaragü. Rü wüxitücumümaxä inacuax ga Yoá. Rü totücumümaxä inacuax ga Abichái ga Cheriá nane ga Yoáenexē ixícü. Rü yema totücumümaxä inacuax ga Itái ga Gáxcüāx ixícü. Rü ñüxüchi ga nüma ga Dabí rü guxüma ga yema norü churaragüxü ñanagürü: —Choma rü tá ta pexü íchixümücü i daiwa —ñanagürü. <sup>3</sup>Natürü ga nümagü rü nanangäxütagü rü ñanagürügü: —Taxuacüma ngēmaäcü cunaxü, Pa Äëxgacüx, erü ngēma torü uanügüçax rü nüétama ega woo naxçaxwa tibuxmüxgu rüexna ngäxü i tatanüxü yuegu, erü ngēma nüma nanaxwaxegüxü nixí nax cuxü yamaçgüxü. Rü ngēmacax, Pa Äëxgacüx, rü cuma rü 10,000 i toma i curü churaragüarü yexera toxü cume. Rü ngēmacax narümemae i nuxátama íanegu curüçäüx nax ngēmaäcü to i churaragü toxütawa cumugüxüçax —ñanagürügü. <sup>4</sup>Rü yexguma ga nüma ga äëxgacü rü nanangäxüga rü ñanagürü: —Tá chanaxü i ngēma pexçax rümemaxü —ñanagürü. Rü yexgumatama ga nüma ga äëxgacü rü guma íanearü íäxgu ínachicuchi rü nüma ga norü churaragü rü ínachoxütücumü. <sup>5</sup>Rü ñüxüchi ga nüma ga äëxgacü rü nayaxucuxégü ga Yoá rü Abichái rü Itái, rü ñanagürü nüxü: —iMea namaxä pechopetü ya yimá ngextüxücü ya Acharóü! —ñanagürü. Rü guxüma ga norü churaragü rü nüxü naxínue ga yexguma äëxgacü yema ñaxgu nüxü ga yema churaragüarü

äëxgacügü nachiga ga gumá Acharóü. <sup>6</sup>Rü yemaacü inaxíächü ga yema churaragü nax Iraéanecüäxgüarü churaragü ga Acharóüwaama ügüxümaxä nügü nax nadaixüçax. Rü Efraíüarü naanewa yexmaxü ga naixnecügu nixí ga nügü nadaixü. <sup>7</sup>Rü yema Dabíwe rüxíxü ga churaragü rü Acharóüarü churaragüxü narüporamaegü. Rü poraäcü nügü nadai, rü 20,000 ga yatü yexma nayue. <sup>8</sup>Rü guxüwama nangu ga nügü nax nadaixü ga yema Efraíarü naanewa. Rü woo yema noxri nügü ínadaixügu nayue ga muxüma, natürü yemaarü yexera nixí ga naixnecügu yuexü ga yexguma Dabíarü churaragü nawe ngégügu. <sup>9</sup>Rü yexguma nügü nadaiyane rü nüma ga Acharóü ga norü múlagu ixícü, rü ngürüächü yexma Dabíarü churaragümaxä nügü nangau. Rü nüma ga Acharóü rü norü múlamaxä niña. Rü wüxi ga castaña ga taxüchacüütüüwa namaxä nagopetü, rü yéma niwaxcuchinaxä, rü yéma narütu. Rü yema múla rü nagopetümare. <sup>10</sup>Rü wüxi ga yema Dabíarü duüxü ga nüxü dauxü rü Yoámaxä nüxü nixü. <sup>11</sup>Rü nüma ga Yoá rü ñanagürü: —¿Taxacü nixí? ¿Rü ngëxguma nüxü cüdaüxgu rü tüxücüü tama noxtacüma cuyamaç? Erü ngëxguma chi cuyamaçgu rü choma rü 10 tachinü i diëru chi cuxna chaxä rü wüxi i goyexü —ñanagürü. <sup>12</sup>Natürü ga yema churara rü Yoáxü nangäxüga rü ñanagürü nüxü: —Woo chi 1000 tachinü i diëru choxna cuxäxgu rü taxüchima chanaxü i ngēma. Erü guxäma i tomax rü nüxü taxínue ga äëxgacü ga yexguma cuxü rü Abicháixü

rü Itáixũ ñaxgu: “iRü taxütáma chixexũ namaxã pexü ya Acharóũ!”, ñaxgu. <sup>13</sup>Rü ngëxgumachi ãëxgacüechita chayamaxgu ya nane rü nüma ya ãëxgacü rü tá nüxũ nacuaç nax texé yamáxũ, rü cuma rü taxüchima chauétüwa cuchogü —ñanagürü. <sup>14</sup>Rü nüma ga Yoá rü ñanagürü: —iMarütama i ngëma dexe i chixemarexũ! —ñanagürü. Rü yexguma nanayaxu ga tomaepüç ga naixmenaxã ga ixãmaguxũ, rü yemamaxã Acharóũxũ nacanapacütüxũ, yerü castañachacüxüwa nax natuxũ rü tama nayu. <sup>15</sup>Rü yemawena rü 10 ga Yoáaru churaragü rü Acharóũxũ ínachomaeguãchi rü nayamaxgüxüchi. ....

<sup>24</sup>Rü yexgumayane rü nüma ga Dabí rü guma ñanearü ñãxwa narüto. Rü nüma ga yema dauxütaeruxũ rü yema ñanearü poxeguxüétügu naxínagü nax yéma nadauxütaexüçax. Rü yexguma yexama nadawenügu ga yema dauxütaerüxũ rü nüxũ nadau ga wüxi ga yatü ga nüxica yéma ne ñaxũ. <sup>25-26</sup>Rü tagaãcü ãëxgacümaxã nayacaxũ. Rü nüma ga ãëxgacü rü tagaãcü nanangãxũ rü ñanagürü: —Ngëxguma nüxicatama ngëma ne nañaxgu, rü mexü i ore ngëma ne nange —ñanagürü. Natürü yexguma yema yatü ga yéma ne ñaxũ ingaicagu, rü nüma ga yema dauxütaeruxũ nüxũ nadau ga to ga yatü ga yéma ne ñaxũ. Rü yemacax yema ñãxaru dauruüna tagaãcü nacagü rü ñanagürü: —Yea nixi i to i yatü rü ngëma ne naña —ñanagürü. Rü nüma ga ãëxgacü rü tagaãcü ñanagürü: —Ngëma rü ta mexü i ore ngëma ne

nange —ñanagürü. <sup>27</sup>Rü yexguma nüma ga yema dauxütaeruxũ rü ñanagürü ta: —Ngëma napexe inãxũ rü norü ñãachiwa nüxũ chacuax nax Chadü nane ya Aimáax yixixü —ñanagürü. Rü nüma ga ãëxgacü rü nanangãxũ rü ñanagürü: —Nüma rü wüxi ya mecü ya yatü nixi, rü mexü i ore nua nange —ñanagürü. <sup>28</sup>Rü nüma ga Aimáax rü ãëxgacüçax nixü rü napexegu nayacaxápüxü rü ñaxtianegu nanangücuchi rü yemacü nüxũ narümoxë rü ñanagürü: —Name ya Cori ya Tupana, ya curü Tupana, Pa ãëxgacüç, erü marü nanadai ga yema tama cuga inüechaüxü, Pa ãëxgacüç —ñanagürü. <sup>29</sup>Rü nüma ga ãëxgacü rü ínaca, rü ñanagürü: —¿Nüxãcü nüxü nangupetüxü ya yimá ngextüxücü ya Acharóũ? ¿Rü namemarexü yixixü? —ñanagürü. Rü nüma ga Aimáax rü nanangãxüga rü ñanagürü: —Ngëxguma Yoá choxü muxgu rü ínixaicha, natürü tama nüxü chacuax, Pa ãëxgacüç, nax taxacü ngupetüxü —ñanagürü. <sup>30</sup>Rü nüma ga ãëxgacü rü ñanagürü nüxü: —iInachi rü ngëxma ínachicuchi! —ñanagürü. Rü nüma ga Aimáax rü yexma ínachicuchi. <sup>31</sup>Rü yexgumatama ínangu ga yema to ga yatü ga Etiopíaanecüãx rü ñanagürü: —Nangexma i wüxi i mexü i ore, Pa ãëxgacüç. Rü ñuxma ya Cori ya Tupana rü mexü cumaxã naxü, Pa ãëxgacüç, erü cuxü inapoxü nawa ga yema tama cuga inüechaüxü, Pa ãëxgacüç —ñanagürü. <sup>32</sup>Rü nüma ga ãëxgacü rü yema Etiopíaanecüãxna naca rü ñanagürü: —¿Rü yimá ngextüxücü ya Acharóũ, rü taxuxüma nüxü üpetüxü?

—ñanagürü. Rū nūma ga Etiopíaanecüāx rū nanangāxūga rū ñanagürü: —Chierü ngēma curü uanügü, Pa Āēxgacūx, rū guxūma i ngēma chixexū cumaxā ügüchañxū rū yimá ngextüxcürüxū nayuegu —ñanagürü. <sup>33</sup>Rū nūma ga āēxgacü rū axumaxā aita naxü. Rū daxū naxī ga yema norü ucapu ga ñanearü poxeguxüétüwa yexmaxūwa, rū yéma nayaxaxu. Rū yexma ínaxūüxūācūma ñanagürü: —Pa Chaunex, Pa Acharóūx. Pa Chaunex, Pa Acharóūx. Chierü choma cuchicüxü chayuxgu. Pa Chaunex, Pa Acharóūx, Pa Chaunex —ñanagürü.

**Āēxgacü ga Dabí rū wenaxarü  
Yerucharéicax natáegu**

**19** <sup>1-2</sup>Rū yexguma duūxūgü nüxū cuaxgügu ga nūma ga āēxgacü ga Dabí ga poraācü nane ga Acharóū ga yucücax nax nangechañxū rū naxcax naxaxuxū rū Yoámamaxā nüxū nayarüxugüe. Rū yemaacü ga yema ngunexūgu ga yema nax norü uanügüxū naporamaegüchiréxū ga daiwa rū ngechañxū nanacaxichi. <sup>3</sup>Rū nūmatama ga yema churaragü rū bexmamare ñanegu nachocu rū āneācü inaxī ñoma chi daiwa yabuxmüxürüxū. <sup>4</sup>Rū yexgumayane ga nūma ga āēxgacü rū nügü yadüxchiweācūma poraācü aita naxüüxū rū ñanagürü: —Pa Chaunex, Pa Acharóūx. Pa Chaunex, Pa Acharóūx, Pa Chaunex —ñanagürü. <sup>5</sup>Rū yexguma ga Yoá rū Dabíxütawa naxü rū ñanagürü: —Pa Āēxgacūx, wüxi i āne nüxū quingexēxē i ngēma curü churaragü i cuxū ípoxūgüxū nax tama peyueñcax i

cuma rū cunegü, rū cuxacügü, rū cuxmaxgü, rū cuxütaxügü. <sup>6</sup>Rū ñuxma rū icunawex nax cuxcax rū taxuwama nameñü i ngēma cutüüwa ügüxū i āēxgacügü rū churaragü, erü nüxū cungechañ i ngēma cuxchi aixexū, rū naxchi cuxai i ngēma cuxū ngechañgüxū. Ñuxma nüxū chicuaxāchi, Pa Āēxgacūx, rū cuxcax narümemaē chi nixī nax Acharóū maxūxū, rū nüétama chi nixī ga nax tayueñü ga tomax. <sup>7</sup>Rū ínaxūxū rū nataāxēgüxēxē i ngēma curü churaragü! Erü Tupanaégagu cumaxā nüxū chixu rū ngēxguma taxütama ngēmaācü cunaxüxgux, rū bai i wüxi tá nuxā cuxütagu narüxāñxü i ñoma i chütaxūgu. Ngēma rū tá guxūma ga chixexū ga yema curü ngextüxügu cuxū ngupetüxüarü yexera tá nixī i cuxcax ínguxū —ñanagürü ga Yoá. <sup>8</sup>Rū yexguma ga nūma ga āēxgacü rū inachi, rū ñanearü ñāxwa narüto. Rū yexguma duūxūgü nüxū cuaxgügu ga guma āēxgacü rū ñanearü ñāxwa nax yanatoxū, rū guxūma ga duūxūgü rū naxütawa naxī. Rū yema Iraéanecüāxgü ga Acharóūwe rüxixū rū nibuxmü rū nachiüwa naxī.

.....

**Nawiyae ga Dabí yerü norü  
uanügüxū narüporamae**

**22** <sup>1</sup>Rū yexguma Cori ya Tupana Dabíñü rüñgüxēēgu nax Chaümexēwa rū guxūma ga norü uanügümexēwa ínanguxuchixēēāñxū, rū nūma ga Dabí rū ñaa wiyaemaxā Tupanaxū nicuaxüxū. <sup>2-3</sup>Rū ñanagürü: “Cumax, Pa Cori rū chorü poxüruxū quixixū, rū chorü cuxchicaxū quixixū, rū chorü nguxuchixēēruxū quixixū, rū

chorü Tupana quixĩxũ, rü tacü ya nuta  
 ya chorü poxũruxũ quixĩxũ, rü chorü  
 tüpexeruxũ quixĩxũ, rü chorü maxẽeruxũ  
 quixĩxũ, rü ma xpúnetapexewa ngẽmaxũ  
 i chorü cuxchicaxũ i nagu changaxixũ  
 quixĩxũ. Rü cuma nixĩ i chorü  
 uanügümexẽwa choxũ ícunguxuchixẽẽxũ  
 nax tama choxũ yama xgũxũcax. <sup>4</sup>Rü  
 cuxũwaxi nixĩ i namexũ, Pa Corix, nax  
 ticuaxũügũxũ. Rü ngẽxguma  
 ãücũmaxũwa changexmagu rü aita  
 cuxcax chaxũxgu, rü cuma rü chorü  
 uanügümexẽwa choxũ ícupoxũ.

.....

<sup>31</sup>Rü ngẽma Tupana nagu rüxĩnũxũ rü  
 aixcũmama iniwex. Rü ngẽma Cori ya  
 Tupanaarü uneta rü name nax yaxõxũ.  
 Rü Tupana rü tüxũ ínapoxũ ya guxãma  
 ya yíxema nagu yaxõgũxe. <sup>32</sup>¿Rü texé  
 Tupana tixĩ ega tama tórü Cori ya  
 Tupana yixĩxgu? ¿Rü taxacürü to i  
 tupana nangexma i nüxũ tauxchaxũ nax  
 tüxũ ínapoxũxũ? <sup>33</sup>Rü nüma ya Tupana  
 nixĩ ya norü poramaxã choxũ idũxũxcü.  
 Rü yimá nixĩ ya namexẽẽcü i chorü  
 maxũ nax taxuwama nachixexũcax”,  
 ñanagürü.

.....

# 1 REYES

## (Nüxíraxûxû i popera i ãëxgacügüchiga)

### Nayaxüchi ga Dabí

**1** <sup>1</sup>Rü yexguma nayaxgu ga ãëxgacü ga Dabí rü naxchiãüwa nayexmaecha. Guxǖguma nüxü nanadeyu, rü woo ñuxre ga düxruũmaxã nax yadüxgüãxü rü nüxü nanadeyuama.

.....

### Adonía rü ãëxgacüxü nügü ningucuchixëxë

<sup>5</sup>Rü yexgumayane ga Adonía ga Dabí nane ga naxmax ga Aquíwaücü rü ãëxgacüwa nügü nanguxëëchaü tümachicüxü ga nanatü. Rü naweǖgü ga cowarugü itüchigüne ne nanutaquexe rü churaragü ga gumagu íxü. Rü nanade ga 50 ga churaragü nax norü dauruxǖgü yixǖgüxüçax. <sup>6</sup>Rü nüma ga nanatü ga ãëxgacü ga Dabí rü taguma nanacuãxi rü bai ga nangaa. Rü wüxi ga yatü ga mechametücü nixí, rü naenexë ga Acharóüxü rübumaectü nixí. <sup>7</sup>Rü nüma ga Adonía rü nanatüarü churaragüarü ãëxgacü ga Yoá ga Chábia nanemaxã nidexa rü chacherdóte ga Abiatámaxã. Rü nümagü rü nüxü nixugüe nax nüxü

tá nangüxëëgüxü nax ãëxgacüxü yangucuchixüçax. <sup>8</sup>Natürü guma chacherdóte ga Chadú, rü tama Adoníawaama nügü naxúxëxë rü bai ga Benáya ga Yoáda nane, rü bai ga gumá Tupanaarü orearü uruxü ga Natáü, rü bai ga Chimef ga ãëxgacü ga Dabímücüxüchi ixicü, rü bai ga yema Dabíarü churaragü ga nüxü rücuãxmaegüxü rü taxuxüma Adoníawaama nügü naxúgüxëxë. <sup>9</sup>Rü yema ínaxüyane, rü nüma ga Adonía rü wüxi ga taxüma ga õna naxü ga nuta ga taxüchicü ga Choeréxütawa ga bairawe ga Duyéarü ngaicamána. Rü tüxü nadai ga carnérugü, rü wocagü rü wocaxacǖgü ga ingüexe. Rü guxüma ga naenegüna naxu, rü guxüma ga duüxǖgü ga Yudátanüxü ga ãëxgacü ga Dabíaxü puracüexüna naxu. <sup>10</sup>Natürü tama nüxna naxu ga guma orearü uruxü ga Natáü, rü bai ga Benáya, rü bai ga yema nanatü ga Dabíarü churaragüerugü rü bai ga naenexë ga Charumóü. <sup>11</sup>Rü yexguma ga nüma ga Natáü rü Charumóü naé ga Bechabémaxã nidexa, rü ñanagürü: —¿Marü nüxü cucuáxü yixixü nax



Adonía i Aquí ngĩne rü ãëxgacüxũ nügü nax yangucuchixëëxũ tama nüxũ nacuáácüma ya yimá tórü ãëxgacü ya Dabí? <sup>12</sup>Rü dücax! rü tá cumaxã nüxũ chixu i wüxi i ucuxë nax ngëmaácü tama peyuexüçax i cumax, rü cune ya Charumóũ. <sup>13</sup>iRü ãëxgacü ya Dabíxütawa naxü, rü ñacurügü tá nüxũ: “Pa Chorü Corix ítama ëxna i chomaxã icuxunetaxũ rü chaune ya Charumóũ tá yixixũ ya yimá ãëxgacü ixĩcü i cuchicüxü? ¿Rü ñuxácü i Adonía rü ãëxgacüxũ nügü yaxixëëxũ?” ñacurügü tá nüxũ! <sup>14</sup>Rü ngëxguma cuma ãëxgacümaxã íquidexayane rü choma rü tá chixücu, rü naétüwa tá chidexa i ngëma curü ore i nüxũ quixuxũ —ñanagürü. <sup>15</sup>Rü yexguma ga ngĩma ga Bechabé rü ãëxgacü ípexügu ixücu. Rü nüma ga ãëxgacü rü marü nayaxüchi ga yexguma, rü Abiachá ga Chunátanüxũ rü nüxna idau. <sup>16</sup>Rü ngĩma ga Bechabé rü ãëxgacüpegegu inangücuchi rü ñuxmata íxmachixüwa iyaxúcatü. Rü nüma ga ãëxgacü rü ngĩxna naca rü ñanagürü: —¿Taxacü cunaxwaxe i cuxçax chaxüxü? —ñanagürü. <sup>17</sup>Rü ngĩma inangãxü rü ngĩgürügü: —Pa ãëxgacüx ¿Tama ëxna Cori ya Tupanaégagu marü chomaxã icuxunetaxũ nax chaune ya Charumóũ tá yixixũ ya yimá ãëxgacü ixĩcü i cuchicüxü? <sup>18</sup>Natürü i ñuxma rü tama nüxũ cucuáácüma rü Adonía ãëxgacüxũ nügü ningucuchixëëxë —ngĩgürügü. .... <sup>22-23</sup>Rü yexguma ãëxgacü ga Dabímaxã íyadexayane ga Bechabé rü yéma ãëxgacüpatawa nangu ga Tupanaarü orearü uruxũ ga Natáũ. Rü yema norü íãxarü dauruxügü rü

Dabímaxã nüxũ nayarüxugüe ga yéma nax nanguxũ ga guma orearü uruxũ. Rü nüma ga Natáũ rü Dabíxütawa naxü rü napexegu nanangücuchi ñuxmata íxmachixüwa yaxúcatü. <sup>24</sup>Rü ãëxgacüna naca rü ñanagürü: —Pa ãëxgacüx ¿ëxna cuma yixixũ i nüxũ cuxunetaxü ya Adonía nax cuchicüxü ãëxgacü yixixũ? —ñanagürü.

.....

**Dabí nüxũ nixu rü Charumóũ tá nixi i nachicüxü ãëxgacü ixixũ**

<sup>28</sup>Rü nüma ga ãëxgacü ga Dabí rü Bechabéçax nangema. Rü ngĩma ga Bechabé rü ãëxgacüpegega ixü, rü yexma iyachi. <sup>29-30</sup>Rü nüma ga ãëxgacü rü Tupanaégagu ngĩmaxã nüxũ nixu rü ñanagürü: —Yimá Tupana ya guxüma ga guxchaxüwa choxü ínguxuchixëëcüégagu cumaxã nüxũ chixu rü ñomatama i ngunexügu rü cune ya Charumóũ tá nixi ya ngexwacaxücü ya ãëxgacü. Rü nüma tá nixi i chauchicawa natoxũ ga yema üpama Cori ya Iraéanecüãxgüarü Tupanaégagu cumaxã nüxũ chixuxürüxũ —ñanagürü. <sup>31</sup>Rü ngĩma ga Bechabé rü ãëxgacüpegegu inangücuchi ñuxmata íxmachixüwa yaxúcatü, rü tagaácü ngĩgürügü: —iGuxüguma namaxü ya chorü cori ya ãëxgacü ya Dabí! —ngĩgürügü. <sup>32-33</sup>Rü yemawena ga nüma ga ãëxgacü ga Dabí rü norü duüxügüxü namu nax naxçax yacagüxüçax ga chacherdóte ga Chadú rü orearü uruxũ ga Natáũ rü Benáya ga Yoáda nane. Rü yexguma ãëxgacüxütawa nangugügu ga yema rü nüma ga ãëxgacü rü ñanagürü:

—íyaxümicüğü i ngēma chorü  
ngüxēruüğü i chautüüwa ügüxü, rü  
chorü cowarugu penatonagüxēxē ya  
chaune ya Charumóü rü bairawe ya  
Yióüwa penaga! —ñanagürü.

.....

<sup>39</sup>Rü nüma ga chacherdóte ga Chadú  
rü Tupanapatawa nanayaxu ga yema  
carnéruchataçuxre ga chíxümaxā  
āācuxü, rü yema Charumóüétü nabagü  
ga āēxgacü nax yixixüçax. Rü  
yemawena rü carnéruchataçuxregu  
nicuegü, rü guxüma ga duüxüğü rü  
tagaācü ñanagürüğü: —iNamaxü ya  
Āēxgacü ya Charumóü! —ñanagürüğü.

.....

**Nawa iyacuaxgüxü ga mugü ga Dabí  
Charumóümaxā nüxü ixuxü**

**2** <sup>1</sup>Rü ningaica ga Dabí ga nax  
nayuxü, rü yemaçax nane ga  
Charumóüxü naxucuxē rü ñanagürü:  
<sup>2</sup>—Choma rü guxü i duüxügürüxü tá  
pexna chixü i ñoma i naanewa. iRü  
cugü naporaxēxē rü taxü icumuüxü! Rü  
chanaxwaxe i chauxrüxü mecü ya  
āēxgacü quixixü. <sup>3</sup>iRü Cori ya  
Tupanaarü mugü rü naga naxñü, rü  
norü ngüchaü naxü! iRü yanguxēxē i  
guxüma i norü mugü ga Moiché  
ümatüxü nax ngēmaācü mea cuxü  
ínanguxuchixüçax i guxüma i cuxixü rü  
mea cuxü nangupetüxüçax i ngextá  
cuma ícuxüüwa! <sup>4</sup>Rü ngēxguma  
ngēmaācü cunaxüxgux rü Tupana rü tá  
cuwa nayanguxēxē ga yema uneta ga  
chomaxā nüxü yaxuxü ga yexguma  
ñaxgu choxü: “Rü ngēxgumachi yimá  
cune rü cutaagü rü mea chauga  
naxñüegu rü aixcüma chauxçax

namaxēgu rü tama choxna  
yaxígachixgu, rü guxügutáma natanüwa  
tá nixí i Iraéanecüāxgüarü āēxgacü ne  
naxüxü, rü tagutáma nataxu nax wüxi i  
cutanüxü i Iraéanecüāxgüarü āēxgacü  
yixixü” —ñanagürü choxü.

.....

<sup>10</sup>Rü ñuxüchi ga Dabí rü nayu, rü  
norü oxigüxütagu nayataçgü ga  
Yerucharéüwa. <sup>11</sup>Rü 40 ga taunecü nixí  
ga Iraéanecüāxgüarü āēxgacü yixixü. Rü  
7 ga taunecü nixí ga Ebróüwa āēxgacü  
yixixü rü 33 ga Yerucharéüwa. <sup>12</sup>Rü  
Charumóü nixí ga yexwacaxücü ga  
āēxgacü ga nanatü ga Dabíchicüxü  
ixicü. Rü yexguma āēxgacü yixixgu ga  
Charumóü, rü meama nüxü nangupetü  
ga Iraéanecüāxgü.

.....

**Charumóü rü Tupanaxütawa  
naxçax ínaca i çuax**

**3** <sup>5</sup>Rü wüxi ga chütaxügu rü ñane ga  
Gabóüwa rü Cori ya Tupana rü  
Charumóüçax nangox ga nanegüwa, rü  
ñanagürü nüxü: —iChoxna naxçax naca  
i ngēma cunaxwaxexü rü choma rü tá  
cuxna chanaxā! —ñanagürü. <sup>6</sup>Rü nüma  
ga Charumóü rü nanangāxüga rü  
ñanagürü: —Cumax, Pa Chorü Tupanax,  
rü nüxü cungechaüxüchi ga chaunatü ga  
Dabí ga curü duüxü ixicü, yerü nüma rü  
meama cupexewa inixü, rü mexü naxü,  
rü cupexewa rü mea iniwex ga norü  
maxü. Rü yemaçax poraācü nüxü  
cungechaü rü wüxi ya nanena cunaxā  
nax nachicawa natoxüçax rü  
Iraéanecüāxgüarü āēxgacü yixixüçax.  
<sup>7</sup>Rü cumax, Pa Corix, Pa Chorü  
Tupanax, rü choxü cumu nax chaunatü

ya Dabíchicüxü ãëxgacü nax chixíxüçax, woo i choma rü wüxi i ngextüxüxü i taxuxü cuáxü nax chixíxü. <sup>8</sup>Natürü i ñuxma rü choxmexwa nangexmagü i guxüma i ngëma Iraéanecüãxgü i cuma nüxü cuxunetaxü. Rü nüma i ngëma duüxügü i ñuxma rü namuxüchi rü ngëmacax taxucürüwa texé tayaxugü. <sup>9</sup>Rü ngëmacax chanaxwaxe i choxna cunaxã i cuax nax ngëmaãcü mea namaxã ichacuáxüçax i curü duüxügü rü nüxü nax chacuáxüçax i ngëma mexü rü chixexü. ¿Erü texéaxü natauxcha nax namaxã itacuáxü i ñaa curü duüxügü i muxüchixü? —ñanagürü. <sup>10</sup>Rü nüma ga Cori ya Tupana rü namaxã nataãxë ga yema Charumóü naxçax ícaxaxü. <sup>11-12</sup>Rü yemacax ñanagürü nüxü: —Ngëma nax choxna naxçax cuçaxaxü i ngëma, rü tama naxçax ícucaxü nax namáxüçax i curü maxü, rüexna cumuarü diëruáxüçax, rüexna curü uanügü chadaixüçax, natürü naxçax ícucaxü i cuax nax mea namaxã icucuáxüçax i ngëma curü duüxügü, rü ngëmacax tá cuxna chanaxã i ngëma choxna naxçax ícucaxü. Rü choma rü tá cuxna chanaxã i cuax ga üpa taguma texéaxü yexmaxü rü cuwena tagutáma texéaxü ngëxmaxü. <sup>13</sup>Rü naétü tá cuxna chanaxã i ngëma tama naxçax ícucachiréxü. Rü tá cuxna chanaxã i muxütama i curü ngëmaxügü i mexü, rü tá cuxü charüngüxë nax cumaxã nataãxëgüxüçax i ngëma curü duüxügü i Iraéanecüãxgü. Rü ngëmaãcü i cuma rü guxüma i curü maxügu rü nataxutáma i to i ãëxgacü i cumaxã wüxiguxü. <sup>14</sup>Rü ngëxguma mea cunaxüxgux i chorü ngúchaü rü cuyanguxëxgu i chorü mugü, yema

cunatü ga Dabí naxüxürüxü, rü choma rü tá chanamaxëxë i curü maxü —ñanagürü. <sup>15</sup>Rü yexguma nabaxächigu ga Charumóü, rü nüxü nicuaxächi ga nanegü nax yixíxü ga yema. Rü yexguma Yerucharéüwa nanguxgu, rü Tupanapatawa naxü rü yema baü ga Cori ya Tupanaarü mugüchixüpexewa nangu. Rü naxüna nadai rü ínanagu rü yemaãcü Tupanaxü namaxã nicuaxüxü. Rü yemawena rü taxüma ga ñna naxü naxçax ga guxüma ga norü ngüxëeruügü.

**Charumóü nanamexëxë ga taxre ga  
ngexüarü guxchaxü**

<sup>16-17</sup>Rü wüxicana rü taxre ga nge ga ingeãxëmarecü rü Charumóüxütawa ixí. Rü yexguma napexewa nayexmagügu, rü wüxi ga yema nge rü ngügürügü: —Pa ãëxgacüx, choma rü ñaa nai i nge rü wüxi ya ípatawatama tangexmagü. Rü yexguma yéma tayexmagüyane, rü chaxíraxacü. <sup>18</sup>Rü tomaepüx ga ngunexüguwena ga nax chaxíraxacüxü, rü ngüma i ñaa nai i nge rü ixíraxacü. Rü toxicatama yéma tayexmagü, rü nataxuma ga to ga duüxügü ga guma ípatawa. Rü toxicatama tixügü. <sup>19</sup>Natürü wüxi ga chütaxügu rü tayu ga guxema ngíxacü i ñaa nge yerü túmaétü ica. <sup>20</sup>Rü yexguma ga ngüma rü bexma ngáxücü írúda. Rü yexguma choma íchapeyane rü bexma chauechita tüxü iyaxu ga guxema chauxacüxe rü ngügüxütagu tüxü iyacaxëxë. Rü guxema ngíxacüxe ga yuxe rü chauxütagu tüxü iyacaxëxë. <sup>21</sup>Rü yexguma paçmama ícharüdadaxgu nax tüxü chamaxüçax ga guxema chauxacüxe, rü tüxü chadau ga

nax tayuxû. Natürü ga mea nax yangóonexû, rü mea tüxû chadau rü nüxû chicuaxächi nax guxema buxe rü tama chauxacüxe nax tixîxû —ngîgürügü. <sup>22</sup>Rü ngîma ga yema nai ga nge rü ngîgürügü: —Tama nixî. Rü chauxacüxe tixî ya yîxema maxûxe rü yîxema yuxe rü cuxacü tixî —ngîgürügü. Natürü ga ngîma ga yema nge ga ngîxíra idexacü rü ngîgürügüama: —Tama nixî. Rü cuxacüe tixî ya yîxema yîxe rü chauxacüe tixî ya yîxema maxûe —ngîgürügüama. Rü yemaacü ngîgümaxâ yéma iyaporagatanücüxü âêxgacüpeḡewa. <sup>23</sup>Rü yexguma ga nüma ga âêxgacü rü meama nagu narüxînü rü nügüâêwa ñanagürü: “Ñaa nge rü ngîgürügü: ‘Ngîxacüxe tixî ya yîxema maxûxe rü yîxema yuxe rü ngêma nai i ngexacü tixî’ ngîgürügü. Natürü ngêma nai i nge rü tōócü nüxû iyaxu” ñanagürü ga nügüâêwa. <sup>24-25</sup>Rü ñuxüchi ga nüma ga âêxgacü rü ñanagürü: —iNua penange i wüxi i tara! —ñanagürü. Rü yexguma âêxgacüxütawa nangegüâxgu ga tara, rü nanamu rü ñanagürü: —iËcü ngâxügu tüxû perüdate ya daxe buxe rü wüxichipanü ngîxna pixächigü i ngêma nge! —ñanagürü. <sup>26</sup>Natürü ga yema nge ga tümaé ixîcü ga guxema buxe yamaxûxe rü poraäcü ingechaüxüchi tümacax ga guxema ngîxacüxe, rü âêxgacüxü icaxxü rü ngîgürügü: —Pa Chorü Âêxgacüx itaxü i tüxü quimáxü ya yîxema buxe! Rü narümemae nixî i ngîxna tüxü cumu i ngêma nai i nge —ngîgürügü. Natürü ga yema nai ga nge rü ngîgürügüama: —Marü name i cunadate i ngêma buxü nax taxuearüma nax yixîxücaḡ —ngîgürügü. <sup>27</sup>Rü

yexguma nüma ga âêxgacü rü ñanagürü: —iNgîxna tüxü pemu i ngêma tama naxwaxecü nax tüxü rüdatexü ya yîxema buxe, erü ngêma iyixî i aixcüma tümaé ixîcü! —ñanagürü. <sup>28</sup>Rü guxüma ga Iraéanecüâxgü rü nüxü nacuáchigagü ga yema âêxgacü üxü ga ñuxäcü nanamexêäxü ga yema taxüchixü ga guxchaxü. Rü yemaçax nüxü nangechaügü yerü nüxü nacuáchigagü ga ñuxäcü Tupana cuax nüxna äxü nax namexêäxücaḡ ga guxchaxügü.

#### Charumóü rü Iraéanecüâxgümaxâ inacuaḡ

**4** <sup>1</sup>Rü nüma ga Charumóü rü guxüma ga Iraéanecüâxgüarü âêxgacü nixî.

.....

<sup>20</sup>Rü Yudáanewa rü Iraéanewa rü namuxüchima ga norü duüxügü ñoma naxnecüteḡe i taxtüpechinüwa ngêxmacürüxü. Rü yema taxre ga naanegüwa rü taguma nataxu ga öna rü axexü, rü ga duüxügü rü nataâxégü. <sup>21</sup>Rü yema naane ga Charumóü namaxâ icuaxü, rü éstewaama rü taxtü ga Eufrátewa inaxügü ñuxmata Piritétanüxügüarü üyeaneḡa rü Equítuanearu üyeaneḡa nangu ga oéstewaama. Rü guxüma ga yema togü ga duüxügü ga tama Iraéanecüâxgü ixîgüxü ga Charumóüaru naanewaama ixügüetanüxü rü nanaxütanügü ga yema diêru ga âêxgacüna üxü, rü Charumóümexêwa nayexmagü ga yexguma namaxyane. ....

<sup>25</sup>Rü yexguma Charumóü maxyane rü ga Yudáanecüâxgü rü yema togü ga Iraéanecüâxgü rü nügü nangechaügü rü taâxêäcü nügümaxâ ínamaxê. Rü nórtewaama rü íane ga Dáüwa inaxügü

ñuxmata ñane ga Bechébawa nangu ga súrwaama rü wüxichigü nüxü nayexma ga napata rü naane.

.....

<sup>29</sup>Tupana rü taxüma ga cuax rü mexü ga ñnü Charumóüna naxá. Rü yemaacü nüxü nacuaxüchi. Rü norü cuax rü ñoma naxnecütexe ya márpechinüwa ngëxmacürüxü namuxüchi. <sup>30</sup>Rü yemaacü ga Charumóüarü cuax rü Equítuanecüãxgüarü cuaxü nangupetü, rü yema duüxügü ga éstewaama yexmagüxüarü yexera nixü ga norü cuax. <sup>31</sup>Rü guxüma ga togü ga yatüarü yexera nüxü nacuax. Rü Etáü ga Chérataxaarü yexera nüxü nacuax, rü Emáü, rü Cacú, rü Dára, rü Maú nanegüarü yexera nüxü nacuax. Rü yema nachiga rü guxüma ga yema nachixüanegü ga nacüwawa yexmagüxüwa nangu. <sup>32</sup>Rü 3,000 ga ucuxëgüxü nixu, rü nanaxümatü ga 1,005 ga wiyægü. <sup>33</sup>Rü naigüchiga nidexa rü nanetüchiga. Rü guma ocayiwa ga taxüne ga Líbanuarü naixnecüwa yexmanechiga nidexa rü ñuxmata yema natüane ga írxaxü ga íxtapüxwa rüxügüxüchiga nidexa. Rü ñuxüchi nachiga nidexa ga naexügü, rü werigü, rü naexügü i naxtanecamaxá itügüxü rü choxnigü. <sup>34</sup>Rü muxüma ga to ga nachixüanecüãxarü ãëxgacügü rü Charumóüxütawa nanamu ga norü ngüxëeruügü nax naxütawa yayauxgüaxüçax ga norü ucuxëgü.

**Charumóü rü ñane ga Tíruarü  
ãëxgacü ga Iráümaxá inaxüga**

**5** <sup>1</sup>Rü yexguma Iráü ga Tíruarü ãëxgacü nüxü cuaxgux ga Charumóü rü nanatü ga Dabíchicüxü ãëxgacü nax yixüxü, rü norü

ngüxëeruügü yéma Charumóüxütawa namugü, yerü ga Iráü rü guxüguma Dabíxü nangechaü. <sup>2</sup>Rü yexguma ga Charumóü rü nanangäxüga rü Iráüçax yéma namuga rü ñanagürü: <sup>3</sup>“Cuma nüxü cucuax ga gumá chaunatü ga Dabí nax taxucürüwama naxüaxü ga guma Cori ya Tupanapata nagagu ga yema dai ga nagu tamaxüxü, ñuxmata Cori ya Tupana tümamexëwa nayexmagüxëçax ga yema tümaarü uanügü. <sup>4</sup>Natürü i ñuxmax i nüma ya Cori ya Tupana rü taaxë toxna naxá i guxüwama i tochixüanewa rü nataxuma i torü uanügü rü nataxuma i chixexü i toxçax ínguxü. <sup>5</sup>Rü ngëmacax nagu charüxüni nax chorü Tupanaçax chanaxüxü ya wüxi ya napata yema chaunatümaxá inaxunetaxürüxü nax choma tá yixüxü i naxçax chanaxüxü. Yerü Tupana rü ñanagürü tüxü ga chaunatü: ‘Rü yimá cune ya cuchicüxü cuchicawa charütoxëëcü, rü yimá tá nixü ya naxücü ya chopata’, ñanagürü tüxü. <sup>6</sup>Rü ngëmacax, Pa Äëxgacüx, Pa Iráüx, rü cuxna chaca i ñuxmax nax ñaa i puracüwa choxü curüngüxëçüçax. iRü namu i curü duüxügü nax Líbanuarü naixnecüwa ocayiwa choxü ne nadexüçax! Rü chomax rü tá chorü duüxügü ngëma chamugü nax curü duüxügüxü nangüxëëgüxüçax. Rü chomax rü tá cuxü chanaxütanü i ngëma naxçax ícucaxaxüexpüx naxçax i curü duüxügüarü puracü. Erü cuma nüxü cucuax rü taxüema ya Iraéanecüãxgü nüxü tacuax nax mürapewa tayaxuxü i ngëma curü duüxügü i Chidóücüãxgürüxü”, ñanagürü. <sup>7</sup>Rü nüma ga Iráü rü nataaxëxüchi namaxá

ga yema dexe ga Charumóũ yéma muxũ, rü ñanagürü: —Tupanaxũ chicuaxũxũ, erü Dabína nanamu ga wüxi ya nane ya nüxũ cuácü nax ãëxgacü nax yixĩxũcax i Iraéanewa —ñanagürü. <sup>8</sup>Rü ñuxũchi nüma ga Iráũ rü Charumóũcax yéma namuga rü ñanagürü: “Marü chanayaxu i ngëma ore i nua chauxcax cumuxũ, rü tá chanaxü i ngëma naxcax ícucaxũ. Rü cuxna tá chanana i ngëma mürapewa i ocayiwanaxcax rü pínunaxcax”, ñanagürü.

.....

<sup>13</sup>Rü yexguma ga Charumóũ rü 30,000 ga puracütanüxũ nade ga guxũma ga Iraéaneciãxgütaniwa. <sup>14</sup>Rü ga guxema rü Libanuarü naixnecüwa tüxũ napuracüexëxë. Rü wüxi ga tauemacügu rü 10,000 yéma tüxũ namugü rü nai ga tauemacü rü toguxe ga 10,000 yéma tüxũ namugü. Rü yemaacü nanapuracüexëxë ga guxũma ga yema tomaepüxtücumü. Rü wüxichigü ga yatü rü wüxi ga tauemacü naixnecüwa nayexma rü taxre ga tauemacü nachixũwa nayexma. Rü Aduniráũ nixĩ ga tümamaxã icuáxũ ga yema puracüwa. <sup>15</sup>Rü nüma ga Charumóũ rü nüxũ nayexma ta ga 70,000 ga yatügü ga nugütaeruxũ rü 80,000 ga yatügü ga nutaarü mexëëcüwawa puracüexũ ga ma xpúneanewa. <sup>16</sup>Rü yemaétü nüxũ nayexma ga 3,300 ga norü duũxũgü ga yema puracütanüxũmaxã icuaxgũxũ. <sup>17</sup>Rü yema nutaarü mexëëcüwaruũgü rü nutaarü ma xpúnewa ne nayapoxochigü ga nutagü ga itacü rü itatanüxũchicü rü meama nayatogücwagü nax guma Tupanapata naétü ütaxũxũcax.

.....

### Charumóũ nanaxü ga Tupanapata

**6** <sup>1</sup>Rü yexguma 4 ga taunecü ãëxgacü yixĩxgu ga Iraéanewa, rü nüma ga Charumóũ inanaxügü ga nax naxüaxũ ga guma Tupanapata. Rü guma taunecügu ga norü taxre ga tauemacü ga Chíxgu (márzo) nixĩ ga inaxügüãxũ. Rü yexguma guma Tupanapata ixügügu, rü marü 480 ga taunecü ningu ga nax Equítuanewa ínaxochüxũ ga Iraétanüxũgü. <sup>2</sup>Rü nüma ga guma Tupanapata rü nüxũ nayexma ga 27 métruarü ngãxũ ga norü maç, rü 9 métru ga norü tachiã, rü 3 métru rü 75 centímetru ga norü máchane. <sup>3</sup>Rü yema nachiã ga nüxíra nawa ixüxucũ ga guma Tupanapata rü 9 métru nixĩ ga norü maç. Rü 4 métruarü ngãxũ nixĩ ga norü tachiã. <sup>4</sup>Rü guma Tupanapataarü ventánagü ga norü ngóonemachiãruxũ rü fiérumenaxãgünaxcax nixigü.

.....

<sup>7</sup>Rü guma nutagü ga guma Tupanapata namaxã naxügücü rü marü ímemarecü nixĩ. Rü yemacax ga yexguma naxügüãxgu ga guma í rü taxuxũma ga martíyuga, rüexna yuemaga, rüexna to ga taxacü namaxã ixüxũga taxínü ga yema ínaxügüãxũwa ga guma í.

.....

<sup>11</sup>Rü yexguma ga nüma ga Cori ya Tupana rü Charumóũmaxã nüxü nixu rü ñanagürü: <sup>12-13</sup>—Yima chopata ya cuxüxũnechigaxũ cumaxã chixu, rü ngëxguma chi chorü mugü nüxü ixüxũácüma cumaxũgu rü chi nagu quixũxgu i ngëma chorü mugü, rü choma rü tá chayanguxëxë ga yema

uneta ga cunatu ga Dabímaxã nüxũ  
chixuxũ ga cuchiga rü petanuwa tá  
chamaxũ rü tagutáma pexna chixügachi  
i pema i Iraéanecüãxgüi i chorü duüxügü  
nax pixígüxũ —ñanagürü. <sup>14</sup>Rü nüma ga  
Charumóũ rü marü nüxũ ningu ga nax  
naxüãxũ ga guma Tupanapata. <sup>15</sup>Rü  
norü aixepetapüxwa ga guma ñpata rü  
mürapewa ga ocayiwanaxçaxmaxã  
nanaxüxtapüx. Rü daxüwa inanaxügü rü  
ñüxmata ñaxtüwa nangu nax  
mürapewamaxã nanaxüxtapüxgüaxũ.  
Rü pínunaxçax ga mürapewamaxã  
nanaxüxmachixũ.

.....

<sup>22</sup>Rü yemaacü ga guma Tupanapata  
rü guxüchiãwama úirumaxã  
nanapexmachiãgü. Rü yexgumarüxũ ta  
ga yema pumáaarü guchicaxũ ga  
nachica ga üünexüpexegu ütaüxũ rü  
úirumaxã nanapexenegü.

.....

<sup>38</sup>Rü guma Tupanapata rü guxüma ga  
norü yemaxügmamaxã ningu ga yexguma  
Charumóũ 11 ga taunecü marü ãëxgacü  
yixíxgu. Rü gumá taunecüarü 8 ga  
tauemacü ga bulgu (noviémbre) nixí ga  
yanguxũ. Rü yemaacü 7 ga taunecügu  
nixí ga yanguxëëgüãxũ ga guma  
Tupanapata.

.....

**Rü tupaucawa nanangegü ga yema baú ga  
Tupanaarü mugü nawa yemaxũ**

**8** <sup>1</sup>Rü yexguma ga Charumóũ rü  
Yerucharéüwa naxçax nangema ga  
guxüma ga yema norü ngüxëëruügü ga  
ãëxgacügü rü guxüma ga yema  
ãëxgacügü ga wüxichigü ga  
Iraéanecüãxtücumümaxã icuaxgüxũ. Rü

nanangutaquexexëxë nax Chióũ ga  
Dabíarü ñanewa yayauxgüaxüçax ga  
yema baú ga Cori ya Tupanaarü mugü  
nawa yemaxũ nax Tupanapatawa  
nangegüaxüçax. <sup>2</sup>Rü gumá taunecüarü 7  
ga tauemacü ga Etanígu (octúbre) nixí  
ga Charumóũ nangutaquexexëxëxü ga  
yema Iraéanecüãxgü nax  
yaxãxüchigüaxüçax ga guma  
Tupanapata. Natürü meama nagu nangu  
ga yema norü peta ga wüxichigü ga  
taunecügu norü düxenügü nagu  
naxüchigagüxũ. <sup>3-4</sup>Rü yéma nangugü ga  
guxüma ga Iraéanecüãxgüarü  
ãëxgacügü. Rü yema chacherdótegü rü  
nanayauxgü ga yema baú ga Tupanaarü  
mugü nawa yemaxũ. Rü guma ñpata ga  
Moiché üxüne ga nawa Tupana namaxã  
idexane rü nayangegü namaxã ga  
guxüma ga yemaxügü ga üünexü ga  
yéma yexmagüxũ. Rü yemagü rü  
chacherdótegü rü Lebítanüxũ nixí ga  
yanaxũ. <sup>5</sup>Rü nüma ga ãëxgacü ga  
Charumóũ rü guxüma ga yema  
Iraéanecüãxgü ga yexma  
ngutaquexegüxũ rü yema baúpexewa rü  
Tupanacax nayagu ga muxüchixüma ga  
carnérugü rü wocagü. Rü  
taxucürüwama texé ixügüxũ ga norü  
mu. <sup>6</sup>Rü yemawena ga yema  
chacherdótegü rü tupaucaarü aixepewa  
nanangegü ga yema baú ga yema  
tupaucachíã ga üünexüwa.

.....

<sup>10</sup>Rü yexguma ñnachoxüxgu ga  
chacherdótegü ga yema nachica ga  
üünexüwa, rü caixanexümaxã nanapá  
ga guma Cori ya Tupanapata. <sup>11</sup>Rü  
nagagu ga yema caixanexü rü nüma ga  
yema chacherdótegü rü taxuacüma

yexma narücho nax Tupanaxĩ  
yacuaxũũgũxũcax, yerü Cori ya  
Tupanaarũ üünemaxã nanapã ga guma  
Tupanapata.

.....

<sup>22</sup>Rũ yemawena ga Charumóũ rü  
napexegu nachi ga yema guchicaxũ ga  
ngextá Cori ya Tupanacax amaregũ  
íguxũwa. Rũ guxũma ga yema  
Iraéanecũãxgũpexewa naxunagũmexẽ.

<sup>23</sup>Rũ ñanagürü: —Pa Corix, ya  
Iraétanũxũgũarũ Tupanax, rü woo  
daxũguxũ i naanewa rü woo ñoma i  
naanewa rü nataxuma ya Tupana ya  
cuxrũxũ ixĩcũ. Erũ cumax rü  
cuyanguxẽxẽ i curü uneta rü tüxũ  
cungechaũ ya guxãma ya yíxema  
aixcũma cuga ñnũxe.

.....

<sup>27</sup>¿Natürü i cumax, rü ñuxũcürüwa i  
wüxi i íxraxũ i nachicawatama  
cumaxũxũ i ñoma i naanewa? Rũ  
ngẽxguma chi daxũguxũ i naane rü  
tama yanguxgu nax nawa cunxemaxũ  
¿rü ñuxãcũ tá yanguxũ ya daa tupauca  
ya íxrane ya cuxcax chaxũxũne?

<sup>28</sup>Natürü Pa Corix, Pa Chorü Tupanax,  
rü chanaxwaxe i choxũ nüxũ cuxĩnũ i  
chorü yumũxẽ. iRũ naxũ i ngẽma  
ñuxma cuxũ naxcax chacaxaxũxũ!

.....

<sup>33-34</sup>Rũ ngẽxgumachi curü duũxũgũ  
chixexũ üegu rü ngẽmagagu norü  
uanügü nüxũ rüporamaegu, rü to i  
nachixũanewa nagagũagu, rü  
chanaxwaxe nax daxũguxũ i naanewa  
icurũxĩnũxũ rü nüxũ nüxũ  
icurũngũmaxũ i norü chixexũgũ, rü ñaa  
torü naane ga torü oxigũna cuxãxũcax  
cunawoeguxẽxũ ega aixcũma cuga

naxĩnũegu rü daa cupatawa naxcax  
ínacagũgu i curü ngũxẽxẽ. <sup>35-36</sup>Rũ  
ngẽxguma yapagũanegu rü taguma  
napuxgu nagagu i ngẽma chixexũ i curü  
duũxũgũ i Iraéanecũãxgũ cupexewa  
ügũxũ, natürü i nümagü rü ngẽxguma  
cuxcax nawoegugu rü daa cupatawa  
yayumũxẽgũgu, rü cuxũ yacuaxũũgũgu,  
rü nüxũ naxoegu i norü chixexũgũ i  
naxcax cupoxcuxẽ, rü chanaxwaxe i  
daxũguxũ i naanewa nüxũ cuxĩnũ rü  
nüxũ nüxũ curũngũma i norü chixexũgũ  
rü cunangũxẽxẽ nax mexũ i nacũmagu  
naxĩxũcax rü cunamu ya yimá pucũ  
nawa i ñaa naane i torü oxigũna cuxãxũ.

<sup>37</sup>Rũ ngẽxguma ñaa nachixũanewa  
nangemagu i taiya, rüexna ínanguxgu i  
nanetüarũ daxaweane, rüexna  
naianexũmaxã nayuegu i nanetügü,  
rüexna ínangugũgu i munügü, rüexna  
õxmigü, rüexna naweanegü, rü  
ngẽxguma torü uanügü nüxũ  
íchomaeguãchigu i torü ñanegü nax toxũ  
nadaixũcax, rüexna taxacürü to i  
guxchaxũ, rüexna daxaweanezü toxcax  
ínguxgu, <sup>38-39</sup>natürü ngẽxguma curü  
duũxũgũ nüxũ naxoegu i norü  
chixexũgũ rü daa tupaucawa  
yayumũxẽgũgu, rü chanaxwaxe i  
daxũguxũ i naanewa icurũxĩnũ rü nüxũ  
nüxũ curũngũma i norü chixexũgũ rü  
nüxũ cunxãxũga i guxũma i ngẽma  
duũxũgũ i aixcũma cumaxã nüxũ ixuxũ  
i norü chixexũ. Erũ cuxicatama nixĩ i  
nüxũ cucuãxũ i wüxichigũarũ maxũ.

<sup>40</sup>Rũ ngẽmaãcũ i curü duũxũgũ rü ñaa  
naane ga torü oxigũna cuxãxũwa  
namaxẽyane, rü tá cuxũ nicuaxũxũgũ.  
<sup>41-42</sup>Rũ ngẽma duũxũgũ i togü i  
nachixũanecũãx rü tá nüxũ naxĩnũe i



cuchiga rü tá nüxü nacuaxgü nax ñuxäcü poraäcü toxü curüngüxëxü. <sup>43</sup>Rü ngëxguma tá yáxüwa cuxçax ne naxixgu nax nua daa tupaucawa yayumüxëgüxüçax irü daxüguxü i naanewa irüxünü rü nüxü nangäxü i norü yumüxë! Rü ngëmaäcü guxütáma i ñoma i naanecüax i nachixüanegü tá cuxü nacuaxgü rü tá cuga naxünü ngëma curü duüxügü i Iraéanecüaxgürüxü. Rü nümagü i yáxüwa ne ixü rü tá nüxü nacuaxgü nax nua daa tupauca ya cuxçax chaxüxünewa nixi i cumaxä yadexagüxü i duüxügü. <sup>44-45</sup>Rü ngëxguma toma itaxiächigu nax torü uanügümaxä togü tadjüxüçax i ngextá cuma toxü ícumugüxüwa, rü ngëxguma daa ñane ya cuma nüxü cuxunetane rü daa tupauca ya cuxçax chaxüxünewa tarüdaunüäcüma tayumüxëgu irü daxüguxü i naanewa irüxünü i torü yumüxë rü toxü ínapoxü i torü uanügümexëwa! <sup>46</sup>Rü ngëxguma curü duüxügü guxü i duüxügürüxü cupexewa chixexü naxügügu rü ngëmacax namaxä cunuxgu, rü norü uanügümexëgu cunayxëëgu nax ngëmaäcü to i nachixüane i yáxügüxüwa rüxna ngaicamaguxüwa nagagüaxüçax, <sup>47</sup>natürü ngëxgumachi ngëma nachixüanewa nüxna yacuaxächigügu i norü chixexü i cupexewa naxügüxü rü cuxçax nawoeguxgux rü cuxna nacagügu nax nüxü nüxü curüngümaxüçax i norü chixexügü, <sup>48</sup>rü ngëxguma ngëma nachixüanewa aixcüma cuga naxünüegu rü ñaa naane ga torü oxigüna cuxäxüguama nadaunüäcüma nayumüxëgügu, rü daa

ñane ya Yerucharëü ga cuma nüxü cuxunetanegu rü daa tupauca ya cuxçax chaxüxünewa nadaunüäcüma nayumüxëgügu, <sup>49</sup>irü daxüguxü i naanewa rü nüxü nüxü naxünü i norü yumüxëgu i nawa cuxü nacaaxügüxü, rü ínapoxü i norü uanügümexëwa! <sup>50</sup>irü curü duüxügüaxü nüxü iyarüngüma i ngëma nax tama cuga naxünüexü rü ngëma norü chixexügü i cupexewa naxügüxü! Rü ngëma äxgacügü i to i nachixüanewa nagagüxü i curü duüxügü irü naxüchicüxü i norü ínü nax curü duüxügü nüxü ngechaütümüxügüxüçax! —ñanagürü ga Charumóü ga norü yumüxëwa.

.....

<sup>54-55</sup>Rü yemaacü yema ämarearü guchicaxüpexegu nacaxápüxüäcüma rü naxunagümexëäcüma Tupanamaxä nidexa ga Charumóü, rü Tupanana naxçax naca ga norü ngüxë. Rü yexguma nüxü nachauxgu ga nax nayumüxëxü, rü inachi rü guxüma ga Iraéanecüaxgümaxä mexü naxuegu. Rü tagaäcü ñanagürü: <sup>56</sup>—Poraäcü tamaxä namecüma ya törü Cori ya Tupana ya tüxü ípoxücü nüxna i törü uanügü, yema inaxunetaxürüxü. Yerü nüma rü aixcüma nayanguxëxë ga guxüma ga yema norü unetagü ga mexü ga norü duü ga Moichéwa nüxü yaxuxü. <sup>57</sup>Rü ñuxma ya Cori ya Tupana rü nataxütägu ga yexguma törü oxigütanüwa nayexmagurüxü. Rü taxütáma tüxna nixügachi rü taxütáma tüxü ínawogü. <sup>58</sup>Rü tüxü naporaexëxë nax ngëmaäcü naxçax idaugüxüçax rü norü ngücháü ixügüxüçax, rü nagu imaxëxüçax i guxüma i norü mugü ga törü oxigümaxä

nüxũ yaxuxũ nax nagu imaxẽxũcax.  
<sup>59</sup>Rü guxũma i ñaa nüxna naxcax  
 chacaxaxũ ya tórü Cori ya Tupana, rü  
 chanaxwaxe i nüma rü chütacü rü  
 ngunecü nagu narüxinü nax ngẽmaacü  
 choxũ nangũxẽxũcax rü pexũ  
 nangũxẽxũcax i guxũwama. <sup>60</sup>Rü  
 ngẽmaacü chanaxwaxe i guxũma i  
 nachixũanegü i ñoma i naanewa  
 ngẽmaguxũ nax nüxũ nacuaxgũxũcax  
 nax aixcũma Tupana nax yixĩxũ ya tórü  
 Cori, rü nataxuxũma i to i naxrũxũ  
 ixĩxũ. <sup>61</sup>Rü ngẽmacax i pemax rü name  
 nixĩ i tórü Cori ya Tupanamaxã  
 pixaixcũmagü, rü name nixĩ i  
 peyanguxẽxẽ rü naga pexĩnüe i guxũma  
 i norü mugü ñoma i ngunexũgurũxũ  
 —ñanagürü ga Charumóũ.

.....

<sup>65</sup>Rü yexguma yaxãxũchigüãxgu ga  
 guma tupauca ga taxũne rü 14 ga  
 ngunexũ ningegü. Rü yexma  
 nangutaquexegü ga muxũchixũma ga  
 duũxũgü ga guxũwama ga Iraeanewa ne  
 ixũ. <sup>66</sup>Rü yemawena ga Charumóũ rü  
 guxũma ga yema duũxũgũxũ narümoxẽ  
 nax nachĩũcax nawoeguxũcax. Rü nüma  
 ga duũxũgü rü taãxẽacũma nawoegu  
 yerü Tupana rü nüxũ nanawex nax  
 ñuxãcü poraãcü norü duũ ga  
 Dabítanũxũxũ nangechaũxũ, rü ñuxãcü  
 poraãcü nüxũ nax nangũxẽxũ i guxũma  
 i norü duũxũgü i Iraeanecüãxgü. Rü  
 nüma ga yema duũxũgü rü norü  
 ãxgacũmaxã mexũ naxuegü.

#### Tupana rü Charumóũmaxã inaxüga

**9** <sup>1-2</sup>Yexguma Charumóũ marü  
 yanguxẽẽgu ga Cori ya  
 Tupanapata, rü guma ãxgacũpata, rü

guxũma ga togü ga naxixchaũxũ, rü  
 Cori ya Tupana rü wenaxarü  
 Charumóũcax nangox yema Gabaóũwa  
 naxcax nangoxgurũxũ. <sup>3</sup>Rü ñanagürü  
 nüxũ: —Nüxũ chaxĩnü i ngẽma curü  
 yumüxẽ rü ngẽma choxũ nax  
 cucaxũxũ. Rü marü chanaxüünexẽxẽ  
 ya daa ngutaquexepataxũ ya cuxũxũne  
 nax guxũguma ngẽma nax  
 changemaxũcax. Rü guxũgutãma  
 nüxna chadau rü namaxã chataãxẽ.  
<sup>4-5</sup>Rü ngẽxguma cunatü ya Dabĩrũxũ  
 mea chopexewa cumaxũxgu rü  
 quixaixcũmagu rü guxũgutãma naga  
 cuxĩnügu i chorü mugü, rü choma rü  
 guxũgutãma Iraeanewa ãxgacũgũxũ  
 chayaxĩgũxẽxẽ i cunegü rü cutaagü,  
 yema cunatü ga Dabĩmaxã  
 ichaxunetaxũrũxũ ga yexguma namaxã  
 nüxũ chixuxgu nax tagutãma nataxuxũ i  
 nataagü i Iraeanecüãxgüarü ãxgacü  
 ixĩxũ. <sup>6-7</sup>Natürü ngẽxgumachi pema rü  
 pexacũgü choxna pixĩgachigu, rü tama  
 peyanguxẽẽgu i ngẽma chorü mugü i  
 pexna chaxãxũ, rü to i tupanagũwe  
 perũxĩxgu rü ngẽmaxũ picuaxũũgũgu,  
 rü choma rü tá pexũ íchawoxũ nawa i  
 ñaa naane ga pexna chaxãxũ. Rü tá  
 nüxna chixũ ya yima ngutaquexepataxũ  
 ya chaugũcax chaxüünexẽxẽne. Rü  
 ngẽxguma i guxũma i togü i  
 nachixũanecüãxgü rü tá pexũ  
 nacugüxeecha. <sup>8</sup>Rü daa  
 ngutaquexepataxũ rü ngẽma natapũxgü  
 tá nügüétü nayi, rü guxũma i ngẽma  
 ngẽma üpetũxũ, rü tá namaxã  
 nabajãxchi rü nüxũ tá nacugüe rü tá  
 ínaca: “¿Tũxcüü ya Tupana rü  
 ngẽmaacü namaxã nanangupetũxẽxẽ i  
 ñaa naane rü daa tupauca ya taxũne?”

ñanagürügü tá. <sup>9</sup>Natürü ngëma ngãxũga rü ñanagürü tá: “Rü ngëma Iraéanecüãxgü rü ngëmaãcü nüxũ nangupetü erü nüxna nixĩgachi ya yimá norü Tupana ga norü oxigüxũ Equítuanewa ínguxũxëécü, rü togü i tupanagnetagüwe narixĩ rü nüxũ nicuaxũxũgü. Rü ngëmacax ya Cori ya Tupana rü guxũma i ñaa chixexũ naxçax ínguxexë” —ñanagürügü tá.

.....

**Charumóũxũtagu inaxũane ga  
Chabáanearü ãëxgacü**

**10** <sup>1</sup>Rü ngĩma ga Chabáanearü ãëxgacü rü yexguma nüxũ naxĩnúgu ga nachiga ga Charumóũ rü ñuxãcü Tupana mexũmaxã rü cuaxmaxã poraãcü nüxũ nax nangũxëexũ, rü yemacax yéma ixũ nax guxchagüxũ ga oremaxã nüxna yacaxaxũçax nax yemaacü nüxũ yaxũxũçax. <sup>2</sup>Rü ngĩma rü meama ngaxãécü Yerucharéũwa ingu namaxã ga muxũma ga caméyugü ga pumáragũmaxã rü úirumaxã rü nutagü ga meruũgũmaxã íxãxwetaxũ. Rü yexguma Charumóũxũtawá nanguxgu rü guxũma ga yema nagu naxĩnúxũãcüma nüxna ica. <sup>3</sup>Rü nüma ga Charumóũ rü meama ngĩxũ nangãxũga ga guxũma ga yema nüxna nax nacaxaxũ, rü nataxuma ga wixi ga ngeariü ngãxũáxũ. <sup>4-5</sup>Rü yexguma ngĩma ga yema Chabáanearü ãëxgacü nüxũ ínũgu ga Charumóũarü cuax rü nüxũ nadãuxgux ga guma ãëxgacüpata ga naxũxũne rü yema mexechixũ ga õnagü ga norü mechagu inumaxũ rü norü ngũxëeruũgüarü ucapugü rü norü

puracütanüxũgüchiru rü yema norü bínuarü baeruügü rü yema muxũchixũ ga naxũnagü ga tupauca ga taxũnegu Tupanaçax ðajũxũ rü íguxũ, rü ngĩma rü poraãcü namaxã íbajixãchiãxë. <sup>6</sup>Rü ãëxgacü ga Charumóũxũ ngĩgürügü: —Yema chauchixũanewa nüxũ chaxĩnúxũ ga cuchiga rü curü cuáxchiga, rü aixcüma nixĩ. <sup>7</sup>Rü ñuxmawaxi nixĩ ichayaxõxũ erü nua chaxũ, rü chauxetũmaxã nüxũ chadau. Natürü yema nüxũ chaxĩnúxũ ga cuchiga, rü curü cuáxchiga ga chomaxã nüxũ yaxugüxũ, rü tama ngãxũwa nangu. Erü ngëma curü cuax, rü curü ngëmaxũgü, rü yema nüxũ chaxĩnúxũarü yexeraxũchi nixĩ. <sup>8</sup>iRü ñuxãcü ecax tataãëgüxũ ya cuxmaxgü, rü nataãxëgüxũ i ngëma curü puracütanüxũgü i guxũguma cuxũtawá ngëxmagüxũ rü nüxũ ínũexũ nax ñuxãcü cuax cuxũ ngëxmaxũ i ngëxguma quidexaxgu! <sup>9</sup>Rü namecũmaxũchi ya Cori ya curü Tupana ya cumaxã taãxëcü rü cuxũ imucuchicü nax Iraéanecüãxgüarü ãëxgacü quixĩxũçax. Rü yemaacü cuxũ ningucuchixëxë nax aixcüma meama ngëma Iraéanecüãxgũmaxã icucuáxũçax, erü guxũguma poraãcü pexũ nangechaũ —ngĩgürügü. <sup>10</sup>Rü yemawena ga ngĩma ga yema ãëxgacü rü nüxna inana ga 3,960 quíru naguxũ ga úiru, rü muxũchixũma ga pumára rü nutagü ga meruũwa mecü. Rü ũpaacü rü taguma Iraéanewa nangu ga yexgumaepũx ga pumáragü ga yema Chabáanearü ãëxgacü Charumóũna naxũexpũx.

.....

<sup>23</sup>Rü nüma ga ãëxgacü ga Charumóü rü norü cuaxwa rü norü yemaxüğüwa rü nüxü narüyexeramae ga guxüma ga togü ga ãëxgacügü ga ñoma ga naanewa yexmagüxü. <sup>24</sup>Rü guxüma ga duüxügü rü nüxü nadaugüchaü rü nüxü naxünechaü ga yema cuax ga Tupana nüxna äxü.

.....

**Charumóü rü togü ga nachixüanegüarü tupanaxü nicuaxüxü**

**11** <sup>1-2</sup>Rü nüma ga Charumóü rü Equítuanecüãxarü ãëxgacü ga Faraóüacümaxä naxäxmax. Rü yexgumarüxü ta namaxä naxäxmax ga muxüma ga ngexügü ga togü ga nachixüanecüãx ixügüxü ga Moátanüxü, rü Amóütanüxü rü Edóütanüxü, rü Chidóücüãxgü, rü Itítatanüxü ga Cori ya Tupana Iraétanüxügüna chuxuxü ga namaxä nax yaxämaxü, yerü ngürüächi ngëma Iraétanüxügü rü tá ngëma ngexügüarü tupanagüwe narüxí. Natürü nüma ga Charumóü rü yema ngexügüxü nangëxë, rü yemacax namaxä naxäxmax. <sup>3</sup>Rü nüxü nayexma ga 700 ga naxmaxüchi, rü nai ga 300 ga nge ga ngímaxä namaxmarecü. Rü yema naxmaxgügagu nixí ga Tupanana yaxügachixü ga Charumóü. <sup>4</sup>Rü yexguma marü yaxguãx yixügu ga Charumóü, rü yema naxmaxgü rü nanatoõxëgü nax yemaacü togü ga tupanagüwe naxüxücax. Rü tama nanatü ga Dabírüxü aixcüma Cori ya Tupanawe narüxü. <sup>5</sup>Rü nüma ga Charumóü rü Chidóücüãxgüarü tupana ga Atatëxü nicuaxüxü. Rü yexgumarüxü ta nüxü nicuaxüxü ga Mícoü ga

Amóücüãxgüarü tupana ga buxe naxcax tüxü yagugüxü. <sup>6</sup>Rü yemaacü ga yema Charumóü üxü rü Cori ya Tupanapexewa tama name. Rü tama nanatü ga Dabírüxü aixcüma Cori ya Tupanaga naxínü. <sup>7</sup>Rü yemacax ga Charumóü, rü guma maxpüne ga Yerucharéüarü éstewaama yexmanegu nanaxü ga wüxi ga ngutaquexepataxü naxcax ga Quemü ga Moáanecüãxgüarü tupanachicünaxä ga buxe naxcax tüxü yagugüxü. Rü yexgumarüxü ta nanaxü naxcax ga Morúx, ga Amóütanüxüarü tupanachicünaxä ga buxe naxcax tüxü yagugüxü ta. <sup>8</sup>Rü yemaacü ta tümacax nanaxü ga guxäma ga naxmaxgü ga togü ga nachixüanecüãxgü ixügüxe nax pumára ítagutëxegüxücax rü naxüna nax tadaixücax naxcax ga tümaarü tupanagü. <sup>9-10</sup>Rü nüma ga Cori ya Iraéanecüãxgüarü Tupana rü Charumóümaxä nanu yerü nüxna nixügachi, woo taxreëpxüxcüna naxcax nax nangóxü, rü namaxä nüxü yaxuxü nax tama togü ga duüxügüarü tupanachicünaxägüxü yacuaxüxücax. Natürü ga nüma ga Charumóü rü tama Cori ya Tupanaga naxínü. <sup>11</sup>Rü yemacax ga Cori ya Tupana rü Charumóüxü ñanagürü: —Ñuxma nax ngëmaäcü tama chauga cuxínüxü rü tama cuyanguxëxü i ngëma yigümaxä ixunetaxü, rü ngëmacax marü tauxütama cunegüwa nangu nax nüxí guxüma i Iraéanecüãxgüarü ãëxgacügü yixügüxücax. Rü wüxi i curü ngüxëëruüna tá chanaxä i ñaa Iraéane. <sup>12</sup>Natürü ngëma cunatü ga Dabígu nax charüxínüxügüagu, taxütama ñuxma cumaxyane cuxna chanayaxu i ñaa

Iraéane. Natürü cunena tá nixĩ ichanayaxuxũ. <sup>13</sup>Natürü taxütáma guxũ i ñaa naane nüxna chayaxu. Rũ wüxi i Iraéanecüãxtücümamaxã tá ichanacuaxêxê i cune, erü cunatü ga Dabígu rü yima ñane ya Yerucharéü ya choma chayaxunegu charüxĩnũ —ñanagürü ga Cori ya Tupana. ....

### Nayu ga Charumóü

<sup>42</sup>Rü nüma ga Charumóü rü 40 ga taunecügü nixĩ ga Iraéanecüãxgümamaxã inacúaxũ ga Yerucharéüwa. <sup>43</sup>Rü yexguma nayuxgu rü ñane ga Yerucharéüarü üye ga nanatü ga Dabígu ãégaxügu nanatãxgü. Rũ yemawena rü nane ga Roboáü nachicüxü ãëxgacü nixĩ.

### Nügü nitoye ga Iraétanüxügü

**12** <sup>1</sup>Rü nüma ga Charumóü nane ga Roboáü rü ñane ga Chiquéüwa naxü yerü guxüma ga Iraéanecüãxgü yéma naxĩ nax yéma ãëxgacüxü yangucuchixêégüaxüçax. <sup>2</sup>Natürü ga Nabáx nane ga Yeruboáü ga üpaacü Charumóüchaxwa Equítuanewa ñacü, rü yéma nüxü nacuáchiga nax ãëxgacüxü yangucuchixü ga Roboáü. <sup>3</sup>Rü Yeruboáüçax nangemagü ga namücügü. Rũ nüma rü Iraéanecãx natáegu rü guxüma ga Iraéanecüãxgümamaxã ãëxgacü ga Roboáüxütawa naxĩ nax namaxã yadexaxüçax. Rũ ñanagürügü nüxü: <sup>4</sup>—Gumá cunatü ga Charumóü rü poraãcü taxü ga diëru toxütawa nayaxu. Rũ ñuxma i cuma rü tama tanaxwaxe i cunatürüxü quixĩ. Rũ

tanaxwaxe i toxü<sup>í</sup> ícunaxixêëxü i ngëma. Rũ ngëxguma tomaxã cumecümagu rü toxü<sup>í</sup> ícunaxixêëgu rü mea tomaxã icucuaxgux, rü tá cuga taxĩnüe rü cuxü tapuracüe —ñanagürügü. <sup>5</sup>Rü nüma ga Roboáü nanangãxüga rü ñanagürü: —ípixĩ rü tomaepüx i ngunexüguwena nua pexĩ! —ñanagürü. Rũ nüma ga duüxügü rü nawoegu. <sup>6</sup>Rü yexgumayane ga nüma ga ãëxgacü ga Roboáü rü naxçax nangema ga yema ucüxëruügü ga nanatü ga Charumóüaxü puracüexü ga yexguma namaxüxgux. Rũ nüxna naca rü ñanagürü: —¿Taxacümaxã i choxü pixucüxëxü i pemax, rü ñuxãcü tá chanangãxügaxü i ñaa duüxügü? —ñanagürü. <sup>7</sup>Rü nümagü rü nanangãxügü rü ñanagürügü: —Ngëxguma chi mea quixixgu namaxã i ñaa duüxügü rü mexü i dexamaxã cunangãxügagu, rü nümagü rü guxügutáma cuxmëxwa nügü nangexmagüxëxê —ñanagürügü. <sup>8</sup>Natürü ga Roboáü rü tama yema nanatüarü ucüxëruügüaxü inaxĩnũ. Rũ naxçax nangema ga yema namücügü ga wüxigu namaxã yaexü rü nüxü puracüexü, rü nüxna naca rü ñanagürü: <sup>9</sup>—¿Taxacümaxã i choxü pixucüxëxü i pemax? ¿Rü ñuxãcü tá chanangãxügaxü i ñaa duüxügü i choxna cagüxü nax namaxã íchanaxixêëxüçax i ngëma diëru i natanüwa chayaxuxü rü tama chaunatürüxü poraãcü taxü i diëru natanüwa chayaxuxüçax? —ñanagürü. <sup>10</sup>Rü nümagü ga yema namücügü ga namaxã wüxigu yaexü rü nanangãxügagü rü ñanagürügü: —Ngëma duüxügü i cuxna cagüxü nax tama cunatürüxü taxü i diëru natanüwa

cuyaxuxĩcax rü ñaãcü tá cunangãxĩ:  
 “Gumá chaunatü rü poraãcü pexũ  
 namu, natürü i choma rü tá norü  
 yexera poraãcü pexũ chamu. <sup>11</sup>Rü  
 aixcüma nixĩ ga chaunatü rü poraãcü  
 taxũ ga diëru petanüwa nayaxu natürü i  
 chomax rü tá yexeraãcü taxũ i diëru  
 petanüwa chayaxu. Rü chaunatü rü  
 goyexũmaxã pexũ nicuajixgü, natürü i  
 choma rü tá cuajixruxũ i fiërumaxã  
 ãpexexũmaxã pexũ chicuajixgüxũ”  
 —ñanagürügü nüxũ. <sup>12</sup>Rü yema  
 ãëxgacü ga Roboáũ nüxũ ixuxürüxũ, rü  
 tomaepüx ga ngunexũ ngupetüguwena  
 rü wenaxarü Roboáũcax nataëgu ga  
 Yeruboáũ namaxã ga guxũma ga  
 duũxügü. <sup>13</sup>Natürü nüma ga ãëxgacü ga  
 Roboáũ rü nanuãcüma nanangãxũ, rü  
 tama naga naxĩnü ga yema nanatüarü  
 ucüxëruügü ga yaexũ. <sup>14</sup>Rü  
 duũxügümaxã nüxũ nixu ga yema ore  
 ga namücügü ga namaxã wüxigu yaexũ  
 nüxũ ixugüxũ, rü ñanagürü: —Aixcüma  
 nixĩ ga chaunatü rü poraãcü taxũ ga  
 diëru petanüwa nayaxuxũ natürü i  
 choma rü tá yexeraãcü taxũ i diëru  
 petanüwa chayaxu. Rü chaunatü rü  
 goyexũmaxã pexũ nicuajixgü, natürü i  
 choma rü tá cuajixruxũ i fiërumaxã  
 ãpexexũmaxã pexũ chicuajixgüxũ  
 —ñanagürü. <sup>15</sup>Rü yemaacü ga nüma ga  
 ãëxgacü rü tama yema duũxügüga  
 naxĩnü yerü woetama Cori ya Tupana  
 rü yemaacü nayaxixëxë nax  
 yanguxũcax ga norü ore ga Nabãx nane  
 ga Yeruboáũmaxã nüxũ yaxuxũ naaxwa  
 ga norü orearü uruxũ ga Aía ga  
 Chírucüãx. <sup>16-17</sup>Rü yexguma yema  
 duũxügü nüxũ icuaxãchitanügu nax  
 nüma ga ãëxgacü tama nayauxãxũ ga

yema naxcax ínacagüxũ, rü inanaxügüe  
 nax yaxáichaxũ rü ñagüxũ:  
 —Taxuwama tüxũ name i Dabí rü  
 natanüxügü. iNgĩxã tachixũanecax  
 tawoegu! iRü Roboáũ rü  
 natanüxügüarü ãëxgacü yixĩ rü tama i  
 tóxrü! —ñagüxũ. Rü guxũma nawoegu.  
 Rü yema Yudátanüxũxica yéma  
 nayaxügü rü Roboáũxũ nayauxgü ga  
 ãëxgacü nax yixixũ. <sup>18</sup>Rü nüma ga  
 ãëxgacü ga Roboáũ rü nanamu ga norü  
 ngüxëëruuxũ ga Aduráũ ga norü  
 puracümaxã icuácü. Rü namaxã nüxũ  
 nixu nax norü puracücax  
 nangutaquexexëãxũcax ga yema  
 Iraéanecüãxgü ga tama naga  
 ñnüechaũxũ. Natürü nüma ga yema  
 duũxügü rü nanueama rü nutamaxã  
 Aduráũxũ nimaxgü. Rü yexguma  
 yemaxũ nacuaxgu ga ãëxgacü ga  
 Roboáũ rü paxa naweũ ga cowaru  
 itúchigünegu nixüe rü Yerucharëüwa  
 naña. <sup>19</sup>Rü yemaacü ga yema togü ga  
 Iraéanecüãxgü rü nanue Roboáũmaxã  
 rü guxũma ga Dabítanüxũmaxã. Rü  
 ññuxma rü ta ngëmaãcü nixĩ. <sup>20</sup>Rü  
 guxũma ga yema Iraéanecüãxgü ga  
 tama Roboáũga ñnüechaũxũ rü nüxũ  
 nacuáchigagü nax Equítuanewa ne  
 naxüxũ ga Yeruboáũ. Rü yemaacax ga  
 yema duũxügü rü Yeruboáũcax  
 nangemagü nax namaxã  
 nangutaquexexũcax. Rü  
 nayangucuchixëëgü nax Iraéanecüãxarü  
 ãëxgacü yixixũcax. Rü guxũma ga yema  
 duũxügü rü Yeruboáũwe narüxĩ. Rü  
 Yudátanüxũxicatama nixĩ ga  
 naxwaxegüxũ ga Dabítaxa ga  
 Roboáũwe rüxixũ.  
 .....

**Yeruboáũ rü**  
**Iraéanecüãxgüxũ namu**  
**nax tupananetachicünaxãgüxũ**  
**yacuãxüũgüxüçax**

<sup>25</sup>Rü nüma ga Yeruboáũ rü wenaxarü nanamexêxê ga guma ñane ga Chiquéũ ga Efraíarü maꝑúneanewa yexmane. Rü gumagu naxãchiũ ga nüma ga ãêxgacü ga Yeruboáũ. Rü guma Chiquéũ namexêêguwena rü nanamexêxê ga guma ñane ga Penué. <sup>26</sup>Natürü ga nüma ga Yeruboáũ rü ñaxũgu narüxĩnũ: “Ngêxguma taxütãma chaxüãxêgu, rü ngürüãchi ngêma Dabítanüxũ rü tá choxũ ínataxüchigü nax Iraéanecüãxarü ãêxgacü chixĩxũ. <sup>27</sup>Rü ngêxguma ñaa duũxügu Yerucharéüwa íxgu nax tupauca ya taxünegu Cori ya Tupanaçax naxünagü yadãjüçax, rü ngürüãchi tá Roboáũ ya Yudaánearü ãêxgacüxũ nangechaũgü, rü tá choxũ nimãxgü, rü wena táxarü Roboáũwe narüxĩ”, ñaxũgu narüxĩnũ ga Yeruboáũ. <sup>28</sup>Rü norü ucuxêruũgüna naca ga yemachiga. Rü yemawena ga nüma ga ãêxgacü ga Yeruboáũ rü taxre ga wocaxacü ga úirunaxçax naxüxêxê rü duũxügüxũ ñanagürü: —Pemax, Pa Iraéanecüãxgüx, rü wüxi i taxü i guxchaxü nixĩ nax Yerucharéüwa pixĩxũ nax ngêma Tupanaxü peyarücuãxüũgüxüçax. Rü dücax, ñaa wocaxacüchicünaxãgü nixĩ i perü tupanagü ga Equítuanewa pexũ ígaxüxũ —ñanagürü. <sup>29</sup>Rü yexguma rü ñane ga Betélgu nanaxú ga wüxi, rü yema to rü ñane ga Dáũgu nanaxú. <sup>30</sup>Rü yemagagu nixĩ ga chixexügu nayixixũ ga Iraéanecüãxgü. Rü yema duũxügu rü Betélwa rü Dáüwa naxĩxũ nax yema

wocaxacüchicünaxãgüxũ  
yanacuãxüũgüxüçax.

.....

**Wüxi ga Tupanaarü orearü uruxü ga**  
**Yudáanewa ne üxü rü poragaacü**  
**Yeruboáũxü naxucüxê**

**13** <sup>1</sup>Rü yexguma Betélwa Yeruboáũ pumáratexê íguyane nawa ga ãmaregiarü guchicaxü, rü yéma nangu ga wüxi ga orearü uruxü ga Yudáanewa ne üxü ga Cori ya Tupana yéma Yeruboáũxütawa muxü. <sup>2</sup>Rü Cori ya Tupana namuxüãcüma tagaãcü yema ãmaregiarü guchicaxüchiga nidexa rü ñanagürü: —Pa ãmaregiarü Guchicaxüx, Pa ãmaregiarü Guchicaxüx, rü Cori ya Tupana rü ñanagürü: “Dabítanüxüwa tá nabu i wüxi i õxhana rü Yochía tá nixĩ i naéga. Rü nüma tá nixĩ i cuwa ínaguaxü i ngêma tupananetachicünaxãgüarü chacherdótegü i ñuxma cuwa pumáratexê ígugüxũ. Rü ngêmaãcü duũxügüchinaxã tá cuétüwa ínagu” —ñanagürü. <sup>3</sup>Rü yematama ngunexügu ga yema orearü uruxü rü ãêxgacümaxã nüxü nixu ga wüxi ga cuãxruxü nax yemawa nüxü nacuãxüçax nax aixcüma Tupanaarü ore yixixũ ga nüxü yaxuxü, rü ñanagürü: —Ñaa nixĩ i cuãxruxü i Cori ya Tupana nüxü ixuxü: “Rü ñaa ãmarearü guchicaxü rü tá nangĩãchi rü yima tanimaca ya naétüwa ngêxmacü rü tá nagüane” —ñanagürü. <sup>4</sup>Rü yexguma nüma ga ãêxgacü ga Yeruboáũ nüxü ínügu ga yema ore ga Tupanaarü orearü uruxü nüxü ixuxü nachiga ga yema ãmarearü guchicaxü ga Betélwa yexmaxü, rü nüma ga Yeruboáũ rü nanu

rü naxunagümexê rü norü purichíagüxü namu rü ñanagürü: —iPeyayaxux! —ñanagürü. Natürü guma naxmex ga naxunagüne rü namaxâ nüxü naxunetane rü yéma nayataitü rü marü taxuacüma narüxue. <sup>5</sup>Rü yexgumatama ga yema âmarearü guchicaxü rü nangĩächi rü guma tanimaca ga naétüwa yexmacü rü nagüane yema Cori ya Tupanaarü orearü uruxü nüxü ixuxürüxü. Rü yemawa nangox nax aixcüma Tupana yixixü ga namuxü nax nüxü yaxuxüçax ga yema ore. <sup>6</sup>Rü yexguma ga nüma ga âëxgacü rü yema orearü uruüna naca rü ñanagürü: —Cuxü chacaçaxü, rü iCori ya curü Tupanana naca nax ngémaäcü charümeméxüçax! —ñanagürü. Rü nüma ga orearü uruxü rü Cori ya Tupanana naca, rü yemaacü narümemex ga guma âëxgacü, rü noxrirüütama nixí. <sup>7</sup>Rü yemawena ga nüma ga âëxgacü rü yema orearü uruüxü ñanagürü: —iNgixâ rü chowe rüxü i chauchiüwa nax ngéma íraxü cungóxüçax! Rü tá wüxi i âmare cuxna chaxâ —ñanagürü. <sup>8</sup>Natürü nüma ga orearü uruxü rü âëxgacüxü nangäxüga rü ñanagürü: —Woo chi norü ngäxü i curü ngëmaxügü i cuchüüwa ngëxmagüxü choxna cuxäxgu, rü taxüchima cuwe charüxü, rü taxüchima chachibü, rü taxüchima chaxaxe i ñaa nachicawa. <sup>9</sup>Yerü yemaacü choxü namu ga Cori ya Tupana. Rü ñanagürü choxü: “iTaxütama cuchibü rü taxütama cuxaxe rü taxütama ngéma nama i noxri nagu quixüxügu cutäegu!” ñanagürü. <sup>10</sup>Rü nüma ga yema orearü uruxü rü to ga namagu natäegu nax tama yema nama

ga noxri Betélwa nagu ne naxüxügu natäeguxüçax. <sup>11</sup>Rü yexguma rü Betélgu naxächüü ga wüxi ga orearü uruxü ga marü yacü. Rü guma nanegü rü namaxâ nüxü nixugüe ga guxüma ga yéma Betélwa naxüxü ga guma orearü uruxü ga Yudáanecüäx. Rü yexgumarüxü ta nanatümaxâ nüxü nixugüe ga yema ore ga âëxgacü nüxü ixuxü. <sup>12</sup>Rü tümax ga nanatü rü tümanegüna taca rü ñatagürü: —¿Ngexürüüxü i namagu natäeguxü? —ñatagürü. Rü nüma ga tümanegü rü tümamaxâ nüxü nixugüe ga yema nama ga nagu natäeguxü ga guma orearü uruxü ga Yudáanecüäx. <sup>13</sup>Rü yexguma ga nüma ga orearü uruxü rü nanegüxü ñanagürü: —iPaxa chauxçax penaxüxmawëx i chorü búru! —ñanagürü. Rü nümagü rü nanamexëëgü ga yema búru, rü yematagu natonagü ga nanatü. <sup>14</sup>Rü nüma rü guma orearü uruxü ga Yudáanecüäxwe nangê. Rü nüxü inayangau nax wüxi ga castáñatüüwa natoxü. Rü nüxna naca rü ñanagürü: —¿Cuma quixixü i orearü uruxü i Yudáanewa ne cuxüxü? —ñanagürü. Rü nüma nanangäxüga rü ñanagürü: —Choma chixí —ñanagürü. <sup>15</sup>Rü yexguma ga guma orearü uruxü ga yacü rü ñanagürü nüxü: —iNgixâ chauchiüwa taxí nax ngéma ichibüexüçax! —ñanagürü. <sup>16</sup>Natürü nüma ga guma orearü uruxü ga Yudáanecüäx rü nanangäxüga rü ñanagürü: —Taxuacüma cuxü íchixümücü rü taxuacü cuchügu chaxücu, rü taxuacüma chachibü rü taxuacüma chaxaxe i ñaa nachicawa. <sup>17</sup>Erü nüma ya Cori ya Tupana rü



meama chomaxã nüxũ nixu nax tama nua chachibüxũcax rü chaxaxexũcax rü tama ngẽma nama ga noxri nagu chixũxũgu chatáeguxũcax —ñanagürü. <sup>18</sup>Natürü nüma ga guma yacü ga orearü uruxũ rü ñanagürü: —Choma rü ta cuxrũxũ orearü uruxũ chixĩ. Rü Cori ya Tupanaarü orearü ngeruxũ i daxũcüãx choxũ namu nax chauchiũwa cuxũ chagaxũcax rü ngẽma cuxũ nax chachibüxẽxũcax, rü cuxũ nax chaxaxexẽxũcax —ñanagürü. Natürü doramare nixĩ ga yema nüxũ yaxuxũ ga guma orearü uruxũ ga yacü. <sup>19</sup>Rü yexguma ga guma orearü uruxũ ga Yudáanecüãx rü düxwa nawe narũxü rü nachiũwa nayachibü rü nayaxaxe. <sup>20</sup>Rü yexguma nügümaxã mechawa natogügu ga guma taxre rü nüma ga Cori ya Tupana rü guma yacü ga orearü uruũmaxã nidexa. <sup>21-22</sup>Rü nüma rü tagaãcü guma orearü uruxũ ga Yudáanecüãxũ ñanagürü: —Nüma ya Cori ya Tupana rü cumaxã nüxũ nixu rü ngẽma tama naga nax cuxĩnũxũ ga yema cuxũ namuxũwa, rü cugü nax cutáeguxũ nax cuchibüxũcax rü cuxaxexũcax i ngextá Cori ya Tupana tama cuxũ ínaxwaxexũwa, rü ngẽmagagu rü taxütáma curü oxigü ítaxgũxũgu cutax —ñanagürü. <sup>23</sup>Rü yexguma marü chibüwa rü axewa yanguxgu ga guma orearü uruxũ ga Yudáanecüãx, rü nüma ga orearü uruxũ ga yacü rü nüxũ nanamexẽxẽ ga norü búru. <sup>24</sup>Rü nüma ga guma orearü uruxũ ga Yudáanecüãx rü ínixü. Natürü namagu nüxũ nangau ga wüxi ga ai rü yexma nayamax. Rü yema naxũne rü namagu naxú. Rü yema búru rü yema ai

rü naxũtagu narücho ga yema naxũne. <sup>25</sup>Rü yexgumayane yéma nachopetü ga ñuxre ga duũxũgü rü nüxũ nadaugü ga naxũne ga namagu üxũ rü yema ai ga naxũnexũtagu irixáũxũ. Rü yexguma guma ñane ga guma orearü uruxũ ga yacü nagu pexũnewa nangugügu ga yema duũxũgü, rü nüxũ nixuchigagü ga yema nüxũ nadaugũxũ. <sup>26</sup>Rü yexguma guma orearü uruxũ ga yacü nüxũ nacuxgu ga guma nax yixĩxũ ga guma orearü uruũxũ ga natáeguxẽãcü, rü aita naxü rü ñanagürü: —Yimá yixĩxũ ya yimá orearü uruxũ ya tama Cori ya Tupana ga ínücü. Rü ngẽmacax i nüma ya Cori ya Tupana rü wüxi i ai napexegu namu nax ngẽmaãcü nagu nawagũxũcax rü yamáaxũcax, yema Cori ya Tupana namaxã nüxũ ixuxũãcüma —ñanagürü. <sup>27</sup>Rü yexgumatama nanegũxũ namu ga naxcax nax namexẽegüaxũcax ga wüxi ga búru. Rü nüma ga nanegü rü naxcax nanamexẽegü. <sup>28</sup>Rü yexguma ga guma orearü uruxũ ga yacü rü ínayadau. Rü yexma namagu nüxũ nayangau ga naxũne rü yema búru rü yema ai ga yema naxũnexũtagu früchoxũ. Rü nüma ga ai rü tama yema naxũnexũ nangõx rü tama tüxũ nimax ga guxema búru. <sup>29</sup>Rü yexguma ga nüma ga orearü uruxũ ga yacü rü guma orearü uruxũ ga Yudáanecüãxũne nangenagü rü búrutagu nanaxũnagü. Rü norü ñanewa nanange nax naxcax naxaxuxũcax rü inatáãxũcax. <sup>30</sup>Rü nüma naxũxü ga naxmaxũgu nayaxücuchi ga naxũne. Rü naxcax naxaxu rü ñanagürü: —Poraãcü cuxcax changechaũ, Pa Chauenexẽ —ñanagürü. <sup>31</sup>Rü yexguma marü yexma

yaxücuchiãguwena, rü nanegüxüñ ñanagürü: —Ngëxguma choma chayuxgu irü ngëma naxmañ i ngëma Tupanaarü orearü uruxü nagu chixücuchixügu tátama choxü pixücuchi! iRü yima chauxchinaxägü rü naxchinaxaxütagu tátama penanú! <sup>32</sup>Erü aixcüma tá ningu i guxüma ga yema Cori ya Tupana nüxü nüxü ixuxëëxü nachiga i ngëma tupananeaarü ãmarearü guchicaxü i Betélwa ngëxmaxü, rü nachiga i guxüma i ngëma togü i ãmarearü guchicaxü i Chamáriaanecüãxaruñ ñanegüwa ngëxmagüxü —ñanagürü. <sup>33</sup>Rü woo yemaacü Tupana nüxü nax nüxü dauxëëxü, rü nüma ga ãëxgacü ga Yeruboáñ rü tama nüxü narüxo ga yema chixexü ga nagu naxñinüxü. Rü wenaxarü duüxügüxü naxuneta ga chacherdóte nax yixügüxüçax nawa ga guma ngutaquexepataxü ya norü tupanachicünaxäçax ixigüne. Rü guxema tüxü nangüchaüxe, rü nüma ga Yeruboáñ rü chíxümaxä tüxü nabaeru, rü chacherdótexü tüxü ningucuchixëxë nawa ga guma ngutaquexepataügü. <sup>34</sup>Rü yema Yeruboáñ üxügagu nixi ga chixexügu nayixü ga nataagü rü yanaxoxü ga guxüma.

.....

**14** <sup>20</sup>Rü nüma ga Yeruboáñ rü <sup>22</sup> ga taunecü ãëxgacü nixi ga Iraéanewa. Rü yexguma nayuxguwena rü nane ga Nadáx rü nachicüxü nixücu nax ãëxgacü yixixüçax.

#### Yudáanearü ãëxgacü ga Roboáñchiga

<sup>21</sup>Rü yoxni ga Yudáanewa rü Charumóñ nane ga Roboáñ nixi ga ãëxgacü ixücü. Rü

nüma rü nüxüñ nayexma ga <sup>41</sup> ga taunecü ga yexguma yaxücuxgu nax ãëxgacü yixixü. Rü <sup>17</sup> ga taunecü nixi ga ãëxgacü yixixü ga Yerucharéüwa. Rü guma ñane nixi ga Tupana nüxü unetane natanüwa ga guxüma ga Iraéanearü ñanegü nax gumawa nayexmaxüçax ga napata. Rü Roboáñ naé rü wüxi ga Amóütanüxü iyixi rü Naamá nixi ga ngíéga. <sup>22</sup>Natürü ga yema Roboáñ üxü, rü poraäcü nachixexüchi ga Tupanapëxewa. Rü yema norü chixexügü ga naxixü, rü guxüma ga norü oxigüarü chixexügüarü yexera nachixe ga Tupanapëxewa. <sup>23</sup>Yerü nümagü ga duüxügü rü norü tupanachicünaxäçax nanaxü ga norü cuaxüüchicagü. Rü wüxichigü ga maxpúnewa rü wüxichigü ga nai ga itaetaxütüüwa nanatogüxëxë ga nutagü rü naixpútagü nax yemaxü yacuaxüügüxüçax. <sup>24</sup>Rü guxüma ga yema nachixüanewa rü nügürüütama yatixü rü ngexü nügümaxä namaxë. Rü yema duüxügü ga Yudátanüxü rü guxü ga chixexü naxigü naxrürü ga yema nachixüanegü ga tama Tupanaxü cuaxgüxü ga nüma ga Cori ya Tupana Iraéanecüãxgüpëxewa íwoxüxü.

.....

<sup>30</sup>Rü guxügüma nügü nadaiecha ga Roboáñ rü Yeruboáñ. <sup>31</sup>Rü yexguma nayuxgu ga Roboáñ, rü ñane ga Yerucharéügu natax tümatanügu ga norü oxigü. Rü nachicüxü ãëxgacüxü ningucuchi ga nane ga Abiá.

#### Abiá rü Yudáanewa ãëxgacü nixi

**15** <sup>1</sup>Rü Abiá inanaxigü ga ãëxgacü nax yixixü ga Yudáanewa ga yexguma Yeruboáñ ga Nadáx nane

marü 18 ga taunecü ãëxgacü yixixgu ga Iraéanewa. <sup>2</sup>Rü tomaepüx ga taunecü nixí ga Yerucharéüwa ãëxgacü nax yixixü. Rü guxema naé rü Maáca nixí ga túmaéga. Rü túma rü Acharóüacü tixí. <sup>3</sup>Rü nüma ga Abiá rü yematama nanatü üxü ga chixexü naxü rü tama aixcúma Cori ya norü Tupanaga naxínü. Rü tama guma norü oxi ga Dabí ga meama Tupanacax maxüürüxü nixí.  
.....

#### Nadax rü Iraéanewa ãëxgacü nixí

<sup>25</sup>Rü yexguma marü taxre ga taunecü ãëxgacü yixixgu ga Ácha ga Yudéanewa, rü nüma ga Nadax ga Yeruboáü nane rü yexwaca inanaxügü ga ãëxgacü nax yixixü ga Iraéanewa. Rü taxretama ga taunecü ãëxgacü nixí ga yéma. <sup>26</sup>Natürü yema naxüxü ga nüma ga Nadax, rü poraäcü nachixe ga Tupanapexewa. Rü yematama chixexügü ga nanatü üxü naxü. Rü muxüma ga tupanetachicünaxägüxü nicuaxüxü. Rü yemaacü poraäcü chixexügu Iraéanecüãxgüxü nayixëxë. <sup>27</sup>Natürü ga Baácha ga Aía nane ga Ichacátanüxü ixícü rü bexma natanüxüxü nanutaquexe nax Nadaxü yamaxgüxücax. Rü Piritéutanüxügüari ñane ga Guibetóügu Nadaxü nimaxgü, ga yexguma nüma ga Nadax guma ñanexü ñnachoeguächiyane namaxá ga guxüma ga Iraéanecüãxgüari churaragü. <sup>28</sup>Rü nüma ga Baácha rü Nadaxü nimax ga yexguma Ácha marü tomaepüx ga taunecü ãëxgacü ixixgu ga Yudáanewa. Rü Nadaxchicüxü ãëxgacü nixí. <sup>29</sup>Rü yexguma noxritama yangucuchigu ga Baácha nax ãëxgacü

yixixü rü tüxü nadai ga guxáma ga Yeruboáütanüxü. Rü yema Cori ya Tupana norü orearü uruxü ga Aía ga Chírucüãxwa nüxü yaxuxürüxü, rü nüma ga Baácha rü guxüma ga Yeruboáütanüxü tüxü nadai rü tüxü naguxëxë. Rü taxúema tüxü ñnayaxúxëxë. <sup>30</sup>Rü yemaacü nangupetü nagagu ga yema Yeruboáü üxü ga chixexü. Rü yema norü pecádugagu nixí ga chixexügu nayixü ga Iraéanecüãxgü rü norü Cori ya Tupanaxü nanuxëëgüxü. <sup>31</sup>Rü guxüma ga yema Nadax üxü i tama nua ngóxü, rü ngëma popera i Iraéanecüãxgüari ãëxgacügüchiga ixümatüxügu naxümatü. <sup>32</sup>Rü guma Yudáari ãëxgacü ga Ácha, rü guma Iraéanecüãxaru ãëxgacü ga Baácha rü nügü nadaiecha. <sup>33</sup>Rü yexguma tomaepüx ga taunecü ãëxgacü yixixgu ga Ácha ga Yudáanewa, rü nüma ga Baácha ga Aía nane rü yexwaca ningucuchi ga Tíchawa nax Iraéanecüãxaru ãëxgacü yixixücax. Rü 24 ga taunecü ãëxgacü nixí. <sup>34</sup>Natürü yema Baácha üxü rü poraäcü nachixe ga Cori ya Tupanapexewa. Yerü nanaxü ga yematama chixexü ga Yeruboáü Iraéanecüãxgüxü nagu nayixixëxü, rü muxüma ga tupanetachicünaxägüxü nicuaxüxü.  
.....

#### Acax rü Iraéanewa ãëxgacü nixí

**16** <sup>29</sup>Rü yexguma 38 ga taunecü ãëxgacü yixixgu ga Ácha ga Yudáanewa rü Acax ga Óüri nane rü yexwaca ningucuchi ga ãëxgacü nax yixixü ga Iraéanewa. Rü 22 ga taunecü ãëxgacü nixí ga Iraéanewa. Rü ñane ga

Chamáriawa nixí ga nayexmaxí.  
<sup>30</sup>Natürü poraáčüxúchima nachixe ga norü maxí ga Cori ya Tupanapexewa. Rü yema nüxíra áëxgacügü ixígüüarü yexera poraáci chixexü naxü. <sup>31</sup>Rü yematama chixexügü ga Yeruboáü ga Nabáx nane üxü naxü. Rü naétü rü Yechabé ga Chidóüarü áëxgacü ga Ebaáxacümaxá naxáxmax. Rü düxwa ngígagu nawa nangu ga norü tupananeta ga Baáxü nax yacuaxüüxü.  
<sup>32</sup>Rü íane ga Chamáriagu Baáçax nanaxü ga wüxi ga ngutaqexepataxü rü wüxi ga ámarearü guchicaxü. <sup>33</sup>Rü yexgumarüxü ta Chamáriawa nanaxü ga tupananeta ga Achérachicünaxá. Rü yemamaxá poraáci Cori ya Iraéanecüáxgüarü Tupanaxü nanuxéxé, guxü ga yema nüxíraxüxü ga Iraéanecüáxgüarü áëxgacügüarü yexera.  
 .....

**Ería nanaxunagü rü tá nax yapagüanexü**

**17** <sup>1</sup>Rü nüma ga Tupanaarü orearü uruxü ga Ería, ga Garaáxarü naanewa yexmane ga íane ga Tibécüáx, rü Acáxü ñanagürü: —Yimá nüxü chapuracücü ya Cori ya Iraéanecüáxgüarü Tupanaégagu cumaxá nüxü chixu, rü doma taunecügu rü tagutáma napu rü bai tá i cherena nax rüngxü ñüxmatáta choma wena nüxü chixu —ñanagürü. <sup>2</sup>Rü yemacax ga Cori ya Tupana rü Eríaxü ñanagürü:  
<sup>3-4</sup>—Ínaxüxü i nua rü üaxcü ne üxüwaama naxü! iRü natü i Yudáüarü éstewaama ngéxmaxü i natüxacü i Queríxgu yarüçux! Rü ngéma natüxacüwa tá cuxaxe rü ngurucugüxü tá chamu nax ngéma cuxü

nangewemügüxüçax —ñanagürü. <sup>5</sup>Rü nüma ga Ería rü nanaxü ga yema Cori ya Tupana namaxá nüxü ixuxü. Rü natü ga Yudáüarü éstewaama naxü, rü yema natüxacü ga Queríxütawa nayayexma. <sup>6</sup>Rü nümagü ga ngurucu rü paxmama rü yáuanecü paü rü namachi Eríacax yéma nangegüxü. Rü yema natüxacüwa naxaxe ga Ería. <sup>7</sup>Natürü marü ñuxre ga ngunexü ngupetüxgux rü yema natüxacü rü nipa yerü taguma napu ga yema nachixüanewa.

**Ería rü yutecü ga íane ga Charétacüax**

<sup>8</sup>Rü yexguma ga Cori ya Tupana rü Eríaxü ñanagürü: <sup>9</sup>—Íane ya Charéta ya Chidóüanewa ngexmanewa naxü, rü ngéxma yarüxáüx rü ngéxma nape! Rü marü ngíxü chamu i wüxi i yutecü i ngéxma áchiücü nax cuxü nachibüxéxüçax —ñanagürü. <sup>10</sup>Rü nüma ga Ería rü inaxüächi, rü íane ga Charétawa naxü. Rü yexguma guma íanearü üüchiwa nanguxgu, rü yéma ngíxü nadau ga wüxi ga yutecü ga yéma üxüwa ücü. Rü ngíxçax naca rü ñanagürü ngíxü: —¿Taxüchima cuxü name i wüxi i axepáügu dexá choxü nuata cunge nax chaxaxexüçax? —ñanagürü. <sup>11</sup>Rü yemataax marü yéma nangeagu, rü nüma ga Ería rü wenaxarü ngíxna naca, rü ñanagürü ngíxü: —¿Tautchi cuxü name ega wüxichipepe ta i paü nua choxü cungegxu? —ñanagürü. <sup>12</sup>Natürü ga ngéma rü inangaxüga rü ngígürügü: —Cori ya Tupanaégagu cumaxá nüxü chixu rü choxü nataxuma i paü. Rü wüximexéäcu i trígutexexicatama choxü nangexma ya wüxi ya tixüwa, rü íxraxü i chíxü i

naxchiüwa. Rü ngëmacax nixí i üxüta chayayaxuxü nax íxraxü i paü chaxüxüçax nüxü ya chaune rü chaugüçax rü ngëmawena rü taiyamaxã tá tayue —ngígürügü. <sup>13</sup>Rü nüma ga Ería rü ngíxü nangãxüga rü ñanagürü: —iTaxuçaxma cumuü! iRü cü yaxü i ngëma nüxü quixuxü! Natürü i ngëma curü trígutexe i cuxü ngëxmaxüwa irü choxü naxüxíra i wüxi i íxraxü i paü i maixcuraxü rü nua choxü nange, rü ngëmawena rü cugüaxü rü cuneaxü naxü! <sup>14</sup>Erü nüma ya Cori ya Iraéanecüãxarü Tupana, rü nüxü nixu rü ngëma curü trígutexe i tüxüwa ngëxmaxü rü ngëma curü chíxü i naxchiüwa ngëxmaxü rü tagutáma nagux, rü ñuxmatáta Cori ya Tupana ñoma i naanegu napuxëëx —ñanagürü. <sup>15</sup>Rü ngíma ga yema yutecü rü íyaxü rü inaxü ga yema Ería ngímaxã nüxü ixuxü. Rü yemaacü ga ngíma rü ngíne rü Ería rü muxüma ga ngunexügüçax naxãwemügü. <sup>16</sup>Rü taguma nagux ga trígutexe ga tüxüwa rü yema chíxü ga naxchiüwa yema Cori ya Tupana Eríawa nüxü yaxuxürüxü. <sup>17</sup>Natürü wüxi ga ngunexügu rü nidaxawe ga yema yutecü ngíne rü nayu. <sup>18</sup>Rü yexguma ga ngíma ga yema yutecü rü Eríaxü ngígürügü: —¿Taxacü chomaxã cuxü Pa Tupanaarü Orearü Ngeruxüx? ¿Rü nua cuxü nax choxna nüxü cucuaxãchixëëxü i chorü chixexügü rü ngëmagagu cunayuxëëxü ya chaune? —ngígürügü. <sup>19</sup>Rü nüma ga Ería ngíxü nangãxüga rü ñanagürü: —iNua namu ya cune! —ñanagürü. Rü yema yutecüxünewa nanaganagü, rü yema ucapu ga nagu napexügu nanagacuchi, rü norü pechicaxügu

nayacaxëxë. <sup>20</sup>Rü yemawena ga Ería rü tagaãcü Cori ya Tupanana naca rü ñanagürü: —Pa Cori ya Chorü Tupanax çrü ngüxü tá ëxna ngíxü quingexëxë i ñaa yutecü i ngíchiügu chapecü, rü ngëmacax cunayuxëëxü ya ngíne? —ñanagürü. <sup>21</sup>Rü yexgumatama ga Ería rü tomaepüxcüna guxema buxëetü nayarüñuãchi rü tagaãcü Cori ya Tupanana naca rü ñanagürü: —Pa Corix, Pa Chorü Tupanax, rü cuxü chacaçaxü nax wena cunamaxëëxüçax i ñaa buxü —ñanagürü. <sup>22</sup>Rü nüma ga Cori ya Tupana rü nüxü naxínü ga Ería nüxü nacaçaxüxü. Rü wenaxarü tüxü namaxëxë ga guxema buxe. <sup>23</sup>Rü yexgumatama ga Ería rü tüxü naganagü ga guxema buxe rü yema ínapexüwa tümamaxã ínarüxü rü ípatachiü ga ñaxtügüxüwa tüxü naga. Rü tümáena tüxü nayamu, rü ngíxü ñanagürü: —iDüçax, nüxü nadau ya cune rü namaxü! —ñanagürü. <sup>24</sup>Rü ngíma ga yema nge rü inangãxüga rü ngígürügü: —Ñuxmawaxi nixí i meama nüxü chacuáxü i Tupanaarü duüxü nax quixíxü rü ngëma nüxü quixuxü rü Cori ya Tupanawa ne naxüxü —ngígürügü.

**Ería rü wenaxarü äëxgacü  
ga Acáxütawa naxü**

**18** <sup>1</sup>Rü yema ngunexügü rü nigüetanü. Rü tomaepüx ga taunecüguwena, rü nüma ga Cori ya Tupana rü Eríamaxã nidexa rü ñanagürü: —iÄëxgacü ya Acáxütawa naxü rü namaxã nüxü yarüxu rü ñoma i naanegu tá chanapuxëxë! —ñanagürü. <sup>2</sup>Rü nüma ga Ería rü inaxüãchi nax Acáxmaxã nüxü yanaxuxüçax. Rü

yexguma rü poraãcü nangux ga taiya ga Chamáriaanewa. <sup>3</sup>Rü nüma ga Acáx rü naxçax naca ga norü ngüxkëeruxü ga Adía ga aixcüma Cori ya Tupanaxü ngechaüxü. <sup>4</sup>Rü nüma ga Adía nixi ga naétiwa nachogüxü ga 100 ga Tupanaarü orearü uruügü ga yexguma Acáx naxmaç ga Yechabé nadaixchaügu. Rü nüma ga Adía rü taxretücumü ga 50 gu nayatoye rü ñuxüchi taxre ga äxmaxügu nayacuxgü rü yéma nayaxüwemüäxü. <sup>5</sup>Rü yexguma namawa nayexmayane ga Ería, rü nüma ga äëxgacü ga Acáx rü Adíaxü ñanagürü: —iNgixã, rü guxüma i ñaa tachixüanegu tanaxiane i guxüma i natüguwa rü natüxacüguwa nax naxçax idauxüçax ya maxë naxçax i tóru búrugü nax ngëmaãcü tama nayuexüçax rü taguma tüxü nataxuxüçax! —ñanagürü. <sup>6</sup>Rü yemaacü ga Acáx rü Adía rü nügümaxã nüxü nixu nax toxnamana naxüxü ga Acáx rü toxnamana ga Adía nax naxçax nadaugüxüçax ga dexá rü maxë. <sup>7</sup>Rü yexguma namawa naxüxgu ga Adía rü Eríaxü yexma nangau. Rü yexguma nüxü yacuaxächigu nax Ería yixüxü rü napexegu nayangücuchi rü ñanagürü: —¿Ëxna cuma quixixü, Pa Chorü Cori, Pa Eríax? —ñanagürü. <sup>8</sup>Rü nüma ga Ería rü nanangäxüga rü ñanagürü: —Ngü, choma chixi. iRü paxa curü corimaxã nüxü yarüxu rü nua changexma! —ñanagürü.

.....

<sup>16</sup>Rü yexguma ga Adía rü Acáxmaxã nüxü nayarüxu nax Ería yéma nguxü, rü nüma ga Acáx rü yéma naxü nax Eríaxü íyadauxüçax. <sup>17</sup>Rü yexguma Eríaxü

nadauxgu rü ñanagürü: —¿Cuma ëxna quixi i ngëma yatü i Iraéanecüãxgüçax chixexü ícunguxëëxü? —ñanagürü. <sup>18</sup>Rü nüma ga Ería nanangäxüga rü ñanagürü: —Tama chaugagu nixi i ngëma guxchaxü i ngupetüxü i nua Iraéanewa. Rü cuma rü curü duüxügügagu nixi i ngëma ngupetüxü, erü tama naga pexinüe i ngëma Cori ya Tupanaarü mugü rü Baächicünaçgüxü pecuaxüxügü. <sup>19</sup>iRü ñuxma rü curü duüxügüxü namu nax maçpüne ya Carmérugu nangutaquexegüxüçax i guxüma i Iraéanecüãxgü namaxã i ngëma 450 i Baáarü orearü uruügü rü 400 i Achéaraarü orearü uruügü i Yechabémexëwa ngëmagüxü rü nüxü rüngüxëëxü! —ñanagürü ga Ería.

#### Ería rü Baáarü orearü uruügü

<sup>20</sup>Rü yexguma ga Acáx rü guxüma ga Iraéanecüãxgüçax nangema, rü nanangutaquexexëxë ga yema orearü uruügü ga maçpüne ga Carmérugu. <sup>21</sup>Rü yexguma ga nüma ga Ería rü guxüma ga duüxügümaxã nidexa rü ñanagürü: —¿Nuxgüxüratáta i pemax i nüxü perüxoexü nax taxre i ñnügü perüxinüexü? Rü ngëxguma Cori ya Tupana rü aixcüma Tupana yixixgu irü nawe perüxi! Rü ega Baá yixixgu irü ngëmawe perüxi! —ñanagürü. Rü nüma ga duüxügü rü taxuxümaama nanangäxügagü. <sup>22</sup>Rü nüma ga Ería rü nidexachigüama rü ñanagürü: —Chaxicatama chixi i Cori ya Tupanaarü orearü uruxü i íchayaxüxü rü chamaxüxü. Natürü ngëma Baáarü orearü uruügü rü 450 nixi. <sup>23</sup>Rü ñuxma rü name nixi i taxre i wocaxacü nua

pega. Rū nūmagū i Baáarū orearū uruūgū rū tá nayayauxgū i wūxi. Rū āgūmūcūgu tá inanachexcugū. Rū ngēmaācū ūxūtanūétūgu tá nananugū i ngēma namachi i Baáarū āmarearū guchicaxūwa, natürū taxūtáma nayanāixēxē ya ūxū. Rū ngēxgumarūxū tá ta i chomax rū chanamexēxē i ngēma to i wocaxacū rū ūxūétūgu tá chananugūmachi, natürū taxūtáma chayanaixēxē ya yima ūxū. <sup>24</sup>Rū ngēmawena i pema rū tá perū tupanana pecagūe, rū choma rū tá Cori ya Tupanana chaca. Rū yima ūxūmaxā tūxū ngāxūgacū, rū yimá tá nixī ya aixcūma Tupana ixīcū —ñanagürū. Rū guxūma ga duūxūgū nanangāxūgagū rū ñanagürügū: —Mexūma nixī i ngēma ĩnū —ñanagürügū. <sup>25</sup>Rū ñuxūchi ga Ería rū yema Baáarū orearū uruūgūxū ñanagürū: —iNgexürūxū i ñaa wocaxacū peyaxu rū pexíra penamexēxē, erū pemu i pemax! iRū ñuxūchi perū tupanana peca natürū taxūtáma nawa penangixichi! —ñanagürū. <sup>26</sup>Rū yemaacū ga nūmagū rū nayayauxgū ga yema wocaxacū ga nūxna namugūxū. Rū nanamexēēgū rū paḡmamacürūwa inanaxūgūe ga norū tupana ga Baána nax nacagūexū rū ñuxmata tocuchiwa nangu. Rū ñanagürügū: —iToxū nangāxūga Pa Baáx! —ñanagürügū. Rū yema āmarearū guchicaxū ga naxūgūxūxū ĩniyuxeguāchitanūcūxū, natürū nataxuma ga taxacū ga nangāxūgūxū. <sup>27</sup>Rū yexguma tocuchiwa nanguxgu, rū nūma ga Ería rū yema Baáarū orearū uruūgūgu nidauxcüraxū rū ñanagürū: —iYexera poraācū pixáicha! Erū ngēma

perū tupana rū ngürüāchi i puracūgu narūxāūx, rüexna nayawoxex, rüexna ūñawena naxū, rüexna ngürüāchi ĩnape rū name nixī i ĩpenabajxgū —ñanagürū. <sup>28</sup>Rū nūmagū rū nayadaxēxē ga nax yaxáichaxū. Rū cūxchimaxā nūgū niwítūchacūgū rū nūgū ĩnapaixūnegū, yerū yema nixī ga nacūmagū ga naxūgūūxū, ñuxmata naduegumūxūnegū. <sup>29</sup>Rū tocuchiwa nangu rū nūmagū rū ĩnayadaxēēgū ga nax yaxáichaxū rū nax nayuxtanūxūxū, rū yemaacū nayáuanexūgūmare, natürū taxuxūma nanangāxū rū bai ga wūxi ga naga ga nūxū naxīnūexū. Rū dūxwa orawa nangu nax Ería Tupanacax yamāxū ga yema to ga wocaxacū. <sup>30</sup>Rū yexguma ga Ería rū guxūma ga duūxūgūxū ñanagürū: —iNúmamaxūra pexī! —ñanagürū. Rū guxūma ga duūxūgū rū naxūtawaama naxī. Rū nūma ga Ería rū nanamexēxē ga yema Tupanaarū āmarearū guchicaxū ga rüngutaūxū. <sup>31</sup>Rū nanayauxpūta ga 12 ga nuta naexpūx ga nanegū ga Acóbu ga Iraéanegu áégacū. <sup>32</sup>Rū guma nutagūmaxā nanaxū ga Cori ya Tupanaarū āmarearū guchicaxū. Rū yemawena rū ĩnanacaegu ga yema āmarearū guchicaxū rū 20 ga lÍtruxācu ga nanetūchire nagu mexū nixī ga norū taxmachatexe. <sup>33</sup>Rū yemawena rū mea ĩnananu ga ūxū. Rū āgūmūcūgu tūxū ĩnachexcu ga guxema wocaxacū, rū yema ūxūétūgu tūxū nanugūmachi. <sup>34</sup>Rū ñuxūchi ñanagürū: —iĀgūmūcū i tūxū ngīxū pixūgūācu dexámaxā rū ngēma namachiétūgu rū ngēma ūxūétūgu ngīxū pebagūācu! —ñanagürū. Rū yemaacū nanaxūgū ga

duñxũgũ. Rũ wena nanamu nax yemaacũ naxũgũaxũcax. Rũ norũ tomaepũxcũna wena nanamu nax yexma ngĩxũ nabagũacũxũcax ga tũxũ. Rũ yemaacũ nanaxũgũ ga nũmagũ. <sup>35</sup>Rũ yema dexá rũ yema ãmarearũ guchicaxũxũ ñayáeguãchi, rũ yema ícaegũxũmachatexe rũ nanapá. <sup>36</sup>Rũ yexguma orawa nanguxgu nax yaguaxũ ga wocaxacũ, rũ nũma ga Tupanaarũ orearũ uruxũ ga Ería rũ naxcax nixũ ga yema ãmarearũ guchicaxũ. Rũ tagaãcũ ñanagũrũ: —Pa Corix, ya Abraãũarũ rũ Ichaãarũ rũ Iraéanecũãxarũ Tupanax icugũ inawex i ñuxmax nax cuma quixĩxũ i Iraéanecũãxarũ Tupana, rũ choma nax chixĩxũ i curũ duñxũ, rũ cuma quixĩxũ i choxũ cumuxũ nax chanaxũxũcax i guxũma i ñaa chaxũxũ! <sup>37</sup>IChoxũ nangãxũga, Pa Corix, choxũ nangãxũga nax ngẽmaãcũ i ñaa duñxũgũ nũxũ cuaxgũxũcax nax cuma quixĩxũ i Tupana rũ nũxna cuxuxũ nax wena cuxcax nawoeguxũcax! —ñanagũrũ. <sup>38</sup>Rũ yexgumatama Cori ya Tupanaarũ ùxũema rũ ngũrũãchi yexma naétũ nangu ga yema wocaxacũmachi. Rũ nixa ga yema namachi rũ ùxũ rũ wootama ga guma nutagũ rũ waixũmũ. Rũ yema dexá ga yema ícaegũxũmachatexewa yexmaxũ rũ inayache. <sup>39</sup>Rũ yemaxũ nadaugũgu ga guxũma ga duñxũgũ rũ ñaxtũanegu nanangũcuchitanũ rũ ñanagũrũgũ: —Nũma ya Cori nixĩ ya Tupana ixĩcũ. Rũ nũma ya Cori nixĩ ya Tupana ixĩcũ —ñanagũrũgũ. <sup>40</sup>Rũ yexguma ga Ería rũ yema duñxũgũxũ ñanagũrũ: —Ípenayauxũ i guxũma i Baãarũ orearũ uruũgũ rũ taxuxũtãma niña!

—ñanagũrũ: Rũ nũma ga duñxũgũ rũ ñanayauxũ. Rũ yexguma ga Ería rũ natũxacũ ga Chichóũwa nanagagũxẽxẽ rũ yexma nayadaũnaxã.

#### Ería rũ pucũcax nayumũxẽ

<sup>41</sup>Rũ yemawena ga Ería rũ Acáxũ ñanagũrũ: —Ílĩxũ rũ yachibũ rũ yaxaxe! Erũ marũ nicuxcu ya pucũ —ñanagũrũ. <sup>42</sup>Rũ nũma ga Acáx rũ natáegu rũ nayachibũ rũ nayaxaxe. Natũrũ ga Ería rũ maxpũne ga Carmérugu naxĩnagũ. Rũ yexma nayacaxãpũxũ rũ nanangũcuchi ñuxmata ga nachiwe rũ naãpũxũgũmachatexewa nangu. <sup>43</sup>Rũ norũ ngũxẽerũxũ ñanagũrũ: —iDauxũguamaxũra naxĩnagũ, rũ márguama yadawenũ! —ñanagũrũ. Rũ nũma ga norũ duñxũ rũ yema naxũ rũ márétũ nayadawenũ. Rũ yemawena ga yema norũ duñxũ rũ ñanagũrũ: —Nataxuma nixĩ i taxacũ —ñanagũrũ. Natũrũ ga nũma ga Ería rũ nanamu rũ ñanagũrũ: —iRũ 7 expũxcũna íyadau! —ñanagũrũ. <sup>44</sup>Rũ yexguma marũ norũ 7 expũxcũna íyadauxgu rũ yema norũ duñxũ rũ ñanagũrũ nũxũ: —Rũ nũxũ chadau i wũxi i íraxũ i caixanexũ i márchĩũétũwa ñnagũemaxũ i wũxi i naxmexẽraxũxũ —ñanagũrũ. Rũ yexguma ga Ería rũ norũ duñxũxũ ñanagũrũ: —iPaxã inañaãchi rũ Acáxmaxã nũxũ yarũxu rũ naweũgu yaxũe rũ ñnaxĩx nawa ya daa maxpũne rũ íyaxũ naxũpa ya pucũ! —ñanagũrũ. <sup>45</sup>Rũ naweũgu naxĩnagũ ga Acáx, rũ paxã ñane ga Yeréwa naxũ. Rũ yexgumayane rũ nanaxẽãchiane, rũ nibua, rũ tacũ ga pucũ ñnangu. <sup>46</sup>Rũ nũma ga Cori ya Tupana rũ Eríana pora



naxã. Rũ yexguma marũ nũgũna  
pexnagũchirugu rũ ãane ga Yerẽwa  
naña. Rũ Acãxũpa yẽma nangu.

**Erĩa rũ maõpũne ga Orẽxa naña**

**19** <sup>1</sup>Rũ nũma ga Acãx rũ naxmaõ  
ga Yechabẽmaxã nũxũ nixu ga  
guxũma ga yema Erĩa ùxũ, rũ ñuxãcũ  
nax nadaũnaaxũ ga yema Baãarũ orearũ  
uruũgũ. <sup>2</sup>Rũ yexguma ga Yechabẽ rũ  
wũxi ga ngĩrũ duũxũxũ imu ga  
Erĩfamaxã nũxũ nax yanaxuxũcãx ga  
ngĩrũ dexa rũ ñanagũrũ: —Cuma rũ Erĩa  
quixĩ rũ chomax rũ Yechabẽ chixĩ. Rũ  
cumaxã nũxũ chixu rũ name nixĩ i  
chorũ tupanagũ porãcũ choxũ napoxcu  
ega moxũ ñoma i oragu tama cumaxã  
chanaxũxgu i ngẽma Baãarũ orearũ  
uruũgũmaxã cuxũxũ —ngĩgũrũgũ. <sup>3</sup>Rũ  
nũma ga Erĩa rũ nũxũ nicuãxãchi ga  
ãũcumaxũwa nax nayexmaxũ, rũ  
yemacãx ãane ga Bechẽba ga  
Yudãanewa yexmanewa naña. Rũ yẽma  
nanatãx ga guma norũ ngũxẽẽruxũ. <sup>4</sup>Rũ  
yemawena rũ taxũema íxãchiũxũwa  
naxũ. Rũ wũxi ga ngunexũ inixũ, rũ  
wũxi ga naixtũũwa nayarũtoõchi. Rũ  
nũgũgu naxĩnũgu rũ nayuxchaũ. Rũ  
yemacãx Cori ya Tupanaxũ ñanagũrũ:  
—iMarũtama Pa Corix, rũ choxna  
nayaxu i ñaa chorũ maxũ! Erũ  
woetãtama chayũ rũ narũmemae nax  
ñuxmatama chayuxũ —ñanagũrũ. <sup>5</sup>Rũ  
yexma naixtũũgu naca rũ yẽma nape.  
Natũrũ wũxi ga daxũcũãx ga Tupanaarũ  
orearũ ngeruxũ rũ yẽma nangu rũ nũxũ  
yangõgũãcũma ñanagũrũ nũxũ: —Írũda  
rũ nachibũ! —ñanagũrũ. <sup>6</sup>Rũ Erĩa rũ  
nanadauãane, rũ nũxũ nadau ga  
naeruxũtagu naxũxũ ga wũxi ga paũ ga

maixcuraxũ ga ùxũetũwa iguxũ rũ dexã  
ga yexma ùweũxũ. Rũ yexguma ga  
nũmax rũ ñnarũda rũ nachibũ rũ naxaxe.  
Rũ yemawena rũ wena inaca. <sup>7</sup>Natũrũ  
ga Cori ya Tupanaarũ orearũ ngeruxũ  
ya daxũcũãx rũ wenaxarũ Erĩfaxũtawa  
naxũ. Rũ ñnayabaixgũ, rũ ñnanagũrũ  
nũxũ: —Írũda rũ nachibũ! Erũ yãxũgu  
tã quixũ i ngẽma ícuxũxũwa  
—ñanagũrũ. <sup>8</sup>Rũ nũma ga Erĩa rũ  
ñnarũda, rũ nachibũ rũ naxaxe. Rũ yema  
õna rũ porã nũxna naxã. Rũ 40 ga  
ngunexũ rũ 40 ga chũtaxũ nixũ  
ñuxmata nawa nangu ga guma maõpũne  
ga Orẽx. (Rũ gumawa nixĩ ga Tupana ga  
Moichẽcãx nangõxũ.) <sup>9</sup>Rũ yexguma  
guma maõpũnewa nanguxgu ga Erĩa rũ  
wũxi ga ãxmaxũgu naxũcu, rũ yẽma  
nanangupetũxẽxẽ ga chũtaxũ. Rũ nũma  
ga Cori ya Tupana rũ namaxã nidexa, rũ  
ñanagũrũ nũxũ: —¿Taxacũ nua cuxũ, Pa  
Erĩfax? —ñanagũrũ. <sup>10</sup>Rũ nũma ga Erĩa  
nanangãxũga rũ ñanagũrũ: —Poraãcũ  
naetũwa chachogũ i curũ ore, Pa Chorũ  
Cori ya Tupana ya Guxũetũwa  
Ngẽxmacũx. Erũ ngẽma Iraeanecũãxgũ  
rũ marũ nũxũ ñnarũngũmae i ngẽma  
curũ uneta ga namaxã cuxũxũ, rũ nagu  
napogũe i ngẽma curũ ãmarearũ  
guchicaxũgũ, rũ taramaxã tũxũ nadai ya  
yĩxema curũ orearũ uruũgũ. Rũ  
chaxicatama íchayaxũ, rũ ñuxma rũ  
chãuxcãx rũ ta nadaugũ nax choxũ  
yamãxgũxũcãx —ñanagũrũ. <sup>11</sup>Rũ nũma  
ga Cori ya Tupana rũ ñanagũrũ nũxũ:  
—Íñaxũxũ rũ chaupẽxe yachi ya daa  
maõpũneetũwa! —ñanagũrũ. Rũ nũma  
ga Erĩa rũ yemaacũ nanaxũ. Rũ nũma  
ga Cori ya Tupana rũ yẽma naxũpetũ.  
Rũ wũxi ga poraxũchicũ ga buanecũ rũ

nagu nangu ga guma maꝑúne, rü nabu rü ga nutagü rü nipue rü narüyixüchipanü, natürü nüma ga Tupana rü tama guma buanecüwa nayexma. Rü guma buanecüwena rü naxiãxãchiane, natürü nüma ga Tupana rü tama yema iãxãchianewa nayexma. <sup>12</sup>Rü yema iãxãchianewa naxã ga wüxi ga üxiema, natürü nüma ga Tupana rü nataxuma ga yema üxiemawa. Rü yema üxiemawena rü yéma inanaxü ga wüxi ga ígaxü ga naga ga mexechixü. <sup>13</sup>Rü yexguma yema nagaxü naxinügu ga Ería, rü nügü nidüxchiwe norü gáuxüchirumaxã. Rü ínanaxü ga yema maꝑúnearü äxmaxüwa rü naaxgu nayachi. Rü yexma nachiyane rü nüxü naxinü ga wüxi ga naga ga nüxü ñaxü. —¿Taxacü ngéma cuxü, Pa Eríax? <sup>14</sup>Rü nüma ga Ería rü nanangãxü rü ñanagürü: —Nüxü chicuaxãchi nax poraãcü cuxü chachuxuxü, Pa Corix Pa Tupana ya Guxaétüwa Ngëxmacüx. Natürü ngéma Iraéanecüãxgü rü marü nüxü inayarüngümae ga yema namaxã nax icuxügaxü. Rü nagu napogüe i ngéma curü ämarearü guchicaxügü, rü yimá curü orearü uruügü rü taramaxã nanadai. Rü chaxicatama íchayaxü i ñuxmax natürü chaꝑuxcaꝑ rü ta nadaugü nax choxü yamaꝑgüxücaꝑ —ñanagürü. <sup>15</sup>Rü yexguma ga Cori ya Tupana rü Eríaxü ñanagürü: —iËcü nataégu nagu i ngéma nama ga noxri nagu quixüxü i Damácuarü chianexüwa daxü! Rü ngëxguma Damácuarü íanewa cunguxgu irü chíxümaxã nabaeru ya Achaé nax Chíríaanearü äëxgacü nax yixüxücaꝑ! <sup>16</sup>Rü ngëxgumawena rü chíxümaxã nabaeru ya Yeü ya Níchi nane, nax

Iraéanecüãxgüarü äëxgacü nax yixüxücaꝑ! iRü ngëxgumarüxü ta chíxümaxã nabaeru ya Erichéu ya Cháfa nane ya Abe-meúracüãx nax cuchicüxi chorü orearü uruxü nax yixüxücaꝑ! <sup>17</sup>Rü yixema Achaémexéwa íñaxe rü Yeü tá tüxü nimax. Rü yixema Yeúmexéwa íñaxe rü Erichéu tá nixí i tüxü daixcü. <sup>18</sup>iRü dücax, rü cumaxã nüxü chixu rü choma rü marü íchayaxügüxëxé i 7,000 i Iraéanecüãxgü i taguma Baápexegu caápüxügüxü nax nüxü yacuaxüüügüxücaꝑ! —ñanagürü ga Tupana.

#### Tupana rü Erichéuxü nayaxu

<sup>19</sup>Rü yexguma ga nüma ga Ería rü inaxüãchi, rü Erichéu ga waixümüanearü aiegümüanewa puracücüxü yexma nangau. Rü guma Erichéupexegu naxí ga 12 chimüxü ga woca ga taxrechigü nügüwa ngacuxü, rü nümatama ga Erichéu namaxã nixü ga yema nawa iyacuáxü. Rü nüma ga Ería rü Erichéucaꝑ nixü rü naétügu nanachaxanagü ga norü gáuxüchiru. <sup>20</sup>Rü nüma ga Erichéu rü nüxna yéma niña ga norü wocagü, rü Eríawe nangë, rü ñanagürü nüxü: —Chanaxwaxe i choxü cuxüchica nax chaunatüxü rü chauéxü chayameäëxücaꝑ, rü ñuxmachí tá cuwe charüxü —ñanagürü. Rü yexguma ga nüma ga Ería rü ñanagürü nüxü: —Marü name i ngéma cuxü, natürü inüxna nacuaxãchi nax Tupana marü cuxcaꝑ caꝑaxü nax norü orearü uruxü quixüxücaꝑ! —ñanagürü. <sup>21</sup>Rü nüma ga Erichéu rü Eríana nixügachi rü taxre ga woca ga yatüxü niyaxu, rü nanadai, rü ägümücügu inanachexcu.

Rü yema naixmenaxãgü ga wocawa inaxgüxümaxã nanaxüxüü. Rü yemawa ínanagu ga namachi, rü namücügüxü nanangõxëxë. Rü yemawena rü Erfawe narüxü norü ngüxëêruxü.

.....

#### Acáx rü Nabúarü úbanecü

**21** <sup>1</sup>Rü wüxi ga yatü ga íane ga Yerécüãx ga Nabúgu áégacü rü guma íanewa nüxü nayexma ga wüxi ga úbanecü ga áëxgacü ga Acáxpataarü ngaicamána. <sup>2</sup>Rü wüxi ga ngunexü ga Acáx rü Nabúxü ñanagürü: —iChoxna naxã i curü úbanecü nax ngëmaãcü choxü nangexmaxüçax i chorü nanetü necü erü chopatana nangaicama! Rü ngëmachicüxü tá cuxna chanaxã i wüxi i úbanecü i irümemaexü, rüexna ega cunaxwaxegu rü diêrumaxã cuxü chanaxütanü —ñanagürü. <sup>3</sup>Natürü ga Nabú rü Acáxü nangãxüga rü ñanagürü: —Rü Tupana tama nanaxwaxe nax cuxna chanaxãxü i ñaa naane i chaunatü choxna äxü —ñanagürü. <sup>4</sup>Rü yema Nabúarü ngãxügagu rü nüma ga Acáx rü nangechaüãcúma rü nanuãxëãcúma napataçax natáegu, yerü Nabú rü namaxã nüxü nixu ga tagutáma nüxna nax naxããxü ga yema naane ga nanatü nüxna äxü. Rü nüma ga Acáx rü nachüüwa nangu, rü naxchiaügu nayaca, rü íxtapüxguama nabuenü, rü tama nachibüchaü. <sup>5</sup>Rü yexguma ga naxmax ga Yechabé rü naxçax iyaxü rü ngügürügü nüxü: —iTaxacüçax cuma rü tama cuchibüchaü? —ngügürügü. <sup>6</sup>Rü nüma ga Acáx rü ngüxü nangãxüga rü ñanagürü: —Nabúmaxã chidexa, rü

nüxna naxçax chaca nax choxü namaxã nataxexüçax i norü úbanecü. Rü ngëxgumachi choxna naxããxgu rü to i úbanecümaxã nüxü chanaxüchicüxü. Natürü i nümax rü tama choxna nanaxãxchaü —ñanagürü. <sup>7</sup>Rü yexguma ga naxmax ga Yechabé rü inangãxüga rü ngügürügü nüxü: —Natürü cuma quixí i nua Iraéanewa áëxgacü quixíxü. iRü yachibü rü nataãxë! Rü marü choma cuxü tá chanayaxu i Nabúarü úbanecü —ngügürügü. <sup>8</sup>Rü yexgumatama ga ngüma rü Acáxégagu inaxümatü ga ñuxre ga popera. Rü yemagu iyaxüçuchi ga Acáxarü cuaxruxü ga norü ánerawa yexmaxü. Rü ñuxüchi iyamu naxçax ga guma íane ga Yeréarü áëxgacügü. <sup>9-10</sup>Rü yema ngürü poperagüwa rü ñanagürü: —iËcü, guxüma i duüxügümaxã nüxü pixu nax nangutaquexegüxüçax nax tama pechibueãcúma peyumüxëgüxüçax! iRü nüxna pexu ya Nabú nax petanüwa naxüxüçax! iRü naxçax pedax i taxre i yatü i nüxü ixugüxü nax nüma ya Nabú rü Tupanamaxã naguxchigaxü rü áëxgacümaxã chixexü naxuegüxü! iRü ngëmaxü pexinüegu wena, rü ípenagaxüchi rü nutamaxã ípenamuxüchi rü peyamá! —ñanagürü ga yema ngürü poperagüwa. <sup>11</sup>Rü nüma ga yema áëxgacügü ga guma íanecüãx rü nayanguxëëgü ga yema ngürü poperagüwa namaxã nüxü yaxuxü. <sup>12</sup>Rü nanaxügü ga yema ngutaquexe rü yéma Nabúna nacagüe. <sup>13</sup>Rü nüma ga yema taxre ga yatügü rü guxüma ga duüxügüpexewa doraxümare nixugüe Nabúchiga. Rü ñanagürügü: —Ñaa Nabú rü Tupanamaxã naguxchiga rü áëxgacü ya Acáxmaxã rü ta naguxchiga

—ñanagürügü. Rü yemaxũ naxĩnüegu ga duũxũgü, rü Nabúxũ niyauxgü rü ñanepemawa nanagáuchigü. Rü yexma nutamaxã ínanamuxũchigü rü yemaacü nayamaxgü. <sup>14</sup>Rü yexũ nawagiëguwena ga guma ñanearü ãëxgacügü, rü Yechabéxütawa namugagü rü ñanagürügü: —Nabú rü marü nutamaxã ínanamuxũchigü i duũxũgü, rü marü nayu —ñanagürügü. <sup>15</sup>Rü yexguma Yechabé nüxũ cuáchigagu ga Nabú rü marü nax nayuxũ rü ngĩgürügü nüxũ ga guma ngĩte ga Acáx: —Yema úbanecü ga Nabú tama cuxũ namaxã taxechaũxũ, rü ñuxma rü ngetanüácüma cuxrü nixĩ. Erü nüma ya Nabú rü marü nayu —ngĩgürügü. <sup>16</sup>Rü yemaxũ naxĩnügu ga Acáx rü ínayadau ga yema Nabúarü úbanecü, rü noxrüxũ nayaxĩxë. <sup>17</sup>Natürü nüma ga Cori ya Tupana rü Eríaxũ ñanagürü: <sup>18</sup>—Dücax, rü ñuxmatama Chamáriawa naxũ i naxütawa i Iraéanecüãxgüarü ãëxgacü ya Acáx. Rü nüma i ñuxma rü nawa nangexma i ngëma Nabúarü úbanecü i noxrüxũ yaxĩxëxũ. <sup>19</sup>Rü ñacurügü tá nüxũ: “Pa Acáx, rü Cori ya Tupana rü ñanagürü cuxũ: ‘Ñuxma nax cuyamáxũ ya Nabú rü nüxna nax cuyapuxũ i ngëma noxrütama ixixũ, rü ngëmacax i ñuxma i cumax rü tá ta cugügu nadëxgüe i airugü yematama nachica ga Nabügü nawa nadëxgüãxũwa’ ” —ñanagürü ga Tupana. Rü nüma ga Ería rü yéma Acáxütawa naxü nax namaxã nüxũ yanaxuxücax. <sup>20</sup>Rü nüma ga Acáx rü Eríaxũ nangãxũ rü ñanagürü: —¿Cumax, Pa Chorü Uanüx, rü choxũ icuyanguama? —ñanagürü. Rü nüma ga Ería rü nanangãxũ rü ñanagürü nüxũ: —Ngũ, cuxũ ichayangau

nax cumaxã nüxũ chayarüxuxücax nax Cori ya Tupanapëxewa poraãcü chixexũ nax cuxüxũ. <sup>21</sup>Rü ngëmacax ya Cori ya Tupana rü ñanagürü cuxũ: “Rü tá cuxcax íchananguxëxë i taxũ i guxchaxũ, rü cugagu tá ichayanaxoxëxë i guxüma i cutanüxügü. Rü tá chanadai i guxüma i cutanüxügü i yatüxügü i Iraéanewa ngëmagüxũ. <sup>22</sup>Rü yema Nabá nane ga Yeruboãütanüxümaxã, rü yema Aía nane ga Baáchatanüxümaxã chaxüxürüxũ tá chanaxü namaxã i ngëma cutanüxügü. Erü yema ãëxgacügürüxũ choxũ cunuxëxë nagagu nax chixexügu cunayixëxũ i Iraéanecüãxgü”, ñanagürü ga Tupana. <sup>23</sup>Rü Yechabéchiga rü Cori ya Tupana rü ñanagürü: “Rü ngëma airugü rü tá ngixũ nangómachigü i Yeréarü íxpemawa. <sup>24</sup>Rü ngëma cutanüxügü i ñanegu yuexũ, rü airugü tá nanangómachi. Rü ngëma cutanüxügü i ñanearü düxëtügu yuexũ, rü ëxchagü tá nanangómachigü” —ñanagürü. <sup>25</sup>Rü nataxuma ga to ga Iraéanecüãxarü ãëxgacü ga Acáxrüxũ naxmaxgagu chixexũ üxũ ga Tupanapëxewa. <sup>26</sup>Rü nüma ga Acáx rü poraãcü Tupanapëxewa chixexũ naxü ga yexguma yema tupanetachicünaxaxü yacuãxüxügu naxrüxũ ga yema Amoréutanüxügü ga Cori ya Tupana Iraétanüxügütanüwa íwoxüxũ. <sup>27</sup>Rü yexguma yema Ería namaxã nüxũ ixuxüxũ naxĩnügu ga Acáx rü nügüchirugu nagáugü. Rü témüxũ ga naxchirugu nicux rü tama nachibü. Rü yema témüxũ ga naxchirumaxã napeexũ rü nangechaüácüma inarüxüxũ. <sup>28</sup>Rü yexguma ga Cori ya Tupana rü Eríaxũ ñanagürü: <sup>29</sup>—¿Nüxũ cudauxü yixixũ ya Acáx nax ñuxãcü chopëxewa nügü

ínaxíxraxû? Rû ngêma nax chopexegu nügü ínaxíxraxûgagu rû taxûtâma chixexû naxacügütanüwa changuxêxê i ñuxma nax namaxûxûgu i nüma ya Acáx. Natürü ngêxguma marü nayuxguwena rû nane âêxgacü ixîxgu tá nixî i Acáxacügüçax íchananguxêêxû i ngêma chixexû nax ngêmaâcü yanaxoxûçax i natanüxügü —ñanagürü.

**Micaía nüxû nixu rû Acáxû tá narüporamae i norü uanügü**

**22** <sup>1</sup>Rû marü tomaepüx ga taunecü ninge nax taguma nügü nadajixû ga Iraéanecüâxgü namaxâ ga Chíríaanecüâxgü. <sup>2</sup>Natürü guma norü tomaepüx ga taunecügu rû nüma ga Yudáanearü âêxgacü ga Yochapá rû Iraéanecüâxaru âêxgacü ga Acáxûtagu nanaxüane. <sup>3</sup>Rû nüma ga Iraéanecüâxaru âêxgacü rû norü ngûxêêruügüxû ñanagürü: —Pema rû marü nüxû pecuax rû yima ñane ya Ramú ya Garaáxanewa ngexmane rû tüxna naxü. ¿Rû tüxcüü i tama pora taxüe nax namexwa napuxûçax i ngêma Chíríaanearü âêxgacü? —ñanagürü. <sup>4</sup>Rû yexguma ga nüma ga Acáx rû âêxgacü ga Yochapána naca rû ñanagürü: —¿Ëxna tama choxû íquixümücüchaûxû nax yanapuxûçax ya yima ñane ya Ramú ya Garaáxanewa ngexmane? —ñanagürü. Rû nüma ga Yochapá rû nanangâxû rû ñanagürü: —Choma rû chorü churaragü rû ítamemare nax pexû tarüngüxêêgüxû. <sup>5</sup>Natürü naxüpa nax ngêma ixixû, rû name nixî i Cori ya Tupanaarü ínucax tadaugü ngoxi norü ngúchaû yixixû i ngêma —ñanagürü. <sup>6</sup>Rû nüma ga Iraéanecüâxaru âêxgacü rû

nanangutaquexexêxê ga wixgutaax 400 ga norü tupanaarü orearü uruügü. Rû yemagüna naca rû ñanagürü: —¿Marü namexû yixixû rû êxna tama nax napuxû ya yima ñane ya Ramú ya Garaáxanewa ngexmane? —ñanagürü. Rû nüma ga yema orearü uruügü rû nanangâxügü rû ñanagürügü: —Marü name i naxçax ípeyaxüâchi nax peyapuxûçax erü Cori ya Tupana rû marü cuxna nanaxâ —ñanagürügü. <sup>7</sup>Natürü ga nüma ga Yudáanearü âêxgacü ga Yochapá rû ínacaama rû ñanagürü: —¿Nua rû nataxuma i to i orearü uruxû i aixcúma Cori ya Tupanaarü orearü uruxû ixixû nax ngêma rû ta namexû nax nüxna icaxaxû? —ñanagürü. <sup>8</sup>Rû nüma ga Iraéanecüâxaru âêxgacü ga Acáx rû Yochapáxû nangâxû rû ñanagürü: —Ngü, nangexma nixî ya wüxi nax tüxû Tupanana nacaxacü, rû nüma nixî ya Micaía ya Irá nane. Natürü naxchi chaxai erü taguma taxacürü mexûxû chomaxâ nixu, rû guxüguma chixemarexüxicatama nixu —ñanagürü. Natürü nüma ga Yochapá rû nanangâxû rû ñanagürü: —iTaxú i ngêma ñacuxû! —ñanagürü. <sup>9</sup>Rû yexgumatama ga nüma ga Iraéanecüâxaru âêxgacü rû wüxi ga norü churaragüerucax naca rû ñanagürü nüxû: —iPaxa nua penaga ya yimá Irá nane ya Micaía! —ñanagürü. <sup>10</sup>Rû nüma ga guma Iraéanecüâxaru âêxgacü ga Acáx, rû Yudáanearü âêxgacü ga Yochapá rû meama ningaxê ga norü âêxgacüchirumaxâ rû yexma ñane ga Chamáriaarü îxûtagu ínatoxû norü tohíçaxügu. Rû guxüma ga yema tupananaarü orearü uruügü rû âêxgacüpexewa nüxû nixu ga yema ore

ga naãxêwa íngugũxũ. <sup>11</sup>Rũ wũxi ga orearũ uruxũ ga Chedequía ga Quenána nane rũ nanaxũ ga ñuxre ga wocachatacũxrechicũnaçã ga fiérunaxçax. Rũ ñuxũchi tagaxãcũ ñanagũrũ: —Rũ ngẽma ñanagũrũ ya Cori ya Tupana: “Rũ ñaa wocachatacũxregũmaxã tá nixĩ i cunadaĩxũ i ngẽma Chíríaanecũãxgũ ñuxmatáta cunaguxẽẽx” —ñanagũrũ. <sup>12</sup>Rũ guxũma ga yema orearũ uruũgũ yemaxũtama nixugũe namaxã ga yema ãẽxgacũgũ. Rũ ñanagũrũgũ nũxũ: —iËcũ naxçax ípeyaxũãchi ya yima ñane ya Ramú ya Garaáxanewa ngexmane! Rũ tá nũxũ perũporamae, erũ nüma ya Cori ya Tupana rũ marũ cumẽxgu nananguxẽẽ, Pa ãẽxgacũx —ñanagũrũgũ. <sup>13</sup>Rũ yoxni ga yema churara ga Micaíaçax yacãxũ rũ ñanagũrũ nũxũ: —Guxũma i ngẽma togũ i orearũ uruũgũ rũ wũxigu ãẽxgacũmaxã nũxũ nixugũe nax nüma tá yixĩxũ i naporamaexũ ya yima ñanearũ puwa. Rũ ngẽmacãx rũ cuxũ chacãxũ nax cuma rũ ta ngẽxgumarũxũ ãẽxgacũmaxã nũxũ quixuxũ nax nüma tá yixĩxũ i naporamaexũ ya yima ñanearũ puwa —ñanagũrũ. <sup>14</sup>Rũ nüma ga Micaía nanangãxũ rũ ñanagũrũ: —Tupanaégagu cumaxã nũxũ chixu rũ ngẽma ore i nüma ya Tupana chomaxã nũxũ yaxuxũxicatátama nixĩ i tá nũxũ chixuxũ —ñanagũrũ. <sup>15</sup>Rũ yemawena rũ nüma ga Micaía rũ ãẽxgacũxũtawaxũ. Rũ nüma ga ãẽxgacũ rũ Micaíana naca rũ ñanagũrũ: —Pa Micaíax ¿marũ namexũ nax naxçax ítayaxũãchixũ ya yima ñane ya Ramú ya Garaáxanewa ngexmane rũ ẽxna tama? —ñanagũrũ. Rũ nüma ga Micaía rũ nanangãxũ rũ ñanagũrũ:

—Marũ name nax naxçax ípeyaxũãchixũ erũ nüma ya Cori ya Tupana rũ marũ pexũ naporaxẽẽxẽ nax pexmẽxgu nanguxẽẽãxũ ya yima ñane —ñanagũrũ. <sup>16</sup>Natũrũ nüma ga ãẽxgacũ rũ Micaíaxũ nangãxũ rũ ñanagũrũ: —Marũ muẽxpũxcũna cumaxã nũxũ chixu rũ ngẽxguma taxacũxũ chomaxã quixuxgu rũ chanaxwãxe i Tupanaégagu aixcũmaxũ chomaxã quixu —ñanagũrũ. <sup>17</sup>Rũ nüma ga Micaía rũ nanangãxũ rũ ñanagũrũ: —Nũxũ chadau i guxũma i Iraéanecũãxgũ i maçpũneanegu woonemarexũ rũ ñoma carnérugũ i ngearũ dauruũãxũrũxũ nax yixĩgũxũ. Rũ nüma ya Cori rũ ñanagũrũ: “Ñaa duũxũgũ rũ nangearũ dauruũãxgũ, rũ ngẽmacãx name nixĩ i wũxichigũ i nüma rũ napataçax nawoegu” —ñanagũrũ. <sup>18</sup>Rũ nüma ga Iraéanecũãxaru ãẽxgacũ rũ ñanagũrũ Yochapãxũ: —Ngẽma nixĩ i cumaxã nũxũ chixuxũ. Rũ ñaa yatũ rũ taguma taxacũrũ mexũxũ chomaxã nixu. Rũ ngẽma nũxũ yaxuxũ rũ chixexũxicatama nixĩ —ñanagũrũ. <sup>19</sup>Rũ nüma ga Micaía rũ nanangãxũ rũ ñanagũrũ: —Chanaxwãxe i curũxĩnũ i ñaa to i norũ ore ya Tupana. Rũ nũxũ chadau ya Tupana ya norũ tochicaxũwa rütocũ, rũ guxũma i daxũcũãx i orearũ ngeruxũ i naxũtagu chigũxũ i norũ tũgũnecũwawa rũ norũ toxoxwecũwawa. <sup>20</sup>Rũ yexguma ga nüma ga Cori ya Tupana rũ ínaca rũ ñanagũrũ: “¿Texé tá tixĩ ya Acáxna ínuxe rũ ngẽmaãcũ naxçax íyagoõchixũcãx ya yima ñane ya Ramú ya Garaáxanewa ngexmane nax ngẽmaãcũ ngẽxma nayuxũcãx?” ñanagũrũ. Rũ ñuxre ga norũ orearũ ngeruũgũ rũ nũxũ nixugũe ga wũxi ga

ĩnũ, rũ togũ ga toraxũxũ ga ĩnũ.

<sup>21</sup>Natũrũ wũxi ga daxũcũãx rũ Cori ya Tupanaxũtawa naxũ, rũ ñanagũrũ: “Choma rũ tá ngẽma chaxũ nax Acáxna chayaxĩnũxũcãx”, ñanagũrũ. Rũ nũma ga Cori ya Tupana rũ nũxna naca nax ñuxãcũ tá yixĩxũ ga nũxna naxĩnũxũ.

<sup>22</sup>Rũ nũma ga yema daxũcũãx rũ Tupanaxũ nangãxũ rũ ñanagũrũ: “Choma rũ tá doramare i ore naãxẽwa changuxẽxẽ i guxũma i ngẽma Acáxaru tupananaetarũ orearũ uruũgũ”, ñanagũrũ. Rũ yexguma ga nũma ga Cori ya Tupana rũ ñanagũrũ nũxũ: “Cuma i nũxũ cucuáxũ nax ngẽma cunaxũxũ” —ñanagũrũ. <sup>23</sup>Rũ yexguma ga Micaía rũ Acáxũ ñanagũrũ: —Ñuxmawaxi nixĩ i nũxũ cucuáxũ nax nũma ya Cori ya Tupana rũ curũ orearũ uruũgũgu naxũãxũ i wũxi i naãxẽ i doramaxã naãxgũwa idexaxũ rũ curũ yuchigaxũ ixugũmarexũ —ñanagũrũ. <sup>24</sup>Rũ yexguma ga Chedequía ga Quenána nane rũ Micaíacãx nixũ rũ nayapechiwe rũ ñanagũrũ nũxũ: —¿Ñuxgu nixĩ i Tupanaãxẽ i choxna yaxũgachixũ nax cumaama yadexaxũcãx? —ñanagũrũ.

<sup>25</sup>Rũ nũma ga Micaía rũ nanangãxũ rũ ñanagũrũ nũxũ: —Ngẽma naxcãx ícucãxaxũarũ ngãxũ rũ tá nũxũ cucuãx i ngẽxguma ĩpatagũgu nuxica ícunacũchigũgu naxchãxwa i ngẽma cuxũ imãxgũchaũxũ —ñanagũrũ. <sup>26</sup>Rũ yexguma ga nũma ga ãẽxgacũ ga Acáx rũ norũ purichíaxũ namu nax Micaíaxũ yayauxgũxũcãx rũ ñanagũrũ: —iPeyayãxux i Micaía rũ daa ĩanearu ãẽxgacũ ya Amóũxũtawa rũ chaune ya Yuáxũtawa penaga! <sup>27</sup>iRũ namaxã nũxũ pixu ya ãẽxgacũ rũ napoxcuã rũ

íxramarexũ i õna rũ dexá nũxna naxãgũ rũ ñuxmatáta mea íchangu nax daiwa ne chaxũxũ! —ñanagũrũ. <sup>28</sup>Rũ yexguma ga nũma ga Micaía rũ nanangãxũ rũ ñanagũrũ: —Ngẽxguma cuma tá maxũãcũ cutãeguxgux, rũ ngẽmawa tá nũxũ cucuãx nax Tupana rũ tama chowa yadexaxũ— ñanagũrũ. <sup>29</sup>Rũ yexguma ga nũma ga Acáx ga Iraéanecũãxaru ãẽxgacũ rũ nũma ga Yochapá ga Yudáanearũ ãẽxgacũ rũ naxcãx inaxĩãchi ga guma ĩane ga Ramú ga Garaáxanewa yexmane. <sup>30</sup>Rũ nũma ga Iraéanecũãxaru ãẽxgacũ rũ Yochapáxũ ñanagũrũ: —Choma rũ tá tomare i naxchirugu chicux i ngẽxguma ichocuxgux nax ngẽma Chíríaanecũãxgũmaxã yigũ idãxũcãx, rũ cuma rũ tá chauxchirugu quicux —ñanagũrũ. Rũ yemaacũ ga Iraéanecũãxaru ãẽxgacũ rũ tomare ga naxchirugu yacũãcũma nixĩ ga nũgũ nadaĩxũ. <sup>31</sup>Natũrũ nũma ga gumá Chíríaanecũãxaru ãẽxgacũ, rũ nũxna naxãga ga yema 32 ga norũ churaragũeru ga cowaru itũgũne ga naweũmaxã icuãxgũxũ, rũ ñanagũrũ: —iTaxũtãma pegũ namaxã pedai ega tama Iraéanecũãxaru ãẽxgacũ yixĩxgu! —ñanagũrũ. <sup>32</sup>Rũ yexguma yema churaragũeru Yochapáxũ daugũgu, rũ naxcãx naxĩ rũ nũxũ ĩnachomaeguãchi nax namaxã nũgũ nadaĩxũcãx yerũ nũma nũxũ nacuãxgũgu rũ guma nixĩ ga Iraéanecũãxaru ãẽxgacũ. Rũ yemacãx ga Yochapá rũ aita naxũ, rũ ngũxẽcãx ĩnaca. <sup>33</sup>Rũ yexguma nũxũ nicuãxãchitanũ nax tama gumá yixĩxũ ga Iraéanecũãxgũaru ãẽxgacũ rũ nũxna nixĩgachimare, rũ marũ tama nawe nangẽgũ. <sup>34</sup>Natũrũ wũxi ga

Chíríaanecüãxaru churara yexma  
 nanamaxmare ga norü würa rü meama  
 Iraéanecüãxaru ãëxgacüçax niña rü norü  
 daixchirucuchitamaxã namexchinü, rü  
 poraãcü nanapix. Rü yemaçax ga nüma  
 ga Acáx rü naweüaru üxëëruüxü namu,  
 rü ñanagürü: —iChomaxã natáegu rü  
 choxü ínamue erü poraãcü chanapix!  
 —ñanagürü. <sup>35</sup>Rü niyexeraguchigü ga  
 yema nügü nax nadajü ga Iraéanecüãx  
 namaxã ga Chíríaanecüãx. Rü nüma ga  
 Iraéanecüãxaru ãëxgacü rü  
 naweüwatama nayexma rü yema  
 naweüaru üxëëruü nüxü narüngüxëë  
 nax inachixüçax. Rü yemaacü  
 Chíríaanecüãxmaxã nügü nadajü. Natürü  
 yexguma marü nayáuanegu rü nayu ga  
 nüma ga guma ãëxgacü ga Acáx. Rü

guma nagü rü naweüxümwawa  
 narüchüxchue. <sup>36-37</sup>Rü yexguma marü  
 yanaxücuçhaügu ga üaxcü rü  
 Iraéanecüãxaru churaragü rü  
 ñanagürügü: —Wüxíxechigü rü tümaaru  
 ñanecax rü tümaaru naanecax tawoegu  
 erü ya ãëxgacü rü marü nayu  
 —ñanagürügü. Rü nüma ga guma  
 ãëxgacü rü ñane ga Chamáriawa  
 nanangegü, rü yexma nayataxgü. <sup>38</sup>Rü  
 yexguma marü inataxgüãguwena, rü  
 nanayauxgü ga guma naweü nawa ga  
 wüxi ga puchu ga Chamáriawa yexmacü  
 rü ngexügü ga chixri maxëxü nawa  
 aiyagüxücü. Rü ga airügü rü nanadexegü  
 ga guma Acáxgü yema Cori ya Tupana  
 nüxü ixuxürüxü.  
 .....



## 2 REYES

### (Norü taxre i popera i ãẽxgacügüchiga)

.....

#### Tupana nayaga ga Ería

**2**<sup>1</sup>Rü yexguma nawa nanguxchaũgu nax daxüguxũ ga naanewa Eríaxũ nagaxũ ga Cori ya Tupana nagu ga wüxi ga buanecü ga íxãũxëmácü, rü nüma ga Ería rü norü ngũxëëruxũ ga Erichéu rü ñane ga Yirigáwa ínachoxũ. <sup>2</sup>Rü nüma ga Ería rü Erichéuxũ ñanagürü: —iNuxã rüxãũx! erü Cori ya Tupana rü Betélwa choxũ namu —ñanagürü. Natürü nüma ga Erichéu rü nanangãxũ rü ñanagürü: —Cori ya Tupanaégagu rü cuégagu cumaxã nüxũ chixu rü tagutáma cuxũ changemücücüxë —ñanagürü. Rü yemacax wüxigu nügümaxã Betélwa naxĩ. <sup>3</sup>Natürü yema ngextüxcügü ga Betélwa Tupanaarü orearü uruũcax ngüexũ rü Erichéucax nibuxmü. Rü nüxna nacagüe rü ñanagürügü: —¿Nüxũ cucuáxũ rü ñuxma tá nixĩ ya Tupana i cuxna yagaaxũ ya Ería? —ñanagürügü. Rü nüma ga Erichéu rü nanangãxũ rü ñanagürü nüxũ: —Ngëmáacü marü nüxũ chacuax. Natürü tama chanaxwaxe i nüxũ pixu —ñanagürü. <sup>4</sup>Rü yemawena rü nüma ga Ería rü

Erichéuxũ ñanagürü: —iËcü nuxã rüxãũx! erü Cori ya Tupana rü Yericúwa choxũ namu —ñanagürü. Natürü nüma ga Erichéu rü nanangãxũ rü ñanagürü: —Cori ya Tupanaégagu rü cuégagu cumaxã nüxũ chixu rü tagutáma cuxũ changemücücüxë —ñanagürü. Rü yemacax wüxigu nügümaxã Yericúwa naxĩ. <sup>5</sup>Natürü yema ngextüxcügü ga Yericúwa Tupanaarü orearü uruũcax ngüexũ rü Erichéucax nibuxmü. Rü nüxna nacagüe rü ñanagürügü nüxũ: —¿Nüxũ cucuáxũ rü ñuxma tá nixĩ ya Cori ya Tupana i cuxna yagaaxũ ya yimá curü ngüxëëruxũ ya Ería? —ñanagürügü. Rü nüma ga Erichéu rü nanangãxũ rü ñanagürü: —Ngëmáacüx, marü nüxũ chacuax. Natürü tama chanaxwaxe i nüxũ pixu —ñanagürü. <sup>6</sup>Rü yexguma ga nüma ga Ería rü Erichéuxũ ñanagürü: —iËcü nuxã rüxãũx! Erü Cori ya Tupana rü natü i Yudáũwa choxũ namu —ñanagürü. Natürü nüma ga Erichéu rü nanangãxũ rü ñanagürü: —Cori ya Tupanaégagu rü cuégagu cumaxã nüxũ chixu rü tagutáma cuxũ changemücücüxë —ñanagürü. Rü yemacax wüxigu yema

natiwa naxí. <sup>7</sup>Natürü 50 ga yema ngextüxücügü ga orearü uruügü rü nawe narüxi. Rü yexguma Yudáücutüwa nangugügu, rü Eríaarü yáxüwaxüra nayachaxächitanü. Rü nüma ga Ería rü Erichéu rü natü ga Yudáücutügu nayachigü. <sup>8</sup>Rü yexguma nüma ga Ería rü nanayaxu ga naxchiru ga mámüxü rü nanadixcumü rü yemamaxá dexächiüwa nanacuáixca. Rü ga dexá rü niyauyxexüchiüächi. Rü nüma ga yema taxre rü yéma nügümaxá nichüü pachitamaxüwa. <sup>9</sup>Rü yexguma marü Yudáüiarü tocütüwa nangugügu, rü nüma ga Ería rü Erichéuxü ñanagürü: —iChomaxá nüxü ixu rü taxacü cunaxwaxe nax cuxcax chaxüxü naxüpa nax Tupana cuxna choxü igaxü! —ñanagürü. Rü nüma ga Erichéu rü nanangäxü rü ñanagürü: —Ngëma Tupanaarü pora i cuxü ngëxmaxü rü chanaxwaxe i taxrexpüxcüna ngëmaarü yexera choxna cunaxá —ñanagürü. <sup>10</sup>Rü yexguma nüma ga Ería rü nanangäxü rü ñanagürü: —Tama wüxi i tauxchaxü nixí i ngëma naxcax ícucaxaxü. Natürü ngëxguma choxü cudauamagu i ngëxguma Tupana choxü igaxgu, rü tá cunayaxu i ngëma naxcax ícucaxaxü. Natürü ngëxguma tama choxü cudauxgu i ngëxguma Tupana choxü igaxgu rü taxütáma cunayaxu —ñanagürü. <sup>11</sup>Rü yemaacü yadexatanüyane ga nax inaxixü rü ngürüächi naxcax nangox ga wüxi ga naweü ga iyáuxracüxüne ga cowaru ga iyáuxratanüxü itügüne, rü yema taxretanügu nayangaxi. Rü guma nixí ga Eríaxü igaxüne ga dauxügüxü ga naanewa nagu ga wüxi ga buanecü ga

íxäüxëmacü. <sup>12</sup>Rü yemaxü nadáuxgu ga Erichéu rü tagaäcü aita naxü rü ñanagürü: —Pa Chaunatüx, Pa Chaunatüx, cuma rü Iraéanecüáxgücax rü ñoma wüxi i churaraticumü i poraxüchixürüxü quixí —ñanagürü. Rü yema ñaxguwena rü marü tama Eríaxü nadau. Rü yexguma nüma ga Erichéu rü norü ngechaxümaxá nügü narügáutechiru.

#### **Eríachicüxü inarüxäux ga Erichéu**

<sup>13</sup>Rü yemawena rü nüma ga Erichéu rü nanayaxu ga Eríachiru ga yéma nguxü. Rü natü ga Yudáücax natáegu, rü yemacutügu nayachi. <sup>14</sup>Rü ñüxüchi yema Eríachirumaxá dexächiüwa nanacuáixca, rü tagaäcü ñanagürü: —¿Ngexcü yixixü ya Cori ya Eríaarü Tupana ixícü? —ñanagürü. Rü yexguma yema ñaxgu rü dexächiüwa nanacuáixca rü niyauyxexüchixü ga dexá. Rü nüma ga Erichéu rü wenaxarü nixüe nawa ga yema natü. <sup>15</sup>Rü yexguma yema orearü uruügü ga Yericücüáxgü nüxü daugügu ga yema ngupetüxü, rü tagaäcü ñanagürügu: —Ngëma Naäxë i Üünexü i Eríawa ngëxmaxü rü Erichéuwa naxüe —ñanagürügu. Rü ñüxüchi naxcax naxí rü napexegu nayangücuchitanü. <sup>16</sup>Rü ñanagürügu nüxü: —Toma nax curü duüxügü tixigüxü rü nua totanüwa nangexmagü i 50 i totanüxü i poraexü. iRü ngëma ngëma namugü nax curü nguxëeruxü ya Eríacax yadaugüxü! Erü ngürüächi i ngëma Tupanaäxë i Üünexü rü maxpúnewa rüexna ngatewa nayatax —ñanagürügu. Natürü nüma ga Erichéu rü nanangäxü rü ñanagürü: —Tama chanaxwaxe i texéxü ngëma pemugü

—ñanagürü. <sup>17</sup>Natürü ga nümagü rü poraäcü nanachixewegü, rü düxwa nüxü inaxĩnü nax yéma namugüaxüçax ga yema 50 ga yatügü nax Eríaçax yadaugüxüçax. Rü tomaepüx ga ngunexü naxçax nayadaugü, natürü taguma nüxü inayangaugü. <sup>18</sup>Rü yemacax wenaxarü Yericüçax nawoegu ga Erichéu íyexmaxüwa. Rü nüma rü ñanagürü nüxü: —Marü pemaxâ nüxü chixu nax tama yéma pexixüçax —ñanagürü.

.....

#### Chíxüwa taxü ga mexü naxü ga Tupana

**4** <sup>1</sup>Rü iyexma ga wüxi ga nge ga orearü uruxü naxmax, rü ngíma ga yema nge rü Erichéuxütawa ixü rü yéma nüxü iyarüxu rü ngígürügü: —Chaute rü marü nayu rü cuma rü nüxü cucuax ga nüma rü aixcüma Tupanaxü nax nangechaüxü. Natürü i ñuxmax i ngéma duüxü ga diëru naxütawa ngixü nayaxuxü ga chaute, rü chauxütawa naxü nax nüxü chanaxütanüxüçax. Rü ngëmacax tüxü nigagüchaü ya yíxema taxre ya chaune norü puracütanüxüruxü —ngígürügü. <sup>2</sup>Rü yexguma nüma ga Erichéu rü ñanagürü: —¿Taxacü i cunaxwaxexü nax cuxçax chaxüxü? iChomaxâ nüxü ixu rü taxacü nixí i cuxü ngëxmaxü i cupatawa! —ñanagürü. Rü ngíma rü inangäxü rü ngígürügü: —Choma i curü ngüxëeruxü rü choxü nataxuma i taxacü i chopatawa. Rü wüxi i íxraxü i pochíyuäcu i chíxüxícatama choxü nangexma —ngígürügü. <sup>3</sup>Rü yexguma nüma ga Erichéu rü ngixü nangäxü rü ñanagürü: —iËcü curü ngaicamagu

pegüxü i duüxügütanüwa naxü rü naxçax ínaca i guxüma i norü butíyagü i ngeäcuxü, rü cugüpatawa nana! <sup>4</sup>iRü ñuxüchi ngëxma cuchiügu naxücu namaxâ i ngéma cunegü, rü nawäxta i curü íax! iRü chíxümaxâ yaxüäcu ya yima butíyagü! iRü yima marü napagücü rü nüxriüguma nanu!

—ñanagürü. <sup>5</sup>Rü ngíma ga yema nge rü inaxü ga yema Erichéu ngímaxâ nüxü ixuxü. Rü nüma ga ngínegü rü yéma ngixütawa nanana ga guma butíyagü, rü ngíma rü chíxümaxâ yaxüäcu. <sup>6</sup>Rü yexguma marü ngixü yaxäacuxgux ga guxcüma ga guma butíyagü rü wüxi ga ngíxexü ngígürügü: —iNai ya butíya nua penange! —ngígürügü. Rü nüma ga ngíne rü ngixü nangäxü rü ñanagürü: —Marü nataxuma —ñanagürü. Rü yexguma ga yema chíxü ga yéma ibaibexü rü ínayachaxächi. <sup>7</sup>Rü ngíma rü ñuxüchi guma orearü uruxü ga Erichéuxütawa ixü rü namaxâ nüxü iyarüxu. Rü nüma rü ñanagürü ngixü: —iËcü ñuxma rü namaxâ nataxe i ngéma chíxü rü ngëmatanümaxâ naxütanü i ngéma coriaxü cungetanüxü! Rü ngéma íyaxücü i diërumaxâ tá nixí i pemaxëxü namaxâ ya cunegü —ñanagürü.

#### Erichéuchiga rü nge ga Chúnecüäxchiga

<sup>8</sup>Rü wüxi ga ngunexügu rü íane ga Chúnewa naxüpetü ga Erichéu. Rü yéma iyexma ga wüxi ga nge ga guma íanegu ächiücü rü mexü ga ngíchiga ngixü yexmacü. Rü nüxna ixu ga ngíchiüwa nax nachibüxüçax. Rü guxüguma ga yexguma yéma naxüpetüüxügu ga Erichéu, rü yexma ngixütagu ínidauuxü

rü yéma nachibüaxü. <sup>9</sup>Rü ngîma rü ngîgürügü ngîtemaxâ: —Rü choma nüxü chacuax i ñaa yatü i nuxâ taxütägu ídauuxü rü wüxi i Tupanaarü orearü uruxü nixî. <sup>10</sup>Rü ngêmacax ingîxâ tapataarü daxüwa naxcax tanaxü i wüxi i ucapu! Rü wüxi i pechicaxü ngêxma taxü, rü wüxi i mecha, rü wüxi i toruxü, rü wüxi i omü nax ngêxma napexücax ega nua taxütawa naxüxügu —ngîgürügü. <sup>11-12</sup>Rü wüxi ga ngunexü rü nüma ga Erichéu rü yema ucapu ga naxcax naxügüxüwa nangu nax yexma napexücax. Rü norü ngüxêruxü ga Yiéchi rü ñanagürü: —iNgîcax naca i ngêma chiüra i daa îpataarü yora! rü ngîmaxâ chidexachaü —ñanagürü. Rü nüma ga guma norü ngüxêruxü rü ngîcax naca. Rü ngîma ga yema nge rü Erichéuxütawa ixü. Rü nüma ga Erichéu rü norü ngüxêruxü ga Yiéchiü namu rü ñanagürü: <sup>13</sup>—iNgîmaxâ nüxü ixu i ngêma chiüra rü poraacü namaxâ tataaxêgü i ngîrü ngüxê! iRü ngîxna naca rü taxacü nanaxwaxexü nax ngîcax naxüxü! Rü bexmana inaxwaxe nax ngîxétüwa idexagüxü i âëxgacüpexewa rüxna churaragüarü âëxgacüpexewa —ñanagürü. Rü yexguma ga ngîma rü inangäxü rü ngîgürügü: —Taxuxüma chanaxwaxe erü nua chautanüxügütanüwa rü poraacü chataaxêxüchi —ngîgürügü. <sup>14</sup>Rü yexguma nüma ga Erichéu rü Yiéchina naca rü ñanagürü: —¿Cuxcax rü taxacü i mexü nax ngîcax naxüxü? —ñanagürü. Rü nüma ga Yiéchi rü nanangäxü rü ñanagürü: —Ngîma rü ingexacü rü ñuxüchi yimá ngîte rü marü naya

—ñanagürü. <sup>15</sup>Rü yexguma nüma ga Erichéu rü ñanagürü nüxü: —iËcü ngîcax naca rü nua naxü! —ñanagürü. Rü yexguma ga Yiéchi rü ngîcax nayaca, rü ngîma rü yéma ixü natürü îaxgutama iyachiächi. <sup>16</sup>Rü yexguma nüma ga Erichéu rü ñanagürü ngîxü: —Yima nai ya taunecüarü ñuxgumaäcü rü tá marü cunaga ya wüxi ya cune —ñanagürü. Rü ngîma rü inangäxü rü ngîgürügü: —Pa Tupanaarü Duüxüx, rü tama name i ngêmaäcü choxü cuwomüxêxê —ngîgürügü. <sup>17</sup>Natürü yema Erichéu ngîmaxâ nüxü ixuxürüütama ningu. Rü ixäxacü, rü guma nai ga taunecügu rü nabu ga guma ngîne. <sup>18</sup>Rü nüma ga guma bucü rü niyachigü. Natürü wüxi ga ngunexügu rü nanatüxü ínayadau ga trîgu íbuxgüxütanüwa yexmaxe. <sup>19</sup>Rü nüma ga guma bucü rü inanaxügü ga aita nax naxüxü, rü ñanagürü: —Poraäcü changuxchametüxüchi —ñanagürü. Rü yexguma ga nanatü rü wüxi ga tümaarü duüxücax taca rü ñanagürü: —iYéa naéxütawa naga! —ñanagürü. <sup>20</sup>Rü nüma ga yema tümaarü duüxü rü naéxütawa nanaga. Rü ngîma rü inaganagü rü ngîgüperemawa inatoxêxê ñuxmata tocuchiwa nangu. Rü yexgumatama nayu ga guma bucü. <sup>21</sup>Natürü ngîma ga naé rü yema ucapu ga Erichéu nagu pexügu iyaxü nagu ga yema norü pechicaxü ga nagu napexü. Rü fixüxü rü inawäxta ga yema îax. <sup>22</sup>Rü yemawena ngîtecax yéma imuga rü ngîgürügü: —iNua namu i wüxi i tóru duüxü namaxâ i wüxi i búru nax naxütawa chaxüxücax ya yimá Tupanaarü orearü

uruxũ! Rũ ñuxuchi tá chatáegu  
—ngĩgürügü.

.....

<sup>27</sup>Rũ maḡpúne ga Carméruwa ingu ga  
Erichéu íyexmaxúwa. Rũ yexguma  
naxútawa nanguxgu, rũ nacutuwa  
inaixáchi. Rũ guma Erichéuarũ  
ngũxêēruxũ ga Yíechi rũ ngĩcax nixũ  
nax ngĩxũ yagagachixũcax. Natürũ nüma  
ga Erichéu rũ ñanagürũ nüxũ:

—Nüétama erũ ngĩma rũ poraãcü  
ngechaũ ngĩxũ nangux, natürũ nüma ya  
Cori ya Tupana rũ tauta chomaxã nüxũ  
nixu nax taxacũ ngĩxũ ngupetũxũ  
—ñanagürũ. <sup>28</sup>Rũ yexguma ga ngĩma rũ  
ngĩgürügü: —Pa Corix, rũ cumatama nixĩ  
ga chomaxã nüxũ quixuxũ rũ tá nax  
chaxãxacũxũ, rũ tama choma cuxna  
naxcax chaca ga yema. Natürũ ga  
yexguma rũ cumaxã nüxũ chixu nax  
tama choxũ cuwomũxêxũ írũ ñuxãcü i  
ñuxma i marũ nayuxũ ya chaune?  
—ngĩgürügü. <sup>29</sup>Rũ yexguma ga Erichéu  
rũ Yíechixũ ñanagürũ: —iPaxa cugũ  
namexêxê rũ nayaxu ya yima chorũ  
caxüruxũ rũ paxa ngéma ngĩpatawa  
naxũ! Rũ ngêxguma texéxũ namagu  
cungauxgu irũ taxútama nüxũ curümoxê!  
Rũ ngêxguma texé namawa cuxũ  
rümoxêgu irũ taxútama cunangãxũ! Rũ  
ngêxguma ngĩpatawa cunguxgu irũ yima  
bucüchametügu naxũ ya yima chorũ  
caxüruxũ! —ñanagürũ. <sup>30</sup>Natürũ ga  
ngĩma ga naé ga guma bucü rũ  
Erichéuxũ ngĩgürügü: —Cori ya  
Tupanaégagu rũ cuégagutama cumaxã  
nüxũ chixu rũ taxútama chatáegu ega  
tama cumaxã yixĩgu —ngĩgürügü. Rũ  
yexguma ga nüma ga Erichéu rũ ngĩwe  
narũxũ. <sup>31</sup>Rũ nüma ga Yíechi rũ yoxni

napexegu nixũ. Rũ yexguma ngĩpatawa  
nanguxgu, rũ guma caxüruxũ rũ guma  
bucüchametügu nanaxũ, natürũ  
taxuxũma nangupetũ nax wena  
namaxũxũcax. Rũ yemacax ga nüma ga  
Yíechi rũ Erichéucax natáegu, rũ namagu  
nüxũ nangau. Rũ ñanagürũ nüxũ:  
—Yimá bucü rũ tama naxcax natáegu i  
norũ maxũ —ñanagürũ. <sup>32</sup>Rũ yexguma  
Erichéu yéma ngxuggu, rũ guma ípatagu  
naxücu. Rũ yexma nüxũ nayangau ga  
guma bucü ga marũ yucü ga norũ  
pechicáétügu úcü. <sup>33</sup>Rũ yema ucapugu  
naxücu ga Erichéu, rũ nanawãxta ga ñãx,  
rũ inanaxügü nax Cori ya Tupanamaxã  
yadexaxũ. Rũ guma bucümaxã  
nüxicatama yéma nayexma. <sup>34</sup>Rũ  
yemawena rũ yema pechicaxũgu  
nañunagü naétü ga guma bucü. Rũ guma  
bucüaxgu nañaxũ, rũ naxetügu naxüxetü,  
rũ naxmexétügu naxũxmex. Rũ guma  
bucüétügu niñu. Rũ yexguma ga naxũne  
ga guma bucü rũ ngürũ nanai. <sup>35</sup>Rũ  
yexguma ga nüma ga Erichéu rũ ínarüda,  
rũ yema ucapugu narũxũxũ. Rũ  
yemawena rũ wenaxarũ noxrirüütama  
guma bucüétü nañunagü. Rũ ngürüãchi  
ga guma bucü rũ nangaixchu 7  
expüxcüna, rũ nidauuchi. <sup>36</sup>Rũ yexguma  
ga nüma ga Erichéu rũ Yíechicax naca rũ  
ñanagürũ nüxũ: —iNgĩcax naca i naé ya  
daa bucü! —ñanagürũ. Rũ nüma ga  
Yíechi rũ ngĩcax naca. Rũ yexguma  
Erichéu íyexmaxúwa nanguxgu, rũ nüma  
rũ ñanagürũ ngĩxũ: —Daa nixĩ ya cune  
—ñanagürũ. <sup>37</sup>Rũ ngĩma rũ naxcax iyaxũ  
rũ Erichéupexegu inangücuchi. Rũ  
yemawena iyaga ga guma ngĩne rũ  
íixũxũ nawa ga yema ucapu.  
.....

**Naamáũ rü naxçax nitaane  
ga norü chaxünewa**

**5** <sup>1</sup>Nayexma ga wüxi ga yatü ga Chíríaanecüâx ga Naamáũgu äégacü. Rü nüma rü Chíríaanearü äëxgacüarü churaragüeru nixĩ. Rü norü äëxgacü rü poraäcü nüxü nangechaũ rü nüxü narüngüxëxë yerü muëxpüxcüna rü norü churaragümaxã norü uanügüxü narüporamae. Natürü nüma ga yema yatü rü chaxünemaxã nidaçawe. <sup>2</sup>Rü nüma ga Chíríaanecüâxgü rü muëxpüxcüna Iraéanecüâxgücax ínayaxüächi. Rü guxema tüxü ínayauxüetanüwa rü iyexma ga wüxi ga pacü ga Iraéanecüâx ga Naamáũ napatawa ngixü gacü nax naxmaxütaxü yixixüçax. <sup>3</sup>Rü wüxi ga ngunexügu ga yema pacü rü ngürü chiüraxü ngügürügü: —Chierü nax namexü ya yimá chorü cori ega naxütawa naxüxgu ya yimá orearü uruxü ya Chamáriaanewa ngëxmacü, rü ngëxguma rü chi naxçax nitaane i norü chaxünewa —ngügürügü. <sup>4</sup>Rü nüma ga Naamáũ rü norü äëxgacümaxã nüxü nixu ga yema ore ga yema pacü nüxü ixuxü. <sup>5</sup>Rü nüma ga guma Chíríaanearü äëxgacü rü nanangãxü rü ñanagürü: —iËcü ngéma naxü! Rü choma rü tá cuxna chanaxã i wüxi i popera naxçax ya Iraéanecüâxgüarü äëxgacü nax cuxü nacuáxüçax —ñanagürü. Rü yexguma nüma ga Naamáũ rü inaxüächi. Rü yéma nanana ga 6,000 tachinü ga diëru ga úirunaxçax rü 30,000 tachinü ga diërumünaxçax rü 10 ga naxchiru. <sup>6</sup>Rü yema popera ga yéma namuxü naxçax ga Iraéanecüâxgüarü äëxgacü, rü

ñanagürü: “Yimá yatü ya ngéma nangecü i ñaa popera rü chorü duüxü ya Naamáũ nixĩ. Rü chanaxwaxe nax naxçax cuyataanexëëxü nawa i norü chaxüne”, ñanagürü. <sup>7</sup>Rü yexguma yema poperaxü nadaumatügu ga guma Iraéanecüâxgüarü äëxgacü, rü nügu narügáutechiru rü ñanagürü: —Ëxna nüma nüxü nacuáxgu rü choma chixĩ ya Tupana i maxü nüxna chaxãxü rü nüxna chanayaxuxü, rü ngëmacax nua chaüçax namuaxü i ñaa yatü nax naxçax chayataanexëëxüçax i norü chaxünewa? Rü ñuxma i nüma rü ngëmagu nügu nicüxmare nax ñuxäcü wena tá taxçax íyaxüächixü —ñanagürü. <sup>8</sup>Natürü yexguma guma orearü uruxü ga Erichéu nüxü cuáchigagu ga yema nügu nax nagáutechiruxü ga guma äëxgacü nagagu ga yema popera ga nayaxuxü, rü naxçax yéma namuga rü ñanagürü: —ËTüxcüü i cugü curügáutechiruxü? iRü êcü nua namu i ngéma yatü nax nua choxü íyadauxüçax! Rü tá naxçax nitaane nax ngëmawa nüxü nacuáxüçax rü nua Iraéanewa nax nangexmaxü i Tupanaarü orearü uruxü —ñanagürü. <sup>9</sup>Rü nüma ga Naamáũ rü yéma naxü nagu ga norü cáru ga cowarugü itüxüne, rü Erichéuarü íãxpatawa nayachaxãchi. <sup>10</sup>Natürü nüma ga Erichéu rü Naamáũxütawa nanamu ga wüxi ga norü ngüxëëru xü nax namaxã nüxü yanaxuxüçax ga yema Erichéuarü ore. Rü nüma ga yema duüxü rü ñanagürü Naamáũxü: —iËcü 7 expüxcüna natü i Yudáüwa cugü nayaxune! Rü ngëmaäcü tá cuxçax nitaane nax curüchaxünexü —ñanagürü. <sup>11</sup>Rü nüma ga Naamáũ rü

nanu rü ñiña rü ñanagürü: —Choma nagu charüxĩnũgu rü chi chauxcax ñnaxũxũ rü ngẽmaacũ mea choxũ nayaxu rü ngẽma nachiacũma chi Cori ya Tupanana naca rü nagu ningõgũ i ngẽma ícharüchaxünexũwa rü ngẽmaacũ chi chauxcax nitaane nawa i chorü chaxũne. <sup>12</sup>¿Rü tama ẽxna i ngẽma natügũ i Abána rü Fáfa i Damácuanewa ngẽmagüxũ rü guxũ i togũ i natũ i Iraéanewa ngẽmagüxũarũ yexera namexechixũ? Rü ngẽmacax rü taxucürüwama ngẽma chaxũ nax ngẽma natũwa chaugũ chayayaxuxũcax rü charümexũcax —ñanagürü. Rü yemaacũ poraacũ nanu rü natáegu. <sup>13</sup>Natürü ga norü duũxũgũ rü naxcax naxĩ rü ñanagürügũ nüxũ: —Pa Corix, ngẽxguma chi yimá orearũ uruxũ rü taxacürü guxchaxũ cuxũ naxüxẽẽgu rü ngẽxguma rü chi cunaxũ. Natürü i ñuxma nax natauxchaxũ i ngẽma cumaxã nüxũ yaxuxũ rü yexera name nixĩ i naga cuxĩnũ. iRü cugũ nayaxunemare nawa i ngẽma natũ nax ngẽmaacũ cuxcax yataanexũcax! —ñanagürügũ. <sup>14</sup>Rü yexguma ga nüma ga Naamáũ rü nawa naxũ ga yema natũ ga Yudáũ. Rü 7 expũxcũna nawa naxũe rü nügũ nayaxune yema orearũ uruxũ namaxã nüxũ ixuxũrixũ. Rü yexguma ga naxchaxmũxũ rü narũme rü wüxi ga buxechaxmũxũrixũ nixĩ. <sup>15</sup>Rü yexguma ga nüma ga Naamáũ rü guxũma ga yema namücügũ rü Erichéuxũtawa naxĩ. Rü yexguma Erichéuxũtawa nangugũgu, rü nüma ga Naamáũ rü ñanagürü nüxũ: —Ñuxmawaxi nixĩ i aixcũma chayaxõxũ rü guxũwama i ñoma i naanewa rü nataxuma i to i Tupana, rü yimá

Iraéanecüãxgiarũ Tupanaxicatama nixĩ ya aixcũma Tupana ixĩcü. Rü ngẽmacax cuxũ chachixewe nax choxũ cunayaxuxũ i ñaa wüxi i ãmare i cuxna chaxãchaxũxũ —ñanagürü. <sup>16</sup>Natürü nüma ga Erichéu rü nanangãxũ rü ñanagürü: —Chorü Tupanaégagu cumaxã nüxũ chixu rü taxütãma cuxũ chanayaxu i ngẽma ãmare —ñanagürü. Rü nüma ga Naamáũ rü namaxã nayachixewechigũama nax nüxũ nayauxãxũcax. Natürü ga nüma ga Erichéu rü tama nanayaxu. <sup>17</sup>Rü yexguma ga nüma ga Naamáũ rü ñanagürü: —Ëcü, ngẽxguma ngẽmaacũ yixĩgu irü nua choxũ yangexẽxẽ i taxre i cowa ruwetaãcu naguxũ i waixũmũ! Erü ñuxmaũcũxũ rü marũ taxütãma togũmare i tupanacax chayamaç rü chayagu i naxũnagũ, rü Cori ya Tupanacaxicatama tá nixĩ ichanaxixũ i ngẽma. <sup>18</sup>Natürü ngẽxguma yimá chorü ãẽxgacũ norü tupana i Dimúũpatagu naxücxgu rü chauxchacũxũ yangĩacũma napexegu chomaxã nacaxãpũxũgu, rü chanaxwaxe ya Tupana rü choxũ nüxũ inarüngũma i ngẽma —ñanagürü. <sup>19</sup>Rü yexguma ga Erichéu rü nanangãxũ rü ñanagürü: —iËcü, taãxẽacũ natáegu! —ñanagürü. Rü nüma ga Naamáũ rü natáegu. <sup>20</sup>Rü yexguma marũ yãxũwaxũra nanguxgu, rü guma Erichéuarũ ngũxẽeruxũ ga Yiéchi rü ñaxũgu narũxinũ: “Yimá chorü cori rü taxuxũma Naamáũ ya Chíríaanecüãxna nayaxu i ngẽma ngẽmaxũgũ i nua naxcax nanaxũ. Rü ngẽmacax i ñuxma rü tá nawe changẽ nax nüxna chayacaxũcax”, ñaxũgu narũxinũ. <sup>21</sup>Rü nüma ga Yiéchi rü

Naamáũwe nangẽ. Rũ yexguma Naamáũ nüxũ d̄axgu nax nawe nangẽxũ rũ ínayachaxáchi rũ ínachie nawa ga norũ cáru. Rũ Yiéchiçax nixũ rũ nüxna naca: —¿Taxacürũ chixexũ nangupetũ? —ñanagürũ. <sup>22</sup>Rũ yexguma nüma ga Yiéchi rũ Naamáũxũ ñanagürũ: —Taxuxĩma nangupetũchirex. Natürũ yimá chorũ cori rũ cuwe choxũ narĩmu nax cumaxã nüxũ chayarũxuxũçax rũ ngexwacaxtama ngẽma nangugũ i taxre i orearũ uruũgũ i ngextũxũ i Efraíarũ maçpũneanewa ne íxũ. Rũ ngẽmaçax i nüma ya chorũ cori rũ nua cuxçax namuga nax nüxna cunaxãxũçax i 3,000 tachinũ i diẽru rũ taxremũ i naxchiru —ñanagürũ. <sup>23</sup>Rũ nüma ga Naamáũ rũ nanangãxũ rũ ñanagürũ: —iËcü, yange i 6,000 tachinũ naguxũ i diẽru! —ñanagürũ. Rũ nüma ga Naamáũ rũ yexeraxũ ga diẽru nüxna naxãama. Rũ taxre ga chocagu ngĩxũ nanucu wũxigu namaxã ga yema taxremũ ga naxchiru. Rũ taxre ga norũ duũxũgũna nanana nax Yiéchipatawa nangegũaxũçax. <sup>24</sup>Rũ yexguma guma maçpũne ga Erichéu nagu áchiũnewa nangugũgu, rũ nüma ga Yiéchi rũ Naamáũarũ duũxũgũna nanayaxu ga yema diẽru, rũ ñuxmachĩ nanamuegutaniũ. Rũ yemawena rũ ípatagu nayacũxgũ ga yema diẽru. <sup>25</sup>Rũ nüma ga Yiéchi rũ ñuxũchi norũ corixũtawa naxũ. Rũ nüma ga Erichéu rũ nüxna naca rũ ñanagürũ: —¿Ngextã ne cuxũ Pa Yiéchix? —ñanagürũ. Rũ nüma ga Yiéchi nanangãxũga rũ ñanagürũ: —Taxuwama nixĩ ne chaxũxũ —ñanagürũ. <sup>26</sup>Natürũ nüma ga Erichéu rũ nüxna nicachigũama rũ ñanagürũ: —¿Tama ėxna nüxũ cucuax i ngẽxguma

Naamáũ naweũwa cuxçax íxũegu rũ Tupana rũ choxũ nüxũ nacuaçẽxẽ i ngẽma? Natürũ ñuxma nax Tupanaarũ poramaxã yixĩxũ i naxçax yataanaxũ i ngẽma yatũ, rũ ngẽmaçax tama name nax naxũtawa naxçax íçaxũ i naxchiru, rũ nayauxtanũxũ nax naxçax itaxexũçax i naanegũ, rũ úbanecũgũ, rũ carnérugũ, rũ wocagũ, rũ puracũtanũxũgũ i yatũxũgũ rũ ngexũgũ. <sup>27</sup>Rũ ngẽmaçax i ñuxma i ngẽma Naamáũarũ chaxũne rũ tá cuxna naxũe rũ nüxna naxũe i cuxacũgũ rũ cutaagũ. Rũ ngẽmaãcü tá nixĩ i guxũgũtãma —ñanagürũ. Rũ yexguma nüma ga Yiéchi rũ Erichéuna yaxũgachigu rũ nüxna naxũe ga chaxũne, rũ nanacómũáchi ga naxchaxmũxũ.

.....

#### Erichéu rũ Chíríaanecũãxgũchiga

**6** <sup>8</sup>Rũ nüma ga Chíríaanecũãxarũ ãẽxgacũ rũ Iraéanecũãxgũmaxã nügũ nadaixchaũ. Rũ yemaçax namaxã nangutaquexe ga norũ churaragũeru rũ namaxã nüxũ nixu nax taxacürũ nachicawa tá nagagũaxũ ga norũ churaragũ. <sup>9</sup>Natürũ Tupana rũ Erichéuxũ nüxũ nacuaçẽxẽ ga yema Chíríaanecũãxarũ ãẽxgacũarũ ínũ. Rũ yemaçax ga Erichéu rũ Iraéanecũãxgũarũ ãẽxgacũxũtawa namuga nax tama yema nachicawa naxĩxũçax yerũ yema Chíríaanecũãxgũ rũ yexma ínayacũxẽgũchaũ. <sup>10</sup>Rũ nüma ga Iraéanecũãxarũ ãẽxgacũ rũ yéma nanamugũ ga norũ ngugũtaeruũgũ nax nüxũ nacuaçũçax rũ aixcũma yixĩxũ ga yema Erichéu nüxũ ixuxũ. Rũ aixcũma nixĩ ga yema, rũ



yemaaci muɛxpũxcũna tama yema  
 Chíríaanecũãxgũmɛxɛgu nayi ga  
 Iraéanecũãxgũ. <sup>11</sup>Rũ nũma ga  
 Chíríaanearũ ãɛxgacũ rũ nabãixãchiãxɛ.  
 Rũ norũ churaragiũerũ  
 nangutaquɛxɛxɛ rũ nũxna naca rũ  
 ñanagũrũ: —¿Texé tixĩ ya petanũwa ya  
 bexma namaxã nũxũ iXuamãxe? ¿Rũ  
 texé tixĩ ya Iraéanecũãxgiũarũ  
 ãɛxgacũmaxã nũxũ iXuamãxe i ngẽma  
 nagu charũxĩnũxũ? —ñanagũrũ. <sup>12</sup>Rũ  
 wũxi ga norũ churaragiũeru rũ  
 nanangãxũ rũ ñanagũrũ: —Pa  
 ãɛxgacũx, taxũema tixĩ ya texé ya nũxũ  
 ixuxe i ngẽma nagu curũxĩnũxũ. Natũrũ  
 yimã Erichéu ya Tupanaarũ orearũ  
 uruxũ ga Iraéanewa ngẽxmacũ, rũ yimã  
 nixĩ ya Iraéanecũãxgiũarũ ãɛxgacũmaxã  
 nũxũ iXuamacũ woo ngẽma cuxicatama  
 nagu curũxĩnũxũ ega curũ pechicawa  
 cunxmagu —ñanagũrũ. <sup>13</sup>Rũ yexguma  
 nũma ga Chíríaanearũ ãɛxgacũ rũ norũ  
 duũxũgũxũ namu rũ ñanagũrũ: —Ècũ  
 ingẽma pexĩ rũ naxçax peyadaũx i  
 ngẽma Erichéu! Rũ ngẽxguma nũxũ  
 ipeyangũxgũx rũ ichomaxã nũxũ pixu  
 nax ngẽma chanamugũxũçax i ñuxre i  
 churaragũ nax yanayaugũaxũçax!  
 —ñanagũrũ. Rũ namaxã nũxũ nixugũe  
 ga ñane ga Dotãũwa nax nayexmaxũ.  
<sup>14</sup>Rũ yéma nanamugũ ga wũxitũcumũ  
 ga churaragũ ga cowaruétũgu ìxũ rũ  
 totũcumũ ga cárugũ ga cowaru  
 itũgũnegu ìxũ rũ muxũma ga churaragũ  
 ga nacutũgumare ìxũ. Rũ yema  
 churaragũ rũ chũtacũ guma ñane ga  
 Dotãũwa nangugũ rũ nũxũ  
 ñachomaeguãchi. <sup>15</sup>Rũ moxũãcũ  
 paXmama ñnarũda ga Erichéuarũ  
 ngũxẽeruxũ. Rũ yexguma ñnaxũxũgu ga

ĩpatawa, rũ nũxũ nadau ga yema  
 churaragũ ga guma ñanexũ  
 íchomaeguãchixũ namaxã ga norũ  
 cowarugũ, rũ namaxã ga naweũgũ ga  
 cowaru itũgũne. Rũ Erichéumaxã nũxũ  
 nayarũxu rũ ñanagũrũ: —¿Ñuxmax, Pa  
 Ngũxẽeruxũx, rũ taxacũ tá ixũxũ?  
 —ñanagũrũ. <sup>16</sup>Rũ nũma ga Erichéu rũ  
 nanangãxũ rũ ñanagũrũ: —iTaxũ i  
 cumũxũ! erũ ngẽma Tupanaarũ  
 churaragũ i daxũcũãx i tamaxã  
 ngẽxmagũxũ rũ ngẽma  
 Chíríaanecũãxarũ churaragiũarũ yexera  
 narũmumae —ñanagũrũ. <sup>17</sup>Rũ nũma ga  
 Erichéu rũ nayumũxɛ rũ ñanagũrũ: —Pa  
 Corix, Pa Tupanax, cuxna chaca nax  
 cunangoxetũxẽxũçax ya daa chorũ  
 ngũxẽeruxũ nax nũxũ nadauxũçax i  
 ngẽma curũ churaragũ i torũ dauruxũ  
 ixĩgũxũ —ñanagũrũ. Rũ nũma ga Cori  
 ya Tupana rũ nanangoxetũxɛxɛ ga guma  
 Erichéuarũ ngũxẽeruxũ. Rũ nũxũ nadau  
 ga guma maxpũne rũ namaxã nanapã ga  
 Tupanaarũ churaragũ ga cowaruétũgu  
 ìxũ rũ naweũ ga ñoma xũüemarũxũ  
 ixĩgũne ga Erichéuxũ íchomaeguãchixũ.  
<sup>18</sup>Rũ yexguma yema churaragũ ga  
 Chíríaanecũãx Erichéuçax  
 ibuxmũchaũgu, rũ nũma ga Erichéu rũ  
 Cori ya Tupanana naca rũ ñanagũrũ:  
 —Pa Tupanax, ècũ iyangexetũxɛxɛ i  
 ngẽma duũxũgũ! —ñanagũrũ. Rũ nũma  
 ga Cori ya Tupana rũ nayangexetũxɛxɛ  
 yema Erichéu naxçax íçaxũrũxũ. <sup>19</sup>Rũ  
 yexguma ga Erichéu rũ ñnaxũxũ ga  
 napatawa rũ yema Chíríaanearũ  
 churaragũxũ ñanagũrũ: —Pa  
 Churaragũx, rũ ípetũe rũ tama daa nixĩ  
 ya yima ñane ya naxçax pedauxũne. Rũ  
 ècũ inua chowe perũxĩ! Rũ tá naxũtawã

pexũ chagagũ i ngẽma yatũ i naxçax pedauxũ —ñanagũrũ. Rũ ãane ga Chamãriawa nanagagũ. <sup>20</sup>Rũ yexguma Chamãriawa nangugũgu, rũ nũma ga Erichẽu rũ nayumũxẽ rũ ñanagũrũ: —Pa Corix, ñuxma rũ iyadauuchigũxẽxẽ nax nũxũ nadaugũxũçax! —ñanagũrũ. Rũ yexguma ga nũmagũ rũ nidauuchigũ, rũ nũxũ nicuaxãchitanũ ga ãane ga Chamãriaarũ aixepewa nax nayexmagũxũ. <sup>21</sup>Rũ yexguma ga nũma ga guma Iraeanecũãxgũarũ ãẽxgacũ rũ yema Chãriaanecũãxgũarũ churaragũxũ nadãuxgu, rũ Erichẽuna naca rũ ñanagũrũ: —Pa Corix ñnamexũ nax chanadaixũ? —ñanagũrũ. <sup>22</sup>Natũrũ nũma ga Erichẽu rũ nanangãxũ rũ ñanagũrũ: —Tama name nax cunadaixũ, erũ tama tacũma nixĩ nax nadaixũ i ngẽma duũxũgũ fıyaxũxũ. Rũ narũmemae nixĩ nax mea cunachibũexẽxũ rũ nax cunaxaxegũxẽxũ. Rũ ñuxũchi inachixũanecax nawoeguxẽxẽ! —ñanagũrũ. <sup>23</sup>Rũ yexguma ga nũma ga Iraeanecũãxgũarũ ãẽxgacũ rũ nanaxũ ga wũxi ga taxũ ga õna naxçax ga yema Chãriaanecũãx ga churaragũ, rũ nanachibũexẽxẽ rũ nanaxaxegũxẽxẽ. Rũ ñuxũchi norũ ãẽxgacũçax ñayamugũ. Rũ yexgumaũcũxũ ga nũma ga Chãriaanecũãxgũ rũ marũ taguma Iraeanecũãxgũxũ nachixewe.  
.....

**Ocochía nixũcu nax Yudáanecũãxarũ  
ãẽxgacũ yixĩxũçax**

**8** <sup>25</sup>Rũ yexguma 12 ga taunecũ Iraeanecũãxarũ ãẽxgacũ yixĩxgu ga Yorãũ ga Acãx nane, rũ yexguma nixĩ ga

Yudáanewa yexwacax yaxũcuxũ ga Ocochía nax Yudáanecũãxarũ ãẽxgacũ yixĩxũçax. Rũ nũma ga Ocochía rũ Yudáanecũãx ga Yorãũ nane nixĩ. <sup>26</sup>Rũ nũma ga Ocochía rũ 22 ga taunecũ nũxũ nayexma ga yexguma inaxũgũãxgu nax ãẽxgacũ yixĩxũ. Rũ wũxi ga taunecũ nixĩ nax Yerucharẽũwa ãẽxgacũ yixĩxũ. Rũ naẽ ga Ataría rũ Iraeanecũãxarũ ãẽxgacũ ga Acãxaci iyixĩ rũ ngĩrũ õxi rũ ãẽxgacũ ga Óri nixĩ. <sup>27</sup>Rũ nũma ga Ocochía rũ porãaci nachixecũma yema norũ õxi ga Acãxtanũxũrũxũ. Rũ yemaçax ga yema Ocochía ùxũ rũ tama name ga Cori ya Tupanapexewa.  
.....

**Yeú ningucuchi nax Iraeanecũãxarũ  
ãẽxgacũ yixĩxũçax**

**9** <sup>1</sup>Rũ nũma ga Tupanaarũ orearũ uruxũ ga Erichẽu naxçax naca ga wũxi ga norũ ngũexũ, rũ ñanagũrũ nũxũ: —iPaxa cugũ namexẽxẽ nax icuxũãchixũçax! iRũ ñyange i wũxi wexũ i chĩxũ, rũ Garaáxanewa ngexmane ya ãane ya Ramũwa naxũ! <sup>2</sup>Rũ ngẽxguma ngẽma cunguxgu irũ naxçax nadau ya Yeú ya Yochapã nane ya Nĩchitaxa! iRũ nagu naxũcu ya yima ñpata ya nawa nangexmane! iRũ natanũxũgũna yagagachi, rũ to i ucapuwa naga! <sup>3</sup>iRũ yawãxnaxũ i ngẽma chĩxũ i ngẽma ñqingexũ! iRũ ngẽmamaxã nabaeru rũ ñacurũgũ tá nũxũ: “Rũ ñanagũrũ ya Cori ya Tupana: ‘Choma rũ Iraeanecũãxarũ ãẽxgacũxũ cuxũ chingucuchixẽxẽ’”, ñacurũgũ tá nũxũ! iRũ ngẽmawena rũ yawãxna i ñãx rũ fixũ rũ taxuwatãma cuyachaxãchi! —ñanagũrũ. <sup>4</sup>Rũ yema

Erichéuarü ngúexũ ga orearü uruxũ rü inaxũachi nax Garaáxanewa yexmane ga ñane ga Ramúwa nax naxũxũ. <sup>5</sup>Rü yexguma yéma nanguxgu, rü nüxũ inayangau ga churaragüarü capitáũgü ga íngutaquexegüxũ. Rü ñanagürü nüxũ: —Choxũ nangexma i wüxi i ore i cumaxã nüxũ chixuxchaũxũ, Pa Capitáũx —ñanagürü. Rü nüma ga Yeú rü nanangãxũ rü ñanagürü: —¿Texé i totanüwa ya tümamaxã quidexachaũxe? —ñanagürü. Rü nüma ga yema orearü uruxũ rü nanangãxũ rü ñanagürü: —Cumaxã nixĩ i chidexachaũxũ, Pa Capitáũx —ñanagürü. <sup>6</sup>Rü yexgumatama inachi ga nüma ga Yeú, rü yema orearü uruũmaxã to ga ucapugu naxücu. Rü nüma ga orearü uruxũ rü chíxũmaxã nanabaeru rü ñanagürü nüxũ: —Cori ya Iraéanecüãxgüarü Tupana rü ñanagürü cuxũ: “Ñuxma i choma rü cuxũ chaxuneta nax ngéma chorü duũxũgü i Iraéanecüãxgüarü ãëxgacü quixixũcax i nua Iraéanewa. <sup>7</sup>Rü cuma rü tá cunadai i guxũma i Acáxtaagü. Rü ngémaacü tá nayangutanüxëxë i guxũma i chorü orearü uruũgü rü chorü duũxũgü ga nadãixũ ga Yechabé. <sup>8</sup>Rü guxũtáma i Acáxtanüxũgü rü tá nadai. Rü ngémaacü tá chanaguxëxë i guxũma i ngéma iyatüxũ i natanüxũ i Iraéanewa ngëxmagüxũ. Rü taxuxũtáma ngextá namaxũ”, ñaxũ ya Tupana —ñanagürü ga yema orearü uruxũ.  
.....

**Yeú rü nayamax ga Yoráũ ga  
Iraéanecüãxarü ãëxgacü**

<sup>16</sup>Rü yemawena ga nüma ga Yeú rü naweũ ga cowaru itúxũnegu nixüe rü

ñane ga Yeréwa naxü ga ãëxgacü ga Yoráũxũtawa. Rü nüma ga Yoráũ rü nidaxawe nagagu nax norü uanügümaxã nügü nadaixũ. Rü nüma ga Yudáanecüãxarü ãëxgacü ga Ocochía rü ta yéma Yoráũxũtawa nayexma, yerü yexma nanaxũane. <sup>17</sup>Rü yema dauũtaeruxũ ga ñane ga Yeréarü dauũtaechicawa yexmaxũ rü nüxũ nadau ga yema Yeútanüxũ nax yéma ne naxixũ. Rü yemaçax nica rü ñanagürü: —Duũxũgü nixĩ i yea ngéma ne íxũ —ñanagürü. Rü nüma ga Iraéanecüãxarü ãëxgacü ga Yoráũ rü norü duũxũgüxũ namu rü ñanagürü: —iWüxi i churara i cowaruétügu ixũxũ ngéma pemux nax íyadauxũcax rü tama nueva núma íxũ yixĩ! —ñanagürü. <sup>18</sup>Rü yema churara ga cowaruétügu ixũxũ rü Yeúçax niña rü nüxna naca rü ñanagürü: —Ãëxgacü nua choxũ namu nax cuxna chayacaxaxũcax rü “¿Tama nueva nua pexĩ?” —ñanagürü. Rü nüma ga Yeú rü nanangãxũ rü ñanagürü: —Ngéma rü tama cuxna naxü. Rü name nixĩ i choweama cuxü —ñanagürü. Rü yema ñanearü dauũtaeruxũ rü ãëxgacüxũ ñanagürü: —Ngéma churara rü marü natanüwa nangu natürü tama natáegu —ñanagürü. <sup>19</sup>Rü nüma ga ãëxgacü rü yexgumatama to ga churara ga cowaruétügu ixũxũ yéma namu. Rü nüma rü yéma Yeútanüwa nangu rü ñanagürü: —Ãëxgacü nua choxũ namu nax pexna chayacaxũcax rü “¿Tama nueva nua pexĩ?” —ñanagürü. Rü nüma ga Yeú rü nanangãxũ rü ñanagürü: —Ngéma rü tama cuxna naxü. Rü name nixĩ i choweama cuxü

—ñanagürü. <sup>20</sup>Rü yema ñanearü dauxütaeruxü rü wenaxarü ãëxgacümaxã nüxü nixu rü ñanagürü: —Ngëma to i churara i ngëma üxü rü natanüwa nangu natürü tama natáegu. Rü çauxçax rü ngëma naweümaxã icuaxü rü Níchitaxa i Yeú nixí, erü wüxi i ngeãëxürüxü inayaxüxëxë ya yima naweü, erü woetama ngëma nixí i nacüma —ñanagürü. <sup>21</sup>Rü yexguma nüma ga ãëxgacü ga Yoráü rü norü churaragüxü namu nax naweü cowaruwa yachocuchigüxüçax. Rü cowaruwa nüxü nayachocuchigü. Rü nüma ga Iraéanecüãxarü ãëxgacü ga Yoráü rü Yudáanecüãxarü ãëxgacü ga Ocochía rü wüxichigü naweügu inaxiãchi nax Yeúpexegu yayixüçax. Rü meama Nabú ga Yerécüãxarü naanegu nüxü nayangaugü. <sup>22</sup>Rü yexguma Yeúxü inangauxgu ga Yoráü rü nüxna naca rü ñanagürü nüxü: —¿Pa Yeúx, tama i nuwa nua cuxüxü? —ñanagürü. Rü nüma ga Yeú rü nanangãxü rü ñanagürü: —¿Taxacürü ngechaxü i naxçax ícucaxaxü ega ngëma cué i Yechabé rü nagu ínamaxüxgu i ngëma chixexü i guxãxü namaxã nachixexëëxü? —ñanagürü. <sup>23</sup>Rü yexgumatama nüma ga Yoráü rü nadauegu rü niña. Rü aita Ocochíacax naxü rü ñanagürü: —Törü daiwa üxü nixí, Pa Ocochíax, rü nataechitae —ñanagürü. <sup>24</sup>Natürü nüma ga Yeú rü norü würa nayaxu rü Yoráüxü namaxü. Rü Yoráüçaxwena ningaxi ga naxne rü norü maxünewa nayarügo. Rü yexma naweügu nayu ga nüma ga Iraéanecüãxarü ãëxgacü ga Yoráü. ....

**Yeú rü Yudáanecüãxarü ãëxgacü ga Ocochíaxü nimax**

<sup>27</sup>Rü yemaxü nadauxgu ga Ocochía ga Yudáanecüãxarü ãëxgacü, rü ñane ga Betagáüçax niña nagu ga yema nama ga Gúruwa daxü. Natürü nüma ga Yeú rü nawe nangë rü norü churaragüxü namu nax yamãxgüaxüçax. Rü guma ñane ga Ibéaarü ngaicamagu nüxü nayangaugü, rü yexma naweügutama nanapixëëgü. Natürü ga nüma rü niñaama rü ñuxmata ñane ga Meyíduwa nangu. Rü yexma nayu. ....

**Ataríá rü ngíxchaama Yudáanecüãxarü ãëxgacüxü ngígü iyangucuchixëxë**

**11** <sup>1</sup>Rü yexguma ngíma ga Ataríá ga Ocochía naé nüxü cuaxgu ga ngíne rü marü nax nayuxü, rü duüxügüxü imu nax nadaiaxüçax ga guxüma ga Ocochíaxacügü. <sup>2</sup>Natürü ga Yochába ga ãëxgacü ga Yoráüacü ga Ocochíaeyax rü wüxi ga ucapugu Ataríachaxwa iyacux ga Yoá ga Ocochía nane norü dauruümaxã. Rü yemaacü tama nayamaxgü. <sup>3</sup>Rü ngíma ga Yoáarü dauruxü rü 6 ga taunecü Tupanapatagu namaxã iyacux. Rü yexgumayane ga Ataríá rü Iraéanewa ãëxgacü iyixí. <sup>4</sup>Rü yexguma marü 7 ga taunecü ngíxü inguxgu ga ãëxgacü nax yixíxü ga Ataríá, rü nüma ga chacherdóte ga Yoiáda rü naxçax nangema ga yema churaragüerugü ga ãëxgacüpatamaxã icuaxgüxü rü yema capitáügu ga ãëxgacüna daugüxü, rü Cori ya Tupanapatagu nanamucu ga yema nüma ínayexmaxüwa. Rü yéma

Tupanaégagu yema churaragümaxã inaxüga nax tama nüxü yaxugüexücax nax namaxüxü ga Ocochía nane ga Yoá. Rü yemawena rü Yoáxü nangoxëxë nax nüxü nadaugüxücax. <sup>5</sup>Rü ñuxüchi nayaxugücxë rü ñanagürü nüxü: —Ñaacü tá nixí i pedauxütaegüxü. Rü ngëxguma wüxichigü i yüxügu ãëxgacüpataarü dauwa pichocüxgux rü wüxítücumü i pema rü tá ngëma ñax i ãëxgacüpatapexewa ngëxmaxüna pedaugü. <sup>6</sup>Rü ngëma toxchimüxü rü ngëma ñax i Chürgu äégaxüwa tá nadauxütaegü. Rü ngëma perü tomaepüxchimüxü rü ãëxgacüpatacaxwena üxü i ñaxwa tá nadauxütaegü. Rü ngëmaacü tá nixí i nüxna pedauxü ya yima ãëxgacüpata. <sup>7</sup>Rü pema i ngüchigaarü ngunexügu ãëxgacüpataarü dauwa ípechoxüxü, rü tá pexí Tupanapatana pedaugü ya daa bucü ya ãëxgacü tá ixücu íngexmaxüwa. <sup>8</sup>Rü änxëacü tá nüxü ípechomaeguächí ya daa Tupanapata ya daa bucü nawa ngexmane. Rü texë ya nagu ücuchaüxe rü tá tüxü pimax. Rü nawe tá pixixütanü ya daa bucü i nüma ínaxüxüwa —ñanagürü. <sup>9</sup>Rü nüma ga yema churaragüeru rü chacherdóte ga Yoiádaga naxínüe rü nanaxügü ga yema namaxã nüxü yaxuxü. Rü wüxichigü ga yema churaragüeru rü norü churaragütücumümaxã inacuax. Rü yemaacü yema chocuxü ga churaragü ga ãëxgacüpatawa dauxütaegüxü, rü yema churaragü ga yema puracüwa íchoxüxü, rü wüxichigü ga ngüchigaarü ngunexügu guma chacherdótepexewa naxíxü. <sup>10</sup>Rü nüma ga chacherdóte ga Yoiáda rü yema churaragüeruna nanana

ga guma wocaegü rü poxüruügü ga guma Tupanapatagu nuxü ga ãëxgacü ga Dabíarü ixígüxü. <sup>11</sup>Rü nüma ga yema churaragü ga dauxütaegüxü rü nachicawa nixüchigü ga Tupanapataarü tügünecüwawa rü norü toxwecüwawa. Rü yexgumarüxü ta nüxü ínachomaeguächí nax nüxna nadaugüxü ga yema ämarearü guchicaxü. Rü wüxichigü ga yema dauxütaexü rü nixäxne nax nüxna nadaugüxü ga guma bucü. <sup>12</sup>Rü yexguma nüma ga Yoiáda rü ínanamüxüchi ga guma bucü ga tauexa ãëxgacü ga Ocochía nane rü naeruwa nayangaxcuchi ga nanatüpatexe. Rü nananucu ga norü cuaxruxü ga ãëxgacü nax yixixü. Rü chíxümaxã nanabaeru rü yemawena rü nanaxunagü nax ãëxgacü yixixü. Rü guxüma ga duüxügü rü nanapépünegü rü tagaacü ñanagürügü: —iNamaxüx ya ãëxgacü! —ñanagürügü. <sup>13</sup>Rü yexguma Ataría nüxü ínügü ga nax ínapépünetagüxü rü tagaacü nataäxëgüxü ga yema churaragü rü duüxügü, rü ngüma ga Ataría rü Tupanapatawa ixü ga yema ínangutaqexëgüxüwa. <sup>14</sup>Rü nüxü idau ga yema nacüma ga peta ga ãëxgacüarü ngucuchichiga rü nüma ga guma ãëxgacü ga Tupanapataarü caxtaxütagu nax nachixü. Rü nüxü idau ta nax naxütagu nachigüxü ga churaragüeru rü paxetaruügü rü duüxügü ga poraacü taäxëgüxü ga norü cornétagu icuegüxü. Rü yexguma ga Ataría rü ngügü irügáutechiru rü tagaacü ngügürügü: —Taechitawaxëgüxü. Taechitawaxëgüxü —ngügürügü. <sup>15-16</sup>Rü yexguma nüma ga Yoiáda rü tagaxäcü yema churaragüeruxü namu rü

ñanagürü: —iNgixũ Ípegaxüchi i nua!  
 iRü taxütáma nuxã Tupanapatachiãgu  
 ngixũ pimax! Rü ngëxguma texé  
 ngiétüwa chogügu irü peyamaxama!  
 —ñanagürü. Rü yemaçax ga nümagü rü  
 guma Tupanapatawa ngixũ  
 ínagaxüchigü, rü yema nachica ga  
 ãëxgacüarü cowarugümamaxã  
 ínanguxügxüwa ngixũ natüchigügü. Rü  
 yexma ngixũ nayarümäxgü. <sup>17</sup>Rü  
 yemawena nüma ga chacherdóte ga  
 Yoiáda rü Tupanamaxã inaxüga rü  
 nüma ga ãëxgacü rü norü duüxügü rü tá  
 Tupanaga naxínüexũ. Rü yexgumarüxũ  
 ta rü ãëxgacümamaxã rü duüxügümamaxã  
 inaxüga nax duüxügü rü tá mea  
 ãëxgacüga naxínüexũ rü nüma ya  
 ãëxgacü rü tá mea duüxügümamaxã  
 inacuáxũ. <sup>18</sup>Rü ñuxüchi guxüma ga  
 duüxügü rü Baáarü ngutaquexepataüwa  
 naxí rü nagu napogüe. Rü nagu napogüe  
 ta ga guxüma ga yema Baáarü ãmarearü  
 guchicaxügü rü naxchicünaxägü. Rü  
 guma Baáarü chacherdóte ga Matáũ rü  
 Baáarü ãmarearü guchicaxüxütagu  
 nayamäxgü. Rü yemawena rü  
 Tupanapataçax nawoegu, rü nüma ga  
 chacherdóte ga Yoiáda rü yexma  
 Tupanapatagu nanamugü ga  
 dauxütaeruüügü nax nüxna  
 nadaugüxüçax. <sup>19</sup>Rü ñuxüchi nüma ga  
 chacherdóte ga Yoiáda rü naxçax naca  
 ga yema churaragüeru ga  
 ãëxgacüpatamaxã icuaxgüxũ rü ga  
 capitáũ ga ãëxgacüna daugüxü rü  
 guxüma ga duüxügü. Rü wüxigu guma  
 Tupanapatawa inaxíachi nax  
 ãëxgacüpatawa nagagüaxüçax ga guma  
 ãëxgacü. Rü yema íax ga  
 ãëxgacüpatapexewaama yexmaxüwa

namaxã nichocu. Rü nüma ga ãëxgacü  
 ga Yoá rü norü tochicaxüwa nayarüto.  
<sup>20</sup>Rü guxüma ga duüxügü rü nataãxëgü.  
 Rü yemaacü Ataríaarü yuwena rü  
 guxüma ga guma íanecüax rü taxuxüma  
 ga guxchaxügu narüxínüe. <sup>21</sup>Rü nüma  
 ga Yoá rü 7 ga taunecü nüxü nayexma  
 ga yexguma ãëxgacüxü yangucuchigu.  
 .....

### Tupanapataarü mexëëchiga

**12** <sup>4-5</sup>Rü wüxi ga ngunexügu ga  
 ãëxgacü ga Yoá rü chacherdóte  
 ga Yoiádaxũ ñanagürü: —Name nixí rü  
 tanamexëxë ya Tupanapata. Rü  
 ngëmacax name nixí i penade i guxüma  
 i ngëma diëru i woetama Tupanana üxü  
 rü ngëma diëru i wüxichigü i duüxü  
 norü ngüchaümaxã ixäxü. iRü ñuxüchi  
 curü duüxügü i diërumaxã  
 icuaxgüxümaxã nüxü ixu nax ngëma  
 diërumaxã namexëëgüaxüçax ya yima  
 Tupanapata! —ñanagürü. <sup>6</sup>Natürü  
 yexguma 23 ga taunecü ãëxgacü yixixgu  
 ga Yoá rü nüma ga chacherdótegü rü  
 taxütáma nanamexëëgü ga guma  
 Tupanapata. <sup>7</sup>Rü yemaçax ga nüma ga  
 ãëxgacü ga Yoá rü naxçax nangema ga  
 chacherdóte ga Yoiáda rü yema togü ga  
 chacherdótegü ga namüçügü. Rü  
 ñanagürü nüxü: —¿Taxacüçax tama  
 penamexëxë ya yima Tupanapata? iRü  
 ñuxmaüçüxü rü marü taxütáma  
 pegüxütama diëru ngixũ peyaxu  
 naxütawa i ngëma diërumaxã  
 nguxügüxü! Rü guxüma i ngëma diëru i  
 ñuxma ngëxmaxü rü Tupanapataarü  
 mexëëruxü tá nixí —ñanagürü. <sup>8</sup>Rü  
 nüma ga chacherdótegü rü norü me nixí  
 nax nüxü naxunetaxü ga wüxi ga diëru

ga woetama Tupanapataarü mexêêruxũ  
ixĩxũ rü marü taxütáma nügüxütáma  
ngĩxũ nayauxgüxũcax. <sup>9</sup>Rü yexguma  
nüma ga chacherdóte ga Yoiáda rü wüxi  
ga diêruchixũ naxátaüwa naxüxmaxetü.  
Rü âmarearü guchicaxüarü  
tügünecüwaguama nanaxú ga  
Tupanapataarü ñaxwa. Rü yema ñaxarü  
dauruügü rü duüxügüna nayadetanü ga  
yema diêru, rü yema diêruchixügu  
nayanúcuetanü. <sup>10</sup>Rü yexguma marü  
naxáãcuãügu ga diêruchixũ, rü nüma ga  
ãêxgacüarü diêruarü ugüruxũ, rü nüma  
ga chacherdóte rü ngĩxũ nixugügüxũ ga  
diêru, rü wüxi ga chocagu ngĩxũ  
nanucu. <sup>11-12</sup>Rü yema diêru rü yexguma  
marü poperagu ngĩxũ  
nawüpanegu wena, rü yema  
puracütanüxüeruna ngĩxũ nana nax  
yemaacü yema corapínagüaxú, rü yema  
puracümaxã icuaxgüxüaxú, rü yema  
íxtaparü üruüguaxú, rü yema nutaarü  
mexêêcüwarüüguaxú  
naxütanügüaxücax. Rü yexgumarüxũ ta  
yema diêrumaxã naxcax nataxegü ga  
mürapewagü rü nuta ga marü  
imexêêcüwagücü rü guxüma ga togü ga  
yemaxügü ga nanaxwaxegüxũ  
Tupanapataarü mexêêruxũ.  
.....

**Achíriacüaxarü ãêxgacümexêgu nangu ga  
iane ga Chamária rü Achíriaanewa  
Iraétanüxügüxũ nagagü**

**17** <sup>1</sup>Rü yexguma 12 ga taunecü  
nüxũ inguxgu ga Acáa nax  
ãêxgacü yixĩxũ ga Yudáanewa, rü  
yexguma nixĩ ga nüma ga Ochéa ya Éra  
nane rü yexwaca yangucuchixũ nax  
Iraéanecüaxarü ãêxgacü yixĩxũcax. Rü

nüma ga Ochéa rü 9 ga taunecü nixĩ ga  
Chamáriaarü ñanewa ãêxgacü yixĩxũ.  
<sup>2</sup>Natürü ga yema Ochéa üxũ rü nachixe  
ga Tupanapexewa rü woo tama yema  
nüxíraxüügüxũ ga Iraéanecüaxarü  
ãêxgacügü ügüxürüxũ nixĩ. <sup>3</sup>Rü nüma ga  
Achíriaanearü ãêxgacü ga Charimanácha,  
rü norü churaragümaxã Iraéanecüaxarü  
ãêxgacü ga Ochéacax ínayagoöchi rü  
nüxũ narüporamae. Rü norü duüxügüxũ  
nayaxígüxêxê, rü natanüwa tacü ga  
diêrucax ínacaiüxũ ga gucüma ga  
taunecügügu. <sup>4</sup>Natürü nüma ga  
Achíriaarü ãêxgacü ga Charimanácha rü  
nüxũ nacucaxama nax Ochéa rü bexma  
Equítuanecüaxarü ãêxgacümaxã nax  
nügü naxucuxêgüxũ nax Achíriamexêwa  
ínguxuchixücax. Rü naétü marü tama  
nüxũ ngĩxũ naxütanü ga yema diêru ga  
wüxichigü ga taunecü nüxna ngĩxũ  
naxágücü. Rü yemacax nüma ga  
Charimanácha rü norü churaragüxũ  
namu nax Ochéaxũ yayauxgüxücax rü  
napoxcugüaxücax. <sup>5</sup>Rü norü churaragü  
rü Iraéanegu nachocu rü ñane ga  
Chamáriacax ínayaxüächü rü tomaepüx  
ga taunecü yema nüxna nadaügü nax  
taxúema íxüxüxücax. <sup>6</sup>Rü yexguma 9 ga  
taunecü marü ãêxgacü yixĩxgu ga Ochéa,  
rü nüma ga ãêxgacü ga Achíriaanecüax  
rü nanapu ga guma ñane, rü  
Achíriaanewa tüxũ nagagü ga guxema  
Iraéanecüaxgü. Rü ñane ga Arágu tüxũ  
ninu ga natü ga Abócutüwa ga  
Gocháüanewa. Rü toxguax rü Medúguarü  
ñanegügu tüxũ ninu. <sup>7</sup>Rü yema guxchaxü  
nixĩ ga nüxũ ngupetüxũ ga yema  
Iraéanecüaxgü, yerü tama naga naxínüe  
ga Cori ya Tupana ga Equítuanewa  
ínguxüxêêcü ga Faraóümexêwa. Rü

tomare ga tupanaxũ nicuaxũxũgũ, rü yemaacü Tupanapexewa chixexũ naxügü.

.....

<sup>14</sup>Rü woo Tupana rü norü orearü uruũgüwa nayaxucuxêgü, natürü ga nüma ga Iraéanecüãxgü rü tama inaxĩnuechaũ rü tama nüxũ nacuaxgüchaũ naxrũxũ ga norü oxigü ga tama aixcuma Cori ya Tupanaaxũ yaxõgũxũ. <sup>15</sup>Rü yemaacü ga yema duũxũgü rü nüxũ naxoe ga Tupanaarü mugü rü nüxũ inarüngümae ga yema uneta ga nüxcuma norü oxigümaxã Tupana nüxũ ixuxũ, rü tama naga naxĩnue ga Tupanaarü ucuxêgü. Rü woo Tupana nüxna nachuxuxũ, natürü naxçax nadauxũtaegüama nax naxchicũnaçãgü i taxuwama mexũxũ nax yacuaxũũgũxũ naxrũxũ ga yema togü ga nachixũanecüãx ga tama Tupanaaxũ yaxõgũxũ. <sup>16</sup>Rü nüxũ narũxoe ga norü Tupanaarü mugü, rü yemaçax nügüçax nanaxü ga taxre ga wocaxacũchicũnaçãgü ga úirunaxçax, rü nanaxügü ta ga Canaáũtanũxũgüarü tupana ga Achérachicũnaçã. Rü naétü nüxũ nicuaxũxũgü ga üaxcũ rü tauemacü rü êxtagü rü Baáchicũnaçã rü ta. <sup>17</sup>Rü yexgumarũxũ ta yema tupanagnetagüarü ãmarearü guchicaxũwa tũxũ nigu ga naxacüe ga yatüe rü ngexe. Rü nagu ínamaxê ga yuü ga êxũgũxũxũ nawa icuáxũ. Rü yemaacü chixexũçax nügü inaxãgü ga Tupanapexewa rü poraãcü nananuxêxê.

.....

**Tomare ga duũxũgü Chamáriaanearü ïanegüwa namugü**

<sup>24</sup>Rü nüma ga Achíriaanecüãxarü ãêxgacü rü Iraéanecüãxchicũxü

Chamáriaanearü ïanegüwa nanamugü ga duũxũgü ga Babiróniaanecüãx rü Cútaanecüãx rü Abáanecüãx, rü Amáanecüãx, rü Cheparabáianecüãx nax yexma naxächĩügũxũçax. Rü yemaacü Chamáriaanegu nachocu rü Iraéanecüãxgüarü ïanegu naxächĩügü. <sup>25</sup>Natürü yema duũxũgü ga Achíriaanecüãx rü tama Cori ya Tupanaxũ nicuaxũxũgü, rü yemaçax ga Tupana rü yéma nanamugü ga aigü nax nadaiaxũçax ga ñuxre ga yema duũxũgü. <sup>26</sup>Rü yemaçax ñuxre ga yema duũxũgü rü Achírianecüãxarü ãêxgacũxũtawax naxĩ ga namaxã nüxũ yanaxugũxũçax, rü ñanagürügü nüxũ: —Toma i Chamáriaanearü ïanegüwa toxũ nax cumugũxũ nax ngêxma taxächĩügũxũçax, rü tama nüxũ tacuax i nacüma i norü Tupana i ngêma nachixũane. Rü ngêmaçax i ngêma norü Tupana rü toxçax ngêma nanamugü i aigü i toxũ ngõxcuxũ —ñanagürügü. <sup>27</sup>Rü yexguma ga nüma ga Achíriaanecüãxarü ãêxgacü rü nanamu rü ñanagürü: —iPenamuegu i wüxi i chacherdóte i Chamáriaanecüãxchirex nax ngêma Chamáriaanewa naxũxũçax rü ngêma nangexmaxũçax rü ngêma ngexwacax ngugũxũ i duũxũgũxũ nangúexêxũçax i ngêma Chamáriaanecüãxarü Tupanacüma! —ñanagürü. <sup>28</sup>Rü yemaacü ga wüxi ga chacherdóte ga Chamáriaanewa ínagaxũchigũxũ rü Betélgay nayaxächĩü. Rü yema nixĩ ga nangúexêxũ nax ñuxãcü Cori ya Tupanaxũ nax yacuaxũũgũxũ. <sup>29</sup>Natürü yema duũxũgü ga to ga nachixũanewa ne íxũ rü noxrütama tupanachicũnaçã ta naxügü,



rü Chamáriaanecüãxgü ügüxü ga tupanachicünaxächicagu nananugü ga ma xpúneta pexewa. <sup>30</sup>Rü yema Babiróniaanecüãxgü rü yema namaxã natupanaãxgüxü ga Chucobenúchicünaxã naxügü. Rü yema Cútaanecüãxgü rü yema namaxã natupanaãxgüxü ga Nerigáchicünaxã naxügü. Rü yema Amáanecüãxgü rü yema namaxã natupanaãxgüxü ga Achímachicünaxã naxügü. <sup>31</sup>Rü yema Abáanecüãxgü rü yema namaxã natupanaãxgüxü ga Nibáchicünaxã rü Tatáchicünaxã naxügü. Rü yema Cheparabáianecüãxgü rü naxacüxegü tüxü ínagu napexewa ga norü tupananetachicünaxãgü ga Adrameréx rü Anameréx. <sup>32</sup>Natürü ga yema duüxügü rü Cori ya Tupanaxü nicuaxüügüchiréx. Natürü nügütanüwa nüxü naxunetagü ta ga norü chacherdótegü nax yemagü norü tupanachicünaxãgücax ínaguxü ga ámategü ga ma xpúneta pexegüwa. <sup>33</sup>Rü yemaacü woo Cori ya Tupanaxü nax yacuaxüügüchiréxü, natürü norü tupananetaxügü rü ta nicuaxüxügü, yema nachixüanegü ga nawa ne naxüxücúmaacü ga wüxichigü. ....

#### Yudáanewa ãëxgacü nixí ga Echequía

**18** <sup>1</sup>Rü yexguma tomaepüx ga taunecü Iraéanearü ãëxgacü yixígu ga Ochéa ga Éra nane, rü ningucuchi ga Echequía ga Acáa nane nax Yudáanewa ãëxgacü yixíxücax. <sup>2</sup>Rü nüma ga Echequía rü nüxü náyexma ga 25 ga taunecü ga yexguma ãëxgacüxü yangucuchigu. Rü 29 ga taunecü

ãëxgacü nixí ga Yerucharéüwa. Rü naé rü Chacarífaxacü tixí rü Abí nixí ga túmaéga. <sup>3</sup>Rü yema Echequía üxü rü name ga Cori ya Tupanapexewa guma nüxcúmaacü ga norü oxí ga Dabí üxürüxü. <sup>4</sup>Rü nüma ga Echequía nixí ga duüxügüxü namuxü nax nagu napogüexücax ga yema nachicagü ga tupananetachicünaxãgü nawa yexmagüxü. Rü guma nutagü ga duüxügü nüxü icuaxüügücü rü írxaxügü nanapo. Rü yema Achérachicünaxãgü rü nayapuexé. Rü nagu nabügüe ga yema áxtapechicünaxã ga bróuchenaxcax ga Moiché üxü ga Iraéanecüãxgü napexewa pumáratéxe igugüxü. <sup>5-6</sup>Rü nüma ga Echequía rü poraacü Cori ya Iraéanecüãxgüarü Tupanana narüyoe. Rü natanüwa ga guxüma ga nüxíra ãëxgacügü íxígüxü ga Yudáanewa rü yema nawena ãëxgacü íxígüxü, rü nataxuma ga to ga ãëxgacü ga Echequíarüxü Tupanaga ínüxü. Rü nüma ga Echequía rü taguma Tupanana nixügachi, rü aixcúmama nagu namaxü ga norü mugü ga Moichéna naxaxü. <sup>7</sup>Rü yemacax ga Cori ya Tupana rü poraacü nüxü narüngüxé. Rü guxüma ga taxacü ga naxüxüwa rü meama nüxü ínananguxuchixé. ....

#### Chenaquerí rü Yudáanegu naxücu

<sup>13</sup>Rü yexguma marü 14 ga taunecü ãëxgacü yixígu ga Echequía, rü nüma ga Chenaquerí ga Achíríanecüãxarü ãëxgacü rü norü churaragümaxã guxünema ga íanegü ga Yudáanewa yexmagüne ga ípoxegügünecax ínayaxüächí rü nanapuxü. <sup>14</sup>Rü

yemacax nūma ga Echequía ga Yudáanecüāxaru āēxgacü rü Achíriaanecüāxaru āēxgacü ga Dáquiwa yexmacüçax nimuga rü ñanagürü: —Nüxü chacuax rü aixcūma wüxi i guxchaxü cumaxā chaxü. Rü ngēmacax chanaxwaxe i cutáegu nawa i chauchixüane, rü choma tá cuxü chanaxütanü i ngēma nagu cuxunetaxü i diēru —ñanagürü. Rü nūma ga Achíriaanearü āēxgacü rü Echequía ga Yudáanecüāxaru āēxgacūmaxā nüxü nixu ga natanü. Rü 9,900 quíru naguxü i diērumü rü 990 quíru naguxü i úirugu naxuneta. <sup>15</sup>Rü nūma ga Echequía rü ngixü inaxā ga gucūma ga diēru ga Tupanapatawa yexmacü rü gucūma ga diēru ga āēxgacüpatawa yexmacü. <sup>16</sup>Rü yexgumarüxü ta ga Echequía rü guma Cori ya Tupanapataaru íāxwa rü norü naxpentüüwa nanade ga yema úiru ga nūmatama yéma nanucuchiréxü, rü Achíriaaru āēxgacūna nanaxā. <sup>17</sup>Natürü woo yemaacü nanaxütanü ga Echequía ga yema Achíriaanearü āēxgacü nagu unetaxü, natürü nūma ga Achíriaanearü āēxgacü rü Yerucharéüwa nanamugüama ga wüxi ga namücü ga churaragüeru rü wüxi ga to ga āēxgacü ga poraxü namaxā ga muxüma ga norü churaragü. Rü Dáquiwa inaxīāchi nax Yerucharéüçax íyaxüāchixüçax. Rü yexguma Yerucharéüwa nangugügu, rü yema puchu ga maçpúnewa yexmaxüaru ngaicamawa nangugü, rü yéma nayachaxāchitanü nacüwawa ga yema nama ga Yauxchiruchicawa nadaxü. <sup>18</sup>Rü ñuxüchi āēxgacü ga Echequíacax nangemagü nax namaxā yanadexaxüçax. Natürü nūma ga

āēxgacü rü tama yéma naxü. Rü nachicüxü yéma nanamugü ga Eriaquí ga Ichía nane ga āēxgacüpatamaxā icuácü, rü Chéna ga āēxgacüaru poperagüna daucü, rü Yoá ga Ácha nane ga āēxgacüaru ngüxēēruxü ixícü. Rü yéma naxí nax yema Achíriaanecüāxgūmaxā yanadexagüxüçax. <sup>19</sup>Rü nūma ga yema Achíriaanearü churaragüeru rü ñanagürü nüxü: —iNamaxā nüxü pixu ya Echequía i torü āēxgacüaru ore i ñaxü: “¿Cuma nagu curüxīnūgu rü tá nangexma i texé cuxü nax ípoxüxü i choxmexwa?

..... <sup>33</sup>Rü dücax, rü natanüwa ga guxüma ga yema togü ga nachixüanegü çrü ngexürüüxü ga yema nachixüanegüaru tupanagü rü napora nax Achíriaanearü āēxgacümexēwa ínapoxüāxü? <sup>34</sup>¿Rü ngexügü nixí i ngēma tupanagü i Amácüāxaru, rü Arüpácüāxaru, rü Cheparabáicüāxaru, rü Énacüāxaru rü Íbacüāxaru? Rü yema tupanagü çrü nüxü natauxchaxü yixixü ga āēxgacü ga Achíriaanecüāxmexēwa nax ínanguxuchixēēāxü ga íane ga Chamária? <sup>35</sup>¿Rü ngexürüüxü nixí ga yema tupanagütanüwa ga nachixüanexü ípoxüxü naxmexwa ga Achíriaanearü āēxgacü? ¿Rü tüxcüü i ñuxma i nagu perüxīnüexü rü Cori ya Tupana tá yixixü ya ínapoxücü ya Yerucharéü?” ñaxü ga torü āēxgacü! —ñanagürü ga yema Achíriaanearü churaragüeru.

.....

<sup>37</sup>Rü yexguma ga Eriaquí ga āēxgacüpatamaxā icuácü rü Chéna ga āēxgacüaru poperagüna daucü rü Yoá ga āēxgacüaru ngüxēēruxü ixícü rü

nanaxĩxãchiãxëgü rü nügü narügáutechirugü. Rü ãëxgacü ga Echequífaxũtawaxã naxĩ nax namaxã nüxũ yanaxugüexũcãx ga yema Achíríaanearü churaragüeruarü ore.

### Yudáane rü tama

#### Chenaquerímëxëgu nangu

**19** <sup>1</sup>Rü yexguma yemaxũ naxĩnügü ga guma ãëxgacü ga Echequífa rü nügü narügáutechiru. Rü norü ìxãchiãëmaxã nagu nicux ga wüxi ga naxchiru ga yaxcũxũ rü témũxũ rü yemaacü Tupanapatawaxã naxũ rü yémaxayayumüxë. <sup>2</sup>Rü nümaxã ga ãëxgacü rü nanamuga Eriaquí, rü Chéxna, rü ñuxre ga chacherdótegü ga rüyamaegũxũ nax nümagü rü ta naxchiru ga yaxcũxũ rü témũxũgü yaxcũxũcãx. Rü yemaacü orearü uruxũ ga Ichaífaxũtawaxã nanamugü nax namaxã nüxũ yanaxugüexũcãx i ngëmaxã guxchaxũ. <sup>3</sup>Rü Ichaífa ga Amú nanemaxã nüxũ nixugüe ga ãëxgacüarü ore rü ñanagürügü: —Ñuxmaxã rü wüxi i taxũmaxã i ãücũmaxũwaxã tangexmagü, rü tórü uanügü rü tomaxã naguxchigagü rü toxũ nacugüe. Rü poraãcũ ngũxũ tingegü ñomaxã wüxi i ngexũ i nguxacũxũ rü turaxũrũxũ. <sup>4</sup>Bexmaxã Cori yaxã curü Tupanaxã rü marü nüxũ naxĩnũ i ngëmaxã ore i nüxũ yaxuxũ i ngëmaxã Achíríaanearü churaragüeruxã Tupanaxã yaxã maxũcũmaxã yaguxchigaxũ. Chierũna napoxcuãxgu yaxã curü Cori yaxã Tupanaxã naxcãx i ngëmaxã ore i nümaxãmaxã nüxũ naxĩnũxũ. Rü ngëmaxãxã chanaxwãxã i toxcãx cuyumüxë nax ìtayaxũgũxũ —ñanagürügü. <sup>5-6</sup>Rü yexgumaxã Ichaífa nüxũ ñnügü yaxã yema

ore rü ñanagürü: —i ãëxgacü yaxã Echequífaxãmaxã nüxũ pixu rü Tupanaxã rü ñanagürü! “iTaxũ i cumuũxũ naxcãx i ngëmaxã ore i chixexũ i chauchigaxã nüxũ yanaxugüexũ i ngëmaxã norü duũxũgü yaxã yimã Achíríaanearü ãëxgacü! <sup>7</sup>Rü dũcãx, chomaxã rü tá nüxãxã chanaxgũxëxë i wüxi i guxchaxũ i ore i tá naxchixũanecãx natãegũxëxëxũ nax ngëxmaxã yaxãxgũaxũcãx” —ñanagürü. <sup>8</sup>Rü nümaxã ga yema Achíríaanearü churaragüeru yaxã Echequífaxũ ãxũnëxũ rü nüxũ nacuãchigaxã ga gumã norü ãëxgacü ga Chenaquerü rü marü ñnaxũxũxũ ga ñane yaxã Dãquíwaxã rü ñane yaxã Dínawaxã naxũxũ. Rü yemacãx yaxã yema churaragüerü rü natãegu yaxã Yerucharéũwaxã, rü norü ãëxgacü yaxã Chenaquerü ñyexmaxũwaxã naxũ yaxã Dínawaxã. <sup>9-10</sup>Rü nümaxã ga ãëxgacü yaxã Chenaquerü rü yémaxã nüxũ yaxãxĩnũchigaxã rü ãëxgacü yaxã Tirãcaxã ga Etiopíaanecũãx rü naxcãx ñnayagoõchichaxã. Natürü nümaxã ga ãëxgacü yaxã Achíríaanecũãx yaxã Chenaquerü rü wenaxarü norü duũxũgũxũ namuamaxã nax Yudáanecũãxarü ãëxgacü yaxã Echequífaxũtawaxã nangegũaxũcãx yaxã poperaxã ga ñnaxũ: “iTaxũ i cugü cuwomüxëxëxũ yaxã curü Tupanaxã yaxã nüxãxã curüyoeçü! Rü nümaxã cumaxã nüxũ nixu yaxã yimaxã ñane yaxã Yerucharéũ rü taxũtãmaxã choxmëxgu yaxã nanguxũ, natürü doramare nixi i ngëmaxã. <sup>11</sup>Cumaxã rü marü nüxũ cucuãchigaxã yaxã yemaxã naxũgũxũ yaxã tochixũanearü ãëxgacügü yaxã namaxã yaxã guxũmaxã yaxã yemaxã togü yaxã naxchixũanegü yaxã nadaixũ. ¿Rü ñuxãcũ i cumaxã i nagu curũxĩnũxũ yaxã taxũtãmaxã

choxmexgu nax cunguxú? <sup>12</sup>Rü yema nachixüanegü ga Gocháü, rü Aráü, rü Rechépa rü ga duüxügü ga Betedécüãx ga ñane ga Terachárawa maxëxü, rü yema norü tupanagü rü tama ínanapoxügü ga yexguma tórü oxigü nadajxgu. <sup>13</sup>¿Rü ngexügü yixixü i ñuxma ga yema norü ãëxgacügü ga guma ñanegü ga Amáx, rü Arupáx, rü Cheparabáiü, rü Éna rü Íba?” ñanagürü ga yema poperagu ümatüxü. <sup>14</sup>Rü yexguma Echequía nayaxuxgu ga yema popera ga Achíriaanearü ãëxgacüarü duüxügü yéma ngegüxü, rü nüxü nadaumatü. Rü ñuxüchi Tupanapatagu naxücu rü yexma Tupanapexegu nayaxü. <sup>15</sup>Rü ñaäcü yéma nayayumüxë: “Pa Corix, Pa Torü Tupana i Nua Daa Cupataarü Aixepewa i Nachica i Üünexüwa Ngëxmaxex, rü cuxicatama nixí ya Tupana i norü yora quixixü i guxüma i nachixüanegü i ñoma i naanewa ngëxmagüxü. Rü cumatama cunaxü ga daxügüxü ga naane rü ñoma ga naane. <sup>16</sup>iChoxü nadawenü, Pa Corix, rü choxü irüxínü! iRü nüxü naxínü i ngëma ore i ngëma ãëxgacü i Chenaquerí nua chauxütawa muxü! Rü guxüma i ngëma norü oregüwa rü cumaxá naguxchiga, Pa Tupana ya Maxücüx. <sup>17</sup>Rü aixcüma nixí, Pa Corix, Pa Tupanax, ga yema nüxcümaxüxü ga ãëxgacügü ga Achíriaanecüãxgü ga nadaiäcuãxü ga nachixüanegü rü napuxüãxü ga norü naanegü. <sup>18</sup>Rü yema nachixüanegüarü tupanachicünaãgü, rü nüxü ínanagu, yerü yema tupanachicünaãgü ga duüxügü nutawa rü naigüwa ügüxü rü tama aixcüma curüxü tupanagü nixí. Rü yemaçax nixí

ga nüxü nagu napogüexü rü ínaguaxü. <sup>19</sup>Rü ñuxmax, Pa Corix, Pa Torü Tupanax irü ngëma Achíriaanecüãx i ãëxgacümexëwa toxü ínaguxüxëxë nax ngëmaäcü guxü i nachixüanegü i ñoma i naanewa ngëxmagüxü nüxü cuãxgüxüçax nax cuxicatama yixixü nax Tupana quixixü!” ñanagürü ga norü yumüxëwa. <sup>20</sup>Rü yemawena nüma ga Ichaía rü Echequíaçax yéma namuga rü ñanagürü: “Nüma ya Iraéanecüãxgüarü Tupana rü ñanagürü cuxü: ‘Marü cuxü nüxü chaxínü i curü yumüxë nachiga i Achíriaanearü ãëxgacü’, ñanagürü. <sup>21</sup>Rü ñaa nixí i ngëma ore ga Cori ya Tupana nüxü ixuxü naxçax i ngëma Achíriaanearü ãëxgacü: ‘Düçax, Pa Chenaqueríx, rü yima Tupanaarü ñane ya Yerucharéüçüãx rü tama cuxü namüë. Rü ñoma wüxi i pacü cuxü cugüxürüxü tá cuxü nacugüe i ngëxguma nüxna quixügachigux. <sup>22</sup>¿Rü texémaxá nixí i cuguxchigaxü rü cunuxü? ¿Rü texémaxá nixí i quipuraxü rü cunuxetüxü? Rü cumaxá nüxü chixu rü chomaxá nixí i cunuxü i choma i Iraéanecüãxgüarü Tupana ya üünecü’”, ñanagürü.

.....

<sup>32</sup>Rü Tupana rü Echequíaxütawa namuga rü ñanagürü: “Ñaa nixí i choriü ore i ngëma Achíriaanecüãxgüarü ãëxgacüchiga: ‘Rü taxütáma Yerucharéügu naxücu rü bai ya wüxi ya naxne tá inamaxü. Rü norü churaragü rü taxütáma norü poxüruümaxá ngëma nangugü, rü taxúnetáma ya toxóone naxtapüxgu nanguxgü nax yimawa naxígüxüçax. <sup>33</sup>Rü yematama nama ga noxri nagu ne naxüxügutama tá natáegu

rü taxütáma nagu naxücu ya daa ñane. Rü choma ya Tupana, rü ngëma nixí i chorü ore i cumaxã nüxü chixuxü. <sup>34</sup>Rü chomatama tá nüxna chadau ya daa ñane rü tá íchanapoxü erü nüxü changechaü ya chorü duü ya Dabí, rü chayanguxëxë i ngëma nüxü chixuxü”, ñanagürü. <sup>35</sup>Rü yematama chütaxügu rü wüxi ga daxücüãx ga Tupanaarü orearü ngeruxü rü nanadai ga 185,000 ga churaragü ga Achíriaanecüãx. Rü yexguma yangunegu rü guxüma nayue. <sup>36</sup>Rü yemawena ga nüma ga Chenaquerí ga Achíriaanearü ãëxgacü rü ñnayachaxáchi ga Yerucharéücüãxmaxã nügü nax nadaïxchaüxü. Rü norü ñane ga Nínibecax natáegu. <sup>37</sup>Rü wüxi ga ngunexügu ga yexguma norü tupana ga Nírupatawa nüxü yacuaxüüyane, rü nanegü ga Adameré rü Chareché rü yéma naxí rü nayamaxgü. Rü nümagü rü Araráanewa nabuxmü. Rü yemawena rü Chenaquerí nane ga Echaradóü nachicüxü ãëxgacüxü ningucuchi.

**Echequía rü nidaxawe natürü Tupana rü naxcax nayataanexëxë**

**20** <sup>1</sup>Rü nüma ga Echequía rü poraäcü nidaxawe. Rü yemacax ga orearü uruxü ga Ichaía ga Amú nane, rü ñnayadau, rü ñanagürü nüxü: —Cori ya Tupana rü ñanagürü cuxü: “Ëcü inamaxã idexa i cuxacügüx, rü namaxã nüxü ixu nax ñuxäcü tá cuwena namaxëxü! Erü ñuxma rü taxütáma cuxcax nitaane, rü tá cuyu”, ñanagürü. <sup>2</sup>Rü nüma ga Echequía rü nadixeguáchi rü íxtpäguama nabuenü rü ñaäcü nayumüxë: <sup>3</sup>—Pa Corix, Pa Tupanax, rü cuxü chacaxü nax nüxna

cucuãxáchixücax nax ñuxäcü cuxcax chapuracüxü rü guxüguma chanaxüxü ga yema cuma namaxã cutaãxëxü —ñanagürü. Rü yema ñaxguwena rü ñuxüchi poraäcü naxaxu. <sup>4</sup>Rü naxüpa ga Ichaía nax íxüxüxü naãxtüwa ga guma ãëxgacüpata, rü nüma ga Cori ya Tupana rü Ichaíamaxã nidexa rü ñanagürü nüxü: <sup>5</sup>—iWena íyadau ya Echequía ya chorü duüxügiarü ãëxgacü ixücü! iRü namaxã nüxü ixu: “Rü choma ya nüxcümaäcü ga curü oxí ga Dabíarü Tupana rü marü cuxü nüxü chaxínü i curü yumüxë, rü nüxü chadau i cuxgüxüetü nax cuxaxuxü! Rü choma rü tá cuxcax chayataanexëxë rü tomaepüx i ngunexüguwena rü tá marü ícurüda rü tá chopatawa cuxü. <sup>6</sup>Rü cuxü tá chanaxüinagü i 15 ya taunecü nax cumaxüxü. Rü choma rü tá cuxü íchapoxü rü tá íchanapoxü ya yima ñane ya Yerucharéü nüxna i ngëma Achíriaanecüãxarü ãëxgacü. Rü ngëmaäcü chanaxü erü nüxü changechaü ya chorü duü ya Dabí rü chayanguxëxë i ngëma nüxü chixuxü” —ñanagürü ga Tupana. <sup>7</sup>Rü Ichaía rü nanamu nax naxügiãxü ga wüxi ga íguchara. Rü yemamaxã nanachagü ga yema ínataixnaãxüwa ga ãëxgacü. Rü yemaacü naxcax nitaane. <sup>8</sup>Rü nüma ga Echequía rü Ichaíana naca rü ñanagürü: —¿Taxacürü cuaxruüwa tá nixí i nüxü chacuáxü nax Cori ya Tupana chaxcax yataanexëxü, rü tomaepüx i ngunexüguwena rü napatawa tá nax chaxüxü? —ñanagürü. <sup>9</sup>Rü nüma ga Ichaía rü nanangãxüga rü ñanagürü: —Ñaa tá nixí i ngëma cuaxruxü i nüma ya Cori ya Tupana tá cuxna äxü nax

nawa nüxũ cucuáxũcax rü aixcüma tá nayanguxẽxẽ i ngẽma cumaxã inaxunetaxũ: ¿Cunaxwaxe i ùaxcüpechita rü 10 i wüye nax naxĩnagũxũ, rüexna 10 i wüye nax natáeguxũ? —ñanagürü. <sup>10</sup>Rü nüma ga Echequía nanangãxũga rü ñanagürü: —Ngẽma ùaxcüpechita nax naxĩnagũxũ rü natauxcha, natürü ngẽma nügü nax natáeguxũ nixĩ i guxchaxũ —ñanagürü. <sup>11</sup>Rü yexguma nüma ga orearü uruxũ ga Ichaía rü Cori ya Tupanana naca, rü nüma ga Cori ya Tupana rü 10 ga wüye nanatáeguxẽxẽ ga ùaxcüpechita nawa ga yema Acáaarü ùaxcüarü ngugüruxũ ga ãëxgacüpatawa yexmaxũ.

**Echequía nanayaxu ga duũxũgü ga  
Babiróniaanewa ne mugũxũ**

<sup>12</sup>Rü yema ngunexũgügu rü nüma ga Babiróniaanearü ãëxgacü ga Merodá-Baradáũ ga ãëxgacü ga Baradáũ nane ixĩcü, rü Echequíaxũtawana nanamugü ga ñuxre ga norü duũxũgü nax norü moxẽ yéma nangegũxũcax rü ãmare nüxna yaxãgũxũcax, yerü nüxũ nacuáchiga ga nax yadaxawexũ. <sup>13</sup>Rü nüma ga Echequía rü meama nanayaxu ga yema ãëxgaciärü duũxũgü. Rü nüxũ nanawex ga guxũma ga norü yemaxũgü ga nüxũ yexmaxũ ga diërumü, rü úiru, rü pumarágü rü chĩxũ. Rü yexgumarixũ ta rü nüxũ nanawex ga naxnegüpataxũ, rü guxũma ga norü yemaxũgü ga yexma namaxã nanguxũxũ. Rü guxũma ga norü yemaxũgü ga ãëxgacüpatawa yexmagũxũ, rü nüxũ nanawex rü taxuxũma inicux. <sup>14</sup>Rü yemawena ga nüma ga orearü uruxũ ga Ichaía rü ãëxgacü ga Echequíaxũtawana nax rü

nüxna nayaca rü ñanagürü: —¿Ngextã ne naxĩ i ngẽma yatügü i cuxũtawana ngugũxũ, rü taxacüxũ yixĩxũ i cumaxã yaxugũxũ? —ñanagürü. Rü nüma ga Echequía rü nanangãxũ rü ñanagürü: —Ngẽma duũxũgü rü yaxũguxũ i nachixũane i Babiróniaanewa nixĩ i ne naxĩxũ —ñanagürü. <sup>15</sup>Rü yexguma ga nüma ga Ichaía rü ãëxgacüna naca rü ñanagürü: —¿Rü taxacü nixĩ ga nüxũ nadaugũxũ i nua cupatawa? —ñanagürü. Rü nüma ga Echequía rü nanangãxũ rü ñanagürü: —Nüxũ nadaugü i guxũma i ngẽmaxũgü i chopatawa ngẽxmaxũ. Rü guxũma nüxũ chawex rü taxuxũma ichicux —ñanagürü. <sup>16</sup>Rü yexguma ga nüma ga Ichaía rü ñanagürü nüxũ: —iDücac, irüxĩnũ i ñaa ore i Tupana cuxcax nua muxũ! <sup>17</sup>“Rü tá ñnangügü i ngunexũgü i nagu ngẽma Babiróniaanecüãx tá nadexũ i guxũma i ngẽmaxũgü ga curü oxigü daa ãëxgacüpatagu nutaquexexũ. Rü tá Babiróniawa nanana, rü taxuxũtáma nua nayaxũãchi. <sup>18</sup>Rü woo ya cutaxagü rü ngẽma Babiróniaanewa tá tüxũ nagagü rü tá tüxũ nidegüpüxücharexe, rü ngẽmaãcü norü puracütanüxũxũ ãëxgacüpatagu tá tüxũ namugü” —ñanagürü. <sup>19</sup>Natürü Echequía rü tama poraãcü naxoegaãxẽ yerü ñaxũgu narüxĩnũ: “Ñuxma nax chamaxũgu rü taxũtáma ngẽma nangupetü”, ñaxũgu narüxĩnũ. Rü yemacax Ichaíaxũ nangãxũga rü ñanagürü: —Chãuxcax name i ngẽma Tupanaarü ore i chomaxã nüxũ quixuxũ —ñanagürü. <sup>20</sup>Rü guxũma ga yema Echequíaarü puracü ga naxüxũ rü Yudáanecüãxaru ãëxgacügüaru

poperagu naxümatü. Rü ngéma nangox ga ñuxácü nax naxüãxü ga yema ñanearü dexápaxü ga taxüchixü rü wüxi ga dexámaxü ga ñanewa nadaxü.

### Nayu ga Echequía

<sup>21</sup>Rü yexguma nayuxgu ga Echequía, rü nane ga Manaché rü nachicüxü Yudáanecüãxarü ãëxgacüxü ningucuchi.

### Yudáanewa ãëxgacü nixí ga Manaché

**21** <sup>1</sup>Rü nüma ga Manaché rü 12 ga taunecü nüxü nayexma ga yexguma ãëxgacüxü yangucuchigu. Rü 55 ga taunecü ãëxgacü nixí ga Yerucharéüwa. Rü ngéga ga naé rü Echíba nixí. <sup>2</sup>Natürü yema Manachécüma rü tama name ga Tupanapexewa. Rü nagu namaxü ga yema nacüma ga chixexü ga nagu naxixü ga yema duüxügü ga nüxcüma Cori ya Tupana Iraétanüxpexewa íwoxüxü. <sup>3-5</sup>Yerü wena nayamexëëgü ga yema tupanenetagüarü ãmarearü guchicaxügü ga maxpúnetapexewa yexmagüxü ga nanatü ga Echequía nagu pogüexü. Rü wena ñanaxüxü ga Baáchicünaxãarü ãmaregüarü guchicaxü. Rü Iraéanecüãxarü ãëxgacü ga Acáxrüxü nanaxü ga wüxi ga Achérachicünaxã. Rü ñuxüchi nüxü nicuaxüxü ga üaxcü, rü tauemacü rü ëxtagü. Rü guma Tupanapatachiáwa rü nayaxüagü ga ãmaregüarü guchicaxü naxçax ga üaxcü, rü tauemacü, rü ëxtagü woo nüma ga Tupana rü nüxü nixu nax naxçaxicatama yixixü ga guma napata ga Yerucharéüwa. <sup>6</sup>Rü naétü nanetama tüxü nigu nawa ga wüxi ga yema tupanenetachicünaxãarü

ãmarearü guchicaxü. Rü nagu namaxü ga yuü ga naãxëgüçax nawa ingemaxü, rü yuü ga nawa nüxü icuáxü ga ëxüguxü. Rü duüxügümaxã nanaxunagü nax nangüexüçax ga yuü rü nax nangüexüçax nax ñuxácü duüxëxü nachixexëëgüxü rü tüxü nangoxgüxü. Rü yemaacü poraãcü chixexü naxü ga Tupanapexewa rü yemaçax poraãcü namaxã nanu ga Tupana.

.....

<sup>16</sup>Rü yema chixexüétüwa rü nüma ga Manaché rü yexera chixexü naxü ga Tupanapexewa yerü nanamu ga duüxügü ga Yudáanecüãx nax nümagü rü ta yema chixexü naxügüçax. Rü nüma ga Manaché rü muxema ga duüxëgü ga taxuxüma ga chixexü ügüxe rü tüxü nadai ga Yerucharéüwa. <sup>17</sup>Rü ngéma tama ñaa poperawa ngóxü i Manachéchiga rü guxüma ga norü puracü ga naxüxüchiga rü norü pecáduchiga, rü Yudáanecüãxarü ãëxgacügüarü poperagu naxümatü. <sup>18</sup>Rü yexguma nayuxgu ga Manaché, rü napata ga Úchawa yexmaneãxtügu nanatãgü. Rü yemawena rü nane ga Amóü rü nachicüxü ãëxgacüxü ningucuchi.

### Yudáanewa ãëxgacü nixí ga Amóü

<sup>19</sup>Rü nüma ga Amóü rü nüxü nayexma ga 22 ga taunecü ga yexguma ãëxgacüxü yangucuchigu. Rü taxre ga taunecü ãëxgacü nixí ga Yerucharéüwa. Rü naé rü Mechuremé nixí ga tümaéga, rü tümanatü rü Achúru ga Yóbacüãx nixí. <sup>20</sup>Natürü Tupanapexewa rü nachixe ga nacüma ga Amóü nanatü ga Manachécümarüütama.

.....

<sup>25</sup>Rü ngëma tama ñaa poperawa ngóxũ i Amóũchiga rü guxũma ga norü puracü ga naxüxũchiga rü Yudáanecüãxaru ãëxgacügiarü poperagu naxümatü. <sup>26</sup>Rü yexguma nayuxgu ga Amóũ, rü napata ga Úchawa yexmaneãxtügu nanataxgü. Rü yemawena rü nane ga Yochía rü nachicüxü ãëxgacüxü ningucuchi.

### Yudaanewa ãëxgacü nixí ga Yochía

**22** <sup>1</sup>Rü nüma ga Yochía rü nüxũ nayexma ga 8 ga taunecü ga yexguma ãëxgacüxü yangucuchigu. Rü 31 ga taunecü ãëxgacü nixí ga Yerucharéüwa. Rü naé rü tümaéga rü Yedída nixí, rü tümanatü rü Bucácüãx nixí, rü Adaía nixí ga naéga. <sup>2</sup>Rü nüma ga Yochía rü Tupanapexewa rü mexũ naxü. Rü nüxcümaũcü ga norü oxí ga Dabí nagu ixüxügu nixü. Rü taguma taxacüçax ñuxgu nüxna ínaxüxü ga yema nacüma ga mexũ. <sup>3</sup>Rü yexguma marü 18 ga taunecü ãëxgacü yixígu ga Yochía, rü nüma rü Tupanapatawa nanamu ga norü poperaarü ümatüruxü ga Chapáũ ga Acharía nane ga Mechuráũ nataxa. Rü ñanagürü nüxü: <sup>4</sup>—iËcü yéa chacherdótegüaru ãëxgacü ya Irichíaxütawa naxü rü namaxã nüxü ixu rü ngixũ nanutaquexe i ngëma diëru i duüxügü Tupanapatawa ngixũ ngecü rü íãxarü dauruügu ngixũ nutaquexecü! <sup>5</sup>iRü ngëma diëru rü nüxna ngixũ naxã i ngëma duüxügü i Tupanapataarü mexëemaxã icuaxgüxü! Rü nümagü rü ngëma diërumaxã tá nüxü nayaxügütanü i norü puracütanüxü i Tupanapataarü mexëewa puracüexü —ñanagürü ga ãëxgacü ga Yochía.

.....

<sup>8</sup>Rü wüxi ga ngunexũ ga yexguma Tupanapataarü mexëë ínaxügüyane, rü nüma ga chacherdótegiarü ãëxgacü ga Irichía rü yexma nüxü inayangau ga Tupanaarü mugüpane ga nüxcüma iyarütaxuxü. Rü poperaarü ümatüruxü ga Chapáũxütawa nanange rü ñanagürü nüxü: —iDücax! Rü Tupanapatagu nüxü ichayangau i ñaa Tupanaarü mugüpane —ñanagürü. Rü Chapáũna nanaxã nax nüma nüxü nadaumatüxüçax. <sup>9</sup>Rü yemawena rü nüma ga Chapáũ rü ãëxgacü ga Yochíamaxã nüxü nayarüxu rü ñanagürü nüxü: —Ngëma curü duüxügü, Pa ãëxgacüx, rü marü ngixü nanutaquexe i ngëma diëru i Tupanapatawa ngexmãxcü. Rü marü nüxna ngixü naxã i ngëma Tupanapataarü mexëewa puracüexümaxã icuaxgüxü —ñanagürü. <sup>10</sup>Rü nüma ga Chapáũ rü yexgumarüxü ta ãëxgacümaxã nüxü nixu rü chacherdóte ga Irichía rü nüxna nax naxããxü ga wüxi ga mugüpane ga Tupanapatagu nüxü iyangauxü. Rü ñuxüchi nüma ga Chapáũ rü ãëxgacüçax nüxü nadaumatü. <sup>11</sup>Rü yexguma ãëxgacü nüxü ínügu ga yema Tupanaarü mugü ga poperagu ümatüxü, rü poraäcü naxoegaãxë rü nügu narügáutechiru. <sup>12-13</sup>Rü yexgumatama ga nüma ga ãëxgacü rü nanamu ga Chapáũ rü Irichía, rü Aicáũ ga Chapáũ nane rü Abúru ga Micaía nane rü Achaía ga norü ngüxëeruxü, rü ñanagürü nüxü: —iËcü, Cori ya Tupanana peyacaxa chauégagu rü Yerucharéüçüãx i duüxügüégagu rü guxũma i Yudaanecüãxégagu nax tüxü nüxü nacuaxëëxüçax i norü ore i ñaa popera i



nüxü ipeyangaxüügu ümatixü! Erü ngürüächi ya Cori ya Tupana rü tamaxã nanu yerü ga tórü oxigü rü tama naga naxínüe i ngëma ñaa poperawa nüxü yaxuxü, rü tama nagu namaxë i ngëma ñaa poperagu ümatixü —ñanagürü ga äëxgacü ga Yochía. <sup>14</sup>Rü nüma ga Irichía, rü Aicáü, rü Abúru, rü Chapáü rü Achaía rü ngixütawa naxí ga yema orearü uruxü ga Úda ga Charúü naxmax. (Rü nüma ga Charúü rü Tíba nane nixí rü Arátaxa nixí. Rü nüma ga Ará rü chacherdótegüchiruarü dauruxü nixí.) Rü ngíma ga Úda rü wüxi ga ngexwacaxüü ga ítamügu ixächüü ga Yerucharéüwa. <sup>15</sup>Rü yexguma ngíxna nacagüegu rü ngíma rü inangaxüga rü ngígürügü: —Ñaa nixí i norü ore ya Cori ya Iraéanecüäxgüarü Tupana rü ñanagürü i nümax: “iNamaxã nüxü pixu ya yimá nua pexü mugücü nax choxna peyacaxaxüçax! <sup>16</sup>Rü choma i Cori ya Tupana rü nüxü chixu rü guxchaxü tá naxçax íchanguxëxë i ñaa nachica rü norü duüxügü yema popera ga äëxgacü nüxü daumatixü nüxü ixuxürüxü. <sup>17</sup>Erü ngëma duüxügü rü choxna nixígachi rü norü tupananetagüçax pumára ínagu. Rü ngëmaäcü choxü nanuxëëgü namaxã i ngëma chixexü nax naxügüxü. Rü ngëmacax nixí i chanuxü namaxã ya daa ñane rü taxütáma icharüngüxmüxü. <sup>18-19</sup>Natürü tá nüxü charüngüxëxë ya yimá Yudáanecüäxarü äëxgacü ya nua pexü mugücü nax choxna peyacaxaxüçax. Rü chanaxwaxe i namaxã nüxü pixu i chorü ore, rü ñaperügü nüxü: ‘Marü nüxü chadau nax ñuxäcü chauga cuxínüxü i ngëxguma chorü orexü cuxínügux, rü ñuxäcü

cuxoégaãxë i ngëxguma poxcu namaxã chaxuegugu i ñaa ñane rü norü duüxügü i tá chadaixü, rü ñuxäcü cugü curügáutechiru rü cuxaxuxü i chopexewa. Rü ngëmacax i choma rü tá cuxü ichaxínü rü tá cuxü chariüngüxëxë. <sup>20</sup>Rü ngëmacax i ñuxmax nax ngëma cuxüügagu rü taxütáma chanadaiaçu ya daa ñane nax ngëmaäcü taãxëäcü cuyuxüçax rü naxütawa cunguxüçax i curü oxigü. Rü ngëmaäcü taxütáma nüxü cudaux i ngëma poxcu i namaxã tá chanapoxcuxü ya daa ñane’” —ñanagürü. Rü yema äëxgacüarü duüxügü ga Údaxütawa namugüxü rü nawoegu nax namaxã nüxü yaxugüexüçax ga yema Tupanaarü ngäxü.

**23** <sup>1</sup>Rü yexguma ga nüma ga äëxgacü ga Yochía rü naxçax nangema ga guxüma ga äëxgacügü ga yaxguäxgü ga Yudáanewa rü ñane ga Yerucharéüwa yexmagüxü nax namaxã nangutaquexexüçax. <sup>2</sup>Rü ñuxüchi nüma ga äëxgacü rü Tupanapatagu namaxã nangutaquexe ga guxüma ga yema duüxügü ga Yudáanecüäx rü Yerucharéücüäx rü ñanexacügücüäx ga duüxügü ga iyaxü, rü buxügü, rü chacherdótegü rü orearü uruügü. Rü nüma ga äëxgacü rü yéma napexewa tagaäcü nawa nangux ga yema popera ga Tupanapatagu nüxü iyangauxü ga Tupanaarü mugü nagu ümatixü. <sup>3</sup>Rü yexguma yema poperaxü nadaumatüguwena ga äëxgacü rü ñuxüchi Tupanapataarü caxtaxütagu nayachi. Rü yéma Tupanapexewa nüxü nixu nax aixcüma tá naga naxínüxü rü nagu namaxüxü i ngëma norü mugü rü

ucuxēgü i ngēma poperagu ümatüxü. Rü guxüma ga duüxügü rü ta yemagutama narüxñüe.

**Yochía ínanawoxü ga  
tupananchicünaxägü**

<sup>4</sup>Rü yexguma ga nüma ga ãëxgacü rü nanamu ga chacherdótegüarü ãëxgacü ga Irichía rü togü ga chacherdótegü rü ñaxarü dauruügü nax guma Tupanapatawa ínawoxüãxüçax ga guxüma ga yemaxügü ga Baáxü, rü Achéraxü, rü üaxcüxü, rü tauemacüxü rü ëxtagüxü namaxä nüxü yacuaxüügüxü ga duüxügü. Rü nüma ga ãëxgacü rü nanamu ga Yerucharéüarü düxétüwa nax iyaguaxüçax ga ngatexü ga Chidóüwa. Rü ñuxüchi guma norü tanimaca rü Betélwa nanangegü.

.....

**Yochía rü nanaxüchiga ga Üpetüchiga**

<sup>21</sup>Rü nüma ga ãëxgacü ga Yochía rü duüxügüxü namu nax Cori ya norü Tupanaégagu naxüchigagüaxüçax ga Üpetüchiga yema popera ga mugüpanewa nüxü yaxuxürüxü. <sup>22</sup>Rü nüxíraxüxü ga Iraéanecüãxüarü ãëxgacügüga rü taguma yemaacü nanaxüchigagü ga Üpetüchiga. Rü woo nawena ga Yudáanecüãxüarü ãëxgacügü rü Iraéanecüãxüarü ãëxgacügü rü taguma yemaacü nanaxüchigagü. <sup>23</sup>Rü yexguma 18 ga taunecü ãëxgacü yixüxgu ga Yochía nixí ga naxunagiüãxü nax Cori ya Tupanaégagu naxüchigagüaxüçax ga yema Üpetüchiga ga Yerucharéüwa.

**Yochía rü aixcüma Tupanaga naxñnü**

<sup>24</sup>Rü nüma ga Yochía rü inayanaxoxëxë ga yuü rü taxacü ga

ëxügüxüxü cuáxü. Rü yexgumarüxü ta inayanaxoxëxë ga yema tupananchicünaxägü ga wüxichigü ga ípatawa yemaxü rü guxüraxüxü ga yema tupananchicüarü yemaxügü ga duüxügü namaxä nüxü icuaxüügüxü ga Yudáanewa rü Yerucharéüwa. Rü yemaacü nanaxü ga Yochía yerü aixcüma naga naxñnü ga guxüma ga yema mugü ga chacherdóte ga Irichía Tupanapatawa nüxü iyanguaxü. <sup>25</sup>Rü naxüpa rü nawena ga Yochía rü nataxuma ga wüxi ga ãëxgacü ga naxrüxü aixcüma Cori ya Tupanacax táegüxü i guxüne ya norü maxünemamaxä, rü guxü i norü ínümaxä, rü guxü i norü poramaxä ngēma Moiché ümatüxü i mugüwa nüxü yaxuxürüxü.

.....

**Nayu ga Yochía**

<sup>28</sup>Rü ngēma tama ñaa poperawa ngóxü i Yochíachiga rü guxüma ga norü puracü ga naxüxüchiga rü Yudáanecüãxüarü ãëxgacügüarü poperagu naxümatü.

.....

<sup>30</sup>Rü yexguma Meguídugu nayuxguwena ga Yochía, rü norü ngüxëerüügü rü wüxi ga cáruyu Yerucharéüwa nanangegü ga naxüne. Rü yema nüma naxüxü ga naxmaxügü nayaxüchigü. Rü nüma ga duüxügü ga Yerucharéücüãxü rü Yochía nane ga Yoacáxü naxuneta. Rü nanatüchicüxü ãëxgacüxü nayangucuchixëgü.

**Ãëxgacü nixí ga Yoacá ga Yudáanewa**

<sup>31</sup>Rü 33 ga taunecü nüxü nayexma ga Yoacá ga yexguma ãëxgacüxü

yangucuchigu. Rū tomaepūx ga tauemacū ãëxgacū nixī ga Yerucharéūwa. Rū tūmaéga ga naé rü Amutára nixī. Rū Amutáranatū rü Yeremía ga Díxnacūāx nixī. <sup>32</sup>Natürü nacūma ga Yoacá rü poraācü nachixexūchi ga Cori ya Tupanapexewa yema norū oxigücūmarūūtama. <sup>33</sup>Rü nüma ga Equítuanecūāxaru ãëxgacū ga Necáu rü Yoacáxū niyaxu, rü ñane ga Dibáragu nanapoxcu ga Amáanewa nax tama ãëxgacū yixixūcax ga Yerucharéūwa. Rū nüma ga Necáu rü Yudáanecūāx ga duūxūgūxū namu nax nüxū naxütanūāxūcax ga 3,300 quíru naguxū ga diërumū rü 33 quíru naguxū ga úuru. <sup>34</sup>Rü ñuxūchi nüma ga Necáu rü Yochía nane ga Eriaquíxū naxuneta nax ãëxgacū yixixūcax nanatüchicūxü. Rü nanaxüchicūxü ga naéga rü Yoachífügu nanaxüéga. Rü guma naenexē ga Yoacá rü Equítuanewa nanaga rü yexma nayayu. <sup>35</sup>Rü nüma ga Yoachífü rü Necáuana nanana ga yema diërumū rü úuru ga naxcax ínacaxaxū nax duūxūgü nüxna naxāxūcax. Rü wüxichigü ga Yudáanecūāx ga duūxūgü rü nanaxütanü ga yema úuru rü diërumū ga ãëxgacū nagu unetaxū nax naxütanügüaxūcax.

#### Ãëxgacū nixī ga Yoachífü ga Yudáanewa

<sup>36</sup>Rü 25 ga taunecü nüxū nayexma ga Yoachífü ga yexguma ãëxgacūxū yangucuchigu. Rū 11 ga taunecü ãëxgacū nixī ga Yerucharéūwa. Rū naé rü Chebúda tixī rü tūmanatü rü Pedaía ga Rúmacūāx nixī. <sup>37</sup>Natürü nacūma ga Yoachífü rü poraācü Cori ya Tupanapexewa nachixe norū oxigücūmarūūtama.

#### Babiróniaanearü ãëxgacū ga Nabucudonochó rü nanapu ga Yerucharéū

**24** <sup>1</sup>Rü yexguma Yoachífü Yudáanewa ãëxgacū yixixgu, rü nüma ga Babiróniaanearü ãëxgacū ga Nabucudonochó rü Yudáanegu nachocu nax yapuaxūcax ga norū ñane ga Yerucharéū. Rü nüma ga Yoachífü rü tomaepūx ga taunecü Nabucudonochómexēwa nayexma rü nüxū nanaxütanü ga yema taxū ga diëru ga naxcax ínacaxaxū. Natürü ga yixcamaxūra rü togu narüxñü rü yemacax Nabucudonochómaxā nanu rü tama nanaxütanü ga yema diëru. <sup>2</sup>Natürü nüma ga Cori ya Tupana rü Yoachífücax yéma nanamugü ga muxūma ga ngítaaxgūxū ga Cadécüāxgü, rü Chíríaanecüāxgü, rü Moátanüxūgü, rü Amóütanüxūgü nax nachixexēgüaxūcax ga norū ñane, yema Cori ya Tupana norū oreatü uruūgüaxwa nüxū yaxuxürüxū. ....

<sup>5</sup>Rü nangexma i tama ñaa poperawa ngóxū i Yoachífüchiga rü guxūma ga norū puracü ga naxüxūchiga. Rü ngēma rü Yudáanecūāxaru ãëxgacügüarü poperagu naxümatü. <sup>6</sup>Rü yexguma nayuxgu ga Yoachífü rü nane ga Yoaquífü nachicūxü ãëxgacūxū ningucuchi. ....

<sup>8</sup>Rü nüma ga Yoaquífü rü 18 ga taunecü nüxū nayexma ga yexguma ãëxgacūxū yangucuchigu. Rū tomaepūx ga tauemacū ãëxgacū nixī ga Yerucharéūwa. Rū naé rü Neúcha nixī ga tūmaéga. Rū tūmanatü rü Yerucharéücūāx nixī rü Enatáü nixī ga

naéga. <sup>9</sup>Natürü nacüma ga Yoaquíü rü poraäcü nachixexüchi ga Cori ya Tupanapexewa yema nanatücümarüütama. <sup>10</sup>Rü yema ngunexügüga rü Babiróniaanearü äëxgacü ga Nabucudonochó rü nanamu ga norü churaragü nax Yerucharéüçax íyaxüächixüçax nax nüxü ínachomaeguächixüçax rü yapugüaxüçax. <sup>11</sup>Rü yexguma marü nüxü ínachomaeguächigu nax yapugüaxüçax ga guma íane ga Yerucharéü rü yéma nangu ga nüma ga Nabucudonochó. <sup>12</sup>Rü yexguma nüma ga Yoaquíü ga Yudáanecüäxaru äëxgacü rü wüxigu tümamaxã ga naé, rü norü churaragüerugü, rü norü ngüxëëruügü, rü togü ga äëxgacügü, rü Babiróniaanearü äëxgacüna nügü nana. Rü nüma ga yema Babiróniaanearü äëxgacü rü ínanayauxü. Rü yexguma

yema ngupetüxgu rü 8 ga taunecü ninge nax äëxgacü yixüü ga Nabucudonochó. <sup>13</sup>Rü yemawena ga nüma ga Nabucudonochó rü nanade ga guxüma ga diëru ga Tupanapatawa yexmaxü, rü guxüma ga diëru ga äëxgacüpatawa yexmaxü yematama Tupana naxueguxürixü. Rü nagu napogü ga guxüma ga Tupanapataaru yemaxügü ga úirunaxçax ga Iraéanecüäxaru äëxgacü ga Charumóü üxü. <sup>14</sup>Rü ñuxüchi tüxü nigagü ga guxãma ga Yerucharéücüäxgü ga äëxgacügü rü churaragü ga yexeraäcü nüxü icuáxe, rü guxema taxacüaru üxü icuáxe, rü guxema fiérumaxã taxacü íxüxüümügüxe. Rü yemaacü 10,000 wa tangu ga guxema tüxü ínayauxüxë. Rü guxema yexeraäcü i ngearü diëruäxgüxexicatama yéma tayaxügü. ....

# I CRÓNICAS

## (Nüxíraxüxü i popera i wenaxarü ãëxgacügüchigaxü ümatüxü)

---

.....

Cháu rü nanegü rü daigu nayue

**10** <sup>1</sup>Rü nüma ga Piritéutanüxügü rü Iraéanecüãxgüçax ínayaxüãchi. Rü ma xpúne ga Yibóagu nügü nadai. Rü muxüma ga Iraéanecüãxgü yexma nayue rü yemaçax Piritéutanüxügüchaxwa nibuxmü. <sup>2</sup>Rü yexguma ga nüma ga Piritéutanüxügü rü Chaúwe rü nanegüwe nangëgü, rü nanadai ga Chaú nanegü ga Yonatáü rü Abinadá rü Maquichúa. <sup>3</sup>Rü yemawena rü Chaúçax nibuxmü rü yema würamaxã ixãxnexü rü Chaúmaxã namexchinügü rü poraãcü nanapixëëgü. <sup>4</sup>Rü yexguma ga nüma ga Chaú rü yema norü poxüruüxü ñanagürü: —iNayaxu i ngëma curü tara rü ngëmamaxã choxü nacaná! Erü tama chanaxwaxe i choxü ngüxü ningexëëgü i yea duüxügü i tama Tupanaaxü yaxögüxü —ñanagürü. Natürü nüma ga guma norü poxüruxü rü tama nanacanápacütüüchaü yerü namuü. Rü yexguma ga nüma ga Chaú rü nanayaxu ga norü tara rü nümatama

nagu nügü nanguxëxë. <sup>5</sup>Rü nüma ga guma norü poxüruxü rü nüxü nadau ga nax nayuxü ga Chaú rü yemaçax ga nüma rü ta nügütama norü taragu nügü nanguxëxë rü nayu. <sup>6</sup>Rü yemaacü nixí ga nayuxü ga Chaú rü nanegü rü guxüma ga natanüxügü. <sup>7</sup>Rü guxüma ga yema togü ga Iraéanecüãx ga guma ma xpúnearü tuächigu ipeaxü, rü yexguma nüxü nadaugüga ga nax yabuxmüxü ga Chaúarü churragü rü marü nax nayuxü ga Chaú rü nanegü, rü yexguma ga nüma ga yexma ächiügüxü rü ínachoxü nawa ga guma ñanegü rü nüma rü ta nibuxmü. Rü nüma ga Piritéutanüxügü rü yéma nangugü rü yexma naxächüügü nagu ga guma ñanegü. <sup>8</sup>Rü yexguma nügü nadaixgu wenaxarü moxüãcü rü nüma ga Piritéutanüxügü rü yema nügü ínadaixüwa naxí nax tüxü yadexenegüxüçax ga guxema yuexe. Rü yexma Chaúxü rü nanegüxü nayangaugü ga yexma yuexü nagu ga guma ma xpúne ga Yibóa. <sup>9</sup>Rü nüma ga Piritéutanüxügü rü Chaúxü ínacuxüxüne

rü nanade ga naxne. Rü nayadaerugü rü nayangegü ga naeru rü naxnegü. Rü ñuxüchi guxüma ga Piritéutanüxügüarü ñanegüwa norü tupanachicünaxãpatawa duñxügümaxã nüxü nixugüetanü ga nachiga ga marü nax nayuxü. <sup>10</sup>Rü ñuxüchi ga guma naxnegü, rü nüma ga Piritéutanüxügü rü norü tupanagüchicünaxãpataxügu nayanu. Rü yema naeru rü norü tupana ga Dagóüarü tupaucaarü ñtapüxgu nayacho. <sup>11-12</sup>Rü guxüma ga yema Iraéanecüãxgü ga ñane ga Yabécüãx ga Garaáxanewa yexmane, rü yexguma nüxü nacuãxgügu ga yema Piritéutanüxügü Chaúmaxã ügüxü, rü guxüma ga yema yatügü ga tama muüewaxexü rü wüxigu nügümaxã nagu narüxínüe nax yadeaxüçax ga yema Chaúxüne rü nanegüxüne. Rü Yabéwa nanana. Rü yexma nixí ga nataxgüaxü ga yema naxünegü natüügu ga wüxi ga castaña. Rü yemawena 7 ga ngunexü naxauree. <sup>13-14</sup>Rü yemaacü nixí ga nayuxü ga Chaú nagagu ga yema chixexü ga naxüxü. Yerü nüma ga Chaú rü tama Tupanaga naxínü rü ñuxüchi yuüxü ga ëxügüxü cuáxüna nayaca. Rü tama nüxna naca ga Tupana. Rü yemagagu nixí ga nüma ga Tupana ga nayuxëãxü rü Ichaí nane ga Dabíxü naxunetaxü nax nüma Iraéanecüãxgüarü ãxgacü yixíxüçax.

#### Dabíxü naxunetagü nax

#### Iraéanecüãxgüarü ãxgacü yixíxüçax

**11** <sup>1</sup>Rü guxüma ga Iraéanecüãxgüarü ãxgacügü rü nangutaquexegü rü ñane ga Ebróüwa naxí rü Dabímaxã narüdexagü. Rü

Dabíxü ñanagürügü: —Toma rü cutanüxütama tixígü. <sup>2</sup>Natürü woo yexguma tóru ãxgacü yixíxgu ga Chaú, natürü cuma nixí ga tóru churaragümaxã icucuáxü ga yexguma tóru uanügümaxã nügü nadaixgu. Rü ñuxmachi nüma ya Cori ya curü Tupana rü cumaxã inaxuneta nax cuma yixíxü i tomaxã icucuáxü nax torü ãxgacü quixíxüçax —ñanagürügü. <sup>3</sup>Rü yexguma ga nüma ga Dabí rü Cori ya Tupanapexewa natanüxüga naxínü. Rü nümagü rü Dabíxü chíxümaxã nabaerugü nax Iraéanecüãxgüarü ãxgacü yixíxüçax. Yerü yemaacü nixí ga Tupana ga Chamuémaxã nüxü yaxuxü.

#### Dabí rü nanapu ga yema norü uanügüarü dauxütaechica ga maxpüne ga Chióüwa yexmaxü

<sup>4</sup>Dabí rü guxüma ga yema Iraéanecüãxgüarü ãxgacügü rü Yerucharéüwa naxí. Rü guma ñane rü Yebúgu nixí ga naéga ga noxri yerü yema naanegu nixí ga naxächüügüxü ga Yebútanüxügü. <sup>5</sup>Natürü nüma ga yema Yebútanüxügü rü Dabína nanachüxgü rü ñanagürügü: —Cuma rü taxuacüma nuxã cuxücu —ñanagürügü. Natürü nüma ga Dabí rü nanapu ga yema dauxütaechica ga maxpüne ga Chióüwa yexmaxü. Rü yexguma marü napuãguwena rü nügügu nanaxüéga. Rü ñuxma rü Dabíarü ñane nixí i naéga. <sup>6</sup>Rü naxüpa ga nax napuãxü ga yema nachica rü nüma ga Dabí rü ñanagürü: —Rü yíxema tüxíra naxçax íyagoõchixe i ngëma Yebútanüxügü rü yíxema tá tixí ya chorü churaragüarü ãxgacüxü tüxü

chaxunetaxe —ñanagürü. Rû Yoá ga Charabía nane nixí ga nüxíra Yebútanüxügüçax íyagoöchicü rü gumaxü naxuneta ga Dabí nax norü churaragüarü äëxgacü yixíxüçax. <sup>7</sup>Rü yemawena ga nüma ga Dabí rü yema dauxütaechicagu naxächíü, rü yemaçax nixí ga Dabíarü İanemaxâ naxügüäxü.

<sup>8</sup>Rü nüma ga Dabí rü nayaxüama ga guma İane nacüwawa ga yema dauxütaechica. Rü yoxni ga Yoá rü nayamexëxë ga guma naigü ga Yerucharéüarü İgü ga nagu İnapogüexüwa. <sup>9</sup>Rü yemaacü ga Dabí rü guxüwama nanguchiga nax naporaxüchixü. Rü nüma ya Cori ya Tupana ya guxâétüwa ngëxmacü rü naxütawa nayexma.

.....

**Dabí rü nagu narüxínü nax Yerucharéüwa nangeaxü ga yema baú ga Tupanaarü mugü nawa yexmaxü**

**13** <sup>1</sup>Rü nüma ga Dabí rü nangutaquexë namaxâ ga yema norü churaragüerügü rü capitáüügü nax norü ucuxëgüçax İnacaxaxüçax. <sup>2-3</sup>Rü yemawena rü guxüma ga yema İraéanecüäxgü ga yexma ngutaquexëgüxüxü ñanagürü: —Ngëxgumachi perü me yixíxgu i pemax rü nüma ya Cori ya Tupana rü tüxü natauxchaxëëägu, rü name nixí i naxçax tangema i guxüma i tatanüxügü i İraéanewa ngëxmagüxü rü chacherdótegü rü Lebítanüxügü i norü İanewa rü norü naanewa ngëxmagüxü. İRü ngíxâ nüxna taxu nax nümagü rü ta tüxü nangüxëëgüxüçax, nax nua nangegüxü i ngëma baú i Tupanaarü

mugü nagu ixüçuchixü! Yerü yexguma Chau äëxgacü ixíxgucürüwa rü nüxü İtarüngümae ga yema baú —ñanagürü. <sup>4</sup>Rü guxüma ga yema duüxügü rü norü me nixí nax yemaacü naxügüäxü. Yerü yema ore ga Dabí nüxü ixuxü rü naxçax rü name.

.....

**Dabí rü Lebítanüxügüxü namu nax Yerucharéüwa nangegüaxüçax ga yema baú ga Tupanaarü mugüchixü**

**15** <sup>1</sup>Rü nüma ga Dabí rü duüxügüxü namu nax yema nüma İnaxâpataxügu náı ya napatagü yexma nüxü naxügüxüçax. Rü yexgumarüxü ta nanamu nax naxügüaxüçax ga wüxi ga yexwacaxüne ga İpata ga naxchirunaxçax nax yéma nayexmaxüçax ga yema baú ga Tupanaarü mugüchixü. <sup>2</sup>Rü yexguma ga nüma ga Dabí rü İnaa ore İnaxü rü ñanagürü: “Rü ngëxguma ngexwacaxüne ya napatawa penangexgu i ngëma baú i Tupanaarü mugü nagu ixüçuchixü rü Lebítanüxüxicatátama nixí i ngëma yangëgüxü. Erü nümagü nixí i woetama Tupana nüxü unetaxü nax guxügutáma ngëma puracü naxügüxüçax”, ñanagürü. <sup>3</sup>Rü İñuxüchi nüma ga Dabí rü Yerucharéügu nanangutaquexëxë ga guxüma ga İraéanecüäxgü nax yemaacü yexwacaxüne ga napatawa nangegüaxüçax ga yema baú ga Tupanaarü mugü nagu İxü.

.....

**16** <sup>1</sup>Rü yema baú ga Tupanaarü mugü nagu İxü rü nawa nanangëgü ga guma İpata ga

naxchirunaxçax ga Dabí woetama yemaçax üxüne. Rü ñuxüchi nüma ga Dabí rü chacherdótegüxü namu nax yéma Tupanapexewa ínaguaxüçax ga âmaregü ga naxünagü rü pumáragü ga duüxügü yéma naxü nax Tupanaxü namaxã nangüxmüxëëgüxüçax. <sup>2</sup>Rü yexguma marü nüxü nachauegu nax Tupanaçax âmare ínaguxü, rü nüma ga Dabí rü Tupanaégagu mexü norü duüxügümaxã naxuegu. <sup>3</sup>Rü ñuxüchi ga Dabí rü guxüma ga Iraéanecüãxgü ga yatüxü rü ngexü rü tüxü nayanu ga wüxi ga paü rü naétü ga taxre ga to ga paü ga maixcuraxü.

.....

#### Wiyaeäcü Tupanana moxë naxã ga Dabí

<sup>7</sup>Rü yema ngunexügu nixí ga Dabí noxri Acháxü rü namücügüxü namuxü nax wiyaeäcü Tupanana moxë naxãgüxü namaxã ga ñaa wiyae: <sup>8</sup>“iMoxë nüxna pexãgü ya Cori ya Tupana! iRü guxüwama nüxü pixuchiga! iRü guxüma i nachixüanecüãxgümaxã nüxü pixu i ngëma mexügü i pexçax naxüxü! <sup>9</sup>iRü perü wiyaeümaxã nüxü picuaxüxügü! iRü pegümaxã nüxü pixu i ngëma taxü i mexügü i naxüxü! <sup>10</sup>iRü pegü namaxã picuaxüxügü ya yimá üüncü! Rü pema nax naxçax pedaugüxü irü petaãxëgü! <sup>11</sup>iRü naxçax pexí ya Cori ya Tupana rü norü poraçax pedaugü! iRü guxüguma norü ngüxëçax ípeca! <sup>12-13</sup>iRü nüxna pecuaxãchie ga yema mexügü ga taxügü ga norü poramaxã naxüxü rü ngëma norü mugü ga pemaxã nüxü yaxuxü, Pa Iraéanecüãxgü ya Acóbutaagü i Tupana Pexü Unetagüxex! <sup>14</sup>Rü nüma nixí i Cori

ya tóru Tupana yixíxü. Rü nüma nixí i ñoma i naanemaxã inacuáxü. <sup>15-17</sup>Rü woo 1,000 tücumü i duüxügü i ñoma i naanewa ngóexü ngupetügu rü nüma ya Tupana rü tagutáma nüxü inayarüngüma i norü uneta ga Abráümaxã nüxü yaxuxü rü Ichaámaxã inaxügaxü rü wenaxarü Acóbumaxã nüxü yaxuxü nax guxügutáma nüxü nangüxëëxü i nataagü i Iraétanüxügü.

<sup>18</sup>Rü yemaçax Acóbumaxã nüxü nixu rü ñanagürü nüxü: ‘Choma rü tá cuxna chanaxã i guxüma i ñaa Canaáüiane nax guxügutáma cuxrü rü cutaagüarü yixíxüçax’, ñanagürü. <sup>19-22</sup>Rü nümagü ga tóru oxigü rü woo noxretama nixígü ga noxri rü toxnamanacüãx nixígü, rü woo ñuxre ga nachixüanegüwa nichopetüetanü rü ñuxre ga äëxgacügümaxëwa íninguxüetanü nax ñaa naanewa nangugüxüçax, natürü nüma ga Tupana rü tama nanaxwaxe nax texë chixri namaxã icuáxü. Rü yemaçax yema äëxgacügü ga naxmexwa nayexmagüxümaxã nüxü nixu rü ñanagürü nüxü: ‘Rü tama chanaxwaxe i ngëma choma nüxü chaxunetaxü i duüxügü rü chixri namaxã ipecuax rü ngëma chorü orearü uruügü rü ngüxü nüxü pingexëëgü’, ñanagürü. <sup>23</sup>Pa Guxüma i Ñoma i Naanecüãx i Duüxügüx irü naxçax pewiyaeü ga Cori ya Tupana! iRü guxü i ngunexügügu penaxunagü nax nüma yixíxü i tüxü namaxëxëëxü! <sup>24</sup>iRü guxüma i duüxügü i guxü i nachixüanegüwa ngëxmagüxümaxã nüxü pixuchiga nax nüma rü naxüünexü rü naxüãxü i muxüma i mexügü i norü poramaxã naxüxü! <sup>25</sup>Erü nüma ya Cori ya Tupana



rü guxãétüwa nangexma, rü ngẽmacax name nax nüxũicatama icuaxũügũxũ. Erü nüma rü naxãücümáxũchi rü guxũma i ngẽma tupananetaguétüwa nangexma. <sup>26</sup>Rü ngẽma togü i nachixũanegüarü tupanagü rü naxchicünaxãmare nixĩgü. Natürü nüma ya Cori ya Tupana nixĩ ga naxũxü i guxũma i ngẽma dauxũwa nüxũ idauxũ. <sup>27</sup>Rü nüma ínangexmaxũwa rü poraãcü nangõone. Rü napatawa nangexma i pora rü taãxẽ. <sup>28</sup>Pa Guxũma i Nachixũanecũãxgũx irü nüxũ pixuchigagü rü nüma ya Tupana rü nüxicatama nixĩ nax aixcüma naporaxũ rü naxüünexũ! <sup>29</sup>iRü nüxũ pengechaxũgüãcüma nüxũ picuaxũxũgü, erü nüma rü guxãétüwa nangexma! iRü naxũtawá penana i perü ãmaregü rü napata ya mexechinewa nüxũ picuaxũxũgü! <sup>30</sup>Rü name nixĩ i guxũma i duũxũgü i ñoma i naanewa maxẽxũ rü napexewa namuũe. Erü nüma rü wüxítama ga namaxũgu nayaxũxẽxẽ ga ñoma ga naane nax tama ngẽma namaxũna yaxũgachixũcax. <sup>31</sup>Rü name nixĩ i nataãxẽ i guxũma i ngẽma daxũguxũ i naanewa ngẽxmagũxũ rü ngẽma ñoma i naanewa ngẽxmagũxũ. iRü guxũ i nachixũanegüwa nüxũ pixu rü ñapegũgü: ‘Nüma ya Cori ya Tupana nixĩ i ãẽxgacü ya guxãétüwa ngẽxmacü yixĩxũ’, ñapegũgü! <sup>32</sup>Rü name nixĩ i norü taãxẽmaxã naxãüga i ngẽma már, rü naxãügatanü i guxũma i ngẽma nawa ngẽxmagũxũ. iRü nataãxẽ i ngẽma naanegü rü guxũma i nanetügü i nagu togũxü! <sup>33</sup>Rü ngẽma naigü i naixnecüwa ngẽxmagũxũ rü name nixĩ i taãxẽãcü nicuxcu napexewa ya Cori ya Tupana ya

nüma üxcü nax ñoma i naanemaxã inacuáxũcax. <sup>34</sup>iRü moxẽ nüxna pexã ya Cori ya Tupana! Erü nüma rü namecümáxũchi rü ngẽma norü ngechaũ rü taguma nagux. <sup>35</sup>iRü ñapegü nüxũ: ‘Toxũ ínanguxũxẽxẽ, Pa Tupanax, Pa Torü Maxẽxẽeruxũ! iRü toxũ nade nax naxmexwa toxũ ícunguxũxẽxũcax i ngẽma togü i nachixũanegü nax ngẽmaãcü tanataxẽxũcax i cuéga i üünexũ rü taãxẽãcüma cuxũ ticuaxũüügũxũcax’, ñapegü nüxũ! <sup>36</sup>Rü guxũguma namecümáxũchi ya yimá tórü Cori ya Tupana i yixema i Iraétanüxũgü”, nawiyaegü ga Achá rü namücügü. Rü guxũma ga duũxũgü rü nachonagütanü rü ñanagürügü: —Aixcüma ngẽmaãcü nixĩ —ñanagürügü. Rü yemaacü Cori ya Tupanaxũ nicuaxũxũgü.

#### Tupana rü Dabímaxã inaxuneta

**17** <sup>1</sup>Rü yexguma marü napatawa nayexmagu ga Dabí rü Tupanaarü orearü uruxũ ga Natáũmaxã nidexa rü ñanagürü nüxũ: —Dücax, choma rü wüxi ya ípata ya ocayiwanaxcax íxixũnewa changexma. Natürü ngẽma baü i Tupanaarü mugü nawa ngẽxmaxũ rü wüxi ya ípata ya naxchirumarenaxcax íxixũnewa nangexma —ñanagürü. <sup>2</sup>Rü nüma ga Natáũ rü nanangãxũ rü ñanagürü: —iËcü naxü i ngẽma nagu curüxinüxũ! Erü ngẽma nixĩ i Tupanaarü ngüchaũ —ñanagürü. <sup>3</sup>Natürü yematama chütaxũgu rü nüma ga Tupana rü Natáũmaxã nidexa rü ñanagürü nüxũ: <sup>4</sup>—iËcü yimá chorü duũ ya Dabixũtawá naxũ rü namaxã nüxũ ixu rü choma ya

Cori ya Tupana rü marü ñacharügü nüxü: “Taxütáma cuma nixí i cunaxüxü ya yima ípata ya nawa tá changexmane! <sup>5</sup>Rü yexguma Equítuanewa Perú oxigüxü íchangüxüxëxgucürüwa rü ñomamarema rü taguma wüxi ga ípata ga taxünewa chayexma. Rü igüxüne ga ípatawamare chiyexmachigü. <sup>6</sup>Rü yexguma namaxá ichixüxgu ga yema chorü duüxügü rü nüxü chaxunetagügu ga norü äëxgacügü, rü taguma wüxi ga yema Iraétanüxüarü äëxgacüxü chamu nax chaüxçax naxügüaxüçax ga wüxi ga ípata ya ocayiwamaxá äxtapüne”, ñacharügü nüxü. <sup>7</sup>Rü ngëmacax i ñuxma rü inamaxá nüxü ixu ya yimá chorü duü ya Dabí rü chomax ya Cori ya Tupana ya guxáétüwa ngëxmacü nax chixíxü rü ñachagürü: “Choma rü cuxü íchamuxüchi ga carnérugüpüxüwa rü cuxü chayaxu nax marü tama carnérugüna cudauxüçax! Rü ñuxmax, rü chanaxwaxe nax cuma namaxá icucuáxü i ngëma chorü duüxügü i cutanüxügü i Iraéanecüäxgü. <sup>8</sup>Rü choma rü marü cuxü íchixümücü ga ngextá cuma ícuxüxüwa rü marü chanadai ga guxüma ga curü uanügü ga cuxü imaxgüchaüxü. Rü marü cuxü chatachigaxëxë naxrüxü i ngëma yatügü i ñoma i naanewa itaégatanücüxü. <sup>9-10</sup>Rü chorü duüxügü i Iraétanüxüçax rü chanamexëxë ga wüxi ga naane. Rü yemawa nixí ga chanangugüxëxü nax norü naanegutama naxächíügüxüçax i ngextá taxúema ínachixewëxüwa rü bai i ngëma norü uanügü ga noxri chixri namaxá inacuaxgüxü ga yexguma Iraétanüxügüarü äëxgacügü ga guxchaxüarü mexëerüügümëxëwa

chanayexmagüxëëgurüxü. Rü choma rü tá chanaxäneexëxë i guxüma i curü uanügü. Rü ñuxma rü cumaxá chanaxuegu rü ngëma cutaagü rü tá nüxí Iraétanüxüarü äëxgacü nixígü cuxrüxü i ñuxma äëxgacü nax quixíxü. <sup>11</sup>Rü ngëxguma marü cuyüxguwena, rü choma rü tá nüxü chaxuneta i wüxi i cune nax nüxí äëxgacü yixíxüçax. <sup>12</sup>Rü yimá äëxgacü tá nixí ya naxücü ya chopata. Rü choma rü tá nüxü charüngüxëë nax ngëma nataagü ga cune rü nüxí guxügütáma Iraétanüxüarü äëxgacü yixígüxüçax. <sup>13</sup>Rü choma rü tá nanatü chixí rü nüma rü tá chaune nixí. Rü tagutáma nüxü charüxo nax nüxü changechaüxü, rü taxütáma nüxü chaxo yema äëxgacü ga Chaüxü nax chaxoxürüxü. <sup>14</sup>Rü yimá äëxgacü ya choma nüxü chaxunetacü rü chorü duüxügümaxá tá inacuax rü tá Iraéanecüäxgümaxá inacuax i guxügütáma. Rü tagutáma ínanguxuchi nax äëxgacü yixíxü” —ñanagürü ga Tupana.

.....

#### Dabí rü duüxügüxü nixugü

**21** <sup>1</sup>Rü nüma ga Chataná rü Iraéanecüäxgümaxá nanu, rü yemacax Dabíäxëwa ínanangüxëxë nax Iraéanecüäxgüxü yaxugüxüçax. <sup>2</sup>Rü nüma ga Dabí rü nanamu ga Yoá rü norü churaragüarü äëxgacügü rü ñanagürü nüxü: —íËcü ipexíächí rü peyaxugü i ngëma Iraéanecüäxgü! Rü ñane ya Bechébawa ipenaxügü nax peyaxugüxü rü ñuxmatáta Dáüarü ñanewa nangu! iRü ngëmawena rü ñuxüchi nua penange i napane nax nüxü chacuáxüçax nax ñuxre

yixixũ i norũ mu i ngẽma duũxũgũ!  
 —ñanagũrũ. <sup>3</sup>Natũrũ nũma ga Yoá rũ  
 nanangãxũ rũ ñanagũrũ: —Ngẽxgumachi  
 Cori ya Tupana naxwãxegu ¿rũ taux  
 ẽxna nüxũ natauxcha nax 100  
 expũxcũna yamuxẽẽãxũ i norũ duũxũgũ?  
 ¿Rũ taux ẽxna guxũma i ngẽma duũxũgũ  
 rũ chi cuxmẽxwa nangexmagũxũ, Pa  
 ãẽxgacũx? ¿Rũ tũxcũũ i cumax i  
 cunaxwãxexũ nax tayaxugũxũ? ¿Rũ  
 ngẽmaãcũ ẽxna chixexũgu  
 cunaxĩxẽchaũxũ i Iraéanecũãxgũ?  
 —ñanagũrũ. <sup>4</sup>Natũrũ nũma ga ãẽxgacũ  
 rũ nanamuama, rũ dũxwa nũma ga Yoá  
 rũ nanaxũ ga yema ãẽxgacũ namaxã  
 nüxũ ixuxũ. Rũ inaxũãchi rũ guxũma ga  
 Iraéanegu nixũgũ. Rũ yemawena rũ  
 Yerucharẽũcãx natãegu. <sup>5</sup>Rũ nũma ga  
 Yoá rũ Dabĩmaxã nüxũ nixu nax ñuxre  
 yixixũ ga norũ mu ga yema yatũgũ ga  
 marũ churarawa imexũ. Rũ Iraéanewa rũ  
 1,100,000 wa nangu ga yema yatũgũ ga  
 marũ nagu imexũ nax churara yixĩgũxũ,  
 rũ Yudáanewa rũ 470,000 nixĩ. <sup>6</sup>Natũrũ  
 tama nayaxugũ ga yema Lebítanũxũ rũ  
 Bẽyamítanũxũ yerũ nũma ga Yoá rũ  
 tama norũ me nixĩ ga yema ãẽxgacũ  
 nüxũ üxẽẽxũ. <sup>7</sup>Rũ nũma ga Tupana rũ  
 tama norũ me nixĩ ga yema nax  
 yaxugũxũ ga duũxũgũ, rũ yemacãx yema  
 Iraéanecũãxgũxũ napoxcu. <sup>8</sup>Natũrũ  
 nũma ga Dabĩ rũ Tupanamaxã nüxũ nixu  
 ga yema norũ chixexũ rũ ñanagũrũ: —Rũ  
 aixcũma cupewa poraãcũ chixexũ chaxũ.  
 Natũrũ cuxna chaca nax choxũ nüxũ  
 curũngũmaxũcãx erũ wũxi i duũxũ i  
 naechitamare maxũxũãcũ íchanaxũ  
 —ñanagũrũ. <sup>9</sup>Rũ yexguma ga Cori ya  
 Tupana rũ Dabĩarũ ucũxẽruxũ ga Gáxũ  
 namu yerũ guma nixĩ ga Dabĩmaxã

Tupanaarũ orexũ ixucũ. Rũ nũma ga  
 Tupana rũ Gáxũ ñanagũrũ: <sup>10</sup>—Iẽcũ  
 Dabĩxũtawã naxũ rũ namaxã nüxũ  
 yarũxu i ñaa tomaepũx i poxcu nax nüxũ  
 yaxuxũcãx rũ ngexũrũxũ i ngẽma poxcu  
 nixĩ i nanaxwãxexũ nax namaxã  
 chanapoxcuxũ i Iraéanecũãxgũ!  
 —ñanagũrũ. <sup>11</sup>Rũ nũma ga Gáx rũ  
 Dabĩxũtawã naxũ rũ ñanagũrũ nüxũ:  
 —Cori ya Tupana rũ cumaxã nüxũ nixu i  
 tomaepũx i poxcu nax cuma nüxũ  
 quixuxũ rũ ngexũrũxũ yixixũ i ngẽma  
 cuma cunaxwãxexũ. <sup>12</sup>Rũ wũxi nixĩ nax  
 tomaepũx ya taunecũ taiya ngẽxmaxũ i  
 Iraéanewa. Rũ to nixĩ nax tomaepũx ya  
 tauemacũgu perũ uanũgũ pexũ dãixũ. Rũ  
 to nixĩ nax tomaepũx i ngunexũ Cori ya  
 Tupana ínanguxẽẽxũ i dãxaweanẽ rũ  
 ngẽma norũ duũxũ i daxũcũãx rũ  
 poraãcũ nachixexẽẽxũ i guxũma i  
 Iraéanewa. Rũ ñuxma rũ chanaxwãxẽ  
 nax chomaxã nüxũ quixuxũ rũ  
 ngexũrũxũ yixixũ i ngẽma cuma  
 cunaxwãxexũ nax namaxã nüxũ  
 chixuxũcãx ya yimã cuxũtawã choxũ  
 mucũ —ñanagũrũ. <sup>13</sup>Rũ nũma ga Dabĩ rũ  
 Gáxũ nangãxũ rũ ñanagũrũ: —Ñuxma rũ  
 taxũma i guxchaxũ chauëtũ nangu. Rũ  
 chaũxcãx narũimemãe nax  
 Tupanamẽxẽgu changuxũ erũ nũma rũ  
 poraãcũ nüxũ tangechaũtũmũxũ. Erũ  
 tama chanaxwãxẽ nax tórũ  
 uanũgũmẽxẽgu iyixũ —ñanagũrũ. <sup>14</sup>Rũ  
 yexguma ga nũma ga Cori ya Tupana rũ  
 Iraéanecũãxgũcãx yẽma nanamu ga  
 dãxaweanẽ rũ 70,000 ga Iraéanecũãxgũ  
 nayue. <sup>15</sup>Rũ nũma ga Tupana rũ yema  
 dãxaweanemãxã yẽma nanamu ga wũxi  
 ga daxũcũãx ga norũ orearũ ngeruxũ nax  
 yemãmaxã Yerucharẽũcũãxũ nadãixũcãx.

Natürü yexguma marü Yerucharéüwa nanguxchaügu nax duüxügüxü nadaixü ga yema daxücüâx, rü nüma ga Cori ya Tupana rü nüxü nangechaütümüxü ga duüxügü rü yemaçax nüxna nachogü ga yema daxücüâx rü ñanagürü nüxü: —iRü marütama nax cunadaixü! —ñanagürü nüxü. Rü nüma ga yema daxücüâx rü marü guma Yebütanüxü ga Orná trígu ípüxüwa nayexma ga yexguma Tupana nüxna chogügu. <sup>16</sup>Rü nüma ga Dabí rü daxügu nadawenü, rü nüxü nadau ga yema daxücüâx ga Cori ya Tupanaarü orearü ngeruxü. Rü daxügüxü ga naane rü ñoma i naanearü ngäxümachatexewa nayexma namaxä ga norü tara ga naxchixüwa natúxuchixü. Rü Yerucharéüguama namaxä nabuenüchacüxü. Rü yemaçax nüma ga Dabí rü guxüma ga yema Iraéanecüâxgüarü äëxgacügü rü témüxü ga naxchirugu icüxügüxü rü ñaxtüanegu nanangücuchitanü rü yemaacü Tupanaxü nacaçaxügu. <sup>17</sup>Rü nüma ga Dabí rü Tupanaxü nacaçaxü rü ñanagürü: —Choma nixí ga chanamuxü ga nax yaxugüxü ga duüxügü. Rü choma nixí i chixexü chaxüxü rü chanaxüxü i pecádu. ¿Rü taxacürü chixexü naxüe i ñaa duüxügü rü ngëmacax cunadaixü? Pa Corix, Pa Chorü Tupanax, cuxna chaca nax choxü rü chauxacügüxüwaxi nax cupoxcuxü, rü marütama nax cunadaixü i duüxügü —ñanagürü.

**Dabí nanaxü ga wüxi  
ga ñamarearü guchicaxü**

<sup>18</sup>Rü yexguma ga nüma ga yema daxücüâx ga Tupanaarü orearü ngeruxü rü Gáxü namu nax Dabímaxä nüxü

yanaxuxüçax nax Tupanaçax wüxi ga ñamarearü guchicaxü naxüxü nagu ga yema nachica ga Orná ga Yebütanüxü nawa trígu püxü. <sup>19</sup>Rü yexguma ga nüma ga Dabí rü nanaxü ga yema Cori ya Tupanaégagu Gáx namaxä nüxü ixuxü. <sup>20</sup>Rü nüma ga Orná rü norü trígu ínapux. Rü yexguma nügiweama nadaçuxgu rü nüxü nadau ga yema daxücüâx ga Tupanaarü orearü ngeruxü. Natürü guma ägümücü ga nane ga namaxä yéma nayexmacü rü nibuxmü rü nicüxgü ga yexguma nüxü nadaugügu. <sup>21</sup>Rü yexguma Dabí Ornáütawa nguxgu, rü nüma ga Orná rü Dabíxü nadawenü. Rü yexguma Dabíxü yacuaxächigu, rü nüma ga Orná rü ínaxüxü ga trígu ínapüxüwa rü Dabípexegu nanangücuchiächi. <sup>22</sup>Rü yexguma ga nüma ga Dabí rü ñanagürü nüxü: —iChoxna naxä i ñaa nachica i trígu nawa cupüxü nax ngëxma Cori ya Tupanaçax chanaxüxüçax i wüxi i ñamarearü guchicaxü! iRü ngëma cunaxwaxexüxpüx choxü namaxä nataxe, rü tá cuxü chanaxütanü nax ngëmaacü yaxügachixüçax i ngëma daxaweane i duüxügü namaxä yuexü! —ñanagürü. <sup>23</sup>Rü nüma ga Orná rü Dabíxü nangäxü rü ñanagürü: —Pa Äëxgacüx iécü nayaxu i ñaa naane rü nagu naxü i taxacü i cuma cunaxwaxexü! Rü choma tá cuxna chanamugü i ñaa tuirugü nax ngëma Tupanaçax ícuguxüçax. Rü yimatama naixmenaxägü ya trígu namaxä chapoxünemaatama naxüxüxü. Rü ñaatama trígu rü wüxigu ngëma wocagümaxä rü cuxna chanaxãmare nax Tupanana cuxãmarexüçax, Pa

Āēxgacūx —ñanagürü. <sup>24</sup>Natürü nüma ga āēxgacū ga Dabí rü nanangāxū rü ñanagürü: —Moxē cuxna chaxā natürü chanaxwaxe nax naxçax cuxū chataxexū rü chomaxā cuxātanūxū i guxūma i ngēma. Rū tama chanaxwaxe i ngetanūācūma cuxna chanayaxuxū i ngēma cuxrū ixīxū, erū tama chanaxwaxe i taxacū i choxū ngetanūxū Cori ya Tupanaçax íchagu —ñanagürü. <sup>25</sup>Rü nüma ga Dabí rü Ornāaxū nanaxütanūama. Rū 600 tachinū ga diēru ga úru ngīxçax nüxna ngīxū naxā. <sup>26</sup>Rü yexma Tupanaaxū nanaxū ga āmarearū guchicaxū rü yéma ínanagu ga āmaregū ga norū chixexūarū ütānüruxū nax Tupanaxū nangüxmüxēēxūçax. Rū ñuxūchi Cori ya Tupanamaxā nidexa rü nüxū nacaçaxū. Rū nüma ga Cori ya Tupana rü nanangāxū rü daxūguxū ga naanewa üxüema narünguxēxē, rü yema āmarearū guchicaxūétūgu nangu. <sup>27</sup>Rü nüma ga Cori ya Tupana rü yema daxūcüāxū namu nax naxchixūgu yaxücuchiāxūçax ga norū tara.

**Dabí rü nüxū naxuneta ga  
Tupanapatachica**

<sup>28</sup>Rü yexguma nüxū nadauxgu ga Dabí nax Cori ya Tupana nüxū ngāxūxū nawa ga yema nachica ga Orná ga Yebütānūxū trīgu nawa púxū, rü wena yéma Tupanaçax ínanagu ga āmaregū. <sup>29</sup>Rü yexgumaüçüxū ga guma Tupanapata rü yema āmarearū guchicaxū ga chianexūgu Moiché üxūne, rü marū Gabaóūarū maçpúnewa nanāngēgū rü yemaçax yéma nayexma. <sup>30</sup>Natürü nüma ga Dabí rü taxücürüwa

Gabaóūwa naxū nax yéma Tupanaçax āmare yanaguxūçax rü Tupanana yacaçaxūçax, yerū namuñ ga yexguma nüxū nadauxgu ga yema Tupanaarū orearū ngeruxū ga norū taramaxā yexma chixū.

**22** <sup>1</sup>Rü yexguma ga Dabí rü ñanagürü: —Ñaa nachica i Orná trīgu nawa púxūwa tá nangexma ya Tupanapata rü ngēma āmarearū guchicaxū nax ngēmawa Iraéanecüāxgū Tupanaçax ínaguxūçax i norū āmaregū.

**Dabí nananutaquexe ga yemaxūgū nax  
naxüguāxūçax ga Tupanapata**

<sup>2</sup>Rü yemawena rü nüma ga Dabí rü nanangutaquexexēxē ga yema duūxūgū ga to ga nachixūānecüāxgū ga Iraétānūgu āchiūgūxū. Rū guxemagūxū namu nax nutaarū mexēēcüwawa tapuracüexū nax gumamaxā naxüguāxūçax ga Tupanapata. <sup>3</sup>Rü yexgumarūxū ta nananutaquexe ga muxūma ga fiéru nax yemawa naxüāxūçax ga itapúagū ga íāxarū potaruūgū rü íāxarū chotarūgū. Rū yexgumarūxū ta nananutaquexe ga muxūma ga bróūche naxçax ga guma Tupanapata. <sup>4</sup>Rü yexgumarūxū ta nananutaquexe ga muxūma ga mürapewa ga oçayiwagū, yerū ga íānegū ga Chidáucüāxgū rü Tírucüāxgū rü muxūma ga mürapewa ga oçayiwagū yéma nana. <sup>5</sup>Rü nüma ga Dabí rü ñaxūgu narūxīnū: “Yimá chaune ya Charumóū rü nabumare, rü taxūta naāxēxū nacuax nax naxüāxū ya yima Tupanapata, erū yima napata tá ixīxūne rü tanaxwaxe nax nataxū rü namexechixū, rü guxū i nachixūānewa

nanguchigaxũ. Rũ ngẽmacax i ñuxma rũ marũ ichanaxũgũ nax chananutaquexexũ i guxũma i ngẽmaxũgũ i namaxã naxũxũ”, ñaxũgu narũxĩnũ. Rũ yemaacũ ga Dabí rũ nananutaquexe ga guxũma ga yemaxũgũ naxũpa ga nax nayuxũ. <sup>6</sup>Rũ yemawena rũ nũma ga Dabí rũ nane ga Charumóũcax naca rũ namaxã nüxũ nixu nax nũma naxũãxũcax ga guma ĩpata ga Cori ya Iraéanecũãxgũarũ Tupanaarũ ixĩũne. <sup>7</sup>Rũ yexguma ga Dabí rũ Charumóũxũ ñanagũrũ: —Pa Chaunex, rũ choxũ nangũchaũ nax chanaxũxũ ya wũxi ya ĩpata naxcax ya Cori ya chorũ Tupana. <sup>8</sup>Natũrũ nũma ya Tupana rũ chomaxã nüxũ nixu rũ ñanagũrũ: “Cuma rũ tacũ ya nagũ cunabaxẽxẽ rũ muxũ ga daiwa cuxũpetũ. Rũ ngẽmacax taxũtãma cuma nixĩ i chaũxcax cunaxũxũ ya yima ĩpata, erũ chopexegu cunabaxẽxẽ ya tacũ ya nagũ i ñoma i naanewa. <sup>9</sup>Natũrũ wũxi ya cune tá cuxũ nangexma, rũ nũma rũ wũxi ya yatũ ya ngũxmũxẽeruxũ tá nixĩ namaxã i norũ uanũgũ i nüxna ngaicamagũxũ. Rũ tá íchayachaxãchixẽxẽ i ngẽma norũ uanũgũ nax tama nachixewegũaxũcax. Rũ ngẽmacax i naéga rũ Charumóũ tá nixĩ. (Rũ ngẽma naéga rũ ‘ngũxmũxẽeruxũ’, ñaxũchiga nixĩ.) <sup>10</sup>Rũ nũma tá nixĩ i naxũãxũ ya chopata. Rũ ñoma chaunexũchirũxũ tá nixĩ rũ choma rũ tá ñoma nanatũrũxũ chixĩ. Rũ tá nüxũ charũngũxẽxẽ nax nũma rũ nane rũ nataagũ guxũgutãma ãxgacũ yixĩxũ i Iraéanewa”, ñanagũrũ ga Tupana. <sup>11</sup>Rũ ñuxmax, Pa Chaunex, rũ cuxũtawã nangexma ya Tupana, rũ marũ cuax

cuxna naxã nax cunaxũxũcax ya yima napata, yexgumarũxũ ga cumaxã nax naxueguãxũ nax cuma tá yixĩxũ nax cunaxũxũ. <sup>12</sup>Rũ nũma ya Cori ya Tupana rũ marũ cuxna nanaxã i ĩnũ i mexũ rũ curũ cuax. Rũ ngẽxguma nũma cuxũ yangucuchixẽẽgu nax Iraéanecũãxgũarũ ãxgacũ quixĩxũ irũ yanguxẽxẽ i ngẽma norũ mugũ ya Cori ya curũ Tupana! <sup>13</sup>Rũ guxũtãma mea cuxũ ĩnixũ i ngẽxguma tá cuyanguxẽxẽxgu i ngẽma norũ mugũ rũ norũ ucuxẽgũ ga Cori ya Tupana Moichẽmaxã nüxũ ixuxũ naxcax ga Iraéanecũãxgũ. iËcũ napora rũ cugũ naporaxẽẽama! iRũ taxũ i curũmaachixũ! iRũ taxũ i cumuũxũ! <sup>14</sup>Rũ dücax, choma rũ pora chaxũ nax chananutaquexexũ i ngẽmaxũgũ nax naxũãxũcax ya Cori ya Tupanapata. Rũ nangexma i 3,300 tonelãda naguxũ i úiru, rũ 33,000 tonelãda naguxũ i diẽrumũ, rũ taxũma i bróũche rũ fiẽru i taxucĩrũwama ingugũxũ i norũ yawa. Rũ ngẽxgumarũxũ ta marũ chananutaquexe i mũrapewagũ rũ nutagũ. Rũ name nixĩ i cumax rũ to ta icuxũ i norũ nguxẽẽeruxũ. <sup>15</sup>Rũ ngẽxgumarũxũ ta i cumax rũ cuxũ nangexma i muxũma i puracũtanũxũ i nutaarũ mexẽẽcũwaruũgũ, rũ cuxũ nangexma i ĩxtapũxarũ chaunxagũruũgũ, rũ corapĩnagũ, rũ yatũgũ i naguxũraxũxũ i puracũxũ cuãxũ. <sup>16</sup>Rũ ngẽma úirumũ, rũ ngẽma diẽrumũ, rũ ngẽma bróũche, rũ ngẽma fiẽru rũ marũ namuxũchiamã, rũ taxucĩrũwama tanangugũ. Rũ ngẽmacax name nax icunaxũgũxũ i ngẽma puracũ. iRũ nũma ya Cori ya

Tupana cuxũ rüngũxêxê! —ñanagürü ga Dabí.

.....

**Charumóũ rü nanatü ga Dabíchicüxü  
ãëxgacüxü ningucuchi**

**28** <sup>1</sup>Rü nüma ga Dabí rü Yerucharéügu nanangutaquexêxê ga guxũma ga Iraéanecüãxgüarü ãëxgacügü. Rü yematanüwa nayexma ga norü ãëxgacügü ga yema 12 ga Iraétücumügümaxã icuaxgüxũ, rü ãëxgacügü ga Dabíarü churaragümaxã icuaxgüxũ, rü yema churaragüarü comaüdáütegü rü capitáüügü, rü yema ãëxgacügü ga Dabíarü rü nanegüarü naanegümaxã rü naxünagümaxã icuaxgüxũ, rü guxũma ga yema togü ga ãëxgacügü ga itaxégatanücüxũ ga Iraéanewa, rü guxũma ga yema churaragü ga tama muüwaxegüxũ. <sup>2</sup>Rü yexguma marü yexma nangutaquexegu, rü nüma ga Dabí rü inachi rü ñanagürü: —Pa Chomücügü rü Pa Chorü Duüxügüx irü choxü iperüxñüe! Rü choma rü choxü nangüchaü nax chanaxüxü ya Tupanapata nax ngëxma naxüxüçax i ngëma baü i Tupanaarü mugü nagu nucuxü nax ngëma nangexmaxüçax ya Tupana. Rü yemacax ga choma rü chananutaquexe ga yemaxügü nax naxüxüçax ya Tupanapata. <sup>3</sup>Natürü nüma ya Tupana rü ñanagürü choxü: “Rü taxütáma cuma nixi i cunaxüxü ya yima chopata. Erü cuma rü daigu cumáeta rü poraäcuma nagü icunabaxêxê”, ñanagürü choxü. <sup>4</sup>Natürü nüma ya Cori ya tórü Tupana rü chautanüxügüitanüwa choxü nayaxu

nax guxügüma perü ãëxgacüxü choxü yaxixêxüçax. Rü yemacax nüxü naxuneta ga Yudátanüxü nax yematücumüwa ãëxgacügü íchoxütanücüxü. Rü yema Yudátücumüwa nixi ga nüxü naxunetaxü ga chautanüxütücumü, rü yema chaueneegüitanüwa rü choxü naxuneta nax guxũma i Iraéanecüãxmaxã ichacuáxüçax. <sup>5</sup>Rü ñüxma rü namu i chaunegü i Tupana choxna mugüxü, rü ngëma chaunegüitanüwa rü Tupana nüxü naxuneta ya chaune ya Charumóũ nax nüma chauchicüxü ãëxgacü yixixüçax i Iraéanewa. <sup>6</sup>Rü nüma ya Cori ya Tupana rü choxü ñanagürü: “Yimá cune ya Charumóũ tá nixi ya yimá naxücü ya yima chopata rü norü íãxgü. Erü choma rü chanayaxu nax chaune yixixüçax, rü choma rü nanatü chixixüçax. <sup>7</sup>Rü choma rü tá guxügütáma nüxü charüngüxêê nax ãëxgacüecha yixixüçax i ngëxguma tá ñüxmarüxü naga naxñüechagu i ngëma chorü mugü rü chorü ucüxégü” —ñanagürü choxü ya Tupana. <sup>8</sup>Rü yexguma ga nüma ga Dabí rü nane ga Charumóüçax nadauegu rü ñanagürü nüxü: —Rü nua napexewa i ñaa ãëxgacügü i Iraéanecüãxgü i Tupanaarü duüxügü ixigüxü, rü napexewa ya tórü Tupana, rü cuxü chaxucüxê nax mea nagu cumaxüxüçax i guxũma i norü mugü ya Cori ya Tupana nax ngëmaäcü cuxmexwa nangexmaechaxüçax i ñaa mexü i naane, rü cunegümexewa cunaxüexêxüçax nax nümagü rü guxügütáma namaxã inacuaxgüxüçax. <sup>9</sup>Pa Chaunex, Pa Charumóüx iücü naga

naxĩnú ya chorú Tupana rü guxũma i curú ngúchaũmaxã rü curú ĩnú i mexũmaxã naxü i ngẽma cuxũ namuxũ! Erü nüma ya Cori ya Tupana rü nanangugü i ngẽma taãxẽwa ngẽxmaxũ rü nüxũ nacuax i guxũma i ngẽma nagu rüxĩnũxũ. Rü ngẽxguma tá cumax naxçax cudaxu, rü nüma rü tá cuxũtawã nangexma. Natürü ngẽxguma nüxna quixũgachigux, rü nüma rü tá cuxũ narüxoxochi. <sup>10</sup>Rü ngẽmacax rü name i poraãcü cuxuãxẽ erü nüma ya Cori rü cuxũ naxuneta nax cuma cunaxũxũçax ya yima napata ya üünene. iRü ecü napora, rü naxü i ngẽma nüma cuxũ namuxũ! —ñanagürü ga Dabí.

.....

**29** <sup>1</sup>Rü yemawena ga ãẽxgacü ga Dabí rü ñanagürü nüxũ ga yema duũxũgü ga yexma ngutaquexexũ: —Rü daa chaune ya Charumóũ nixĩ ya Tupana nüxũ unetacü, rü nüma rü nangextüxũxũchi rü taxũta cuax nüxũ nangexma. Natürü i ngẽma puracü i tá naxũxũ rü nataxũchi, erü tama ãẽxgacüpatamare naxü, natürü Cori ya Tupanapata nixĩ ya naxũxũne. <sup>2</sup>Rü yemaçax pora naxçax chaxü nax chananutaquexexũ i ngẽmaxũgü nax naxũãxũçax ya yima Tupanapata. Rü ngẽma chanutaquexexũ rü úrumü, rü diërumü, rü bróuche, rü fiëru, rü mürapewagü nixĩ. Rü ngẽxgumarũxũ ta chananutaquexe ya mucüma ya nutagü ya imexechicü ya cornalína, rü naigüama ya nutagü ya imexechicü, rü tatanücü ya meruũgü. Rü ngẽxgumarũxũ ta mucüma ya nuta ya mármio i ĩxtapüxrxũxũ chanutaquexe. <sup>3</sup>Rü naëtüwa i ngẽma ngẽmaxũgü i

marü naxçax chanutaquexexũ ya yima Tupanapata rü nüxna chanaxã i ngẽma choxrũxũchi ixĩxũ i úrumü rü diërumü, erü poraãcü choxũ name ya yima Tupanapata. <sup>4</sup>Rü ngẽmaãcü 100,000 quíru naguxũ i úiru, rü 230,000 quíru naguxũ i diërumü i marü memarexũ nixĩ i nüxna chaxãxũ nax ngẽmamaxã nachaxuxũçax i naxtapüxgü ya yima Tupanapata. <sup>5</sup>Rü ngẽmaãcü marü nangexma i úiru rü diërumü nax ngẽmawa ngẽma puracütanũxũ naxüxũxũçax i naguxũraũxũ i meruũgü i Tupanapataçax ixĩxũ. Rü ñuxmax çRü texé tanaxwaxe nax tümaarü ngúchaũmaxã itanaxũxũ i tümaarü ãmare naxçax ya Cori ya Tupana? —ñanagürü ga Dabí. <sup>6</sup>Rü yexguma ga yema wüxichigü ga papá rü wüxichigü ga yema ãẽxgacügü ga nügütanũxũxũchigü ixĩxũ, rü yema ãẽxgacügü ga churaragũmaxã icuáxũ, rü yema ãẽxgacügü ga Dabíarü puracũmaxã icuáxũ rü norü ngúchaũmaxã ãmare inaxãgü. <sup>7</sup>Rü yema norü ãmaregü ga Tupanapataçax inaxãgũxũ rü 165,000 quíru naguxũ ga úiru nixĩ, rü ngíétü 10,000 tachinü ngĩxguxcü ga diëru ga úirunãxçax, rü 330,000 quíru naguxũ ga diërumü rü wixgutaax 600,000 quíru naguxũ ga bróuche, rü 3,300,000 quíru naguxũ ga fiëru. <sup>8</sup>Rü yema nüxũ yexmaxũ ga nuta ga imexechicü rü guma rü ta inanana nüxna ga Yeriéx ga Yerchóũtaxa ga Tupanapataarü diërumaxã icuáxũ. <sup>9</sup>Rü nüma ga duũxũgü rü nataãxëgü yerü norü ngúchaũmaxã Cori ya Tupanana nanaxãmaregü ga norü yemaxũgü. Rü yexgumarũxũ ta rü nüma ga ãẽxgacü ga



Dabí rü poraãcü nataãxëxüchi. <sup>10</sup>Rü yexguma ga nüma ga Dabí rü Cori ya Tupanaxü nicuaxüxü napexewa ga guxüma ga yema duüxüğü ga yexma ngutaquexexü rü ñanagürü: —Pa Cori ya Tonatügiarü Tupanax, rü guxügutáma cuxü ticuaxüxüğü. <sup>11</sup>Rü cumax, Pa Corix, rü guxüétüwa cunxexma, rü cupora rü cuxüüne rü namaxã icucuax i guxüma. Erü guxüma i taxacü i ngëxmaxü i daxüguxü i naanewa rü ñoma i naanewa rü cuxrü nixí. Rü cuxrüğü ta nixí i guxüma i naanegü erü guxüétüwa cunxexma. <sup>12</sup>Rü cuma nixí i cunangoxëxü i guxüma i úirugü rü diërugü rü ngëmaxüğü. Rü cugagu nixí i mea tochiga yadexagüxü i duüxüğü. Rü cuma nixí i namaxã icucuaxü i guxüma. Rü cuwa nixí i ne naxüxü i pora. Rü cuxmexwa nangexma nax toxü cutaxëxü rü toxü cuporaexëxü ya guxãma. <sup>13</sup>Rü ngëmacax, Pa Torü Tupanax, i ñuxmax rü moxë cuxna taxãxü rü cuxü ticuaxüüğüxü erü cuxüüne. <sup>14</sup>¿Rü taxacü ãxna chixí i chomax, rü taxacüğü nixí i ngëma chorü duüxüğü nax ngëmaãcü toxü natauxchaxü nax cuxna tanaxãxü i muxüma i ngëmaxüğü? Rü dücax i guxüma i ngëma rü cuxütawa ne naxü, rü ngëma cuxna taxãxü rü cuxütawa tayaxüxü nixí. <sup>15</sup>Rü cupexewa i ñoma i naanewa rü toma rü ñoma duüxüğü i ñanetanüxürüümare tixíğü nax paxaãchi i ñoma i naanewa tangexmagüxü yema nüxcüma ga torü oxigürüxü. Rü ngëma torü maxü i ñoma i naanewa rü ñoma wüxi i naxchipetaxürüxü paxa inarütaxmare. <sup>16</sup>Pa Corix, Pa Torü

Tupanax, cuxrüğü nixí i guxüma i ñaa ngëmaxüğü i tanutaquexexü rü cuxmexwa nixí i ne naxüxü nax naxügiãxüçax ya yima cupata ya cuxçax taxüxüne, Pa Tupana ya Üü necüx. <sup>17</sup>Rü choma rü nüxü chacuax nax guxüguma mea cunangugüxü i torü ñnü rü namaxã cutaãxëxü nax tixaixcümagüxü. Rü ngëmacax aixcüma mexüğü charüxínüãcüma chorü ngüchaümaxã cuxna chanana i guxüma i ñaa ãmaregü. Rü ñuxma rü chataãxë erü nüxü chadau i ñaa curü duüxüğü i nuxã ngutaquexexü rü guxüma i norü ngüchaümaxã cuxna nanana i ngëma norü ãmaregü. <sup>18</sup>Pa Corix i Torü Oxigü i Abráü rü Ichaü rü Iraéarü Tupanax iëcü nüxü rüngüxëxë i ñaa curü duüxüğü nax guxüguma nüxü nangüchaüxüçax nax cuga naxínüexü, rü tagutáma nüxü naxoxëxüçax nax cuxü nangechaüğüxü! <sup>19</sup>Rü ngëxgumarüxü ta ya yimá chaune ya Charumóü irü nüxna naxã i wüxi i naãxë i cugu rüxínüxü nax ngëmaãcü mea naxüxüçax i ngëma curü mugü rü curü ucuxëğü rü cucümagü, rü ngëmaãcü naxüãxüçax ya yima cupata ya naxçax chananutaquexene i ngëmaxüğü! —ñanagürü ga Dabí. <sup>20</sup>Rü yemawena rü nüma ga Dabí rü ñanagürü nüxü ga guxüma ga yema duüxüğü ga yexma ngutaquexegüxü: —Rü ñuxma rü chanaxwaxe i nüxü picuaxüxüğü ya Cori ya tórü Tupana —ñanagürü. Rü yexguma ga yema duüxüğü rü Cori ya Tupanaxü nicuaxüxüğü, rü napexegu rü ãëxgacü ga Dabípexegu nacaxápüxüğü. <sup>21</sup>Rü moxüãcü rü yéma nanagü ga 1,000 ga wocaxacüğü ga yexwaca yaexü, rü

1,000 ga carnérugü. Rü Tupanaçax nanadai ga yema naxĩnagü rü ãmare ga bĩnu naétü naba, rü yemaacü guxũma ga Iraéanecüãxégagu Tupanaçax ínanagu. <sup>22</sup>Rü yema ngunexũgu rü meama nachibüe rü naxaxegü rü poraãcü nataãxégü napexewa ga Cori ya Tupana. Rü ñuxũchi wenaxarü nüxũ nixugüe nax Charumóũ ga Dabí nane nax ãëxgacü yixĩxũçax. Rü Tupanapexewa chíxũmaxã nanabaerugü nax nüma Iraéanecüãxgũmaxã inacúaãxũçax. Rü yexgumarũxũ ta nüxũ naxunetagü ga Chadó nax chacherdótegüarü ãëxgacü yixĩxũçax. <sup>23</sup>Rü yemaacü nixĩ ga Tupana nüxũ unetaxũ ga Charumóũ nax nüxĩ nanatü ga Dabíchicüxü yangucuchixũçax. Rü guxũma ga Iraéanecüãxgü rü naga naxĩnüe rü yemaacü mea inixü ga guxũma. <sup>24</sup>Rü guxũma ga

Iraéanecüãxgüarü ãëxgacügü rü churaragüerugü rü Charumóũeneegü rü namaxã nüxũ nixugüe ga naga tá nax naxĩnüexũ. <sup>25</sup>Rü nüma ga Cori rü poraãcü nanatachigaxëxë ga guxũma ga Iraéanewa. Rü yexeraãcü namuarü yemaxũãx rü nanatüarü yexera nüxũ nicuaxũxũgü.

#### Nayu ga Dabí

<sup>26-27</sup>Rü Dabí ga Ichaí nane rü 40 ga taunecü nixĩ ga ãëxgacü yixĩxũ ga Iraéanewa. Rü 7 ga taunecü nixĩ ga ãëxgacü yixĩxũ ga Ebróũwa rü 33 ga taunecü nixĩ ga Yerucharéũwa. <sup>28</sup>Rü yexguma nayuxgu rü poraãcüxüchima marü naya rü namuarü yemaxũãx. Rü duũxũgü rü poraãcüxüchima namaxã nataãxëgü. Rü nane ga Charumóũ nixĩ ga nachicüxü ãëxgacüxũ ingucuchicü. ....

## 2 CRÓNICAS

### (Norü taxre i popera i wenaxarü ãêxgacügüchigaxü ümatüxü)

#### Charumóü rü Tupanana naxçax naca i cuax

**1** <sup>1</sup>Rü Charumóü ga Dabí nane, rü wüxi ga poracü ga ãêxgacü nixí, yerü Cori ya Tupana nüxü narüngüxêê, rü yemaçax natachiga. <sup>2</sup>Rü yexguma ga nüma ga Charumóü rü naxçax nangema ga guxüma ga Iraéanecüãxgüarü ãêxgacügü ga churaragüerugü, rü íanegüarü ãêxgacügü, rü chacherdótegüarü ãêxgacügü, rü papágü ga ãêxgacü ixígüxü ga Iraéanewa. <sup>3</sup>Rü yexguma marü yema duüxügü ga yexma ngutaqexexümaxã yadexaguwena ga Charumóü, rü Gabaóüwa namaxã naxü yerü yéma nixí ga nayexmaxü ga guma Tupanapata ga naxchirunaxçax ga nüxcüma norü duü ga Moiché chianexügu naxüxüne. <sup>4</sup>Rü marü tama Gabaóüwa nayexma ga yema baú ga Tupanaarü mugü nagu nuxü, yerü nüma ga Dabí rü üpaacü marü Quiriá-Yearüwa nayayaxu rü Yerucharéüwa nanange nawa ga guma ípata ga naxchirunaxçax ga yema

baúçax yexma naxüxüne. <sup>5</sup>Natürü Gabaóüwatama nayexma ga yema ãmarearü guchicaxü ga bróüchenaxçax ga naxüxü ga Becharé ga Úri nane ga Úrtaxa ixícü. Rü yema ãmarearü guchicaxü rü Cori ya Tupanapatapexewa nayexma ga Gabaóüwa. Rü nüma ga Charumóü rü guxüma ga yema duüxügü ga íyaxümücügüxü rü yéma Gabaóüwa naxí nax Tupanamaxã yanadexagüxüçax. <sup>6</sup>Rü nüma ga Charumóü rü nagu nachinagü ga yema ãmarearü guchicaxü ga bróüchenaxçax ga Tupanapatapexewa yexmaxü. Rü yemawa ínanagu ga 1,000 ga ãmaregü ga naxünagü ga Tupanacax daxü. <sup>7</sup>Rü yematama chütaxügu, rü nüma ga Tupana rü Charumóüçax nangox rü ñanagürü nüxü: —iChoxna naxçax naca i taxacü i cunaxwaxexü! Rü choma rü tá cuxna chanaxã —ñanagürü. <sup>8</sup>Rü nüma ga Charumóü rü Tupanaxü nangäxüga rü ñanagürü: —Cumax, Pa Tupanax, rü poraäcü chaunatu ga Dabí cuxü nangechaütümüxü. Rü ñüxma rü

chaunatüchicüxü ãëxgacüxü choxü quingucuchixëxë. <sup>9</sup>Rü ñuxmax, Pa Cori Pa Tupanax iëcü yanguxëxë ga yema chaunatü ga Dabímaxã nüxü quixuxü rü tá nüxü curüngüxëë i nanegü rü nataagü! Erü ñuxma rü marü ãëxgacüxü choxü cuxuneta natanüwa i ngëma muxüchixü i curü duüxügü i ñoma naxnecütëxerüxü imuxü. <sup>10</sup>Rü ëcü choxna naxã i cuax nax guxüxüma chacuáxüçax rü ngëmaãcü mea namaxã ichacuáxüçax i ngëma curü duüxügü! ¿Erü texë tüxü natauxcha nax namaxã itacuáxü i ñaa curü duüxügü i muxüchixü? —ñanagürü. <sup>11</sup>Rü nüma ga Tupana rü Charumóüxü nangãxü rü ñanagürü: —Ñuxma nax chauxütawa naxçax ícuçaxaxü i cuax nax mea chorü duüxügümaxã icucuáxüçax rü chataãxë, erü tama naxçax ícuca nax cumuarü ngëmaxüáxü rüçxna cuxü chatachigaxëëxü, rü tama naxçax ícuca nax chanadãixüçax i curü uanügü rü tama naxçax ícuca nax cumáarü maxüáxüçax. Natürü ngëma naxçax ícuçaxaxü nixí i cuax rü cuãëxü nax cucuáxü nax ngëmaãcü mea namaxã icucuáxüçax i chorü duüxügü i naxçax ãëxgacüxü cuxü chingucuchixëëxü. <sup>12</sup>Rü ñuxma rü cuxna chanaxã i cuax nax guxüxüma cucuáxüçax. Natürü naétü cuxna chanaxã i diëru rü ngëmaxügü rü cuxü chatachigaxëxë. Rü yema nüxírxügüxü ga ãëxgacügü rü tama cuxrüxü chanatachigaxëxë, rü ngëma cuwena ãëxgacügü ixígxü rü taxütáma ngëxgumarüxü chanatachigaxëxë —ñanagürü ga Tupana. <sup>13</sup>Rü yemawena rü nüma ga Charumóü rü natáegu nawa ga guma Tupanapata ga Gabaóüwa

yexmane. Rü Yerucharéüwa naxü rü yéma Iraéanecüaxgüarü ãëxgacü nixí. ....

### Charumóü rü Tíruarü ãëxgacü ga Iráümaxã inaxüga

**2** <sup>1</sup>Rü nüma ga Charumóü rü nanaxunagü nax Cori ya Tupanaaxü naxüãxü ga wüxi ga tupauca ga taxüne. Rü yexgumarüxü ta nüxü nixu rü tá naxüãxü ga napata nax ãëxgacü yixíxü. <sup>2</sup>Rü yemaçax nüxü naxuneta ga 70,000 ga nugütaeruügü, rü 80,000 ga nutagüarü mexëcüwaruügü ga maxpúneanewa puracüexü, rü 3,600 ga naerugü ga yema puracümaxã icuaxgüxü. <sup>3</sup>Rü yemawena ga Charumóü rü ñane ga Tíruarü ãëxgacü ga Iráüxütawa namuga rü ñanagürü: —Cuxna chaca nax choxü curüngüxëëxü yema chaunatü ga Dabíxü curüngüxëëgurüxü ga yexguma mürapewagü ga ocayiwanaxçax núma cumugügurüxü nax napata naxüçax —ñanagürü. ....

### Charumóü nanaxü ga Tupanapata

**3** <sup>1</sup>Rü nüma ga Charumóü rü inanaxügü ga maxpúne ga Moríagu nax naxüãxü ga Cori ya Tupanapata ga Yerucharéüwa. Rü guma maxpúnewa nixí ga Cori ya Tupana rü nanatü ga Dabíçax nangóxü. Rü yema nixí ga yema nachica ga guma Yebuchéutanüxü ga Orná trígu nawa púxü rü Dabí nüxü unetaxü nachicaxü ga guma Tupanapata. <sup>2</sup>Rü yexguma marü 4 ga taunecü marü ãëxgacü yixígu ga Charumóü rü meama norü taxre ga

tauemaciärü taxre ga ngunexügu  
(abrilärü 17) nixí ga inaxügüxü nax  
naxüxü ga guma Tupanapata.

.....

**5** <sup>1</sup>Rü yexguma marü yanguxgu ga  
guma Tupanapata, rü nüma ga  
Charumóü rü yéma nanana ga yema  
Tupanapataarü yemaxügu ga  
úirunaxcax rü diërumünaxcax ga nanatü  
ga Dabí Cori ya Tupanana naxü. Rü  
Tupanaarü diërutänügu namaxã  
nanguxü.

**Yema baú ga Tupanaarü mugü  
nagu nuxü rü guma yexwacaxüne ga  
Tupanapatawa nanangegü**

<sup>2</sup>Rü nüma ga Charumóü rü  
Yerucharéügu nanangutaquexexë ga  
yema Iraéanecüãx ga ãëxgacütücumüwa  
ügüxü, rü guxüma ga yema 12 ga  
Iraétücumügiärü ãëxgacügüchigü, rü  
guxüma ga papágü ga natanüxüeru  
ixügüxü. Rü yemaacü  
nanangutaquexexë nax maxpüne ga  
Chióüwa yayauxgüaxücax ga yema baú  
ga Tupanaarü mugü nagu nuxü, rü  
guma yexwacaxüne ga napatawa  
nangegüaxücax. <sup>3</sup>Rü yema ngunexü ga  
Iraéanecüãxgü nagu naxüchigagüãxü  
nax düxenügütüüwa nayexmagüxü ga  
meama norü 7 ga tauemacügu (octúbre)  
rü yexguma nixí ga Charumóümaxã  
nangutaquexegüxü ga yema  
Iraéanecüãxgiärü ãëxgacügü. <sup>4</sup>Rü yéma  
maxpüne ga Chióüwa nangugü ga  
guxüma ga yema Iraéanecüãxgiärü  
ãëxgacügü. Rü yema Lebítanüxügü rü  
nayangegü ga yema baú ga Tupanaarü  
mugü nagu nucuxü. <sup>5</sup>Rü guma  
yexwacaxüne ga napatawa nanangegü

ga yema baú wüxigu namaxã ga guma  
nüxíraxüne ga napata ga  
naxchirunaxcax rü guxüma ga norü  
yemaxügu. Rü yema chacherdótegü rü  
Lebítanüxügü nixí ga yéma nanaxü. <sup>6</sup>Rü  
nüma ga ãëxgacü ga Charumóü rü  
guxüma ga Iraéanecüãxgü rü yexma  
nangutaquexegü napexegu ga yema baú  
ga Tupanaarü mugü nagu nucuxü. Rü  
yema nax namuxüchixü ga yema  
carnërugü, rü wocaxacügü i yatüxü ga  
Tupanaçax dajüxü rü taxucüriwa texé  
tayaxugü. <sup>7</sup>Rü yemawena ga yema  
chacherdótegü rü guma Tupanapataarü  
aixepewa nanangegü ga yema baú ga  
Tupanaarü mugü nagu nucuxü. Rü  
yema Nachica i Üünexügu nayaxügu  
natüügu ga guma naxpexátü ga yema  
taxre ga daxücüãxchicünaxã ga  
Charumóü üxü. <sup>8</sup>Rü yema taxre ga  
daxücüãxchicünaxãgü rü guma  
naxpexátügü rü baú íxüxüétüguama  
narüxunü rü nayadüxëtügü ga yema baú  
rü guma naxpawerugü. <sup>9</sup>Natürü guma  
naxpawerugü rü nimax, rü yemaçax  
yema napexegü rü nüxü tadauama ga  
yexguma nüxíraxüxü ga nachiäwa  
idawenügu, natürü yema norü íãxwa rü  
tama nüxü tadau.

.....

<sup>13</sup>Rü yema wiyaetanüxü rü  
paxetatanüxü rü wüxigu nawiyaegü rü  
Tupanaxü nicuaxüxügü rü Cori ya  
Tupanana moxë naxägü. Rü yemaacü  
napaxetägü namaxã ga norü cornétagü  
rü norü platýugü rü togü ga  
paxetarüügü. Rü yexguma  
ínawiyaegüyane rü ñanagürügü: “iNüxü  
picuaxüxügü ya Cori ya Tupana erü  
nüma rü namecüma rü ngëma norü

ngechañ rü taguma inayagux!“  
ñanagürügü. Rü yexgumatama ga guma  
Cori ya Tupanapata rü caxixümaxã  
nanapá. <sup>14</sup>Rü yema caxixügagu rü nüma  
ga chacherdótegü rü taxucürüwama  
yexma narücho nax yadaxëëgüaxücax  
ga yema puracü ga yéma Tupanacax  
ínaxügüxü. Yerü Tupanaarü üünemaxã  
nanapá ga guma napata.

**Charumóü rü Tupanamëxëgu nanaxü ga  
guma ípata ga naxüxüne**

**6** <sup>1</sup>Rü yexguma ga Charumóü rü  
nayumüxë rü ñanagürü: “Cumax,  
Pa Cori Pa Tupanax, rü cugü quixu nax  
caixanexü i waemaxüwa cumaxüxü.  
<sup>2</sup>Natürü choma rü cuxcax chanaxü ya  
daa ípata nax yimawa  
cungexmaechaxücax”, ñanagürü. <sup>3</sup>Rü  
ñuxüchi nüma ga äëxgacü ga Charumóü  
rü naxcax nadauegu ga guxüma ga  
yema Iraéanecüäxgü ga yexma chigüxü.  
Rü mexü namaxã naxuegu rü ñanagürü:  
<sup>4</sup>—Namecümamaxüchi ya Cori ya tórü  
Tupana. Rü nüma rü marü nayanguxëxë  
ga yema chaunatu ga Dabímaxã nüxü  
yaxuxü ga yexguma ñaxgu nüxü: <sup>5</sup>“Rü  
yematama ngunexü ga Equítuanewa  
chorü duüxügü ga Iraétanüxü  
íchanguxüxëëxügumama rü taguma  
nüxü chaxuneta ga wüxi ga íane nax  
yimagu naxüxücax ga chopata. Rü  
taguma natanüwa nüxü chaxuneta ga  
wüxi ga yatü nax chorü duüxügü i  
Iraétanüxügümaxã inacuáxücax.  
<sup>6</sup>Natürü i ñuxma rü nüxü chaxuneta ya  
Yerucharéü nax ngëxma naxüxücax ya  
chopata. Rü nüxü chaxuneta ya Dabí  
nax yimá chorü duüxügüarü äëxgacü  
ixüxücax”, ñanagürü ga Tupana. <sup>7</sup>Rü

nüma ga guma chaunatu ga Dabí rü  
nüxü nangüchañ ga nax naxüäxü ga  
wüxi ga ípata ya taxüne naxcax ya Cori  
ya tórü Tupana. <sup>8</sup>Natürü nüma ga Cori  
ya Tupana rü ñanagürü nüxü: “Wüxi i  
mexü nixí nax nagu curüxínüxü nax  
chaxcax cunaxüxü ya wüxi ya chopata.  
<sup>9</sup>Natürü taxütáma cuma nixí i  
cunaxüxü. Rü yimá cune ya tá cuxü  
ngëxmacü tá nixí ya naxücü ya yima  
chopata”, ñanagürü ga Tupana. <sup>10</sup>Rü  
yexguma ga nüma ga Charumóü rü  
duüxügüxü ñanagürü: —Nüma ya Cori  
ya Tupana rü marü nayanguxëxë ga  
yema norü uneta. Erü ñuxma i choma  
rü äëxgacü chixí tümachicüxü ya chorü  
papá. Rü chanaxü ya yima ípata ya  
taxüne naxcax ya Cori ya tórü Tupana.  
<sup>11</sup>Rü ñuxma rü yimagu chayaxücuchi i  
ngëma baü i nawa nangexmagüxü i Cori  
ya Tupanaarü mugü ga nutagu ümatüxü  
ga nüxcümamaxügüxü ga tórü oxigümaxã  
nüxü yaxuxü —ñanagürü. <sup>12-13</sup>Rü nüma  
ga Charumóü rü duüxügüxü nanaxüxëxë  
ga wüxi ga chinagüchica ga  
bróuchenaxcax. Rü meama  
Tupanapataarü ngäxüäxtügu nüxü  
nanaxüxëxë napexegu ga ämarearü  
guchicaxü. Rü yima chinagüchica rü  
nüxü nayexma ga 2 métru 70 ga norü  
max, rü taxre ga métru ga norü  
tatachinü, rü wüxi ga métru 57 ga norü  
máchane. Rü yemagu nachinagüäcuma  
rü guxüma ga Iraéanecüäxgü ga yexma  
ngutaquëxëgüxümaxã nidexa. Rü  
yexguma duüxügü nüxü írüdaunüyane  
rü nüma ga Charumóü inacaxápüxü, rü  
daxü naxunagüchacüxü rü ñaäcü  
nayumüxë: <sup>14</sup>“Pa Cori Pa Torü Tupanax,  
rü woo i daxügüxü i naanewa, rü woo i

ñoma i naanewa, rü nataxuma i taxacü i cuxruxũ ixixũ. Erü cumax rü cuyanguxëxë i curü unetagü rü aixcúma nüxũ cunawex nax namaxã cumecúmaxũ i ngëma curü duũxũgü i norü ngúchaũmaxã cuga ñnüexũ. <sup>15</sup>Rü cuma rü cuyanguxëxë ga curü uneta ga chaunatü ga Dabímaxã nüxũ quixuxũ ga daa cupatachiga. Rü ñuxma rü aixcúmaxũchima cunangoxëxë i ngëma. <sup>16</sup>Rü ñuxmax, Pa Torü Tupanax, rü ngëxgumarixũ ta yanguxëxë ga yema uneta ga chaunatü ga curü duũ ga Dabímaxã nüxũ quixuxũ ga yexguma ñacuxgu nüxũ: 'Rü cutaagü tá nixĩ i guxũgutáma ãëxgacügü ixĩgũxũ i Iraétanüwa ega cuxruxũ mea nagu namaxëgu i chorü mugü', ñacuxgu! <sup>17</sup>Rü ngëmacax, Pa Cori Pa Torü Tupanax, cuxũ chacaxũ nax cuyanguxëxũcax i ngëma curü uneta ga chaunatü ga curü duũ ga Dabímaxã nüxũ quixuxũ", ñanagürü.

.....

**7** <sup>1-2</sup>Rü yexguma Charumóũ nüxũ rüchauxgu nax nayumüxëxũ rü daxüguxũ ga naanewa narüngu ga üxüema rü yema ãmaregü ga Tupanacax yéma nanaxũ rü yema naxünagü ga Tupanacax nadaixũtëtügu nangu rü nixae. Rü yema Tupanaarü üüne rü guma Tupanapata namaxã nanapá rü yemacax ga yema chacherdótegü rü taxucürüwama nagu nachocu. <sup>3</sup>Rü yexguma yema Iraéanecüãxgü yema üxüemaxũ rü Tupanaarü üünexũ nadaugügu nax ñuxãcü Tupanapataétügu ínaxixũ, rü guxũma ga nümagü rü yema ínachauãxtüügu nacaxápüxügü rü

nanangücuchitanü. Rü Tupanaxũ nicuaxüxũgü rü nüxna moxë naxãgü rü ñanagürügü: —Nüma ya Tupana rü namecúma rü norü ngechaũ rü taguma inayagux — ñanagürügü. <sup>4</sup>Rü yemawena rü nüma ga ãëxgacü ga Charumóũ rü guxũma ga yema togü ga Iraéanecüãxgü rü Tupanacax nanadai rü nayagu ga muxũma ga naxünagü. ....

#### Tupana rü Charumóũmaxã inaxuneta

<sup>11-12</sup>Rü yexguma Charumóũ yanguxëëgu ga guma Tupanapata rü guma ãëxgacüpata rü guxũma ga yema togü ga yemaxũgü ga naxixũ, rü nüma ga Cori ya Tupana rü wüxi ga chütacü naxcax nangox rü ñanagürü nüxũ: —Marü nüxũ chaxínü i ngëma curü yumüxë rü marü nüxũ chaxuneta ya daa chopata nax yimagu chauxcax penadaixũcax rü ípenaguxũcax i ngëma naxünagü i choxna pexãmaregüxũ. <sup>13-14</sup>Rü ngëmacax i ngëxguma íchayachaxächixëëgu ya pucü nax taguma napuxũcax rü munügü íchangugüxëëgu nax penetügü nangóxũcax rüexna pexcax daxaweane íchanguxëëgu, natürü ngëxguma chopexegu pegü íperüxíragügu i pemax nax chorü duũxũgü pixĩgũxũ, rü peyumüxëgügu rü chauxcax pedaugügu, rü nüxũ perüxoegu i ngëma chixexũ i pecümagü, rü choma rü tá pexũ chaxínü i yéa daxüguxũ i naanewa íchangexmaxüwa. Rü tá pexũ nüxũ icharüngüma i perü chixexũgü rü tá ichayanaxoxëxë i ngëma guxchaxũ i perü naanewa ngëxmaxũ. <sup>15</sup>Rü ñuxmacürüwa rü mea tá pexũ nüxũ

chaxĩnũ i perũ yumũxĕgũ i daa chopatawa pexũĩ. <sup>16</sup>Erũ chomatama nũxũ chaxuneta rũ chanaxũinexĕxĕ ya daa chopata nax nawa tá guxũguma changexmaxũ. Rũ guxũguma chauãĕwa nangexma rũ tá nũxna chadau. <sup>17-18</sup>Rũ ñuxma i cumax, Pa Charumóũx, rũ ngĕxguma tá cunatũ ya Dabĩrũxũ mea chauga cuxĩnũgu, rũ nagu cumaxũgu i ngĕma chorũ mugũ rũ chorũ ucũxĕgũ, rũ choma rũ tá chayanguxĕxĕ ga yema uneta ga cunatũ ga Dabĩmaxã nũxũ chixuxũ nax cumax rũ cutaagũ rũ guxũgutãma Iraĕanecũãxgũarũ ãĕxgacũgũ tá yixĩgũxũ. <sup>19-20</sup>Natĩrũ ngĕxguma pema rũ choxna pixĩgachitanũgu rũ tama peyanguxĕĕgu i ngĕma mugũ ga pexna chaxãxũ rũ naxchicũnãxãgũxũmare picuãxũũgũgu, rũ tá nawa pexũ íchawoxũ i ñaa naane i pexna chaxãxũ. Rũ tá nũxna chixũgachi ya daa chopata ya chaxũinexĕĕchirĕne, rũ tá wũxi i cugũrũxũ chayaxĩxĕxĕ napĕxewa i ngĕma togũ i nachixũanegũ. <sup>21</sup>Rũ daa chopata ya mexechichirĕne rũ nachicaxica tá ngĕma nayaxũ. Rũ ngĕxguma i guxũma i duũxũ i nawa ũpetũxũ i ñaa nachica rũ nũxũ nadaugũgu i ngĕma chopatachica rũ tá namaxã nabãixãchie rũ tá ñanagũrũgũ: “¿Tũxciũ ya Cori ya Tupana i porããcũ nachixexĕãxũ i ñaa nachixũane rũ daa napata?” ñanagũrũgũ tá. <sup>22</sup>Rũ namũcũgũ rũ tá nanangãxũgũ rũ ñanagũrũgũ tá: “Ngĕmaãcũ namaxã nangupetũ erũ ñaa duũxũgũ rũ nũxna nixĩgachi ya Cori ya norũ oxigũarũ Tupana ga Equítuanewa ínganguxũxĕĕcũ, rũ nawe narũxĩ ga yema naxchicũnãxãgũmare rũ nũxũ

nicuãxũxũgũ. Rũ yemacãx nixĩ ga Tupana ga naxcãx ínganguxĕĕgũãxũ ga yema taxũ ga guxchaxũgũ”, ñanagũrũgũ tá —ñanagũrũ ga Tupana nũxũ ga Charumóũ.

.....

#### Yerucharéũwa ãĕxgacũ nixĩ ga Chedequã

**36** <sup>11</sup>Rũ nũma ga Chedequã rũ nũxũ nayexma ga 21 ga norũ taunecũ ga yexguma noxri ãĕxgacũ yixĩxgu. Rũ 11 ga taunecũ nixĩ ga ãĕxgacũ yixĩxũ ga Yerucharéũwa. <sup>12</sup>Natĩrũ wũxi ga ãĕxgacũ ga tama Tupanaga ínũcũ nixĩ. Yerũ tama inarũxĩnũchaũ nũxũ ga guma orearũ uruxũ ga Yeremã ga Tupana nawa namaxã idexacũ. <sup>13</sup>Rũ naétũ tama nayanguxĕxĕ ga norũ uneta ga Tupanapexewa Babiróniaanearũ ãĕxgacũ ga Nabucudonochómaxã nũxũ yaxuxũ nax norũ churagũmaxã tá nũxũ nangũxĕĕxũ. Rũ nũma ga Chedequã rũ porããcũ nũgũ nataixĕxĕ nax tama Tupanaga naxĩnũxũcãx. <sup>14</sup>Rũ yexgumarũxũ ta ga guxũma ga Yudãanecũãxarũ ãĕxgacũgũ rũ norũ duũxũgũ rũ chacherdótegũ rũ ta, rũ porããcũ chixri namaxĕ. Rũ to ga nachixũane ga tama Tupanaxũ cuãxgũxũarũ tupanachicũnãxãxũ nicuãxũxũgũ. Rũ yemaacũ chixexũ nawa naxũgũ ga guma Tupanapata ga nũma ga Tupana nũxũ unetane nax napata yixĩxũcãx ga Yerucharéũwa. <sup>15</sup>Rũ nũma ga Cori ga Iraĕanecũãxgũarũ oxigũarũ Tupana rũ guxũguma yema nanamugũ ga norũ orearũ uruũgũ nax yaxucũxĕgũãxũcãx, yerũ nũma ga Tupana rũ nũxũ nangechaũtũmũxũgũ



ga norü duũxũgü rü nüxũ nangechaũ ga guma napata ga nawa nayexmane.

<sup>16</sup>Natürü nümagü ga yema duũxũgü rü nüxũ nacugüeama ga yema Tupanaarü orearü uruũgü rü tama nüxũ inarixĩnüechaũ ga yema namaxã nüxũ yaxuxũ. Rü yemaçax ga nüma ga Tupana rü düxwa namaxã nanu ga yema norü duũxũgü rü taxüema Tupanaxũ ítayachaxãchixëxë.

**Nagu narüchixe ga Tupanapata rü inawoxũ ga Yudáanecüãxgü**

<sup>17</sup>Rü yemaçax nüma ga Cori ya Tupana rü Cadéguarü ãëxgacüxũ namu nax nadaiaxüçax ga yema Iraéanecüãxgüarü ngextjüxüxũgü ga Tupanapatawa puracüexũ. Rü tama nüxũ tangechaũtümüxũgü ga guxema ngextjüxügüxe, rü paxegü, rü yaxguãxgü, rü guxema ichixéxe. Rü yemaacü ga nüma ga Cori ya Tupana rü guxüma ga Iraéanecüãxgüxũ Cadéguümexëgu nayixëxë nax nadaiaxüçax. <sup>18</sup>Rü guxüma ga Tupanapataarü yemaxũgü ga itaxü rü ixíraxü rü nayana. Rü norü diërugü ga guma Tupanapata, rü guma ãëxgacüpataarü diërugü rü yema norü ngüxëëruũgüarü diërugü, rü nüma ga Cadéguarü ãëxgacü rü íane ga Babiróniawa nanana. <sup>19</sup>Rü guma Tupanapata rü nayagugü rü yema Yerucharéüarü poxeguxũ rü nagu napogüe. Rü guma ãëxgacüpatagü ínanagu rü inayanaxoxëëgü ga guxüma ga taxacü ga tatanüxü ga guma íanewa yexmaxũ. <sup>20</sup>Rü yemawena rü yema Iraéanecüãxgü ga íyaxügüxũ rü Babiróniaanewa nanagagü nax ãëxgacüarü rü nanegüarü puracütanüxũ

yixügüxüçax. Rü yemaacü nixgü rü ñüxmata Pérchiaanearü ãëxgacüümexëwa nayexmagü ga Cadéguü. <sup>21</sup>Rü yemaacü nixí ga yanguxü ga yema Tupanaarü ore ga Yeremíawa nüxũ yaxuxũ ga ñaxgu: “Rü ngëma naane rü tá inarüngü”, ñaxgu. Rü aixcüma yemaacü nangupetü yerü yema 70 ga taunecü ga Cadéguümexëwa nax nayexmaxũ rü inarüngü ga yema Iraéane yerü nataxuma ga duũxũgü ga nawa puracüexũ.

**Pérchiaarü ãëxgacü ga Chíru nanaxunagü nax wena naxüaxũ ga Tupanapata**

<sup>22</sup>Rü guma taunecü ga nagu yangucuchicü ga Chíru nax Pérchiaanearü ãëxgacü yixüxüçax, rü nüma ga Tupana rü Chíruãëwa nananguxëxë ga ínü nax naxunagüaxüçax ga wüxi ga mu ga Iraéanecüãxgüétiwa idexaxü nax nüxũ nangüxëëgüxüçax. Rü nanaxümatü ga yema mu rü guxü ga norü naanewa nanamu nax yemaacü yanguxüçax ga Cori ya Tupanaarü ore ga Yeremíawa nüxũ yaxuxũ. <sup>23</sup>Rü nüma ga Chíru ga Pérchiaanearü ãëxgacü rü nanaxunagü i ñaa ore ga ñaxü: “Rü nüma ya Cori ya daxügüxü i naanearü Tupana, rü choxmexwa nanangexmagüxëxë i guxüma i ãëxgacügü i ñoma i naanewa ngëxmagüxü. Rü choxü namu nax Yerucharéügu chanaxüxüçax ya napata i Yudáanewa. Rü ngëmacax ya ngexerüxüxe i pemax nax Cori ya Tupanaarü duũxũgü pixgüxü irü ëcü pechixüanecax pewoegu! iRü nüma ya Cori ya perü Tupana pexü rüngüxëxë!” ñanagürü ga ãëxgacü ga Chíru.

# ESDRAS

## (Édra)

**Āēxgacū ga Chíru nanaxunagū nax wena  
naxūgūaxūcax ga Tupanapata**

**1** <sup>1</sup>Rū guma tauncū ga nagu āēxgacū yangucuchicū ga Chíru ga Pérchiaanecūāxarū āēxgacū, rü Cori ya Tupana nayanguxēxē ga norū ore ga noxri Yeremíaxwa nüxū yaxuxū. Rū yemacax ga nūma ga Tupana rü āēxgacū ga Chírūāēwa ínananguxēxē nax guxū ga nachixūānegū ga nūma namaxā inacuáxūmaxā naxunagūaxūcax ga ñaa ore ga ūmatūxū ga ñaxū: <sup>2</sup>“Rū choma i Chíru i Pérchiaanecūāxarū āēxgacū rü chanaxunagū i ñaa ore. Rū nūma ya daxūcūāx ya Cori ya Tupana rü marū choxmexwa nanangexmagūxēxē i guxūma i nachixūānegū i ñoma i naanewa ngēxmagūxū. Rū choxū namu nax naxcax chanaxūcūcax ya wūxi ya napata nawa ya yima íane ya Yerucharēū i Yudáanewa ngexmane. <sup>3</sup>Rū ngēmacax i guxāma i pema ya Iraéanecūāxgū íxīgūxe, rü name nixī nax Yerucharéūcax pewoeguxū nax wena penaxūgūxūcax ya napata ya yimá perū Tupana. iRū nūma pexū

nangūxēxē nawa i ngēma puracū! <sup>4</sup>Rū yíxema petanūxūgū ya tama woeguchaūxe, rü name nixī i naxchirumaxā, rü tūmawexūmaxā, rü ōnamaxā nüxū tarūngūxēē i ngēma woeguxū. Rū naétū rü name nixī i nüxna tanaxā i tūmaarū āmare naxcax ya Tupanapata ya Yerucharéūwa wena tá naxūgūne”, ñanagürü ga āēxgacū ga Chíru.

**Iraéanecūāxgū rü wena  
Yerucharéūcax nawoegu**

<sup>5</sup>Rū nūma ya Tupana rü yema Yudátanūxūarū rü Bēyamítanūxūarū āēxgacūgūāēwa rü chacherdótegiāēwa nananguxēxē ga wūxi ga ngūchaū nax Yerucharéūcax nawoeguxūcax nax wena naxūgūaxūcax ga Tupanapata. <sup>6</sup>Rū yema Iraéanecūāxgū ga tama Yerucharéūcax woeguchaūxū, rü yema woeguxūxū narūngūxēgū diērumaxā, rü úrumaxā, rü wocagūmaxā rü norū yemaxūgū ga tatanūxūmaxā. Rū naétū nüxna nanaxāgū ga āmaregū Tupanapatacax. <sup>7</sup>Rū nūmatama ga āēxgacū ga Chíru rü nanawoeguxēxē ga yema cópagū ga úirunaxcax rü guxūma

ga togüamachigü ga Tupanapataariü yemaxüügü ga ãëxgacü ga Nabucodonochó Yerucharéüwa naxü rü norü tupanapatagu yanuxü. <sup>8</sup>Rü nüma ga Chüru ga Pérchiaanecüãxaruü ãëxgacü rü norü diëruaruü dauruxü ga Miridátexü namu nax Yudáanecüãxaruü ãëxgacü ga Chebachárana nanaaxüçax ga yema Tupanapataariü yemaxüügü.

.....

<sup>11</sup>Rü yema Tupanapataariü yemaxüügü ga úirunaxçax rü diërumünaxçax rü 5,400 nixí ga norü mu. Rü guxüma ga yema yemaxüügü rü Chebachára nayana ga yexguma Babiróniaanewa natáeguxgu namaxá ga yema duüxüügü ga Yerucharéüçax woeguxü.

.....

**Iraéanecüãxgü ga  
Babiróniaanewa woeguxü**

**2** <sup>64-65</sup>Rü 42,360 nixí ga norü mu ga yema Iraéanecüãxgü ga woeguxü. Natürü tama yematanügu nixugü ga norü puracütanüxüügü rü naxütaxüügü ga 7,337 ga duüxüügü ixígüxü. Rü yexgumarüxü ta nayexmagü ga 200 ga wiyaetanüxü ga yatüxü rü ngexüügü. <sup>66-67</sup>Rü 736 ga cowarugü nüxü nayexmagü, rü 245 ga múlagü, rü 435 ga caméyugü rü 6,720 ga búrugü. <sup>68</sup>Rü yexguma Yerucharéüwa nangugüga ga yema Iraéanecüãxgü, rü ñuxre ga norü ãëxgacügü rü norü ãmaregü inaxägü nax wena Cori ya Tupanapata namexëégüxüçax. <sup>69</sup>Rü yema wüxichigü nüxü tauxchaxü ga diëru nixí ga inaxägüxü naxçax ga guma Tupanapata. Rü 488 quíru naguxü ga úiru, rü 2,750 quíru ga diërumü, rü 100 ga

chacherdótegüchiru ga mámüxü nixí ga inaxägüxü. <sup>70</sup>Rü yema chacherdótegü rü yema Lebítanüxüügü rü ñuxre ga yema togü ga duüxüügü rü yexma Yerucharéügu naxächüügü. Natürü yema wiyaetanüxüügü, rü yema Tupanapataariü iãxaruü dauruüügü, rü yema Tupanapatawa puracüexü, rü yema togü ga Iraéanecüãxgü rü wüxichigü norü ñanewa ningugüetanü.

**Yerucharéüwa rü wena inanaxüügü nax  
Tupanacax nangutaquexegüxü**

**3** <sup>1</sup>Rü yexguma 7 ga tauemacüwa nanguxgu nax Babiróniaanewa ne naxíxü rü nüma ga Iraéanecüãxgü ga norü ñanewachigü ngugüxü rü Yerucharéüwa naxí nax yema yangutaquexegüxüçax. <sup>2</sup>Rü yemacax ga Yochué ga Yochadá nane rü namücügü ga chacherdótegümaxá rü Chorobabé ga Charatié nane rü natanüxüügümaxá wenaxaruü nanaxüügü ga Tupanaariü ãmarearuü guchicaxü nax yema ínaguaxüçax ga Tupanaariü ãmaregü, yema mugü ga Moiché úmatüxü nüxü ixuxürüxü. <sup>3</sup>Rü yema Tupanaariü ãmarearuü guchicaxü rü nüxíraxüxü ga nachicagutama nanaxüügü rü meama natai. Rü yema nax naxçax namuüexü ga yema duüxüügü ga yema naanewa yexmagüxü, rü yemacax guxüguma ga paçmama rü yáuanecü rü Cori ga Tupanacax ínanagugüxü ga norü ãmaregü. <sup>4</sup>Rü yema Moiché úmatüxü ga mugü nüxü ixuxürüxü rü nanaxüchigagüxü ga yema naixatümaxá nügü nax yaxüpataxü. Rü guxüma ga ngunexügu rü ínanaguuxü ga ãmaregü aüxrügumarüütama yema Moiché

ümatüxü ga mugü nüxü ixuxürixü. <sup>5</sup>Rü yexgumarüxü ta ínanagu ga ámaregü ga ngüchigaarü ngunexügu íguxü, rü yema ámaregü ga yexwaca ixücücü ga tauemacügu íguxü, rü yema ámaregü ga togü ga petagu Tupanacax íguxü. Rü yexgumarüxü ta ínanagu ga yema ámaregü ga texé tümaarü ngüchaümaxá Tupanacax íxámaregüxü. <sup>6</sup>Rü yema nax Tupanacax ínaguaxü ga ámaregü, rü inanaxügüe meama 7 ga tauemacüarü ügügu naxüpa nax inachixëëgüaxü ga yema naxtapüx ga guma Tupanapata. <sup>7</sup>Rü ñuxüchi naxcax nadaugü ga ípataarü üruügu ga nutaarü ñaxcurüügu rü corapínagü, rü diérumaxá nüxü nanaxütanü. Rü Líbanuanewa ga Tíruwa rü Chidáüwa naxcax nataxegü ga mürapewa ga ocayiwagü. Rü yema mürapewa rü ðnamaxá, rü bínúmaxá, rü orfbuarü chíxümaxá nanaxütanügü. Rü yema mürapewagü rü Líbanuanewa nixí ga ne nanaaxü. Rü márpechinügu nayana ñuxmata Yópearü türewa nangugü, yerü yemaacü nixí ga nüxna naxágaxü ga Pérchiaanecüáxarü äëxgacü ga Chíru.

**Inanaxügüe ga wena nax  
naxügüáxü ga Tupanapata**

<sup>8</sup>Rü nüma ga Chorobabé ga Charatié nane rü Yochué ga Yochadá nane rü nüma ga chacherdótegü rü Lebítanüxügü rü guxüma ga yema Iraéanecüáxgü ga wenaxarü Yerucharéücax woeguxü rü inanaxügüe ga yema puracü nax wena namexëëgüaxü ga Tupanapata. Rü yema puracü rü inaxügü ga yexguma marü taxre ga taunecü ínguxgu rü naétü taxre

ga tauemacü yixíxgu ga Yerucharéüwa nax nayexmagüxü. Rü yema puracümaxá inacuaxgü ga yema Lebítanüxü ga 20 ga taunecüarü yexera nüxü yexmagüxü. <sup>9</sup>Rü nüma ga Yochué rü nanegü rü naeneegü rü nügu nade, rü wüxitücumü nügümaxá naxü namaxá ga Camierí rü nanegü ga Yudátaagü íxígüxü. Rü yexgumarüxü ta nügütanüwa nanaxügüxëxë ga Enadáx nanegü rü naeneegü rü natanüxügü ga Lebítaagü íxígüxü. Rü nümagü nixí ga namaxá inacuáxü ga yema Tupanapataarü mexëëruügu. <sup>10</sup>Rü yexguma yema Tupanapataarü mexëëruügu nanucugu ga nüxíraxücü ga nutagü ga natapüxparagü nawa rütogüine, rü nüma ga chacherdótegü rü mea nügu nangaxáëëcüma yexma nachigü rü nayacue ga norü cornétagü. Rü yema Lebítanüxü ga Achátaagü rü yéma nanana ga norü paxetaruügu ga namaxá Tupanaxü yacuaxüügüxü, yema äëxgacü ga Dabí unagixürixü. <sup>11</sup>Rü ñuxre ga nümagü rü nawiyaegü rü Tupanaxü nicuaxüxügü. Rü yema togü rü nanangáxügü rü ñanagürügü: —iNüxna moxë pexá ya Cori ya Tupana erü nüma rü tamaxá namecüma rü ngéma norü ngechaü i taxcax rü taguma nagux! —ñanagürügü. Rü guxüma ga duüxügü rü nataäxëgü, rü tagaäcü Cori ya Tupanaxü nicuaxüxügü, yerü marü inaxügü ga nax wena namexëëxü ga Cori ya Tupanapata. <sup>12</sup>Rü muxüma ga yema chacherdótegü rü Lebítanüxü rü äëxgacügü ga iyaxü ga marü nüxü daugüxü ga guma nüxíraxüine ga Tupanapata, rü yemagü rü tagaäcü naxauxe, yerü nüxü nadaugü ga wena

nax inaxügüxü ga guma yexwacaxüne ga Tupanapata. Rü yexgumarüxü ta ga togü rü norü taãxëmaxã tagaãcü aita naxügü. <sup>13</sup>Rü yemaacü taxúema nüxü tacuax rü nataãxëgü rüexna nangechaügü yerü yema auxexü rü yema taãxëgüxü rü wüxigu aita naxüe rü yáxüguma nüxü naxínüe.

**Norü uanügü inayachaxächigüxëxë nax naxügüãxü ga guma Tupanapata**

**4** <sup>1-2</sup>Rü yexguma yema norü uanügü nüxü cuaxgügu nax wena namexëëgüaxü ga guma Tupanapata ga yema duüxügü ga Yudátanüxü rü Bëyamítanüxü ga Babiróniaanewa ne íxü ga Yerucharëúcax woeguxü, rü nüma ga norü uanügü rü Chorobabéxütawa rü Yochuéxütawa rü yema togü ga ãëxgacügüxütawa inayadaugü. Rü ñanagürügü nüxü: —iTaxú i toxna penachuxuxü nax pexü tarüngüxëëgüxü nawa i ñaa puracü! Erü toma rü ta pexruxü nüxü tayaxögü ya yimá perü Tupana. Rü naxcax ítanaguuxü ga torü ãmaregü ga yexguma Achíriaanearü ãëxgacü ga Echaradóü nua toxü gagügumama —ñanagürügü. <sup>3</sup>Natürü nüma ga Chorobabé rü Yochué rü yema togü ga ãëxgacügü ga iyaxü, rü nanangãxügü rü ñanagürügü: —Taxucürüwama pemaxã wüxigu tanaxü ya daa torü Tupanapata. Rü marü toxicatátama tanaxü ya napata ya Cori ya torü Tupana, yerü yemaacü nixí ga tomamaxã nüxü yaxuxü ya Chíru ga Pérchiaanecüãxarü ãëxgacü —ñanagürügü. <sup>4</sup>Rü yexguma ga nüma ga yema uanügü ga yema naanegu äxchiügüxü rü inanaxügüe nax chixri

yema Iraéanecüãxgüchiga yadexagüxü nax íyachaxächigüxüçax ga yema puracü.

.....

<sup>8</sup>Rü yexguma Arteyére rü Pérchiaanecüãxarü ãëxgacü yixíxgu, rü yema Iraéanecüãxgüarü uanügüarü ãëxgacü ga Rexú rü nanamu ga norü poperaarü úmatüruxü ga Chíchái nax Arteyérexütawa namuaxü ga wüxi ga popera ga chixexü tümachiga ga guxema Yerucharëúcüãxgü ga ñaxü: .....

<sup>12</sup>“Rü cuxü nüxü tacuaxëxë, Pa ãëxgacüx, rü ngëma Yudfugü ga Iraétanüxügü ga Yerucharëúcax woeguxü ga Babiróniaanewa ne íxü, rü ñuxma rü wena nanamexëëgü ya yima norü ñane i ngëma duüxügü i taxúega inüxü rü chixexü ügüxü. Rü marü inanaxügüe nax namexëëgüaxü i norü ñanearü poxeguxütápux rü marü nananucu ga norü Tupanapataarü nutagü ya natapüxparagü nawa rütogüne”, ñaxü.

.....

<sup>17</sup>Rü yexguma nüma ga ãëxgacü ga Arteyére nayaxuxgu ga yema popera, rü nanangãxü rü ñanagürü: “Pa ãëxgacüx, Pa Rexúx, rü yimá cumucü ya Chíchái ya poperaarü úmatüruxü, rü ngëma cumücügü i ñane ya Chamáriawa ngëxmagüxü, rü guxüma i cumücügü i taxtü i Eufrátëarü oéstewa ngëxmagüxü, rü pexü charümoxë. <sup>18</sup>Rü ngëma perü popera i chauxcax nua pemuxü rü marü chauxütawa nangu rü ngëmaacü nüxü chacuax i perü ore i chomaxã nüxü pixuxü. <sup>19</sup>Rü marü chanamu i chorü ngüxëëruügü nax poperatanügu naxcax

nadaugüxüçax i nachiga i ngêma duüxügü i Yerucharéüçax. Rü yema poperawa rü nüxü nayangaugü nax ngêma nüxü yaxuxü nax aixcúma yixixü rü ngêma duüxügü rü yema nüxíraxügüxü ga Pérchiaanecüâxarü âëxgacügüçax nügü nanutaquexegüxü nax nügü namaxâ nadaixüçax, yerü tama yema âëxgacügüga naxínüechaü. <sup>20</sup>Rü ngëxgumarüxü ta nüxü itayangau rü nüxcúmaxüchima rü nayexmagü ga norü âëxgacügü ga iporaxüchixü ga namaxâ icuáxü ga guxüma ga naanegü i taxtü i Eufrátëarü oéstewaama ngëxmagüxü. Rü yema naanegüçax ga naxmëxwa yexmagüxü rü nüxü nanaxütanügü ga taxü ga diëru. <sup>21</sup>Rü ngëmacax chanaxwaxe nax ípeyachaxächitanüxëëxü i ngêma duüxügü i norü ïanëarü mexëëwa puracüexü, ñuxmatata wena nüxna chaxãga nax ngêma puracü naxügüxüçax. <sup>22</sup>Rü tama name nax ngêma nüxü perüdaunümarexü erü taxü i guxchaxü tá çauxçax ínanguxëëgü i ngêma duüxügü ega tama nüxna pedauxgu”, ñanagürü ga norü poperawa. <sup>23</sup>Rü yexguma naxütawa nanguxgu ga yema âëxgacü ga Arteyéarü popera, rü Rexü rü Chíchái ga popëaarü umatüruxü, rü namücügü rü nüxü nadaumatügü. Rü yexgumatama ga guxüma ga nümagü rü Yerucharéüwa naxí, rü nuácü Yudfügüxü namu nax íyachaxächigüxüçax nax napuracüexü. <sup>24</sup>Rü yemaacü nixí ga íyachaxächixü ga Tupanapataarü mexëë ga Yerucharéüwa. Rü tama nawa napuracüë ñuxmata Darü taxre ga

taunecü inguxëë nax âëxgacü yixixü ga Pérchiaanewa.

**Wena inanaxügüë ga puracü  
Tupanapata nax namexëëgüxü**

**5** <sup>1</sup>Rü nüma ga Tupanaarü orearü uruügü ga Aguéu rü Chacaría ga Ídu nane, rü yema Yudfügü (ga Iraétanüxügü) ga Yudáanecüâxmaxã, rü Yerucharéüçaxmaxã nüxü nayarüxügüë ga yema ore ga Cori ga Tupana namaxã nüxü ixuxü. <sup>2</sup>Rü yexguma ga Chorobabé ga Charatié nane rü Yochué ga Yochadá nane rü wenaxarü inanaxügüë ga nax nawa napuracüexü ga Tupanapataarü mexëë ga Yerucharéüwa. Rü nüma ga Tupanaarü orearü uruügü rü ta nüxü narüngüxëëgü. <sup>3-4</sup>Natürü nüma ga Tanái ga taxtü ga Eufrátëarü oéstewaamaarü âëxgacü, rü nüma ga Chetáru-Bonái rü namücügü, rü Yerucharéüwa naxí rü Yudfügüna (Yudátanüxüna) nayacagü rü ñanagürügü: —¿Texé pexü tamu nax wena penamexëëxü ya daa Tupanapata rü nax peyamexëëgüxü i norü poxeguxü ya daa ïane? —ñanagürügü. Rü ñuxüchi naxçax ínaca ga tümaéga ga guxema Tupanapataarü mexëëwa puracüëxe. <sup>5</sup>Natürü nüma ga Tupana rü nüxna nadau ga yema Yudfügü ga yema puracümaxã icuaxgüxü. Rü yemaacü nataxuma ga texé nüxna nachuxuxü nax napuracüeamaxüçax. Rü yoxni ga yema Yudfügüarü uanügü rü Pérchiaanecüâxarü âëxgacü ga Darfüçax nanaxümatü ga wüxi ga popera nax nüma namexëëxüçax ga yema guxchaxü. <sup>6</sup>Rü yema popera ga Darfüxütawa namugüxü ga Tanái, rü

Chetáru-Bonái, rü norü ngüxêëruüügü ga ãëxgacügü rü ñanagürügü: <sup>7</sup>“Pa ãëxgacüx, Pa Daríux, rü cuxü tarüumoxëgü. <sup>8</sup>Rü cumaxã nüxü tixu nax Yudáanewa Ítayadauxü ya napata ya yimá Yudíugüarü Tupana ya guxãétüwa ngëxmacü. Rü yima rü ínanamexëëgü nuta ya itaxüchicümaxã. Rü ngëma natapüx rü meama mürapewamaxã natüchiã. Rü ngëma puracü rü naxçax napaxaãëgü rü ngëmacax paxama inixü. <sup>9</sup>Rü yema Yudíugü ga yema puracümaxã icuaxgüxüna taca nax texé tixíxü ga namuxe nax wena namexëëgiaxüçax ya yima Tupanapata, rü mürapewamaxã nax napexgüãxü i nachiãwaama. <sup>10</sup>Rü naxçax Ítagü ta ga naégagü ga yema puracümaxã icuaxgüxü rü tayawügüéga nax ngëmaãcü cumaxã nüxü tixuxüçax, Pa ãëxgacüx. <sup>11</sup>Rü nüma rü toxü nangãxügü rü ñanagürügü: ‘Toma rü yimá Tupana ya daxügüxü i naanearü üruxü rü ñoma i naanearü üruüarü duüxügü tixígü. Rü Ítanamexëë ya daa napata ga nüxcümaxüchima ga torü oxigüarü ãëxgacü ga Charumóü üxüne’, ñanagürügü. <sup>12</sup>Rü nüxü nixugügü ta rü ñanagürügü: ‘Rü torü oxigü rü Tupana ya daxüçüãxü nanuxëëgü rü yemacax nüma ga Tupana rü ãëxgacü ga Nabucudonochómëxëgu nanayixëë. Rü nüma ga Nabucudonochó rü nagu napogü ga guma Tupanapata, rü yema duüxügü rü ínanayauxü rü Babiróniaanewa nanagagü’, ñanagürügü. <sup>13</sup>Rü nüma i Yudíugü rü nüxü nixugüë rü guma nüxíraxücü ga taunecü ga nagu Babiróniaanearü ãëxgacü yixícü ga Chíru, rü nüma ga

guma ãëxgacü rü nanaxunagü nax guma Tupanapata rü tá wena namexëëgiaxü. <sup>14</sup>Rü yexgumarüxü ta nüxü nixugüë rü nüma ga ãëxgacü ga Chíru rü marü nanawoeguxëë ga yema Tupanapataarü yemaxügü ga úirunaxçax rü diërumünaxçax ga Nabucudonochó Yerucharéüwa dexü rü Babiróniaanewa yexmane ga norü tupanapatagu yanuxü. Rü nüxü nixugüë ta rü yema Tupanapataarü yemaxügü rü ãëxgacü ga Chíru rü wüxi ga yatü ga Chebacháragu áëgaxüna nanana. Rü nüma ga Chebachára nixí ga Chíru nüxü unetaxü nax Yudáanecüãxarü ãëxgacü yixíxüçax. <sup>15</sup>Rü nüma ga ãëxgacü ga Chíru rü guma Chebacháraxü namu nax yima Yerucharéüwa ngexmane ya Tupanapatawa nanaaxüçax ga yema yemaxügü. Rü ñüxüchi nanamu nax wena namexëëgiaxüçax ga Tupanapata ga noxritama ínaxüxüwa. <sup>16</sup>Rü yemawena ga nüma ga Chebachára rü Yerucharéüwa naxü, rü nananucu ga guma nutagü ya natapüxparagü nawa rütogüë ya yima Tupanapata. Rü ga duüxügü rü yexgumaüçüxü rü ínanaxügüë ga nawa nax napuracuexü, natürü taxüta ningü. <sup>17</sup>Rü ngëmacax i ñüxmax, Pa ãëxgacüx, rü cuxna naxçax taca nax naxçax cudauxü i Babiróniaanearü poperatanügu nax nüxü cucuáxüçax ngoxi aixcüma yixíxü nax ãëxgacü ga Chíru naxunagüxü nax wena naxügiaxüçax ya yima Tupanapata i Yerucharéüwa. Rü ñüxüchi cuxna naxçax taca nax tomaxã nüxü quixuxüçax rü taxacü yixíxü i nagu curüxínüxü i cuma i ngëmachiga”, ñanagürügü ga norü poperawa.

**6** <sup>1</sup>Rü yexguma ga nüma ga äëxgacü ga Darü rü norü duüxügüxü namu ga naxçax nax nadaugüxüçax ga yema mugüpane ga Chíru ümatüxü natanügu ga nüxcümaüxü ga poperagü ga Babiróniaanewa yexmagüxü. <sup>2</sup>Rü yema popera ga nagu naxümatüxü ga yema Chíruarü mugü rü nüxü inayangaugü nagu ga guma äëxgacüpata ga ñane ga Ebatánawa yexmane ga Médiaanewa. <sup>3</sup>Rü yema mu ga yema poperagu ümatüxü rü ñanagürü: “Guma nüxíraxücü ga tauncü nagu äëxgacü yixícü ga Chíru rü ñaxü ga mu naxunagü: ‘Rü guma Tupanapata ga Yerucharéüwa yexmane ga Yudúgu norü ámare ga naxüna nawa ígugüxüne, rü tanaxwaxe i wena namexëxë, rü yima naparagü rü mea inapugü. Rü ngëma norü máchane rü 27 i métruarü ngäxü tá nixí, rü ngëma norü tachiü rü 27 i métruarü ngäxü tá nixí. <sup>4</sup>Rü natapüxaru ügü rü tomaepüxchimüxü ya nutagü ya itacü tá nixí. Rü yimaétüwa rü ngexwacaxüxü i mürapewa i yaxcüxü tá nixücuchigü. Rü chorü diëruarü dauruxü tá nixí i naxütanüxü i guxüma i ngëma puracü. <sup>5</sup>Rü Tupanapataarü yemaxügü i úirunaxçax rü diërumünaxçax ga Nabucudonochó Tupanapatawa dexü, rü tanaxwaxe i Yerucharéüçax tanawoeguxëxë rü nagu tayanú ya yima Tupanapata ya wena tá üxüne, erü woetama ngëma nixí i nachica” ñanagürü ga yema Chíruarü poperawa. <sup>6</sup>Rü yexguma ga nüma ga Pérchiaanecüxaru äëxgacü ga Darü rü nanaxümatü ga wüxi ga popera naxçax ga Tanái ga taxtü ga Eufrátëaru oéstewaamaarü äëxgacü, rü

Chetáru-bonái rü norü ngüxëëruügu ga äëxgacügü ixígüxü ga yema naanewa. Rü norü poperawa rü ñanagürü: “iTaxütáma nüxü penaguxchaxëxë i ngëma Yudúgu nax wena naxügüäxü ya yima Tupanapata! Rü ngëma noxrirüxü i nachicagu tátama nanaxügü. <sup>7</sup>iRü taxütáma penachixewe ya yimá Yudáanecüxaru äëxgacü rü ngëma togü i duüxügü i ngëma puracümaxä icuaxgüxü! <sup>8</sup>Rü ñüxüchi pemaxä nüxü chixu nax perü diërumaxä nüxü perüngüxëgüxü i ngëma Yudúgu i ngëma puracümaxä icuaxgüxü nax naxügüäxüçax ya yima Tupanapata. Rü ngëma diëru i perü naanewachigütama perü duüxügütanüwa ngüxü peyaxucümaxä tá nixí i paxa penaxütanüxü i ngëma Tupanapataarü mexëxë nax ngëmaäcü tama íyachaxächixüçax i ngëma puracü. <sup>9</sup>Rü ngëma chacherdótegü i Yerucharéüwa ngëxmagüxü rü chanaxwaxe i nüxna penamugü i ngëma wocaxacügü rü carnérugü i nanaxwaxegüxü nax naxçax yagugüäxü ya yimá Tupana ya dauxüwa ngëxmacü. iRü naétü nüxna penaxä i trígutexe, rü bínu, rü yucüra, rü orfbuarü chíxü i wüxichigü i ngunexügügu rü tagutáma nixüye! <sup>10</sup>Rü ngëmaäcü tá nüxü natauxcha nax yimá daxügücü ya Tupanacax yagugüäxü i taxacü i namaxä nataaxëxü rü ñüxüchi çaxçax rü çauxacügüçax nayümüxëgüxüçax. <sup>11</sup>Rü ngëxguma chi texé tama naga ñnügu i ñaa chorü mu, rü name nixí i wüxi ya tümapataarü omüta tayaxu rü yimamaxä tüxü tapai nax ngëxma tayuxüçax ya yixema tama naga ñnüxe. Rü yima tümapata rü



ngëxma narüxo rü naachinaxãgüxica ngéma nayaxü. <sup>12</sup>Rü yimá Tupana ya nügüçax nüxü unetacü ya yima ñane ya Yerucharéü rü tá nanachixexë i ngexürüüxümare i nachixüane rüxna norü äëxgacü i tama yanguxëëxü i ñaa chorü mu, rü nachixexëëxü ya yima Tupanapata. Rü choma i Daríu nixí i chanaxunagüxü i ñaa mu. Rü ngëmacax chanaxwaxe i aixcüma naga naxínüe”, ñanagürü ga norü poperawa.

### Ningu ga Tupanapata

<sup>13</sup>Rü nüma ga Tanái ga taxtü ga Eufrátëarü oëstewaamaarü äëxgacü rü Chetáru-bonái rü norü ngüxëëruüügü rü paxama naga naxínüe ga yema mu ga äëxgacü ga Daríu unagüxü. <sup>14</sup>Rü yemaacü ga nüma ga yema Yudíüügü ga yema puracümaxã icuaxgüxü rü nayadaxëëgü ga nax napuracüexü. Rü Tupanaarü orearü uruüügü ga Aguéu rü Chacaría ga Ídu nane rü Tupanaarü oremaxã poraäcü nanataãxëëxë. Rü yemaacü ga guma Tupanapataarü mexëxë rü ningu yema Tupana nüxü ixuxürüxü rü yema Chíru rü Daríu rü Arteyére ga Pérchiaanecüãxarü äëxgacüü unagügüxürüxü. <sup>15</sup>Rü yexguma 6 ga taunecü äëxgacü yixíü ga Daríu ga Pérchiaarü naanewa, rü yexguma nixí ga nax yanguxü ga guma Tupanapata, meama Adáarü tauemacüarü tomaepüxarü ngunexüü (18 febréru).  
.....

### Édra rü namücügümaxã Yerucharéüwa nangugü

**7** <sup>1</sup>Rü yexguma Arteyére rü Pérchiaanecüãxarü äëxgacü yixíü, rü nayexma ga wüxi ga chacherdóte ga

Yudíu ga Édragu äégacü. Rü nüma rü nüxcümaücü ga Aróütaxa nixí.

.....

<sup>6</sup>Rü nüma ga Édra rü wüxi ga nguxëëtaeruxü nixí, rü meama nüxü nacuax ga Tupanaarü mugü ga Moiché ümatüxü. Rü wüxi ga ngunexüü rü äëxgacü ga Arteyérena naca nax Yerucharéüçax namueguaxüçax. Rü nüma ga äëxgacü rü naga naxínü, yerü Tupana rü poraäcü Édraxü narüngüxëë. Rü yemaacü ga Édra rü Babiróniaanewa inaxüächi rü Yerucharéüçax natáegu. <sup>7-9</sup>Rü yexguma marü 7 ga taunecü äëxgacü yixíü ga Arteyére rü natáegu ga Édra. Rü namaxã nawoegu ga wüxítücumü ga Iraétanüxüügü. Rü yematanüwa nayexmagü ga chacherdótegü rü Lebítanüxüügü, rü wiyætanüxüügü, rü Tupanapataarü ñãxarü dauruüügü, rü Tupanapataaarü ngüxëëruüügü. Rü yemamaxã inaxüächi ga Édra meama nüxíraxücü ga tauemacüarü ügüü. Rü Yerucharéüwa nangugü meama guma norü 5 ga tauemacüarü ügüü yerü Tupana rü poraäcü nüxü narüngüxëë. <sup>10</sup>Rü nüma ga Édra rü aixcüma naga narüxínü nax Tupanaarü mugüwa nangüxü rü naga nax namaxüxü rü yema togü ga Iraéanecüãxgüxü nax nangüxëëxüçax ga yema Tupanaarü mugü. <sup>11-12</sup>Rü nüma ga Édra rü wüxi ga nguxëëtaeruxü ga meama guxüma ga Tupanaarü mugüxü cuácü nixí. Rü yexguma Babiróniaanewa inaxüächichaxüxüü ga Édra, rü nüma ga äëxgacü rü Édrana nanaxã ga wüxi ga popera ga ñaxü: “Choma i äëxgacü i Arteyére rü cuxü charüimoxë Pa Chacherdóte, Pa Édrax. Rü cuma rü

wixi i nguxēētaeruxū i meama Tupana ya daxūguciarū mugūxū cuáxe quixī. <sup>13</sup>Rū marū chanaxunagū i wixi i mu nax ngēmaācū guxūma i Iraétanūxūgū i choxmexwa ngēxmagūxū rü naxwaxegūxū nax cumaxā Yerucharéūcax nawoeguxū, rü marū name nax cuwe naxīxū. Rū ngēxgumarūxū ta i ngēma Lebítanūxūgū rü chacherdótegū rü marū name nax nawoeguxū. <sup>14</sup>Ertü choma i āēxcagū, rü ngēma 7 i chorū ngūxēēruūgūmaxā rü ngēma cuxū tamu nax mea cuyangugūxūcax nax ñuxācū ínamaxēxū i ngēma cutanūxūgū i Yudáanewa, rü ñane ya Yerucharéūwa, rü ngoxi nagu ínamaxē i ngēma curū Tupanaarū mugū i cuxū ngēxmaxū. <sup>15</sup>Rū ngēxgumarūxū ta cuxna taxāga nax cuyanaxūcax i ngēma diērumū rü úiru i choma i āēxcagū rü chorū ngūxēēruūgūmaxā torū ngúchaūmaxā cuxna taxāmaregūxū naxcax ya perū Tupana ya Yerucharéūgu āpatacū. <sup>16</sup>Rū ngēxgumarūxū ta rü name nixī i cutanūxūgū i duūxūgū rü chacherdótegū i Babiróniaanewa ngēxmagūxūtanūwa cunade i ngēma diērumū, rü úiru, rü āmaregū i norū ngúchaūmaxā inaxāgūxū naxcax ya yima Tupanapata ya Yerucharéūwa ngexmane. <sup>17</sup>Rū ngēma diērumaxā rü tá naxcax cutaxe i wocaxacūgū, rü carnérugū rü carnéruxacūgū wūxigu namaxā i āmaregū i trígu rü bínu. Rū ngēma āmaregū tá nixī i Tupanapataarū āmarearū guchicaxūwa ícuyaguxū i ngēxguma Yerucharéūwa pengugūgu. <sup>18</sup>Rū ngēma diēru rü úiru íyaxūxūmaxā rü cuma rü cumūcūgū rü tá naxcax petaxe i ngēma pema nagu perūxīnūiegu

rü Tupanaarū ngúchaū ixīxū. <sup>19</sup>Natürü ngēma curū Tupanapataarū ngēmaxūgū i pexna taxāxū rü cunaxwaxe nax cumatama yima Tupanapatagu cuyanuxū i Yerucharéūwa. <sup>20</sup>Rū ngēxguma iyataxūxgu i diēru naxcax ya yima Tupanapata rüxna taxacū i to i puracū i Tupanacax pexūxchaūxū, rü marū name i chorū diēruarū dauruxūxūtawa naxcax ícuca. <sup>21</sup>Rū pemax, Pa Āēxcagūgūx i Taxtū i EufrátEARÜ Oéstewaama Ngēxmagūxe i Diērumaxā Icuaxgūxex, rü choma i Pérchiaanecūāxarū āēxcagū i Arteyére rü pexcax chayamupane i ñaa mugū: ‘iRū nūxna penaxā i guxūma i taxacū i pexūtawa naxcax ínacaxaxū ya yimá chacherdóte ya nguxēētaeruxū ya Édra i meama Tupana ya daxūcūāxarū mugūxū cuáci! <sup>22</sup>Rū name nixī i nūxna penaxā ñuxmata 3,600 quíru naguxū i diērumū rü 22,000 lítru naguxū i trígu, rü 2,200 lítru nagucū ya bínu, rü 2,200 lítru naguxū i chíxū. Rū yima yucūra ya nūma naxcax ínacaxacū irū nūxna penaxā! <sup>23</sup>Rū ngēxgumarūxū ta i ngexūrūxūmare i ngēmaxūgū i Tupana ya daxūcūāx naxwaxexū i napatacax, rü name nixī i nūxna penaxā nax tama chāxūcax rü chaunecax poxcu ínanguxēēxū.’ <sup>24</sup>Rū ngēxgumarūxū ta chanaxunagū i ñaa mu: ‘Rū ngēma chacherdótegū, rü Lebítanūxūgū, rü wiyetaanūxūgū, rü íāxarū dauruūgū rü guxūma i ngēma togū i Tupanapatawa puracūexū, rü tama chanaxwaxe nax āēxcagūaxū nax naxūtanūgūaxū.’ <sup>25</sup>Rū cumax, Pa Édrax, rü name nixī i nagu quixū i ngēma cuax i Tupana cuxna āxū. Rū ngēmaācū ngēma naanegū i taxtū i

EufrátEARÜ oéstEwaama ngëxmagüxü i duüxüügüçax tá nüxü cuxuneta i äëxgacügü i duüxüügiarü guxchaxüarü mexëëruxü ixigüxü, rü äëxgacügü i mea ngëma duüxüügümaxä icuáxü. Rü ngëxguma nangemagu i duüxüügi i tama curü Tupanaarü mugüxü cuaxgüxü, rü name nixi i cuma cunangüexëxë. <sup>26</sup>Rü ngexerüxüxemare ya tama naga ïnüxe i ngëma curü Tupanaarü mugü rü chorü mugü irü noxtacüma tüxü pimax rüexna tüxü ípetaxüchi i perü naanewa, rüexna tüxna penapuxü i tümaarü ngëmaxügi, rüexna tüxü pepoxcu!” ñanagürü ga äëxgacü ga Arteyére norü poperawa.

#### Édraarü Yumüxë

<sup>27</sup>Rü yexguma ga Édra rü nayumüxë rü ñanagürü: “Pa Torü Qxigüarü Tupanax, rü cuma rü cumeciümaxüchi. Rü ngëmacax äëxgacüäëwa ícunangüexë nax yima cupata ya Yerucharéüwa ngexmane wena namexëëgüaxüçax i curü duüxüügi. <sup>28</sup>Rü moxë cuxna chaxä, Pa Tupanax, erü cuxü changechaütümüxü napëxewa ya äëxgacü, rü ngëma 7 i namüciügi, rü guxüma i norü ngüxëëruügi. Rü chapora erü cumax, Pa Tupanax, chauxütawa cungexma rü ngëmacax choxü natauxcha nax nüxü chanangüchaüxëëxü i ñuxre i chautanüxügi i Iraétanüxügiarü äëxgacügü nax chowe Yerucharéüçax nawoeguxü”, ñanagürü ga norü yumüxëwa.

.....

#### Tupanapatawaarü puracütanüxügi

**8** <sup>15</sup>Rü choma ya Édra rü natü ga Abácutügi chanangutaquexëxë ga yema duüxüügi ga chomaxä

Yerucharéüçax woeguchaüxü. Rü yexma tapegü ga tomaepüx ga ngunexü. Rü yéma yoxni tayawügiéga ga duüxügi rü chacherdótegü ga yéma nugüxü. Rü yemaacü nüxü tacuax rü nataxuma ga Lebítanüxü ga nüechamatama yéma íxü. <sup>16</sup>Rü yemaçax Eriechéçax, rü Ariéçax, rü Chemaíaçax, rü Erünatáüçax, rü Yarıçax, rü to i Erünatáüçax, rü Natáüçax, rü Chacaríaçax, rü Mechuráüçax changema, yerü nümagü nixi ga Lebítanüxüarü äëxgacügü yixixü. Rü yexgumarüxü ta naxçax changema ga Yoiarí rü Erünatáü ga nguxëëtaeruügi ixigüxü. <sup>17</sup>Rü Cachipíaarü ïanewa chanamugü ga yema duüxüügi nax Lebítanüxüarü äëxgacü ga Ídumaxä, rü namüciügi ga ngüxëëruügi ga yema ïanearü Tupanapatawa puracüexümaxä yanadexagüxüçax rü namaxä nüxü yaxugüxüçax nax toxütawa namugüaxüçax i Lebítanüxügi nax yima Tupanapata ya Yerucharéüwa ngexmanewa toxü nangüxëëgüxüçax. <sup>18</sup>Rü Tupana rü tomaxä namecüma, rü yemaçax toxütawa nanamu ga Cherebía ga meama poperaxü cuácü ga Lebítanüxü ga Marítaxa ixücü. Rü nüma ga Cherebía rü toxütawa nangu wüxigu namaxä ga nanegü rü naeneegü ga meama 18 ga duüxügi ixigüxü. <sup>19</sup>Rü yexgumarüxü ta Tupana yéma nanamugü ga Achabía namaxä ga namüciü ga Yechaía ga Merári nane ixücü. Rü namaxä ïnangugü ga nanegü rü naeneegü ga meama 20 ga duüxügi ixigüxü. <sup>20</sup>Rü naétüwa rü ïnangugü ga 220 ga Tupanapatawaarü ngüxëëruügi. Rü nüxcüma rü äëxgacü ga Dabí nixi ga

yemaacü inanücü naxçax ga Tupanapataarü puracü. Rü guxüma ga yema 220 ga ngüxëeruüğü rü nayawüğü ga naëgagü. <sup>21</sup>Rü yemawena rü chanaxunagü nax aureäcü tayumüxëgüxü natü ga Abácutüwa nax Tupanamaxä nüxü tixugüxüçax ga torü chixexüğü, rü Tupanana naxçax tacaxaxüçax nax mea toxü naxüpëtüxüçax i namawa, rü toxna rü toxocüguna nadauxüçax wüxigu namaxä i guxüma i torü ngëmaxüğü i namaxä itaxixü. <sup>22</sup>Yerü chorü äne nixi ga äëxgacüxütawa naxçax ichaçaxaxü ga churaragü ga cowarugu ixü nax torü uanüguna toxü inapoxüxüçax i namawa, yerü yexguma taxüta itaxiächigu rü marü äëxgacümaxä nüxü tixugü nax Tupana tüxü rüngüxëexü ya yixema naxçax daugüxe, natürü tüxü napoxcu ya guxäma ya tama naga inüexe. <sup>23</sup>Rü ngëmacax aureäcüma tayumüxëgü rü Tupanana tacagüe nax toxna nadauxüçax. Rü nüma rü aixcüma toxü nangäxüga.

.....

<sup>31</sup>Rü natü ga Abácutüwa itaxiächi meama nüxiraxücü ga tauemacüarü 12 arü ngunexügu nax Yerucharéüwa taxixü. Rü Tupana rü namawa toxna nadau rü toxü inapoxü nüxna ga torü uanüğü rü ngítaaxgüxü. <sup>32</sup>Rü yexguma Yerucharéüwa tangugügu, rü tomaepüx ga ngunexü tarüngüğü.

.....

<sup>35</sup>Rü yemawena rü wüxichigü ga toma rü naxüna itagu naxçax ga guma torü Tupana. Rü guxüma ga Iraétanüxügüégagu rü itanagu ga 12 ga wocaxacüğü rü 96 ga carnërugü rü 77

ga carnërucacüğü. Rü torü chixexügüarü ütanüruxü rü itanagu ga 12 ga chübugü. <sup>36</sup>Rü toma rü yema nachixüanegü ga taxtü ga Eufrátëarü oëstewaamaarü äëxgacüguna tanaxä ga yema popera ga Pérchiaanecüäxaru äëxgacü toxna äxü. Rü nümagü rü paxa toxü narüngüxëë nax wena tanaxüxüçax ga guma Tupanapata.

#### Édra rü Tupanamaxä nüxü nixu ga Iraéanecüäxgüarü chixexü

**9** <sup>1</sup>Rü yemawena ga yema Iraéanecüäxgüarü äëxgacüğü ga marü nüxira Yerucharéüwa ngugüxü rü chaçaxçax naxi rü chomaxä nüxü nayarüxugüe rü ñanagürüğü: “Muxüma i ngëma tatanüxüğü i Iraéanecüäxgü ga nüxira tomaxä woeguxü, rü woo chacherdótegü rü Lebítanüxüğü rü tama nügüxü nüxü naxoxoxgü i nacümagü i chixexüğü i nagu naxixü i ngëma togü i duüxüğü i nua törü naanegu yaxächüügüxü. Natürü ngëma tatanüxüğü rü woo poraäcü Tupanapëxewa nachixe nax ngëma togücümagu nax naxixü, natürü nagu naxiama i nacümagü i ngëma Canaäütanüxüğü rü Itfatanüxüğü, rü Ferechéutanüxüğü, rü Yebuchéutanüxüğü, rü Amóütanüxüğü, rü Moátanüxüğü, rü Equítuanecüäxgü, rü Amoréutanüxüğü. <sup>2</sup>Yerü nüma i tatanüxüğü rü nanegü rü marü nixäxmaçgü namaxä i ngëma togü i duüxügüxacüğü i nua törü naanegu yaxächüügüxü i tama Tupanaaxü yaxögüxü. Rü yemaacü ga Tupanaarü duüxüğü rü yema tama yaxögüxü ga duüxügümaxä nüğü narüxücutanü. Rü

tatanüxügü i ãëxgacügü nixĩ ga nüxıra inaxügüxü nax nagu naxixü ga yema chixexü”, ñanagürügü choxü. <sup>3</sup>Rü yexguma yema orexü chaxinügu rü chorü ngechaümaxã chaugü charügáutechiru rü chaugü chapuxüyae rü chaugü chapuxüchinagu, yerü poraãcü chauãëwa nangux ga yema. <sup>4</sup>Rü guxüma ga yema Iraéanecüãxgü ga norü Tupanaarü poxcucax müëxü nagagu ga tatanüxügüarü chixexügü rü chauxütawa nayarütogü. Rü choma rü chorü ngechaümaxã yematama chauchicawa charüto ñuxmata nawa nangu ga yema yáuanecüarü ora ga nagu Tupanacax yagügüãxü ga ãmaregü. <sup>5</sup>Rü yexguma yema orawa nanguxgu rü marü choxü nangupetüxüra ga nax changechaüxü. Rü charügáuxchiruãcüma ichanaxügü nax chayümüëxü. Rü Cori ya Tupanamaxã chidexa. <sup>6</sup>Rü ñachagürü nüxü: “Pa Chorü Tupanax, Pa Chorü Tupanax, rü poraãcü chaxãnexüchi i cupëxewa. Rü tama nüxü chacuax nax taxacü chaxüxü rü ñuxãcü cumaxã chidexaxü. Erü ngëma torü chixexü rü marü nangupetüxüchiamã rü ngëma torü pecádugü rü marü ñoma i naane namaxã nanapã. <sup>7</sup>Rü nüxcümacürüiwa ga torü oxigü rü chixexügu namaxëx rü ñomaxücüxü i toma rü ta nagu ítamaxë. Rü ngëma torü chixexügüga rü toma rü torü ãëxgacügü rü torü chacherdótegü rü naxmëxgu tayi i ngëma to i nachixüanecüãxgüarü ãëxgacügü i tama cuxü yaxögüxü. Rü nümagü rü toxü ínayauxü rü toxcax nangixgü rü duüxügüpëxewa toxü nacugüe. Rü ngëmatama nixĩ i ñuxma toxü

ngupetüxü. <sup>8</sup>Natürü i ñuxmax, Pa Corix, Pa Torü Tupanax, rü ngëma nax tomaxã cumecümaxügüga rü toxü cunatauxchaxëxë nax ñuxre i toma rü wena ñaa naane i cuma cuxüünexëëxücax tawoeguxü nax nagu taxãchiügüxücax. Rü cuma rü wüxi i ngexwacaxüxü i ínü toxna cuxã, rü ngëmaãcü paxaãchi toxü cutaãxëxëxë naétüwa i torü guxchaxügü. <sup>9</sup>Rü woo to ga ãëxgacümëxëwa nax tangëmagüxü natürü i cumax rü tama toxü ícuwogü. Rü ngëma Pérchiaanecüãxarü ãëxgacügüãëwa ícunanguxëxë nax tomaxã namecümagüxücax. Rü toxna cudau nax ñuxma rü ta tamaxëxücax, rü ngëmaãcü tawoeguxücax, rü wena noxrixüxü ga nachicagutama tanaxüxücax ya yima cupata. Rü cumax, Pa Tupanax, rü toxna cudau i guxüma i ñaa naane i Yudáanewa rü daa íane ya Yerucharéüwa. <sup>10</sup>Natürü i ñuxmax, Pa Tupanax írü taxacüxü tá cumaxã tixuxü nawena i guxüma i ngëma chixexü i taxüxü. Erü aixcüma nixĩ nax tama naga taxinüexü i curü mugü”, ñachagürü ga chorü yumüxëwa.

.....

**Yudíugü rü ínanawoxü ga yema ngexügü  
ga to ga nachixüanecüãxgü ixigüxü**

**10** <sup>1</sup>Rü yexguma ñaxtüanegu chayangücuchigu norü toxmãxtawa ga guma Tupanapata, rü yéma chaxauxãcüma chayümüxë, rü Tupanamaxã nüxü chixu ga torü chixexügü. Rü yexgumayane yéma nangugü ga muxüma ga yatügü rü ngexügü rü buxügü rü chauxütagu nangutaquëxe rü wüxigu chomaxã

naxaxe. <sup>2</sup>Rü yexguma nüma ga Checanía ga Yeríe nane ga Eráútanüxü ixícü rü ñanagürü choxü: “Rü aixcüma nixí i Tupanapexewa chixexü ixügüxü. Erü ngexügü i to i nachixüanecüâx ixügüxü i tama Tupanaaxü yaxögüxümaxâ tixâxmaxgü i yixema i Iraéanecüâxgü. Natürü nangexmaama nax ñuxâcü Tupanapexewa namexêêxü i ngêma torü chixexü. <sup>3</sup>Rü ngêmacax tórü Tupanapexewa tá nüxü tixu nax tüxna tixígachixücax ya yixema toxmaxgü ya tama Tupanaaxü yaxögüxe rü yixema toxocügü ya tümawa toxü ngêxmagüxe. Rü ngêmaâcü ngêma cuma rü ngêma togü i duüxügü i aixcüma Tupanaga ñnüexü tomaxâ nüxü ixuxürüxü tá naga taxínüe ya tórü Cori ya Tupanaarü mugü. <sup>4</sup>iRü inachi rü naxü i ngêma Tupana cuxü muxü nax cunaxüxü! Rü toma rü tá cuga taxínüe. iËcü tomaxâ nüxü ixu nax ñuxâcü tá tanamexêê i ngêma chixexü i taxüxü!” ñanagürü.  
.....

<sup>10</sup>Rü yexguma ga choma ga chacherdóte ya Édra rü ichachi rü

ñachagürü: “Pema rü poraâcü chixexü pexü erü namaxâ pixâxmaxgü i ngêma ngexügü i to i nachixüanecüâx ixügüxü. Rü ngêmaâcü penayexeraxêê i tórü chixexügü i Tupanapexewa.

<sup>11</sup>Rü ñuxma rü penaxwaxe i tórü oxigüarü Tupanapexewa penaxü i ngêma nüma nanaxwaxexü rü nüxü pixu nax aixcümama chixexü pexügüxü. Rü ngêmacax pemaxâ nüxü chixu irü nüxna pixígachi i ngêma duüxügü i tama yaxögüxü rü ngêma ngexügü i to i nachixüanecüâxgü ixügüxü!” ñachagürü. <sup>12</sup>Rü yexguma yemaxü naxínüegu ga guxüma ga yema duüxügü rü tagaâcü nanangâxügagü rü ñanagürügü: “Ngêmaâcü tá tanaxü i ngêma toxü cumuxü”, ñanagürügü.

.....

<sup>44</sup>Rü guxüma ga yema Iraéanecüâxgü ga to ga nachixüanecüâx ga ngexügümaxâ ixâxmaxgüxü rü tümangatügücax tüxü nawoeguxêê wüxigu tümamaxâ ga tümamaxügü.

# NEHEMÍAS

## (Neemía)

Neemía rü natanüügüçax nayumüxê

**1** <sup>1</sup>Rü ñaa nixí i chauchiga i choma i Neemía ya Acaría nane nax chixíxü. Rü yexguma 20 ga taunecü äëxgacü yixíxgu ga Artayére rü meama Quiréuarü taumacügu (diciembre), rü choma ga Neemía rü ñane ga Chúchawa chayexma. <sup>2</sup>Rü chauxütawa nangu ga chauenexê ga Ananí namaxã ga ñuxre ga yatügü ga Yudáanewa ne íxü. Rü yexguma chayoxnie ga nüxna nax chacaxaxü nachiga nax ñuxácü íngupetüxü ga Yerucharéüwa, rü ñachagürü: “¿Ñuxácü nüxü íngupetüxü i ngéma? Rü yema Yudíutanüügü ga Yudáanegu rüchoxü çrü mea nüxü nangupetüxü rü êxna tama?” ñachagürü. <sup>3</sup>Rü nümagü rü choxü nangãxü rü ñanagürügü: “Ngéma rü tama aixcüma mea inixü. Rü ngéma duüxü rü Yudáanegu rüchoxü rü poraäcü ngüxü ningegü rü chixexü nüxü naxüpetü. Rü ngéma natapüx ya yima tórü ñane ya Yerucharéü rü nanaxaixrügumaraxütama ga nagu nax napogüexü, rü yema natapüxarü íãxgü ga ínguxü rü taütama nimexêëgü”,

ñanagürügü. <sup>4</sup>Rü yexguma yemaxü chaxínügu rü poraäcü choxü nangüx rü chaxaxu. Rü ñuxre ga ngunexü rü chaxaure rü Cori ya Tupanamaxã chidexa. <sup>5</sup>Rü ñachagürü nüxü: “Pa Cori Pa Tupana ya Daxücüãx, cuma rü Tupana ya guxáétüwa ngëxmacü quixí, rü cuxãücüma. Rü taguma naxüchicüxü i ngéma nüxü quixuxü, erü cuma rü namaxã quixaixcüma i ngéma duüxü rü cuxü ngechaügüxü rü yanguxêëgüxü i curü mugü. <sup>6</sup>Rü ngëmacax i ñuxma rü cuxü chacaxaxü nax choxü nüxü cuxínüxü i ñaa chorü yumüxê i chütacü rü ngunecü cumaxã nüxü chixuxü naxçax i ngéma curü duüxü rü Iraétanüügü. Rü nüxü chacuax nax cupexewa chixexü taxüxü i toma i Iraétanüügü, rü woo i choma rü chautanüügü rü cupexewa chixexü taxügü. <sup>7</sup>Rü cupexewa poraäcü chixexü taxügü, erü tama tayanguxêë i ngéma curü mugü rü curü ucuxëgü ga curü duü ga Moichéwa tomaxã nüxü quixuxü. <sup>8-9</sup>Rü nüxna nacuaxächí i curü ore i Moichémaxã nüxü quixuxü! Erü cuma rü nüxü quixu rü ngëxguma toma chixexü cupexewa taxüxgu rü tá togü i

nachixüanegügu toxü cuwoonemare, natürü ngëxguma chi wena cuxcax tawoeguxgu rü aixcüma nagu tamaxëgu i curü mugü, rü woo ñoma i naane íyacuáxügu tawoonegu, rü cuma rü chi tochixüanecax toxü cuyagagü, rü ngëma nachica i üünexü i cumatama nüxü cuxunetaxü nax nawa cungexmaxüwa wenaxarü toxü cugagüxücax. <sup>10</sup>Toma rü curü duüxügü i curü puracütanüxü tixügü, yerü cuma rü curü poramaxá torü uanügümexëwa toxü ícungüxüxëxë. <sup>11</sup>Pa Corix, cuxü chachixewe nax choxü nüxü cuxínüxücax i ñaa chorü yumüxë i cumaxá nüxü chixuxü i chomax nax curü duüxü chixixü. Erü ngëma chorü ngüchaü i nagu charüxínüxü nixí nax cuxü chicuaxüüxü. Rü ngëxgumarüxü ta cuxna naxcax chaca nax choxü curüngüxüxëxü nax chomaxá namecümáxücax ya ãëxgacü”, ñachagürü.

**Artayére rü Neemíaxü ningex nax Yerucharéüwa naxüxücax**

**2** <sup>1</sup>Rü yexguma ga choma rü ãëxgacü ga Artayérepáüarü üacuxürüxü chixí. Rü wüxi ga ngunexü ga Misáüarü tauemacügu (abril) ga yexguma Artayére marü 20 ga taunecü ãëxgacü yixíxgu, rü naxpáxü bínuxaxá chaxüácuyane rü nüma ga ãëxgacü rü choxü nadawenü ga nax changechaüchametüxü. Rü yemacax choxna naca rü ñanagürü: <sup>2</sup>“Cuxü chadau nax cungechaüchametüxü. ¿Taxacü cuxü nangupetü? Tama cuwa nangox nax quidaxawexü. ¿Rü ngëmacax taxacü cuxü nangexma? ¿Ëxna wüxi i guxchaxü?”, ñanagürü

choxü. Rü yexguma ga choma rü poraäcü chamuü. <sup>3</sup>Rü ãëxgacüxü changäxüga rü ñachagürü: “Pa ãëxgacüx iGuxüguma namaxü! ¿Ñuxäcü chi i tama changechaüxü? Erü yima íane ya chaunatügü nagu taxgüne rü nachicaxicatama nixí, rü natapüxarü íäxgü rü ínanagu”, ñachagürü. <sup>4</sup>Rü nüma ga ãëxgacü rü choxna naca rü ñanagürü: “¿Taxacüwa i cuxü charüngüxüxëxü?” ñanagürü. Rü yexguma ga choma rü Tupanamexëgu chaugü chaxü. <sup>5</sup>Rü ãëxgacüxü changäxüga rü ñachagürü: “Ngëxguma chi cuxcax namexgu, Pa ãëxgacüx, rü choxü curüngüxüxëxüchaxgux, rü cuxna chaca, Pa ãëxgacüx, nax Yudáanewa choxü cumuxü nawa ya yima íane ya chaunatügü nagu taxgüne, nax ngëmaäcü wena chanamexëxëxücax”, ñachagürü. <sup>6</sup>Rü ngíma ga ãëxgacümax rü nacüwawa irüto. Rü nüma ga ãëxgacü rü choxna naca rü ñanagürü: “¿Ñuxre i ngunexü tá icuyarütaxuxü nax ngëma cuxüxü? ¿Rü ñuxgu tá cutáeguxü?” ñanagürü. Rü choma rü namaxá nüxü chixu ga ngunexü ga nagu tá chatáeguxü. Rü yexguma ga nüma rü yéma choxü namu. <sup>7</sup>Rü yema to ga naxcax íchacaxaxü nixí ga choxna naxáaxü ga wüxi ga popera naxcax ga yema ãëxgacügü ga taxtü ga Eufrátarü tocutüwa yexmagüxü nax yemaacü norü naanewa mea choxü namupetügüxücax ñuxmata Yudáanewa changu. <sup>8</sup>Rü to ga popera ga naxcax íchacaxaxü, rü Achácax nixí. Rü nüma nixí ga ãëxgacüarü naixnecüarü dauruxü yixíxü. Rü yema poperawa rü ãëxgacü nüxna naxága nax mürapewa choxna



tanaxãxũcax nax ngẽmamaxã  
chanamexẽxũcax i norũ ãxgũ ya yima  
Tupanapataarũ dauxũtaechica rũ ngẽma  
ïanearũ poxeguxũarũ ãxgũ, rũ yima  
ïpata ya nawa tá changexmane. Rũ  
nũma ga ãxgacũ rũ choxna nanaxã ga  
guxũma ga yema naxcax íchacaxaxũ,  
yerũ Cori ya Tupana rũ poraãcũ choxũ  
narũngũixẽ. <sup>9</sup>Rũ yexguma taxtũ ga  
Eufrátarũ tocutiwa yexmagũxũ ga  
ãxgacũgũxũtawa changuxgu, rũ nũxna  
chanana ga yema poperagũ ga ãxgacũ  
ga Artayére yéma mugũxũ. Rũ choxũ  
ínixũmücũgũ ga ñuxre ga churaragũarũ  
ãxgacũgũ namaxã ga norũ churaragũ  
ga cowarutagu íxũ. <sup>10</sup>Natürũ yexguma  
Chaũbára ga Oróũtanũxũgũarũ ãxgacũ,  
rũ Tobía ga Amóũtanũxũgũarũ ãxgacũ  
nũxũ cuaxgũgu nax íchanguxũ, rũ  
poraãcũ nanue yerũ nũxũ nacuaxgũ nax  
chautanũxũgũ ga Iraéanecũãxgũarũ  
ngũixẽewa nax chaxũxũ.

#### Wena nanamexẽxã ga Yerucharéũtapũx

<sup>11-12</sup>Rũ düxwa Yerucharéũarũ ïanewa  
changu. Rũ yexguma tomaepũx ga  
ngunexũ yéma chayexmagu, rũ chũtacũ  
rũ ícharũda. Rũ choxũ nixũmücũgũ ga  
ñuxre ga yatũ nax ítayadaugũxũcax ga  
guma ïanearũ poxeguxũ. Natürũ  
taxúemaama nũxũ chixu ga yema  
Tupana chauãewa nguxẽxũ nax  
taxacũcax Yerucharéũwa chaxũxũ. Rũ  
chaxicatama búruétũgu chixũ. <sup>13</sup>Rũ  
yematama chũtaxũgu rũ Ngategu  
ãégaxũ ga ãxwa íchayaxũxũ rũ  
Dragóũarũ Puchuwaama chaxũ ñuxmata  
Guxchirearũ ãxwa changu. Rũ meama  
chanangugũ ga yema natapũx ga guma  
Yerucharéũarũ poxeguxũ ga nagu

napogũexũ rũ norũ ãxgũ ga ínaguxũ.  
<sup>14</sup>Rũ ñuxũchi ichixũchigũ ñuxmata  
Dexã i Chuchuxũgu ãégaxũ ga ãxwa  
changu ga ãxgacũarũ puchu  
íyexmaxũwa. Natürũ ga chorũ búru rũ  
taxuacũma naétũwa naxũpetũ ga yema  
natapũxarũ puexũ. <sup>15</sup>Rũ yexguma rũ  
taũtama ningune. Rũ yema ngatexũwa  
dauxũ chaxĩ rũ yéma chayangugũ ga  
yema natapũx. Rũ yemaacũ nũxũ  
íchayaxũegu ga guma ïanetapũx, rũ  
wenaxarũ Ngategu ãégaxũ ga ãxwa  
chixũcu. <sup>16</sup>Rũ guma ïanearũ ãxgacũgũ  
rũ tama nũxũ nacuax ga ngextã nax  
chaxũxũ rũ taxacũcax yéma chaxũxũ.  
Yerũ taxũta yema chacherdótegũmaxã,  
rũ ïanearũ ãxgacũgũmaxã, rũ  
puracũtanũxũmaxã, rũ yema togũ ga  
Yudfũgũmaxã nũxũ chixu nax taxacũcax  
Yerucharéũwa changuxũ. <sup>17</sup>Rũ yemacax  
chanangutaquexexẽ ga yema duũxũgũ  
rũ ñachagürũ nũxũ: “Pema meama nũxũ  
pecuax nax wũxi i guxchaxũwa  
ingexmagũxũ, rũ daa ïane ya  
Yerucharéũ rũ nachixe, rũ natapũxarũ  
ãxgũ rũ ínagu. iRũ ngĩxã wũxigu  
tanamexẽxã ya daa ïanearũ poxeguxũ  
nax ngẽmaãcũ marũ tama wũxi i  
cugüruxũ íxgũxũcax!” ñachagürũ. <sup>18</sup>Rũ  
yexguma namaxã nũxũ chixuxgu nax  
ñuxãcũ Tupana poraãcũ choxũ  
rũngũxẽxũ rũ yema ore ga ãxgacũ ga  
Artayére chomaxã nũxũ íxuxũ, rũ nũma  
ga duũxũgũ rũ choxũ nangãxũgagũ rũ  
ñanagürũgũ: “iNgĩxã itanaxũgũ nax  
namexẽxã ya daa ïanearũ poxeguxũ!”  
ñanagürũgũ. Rũ inanaxũgũe ga nax  
napuracũexũ. <sup>19</sup>Natürũ yexguma  
Chaũbára ga Oróũtanũxũgũarũ ãxgacũ,  
rũ Tobía ga Amóũtanũxũgũarũ ãxgacũ,

rü Yechéũ ga Árabe ixĩxũ nüxũ  
cuáchigagu ga yema puracü rü toxũ  
nacugüe rü togu nidaucüraxũgü. Rü  
toxna naca rü ñanagürügü toxũ:  
“¿Taxacü ípexüe? ¿Ëxna nagu perixĩnue  
nax tama aêxgacüga pexĩnuexũ?”  
ñanagürügü. <sup>20</sup>Natürü ga choma rü  
chanangãxũga rü ñacharügü: “Nüma ya  
daxücüãx ya Tupana rü tá toxũ  
narüngũxê. Toma i norü duũxũgü rü  
itanaxügü nax tanamexêxũ ya daa  
ñanearü poxeguxũ. Natürü i pemax rü  
nataxuma i taxacü i pexna üxũ nawa i  
ñaa puracü”, ñachagürü nüxũ.  
.....

#### Norü uanügü nüxũ nacugüe ga Yudfugü

**4** <sup>1</sup>Rü yexguma nüma ga Chaũbára  
nüxũ ñnuchigagu ga nax  
namexêgüaxũ ga guma ñanearü  
poxeguxũ, rü nanu rü norü numaxã  
toxũ nacugü. <sup>2</sup>Rü ñanagürü napexewa  
ga namücügü ga Chamáriaciãx ga  
churaragüarü aêxgacügü: “¿Taxacügu  
narüxĩnue i ngêma Yudfugü i taiyamaxã  
yuechaũxũ? ¿Rü nüma nagu naxĩnuegu  
rü chi wena nüxũ tanaxüxêxê nax  
naxũna norü Tupanacax nadajxũ rü  
ñaguxũ? ¿Ëxna nagu naxĩnuegu rü  
wüxi i ngunexũgu tátama nüxũ nagux i  
ngêma puracü i naxügüxũ? ¿Ëxna  
ngêma naxtapüx i ngêxma aũxchitaxũ i  
marü ixaexũwa tátama nadeaxũ ya  
ngexwacaxücü ya nutagü?” ñanagürü.  
<sup>3</sup>Rü naxũtawa nayexma ga Tobía ga  
Amóũtanüxũ. Rü nüma rü ñanagürü ta:  
“iDücax i ngêma naxtapüx i naxügüxũ!  
Rü wüxi i cugüruxũ nixĩ. Erü woo wüxi  
i ngowa daxũ nawa ïxgu rü tá  
nayawaxtapüxêxê”, ñanagürü.

#### Neemíaarü yumüxê

<sup>4</sup>Rü yexguma ga chomax, rü  
chayumüxê rü Tupanamaxã chidexa rü  
ñachagürü: “Pa Torü Tupanax inüxũ  
naxĩnü nax ñuxácü toxũ nacugüexũ!  
iËcü naxcaxtama natáeguxêxê i ngêma  
namaxã toxũ nacugüexũ, nax ngêmaacü  
norü uanümexêgu nayixixücax rü to i  
nachixũanewa nagagüaxücax!”  
ñachagürü.  
.....

#### Norü uanügü nanaxãxünegü

<sup>6</sup>Rü nawa tapuracüeama ga yema  
ñanetapüx ga marü ngãxũgu ixũxũ ga  
nax naxüxũ. Rü nüma ga duũxũgü rü  
norü ngüchaũmaxã napuracüe. <sup>7</sup>Natürü  
yexguma torü uanügü ga Chaũbára rü  
Tobía rü yema Árabegü, rü  
Amóũtanüxũgü, rü Adóũtanüxũgü nüxũ  
ñnuegu nax mea iyaxüxũ ga yema  
puracü ga Yerucharéüarü  
poxeguxũtapüxwa rü yema  
ãxmaxétügüxũ rü marü nax  
nañaxtagüãxũ, rü nümagü ga yema  
uanügü rü poraacü nanue. <sup>8</sup>Rü guxũma  
ga nüma rü wüxigu nügümaxã nagu  
narüxĩnue nax Yerucharéücax  
íyaxüãchixũ nax nagu napogüexücax ga  
naxtapüx. <sup>9</sup>Rü yexguma ga toma rü  
tayumüxêgü, rü Tupanana taca nax toxũ  
nangüxêxêxücax. Rü ñuxüchi  
daxütaeruxũ itamugü nax chütacü rü  
ngunecü nadauxütaegüxücax nax  
yemaacü togu ítapoxüxücax. <sup>10</sup>Rü  
nümaxũ ga yema Yudáanecüãxgü ga  
yema puracümaxã icuãxgüxũ rü  
nidexagü rü ñanagürügü: “Rü ngêma  
puracütanüxũ i nuta ñanagügüxũ rü

marü nipaerü erü namuxüchima ya nuta ya äüxchitacü, rü ngëmaäcü tagutáma tüxü name i ngëma naxtapüx”, ñanagürügü. <sup>11</sup>Rü yema torü uanügü rü nagu narüxíniue nax taxüchima nüxü tacuaxgüxü rü nüxü tadauxü ga yexguma chi bexma totanügu nachocuxgux nax toxü nadaixücax, rü yemaacü nax íyachaxächigüxëëãxücax ga yema puracü. <sup>12</sup>Natürü yema totanüxügü ga torü uanügiarü ngaicamagu pegüxü rü muexpüxcüna tomaxã nüxü nayarüxugüe, rü yema torü uanügü rü guxücüwawa toxcax nax íyaxüächichaüxü. <sup>13</sup>Rü yemaçax ga choma rü chanamu ga duüxügü nax nügütanüxügüchigüäcü nügü iyanuxücax ga yema naxtapüxpechitagu ga ínanuxchanexüwa rü ínaxãmxaxetüchigüxüwa, rü taramaxã, rü wocaemaxã, rü würamaxã íxãnxexü nax yemamaxã nügü ínapoxügüxücax. <sup>14</sup>Rü yexguma nüxü chicuaxächigu ga nax namüëxü ga duüxügü, rü nüxna chaxu ga guxüma ga äëxgacügü rü duüxügü nax chomaxã nangutaquexegüxücax, rü ñachagürü nüxü: “¡Taxü i pemuëxü! ¡Rü nüxna pecuaxächie rü nüma ya Tupana rü poraxüchicü rü üünecü nax yixüxü! Rü ngëmaçax name nixí nax ípemexü nax perü uanümaxã pegü pedaxü rü ípenapoxüxü i pemücügü, rü petanüxügü rü pepatacüaxgü”, ñachagürü nüxü. <sup>15</sup>Rü yexguma torü uanügü nüxü cauxchigagügu ga toma rü marü nüxü nax tacuáxü ga yema nagu naxíniüexü, rü Tupana rü marü toxü ínapoxüxü, rü yemaçax ga nümagü rü toxna nixígachitanü. Rü toma rü naxcax

tawoegu ga nawa nax tapuracüexü ga yema íanearü poxeguxütapüx. <sup>16-17</sup>Natürü yexgumaäcüxü rü ngãxütücumü ga duüxügü napuracüe rü yema totücumü rü nadauxütaegü ga meama íxãnxexü wocaemaxã rü würamaxã. Rü nanangaxcu ga norü poxüruügü ga escüdügü, rü nacüxcu ga naremüarü poxüruxü. Rü yema norü äëxgacügü ga Yudáanecüãxgü rü natanügu naxägü rü ínamemare nax nüxna nadaugüxü ga yema duüxügü ga íanetaxpüxwa puracüexü. Rü yema togü ga puracütanüxügü ga nutaarü nugüruügü rü napuracüeama, natürü äxneäcüma nananugüama ga nutagü. <sup>18</sup>Rü guxüma ga yema puracütanüxügü rü nügücüwawa nanatuxëxë ga norü tara. Rü yema cornétaarü cueruxü rü chauxütawatama nayexma nax yemaacü nüxü natauxchaxücax nax paxama yacaxüãxücax ga uanügü. ....

#### Neemíaxü nimaxgüchäu

**6** <sup>1</sup>Rü yema torü uanügü ga Chaübára rü Tobía rü yema Árabe ga Yechéü rü yema togü ga torü uanügü rü nüxü nacuáxchigagü nax wena chanamexëxü ga yema íanearü poxeguxütapüx. Rü taxuxüma ga ngextá íyangoxnaxüwa rü nüxü chaxüpetü ga nax chachauxtaxü. Rü norü íãxgüxicatama nixí ga choxü taxuxü nax chanucuxü. <sup>2</sup>Rü yemaçax ga yema chorü uanügü ga Chaübára rü Yechéü rü chauxütawa namugagü nax chomaxã nangutaquexegüxücax nawa ga wüxi ga íane ga Ónuarü ngatexüwa yexmane. Natürü yema nagu naxíniüexü nixí nax

yemaacü choxũ yamãxgũchaũxũ. <sup>3</sup>Rü yexguma ga chomax rü yéma chanamugü ga duũxũgü nax namaxã nüxũ yanaxugũxũcãx nax choma rü taxucürüwa yéma chaxũxũ yerü nataxüchi ga chorü puracü, rü changechica yerü chi yéma chaxũxgu rü yema puracü ga íchaxũxũ rü chi ínayachaxãchi. <sup>4</sup>Rü ägümüciexpüxcüna nixĩ ga chaũxcãx yéma namugagũxũ, natürü ga choma rü noxriãcütama chanangãxũ. <sup>5</sup>Rü yexguma ga nüma ga Chaũbára rü norü 5 expüxcüna wüxi ga norü duũxũmaxã chaũxcãx yéma namuga, rü yematama ore ga noxri chaũxcãx yéma namaxã namugaxütama nixĩ ga nagu naxümatüxũ ga yema popera ga yéma chauxütawa nangexũ. <sup>6</sup>Rü yema popera rü ñaxũ nagu naxümatü: “Nua rü duũxũgütanüwa rü Yechéũxütawa nüxũ taxĩnüe nax cuma rü ngẽma Yudfugümaxã nagu perüxĩnüexũ nax tama äëxgacüga pexĩnüexũ, rü ngẽmacãx yixixũ nax ípenamexëëxũ i ngẽma naxtapüx ya yima íane. Rü ngëxgumarüxũ ta nüxũ chaxĩnüchiga nax cuma tá yixixũ i äëxgacü quixixũ. <sup>7</sup>Rü cumax rü marü nüxũ cuxuneta i orearü uruũgü nax ngẽma naxunagügũxũcãx nax cumax nax äëxgacü quixixũ i Yerucharéüwa, rü nüxũ yaxugũxũcãx nax marü nayimaxũ ya äëxgacü i Yudáanewa. Rü ngẽma ore rü ngürüãchi tá nüxũ naxĩny ya äëxgacü ya Artayére, rü ngẽmacãx name i nua cuxü rü ngĩxã yigümaxã tidexagü”, ñanagürü ga yema popera. <sup>8</sup>Rü yexguma ga chomax rü chanangãxũ rü ñachagürü: “Tama aixcüma nixĩ ga yema nüxũ cuxĩnüchigaxũ yerü yema rü

cumatama nagu curuxĩnümarexũ nixĩ”, ñachagürü. <sup>9</sup>Rü yemaacü toxũ naxaxünegü, yerü toxũ namuüexëëchaũ nax nüxũ tarüchauexũcãx nax tapuracüexũ. Natürü ga choma rü yexeraãcü chanaxüama ga yema puracü.

.....

<sup>15</sup>Rü meama Elúarü tauemacüarü 25 ga ngunexũgu (setiëmbre 25) nixĩ ga nagũxũ ga guma íanearü poxeguxütapüx. Rü yema puracü rü meama 52 ga ngunexũ nagu tinge. <sup>16</sup>Rü torü uanügu rü guxüma ga yema togü ga nachixüanecüãx ga torü ngaicamána yexmagũxũ rü nüxũ nacuáchigagü ga marü nax yanguxũ ga guma íanearü poxeguxütapüx. Rü yemaçãx ga nümagü rü poraãcü namuüe rü nixãneächitanü yerü nüxũ nicuãxächitanü ga yema puracü ga taxüxũ rü Tupanaarü ngüxëëmaxã nax yanguxũ.

.....

#### Duũxũgü rü norü íanecãx nawoegu

**7** <sup>1</sup>Rü yexguma marü naguxgu ga Yerucharéüarü poxeguxütapüx rü nanucuxgu ga norü íãxgü, rü nüxũ naxunetagu ga íãxarü dauruũgü rü wiyaetanüxũgü rü Lebítanüxũgü ga chacherdótegüarü ngüxëëruũgü ixigũxũ. ....

<sup>73</sup>Natürü yema chacherdótegü rü Lebítanüxũgü rü íãxarü dauruũgü rü wiyaetanüxũgü rü yema Tupanapatawa puracüexũ ga paxaãchi irüngüexũ rü wüxichigü norü íanegüwa nixĩchigü wüxigu namaxã ga yema togü ga duũxũgü.

.....

**Tupanaarü mugü rü guxû ga  
duûxûgüpeḡewa nüxû nadaumatügü**

**8** <sup>1</sup>Rü guma norü 7 ga tauemacügu (setiémbré) rü guxûma ga yema duûxûgü ga marü norü ïanewa iyexmachigüxû rü wena Yerucharéüçax nawoegu nax nüxû naxîniexüçax ga Tupanaarü ore. Rü yema ïanearü ngutaquexechica ga Ìax ga Dexágu äégaxüarü toxmáxtawa yexmaxügu nangutaquexegü. Rü ñuxüchi ga nüma ga duûxûgü rü chacherdóte ga Édraxû ñanagürügü: “iÉcü nua nange i ngéma Cori ya Tupanaarü mugüpane ga Moiché ümatüxû naxçax ga tórü oxigü ga Iraétanüxügü!” ñanagürügü. <sup>2</sup>Rü nüma ga chacherdóte ga Édra rü yéma nanange ga yema Tupanaarü mugüpane napexewa ga yema duûxûgü ga yexma ngutaquexegüxû ga yatüxü rü ngexü rü ngextüxücügü rü pactügü. <sup>3</sup>Rü exüwa inanaxügü rü ñuxmata tocuchiwa nangu nax duûxûgüçax nüxû nadaumatüxû ga Tupanaarü mugü nawa ga yema ïanearü ngutaquexechica ga Ìax ga Dexágu äégaxüarü toxmáxtawa yexmaxü. Rü guxûma ga duûxûgü rü meama inarüxînié ga yema Tupanaarü mugü. <sup>4</sup>Rü nüma ga chacherdóte ga Édra rü nachinagü nagu ga wüxi ga chinagüruxü ga mürapewanaxçax ga woetama yemaruxü yexma üxü. Rü norü tügüneçüwaguama nachigü ga Matatía, rü Chéma, rü Anía, rü Uría, rü Ichía rü Maachía. Rü norü toxwecüwaguama nachigü ga Pedaía, rü Michaé, rü Maquía, rü Achúü, rü Abadána, rü Chacaría rü Mechuráü.

.....

<sup>8</sup>Rü nümagü rü tagaäcü duûxûgüçax nüxû nadaumatügü ga yema Tupanaarü mugüpane. Rü ñuxüchi meama duûxûgümaxá nanangoxëxë ga yema ore nax nüxû nacuaçgüxüçax nax taxacüchiga yixüxü. <sup>9</sup>Rü guxûma ga duûxûgü rü yexguma nüxû naxîniégu ga yema Tupanaarü mugü rü naxauxe. Natürü ga choma ga äëxgacü ga Neemía, rü nümatama ga chacherdóte ga Édra, rü yema tomücügü ga Lebítanüxügü rü tanataäxëxëxë ga yema duûxûgü, rü ñatagürügü nüxü: “iTaxü i pengechaxügüxü rü pexauxexü! Erü ñoma i ngunexü rü woetama tórü Cori ya Tupanaçax ítanaxüxüchi”, ñatagürügü. <sup>10</sup>Rü ñanagürü ta ga Édra: “iÉcü mea peyachibüe rü bínu ya maixcuracü peyaxaxü rü tüxna pexu ya texé ya tüxü nataxúxe i tümaarü öna nax wüxigu petaäxëgüxüçax! Erü ñoma i ngunexü rü woetama Cori ya Tupanaçax ítanaxüxüchi. Rü ngëmacax tama name nax pengechaügüxü erü ngéma taäxë i tórü Cori ya Tupana tüxna äxü rü tórü poxüruxü nixü”, ñanagürü. <sup>11</sup>Rü yexgumarüxü ta ga nüma ga Lebítanüxügü rü duûxûgümaxá nüxü nixugüe rü ñanagürügü: “Marütama nax pexauxexü. Erü ñoma i ngunexü rü woetama Cori ya Tupanaçax ítanaxüxüchi”, ñanagürügü. <sup>12</sup>Rü yexguma ga nüma ga guxûma ga duûxûgü rü chibüwa rü axewa naxî rü namücügümaxá nangaugü ga norü önagü. Rü yemaacü nanaxüchigagü ga yema ngunexü, yerü nüxü nicuaçächitanü ga yema Édra nangüexëxü.

.....

**Édra rü Tupanamaxã nüxü nixu ga  
Iraétanüxügüarü chixexügü**

**9**<sup>1-2</sup>Rü gumatama tauemaciärü 24 ga ngunexügu rü nüma ga Iraétanüxügü rü nangutaqexegü nax naxaureexüçax. Rü nüxna nixigachi ga yema duixügü ga tama Iraétanüxügü ixigüxü. Rü témüxü ga naxchirugu nicuxgü rü waixümütexë nügiëru nagünagügü. Rü yexma nachigiüacüma Tupanamaxã nüxü nixugüë ga noxrütama chixexügü rü nüxna nacuxächie ga norü oxigüarü chixexügü rü ta. <sup>3</sup>Rü nachicawatama nayexmagüyane rü tomaepüx ga ora ningegü ga nüxü nax naxinüexü ga Cori ya Tupanaarü mugü. Rü naétü to ga tomaepüx ga ora ningegü ga Tupanamaxã nüxü nax yaxugüexü ga norü chixexügü rü Tupanaxü nax yacuaxüügüxü. <sup>4</sup>Rü yemawena ga yema Lebítanüxügü ga Yochué, rü Binúi, rü Caxmié, rü Chebanía, rü Búni, rü Cherebía, rü Báni rü Quenáni rü yema chinagüchicagu naxigü rü yéma tagaäcü Cori ya Tupanamaxã nidexagü. <sup>5</sup>Rü ñuxüchi yema Lebítanüxügü ga Yochué, rü Caxmié, rü Binúi, rü Achaxnía, rü Cherebía, rü Odía, rü Chebanía rü Petaía rü duixügüxü ñanagürügü: “iËcü, ipechigü rü nüxü picuaxüxügü ya Cori ya Tupana i guxügüma maxüctü! Rü naéga rü naxüüne rü guxüétüwa nangexma, rü ngëmacax name nixí i nüxü ticuaxüxügü”, ñanagürügü. <sup>6</sup>Rü ñuxüchi ga nüma ga Édra rü nayumüxë rü ñanagürü: “Pa Tupanax, cuma nixí i Cori quixixü rü nataxuma i to. Rü cuma nixí ga cunaxüxü ga daxügüxü i naane,

rü ngëma daxügüxü i naaneétüwa ngëxmaxü rü guxüma i norü ëxtagü. Rü cuma nixí ga cunaxüxü ga ñoma i naane, rü taxtügü, rü guxüma i taxacü i nawa ngëxmaxü. Rü cuma nixí i maxü nüxna cuxäxü i guxüma i ngëma maxëxü. Rü ngëmacax nixí i cuxü yacuaxüügüxü ya ëxtagü ya dauxüwa ngëxmagüxü.

.....

<sup>9</sup>Cuma rü tüxü cudau ga ñuxäcü ngüxü nax tingegüxü ga torü oxigü ga Equítuanewa. Rü tüxü cuxínü ga nax taxauxexü ga Már ga Dauchiüxücutüwa. <sup>10</sup>Rü cuma rü Faraóüpexewa rü guxüma ga norü ngüxëëruügüpexewa, rü guxüma ga yema nachixüanecüäxgü ga duixügüpexewa, rü cuyaxüchigüama ga taxü ga mexügü ga curü üünemaxä cuxüxü. Yerü nüxü cudau ga ñuxäcü totanüxügümaxä chixri inacuxgüxü, rü ngëmacax cutachigaxü i ñuxmax.

.....

<sup>34</sup>Natürü woo ga torü äëxgacügü rü yatügü ga tomaxä icuaxgüxü, rü chacherdótegü, rü woo ga torü oxigü rü taguma nayanguxëëgü ga curü mugü rü taguma naga naxinüë ga curü ucuxëgü ga namaxä nüxü quixuxü. <sup>35</sup>Rü yexguma torü oxigüna cunaxäxgu i ñaa naane nax noxrü yixixüçax, rü woo poraäcü nüxü curüngüxëë, natürü togumare narüxinüë. Rü woo nüxna nax cunaxäxü ga norü yemaxügü, rü woo naxmëxgu cunayixëxë ga ñaa nachixüane ga mea nanetü nawa yaexü, natürü taguma cuxü nicuaxüxügü, rü tama nüxü narüxoechaü ga nacüma ga chixexügü. <sup>36</sup>Rü dücax, rü ñaa tochixüane ga torü oxigüna cuxäxü nax

nagu natogüaxüçax ga nabü, rü ñuxma rü ñaatama naanewa rü to i nachixüanemexēwa tangexmagü. <sup>37</sup>Rü guxāma i tomax, rü torü wocagü, rü tonetügü rü ñuxma rü torü chixexügügagu torü uanügü i äëxgacügümexēwa tangexmagü, rü nüma nanaxwaxexüäcü tomaxä inacuax. Rü ngēmacax i ñuxma rü poraäcü tanaxixächiäētaniü”, ñanagürü ga Édra norü yumüxēwa.

**Iraétanüxügüarü äëxgacügü  
rü Tupanamaxä inaxunetagü  
nax Tupanaarü mugüga  
naxinüexüçax**

<sup>38</sup>Rü yemacax ga guxāma ga toma rü Tupanamaxä nüxü tixu nax aixcüma tá naga taxinüexü ga norü mugü. Rü napexewa poperagu tanaxümatü ga yema namaxä nüxü tixuxü. Rü toma ga äëxgacügü, rü Lebítanüxügü, rü chacherdótegü rü toéga nagu taxümatügü nax aixcüma tá tayanguxēexü ga yema torü uneta.

.....

**Duüxügü rü to ga uneta  
Tupanamaxä nixugü**

**10** <sup>28</sup>Rü toma tixigü ga yema poperagu togü taxümatüégagüxü naxçax ga guxüma ga yema togü ga duüxügü ga chacherdótegü, rü Lebítanüxügü, rü Tupanapataarü iäxaru dauruügü, rü wiyetanüxügü, rü yema puracütanüxügü ga Tupanapatawa puracüexü, rü guxüma ga yema togü ga duüxügü ga wüxigu naxmaxgümaxä rü naxacügümaxä Tupanacax nüxna ixigachitanüxü ga yema togü ga nachixüanecüäx ga tama Tupanaxü cuaxgüxü. <sup>29</sup>Rü guxāma ga toma rü mea tanayauxgü ga yema uneta rü nüxü tixu nax aixcüma tá mea naga taxinüexü i ngēma Tupanaarü mugü rü ucuxëgü ga nüma ya Tupana norü duü ga Moichéna naxäxü. <sup>30</sup>Rü wüxigu nagu tarüxünüe rü tama tanaxwaxe i toxocügü rü tonegü rü ngēma duüxügü i tama Iraétanüxü ixixümaxä nixäte rüçna nixäxmax.

.....

# ESTER

## (Ité)

Taxũ ga òna naxũ ga ãëxgacũ ga Achuéru

**1** <sup>1</sup>Rũ nũma ga Achuéru rü ãëxgacũ nixĩ ga Médiaanewa rü Pérchiaanewa. Rũ yema norü naane rü 127 gu nixüye. Rũ Ídiaanewa inaxügü rü ñuxmata Etiopíaanewa nangu ga norü ta. <sup>2</sup>Rũ guma ãëxgacüpata rü ñane ga Chúchawa nixĩ ga nayexmaxũ. <sup>3</sup>Rũ yexguma marü tomaepüx ga taunecü ãëxgacü yixixgu ga Achuéru rü nanaxü ga wüxi ga taxũma ga peta. Rũ nüxna naxu ga guxũma ga norü ngüxëëruũgü ga ãëxgacügü rü churragüerugü ga Médiaanecüãx rü Pérchiaanecüãx, rü yema ãëxgacügü ga wüxichigü ga norü naanearü üyewa yexmagüxũ. <sup>4</sup>Rũ yemaacü nanaxü ga yema peta, yerü ga nũma rü nügü inawéxchaũ nax ñuxäcü naporaxũ rü ñuxäcü namuxüchixũ ga nachixüãnearü yemaxügü rü ñuxäcü namexechixũ ga norü ñane. Rũ yema peta rü natai ga ngãxũ ga taunecü. <sup>5</sup>Rũ yema petawena rü nũma ga ãëxgacü rü to ga peta naxü ga ãëxgacüpataxütuwa ga 7 ga ngunexũ taixũ. Rũ yema petawa rü nüxna naxu ga guxũma ga yema duüxügü ga ãëxgacüpatawa puracüexũ

ga norü ngüxëëruũgü rü norü puracütanüxügü ixigüxũ.

.....

<sup>10-11</sup>Rũ yema peta nagu yagüxũ ga ngunexügü rü nũma ga ãëxgacü rü marü bínunaxã nangãxãë rü yemaçax nataãxë. Rũ nanamu ga 7 ga norü ngüxëëruũgü ga Meumáũ, rü Bícha, rü Arbóna, rü Bíta, rü Abáta, rü Chetá, rü Cárca nax napexewa ngixũ nagagüxüçax ga yema naxmaç ga Báti ga meama ngaxãëcü namaxã ga yema norü ngaxcueruxũ. Rũ yemaacü nanamu nax guxũma ga duüxügüxũ rü ãëxgacügüxũ ngixũ nawéxüçax nax ñuxäcü namexechixũ, yerü aixcüma imexechi. <sup>12</sup>Natürü ngíma ga naxmaç rü tama naga ixĩnũ ga yema ãëxgacüarü duüxügü ngímaxã nüxü ixuxũ. Rũ yemaçax ga nũma ga ãëxgacü rü poraäcü nanu. <sup>13</sup>Rũ norü numaxã norü ucüxëruũgü ga meama yema naanearü mugüxũ icuáxũna naca nax taxacü tá naxüxũ ngímaxã ga naxmaç. Yerü nũma ga ãëxgacü rü nacüma nixĩ nax norü ucüxëruũgü ga meama mugüxũ icuaxgüxũna naxaxíraxũ naxüpa nax taxacürü mu naxunagüxũ. <sup>14</sup>Rũ yema



ucuxëruũgü ga ãëxgacümaxã  
 ãmücügüxũ rü Cachéna, rü Chetáru, rü  
 Amáta, rü Tárci, rü Mére, rü Marchéna  
 rü Memucáũ nixígü. Rü nümagü ga  
 yema 7 ga yatügü ga iporaexü ga  
 Pérchiaanewa rü Médiaanewa rü  
 ãëxgacüarü ucuxëruũtücümüwa naxügü.  
 Rü taxü ga ãëxgacügü nixígü ga yema  
 nachixüanewa. <sup>15</sup>Rü nüma ga ãëxgacü  
 ga Achuéru rü yema yatügüna naca rü  
 ñanagürü: —¿Taxacü tá chaxü i  
 ñuxmax? ¿Rü taxacürü poxcu nixí  
 ixümatüxü i mugüwa ngíxcax i wüxi i  
 ãëxgacümax i tama ãëxgacüga ñnücü  
 ega norü ngüxëëruũgüxü namugügu nax  
 ngíxcax yacagüxüçax? —ñanagürü. <sup>16</sup>Rü  
 nüma ga Memucáũ rü namücügüégagu  
 ãëxgacüxü nangäxü rü ñanagürü: —Pa  
 ãëxgacüx, rü ngëma cuxmax rü tama  
 cupëxewaxica chixexü ixü, natürü  
 guxüma i ãëxgacügü rü duüxügü  
 iyatüxüpëxewa inaxü i ngëma chixexü.  
<sup>17</sup>Rü ngëxguma ngëma naigü i ngexügü  
 i curü naanewa ngëxmagüxü nüxü  
 cuaxgügu i ngëma naxüxü i ngëma  
 cuxmax i Bátis, rü nümagü rü ta rü  
 taxütáma natega naxínüe. Erü tá nüxü  
 nixugü rü ãëxgacü ya Achuéru rü  
 naxmax ga Baticax nangema rü ngíma  
 rü tama naga ixínü. <sup>18</sup>Rü guxüma i  
 ngëma ãëxgacügü i Pérchiaanewa rü  
 Médiaanewa ngëxmagüxü naxmaxgü rü  
 ngëxguma nüxü nacuáchigagügu i  
 ngëma naxüxü i ngëma cuxmax, rü  
 ngëma ngexügü rü tá ta ngëmaäcü  
 natemaxã nanaxügü nax tama natega  
 naxínüexü. <sup>19</sup>Rü cumaxã nüxü tixu, Pa  
 ãëxgacüx, rü ngëxguma chi curü me  
 yixügu nax cunaxunagüxüçax i wüxi i  
 mu i tagutáma texë iyarüxoxëëxü i

Pérchiaanewa rü Médiaanewa, rü  
 ngëma muwa rü tá nüxü quixu nax  
 tagutáma wena cupëxewa nax nanguxü  
 i cuxmax i Bátis. Rü ñuxüchi, Pa  
 ãëxgacüx, rü name i nai i cuxmaxçax  
 cudadu, i ngëmaarü yexera cuga ñnücü.  
<sup>20</sup>Rü ngëma mu rü name nixí i  
 cunaxunagü i guxüma i ngëma naanegü  
 i namaxã icucuáxüwa. Rü ngëmaäcü i  
 guxüma i ngexügü rü tá natega naxínüe  
 rü woo ãëxgacü yixixgu rüçxna  
 ngexürüxümare i duüxü yixixgu  
 —ñanagürü. <sup>21</sup>Rü yema Memucáũarü  
 ucuxë rü ãëxgacüçax rü norü  
 ngüxëëruũgüçax rü name. Rü yemaçax  
 ga nüma ga ãëxgacü rü nanamu nax  
 naxümatüxü ga yema mu. <sup>22</sup>Rü  
 wüxichigü ga nagawa naxümatü rü  
 ñuxüchi guxüma ga yema naanegü ga  
 ãëxgacü namaxã icuáxüwa nanamupane  
 nax guxüma ga ngexügü rü guxüwama  
 natega naxínüexüçax.

#### Itégu nangu nax ãëxgacümax yixixü

**2** <sup>1</sup>Rü yëxguma marü  
 inangüxmüguwena ga nüma ga  
 ãëxgacü ga Achuéru, rü ngíxna  
 nacuaxächi ga naxmax ga Bátis, rü nagu  
 narüxínü ga yema mu ga nüma  
 naxümatüxügü nax tagutáma wena  
 ngíxü nadauxü. <sup>2</sup>Rü yëxguma ga yema  
 norü ngüxëëruũgü rü ñanagürügü nüxü:  
 —Name nixí i cuxü ngíxcax tadaugü i  
 pacügü i mexechicü i taguma yatüxü  
 cuaxgücü. <sup>3</sup>iËcü nüxü naxuneta i  
 duüxügü i wüxichigü i naane i namaxã  
 icucuáxüwa nax ngëma pacügü i  
 mexechicü i taguma yatüxü cuaxcü  
 ngíxü idexechixüçax rü nua curü  
 ngexügüpatawa ngíxü nagagüxüçax! Rü

ñux̄ichi name nix̄i ya yima  
 ngex̄ügüpataarü daurux̄ü ya Egái nḡixna  
 nadau i nḡema pacügü nax nḡix̄ü  
 yangax̄ãégüx̄üçax. <sup>4</sup>Rü nḡema pacü i  
 yexera curü me ix̄icü Pa Ǣxgacü, rü  
 nḡema tá iyix̄i i cuxmax̄ ix̄icü  
 nḡichicüxü i Báci —ñanagürügü. Rü  
 yema ñn̄ü rü norü me nix̄i ga Ǣxgacü,  
 rü yemaacü nanaxü. <sup>5</sup>Rü Chúchawa ga  
 Ǣxgacüpatawa napuracü ga wüxi ga  
 Yudü ga Bëyamitanüx̄ü ga Marduquéu  
 ga naéga. Rü nüma rü Yax̄i nane nix̄i, rü  
 Chimeí rü Chí tix̄i ga norü ox̄igü. <sup>6</sup>Rü  
 nüma ga Marduquéu rü natanüwa  
 nayexma ga yema mux̄üma ga Yudfugü  
 ga Nabucudonochó Yerucharéüwa  
 Ígax̄üx̄ü wüxigu namax̄a ga Yeconía ga  
 Yudáanecüãxaru Ǣxgacü ix̄icü. <sup>7</sup>Rü  
 nüma ga Marduquéu rü nüx̄ü iyexma ga  
 wüxi ga nanepüxacü ga gux̄üwama  
 tax̄cucü. Rü nḡéga rü Adácha rüexna  
 Ité nix̄i. Rü nḡíma rü imechametüx̄üchi  
 rü nḡixine rü namexechi. <sup>8</sup>Rü yexguma  
 naxunagügu ga Ǣxgacüarü mu ga pacü  
 nḡix̄ü nax nanutaqexegüx̄üchiga, rü  
 mucüma ga pacü nḡix̄ü nanutaqexegü  
 nagu ga Ǣxgacüpata ga Chúchawa  
 yexmagüne. Rü pacügüarü daurux̄ü ga  
 Egáimex̄ewa iyexmagü. Rü yema  
 pacügütanüwa ta iyexma ga Ité. <sup>9</sup>Rü  
 nüma ga Egái ga yema pacügümax̄a  
 icuax̄cü rü poraãcü norü me iyix̄i ga Ité.  
 Rü yemacax̄ ga nüma ga Egái rü  
 noxtacüma nḡix̄ü nayangax̄ãe rü  
 memaex̄ü ga ñna nḡixna nax̄a. Rü nḡix̄ü  
 naxuneta ga 7 ga ngex̄ügü ga  
 Ǣxgacüpatawa puracüecü ga nüx̄ü  
 rücuax̄maegücü nax yema Iténa  
 daugüx̄üçax. Rü yema rümemax̄ü ga  
 ucapuwa nḡix̄ü nagagü nax yéma

nayexmax̄üçax ga ngex̄ügüpatawa.

<sup>10</sup>Natürü nḡíma ga Ité rü tama nḡígü  
 iyaxu nax Yudü yix̄ix̄ü rü tama nḡígü  
 iyaxu ga texétanüx̄ü nax yix̄ix̄ü. Yerü  
 yemaacü nḡix̄ü naxucux̄e ga Marduquéu  
 nax tama nḡígü yaxux̄üçax.

.....

<sup>15</sup>Rü nḡíma ga Ité ga Marduquéueyax  
 ga Abiáixacü, rü yexguma nḡíwa  
 nanguxgu nax Ǣxgacüpeyax nḡix̄ü  
 nagagüx̄ü, rü nḡíma rü inayaxu ga yema  
 Egái ga pacügüarü dauruüarü ucux̄e. Rü  
 meama nḡígü ingax̄ãe yema nḡímax̄a  
 nüx̄ü yaxux̄ürüx̄ü. Rü yema naigü ga  
 pacügü rü poraãcü nḡímax̄a itaãx̄egü ga  
 yexguma nḡix̄ü nadaugügu. <sup>16</sup>Rü  
 yexguma marü 7 ga taunecü Ǣxgacü  
 yix̄ixgu ga Achuéru, rü meama norü 10  
 ga tauemacü ga Tebéxgu Ǣgacügu  
 (enéro) nix̄i ga Ǣxgacüpatawa Itéx̄ü  
 nagagüx̄ü naxütawa ga Achuéru. <sup>17</sup>Rü  
 yexguma nḡix̄ü nadaux̄gu ga Achuéru rü  
 poraãcü nüx̄ü ingúchaü gucü ga naigü  
 ga pacüarü yexera. Rü yemacax̄  
 nḡíeruwa nayangax̄cuchi ga yema  
 ngax̄cuerux̄ü ga Ǣxgacümax̄çax ix̄ix̄ü,  
 rü nḡix̄ü naxuneta nax naxmax̄ yix̄ix̄ü  
 nḡichicüxü ga Báci.

.....

**Marduquéu rü nüx̄ü nacuáchigaama nax  
 Ǣxgacüx̄ü yamax̄güchaüx̄ü**

<sup>21</sup>Rü wüxi ga ngunex̄ü ga yexguma  
 Marduquéu Ǣxgacüpataarü ñax̄wa  
 nadaux̄ütaeyane rü nüx̄ü nax̄ínü ga  
 taxre ga ñax̄arü dauruügü ga Bigatá rü  
 Tére ga nugaãcü nügümax̄a idexagüx̄ü  
 nachigagu nax ñux̄äcü tá Ǣxgacü ga  
 Achuérux̄ü yamax̄güx̄ü. <sup>22</sup>Rü yexguma  
 yemax̄ü nacux̄gu ga Marduquéu rü

ãĕxgacü naxmaç ga Itémaxã nüxü nixu ga ãĕxgacüxü nax yamaçgüchaüxü. Rü ngîma ga Ité rü ãĕxgacümaxã nüxü iyaxu ga yema Marduquéu ngîmaxã nüxü ixuxü. <sup>23</sup>Rü nüma ga ãĕxgacü rü naxçaç ínicagüchigü nachiga ga yema nax yamaçgüchaüxü. Rü nüxü nacuáchiga nax aixcüma yixüxü ga yema. Rü yemaçax nanawëxgümaxã ga yema taxre ga yatügü. Rü guxüma ga yema ngupetüxü rü ãĕxgacüpëxewatama nanaxümatü nagu ga nachixüanepane.

### Marduquéu rü Amáüchiga

**3** <sup>1</sup>Rü yema ngupetüxguwena rü nüma ga ãĕxgacü ga Achuéru rü wüxi ga yatü ga Amáüxü naxuneta nax norü ngüxëëruüügümaxã inacuáxüçaç. Rü yemaacü nawa nangu nax guxüma ga yema naanemaxã inacuáxü ga Amáü. Rü Achuéruxicatama nixi ga naétüwa yexmaxü. Rü nüma ga Amáü rü Amedáta nane ga Agátanüxü nixi. <sup>2</sup>Rü guxüma ga yema ãĕxgacüpatawaurü puracütanüxügü rü Amáüpëxegu nacaxápüxügü rü narümaächitanü ga yexguma Amáü napëxewa üpetüxgu rüexna napëxewa nayexmagu. Yerü yemaacü nixi ga ãĕxgacü ga naxunagüäxü. Natürü nüma ga Marduquéu rü tama naga naxînüchaü ga yema mu, rü yemaçax tama narümaächigü ga yexguma Amáü napëxewa üpetüxgu. <sup>3</sup>Rü yexguma yemaxü nadaugüga ga ãĕxgacüarü ngüxëëruügü, rü Marduquéuna nacagüe rü ñanagürügü: —¿Tüxcüü tama naga cuxînü i ngëma ãĕxgacü unagüxü? —ñanagürügü. <sup>4</sup>Rü guxüma ga

ngunexügüga rü yemaacütama Marduquéuna nacagüxü, natürü nüma ga Marduquéu rü nanangäxü nax nüma rü Yudüfu yixüxü rü yemaçax tama Amáüpëxegu nayarümaxächigü. Rü yemaçax ga yema duüxügü rü Amáümaxã nüxü nayarüxugüe rü nüxna naca rü name nax yemamaxã nügü ínapoxüxü ga Marduquéu. <sup>5</sup>Rü yexguma Amáü Marduquéuxü dajxgu nax tama inacaxápüxügü rüexna yanamaxächixü ga yexguma yéma naxüpetüxgu, rü nüma ga Amáü rü poraäcü nanu. <sup>6</sup>Natürü yema marü nüxü nax nacuáxü nax taxacürü duüxü yixüxü ga Marduquéu rü yemaçax tama nüxica nanapoxcuchaü. Rü nagu narüxînü nax ñuxäcü tá nadaiaxüga guxüma ga yema Yudüfugü ga yema naanegü ga Achuéru namaxã icuáxüwa yexmagüxü.

### Mu ga Yudüfügarü dajxchiga unagüxü

<sup>7</sup>Rü yexguma 12 ga taunecü ãĕxgacü yixüxgu ga Achuéru, rü meama guma nüxíraxücü ga tauemacü ga Misáügu äégacüga (abril) rü Amáüpëxewa naxçaç nadaugü nax taxacürü ngunexü tá yixüxü ga Yudüfugüxü nagu nadajüxü. Rü nagu naxunetagü nax guma nai ga 12 ga tauemacü ga Adágu äégacüarü 13 ga ngunexügu (13 febréro) tá yixüxü nax nadaiaxü. <sup>8</sup>Rü nüma ga Amáü rü ãĕxgacü ga Achuéruxütawa naxü nax namaxã nüxü yanaxuxüçaç nachiga ga yema. Rü ñanagürü: —Pa Äĕxgacüx, rü natanüwa i guxüma i ngëma togü i nachixüanecüäxgü rü nangexma i wüxítücumü i tama togümaxã wüxigüchaüxü. Erü ngëma nacümagü rü nanatoraxü rü tama naga naxînüe i

ngēma curü mugü, Pa ãĕxgacüx. Rü ngēmacax, Pa ãĕxgacüx, rü tama name nax ñaa naane i namaxã icucuáxüwa namaxēxü. <sup>9</sup>Rü ngēmacax Pa ãĕxgacüx, ega curü me yixixgu i ngēma nüxü chixuxü irü ěcü naxunagü i wüxi i mu i nüxü ixuxü nax noxtacüma nadaixü i ngēma Yudfugü! Rü choma rü tá 330,000 quíru naguxü i diérumü ichaxã nax ngēmamaxã naxütanüxüçax nüxü i ngēma nadaixü —ñanagürü. <sup>10-11</sup>Rü yexguma ga nüma ga ãĕxgacü rü ñanagürü nüxü: —iRü ngēma diéru rü cuxrütama yixi! iRü ngēma Yudfugü rü namaxã naxü i taxacü i cuma cunaxwaxexü! —ñanagürü. Rü ñuxüchi nügümexēwa ngixü nayaxu ga norü ãnera rü Amáüna ngixü naxã nax yemaacü ãĕxgacüéga nawa ngóxüçax ga yema mu ga Amáü unagüxü. <sup>12</sup>Rü guma taunecüarü nüxíraxüçü ga tauemacüarü 13 ga ngunexügu rü nüma ga Amáü rü nanangutaquexexēxē ga ãĕxgacüarü poperaarü ümatürüügü. Rü namaxã nüxü nixu nax naxümatügüaxüçax ga wüxi ga mu naxçax ga guxüma ga ãĕxgacügü ga namaxã icuáxü ga yema (127) nachixüanegü ga Achuérumexēwa yexmagüxü. Rü wüxichigü ga yema nachiüanecüãxgügüga naxümatü ga yema mu, rü ãĕxgacüéga nagu naxü rü norü ãneraéga nawa nangox. <sup>13</sup>Rü yema ãĕxgacüarü orearü ngerüügü rü inayanuetanü ga yema popera nawa ga guxüma ga yema nachixüanegü ga ãĕxgacü namaxã icuáxü. Rü yema poperawa rü nüxü nixu rü ñanagürü. “Rü meama nai ya 12 ya tauemacü ya Adágu ágacüarü 13 ya ngunexügu (13 febréro) rü tá nadai i guxüma i Yudfugü

i yatüxü rü ngexü rü ngextüxüxüügü rü paxüügü rü buxüügü. Rü guxüma i ngēma norü ngēmaxüügü rü ngēma nadaixümeçēwa tá nachoü”, ñanagürü. ....

#### Nangechaügü ga Yudfugü yerü naxunagü ga norü daichiga

**4** <sup>1</sup>Rü yexguma Marduquéu nüxü cuaxgu ga yema unagüxü rü nügü narügáutechiru yerü poraäcü nangechaü. Rü yemaçax témüxü ga naxchirugu nicux rü tanimacamaxã nügü nagüeru. Rü guma ñanegu ínayaxüegu rü tagaäcü aita naxü norü ngechaümaxã. <sup>2</sup>Rü yemaacü inixü rü ñuxmata ãĕxgacüpataaxwa nangu rü yéma nayachaxächí, yerü nachuxu ga ngechaüchirugu icüxe ãĕxgacüpatagu nax ücuxü. <sup>3</sup>Rü yexgumarüxü ta ga wüxichigü ga ñanewachigü ga ngextá íyanguchigüxüwa ga yema mu ga ãĕxgacü üxü, rü ga Yudfugü rü poraäcü nanaxixächíäetanü. Rü poraäcü nangechaügü rü tama nachibüe rü naxauxe. Rü muxüma ga nümagü rü tanimacatexegu napegü rü naxchiru ga témüxügu nicuxgü.

#### Yudfugüétüwa ichogü ga Ité

<sup>4</sup>Rü yema ngixütaxüügü ga Ité rü yema yatügü ga ngírü dauruügü ixigüxü rü ngímaxã nüxü nixugü ga yema Marduquéuxü ngupetüxü. Rü yemaxü naxíniugu ga ngímax rü yexeraäcü inaxixächíäxē. Rü yemaçax Marduquéuçax yéma inamu ga mexü ga naxchiru nax ínacuxuchixüçax ga yema témüxü ga naxchiru ga nagu yacúxü. Natürü ga nümax rü tama

ínacuxuchichaũ. <sup>5</sup>Rü ngĩma ga Ité rü naxçax ingema ga yema ngĩrũ dauruũeru ga Atáx. Rü Marduquéuxũtawá inamu nax nüxna yacaxaxũçax nax taxacü ngupetũxũ rü taxacüçax natémüchiruxũ. <sup>6</sup>Rü nüma ga Atáx rü Marduquéuna nayaca ga ïanearü ngutaquexechicawa ga ãëxgacüpataarü ïãxarü toxmaçtawá. <sup>7</sup>Rü nüma ga Marduquéu rü namaxã nüxũ nixu ga guxũma ga yema ngupetũxũ rü ñuxre ga diëru ngĩxũ nax inaxãxũ ga Amáũ nax yemaacü guxũma ga Yudfugũxũ nadaixũçax. <sup>8</sup>Rü yexgumarũxũ ta Atáxna nanaxãpane ga yema mu ga nüxũ ixuxũ ga Yudfuguarü dajixchiga. Rü Atáxmaxã nüxũ nixu nax Iténa naxããxũçax rü yemaacü nüxũ nacuáxũçax ga yema ngupetũxũ. Rü yexgumarũxũ ta Itéçax yéma namuga nax ngĩmatama ãëxgacümaxã nüxũ yanaxuxũçax rü yemaacü naétüwa nachogũxũçax ga ngĩtanũxũgü. <sup>9</sup>Rü nüma ga Atáx rü natáegu rü Itémaxã nüxũ nayarũxu ga yema Marduquéu namaxã nüxũ ixuxũ. <sup>10</sup>Rü ngĩma ga Ité rü wenaxarü Marduquéuxũtawá inamu ga Atáx nax namaxã nüxũ yanaxuxũçax ga ngĩrũ dexa ga ñaxũ: <sup>11</sup>“Guxũma i duũxũgü rü nüxũ nacuax rü ngëxguma texé ãëxgacüxũtawá ümaregu rü tama nüma tümacax nangemaãcüma rü tayu ega nüma ya ãëxgacü rü tama norü nai i úrumaxã chauxmenaxãne tümaétügu nawexgu. Rü chomax rü marü 30 i ngunexũ taguma çauxçax nangema ya ãëxgacü”, ngĩgürügü. <sup>12-13</sup>Rü yexguma Marduquéu nüxũ ïnũgu ga ngĩrũ ngãxũ ga Ité, rü ngĩxçax yéma namuga rü ñanagürü: “¿Ëxna cuma nagu

curũxĩnũgu rü taxütáma cuyuxũ erü ãëxgacüpatawa cungexma woo Yudfú nax quixixũ? <sup>14</sup>Rü ñuxma nax ngéma cungeaxmarexũ rü tama naétüwa nax cuhogũxũ i tatanũxũgü i Yudfugü, rü toxnamana tá ne naxü i ngũxëë nax nawa ïnguxũxũçax i ngéma guxchaxũ, natürü i cumax rü ngéma cunatütanũxũgü rü tá nayue. Rü bexmana ngéma nax toxũ ícupoxũxũçax nixĩ i ãëxgacümaxwa nax cunguxũ i ñuxmax”, ñanagürü. <sup>15</sup>Rü yexguma ga ngĩma ga Ité rü ñaãcü Marduquéuçax yéma imuga: <sup>16</sup>“ÍËcü ngéma naxü rü nangutaquexexëë i guxũma i Yudfugü i Chúchawa ngëxmagũxũ nax çauxçax aureacü nayumüxëgũxũçax! iRü tomaepũx i ngunexũ rü tomaepũx i chütaxũ rü taxuxũtáma taxacü nangõxgü rüexna taxacü nixaxgü! Rü chomax, rü namaxã i chauxũtaxũgü rü ngémaãcü tátama tanaxũgü. Rü ngémawena rü tá ãëxgacüxũtawá íchayadau woo nachuxu nax texé ngéma ümarexũ tama tümacax nangemayane. Natürü tá ngéma chaxüama rü nüétama ega woo chayuxgux”, ngĩgürügü. <sup>17</sup>Rü yexguma ga nüma ga Marduquéu rü nanaxü ga yema Ité namaxã nüxũ ixuxũ.

#### Ãëxgacüxũtawá ixü ga Ité

**5** <sup>1</sup>Rü tomaepũx ga ngunexũguwena rü ngĩma ga Ité rü nagu iyacux ga ngĩrũ ãëxgacümaxchiru rü ñuxũchi ãëxgacüpatagu ixücu. Rü yema ucapu ga ãëxgacü nawa rütouxũarü ïãxarü wexgu iyachi ga ãëxgacü mea ngĩxũ ídaxũwa. <sup>2</sup>Rü nüma ga ãëxgacü rü yexguma ngĩxũ nadauxgu ga Ité nax

yexma nachixũ, rü ngĩmaxã nataãxê rü nanawexnagü ga norü úirumenaxã. Rü ngĩma ga Ité rü naxçax iyaxü rü norü úirumenaxãpexegu iyarüngógü. <sup>3</sup>Rü nüma ga ãëxgacü rü ngĩxna naca rü ñanagürü: —¿Taxacü cuxü nangupetü Pa Itéx? ¿Rü taxacü cunaxwaxex? iRü woo chi ngãxũgu i chauchixüanecax choxna cucaxgu rü chi cuxna chanaxã! —ñanagürü. Rü Ité rü inangãxü rü ngĩgürügü: <sup>4</sup>—Rü ngëxguma chi curü me yixĩxgu, Pa ãëxgacüx, rü cuxna chaxu nax chauxütawa cuxüxüçax erü cuxçax rü Amaüçax chanaxü i wüxi i òna i mexü i ñuxmax —ngĩgürügü. <sup>5</sup>Rü nüma ga ãëxgacü rü norü duüxügüxü namu rü ñanagürü: —iNaxçax pedax ya Amáü rü nua naxü nax ngëmaäcü nataãxëxüçax i Ité! —ñanagürü. Rü ñuxüchi ga nüma ga ãëxgacü rü Amáü rü yéma naxĩ nawa ga yema òna ga Ité naxçax üxü. <sup>6</sup>Rü yexguma ínachibüeyane rü nüma ga ãëxgacü rü Itéxü ñanagürü: —iChoxna naxçax naca i taxacü i cuma cunaxwaxexü rü tá cuxna chanaxã woo chitama ngãxũgu i chauchixüanecax choxna cucaxgu! —ñanagürü. <sup>7</sup>Rü ngĩma ga Ité rü inangãxü rü ngĩgürügü: —Ñaaxicatama nixĩ i ngëma chanaxwaxexü i tá cuxna naxçax chacaxü. <sup>8</sup>Pa ãëxgacüx, ngëxguma chi aixcüma choxü cungechaüxgu, rü chi curü me yixĩxgu i ngëma chanaxwaxexü, rü chi choxna cunaxãchaügu i ngëma cuxna naxçax chacaxaxü, rü cuxna chaxu nax moxüarü ngunexügu Amáümaxã nua chauxütawa pexixü naxçax i to i òna i pexçax tá chamexëxü. Rü ngëma tá nixĩ i cumaxã nüxü chixuxü, Pa

ãëxgacüx, i ngëma choxna naxçax cucaxaxü —ngĩgürügü.

**Amáü rü Marduquéuçax nanaxü  
ga wüxi ga wëxnaxächicaxü**

<sup>9</sup>Rü nüma ga Amáü rü poraäcü nataãxëäcüma natáegu nawa ga chibü. Natürü yexguma ãëxgacüpataarü ãëxwa ínaxüxüxgu rü poraäcü nanu yerü ga Marduquéu ga ãëxwa yexmacü rü tama inachi rü bai ga nax naxĩãxächixü ga yexguma nüxü nadaüxgu ga yéma nax naxüpetüxü. <sup>10</sup>Natürü yexgumatama rü tama nügü nangoxëxê ga nax nanuxü. Rü yexguma nachüüwa nanguxgu rü namücügüçax nangema rü ngĩçax nangema ga Chére ga naxmax. <sup>11</sup>Rü yema namücügüpexewa inanaxügü ga nügü nax yacuaxüxü. Rü nüxü nixu nax ñuxäcü namuarü ngëmaxüãxüchixü rü namuxacüxüchixü rü ñuxäcü ãëxgacü nüxü icuaxüxü natanüwa ga yema norü ngüxëëruügu rü yemacax yema togüétüwa nanaxüxëxê ga ãëxgacü. <sup>12</sup>Rü ñanagürü ta: —Rü chaxicatama nixĩ i choxna naxuxü i Ité i ãëxgacü naxmax nawa i ngëma òna i ñuxma ãëxgacüçax naxçax nangemaxü. Rü wenaxarü choxna ixu nawa i ngëma òna i moxü tá ãëxgacüçax naxüxü. <sup>13</sup>Natürü ngëxguma nüxü chadaüxgu i ngëma Yudü i Marduquéu i ãëxgacüpataarü ãëxwa rütoxü rü chauxëwa nangux erü tama choxü nicuaxüxü. Rü ngëmagagu choxna niña i ngëma chorü taãxê i ãëxgacü naxmax çauxçax üxü —ñanagürü ga Amáü. <sup>14</sup>Rü yexguma ga naxmax rü namücügü rü ñanagürügü nüxü: —iËcü duüxügüxü naxüxëxê i wüxi i wëxnaxächica i 22 métru i norü

máchane, rü moxũ pařmama rü  
ãĕĕgacũna naca nax ngĕmagu  
nawĕxnaxãĕgũaxũĕař i Marduquéu! iRü  
ñuxũchi ngĕmaãcũ chibũwa naxũ  
namaxã ya ãĕĕgacũ! Erũ marũ  
taxugutãma curũxĩnũ i ngĕĕguma  
—ñanagũrũgũ. Rü yema ñũ rü norũ me  
nixĩ ga Amãũ rü yemaĕař duũxũĕgũũ  
nanaxũĕxĕ ga wũxi ga wĕxnaxãchica.

### Marduquéu narũporamae

**6** <sup>1</sup>Rü yema ga chũtaxũĕu ga ãĕĕgacũ  
rü tama nape rü inadauecha. Rü  
yemaĕař naxĕař nangema ga yema  
popera ga nagu naxũmatũxũ ga guxũma  
ga yema nachixũanewa ngupetũxũ nax  
naxĕař nüxũ nadaumatũĕũĕař. <sup>2</sup>Rü  
yexguma nüxũ nadaumatũĕũĕu ga yema  
popera rü yexma nüxũ nayangaugũ ga  
ore ga Marduquéuchiga ga ñuxãcũ  
ãĕĕgacũ ga Achuerũxũ ñapoxũxũ ga  
yexguma yema ãĕĕgacũpataarũ  
daurũĕũ ga Bigatã rü Tére nüĕũ  
ucũĕĕgũgu nax ãĕĕgacũxũ  
yamãĕgũchaũxũ. <sup>3</sup>Rü yemaxũ naxĩnũgu  
ga ãĕĕgacũ rü ñnaca rü ñanagũrũ:  
—ĕTaxacũrũ ãmare rü cuãxũxũ nixĩ ga  
nayaxũxũ ga Marduquéu naxĕař ga  
yema mexũ ga ĕařũĕař naxũxũ?  
—ñanagũrũ. Rü nüma ga norũ  
ngũxĕĕrũũgũ rü nanangãxũũgũ rü  
ñanagũrũgũ: —Taxuxũma noxtacũma,  
Pa ãĕĕgacũx —ñanagũrũgũ. <sup>4</sup>Rü  
yexguma ñyadexagũyane rü yoxni ga  
nüma ga Amãũ rü yema nangu rü  
yemaĕař ñãxtũwa nayexma nax  
ãĕĕgacũna yacaxũĕař nax Marduquéuxũ  
yema wĕxnaxãchica ga naxũxũgu  
nawĕxnaxãxũĕař. Rü yexguma ga nüma  
ga ãĕĕgacũ rü ñnaca rü ñanagũrũ:

—ĕTexĕ tixĩ ya ñãxtũwa ngĕĕmaxe?  
—ñanagũrũ. <sup>5</sup>Rü yema norũ  
ngũxĕĕrũũgũ rü nanangãxũ rü  
ñanagũrũgũ: —Amãũ nixĩ i ngĕma  
ngĕĕmaxũ —ñanagũrũgũ. Rü nüma ga  
ãĕĕgacũ rü ñanagũrũ: —iNamaxã nüxũ  
pixu rü nua naxũ! —ñanagũrũ. <sup>6</sup>Rü  
yexguma ga nüma ga Amãũ rü nixũcu  
rü ãĕĕgacũpexegu nayachi. Rü nüma ga  
ãĕĕgacũ rü nüxna naca rü ñanagũrũ:  
—ĕÑuxãcũ chi i nüxũ quicuãxũxũ i  
wũxi i yatũ i cuma cunaxwãxexũ nax  
nüxũ quicuãxũxũ? —ñanagũrũ. Rü  
nüma ga Amãũ rü nüĕũãĕewa nagu  
narũxĩnũ: “ĕTexĕxũ tá nicuãxũxũ ya  
ãĕĕgacũ? ĕRü taux ĕĕna i choxũ tátama  
yixĩxũ?”, ñaxũgu narũxĩnũ. <sup>7-8</sup>Rü  
yemaĕař ga nüma ga Amãũ rü  
ãĕĕgacũxũ nangãxũ rü ñanagũrũ:  
—Ngĕĕguma chi nüxũ  
chicuãxũxũĕhaũgu i wũxi i yatũ rü  
naxchĩru i ãĕĕgacũ nagu icũxũgu chi  
chayacũxĕxĕ, rü ñuxũchi norũ cowaru i  
ãĕĕgacũ nagu ixũxũgu chi chayaxũxĕxĕ  
rü ngãxcuerũxũ i ãĕĕgacũ namaxã  
ngãxcuerũũmaxã chi chanangãxcueru.  
<sup>9</sup>Rü chi chorũ ngũxĕĕrũũĕũrũxũ  
chamu nax nagu yacũxĕĕãxũĕař i  
ngĕma naxchĩru rü chi cowaruĕtũgu  
chanaxaunagũxĕxĕ nax ngĕmaãcũ  
ñanemaũgu namaxã yacaĕchigũxũĕař:  
“Ñãcũ nixĩ ya ãĕĕgacũ i nüxũ  
yacũãxũxũ i wũxi i duũxũ i namaxã  
nataãxĕxũ”, ñachagũrũ chi —ñanagũrũ  
ga Amãũ. <sup>10</sup>Rü yexguma ga nüma ga  
ãĕĕgacũ rü ñanagũrũ: —Nameĕechi nixĩ  
i ngĕma. iĕcũ ñuxma rü nayaxu i ngĕma  
naxchĩru rü ngĕma cowaru rü ngĕma  
nüxũ quixũxũãcũma naxũ namaxã ya  
Marduquéu ya Yudũfa ya ãĕĕgacũpataarũ

ĩãxaru dauruxũ! —ñanagürü. <sup>11</sup>Rü yexguma ga Amáũ rü nanayaxu ga yema ãëxgacüchiru rü ga cowaru ga ãëxgacü natagu tonagixũ, rü Marduquéuxũ nicuxcuchi rü yema cowarutagu nayaga. Rü ïanemaũgu namaxã nanaxũane rü namaxã nicaechigü rü ñanagürü: —Rü ñaãcü nixĩ i namaxã naxüãxũ i ngẽma yatü i ãëxgacü nüxũ icuãxũũxũ —ñanagürü. <sup>12</sup>Rü yemawena rü nüma ga Marduquéu rü nataégu nax ãëxgacüpataarü ïãxna yadauxũcax. Natürü nüma ga Amáũ rü nügü nidüxchiwe rü nangechaũãcuma paxa nachüüwa naxü. <sup>13</sup>Rü yexguma nachüüwa nanguxgu rü naxmaxmaxã rü namücügümaxã nüxũ nixu ga yema ngupetüxũ. Rü nümagü nanangãxügü rü ñanagürügü: —Ngẽma Yudíu i Marduquéu rü taxucürüwa nüxũ curüyexera, erü ngëxguma chi ngẽmaãcü namaxã cunaxüxgux rü tá cuxchaama chixexũ cuxcax inangu —ñanagürügü. <sup>14</sup>Rü yexguma íyadexayane rü ïnangugü ga ãëxgacü ga Achuéruarü duüxügü nax Amáũcax yacagüxũcax nax Itéarü õnawa nagagüaxũcax.

**Amáũmaxã nanaxuegu nax yamaxgüaxũ**

**7** <sup>1</sup>Rü nüma ga ãëxgacü rü Amáũ rü nawa naxĩ ga yema chibü ga Ité naxcax mexëëxũ. <sup>2</sup>Rü yexguma norü bínu íyaxaxgüyane rü nüma ga ãëxgacü rü wena ngĩxna naca ga Ité, rü ñanagürü: —¿Taxacü nixĩ i naxcax ícuçaxchaũxũ, Pa Choxmax, Pa Itéx? iRü choxna naxcax naca i ngẽma cunaxwãxexũ rü choma rü tá cuxna chanaxã woo chi naxcax ícuçaxgu i

ngãxũgu i chauchixüane! —ñanagürü. <sup>3</sup>Rü ngĩma ga Ité rü inangãxũ rü ngĩgürügü: —Pa Chorü ãëxgacüx, ngëxguma chi aixcuma choxũ cungechaũxgu, rü cuxcax namexgu i ngẽma cuxna naxcax chacaxaxũ, rü ñaaxicatama nixĩ i chanaxwãxexũ nax cuxna naxcax chacaxaxũ, Pa ãëxgacüx: iRü choxũ nüxũ nangechaxũ i chorü maxü rü nüxũ nüxũ nangechaxũ i ngẽma chautanüxügüarü maxü! <sup>4</sup>Erü choma rü chautanüxügü rü marü toxũ naxüpane nax ngẽmaãcü toxũ nadaixũcax ya guxãma. Rü ngëxguma chi tomaxã nataégu gu nax togüarü puracütanüxügü tixigüxũcax, rü choma rü chi taxu ñachagürümare, woo i ngẽma rü ta rü wüxi i chixexũ i taxũ nixĩ i cuxcax, Pa ãëxgacüx —ngĩgürügü. <sup>5</sup>Rü yexguma ga nüma ga Achuéru rü ngĩxna naca rü ñanagürü: —¿Texé tixĩ ya yíxema tügü írúporaxe nax ngẽma chixexũ cumaxã taxüxũ? —ñanagürü. <sup>6</sup>Rü ngĩma rü inangãxũ rü ngĩgürügü: —Ngẽma torü uanü i chixexũ tomaxã üxchaũxũ rü ñaa chixecümaxũ i Amáũ nixĩ —ngĩgürügü. Rü yexguma yemaxũ naxĩnügü ga Amáũ rü poraãcü norü muũmaxã nanaxixãchiãxë napexewa ga ãëxgacü rü naxmaxpexewa. <sup>7</sup>Rü nüma ga Achuéru rü norü numaxã nayuxnagü rü yéma nüxna niña ga yema ïnachibüexüwa rü ãëxgacüpataaxtüwa naña. Rü nüma ga Amáũ ga marü nüxũ nax nacuáxũ nax ãëxgacü tá namaxã naxueguxũ nax yamaxgüaxũ, rü yoxni Itépegegu nayangücuchi rü ngĩxũ nacaaxũ nax naétüwa nachogüxũ nax tama ãëxgacü namaxã naxueguxũcax nax yamaxgüaxũ. <sup>8</sup>Rü yexguma



napatax̄tūwa natáeguxgu ga āēxgacū rū wena nixūcu nawa ga yema ucapu ga nawa nachibūexū, rū nūxū nadau ga Amáú ga Itéx̄tūtagu nangūcuchixū rū nugaācū ñanagūrū: —Chopexewatama ngīmaxā cumáxchaū i ñaa choxmax nawa ya daa chopata —ñanagūrū. Rū yexgumatama Amáúxū nidūxchiwegū namaxā ga yema naxchiru ga duūxū imáxchaūxū namaxā natūchiwegūxū. <sup>9</sup>Rū yexguma ga Arbóna ga āēxgacūarū ngūxēeruxū ixīxū rū ñanagūrū: —Pa Cori, Pa Āēxgacūx, ñaa Amáú rū duūxūgūxū nanaxūxēxē i wūxi i wēxnaxāchica i 22 métruarū ngāxū i norū máchane nax ngēmagu nawēxnaxāāxūcax ya Marduquéu ga cuxū ípoxūcū ga yexguma Bigatá rū Tére cuxū imáxgūchaūgu. Rūngēma wēxnaxāchica rū Amáúpatax̄tūwa nangexma —ñanagūrū ga Arbóna. Rū nūma ga āēxgacū rū nanangāxū, rū ñanagūrū: —iNgēmagu peyawēxnaxāx i Amáú! —ñanagūrū. <sup>10</sup>Rū nūma ga āēxgacūarū duūxūgū rū yema nūmatama ga Amáú Marduquéucax naxūxū ga wēxnaxāchicagu nanawēxnaxāgū. Rū yexguma narūngūxmū ga āēxgacū.

#### Mu ga Yudfugüétūwa chogūxū

**8** <sup>1</sup>Rū yematama ngunexūgu rū nūma ga āēxgacū ga Achuéru rū naxmax ga Iténa nanaxāmare ga guma napata ga Amáú ga Yudfugūmaxā rūxuanūxū. Rū nūma ga āēxgacū rū Marduquéucax nangema rū yemacax āēxgacūx̄tūwawa naxū yerū ngīma ga Ité rū nūxū iyaxu nax ngīnepū nane yixīxū. <sup>2</sup>Rū yexguma ga nūma ga āēxgacū rū ngīxū

īnangaxūchi ga norū ānera ga Amáúna ngīxū nayaxūxcū. Rū Marduquéuna ngīxū naxā. Rū ngīma ga Ité rū Marduquéuxū ixuneta nax namaxā inacuáxūcax ga yema yemaxūgū ga Amáúarūchirex ixīxū. <sup>3</sup>Rū ñuxūchi ngīma ga Ité rū wenaxarū āēxgacūx̄tūwawa ixū. Rū napexegu iyangūcuchi rū ixaxu. Rū nūxū icaxaxū nax ínapiāxūcax ga yema mu ga Amáú unagūxū ga Yudfugūarū dāixchiga nax yemaacū yanaxomarexūcax. <sup>4</sup>Rū nūma ga āēxgacū rū Itéétūguama nanawēxnagū ga norū úrumenaxā. Rū yexguma ga ngīma ga Ité rū napexewa ichi, rū ngīgūrūgū nūxū: <sup>5</sup>—Pa Āēxgacūx, ngēxguma chí aixcūma choxū cungechaūxgu, rū aixcūma cuxcax namexgu i ngēma cuxna naxcax chacaxaxū, rū chanaxwaxe i cunaxūmatū i to i mu i nūxū ixuxū nax marū yanaxoxū i ngēma mu ga Amáú unagūxū nax chautanūxūgū i Yudfugūxū nadāixūcax i guxūma i cuchixūanewa. <sup>6</sup>Rū ngēmacax taxucūriwa yaxna namaxā chaxīnū i ngēma chixexū i chautanūxūmaxā naxueguxū nax nadāixchaūāxū —ngīgūrūgū. <sup>7</sup>Rū yexguma ga nūma ga āēxgacū ga Achuéru rū naxmax ga Itémaxā rū Yudú ga Marduquéumaxā nūxū nixu rū ñanagūrū: —Choma rū marū cuxna chanaxā, Pa Itéx, ya yima Amáúpata. Rū nūma ga Amáú rū marū chanamu nax nawēxnaxāgūaxūcax yerū nanaxunagū nax guxāma i pemax i Yudfugū pexū nadāixchaūxū. <sup>8</sup>Rū ñuxma rū pexū chamu nax chauégagu penaxūmatūxū rū penaxunagūxū i wūxi i to i mu i pexcax mexū nax peétūwawa nachogūxū. iRū chorū ānera i chauéga ngīwa ngēxmacūmaxā

penaxiúéga! Erü wüxi i mupane i chauéagagu unagüxü rü chorü ãneraéga nawa ngóxü rü taxucüriwama texé itayanaxoxêxê —ñanagürü. <sup>9</sup>Rü yexgumatama naxçax nangema ga ãëxgacüarü poperaarü ümatüruüügü. Rü yema ngunexü ga nagu naxümatüxü rü meama norü tomaepüx ga tauemacü ga Sibáügu áégacüarü 23 ga ngunexügu nixí (júlioarü 23). Rü Marduquéu rü yema poperaarü ümatüruüügümaxá nüxü nixu nax ñuxácü tá naxümatüügüáxü naxçax ga Yudfügü, rü naxçax ga wüxichigü ga ãëxgacü ga namaxá icuaxgüxü ga yema 127 ga Achuérichixüanegü ga Ídiaanewa ixügüxü rü ñuxmata Etiopíaanewa nangu. Rü yema mupane rü wüxichigü ga nagawachigü naxümatü. Rü Yudfügügawa rü ta naxümatü. <sup>10</sup>Rü yema poperawa nangox ga naéga ga gumá ãëxgacü ga Achuéru rü norü ãneraéga rü ta nawa nangox. Rü ñuxüchi poperaarü núruüügü ga ãëxgacüarü cowarugü ga iporaxüchixüügu íxü namaxá nanüégü. <sup>11</sup>Rü yema poperawa rü nüma ga ãëxgacü rü guxüma ga Yudfügüna naxága nax nügü nanutaquëxegüxüçax nax nügütama ínapoxüügüxüçax rü nadaiaxüçax ga guxüma ga duüxüügü ga guxchaxü namaxá üxü rü noxrüxü yaxíxëëgüaxüçax ga yema norü uanügiarü naanegü rü norü yemaxüügü. <sup>12</sup>Rü yematama ga ngunexü ga Amáü Yudfügüxü nagu dajxchaxüügu rü yematama ngunexügu nixí ga naxunetaxü ga Marduquéuarü mu nax guxüwama Achuérichixüanegüwa nügü nanutaquëxegüxüçax ga Yudfügü nax nügütama ínapoxüügüxüçax. Rü yema ngunexü rü meama norü 12 ga tauemacü

ga Adágu áégacüarü 13 ga ngunexügu nangu (13 febréro). <sup>13</sup>Rü yema muwa rü nüxü nixu ta nax guxüanewa naxunagüxüçax nax guxüma ga duüxüügü nüxü nacuaxgüxüçax rü nümagü ga Yudfügü rü ínamemaregüxüçax nax norü uanügümaxá nügü nadajxüçax rü nüxü naporamaegüxüçax. <sup>14</sup>Rü yema poperaarü núruüügü rü paxama inaxíachi nagu ga yema ãëxgacüarü cowarugü ga iporaxüchixü yerü yemaacü nanamu ga ãëxgacü. Rü yema mu rü Chüchaarü íanewa rü ta naxunagü. <sup>15</sup>Rü yema ngunexü ga nagu naxunagüxü ga yema mu, rü nüma ga Marduquéu rü nagu nicux ga ãëxgacüchiru ga cómixü rü yáuxü. Rü nügü natüátü namaxá ga wüxi ga tüátüruxü ga línuchinaxçax ga dauracharaxü. Rü nügiëruwa nayangaxcuchi ga wüxi ga ngaxcueruxü ga úrunaxçax. Rü yemaacü ínaxüxü ga ãëxgacüpatawa. Rü guxüma ga duüxüügü ga Chühacüax rü tagaacü nüxü nicuaxüxüügü. <sup>16</sup>Rü nüma ga Yudfügü rü poraacü nataaxëgü, rü guxüwama ga duüxüügü rü yema Yudfügüxü nicuaxüxüügü. <sup>17</sup>Rü guxüma ga Achuérichixüanegüwa rü íanegüwa ga ngextá ínanguxüwa ga yema mu ga ãëxgacü unagüxü, rü nüma ga Yudfügü rü poraacü nataaxëgü, rü nanaxüchigagü ga yema ngunexü. Rü muxüma ga yema togü ga duüxüügü rü nügü nixugüë nax Yudfügü yixigüxü, yerü poraacü yema Yudfügüxü namuë.

#### Yudfügü rü narüporamaegü

**9** <sup>1</sup>Rü yema ãëxgacüarü mu ga Yudfügüétiüwa chogüxü rü meama norü 12 ga tauemacü ga Adágu

ãégaciãrũ 13 ga ngunexũgu nangu (13 febréro). Rũ yematama ngunexũ nixĩ ga nanguxchaũchiréxũ ga Amáũiarũ mu ga Yudfũgiãrũ dajxchigaxũ ixuxũ. Natũrũ tama yema Amáũ nagu rũxĩnũxũrũxũ ãnanguxuchi, yerũ yema ngunexũgu nixĩ ga Yudfũgũ norũ uanũgũxũ naporamaegũxũ rũ nadaiaxũ. <sup>2</sup>Rũ guxũma ga Achuéruchixũãnegũwa rũ nũmagũ ga Yudfũgũ rũ guma norũ ãanegũwa nũgũ ninutaqexegũchigũ nax namaxã nũgũ nadajxũcãx ga norũ uanũgũ ga nadaixchaũxũ. Natũrũ nataxuma ga ngexũrũxũ ga norũ uanũ ga naxcãx yéma ixũ nax nadaiaxũcãx, yerũ guxũnema ga ãanewa rũ Yudfũgũxũ namuũe.

.....

<sup>20</sup>Rũ nũma ga Marduquéu rũ nanaxũmatũ nachiga ga yema ngupetũxũ. Rũ ñũxũchi guxũma ga Yudfũgũ ga ngaicamagũxũ rũ yáxũgugũxũ ga Achuéruchixũãnegũwa yexmagũxũcãx nayamugũ ga yema popera. <sup>21-22</sup>Rũ yema poperawa rũ Yudfũgũmaxã nũxũ nixu nax gucũ ya taunecũgu ga Adáũiarũ tauemaciãrũ 14

rũ 15 ga ngunexũgu (14 rũ 15 febréro) naxũchigagũaxũcãx nax yemaacũ nũxna nacuãxãchixũcãx ga yema ngunexũgũ ga nagu norũ uanũgũmexẽwa ãnanguxũxũ ga nũmagũ ga Yudfũgũ rũ yemaacũ ga norũ ngechaũgũ rũ norũ axu rũ taãxẽxũ yanguxuchixũcãx. Rũ yema poperawa nũxũ nixu rũ ngẽxguma naxũchigagũagu rũ name nax nũgũmaxã nataãxẽgũxũ rũ nũgũmaxã nachibũexũ rũ ãmare nũgũna naxãgũxũ rũ diẽru ngĩxũ nanutaqexegũxũ tũmacãx ya ngeãrũ diẽruãxgũxe. ....

#### Marduquéuxũ nicuãxũxũgũ

**10** <sup>3</sup>Rũ nũma ga Marduquéu rũ ãẽxgacũ ga Achuérutũxũwaama nayexma, rũ guxũma ga norũ ngũxẽẽruũgũeru nixĩ. Rũ nũma ga Marduquéu rũ guxũma ga Yudfũgũtanũwa rũ ãẽxgacũ ya poracũ nixĩ. Rũ guxũma ga natanũxũgũ rũ nũxũ nangechaũgũ yerũ meama namaxã ãnacuaãx rũ guxũguma naxcãx nadau nax ñuxãcũ nũxũ nangũxẽẽxũ.

# JOB

## (Yox)

### Tupana rü Chatanáxũ naxüchica nax Yoxũ naxüxũ

**1** <sup>1</sup>Rü Úanegu naxächíũ ga wüxi ga yatü ga Yoxgu ãégacü. Nüma rü meama namaxũ rü nataxuma ga chixexũ ga nachiga. Rü aixcüma Tupanaarü ngúchaũ naxü, rü nügüna nadau nax taxúemaama chixexũ naxüxũ. <sup>2-3</sup>Rü nüma ga Yox rü nüxũ nayexma ga 7 ga nanegü rü tomaepüx ga naxacügü. Rü nüxũ nayexma ta ga 7,000 ga carnérugü, rü 3,000 ga caméyugü, rü 500 chimüxũ ga wocagü ga puracüruxũ ixígüxũ, rü 500 ga búrugü ga ingexũ. Rü yexgumarüxũ ta nüxũ nayexma ga muxüma ga norü puracütanüxũgü. Rü yemaacü ga nüma ga Yox rü wüxi ga yatü ga guxáarü yexera muarü yemaxũãxüchicü nixĩ ga yema nachixüane ga éstewaama yemaxũ. <sup>4</sup>Rü guma Yox nanegü rü wüxichigü napatawachigü nanaxügüxũ ga peta ga nawa nügüna naxugüüxũ. Rü yexgumarüxũ ta guxüguma tüxna naxugüxũ ga guxema tomaepüx ga naeyaxgü. <sup>5</sup>Rü yexguma marü nawena ga yema nanegüarü peta ga naxügüüxũ,

rü nüma ga Yox rü nanegüçax nangemaxũ. Rü paxmamaxüchima ínarüdaüxũ rü wüxichigü ga nanegüégagu rü naxacügüégagu Tupanaçax nayamaç rü nayagu ga wüxi ga naxüna nax yemaacü Tupana nüxũ nüxũ rüngümaxüçax ga yema naxacügüarü chixexüğü. Rü yemaacü nanaxüüxũ ga Yox yerü nagu narüxínü rü ga naxacügü rü bexmana marü Tupanapexewa guxchaxũ naxügüe ga norü ínüwa ga yexguma peta naxügüxüğüx. <sup>6</sup>Rü wüxi ga ngunexũ ga yexguma Cori ya Tupanapexewa naxixgu ga norü orearü ngeruxüğü ga daxücüãx, rü nüma ga Chataná rü ta Cori ya Tupanapexewa nangu. <sup>7</sup>Rü nüma ga Cori ya Tupana rü Chatanána naca rü ñanagürü: —¿Ngextá ne cuxü i cumax? —ñanagürü. Rü nüma ga Chataná rü Corixũ nangãxũ rü ñanagürü: —Guxĩ i naanegu íchayaxüegu i duüxügüitanüwa —ñanagürü. <sup>8</sup>Rü yexguma ga nüma ga Cori rü ñanagürü nüxũ: —¿Tama ěxna cunangugü ya yimá chorü duũ ya Yox? Erü nataxuma i ngéma naanewa ya yimárüxũ aixcüma chauga ínücü rü mea

maxĩcũ. Rũ nataxuxũma i chixexũ i nachiga rũ mea nũgũna nadau nax taxũemaama chixexũ naxũxũcax —ñanagũrũ. <sup>9</sup>Natĩrũ nũma ga Chataná rũ Corixũ nangãxũ rũ ñanagũrũ: —Tama natũcaxmamare cuga naxĩnũ. <sup>10</sup>Erũ cuma rũ cunachũxu nax taxũema guxchaxũ namaxã uxũcax i nũmax rũ guxãma ya naxacũãxgũ rũ norũ ngẽmaxũgũ. Rũ cuma rũ nũxũ curũngũxẽẽ i guxũma i taxacũ i naxũxũwa, rũ ngẽmacax i nũma i ñũxma rũ wũxi ya yatũ ya guxãarũ yexera muarũ wocaãxũchicũ nixĩ nawa i ngẽma nachixũane. <sup>11</sup>iRũ dũcax, nũxũ iyanaxoxẽxẽ i guxũma i ngẽma nũxũ ngẽxmaxũ, rũ ngẽxguma tá nũxũ cudau nax cupe\_xewatama cumaxã naguchigaxũ! —ñanagũrũ. <sup>12</sup>Rũ nũma ga Cori ya Tupana rũ Chatanáxũ nangãxũ rũ ñanagũrũ: —Marũ name. iËcũ naxũ i taxacũ i cuma cunaxwaxexũ namaxã i norũ ngẽmaxũgũ ya yimã Yox! Natĩrũ tama chanaxwaxe nax namaxãxũchi chixexũ cuxũxũ —ñanagũrũ. Rũ yexguma ga nũma ga Chataná rũ Cori ya Tupanana nixũgachi. <sup>13-14</sup>Rũ wũxi ga ngunexũ ga yexguma nanegũ rũ naxacũgũ wũxi ga peta ga taxũ ñnaxũgũyane naenexẽ ga yacũpatawa, rũ wũxi ga yatũ Yoxpatawa nangu rũ namaxã nũxũ nayarũxu ga ñaa ore: —Yexguma naanewa aimũaneruxũ i wocagũmaxã itapuracũeyane, rũ ngẽma búrugũ ga ingexũ rũ torũ ngaicamánatama nachibũe. <sup>15</sup>Rũ ngũrũãchi ngẽma nangugũ i Chabéutanũxũgũ, rũ naxcax nangĩxgũ i ngẽma wocagũ rũ búrugũ, rũ taramaxã nanadai i ngẽma chomũcũgũ i

puracũtanũxũgũ. Rũ chaxicatama chiña nax cumaxã nũxũ chayarũxuxũcax —ñanagũrũ. <sup>16</sup>Rũ taũtama yagũgegayane ga yema yatũ rũ to ga yatũ yema nangu rũ ñanagũrũ: —Wũxi ya ãẽmacũ yexma nangu rũ wũxigu norũ dauruũgũmaxã nanadai i ngẽma carnérugũ. Rũ chaxicatama chiña nax cumaxã nũxũ chayarũxuxũcax —ñanagũrũ. <sup>17</sup>Rũ yema yatũ rũ ta taũtama yagũgegayane rũ yema nangu ga norũ tomaepũx ga yatũ rũ ñanagũrũ: —Tomaepũxtũcumũ i Cadéucũãxgũ toxcax ñnayaxũãchi rũ naxcax nangĩxgũ i curũ caméyugũ rũ ngẽma chomũcũgũ i puracũtanũxũgũ rũ taramaxã nanadai. Rũ chaxicatama chiña nax cumaxã nũxũ chayarũxuxũcax —ñanagũrũ. <sup>18-19</sup>Rũ yema yatũ rũ ta taũtama yagũgegayane rũ yema nangu ga to ga puracũtanũxũ rũ ñanagũrũ: —Yimã cunegũ rũ ngẽma cuxacũgũ rũ cune ya yacũchĩũwa taxũ i peta ñnaxũgũ. Rũ ngũrũãchi ngẽma ñnachianexũwaama ne naxũ ya wũxi ya taxũchicũ ya buanecũ rũ guxũcũwawa nagu nangu ya yima i rũ cuxacũgũétũgu nangutaũ. Rũ guxãma ya cuxacũãxgũ rũ ngẽxma tayue. Rũ chaxicatama chiña nax cumaxã nũxũ chayarũxuxũcax —ñanagũrũ. <sup>20</sup>Rũ yexguma ga nũma ga Yox rũ inachi rũ norũ ngechaũmaxã nũgũchirugu nagãugũ rũ nũgũ nabaj\_xeruxẽxẽ rũ waixũmũanegu nayangũcuchi rũ Tupanaxũ nicuaxũxũ. <sup>21</sup>Rũ yexguma rũ ñanagũrũ: —Ngexchiruxãcũ chauéanũwa chabu nax ñoma i naanewa changóxũcax. Rũ ngẽxgumarũxũ tá ta taxuxũtãma choxũ nangexma i ngẽxguma chayũxgux. Rũ nũma ya Cori ya Tupana choxna nanaxã

i guxũma, rü nümatama wena choxna nanayaxu. iNamecũmaxũchi ya Cori ya Tupana! —ñanagürü. <sup>22</sup>Rü yemaacü ga Yox rü woo guxũma ga yema guxchaxũgü nüxũ nax ngupetũxü rü tama chixexũ naxü rü tama Tupanamaxã naguxchiga.

#### Chataná rü Yoxũ nidaxawexẽ

**2** <sup>1</sup>Rü yexguma nawa nanguxgu ga ngunexũ nax Tupanapexewa wena nangugũxü ga yema norü orearü ngeruũgü ga daxücüãx, rü nüma ga Chataná rü ta natanügu naxã. <sup>2</sup>Rü nüma ga Cori ya Tupana rü nüxna naca rü ñanagürü: —¿Ngextã ne cuxü i cumax? —ñanagürü. Rü nüma ga Chataná rü nanangãxü rü ñanagürü: —Guxũ i naanegu íchayaxüegu i duũxũgütanüwa —ñanagürü. <sup>3</sup>Rü yexguma ga nüma ga Cori ya Tupana rü ñanagürü nüxü: —¿Tama êxna cunangugü ya yimã chorü duũ ya Yox? Rü tataxuma ya texé ya naxrũxü ixixe, rü naxrũxü chauga ñnũxẽ, rü naxrũxü mea maxũxe, rü naxrũxü chixexüwa ngechigaxe, rü naxrũxü tügüna dáuxe nax taxúemaama chixexũ taxüxũcax. Rü woo i cuma choxna naxcax cuca nax chixexũ nüxü cungupetüxẽxũcax nüma taxuxũma i chixexũ naxüyane, natürü nüma rü nanaxãixrügumaraxũmare i nacümaawa rü taxuxũma i chixexũ naxü —ñanagürü. <sup>4</sup>Natürü ga nüma ga Chataná rü Cori ya Tupanaxü nangãxüga rü ñanagürü: —Ngëxguma taxúema ya texé tümaxünexũchimaxã chixexũ üxgux ya wüxíe, rü taxucaxma tanaxixãchiãxẽ. Rü tügü nax tamaxẽxũcax rü ítamemare nax

itanaxãxü i guxũma i taxacü i tüxü ngëxmaxü. <sup>5</sup>Natürü ngëxguma chi naxũnewaxüchi yadaawexẽxgu rü tá nüxü cudau nax chixexũ tá cupexewatama cumaxã yaxugũxü —ñanagürü. <sup>6</sup>Rü nüma ga Cori ya Tupana rü Chatanáxü nangãxüga rü ñanagürü: —Marü name. iRü namaxã naxü i ngëma cuma cunaxwaxexü, natürü taxütãma nüxü cudáu i norü maxü! —ñanagürü. <sup>7</sup>Rü yexguma ga nüma ga Chataná rü Cori ya Tupanapexewa nixügachi, rü Yoxcax ínananguxexẽ ga wüxi ga cháxüne ga poraxü ga guxũma ga naxũnewa irüyixixü. Rü naeruwa inaxügü rü ñuxmata nacutüwa nangu. <sup>8</sup>Rü yexguma ga nüma ga Yox rü tanimacatexewa narüto. Rü nanayaxu ga wüxi ga ngáxwechipe nax yemamaxã nügü yawüxünexũcax. <sup>9</sup>Natürü tüma ga naxmãx rü ñatagürü nüxü: —¿Ñoma rü ta pora cuxü nax mea Tupanapexewa cumaxũxü? iRü Tupanamaxã chixexũ naxuegu rü noxtacüma nayu! —ñatagürü. <sup>10</sup>Natürü ga nüma ga Yox rü ngixü nangãxüga rü ñanagürü: —Pa Ngex, tama name i ngëmaacü chixexü i oremaxã quidexa. Rü guxüguma taãxẽacü tanayaxu i ngëma mexũgü i Tupana tüxna ãxü. ¿Rü ñuxãcü chi i taxüchima nayaxuxü i ngëma guxchaxũgü i taxcax ínguxü? —ñanagürü. Rü yemaacü ga Yox rü woo yema nüxü nax ngupetũxü rü tama chixexũ naxü rü bai ga norü dexawa.

#### Yoxũ ínayadaugü ga namücügü

<sup>11</sup>Rü nüma ga Yox rü nüxü nayexma ga tomaepüx ga namücügü, rü wüxi rü

Erifá ga Temáũanecũãx ixĩxũ, rü to rü Biridá ga Chũaanecũãx ixĩxũ, rü yema to rü Chofá ga Naamáanecũãx ixĩxũ. Rü yexguma nüxũ naxĩnuechigagu ga naguxũraũxũ ga guxchaxũgü nüxũ nax ngupetũxũ ga Yox, rü wũxigu naxũtawana xaxĩ nax nataãxẽgũxẽãxũcax rü naxũmũcũgũaxũcax nawa ga yema ngũxũ nax yangexũ. <sup>12</sup>Rü yexguma yáxũgutama naxĩxgu rü Yoxũ nadaugũ, rü yema poraãcü nax yadaxawexũ rü tama aixcũma nüxũ nacũxgũ. Rü yemaçax inanaxũgũe ga aita nax naxũexũ rü naxauxexũ. Rü yema taxũ ga ngechaũ nax yangegũxũgagu rü nügũ narũgũatechirugũ rü mairaxũtẽxe nügũerugu nagũnagũtẽxegũ. <sup>13</sup>Rü yemawena rü Yoxmaxã mairaxũanewa narũtogũ. Rü 7 ga ngunexũ rü 7 ga chũtaxũ yéma nayexmagũ rü taxuxũma ga dexa nanaxuxuchigũ, yerũ nüxũ nadaugũ ga Yox ga taxũ ga ngũxũ nax yangexũ.

#### Nidexa ga Yox naxçax ga yema ngũxũ ga naxçax ínguxũ

**3** <sup>1</sup>Rü düxwa nidexa ga Yox rü chixexũ namaxã naxuegu ga yema ngunexũ ga nagu nabuxũ rü ñanagũrũ: <sup>2-3</sup>—Nachixe ga yema chũtaxũ ga nagu changóxũ. Rü nachixe ga yema ngunexũ ga nagu chabuxũ.

.....

<sup>20</sup>¿Tũxcũũ ya Tupana i tũxũ nangóexẽxũ ya yíxema ngũxũ ingeechaxe? ¿Rü tũxcũũ i tũxũ namaxẽxũ ya yíxema guxchaxũgũ rü ngechaũgũ tũmaçax ínguechaxe? <sup>21</sup>¿Rü tũxcũũ tama tayu ya yíxema yuçax dáuxe rü woo poraãcü naxçax tadaũxgu

ñoma diẽru icũxũcax idauxũrũxũ? <sup>22</sup>Rü ngẽma taãxẽ i naxçax tadauxũ rü düxwa tũxna nangu i ngẽxguma tayũxgux. <sup>23</sup>¿Rü tãxacũcax nangóxũ ya wũxi ya yatũ ega chi Tupana ngũxũwa rü guxchaxũwa namaxẽãgu? <sup>24</sup>Rü ngẽma choxũ nax nangũxũgagu rü tama chataiya rü ngẽma nax chaxaxuxũ rü chauxgũxũetũ rü ñoma dexãrũxũ nichuru. <sup>25</sup>Rü guxũma ga yema guxchaxũgũ ga naxçax chamuũxũ rü ñũxma rü chowa nangu. <sup>26</sup>Rü taguma icharũngũ rü taguma chataãxẽ, erũ ngẽma guxchaxũgũ rü chaugu nangu, rü ngẽmagagu rü nataxu i chorũ taãxẽ —ñanagũrũ ga Yox.

#### Erifá rü Yoxũ naxucũxẽ

**4** <sup>1</sup>Rü Erifá ga Temáũcũãx ixĩxũ rü Yoxna naca rü ñanagũrũ nüxũ: <sup>2</sup>—Ngẽxguma chi texé cumaxã idexagu ¿rũ taxũchima cuxũ nawaxtũmũũxũ? Erũ taxucũrũwama charũchianemare nax tama cumaxã chidexaxũ. <sup>3-5</sup>Rü cuma nax tũxũ cungũxẽxũ ga guxema muxema ga guxchaxũ tũxũ ngupetũgũxe, rü tũxũ cuporaxẽxũ ga guxema turáxe, rü tũxũ cunangũchaũxẽxũ nax ítarũdaxũcax ga guxema rũnguxe, rü tũmamaxã cuporaxũ ga guxema rũnguxchaũxe, natũrũ i ñũxma nax guxchaxũgũ cuxçax ínguxũ, rü cuma rü cungearũ poraãx rü cumuũ. <sup>6</sup>Rü cuma nax aixcũma Tupanaaxũ cupuracũxũ rü mecũ ya norũ duũ quixĩxũ ¿rũ ñuxãcü i tama aixcũma nagu cuyaxóxũ ya yimá nüxna nadaucũ i ngẽma mexũ i duũxũgũ? <sup>7</sup>iRü mea nagu rũxĩnũ! ¿Wũxi ya duũxẽ ya aixcũma mexe rü taguma chixexũ úxe, rü marũ ñuxgu nüxũ

cudauxũ nax ngürümare Tupana tüxũ  
poxcuxũ? —ñanagürü ga Erifá.

.....

#### Yox rü namücügüxũ nangãxũ

**6**<sup>1-3</sup>Rü nüma ga Yox rü nanangãxũga  
rü ñanagürü: —Ngëxguma chi  
guxũma i chorü ngechaũgü rü chorü  
guxchaxũgü rü inayáxgu, rü naxnücü ya  
taxtü i taxũwa ngëxmagüciarü yexera  
chi nayá. Rü ngëma ngúxũ nax  
chingexũcax nixĩ nax düxwa ore i tama  
mexũmaxã chachonagüxũ.

.....

<sup>8-9</sup>Chierüna Tupana noxtacüma  
choxna naxãxgu i ngëma nüxna naxcax  
chacaxũ i chanaxwaxexũ. Rü chierüna  
wüxicana choxũ yagaxgu nax ngëxma  
nagúxũcax i chorü maxũ. <sup>10-11</sup>Rü ñuxma  
nax ngúxũ chingexũ, rü wüxi i chorü  
taãxë nixĩ nax choxũ yagaxũ ñomarüta  
nüxũ changechaũ i norü ore ya Tupana  
ya üü necü. Rü ñuxma rü chagúarü  
poraãx rü marü tama yaxna namaxã  
chaxĩnü i ngëma guxchaxũgü rü marü  
taxucaxma tüxcüũ nua chamaxecha.

<sup>12</sup>Rü chorü maxũ rü tama wüxi ya  
nutarüxũ natai. Rü choma rü tama wüxi  
i bróucherüxũ chatai. <sup>13</sup>Rü taxucürüwa  
chaugünatama pora chaxã rü taxüema  
texé choxũ taporaxëxë. <sup>14</sup>Rü wüxi i  
tamücü i ngúxũ ingexũ rü nüxũ  
tangechaũ woo tama yimá guxãétüwa  
ngëxmacümaxã yaxaixcümagu.

.....

<sup>15</sup>Natürü i pemax, Pa Chomücügüx, rü  
tama chomaxã pixaixcümagü. Rü ñoma  
wüxi i natüxacü i paxürüxũ pixĩgü.

.....

<sup>21</sup>Rü ngëmaãcü pixĩgü chauxcax i  
pemax. Rü nüxũ pedau i ñaa taxũ i

chorü guxchaxũ natürü pebaixãchiãxë  
rü ngëmacax pemuüe.

.....

<sup>24</sup>iChomaxã nüxũ pixu nax ngextá  
íchatüxũ rü chixexũ chaxiüxũ! Rü choma  
rü tá charüngeaxmare. <sup>25</sup>Rü taxüema nüxũ  
taxo i wüxi i ore i aixcüma ixĩxũ, natürü i  
pema rü taxuxũma i chixexũ chaxüchirëxũ  
rü choxũ pixugü —ñanagürü ga Yox.

.....

#### Biridá rü Yoxũ nangãxũ

**8**<sup>1</sup>Rü nüma ga Biridá ga  
Chúaanecüãx rü Yoxũ nangãxũga  
rü ñanagürü: <sup>2</sup>—Ñomarüta Pa Yox, rü  
quidexachigüama. ¿Rü ñuxguxüratáta  
nüxũ curüchaxũ nax ñoma wüxi ya  
buanecü ya tacürüxũ yixĩxũ i curü  
dexa? <sup>3</sup>Rü Tupana ya guxãétüwa  
ngëxmacü rü guxũguma nixaixcüma rü  
tama nanangupetüxëmare i wüxi i  
chixexũ. <sup>4</sup>Rü guma cunegü rü maneca  
Tupanapexewa chixexũ naxüe, rü  
ngëmacax nüma ya Tupana rü  
nanapoxcue naxcax ga yema naxügüxũ.

.....

<sup>13</sup>Rü ngëmatama nixĩ i nüxũ ngupetüxũ i  
guxũma i duüxũgü i chixexũarü üruxũ  
ixĩgüxũ rü Tupanaxũ rüngümaexũ, rü guxũ  
i nagu naxĩnüexũ rü ngëxma narüxomare.

.....

<sup>20</sup>Tupana rü taguma nüxũ  
inayarüngüma ya yimá yatü ya  
chixexũwa ngechigacü, rü tama nüxũ  
narüngüxë i ngëma duüxũgü i  
chixexũarü üruxũ ixĩgüxũ. <sup>21</sup>Rü nüma  
ya Tupana rü tá wena cuxũ nacugüxëxë  
rü tá curü taãxëmaxã tagaãcü aita  
cunaxüxëxë —ñanagürü ga Biridá.

.....



## Yox rü Biridáxü nangãxü

**9** <sup>1</sup>Rü yexguma ga Yox rü Biridáxü nangãxü rü ñanagürü: <sup>2</sup>—Choma rü meama nüxü chachuax i guxüma i ngëma, rü nataxuma i ngexwacaxüxü i chomaxã nüxü quixuxü. Rü aixcüma nixí nax Tupanapexewa rü nataxuxü ya yatü ya ngearü chixexüácü. <sup>3</sup>Rü ngëxguma chi wüxi ya yatü rü Tupanapexewa nügü ínapoxüchaügu, rü woo 1000 i oremaxã nügü ínapoxügu, rü bai i wüxi rü ningü nax nügü namaxã ínapoxüxü.

.....

<sup>15</sup>Rü woo chi changearü chixexüãxgux, rü taxucürüwama chanangãxü erü nüma nixí i chorü maxüxü nangugüxü. Rü ngëma nax nüxü changechaütümüxüxícata nixí i choxü tauxchaxü nax naxcax íchacaxü.

.....

<sup>19</sup>¿Rü texé nagu tarüxínü nax túmaarü poramaxã tá nüxü tarüporamaexü? Erü nüxícata nixí i naporaxü rü yaxaixcümaxü. ¿Rü texé tá nüxna taca i norü maxüchiga?

.....

<sup>33-34</sup>Rü chierüna toxcax nangexmagu i wüxi i ãëxgacü i guxchaxüarü mexëerüxü i Tupanamaxã rü chomaxã icuáxü nax chauétüwa nachogüxü nax tama choxü yapoxcuchigüxüçax rü choxü yamuüxëëchigüxüçax ya Tupana. <sup>35</sup>Rü ngëxguma i choma rü taxüchima chamuüãcüma namaxã chidexa, erü chaüxcax rü taxuxüma i chixexü napexewa chaxü —ñanagürü ga Yox.

.....

## Chofá rü Yoxü nangãxü

**11** <sup>1</sup>Rü yexguma ga Chofá ga Naamáanecüax rü Yoxü nangãxü rü ñanagürü: <sup>2</sup>—Guxüma i ngëma dexagüane i nüxü quixuxüçax rü tá chanangãxü. Rü tama ngëma nax namaarü dexaáxüçax nixí i aixcüma yixíxü i wüxi i duüxüarü ore. <sup>3</sup>¿Rü cuma nagu curüxínügu i ngëma curü dexamaxã chi toxü curüingëaxgüxëxë rü taxüechima cuxü tangãxügaxü naxcax i ngëma curü ore i namaxã toxü cucugücüraxüxü? <sup>4</sup>Rü cuma nüxü quixuxgu rü nawexgu i ngëma curü ínú, rü cugü ícurümeaarü maxüãx i Tupanapexewa. <sup>5</sup>Chierüna Tupana idexagu nax cumaxã nüxü yaxuxüçax i ngëma nüma cumaxã nagu naxínüxü. <sup>6</sup>Rü nüma ya Tupana rü chi cuxcax nanangoxëxë nax taxacüwa yixíxü ga chixexü cuxüxü, erü nüma rü aixcüma nüxü nacuax i guxüma i cuxüxü. Rü ngëmaãcü i cuma rü tá nüxü cucuax rü íxramarexü i poxcu cuxna naxã rü tama i ngëma cuxüxümaxã wüxiguxü. <sup>7</sup>¿Rü nüxü cucuáxü yixíxü i ngëma Tupanaarü ínú i ëxüguxü? ¿Rü cuxü natauxchaxü nax nüxü cucuáxü i ngëma nagu naxínüxü ya yimá guxãétiwa ngëxmacü? .....

<sup>11</sup>Rü nüma ya Tupana rü aixcüma nüxü nacuax nax texé tixíxü ya yíxema idorataxáxe. Rü nüma rü nüxü nadau i ngëma chixexü. ¿Ëxna cuma nagu curüxínügu rü tama nixí i nüxü nacuáxü i ngëma cuxüxü? <sup>12</sup>Rü wüxi i duüxü i Tupanaarü cuaxwa nügü nguxëëchaüxü rü ñoma wüxi i búrucacü i nügü duüxüwa nguxëëchaüxürüxü nixí. <sup>13</sup>¿Rü

íyachaxāchi nax chixexũ cuxuxũ rü mexũ naxũ! iRü Tupanana naca nax cuxũ nangũxēxũcax! <sup>14</sup>Rü ngēxguma chixexũ cuxũxgu irü nüxna ixũgachi! Erü tama name i curü maxũwa cunaxũchica i ngēma chixexũ. <sup>15</sup>Rü ngēxgumarica tá nixĩ i cungearü chixexũācũma cudaunagũxũ rü taāxēācũma Tupanamaxā quidexaxũ rü taxũtāma cumuũxũ —ñanagürü ga Chofá.

.....

**13** <sup>1</sup>Rü yexguma ga nüma ga Yox rü nanangāxũ rü ñanagürü: —Guxũma i ngēma nüxũ pixuxũ rü chauxetũmaxā nüxũ chadau, rü chauchixēmaxā nüxũ chaxĩnũ. <sup>2</sup>Rü ngēma pema nüxũ pecuáxũ rü choma rü ta nüxũ chacuāx. Rü taxuwama nixĩ i pexũ nax charũñaxtũgumaexũ i chorü cuāxwa. <sup>3</sup>Natürü narũmemae chi nixĩ nax Tupanamaxāxũchi chidexaxũ nax namaxā togü tachoxũgagũxũ ya yimá guxāētũwa ngēxmacü. <sup>4</sup>Pema rü perü doramaxā peyadũxü i ngēma aixcũma ixĩxũ. Rü pema rü ñoma dutũrugü i taxũxũma üxũxũrũxũ pixĩgü.

.....

<sup>15</sup>Rü woo chi Tupana ñaa guxchaxũmaxā choxũ imāxgu, natürü napexewaxũchi rü tá chaugü íchapoxũama, erü taxuxũma i chixexũ chaxũ.

.....

<sup>23</sup>iChomaxā nüxũ iXu! ¿Taxacürü chixexũ chaxũ? ¿Rü taxacũwa nixĩ i tama Tupanaga chaxĩnũxũ?

<sup>24</sup>¿Taxacũcax chauxchaxwa cudauegu? ¿Rü tũxcũũ wüxi i curü uanürũxũ chomaxā quixĩ? —ñanagürü ga Yox.

.....

Erifá rü wenaxarü Yoxũ nangāxũ

**15** <sup>1</sup>Rü yexguma ga Erifá rü nanangāxũga rü ñanagürü: <sup>2</sup>—¿Ngēmaācũ yadexaxũ ya wüxi ya yatü ya nüxũ cuácü? Rü ngēma curü ore i cugü namaxā ícupoxũxũ rü ñoma buanecürüũmare nixĩ. <sup>3</sup>Rü wüxi ya yatü ya aixcũma nüxũ cuácü rü taguma ngeāxēācũmare nidexa rü tama nügü ínapoxũ namaxā i ore i natũxcaxmamare ixĩxũ. <sup>4</sup>¿Ēxna tama Tupanaxũ cumuũ? ¿Rü ėxna tama nüxũ cungechaũ?

.....

<sup>12</sup>¿Rü tũxcũũ i ngēma ngũxũ i quingexũ cuxũ narũporamae rü ngēmacax cunuxetü? <sup>13</sup>¿Rü tũxcũũ Tupanamaxā cunu rü ngēmacax tama cuxāne nax napexewa naxcax quidexaxũ i ngēma cuxcax ínguxũ?

.....

<sup>20</sup>Rü ngēma duũxũ i chixexũ rü nuxwaxexũ, rü norü maxũ rü nanuxu rü guxũguma nachixeāxēechamare.

.....

<sup>34</sup>Rü ngēma chixri maxēxũ i duũxũgü rü tá nangexacũgũmare. Rü yima napatagü ya muarü ngēmaxũíane ngĩmaxā i ngēma diēru i chixexũwa ngĩxũ nayaxũxcü rü tá nixae —ñanagürü ga Erifá.

.....

Yox rü Erifáxũ nangāxũ

**16** <sup>1-2</sup>Rü yexguma ga Yox rü nanangāxũga rü ñanagürü: —Marü muexpũxcũna nüxũ chaxĩnũ i nangexgumaraxũxũ i dexa. Pema rü tama taāxē choxna pexā, rü yexeraācũ

ngúxũ choxũ pingexẽẽgũ. <sup>3</sup>Rũ ngẽma perũ dexagũ i taxuwama mexũ rũ ipeyadaxẽẽmare. ¿Rũ ñuxguxuratáta nũxũ perũxoexũ nax chixri chauchiga pidexagüechaxũ?

.....

<sup>15</sup>Choma rũ chorũ ngechaũmaxã naxchiru i témũxũgu chicux, rũ tanimacagu chaxüeru. <sup>16</sup>Rũ axumaxã düxwa charüchachiwe rũ ngẽmacax charüchaxetü. <sup>17</sup>Rũ ngẽmaãcü chauxcax ínangu woo taguma ñuxgu texémaxã chanu rũ taxuxũma i chixexũgu charüxĩnũácũma chayumüxẽ. <sup>18</sup>Rũ ñaa guxchaxũgũ i chauxcax íngugũxũgagu, rũ chanaxwaxe nax texé choxũ ípoxũxũ. Rũ ngẽma naxcax íchacaxũ nixĩ nax naxũpa nax chayuxũ rũ aixcũma nangóxũ nax tama bexma pecádu chaxũxũgagu yixĩxũ i ngúxũ chingexũ. <sup>19-20</sup>Rũ ñoma wüxi i duũxũpexewa tamüciétüwa idexaxũrũxũ rũ bexmana tayíxema i daxũgũxũ i naanewa ya chauétüwa idexáxe rũ nũxũ ixuxe i Tupanapexewa i ngẽma chorũ ínũgũ nax ngẽmaãcü nüma ya Tupana rũ nũxũ nax nadauxïcax i ngẽma chauxgũxũxetü rũ nũxũ changechaũtümũxũxïcax —ñanagürü ga Yox.

.....

**17** <sup>1</sup>Rũ nüma ga Yox rũ ñanagürü ta: —Marũ nataxuma i chorũ pora rũ marũ ningaica nax chayuxũ. Rũ chauxmaxũ i nagu tá chatáxũ rũ marũ ínamemare. <sup>2</sup>Rũ ngẽma duũxũgũ i chauxütawa ngẽmagũxũ rũ nua choxũ yacugüemarexũ nixĩgũ. Rũ ngunecü rũ chütacü rũ nũxũ chadau nax ñuxãcü choxũ nachixewegüechaxũ.

.....

<sup>11</sup>Rũ ngẽma ngunexũgũ i nagu chamaxũxũ rũ nigúetanü, rũ guxũma i ngẽma chaxũxchaũxũ rũ nagu charüxĩnũxũ rũ ngẽxma narüxogümare.

.....

<sup>13</sup>Rũ yuxicatama nixĩ i ngẽma íchananguxẽxũ nax ngẽma éanexũgu charüngũxũcax —ñanagürü ga Yox.

.....

**Biridá rũ wenaxarü Yoxũ nangãxũ**

**18** <sup>1-2</sup>Rũ yexguma ga nüma ga Biridá rũ Yoxũ nangãxũga rũ ñanagürü: —¿Ñuxguxuratáta nũxũ curüchaxũ nax ngẽmaãcü quidexaxũ? Rũ ngẽxguma chi aixcũma yixĩxgu i curü ore rũ marü name i yigũmaxã tidexagũ.

.....

<sup>5</sup>Rũ ngẽma chixri maxũxũ i duũxũ rũ paxa inayagux i norü maxũ, rũ ngẽmawena rũ taxütáma wena namaxũ i ñoma i naanewa.

.....

<sup>7</sup>Rũ ngẽma nacũma i chixexũ i naxcax mexũ rũ taxütáma mea nũxũ ínanguxuchi. Rũ nüma tátama nagu nangu i ngẽma chixexũ i togücax nagu naxĩnũxũ.

.....

<sup>11</sup>Rũ ngẽma chixri maxũxũ i duũxũ rũ guxũ i naanewa rũ duũxũgũ nanaxãxünegü, rũ ngextá ínaxũxüwa rũ nawe ningëxütanü.

.....

<sup>17</sup>Rũ guxũma i nachiga rũ tá inayarüxo i ñoma i naanewa, rũ marü taxuwatáma duũxũgũ nüxna nacuxãchie.

.....

<sup>21</sup>Rü ngēmaācü ngēxma nayagux i norü maxü i ngēma duüxü i chixri maxüxü i tama Tupanaxü cuáxchaüxü —ñanagürü ga Biridá.

**Yox rü namücügüxü nangāxü**

**19** <sup>1-2</sup>Rü yexguma ga nüma ga Yox rü namücügüxü nangāxüga, rü ñanagürü: —¿Ñuxguxüratáta i nüxü perüchaxü nax choxü penaxixächiāēēxü rü ngüxü choxü pingexēēxü namaxá i perü dexa? <sup>3</sup>Rü guxüguma chomaxá peguchigagü. ¿Ēxna tama pexānee nax ngēmaācü chomaxá pixīgüxü?

.....

<sup>7</sup>Rü poraācü aita chaxü nax texé choxü íyapoxüxüçax, natürü taxúema choxü tangāxü. Rü ngüxēēçax íchaca rü taxúema choxü tarüngüxēē. <sup>8</sup>Rü Tupana rü choxü nipoxyemaxü rü choxü nixēyemaxü nax taxucürüwa chaxüpetüxüçax.

.....

<sup>11</sup>Rü poraācü chomaxá nanu rü ñoma wüxi i norü uanürüxü chomaxá nixí.

.....

<sup>19</sup>Rü ngēma chomücüxüchigüchirex ixīgüxü rü chauxchi naxaie. Rü ngēma poraācü nüxü changechaügüxüchichiréxü rü chomaxá narüxuanügü. <sup>20</sup>Rü ngēma chaüxchaxmü rü marü chauxchinaxāwa nayaxüx. Natürü naétüwa i ngēma rü chamaxama. <sup>21</sup>iPexü changechaxütümüxü, Pa Chomücügüx! Erü nüma ya Tupana rü naxmexmaxá choxü nimax. <sup>22</sup>¿Tüxcüü i pema rü Tupanarüxü chowe pingēxütanüxü? ¿Rü tama ěxna i marütama yixixü nax

chixexü chomaxá pexüxü? <sup>23-24</sup>Rü chierü texé naxümatügu i chorü dexa. Rü chierü wüxi i fiérunaxçax i ümatürüümaxá plómotachinügu rüexna nutatachinügu naxümatügu i ñaa chorü ore nax guxüguma ngēma nangexmaechaxüçax. <sup>25</sup>Rü choma rü nüxü chachuax rü yimá choxü ípoxücü rü namaxü. Rü nüma tá nixí i chauétüwa nachogüxü i nõma i naanewa. <sup>26</sup>Rü woo i ñaa chauxune rü tá nua chanatax, natürü ngexwaxçaxüxü i chauxunemaxá rü ngóxüwama tá Tupanaxü chadau. <sup>27</sup>Rü chomatama chauxetümaxá tá nüxü chadau rü tama toguxexetümaxá —ñanagürü ga Yox.

.....

**Wenaxarü Yoxü nangāxü ga Erifá**

**22** <sup>1-2</sup>Rü yexguma ga nüma ga Erifá rü Yoxü nangāxü rü ñanagürü: —¿Cuma nagu curüxñnügü rü Tupanaaxü namexü ya wüxi ya yatü ega nüxü cuaxüchicü yixixgu? <sup>3</sup>¿Rü yimá Tupana ya guxáétüwa ngēxmacü rü taxacürü mexü tá cuwa nayaxu ega mea cumaxüxgu rü napexewa nataxüxgu i curü chixexü? <sup>4-5</sup>Rü ñuxma nax Tupana cuxü poxcuxü rü tama i taxacürü mexü nax cuxüxügagu nixí i cuxna nacaxü rü cuxü yanawexächixēēxü. Natürü ngēma curü chixexü i taxüchixü i taxuguma yagüxügagu nixí i cuxü napoxcuxü.

.....

<sup>12</sup>Rü nüma ya Tupana rü dauxüwaxüchi nangexma rü yimá ětagü ya dauxüwa nüxü idaucü rü nacutütüüwa nangexmagü. <sup>13-14</sup>¿Ñuxācü i cuma i nagu curüxñnüxü nax Tupana tama nüxü nacuáxü i ngēma cuxüxü rü

ngēma pamüxü i caixanexügagu taxucürüwa cuxü nangugüarü maxüáxü? ¿Rü ñuxäcü nüxü quixuxü nax Tupana tama cuxü dauxü? Erü nüma rü guxüwama naxü i dauxüwa.

.....

<sup>21</sup>iRü dücax, rü wenaxarü Tupanamaxä rüngüxmü! Rü ngēmaäcü tá wenaxarü mea cuxü naxüpetü. <sup>22</sup>iRü irüxñü i norü ucuxë rü cuäëgu namaxä nanguxü i norü ore! <sup>23-25</sup>Rü ngëxguma chi yimá guxäétüwa ngëxmacüna cugü cuxägu rü naxcax cutäeguxgux rü chi cugüna cuyaxügachixëëgu i guxüma i chixexü i cuchüüwa ngëxmaxü rü chi cugüwa nüxü cuxooxgu nax cuxü nangüchaüxü i diëru rü úirugü, rü nümatátama ya Tupana tá nixí i cuxcax ñoma taxü i curü úiru rü curü diërurüxü yixüxü. <sup>26</sup>Rü ngëxguma rü tá curü taäxë nixí ya Tupana rü taxucaxtáma nüxü cuxâne. <sup>27</sup>Rü ngëxguma curü yumüxëwa taxacüçax nüxna cucaxgu, rü nüma rü tá cuxü naxñü. Rü cuma rü tá cuyanguxëxë i guxüma i ngēma namaxä icuxunetaxü. <sup>28</sup>Rü guxüma i ngēma cuxüxüwa rü mea tá ínanguxuchi. Rü Tupana rü cuax tá cuxna naxä nax mea yaxüxü i curü maxü. <sup>29</sup>Erü nüma ya Tupana rü nanaxänexëxë i ngēma nügü icuaxüxü natürü ínanapoxü i ngēma napexewatama tama nügü icuaxüxü —ñanagürü ga Erifá.

.....

**Yox rü nügü ínixuechigüama  
nax taguma chixexü naxüxü**

**23** <sup>1-2</sup>Rü yexguma ga nüma ga Yox rü nanangäxüga rü ñanagürü: —Chanaxixächiäëcüma tá

chanangäxüga i ñuxma erü nüma ya Tupana rü naxmëxmaxä choxü nimax. <sup>3-4</sup>Rü chierü nüxü chacuaxgu nax ngextá Tupanaxü ichayangaxü nax naxütawa changuxüçax, rü namaxä ngēma chayarüdexaxüçax, rü nüxü chixuxüçax i ngēma choxü ngupetüxü. Erü choxü nangexma nax taxacümaxä chanangäxügaxü.

.....

<sup>10</sup>Natürü nüma rü nüxü nacuax nax ñuxäcü mea chamaxüxü rü ngëmacax ngëxguma choxü naxüxgu rü ñoma úiru i ngearü äüächixüxü tá chixí. <sup>11</sup>Rü choma rü guxüguma mea naga chaxñü rü taguma nüxna íchaxüxü i ngēma norü ucuxë i chomaxä nüxü yaxuxü. <sup>12</sup>Rü guxüguma mea chayanguxëxë i norü mugü rü norü ucuxëgü, rü taguma choxrütama ngüchaü chaxü. <sup>13</sup>Rü ngëxguma taxacü naxüxüchaxü i nümax rü nanaxü, rü taxüema texë tanaxüchicüxü i ngēma norü ínu. <sup>14</sup>Rü ngēma nüma nagu naxñüxü nax chomaxä naxüáxü rü tá nanaxü wüxigu namaxä i ngēma to i nangexgumaraxüxü i tá chomaxä naxüxü. <sup>15</sup>Rü ngëmacax nüxü chamuü. Rü ngëxguma nagu charüxñümaregu i ngēma choxü ngupetüchaüxü rü muü chaçaxçax ínangu —ñanagürü ga Yox.

.....

**24** <sup>1</sup>Rü nüma ga Yox rü ñanagürü ta: —¿Tüxcüü ya yimá guxäétüwa ücü ya Tupana rü tama tamaxä nüxü yaxuxü ega taxacü naxüxüchaxü nax ngēmaäcü i yixema rü nüxü icuáxüçax? <sup>2</sup>Rü ngēma chixexü i duüxügü rü nayapugachigü i ngēma üyeanearü cuaxrüügü. Rü tümacax

nangĩxgũ ya carnérugũ nax yexeraãcü  
nũxũ timuxũçax. <sup>3</sup>Rũ tũmaxũnacax  
nangĩxgũ ya yĩxema taxcutagũ rü  
yutegũxe.

.....

<sup>12</sup>Rũ yĩxema ïanewa ngẽxmagũxe rü  
yuechaũxe rü taxauxe rü  
tangechaũgagũ, natürü nüma ya Tupana  
rü tama tüxũ nũxũ naxĩnü i tũmaarü  
yumũxẽ.

.....

**31** <sup>1</sup>Rũ nüma ga Yox rü  
nidexachigũama rü ñanagürü:  
—Choma rü meama chaugũna chadau  
nax tama chauãewa choxũ  
nangũchaũxũ i togüarü ngẽmaxũgũ rü  
bai i pacügü.

.....

<sup>5</sup>Rũ aixcüma nũxũ chixu rü taguma  
chixexũgu charũxĩnũãcüma taxacü  
chaxü, rü bai nagu charũxĩnü ga texéxũ  
nax chawomũxẽxũ.

.....

<sup>16</sup>Rũ taguma tüxũ icharüngũma ga  
guxema ngearü diëruãxgũxe nax tüxũ  
charüngũxẽxũ, rü woo ga guxema  
yutegũxe rü taguma chanaxwaxe ga  
taiya nax tingegũxũ.

.....

<sup>24</sup>Rũ taguma chorü diëругu chayaxõ.  
<sup>25</sup>Rũ ngẽma chorü taãxẽ rü bai ga  
ñuxgu chorü muxũ ga yemaxũwa  
nayexma, rü bai ga yema mucũma ga  
diëru choxna nguxũwa nax nayexmaxũ.

.....

<sup>33-34</sup>Rũ taguma togürũxũ ichayacux ga  
yema chixexũ ga chaxũxũ rü taguma  
chayacúchigü nax duũxũgü tama nũxũ  
cuáxũçax. Rũ taguma  
chautanũxũgüpexewa chaugü chibexcu

nax yemaacü tama nũxũ nacuxgũxũçax  
i chorü chixexũ rü tama choxũ nax  
naxoexũçax. <sup>35</sup>Chierü tayĩxemagu ya  
choxũ irũxĩnũxe. Rũ ngẽma nũxũ  
chixuxũ rü aixcüma nixĩ rü ngẽmacax  
chauéga nagu chaxü. Chierü ñuxma ya  
Tupana ya guxũxũ cuácü rü choxũ  
nangãxũga. Rũ ngẽma choxũ  
ixuaxũgũxũ rü name nixĩ i poperagu  
nanaxümatügũã i ngẽma namaxã choxũ  
yaxugũxũ —ñanagürü ga Yox.

.....

#### Eriú rü nüxĩ Yoxmaxã nidexa

**32** <sup>1</sup>Rũ yexguma ga yema  
tomaepũx ga yatügü rü  
narüngeaxgü rü marü tama Yoxũ  
nixuchigachigü, yerü nüma ga Yox rü  
nũxũ nixuchigũama ga taxuxũma ga  
chixexũ nax naxũxũ. <sup>2</sup>Rũ yema  
nayexma ta ga wũxi ga to ga yatü ga  
Eriúgu ãégacü. Rũ nüma rü Baraqué ga  
Buchftanũxũ nane nixĩ. Rũ norü oxĩ rü  
Ráũ nixĩ. Rũ nüma ga Eriú rü marü  
tama yaxna namaxã naxĩnü nax  
Yoxmaxã nanuxũ, yerü nũxũ nadau ga  
nügü nax ñapoxũxũ rü Tupanana  
naxugũãxũ. <sup>3</sup>Rũ nüma ga Eriú rü yema  
tomaepũx ga Yoxmücügũmaxã rü ta  
nanu, yerü tama nũxũ nacuxgü ga  
ñuxácü Yoxũ nax nangãxũgagũxũ, rü  
yemaacü naya Tupanaguãchixẽégü ga  
yema chixexũ. <sup>4</sup>Rũ nüma ga Eriú rü  
guxãxũma narüngextũxũmae, rü  
yemacax yema togũxũ ñananguxẽxẽ ga  
nax yagüegagũxũ ga Yoxmaxã nax  
yadexagũxũ. <sup>5-6</sup>Natürü yexguma nũxũ  
nadauxgu nax tama nũxũ nacuxgũxũ  
ga ñuxácü nax nangãxũgagũãxũ, rü  
dũxwa tama yaxna namaxã naxĩnü rü

ñanagürü: —Choma rü pexü  
charübumae rü ngëmacax  
changeaxmare, rü tama pemaxã nüxü  
chixu i ngëma nagu charüxínüxü. <sup>7</sup>Erü  
choma rü nagu charüxínü rü pema nax  
perüyamaegüxü rü yexera peãëxü mea  
pecuax. <sup>8-9</sup>Natürü tama ngëma nax  
namuarü taunecüáxügagu nixí nax wüxi  
ya yatü cuax nüxü ngëxmaxü. Erü yimá  
Tupana ya guxãétüwa ngëxmacü nixí ya  
inaxãcü i wüxíxechigüarü cuax  
—ñanagürü ga Eriú.

.....

**33** <sup>1</sup>Rü nüma ga Eriú rü  
nidexachigüama rü ñanagürü:  
—Ngëmacax, Pa Yox, chanaxwaxe nax  
icurüxínüxü i chorü ore. iRü nangugü i  
ngëma tá cumaxã nüxü chixuxü! <sup>2</sup>Rü  
ñuxma rü marü choxü nangexma nax  
taxacümaxã tá cuxü changãxüxü. <sup>3</sup>Rü  
ore i aixcüma ixixümaxã tá chidexa. Rü  
aixcüma tá cumaxã nüxü chixu i ngëma  
nagu charüxínüxü. <sup>4</sup>Rü Tupana ya  
guxãétüwa ngëxmacü rü choxü  
nangoxëxë rü choxü namaxëxë. <sup>5</sup>Rü  
ngëxguma chi nüxü cucuaxgu nax  
choxü cungãxüxü irü ëcü choxü  
nangãxü! <sup>6</sup>Rü dücax, rü choma rü  
cumax rü Tupanapexewa rü  
tawüxigumare. Erü yixema i taxre rü  
waixümüwa tüxü naxü ya Tupana. <sup>7</sup>Rü  
ngëmacax tama name i chomaxã  
cubajixãchi erü taxütãma ñoma wüxi i  
ãëxgacü tüxü muxürüxü tá cuxü chamu.  
<sup>8-10</sup>Rü choma rü aixcüma  
chauchixëmaxã cuxü chaxínü nax  
ñacuxü: “Rü Tupanapexewa chame, rü  
nataxuma i chixexü i chowa, rü taguma  
taxacürü chixexü chaxü. Natürü nüma  
ya Tupana rü naxçax nadau nax

taxacüçax choxü ínaxuxüxü. Rü ñoma  
wüxi i norü uanürüxü chomaxã nixí”,  
ñacuxü.

.....

<sup>12</sup>Natürü tama aixcüma nawexgu i  
ngëma nüxü quixuxü erü ya Tupana rü  
guxãétüwa nangexma. <sup>13</sup>¿Rü tüxcüü  
napexewatama Tupanana cunaxu nax  
tama cuxü nangãxüxü i curü ore i  
namaxã cugüétüwa cuchogüxü?  
<sup>14</sup>Tupana rü naguxüraüácü tamaxã  
nidexa natürü i yixema rü tama nüxü  
tacuax i ngëxguma tamaxã yadexagu.  
<sup>15</sup>Ñuxguacü rü chütacü tamaxã nidexa i  
tanegüwa, rüexna tüxü nangoxetüxëxë i  
ngëxguma yaxta tüxü poragu rü ipeegu.  
<sup>16-17</sup>Rü Tupana rü nidexa  
naxmachixëwa i duüxügü rü  
nayaxucuxëgü rü nanamuüexëxë nax  
ngëmaãcü nüxna yaxigachixüçax i  
ngëma nacüma i chixexü rü tama nügü  
yacuaxüügüxüçax. <sup>18</sup>Rü ngëmaãcü ya  
Tupana rü äücümaxüwa  
ínananguxüxëxë i duüxügü nax tama  
nayuxüçax rü tama tauquegu  
yataxgüxüçax. <sup>19</sup>Rü ñuxguacü ya  
Tupana rü duüxügüçax ínananguxëxë i  
daweane rü ngúxü nüxü ningexëxë nax  
ngëmamaxã iyanawëxãchixëãxüçax.

.....

<sup>29-30</sup>Rü Tupana rü muexpüxcüna  
ngëmaãcü duüxümaxã nanaxü nax  
ínapoxüãxüçax nüxna i yu nax  
ngëmaãcü namaxechaxüçax —ñanagürü  
ga Eriú.

.....

**34** <sup>10</sup>Rü nüma ga Eriú rü  
ñanagürü ta: —Natürü pemax,  
Pa Chomücügüx nax Peãëxü Pecuáxüx  
irü choxü iperüxínüe! iRü taxü i nagu

perüxîniüexû ya yimá Tupana ya guxáétüwa ngëxmacü rü chixexû naxüxû rüexna ínatüxû i ngëxguma texéxû iyanawexächixëégu! <sup>11</sup>Rü nüma ya Tupana rü ngëma wüxíe taxüxüâcüma tüxû nanaxütanü. Rü yíxema mexû ügúxe rü mexümaxâ tüxû nanaxütanü rü yíxema chixexû ügúxe rü poxcumaxâ tüxû nanaxütanü.

.....

<sup>14-15</sup>Rü ngëxguma Tupana duüxügüna nayaxüxgu i norü maxû rü guxüma nayue rü wenaxarü waixümüxû nixígü. <sup>16</sup>Rü ngëxguma cuma rü wüxi i duüxû i cuâéxû cuáxû quixíxgu rü iécü choxû íruxînü i ñaa chorü dexa! <sup>17</sup>Rü ngëxgumachi Tupana naxchi aixgu i ngëma mexû ñrü ñuxácü chi namaxâ inacuax i guxüma i naane? Rü nüma nax guxáarü yexera mecü yixíxü ñrü ñuxácü i cumax i chixexû namaxâ cuxueguxû? <sup>18</sup>Rü ngëxguma chixexû naxügügu i ngëma nachixüanegüarü âëxgacügü rü ngëma diëruâxgüxû, rü Tupana rü tama nüxcü poxcu namaxâ naxuegu. <sup>19</sup>Natürü nüma ya Tupana rü guxâxüma wüxigu narüngüxëé, rü woo âëxgacü íxíxe rü woo diëruâxgüxe rü woo ngearü diëruâxgüxe rü Tupana rü wüxigutama guxâxû narüngüxëé, erü nüma ya Tupana rü guxâxüma nangoxëxë.

.....

<sup>22</sup>Rü nataxuma i taxacü i waanexû i Tupanachaxwa yadüxüxü i wüxi i duüxû i chixexüarü üruxû.

.....

<sup>31</sup>¿Rü tüxcüü i duüxügü i tama Tupanamaxâ nüxü yaxugüxü i norü chixexügü, rü ñagüxü: “Chixexû taxüe

natürü tá nüxü tarüxoe i ngëma chixexügü”, ñagüxü? <sup>32</sup>¿Rü tüxcüü i tama Tupanaxü ñagüxü: “iÉcü choxû nawex i ngëma chixexü i chaxüxü! Rü ngëxguma chi marü chixexü chaxüxgu rü tá nüxü charüxo”, ñagüxü? <sup>33</sup>¿Éxna cumax, Pa Yox, rü nagu curüxínügu rü Tupana rü tá cunaxwaxexüâcüma cuxû nanaxütanü woo cuma rü tama naga nax cuxîniüxü? Rü ñuxma rü cuxna chaca ¿rü ñuxü ñaxügu curüxîniüxü i ñuxma nax ngëma orexü cumaxâ chixexü? Rü chanaxwaxe i toxû cungâxüga. <sup>34</sup>Rü ñaa yattügu i nuxmagüxü i nüxü icuaxüchixü rü choxü ñnüexü, rü wüxigu namaxâ i guxüma i ngëma togü i duüxügü i naâxëxü icuáxü rü tá chomaxâ nüxü nixugü rü ñanagürügü tá: <sup>35</sup>“Yox rü tama nüxü nacuââcüma nidexamare, rü ngëma norü ore rü taxuwama name. <sup>36</sup>Rü name nixí nax nügu nangugüarü maxüâxü ya Yox erü ngëma norü ngâxüga rü ñoma wüxi i duüxü i chixexüarü ngâxügarüxü nixí. <sup>37</sup>Rü tama chixexüxatama naxü i Yox natürü naétü tama Tupanaga naxîniü. Rü tapexewa rü Tupanagu nidauxcüraxü rü namaxâ nügu nachoxügagü” —ñanagürü ga Eliú.

.....

**35** <sup>9</sup>Rü nüma ga Eriú rü nidexachigüama rü ñanagürü: —Ngëxguma wüxi i âëxgacü norü duüxügümaxâ chixri icuaxgu, rü nüma i duüxügü rü aita naxüe rü naxçax nadaugü nax texé naxmexwa ínanguxüxëexü i ngëma âëxgacü i chixri namaxâ icuáxü. <sup>10</sup>Natürü ngëma duüxügü rü tama naxçax nadaugü ya



yimá Tupana ga nangoxēēcü rü pora nūxna ācü i ngēxguma taxū i guxchaxūwa nangexmagügux. <sup>11</sup>Rü nūxū narüngümae ya yimá Tupana ya cuax tüxna ācü rü tüxū nguxēēcü nax naexūgü rü werigüarü yexera cuax tüxū ngēxmaxūcax. <sup>12</sup>Rü ngēma duūxūgü rü düxwa Tupanacax aita naxüe, natürü nüma rü tama nanangāxū erü nūmagü rü duūxūgü i chixexū rü nügü icuaxūūgūxū nixīgü. <sup>13</sup>Rü yimá Tupana ya guxāétüwa ngēxmacü rü tama naga naxīnū i ngēma ore i doramare ixīxū —ñanagürü ga Eriú. ....

**36** <sup>13</sup>Rü nüma ga Eriú rü ñanagürü ta: —Ngēma tama yaxōgūxū rü Tupanamaxā nanueama rü woo poxcuwa nax nangexmagūxū rü tama Tupanana ngūxēēcax nacagüe. <sup>14</sup>Rü nangextūxügutama nayu. Rü ngēxguma nayuxgu rü wüxi i āne nixī, erü chixexūgumare nayu. <sup>15</sup>Natürü Tupana rü düxwa ngúxū tingeācūma tüxū ínanguxuchixēxē ya wüxíe nawa i túmaarü chixexū nax ngēmaācü ngēma ngúxū itingexūwa nūxna tacuaxāchixūcax i túmaarü chixexū. <sup>16</sup>Rü cuma rü ta, Pa Yox, rü curü íxāchiāēwa cuxū ínanguxuchixēxē rü muxūma ga curü yemaxūgü cuxna naxā rü nanapá ga curü mecha namaxā ga ōna ga chixichixū. ....

<sup>22</sup>iRü nagu rüxīnū nax ñuxācü naporaxūchixū ya Tupana! Rü nataxuma i nguxēētaeruxū i namaxā wüxiguxū —ñanagürü ga Eriú. ....

**37** <sup>1</sup>Rü nüma ga Eriú rü nidexachigüama rü ñanagürü: —Ngēxguma nūxū chadauxgu ya

buanecü ya taxüchicü rü chamuñ rü yima chorü maxūne rü poraācü niyuxnecüxü. <sup>2</sup>Rü pema rü meama nūxū pexīnūe i Tupanaga i naqxwa íxūxūxū i ñoma i duruanexürüxū tagaxū. <sup>3</sup>Rü nüma ya Tupana rü nanamu i bajxbeanexū i guxūanewama ngóxū. ....

<sup>13</sup>Rü guxūma i ngēmawa Tupana tüxū nūxū nadauxēxē i norü pora. Rü tacü ya buanecü rü pucü núma namu nax namaxā duūxūgūxū yanawexāchixēxūcax. Rü yimawatama tüxū nanawex nax nūxū ingechaütümüxūgūxū. <sup>14</sup>Pa Yox iyaxna naxīnū, rü irüxīnū, rü nagu rüxīnū i ngēma taxūgü i mexūgü i Tupana úxū! <sup>15</sup>¿Rü nūxū cucuáxū nax ñuxācü Tupana mea namaxā inacuáxū rü mea nachicagu nanuáxū i guxūma i ngēma dauxūwa nūxū idauxū? ¿Rü nūxū cucuáxū nax ñuxācü yayaxracüxūxēēāxū ya yimá āemacü i caixanexūwa? ....

<sup>23</sup>Rü tama nūxū tacuax i norü ínū ya yimá guxūxūma cuácü ya Tupana. Erü nüma rü guxūarü yexera naporaxūchi, rü aixcūmacü nixī, rü nawexgu i norü ínū, rü taguma chixri texēmaxā inacuax —ñanagürü ga Eriú. ....

#### Tupana rü Yoxmaxā nidexa

**38** <sup>1</sup>Rü Cori ya Tupana rü buanecü ya íxāūxēmacüwa Yoxmaxā nidexa rü ñanagürü nūxū: <sup>2</sup>—¿Texé quixī i cumax rü ngēmacax tama cunayaxuxū i ngēma chorü ucuxēgü? Rü curü dexawa nixī i

nangóxũ nax cuxũ nataxuxũ i curũ cuax.  
 3Rũ ñuxma ega cugũ ícurüporagu, rü  
 chanaxwaxe i choxũ cunawex nax tama  
 cumuũxũ nax choxũ cungãxũxũ i ngẽma  
 cuxna tá naxçax chacaxũ. 4¿Rũ ngextá  
 cuyexmaxũ ga noxrix ñaa naane  
 changoxêẽgu? iChomaxã nüxũ ixu ega  
 aixcũma cuax cuxũ ngẽxmagu! 5¿Nüxũ  
 cucuáxũ nax texé tixĩxũ ga noxri nagu  
 rüxĩnũxe ga ñoma ga naane rü texé  
 tixĩxũ ga guxema norü ngugüruxũ ixĩxe?  
 .....

8Rũ yexguma naanearü aixepewa  
 nagoxũchiügu ga dexá i márwa  
 ngẽxmaxũ ¿rü texé tixĩxũ ga guxema  
 wüxiwatama nayexmaxêxe ga yema  
 dexá?  
 .....

12Rũ cuma rü yexguma ñoma ga  
 naanewa cungoxguwena ¿rü marü  
 ñuxgu cunamuxũ ya üaxcü nax yéa  
 nachicawa iyanagoxũ nax  
 yangunexũçax?  
 .....

16¿Rũ marü ñuxgu ícuyadauxũ i  
 ngẽma äxmaxũ i nawa inaxügũxũ i  
 ngẽma már?  
 .....

25¿Rũ texé tixĩ ya pucü iwãxnaxũxe rü  
 naxũmaxũxe ya buanecü?  
 .....

31¿Rũ ẽxna cuma yixĩxũ i wüxiwa  
 cungexmagüxêẽxũ ya ẽtagü? Rũ ngẽma  
 ẽtagütücumü i Préyadegu áegagüxũ  
 ¿rü cuma yixĩxũ nax wüxiwa  
 cungexmagüxêẽechaxũ nax tama nügü  
 nawoonexũçax? Rũ ngẽma  
 ẽtagütücumü i Orióügu áegagüxũ ¿rü  
 cuma yixĩxũ nax nachicawatama  
 cungexmagüxêẽechaxũ i wüxichigü nax

tama nügüçax naxixũçax? 32¿Rũ cuma  
 yixĩxũ i meama norü oragu  
 cunangoxêẽxũ ya yimá woramacuri ya  
 ngunetüxũ rüxücü? ¿Rũ cuma yixĩxũ i  
 namaxã cucuáxũ ya yimá ẽtagütücumü  
 i Ócha i Taxügu áegagüxũ rü yimá  
 ẽtagütücumü i Ócha i Íxraxügu  
 áegagüxũ? —ñanagürü ga Tupana.  
 .....

**40** 1Rũ nüma ga Cori ya Tupana rü  
 nidexachigü rü ñanagürü:  
 2—Ñuxma i cuma i chomaxã  
 curüxutagachãxũ i choma nax  
 guxãétüwa changexmaxũ ¿rü ẽxna  
 quidexachigüamaxũ tá nax choxũ  
 cungãxũxũ? —ñanagürü ga Tupana. 3Rũ  
 yexguma ga nüma ga Yox rü Tupanaxũ  
 nangãxũ rü ñanagürü: 4—Choma rü  
 taxumaama cuxũ changãxũ, Pa Tupanax,  
 erü choma rü taxuwama chame i  
 cupexewa. Rũ narümemae nixĩ i  
 noxtacũma ichayarüingeax. 5Rũ marü  
 poraäcü chidexa rü ngẽmacax taxuxũma i  
 taxacürü toxũ chixu —ñanagürü ga Yox.

#### Tupana rü wena Yoxmaxã nidexa

6Rũ Cori ya Tupana rü wenaxarü  
 buanecü ya íxãũxêmacüwa Yoxmaxã  
 nidexa rü ñanagürü nüxũ: 7—iËcü choxũ  
 nawex nax tama choxũ cumuũxũ! iRũ  
 nangãxũ i ñaa cuxna naxçax chacaxũ!  
 8¿Ëxna chomaxã nagu curüxinü nax  
 choma rü wüxi i dorataxãxũ chixĩxũ rü  
 chaugagu yixĩxũ nax chixexũ cuxçax  
 ínguxũ nax ngẽmaäcü i cuma rü cugü  
 quixuxũçax nax taxuxũma i chixexũ  
 cuxxũ? 9¿Ëxna cugü cucuaxgu rü  
 chauxrũxũ cuporaxüchi? ¿Rũ ngẽma  
 cuga rü chaugarüxũ duruanexürũxũ nixĩ?  
 .....

<sup>15</sup>iDücax, nangugü i ngêma naexû i taxüchixû i ipopütamu i choma changoxêêxû ngêma cuxû changoxêêxürüxû! Rû nûma rû maxê nanangõx ñoma wocagürüxû. <sup>16</sup>iRû dücax i ngêma naxçaxwex rû ñuxâcü naporaxüchi rû ngêma namachi rû natai! <sup>17</sup>Rû yima narexû rû ñoma wüxi ya ocayiwariwüxi mea niwex. Rû yima naparaarü tarumagü rû nipora. <sup>18</sup>Rû yima naxchinaxägü rû ñoma bröüchemenaxägürüxû rû fiérumenaxägürüxû nixigü. <sup>19</sup>Rû guxüma i ngêma naexügü i chaxüxütanüwa rû ngêma ipopütamu nixi i yexeraäcü duüxügü nüxü muüexü. Rû choma i norü üruüxicatama nixi i nüxü charüporamaexü —ñanagürü ga Tupana. ....

**41** <sup>1</sup>Rû nûma ga Tupana rû ñanagürü ta: —Ngêma bayéna i taxü i márwa ngêxmaxü ðrû cuxçax rû wüxi i poxwamaxâ icuyayaxuxü? ðRû cuxü natauxchaxü nax wüxi i naxînutamaxâ cunawëxarü conüáxü? ....

<sup>5</sup>ðRû cuxçax rû ñoma wüxi i werirüxü tá icuyapuxêêxü? ðRû cuxçax rû tá cuxütüxüxü cuxacügüarü ñnucaruxü? ....

<sup>9</sup>Rû ngêxguma texé nüxü daumaregu i ngêma bayéna, rû poraäcü tamuü. <sup>10</sup>Rû ngêxguma texé nachixewegu rû nûma rû nidüra. Rû taxüema tapora nax naxçax tixüamaxü. <sup>11</sup>ðRû yixema naxçax ixüamaxe rû tamaxüxü yiixü? Rû taxüema i ñoma i naanewa tapora nax naxçax tixüamaxü —ñanagürü ga Tupana. ....

### Yox rû Tupanaxü nangäxü

**42** <sup>1</sup>Rû yexguma ga nûma ga Yox rû Tupanaxü nangäxü, rû ñanagürü: <sup>2</sup>—Nüxü chacuax nax guxüxüma cucuáxü rû nataxuma i taxacü i cuxü guxchaxü nax cunaxüxü. <sup>3</sup>ðRû texé chixi i chomax rû ngêmacax tama cuxü chanayaxuxü i ngêma curü ucuxëgü? Rû ngêmaäcü chanangoxêêxü nax taxuxüma chacuáxü. Rû choma rû nachiga chidexa i taxacü i äücümaxü i tama nüxü chacuáxü i cuxicatama nüxü cucuáxü. <sup>4</sup>Cuma rû ñacurügü choxü: “iChoxü rüxînü rû cumaxâ chidexachaü! iRû choxü nangäxü nax cuxna chacaxü!” ñacurügü choxü. <sup>5</sup>Noxri rû cuxü chaxînüchigaxüwaxica nixi i cuxü chacuáxü, natürü i ñuxma rû daa chauxetümaxâ cuxü chadau. <sup>6</sup>Rû ngêmacax i ñuxma rû marü nüxü charüxo ga yema noxri cumaxâ nagu charüxînúxü. Rû ngêmacax nua mairaxütëxewa rû tanimacatëxewa charüto —ñanagürü ga Yox.

### Tupana rû wena Yoxü narüngüxëë

<sup>7</sup>Rû yexguma Yoxmaxâ yadexaxguwena ga Tupana rû ñuxüchi Erifáxü ñanagürü: —Yimá chorü duü ya Yox rû aixcümáxü nixu ga chauchiga. Natürü poraäcü cumaxâ chanu rû namaxâ chanu i ngêma cumücügü yerü tama Yoxrüxü aixcümáxü pixu ga chauchiga. <sup>8</sup>iRû êcü i ñuxma rû 7 i woca i yatüxü piyaxgü rû 7 i carnërugü rû chorü duü ya Yoxütawa penagagü! iRû yimápëxewa perü maxüçax penadai rû ípeyagu i ngêma naxünagü! Rû nûma ya yimá chorü duü

ya Yox rü tá pexçax nayumüxē. Rü choma rü tá nüxú nüxü chaxĩnü i norü yumüxē rü taxuxütáma chixexü pemaxã chaxü woo nax namexü nax pexü chapoxcuexü nagagu nax tama aixcümáxü pixuxü ga chauchiga yema chorü duü ga Yox aixcümáxü ixuxürüxü —ñanagürü ga Tupana. <sup>9</sup>Rü nüma ga Erifá rü Biridá rü Chofá rü inaxĩachi rü nanaxügü ga yema Cori ya Tupana namaxã nüxü ixuxü. Rü nüma ga Cori ya Tupana rü nüxü naxĩnü rü nanayaxu ga yema Yox namaxã nüxü ixuxü norü yumüxēwa. <sup>10</sup>Rü yexguma Yox namücügüçax yumüxēguwena rü Tupana rü noxriarü yexera Yoxü narüngüxē. <sup>11</sup>Rü yexgumawena rü guxüma ga naeneegü rü naeyaxgü rü namücügü rü guxüma ga yema duüxügü ga üpaacü nüxü cuaxgüxü rü Yoxütagu nanaxiane. Rü nachiüwa rü namaxã nanaxügü ga wüxi ga taxü ga õna. Rü wüxigu nanataãxēgüxēxē nax tama

nagu naxĩnüxü ga yema ngúxü rü guxchaxügü ga Tupana nüxü ingexēxü. Rü wüxichigü ga nüma ga yema namücügü rü nüxna ngixü nixächigü ga ñuxre ga diëru rü wüxi ga ánera ga úirungĩçax. <sup>12</sup>Rü Tupana rü poraacü noxriarü yexera Yoxü narüngüxē ga yexguma marü nayaçgu. Rü yexguma rü 14,000 wa nangu ga norü carnérugü, rü 6,000 wa ga norü caméyugü, rü 1,000 chimüxüwa ga norü wocagü ga puracürüxü ixīgüxü, rü 1,000 wa ga norü búru ga ingexü. <sup>13</sup>Rü yexgumarüxü ta wenaxarü naxãxacü rü nüxü nayexma ga 14 ga nanegü rü tomaepüç ga naxacü.

.....

<sup>16-17</sup>Rü yexgumawena ga Yox rü namaxü ga 140 ga taunecü rü nüxü nadau ga nataagü rü nataaxacügü. Rü yema nataaxacügüacügüxü rü ta nadau. Rü yemaacü marü nayaxüchiácüma nayu.

# SALMOS

## (Wiyaegü)

### Taãxê i aixcúma ixĩxũ

**1** <sup>1</sup>Rũ tataãxê ya yíxema tama naga ñnũxe i ngêma chixexũ i duũxũgüarũ ucuxê rü tama nagu ixũxê i ngêma chixexũ ügüxcúma rü tama nanaãxêraxũxe i ngêma duũxũgü i Tupanaxũ cugüexũ. <sup>2</sup>Natürü tümaarü taãxê nixĩ nax nagu tamaxũxũ i Tupanaarü mugü rü guxũguma chütaçü rü ngunecü ngêmagu tarüxinü. <sup>3</sup>Rü yíxema duũxê rü ñoma wüxi i nanetü i natücutü toxũ rü guxũguma oxũ rü taguma rüñêxatüxürüxũ tixĩ. Rü guxũma i taxacü i taxüxüwa rü mea tüxũ ñnanguxuchi. <sup>4</sup>Natürü ngêma duũxũgü i chixexũ ügüxũ rü tama ngêmaäcü mexũ nüxũ naxüpetü. Rü ñoma maxê i paxũ ya buanecüema cuenagüxürüxũ nixĩgü. <sup>5</sup>Rü ngêmacax i ngêma duũxũgü i chixri maxêxũ rü ngêxguma Tupana nüxũ icagügu, rü taxumaxâtama nügü ñnapoxũgü rü poxcu i taguma gúxũ tá namaxã naxuegu. Rü ngêma chixexũ ügüxũ rü tá nangechica natanüwa i ngêma duũxũgü i aixcúma Tupanapexewa imexũ. <sup>6</sup>Erü nüma ya Cori ya Tupana rü meama

nüxũ nacuax i tümaarü maxũ rü tüxna nadau ya yíxema aixcúma naga ñnũxe, natürü ngêma chixexũ i duũxũgü i tama naga ñnũchaũxũ rü nagagu tátama poxcuwa naxĩ.

### Cuma nixĩ i chaune quixixũ

**2** <sup>1</sup>¿Taxacüçax nügümaxã narünuetanüçüxü i ñoma i naanecüãx i tama Tupanaxũ cuaxgüxũ? ¿Rü tüxçüü i nügümaxã nagu narüxinüe i taxacü i taxuwama mexũ nax ñnuxäcü norü cuaxmaxã Tupanaxũ nügü nayexeragüxũ? <sup>2</sup>Rü ñoma i naanecüãx i nachixüanegüarü ãêxgacügü rü Tupanamaxã rü yimá nüma yangucuchixêecümaxã nanue, rü wüxigu nagu narüxinüe nax ñnuxäcü yimáxũ ñnataxüchigüxũ. <sup>3</sup>Rü tagaäcü ñnanagürügü: “iNgexrüma nax naga ixĩnũxũ! iRü ngĩxã naxmexwa yigü ñtangüxüxêxê nax tama natüüwa ingexmagüxüçax!” ñnanagürügü. <sup>4</sup>Natürü nüma ya Cori ya Tupana ya ãêxgacü ixĩcü i daxüguxũ i naanewa rü nüxũ nacugümare. <sup>5</sup>Rü ñnuxüchi norü numaxã ñnanabaixgü rü nugaäcü nayangagü rü ñnanagürü nüxũ: <sup>6</sup>“Choma rü marü nüxũ

chaxuneta ya yimá ãëxgacü ya choma chanaxwaxecü nax namaxã inacuáxüçax ya yima ñane ya Yerucharéü ya yima maþpüne ya üünene ya Chióüwa ngexmane”, ñanagürü. <sup>7</sup>Rü nüma ya yimá nüxü naxunetacü rü nanangãxü rü ñanagürü: “Rü ñuxmax, Pa Chaunatüx, rü tá chanaxunagü i ngëma cuma nagu curüxínüxü, erü cuma rü ñacurügü choxü: ‘Cuma rü chaune quixí, rü choma nixí i cuxü chamaxëëxü i ñuxmax. <sup>8</sup>iRü choxna naxçax naca nax cuxmexwa changexmagüëëxüçax i guxüma i nachixüñegü i ñoma i naanewa ngëxmagüxü nax cuxrü yixüçax! RÜ choma rü tá cuxna chanaxã. <sup>9</sup>iRü inawex i curü pora rü ngëmamaxã nadai i ngëma nachixüñegüarü ãëxgacügü ñoma fiérumenaxãmaxã ya buetare ya waixümünaxçaxwa nacuaixcagurüxü!’ ñacurügü choxü.” <sup>10</sup>Rü ngëmacax i pemax, Pa ãëxgacügüx irü iperüxínüe i ñaa ucuxë rü naga pexínüe i ñaa pemaxã nüxü chixuxü! <sup>11-12</sup>iRü taãxëäcü rü nüxü pengechaügüäcü nüxü picuaxüxügü ya Cori ya Tupana! iRü nüxü pemüñeäcüma napexegu pecaxápüxügü, rü naga pexínüe nax tama pemaxã nanuxüçax, rü ngëmaäcü namagu peyueüçax! Erü ngëxguma düxwa pemaxã nanuxgu rü tá ipeyarütaxe. Natürü tataãxëgü ya yixema naxmexwa tügü ngëxmaxëëgüxe.

**Dabí rü norü yumüxëwa Tupanaarü ngüxëçax ñaca**

**3** <sup>1</sup>Pa Corix, namuxüchi i chorü uanügü rü namuxüchi i ngëma chauxchi aiexü. <sup>2</sup>Rü namuxüchi i ngëma chauchigagu ñagüxü: “Tupana rü

taxütáma ñanapoxü”, ñagüxü. <sup>3</sup>Natürü cumax, Pa Corix, rü chorü poxürüxü quixí. RÜ cuma nixí i choxü cuporaxëëxü nax nüxü charüporamaexüçax i chorü uanügü. <sup>4</sup>Rü Cori ya Tupanaçax aita chaxü nax choxü nangüxëëxüçax. RÜ nüma rü choxü naxínü ya yima napata ya maþpüne ya Chióüwa ngexmanewa, rü choxü nangãxü. <sup>5</sup>Rü ngëmacax ngëxguma ichacaxgu rü mea chape, rü taãxëäcü chabaxächi erü nüma ya Cori ya Tupana rü choxna nadau. <sup>6</sup>Rü tama namaxã chabaxächi i ñaa muxüchixü i chorü uanügü i choxü íchomaeguächixü nax choxü yamaþgüxüçax. <sup>7</sup>Pa Corix, Pa Chorü Tupanax ichauxétüwa ñayuxu rü choxü ñapoxü nüxna i ñaa chorü uanügü! RÜ cuma tá nixí i nachiwewa tá quimáxü rü cunabüüpütaxü i ngëma chorü uanügü i chauxchi aiexü. <sup>8</sup>Rü cuma nixí, Pa Corix, i äücümáxüwa toxü ícungüxüëëxü. iRü mexü namaxã naxuegu i curü duüxügü!

**Aixcüma Cori ya Tupanagu tayaxögü**

**4** <sup>1</sup>Pa Chorü Poxürüxü, Pa Tupanax irü choxü nangãxü ega cuxna chacaxgu! RÜ cuma rü ngëxguma ngüxü chingexgu, rü cuma nixí i choxü cutaãxëëëxü. iRü cuxü changechaxütümüxü rü choxü nüxü naxínü i chorü yumüxë! <sup>2</sup>Rü pema nax pegü picuaxüügüxü çrü ñuxgüüratáta i nüxü perüoexü nax choxü picügüxü rü ñane choxü pingexëëxü? ¿Rü ñuxgüüratáta i nüxna pixgachixü nax nagu pemaxëxü i pecümagü i chixexü i taxuwama mexü rü natüçaxmamare ixüxü? <sup>3</sup>Rü dücax, rü nüma ya Cori rü

aixcúma natúmawaxe ya yíxema duĩxẽ  
 ya aixcúma naga ñnuxe. Rú nũma rũ  
 choxũ naxĩnũ ega nũxna chacaxgux.  
 4iRũ nũxũ pemuĩeácũma nũxũ  
 iperũxĩnũe, rũ marũtama nax chixexũ  
 pexũgũxũ! Rú ngẽxguma  
 ipeyacaxáchitanũgu i pexchiáxũwa irũ  
 peãẽwa pegũ pengugũ nax ñuxácũ  
 yixĩxũ i perũ maxũ i Tupanapexewa!  
 5iRũ Tupanana penaxã i ngẽma ãmaregũ  
 i nũma aixcúma namaxã nataãxẽxũ, rũ  
 guxũguma nagu peyaxõgũ! 6Rũ muxũma  
 i duĩxũgũ rũ ñanagũrũgũ: “¿Texẽ tá  
 tũxũ tarũngũxẽxẽ?” ñanagũrũgũ. Pa  
 Corix icuxũ tangechaũtũmũxũácũma  
 toxũ nadawenũ rũ toxũ rũngũxẽxẽ!  
 7Cuma rũ taãxẽ choxna cuxã i norũ  
 yexera i ngẽma duĩxũgũ i muxũma i  
 trĩgu rũ bĩnu nũxũ ngẽxmagũxũ.  
 8Choma rũ taãxẽácũ ichayacaãchi rũ  
 ngẽxgumatama mea chape, erũ nũxũ  
 chacuax, Pa Corix, nax cuma rũ choxna  
 cudauxũ.

#### Tupanamaxã itanaxũgũ i ngunexũ

**5** 1-2Pa Corix, Pa Chorũ ãẽxgacũx, Pa  
 Chorũ Tupanax ichoxũ nũxũ naxĩnũ  
 i ñaa chorũ dexa i cumaxã nũxũ chixuxũ!  
 iRũ choxũ nayaxu i ñaa chorũ yumũxẽ i  
 auxãcũma cumaxã nũxũ chixuxũ! iRũ  
 nũxũ naxĩnũ i ngẽma cuxna naxçax  
 chacaxũ! Erũ cumaxã nixĩ i nũxũ chixuxũ  
 i chorũ yumũxẽwa. 3Rũ exũwa noxri  
 yangõonegu rũ tá nũxũ cuxĩnũ i chauga.  
 Rú paçmama tá cumaxã nũxũ chixu i  
 taxacũ nixĩ i chanaxwaxexũ. Rú  
 íchananguxẽxẽ nax choxũ cungãxũxũ.  
 4Rũ nũxũ chacuax, Pa Tupanax, rũ tama  
 namaxã cutaãxẽ i taxacũrũ chixexũ. Rú  
 ngẽma duĩxũgũ i chixri maxẽxũ rũ

taxucũrũwama cuxũtawana nangexmagũ.  
 5Rũ cupexewa rũ nangechica i ngẽma  
 nũgũ icuaxũũgũxũ. Rú cuma rũ naxchi  
 cuxai i ngẽma chixexũ ũgũxũ. 6Rũ ngẽma  
 idorataçaxgũxũ rũ cunadai. Rú cuma rũ  
 nũxũ cuxo i ngẽma cuechitawaxegũxũ rũ  
 máetagũxũ. 7Natũrũ i chomax rũ curũ  
 ngechaũgagu choxũ natauxcha nax nagu  
 chaxũcuxũ ya yima cupata. Rú choxũ  
 natauxcha nax cuxũ changechaũácũma  
 cuxũ chicuaxũũxũ i ngẽxguma cupata ya  
 ũnene íngexmaxũguama chadawenũgu.  
 8Pa Corix ichoxna nadau naxchaxwa i  
 ngẽma chorũ uanũgũ! iRũ curũ  
 namawaama choxũ naxũxẽxẽ nax tama  
 taxacũçax choxũ yaxugũexũçax! 9Erũ  
 ngẽma chorũ uanũgũ rũ taguma ñuxgu  
 aicũmaxũ nixugũ. Rú chixexũguxicatama  
 narũxĩnũe. Rú ngẽma naçx rũ ñoma wũxi  
 i yuetamaxũ i ngenaxũrũxũ nixĩ. Rú yima  
 norũ conũ rũ nidorataçax. 10Rũ ngẽmacax,  
 Pa Chorũ Tupanax inapoxcue i ngẽma  
 duĩxũgũ! iRũ naxoxẽxẽ i ngẽma chixexũ  
 i nagu naxĩnũexũ! iRũ norũ  
 pecádugũgagu nũxũ naxo, erũ cumaxã  
 nixĩ i nanuexũ! 11Natũrũ guxãma ya  
 yíxema naxçax daugũxe i curũ ngũxẽẽ rũ  
 tataãxẽgũ. Rú guxũguma taãxẽácũma  
 tawiyaegũ erũ cuma rũ tũxũ ícupoxũ. Rú  
 guxãma ya yíxema cuxũ ngechaũgũxe rũ  
 cugagu tataãxẽgũ. 12Erũ cuma rũ mexũ  
 tũmamaxã cuxuegu ya yíxema aixcúma  
 cuga ñnuxe rũ ngẽma curũ ngechaũ rũ  
 tũmaartũ poxũrũxũ nixĩ.

#### Tupanana taca ega guxchaxũ taxçax ínguxgu

**6** 1Pa Corix itaxũ i choxũ cuxũáxũ  
 ega chaugagu cunuxgu! iRũ taxũ i  
 curũ nugagu choxũ cupoxcuxũ! 2Pa

Corix icuxú changechaütümüxú erü choma rü chatura! iRü chauxçax yataanexê! Erü poraáč chidaxawe. <sup>3</sup>Rü ñuxma rü chorü muümaxâ chiduxrux. Rü cumax, Pa Cori Pa Tupanax ðrü ñuxguxüratáta i choxú curüngüxêxú? <sup>4</sup>Pa Corix inua naxü rü chauxçax yataanexê! iRü cuxú changechaütümüxügagu choxú ínapoxú! <sup>5</sup>Erü yíxema yúxe rü marü taxucüriwa cuxna tacuaxâchi. ðRü ñuxâcü tá cuxú ticuaxüxüxü ya yíxema yuxe ya tümamaxüwa ngëxmaxe? <sup>6</sup>Rü marü chipa nax chaxaxuxü. Rü guxü i chütaxügu rü poraáč chaxaxu rü ngëmacax düxwa chauxgüxüxetümaxâ chayawaixêxê i chorü cüxeruxü. <sup>7</sup>Rü ngëma ngúxü nax chingexügagu rü daa chauxetügu rü marü nixogü. Rü ngëma chorü uanügügu rü chixogüxetü. <sup>8</sup>iRü choxna pixígachi, Pa Chixexüarü Üruxügüx, erü nüma ya Cori ya Tupana rü marü nüxü naxínü i chorü axu! <sup>9</sup>Rü nüma rü marü nüxü naxínü nax nüxna chacaxaxü, rü marü choxú nanayaxu i chorü yumüxê. <sup>10</sup>Rü guxüma i ngëma chorü uanügü rü tá nabaixâchie rü namuüe, rü ngëmacax cugüruxü tá nixígü. Rü ngëmaücü paxa norü ânemaxâ tá nibuxmü.

**Cori ya Tupana rü äëxgacü ya mea duüxügümaxâ icuácü nixí**

**7** <sup>1</sup>Rü cuxmexwa chaugü changexmaxêxê, Pa Cori Pa Chorü Tupanax, nax ngëmaücü choxü ícupoxüxüçax nüxna i ngëma chowe ingëxütanüxü. <sup>2</sup>iRü naxmexwa choxü ínanguxuchixê! Erü ñoma aigü i chaugu wagüchaügüxürüxü nixígü. Rü

tataxuma ya texé ya nüxna choxü ípoxüxe. <sup>3</sup>Pa Corix, Pa Chorü Tupanax ðrü taxacürü chixexü chaxü? ðRü êxna chamáeta? <sup>4</sup>ðRü êxna ngëxguma chomücü mexü chomaxâ üxguyane rü chixexümaxâ tüxü chanatæguxêxê? ðRü êxna wüxi i chorü uanü rü ngürümare chanapoxcux? <sup>5</sup>Rü ngëxguma chi ngëmaücü chanaxüxgux, rü marü name nax chorü uanügü chowe yangëxütanüxü rü waixümüanegu choxü nañagüxü rü äxtexeanexügu napüxcuchigüaxü i chorü maxü. <sup>6</sup>Pa Corix icurü numaxâ chauétüwa nachogü rü nadai i ngëma chorü uanügü i choxü imaxgüchaüxü! Cuma rü cunaxuegu nax cunapoxcuxü i ngëma duüxügü i chixexü ügüxü. Rü ñuxma rü chanaxwaxe nax chauétüwa cuchogüxü. <sup>7</sup>iRü cugüpegegu nangutaquexegüxêxê i guxüma i nachixüanecüäxgü i duüxügü! iRü guxüma i ngëma nachixüanecüäxgüarü äëxgacügüétüwa cugü nangexmaxêxê rü namaxâ inacua! <sup>8</sup>Rü cuma nax guxü i nachixüanecüäxgümaxâ icucuáxü, rü chanaxwaxe i duüxügüpepexewa nüxü quixu nax aixcüma cupexewa chamexü rü chowa rü nataxuxüma i taxacürü chixexü. <sup>9</sup>Pa Cori Pa Tupana ya Ixaixcümacüx, cuma rü cunangugü i wüxichigü i duüxügüarü ínügü rü norü ngüchaügü i naaxêwa nagu naxínüexü. iRü iyanaxoxêxê i norü chixexü i ngëma chixri maxêxü i duüxügü! Natürü ngëma mea maxüxü i duüxü irü nüxna nadau nax guxüguma cugu yaxögüechaxüçax! <sup>10</sup>Rü Tupana ya guxâétüwa ngëxmacü rü chorü poxüruxü nixí. Rü nüma nixí i tüxü



namaxêxêxũ ya yíxema namaxã  
 ixaixcümagũxe. <sup>11</sup>Rü Tupana rü ãêxgaci  
 ya aixcũma wexgucũ nixĩ, rü nüma rü  
 guxũguma naxchi naxai i ngẽma  
 chixexũ. <sup>12</sup>Rü ngêxgumachi taguma  
 Tupanacax natãeguxgu i wũxi i duũxũ  
 rü nüma ya Tupana rü tá  
 nanawaixmagu i norũ tara rü tá tüxũ  
 nadai. Rü yima norũ wũra rü marũ  
 ínaporamaáxũ. <sup>13</sup>Rü marũ  
 narũtonũmare ya norũ chuxchigũ ya  
 iyauxramagũgũne. Rü marũ ínamemare  
 ya naxnegũ ya tüxũ imáxũne. <sup>14</sup>Rü  
 dücax, nüxũ pedax i ngẽma chixexũarũ  
 íruxũ! Rü ñoma wũxi i ngexũ i  
 ixíraxacũchaũxũrũxũ nixĩ erũ  
 nanaxĩxãchiãxê. Rü ngẽma chixexũ i  
 nawa ngêxmaxũ rü nawa tá  
 ínanguxuchi i ngẽma dora. <sup>15</sup>Rü nüma  
 rü toguecax nanaxũ i m̃axmaxũxũ i  
 ãxmaxũ natürũ nümatátama nagu  
 ningucuchi i ngẽma. <sup>16</sup>Rü ngẽma  
 chixexũ i togücax naxũxũ rü ngẽma  
 máeta i nagu naxĩnũxũ, rü nagu tátama  
 nangu. <sup>17</sup>Natürũ i chomax rü Cori ya  
 Tupanaxũ tá chicuaxũxũ erũ nüma rü  
 aixcũmacũ nixĩ. Rü choma rü chorũ  
 wiyamaxã tá chanataxêxê ya yimá  
 Tupana ya guxãétũwa ngêxmacũ.

**Tupana rü guxũarũ yora nixĩ natürũ  
 yima duũxũmexêwa nanangexmaxêxê i  
 ñoma i naane**

**8** <sup>1</sup>Pa Cori Pa Tupana ya Guxũétũwa  
 Ngêxmacũx, rü cuéga rü guxũma i  
 ñoma i naanewa nüxũ nacuaxgũ. Rü  
 ngẽma curũ üüne rü daxũguxũ i  
 naanearũ yexerawa nangu. <sup>2</sup>Rü ngẽma  
 buxũgũ rü woo ngẽma maixũ rü nüxna  
 cunanguxêxê nax cuxũ

yacuaxũũgũxũcãx nax ngẽmaãcü  
 nangóxcãx i curũ pora, rü ngẽma curũ  
 uanũgũ rü cupexewa naxãneexũcãx rü  
 yanangeaxgũxũcãx. <sup>3-4</sup>Rü ngêxguma  
 chũtacũ daxũgu chadawenũgu rü nüxũ  
 chadau i ngẽma cumatama cuxũxũ ya  
 tauemacũ rü êxtagũ i ngẽma  
 cungexmagũxêxêxũ. Rü chaugũna chaca  
 rü ñachagürũ: “¿Tãxacũwa cuxũ name i  
 duũxũgũ rü ngẽmacãx nagu  
 curũxĩnũxũ? ¿Rü tüxcũũ nüxna  
 cucuaxãchixũ rü naxcãx  
 cuxoégaãxêxũ?” ñachagürũ. <sup>5</sup>Rü  
 wixgutaax cugüraxũxũchiãcü cunaxũ ya  
 yimá yatũ, rü cunataxêxê, rü nagu  
 cuyaxõ. <sup>6</sup>Rü guxũma i ngẽma  
 cuxũxũétũwa cunangexmaxêxê ya yimá  
 yatũ, rü namaxã nüxũ icucuaxêxê. <sup>7</sup>Rü  
 carnérugũétũwa rü wocagũétũwa rü  
 naexũgũétũwa cunangexmaxêxê. <sup>8</sup>Rü  
 werigũ i daxũanegu ixũxũxũétũwa, rü  
 choxnigũ i natũwa maxêxũétũwa rü  
 guxũma i márwa ngêxmagũxũétũwa  
 cunangexmaxêxê ya yimá yatũ. <sup>9</sup>Pa Cori  
 ya Guxũétũwa Ngêxmacũx, rü cuéga rü  
 guxũma i ñoma i naanewa nüxũ  
 nacuaxgũ.

**Tupanaxũ ticuaxũxũ erũ mexũ naxũ**

**9** <sup>1</sup>Pa Cori Pa Tupanax, cuxũ  
 chicuaxũxũchaũ guxũne ya chorũ  
 maxũnemaxã. Rü nüxũ chixuchigachaũ i  
 ngẽma muxũma i mexũgũ i cuxũxũ. <sup>2</sup>Pa  
 Tupana ya Guxãétũwa Ngêxmacũx, rü  
 chorũ taãxemaxã poraãcü cuxũ  
 chicuaxũxũ. Rü cuxcãx chawiyaechaũ.  
<sup>3</sup>Rü ngẽma chorũ uanũgũ rü cuxchãxwa  
 nibuxmũ rü nayayi rü nayue. <sup>4</sup>Cuma rü  
 ãêxgaci ya ixaixcũmacũ quixĩ. Rü curũ  
 tochicaxũwa curũto nax ngẽma

chauétüwa cuhogüxüçax. <sup>5</sup>Rü cuyangagü i ngēma tama cuxü yaxögüxü, rü cunadai i ngēma chixri maxēxü. Rü noxtacüma ícunapi i naégagü i curü poperawa. <sup>6</sup>Rü ngēma chorü uanü rü marü nayu, rü yima norü íanegü rü namaxátama narüxogü. Rü cumax, Pa Tupanax, nixí ga cuyanaxoxēēxü. Rü taxuxüma i taxacü nawa inayaxügü rü bai i taxacü i nawa nüxna nax icuaxāchixüçax. <sup>7</sup>Natürü nüma ya Cori ya Tupana rü guxügutáma āēxgacü nixí. Rü nüma rü norü tochicaxüwa narüto nax ngēma nangugüaxüçax i wüxichigü i duüxügüarü maxü. <sup>8</sup>Rü nüma rü tá mea guxü i duüxügüarü maxü nangugü. Rü ñuxüchi tá nüxü nixu i taxacü tá nixí i namaxā naxueguxü. <sup>9</sup>Rü nüma ya Cori ya Tupana rü tüxna nadau ya yíxema chixri tümamaxā inacuaxgüxe. Rü tüxü narüngüxēē ega ngúxü tingegügu. <sup>10</sup>Pa Corix, yíxema cuxü cuaxgüxe rü cugu tayaxögü. Rü taguma tüxü icuyarüngüma ya yíxema cuxçax daugüxe. <sup>11</sup>iRü naxçax pewiyaegü ya Cori ya Tupana ya Yerucharéüwa āēxgacü íxíci! iRü guxüma i íanegüwa nüxü pixu i ngēma mexügü i naxüxü! <sup>12</sup>Rü nüma ya Tupana rü tüxna nacuaxāchi ya yíxema ngechaügüxe rü tama nüxü inarüngüma i ngēma túmaarü axu. Natürü nanapoxcue i ngēma chixri tümamaxā icuaxgüxü. <sup>13</sup>Pa Corix ícuxü changechaxütümüxü! iRü dücax, nüxü nadawenü i ñuxácü choxü nachixeāxē i ngēma chauxchi aiexü! iRü nawa choxü ínanguxuchixēxē i ngēma yu! <sup>14</sup>Rü ngēxguma choxü ícunguxuchixēēgu rü choma rü tá

Yerucharéüarü íāxwa cuxü chicuaxüxü napexewa i guxüma i duüxügü. Rü namaxā tá nüxü chixu nax chataāxēxü erü choxü ícunguxuchixēxē. <sup>15</sup>Rü ngēma tama yaxögüxü i duüxügü, rü nümatátama nagu nayi i ngēma āxmaxü i toguxecax namagu naxügüxü. Rü nümatátama nagu ínanue i ngēma püxcha i toguxecax bexma ngēxma naxügüxü. <sup>16</sup>Rü nüma ya Cori ya Tupana rü nügü nangoxēxē i ngēxguma napoxcuāxgu i ngēma chixexü ügüxü. Rü ngēmacax i ngēma chixexü ügüxü rü tá napoxcue nagagu i ngēma chixexü i nümagütama bexma toguxecax naxügüxü. <sup>17</sup>Rü ngēma chixexü ügüxü rü ngēma tama yaxögüxü rü ngēma Tupanaxü iyarüngümaexü rü poxcu i taguma gúxüwa tá naxí. <sup>18</sup>Natürü yíxema yaxna ínüexe ega woo guxchaxügü tümacax ínguxgu rü tama natüçaxma Tupanaarü ngüxēē ítanangüxēēgü, erü nüma ya Tupana rü taxütáma tüxü inarüngüma rü tá tüxü narüngüxēē. <sup>19</sup>Pa Cori Pa Tupanax ítaxü i cunaxüchicaxü i ngēma duüxügü i cuétüwa nügü ügüxēxēchaxüxü! iÉcü cugüpexewa nagagü i ngēma tama yaxögüxü nax nüxna cucaxaxüçax nachiga i norü chixexügü! <sup>20</sup>Pa Corix inamuüxēxē i ngēma chixexü ügüxü! iRü nüxü nüxü nacuaxēxē nax nümagü rü duüxügümare yixígüxü!

**Yumüxē i nawa Tupanaarü  
ngüxēēçax íçaxaxü**

**10** <sup>1</sup>Pa Cori Pa Tupanax ¿Tüxcüü toxna cuyáxügu? ¿Rü tüxcüü íquicux ega ngúxü tingegügu? <sup>2</sup>Erü ngēma chixri maxüxü rü nügü írütaxü

rü norü numaxã tüxũ nachixewe ya yíxema tama nüxũ cuáxe nax tügü ítapoxũxũ. Natürü nümatátama nagu nangu i ngéma chixexũ i toguxemaxã nagu naxínüxũ. <sup>3</sup>Rü ngéma chixexũ i duũxũ rü nügü namaxã nicuaxxũ i noxrütama ngúchaũ. Rü ngéma duũxũ i ngémaxügü nügüna nanuxüchixũ, rü Cori ya Tupanamaxã naguchiga rü nüxũ naxo. <sup>4</sup>Rü ngéma yatü i chixexũ rü nügü nicuaxxũ rü ñanagürü: “Nataxuma ya Tupana. Rü taxúetáma choxna taca nachiga i ngéma chaxüxũ”, ñanagürü. Rü ngémaguxicatama narüxínü. <sup>5-6</sup>Rü ngéma naxüxüwa rü guxüguma mea nüxũ ínanguxuchi. Rü nüma rü nüxna nixügachi i curü mugü rü nagu naxínügu rü tagutáma cunapoxcu, Pa Tupanax. Rü norü uanügüxũ nacugü rü nagu narüxínü nax taxúetáma iyanguxëxũ rü tagutáma guxchaxũ nüxũ ngëxmaxũ. <sup>7</sup>Rü naaxwa ínaxüxü i chixexũ i dexa rü doraxũ nixu rü naguxchigawaxe. Rü ngëxguma yadexaxgu rü mexü i oregu nayacux i ngéma chixexũ i nagu naxínüxũ, rü ngémaãcü tüxũ nawomüxëxë ya duëxëgü. <sup>8</sup>Rü chütacü rü ñaneacügü i éanexügu tüxũ ínicyxéxü rü ngëxma tüxũ nimax ya yíxema ngéma üpetüxe. Rü guxüguma bexma tüxũ ínidawenüchigüxũ ya yíxema turaxe i taxucürüwama tügü ípoxüxe. <sup>9</sup>Rü ñoma ai i naxmaxüwa naexücax idawenüxürüxũ nügü nixixëxë i ngéma yatü i chixexũ. Rü ngéma iyacüxüwa tüxũ nananguxëxë ya yíxema turaxe nax ngémaãcü tüxũ yayaxuxücax. Rü ngëxguma tüxũ yayaxuxgu rü marü taxucürüwama nüxna tiña. <sup>10</sup>Rü ñoma

ai iyauxexüchaüxüxüxü norü poramaxã tüxũ narüyexera ya yíxema turaexe rü ngémaãcü naxmexgu tayi. <sup>11</sup>Rü ngéma yatü i chixexũ rü nagu narüxínü nax nüma ya Tupana rü marü nüxũ yanangümaxü rü nügü yadüxchixewü nax tama nüxũ nadauxücax i ngéma norü chixexũ i naxüxũ i ngéma duũxũ. <sup>12</sup>iInachi Pa Cori Pa Tupanax, rü naxunagüchacixü! iRü taxú i tüxũ curüngümaxü ya yíxema naxixächiaëgüxë! <sup>13</sup>¿Rü tüxücü, Pa Tupanax, icunaxüchicaxü nax cuxü nacugüxũ i ngéma chixexũ i duũxügü? Erü nümagü nagu narüxínüe rü tagutáma nüxna cuca nachiga i ngéma chixexũ i naxügüxũ. <sup>14</sup>Pa Corix, cumatama nüxũ cudau i ngéma chixexũ i naxügüxũ. iÉcü napoxcue naxcax i ngéma guxchaxügü i naxügüxũ rü ngüxü nax duüxëgüxü yangexëëgüxü! Rü yíxema turaexe rü curü ngüxëëcax nixí itadaugüxũ, erü cuma nixí i tümaarü poxürüxü quixixü. Rü cuma nixí i tüxü curüngüxëxü ya yíxema taxcutagü. <sup>15</sup>iRü iyanaxoxëxë i ngéma norü pora i ngéma chixexügü! iRü nüxna naca nachiga i norü chixexügü, rü bai tá i wüxi i nüxü cuxüpetümarexü! <sup>16</sup>Rü nüma ya Cori ya Tupana nixí i äëxgacü yixixü i guxüguma. Rü ngéma duũxügü i tama Tupanaaxü yaxögüxü, rü Tupanaarü naanewa tá ínawoxü. <sup>17</sup>Pa Corix, cuma rü nüxü cuxínü i tümaarü yumüxë ya yíxema tama tügü icuaxüügüxe. Rü cuma rü tüxü cutaãxëgüxëxë rü tüxü curüngüxëë. <sup>18</sup>iRü ëcü tümaétüwa nachogü ya yíxema taxcutagü rü yíxema togümexëwa ngëxmagüxe! Rü yima

yatü ya waixüümüwa cunaxücü, rü tama tanaxwaxe nax wena muü naxçax ínanaguxêxü i curü duüxügü.

**Cori ya Tupana rü aixcüma  
törü poxüruxü nixí**

**11** <sup>1</sup>Choma rü Cori ya Tupanamexêwa chaugü changemaxêxê nax choxü ínapoxüxüçax nüxna i chorü uanügü. ¿Rü tñxcüü choxü ñapegürü: “iMáxpúneanewa naña nax ngéma werigürüxü cugü quicúxüçax!” ñaperügü choxü? <sup>2</sup>iRü dücax, nangugü i ngéma chixexü ügüxü i duüxügü! Rü yima naxnegü rü pexcunüne ya norü würawa nanadagü rü yacuxgüácüma duüxügü i mea maxêxüguama nanamaxgü. <sup>3</sup>Rü ngëxguma chi nüma ya ãëxgacü marü chixexügu nanguxgu ¿rü ñuxácü tá nügü ínapoxü ya yimá mecü ya duü? <sup>4</sup>Natürü nüma ya Cori ya Tupana rü napata ya üünenewa nangexma. Rü nüma ya Cori rü daxügüxü i naanewa nüxü nangexma i norü tochicaxü, rü ngéma meama ínadawenü rü nanangugü i duüxügü. <sup>5</sup>Rü nüma ya Tupana rü nanangugü i ngéma mexü ügüxü rü ngéma chixexü ügüxü, rü naxchi naxai i ngéma máxwaxegüxü. <sup>6</sup>Rü nüma ya Cori ya Tupana rü ñoma pucürüxü tá ngéma chixexü ügüxüétügu nanayixêxê ya áxwe rü üxüema i asúfremaxá ãëxüxü. Rü tá naxçax ínananguxêxê ya wüxi ya buanecü nax yaxaxüçax i guxüma. Rü nüma ya Cori ya Tupana rü ngémaácü tá nanapoxcue i ngéma duüxügü i chixexü ügüxü. <sup>7</sup>Rü nüma ya Cori ya Tupana rü íxaixcümacü nixí, rü

ngëmacax nüxü nangechaü i ngéma wëxguxü. Rü ngëmacax ya yíxema aixcüma imexe rü tá nüxü tadaugüxüchi.

**Yumüxê i nawa Tupanaarü  
ngüxêëçax íçaxaxü**

**12** <sup>1</sup>Pa Cori Pa Tupanax ipaxa toxü rüngüxêxê! Erü marü nataxuma i ngéma aixcüma cuxü yaxögüxü. Rü marü inarüxo i ngéma duüxügü i aixcüma mexügu rüxñüexü. <sup>2</sup>Rü nügütanüwa i duüxügü rü nügü nawomüxêëgü. Rü mea nidexagünetata natürü tama aixcümaxü nixügü. <sup>3</sup>Pa Tupanax iyanaxoxêxê i guxüma i ngéma nügü írümegünetaxü rü ngéma nügü icuaxüügüxü! <sup>4</sup>iRü napoxcue i ngéma ñagüxü: “Toma rü mea nüxü tacuaxgü nax tidexagüxü rü torü oremaxá togü ítapoxü. ¿Rü texé tá toxü tarüngeaxgüxêxê?” ñagüxü! <sup>5</sup>Natürü nüma ya Cori ya Tupana rü pexü nangäxü rü ñanagürü pexü: “Yíxema ngearü ngëmaxüãxgüxe rü chixri tümamaxá ipecuaxgüxe rü ngüxü tüxü pingexêëgü. Rü ngëmacax i ñuxma i choma rü tá tümaétüwa chachogü rü tá tüxü charüngüxêë erü ngéma nixí i guxüguama tüma tanaxwaxegüxü”, ñanagürü. <sup>6</sup>Rü ngéma Cori ya Tupanaarü uneta rü aixcüma nixí. Rü nüma rü tama nidora ega taxacüxü yaxuxgux. Rü ngéma nüxü yaxuxü rü aixcüma naxanguxêxê. Rü ngéma diërumü i <sup>7</sup>expüxcüna i guxürüxü nixí nax namexü i norü uneta. <sup>7-8</sup>Pa Cori Pa Tupanax, rü woo guxüma i duüxügü rü namaxá nataaxê i ngéma chixexü i naxügüxü rü woo guxüwama toxü

ínachomaeguãchi i ngêma duũxũgũ, natürü i cuma rü tá toxna cudau rü guxũgutáma toxũ ícupoxũ nüxna i ngêma chixexũ ügũxũ.

Yumüxé i nawa ngũxêêçax íçaxaxũ

**13** <sup>1</sup>Pa Cori Pa Tupanax ¿Rü ñuxguxüratáta nüxũ curüchaxũ nax choxũ icurüngümaxũ? ¿Ëxna choxũ icurüngümaxüchi? ¿Rü ñuxguxüratáta nüxũ curüchaxũ nax çaxchaxwa iquicúxũ? <sup>2</sup>¿Rü ñuxguxüratáta iyanaxoxũ i ngêma guxchaxũgü i choxũ ngêxmaxũ? ¿Rü tüxciũ i guxũ i ngunexũgu rü ngũxũ rü ngechaũ chingeechaxũ? ¿Rü ñuxguxüratáta iyanaxoxũ nax chorü uanümexêwa changexmaxũ? <sup>3</sup>Pa Cori Pa Chorü Tupanax ichoxũ nadawenü rü choxũ nangãxũ rü choxna naxã i maxũ nax tama chayuxçax! <sup>4</sup>Rü ngêmaãcü i chorü uanü rü taxütáma ñanagürü: “Marü nüxũ charüporamae”, ñanagürü. <sup>1</sup>Rü choxna nadau nax tama nataãxêxüçax i ngêma chorü uanü i ngêxguma guxchaxũgu changuxgux! <sup>5</sup>Rü choma rü chayaxõ nax aixcüma choxũ cungechaũxũ rü chataãxê erü cuma rü choxũ cumaxêxê. <sup>6</sup>Rü chorü wiyaemaxã tá Cori ya Tupanaxũ chicuaxũxũ erü poraãcü choxũ narüngüxêxê.

Nüma ya yatü rü chixexũgu narüxinüecha

**14** <sup>1</sup>Rü ngêma duũxũgü i naechitamare maxêxũ rü nagu narüxinüecha nax nataxuxũ ya Tupana. Rü guxũma rü chixexũgu narüxinüecha nanaxügu i ngêma Tupanapexewa chixexüchixũ. Rü bai i wüxi i mexũ üxũ.

<sup>2</sup>Rü nüma ya Cori ya Tupana rü daxũguxũ i naanewa duũxũgũxũ nadawenü. Rü tüxũ nangugü rü ngoxi tayíxema ya tümaãxêxũ cuáxe rü naxçax dauxe. <sup>3</sup>Natürü guxũma i duũxũgü rü chixexũwe narüxi rü guxũma wüxigu chixexũgu narüxinüecha. Rü marü tataxuma ya texé ya mexũ úxe, rü bai ya wüxíxe. <sup>4</sup>Rü tama naãxêxũ nicuax i ngêma chixexũ ügũxũ. Rü norü chixexũmaxã nanaguxêxê i chorü duũxũgü ñoma paü ingóxũ rü iguxêxüürüxũ. Rü taguma Cori ya Tupanacax nadaugü. <sup>5</sup>Natürü ngêma chixexũ ügũxũ rü wüxi i ngunexũ tá muũmaxã niduxrue. Erü Tupana rü tümaxütawa nangexma ya yíxema naga ñnüxe. <sup>6</sup>Rü ngêma chixexũ ügũxũ rü tüxũ nüxũ nacugüe i tümaarü ñnü ya yíxema mea maxêxê, natürü nüma ya Cori ya Tupana rü tüxũ ínapoxũ. <sup>7</sup>Chierü yimá Tupana ya maxpüne ya Chióüwa ngêxmacü nua üxgu nax norü uanügümexêwa ínanguxũxêêxüçax i norü duũxũgü i Iraéanecüãxgü. Rü ngêxguma nüma ya Cori ya Tupana ínanguxũxêêgu rü guxũma i Acóbutaxagü i Iraétanüxũgü rü tá nataãxêgü.

Tupana nanaxwaxe nax mexũ  
naxüxũ ya yatü

**15** <sup>1</sup>Pa Corix ¿texé tá tixí ya yíxema cupata ya üünenewa ngêxmaxe? ¿Rü texé tá tixí ya yima curü maxpüne ya üünenegu áchiúxe? <sup>2</sup>Rü yíxema ngearü chixexũáxe, rü mexũ úxe, rü íxaxcümaxe, <sup>3</sup>rü yíxema tama texéchiga chixri ídexáxe, rü yíxema taxuxũma i chixexũ

tümamücümaxã üxe, rü yíxema taxuxüma i chixexü üxe namaxã i ngëma tümaarü ngaicamagu pexü, <sup>4</sup>rü yíxema naxchí aixe i pecádugü rü tama nanaãxêraxüxe i ngëma duüxügü i chixexü ügüxü, rü yíxema nüxü ngechaügüxe i ngëma duüxügü i Tupanaxü ngechaügüxü, rü yíxema naxüamaxe i ngëma nagu taxunetaxü woo tama mea tüxü ínanguxuchigu, <sup>5</sup>rü yíxema tümaarü diëru ngixü íxãxe ngearü üetüiácüma, rü yíxema diëru oxé ega texé naxütanüchaügu nax napoxcuxüçax i ngëma taxuxüma i chixexü üxü. Rü yíxema ngëmaácü maxüxe rü tagutáma taxacürü chixexügu tüxü nanguxêxê.

**Ngëma mexü i Tupana tüxna äxü rü natakuma i to i ngëmaarü yexeraxü**

**16** <sup>1</sup>iChoxna nadau, Pa Tupanax! Erü cuma nixí i choxü ícupoxüxü. <sup>2</sup>Choma rü marü cumaxã nüxü chixu rü ñachagürü: “Cuma nixí i chorü Cori quixixü, rü natakuma i to i curüxü aixcüma choxü rüngüxêxêxü”, ñacharügü. <sup>3</sup>Rü ngëma duüxügü i namaxã taãxêgüxü i norü tupananetachicünaxägü rü ñanagürügü: “Torü tupanagü rü naporae”, ñanagürügü. <sup>4</sup>Rü ngëmacax nayamuxêetanü i ngëma naxchicünaxägü rü nüxü nicuaxüxügü guxüma i norü taãxêmaxã. Natürü i choma rü tagutáma ichaxã nawa i ngëma nacüma i norü tupananetagüçax nagü nawa inabaxêégüxü rü bai i chauaxmaxã nüxü chixu i ngëma tupananetagüéga. <sup>5</sup>Rü cumax Pa Cori nixí i chomaxã icucuáxü. Rü cuma nixí i

choxna cunaxãxü i guxüma i mexügü. Rü cumexwa nangexma i chorü maxü. <sup>6</sup>Rü yexguma icuyanuxgu ga yema naane nüxü ga Iraétanüxügü, rü yema choxna cuxãxü nixí ga yema rümemaxü. Rü namexechi i ngëma naane i choxna cuxãxü. <sup>7</sup>Rü nüxü chicuaxüxü ya Cori ya Tupana erü nüma rü chomaxã inacuax. Rü chütacü rü nüma rü chauãxêwa choxü naxucuxê. <sup>8</sup>Rü guxüguma nagu charüxínüecha ya Cori. Rü nüma nax chauütawa nangexmaxü rü taxuxütáma i taxacürü chixexügu choxü nanguxêxê. <sup>9</sup>Rü ngëmacax i ñuxma rü guxüguma chataãxê rü taxuçaxtáma taxacüçax chaxoégaãxê. <sup>10</sup>Erü cuma rü taxütáma tauquewa choxü cutax. Rü taxütáma wüxi i äxmaxügu nüxü curüngüma ya yima aixcüma cumücü ixücü. <sup>11</sup>Rü cuma rü tá choxü cunawex i ngëma nama i maxüwa nadaxü. Rü cuxütawa nangexma i taxüchixü i taãxê, rü ngëma taãxê rü taguma inayagux.

**Duüxü i mea maxüxüarü yumüxê**

**17** <sup>1</sup>Pa Corix ichoxü nüxü naxínü i chorü yumüxê, rü choxna naxã i ngëma ngüxêê i cuxna naxçax chacaxü! Erü cupexewa rü taxuxüma i chixexü chaxü rü tama wüxi i dorataxãxü chixí. <sup>2</sup>Rü cuma rü guxüguma quixaixcüma, rü ngëmacax guxü i duüxügüpexewa nangox nax taxuxüma i chixexü chaxüxü. <sup>3</sup>Rü cuma rü marü nüxü cucuax i ngëma chauãêwa nagu charüxínüxü, rü chütacü rü choxna cudau. Rü choxü cuxü rü taxuxüma i chixexü chowa icuyangau. Rü ngëmawa nüxü cucuax

nax aixcūmaxũ chixuxũ. <sup>4</sup>Rũ mea nagu chamaxũ i ngẽma curũ mugũ rũ tama nũxũ chayadauxũ i ngẽma duũxũgũ i máetagũxũ rũ chixexũ ügũxũ. <sup>5</sup>Rũ aixcūmama mea nagu chixũ i ngẽma cucūma rũ taguma ichayangex. <sup>6</sup>Pa Tupanax, cumaxã nixĩ i chidexaxũ erũ nũxũ chacuax rũ cuma rũ choxũ nũxũ cuxĩnũ i chorũ yumũxẽ ega cumaxã chidexaxgux. iRũ choxna naxã i ñaa cuxna naxçax chacaxũ! <sup>7</sup>Rũ chanaxwaxẽ i choxũ cunawex nax aixcūma choxũ cungechaũxũ. Erũ cuma rũ tũxũ curũngũxẽẽ ya yĩxema cuxũtawa tũmaarũ ngũxẽẽçax ícagũxe naxçaxwa i tũmaarũ uanũgũ. <sup>8</sup>iRũ choxna nadau ñoma cugũpũxũxetũna cudauxũrũxũ! iRũ cugũpexátũtũuwa choxũ nangexmaxẽẽ! <sup>9</sup>Rũ ngẽma chorũ uanũgũ rũ choxũ ínachomaeguãchi, rũ ngẽma chixexũ i duũxũgũ rũ çauxçax ínayaxũãchi. <sup>10</sup>Rũ nũgũ yacuaxũũgũãcũma nidexagũ, rũ tama ngechaũxũ nacuaxgũ. <sup>11</sup>Rũ choxũ nangugũgũ nax ngextã chaxũxũ nax choxũ yanguxẽẽgũxũçax. <sup>12</sup>Rũ nũmagũ rũ ñoma aigũrũxũ nixĩgũ nax choxũ iyacũxẽũgũxũ nax choxũ yamaxgũxũçax. <sup>13</sup>Pa Corix iẽcũ chauétũwa nayuxu rũ nadai i ngẽma chorũ uanũgũ! iRũ curũ taramaxã yabuxmũxẽẽ rũ choxũ ínapoxũ nũxna i ngẽma duũxũgũ i chixexũ! <sup>14</sup>Pa Corix icurũ poramaxã choxũ ínanguxuchixẽẽ naxmexwa i ngẽma duũxũgũ i chixexũ ügũxũ! iRũ ínawoxũ nawa i ñoma i naane i nawa nũgũ yacuaxũũgũxũ namaxã i norũ ngẽmaxũgũ! Rũ taxuwama choxũ name ega woo nũmagũ rũ namuarũ ngẽmaxũãxgũgu rũ

naxacũgũ rũ meama nachibũegu rũ nataagũçax rũ muxũ i norũ ngẽmaxũgũ nũxũ íyaxũxgu. <sup>15</sup>Naturũ i chomax rũ ngẽma namaxã chataãxẽxũ nixĩ nax cuxũxũchi tá chadauxũ rũ cuxũtawaxũchi tá changexmaxũ i ngẽxguma tá yuwa ícharũdaxgux.

**Norũ uanũxũ nax  
naporamaexũchigaarũ wiyae**

**18** <sup>1</sup>Rũ cuma nixĩ, Pa Corix, i chorũ poraxẽẽruxũ quixĩxũ. Choma rũ cuxũ changechaũ. <sup>2</sup>Rũ cuma nixĩ i chorũ poxũruxũ quixĩxũ rũ chorũ çuxchicaxũ quixĩxũ, rũ chorũ nguxuchixẽẽruxũ quixĩxũ, rũ chorũ Tupana quixĩxũ. Rũ cuma nixĩ i nuta i taxũchixũ i chorũ poxũruxũ quixĩxũ, rũ chorũ tũpexeruxũ quixĩxũ, rũ chorũ maxẽẽruxũ quixĩxũ, rũ ngẽma chorũ çuxchicaxũ i maçpũnetapexewa quixĩxũ, rũ ngẽma chorũ çuxchicaxũ i maçpũnechitaeruwa nagu changaxixũ quixĩxũ. <sup>3</sup>Rũ cuma nixĩ, Pa Cori Pa Tupanax, i namexũ nax cuxũ ticuaxũũgũxũ. Rũ ngẽxguma ãũcūmaxũwa changexmagu, rũ aita cuxçax chaxũxgu, rũ cuma rũ chorũ uanũgũmexẽwa choxũ ícupoxũ. <sup>4</sup>Rũ yema yu rũ choxna nangaicama rũ choxũ nimãxchaũ. Rũ porãcũ chamuũ napexewa ga guxũma ga yema ãũcūmaxũ ga chauxũtawa namuxũ. <sup>5</sup>Rũ yema yu rũ choxũ ínananumaeguãchi ga norũ yaxurũgũ, rũ yemaacũ choxũ niyaxu nax choxũ yamãxũçax. <sup>6</sup>Rũ yema ãũcūmaxũwa nax chayexmaxũ, rũ Coricax aita chaxũ nax nũma ga Tupana choxũ rũngũxẽẽxũçax. Rũ nũma rũ choxũ naxĩnũ ga yéa ínayexmaxũwa. Rũ

yema aita nax chaxüxü rü  
 naxmachixêwa changuga. <sup>7</sup>Rü yexguma  
 rü poraäcü naxixäächiane. Rü guma  
 ma\_xpúnegü rü naxixäächitanü. Rü Cori  
 ya Tupanaarü numaxä nixiätanücüxü.  
<sup>8</sup>Rü naxmaraüwa rü caxixü inaxüxü. Rü  
 na\_xwxa inaxüxü ga üxüema ga ñoma ga  
 naane ixaxêëxü, rü áxwe ga inaicü. <sup>9</sup>Rü  
 ningena ga daxüguxü ga naane rü nüma  
 ga Tupana rü ñoma ga naanegu inarüxí.  
 Rü nacutütüüwa rü nataxüchi ga  
 caixanexü rü naxêane. <sup>10</sup>Rü wüxi ga  
 dau\_xücüâx ga ä\_xpexätüxüé\_tügu  
 naxaunagü rü yema namaxä nigoe. Rü  
 buanecüemagu namaxä nayangaxi. <sup>11</sup>Rü  
 yema waanexü nixí ga yadü\_xchipetaxü.  
 Rü caixanexü ga pucümaxä waxügu  
 namaxä nayangaxi. Rü yemagu nügu  
 nicü\_x rü yemaarü aixepewa nayexma.  
<sup>12</sup>Rü naxütawa rü naxaemacüane rü  
 yema caixanexüwa narüyi ga gáuxü rü  
 áxwe ga inaicü. <sup>13</sup>Rü nüma ga Cori ya  
 Tupana ya gu\_xaétüwa ngëxmacü rü  
 daxüguxü ga naanewa inanaxü ga naga  
 ga ñoma idü\_xruanexürüxü ixíxü. Rü  
 yéma narüyi ga gáuxü ga äpü\_xüxü rü  
 áxwe ga naicü. <sup>14</sup>Rü yéma inanaxügu  
 ga naxne, rü äëmacügu inaxüxêë. Rü  
 yemach\_xwxa ga yema chorü uanügü rü  
 nügu nawoone rü nibuxmü. <sup>15</sup>Rü yema  
 mártama rü nipa, rü yexma nangox ga  
 natama nagagu ga yema naga ga  
 äü\_cümaxü rü guma buanecü ga yema  
 namuäcü. <sup>16</sup>Rü nüma ga Tupana rü  
 daxüguxü ga naanewa cha\_xcax  
 narüxue rü choxü inayaxuchi nawa ga  
 yema taxü ga äü\_cümaxü. <sup>17</sup>Rü chorü  
 uanügü ga poraexü ga cha\_xchi  
 aiexümexêwa choxü inanguxuchixêë.  
<sup>18</sup>Rü yexguma chaturayane rü cha\_xcax

inayaxüächi. Natürü nüma ga Cori ya  
 Tupana rü choxü narüngüxêë. <sup>19</sup>Rü  
 choxü inanguxuchixêë rü choxü  
 nanapu erü choxü nangechaü. <sup>20</sup>Rü  
 nüma ga Cori ya Tupana rü choxü  
 nanaxütanü naxcax ga yema mexü ga  
 chaucüma. <sup>21</sup>Yerü choma rü nagu chixü  
 i ngëma Tupana nagu rü\_xinüxü rü  
 taguma nüxü chaxo. <sup>22</sup>Rü gu\_xüma i  
 norü ucü\_xëgü rü nachauä\_xëgu, rü  
 taguma nüxü chaxo i norü mugü. <sup>23</sup>Rü  
 nap\_xewa rü taguma ta\_xacürü chixexü  
 chaxü rü nüxna chayá\_xügu i chixexü.  
<sup>24</sup>Rü nüma ga Cori ya Tupana rü choxü  
 nanaxütanü naxcax ga yema mexü ga  
 nap\_xewa chaxüxü. <sup>25</sup>Rü cumax, Pa  
 Cori Pa Tupanax, rü tümamaxä  
 quixaixcüma ya yíxema aixcüma cuga  
 inüxe. Rü cuxü tangechaütümüxü ya  
 yíxema tümamücü tüxü  
 ngechaütümüxe. <sup>26</sup>Rü cuma rü aixcüma  
 tüxü curüngüxêë ya yíxema cuga inüxe,  
 natürü ngëma tama cuga inüxü rü cuma  
 nüxü cucu\_x nax ñuxäcü tá  
 cunapoxcuxü. <sup>27</sup>Rü cumax, Pa Tupanax,  
 rü tüxü ícunguxuchixêë ya yíxema  
 tama tügü icu\_xüügüxe, natürü  
 cuyaxäcuchi i ngëma nügu  
 icu\_xüügüxü. <sup>28</sup>Rü cumax, Pa Cori Pa  
 Tupanax, rü cha\_xcax cunangóonexêë.  
 Rü ngëxguma éanexüwa changexmagu  
 rü choxü quibaixmaxü. <sup>29</sup>Rü curü  
 ngü\_xëëmaxä rü tá naxcax íchayagoöchi  
 i ngëma chorü uanü. Rü norü íanegiariü  
 poxeguxüé\_tüwa tá chaxípetü. <sup>30</sup>Rü  
 ngëma Tupanaarü inü rü aixcüma  
 gu\_xüwama name. Rü ngëma norü uneta  
 rü name nixí nax aixcüma yaxöxü. Rü  
 nüma ya Tupana rü tüxna nadau ya  
 yíxema nüxü yaxö\_güxe. <sup>31</sup>¿Rü texé tixí



ya Coriétüwa Tupana ixixe? ¿Rü taxacürü to i tupana nangexma i tüxna dauxü? <sup>32</sup>Rü Tupana nixi ya yimá choxü poraxēēcü. Rü yimá nixi ya iyanawexächixēēcü i chaucüma nax taxuwama nachixexüçax i chorü maxü. <sup>33</sup>Rü nüma ya Tupana nixi i choxü naporaeparaxēēxü ñoma cowürüxü rü maxpüñeanewa chomaxã inacuax nax taxuguma chayarüngxüçax. <sup>34</sup>Rü nüma nixi i choxü nanguxēēxü nax daixü chacuáxüçax rü pora choxna naxã nax bróüchenaxçax ya würa ichamaxüxüçax. <sup>35</sup>Rü cumax, Pa Cori Pa Tupanax, rü choxü ícupoxü rü chorü uanümexēwa choxü cunapu. Rü curü tügünechacüümaxã choxü quingí. Rü ngēma curü ngechaügagu rü cuaxwa changu. <sup>36</sup>Rü choxü cunatauxchaxēxē ga chomaxü nax yemaacü tama ichinguxüçax. <sup>37</sup>Rü nawe changē ga yema chorü uanügü rü ñuxmata nüxü ichayangau. Rü tama chatáegu ñuxmata guxüma chadai. <sup>38</sup>Rü nagu chachexgü rü yemaacü marü taguma ínarüdagü rü chayapuxyenaxägü. <sup>39</sup>Rü cumax, Pa Tupanax, rü choxü cuporaxēxē ga daiwa rü yemaçax ga yema chomaxã nuexü rü choxmexgu cunayixēxē. <sup>40</sup>Rü yemaçax choxna nibuxmü ga yema chorü uanügü. Rü yemaacü chanadai ga yema chauxchi aiexü. <sup>41</sup>Rü aita naxüe nax ngüxēēcax ínacagüxü natürü taxüema nüxü tarüngxüēē. Rü cuxna nacagüe, “Pa Cori Pa Tupanax”, natürü ga cuma rü tama nüxü cungäxüga. <sup>42</sup>Rü chanapuxächixēxē rü ñuxmata ñoma ätexeanexü i buanecü cuexürüxü yixigü. Rü nagu chapugü ñoma namaarü ächaraxügu ipugüxürüxü. <sup>43</sup>Rü cuma rü

choxü ícunguxuchixēxē naxmexwa ga yema duüxügü ga tama chauga ñnüechaüxü. Rü yema togü ga nachixüanegüarü äëxgacüxü choxü quixixēxē. Rü yemaacü ga yema duüxügü ga noxri tama nüxü chacuáxü rü ñuxma rü chorü puracütanüxügü nixigü. <sup>44</sup>Rü ngëxguma choxü naxínüegu rü chauga naxínüe rü ngēma togü i nachixüanecüãx i duüxügü rü chomaxã nataãxëgünetä. <sup>45</sup>Rü ngēma togü i nachixüanecüãxgü rü choxü namuüe, rü ngēma íyacuxgüxüwa rü ðuxruxeäcü ínachoxü. <sup>46</sup>iNamaxü ya Cori ya Tupana! iRü namecümäxüchi ya yimá chorü poxüruxü! iRü nüxü icuaxüxügü ya yimá chorü maxēeruxü ya Tupanax! <sup>47</sup>Rü nüma ya Tupana nixi i chauétüwa nayuxuxü rü choxmexgu nayixēēäxü i ngēma togü i nachixüanegü. <sup>48</sup>Rü nüma rü naxmexwa choxü ínanguxuchixēxē i chorü uanügü rü ngēma chomaxã nuexü. Rü cumax, Pa Corix, rü choxü ícupoxü nüxna i ngēma choxü imaxgüchaüxü. <sup>49</sup>Rü ngēmacax i natanüwa i ngēma nachixüanegü rü cuxü chicuaxüxü rü cuégagu chawiyae. <sup>50</sup>Rü cuma rü chorü uanügüxü choxü curüporamaexēxē erü cumatama choxü cuxuneta nax äëxgacü chixixü. Rü cuma rü guxüguma choxü cungechaü rü nüxü cungechaü i chautaaügü.

**Ngēma naxüxüwa nangox i  
Tupanaarü üüne**

**19** <sup>1</sup>Rü ngēma daxüwa nüxü idauxü nanangoxēxē i Tupanaarü üüne rü norü pora. Rü guxüma i ngēma daxüwa ngëxmaxü

tüxü nüxü nacuaxêxê nax ñuxácü namexechixü i ngêma nûma naxüxü. <sup>2</sup>Rü wüxichigü i ngunexü rü wüxichigü i chütaxü rü taxçax nanangoxêxê nax ñuxácü namexechixü ya Tupana. <sup>3</sup>Rü woo taxuxüma i dexagüxü taxinü rü taxuxü i naga taxmachixêwa nanaxu, <sup>4</sup>natürü ngêma Tupananarü üünechiga rü guxü i naanewa nangu ñuxmata naane íyacuáxüwa rü ñuxmata üaxcü íngexmaxüwa. <sup>5</sup>Rü nûma ya üaxcü rü taãxêácü inarügo nax ngêma namaxügu yaxüxü ñoma wüxi i duüxü íñaxächichaüxürüxü rü ñoma wüxi i yatü i ngexwacax ngüwa ixüxüürüxü. <sup>6</sup>Rü nûma ya üaxcü rü wüxi i ñoma i naanecüwawa ne naxü rü norü tocüwawa narüxücu, rü taxucürüwa texé norü naiemaxüchaxwa tiña. <sup>7</sup>Rü Cori ya Tupanaarü ore rü aixcüma name erü nanaxüchicüxü i tacüma rü ngexwacaxüxü i maxü tüxna naxã. Rü Cori ya Tupanaarü mugü rü aixcümaxü nixu rü cuaxwa nanangoxêxê ya yimá yatü ya ímemarecü nax nayauxãxü i ucüxêgü. <sup>8</sup>Rü Cori ya Tupanaarü ucüxêgü rü aixcüma mea iniwex rü ngêmacax taãxê tüxna naxã. Rü Cori ya Tupanaarü mu rü taxuwama nachixe rü ngêmacax taãxêxü tüxü nacuaxêxê. <sup>9</sup>Rü Tupanaarü ore rü taxuwama nachixe rü tagutáma nagux. Rü norü mugü rü aixcüma name rü mexüwa tüxü nagagü. <sup>10</sup>Rü ngêma mugü rü mexechixü i úiruarü yexera nixí. Rü berure ya naxchiãxüwa yaxunearü yexera tüxü name. <sup>11</sup>Rü choxü ínapoxü naxüpa nax chixexügu changuxü rü mexü i namawa choxü naga i ngêxguma naga chaxínügu. <sup>12</sup>¿Rü texé ya nüxü cuáxe i

tümaarü chixexü tümawatama ngêxmaxü? Pa Cori Pa Tupanax ichoxü nüxü írüngüma i ngêma chixexü i chowa ngêxmaxü! <sup>13</sup>iRü choxü ínapoxü nax tama ngêma chixexü i nagu charüxínüxügu changuxüçax! iRü choxü rüngüxêxê nax ngêma chixexüna chixügachixüçax! Rü ngêxgumarica tá nixí i taxütáma chixexü chaxüxü rü nawa íchanguxuchixü i ngêma chixexü i taxüchixü. <sup>14</sup>iRü choxü nayaxu i ngêma chorü dexagü i cumaxá nüxü chixuxü rü chorü ínügü, Pa Cori Pa Tupana ya chorü poxürüxü rü chorü nguxuchixêerüxü íxícüx!

**Yumüxê i nawa Tupanaarü ngüxêçax  
íçaxaxü nax ngêma uanüxü  
naporamaegüxüçax**

**20** <sup>1</sup>iRü nûma ya Cori ya Tupana cuxü ínü, Pa Æëxgacüx, ega guxchaxüwa cungexmayane cuyumüxêgu! iRü yimá Acóbuarü Tupana cuxü ípoxü nüxna i curü uanü! <sup>2</sup>iRü Yerucharéüwa ngexmane ya napatawa cuxçax ne nanamu i ngüxêê nax curü uanügüpexewa cuporaxüçax! <sup>3</sup>iRü nüxna nacuaxächi i curü ãmaregü, rü cuxü nanayaxu i ngêma naxünagü i naxçax quiguxü! <sup>4</sup>iRü nûma rü cuxna nanaxã i ngêma cuma cunaxwaxexü, rü aixcüma yanguxêxê i guxüma i taxacü nagu curüxínüxü! <sup>5</sup>Rü ngêmaácü tá tanaxüchiga, Pa Æëxgacüx, i ngêxguma curü uanügüxü curüporamaegu. Rü Tupanaégagu tá tanawexgü ya tóru woneragü. iRü Tupana yanguxêxê i guxüma i ngêma nüxna naxçax cucaxaxü! <sup>6</sup>Rü choma ya ãëxgacü ya Tupana choxü naxunetaxü rü chayaxó

nax nūma rü tá chorü uanügüxü choxü naporamaexēxü. Rü nüxü chacuax nax nūma choxü naxínüxü i dauxügüxü i naanewa rü tá choxü nangaxüxü rü norü poramaxá tá choxü naporamaexēxü nüxü i chorü uanügu. <sup>7</sup>Rü nümaxü i nachixüanegüarü ãëxgacügü rü nüxü nangexma ya nawexügü ya daiwa namaxá naxixüne. Rü togü rü nüxü nangexma i norü cowarugü i dairuxü ixügüxü. Natürü i yixema rü tüxü nangexma ya tórü ngüxēeruxü napexewa i tórü uanügü, rü nūma rü Cori ya Tupana nixí. <sup>8</sup>Rü ngēma nachixüanegü rü tá inayayitanü rü tá inayarüxo. Natürü i yixema rü tá tanaxaixrügumagüraxüecha rü yexeraäcü tá taporae. <sup>9</sup>Pa Cori Pa Tupanax inaporamaexēxē ya yimá torü ãëxgacü rü toxü nüxü naxínü i torü yumüxē!

**Nataāxē ya ãëxgacü erü narüporamae**

**21** <sup>1</sup>Pa Cori Pa Tupanax, rü yimá ãëxgacü rü nataāxē erü pora nüxna cuxá. Rü poraäcü nataāxēxüchi erü norü uanügüxü cunaporamaexēxē. <sup>2</sup>Rü cuma rü marü nüxna cunaxá i ngēma norü ngüchaü ixüxü, rü tama nüxna cunachuxu i ngēma naxçax cuxna naxçaxü. <sup>3</sup>Rü taāxēäcü cunayaxu rü poraäcü nüxü curüngüxē. Rü úrunaxçax i ãëxgacüarü ngaxcueruxü i naeruwa quixücuchi. <sup>4</sup>Rü cuxna naca nax cunamáarü maxüãxēxüçax rü cuma rü nüxna cunaxá nax guxüguma nüxü nangexmaxüçax i maxü. <sup>5</sup>Rü ngēma curü ngüxēegagu rü nataxüchi i norü pora ya yimá ãëxgacü. Rü cuma rü norü duüxügüpeçewa nüxü quicuaxüxü.

<sup>6</sup>Rü guxüguma nüxü curüngüxē, rü ngēma nax naxütawa cunexmaxügagu rü guxüguma nataāxēxüchi. <sup>7</sup>Rü cumax, Pa ãëxgacüx, rü aixcüma Cori ya Tupanaaxü cuyaxō, rü ngēmacax i curü uanügü rü taxütáma cuxü narüporamae, erü cuyaxō nax cuxü nangechaüxü ya yimá guxáétüwa ngēxmacü. <sup>8</sup>Rü ñuxmax, Pa ãëxgacüx, rü guxüma i curü uanügümaxá tá icucuax. Rü ngēmaäcü cuxmexwa tá nangexmagü i ngēma cuxchi aixü. <sup>9</sup>Rü ngēxguma cunapoxcuxgux, rü ñoma üxiemawa taxacü iguxürüxü tá cuyaxixēxē. Rü nūma ya Cori ya Tupana rü tá norü numaxá üxüwa nayawocu i ngēma curü uanügü nax ngēxma yanaxoxüçax. <sup>10</sup>Rü ngēmaäcü i curü uanügü rü naxacügü rü nataagü rü tá icuyanaxoxēxē i ñoma i naanewa. <sup>11</sup>Rü ngēma curü uanügü rü woo chixexü cumaxá naxügüchaügu, natürü taxütáma mea nüxü ínanguxuchi i ngēma nagu naxínüexü. <sup>12</sup>Erü cuma rü tá cuyabuxmüxēxē erü yima curü würa rü naguama cunatoenü. <sup>13</sup>iRü ecü curü poramaxá toétüwa ínayuxu, Pa Cori Pa Tupanax! Rü toma rü tá tanaxüchiga nax wiyaegümaxá cuxü ticuaxüügüxü, erü cuma rü nüxü curüporamae i torü uanügü.

**Ngúxü yangexügagu aita naxü natürü  
Tupanaxü nicuaxüxü**

**22** <sup>1</sup>Pa Chorü Tupanax, Pa Chorü Tupanax ¿tüxcüü choxna quixügachi? ¿Rü tüxcüü tama choxü curüngüxēechaü rü tama nüxü cuxínüchaü i chorü axu? <sup>2</sup>Pa Chorü Tupanax, ngunecü rü chütacü cuxna chaca rü tama choxü cungaxü rü marü

düxwa chipa. <sup>3</sup>Natürü i cumax rü  
 cuxüüne rü torü ãëxgacü quixĩ rü  
 ngëmacax i toma i Iraéanecüãxgü rü  
 cuxũ ticuaxũxügü. <sup>4</sup>Rü tonatügü rü  
 cugu tayaxögü, rü cuma rü tüxũ  
 ícunguxũxëxë naxmëxwa i tümaarü  
 uanügü. <sup>5</sup>Rü ngüxëëcax cuxna tacagü rü  
 cuma rü tüxũ ícunguxũxëxë. Cuxũ  
 tayaxögü rü taguma tüxũ cuwomüxëxë.  
<sup>6</sup>Natürü i chomax rü tama wüxi i duũxũ  
 chixĩ, rü ñoma wüxi i õxmirüümare  
 ngëma chataxmare. Rü duũxũgüarü  
 cugüruxũ chixĩ. <sup>7</sup>Rü ngëma choxũ  
 daugüxũ rü choxũ nacugüe rü choxna  
 nabiãxgü rü nanexãerügü. <sup>8</sup>Rü  
 ñanagürügü: “Ñaa nixĩ i ngëma yatü ga  
 Cori ya Tupanaaxũ yaxõxũ. iRü ëcü rü  
 ínanguxuchixëxëãx rü namaxëxëãx ega  
 aixcüma nüxũ nangechaũgü!”  
 ñanagürügü. <sup>9</sup>Natürü cumax, Pa Corix,  
 nixĩ i chauéanüwa choxũ cubuxëëxũ rü  
 chabuxgumama choxũ curüngüxëëxũ.  
<sup>10</sup>Rü yexguma tauta chabuxgu rü  
 choxna cudau. Rü yexguma noxri  
 chabuxgutama rü chorü Tupana quixĩ.  
<sup>11</sup>iRü taxú i choxna quixügachixũ! Erü  
 ngëmama choxna nangu i ãücümaxũ rü  
 taxúema choxũ ítapoxũ. <sup>12</sup>Rü ñoma  
 tuirügü i Bacháücüãx i düraexürüxũ  
 choxũ ínachomaeguãchi i chorü uanügü.  
<sup>13</sup>Rü ñoma ai i norü düramaxã aita  
 üexürüxũ nichogü rü choxna nayuxgü.  
<sup>14</sup>Rü ngëma chorü pora rü ñoma dexá i  
 baxürüxũ nixĩ rü guxünema ya  
 chauxchinãxã rü ta inagü. Rü yima  
 chorü maxüne rü ñoma taxacü  
 idexexürüxũ nixĩ. <sup>15</sup>Rü ngëma chorü  
 pora rü choxna ínaxuxũ rü ñoma  
 mairaxũ i üaxcüemamaxã ipaxürüxũ  
 nixĩ. Rü yimá chorü conü rü

chauxmanaxãwa nayaxũx erü yuwa  
 choxũ cutagachi. <sup>16</sup>Rü chorü uanügü rü  
 ñoma airugürüxũ choxũ  
 ínachomaeguãchi i guxũwama rü  
 chauxmëxwa rü chaucutüwa choxũ  
 ínipotagü. <sup>17</sup>Rü ngëma ngúxũ nax  
 chingexügagu rü nangox ya wüxichigü  
 ya chauxchinãxãremügü. Rü ngëma  
 chorü uanügü rü tama choxna  
 ningexetügü, rü choxũ narüdaunüecha.  
<sup>18</sup>Rü nügü nayanú ga chauxchiru rü  
 nügümaxã naxcax naxñüncaxwaxegü  
 nax nüxũ nacuaxgüxũcax nax texégu  
 nanguxũ. <sup>19</sup>Natürü cumax, Pa Corix,  
 nax chorü poraxëëxürüxũ quixixũ irü taxú  
 i choxna quixügachixũ! iRü paxa nua  
 naxü rü choxũ rüngüxëxë! <sup>20</sup>iRü choxũ  
 ínapoxũ nax tama taramaxã choxũ  
 yamãxgüxũcax i ñaa chorü uanügü i  
 ñoma airugürüxũ taxuwama mexũ!  
<sup>21</sup>iRü choxũ ínapoxũ nüxna i ñaa  
 yatügü i ñoma aigürüxũ rü ñoma  
 tuirügü i düraexürüxũ ixígüxũ! <sup>22</sup>Rü  
 chaueneegümaxã tá cuchigaxũ chixu, rü  
 curü duũxũgütanüwa tá cuxũ  
 chicuaxüxũ. <sup>23</sup>Rü choma rü ñacharügü:  
 “Guxãma ya texé ya Tupanaxũ  
 ngechaũgüxe irü nüxũ picuaxüxügü! Rü  
 guxãma i pema i Iraétanüxügü i  
 Acóbutaagü ixígüxe irü penataxëxë!”  
 ñachagürü. <sup>24</sup>Erü nüma ya Cori ya  
 Tupana rü taguma tüxũ inarüngüma ya  
 yixema ngúxũ ingegüxe rü taguma  
 tümachaxwa inicux. Rü nüma ya  
 Tupana rü tüxũ naxñü nax ngëxguma  
 nüxna icaxgu, rü tüxũ narüngüxëxë. <sup>25</sup>Rü  
 ngëmacax, Pa Cori Pa Tupanax, rü tá  
 cuxũ chicuaxüxũ napëxewa i ngëma  
 curü duũxügü. Rü tá nüxũ chixu nax  
 quixaixcümaxũ. Rü napëxewa i ngëma

duũxũgũ i cuxũ taxẽegũxũ rũ tá  
 chayanguxẽxẽ i ngẽma cumaxã  
 ichaxunetaxũ. <sup>26</sup>Rũ pema i togũ chixri  
 pemaxã cuaxgũxe irũ meama pechibũe  
 rũ ñuxmata mea pexũ yangu! Rũ pema i  
 Tupanacax daugũxe irũ nüxũ  
 picuaxũxũgũ! iRũ namá i perũ maxũ!  
<sup>27</sup>Rũ Pa Guxãma ya Duẽxẽgũ i Ñoma i  
 Naanewa Maxẽxe irũ nüxna  
 pecuaxãchie ya Cori ya Tupana rũ  
 naxcax pexĩ! iRũ napexegu  
 pecaxápũxũgũ rũ nüxũ picuaxũxũgũ!  
<sup>28</sup>Erũ nüma ya Cori ya Tupana rũ  
 ãẽxgacũ nixĩ rũ guxũ i  
 nachixũanegũmaxã inacuax. <sup>29</sup>Rũ  
 guxũma i ngẽma diẽruãxgũxũ rũ name  
 nixĩ nax Cori ya Tupanapexegu  
 nacaxápũxũgũxũ nax nüxũ  
 yacuaxũũgũxũcax. Erũ guxũma i ngẽma  
 ñoma i naanewa maxẽxũ rũ wena tá  
 waixũmũxũ nixĩgũ, erũ nügũwatama rũ  
 nataxuma i maxũ. <sup>30</sup>Rũ ngẽma tawena  
 ngóexũ i duũxũgũ rũ tá Cori ya  
 Tupanaxũ nicuaxũxũgũ rũ nüxũ  
 nixuchigagũ. <sup>31</sup>Rũ woo ngẽma duũxũgũ  
 i ngẽmawena buexũ rũ tá nüxũ  
 naxĩnũechiga ga yema taxũ ga mexũgũ  
 ga Cori ya Tupana norũ poramaxã üxũ.

**Cumax, Pa Cori Pa Tupanax, rũ  
 chauxũtawata cunxemaecha**

**23** <sup>1</sup>Rũ nüma ya Cori ya Tupana  
 rũ chorũ dauruxũ nixĩ rũ  
 taxuxũma choxũ nataxu. <sup>2</sup>Rũ mexũ i  
 nachicagu choxũ narũngũxẽxẽ rũ  
 mechiũxũ i natũwa choxũ naga. <sup>3</sup>Rũ  
 ngẽxguma chaturagu rũ choxũ  
 naporaxẽẽama rũ mexũ i namawa  
 choxũ naga nax ngẽmaãcü  
 natachigaxũcax i naéga. <sup>4</sup>Rũ woo

taxacürũ ãũcũmaxũ i taxũwa  
 chaxũpetũxgux, rũ taxucaxma chamuũ  
 erũ cumax, Pa Cori Pa Tupanax, rũ  
 chauxũtawata cunxema. Rũ yima curũ  
 naixmenaxãmaxã mexũ i namawaama  
 choxũ cuxũxẽxẽ, rũ curũ caxũruũmaxã  
 choxũ ícupoxũ. <sup>5</sup>Rũ mexũ i õna  
 chauxcax cumexẽxẽ, napexewa i chorũ  
 uanũgũ, rũ pumáramaxã choxũ cubaeru.  
 Rũ nangupetũxũchi i ngẽma curũ  
 ngũxẽxẽ i choxna cuxãxũ. <sup>6</sup>Rũ guxũ i  
 ngunexũgu rũ chomaxã cumecũma, rũ  
 cuxũ changechaũtũmũxũ. Rũ ngẽmacax,  
 Pa Corix, rũ cupatawa tá  
 changexmaecha rũ guxũgutãma  
 cuxũtawata chamaxecha.

**Tupana nixĩ ya ãẽxgacũ ya üünecũ**

**24** <sup>1</sup>Rũ Cori ya Tupanaarũ nixĩ i  
 guxũma i ñaa naane, rũ  
 guxũma i nawa ngẽxmagũxũ rũ nawa  
 maxẽxũ. <sup>2</sup>Yerũ nüma nixĩ ga naxũãxũ  
 ga ñoma ga naane. Rũ nüma nixĩ ga  
 naxũchicaãxũ ga márgũ rũ taxtũgũ nax  
 yemaacũ nangóxũcax ga paanexũ. <sup>3</sup>¿Rũ  
 texé tame nax nawa tanguxũ ya yima  
 maxpũne ya üünene i Tupana  
 íngexmaxũwa? ¿Rũ texé tame nax  
 napata ya üünenewa tamaxũxũ? <sup>4</sup>Rũ  
 tũma tixĩ ya yixema taguma chixexũ  
 üxe rũ taguma tũmãẽwa chixexũgu  
 rũxĩnũxe, rũ taguma  
 tupananetachicũnaxãgũxũ  
 icuaxũũxũgũxe rũ taguma idoraxe. <sup>5</sup>Rũ  
 Cori ya tũmaarũ Tupana ya tũmaarũ  
 maxẽeruxũ rũ tá mexũ tũmamaxã  
 naxuegu rũ tá tũxũ narũngũxẽxẽ. <sup>6</sup>Rũ  
 ngẽmaãcü tanaxwaxe nax tamaxẽxũ ya  
 yixema Acóbuarũ Tupanacax daugũxe  
 nax tũmaxũtawata nangexmaechaxũcax.

7iRü piwāxnagü, Pa Nūxcūmaxūxū i Yerucharéüaru Īāxgūx, pengeenügü nax yaxūcuxūcax ya yimá guxāaru āēxgacü ya üünecü ya poracü! <sup>8</sup>¿Rü texé nixī ya yimá āēxgacü ya üünecü? Rü nüma nixī ya Cori ya Tupana ya poracü rü tama muücü. Rü aixcüma nüma ya Cori ya Tupana nixī ya taxuxūma muücü ega ngēxguma texémaxā nügü nadaixgux. <sup>9</sup>iRü piwāxnagü, Pa Nūxcūmaxūxū i Yerucharéüaru Īāxgūx, rü pengeenügü nax yaxūcuxūcax ya yimá āēxgacü ya üünecü ya poracü! <sup>10</sup>¿Rü texé nixī ya yimá āēxgacü ya üünecü ya poracü? Rü nüma nixī ya Cori ya Tupana ya guxāétüwa ücü. Rü nümatama nixī ya āēxgacü ya aixcüma üünecü ya poracü.

**Yumüxē i nawa Tupanaaru  
ngūxēēcax icaxaxū**

**25** <sup>1</sup>Pa Cori Pa Tupanax, rü cuxna nixī i chacaxaxū. <sup>2</sup>Pa Chorü Tupanax, cuxū chayaxō. iRü taxú i cunaxūchicaxū i chorü uanügü nax āne choxū yangexēēgūxūcax rü choxū nacugüexūcax! <sup>3</sup>Rü tama chanaxwaxe nax texé āne tūxū ingexēēxū ya yíxema cuxū yaxōgūxe. Natürü i ngēma tama cuga ĩnüexū rü cumaxā nuexū, rü name nixī i āne nüxū quingegūxē. <sup>4</sup>Pa Corix ichoxū nawex i cumaxū rü ngēmagu choxū ixūxē! <sup>5</sup>iRü chomaxā inacuaax rü choxū nanguxēxē i ngēma curü ore i aixcüma ixūxū! Erü cuma nixī i chorü Tupana rü chorü maxēeruxū quixīxū. Rü guxūma i oragu rü cugu chayaxō. <sup>6</sup>Pa Cori Pa Tupanax inūxna nacuaaxāchi nax ñuxācü guxūgumachirex toxū cungechaūxū rü cuxū tangechaütümüxūgūxū! <sup>7</sup>iNatürü taxú i

nūxna cucuaaxāchixū i chorü chixexūgü rü yema chixexū ga chaxixū ga yexguma changextūxügu! Pa Cori Pa Tupanax ichoxna nacuaaxāchi erü ngēma curü ngechaū rü curü mecüma rü nata! <sup>8</sup>Rü nüma ya Cori ya Tupana rü namecüma rü aixcümacü nixī. Rü nüma rü tūxū narüwexāchixēxē ya yíxema chixri maxēxe. <sup>9</sup>Rü namaxūgu tūxū naxīxēxē ya yíxema tama tūgü icuaaxūügūxe, rü mexūwa tūxū nagagü. <sup>10</sup>Rü ngēxguma naga ixīnüegu i norü mugü rü mea yanguxēēgu i ngēma uneta i namaxā ixūxū, rü nüma rü tūxū nangechaūācüma tūxū naxucuxē namaxā i norü ore i aixcüma ixīxū. <sup>11</sup>Pa Cori Pa Tupanax, nata i chorü chixexū i cupexewa chaxūxū iRü choxū nüxū irüngüma i ngēma nax taxúema chixri cuchiga idexaxūcax! <sup>12</sup>Rü yíxema Cori ya Tupanax ngechaūxe, rü nüma rü tá tūxū nanawex i nama i mexū nax nagu tixūxū. <sup>13</sup>Rü tá tūxū narüngūxē rü tūmaxacügümexēgu nanaxú i ñaa nachixūane nax namaxā inacuaaxgūxūcax. <sup>14</sup>Rü nüma ya Cori ya Tupana rü yíxema nüxū ngechaūgūxemücü nixī, rü meama tūmacax nanangoxēxē i ngēma norü uneta. <sup>15</sup>Rü guxūguma Cori ya Tupanaaru ngūxēēcax chadau erü nüma nixī i choxū ĩnapoxūxū nawa i guxūma i āücūmaxū. <sup>16</sup>Pa Corix ichoxū rüngūxēxē rü cuxū changechaütümüxū! Erü chatura rü taxū i guxchaxūwa changexma. <sup>17</sup>Choma rü yexera chanaxīxāchiāēchigü. iRü nawa choxū ĩnanguxuchixēxē i ñaa ngúxū i chingexū! <sup>18</sup>iChoxū nüxū nadau i chorü guxchaxūgü rü ñaa ngúxū ichingexū rü

choxú íyanaxoxê! iRü choxú nüxü yarüngüma i chorü chixexüğü! <sup>19</sup>iRü dücax i ñuxre i chorü uanüğü i choxü imaxgüchaüxü! <sup>20</sup>iRü choxna nadau rü choxü ínapoxü nax tama choxü yamaxgüxcaxi iRü taxü i cunaxüchicaxü i chorü uanüğü nax âne choxü yangexêêgüxcax! Erü cuma nixí i chorü poxüruxü quixixü, rü cuxütagu nixí i nüxü ichayangüxü i ngüixê. <sup>21</sup>Rü ngêma chaugü namaxâ íchapoxüxü nixí nax aixcümáxü chixuxü rü taxuxüma i chixexü chaxüxü. Rü ngêmaâcü chamaxü erü cugu chayaxô. <sup>22</sup>Pa Tupanax ínapoxü i guxüma i chautanüxüğü i Iraéanecüâxgü nawa i torü guxchaxüğü!

**Yimá norü maxümaxâ  
mea icüaciärü yumüxê**

**26** <sup>1</sup>Pa Cori Pa Tupanax ichoxü rüngüxêxê! Erü chorü maxüwa rü nataxuma i chixexü. Rü aixcüma cugu chayaxô, Pa Cori Pa Tupanax. <sup>2</sup>iRü êcü choxü nangugü! iRü choxü naxü! iRü nüxü naxü i chorü ñnü rü chorü ngüchaü i chaxica nüxü chacuáxü! <sup>3</sup>Choma rü nagu charüxînú nax choxü cungechaüxü, rü guxüguma meama cuga chaxînú. <sup>4</sup>Rü taguma namaxâ chaxâmücü i ngêma idorataaxgüxü rü bai i ñuxgu wüxiwa namaxâ changexma i ngêma duüxügüpezewa mexü ügüinetaxü. <sup>5</sup>Rü choxü nawaxtümüxü i norü ngutaquexe i ngêma chixexü ügüxü i duüxüğü. Rü taguma namaxâ chaxâmücü i ngêma duüxüğü i chixecümaxü. <sup>6-7</sup>Rü cupexewa chaugü chayauxmex nax ngêmaâcü cuxü chawéxüxcax nax chowa rü nataxuxüma

i taxacürü chixexü. Rü ngêmaâcü, Pa Cori Pa Tupanax, curü âmarearü guchicaxüwa changu nax cuxcax chawiyaxüxcax rü cuxü chicuaxüxüxcax naxcax i ngêma mexüğü i cuxüxü. <sup>8</sup>Pa Corix, choma rü nüxü changechaü ya yima cupata ya nawa curü üünemaxâ cunxexmane. <sup>9</sup>Rü tama chanaxwaxe i choxü quimax wüxigu namaxâ i ngêma pecáduâxgüxü. Rü tama chanaxwaxe i ngêma máetagüxürüxü chomaxâ quixí. <sup>10</sup>Rü tama chanaxwaxe i ngêma chixexü ügüxürüxü rü ngêma âêxgacüğü i diêrucax chixri duüxügümaxâ icuaxgüxürüxü chomaxâ quixí. <sup>11</sup>Erü chorü maxü rü taxuwama nachixe irü ngêmacax choxü rüngüxêxê rü cuxü changechaütümüxü! <sup>12</sup>Rü cumax, Pa Corix, rü taianexüğü choxü cuchixêxê nax tama chorü uanügümexëgu changüxcax. Rü ngêmacax guxü i duüxügüpezewa tá cuxü chicuaxüxü rü mexü cumaxâ chaxuegu.

**Cori ya Tupana rü chorü omü  
rü chorü maxêêruxü nixí**

**27** <sup>1</sup>Rü nüma ya Cori ya Tupana rü chorü omü rü chorü maxêêruxü nixí. ¿Rü ngêmacax rü texêxü tá nixí i chamuüxü? Rü nüma ya Cori ínapoxü i chorü maxü. ¿Rü ñuxma rü texêxü tá nixí ichamuüxü? <sup>2</sup>Rü ngêxguma chixexüğü i chorü uanüğü, chauxcax ibuxmügu nax choxü yamaxgüxcax rü nüxchama tá guxchaxüğü nayi. <sup>3</sup>Rü woo muxüchixü i chorü uanüğü choxü íchomaeguâchigu rü taxucaxtáma chamuü. Rü woo nüğü ínamexêêgügu nax chauxcax íyaxüâchixüxcax rü taxucaxma

chanaxixächiäxē erü nüxü chacuax nax nūma ya Tupana tá choxü ipoxüixü. <sup>4</sup>Rü ngēma Cori ya Tupanana naxçax chacaxü rü choxü ngúchaüixü rü wüxitama nixí. Rü ngēma nixí nax guxūma i chorü maxügu Cori ya Tupanapatawa changexmaxü nax ngēmaäcü nüxü chicuaxüüxüçax rü norü üünemaxā chataäxēxüçax. <sup>5</sup>Rü ngēxguma guxchaxü çauxçax ínguxgu rü nūma ya Cori rü napatawa tá choxna nadau. Rü nügümaxā tá choxü natüxchipeta rü wüxi ya nuta ya tacüétügu tá choxü namunagü nax taxuxūma choxü imáxüçax. <sup>6</sup>Rü ngēma rü taxuxütáma i chorü uanü choxna nangu. Rü ngēxguma rü tá choxü natauxcha nax Cori ya Tupanaçax chayaguxü i ämaregü i napatawa rü taäxēäcüma naxçax chawiyaexü rü nüxü chicuaxüüxü. <sup>7</sup>Rü cuxna nixí i chacaxaxü, Pa Corix. iRü choxü naxinü! iRü cuxü changechaxütümüxü rü choxü nangäxü! <sup>8</sup>Rü chauäēwa rü nagu charüxinü rü chaugü ñachagürü: “Cori ya Tupanaçax tá chadau”, ñachagürü. Rü ngēmaçax i chomax, Pa Corix, rü cuxçax chadau. <sup>9</sup>iRü taxü i çauxçauxwa iquicüxü rü taxü i curü numaxā choxü cuxoxü! Erü cuxicatama nixí i chorü ngüxēerüxü quixixü. iRü taxü i chaxica nua choxü cutáxü nax ngēmaäcü changemüçüxüçax! Erü cuma nixí ya chorü Tupana rü chorü maxēerüxü quixixü. <sup>10</sup>Rü woo chaunatü rü chaué choxü itaxgügu natürü cumax, Pa Corix, tá nixí i choxna cudauxü. <sup>11</sup>Pa Corix ichoxü nawex i cumaxü rü chorü uanügüchaxwa choxü nüxü nacuaxēxē i ngēma mexü i nama nax nagu

chixüxüçax! <sup>12</sup>iRü taxü i norü ngúchaüwa choxü cutáxü! Erü ngēma duüxügü i choxü imaxgüchaüixü rü chixiri chauchiga nidexagü, natürü guxūma i ngēma rü doragümare nixí. <sup>13</sup>Natürü i choma rü chayaxō nax nüxü tá chadauxü nax ñuxäcü choxü nangechaüixü ya Cori ya Tupana i guxūma i ngunexügu i nagu chamaxüxüwa. <sup>14</sup>iEcü nüxü yaxō ya Cori! iRü cügü naporaxēxē rü taxü i nüxü curüxoxü nax cuyaxōxü! Rü cumaxā nüxü chixu rü inagu yaxō ya Cori ya Tupana!

**Cori ya Tupana rü nüxü  
naxinü i törü yumüxē**

**28** <sup>1</sup>Pa Cori Pa Tupana Pa Chorü Poxüruxüx, rü cuxna nixí i chacaxü. iRü taxü i çauxçauxwa iquicüxü nax tama choxü cungäxüxüçax! Erü ngēxguma taxütáma choxü cungäxüxgu rü tá chayü. <sup>2</sup>iRü choxü naxinü i ngēxguma cupata íngexmaxügu chawéxmexäcüma curü ngüxēçax íchacaxgu! <sup>3</sup>Rü tama chanaxwaxe i choxü cupoxcu wüxigu namaxā i ngēma chixexü ügüxü. Rü nümagü rü mea tümamaxā naxämüçügüneta ya duëxëgü, natürü naäxēwa rü nagu narüxinüe nax ñuxäcü tüxü yamaxgüchaüixü. <sup>4</sup>Rü ngēmaçax, Pa Corix, rü name nax cunapoxcuexü naxçax i ngēma norü chixexü i naxügüxü. iRü ngēma chixexü i toxguäxmaxā naxügüxütama naxçax natáeguxēxē nax ngēmatama i chixexümaxā cupoxcuexüçax! <sup>5</sup>Rü nümagü rü tama Tupanaxü nacuaxgüchaü rü tama nüxü



nacuaxgüchaũ i ngẽma Tupana ngoxẽẽxũ. Rũ ngẽmacax ya Tupana rũ tá nanadai rũ tagutáma wena inanachigüxẽxẽ. <sup>6</sup>Rũ namecũmaxũchi ya Cori ya Tupana erũ nüxũ naxĩnũ i chorũ yumüxẽ. <sup>7</sup>Rũ nüma ya Cori ya Tupana rũ chorũ poxũruxũ ya poraxũchicũ nixĩ. Rũ nagu nixĩ ga chayaxõxũ rũ nüma nixĩ ga choxũ nangũxẽẽxũ. Rũ poraãcũ chataãxẽ i ñuxmax. Rũ ngẽmacax tá Cori ya Tupanacax chawiyae rũ tá moxẽ nüxna chaxã. <sup>8</sup>Rũ nüma ya Cori ya Tupana nixĩ i norũ duũxũgüxũ naporaexẽẽxũ. Rũ nüma nixĩ i nüxũ nangũxẽẽxũ rũ ínapoxũãxũ ya yimá ãẽxgacũ ya nümatama nüxũ naxunetacũ. <sup>9</sup>Pa Cori Pa Tupanax inüxũ rüngũxẽxẽ ya curũ duũxũgũ rũ mexũ namaxã naxuegu! iRũ ñoma wüxi i carnéruarũ dauruũrũxũ nüxna nadau rũ guxũguma mea yagagũ!

#### Napora i naga ya Cori ya Tupana

**29** <sup>1</sup>Pa Dauxũcüãx inüxũ picuaxũxũ ya Cori ya Tupana naxçax i norũ pora rũ norũ üüne! <sup>2</sup>iRũ nüxũ picuaxũxũ i ngẽma naéga i üünexũ! iRũ yima napata ya mexechinewa rũ penatachigaxẽxẽ! <sup>3</sup>Rũ ngẽma naga ya Cori ya Tupana rũ márétũgu nayaxũ. Rũ nüma ya Tupana ya poracũ rũ nayaduruanexẽxẽ. Rũ nüma rũ ngẽma taxũ i márétũwa nangexma. <sup>4</sup>Rũ ngẽma naga ya Cori ya Tupana rũ napora rũ guxũwama nangu. <sup>5</sup>Rũ ngẽma naga ya Cori ya Tupana rũ nanabũũchacũxũ ya yima ocayiwagũ ya Líbanuwa ngẽxmagũne. <sup>6</sup>Rũ nagamaxã nayaduxruexẽxẽ ya yima maxpũnegũ ya Líbanu rũ Chiriú. Rũ ñoma tuirugũrũxũ

rũ ñoma naxacũgũrũxũ nanayuxnagũtanüxẽxẽ. <sup>7</sup>Rũ ngẽma nagawa rũ ínaxũxũ i üxüema. <sup>8</sup>Rũ ngẽma naga ya Cori ya Tupana rũ ngẽma ínachianexũwa rũ nayaduxruxẽxẽ. <sup>9</sup>Rũ ngẽma naga ya Cori rũ yima castãñagũ rũ nayawaxgüxẽxẽ rũ ngẽmaãcũ i ngẽma dauxchitagũ rũ nanangearũ naixnecũãxẽxẽ. Rũ napatawa ya Cori rũ guxãma nüxũ ticuaxũxũgũ. <sup>10</sup>Rũ nüma ya Cori ya Tupana rũ pucũmaxã ínacuaç. Erũ nüma nixĩ i guxũguma ãẽxgacũ yixĩxũ. <sup>11</sup>Rũ nüma ya Cori ya Tupana rũ nanaporaexẽxẽ i norũ duũxũgũ. Rũ mexũ namaxã naxuegu rũ nanataãxẽxẽgũ.

**Dabí rũ Cori ya Tupanaxũ ticuaxũxũ erũ norũ daxawewa naxçax nayataanexẽxẽ**

**30** <sup>1</sup>Pa Cori Pa Tupanax, rũ cuxũ chicuaxũxũ erũ cuma nixĩ i chorũ daxawewa choxũ ícurũdaxẽẽamaxũ rũ ngẽmacax tama chayu. Erũ cuma rũ tama cunaxwaxe nax choxũ nacugüexũ i chorũ uanũgũ. <sup>2</sup>Pa Cori Pa Chorũ Tupanax, choma rũ cuxũtawawa naxçax íchaca i curũ ngũxẽẽ, rũ cuma rũ choxũ cungãxũga rũ chaũxçax cuyataanexẽxẽ. <sup>3</sup>Rũ nawa choxũ ícunguxuchixẽxẽ i ngẽma yu rũ choxũ cumaxẽẽama. Rũ ngẽmacax tama chayu. <sup>4</sup>Rũ ngẽmacax i pemax, Pa Chomüçũgũ i aixcũma Cori ya Tupanaaxũ Yaxõgũxũ irũ ngĩxã wüxigu Tupanacax tawiyægũ rũ nüxũ ticuaxũxũgũ ya yimá üüncũ! <sup>5</sup>Erũ ngẽma norũ nu rũ paxaãchímare nixĩ, natürũ ngẽma norũ ngũxẽẽ rũ taguma ínayagux. Rũ woo chũtacũ íxauwegu,

natürü moxũãcü rü taãxẽãcü tingunexũgü. <sup>6</sup>Rü choma rü yexguma taxũta chidaxawegu rü chaugügu charũxĩnũ rü ñachagürü “Ñuxma rü marü taxuxũtãma i taxacü choxũ nangupetü”, ñachagürü. <sup>7</sup>Natürü i cuma rü choxũ cuxü, rü choxna quixũgachi rü tama choxũ curüngũxẽ. Rü ngẽmacax chorü muũmaxã chabaxãchiã. Natürü yemawena rü chomaxã cumecüma, rü chauxcax cuyataanexẽxẽ. <sup>8</sup>Rü cuxna nixĩ i chacaxũ, Pa Cori Pa Tupanax, rü cuxũ nixĩ i chachixewexũ. <sup>9</sup>Rü ñachagürü: “Pa Cori Pa Tupanax çrü taxacüwa namexũ ega taxwa choxũ nangegügu? Erü wüxi i waixümü rü taxucürüwa cuxũ nicuaxũxũ rü taxucürüwa nüxũ nixu nax cuma rü aixcümäcü quixĩxũ”, ñachagürü. <sup>10</sup>Pa Cori Pa Tupanax icuxũ changechaxũtümüxũ rü choxũ naxĩnũ rü choxũ rüngũxẽxẽ! <sup>11</sup>Rü ñuxma nax chauxcax cuyataanexẽxẽxũ rü ngẽma chorü ngechaũ rü taãxẽxũ choxũ cuyanguxuchixẽxẽ. Rü ngẽmaãcü choxna cuyaxũgachixẽxẽ i ngẽma chorü ngechaũ rü taãxẽ choxna cuxã. <sup>12</sup>Rü ñuxmax, Pa Cori Pa Tupanax, rü taxucürüwama charüingeaxmare. Rü ngẽmacax wiyaegümãxã tá cuxũ chicuaxũxũ rü guxũgutãma moxẽ cuxna chaxã.

**Name nax aixcüma Tupanagu nax yaxõxũ**

**31** <sup>1</sup>Pa Cori Pa Tupanax, cuxũtagu nixĩ i chaugü charücücũxũ nax choxũ icupoxũxũcax nax tama choxũ yamãxgũxũcax i chorü uanügü. iRü taxũ i nüxũ icurüngümãxũ ega curü ngũxẽcax íchacaxgux! iRü choxũ

ínanguxuchixẽxẽ naxmexwa i chorü uanügü! Erü cuma rü Tupana ya aixcüma mecü quixĩ. <sup>2</sup>iRü ecü choxũ nüxũ naxĩnũ i chorü yumüxẽ! iRü paxa nua naxü rü naxmexwa choxũ ínanguxuchixẽxẽ i chorü uanügü! Rü chanaxwãxe i chorü poxüruxũ nax quixĩxũ i cumax, rü chanaxwãxe nax chorü cuxchicaxũ nax quixĩxũ nax tama choxũ yamãxgũxũcax. <sup>3</sup>Rü cuma nixĩ i chorü poxüruxũ rü chorü cuxchicaxũ. iRü chomaxã inacuax rü choxna nadau naxchãxwa i chorü uanügü! Rü ngẽmaãcü i nümagü rü tá nüxũ nacuaxgü nax aixcüma Tupana ya poracü nax quixĩxũ. <sup>4</sup>iRü choxũ ínanguxuchixẽẽama nawa i ngẽma guxchaxũ i chauxcax inaxũgũxũ! Erü cuma nixĩ i chorü poxüruxũ quixĩxũ. <sup>5</sup>Rü cummexwa chanangex i chorü maxũ. iRü choxũ ínanguxuchixẽxẽ, Pa Cori Pa Tupana ya Ixaixcümacüx! <sup>6</sup>Rü tama namaxã chataãxẽ i ngẽma duũxũgü i naxchicünaxãgü i taxuwama mexũxũ icuaxũgũxũ. Erü cugu nixĩ i chayaxõxũ, Pa Cori Pa Tupanax. <sup>7</sup>Rü ngẽma choxũ nax cungechaũxũcax rü chataãxẽ rü mexũgu charũxĩnũ. Rü cuma rü nüxũ cucuax nax ngechaũ chingexũ rü chanaxĩxãchiãxũ. <sup>8</sup>Natürü tama chorü uanümexẽgu choxũ cunguxẽxẽ. Rü chauxcax cunamexẽxẽ i wüxi i nachica i nüxũ guxchaxũ nax choxna nangugũxũ. <sup>9</sup>Pa Cori Pa Tupanax icuxũ changechaxũtümüxũ! Erü aücümãxũwa changexma i ñuxmax. Rü ngẽma ngũxũ nax chingexũcax rü changuxetü rü changuxune rü guxũwama choxũ nangux. <sup>10</sup>Rü ngẽma nax ngũxũ chingexũ rü nax

changechaũxũgagu rü tá paxa chayü. Rü ngẽma nax ngechaũ chingexũgagu rü chiturachigü. Rü ngẽmacax i chaxune rü natura. <sup>11</sup>Rü choma rü norü cugüruxũ chixĩ i ngẽma chorü uanügü. Rü ngẽma chorü ngaicamagu achiũgũxũ i duũxũgü rü norü ñnicaruũmare choxũ nixĩgũxẽxẽ. Rü ngẽma choxũ cuaxgũxũ i duũxũgũcax rü wüxi i ãũächixũ chixĩ. Rü ngẽxguma ñtamüwa choxũ nadaugügu rü chauxchaxwa nibuxmü. <sup>12</sup>Rü choxũ inarüngümaexũchima rü ñoma marü chayuxũrũxũ choxũ nadau. Rü ngẽmaacü ñoma wüxi i axepáũ i puxächixũrũxũ chixĩ. <sup>13</sup>Rü duũxũgü rü bexma choxũ nixugüechamare chixexũmaxã. Rü ngexta íchadawenũxũwa rü nangexma i ãñcũmaxũ rü poraacü chamuũ. Rü duũxũgü rü wüxigu nagu narũxinüe nax ñuxãcũ choxũ yamãxgũchaũxũ. <sup>14</sup>Natürü i chomax, Pa Cori Pa Tupanax, rü cugu chayaxõ rü ñachagürü: “Rü cuma nixĩ i chorü Tupana quixĩxũ”, ñachagürü. <sup>15</sup>Rü ñaa chorü maxũ rü cuxmexwa nangexma. Rü ngẽmacax chanaxwaxe i naxmexwa choxũ ícunguxuchixẽxẽ i ngẽma chorü uanügü i chauxchi aixũ. <sup>16</sup>Rü choma nax curü duũxũ chixĩxũ irü cuxũ changechaxũtümũxũxũ! iRü êcü choxũ ñnanguxuchixẽxẽ erü choxũ cungechaũ! <sup>17</sup>Pa Cori Pa Tupanax, rü cuxna nixĩ ichacaxũ. Rü chanaxwaxe i choxũ cungãxũga nax tama ãne chingexũcax. Natürü ngẽma chixexũ ügũxũ i duũxũgü rü name nixĩ i ãne nüxũ quingexẽxũ. iRü êcü noxtacũma naxmaxũ i chianexũ i tauquewa ngẽxmaxũwa namugü! <sup>18</sup>Rü ngẽmaacü tá narüchianegü i ngẽma

duũxũgü i dorataaxgũxũ i cugüwaxegũxũ rü toxguãxũ oexũ rü guxchigawaxegũxũ tümamaxã ya yíxema mexe ya duũxẽgü. <sup>19</sup>Pa Tupanax, cuma rü poraacü cumecũma tümamaxã ya yíxema cuga ñnüexe. Rü duũxũgüpezewa cunawex nax ñuxãcũ cumecũmaxũ tümamaxã ya yíxema cugu yaxõgũxe. <sup>20</sup>Rü cuma rü tüxũ ícupoxũ nüxna i ngẽma duũxũgü i chixexũgu rüxinüexũ. Rü cugütüüwa tüxũ cungexmagũxẽxẽ nax ngẽmaacü tama tümamaxã naguxchigagũxũcax i tümaarü uanügü. <sup>21</sup>Rü cumexechi, Pa Cori Pa Tupanax. Erü choxũ nax cungechaũxũgagu taxũ i mexũ chauxcax cuxü ga yexguma ngũxũ chingeyane. <sup>22</sup>Rü ngẽxguma guxchaxũwa changexmayane rü nagu charũxinü nax choxna quixũgachixũ. Natürü yexguma cuxna chacaxgu nax choxũ curüngũxẽxũcax rü cuma rü choxũ cuxĩnü nax aita cuxcax chaxũxũ. <sup>23</sup>Pa Guxãma i Pema i Cori ya Tupanaaxũ Yaxõgũxex irü nüxũ pengechaxũgũx! Erü nüma ya Cori rü tüxna nadau ya yíxema naga ñnüexe. Natürü ngẽma tama naga ñnüexũ rü tá poraacü nanapoxcue. <sup>24</sup>Rü guxãma i pema i Cori ya Tupanagu nax peyaxõgũxũ irü peporae rü petaãxẽgü!

**Ngẽxguma Tupanamaxã nüxũ  
ixuxgu i tórü chixexũ rü nüma  
rü tüxũ nüxũ inarüngüma**

**32** <sup>1</sup>Rü nataãxẽ ya yimá yatü ya Tupana marü nüxũ nüxũ irüngümacü i norü pecádugü. <sup>2</sup>Rü nataãxẽ ya yimá yatü ya tama chixexũgu rüxinücü rü Tupana

taxuxũma i chixexũ nachigaxũ ixuci.  
 3Rũ yexguma tama Tupanamaxã nüxũ  
 chixuxgu ga yema chorũ chixexũ rü  
 guxũ ga ngunexũgu rü chaxauxecha rü  
 yexeraäcü chaxoégaaxê rü chiturachigü.  
 4Rũ chütacü rü ngunecü choxũ  
 cuchixewe Pa Tupanax. Rũ yema chorü  
 pora rü ínaxũxü ñoma putürachacu i  
 üaxcü ipaxêxũrürüxü. 5Natürü wüxi ga  
 ngunexũgu rü cumaxã nüxũ chixu ga  
 guxũma ga chorü chixexũgü rü  
 taxuxũma chixux. Rũ chaugũmaxã  
 ñacharügü: “Cori ya Tupanamaxã tá  
 nüxũ chixu i chorü chixexũgü”,  
 ñacharügü. Rũ cumax, Pa Corix, rü  
 choxũ nüxũ icurüngũma ga guxũma.  
 6Rũ ngẽmacax i guxũma i duũxũgü i  
 aixcüma yaxõgũxü rü ngẽxguma  
 ngürüächi guxchaxũwa nangexmagu rü  
 tá cumaxã nidexa. Rũ woo chi  
 taxüchixü i guxchaxü nüxũ ingaicagu rü  
 taxütãma nüxna nangu. 7Rũ cumax rü  
 chorü dauruxũ quixí, rü cuma nixí i  
 choxũ ícupoxũxü i ngẽxguma  
 äücũmaxũwa changexmagu. Rũ  
 ngẽxguma nüxũ charüporamaegu i  
 chorü uanügü rü chopexewa taãxêäcü  
 cunawiyaegüxêxê i duũxũgü. 8Rũ  
 cumax, Pa Cori Pa Tupanax, rü  
 ñacugürü choxũ: “Choma rü guxũguma  
 cuxũ chadawenü rü tá cuxũ changüxêxê  
 i ngẽma cuxũ chanaxwaxexũ. Rũ tá  
 cuxũ chaxucuxê rü cumaxã tá nüxũ  
 chixu i ngẽma nama i nagu tá quixũxü.  
 9Rũ tama name nax ñoma cowarurüxü  
 rüexna ñoma múlarüxü quixixü rü nax  
 nataxuxũma i curü cuax rü ñuxmata  
 ütũxünágucax cuwáxü nax mea namagu  
 quixũxüçax”, ñacurügü choxũ. 10Rũ  
 muxütãma i ngúxü ningegü i ngẽma

chixexũarü üruxũ ixĩgũxü, natürü  
 ngẽma cugu yaxõgũxü rü guxũgutãma  
 Cori ya Tupana nüxũ nangechaü. 11iRü  
 Cori ya Tupanamaxã petaãxêgü, Pa  
 Yatügü i Mexü i Tama Chixexü Ügũxü!  
 iRü petaãxêgü rü taãxẽmaxã Tupanaxü  
 picuaxũxũgüx!

**Tupanana moxê taxã rü nüxũ ticuaxũxũgü**

**33** 1Rũ pemax, Pa Duũxũgü i  
 Tupanaga Ñnuxũx irü nüxũ  
 picuaxũxũgü! Erü nüma ya Tupana rü  
 namaxã nataãxê i norü duũxũgüarü  
 cuaxũxü. 2iRü moxê nüxna pexãgü ya  
 Cori ya Tupana! iRü árpamaxã rü  
 árpaxacũmaxã taãxêäcü naxçax  
 pewiyaegü! 3iRü ngexwacaxũxü i  
 wiyaegu pewiyaegü! iRü mea  
 pepaxetaguäcüma nüxü picuaxũxũgü!  
 4Rü ngẽma Cori ya Tupanaarü ore rü  
 aixcüma name. Rü ngẽma naxũxüwa  
 nangox nax nüma rü aixcüma  
 yanguxêëaxü i ngẽma nüxü yaxuxü. 5Rü  
 nüma ya Cori ya Tupana rü namaxã  
 nataãxê i ngẽma aixcüma ixixü rü  
 ngẽma wexguxü. Rü ngẽma norü  
 ngechaü rü ñoma i naane namaxã  
 nanapá. 6Rü ngẽma daxũguxü i naane  
 rü guxũma i ngẽma ngẽmagüxü rü  
 nüma ga Cori ya Tupana rü norü  
 dexamaxã nanaxü rü naétü “cue”,  
 ñanagürü. 7Rü nüma ga Tupana rü  
 nanaxü ga yema taxü ga már i  
 mátamaxü. Rü yema norü dexá rü  
 wüxitama ga nachicawa  
 nanayexmaxêxê. 8Pa Guxũma i Taxacü i  
 Ñoma i Naanewa Ngẽmagüxũx irü  
 Tupanaga pexĩnue! Rü guxãma i pemax,  
 Pa Ñoma i Naanecüax i Duũxũgüx irü  
 nüxü pengechaxũgü! 9Yerü nüma rü

norü dexamaxã guxũma naxü. Rü nanamu rü guxũma mea inanu. <sup>10</sup>Rü nüma ya Cori ya Tupana rü nagu nayanaxoxêxê i ngêma nagu naxĩnüexũ i ngêma duũxũgü i tama nüxũ yaxôgũxũ. <sup>11</sup>Natürü i ngêma nüma ya Cori ya Tupana nagu rüxĩnüxũ rü guxũguma nanaxaixrügumaraxũ rü taguma narüxo. <sup>12</sup>Rü nataãxêgü i ngêma nachixũane ya Cori ya Tupanamaxã tupanaãxgũxũ rü ngêma duũxũgü ya Cori ya Tupana nügũxũ dexũ. <sup>13</sup>Rü nüma ya Cori ya Tupana rü daxũguxũ i naanewa ínadauwenü, rü nüxũ nadau i guxũma i duũxũgü. <sup>14</sup>Rü ngêma daxũguxũ i naane i nawa nangexmaxũwa nixĩ i tüxũ nangugũxũ ya yĩxema ñoma i naanewa ngêxmagũxe. <sup>15</sup>Rü nüma nixĩ i maxũ tüxna naxãxũ rü nüxũ nadauxũ i guxũma i ngêma taxũgũxũ. <sup>16</sup>Rü taxucũma ya ãêxgacü ya woo muarü churaraácü rü tá nügü ínapoxũ ega tama Tupana nüxũ rüngũxêëgu. Rü bai ya wüxi ya yatü ya poraxũchicü rü tá norü poramaxã nügü ínapoxũ ega tama Tupana naxũtawa ngêxmagu. <sup>17</sup>Rü woo cowarugü i poraxũchixũ rü taxuacũma norü yoraxũ ínapoxũ ega tama Tupana nüxũ rüngũxêëgu. <sup>18</sup>Natürü nüma ya Cori ya Tupana rü guxũguma tüxna nadau ya yĩxema nüxũ ngechaũgũxe rü nagu yaxôgũxe. <sup>19</sup>Rü ngêmaäcü yuwa tüxũ ínapoxũ rü maxũ tüxna naxã ega taiya ínguxgu. <sup>20</sup>Rü Tupanaxũtaguxicatama nixĩ i nüxũ yarüngauxũ i tórü maxũ. Erü nüma rü tüxũ narüngũxêë rü tüxũ ínapoxũ. <sup>21</sup>Rü ngêmacax tórü Cori ya Tupanamaxã tataãxêgü rü aixcũma naéga i üünexũgu

tayaxôgü. <sup>22</sup>iRü taxũ i nüxũ curüxoxũ nax toxũ cungechaũxũ, Pa Cori Pa Tupanax! Erü cuma rü tomaxã icuxuneta rü taxũtãma toxũ ícuwogü.

**Tupanaxũ ticuaxũxũ erü  
tamaxã namecũma**

**34** <sup>1</sup>Rü guxũ i oragu rü Cori ya Tupanamaxã tá mexũ chaxuegu, rü chauaxmaxã rü guxũgutãma nüxũ chicuaxũxũ. <sup>2</sup>Rü Cori ya Tupanamaxã chaugü chicuaxũxũ. iRü nüxũ íperüxĩnüe rü namaxã petaãxêgü, Pa Duũxũgü ya Mexũgu Rũxĩnüexex! <sup>3</sup>iRü ngĩxã wüxigu nüxũ ticuaxũxũgü rü tanatachigaxêxê i naéga! <sup>4</sup>Rü Cori ya Tupanana chaca rü nüma rü choxũ nangãxũga, rü choxũ ínanguxuchixêxê nawa i guxũma i chorü oégaãêgü. <sup>5</sup>Rü yĩxema Cori ya Tupanagu rüdaunüxe rü guxũgutãma tataãxêgü rü tagutãma ãne tingegü. <sup>6</sup>Rü doma yatü ya ngearü ngêmaxũácü rü Cori ya Tupanana naca rü nüma nüxũ naxĩnü rü norü guxchaxũgüwa ínananguxuchixêxê. <sup>7</sup>Rü Cori ya Tupanaarü orearü ngeruxũ i daxũcüax rü tüxna nadau rü tüxũ namaxêxê ya yĩxema Cori ya Tupanaxũ ngechaũgũxe. <sup>8</sup>iRü nüxũ pixũx nax ngêmaäcü nüxũ pecuaxũcax nax ñuxãcü namecũmaxũ ya Cori ya Tupana! Rü nataãxê ya yimá yatü ya Cori ya Tupanagu yaxôcü. <sup>9</sup>Rü pema i aixcũma Cori ya Tupanaxũ ngechaũgũxe, rü name nixĩ i nüxũ picuaxũxũgü rü naga pexĩnüe. Erü taxuxũtãma taxacü tüxũ nataxu ya yĩxema nüxũ ngechaũgũxe rü naga ínüexe. <sup>10</sup>Rü woo ya yimá ai ya porachirécü i ñuxguxacü rü taiya nüxũ

nangux. Natürü yíxema aixcüma Cori ya Tupanaga ñnüexe rü tagutáma tüxü nataxu i mexü. <sup>11</sup>Pa Chauçacügüx inua pexí rü choxü iperüxínü! Rü pexü tá changúexëxë i ñuxäcü Cori ya Tupanaxü nax picuaxüügüxü. <sup>12</sup>¿Cunawaxexü nax cutaãxëxü rü namáxü i curü maxü i ñoma i naanewa? <sup>13</sup>Rü dücax inaxuãxë rü nüxna nadau ya curü conü rü taxú i quidoraxü! <sup>14</sup>iRü nüxna ixügachi i guxüma i chixexü rü mea namaxü! iRü naxçax nadau nax taxúemaama nax cuguxchaxüáxü rü ngëmaäcü namaxü! <sup>15</sup>Erü nüma ya Cori ya Tupana rü tüxna nadau ya yíxema aixcüma mea maxëxe. Rü tüxü nüxü naxínü i tümaarü yumüxë. <sup>16</sup>Natürü nüxü naxo i ngëma chixexü ügüxü rü inayanaxoxëxë i ñoma i naanewa nax taxúema nüxna cuaxächixüçax. <sup>17</sup>Rü nüma ya Cori ya Tupana rü nüxü naxínü i norü yumüxë ya yimá mecü ya duü. Rü guxüma i norü guxchaxüğüwa rü ínanapoxü. <sup>18</sup>Rü nüma ya Cori ya Tupana rü ínamemare nax tüxü nangüxëxëxü ya yíxema tügüçax iyarütauxexe. Rü tüxü namaxëxë ya yíxema tümaarü chixexüçax tügümaxã ngechaüğüxe. <sup>19</sup>Rü yimá yatü ya mecü rü nawa nangupetü i muxüma i guxchaxüğü. Natürü nüma ya Cori ya Tupana rü nawa ínanapoxü i guxüma i ngëma. <sup>20</sup>Rü nüma ya Tupana nüxna nadau nax tama yexeraxü i guxchaxüğü naxçax íngüxüçax rü woo naxchinaxäğü rü nüxna nadau. <sup>21</sup>Rü ngëma duüxü i chixexü ügüxü rü ngëma norü guxchaxüğü tátama nayi. Rü ngëma tümachi aixü ya yíxema mexü üxe rü Tupana tá nanapoxcu. <sup>22</sup>Natürü nüma

ya Cori ya Tupana rü tüxü ínapoxü ya yíxema norü duüxüğü ixüğüxe. Rü tama tüxü napoxcxe ya yíxema nagu yaxögüxe.

**Yumüxë i nawa Tupanaarü  
ngüxëçax ícaxaxü**

**35** <sup>1</sup>Pa Cori Pa Tupanax inaxçax íyaxüächi i ngëma çauçaxçax yaxüächixü rü nadai i ngëma choxü imaxgüchaüxü! <sup>2</sup>iRü ëcü nayaxu i curü poxüruxü rü nua naxü rü choxü rüngüxëxë! <sup>3</sup>iRü ñuxma rü nayaxu ya cuxne nax namaxã cunadaixüçax i ngëma chowe ingëxütanüxü! iRü chomaxã nüxü ixu nax cuma yixüxü i choxü cumaxëxü! <sup>4</sup>iRü yabuxmüxëxë i ngëma choxü imaxgüchaüxü! iRü yabuxmüxëxë rü naxãneexëxë i ngëma choxü chixexëgüchaüxü! <sup>5</sup>iRü namu i curü orearü ngeruxü i daxücüax nax ínawoxüãxüçax ñoma buanecü arúchuchirexü ngianexëxürüxü! <sup>6</sup>iRü ngëma namaxü i chorü uanüğü rü naxëanexëxë rü nacoramaxëxë! Rü chanaxwaxe i curü orearü ngeruxü i daxücüax nawe ningëchigü. <sup>7</sup>Rü woo taxuxüma i chixexü chaxüyane rü nümagü rü chixexügu choxü nanguxëgüchaü. Rü woo taxuxüma i chixexü chaxüyane rü nümagü rü bexma nanaxüğü i wüxi i äxmaxü nax ngëmagu chingucuchixüçax. <sup>8</sup>iRü ëcü ngürüächi chixexüğü nayixëxë nax ngëma nümatama namexëgüxü i äxmaxüğü nayixüçax rü ngëmaäcü nagu yanachixexüçax! <sup>9</sup>Natürü i chomax rü Cori ya Tupanamaxã tá chataãxë erü choxü ínapoxü. <sup>10</sup>Rü guxüma i chorü maxümaxã rü ñacharüğü tá: “¿Texë

cumaxã tawüxigu, Pa Cori Pa Tupanax? Erü yíxema ngearü diëruãxgüxe rü tüxü nataxu i ngëmaxügü, rü cuma rü tüxü ícupoxü nüxna i ngëma tüxü rüporamaegüxü rü ngëma chixri túmaarü puracü ütänügüxü”, ñachagürü. <sup>11</sup>Rü ñuxma rü inachigü i duüxügü i chauchiga doraxü ixugüxü. Rü choxna naxçax nacagüe i taxacü i choma tama nüxü chacuáxü. <sup>12</sup>Rü ngëma duüxügü rü yema mexü ga naxçax chaxüxü rü chixexümaxã choxü nanatáeguxëëgü. Rü ngëma nixi i poraäcü ngechaü choxna äxü. <sup>13</sup>Rü yexguma nümagü yadaxaweegu rü choma rü naxçax chaxoégaäxë rü naxchiru ga témümarexügu chicux. Rü tama chachibüácüma guxügüma naxçax chayumüxë. <sup>14</sup>Rü choma rü naxçax changechaü rü ñoma chaué yuxürüxü rüxna wüxi i chomücü rüxna chauenexë yuxürüxü chixi. <sup>15</sup>Natürü yexguma guxchaxü chauxçax ínguxgu ga chomax rü nümagü rü naxítaquexe rü choxü nacugüe ñoma tama choxü nacuxgüxürüxü. Rü yemaacü chixexümaxã choxü nixugüecha. <sup>16</sup>Rü ngüxü choxü ningexëëgü rü choxü nacugüe rü numaxã choxna nadaugü. Rü yemaacü chauxchi naxaie. <sup>17</sup>Pa Cori Pa Tupanax çñuxguxüratáta i nüxü curüchauxü nax ngëma nüxü cudawenümarexü i ngëma duüxügü i ñoma aigürüxü chauxçax inginetanüciüxü? iRü nüxna choxü ínapoxü nax tama choxna nayauxgüäxüçax i ngëma nügümaxã choxü wüxicaxü i chorü maxü! <sup>18</sup>Rü ñuxüchi i choma rü tá moxë cuxna chaxã napexewa i ngëma muxüchixü i

curü duüxügü. Rü guxüma i ngëma duüxügüpexewa rü tá cuxü chicuaxüxü. <sup>19</sup>Rü tama chanaxwaxe i chauchigagu nataäxëgü i ngëma chorü uanügü. Rü tama chanaxwaxe nax choxna nanuxetügüxü i ngëma duüxügü i chauxchi aieü woo taxuxüma chaxüyane. <sup>20</sup>Rü nümagü rü tama ngüxmüecax nadaugü. Natürü ngëma naxçax nadaugüxü nixi nax túmaechitawaxegüxü ya yíxema ñaa nachixüanewa mexügu rüxinüexe. <sup>21</sup>Rü poraäcü nichogü chixexü i chauchigamaxã rü ñanagürügü: “Dücac, toxetüxüchimaxã cuxü tadau nax chixexü cuxüxü”, ñanagürügü. <sup>22</sup>Pa Corix, cuma rü meama nüxü cucuax i ngëma naxügüxü i ngëma duüxügü. iRü taxü i choxna cuyáxügüxü! <sup>23</sup>Pa Corix, Pa Chorü Tupanax inabaxüxächi rü inachi rü chauétüwa nachogü! <sup>24</sup>Pa Corix, Pa Chorü Tupanax, cuma nax mecü quixixü irü choxü nangugü! Erü tama chanaxwaxe i choxü nax nacugüexü i chorü uanügü. <sup>25</sup>Rü tama chanaxwaxe i chauchiga nidexagü rü chauchiga chixexügu narüxinüe ñaxümaxã: “Ñaa nixi i ngëma inaxwaxegüxü rü düxwa marü chixexügu tananguxëë”, ñanagürügü. <sup>26</sup>Rü ñuxma chanaxwaxe i äne ningegü i ngëma duüxügü i taäxëgüxü naxçax nax chixexügu changuxü. Rü chanaxwaxe i guxüwama äne ningegü i ngëma nügü ixugüexü nax choxü nayexeragüxü. <sup>27</sup>Natürü yíxema naxwaxegüxe nax chorü uanügüxü charüporamaegüxü, rü name nixi i taäxëäcü guxügüma tagaäcü ñatarügügü: “Nüma ya Cori ya Tupana rü namecümäxüchi. Rü namaxã nataäxë

i ngëxguma norü duũxũ mexũ nüxũ ngupetügu”, ñatarügügü. <sup>28</sup>Rü choma rü chorü conümaxã tá nüxũ chixuchiga i ñuxácü ãëxgacü ya mecü nax quixixũ. Rü guxũ i ngunexũgu tá cuxũ chicuaxũxũ.

**Duũxũgü rü guxũwama nachixe natürü  
Tupana rü guxũguma namecüma**

**36** <sup>1</sup>Rü ngëma duũxũ i tama Tupanaga ñnüxũ rü ngëma pecádu nixĩ i norü ñnüwa nüxũ nangúchaũxëxũ nax chixexũ naxũxũcax. Rü ngëmacax taguma nagu narüxĩnú nax Tupanaxũ namuũxũ. <sup>2</sup>Rü nügügu narüxĩnú nax namexũ i ngëma chixexũ i naxũxũ rü ngëmamaxã nügü nicuaxũxũ. <sup>3</sup>Rü ngëma duũxũ i chixexũ rü ngëxguma yadexagu rü taguma mexũ i orexũ nixu rü doraxũxicatama nixu. Rü wüxi i duũxũ i tama naãxëxũ cuáxũ nixĩ, rü taguma mexũ naxü. <sup>4</sup>Rü ngëxguma norü pechicaxũgu nacaxgu rü ngëma nagu narüxĩnú nax chixexũ naxũxũ. Rü ngëma nax poraácü nüxũ nangúchaũ i ngëma chixexũ i naxũxũ rü ngëmacax tama ñnanangéxchaũ. <sup>5</sup>Natürü i ngëma curü ngechaũ, Pa Cori Pa Tupanax, rü daxũguxũ i naanewa nangu. Rü ngëma nax quixaixcümamaxũ rü yauxtüweanexũarü yexerawa nangu. <sup>6</sup>Rü ngëma nax mea guxũmaxã icucuáxũ rü nanaxaixrügumaraxũ, ñoma ma xpúnegü ya taxũnegürüxũ. Rü ngëma curü mugü rü guxũgucax nixĩ ñoma már i taxũ rü mátamaxũchixürüxũ. Rü cumax, Pa Cori Pa Tupanax, rü nüxna cudau i guxũma i duũxũgü rü naexũgü. <sup>7</sup>Rü ngëma curü ngechaũ, Pa Tupanax, rü namexechi. Rü ngëmacax i duũxũgü

rü cupëxátütüxũcax nibuxmü nax ícupoxũxũcax. <sup>8</sup>Rü cuma rü duũxũgüna cunaxã i nawemü i mexũ rü natü i mexũwa cuyaxaxegüxëxë. Rü ngëmaácü meama nüxũ ningu. <sup>9</sup>Rü aixcüma cuwa nangexma i maxũ rü cuma nixĩ i toxcax cunangóonexëxũ. <sup>10</sup>Rü ngëma curü duũxũgü i cuxũ cuaxgüxũ rü cuga ñnüxũ, rü cuma rü nüxũ cungechaũ rü mea namaxã icucuax. <sup>11</sup>Natürü taxú i cunaxüchicaxũ i chauétü nax nachigüxũ i ngëma nügü icuaxũgüxũ rü bai i choxũ nax ñnataxüchigüxũ i ngëma tama cuga ñnüxũ! <sup>12</sup>Dücax, marü ngëxma nayayitanü i ngëma chixexũarü üruügü. Nayayitanü rü marü taxucürüwa inachigü.

**iCori ya Tupanagu yaxõ!**

**37** <sup>1</sup>iTaxú i cunaxixãchiãëxũ namaxã i ngëma duũxũgü i chixexũ ügüxũ! iRü taxú i quixauxãchixũ! <sup>2</sup>Erü ngëma duũxũgü rü paxa tá inayarüxo ñoma maxë ya rüñëxëcürüxũ rü ñoma natüane i pagüxürüxũ. <sup>3</sup>iRü nagu yaxõ ya Cori ya Tupana rü mexũ naxü! iRü ñoma i naanewa namaxũ rü guxũguma aixcüma nagu yaxõ! <sup>4</sup>iRü aixcüma nüxũ nangechaxũ ya Cori ya Tupana! Rü nüma rü tá nayanguxëxë i ngëma cuma nagu curüxĩnúxũ. <sup>5</sup>iRü Cori ya Tupanamëxëgu naxü i curü maxũ! iRü nagu yaxõ! Rü nüma rü tá cuxũ narüngüxëxë. <sup>6</sup>Rü nüma rü tá ngóxüwa nanange nax cumexũ rü quixaixcümamaxũ ñoma üaxcü tocuchigu ibaxixürüxũ. <sup>7</sup>Rü tama name nax taxacücax quidexaxũ napëxewa ya Cori ya Tupana. iRü yaxna naxĩnú! Rü nüma rü tá cuxũ



narüngüxêê. iRü taxú i namaxã  
 cuchixeãxêxü ega ngêma chixexü ügüxü  
 muarü ngêmaxüãxgügu rü mea yaxüxgu  
 i ngêma chixexü i nümagü nagu  
 naxínüexü! <sup>8</sup>iRü nüxü rüxo nax  
 cunuxwaxexü rü nüxna ixügachi nax  
 ngêma curü numaxã chixexü cuxüxü!  
 iRü taxú i ngêma nugu curüxínüxü! Erü  
 ngêxguma ngêmagu curüxínüamagu rü  
 yexera cugütama cuchixeãxê. <sup>9</sup>Erü  
 ngêma duüxügü i chixexü rü tá ínawoxü  
 nawa i ñaa nachixüane. Natürü ngêma  
 duüxügü i Cori ya Tupanagu yaxögüxü  
 rü nümagü tá nixí i nayauxgüãxü i ñaa  
 nachixüane. <sup>10</sup>Rü noxretama i ngunexü  
 nataxu nax ngêma chixexü ügüxü rü  
 nax iyanaxoxü. Rü woo tá naxçax  
 cudaxüxgu rü taxugütama nüxü  
 icuyangau. <sup>11</sup>Natürü yíxema Cori ya  
 Tupanapexewa mexügu rüxínüexere rü  
 yíxemagü tá tixí ya nayauxgüxe i ñaa  
 naane rü ngêma tá nixí i aixcüma  
 tataãxêgüxü. <sup>12</sup>Rü ngêma duüxügü i  
 chixexü rü naxçax nadaugü nax ñuxäcü  
 yimá yatü ya mecüxü nachixexêêxü. Rü  
 nuäcüma nüxü nadawenü. <sup>13</sup>Natürü  
 nüma ya Cori ya Tupana rü nüxü  
 nacugü. Erü nüxü nacuxax nax marü  
 yangaicaxü i norü poxcu i ngêma  
 duüxügü i chixexügü. <sup>14</sup>Rü ngêma  
 chixexü rü norü tara ngixü nanatüxuchi  
 nax tüxü nachexexüçax rü norü würaxü  
 natú nax tüxü namaxüxüçax ya yíxema  
 ngearü ngêmaxüãxgüxe rü mexü ügüxe.  
 Rü ngêmaäcü tüxü nadajxchaü ya  
 yíxema mea maxêxe. <sup>15</sup>Natürü ngêma  
 norü tara tátama nixí i norü maxünewa  
 yarüwáxü, rü yima norü würagü rü  
 írxaxügu tá inabüe. <sup>16</sup>Rü woo namuarü  
 ngêmaxüãxgü i ngêma duüxügü i

chixexü, natürü narümema nixí i  
 ngêma noxretama i ngêmaxügü ya yimá  
 yatü ya mecü nüxü ngêmaxü. <sup>17</sup>Erü  
 nüma ya Cori ya Tupana rü tá  
 inayanaxoxêê i ngêma duüxügü i  
 chixexü ügüxü, natürü tá tüxü  
 inachigüxêê ya yíxema mexü ügüxe.  
<sup>18</sup>Rü nüma ya Cori ya Tupana rü tüxna  
 nadau ya yíxema mea ímaxêxe, rü  
 ngêma tümaane i tümanatüwa tayaxuxü  
 rü guxütama tümataawa naxüxe. <sup>19</sup>Rü  
 ngêxguma guxchaxügü íngugügux, rü  
 taiya nguxgu, rü taxütama äne tinge,  
 erü òna rü tá tüxü ínayaxüxüchi.  
<sup>20</sup>Natürü ngêma chixexü ügüxü rü ñoma  
 maxê i pagücü íguxürüxü tá  
 inayarüxogü. Rü ngêma Tupanaarü  
 uanügü rü ñoma taemaxürüxü tá  
 inayarütauxe. <sup>21</sup>Rü ngêma chixexü i  
 duüxü rü ngêxguma texéxütawa  
 taxacüçax ínacaxgu rü taguma  
 nanatægüxêê. Natürü yimá mecü ya  
 yatü rü namücü nüxü tangechaütümüxü  
 rü norü ngêmaxügü tümamaxã nangau.  
<sup>22</sup>Rü yíxema Cori ya Tupana tüxü  
 rüngüxêêgüxe rü tümaarü tá nixí i  
 naane. Natürü i ngêma tama naga  
 ínüexü rü Tupana tá chixexüwa  
 nanawogü rü tá inayarüxogü. <sup>23</sup>Rü yimá  
 yatü ya mecü rü Cori ya Tupana rü  
 ngêma nama i mexüwaama nanamu. Rü  
 ngêxguma ngêma namagu yaxüxgu ya  
 yimá yatü rü nüma ya Cori rü nataãxê.  
<sup>24</sup>Rü woo ega ngürüächü chixexügü  
 nanguxgu ya yimá yatü rü tama ngéma  
 nangexmaecha erü nüma ya Cori ya  
 Tupana rü naxmexgu ningí rü wenaxarü  
 inanachixêêama. <sup>25</sup>Rü yexguma  
 changextüxügücürüwa rü ñuxma nax  
 chayaxügu rü taguma nüxü chadau ya

wüxi ya yatü ya mexü ücü rü ngexta nax nataxmarexü rü bai i nanegü i nüxü chadauxü i ngextá diêrucax nax nacaaxüwaxegüxü. <sup>26</sup>Rü nüma ya yimá yatü ya mecü rü guxüguma duüxê nüxü tangechaütümüxü rü tüxna nanaxá éga taxacüçax nüxna tacagügu. Rü nanegü rü norü taaxêxêerüxü nixigü. <sup>27</sup>iRü nüxna ixügachi i ngêma cucüma i chixexü, Pa Duüxüx, rü mexü naxü! Rü ngêmaäcü tá guxügutáma cuxü nangexma i cuchica i taguma gúxü i Tupanaxütawa. <sup>28</sup>Erü nüma ya Cori ya Tupana rü aixcüma mea tüxü nangugü rü ngêmacax taguma tüxü ínatax ya yixema aixcüma nawe rüxixe. Natürü ngêma chixexü ügüxü rü tá inayanaxoxêxê rü taxuxütáma i tümataxa ínayaxügü. <sup>29</sup>Natürü ngêma mexügü rü noxrü tá nixí i ñaa naane rü guxügutáma nawa namaxê. <sup>30</sup>Rü yimá yatü ya mecü nüxü nacuáäcüma nidexa, rü ngêxguma yadexagu rü aixcümaxü nixu. <sup>31</sup>Rü nügüäëgu namaxá nanguxü i ngêma ore i Tupana namaxá nanguxêexü. Rü ngêmacax i ngextá ínaxüxüwa rü naxuáxê nax tama chixexügu nanguxüçax. <sup>32</sup>Rü ngêma chixexü i duüxü rü yimá yatü ya mecüxü nangugü erü naxçax nadau nax ñuxäcü yamáaxüçax. <sup>33</sup>Natürü nüma ya Cori ya Tupana rü tá yimá yatü ya mecüxü ínapoxü nax tama ngêma chixexü i duüxümexêgu nanguxüçax rü taxúetáma i texé äëxgacüpexewa chixexü nachiga ixuxüçax. <sup>34</sup>Rü cumax, Pa Duüxüx irü Cori ya Tupanagu yaxó rü naga naxínü! Rü nüma rü tá cuxü nicuaxüxü rü tá cuxna nanaxá i ñoma i naane nax cuxrü yixüçax. Rü

cuxetümaxá tá nüxü cudau i ñuxäcü nax yanaxoxü i ngêma chixexü ügüxü. <sup>35</sup>Rü nüxü chadau i ngêma duüxügü i chixecümaxü nax nügü yacuaxüügüxü rü nügü ínatagüxü ñoma wüxi i nai i mexü rü taetaxürüxü. <sup>36</sup>Natürü ngêxguma wena ngêma chaxüpetüxgux, rü naxçax chadau rü marü nataxuma rü taxuxüxüma ichayangau. <sup>37</sup>iNatürü düçax, nangugü ya yimá duü ya aixcüma mecü rü taguma chixexü ücü! Rü ngêma naxçax ínguxü rü taaxê nixí. <sup>38</sup>Natürü ngêma duüxügü i tama Tupanaga ínüechaüxü rü tá inayarüxo rü ngêma naxügüxü rü ngêxma nayacuax. <sup>39</sup>Natürü ngêma duüxügü i mexü rü Tupanawa nixí i ne naxüxü i norü ngüxêê. Rü nüma nixí i nüxna nadauxü ega guxchaxü naxçax ínguxgu. <sup>40</sup>Rü ngêxguma Tupanaarü ngüxêçax nüxna nacagügu, rü nüma ya Cori ya Tupana rü nüxü narüngüxêê nax tama ngêma chixexü i duüxügümexêgu nayixüçax.

#### Yumüxê i Tupanaarü ngüxêçax íçaxaxü

**38** <sup>1</sup>Pa Cori Pa Tupanax ítaxü i choxü cuxüáxü ega chaugagu cunuxgu! iRü taxü i choxü cupoxcuxü i curü numaxá! <sup>2</sup>Rü yima cuxne rü chowa narüwaxgü rü cuxmexmaxá choxü quimax. <sup>3</sup>Rü ngêma chorü chixexügagu nixí i chomaxá cunuxü. Rü ngêmacax i ñaa chaxune rü guxüwama nidaxawe rü bai ya wüxi ya chauxchinaxá ya mexüne. <sup>4</sup>Rü ngêma chorü chixexügü rü chauétüwa nangu rü choxü narüyexera rü taxucürüwama namaxá chapora. <sup>5</sup>Rü ngêma tama chauäëxü nax chacuáxügagu rü chorü oxri rü niyixi rü

naxãxũchixũ. <sup>6</sup>Rũ guxũma i ngunexũgu rũ changechaũ rũ chamá rũ chanaxixãchixũ. <sup>7</sup>Rũ chauxcaxwe rũ niyauca erũ chixaxũne. Rũ guxũwama i chaxunewa rũ chidaxawe. <sup>8</sup>Rũ chaxune rũ ñoma inapoexũrũxũ nixĩ erũ chipaxũchi rũ changearũ poraãx. Rũ ngẽma nax chixãĩnecũxũ rũ aixcũma nixĩ erũ poraãcũ choxũ nanguxuchi. <sup>9</sup>Pa Cori Pa Tupanax, cuma rũ meama nũxũ cucuax i guxũma i chorũ ngũchaũgũ. Rũ ngẽma nax yaxna charũngũxũ rũ cuma nũxũ cucuáchiga nax taxacũcax ngẽmaãcũ chixixũ. <sup>10</sup>Rũ chorũ maxũne rũ poraãcũ nixĩãxcũxũ rũ ngẽma chorũ pora rũ nigũchigũ. Rũ woo ya yima chauxetũ rũ marũ taxuxũma nadau. <sup>11</sup>Rũ ngẽma chomũcũxũchi ixĩgũxũ rũ woo i ngẽma chautanũxũgũ rũ choxna nayáxũgũgũ naxchaxwa i ngẽma chorũ oxrigũ. <sup>12</sup>Rũ ngẽma choxũ imãxgũchaũxũ rũ chopexegu nananu i norũ yauxruũgũ. Rũ ngẽma choxũ chixexẽchaũgũxũ rũ nũgũmaxã nidexagũ nax ñuxãcũ choxũ iyanaxoxẽegũxũcax. Rũ guxũ i oragu rũ nagu narũxĩnũe nax nachauechitaegũchaũxũ. <sup>13</sup>Natũrũ i choma rũ chaugũ changauchiãxẽnetaxẽẽmare rũ ñoma tama nũxũ chaxĩnũxũrũxũ chixĩ. Rũ ñoma ngeáxũrũxũ taguma chidexa. <sup>14</sup>Rũ wũxi i ngauchiãxẽxũ i taxuxũma ixuxũ nax nũgũ inapoxũxũcaxrũxũ chaugũ chixixẽxẽ. <sup>15</sup>Pa Cori Pa Chorũ Tupanax, rũ curũ ngũxẽẽ nixĩ i ngẽma chanaxwãxexũ. Rũ chanaxwãxe nax cuma yixixũ i cunangãxũxũ i ngẽma chorũ uanũgũ. <sup>16</sup>Rũ ngẽma cuxna naxcax chacaxũ nixĩ nax tama choxũ

nacugũexũ rũ nataãxẽgũxũ i chorũ uanũgũ i ngẽxguma guxchaxũgu changuxchaũgu. <sup>17</sup>Rũ aixcũma nixĩ nax marũ ichayanguxchaũxũ. Rũ ngẽma nax choxũ nangũxũ rũ taguma choxũ narũna. <sup>18</sup>Rũ ñuxmax, Pa Tupanax, rũ cumaxã nũxũ chixu i ngẽma chorũ pecádugũ erũ naxcax chaugũ íchicuax ga yema chixexũ ga chaxũxũ. <sup>19</sup>Rũ ngẽma chorũ uanũgũ rũ nimuetanũ rũ ngẽmacax namuxũchi i ngẽma natũcãxma chauxchi aixũ. <sup>20</sup>Rũ ngẽxguma mexũ naxcax chaxũxgux rũ chixexũmaxã choxũ nanaxũtanũgũ. Rũ ngẽxguma naxcax chadauxgux nax mexũ chaxũxũ rũ nũmagũ rũ chomaxã nanue. <sup>21</sup>Pa Corix itaxũ i chaxica nua choxũ cutãxũ! Pa Chorũ Tupanax irũ taxũ i choxna quixũgachixũ! <sup>22</sup>Pa Tupana ya Chorũ Maxẽerũxũ Ixixũ ipaxa nua naxũ rũ choxũ yarũngũxẽxẽ!

#### Maxũ rũ paxa nagux

**39** <sup>1</sup>Choma rũ marũ chaugũmaxã ñachagũrũ: “Chaugũna tá chadau nax ngẽmaãcũ tama chixexũ chaxũxũcax i ngẽxguma chidexaxgu. Rũ tá changeaxmare i ngẽxguma chopexewa nangexmagũgu i ngẽma duũxũgũ i chixexũgu rũxĩnũexũ”, ñachagũrũ. <sup>2</sup>Rũ wũxi ga tama idexaxũrũxũ chaugũ chixixẽxẽ. Rũ taxuxũma chixu rũ bai ga wũxi ga dexa ga mexũxũ chixu. Natũrũ yema choxũ ngũxũ rũ yexeraãcũ ningũchigũ. <sup>3</sup>Rũ poraãcũ chauãẽwa nangux i ngẽma choxũ ũpetũxũ. Rũ yexguma yexeraãcũ nagu charũxĩnũgu rũ yexeraãcũ chanuãxẽ. Rũ yemacax dũxwa tagaãcũ ñachagũrũ: <sup>4</sup>“Pa Cori Pa Tupanax

ichoxũ nüxũ nacuaxêxê nax ngexta tá yacuáxũ i chorũ maxũ rü ñuxre i ngunexũ tá choxũ ngêxmaxũ! iRü choxũ nüxũ nacuaxêxê nax ñuxácü nanuxũxũ i ñaa chorũ maxũ! <sup>5</sup>Erü ñaa maxũ i choxna cuxãxũ rü aixcüma nanuxu. Rü cupexewa rü wüxi i paxaächiruũmare nixĩ. Rü wüxichigü i duũxũarũ maxũ rü ñoma wüxi i ngũãcüürũxũ nixĩ. <sup>6</sup>Rü wüxichigüarũ maxũ rü ñoma wüxi i gauxchipeta i ngupetũxũrũxũ nixĩ. Rü natüçaxma nananutaquexe i norü ngêmaxũgü, natürü tama nüxũ nacuax i texéarũ tá yixĩxũ i nawena. <sup>7</sup>Rü ngêmacax, Pa Corix çrũ taxacü chi i to i íchayanguxêxũ? Erü cuma nixĩ i choxna cunaxãxũ i ñaa chorũ maxũ. <sup>8</sup>iRü choxũ ínanguxuchixêxê nawa i chorũ pecádugü! iRü taxú i nüxũ cunatauxchaxêxũ i ngêma chixearũ ñnúáxũ i duũxũgü nax choxũ nacugüexũ! <sup>9</sup>Pa Corix, cupexewa rü changeax rü taxu ñachagürü, erü cuma nixĩ i cunaxũxũ i ñaa chorũ maxũ. <sup>10</sup>iRü marütama nax choxũ quimáxũ! Erü ñaa curü maxmaxã rü tá chayü. <sup>11</sup>Rü cuma rü ngêxguma norü chixexũgagu cunapoxcugu i wüxi i duũxũ, rü ngêmaãcü ícuyanawexãchixêxê. Rü ngêma yexeraãcü nüxũ cungechaũxũ rü aixcümama cuyanawexãchixêxê. Rü wüxichigü i duũxũ rü ñoma wüxi i ngũãcüürũxũ nixĩ i norü maxũ. <sup>12</sup>Pa Cori Pa Tupanax ichoxũ nüxũ naxĩnũ i chorũ yumüxê! iRü irüxĩnũ nax ñuxácü auxácü cumaxã chidexaxũ! iRü taxú i cungeaxmarexũ naxçax i chorũ axu! Choma rü cupexewa rü ñoma wüxi i duũxũ i tama curü duũxũ ixĩxũrũxũ chixĩ. Rü chorũ oxigürũxũ rü wüxi i

paxaãchimare ñoma i naanewa ngêxmaxe chixĩ. <sup>13</sup>Pa Corix itaxú i yumaxã choxũ cupoxcuxũ! iRü çhaxçax yataanexêxê nax wena chataãxêxũçax naxũpa nax chayuxũ!” ñachagürü.

**Chorü taãxêmaxã chanaxü i curü  
ngüchaũ, Pa Chorü Tupanax**

**40** <sup>1</sup>Rü choma rü yaxna chaxĩnũãcüma íchananguxêxê nax Tupana choxũ rüngüxêxũ. Rü nüma rü choxũ naxĩnũ ga yema nüxna nax chacaxaxũ. <sup>2</sup>Rü yuwa choxũ ínanguxuchixêxê. Rü ngêxguma ngêma ácharaanexũgu changuchaũgu rü taianexũwaama choxũ nagagachi nax íchixũxũçax. <sup>3</sup>Rü wüxi i ngexwacaxũxũ i wiyae chauaxwa nanguxêxê nax ngêmamaxã nüxũ chicuaxũxũçax. Rü muxema ga yema wiyaxũ taxĩnüegu rü tataãxêgü rü Cori ya Tupanaxũ tamuũe rü nagu tayaxögü. <sup>4</sup>Rü tataãxêgü ya yixema Cori ya Tupanagu yaxõxe, rü tama ngêma chixexũ ügüxũxũtagu naxçax dauxe i tümaarũ ngüxêê rü tama ngêma tupanenetachicũnaxãgüxũ icuaxũügüxe. <sup>5</sup>Pa Cori Pa Chorü Tupanax, rü namuxũchima nixĩ ga yema mexũgü ga curü poramaxã toxçax cuxũxũ. Rü cuma rü guxũguma togu curüxĩnũ rü taxüema cumaxã tawüxigu. Rü ngêma toxçax cuxũxũ rü ngêma togu nax curüxĩnũxũ rü chanaxunagüchaũ, natürü namuxũchi i ngêma rü ngêmacax taxucürüwama nüxũ chixu i guxũma. <sup>6</sup>Cuma rü tama namaxã cutaãxê nax duũxũgü cuxçax nadaxũ rü yagugüãxũ i wocaxacügü rü carnérugü. Rü woo i ngêma ãmaregü i chawüarũ rü tríguarü

rü chebádaarü rü tama namaxã cutaãxê.  
 Rü tama naxçax ícuca nax âmaregü  
 cuxçax yagugüxü i duüxügü nax  
 ngêmaäcü norü chixexüxü  
 curüngümaxüçax. Natürü ngêma cuma  
 cunaxwaxexü nixí nax guxüguma cuga  
 chaxínüxü rü cuxna chanaxãxü i chorü  
 maxü. <sup>7</sup>Rü ngêmacax cumaxã nüxü  
 chixu rü daxe chixí rü chaugü ichaxã  
 yema curü orearü uruügü curü orewa  
 naxümatüxürüxü. <sup>8</sup>Rü chomax, Pa  
 Chorü Tupanax, rü namaxã chataãxê  
 nax curü ngúchaü chaxüxü. Rü  
 chauãêgu namaxã changuxü i ngêma  
 curü nguxêetae. <sup>9</sup>Rü ngêma muxü i curü  
 duüxügüpeçewa chanaxunagü i curü ore  
 i aixcüma ixíxü. Cumax rü meama nüxü  
 cucuax nax marü namaxã nüxü chixuxü.  
<sup>10</sup>Rü tama chaugügu chayacux nax  
 ñuxãcü aixcüma namexü i ngêma  
 cuxüxü. Rü marü namaxã nüxü chixu  
 nax ñuxãcü cuyanguxêxü i ngêma  
 nüxü quixuxü rü ñuxãcü toxü  
 cumaxêxêxü. Rü ngêxgumarüxü ta rü  
 marü tama ichayacux nax nüxü chixuxü  
 nax aixcüma cuxü  
 nangechaütümüxügüxü i ngêma  
 muxüchixü i curü duüxügü. <sup>11</sup>Rü  
 ñuxmax, Pa Corix, rü tama chanaxwaxe  
 nax nüxü curüchaxü nax cuxü  
 changechaütümüxüxü. Erü ngêma curü  
 ngechaü rü curü ore i aixcüma  
 ixíxüicatama nixí i chorü poxürüxü  
 ixíxü. <sup>12</sup>Rü ngêma chixexügü i choxü  
 ngupetüxü rü namuxüchi, rü düxwa  
 taxucürüwama chayaxugü. Rü ngêma  
 choxrütama chixexügügu changu rü  
 ngêmagagu taxucürüwa cuxü  
 chadawenü. Erü ngêma chorü  
 chixexügü rü chauyaexü narümumae rü

ngêmagagu cuxü charüxochiga. <sup>13</sup>Pa  
 Corix, cuxü chacaxü irü choxü  
 ínanguxuchixêxê nawa i ngêma chorü  
 chixexügü rü paxa choxü rüngüxêxê!  
<sup>14-15</sup>Rü ngêxgumarüxü ta, Pa Corix, rü  
 chanaxwaxe i cunaxãneexêxê i ngêma  
 chorü uanügü i choxü imaxgüchaüxü.  
 Rü name nixí nax norü ânemaxã  
 cuyabuxmüxêxêxü i ngêma duüxügü i  
 chixexü chomaxã ügüchaüxü rü ñuxma  
 choxü cügüexü. <sup>16</sup>Natürü guxãma ya  
 yíxema cuxçax daugixe rü name nixí  
 nax poraäcü tataãxêgüxü. Rü guxãma  
 ya yíxema tüxü nangüchaügixe nax  
 tüxü cumaxêxêxêxü rü name nixí i  
 guxüguma ñatarügügu: “iCori ya  
 Tupanaxü picuaxüxügü erü guxãetüwa  
 nangexma!” ñatarügügu. <sup>17</sup>Rü choma  
 nax taxuxüma chixíxü rü  
 chanaxixächiãêxü irü taxü i choxü  
 curüngümaxü, Pa Corix! Erü cuma nixí i  
 choxü curüngüxêxêxü rü choxü  
 ícupoxüxü. Rü ngêmacax, Pa Chorü  
 Tupanax irü taxü i cunüxcüãêxü nax  
 choxü curüngüxêxêxü!

#### Duüxü i daxawexüarü yumüxê

**41** <sup>1</sup>Rü nüma ya Tupana rü  
 tümamaxã nataãxê ya yíxema  
 tümamücü ya ngearü ngêmaxüãaxexü  
 rüngüxêxêxê. Rü nüma ya Cori ya  
 Tupana rü tá tüxü ínananguxuchixêxê  
 ega ngêxguma guxchaxü tümacax  
 ínguxgu. <sup>2</sup>Rü nüma ya Cori ya Tupana  
 rü tá tüxna nadau rü tá maxü tüxna  
 naxã rü tá tüxü nataãxêxêxê i ñoma i  
 naanewa. Rü taxütãma tümaarü  
 uanügüarü ngüchaüwa tüxü natax. <sup>3</sup>Rü  
 nüma ya Cori ya Tupana rü tá pora  
 tüxna naxã ega ngüxü tingegügu. Rü

ngëxguma tidaxawegu rü tá tûmacax  
 nayataanexêxê. <sup>4</sup>Rü choma rü ñaãcü  
 chayumüxê: “Pa Corix icuxú  
 changexaxütümüxü rü chauxcax  
 yataanexêxê! Erü marü cumaxã nüxü  
 chixu i chorü chixexügü”, ñachagürü.  
<sup>5</sup>Natürü ngëma chorü uanügü rü  
 ñanagürügü: “Chierüna paxa nayuxgux  
 nax ngëmaãcü ngëxma yanaxoxüçax”,  
 ñanagürügü. <sup>6</sup>Rü ngëxguma choxü  
 íyadaugügu i ngëma nax chidaxawexü  
 rü chomücüxü nügu nixixêenetagü.  
 Natürü chauxchi naxaie rü nataãxêgü i  
 ngëxguma nüxü nadaugügu nax ngúxü  
 chingexü. Rü ngëxguma choxna  
 nawoeguxgu rü choxü nacugüe. <sup>7</sup>Rü  
 ngëma chauxchi aiexü rü naxítaquexe  
 rü chauchiga nidexagü. Rü nagu  
 narüxînüe nax chaugagutama ngúxü  
 chingexü. <sup>8</sup>Rü ñanagürügü: “Rü ngëma  
 nax yadaxawexü rü yuuxü chixexü  
 namaxã naxü rü ngëmacax i ñuxma rü  
 marü tagutáma wena ínarüda”,  
 ñanagürügü. <sup>9</sup>Rü woo ga yema mexü ga  
 chomücü ga nagu chayaxõxü nax  
 aixcüma choxü nangechaüxü rü wüxiwa  
 chomaxã chibüchiréxü rü ñuxma rü  
 chomaxã narüxuanü. <sup>10</sup>Natürü cumax,  
 Pa Corix irü cuxú changexaxütümüxü!  
 iRü choxü írudaxêxê nax ngëmaãcü  
 chanapoxcuexüçax i ngëma chomaxã  
 rüxuanügüxü! <sup>11</sup>Rü aixcüma tá nüxü  
 chacuax nax cuxü chataãxêxêxü ega  
 ngëxguma ngëma chorü uanügü rü  
 taxütáma nügu yaxuxgu nax choxü  
 naporamaexü. <sup>12</sup>Rü chomax nax mea  
 chamaxüxü rü taguma chixexü chaxüxü  
 irü choxna nadau nax ngëmaãcü  
 guxüguma cuxütawa changexmaxüçax!  
<sup>13</sup>Rü namexechi ya Cori ya

Iraétanüxüarü Tupana. Rü ñuxmax rü  
 guxügutáma rü ngëmaãcüecha nixí.

### Tupanaxütawa ne naxü i chorü ngüxêê

**42** <sup>1</sup>Rü ñoma wüxi i cowü i  
 taxawaxüchixü i natüçax  
 dauxürüxü chixí nax cuxcax chadauxü,  
 Pa Chorü Tupanax. <sup>2</sup>Rü choxü  
 nangüchaü nax namaxã chaxãmücüxü  
 ya Tupana ya maxüarü yora. ¿Rü ñuxgu  
 tá i wena napatawa chaxüxü nax ngéma  
 nüxü chicuaxüüxüçax? <sup>3</sup>Nguncü rü  
 chütacü rü chaxaxu nax norü ngüxêçax  
 íchacaxaxüçax. Rü yoxni i chorü uanügü  
 rü choxü nacugüe rü ñanagürügü:  
 “¿Ngexcü nixí ya curü Tupana?”  
 ñanagürügü. Rü ngëmamaxã choxü  
 nacugüe. <sup>4</sup>Rü ngëxguma ngëmagu  
 charüxînügu rü marü tama yaxna  
 namaxã chaxînü i ngëma choxü ngúxü.  
 Rü nüxna chacuaxächi nax ñuxácü  
 taãxêácüma rü Tupanana moxê  
 itaxãácüma napatawa chanagagüxü ga  
 yema muxüma ga duüxügü. Rü ñuxácü  
 tataãxêgü ga yexguma. <sup>5</sup>¿Rü ñuxma rü  
 taxacüçax chi i nüxü charüxoxü? ¿Rü  
 taxacüçax chi i naxcax chaxoégaãxü?  
 Rü Tupanawaxicatama nüxü ichayangau  
 i chorü ngüxêê, rü yimáxü tá nixí i  
 chicuaxüüxüamaxü. Erü nüma nixí ya  
 chorü Tupana ya chorü maxêerüxü.  
<sup>6</sup>Natürü i ñuxmax rü poraãcüxüchima  
 íchayaxoõchi. Rü ngëmacax, Pa  
 Tupanax, poraãcü cuxna chacuaxächi  
 nawa i ñaa naane i natü i Yudáü nawa  
 dapetüxü rü yima maxpúnegü ya Ermõü  
 rü Michá nawa ngëxmagüne. <sup>7</sup>Rü  
 guxüma i ngëma guxchaxügu rü  
 ngúxügü i chauxcax ícunanguxêxü rü  
 ñoma wüxi ya yuape ya taxüchicürüxü

chauétüwa naxüpetü. Rü ñoma dexá i dauxüwa nagoxüchiüxürüxü chauétü nangu. <sup>8</sup>Rü ngunecü rü nüma ya Cori rü choxü nangechaü. Rü chütacü rü tama nüxü charüchau nax chawiyaxü rü chayumüxëxü naxcax ya Tupana ya chorü maxëeruxü. <sup>9</sup>Rü ñachagürü nüxü ya Tupana ya chorü poxüruxü: “¿Tüxcüü choxü curingüma? ¿Rü taxacücax i ñuxma rü ngechaüãcü ichixüxü rü choxü nua nachixëãxëgüxü i chorü uanügü?” ñachagürü. <sup>10</sup>Rü woo ya chauxchinaxägü rü ta nangúe nagagu i ngëma chorü uanügü i guxüguma choxü cugüexü rü ñagüxü: “¿Ngexcü nixí ya curü Tupana?” ñagüxü. <sup>11</sup>¿Natürü taxacücax chi nüxü charüxoxü? ¿Rü taxacücax chi ichaxoégaãëxü? Erü Tupanagu nixí i chayaxöxü rü yimáxü tá nixí i chicuaxüüxüamaxü. Erü nüma nixí i chorü Tupana ya chorü maxëeruxü ixícü.

**Choxü nangúchaü nax  
Tupanapatawa changuxü**

**43** <sup>1</sup>Pa Tupanax ichauétüwa idexa! iRü chauétüwa nachogü napëxewa i ñaa duüxügü i tama yaxögüxü! iRü naxmëxwa choxü ínanguxuchixëxë i ngëma idorataxáxü rü ngëma chixexügu rüxünüxü! <sup>2</sup>Erü cuma nixí i chorü Tupana i chorü poxüruxü quixixü. ¿Rü tüxcüü i cugüna choxü cuyáxüguxëxëxü? ¿Rü taxacücax i ngechaü chingexechaxü rü ngëma chorü uanügü rü chixri chomaxá nachopetü? <sup>3</sup>iRü ëcü chauxcax nangóonëxë nax nüxü chacuáxücax i ngëma curü ore i aixcüma ixixü nax

ngëma choxü nüxü cuaxëëxücax i ngëma nama ya yima curü maxpúne ya üinenewa nadaxü i ngextá cuma ícungexmaxüwa! <sup>4</sup>Rü ngëmaãcü tá nawa changu i ngëma curü amarearü guchicaxü, Pa Tupanax. Rü ngëma tá cuxü chicuaxüxü árpagamaxá. Erü cumax, Pa Tupanax, rü taãxëmaxá choxü cunapaxëxë. <sup>5</sup>¿Rü ñuxma rü taxacücax tá i nüxü charüxoxü i ngëma? ¿Rü taxacücax tá ichaxoégaãëxü? Erü choma rü marü Tupanaaxü chayaxö rü tá yimáxü nixí i chicuaxüxüechaxü. Rü nüma nixí i chorü Tupana i chortü maxëeruxü yixixü.

**Yumüxë i nawa Tupanaarü  
ngüxëëcax ícaxaxü**

**44** <sup>1</sup>Pa Tupanax, tomatama nüxü taxínüechiga ga yema taxü ga mexü ga nüxcüma cuxüxü. Yerü torü oxigü rü nüxü tixugügü ga yema nüxcüma cuxüxü ga yexguma tüma tamaxëgu. <sup>2</sup>Rü cumatama nixí ga norü naanewa ícuwoxüxü ga yema duüxügü ga tama cuxü yaxögüxü. Rü yemaacü cunapoxcue ga yema duüxügü nax yema naanegu torü oxigüxü cuxãchiügüxëxëxëcax. <sup>3</sup>Rü tama tümaarü poramaxá rü tümanegümaxá nixí ga tanayauxgüxü ga yema naane. Natürü yema curü poragagu rü curü ngüxëëgagu nixí ga nawa tangugüxü ga yema naane. Yerü cuma rü tüxü cungechaü rü yemacax tümamaxá cumecüma. <sup>4</sup>Pa Chorü Áëxgacü, Pa Chorü Tupanax, cuma nixí i ícunaporamaexëëxü i curü duüxügü. <sup>5</sup>Rü cugagu nixí i nüxü tarüporamaegüxü i torü uanügü. Rü

ngëxguma cuéga tanaxuxuchigu rü nüxü tariyexera i ngëma toxü daiχchaüxü. <sup>6</sup>Rü choma rü tama chauxnegügu chayaxõ erü yima chauxnegü rü tagutâma chorü uanügüxü choxü nariüporamaexëxë. <sup>7</sup>Rü cuma nixî ga torü uanüxü toxü curüporamaexëxü rü cuma nixî i cunaxâneexëxü i ngëma toxchi aiexü. <sup>8</sup>Rü guxǖguma cumaxâ togü ticuaxüxǖgü, Pa Tupanax. Rü guxǖgutâma nüxü ticuaxüxü i cuéga. <sup>9</sup>Natürü i cumax rü toxü cuxo rü toxü cuxâneexëxë. Rü marü tama ícuyaxǖmǖcü i torü churaragü. <sup>10</sup>Rü cuma rü nüxǖ cunatauxchaxëxë i torü uanügü nax toxü yabuxmǖxëxǖcax. Rü ngëmacax i ngëma toxchi aiexü rü toxü nangixgü rü nayana i ngëma nüma nanaxwaxegüxü. <sup>11</sup>Rü cuma rü nüxna toxü cumugü ñoma carnérugü i daiwa nagagüxürüxü. Rü ngëma duüxügü i tama cuxǖ yaxögüxütanügu toxü cuwoonexëemare. <sup>12</sup>Rü ítanüxǖgu tomaxâ cutaxe rü taxuxǖma nawa cuyaxu nax tomaxâ cutaxexü. <sup>13</sup>Rü ngëma toxna ngaicamagüxü i nachixǖanecǖãxgü rü toxü nacugüe rü tomaxâ naguxchigagü nagagu ga yema chixexü ga toxçax ícunguxëxü. <sup>14</sup>Rü ngëmagagu i ngëma duüxügü i tama yaxögüxü rü toxü nacugüe. Rü ngëxguma toxü nadaugügu rü nanexâerugǖãcuma toxü nacugüe. <sup>15</sup>Rü wüxichigü i ngunexü rü ngëma guxchaxǖwa changexma. Rü ngëmacax chorü ãnemaxâ tama chadaunagü. <sup>16</sup>Erü ngëma chorü uanügü rü choxü nimaxgǖchaü rü chomaxâ naguxchigagü rü chaugu nidauxcüraxǖgü. <sup>17</sup>Rü ngëma

ñuxma toxǖ ngupetüxǖ rü tama ngëma cuxǖ nax itarüngǖmaexǖgagu nixî rü tama nax taxacürü chixexǖ cupexewa taxǖxǖgagu nixî. <sup>18</sup>Rü toma rü tama nagu tarüxînǖie nax cuxǖ ítatáxǖ rü tama nagu tarüxînǖie nax nüxǖ itarüngǖmaexǖ i curü ore. <sup>19</sup>Natürü i cuma rü toxǖ cupoxcueama. Rü ngexta guxǖma i ngëmaxǖgǖ ítaxuxǖwa toxǖ cuwogü rü ngëmaãcǖ yuwa toxǖ cumugü. <sup>20-21</sup>Rü ngëxguma chi cuxǖ itarüngǖmaegux rü chi nüxǖ ticuaxǖxǖgux i tomare i tupana, rü cuma rü chi nüxǖ cucuaxama. Erü cuma rü meama nüxǖ cucuax i guxǖma i ngëma bexma toõxëwa nagu tarüxînǖexǖ. <sup>22</sup>Natürü cugagu rü guxǖguma ãñcümamaxǖ i yuwa tangexmagü. Rü ngëma torü uanügü rü ñoma carnérugü i daiwa nagagüxürüxǖ tomaxâ nixîgü. <sup>23</sup>Pa Corix ítǖxcǖǖ tama ícuxuãxë? iRü nabajxâchi, rü taxú i toxǖ ícuwogǖxǖchixǖ! <sup>24</sup>¿Tǖxcǖǖ toxçaxwa íquicux? ¿Rü tǖxcǖǖ toxǖ icurüngǖma i toma nax poraãcǖ ngüxǖ tingegǖechaxǖ? <sup>25</sup>Rü ñuxma rü tipaexǖchima rü ãne tingegü. Rü waixǖmǖanegumare togǖ titügü. <sup>26</sup>¡Ëcǖ inachi rü nua naxü rü toxǖ yarüngǖxëxë! iRü taxǖ i curǖ ngechaǖmaxâ toxǖ ínanguxǖxëxë!

#### Ãëxgacǖarǖ ngîchixǖguarǖ wiyae

**45** <sup>1</sup>Rü chauãxëwa nangu i mexǖ i dexagü, rü chorǖ conǖ rü ñoma wüxi i ümatǖxürǖǖxǖ nixî. Rü ñaa chorǖ ore i chaxǖmatǖxǖ rü ãëxgacǖpexewa tá nüxǖ chixu. <sup>2</sup>Rü cumax, Pa Ãëxgacǖx, rü guxǖ i yatügüxǖ curǖmema. Rü ngëma curǖ



dexa i cuaxwa íxixúxũ rü namexechi. Rü ngẽmacax ya Tupana rü guxũguma cuxũ narũngũxẽẽ. <sup>3</sup>Pa Poracũx iẽcũ cugũcũwawa yangaxcuchi i ngẽma curũ tara! Rü ngẽma nixĩ i curũ meruxũ ixĩxũ. <sup>4</sup>Rü cumax, Pa ãËxgacũx, rü ngẽma curũ poramaxã nüxũ curüyexera i guxũma i tórũ uanũgũ rü ícunapoxũ i ngẽma ore i aixcũma ixĩxũ. Rü yĩxema duẽxẽgũ i tama tũgũ icuaxũũgũxẽ rü cuma rü tũxũ ícupoxũ. Rü yima curũ tũgũnechacũũmaxã rü taxũma i mexũgũ cuxũ. <sup>5</sup>Pa ãËxgacũx, rü ngẽma togũ i nachixũanecũãxgũ rü cuxmẽxgu nayi. Rü yima cuxnegũ rü meama nixãmagu rü ngẽma curũ uanũgũarũ maxũnewa nayarũwaxgũ. <sup>6</sup>Pa Tupanax, cuma rü guxũguma ãËxgacũ quixĩ rü aixcũma mea guxũma i duũxũgũmaxã icucuaax. <sup>7</sup>Rü cumax, Pa ãËxgacũx, rü namaxã cutaãxẽ i ngẽma mexũ ixĩxũ, natũrũ naxchi cuxai i ngẽma chixexũ. Rü yemacax nixĩ ga Tupana ga cuxũ naxunetaxũ rü cumũcũgũarũ yexera taãxẽ cuxna naxãxũ. <sup>8</sup>Rü guxũma i cuxchirugũ rü pumãra i yixichixũ i mĩra rü aroẽ rü canẽramaxã nayixema. Rü paxetarũgũ i ãtũxũxũmaxã cuxũ nataãxẽxẽẽgũ nawa ya cupata ya nuta ya mexechicũ ya marflnaxcax ixĩxũne. <sup>9</sup>Rü natanũwa i ngẽma ngexũgũ i cupatawa ngẽxmagũxũ rü nangexmagũ i to i nachixũanegũarũ ãËxgacũgũarũ paxũgũ. Rü curũ tochicaxũarũ tũgũnecũwawa ingexma i cuxmax i úiru i mexechixũmaxã ngaxãẽcũ. <sup>10</sup>iRü irũxĩnũ, Pa Chauxacũx, rü mea nangugũ i ngẽma tá cumaxã nüxũ chixuxũ! iRü nüxũ irũngũma i ngẽma cutanũxũgũ rü ngẽma curũ duũxũgũ! <sup>11</sup>Erũ nüma ya

yimã ãËxgacũ rü nüxũ cunjúchaũ. Rü nüma nixĩ i curũ cori yixĩxũ rü name nixĩ i naga cuxĩnũ. <sup>12</sup>Pa Pacũ i Tĩrucũãx, rü ngẽma duũxũgũ i curũ íanewa poraãcũ diẽruãxũchigũxũ rü mexechixũ i ãmare tá cuxna naxãgũ nax ngẽmamaxã cuxũ íyapuxẽẽgũxũcax. <sup>13</sup>Rü ñuxma rü iyaxũcu i ngẽma pacũ i meama ngaxãẽcũ. Rü ngẽma naxchiru rü úirumaxã naxãmatũ. <sup>14</sup>Rü meama ngaxãẽcũ ãËxgacũpexewa ngĩxũ nagagũ. Rü ngẽma ngĩmũcũgũ i pacũgũ rü ngĩwe yaxãxũtanũ. <sup>15</sup>Rü taãxẽãcũma iyaxĩ rü taãxẽãcũ nagu ichocu ya yima ãËxgacũpata. Rü yimã cunegũ i tá cuxũ ngẽxmagũcũ, Pa ãËxgacũx, rü nümagũ tá nixĩ i cuchicũx ãËxgacũgũ yixĩgũxũ. Rü cuma rü naxmẽxwa tá cunangexmaxẽxẽ i ñaa nachixũane nax nüma namaxã inacuaxgũxũcax. <sup>16</sup>Rü choma rü tagutãma ichayanaxoxẽxẽ i ngẽma cuẽga nax ngẽmaãcũ i guxũma i ngẽma ngexwacax i ngoetanũxũ i duũxũgũ rü nüxna nacuaaxãchixũcax. Rü guxũma i nachixũanecũãxgũ cuxũ icuaxũũgũxũcax. <sup>17</sup>Rü chomax, Pa ãËxgacũx, rü chanaxũmatũ i ñaa ore nax guxũma i ngẽma duũxũgũ i ngexwacax tá ingõetanũxũ cuxna cuaxãchixũcax rü guxũgutãma cuxũ yacuaxũũgũxũcax i guxũma i nachixũanecũãxgũ.

**Tórũ poxũruxũ ya Tupana  
rü tatanũwa nangexma**

**46** <sup>1</sup>Rü nüma ya Tupana rü tórũ poxũruxũ nixĩ rü tórũ poraxẽẽruxũ nixĩ. Rü nüma rü tũxũ narũngũxẽẽ ega guxchaxũ taxcax ínguxgux. <sup>2</sup>Rü ngẽmacax taxucaxma

tamuïe ega woo ñoma i naane rü nangĩächigu rü maḡpúnegü rü márchíütamagu nayixgu. <sup>3</sup>Rü woo naxáügachiügutama i ngẽma már rü poraäcü nayuapegu rü ngẽmaäcü ya yima maḡpúnegü rü niduxrue nagagu nax nanuxü i ngẽma már, natürü i yixema rü taxucaḡma tamuïe. <sup>4</sup>Rü wüxi i natü rü nachacüügümaxã nanataãxẽxẽxẽ ya yima Tupanaarü ñane ya Yerucharëü. Rü yima ñane rü naxüünexüchi rü yimawa nixí i nangexmaxü ya Tupana ya guxãétüwa ngẽxmacü. <sup>5</sup>Rü nüma ya Tupana rü ngẽxma naxächíü rü namaxã napora. Rü nüma rü guxüma i ngunexü i noxri yangunegu rü nüxü narüngüxẽe. <sup>6</sup>Rü ngẽma nachixüanegü rü nügümaxã nanue rü nügü naxãxünegü. Natürü ngẽxguma Tupana idexagu rü ngẽma äëxgacügü rü niduxrue rü ngẽma waixüümü rü nanangomüächiane. <sup>7</sup>Rü nüma ya Cori ya Tupana ya guxãétüwa ngẽxmacü rü tatanüwa nangexma. Rü yimá Acóbuarü Tupana nixí ya tóru poxüruxü ixícü. <sup>8</sup>iRü nua ípeyadaux i ngẽma taxü i äücümaxü i Cori ya Tupana ñoma i naanewa üxü! <sup>9</sup>Erü guxüwama i ñoma i naanewa rü marü inayanaxoxẽxẽ ga nügü nax nadäixü i duüxügü rü nüxü nayachixegüxẽxẽ ya norü würagü rü naigü ya naxnegü. Rü yima nawexügü ya daiwa namaxã naxixüne rü ínanagu. <sup>10</sup>Rü nüma ya Tupana rü ñanagürü: “Pa Nachixüanegüarü Äëxgacügüx irü choxü íperüxínüe! iRü nagu perüxínüe nax choma rü Tupana chixixü! Rü choma nixí i namaxã ichacuáxü i guxüma i nachixüanegü. Rü choma nixí

i guxüma i ñoma i naaneétüwa changexmaxü”, ñanagürü. <sup>11</sup>Rü Cori ya Tupana ya guxãétüwa ngẽxmacü rü tatanüwa nangexma. Rü nümatama nixí i Acóbuarü Tupana yixixü. Rü nüma nixí i tóru poxüruxü yixixü.

#### Tupana rü ñoma i naanearü äëxgacü nixí

**47** <sup>1</sup>Pa Guxüne ya Íanecüäxgüx ipenapépüne ya Cori ya Tupana rü taãxẽäcü naxcaḡ pewiyaegü! <sup>2</sup>Erü nüma ya Cori ya Tupana ya guxãétüwa ngẽxmacü rü naxãücüma. Rü nüma nixí i ñoma i naanearü äëxgacü yixixü. <sup>3</sup>Rü nüma rü nanadaiäcu ga íanegü rü nachixüanegü rü taxmexwa nanangexmagüxẽxẽ i norü duüxügü. <sup>4</sup>Rü nümatama nixí ga tüxü naxunetaxü nax norü duüxügü i Yudíügü ixígüxü. Rü ngẽmaäcü nanataãxẽxẽxẽ ya Acóbu ya nüma nüxü nangechaüxüchicü. <sup>5</sup>Rü nüma ya Cori ya Tupana rü dauxü naxí nax norü tochicaxüwa namaxã inacuáxücaḡ i guxüma. Rü duüxügü yoxni taãxẽäcüma nawiyaegü rü cornétamaxã nanapaxpúnegü. <sup>6</sup>iRü naxcaḡ pewiyaegü ya Cori ya Tupana! iRü naxcaḡ pewiyaegü ya yimá tóru äëxgacü! <sup>7</sup>Erü nüma ya Tupana rü ñoma i naanearü äëxgacü nixí. Rü ngẽmacax name nixí i mea nagu perüxínüeäcüma nüxü picuaxüüügüxü rü naxcaḡ pewiyaegüxü. <sup>8</sup>Rü nüma ya Tupana rü guxü i nachixüanegüarü äëxgacü nixí. Rü nüma ya Tupana rü norü tochicaxü i üünexüwa narüto. <sup>9</sup>Rü ngẽma togü i nachixüanegüarü äëxgacügü rü tamaxã nangutaquexe nax wüxigu Abraüarü Tupanaxü icuaxüüügüxücaḡ. Erü Tupanamexëwa nangexmagü i guxüma i

ãëxgacügü i ñoma i naanewa ngëxmagüxü. Rü nüma ya Tupana rü naétüwa nangexma i guxüma.

**Nomechi ya Tupanaarü ñane ya Chióüarü ma xpúnewa ngexmane**

**48** <sup>1</sup>Rü nüma ya Cori ya Tupana rü guxáétüwa nangexma rü nüxü nacuaxüchi. Rü ngëmacax name nax nüxü icuaxüügüxü nawa ya yima norü ñane ya norü ma xpúne ya üüneney ya Chióüwa ngexmane. <sup>2</sup>Nomechi ya yima ma xpúne ya Chióü i nórtewaama ngexmane. Rü yima nixí ya namaxá nataãxëgüne i guxüma i duüxügü i ñoma i naanewa maxëxü. Rü yimawa nixí i nangexmaxü i norü ñane ya yimá ãëxgacü ya guxáétüwa ngëxmacü. <sup>3</sup>Rü Yerucharéüwa ngexmane ya ãëxgacüpatagüwa nixí i nangexmaxü ya Tupana. Rü nüma ya Tupana rü nügü nangoxëxë nax yima ñanearü poxüruxü ya aixcüma mecü yixíxü. <sup>4</sup>Rü ñoma i naanecüax i nachixüanegüarü ãëxgacügü rü nügümaxá nangutaquexegü rü wüxigu yima ñanecax ínayachoxóchi. <sup>5</sup>Natürü yexguma nüxü nadaugügu rü poraäcü nabáixächíãëgü rü nibuxmü. <sup>6</sup>Rü poraäcü namuüe. Rü nanaxíxächíãëgü ñoma wüxi i nge i ixírxacüchaücürüxü. <sup>7</sup>Rü nüma ya Tupana rü wüxi ya taxüchicü ya buanecü ya éstewaama ne namuäcümaxá inanayixëxë ya yima Tárchiaciüaxgüarü wapurugü ya tóru daiwa íxüne. <sup>8</sup>Rü yima Tupanaarü ñane ya Yerucharéü rü nomechi yema tóru oxigüwa nüxü taxínüechigaxürüxü. Rü ñuxma i yixema rü ta rü

taxetümaxãxüchi nüxü tadaugü i ngëma. Rü nümatama ya Tupana ya guxáétüwa ngëxmacü rü guxügutáma yima ñanexü ínapoxü. <sup>9</sup>Pa Tupanax, rü nua cupatawa tangexmagügu rü nüxna tacaaxáchie nax ñuxäcü poraäcü toxü cungechaüxü i cumax. <sup>10</sup>Pa Tupanax, guxüwama i ñoma i naanewa rü cuxü nicuaxüxügü, erü woetama ngëmaäcü nixí i cuxna üxü. Rü ngëma curü poramaxá nixí i mea tomaxá icucuáxü. <sup>11</sup>Rü name nixí i petaãxëgüxü, Pa Yerucharéücüaxgüx rü Guxáma i Pemax i Yudáanecüaxgüx. Erü nüma ya Tupana rü aixcüma mexü pemaxá naxuegu. <sup>12</sup>iRü ëcü, nüxü ípeyachoegu ya yima ñane rü peyaxugü ya yima norü tórrégü rü ñuxre yixíxü! <sup>13</sup>iRü mea penangugü i ngëma norü poxeguxütápüxügü rü yima ãëxgacüpatagü nax pexü natauxchaxücax nax namaxá nüxü pixuchigaxü i ngëma petaagü! <sup>14</sup>Erü nüma ya Tupana rü guxügutáma tóru Tupana nixí. Rü nüma rü guxügutáma mea tamaxá inacuax.

**Tóru maxü rü tama diërumaxá naxçax tataxe**

**49** <sup>1</sup>iDücax, rü mea iperüxínüe i ñaa ore, Pa Guxüma i Duüxügü i Ñoma i Naanewa Maxëxüx! <sup>2</sup>Rü guxáma i pema i diëruaxgüxe, rü pema ya ingearü diëruaxgüxe, rü pema i duüxügümaxá icuaxgüxe, rü pema i togümexëwa ngëxmagüxe írü mea iperüxínüe i ñaa ore! <sup>3</sup>Rü ñuxmax rü tá chidexa namaxá i ore i aixcüma cuax tüxna äxü rü tá nüxü chixu i ngëma ñnü i aixcüma Tupanaarü cuaxwa ne üxü. <sup>4</sup>Rü mexü i cuaxächixëëruügügu tá charüxínü rü

árpamaxã chapaxetaxãci ore i  
 êxũguxũchiga tá chawiyae. <sup>5</sup>¿Rü  
 taxacũcax tá chamuũ i ngẽxguma  
 ínangugũgu i ngunexũgũ i áũcũmaxũ rü  
 ngẽxguma ngẽma chauxchi aiexũ i  
 duũxũgũ choxũ íchomaeguãchigu  
 namaxã i norü chixexũgũ? <sup>6</sup>Rü nümagü  
 rü norü diêruguama narüxĩnũe rü muxũ i  
 norü ngẽmaxũgũmaxã nügü  
 nicuaxũxũgũ. <sup>7</sup>Natürü taxúema tüxũ  
 natauxcha nax tügütama tamaxẽxũ  
 rüxna Tupanaaxũ tanaxütanũxũ nax  
 tüxũ namaxẽxũcax. <sup>8-9</sup>Rü taxuxũma i  
 diêru ñingu nax naxcax itaxexũcax i wüxi  
 i duũxũarü maxũ nax ngẽmaãcü nüxna  
 ínanguxuchixũcax i yu rü guxũguma  
 namaxechaxũcax. <sup>10</sup>Rü ñuxmax rü nüxũ  
 tadau nax guxũma i duũxũgũ yuexũ woo  
 i ngẽma nüxũ cuaxũchigũxũ rü nayue, rü  
 woo i ngẽma naechitamare maxẽxũ rü  
 nayue rü ngẽma norü ngẽmaxũgũ rü  
 togüçax ngẽma nawogü. <sup>11</sup>Rü ngẽma  
 diêruãxgũxũ rü nügũgu nanaxüéga i  
 ngẽma norü naane ñoma guxũgutáma  
 noxrü yixĩxũrũxũ. Natürü ngẽxguma  
 nayuxgux rü ngẽma naxmaxũ tá nixĩ i  
 napata ixĩxũ i guxũgutáma. <sup>12</sup>Rü wüxi ya  
 yatü rü tama nixĩ i namaxechaxũ ega  
 woo nadiêruãxũchigux, erü ñoma  
 naexũgürüütama nayu. <sup>13</sup>Rü ngẽmaãcü  
 nixĩ i nayuexũ i ngẽma duũxũgũ i  
 nügũgu yaxögũxũ, rü ngẽmaãcütama  
 nayue i ngẽma duũxũgũ i nügütama  
 icuaxũũgũxũ. <sup>14</sup>Rü yu nixĩ i namaxã  
 icuáxũ i ngẽma duũxũgũ erü naxmaxũwa  
 nanagagü ñoma carnêrugü igagũxũrũxũ.  
 Natürü ngẽma ngunexũ i nagu yuwa  
 ínadagũxũgu i duũxũgũ rü ngẽma mea  
 maxẽxũ rü tá ngẽma chixri maxẽxũmaxã  
 inacuaxgü. Erü ngẽma chixri maxẽxũ i

duũxũgũ rü ngẽma nügü namaxã  
 yacuaxũũgũxũ, rü ngẽxma tá nayacuax i  
 ngẽxguma nayuegu, erü taxucürüwa  
 nayana i norü ngẽmaxũgũ. <sup>15</sup>Natürü  
 nüma ya Tupana tá nixĩ i yuwa choxũ  
 ínanguxuchixẽxũ, erü nügũxütawa tá  
 choxũ naga. <sup>16</sup>iRü taxú i naxcax  
 quixaçxãchixũ ega texé muarü diêruãxgu  
 rü yamuxgu i norü meruũgü i napatawa!  
<sup>17</sup>Erü ngẽxguma nayuxgux rü  
 taxucürüwatáma taxacü ninge. Rü woo i  
 ngẽma norü meruũgü rü taxütáma  
 naxmaxũwa namaxã naxü. <sup>18-19</sup>Rü woo  
 ñuxma nax maxũgux rü nataãxẽ, rü  
 duũxũgũ rü nüxũ nicuaxũxũgũ naxcax i  
 norü ngẽmaxũgũ, natürü wüxi i  
 ngunexũgu rü tá nayu rü marü tagutáma  
 ñomaarü ngóonexũxũ nadau. <sup>20</sup>Rü wüxi i  
 duũxũ rü tama namaxecha ega woo  
 namuarü ngẽmaxũãxgux, rü nayuama  
 ñoma naexũgürüütama.

**Tupana tá nixĩ ya nüxna çaxcü i ngẽma  
 mea maxẽxũ rü ngẽma chixri maxẽxũ**

**50** <sup>1</sup>Rü nüma ya Cori ya Tupana ya  
 guxãétüwa ngẽxmacü rü nidexa  
 rü naxcax nangema i guxũma i duũxũgü  
 i ñoma i naanewa ngẽxmagũxũ. <sup>2</sup>Rü  
 nüma ya Tupana rü yima mexechine ya  
 napata ya Chióüwa ngexmanewa norü  
 üünemaxã nanangóonexẽxẽ. <sup>3</sup>Rü nüma  
 ya tórü Tupana rü nua naxü. Natürü  
 tama bexma ínangu erü napexewa  
 nangexma i wüxi i üxüema i tüxũ iguxũ,  
 rü nacüwawa nangexma ya buanecü ya  
 tacü. <sup>4</sup>Rü daxüwa rü Tupana naxcax  
 nangema i ngẽma dauxcüçax rü ñoma i  
 naaneciãx nax inadaunüxcãçax i  
 ngẽxguma norü duũxũgü i Iraécüãxgũxũ  
 yacagüx. <sup>5</sup>Rü ñanagürü nüxũ:

“iPenangutaqexexēxē i ngēma duūxūgū i norū āmaregū i chauxcax yaguxūmaxā chomaxā ixunetagūxū nax aixcūma chauga naxīnūexū!” ñanagürü. <sup>6</sup>Rü ngēma daxūcüāxgū rü nüxū nixugū nax nüma ya Tupana rü āēxgacū ya aixcūma mecūmacū nax yixūxū erü meama norü duūxūgūmaxā inacuax. <sup>7</sup>Rü nüma ya Tupana rü ñanagürü: “Pa Chorü Duūxūgū i Iraétanūxūgūx irü iperūxīnūe! Rü ñuxma rü tá pemaxā chanangoxēxē i ngēma perü chixexū. Rü dücax, chaxicatama nixī i Tupana chixīxū. Rü chomatama nixī i perü Tupana chixīxū. <sup>8</sup>Rü ñuxma rü tama pexū chapoxcu naxcax i ngēma āmaregū i guxūguma chauxcax pedajūxū rü chauxcax ípeguxū. <sup>9</sup>Rü tama pexna naxcax chaca i ngēma wocaxacū i yatūxū rü carnéruxacū i yatūxū i perü naxpūücüāx ixīxū. <sup>10</sup>Erü choxrügü nixī i guxūma i naexūgü i naixnecücüāx ixīgūxū, rü ngēxgumarūxū ta i ngēma wocagü i máxpūxanexūwa ngēxmagūxū. <sup>11</sup>Rü choxrügü nixī i ngēma werigü i máxpūxanecücüāxgū, rü guxūma i ngēma ñoma i naanewa aexū rü naxūanexū. <sup>12</sup>Rü ngēxguma chi chataiyaxgu i choma rü taxūchima pemaxā nüxū chixu erü choxrü nixī i ñoma i naane namaxā i guxūma i taxacū i nawa ngēxmagūxū. <sup>13</sup>¿Ēxna pema nüxū pecuaxgu rü wocamachimaxā chaxāwemūxū rü namaxā chaxaxexūáxū ya yimá nagü i wocaxacū i yatūxū? <sup>14</sup>Rü ngēma āmare i chanaxwaxexū nixī nax moxē choxna pexāxū rü aixcūma peyanguxēxū i ngēma perü uneta. <sup>15</sup>iRü chauxcax peca ega ngēxguma guxchaxū pexū ngupetūxgux! Rü choma rü tá pexū íchapoxū rü pema rü tá choxū

picuaxūxūgū”, ñanagürü ya Tupana. <sup>16-17</sup>Natürü ngēma chixexū ügūxū rü Tupana rü ñanagürü nüxū: “¿Taxacūwa i cuxū namexū nax nüxū cucuaxmarexū i ngēma chorü mugü rü nüxū quixumarexū i ngēma chorü uneta, natürü tama namaxā cutaāxēgu i ngēxguma cuxū chaxucuxēgu rü tama nüxū cucuaxchaūgu i ngēma chorü ore? <sup>18</sup>Natürü taāxēacū cunayaxu i ngēma ngítaaxgūxū rü namaxā cuxāmücü i ngēma duūxūgü i naxmaxechita nai i ngemaxā maxēxū. <sup>19</sup>Rü ngēxguma quidexaxgu rü chixexū i dexa ícuxuxūxēxē, rü curü conü rü doraxū nixu. <sup>20</sup>Rü ngēxguma ícurütōxgu, rü chixri nachiga quidexa ya cuenexē. Rü yimá cuenexēxūchi rü namaxā cuguxchiga. <sup>21</sup>Rü guxūma i ngēma nixī i ngēma cuxūxū, rü choma rü ngēma changeaxmare. Rü cuma nagu curūxīnūgu rü marü nüxū icharūngūma i ngēma cuxūxū. Natürü i ñuxma rü tá cupexewa chanangoxēxē i ngēma chixexū icuxūxū rü tá naxcax cuxna chaca. <sup>22</sup>iDücax i pemax nax choxū iperūngūmaexū! iRü chauxcax pewoegu naxūpa nax pexū chadajūxū rü taxúema pexū ípoxūxū! <sup>23</sup>Rü choxū ticuaxūxū ya yixema moxē choxna āxē. Rü choma rü tūxū chamaxēxē ya yixema aixcūma chauga īnūxe”, ñanagürü ya Tupana.

**Yumüxē nax Tupana pecádūxū  
rūngūmaxūcax**

**51** <sup>1</sup>Pa Tupana ya Choxū Ngechaūwaxecü rü Mecūmacūx icuxū changechaxūtümūxū! iRü curü ngechaūgagu rü choxū nüxū irūngūma i chorü pecádugü! <sup>2</sup>iRü choxū nayaxu i

ñaa chorü ãñächixü! iRü choxü nüxü irüngüma i chorü pecádugü! <sup>3</sup>Rü chomatama chaugü íchicuax nax aixcüma wüxi i ãne yixü i ngëma chaxüxü. Rü ngëma chorü pecádugagu rü ngunecü rü chütacü rü choxü nachixeãxëecha. <sup>4</sup>Rü cupexewatama nixi i chanaxüxü i ngëma taxü i chixexü i nagagu choxü cupoxcuxü. Rü ngëmacax i ngëma poxcu i chomaxã cuxueguxü rü aixcüma name rü taxucürüwa texé nüxü tixu nax chixri choxü cungugüxü. <sup>5</sup>Rü aixcüma nixi nax wüxi i chixexü chixüxü ga noxritama chabuxgu rü woetama pecáduwa chayaxixüchi ga chauéanuwa. <sup>6</sup>Cuma rü aixcüma nüxü cungechaü i ngëma duüxü i aixcüma cumaxã nüxü ixuxü i norü pecádugü. Rü ngëmacax chanaxwaxe i choxna cunaxã i cuax nax aixcümaxü cumaxã chixuxüçax. <sup>7</sup>iRü ecü ngëma maxcuruümaxã choxü namaxcuxüne nax iyanaxoxüçax i chorü chixexü! Rü ngëmaacü wena cupexewa tá chame rü ngëma caixanexü i cómixüarü yexera tá nacómixü i chorü maxü. <sup>8</sup>Rü woo choxü nax cupoxcuchiréxü naxçax i chorü chixexü, natürü i ñuxma rü chanaxwaxe i wena chauxçax cunataéguxëxë i chorü taãxë. <sup>9</sup>iRü ecü choxü nüxü irüngüma i chorü pecádugü rü taxü i nüxü cudawenüxü! <sup>10</sup>Pa Tupanax iñü i mexü chauãewa nanguxëxë! iRü choxna naxã i wüxi i naãxë i ngexwacaxüxü i cumaxã ixaixcümaxü! <sup>11</sup>iRü taxü i choxü cuxoxü! iRü taxü i choxna cuyaxügachixëxëxü i Cuãxë i Üünexü! <sup>12-13</sup>iEcü wena chauxçax natáéguxëxë i ngëma taãxë ga noxri choxü yexmaxü nagagu nax choxü cumaxëxü! iRü choxü naporaxëxë nax

ñuxmawena rü aixcüma cuga chaxñüxüçax rü ngëmaacü chanangüxëxëçax i ngëma chauxrüxü pecádu ügüxü nax nümagü rü ta nüxü naxoxüçax i norü chixexü rü cuxçax nawoeguxüçax! <sup>14</sup>Pa Tupana ya Chorü Maxëeruxüxü ichoxü ínanguxuchixëxë nawa i ngëma nax chamáwxaxexü! Rü wiyaeacü tá nüxü chixu nax cuma rü aixcümacü quixüxü. <sup>15</sup>Pa Corix iëcü choxü ichoxëxë nax cuxçax chawiyaxüçax rü ngëmaacü cuxü chicuaxüxüçax! <sup>16</sup>Erü cuma rü tama cunaxwaxe nax taxacürü ãmare cuxçax iguxü. Rü choma rü chi cuxna chanaxã, natürü tama ngëma nixi i namaxã cutaãxëxü. <sup>17</sup>Rü ngëma cuma cunaxwaxexü, Pa Tupanax, nixi i wüxi i duüxü i aixcüma norü maxüwa nüxü rüxoxü i chixexü. Rü cumax, Pa Tupanax, rü tama nüxü cuxo i ngëma duüxü i nügümaxã nangechaüacüma cumaxã nügü ixuxü nax nachixexü. <sup>18</sup>Pa Cori Pa Tupanax icuxü nangechaxütümüxü ya yima cupata ya Chióüwa ngexmane erü nüxü cungechaü! iRü curü duüxügüxü rüngüxëxë rü ínapoxü ya Yerucharéü! <sup>19</sup>Rü ngëxguma marü cupexewa chamexgux, rü ngëxguma rü tá choxü cunayaxu i ngëma ãmargü i wocagü i tá cuxçax chadaixü rü íchaguxü. Rü ñuxüchi i duüxügü rü tá curü ãmarearü guchicaxüwa cuxçax nayagugü i wocaxacügü.

**Natüçaxma nügü nicuaxüxü i ngëma duüxü i chixri maxüxü**

**52** <sup>1</sup>Pa Yatü i Poraxüx *ztüxcüü* cugü quicuaxüxü namaxã i ngëma chixexü i cuxüxü napexewa i

ngêma Tupanaarü duïxügü i nûma guxüguma nüxü nangechaxüxü? <sup>2</sup>Rü cuma rü chixexüarü üguxicatama curüxînü. Rü yima curü conü rü naxâücüma ñoma wüxi i cüchi i texechixürüxü. <sup>3</sup>Rü cuma rü chixexüguama curüxînü. Rü ngêma mexüarü yexera cunaxwaxe i ngêma chixexü. Rü ngêma ore i aixcüma ixixüarü yexera curü me nixî i ngêma dora. <sup>4</sup>Rü curü me nixî nax curü conümaxá toxguäxü quixuxü rü curü me nixî nax nüxü quixuxü i doramare i toxguäxchiga ixixü. <sup>5</sup>Natürü nûma ya Tupana rü ngêmacax tá cuxü napoxcu, rü tagutáma ngêmawa ícunguxuchi. Rü tá cupatawa cuxü ínataxüchi, rü tá cuxna nanayaxu i curü maxü. <sup>6</sup>Rü ngêma duïxügü i Tupanaga ñnüexü rü ngëxguma nüxü nadaugügu i ngêma, rü tá poraäcü namuüe. Rü tá cuxü nacugüe rü ñanagürügü tá: <sup>7</sup>“¡Dücax, nüxü pedäx i ngêma duïxü i tama Tupanaga ñnüchaüxü rü ngêma norü ngêmaxügügu yaxöxü rü chixexüguama maxüxü!” ñanagürügü tá. <sup>8</sup>Natürü i choma rü ñoma wüxi i nanetü i orübu i bacaxü i Tupanapataxütügu toxürüxü chixî. Rü ngêmacax guxügutáma norü ngechaxügu chayaxö. <sup>9</sup>Pa Tupanax, choma rü guxügutáma moxë cuxna chaxá naxçax i ngêma cuxüxü. Rü napexewa i ngêma aixcüma cuga ñnüexü rü tá mea cuxü íchananguxëxë, erü chomaxá cumecüma.

#### Duïxügüarü chixexüchiga

**53** <sup>1</sup>Rü ngêma duïxügü i naechita maxëmarexü rü ñanagürügü: “Nataxuma ya Tupana”, ñanagürügü.

Rü guxüma i duïxügü rü chixexügu narüxînüe rü chixexü naxügü. Rü tataxuma ya texé ya mexü üxe. <sup>2</sup>Rü nûma ya Tupana rü daxüwa duïxügüxü nadawenü nax nüxü nacuáxüçax rü tayíxema ya aixcüma tümaäexü cuáxe rü naga ñnüxe rü naxçax dauxe. <sup>3</sup>Natürü guxüma i duïxügü rü Tupanana nixîgachitanü rü guxüma chixexügu narüxînüe. Rü marü tataxuma ya texé ya mexü üxe, rü bai ya wüxie. <sup>4</sup>Rü ngêma chixexü ügüxü rü nangeäxëgümare rü paxama nanachixexëxë i chorü duïxügü. Rü ngêma duïxügü i tama Tupanaga ñnüexü rü chorü duïxügüxü inarüxoxëëgü ñoma paü ingöxgu rü iyanaxoxëëxürüxü. Rü ngêmaäcü nixîgü i ngêma duïxügü i tama Tupanaxü cuaxgüxü. <sup>5</sup>Rü woo i ñüxma rü taxuxüma namuüe i nûmagü, natürü wüxi i ngunexü rü tá muümaxá nidüxrue. Erü nûma ya Tupana rü norü uanügüchinaxámaxá nanawoone. Rü ngêmaäcü tá wüxi i cugüxü nixîgü erü nûma ya Tupana rü marü nüxü naxo. <sup>6</sup>Chierü yima maxpüne ya Chióüwa ne naxüxgu i Iraétanüxügüarü maxëxëerüxü. Rü ngëxguma nûmatama ya Tupana nügüçax nawoeguxëëgü i ngêma norü duïxügü rü ngëxguma tá nixî i nawoeguxü i guxüma i chautanüxü i Iraéanecüäxgü i Acóbutaagü ixîgüxü.

#### Törü yumüxëwa Tupanaarü ngüxëçax itaçax

**54** <sup>1</sup>Pa Tupanax icumatama choxü ínanguxuchixëxë! <sup>1</sup>Rü choxü ínapoxü namaxá i curü pora! <sup>2</sup>Pa

Tupanax ichoxũ nüxũ naxĩnũ i chorũ yumüxẽ rü êcü irixĩnũ i chorũ dexa!  
 3Erü ngẽma duũxũgũ i nügũ írütágũxũ rü máxwaxegũxũ rü chauxchi naxaie rü choxũ nimaxgũchaũ. Rü ngẽmagũ rü tama cuxũ namuũ, Pa Tupanax. 4Natürü i cumax, Pa Cori Pa Tupanax, rü choxũ curüngũxẽ rü choxũ cumaxẽxẽ. 5Rü cumax, Pa Tupanax, rü tá ngẽma chorũ uanüügüçax cunatáegüxẽ i ngẽma norü chixexũgũ. iRü êcü nadai, Pa Corix! Erü cuma rü quixaixcũma. 6Rü choma rü chorũ ngũchaũmaxã tá cuxna chanaxã i chorũ ãmare i cuxçax chiguxũ. Rü tá cuxũ chicuaxũxũ erü cuma rü chomaxã cumecũmaxũchi. 7Erü choxũ ícunguxuchixẽxẽ nawa i guxũma i chorũ guxchaxũgũ rü nüxũ chadau i ngẽma chorũ uanüügũxũ nax curüporamaexũ.

**Wüxi ya yatü ya nawe  
yangẽxũtanüciarü yumüxẽ**

**55** 1Pa chorũ Tupanax inüxũ naxĩnũ i chorũ yumüxẽ rü taxũ i cugũ iquicũxũ naxchaxwa i ngẽma cuxna naxçax chacaxũ! 2iRü chauga naxĩnũ erü ngũxũ chingeyane cuxna chaca! 3Rü ngẽma naga i chorũ uanügũ i chixexũgũ rü choxũ niduxruxẽxẽ. Rü poraãcü choxũ nanaxixachiãẽxẽgũ rü nuãcũma chauxçax nibuxmũ. 4Rü chiyuxnearü maxũneax erü poraãcü chamuũ nüxũ i ngẽma yu i choxna nguxũ. 5Rü poraãcüxüchi muũ choxna nangu rü ngẽmacax ngẽma muũmaxã chiduxrux. 6Rü ngẽmacax ñachagürü: “Chierü ñoma muxtucurũxũ chaxãpxexátügu rü ngẽxguma rü chi chigoe nax naxchaxwa chiñaxũçax rü ngexta charüngũxũçax. 7-8Rü yáxũguxũ i

chianexũwa chi chaña rü ngẽxma chi charũxãũx, rü paxa chi chañaãchi nax chaugũ ichayarüçũxũçax naxchaxwa i ngẽma guxchaxũgũ i ñoma buanecü ya poraxüchicürũxũ chauxçax ngẽma ne üemaxũ”, ñachagürü. 9Pa Corix inadai i ngẽma chomaxã rüxuanügũxũ! iRü noxrütama dexagu ínatüexẽxẽ! Erü ngẽma nüxũ chadauxũ nixĩ nax nügũ nadaxũ rü yapuraexũ. 10Rü chütacü rü ngunecü rü ñanexũ ínayachoegu, rü ngẽmaãcü norü chixexũmaxã nayapaxẽxẽ ya yima ñane. Rü ngẽmacax rü duũxũgũ rü ãẽxgacũmaxã nanue rü ãẽxgacũaxũ nanaxũtanü nax tama napoxcuxũçax ega woo taxacürü chixexũ naxüegu. 11Rü yima ñanearü ítamügu rü namaxã nanapá i máetagũxũ rü dorataaxgũxũ. 12Rü ngẽxguma wüxi i chorũ uanü chomaxã nuxgu, rü choma rü chi yaxna namaxã chaxĩnũ. Rü ngẽxguma chi ngẽma chauxchi aiexũ choxũ imáxchaũgu, rü choma rü chi naxchaxwa ichicux. 13-14Natürü cumatama, Pa Chomüçüchichirẽx Ixixex, nixĩ i cuchauechitaexũ woo wüxigu Tupanapatawa nax ixĩxũchirẽxũ nax yigü ingechaũgũãcũma yigũmaxã idexagũxũ natanüwa ga yema muxũma ga duũxũgũ. 15iRü ngẽma chorũ uanügũ rü noxtacũma yu naxçax íngu rü maxũãcü naxmaxũgu nayicu! Erü ngẽma norü chixexũ rü nanachixexẽxũchi i norü maxũ. 16Natürü i choma rü Tupanana chacaama rü nüma ya Cori rü tá choxũ ínapoxũ. 17Rü exũwa rü tocuchigu rü chütacü rü Tupanaxũ chacaxũ rü nüma rü tá choxũ naxĩnũ rü tá choxũ



nangãxúga. <sup>18</sup>Rü ngëxguma chorü uanügümaxã togü tadajıxgux rü nüma ya Tupana rü tá choxü narüporamaexëxë nax tama choxü yamãxgüxcax woo namuxüchigu i ngëma chorü uanügü. <sup>19</sup>Rü nüma ya Tupana ya guxüguma äëxgacü ixıcü rü tá choxü naxınü rü ngëmaäcü tá nayaxãneächitanüxëxë i ngëma chomaxã rüxuanügüxü. Erü nümagü rü tama nüxü narüxoechaü i nacümagü i chixexü rü tama Tupanaga naxınüechaü. <sup>20</sup>Rü tüxü nimãxgüama ya yıxema namücüchirex ixıxe. Rü ngëmaäcü tama aixcüma nayanguxëxë i ngëma uneta i namücümaxã nüxü yaxuxü. <sup>21</sup>Rü ngëxguma yadexagügu rü namexechi i norü dexa, natürü i norü ñnuwa rü daigu narüxınüe. Rü mexechixü i dexamaxã nidexagüchirex nax ngëmaäcü tüxü ñnayapuxëxë, natürü ngëma dexagü rü ñoma taragü i meama téxürüxü nixıgü. <sup>22</sup>Natürü i cumax, Pa Chomücüx irü Cori ya Tupanamëxëwa nangex i curü guxchaxügü! Rü nüma rü tá cuxü naporaxëxë. Rü tagutáma chixexügu nananguxëxë ya yimá yatü ya naga ñnücü. <sup>23</sup>Pa Chorü Tupanax, rü ngëma máetagüxü rü idorataãxgüxü rü taxütáma ngãxü i norü maxüwa nangugü nax namaxëxü. Rü cuma rü yumaxã tá cunapoxcue. Natürü i choma rü cugu chayaxõ.

**Tupanagu chayaxõ rü  
norü oremaxã chataãxë**

**56** <sup>1</sup>Pa Chorü Tupanax icuxü changechaxütümüxü! Erü guxüguma nangexma i duüxügü i chowe ingëxütanüxü rü chaıxcax íyaxüächixü

rü choxü naxıxãchiãëgüxëxü. <sup>2</sup>Rü ngëma chomaxã rüxuanügüxü rü guxü i ngunexügügu rü chowe ningëxütanü. Rü namu i ngëma nügü rütagüxü rü chaıxcax íyaxüächixü. <sup>3</sup>Rü ngëxguma chamuügu rü cugu chayaxõ. <sup>4</sup>Rü choma rü Tupanagu chayaxõ rü norü oremaxã chataãxë. Rü ngëma nax nagu chayaxõxügü rü taxucaxma chamuü. <sup>5</sup>Rü taxacürü chixexü tá chomaxã naxügüxü i ngëma chomaxã rüxuanüãxgüxü? <sup>6</sup>Rü ngëma chomaxã rüxuanüãxgüxü, rü guxüma i oragu rü norü dexamaxã ngüxü choxü ningexëëgü. Rü ngëma nax chixexügu choxü nanguxëëgüxüxıcatama nıxı i nagu naxınüexü. <sup>7</sup>Rü ngexta íchaxüxüwa rü chowe ningëxütanü rü nuxica choxü ñnicıxéxügü. Rü ngëmaäcü naxcax nadaugü nax choxü yamãxgüxü. <sup>8</sup>Rü nüma nagu naxınüegu rü tagutáma texé nüxü tacuaxama i ngëma chixexü i naxügüxü. Pa Chorü Tupanax inaéttügu nanguxëxë i curü nu, rü curü poxcumaxã yaxãneeächitanüxëxë i ngëma duüxügü! <sup>9</sup>Rü cuma rü meama nüxü cucuax i ñuxrexpüxcüna naxchaxwa chiña. Rü cuma rü nuxü cudadu i ñuxrexpüxcüna ngüxü chingexü rü chaxaxuxü. Rü cuma rü curü poperagu cunaxümatü i guxüma i ngëma chorü guxchaxügü. <sup>10</sup>Rü ngëma chomaxã rüxuanüãxgüxü rü tá cuxchaxwa nibuxmü i ngëxguma curü ngüxëëcax cuxna chacaxgu. Pa Tupanax, choma rü meama nüxü chacuax nax chauétüwa cuchogüxü. <sup>11</sup>Rü choma rü Tupanagu chayaxõ, rü norü oremaxã chataãxë. Rü Corıgu chayaxõ rü norü oremaxã chataãxë. <sup>12</sup>Rü Tupanagu

chayaxō rü taxucaxma chamuũ. ¿Rü taxacirü chixexũ tá chomaxã naxixũ i ngẽma chomaxã rüxuanüãxũ? <sup>12</sup>Pa Tupanax, cuyũ chicuaxüxüãcũma tá chayanguxëxë i ngẽma chorü uneta i cumaxã nüxũ chixuxũ. <sup>13</sup>Erü cuma rü yuwa choxũ ícunguxuchixëxë rü choxũ ícupoxũ nax tama chayuxüçax rü ngẽmaãcü cupexewa chamaxüxüçax.

**Yumüxë i nawa Tupanaarü  
ngüxëççax íçaxaxũ**

**57** <sup>1</sup>iCuxũ changechaxütümüxũ, Pa Chorü Tupanax, cuyũ changechaxütümüxũ! Erü cuxçax chiña nax choxũ ícupoxüxüçax. Rü cupexátütüügu chaugü chicúxchaũ ñuxmatáta nangupetü i ngẽma ãücũmaxũ. <sup>2</sup>Rü ñuxma rü tá nüxna chaca ya yimá Tupana ya guxãétüwa ngẽxmacü, erü nüma rü guxüwama choxũ narüngüxëë. <sup>3</sup>Rü nüma rü nixaixcũma rü poraãcü choxũ nangechaũ. Rü ngẽmacax dauxüwa tá çauxçax ne nanamu i norü ngüxëë nax naxmexwa choxũ ínanguxuchixëëxüçax i ngẽma nuãcüma chowe ingëxütanüxũ. <sup>4</sup>Rü ngëxguma chapexgu rü ñoma aitanüwa chapexürüxũ chixĩ erü ãücũmaxüwa nangexma i chorü maxũ. Rü ngẽma chomaxã rüxuanüãxgüxũ rü napüta rü ñoma naxnegü i ãmaguxürüxũ nixĩ rü norü conü rü ñoma tara i meama waixmaguxürüxũ nixĩ. <sup>5</sup>Pa Chorü Tupanax, cuma rü daxüguxũ i naanemaxã icucuax rü curü üüne rü ñoma i naane namaxã nanapá. <sup>6</sup>Ngẽma chomaxã rüxuanüãxgüxũ rü çauxçax nanaxügü i wüxi i yauxruxũ nax ngẽmagu changuxüçax. Rü

chomaxüwa nanaxügü i ãxmaxũ, natürü nümatama nagu nayi. <sup>7</sup>Pa Chorü Tupanax, ñuxma rü chataãxë rü íchame nax chorü wiyamaxã cuyũ chicuaxüxüxũ. <sup>8</sup>Rü paçmama tá ícharüda rü chorü paxetaruügümaxã tá chapaxeta. Rü ngẽmaãcü tá naxçax ícharüda i ngẽma ngexwacaxũ i ngunexũ. <sup>9</sup>Pa Cori Pa Tupanax, rü chorü wiyægümaxã tá cuyũ chicuaxüxü napexewa i guxüma i nachixüanecüãx i duüxügü. <sup>10</sup>Erü ngẽma curü ngechaũ rü daxüguxũ i naanearü yexerawa nangu. Rü ngëxgumarüxũ ta i curü aixcüma rü yauxtüweanexüarü yexerawa nangu. <sup>11</sup>Pa Chorü Tupanax, cuma rü daxüguxũ i naanemaxã icucuax rü curü üüne rü ñoma i naane namaxã nanapá.

**Tupanana naxçax naca nax ãëxgacügü  
mea duüxügümaxã inacuaxgüxüçax**

**58** <sup>1</sup>Rü pexna chaca, Pa ãëxgacügüx çrü pexçax marü meama nüxna pecaxũ i ngẽma duüxügü i chixexũ ügüxü? ¿Rü pexçax rü marü aixcüma nawexgux i ngẽma poxcu i namaxã pexueguxũ? <sup>2</sup>Rü tama ngẽmaãcü nixĩ. Erü ngëxguma texé tũmaarü guxchaxũ pepexewa mexëëchaũgux rü tama tüxü íperüxínüe, natürü naga pexínüe i ngẽma doramare pemaxã ixuxũ erü pexü nanaxütanü. Rü ngẽmacax pegümaxã penanüexëxë i duüxügü i pechixüanewa. <sup>3</sup>Rü ngẽma chixri maxëxü i duüxügü rü woetama naéanüwa nixĩ i chixexũ nüxna nguxũ. Rü ngẽma idorataxáxü rü woetama taxüta nabuxgu rü ngẽma dora namaxã inacuax. <sup>4-5</sup>Rü norü dexe rü ñoma äxtapeguchatarüxü tüxü nimax. Rü

nacüma rü ñoma ãxtape i düraxüchixü i tama norü puxëëruüiarü paxetaga ñnuchaüxürüxü nixí. <sup>6</sup>Pa Tupanax irü napoxüpüta i ngëma chixexü ügüxü! iRü nabüü ya yima norü cuainagü i ngëma duüxügü i aigürüxü idüraexü! <sup>7</sup>iRü noxtacüma yanaxoxëxë ñoma wüxi i dexá i yachexürüxü! iRü nüxna nayaxu i norü maxü ñoma wüxi ya maxë ya namawa yadaxüchicürüxü! <sup>8</sup>iRü ñoma wüxi i meru i yarüxoxürüxü rü ñoma wüxi i buxü i naéanügu yuxü rü taguma ngóonexüxü dauxürüxü yaxixëxë! <sup>9</sup>Rü name nixí nax nayuxü ñoma chuchuxügü i paxa ixaxürüxü. Rü name nixí nax curü numaxá cunadajüxü ñoma maxë i ibéxürüxü. <sup>10</sup>Rü ngëma duüxügü i aixcüma Tupanaga ñnüexü rü tá nataãxëgü i ngëxguma nüxü nadaugügu nax napoxcuexü i ngëma chixexü ügüxü. Rü nümagü i ngëma mea maxëxü rü ngëma chixexü ügüxügüwa tá nangagü. <sup>11</sup>Rü ñuxüchi ngëma aixcüma Tupanaarü duüxügü ixigüxü rü ñanagürügü tá: “Aixcüma nangexma i natanü i mexü ega mea Tupanapexewa imaxëgu. Rü nüma ya Tupana rü aixcüma nanapoxcue i ngëma chixexü ügüxü”, ñanagürügü tá.

Nüma ya Cori ya Tupana nixí ya tóru  
poxürüxü ixícü

**59** <sup>1</sup>Pa chorü Tupanax ichoxü ñanguxuchixëxë naxmexwa i ngëma chomaxá rüxuanüãxgüxü! iRü nüxna choxü ñnapoxü i ngëma chauxcax íyaxüãchixü! <sup>2</sup>iRü nüxna choxü ñanguxuchixëxë i ngëma duüxügü i chixexü ügüxü! iRü choxü ñnapoxü nüxna i ngëma máetagüxü! <sup>3</sup>Erü

nangexma i yatügü i máxwaxegüxü i naxcax daugüxü nax ñxácü choxü yamãxgüxü. <sup>4</sup>Pa Cori Pa Tupanax, taguma ñuxgu cumaxá chanu rü chixri cuga chaxínü rüexna cupexewa pecádu chaxü. Rü taxuxüma i chixexü chaxü. Natürü ngëma chorü uanügü rü nañuxãëgü nax chauxcax íyaxüãchixü. iRü paxa nua naxü, rü choxü yarüngüxëxë! <sup>5</sup>Pa Cori ya Guxãétüwa Ngëxmacü ya Torü Tupana Ixícü irü paxa napoxcue i ngëma tama cuxü yaxögüxü! Rü tama chanaxwaxe i cuxü nangechaütümüxügü i ngëma chixexü ügüxü rü taechitawaxegüxü. <sup>6</sup>Nümagü rü chütacü nanaxíane rü ñanemaxügüwa naxãügatanü ñoma airgü i nügü dajüxürüxü. <sup>7</sup>Rü chixexü i dexamaxá nanacaetanüane rü cumaxá naguchigagü rü ñanagürügü: “Rü nataxuma i taxacü i tüxü ñnüxü” ñanagürügü. <sup>8</sup>Natürü i cumax, Pa Corix, rü nüxü cuxínü rü nüxü cucugü rü cunaxãneexëxë i ngëma duüxügü i tama cuxü yaxögüxü. <sup>9</sup>Rü cumax, Pa Chorü Tupanax, tá nixí i choxna cudauxü erü cuma nixí i chorü poxürüxü rü chorü dauruxü quixixü. <sup>10</sup>Rü nüma ya Tupana ya choxü ngechaücü rü tá choxü ñayadau. Rü tá choxü nüxü nadauxëxë nax ñxácü nüxü naporamaexü i ngëma chomaxá rüxuanüãxgüxü. <sup>11</sup>iRü taxü i noxtacüma cunadajüxü natürü curü poramaxá namaxá nawoone rü naxãneexëxë nax ngëmaãcü i chautanüxügü tama paxa nüxü iyanangümaexücax i curü poxcu! Erü cumax, Pa Corix, rü torü dauruxü quixí. <sup>12</sup>Rü ngëma duüxügü i chixexü rü guxüma i norü dexawa nidora. iRü ngëma nügü nax yacuauxüügagu rü nax

inaxunetaxetaxũgagu rü napoxcu! <sup>13</sup>iRü curü numaxã yanaxoxẽxẽ i ngẽma duũxũgũ! iRü noxtacũma nayuexẽxẽ nax ngẽmaãcü nüxũ nacuaxgũxũcax i duũxũgũ nax cuma aixcũma Iraétanũwa rü guxũ i ñoma i naanewa ãẽxgacü quixĩxũ! <sup>14-15</sup>Rü ngẽma duũxũgũ i chixexũ rü ngẽxguma chütacü ñoma airugũrũxũ naxãũgatanü rü ñanegu ñayachoegu nax nawemũcax nadaugũxũcax, rü tá naxauxe erü tama nüxũ inguxũ i nawemũxũ i inayangaugũ. <sup>16</sup>Natürü i chomax rü paxmama tá cuxçax chawiyae. Rü ngẽma chorü wiyae wa rü tá nüxũ chixu nax cuporaxũ rü cuxũ tangechaũtũmũxũgũxũ. Erü cuma rü chorü dauruxũ quixĩ rü cuxũtagu nixĩ i chaugũ charücúxũ i ngẽxguma ãñcũmaxũwa changexmagu. <sup>17</sup>Rü ngẽmaãcü tá cuxçax chawiyae, Pa Tupanax, erü cuma nixĩ i chorü poxũrũxũ quixĩxũ rü cuma nixĩ i choxna cudauxũ. Rü aixcũma cuma nixĩ i chorü Tupana i choxũ cungechaxũxũ.

**Yumũxẽ i nawa Tupanaarü  
ngũxẽẽcax ícaxaxũ**

**60** <sup>1</sup>Pa Tupanax, cuma rü curü numaxã toxna quixũgachi rü toxũ cuwoone. Rü tanaxwaxe i wenaxarü toxçax cutáegu nax noxrĩrũxũ taporaexũcax. <sup>2</sup>Cuma rü cunaxĩaxãchixẽxẽ ga ñaa naane rü yemaçax inangũxcuane. iRü êcü nügũna naxĩxẽxẽ i ngẽma norü ngũcuane nax tama nabuxũcax! <sup>3</sup>Rü cuma rü taxũ i guxchaxũgũ toxçax ícunguxẽxẽ. Rü ñoma wũxi ya bínu ya toxũ ãũxãẽxẽẽcürũxũ toxũ nixĩgũxẽxẽ i ngẽma guxchaxũgũ. <sup>4</sup>Rü ñuxma i toma nax cuga taxĩnüexũ rü

tanaxwaxe i wũxi i cuaxruxũ toxna cuxã nax ngẽmaãcü nüxna toxũ ícupoxũxũcax ya yima naxne i ngẽma torü uanũgũ. <sup>5</sup>iRü toxũ nangãxũ rü curü poramaxã toxũ ñanguxũxẽxẽ i toma nax toxũ cungechaũgũxũ! <sup>6</sup>Rü cumax, Pa Tupanax, rü cupatawa quidexa rü ñacurũgũ: “Guxũma i ngẽma naane i oéstewaama Chiquéũwa ixũgũxũ rü ñuxmata éstewaama Sucóxaru ngatexũwa ngxũ rü choxrü nixĩ. <sup>7</sup>Rü ngẽxgumarũxũ ta i Garaáxaru naane rü Manachéaru naane i natü i Yudaũaru éstewaama ngẽxmagũxũ rü choxrü nixĩ. Rü ngẽma Efraíaru naane i churaragü i poraxũ nawa ne íxũ rü choxrü nixĩ. Rü ngẽxgumarũxũ ta i ngẽma Yudáaru naane i Iraétanũxũgũaru ãẽxgacũgũ nawa ne íxũ rü choxrü nixĩ. <sup>8</sup>Rü ngẽma Moáane rü Edóũane rü chautiũwa nangexmagü. Rü ngẽma Piritéutanũxũgũ rü choma rü tá nüxũ charüporamae”, ñanagürü ya Tupana. <sup>9-10</sup>Pa Tupanax ¿Texé tá Edóũanewa choxũ taga? ¿Rü texé tá norü ñane ya poranegu choxũ taxũcuxẽxẽ i ñuxma nax toxũ cucoxũ rü marü tama torü churaragũxũ íquixũmũcũxũ? <sup>11</sup>iRü torü uanũgũchaxwa toxũ rüngũxẽxẽ nax nüxũ tarüporamaegũxũcax! Erü taxuwama toxũ name i toxrũxũ i duũxũgũaru ngũxẽ. <sup>12</sup>Natürü curü ngũxẽẽmaxã, Pa Tupanax, rü tá nüxũ tarüporamae i ngẽma torü uanũgũ, erü cuma rü tá cuyayitanũxẽxẽ.

**Tupanagu tayaxõ erü nüma tũxũ ínapoxũ**

**61** <sup>1</sup>Pa Chorü Tupanax irü choxũ nüxũ naxĩnü i chorü yumũxẽ nax cuxna chacaxũ ñuxma nax poraãcü ngũxũ chingexũ! iRü choxũ nangãxũ!

<sup>2</sup>Rü ñuxma nax chorü naanena chayáxüguxü rü cuxna chaca nax choxü curüngüxëxüçax, erü guxchaxü choxü nangexma. Rü ngëmacax chanaxwaxe i choxü ícupoxü. iRü wüxi i nachica i ngextá taxucürüwa chorü uanügu nawa choxna nguxügu choxü namunagü! <sup>3</sup>Erü cuma nixí i chorü dauruxü quixixü. Rü cuma rü ñoma wüxi i poxüchicaxü i taxucürüwa taxacürü uanü nawa ngugüxürüxü quixí. <sup>4</sup>Rü chanaxwaxe nax guxügutáma cupatawa changexmaxü nax ngëma cupexátütüügu chicúxüçax. <sup>5</sup>Rü cumax, Pa Chorü Tupanax, rü marü nüxü cuxínü i chorü unetagü i cumaxá nüxü chixuxü. Rü cuma rü marü choxna cunaxá i ngëma ámare i ngëma duüxügü i cuxü ngechaxügüxüçax ixixü. <sup>6</sup>Rü choma nax äëxgacü chixixü rü chanaxwaxe i cunamaxëxë i chorü maxü nax ngëmaäcü mucü ya tauncü chamaxüxüçax. <sup>7</sup>Rü chanaxwaxe i mexü chomaxá cuxuegu nax ngëmaäcü meama chorü duüxügümaxá ichacuáxüçax. Rü cumax, Pa Tupanax, rü quixaixcüma rü choxü cungechaü. Rü ngëmacax meama choxna cudau. <sup>8</sup>Rü ngëmacax guxügutáma cuxü chicuaxüxü. Rü wüxichigü i ngunexügu tá cupexewa chayanguxëxë i ngëma unetagü i cumaxá nüxü chixuxü.

**Tupanaxicatama nixí ya poxürüxü ixícü**

**62** <sup>1</sup>Rü Tupanaxicatama nixí ya aixcüma choxü taäxëxëcü. Rü nüma nixí i choxna naxáaxü i maxü. <sup>2</sup>Rü nüma nixí i chorü dauruxü i choxna nadauxü. Rü ngëmacax tagutáma ichayangu erü nüma nixí i chorü

poxürüxü yixixü. <sup>3</sup>¿Rü ñuxguxüratáta nüxü perüchau nax çauxçax ípeyaxüächixü nax ngëmaäcü ichayanguxüçax ñoma wüxi ya íxtapüx iwaxgüxürüxü rüxna ñoma wüxi ya poxeguxü iwáxürüxü? <sup>4</sup>Rü ngëma duüxügü i chixexü rü ngëma nagu naxínüexüxicatama nixí nax choxü ínataxüchigüxü. Rü ngëma guxüarü yexera namaxá nataäxëgüxü nixí i norü dora. Rü naqxmaxá choxü nicuaxüxügü, natürü norü ínüwa rü chomaxá naguxchigagü. <sup>5</sup>Rü Tupanaxicatama nixí ya aixcüma choxü taäxëxëcü. Erü nüma tá nixí i choxü nangüxëxü. <sup>6</sup>Rü nüma nixí i chorü dauruxü i choxna nadauxü. Rü ngëmacax tagutáma ichayangu, erü nüma nixí i chorü poxürüxü yixixü. <sup>7</sup>Rü naxmexwa nangexma i chorü maxü rü guxüma i chauchiga nax ñuxäcü chamaxüxü. Rü nüma nixí i chorü dauruxü rü chorü poxürüxü. <sup>8</sup>Pa Chorü Duüxügüxü irü guxüguma nagu peyaxögü! iRü taxú i nüxü pemuüexü nax perü yumüxëwa namaxá nüxü pixuxü i perü guxchaxügü! Erü nüma nixí i aixcüma tóru poxürüxü yixixü. <sup>9</sup>Rü Tupanaxewewa rü çtaxacüwa name i ngëma diëruäxgüxü rü ngëma ngearü diëruäxgüxü? Erü guxüma rü napexewa rü nawüxigumare. Rü nümagü rü ngëxguma chí yaxüarü ngugüxüwa iyangügügu, rü taxuxüma nügu narüyamaegü. <sup>10</sup>iRü taxú i máetagu rüxna ngüxgu pegü pediëruäxëxü! Rü ngëxguma pemuarü diëruäxgu rü itaxú i ngëma perü diëruagu peyaxögüxü! <sup>11-12</sup>Rü choma rü marü taxrexpüxcüna nüxü chaxínü i Tupanaarü ore i ñaxü:

“Rü ngëma pora rü ngëma ngechaxü rü Tupanaarü nixí. Rü ngëma ñuxácü nüxü tapuracüxürüxü tátama tüxü nanaxütanü ya wüxíechigü”, ñaxü.

**Tupana rü duüxügüarü taãxëëerüxü nixí**

**63** <sup>1</sup>Pa Chorü Tupanax, cuma nixí i aixcüma chorü Tupana quixixü. Rü guxüma i chorü ngüchaümaxã cuxçax chadau erü poraãcüxüchi choxü cungüchaü. Rü chacuxwaxe erü ñaa chorü maxü rü ñoma wüxi i waixümü i paxürüxü nixí. <sup>2-3</sup>Rü ngëmacax chanaxwaxe i cupatawa chauxçax congox nax ngëmaãcü nüxü chadauxüçax nax ñuxácü cuporaxü rü cuxüünexü. Erü ngëma curü ngechaü rü maxüarü yexera name. Rü chauaxmaxã tá cuxü chicuaxüxü. <sup>4</sup>Rü ñuxma nax ñoma i naanewa chamaxixügu rü tá cuxü chixuchiga rü cuxçax chaxunagümejëãcüma tá chayumüxë. <sup>5</sup>Rü ngëxguma rü tá poraãcü chataãxëüchi ñoma wüxi i duüxü i õna i taxüwa chibüxürüxü. Rü taãxëãcü chauaxmaxã tá cuxü chicuaxüxü. <sup>6</sup>Rü ngëxguma chütacü i marü ichacaxgu rü cuxna chacuaxächi rü cugu charüxínü. <sup>7</sup>Erü cuma nixí i choxü curüngüxëëxü. Rü chataãxë i cupexátügütüüwa. <sup>8</sup>Rü ñaa chorü maxü rü cuxna chanaxã. Rü yima curü tügünemëxë rü tama choxü ningëx. <sup>9-10</sup>Rü ngëma chorü uanügü i choxü imaxgüchaüxü rü nüxchama waixümügu nataxgü. Erü taramaxã tá nadai rü aigüwemüxü tá nixígu. <sup>11</sup>Natürü i choma nax äxgacü chixixü rü tá Tupanamaxã chataãxë. Rü guxüma i ngëma nüxü yaxögüxü rü tá taãxëãcü naxçax nawiyaegü rü nüxü

nicuaxüxügü. Natürü ngëma idorataaxgüxü rü Tupana rü tá inayanangeaxëëgü.

**Yumüxë i nawa Tupanaarü ngüxëëçax ícaxaxü**

**64** <sup>1</sup>Pa Cori Pa Tupanax ichoxü nüxü naxínü nax cuxütawa íchaxuaxüxü! iRü choxna nadau naxçaxwa i ngëma choxü imaxgüchaxüxü! <sup>2</sup>iRü naxçaxwa choxü icux i ngëma máxwaxëgüxü i bexma nagu rüxínüexü nax ñuxácü choxü yamaxgüchaxüxü! iRü nagu yanachixëxë i ngëma nagu naxínüexü! <sup>3</sup>Erü norü conü rü ñoma tararüxü natëxëchi nax doraxü yaxuxü. Rü ñoma naxnegürüxü inanaña i norü dexagü i poraãcü tüxü nangüxëëxü. <sup>4</sup>Rü ngëma íyacuxgüxüwa rü ínanaxüxüxëxë i chixëxü i ore tûmacax ya yíxema taxuxüma guxchaxü namaxã üxe. Rü tama namuüãcüma ngürüächi tûmaechita ínanaxüxüxëxë i ngëma norü dexa i chixëxü. <sup>5</sup>Rü nügüxü nanangüchaüxëxë nax chixëxü naxügüxü. Rü nügümaxã nagu narüxínüe nax ñuxácü bexma duüxügüxü chixëxügu nayixëëchaüxü. Rü nüma nüxü nacuaxgügu rü taxúema nüxü tadau. <sup>6</sup>Rü nagu narüxínüe nax taxúema bexma nangugügüxü i ngëma chixëxü i naxügüxü. Natürü yimá nüxü cuácü i guxáarü ínü rü nüma tá nixí i bexma nangugüãxü. <sup>7</sup>Rü nüma rü ngürüächi naxnemaxã tá nanapíexëxë. <sup>8</sup>Rü ngëmaãcü i ngëma chixëxü i togüçax nagu naxínüexü rü nümagütátama nagu nayi. Rü texé ya nüxü daugüxe nax nümagütama nagu

nayixũ, rü tá nüxũ tacugüe. <sup>9</sup>Rü ngëxguma ngëmaxũ nadaugügu i duũxũgü rü tá Tupanaxũ nicuaxũxũgü. Rü ngëma naxüüchiga tá nixugügu rü tá nüxũ nicuaxächitanü nax taxacüchiga yixixũ. <sup>10</sup>Rü yimá yatü ya mea maxücü rü Cori ya Tupanamaxã tá nataãxë rü tá naxçax nixü nax ínapoxüãxüçax. Rü guxũma i duũxũgü i mexügu rüxĩnüexũ rü tá nataãxëgü.

**Tupana nixí ya mecü nax  
nüxũ icuaxũxũgüxũ**

**65** <sup>1</sup>Rü cumax, Pa Tupanax i Chióügu Ápataxex, rü name nixí i cuxü ticuaxũxũgü rü cupexewa tayanguxëxë i ngëma unetagü i cumaxã nüxũ tixuxũ. <sup>2</sup>Erü cuma rü nüxũ cuxĩnũ i torü yumüxë. Rü guxũma i duũxũgü rü cuxütawa naxí nax curü ngüxëççax íyacagüxüçax. <sup>3</sup>Rü ngëma torü chixexũgüama tomaxã ínacuaç natürü cuma rü toxú nüxũ icuyarüngüma i ngëma torü pecádugü. <sup>4</sup>Rü nataãxë i ngëma duũxũ i cuma cuyaxuxũ nax yima cupata ya Chióüwa ngexmanewa cumaxëxüçax. Rü wüxi i taãxë tá nixí nax natanüwa tangexmagüxũ i ngëma mexügu i cupata ya üinenewa ngëxmagüxũ. <sup>5</sup>Pa Tupana Pa Torü Maxëxëeruxũx, cuma rü tomaxã quixaixüma rü ngëmacax toxü cungãxũ namaxã i ngëma mexügu i curü poramaxã cuxüxũ. Rü guxũma i duũxũgü rü woo ngëma már-arü tocutüwa i yáxüwa ngëxmagüxũ rü cugu nayaxögü. <sup>6</sup>Rü cuma rü curü poramaxã mea nachicawa cunangexmagüxëxë ya yima maxpúnegü. <sup>7</sup>Rü cuma rü

cunachiächixëxë i ngëma yuapegü i taxügu, rü cuyanangeaxgüxëxë i ngëma duũxũgü i ípuraexũ. <sup>8</sup>Rü woo ngëma már-arü tocutüwa i yáxüwa ngëxmagüxũ rü nüxũ namuüe i ngëxguma nüxũ nadaugügu i ngëma taxü i mexügu i curü poramaxã cuxüxũ. Rü guxüwama i duũxũgü rü cugagu poraäcü nataãxëgü. <sup>9</sup>Rü cuma nixí i ñoma i naanena cudauxũ rü nagu cupuxëxũ nax naxügüxüçax i nanetügü. Rü cuma rü natüxacügümaxã cuyawaimüanexëxë nax naxügüxüçax i trígugü. Rü ngëmaäcü nixí i cunangomüanexëxũ i waixüümü. <sup>10</sup>Rü cuma rü cuyamegütanü i ngëma nanetü i aimüanexügu togüxũ. Rü ngëma ngüchitaerugüxũ rü cuyanawexächianexëxë. Rü pucümaxã cunangomüanexëxë rü ngëmaäcü duũxũgüaxũ cunamuarü oxöxëxë i nanetügü. <sup>11</sup>Rü wüxichigü ya taunecü rü mexümaxã ícunanguxëxë. Rü ngëma curü caixanexügu rü poraäcü nanapuxëxë. <sup>12</sup>Rü ngëma carnéruchitaxügu i paanexüwa ngëxmagüxũ rü narüxügü rü nayaxütüane. Rü yima maxpúnegü rü maxëmaxã nangaxãëgü. <sup>13</sup>Rü ngëma metachinüanegüxũ rü carnérugümaxã nayapagü. Rü ngëma ngategü rü trígunecü i bacaxũ nixígü. Rü guxũma i ngëma rü taãxëäcü nacuxcutanügü.

**Guxũma i ngëma Tupana  
üxũ rü namexechi**

**66** <sup>1</sup>Pa Duũxũgü i Ñoma i Naanewa Maxëxüx irü Tupanaçax taãxëäcü pewiyaegü! <sup>2</sup>iRü perü wiyawa nüxũ pixu nax naxüünexü

i naéga! iRü wiyaeãcūma nūxũ picuaxūxũgũ! <sup>3-4</sup>iRü Tupanamaxã nūxũ pixu rü ñapegũgũ: “Curü puracũgũ rü namexechi erü curü poramaxã cunaxũ. Rũ ngẽma cumaxã ruxuanũgũxũ rü norũ muũmaxã cuxmexgu nũgũ nayixẽxẽ. Rũ guxũma i duũxũgũ rü cuxũ nicuaxūxũgũ rü norũ wiyaeãcūmaxã cuxũ nataxẽẽgũ”, ñapegũgũ! <sup>5</sup>iRü nua pexĩ nax nūxũ pedaugũxũcax i ngẽma taxũ i mexũgũ i duũxũgũcax naxũxũ ya Tupana! <sup>6</sup>Rü nüma rü nayapachitamaxẽxẽ ga yema már nax tũmacutũmaxã yẽma tichoũxũcax ga tóru oxigũ. Rũ yemacax poraãcũ nataãxẽgũ ga duũxũgũ. <sup>7</sup>Rü nüma ya Tupana rü guxũguma norũ poramaxã ñoma i naanemaxã inacuax. Rũ nüma rü nũxna nadau i guxũma i nachixũanegũ nax tama namaxã nanuexũcax i ngẽma tama naga ñnũexũ. <sup>8</sup>Pa Guxũma i Nachixũanecũãxgũx imexũ i nachigaxũ pixugũ ya tóru Tupana! iRü perũ wiyaeãcūmaxã nūxũ picuaxūxũgũ! <sup>9</sup>Erũ nüma rü tũxna nadau rü tũxna nanaxã i maxũ nax tama iyueũcax. <sup>10</sup>Pa Tupanax, cuma rü poraãcũ toxũ cuxũ. Rũ ngẽmaãcũ toxũ cumexẽxẽ ñoma diẽrumũ üxũwa imexẽẽxũrũxũ. <sup>11</sup>Rü cuma rü torũ uanũgũaxũ cunatauxchaxẽxẽ nax toxũ ñnayauxũxũcax nax ngẽmaãcũ poraãcũ toxũ napuracũexẽẽxũcax. <sup>12</sup>Rü cunatauxchaxẽxẽ nax ngexũrũũxũmare ga duũxũgũ togu idauxcũraxũgũxũ. Rũ toma rü guxchaxũgũ ga ãcũmaxũchixũwa tachopetũ, natũrũ dũxwa ñaa naane i mexũwa toxũ cugagũ. <sup>13-14</sup>Rü ngẽmacax i ñuxma rü cupatawa tá chaxũ rü ngẽma tá cupexewa chayagu i ãmaregũ. Rũ

ngẽmaãcũ tá chayanguxẽxẽ i ngẽma cumaxã ichaxunetaxũ ga yexguma ãcũcũmaxũwa chayexmagu. <sup>15</sup>Rü ngẽma curũ ãmareartũ guchicaxũwa rü tá cuxcax chayagu i wocaxacũgũ i ngũexũ, rü wocagũ i yatũxũ, rü chíbugũ i yatũxũ, rü carnérugũ nax ngẽma naemamaxã cutaãxẽxũcax. <sup>16</sup>Pa Duũxũgũ i Tupanaga ñnũexũx irũ nua pexĩ rü iperũxĩnũe! Rũ tá pemaxã nūxũ chixu i ngẽma mexũgũ i Tupana chaxcax üxũ. <sup>17</sup>Rü ñaa chauxmaxã nũxna chaca rü daa chorũ conũmaxã nūxũ chicuaxũxũ. <sup>18</sup>Rü ngẽxguma chi chixexũgu charũxĩnũgu rü nüma ya Cori rü taxũ chima choxũ nangãxũ. <sup>19</sup>Natũrũ i nümax rü choxũ naxĩnũ rü nanangãxũ i chorũ yumũxẽ. <sup>20</sup>Rü namexechi ya Tupana, erũ tama choxũ nūxũ naxox i ngẽma naxcax íchacaxũ. Rũ tama nūxũ narũchau nax choxũ nangechaũxũ.

**Name nixĩ i guxũma i nachixũanegũ rü  
Tupanaxũ nicuaxūxũgũ**

**67** <sup>1-2</sup>Pa Tupanax icuxũ tangechaxũtũmũxũgũ rü toxũ rũngũxẽxẽ, rü taãxẽãcũ toxũ nadawenũ nax ngẽmaãcũ guxũ i nachixũanecũãxgũ nūxũ cuaxgũxũcax nax curũ ngũchaũ yixĩxũ nax cunamaxẽxẽẽxũ i duũxũgũ! <sup>3</sup>Pa Tupanax, rü name nixĩ nax guxũma i duũxũgũ i guxũ i nachixũanegũwa ngẽxmagũxũ cuxũ icuaxūxũgũxũ. <sup>4</sup>Rü ngẽma nachixũanegũ rü name nixĩ nax taãxẽãcũ cuxũ yacuaxũũgũxũ erũ norũ ãẽxgacũ quixĩ rü mea namaxã icucuax. <sup>5</sup>Pa Tupanax, rü name nixĩ nax guxũma i duũxũgũ i guxũma i nachixũanecũãx cuxũ icuaxũũgũxũ. <sup>6</sup>Erũ poraãcũ toxũ curũngũxẽẽ rü ngẽmacax ngẽma



waixümüwa mea nayae i tonetügu rü namu i norü o. <sup>7</sup>iRü Tupana tüxü rüngüxêxê! Rü name nixî i guxüma i duüxügu nüxü nicuaxüxügu.

**Tupana rü norü uanüxü narüporamaegü**

**68** <sup>1</sup>Pa Tupanax ipaxa nua naxü rü inawoxü i ngêma cumaxâ rüxuanüaxgüxü! Rü ngêmaâcü i ngêma cuxchi aiexü rü tá cuxchaxwa nibuxmü. <sup>2</sup>Rü nümagü rü ñoma caixanexürüxü tá ngêxma narütauxe. Rü ñoma wera idexexürüxü tá inarüxo. Rü cupexewa rü taxuwama name i ngêma chixexü ügüxü. <sup>3</sup>Natürü ngêma mexü ügüxü rü tá nataaxêgü. Rü cupexewa, Pa Tupanax, rü taaxêâcü tá cuxü nicuaxüxügu. <sup>4</sup>Pa Duüxügüx iTupanaxax pewiyaegü rü perü wiyawewa penataxêxê! iRü nüxü picuaxüxügu ya yimá caixanexüétügu ixücü! iRü namaxâ petaaxêgü ya yimá Cori rü napexewa petaaxêgü! <sup>5</sup>Rü yimá Tupana ya napata ya üinenewa ngêxmacü rü ngêma tacutagümaxâ inacuax rü ngêma yutegüxüarü poxürüxü nixî. <sup>6</sup>Rü ngêma duüxügu i nüxü nataxuxü i natanüxü rü nüma ya Tupana rü nüxü nanangexmaxêxê ya nachüü. Rü nüma rü inananguxüxêxê i ngêma poxcuexü nax mexüwa nangexmagüxüçax. Natürü ngêma tama ixînüechaxüxü rü naane i taxuxüma nawa rüxüüwa tá nanamaxêxêxê. <sup>7</sup>Pa Tupanax, rü yexguma Equítuanewa ícunanguxüxêgü ga curü duüxügu rü chianexügu cuyagagü. <sup>8</sup>Rü yexguma ga ñoma ga naane rü naxîaxâchi. Rü pucü narüxüe ga daxügüxü ga naanewa. Rü guma maxpüne ga Chinaí rü cunaxîaxâchixêxê, Pa Torü Tupanax.

<sup>9</sup>Rü cuma rü cunapuechaxêxê nax yemaacü cuyawaxümüanexêxêxüçax ga yema curü naane ga ipaxü nax nawa naxügüxüçax ga nanetügu. <sup>10</sup>Rü yema curü duüxügu rü yexma naxâchiügu. Rü cumax, Pa Tupanax, rü namaxâ cumecüma, rü yemaçax nüxna cunaxâ ga norü ñna ga nüxü taxuxü. <sup>11-13</sup>Rü yexguma Tupana idexagu rü yema uanügu rü nibuxmü. Rü yema ngexügu ga ípatawachigü yexmagüxü rü tagaâcü nüxü nixugügu nax yabuxmüxü ga yema norü uanügu ga norü daiwa yéma íxü. Rü nüma ga yema ngexügu rü nanade ga yema norü uanüguarü yemaxügu ga nüxna yéma yabuxmüxü rü nügümaxâ nayatoye. Rü norü uanüguarü ngaxâeruügümaxâ nügu ningaxâêgü. Rü namaxâ naxâxünegü rü ñoma wüxi i muxtucu i naxpexátümaxâ tüxünexürüxü nixügu. <sup>14</sup>Rü yexguma Tupana ya guxâétüwa ngêxmacü yabuxmüxêgü ga tóru uanügu rü guma maxpüne ya Charumúçax nibuxmü, natürü gauxü yexma nayi. <sup>15</sup>Rü namáxchanexüchi ya yima maxpüne ya Bacháü. Rü nachitaerugü rü nadauxüguxüchi. <sup>16</sup>Rü pemax, Pa Maxpünegü ya Máchanexüchigünex ¿rü tüxücüü auxâchiâcü nüxü perüdaunü ya yima maxpüne ya Chióü ya Tupana nagu âchiüchaxüne? Rü nüma ya Cori ya Tupana rü ngêma tá nangexmaecha. <sup>17</sup>Rü nüma ya Tupana rü guxünema ya nawexümaxâ Chinafarü maxpünewa ínaxüxü nax napata ya Chióüwa ngexmanewa naxüçax. <sup>18</sup>Pa Tupanax, rü ngêxguma Chióü ya maxpünegu cuxínagügu rü cugüwe cuyagagü i ngêma ícuyauxüxü i curü uanügu, rü

natanüwa cunayaxu i diêru. Rü woo i ngêma tama cuga ñüechaxüxü rü cuxmëxwa nügü nangexmagüxëxë.  
 19Cumexechi, Pa Cori Pa Torü Tupana i Torü Maxëêëeruxüx. Rü wüxichigü i ngunexügu rü toxü curüngüxëxë. 20Rü nüma ya tórü Tupana rü tüxü maxëxëcü nixü. Rü nüxü natauxcha nax yuwa tüxü ñanguxüxëxëxü. 21Rü nüma ya Tupana rü tá nanamateeru i ngêma norü uanügu i tama nüxü rüxoexaxüxü i norü chixexügü. 22Rü nüma ya Tupana rü ñanagürü: “Pa Iraétanüxüx, rü choma rü tá pexü chamupetütanüamaxü i Bacháüanewa nax nawa pengugüxüçax i perü naane i már i mátamaxücutüwa ngëxmaxü. 23Rü ngêma rü tá pegü piwaiecutüxëxë nagümaxä i perü uanügu. Rü perü airügü rü tá yimá nagüwa naxaxegü”, ñanagürü. 24Pa Tupanax, Pa Chorü Tupanax, Pa Chorü Ñëxgacüx, rü cupataãxtüwa nüxü tadau i ngêma curü duüxügü i ngêma chocuchimüxü rü cuxü nicuaxüxügü erü nanaxüchigagü nax curü uanügüxü curüporamaexü. 25Rü ngêma wiyaegüxü rü napëxegu naxägü, rü ngêma paxetagüxü rü ngêmaweama naxägü, rü ngêma paxügü i paüderü pagüxü rü ngäxütanügu naxägü. 26Rü guxäma i pema i ngëxma chocuxe irü nüxü picuaxüxü ya Cori ya Tupana! Rü guxäma i pema i Iraétanüxü irü nüxü picuaxüxügü! 27Rü Bëyamíchimüxü rü napëxewaama naxü, rü ngêmaweama naxü i Yudáchimüxü norü ãëxgacügümaxä. Rü ngêmaweama naxügü i Chaburóüchimüxü rü Netaríchimüxü. 28Pa Chorü Tupanax iinawëx i curü pora! iRü wenaxarü

toxçax naxü ga yema taxü ga mexügü ga nüxcüma curü poramaxä cuxüxü! 29Rü yima cupata ya maxpünewa ngexmane i Yerucharéüwa rü togü i nachixüanegüarü ãëxgacügü cuxçax ngêma nananagü i ãmaregü. 30iRü yima cupatawa yangagü i ngêma cumaxä rüxuanügüxü i ñoma dexnenecüçax i wocagü i düraexüchixüxüxü ixügüxü! Rü nümagü rü ñoma tuirügü i düraexüxüxü nachixecüma, rü ñoma wocaxacügürüxü nimu. iRü naxãneexëxë i ngêma duüxügü i norü diêruguama rüxüñüxü! iRü nawoone i ngêma daigu rüxüñüxü! 31Rü ngêma Equítuanecüãxarü ãëxgacügü rü tá cupëxewa nangugü rü ngêma Etiopíacüãxgü rü tá cuxü nicuaxüxügü. 32Pa Ñoma i Naanewa Ngëxmagüxü i Nachixüanegüarü Ñëxgacügüx irü nüxü picuaxüxügü ya Tupana! iRü naxçax pewiyægü ya Cori! 33Rü nüma rü caixanexügu nixü i daxügüxü i naane i nüxcüma üxüwa. Rü ngêma rü tagaäcü nidexa. 34iRü nagu perüxüñü nax ñuxäcü naporaxüchixü ya Tupana! Rü nüma rü guxüma i Iraétanüxümaxä inacuax. Rü norü pora rü yaüxtüweanexüwa nangu. 35Rü nüma ya Tupana ya napatawa ngëxmacü rü naxüüne. Rü nüma ya Iraéarü Tupana rü nanaporaexëxë i norü duüxügü rü nüxü nanatauxchaxëxë nax norü uanügüxü naporamaegüxüçax. iRü namexechi ya Tupana!

**Aita Tupanacax naxü erü taxü i guxchaxüwa nangexma**

**69** 1iChoxü rüngüxëxë, Pa Chorü Tupanax! Erü ngëmatama nagu changu i taxü i guxchaxü. 2Rü ñoma

wüxi i ngóxũcharawa rü wáxũrũxũ  
 chixĩ. Rü taxuguma chayachiãchiéga.  
 Rü ñoma mátamaxũchixũ i dexáwa  
 ingaxgurũxũ chixĩ nax choxũ  
 yachaxẽxũ i poraxũchixũxũ. <sup>3</sup>Rü  
 choma rü düxwa chipa nax curü  
 ngũxẽcax íchacaxaxũ. Rü marü düxwa  
 changuxmanaxã. Rü düxwa chipaxetü  
 nax cuxcax ichadawentũxũ, Pa Chorü  
 Tupanax. <sup>4</sup>Rü ngẽma natũxcaxma  
 chauxchi aieuxũ rü chayaexũ  
 narümmae. Rü nimuetanü i ngẽma  
 chomaxã rüxuanũãxgũxũ. Rü nümagü  
 rü naxcax nadaugü nax ñuxãcü choxũ  
 yamãxgũchaũxũ. Rü choxũ  
 nachixewegü nax chanatãeguxẽxũcax i  
 ngẽma tama naxcax changĩxchirẽxũ. <sup>5</sup>Pa  
 Chorü Tupanax, cuma nüxũ cucuax nax  
 ñuxãcü tama chauãxũ chacuaũxũ. Rü  
 ngẽmacax taxucirüwama cupexewa  
 ichayacuxgü i chorü chixexũgü. <sup>6</sup>Pa  
 Cori Pa Tupana ya Guxãétüwa  
 Ngẽmacũx, tama chanaxwaxe nax  
 chaugagu ãne yangegũxũ i ngẽma  
 chautanũxũ i cuxũ yaxõgũxũ. Pa Torü  
 Tupanax, rü tama chanaxwaxe nax  
 chaugagu cuxũ naxoexũ i chautanũxũgü  
 i noxri norü ngũchaũmaxã cuxcax  
 daugũxũ. <sup>7</sup>Rü cuxcax nixĩ ga yaxna  
 namaxã chaxĩnũxũ rü ãne chingexũ ga  
 yexguma cumaxã nachixegagü i  
 ngẽma cumaxã rüxuanũãxgũxũ. <sup>8</sup>Rü  
 chautanũxũgüpepewa rü ñoma wüxi i to  
 i nachixũanecũãxrũxũ chixĩ rü ñoma  
 tama choxũ nacuxgũxũrũũãcü choxũ  
 narüdaunü. <sup>9</sup>Rü choma rü ngũxũ chinge  
 erü poraãcü chayanuxü ya cupata nax  
 taxúema chixexũ nawa üxũcax. Rü  
 chauxchaama chanangenagü i norü  
 guxchigagü i ngẽma cumaxã

rüxuanũgũxũ. <sup>10</sup>Rü ngẽxguma cuxcax  
 chaxaxuxgu rü tama chachibũãcüma  
 chayumũxẽgu rü nümagü rü choxũ  
 nacugüe. <sup>11</sup>Rü ngẽxguma chorü  
 ngechaxũchirugu chicuxgu rü guxũma  
 choxũ narücutanũxũ. <sup>12</sup>Rü duũxũgü rü  
 chauchiga nidexagü rü ngẽma ngãxẽxũ  
 rü chaugu nawiyaegü. <sup>13</sup>Natürü i  
 chomax, Pa Corix, rü chorü yumũxẽwa  
 rü cuxna chacaama. Rü ngẽmacax, Pa  
 Chorü Tupanax ichoxũ rüngũxẽxẽ i  
 ñuxmax! Rü ngẽma choxũ nax  
 cungechaũxũgagu irü choxũ nangãxũ!  
 Rü cuma nax guxũguma choxũ  
 curüngũxẽxẽxũ, rü chanaxwaxe i  
 chauétüwa cuchogü. <sup>14</sup>iRü choxũ  
 rüngũxẽxẽ nax tama nagu changuxũcax  
 i ngẽma chixexũgü, ñoma wüxi i  
 ãchixũanexũgu inguxgurũxũ! iRü  
 naxmexwa choxũ ínanguxuchixẽxẽ i  
 ngẽma chauxchi aieuxũ! iRü nüxna  
 choxũ ixũgachixẽxẽ i ngẽma chorü  
 guxchaxũgü i ñoma dexá i  
 mátamaxũrũxũ ixĩxũ! <sup>15</sup>Rü tama  
 chanaxwaxe i ngẽma guxchaxũgü choxũ  
 narüyexera ñoma poraxũchixũxũ choxũ  
 ichaxẽxũrũxũ. Rü tama chanaxwaxe i  
 nagu changu i ngẽma guxchaxũ i  
 taxũchixũ ñoma wüxi ya tupuyuca  
 choxũ itúcuchigurũxũ. <sup>16</sup>Pa Corix  
 ichoxũ nangãxũ! Erü cuma rü chomaxã  
 cumecüma rü poraãcü choxũ  
 cungechaũ. Rü ngẽma nax choxũ  
 cungechaxũxũgagu irü chaugu rüxĩnũ!  
<sup>17</sup>Rü choma nax curü duũxũ chixixũ irü  
 taxú i choxũ cuxoxũ! iRü paxa choxũ  
 nangãxũ! Erü ãcũmaxũwa changexma.  
<sup>18</sup>iRü nua naxü rü choxũ rüngũxẽxẽ!  
 iRü naxmexwa choxũ ínanguxuchixẽxẽ i  
 ngẽma chomaxã rüxuanũgũxũ! <sup>19</sup>Cuma

rü nüxü cucuax nax ñuxäcü chomaxã nachixegagüxü rü chomaxã naguxchigagüxü rü äne choxü yangexëégüxü. Rü cuma nüxü cucuax nax taxacügü yixixü i ngëma chomaxã rüxuanügüxü. <sup>20</sup>Rü ngëma chomaxã nax nachixegagüxü rü poraäcü choxü nangux. Rü ngëmacax charümaächi rü changearü poraãx. Rü natücaxma naxcax chadau nax texéaxü changechaütümüxüxü rü texé choxü taãxëxëxü. <sup>21</sup>Rü ngëma chauxchi aiexü rü chowemügu nanaxügu i chãxüruxü. Rü yexguma chitaxawagu rü bínu ya ngüchiäxüchicü choxna naxägü. <sup>22</sup>Natürü ngëma norü ðna i taxügu i nügümaxã nangöxgüxü rü namaxã ínataãxëgüxü rü ñuxma rü chanaxwaxe nax noxrütama chixexëëruxü yanguxuchixü. <sup>23</sup>iRü ëcü yangexetüxëxë rü guxüguma yaduxrueparagü! <sup>24</sup>iRü ëcü curü numaxã napoxcue nax ngëmaarü poramaxã nayuexücax! <sup>25</sup>Rü chanaxwaxe i ngëma ínaxächüügüxüwa rü wüxi i nachica i chianexüxü cunanguxuchixëxë nax taxüema napatagüwa ngëxmagüxücax. <sup>26</sup>Erü nümagü rü tümawe ningëxütanü ya yíxema cuma tüxü cunaxixächüiãxëxë. Rü tüxü nacugüe ya yíxema tüxü nangüe nagagu nax tüxü cunapixëxëxü. <sup>27</sup>Ëcü poxcumaxã nüxü naxütanü naxcax i ngëma chixexü i naxügüxü! iRü taxü i nüxü nüxü curüngümaxü i ngëma norü chixexü! <sup>28</sup>iRü ínapiéga nawa i ngëma curü popera i curü duüxügüéga nagu ümatüxü! Rü tama chanaxwaxe i ngëma cuga ñnüexütanüwa cunangoxégagüxëxë. <sup>29</sup>Natürü i choma nax chidaxawexü rü

chanaxixächüiãxëxü irü choxü írüdaxëxë rü choxü ínapoxü, Pa Chorü Tupanax! <sup>30</sup>Rü choma rü wiyamaxã tá cuxü chicuaxüxü rü moxë tá cuxna chaxã, Pa Tupanax. <sup>31</sup>Rü ngëxguma wüxi i tuiru rüexna wocaxacü cuxcax chiguxguarü yexera tá namaxã cutaãxë i ngëxguma cuxü chicuaxüxügu rü moxë cuxna chaxãxgu, Pa Corix. <sup>32</sup>Rü yíxema naxixächüiãxëgüxë rü tá tataãxëgü i ngëxguma nüxü tadaugügu nax ñuxäcü Tupana chomaxã taãxëxü. Rü yíxema Tupanacax daugüxë rü tá yexera tüxü nangüchaü nax nawe tartüxüxü. <sup>33</sup>Erü nüma ya Cori ya Tupana rü tüxü naxínü ya yíxema tüxü nataxüxë i tümäärü ngëmaxügü. Rü tama tüxü naxo ya yíxema norü duëxëgü ya poxcuexe. <sup>34</sup>Pa Dauxügüxü i Naane, rü Pa Ñoma i Naane rü Pa Már, rü name nixí i Tupanaxü picuaxüxügu i pemax rü guxüma i pewa maxëxü. <sup>35-36</sup>Erü nüma rü tá naétüwa nachogü ya Chióü. Rü tá nüxü narüngüxëxë i norü duüxügü nax wena táxarü namexëégüaxücax ya Yudátanüxüarü íanegü. Rü yima íane ya Yerucharéü rü Tupanaarü duüxügüxacügüarü tá nixí. Rü ngëma tá namaxë rü tá namaxã inacuaxgü. Rü guxüma i ngëma Tupanaga ñnüexü rü ngëxma tá naxächüügü.

**Yumüxë i nawa Tupanaarü  
ngüxëcax íicaxaxü**

**70** <sup>1</sup>Pa Chorü Tupanax inua naxü rü choxü íyanguxuchixëxë! Pa Corix ipaxa nua naxü nax choxü curüngüxëxëxücax! <sup>2</sup>iRü naxãneexëxë i ngëma choxü imaxgüchaüxü nax ngëmaäcü norü äneemaxã

yabuxmüxcax i ngëma chixexü  
 chomaxã ügüchaxü! <sup>3</sup>Rü ngëma choxü  
 cugüexü, rü chanaxwaxe i  
 cunaxãneexë. <sup>4</sup>Natürü guxãma ya texé  
 ya cuxçax daugüxe rü name nixí nax  
 poraãcü tataãxëgüxü. Rü yíxema  
 naxwaxegüxe nax tümaétüwa cuchogüxü  
 rü name nixí i guxüguma ñatagürügü:  
 “Namexechi ya Tupana”, ñatagürügü.  
<sup>5</sup>Natürü i choma nax changearü  
 ngëmaxüáxü rü chanaxixãchiãëxü, rü  
 chanaxwaxe i paxa nua cuxü rü choxü  
 curüngüxëë, Pa Tupanax. Erü cuma nixí i  
 choxü curüngüxëëxü rü choxü  
 ícunguxuchixëëxü nawa i guxchaxügü.  
 iRü paxa choxü rüngüxëë, Pa Corix!

#### Wüxi i yaxguaxarü yumüxë

**71** <sup>1</sup>Pa Cori Pa Tupanax, cuma nixí  
 i chorü poxüruxü quixixü. iRü  
 taxú i ãne choxna cuxãxü! <sup>2</sup>iRü ëcü  
 chorü uanügüna choxü ínapoxü! Erü  
 cuma rü quixaixcüma. iRü choxü nüxü  
 naxínü i chorü yumüxë rü choxü  
 ínanguxuchixëë! <sup>3</sup>Rü chanaxwaxe nax  
 chorü tÿxchipetaruxü rü chorü  
 cuxchicaxü rü chorü poxüruxü quixixü.  
 Rü ngëmaãcü taxucürüwa choxü  
 nimaxgü. Erü cuma nixí i chorü  
 tÿxchipetaruxü rü chorü cuxchicaxü  
 quixixü. <sup>4</sup>Pa Chorü Tupanax ichoxü  
 ínanguxuchixëë naxmexwa i ngëma  
 duüxügü i chixexügü i máetagüxü rü  
 nuxwaxegüxü! <sup>5</sup>Yerü yexguma  
 changextÿxügutama cuxü chayaxó yerü  
 cuma nixí ga aixcüma choxü  
 curüngüxëëxü rü choxna cudauxü. <sup>6</sup>Rü  
 yexguma chauéanüwa chayexmagu, rü  
 cuma rü woetama marü choxü  
 curüngüxëë rü choxü cubuxëë. Rü

ngëmacax i ñuxma rü guxügutama cuxü  
 chicuaxüxü. <sup>7</sup>Rü muxüma i duüxügü rü  
 chomaxã nabaxãchiãëgü erü marü  
 chaya. Natürü cuma nixí i chorü  
 poxüruxü quixixü. <sup>8</sup>Rü guxüma i  
 ngunexügügu rü cuxü chicuaxüxüëcha,  
 Pa Tupanax, naxçax i ngëma mexü i  
 çaxçax cuxüxü. <sup>9</sup>Natürü ñuxma nax  
 yaxguax chixixü rü changearü poraãxü  
 irü taxú i choxü cuxoxü, rü taxú i choxü  
 ícutaxü! <sup>10</sup>Rü ngëma chorü uanügü i  
 choxü imaxgüchaxü rü nügü  
 narüngüxëëgü rü wüxigu nügümaxã nagu  
 narüxínü nax ñuxãcü choxü yaxgüxü.  
<sup>11</sup>Rü ñanagürügü: “iNawe pingëxütanü  
 rü peyayauxgü, erü ya Tupana rü marü  
 nüxna nixügachi rü taxúetama  
 ítanapoxü!” ñanagürügü. <sup>12</sup>Pa Tupanax  
 itaxú i choxna quixügachixü! iRü paxa  
 nua naxü rü choxü yarüngüxëë! <sup>13</sup>iRü  
 naxãneexëë rü nadai i ngëma chorü  
 uanügü i choxü imaxgüchaxüxü! iRü  
 duüxügüarü cugüruxü yaxígüxëë i  
 ngëma nanaxwaxegüxü nax chixexügu  
 changuxü! <sup>14</sup>Natürü i choma rü  
 guxüguma íchanangüxëë nax choxü  
 curüngüxëëxü. Rü ngëmacax yexeraãcü  
 tá cuxü chicuaxüxü. <sup>15</sup>Rü wüxichigü i  
 ngunexügu rü tá nüxü chixu nax cuma  
 quixixü nax toxü cumaxëëëxü rü  
 aixcüma toxü curüngüxëëxü. Rü ngëma  
 nax namuxüchixü i ngëma mexügü i  
 çaxçax cuxüxü, rü taxucürüwama  
 guxüxü chixu. <sup>16</sup>Pa Corix, guxüma i  
 duüxügümaxã tá nüxü chixu i ngëma  
 taxügü i mexügü i cuxüxü. Rü tá  
 chanaxunagü nax cuxicatama yixixü nax  
 quixaixcümaxü. <sup>17</sup>Pa Chorü Tupanax  
 yexguma changextÿxügutama choxü  
 cüngüxëë i curü ore, rü ñuxma rü ta

nüxü chixuchigüama ga yema mexü ga taxü ga cuxüxü. <sup>18</sup>Pa chorü Tupanax itaxü i choxna quixügachixü i ñuxma nax marü chayaxü rü chapuxeruxü! Rü ñuxma rü ta curü porachigaxü chixu namaxä i ngëma ñuxma maxëxü i duüxügü nax nümagü rü ta ngëma duüxügü i tá ingóetanüxümaxä nüxü yaxugüxüçax. <sup>19</sup>Pa Tupanax, ngëma curü porachiga rü curü mecümachiga rü guxüwama nangu ñuxmata daxügüxü i naanewa. Rü cuma rü cunaxü i taxügü i mexügü. Rü tataxuma ya texé ya cumaxä wüxiguxe. <sup>20</sup>Rü woo muxüma ga guxchaxügü rü ixächiaëgüwa choxü cuxüpetüxëxë, natürü wenatáxaru choxü cutaäxëxëxë. Rü tá choxü ícurüdaxëxë nawa i chorü guxchaxügü, ñoma waixümütüüwa írüdaxgurüxü. <sup>21</sup>Rü noxriarü yexera tá chomaxä cutaäxë rü wena táxaru choxü cuporaxëxë. <sup>22</sup>Pa Chorü Tupana ya Guxüma i Iraéanecüäxgüarü Tupana ya Üü necüx, rü cuxçax tá chawiyae rü chorü árpamaxä rü chorü árpaxacümaxä tá cuxü chicuaxüxü. Erü aixcüma cuyanguxëxë i guxüma i ngëma nüxü quixuxü. <sup>23</sup>Rü ngëmaäcü taäxëäcüma chauaxmaxä tá cuxçax chawiyae, rü chauäxë i wena ícurüdaxëxümaxä tá cuxü chicuaxüxü. <sup>24</sup>Rü chorü conü rü guxüma i oragu tá nüxü nixu nax cuma rü íxaixcümacü quixüxü. Erü ngëma duüxügü i naxwaxegüxü nax chixexügu changuxü rü ñuxma rü äne ningegü.

#### Yumüxë i äëxgacüçax ixüxü

**72** <sup>1-2</sup>Pa Tupanax inüxna naxä ya äëxgacü i cuax nax curüxü mexügu naxünüxüçax rü aixcümacü nax

yixüxüçax, nax ngëmaäcü mea namaxä inacuáxüçax i curü duüxügü rü tüxü nangüxëëxüçax ya yíxema guxchaxüwa ngëxmagüxe! <sup>3</sup>Rü chanaxwaxe i cunabacaxëxë i ngëma nanetügü i ma xpüneanewa ngëxmagüxü nax ngëmaäcü nataäxëgüxüçax i duüxügü rü mea namaxëxüçax. <sup>4</sup>Rü chanaxwaxe i nüma ya äëxgacü rü mea tümamaxä inacuax ya yíxema ingearü ngëmaxüäxgüxe, rü tüxü narüngüxëxë ya tümamaxügü ya yíxema tüxü nataxüxe, rü napoxcueä i ngëma chixri norü puracütanüxümaxä icuaxgüxü. <sup>5</sup>Rü ngëmaäcü ya yimá äëxgacü rü guxügütáma cuxü namü rü cuga naxínü ngëxgumarüxü ya üaxcü rü tauemacü rü guxüguma nangexmagüechaxürüxü. <sup>6</sup>Rü chanaxwaxe nax yimá äëxgacü rü meama guxüma i norü duüxügüxü nangüxëëxü ñoma pucü i guxüma i nanetügü meama iwainecüxëëcürüxü. <sup>7</sup>Rü nüma äëxgacü yixüxüyane rü chanaxwaxe nax guxüma mea ixüxü rü guxü i ngunexügu nax nataxuxüma i chixexü rü nu. <sup>8</sup>Rü nüma rü name nixü i namaxä inacuáxü i guxüma i naane i éstearü taxtüwa inaxügü rü ñuxmata oéstearü márwa nangu. Rü ngëmaäcü i norü naane rü taxtü ya Eufrátewa tá inaxügü rü naane íyacuáxüwa tá nangu. <sup>9</sup>Rü ngëma äëxgacüarü uanügü i chianexügu ächiügüxü rü name nixü i yimá äëxgacüpexewa nügu nangexmagüxëxë rü naga naxínüe. <sup>10</sup>Rü ngëma Tárchiaanearü äëxgacü, rü Capaxügüarü äëxgacü, rü Chabáanearü äëxgacü, rü Chébaanearü äëxgacü, rü name nixü i guxüma i ngëma äëxgacügü

rü torü ãëxgacüxütawa nanana i norü ãmaregü rü diërugü. <sup>11</sup>Rü guxüma i nachixüanegüarü ãëxgacügü, rü name nixí i torü ãëxgacüpehexegu nacaxápüxügü. Rü guxüma i ngëma nachixüanegüarü duüxügü, rü name nixí i torü ãëxgacümexëwa nangexmagü. <sup>12</sup>Erü nüma ya yimá ãëxgacü rü tá tüxü ínapoxü ya yíxema ngearü ngëmaxüáxe ya nüxna caxe. Rü yíxema taxúema tüxü rüngüxëxéxe rü nüma tá tüxü narüngüxë. <sup>13</sup>Rü yíxema tama tügü icuaxüxügüxe, rü tá nüxü tangechaütümüxügü. Rü yíxema ngearü diëruãxgüxe rü tá tüxü ínapoxü. <sup>14</sup>Rü tá tüxü ínanguxüxëxë naxmëxwa i ngëma chixri tümamaxá icuáxü rü tüxü daxü. Erü ngëma tümaarü maxü rü naxçax rü namexechi. <sup>15</sup>iRü namaxü ya yimá ãëxgacü! iRü nüxna penaxá i ngëma Chabáanearü úru! iRü guxüguma Tupanapëxewa naxçax peyumüxëgü! iRü name nixí i guxüguma mexü nüxü naxüpetü! <sup>16</sup>iRü toxü rüngüxëxë, Pa Tupanax, nax toxü yaxoxochixüçax i torü trígugü rü toxü nabacaxüçax i torü tríguncügü i ma xpúneanewa ngëxmagüxü! iRü namuxëxë i norü o ngëma Líbanuanewa ngëxmagüxü i nanetügürüxü! iRü ñoma maxë i naanegüwa rüxügüxürüxü yamuxëxë i duüxügü i torü íanegüwa! <sup>17</sup>Rü chanaxwaxe nax guxüguma mea yimá ãëxgacüchiga yadexagüxü i duüxügü. Rü name nixí i guxüguma duüxügü nüxü nacuáchiga ñoma üaxcü guxüguma ibaxixürüxü. Rü chanaxwaxe nax guxüma i nachixüanecüãxgü i duüxügü nayauxgüxü i norü ngüxë rü ngëmaäcü guxüma i ngëma

nachixüanecüãxgü nüxü icuaxüxügüxü. <sup>18</sup>Namexechi ya Cori ya Tupana ya tóru Tupana ixcü. Rü nüxicatama nixí i naxüáxü i ngëma mexügü i taxügü i norü poramaxá naxüxü. <sup>19</sup>Rü name nixí i guxüguma nüxü ticuaxüxügü erü namexechi. Rü tanaxwaxe nax guxüma i ñaa naane rü namaxá napaxü i norü üüne. Rü ngëmaäcü yixí. <sup>20</sup>Rü nuxá nixí i yagüxü i norü yumüxëgü ya Dabí ya Ichaxí nane.

### Tupanaarü mecümachiga

**73** <sup>1</sup>Rü Tupana rü namaxá namecüma i ngëma Iraétanüxü i mexügu rüxünüxü. <sup>2</sup>Rü choma rü chiwixíchi rü wixgutaax nagu changu ga yema chixexü. <sup>3</sup>Yerü chixauxächi naxçax nax ñuxäcü namuarü ngëmaxüãxgüxü i ngëma duüxügü i nügü icuaxüxügüxü rü chixexü ügüxü. <sup>4</sup>Rü ngëma duüxügü rü tama nagu narüxünüxe tá nax nayuxü erü naporae rü taxuxüma nüxü naxüpetü. <sup>5</sup>Rü taguma ngüxü ningegü rü taguma toxguãxgürüxü nangularü diëruãxgü. <sup>6</sup>Rü ngëma nax nügü yacuaxüüügüxü rü norü ngaxäxürüxü nayaxixëgü. Rü ngëma dai nixí i guxüguma naaxëwa ngëxmaechaxü. <sup>7</sup>Rü norü ngümaxá naxetügü rü nanayigü, rü ngëma norü chixexü i nagu naxünüxü rü nangupetüxüchiana. <sup>8</sup>Rü Tupanaxü nacugüeäcüma chixexü namaxá nixugüe. Rü chixexümaxá rü maçmaxá duüxügüxü naxäxünegü. Rü nügü yacuaxüüügüäcüma nidexagü. <sup>9</sup>Rü chixri daxügüxü i naanechiga nidexagü rü ngextá ínaxüwa rü norü ngëmaxügümaxá nügü nicuaxüxügü. <sup>10</sup>Rü ngëmaçax i nümaxü i Tupanaarü

duñxügü rü düxwa nawe narüxĩ rü naga naxĩnue rü nanayauxgü i norü ore i nüxü yaxugüexũ. <sup>11</sup>Rü ngëma duñxügü i chixexũ rü nügümaxã ñanagürügü: “Nüma ya Tupana rü taxütãma nüxü nacuaç x i ngëma ixügüxũ. Rü yimã guxãétüwa ngëxmacü rü taxütãma nüxü nacuaçama”, ñanagürügü. <sup>12</sup>Rü dücax i ngëma duñxügü i chixri maxëxũ nax ñuxãcü taãxëãcüma yamuxëëxũ i norü ngëmaxügü! <sup>13</sup>Rü ngëmacax i chomax rü düxwa nagu charüxĩnü rü natüçaxmamare nixĩ nax mea chamaxũxũ rü chaugüna chadauxũ nax tama chixexũ chaxüxüçax. <sup>14</sup>Erü ñuxma nax Tupanawe charüxüxũ rü taxuwama choxũ name. Erü guxü i ngunexügu rü ngüxũ chinge rü guxchaxügü choxũ nangupetü. <sup>15</sup>Natürü, Pa Tupanax, rü ngëxguma chi ngëma nüma nagu naxĩnüexügu charüxĩnügü rü choma rü chi naechita chixri chamaxũ i curü duñxügü. <sup>16</sup>Rü yexguma ga choma rü pora chaxü nax nüxü chacuáxüçax nax tñxcüü i ngëma chixri maxëxũ rü poraãcü namuarü ngëmaxüãxgüxũ natürü ngëma yaxögüxũ rü ngüxũ yangegüxũ. Natürü choxũ naguxcha nax nüxü chacúaxũ. <sup>17</sup>Natürü yexguma cupatagu chaxüçuxgu, Pa Tupanax, rü yexguma nixĩ ga nüxü chicuaxãchixũ nax ngextã tá naxĩxũ i ngëma chixexũ ügüxũ. <sup>18</sup>Rü cuma rü marü nüxü quingex nax ngëmaãcü norü chixexügu nayixüçax rü ngëxma yanaxoxüçax i norü guxüma. <sup>19-20</sup>Rü ngürüãchimare tá narüxo. Rü norü muümaxã tá nayue. Rü ngëxguma cumax, Pa Corix, ícurüdagxu ñoma wüxíxe pewa írudaxürüxũ, rü cuma rü tá nüxü cuxo erü tama aixcüma mea

cupëxewa namaxë. <sup>21</sup>Rü noxri ga choma rü chixãüxãchi naxçax nax ñuxãcü namuarü ngëmaxüãxgüxũ i ngëma chixexũ ügüxũ, rü poraãcü chauãëwa nangux. <sup>22</sup>Yerü wüxi ga ngëãemarexũ chixĩ ga yexguma rü tama chauãëxũ chachuax. Rü cupëxewa, Pa Tupanax, rü ñoma wüxi ga naeürüümare chixĩ. <sup>23</sup>Natürü i choma rü guxüguma cugu charüxĩnü. Rü chorü tügünemëxëgu cuyayauxãchi. <sup>24</sup>Rü ngëma curü ucüxëmaxã choxũ icuyarüwëxãchixëxë. Rü wüxi i ngunexũ rü taãxëãcüma tá choxũ cuyaxu i daxügüxũ i naanewa. <sup>25</sup>¿Rü texé tixĩ ya chomücü i daxügüxũ i naanewa? Rü cuma nixĩ, Pa Tupanax. Rü cuxicatama nixĩ i chacuxwaxexũ i ñoma i naanewa rü taxuxüma i to. <sup>26</sup>Rü ñoma i naanewa rü guxüma i ñaa chaxune rü inayarüxo, rü ngëma chorü pora rü ñaxtüwa naxü. Natürü i cumax, Pa Tupanax, rü guxügütãma chorü Tupana quixĩ. Rü cuma nixĩ i choxũ cuporaxëëxũ i chorü maxüwa. <sup>27</sup>Rü ngëma duñxügü i cuxna ixígachixũ rü tá nayue. Rü tá icuyanaxoxëxë i ngëma tama aixcüma cuga ñnüexũ. <sup>28</sup>Natürü i chomax rü yexeraãcü tá cuxna changaixcama. Erü ngëma nixĩ i chaüxçax rümemaexũ. Rü cumax, Pa Cori Pa Tupanax, rü chorü poxüruxũ quixĩ. Rü ngëmacax tá nüxü chixuchiga i guxüma i ngëma chaüxçax cuxüxũ.

**Yumüxë i nawa naxçax ínacaxaxũ nax norü uanügümëxëwa ínanguxüxüçax i Tupanaarü duñxügü**

**74** <sup>1</sup>Pa Tupanax, toma nax curü duñxügü nax tixügüxũ, rü ¿tñxcüü toxü ícuwogüxüchi? ¿Rü



tj̄xcũũ tomaxã cunu? <sup>2</sup>iRũ nüxna nacuaxãchi i curũ duũxũgũ ga woetama nüxcũma cudexũ! Rũ yemagũ nixĩ ga norũ uanũgũmexẽwa ícunguxũxẽxũ nax curũ duũxũgũ yixĩgũxũcax. iRũ nüxna nacuaxãchi ya yima maxpũne ya Chióũ ga nagu cuxãchixũne! <sup>3</sup>iRũ nua naxũ rũ íyadau ya daa curũ ñane nax guxũwama nagu napogũene! Rũ yema curũ uanũgũ rũ cupatawa rũ nagu napogũe ga guxũma ga taxacũ yẽma yexmagũxũ. <sup>4</sup>Rũ ñuxma i ngẽma curũ uanũgũ rũ noxrũtama wiyaegũgu nawiyaegũ nawa ya cupata erũ marũ narũporamaegũ. Rũ yimá norũ woneragũ rũ ngẽma nanawãixnagũgũ. <sup>5-6</sup>Rũ ñoma naixnecũwa üxũ imaxũrũxũ rũ nagu namagũe rũ nagu napogũe ga guxũma ga norũ meruũgũ ga guma cupata. <sup>7</sup>Rũ guma cupata ga üünene rũ nagu nanangixgũ rũ nayawaxẽegũ. Rũ yemaacũ nanachixexẽegũ ga guma cupata. <sup>8</sup>Rũ ngẽma torũ uanũgũ rũ nagu narũxinũe nax noxtacũma toxũ nadaixũchixũ. Rũ torũ ñanegũwa rũ ñanagu ga torũ ngutaquexepataũgũ ga nawa cuxũ ticuaxũũgũne. <sup>9</sup>Rũ ñuxma rũ marũ nataxuma ya cupata rũ nataxuma i curũ orearũ uruũgũ. Rũ tama nüxũ tacuax nax ñuxgu tá nangupetũxũ i ñaa guxchaxũ i toétiwa ngẽmaxũ. <sup>10</sup>Pa Tupanax ññuxguxũratáta nixĩ i nüxũ nachauexũ i ngẽma torũ uanũgũ nax chixri tomaxã nachopetũxũ? ¿Rũ ngẽxgumarũxũ ta rũ ñuxguxũratáta nixĩ i nüxũ nachauexũ nax cumaxã chixexũ yaxugũexũ? <sup>11</sup>¿Rũ tj̄xcũũ tama ícunawéxchaxũ i curũ pora? ¿Rũ tj̄xcũũ ngẽma nüxũ cudawenũmare? <sup>12</sup>Rũ nüxcũmacürüwatama rũ cuma nixĩ ga

torũ ãẽxgacũ quixĩxũ. Rũ ñoma i naanewa rũ muxũma ga ãẽxgacũgũxũ curũporamae. <sup>13</sup>Rũ cuma rũ curũ poramaxã cuyayauxye ga már-arũ dexã. Rũ yema ngoxogũ ga márwa yexmagũxũ rũ cunadaieru. <sup>14</sup>Rũ yema ngoxo ga Leviatãũ rũ cuyamaxeru. Rũ yema aigũ ga dauxchitacũãxna cunaxã nax nawemũ yixĩxũcax. <sup>15</sup>Rũ cuma nixĩ ga cungóexẽxũ ga dexaarũ baibeangũxũ rũ natũgũ. Rũ cuma nixĩ ga cuyapagũxẽxũ ga natũgũ ga noxri taguma ngearũ dexããxgũxũ. <sup>16</sup>Rũ cuma nixĩ ga cuxũxũ ga ngunexũ rũ chũtaxũ. Rũ yima tauemacũ rũ üaxcũ, rũ cuma nixĩ ga namagu cuyaxũxẽechigũxũ ga wũxichigũ. <sup>17</sup>Rũ cuma nixĩ ga cuxunetaxũ ga ngextá tá yacuáxũ ga naane. Rũ cuma nixĩ ga cungoxẽxũ ga mucũ rũ taunecũ. <sup>18</sup>Pa Corix itaxũ i nüxũ icurũngũmaxũ i ñuxãcũ ngẽma curũ uanũãxgũ cumaxã chixexũ yaxugũexũ! iRũ dũcax i ngẽma duũxũgũ i tama naãxẽxũ cuaxgũxũ rũ ñuxãcũ chixri cuchiga nidexagũ! <sup>19</sup>iRũ taxũ i toxũ curũngũmaxũ! Erũ muxtucuxacũgürũxũ taturae. iRũ taxũ i torũ uanũgũ i dũraexũmexẽwa toxũ cuwogũxũ! <sup>20</sup>iRũ nüxna nacuaxãchi ga yema curũ uneta ga torũ oxigũmaxã cuxũxũ! Erũ ñuxma rũ ñaa torũ nachixũane rũ daimaxã nanapá i guxũwama. <sup>21</sup>iRũ taxũ i cunangexrũxũ i ngẽxguma ngẽma duũxũgũ i poraexũ chixri namaxã chopetũgu i ngẽma ngearũ ngẽmaxũãxgũxũ! iÉcũ nüxũ natauxchaxẽxẽ nax cuxũ yacuaxũũgũxũcax i ngẽma ngearũ díeruãxgũxũ rũ ngẽma ngearũ ngẽmaxũãxgũxũ! <sup>22</sup>iInachi, Pa Tupanax,

rü ínapoxũ i ngẽma cuxçax mexũ! iRü nüxna nacuaxãchi nax torü uanügü i naechitamare maxẽxũ rü guxũguma chixexũ cumaxã nixugüe! <sup>23</sup>iRü taxú i cunangexrũxũ i norü guchigagü i ngẽma curü uanügü! Erü wüxichigü i ngunexũgu rü niyexerachigü i ngẽma norü dexa i chixexũ.

**Tupana rü ãẽxgacü ya duũxũgüarü maxũarü ngugüruxũ ya mecü nixí**

**75** <sup>1</sup>Moxẽ cuxna taxã, Pa Tupanax, moxẽ cuxna taxã. Rü cuxna nixí i tacaxaxũ i torü yumüxẽwa. Rü ngẽma mexũgü i curü poramaxã cuxũxũchiga nixí i tawiyaegũxũ. <sup>2</sup>Rü nüma ya Cori ya Tupana rü ñanagürü: “Ngẽxguma nawa nanguxgu i ngẽma ngunexũ i choma nüxũ chaxunetaxũ, rü aixcũma tá nüxna chaca i wüxichigü i duũxũ i norü maxũchiga. <sup>3</sup>Rü ngẽxguma naxĩãxãchigu i ñaa naane guũma i norü duũxũgũmaxã, rü chomatama nixí i namaxã ichacuáxũ nax tama yaxũgachixũçax i namaxũwa”, ñanagürü. <sup>4</sup>Rü choma ya Tupana rü ñachagürü nüxũ i ngẽma nügü icuaxũxũgũxũ rü ngẽma chixexũ ügũxũ: “iTaxú i pegü íperütägũxũ rü pegü picuaxũügũxũ! <sup>5</sup>iRü taxú i perü porachiga pidexagũxũ! Rü ngẽxguma pidexagũgu irũ taxú i choxũ perüyexeragũchaxũxũ namaxã i perü cuax!” ñachagürü. <sup>6</sup>Rü ngẽma tórtü ngũxẽẽ rü tama nachixũanegü i éstewa ngẽmagũxũwa rüçna ngẽma nachixũanegü i oéstewa ngẽmagũxũwa, rü bai i ngẽma nachixũanegü i súrwa ngẽmagũxũwa ne naxũ. <sup>7</sup>Natürü nüma ya Tupana nixí

ya aixcũma ãẽxgacü ixĩcü rü nüma nixí i nangugüãxũ i wüxíxechigüarü maxũ. Rü tímáxe rü tüxũ naxãneexẽxẽ rü toguxe rü tüxũ nicuaxũxũ. <sup>8</sup>Rü nüma ya Cori ya Tupana rü naxmexwa nangexma i ngẽma cópa i norü nu nawa ngẽxmaxũ ñoma wüxi ya bínu ya ngúchiãxũchicürũxũ. Rü ngẽxguma inabaagu i ngẽma norü nu naétü i ngẽma duũxũgü i chixexũ ügũxũ rü guxũwatáma nangu rü taxuxũtáma niña. <sup>9</sup>Natürü i choma rü guxũgutáma nüxũ chixuchiga ya yimá Acóbuarü Tupana. Rü chorü wiyaemaxã tá nüxũ chicuaxũxũ. <sup>10</sup>Erü nüma rü tá inayanaxoxẽxẽ i norü chixexũgü i nügü namaxã yacuaxũügũxũ i ngẽma duũxũgü i chixri maxẽxũ. Natürü yíxema mexũ ügũxe rü nüma rü tá tüxũ nicuaxũxũ.

**Tupana rü narüporamae**

**76** <sup>1</sup>Rü Yudáanewa rü duũxũgü rü meama Tupanaxũ nacuaxgü. Rü nüma rü natachigaxũchi i guxũwama i Iraéanewa. <sup>2</sup>Rü yima napata rü Chióüarü ma xpúnewa nangexma i Yerucharéüarü ñanewa. <sup>3</sup>Rü yéma nixí ga nagu nabügũxũ ga tórtü uanügüarü naxnegü ga poxũruũgü rü taragü rü würagü rü chuchigü. <sup>4</sup>iRü cumax, Pa Corix, rü guxũarü yexera cuxãücũmaxũchi! Rü yima ma xpúnegü i guxũguma ngẽxmaechanearü yexera quixí. <sup>5</sup>Rü yema tama cuxũ muñechaũxũ rü cuma rü ícunawoxũ. Rü yema nügü írüpörögũxũ rü taxucürüwama taxacü cumaxã naxüe, rü nayuemare. <sup>6</sup>Rü yema churaragü ga cowaruétügu íxũ rü wüxigu norü

cowarugümaxã ínayachaxgütanüãchi rü taxuxüma naxüe ga yexguma nüxna cuhogügux, Pa Acóbuarü Tupanax. 7Erü cuma rü cuxãücümaxüchi. ¿Rü texé tabora nax cupexewa itachiamaxü i ngëxguma cuma túmamaxã cunuxgu? 8-9Rü daxüguxü i naanewatama marü cunaxuegu i curü poxcu namaxã i ngëma chixexü ügüxü. Rü ngëmacax i ñoma i naane rü niduxryx rü nachianemare i ngëxguma cunaxueguxgu i curü poxcu naxcax i ngëma chixexü ügüxü rü ícunanguxüxëëgu i ngëma curü duüxügü i togü chixri namaxã icuaxgüxü. 10Rü ngëma norü nu i ngëma cumaxã rüxuanügüxü rü curü cuaxüxüruxü tá nayanguxuchi. Rü woo ngëxguma íxrariüwa nanuegu rü curü ngaxãërxü nayanguxuchi i ngëma. 11Rü Tupanamaxã ipexunetagu, natürü aixcüma peyanguxëxë i ngëma perü uneta! Rü guxãma i pema ya yimá äücümacüarü duüxügü pixígüxü rü iëcü nüxna penana i perü ämaregü! 12Rü ngëma äëxgacügü i duüxügümaxã icuaxgüxü rü nüma ya Tupana rü nanadai. Rü ngëmaäcü nanamuüexëxë i ngëma nachixüanegüarü äëxgacügü.

**Naxcax ínicuaxgü nax ñuxäcü Tupana Equítuanewa ínanguxüxëëxü**

**77** 1Rü tagaäcü Tupanana chaca i chorü yumüxëwa nax choxü naxínüxücax. 2Rü ngëma ngunexü i guxchaxüwa changexmagu rü Tupanacax chadau. Rü taguma nüxü charüchau nax chaxunagümexëäcüma chütacü chayumüxëxü. Natürü woo ngëmaäcü chayumüxë rü taguma

chataãxë. 3Rü nüxna chacuaxãchi ya Tupana rü chaxaxu. Rü Tupanaarü ngüxëëcax chadau, natürü changechaü erü tama paxa ínangu i norü ngüxëë. 4Rü cumax, Pa Tupanax, rü tama choxü cuyaxtaxëxë. Rü ngëma nax poraäcü chanaxixãchiãëxü rü taxucürüwa chidexa. 5Rü nüxna chacuaxãchi ga yema ngunexügü rü taunecügü ga nagu mexü choxü ngupetüxü. 6Rü nüxna chacuaxãchi ga yexguma chütacü taãxëäcüma chawiyaeagu. Rü chauãxëwa nagu charüxínü rü chaugüna chaca: 7“¿Ëxna guxügütama i nanuxü ya Cori ya Tupana? ¿Rü taxütama ëxna wena tamaxã nangüxmüxü? 8¿Rü ëxna marü nüxü narüchau nax tüxü nangechaxüxü? ¿Ëxna nüxü narüngümaxüchi ga norü uneta ga nüxü yaxuxü? 9¿Ëxna nüxü narüxo ya Tupana nax namecümaxü? ¿Ëxna tamaxã nanuxüchi rü ngëmacax marü tama nüxü tangechaütümüxügü?” ñachagürü. 10Rü ngëma yexera choxü ngüxü nixí i ngëxguma nagu charüxínügu nax nüma ya Tupana ya guxãétüwa ngëxmacü rü marü tama noxrirüüäcü tamaxã yixixü. 11Rü choma rü tá nüxna chacuaxãchi ga yema mexügü ga üpa norü poramaxã naxüxü. 12Rü nagu tá charüxínü ga guxüma ga yema naxüxü. 13Pa Tupanax, cuma rü cuxüüne rü ngëmacax cunaxü i ngëma cuxüxü. Rü nataxuma i taxacü i to i tupana i cumaxã wüxigüxü. 14Erü cuma nixí i Tupana i guxüma i ngëma mexü cuxüxü. Rü guxü i nachixüanecüãx i duüxügüpexewa cunawëx i curü pora. 15Rü ngëma curü poramaxã nixí i Equítuanewa ícunanguxüxëëxü i curü duüxügü i Acóbutaagü rü Yúchetaagü.

<sup>16</sup>Pa Tupanax, rü yexguma cuxĩ nadaxgu ga yema már rü cuxĩ namuĩ. Rü niduxruxchixü woo ínamatamaxüwa. <sup>17</sup>Rü yema caixanexügü rü nanapuxexẽ. Rü dauxüwa rü niduruane rü guxüwama naxãemaciãne. <sup>18</sup>Rü yema cuga ga duruanexürüxü ixixü rü buanecü ga íxãüxemaciãwa inanaxü. Rü guma ãemaciü rü ñoma ga naanexü nangónexexẽ. Rü naxíãxãchi ga ñaa naane. <sup>19</sup>Rü cuma rü márwaama cuxü rü yemaacü cunaxümaxü ga dexá. Natürü taxüema nüxü tatau ga cucutüchica. <sup>20</sup>Rü cunamu ga Moiché rü Aróü nax yagagiãxüçax ga curü duüxügü ñoma carnérugü igagüxürüxü.

**Tupanaarü ngüxexẽ ga nüxcüma norü duüxügüçax naxüxü**

**78** <sup>1</sup>Pa Chorü Duüxügüx inaga pexĩnie i ñaa ore i pexü changüxexẽxü! iRü iperüxĩnie i ñaa pemaxã nüxü chixuxü! <sup>2</sup>Rü cuãxruügu ixuxü i oreãcü tá pemaxã chidexa. Rü tá pemaxã nüxü chixu i ore i exüguxü ga nüxcüma taguma texe nüxü cuáxü. <sup>3-4</sup>Rü yema ore ga marü nüxü ixĩnüexü rü marü nüxü icuáxü ga tórü oxigü marü tamaxã nüxü ixugügüxü rü taxütãma taxacügüchaxwa itayacux. Rü ngẽmaãcü i ngẽma taweama ügüxü i duüxügü tá tórü Corixü nicuãxüxügü rü tá naxacügümaxã nüxü nixugü nax ñuxãcü naporaxü rü ñuxãcü yema norü poramaxã taxü ga mexü naxüxü. <sup>5-6</sup>Rü nüma ga Tupana rü tórü oxü ga Acóbutanüxüna nanaxã ga norü mugü rü namaxã nüxü nixu nax ñuxãcü tá namaxexü. Rü tórü oxigüxü namu nax naxacügüxü nangüxexẽxüçax nax

ngẽma naweama ügüxü i nataagü rü ta nüxü nacuãxgüxüçax rü nümagü rü ta naxacügüxü nangüxexẽxüçax. <sup>7</sup>Yerü nüma ga Tupana nanaxwaxe nax yema tórü oxigüweama ügüxü ga duüxügü rü ta nagu nax yaxögüãxüçax nax tama nüxü iyanangümaexüçax ga yema taxü ga mexü ga nüxcüma naxüxü rü ngẽmaãcü naga naxĩnüexüçax i ngẽma norü mugü. <sup>8</sup>Rü yemaacü nanamu ga Tupana yerü tama nanaxwaxe nax yema duüxügü norü oxigürüxü yixigüxüçax. Yerü nümagü ga norü oxigü rü tama Tupanaga naxĩnie rü tama naãxexü nicuãx rü tama aixcüma Tupanawe narüxü rü tama naxçax namaxẽ. <sup>9</sup>Rü yema Efraítanüxügü rü woo ga nüma rü nixãxne namaxã ga norü würagü rü chuchigü rü tama inaxãgüchãü ga yexguma nügü nadaxgu, rü norü uanügüchaxwa nibuxmümare. <sup>10</sup>Rü tama nayangüxexẽgü ga yema norü uneta ga Tupanamaxã nüxü yaxugüxü. Rü yema Tupanaarü mugü rü tama naga naxĩniechãü. <sup>11</sup>Rü nüxü inarüngümae ga yema mexügü ga taxü ga Tupana norü poramaxã napexewa üxü. <sup>12</sup>Rü Equítuanewa ga Choãüanewa rü Tupana rü aixcüma taxü ga mexü naxü napexewa ga norü oxigü. <sup>13</sup>Rü yema már rü nayapoxyexüchixü. Rü ñoma naxãtapüxürüxü nayaxixexẽ ga yema dexá nax yemaacü paanexüwa yachoüxüçax. <sup>14</sup>Rü ngunecü rü wüxi ga caixanexü nixü ga norü cuãxruü ga napexegu ixüxü. Rü chütacü rü wüxi ga üxüema nixü ga norü cuãxruü. <sup>15</sup>Rü yema chianexüwa ga ngextã ínataxuxüwa ga dexá rü wüxi ga maxpúnetapüxgu naponeta. Rü yéma

nayagoxũchixũ ga dexá rü yemaacũ meama naxaxegũ ga guxũma. <sup>16</sup>Rü nümatama nixĩ ga Tupana ga yema ma xpũnetapũxwa yagóxũchiuxẽẽaxũ ga taxũ ga dexá naxçax ga yema norũ duũxũgũ. <sup>17</sup>Natürũ ga nümagũ ga norũ duũxũgũ rü chixexũ naxũgũama napexewa ya yimá guxãétüwa ngẽxmacũ rü tama naga naxĩnũechaũ ga ínachianexũwa. <sup>18</sup>Rü nüxũ naxũgũmarechaũ, rü yemaçax naxçax ínacagũ ga namachi ga nüxũ chíxéga. <sup>19</sup>Rü chixri Tupanachiga nidexagũ rü ñanagürügũ: “¿Ëxna Tupanaaxũ natauxchaxũ nax tũxna naxããxũ i ñna i mexũ i nua chianexũwa? <sup>20</sup>Rü aixcũma nixĩ ga Tupana ga nangũxtexẽẽaxũ ga guma nuta ga taxũchicũ. Rũ aixcũma yéma nayagoxũchixũ ga dexá ñoma natürũxũ rü ga paanexũ rü nibaxichi. ¿Natürũ nüxũ natauxchaxũ nax paũ tũxna naxãxũ rü namachi tũxna naxãxũ i yixema nax norũ duũxũgũ ixĩgũxũ?” ñanagürügũ. <sup>21</sup>Rü yexguma Tupana nüxũ ñnũgu ga yemaacũ nax yadexagũxũ, rü poraãcũ nanu namaxã ga yema Iraétanũxũgũ. Rũ yema norũ nu rü ñoma wũxi ya üxũemarũxũ nixĩ. <sup>22</sup>Yerũ ga nümagũ rü tama aixcũma Tupanagu nayaxõgũ rü nagu naxĩnũegu rü tama nüxũ natauxcha nax nüma ya Tupana nüxũ rüngũxẽẽxũ. <sup>23-24</sup>Natürũ ga nüma ga Tupana rü caixanexũgũxũ namu nax yema duũxũgũçax nayixẽẽaxũçax ga nawemüruxũ ga paũ ga dauxũcüãx ga maná. <sup>25</sup>Rü yemaacũ Tupanaarũ orearũ ngeruxũ i dauxũcüãxwemũ nangõxgũ ga tóru oxigũ. Rũ nüma ga Tupana rü meama nanachibüexẽxẽ. <sup>26</sup>Rü Tupana rü norũ

poramaxã ínanganguxẽxẽ ga buanecũ ga éstewaama ne üxcũ rü buanecũ ga sũrwaama ne üxcũ, rü poraãcũ nibuane. <sup>27</sup>Rü Tupana rü guma buanecũgu ínangangugũxẽxẽ ga muxũma ga ngugagũ ñoma naxnecũtẽxerũxũ ixĩxũ nax namuxũchixũ. <sup>28</sup>Rü yema duũxũgũ ínaxãchiũgũxũgu Tupana nanayixẽxẽ ga yema muxũchixũ ga ngugagũ. <sup>29</sup>Rü yema nangõxgũ rü ñyuxmata mea nüxũ yangu. Rũ yemaacũ nixĩ ga Tupana ga aixcũma nüxna naxããxũ ga yema naxçax ínacagũxũ. <sup>30-31</sup>Natürũ yexguma yexwacax yangugũgutama rü naaxwatama nayexmagũyane ga nawemũ, rü Tupana norũ numaxã nanapoxcue. Rũ yema yatũgũ ga rüporamaegũxũxũ nadai. Rũ yemaacũ nanayuexẽxẽ ga yema rümemagũxũ ga yatũgũ ga Iraétanũxũ. <sup>32</sup>Rü woo nax yemaacũ Tupana napoxcuexũ natürũ wenaxarũ chixexũ nixũetanũama rü tama aixcũma nagu narũxĩnũe ga yema taxũ ga mexũgũ ga Tupana norũ poramaxã napexewa naxũxũ. <sup>33</sup>Rü yemaçax nixĩ ga Tupana ga poxcu ga aũcũmaxũchixũ naxçax ínanguxẽẽxũ, rü noxtacũma nanadai ga muxũma naxũpa ga nawa nax nanguxũ ga yema ngunexũ ga woechitama nagu nayuexũ. <sup>34-35</sup>Rü yexguma Tupana napoxcueguama ga yema duũxũgũ rü yexgumama poraãcũ naxçax nadaugũ rü naxçax nawoegu. Rũ nüxna nacuaçachie ya yimá Tupana ya guxũétüwa ngẽxmacũ ga norũ dauruxũ rü norũ poxũruxũ ixĩcũ. <sup>36</sup>Natürũ norũ dexawaxicatama nixĩ i nüxũ yaxugũexũ nax nawe naxĩxũ, natürũ norũ maxũwa rü tama aixcũma ngẽmagu narũxĩnũe. <sup>37</sup>Rü taguma aixcũma nawe narũxĩ rü

taguma aixcūma nayanguxēēgū ga norū unetagū ga Tupanamaxā nūxū yaxugūexū. <sup>38</sup>Natürü woo nax yemaacū nax yixīgūxū, rü nūma ga Tupana rü nūxū nangechaxūtümūxūgūama. Rū nūxū nūxū inarūngūma ga norū chixexūgū rü tama guxūxū nadai. Rū muexpūxcūna ga yexguma namaxā nanuxgu rü yaxna namaxā naxīnū rü tama naga naxīnū ga norū nu. <sup>39</sup>Rū nūma ga Tupana rü nūxna nacūaxāchi nax duūxūgūmare yixīgūxū rü ñoma wūxi ya buanecū ya ūpetūcū rü taguma táegucūrūxū nixī i norū maxū. <sup>40</sup>Rū muexpūxcūna tama Tupanaga naxīnūe rü yema ínachianexūwa rü ngūxū Tupanaxū ningexēēgū. <sup>41</sup>Natürü wenaxarū nūxū naxūgūxū rü yemaacū poraācū nanangechaūxēēgū ya yimá Iraétanūxiarū Tupana ya Ūinecu. <sup>42</sup>Rū tama nūxna nacūaxāchie ga yema ngunexū ga nagu Tupana norū uanūgūmexēwa ínanguxūxēēgux. <sup>43</sup>Rū nūxū narūngūmae ga yema taxū ga mexūgū ga Equítuanewa naxçax naxūxū. <sup>44</sup>Rū tama nagu narūxīnūe ga yexguma nagūxū yanguxuchixēēāgu ga nextūgū, rü nūma ga Equítuanecūāxgū rü taxucūrūwa nawa naxaxegū. <sup>45</sup>Rū nūma ga Tupana rü yéma Equítuanecūāxtanūwa nanamugū ga muxūchixū ga murenūgū rü cururugū ga guxūwama namaxā āanemarexū. <sup>46</sup>Rū yema ōxmīgūxū rü munūgūxū nanangōxēxē ga yema Equítuanecūāxarū nanetūgū ga nūmatama nawa napuracūexū. <sup>47</sup>Rū gáuxūmaxā nanadai ga norū nanetūgū ga iguéragū rü úbagū. <sup>48</sup>Rū yexgumarūxū ta ga norū wocagū rü

norū carnérugū rü nayue ga yexguma gáuxū rü āēmacū naétūgu yixgu. <sup>49</sup>Rū yemaacū ga nūma ga Tupana rü norū numaxā nanapoxcue ga yema duūxūgū. Rū taxū ga guxchaxū rü ngechaxū naxçax ínanguxēxē. Rū nanamu ga norū orearū ngerūgū ga dauxūcūāx nax nadaiaxūçax ga yema duūxūgū. <sup>50</sup>Rū yemaacū ga nūma ga Tupana rü tama yaxna namaxā naxīnū ga norū nu. Rū yemaçax tama nūxū nangechaūtümūxūgū ga yema Equítuanecūāxgū rü noxtacūma nanayuexēxē. <sup>51</sup>Rū yema naanewa rü guxūnema ga ípatawachigū rü nayamax ga yema Equítuanecūāx nane ga nūxíraxūxū. <sup>52</sup>Rū Equítuanewa Iraétanūxūgūxū ínagaxū ñoma carnérugū naxpūūwa ígaxūxūrtūxū. Rū chianexūwa nanagagū ga yema norū duūxūgū ga Iraétanūxūgū. <sup>53</sup>Rū yemaacū meama nūxna nadau nax tama yema Equítuanecūāxū namuūexūçax. Natürü yema norū uanūgū ga nawe íngēxūtanūxū rü yema már-arū dexá rü naétū nanagoxūchixūxēxē ga yexguma nawe yachoūgu. <sup>54-55</sup>Rū nūma ga Tupana rü yema naane ga nūma nagu naxāchiūxūwa nanagagū ga yema norū duūxūgū ga Iraétanūxūgū. Rū nawa nanagagū ga yema maçpūneane ga nūmatama nawa ínawoxūāxū ga yema duūxūgū ga nūxíra yexma āchiūgūxū ga tama nūxū yaxōgūxū. Rū wūxitūcumūchigūxū nayanu ga yema naane. Rū yemagu nixāchiūgūchigū. <sup>56</sup>Natürü ga nūma ga yema Iraétanūxūgū rü nūxū naxūgūmare ya yimá Tupana ya guxāétūwa ngēxmacū rü namaxā nanue rü tama naga

naxĩnũiechaũ ga norũ mugũ. <sup>57</sup>Rũ yema norũ oxigũrũũtama nũxna nixĩgachitanũ rũ tama aixcũma nũxũ nayaxõgũ. Rũ ñoma wũxi ya wũra ya wũxũnerũxũ nixĩgũ. <sup>58</sup>Rũ Tupanaxũ nanuxẽegũ namaxã ga yema amaregũ ga tupanagnetagũcax igrũxũ. Rũ nũxũ nicuaxũxũgũ ga tupanagnetachicũnaaxãgũ rũ yemaacũ Tupanaãẽwa nananguxẽegũ. <sup>59</sup>Rũ yemaxũ nadaũxgu ga nũma ga Tupana rũ poraãcũ nanu rũ yema Iraétanũxũgũna nixũgachi. <sup>60</sup>Rũ nũxna nixũ ga guma napata ga naxchirunaxcax ga duũxũgũtanũwa yexmane ga Chĩruwa. <sup>61</sup>Rũ nanayexrũ nax yema Iraéanecũãxgũarũ uanũgũ yangegũxũcax ga yema baũ ga norũ mugũ nawa yemaxũ. <sup>62</sup>Rũ nũma ga Tupana rũ poraãcũxũchi namaxã nanu ga yema norũ duũxũgũ ga Iraéanecũãxgũ rũ yemacax norũ uanũgũaxũ nanatauxchaxẽxẽ nax nadaiaxũcax. <sup>63</sup>Rũ norũ ngextũxũcũgũ rũ norũ uanũgũ rũ ñanagu rũ yemacax taxucũrũwa nixãtexacũgũ ga yema duũxũgũ. <sup>64</sup>Rũ yema norũ chacherdõtegũ rũ taramaxã nanadai. Rũ naxmãxgũ rũ ta tayue rũ yemacax tataxuma ga yutegũxe ga tũmatecax axuxe. <sup>65</sup>Natũrũ yemawena ga nũma ga Cori ya Tupana rũ ñoma wũxi i pewa ñbãixãchixũrũxũ nixĩ. Rũ wũxi i churara i bĩnumaxã poraãxẽxũrũxũ nixĩ. <sup>66</sup>Rũ yema namaxã rũxuanũgũxũ narũporamae rũ nayabuxmũxẽxẽ. Rũ yemaacũ guxũguma nanaxãneexẽxẽ. <sup>67</sup>Rũ tama nanaxwãxe nax Yũche nane ga Efraĩtanũxũwa ne naxĩxũ ga Iraéanecũãxgũarũ ãẽxgacũgũ. <sup>68</sup>Rũ yemacax nũxũ naxuneta nax

Yudátanũxũwa ne naxĩxũ ga norũ duũxũgũarũ ãẽxgacũgũ. Rũ nũxũ naxuneta ga mãxpũne ga Chioũ nax gumawa nayemaxũcax ga napata. <sup>69</sup>Rũ yexma nanaxũ ga napata ga máchanene ga dauxũwa nguxũne nax guxũguma ngẽma nangexmaechaxũcax ñoma i naane ngẽxmaechaxũrũxũ. <sup>70</sup>Rũ nũxũ naxuneta ga guma norũ duũ ga Dabĩ ga carnẽrugũarũ dauruxũ ixĩcũ. <sup>71</sup>Rũ yemaacũ yema carnẽrugũwe nax ñnaxũxũwa nanayaxu nax norũ duũxũgũ ga Iraétanũxũgũna nadauxũcax. <sup>72</sup>Rũ nũma ga Dabĩ rũ meama nũxna nadau ga yema Tupanaarũ duũxũgũ rũ meama Tupana naxwãxexũãcũma namaxã inacuax.

#### Poraãcũ ngũxũ ningegũ yerũ

#### Yerucharẽũgu napogũe ga norũ uanũgũ

**79** <sup>1</sup>Pa Tupanax, ngẽma tama cuxũ yaxõgũxũ rũ naxcax ñnayaxũãchi ya yima cupata ya tũnene rũ nanaxãũãchixẽxẽ. Rũ nũma ya ñane ya Yerucharẽũ rũ nagu napogũe. <sup>2</sup>Rũ ngẽma naxũnegũ i ngẽma aixcũma curũ duũxũgũ ixĩgũxũ rũ ngẽma nanawogũ nax ngẽmaãcũ echawemũ rũ aigũwemũ yixĩgũxũcax. <sup>3</sup>Rũ ñoma dexã ñbaxũrũxũ nixĩ ga guma nagũ ga Yerucharẽũarũ namagũwa. Rũ nataxuma nax texẽ inataxgũxũ. <sup>4</sup>Rũ ngẽma nachixũãnegũ i torũ ngaicamãna ngẽxmagũxũ rũ togu nĩdauxcũraxũgũ rũ toxũ nacugũe. <sup>5</sup>Pa Cori Pa Tupanax çrũ ñuxguxĩratãta i nũxũ curũchaxũxũ nax tomaxã cunuxũ? çRũ ãxna guxũgutãma ñoma wũxi ya ùxũrũxũ niyauraecha i ngẽma curũ nu? <sup>6</sup>Irũ ãcũ namaxã nanu i ngẽma nachixũãnegũ i tama cuxũ yaxõgũxũ rũ

taguma yumüxēwa cuxna cagüexü!  
 7Yerü nümagü nixī ga totanüxü ya  
 Acóbutanüxüxü nadaixü rü guxüwama  
 nachixexēēaxü ga tochixüane. <sup>8</sup>iRü taxü  
 i toguama cuyangutanüxēēxü ga yema  
 chixexügü ga torü oxigü ügüxü! iRü  
 paxa cuxü tangechaxütümüxügü! Erü  
 marü toxü narüyexera i ñaa  
 guxchaxügü. <sup>9</sup>Pa Tupana ya Torü  
 Maxēxēeruxüx irü curü üünegagu rü  
 toxü rüngüxēxē, rü toxü ínangüxüxēxē,  
 rü toxü nüxü irüngüma i torü chixexü!  
<sup>10</sup>Rü ngēma duüxügü i tama cuxü  
 yaxögüxü rü taxucaxma tūxcüü  
 ñanagürügü: “¿Ngecix nixī ya yimá norü  
 Tupana?” ñanagürügü. Rü ñuxma rü  
 nüxü tadauxchaü nax ñuxacü tá  
 cunadaixü i ngēma torü uanügü ga curü  
 duüxügüxü daixü. Rü woo i ngēma  
 nachixüanecüāxgü i tama cuxü  
 yaxögüxü rü nümagü rü ta nüxü  
 nadaugüxüçax i ngēma cuxüxü. <sup>11</sup>iRü  
 nüxü naxīnü i norü axu i ngēma  
 totanüxügü ipoxcuxü! iRü curü  
 poramaxā ínangüxüxēēama i ngēma  
 totanüxügü i dai namaxā naxuegugüxü!  
<sup>12</sup>Rü ngēma nachixüanegü i cumaxā  
 guxchigagüxü, Pa Cori Pa Tupanax irü 7  
 expüxcüna napoxcue! <sup>13</sup>Rü ñuxüchi i  
 toma nax curü duüxügü tixigüxü rü  
 guxügutáma moxē cuxna taxā. Rü torü  
 wiyamaxā guxügutáma gucü ya  
 taunecügügu cuxü ticuaxüxügü.

#### Tupanaarü ngechaüçax ínacagüe

**80** <sup>1-2</sup>Pa Cori Pa Tupana Pa  
 Iraétanüxüarü Dauruxüx, rü  
 cuma nixī i carnérugürüüäcü  
 Yúchetanüxümaxā icuacuaxü. Rü cuma nax  
 ngēma taxre i daxücüāxchicünaçägü i

ixāpexátüxüarü ngāxüwa nax curütöxü irü  
 nüxü naxīnü i torü yumüxē! iRü toxü  
 nangechaxüüäcüma mea nüxü nadawenü  
 ya Efraítanüxü rü Bēyamítanüxü rü  
 Manachétanüxü! iRü inachi, rü nua naxü  
 nax curü poramaxā toxü  
 ícungüxüxēēxüçax! <sup>3</sup>Pa Torü Tupanax  
 itoxü rüngüxēxē nax noxrirüütama wüxi i  
 nachixüane i poraxü tixigüxüçax! Rü  
 tanaxwaxe nax toxü cungechaxüxü nax  
 ngēmaäcü naxmexwa ítangüxüxüçax i  
 torü uanügü. <sup>4</sup>Pa Cori Pa Tupana ya  
 Guxāétüwa Ngēxmacüx çrü ñuxguxüratá  
 nüxü curüchaxü nax tomaxā cunuxü rü  
 ngēmacax tama toxü nüxü cuxīnüchaüxü i  
 torü yumüxégü? <sup>5</sup>Rü ngēma namaxā toxü  
 cuxüwemüxü rü axu nixī, rü ngēma  
 namaxā toxü cuxaxexēēxü rü toxgüxüxetü  
 nixī. <sup>6</sup>Rü ngēma nachixüanegü i torü  
 ngaicamagüxüarü dauxcüraxüruxü toxü  
 quixixēxē, rü ngēma torü uanügü rü toxü  
 nacügüe. <sup>7</sup>Pa Torü Tupanax itoxü  
 rüngüxēxē nax noxrirüütama wüxi i  
 nachixüane i poraxü tixigüxüçax! Rü  
 tanaxwaxe i toxü cungechaü nax  
 ngēmaäcü naxmexwa ítangüxüxüçax i  
 torü uanügü. <sup>8</sup>Rü Equítuanewa toxü  
 ícugaxü ñoma wüxi i úba i ngexwacax  
 rüxüxü i to i naanewa ngexü rü ngēxma  
 yatoxürüxü. Rü toxçax ícunawoxü ga  
 yema duüxügü ga tama cuxü yaxögüxü  
 nax yema nachica ga nawa  
 ícunawoxüxügu toxü cumugüxüçax. <sup>9</sup>Rü  
 cunamexēxē ga yema naane naxçax ga  
 yema úba. Rü yema úba rü mea narüxü rü  
 naxāxchumaxā rü guxüwama ga yema  
 nachixüanewa rü nimu. <sup>10</sup>Rü guma  
 mǎxpünegü rü nanagaüxpechitagüxēxē rü  
 yema nanetügü ga máchanegü rü ta  
 nanagaüxpechitaanexēēgü. <sup>11</sup>Rü yema



nachacüügü rü guxüwama nangugü rü ñuxmata márwa nangugü rü ñuxmata natü i Eufrátewa nangugü. <sup>12</sup>Rü ñuxmax, Pa Tupanax érü tixcüü cuyawañéxé i ngéma úbanecüarü poxeguxü rü ngëmacax nüxü natauxcha i ngéma duüxügü i ngéma chopetüxü nax nacauüäxüçax i norü o? <sup>13</sup>Rü ngéma ngüügü rü nanacauümaxügü rü ngéma togü i naexügü rü nayawacutanügü. <sup>14</sup>Pa Tupana ya Guxáétiwa Ngëxmacüx irü toxçax natáegu rü daxügüxü i naanewa toxü ínadawenü! iRü wenaxarü toxü nayaxu ñoma úba ga ítáxü rü wena iyaxuxürüxü! <sup>15</sup>Rü ñoma úba itoxürüxü rü cuma rü ñaa naanegu toxü cumugü. Rü cumatama toxna cudau ñoma úba i ngexwacax rüxüxü rü igüpünexürüxü. <sup>16</sup>iÉcü curü numaxá nadai i ngéma torü uanügü i curü duüxügüxü dajüxü rü naguxëégüchaüxü! <sup>17</sup>iNatürü toxü rüngüxéxé i toma i woetama toxü cuxunetaxü nax curü duüxügü tixügüxü! iRü toxna nadau i toma itayaxügüxü natanüwa ga yema duüxügü ga cumatama nüxü cuxunetaxü! <sup>18</sup>iÉcü toxü rüngüxéxé rü tagutáma cuxna tixígachi! iRü toxü namaxéxéxé rü cuxnaxica tátama nixí i ítacaxaxü i torü yumüxéwa! <sup>19</sup>Pa Torü Tupana ya Guxáétiwa Ngëxmacüx itoxü rüngüxéxé nax noxrürüütama wüxi i nachixüane i poraxü tixígüxüçax! iRü toxü nangechaxü nax ngémaäcü torü uanügümexéwa ítanguxüxüçax!

**Tupana rü Iraétanüxümaxá namecüma naétüwa i norü chixexügü**

**81** <sup>1</sup>iRü taäxëäcü Tupanacax pewiyaegü! Erü nüma nixí i tüxü naporaexéxü. iÉcü tagaäcü nüxü

picuaxüxügü ya yimá Acóbuarü Tupana! <sup>2</sup>iRü paüderumaxá rü árpamaxá rü árpaxacümaxá pegü pepaxpexegüäcüma pewiyaegü! <sup>3</sup>Rü ngëxguma ngexwacax nangoxgux ya tauemacü irü peyacue ya cornéta! Rü ngëxgumarüxü ta i ngëxguma tüema yixixgu irü peyacue! Rü ngéma nixí i ngunexü i nagu naxüchigaxü nax Tupanaxü icuaxüügüxü. <sup>4</sup>Erü yema nixí ga mu ga Acóbuarü Tupana Iraétanüxüna äxü. <sup>5</sup>Rü yema nixí ga mu ga Yúchetanüxüna naxäxü ga yexguma Tupana Equítuanecüäxarü äëxgacüxü naxäxünegu. Rü choma rü nüxü chaxínü ga wüxi ga naga ga tama nüxü chacuáxü ga ñaxü: <sup>6</sup>“Pa Iraétanüxügüx, marü pexü ichaxüxweta rü pexü íchangüxüxéxé nawa ga yema puracü ga nagu pexü nadajüxü. <sup>7</sup>Rü yexguma guxchaxüwa peyexmagügu ga Equítuanewa rü choxna pecagüe, rü choma rü pexü íchangüxüxéxé. Rü yema caixanexü ga duruanexü nawa ínaxüxüwa pexü changäxü. Rü yexguma Meríbawa pengugügu rü nataxüxgu ga dexá rü choma rü pexü chaxümare yerü nüxü chacuáxchaü ga perü ö. <sup>8</sup>Pa Chorü Duüxügüx inaga pexínüe i ñaa chorü ucüxé i pemaxá nüxü chixuxü! iChierü chauga pexínüegux, Pa Iraétanüxügüx! <sup>9</sup>Rü tama chanaxwaxe i namaxá petupanaäxgü i ngéma tama aixcüma Tupana ixixü rü tama chanaxwaxe i nüxü picuaxüxügü i naxchicünaxägü. <sup>10</sup>Rü choma nixí i perü Cori ya Tupana chixixü ga Equítuanewa pexü íchangüxüxéxü. Rü ngëxguma taxacü pexü taxüxgux irü choxna peca! Rü choma rü tá pexna chanaxá. <sup>11</sup>Natürü i

pema i chorü duũxũgũ i Iraétanũxũgũ, rü tama choxũ ipexĩnie rü tama chauga pexĩnũechaũ. <sup>12</sup>Rü yemacax nixĩ ga pexũ chayexrũxũ nax penaxũamaxũcax ga perü chixexũ rü pema penaxwaxexũácima pemaxẽxũcax. <sup>13-14</sup>Rü yexguma chi chauga pexĩnũegu, Pa Chorü Duũxũgũx, rü chi nagu pexĩxu ga yema pexũ chamuxũ, Pa Iraétanũxũgũx, rü chi paxaxũchi chanaxãneexẽxẽ ga yema pemaxã rüxuanũãxgũxũ rü chi chanapoxcue”, ñanagürü ga Tupana. <sup>15</sup>Rü ngẽma naxchi aiexũ ya Cori ya Tupana, rü norü muũmaxã tá napexegu nayayitanü erü ngẽma norü poxcu rü marü namaxã naxuegu. <sup>16</sup>Natürü ngẽxguma chi norü duũxũgũ ya Tupana naga ñnũegu rü chi mexũ i trígumaxã nanaxüwemü rü chi berurewa nayaxaxegũxẽxẽ.

**Ãexgacũgũ i guxchaxũarü mexẽeruũétüwa nangexma ya Tupana**

**82** <sup>1</sup>Rü Tupana ãexgacũ íyixĩxũwa i daxũgũxũ i naanewa rü inachi nax poxcu namaxã naxueguxũcax i ngẽma ãexgacũgũ i guxchaxũarü mexẽeruũgũ i chixri norü duũxũgũmaxã icuãxgũxũ. Rü ñanagürü: <sup>2</sup>“¿Ñuxguxüratáta i nüxũ perũchaxũxũ nax chixri duũxũgũmaxã ipecuáxũ rü ngẽma chixri maxẽxũétüwaama nax pexũgũxũ? <sup>3</sup>Rü dücax, rü name nixĩ i nüxũ perũngũxẽgũ i ngẽma duũxũgũ i taxucürüwa nügũ ípoxũgũxũ rü ngẽma taxcutagũ. Rü ecü nüxũ perũngũxẽxẽ i ngẽma ngearü diẽruãxgũxũ rü ngẽma nüxũ nataxuxũ i norü ngẽmaxũgũ. <sup>4</sup>iRü ngẽma chixexũ i duũxũgũmexẽwa ípenanguxũxẽxẽ i ngẽma taxucürüwama

nügũ ípoxũgũxũ rü ngẽma ngearü diẽruãxgũxũ! <sup>5</sup>Natürü i pemax, Pa ãexgacũgũx, rü tama peãxũ pecuãx rü peechitamare pemaxẽ. Rü ngẽmacax nangexma i taxũ i chixexũ i petanüwa rü ngẽma duũxũgũ i namaxã pecuáxũ rü pemaxã nanue. <sup>6</sup>Rü choma rü pexũ chaxuxgu rü tupanagũ pixĩgũ erü chauxacũgũ pixĩgũ i choma nax guxãétüwa changexmaxũ. <sup>7</sup>Natürü i pema rü guxũ i duũxũgürũxũ tá peyue. Rü ngexürüxũ i ãexgacũ i chixri norü duũxũgũmaxã icuáxürüãcũ tá peyue”, ñanagürü ya Tupana. <sup>8</sup>Pa Tupanax iẽcü inachi rü nüxna naca i norü chixexũchiga i ñoma i naanecũãxgũ i ãexgacũgũ! Erü cuma nixĩ i norü yora quixĩxũ i guxũma i nachixũanegũ.

**Yumũxẽ i nawa Tupanaarü ngũxẽcax ñnacagũxũ**

**83** <sup>1</sup>Pa Tupanax itaxũ i curüchianexũ, rü taxũ i ngẽxma curüxãxmarexũ! iRü nangãxũ i torü yumũxẽ rü toxũ ñnanguxũxẽxẽ! <sup>2</sup>iDücax i ngẽma curü uanũgũ i cuxchi aiexũ! Rü nümagũ rü nananuexẽxẽ i duũxũgũ nax tama cuga naxĩnũexũcax. <sup>3</sup>Rü nüma rü meama nanangugũgũ rü naxcax nadaugũ nax ñuxãcü tá curü duũxũgũ i cumatama ícupoxũxũxũ naporamaegũxũ. <sup>4</sup>Rü nagu narüxĩnũe nax ñuxãcü nua toxütawa naxĩxũ nax toxũ nadaĩxũcax nax ngẽmaãcü itayarüxoxochixũcax rü taxúema nüxũ cuáxũcax i ngẽma tochixũaneéga i Iraé. <sup>5</sup>Pa Tupanax, cuxcax nügũmaxã nangutaquexegũ rü wüxigu nügũmaxã inaxũgagũ nax curü duũxũgũxũ nadaĩxũcax. <sup>6-7</sup>Rü ngẽmaãcü toxcax

ínayaxüächichaũ i ngēma  
 Edóüanecüãxgü, rü Ismaétanüxügü ga  
 Agátaagü, rü Moátanüxügü, rü  
 Guebátanüxügü, rü Amóütanüxügü rü  
 Amaléxtanüxügü rü Piritéutanüxügü, rü  
 Tírucüãxgü. <sup>8</sup>Rü woo i ngēma  
 Achíriaanecüãxgü rü ngēma  
 Loxtanüxügü rü natanügu naxägü.  
<sup>9-10</sup>Pa Tupanax iēcü ngēma torü  
 uanügüxü nadai yexgumarüxü nax  
 cunadaixü ga yema Madiáütanüxügü rü  
 ãëxgacü ga Chíchara rü ãëxgacü ga  
 Yabfũ ga Chichóüarü ngategu yuxü ga  
 Eüdüwa! Rü nümagü rü ñuxma rü  
 waxmüanexü ga waixümü nixügü.  
<sup>11-12</sup>Rü ngēma churaragüarü ãëxgacügü  
 i ñuxma toxçax íyaxüächichaũxü irü ěcü  
 nadai yexgumarüxü nax cunadaixü ga  
 yema churaragüarü ãëxgacügü ga Oré  
 rü Cheé! iRü nadai i norü ãëxgacügü  
 yexgumarüxü nax cunadaixü ga yema  
 ãëxgacügü ga Chebá rü Chamúna ga  
 curü duüxügüarü wocachitaxügü  
 nügüxü yauxgüchaũxü! <sup>13</sup>Pa Tupanax,  
 rü ngēma torü uanügü rü tanaxwaxe  
 nax chuchuxüeta i buanecü  
 idixgüëëxürüxü cuyaxígüxëxë. iRü  
 ñoma naixatü i pagüxü i buanecü  
 cuenagütanüxürüxü yaxígüxëxë! <sup>14-15</sup>Rü  
 ñoma üxiema i naixnecü íxaxëëxü rü  
 naguxëëxürüxü tanaxwaxe i curü  
 numaxá nawe quingëchigü i ngēma torü  
 uanügü. iRü curü numaxá namüëxëxë!  
<sup>16</sup>Pa Corix ínaxâneexëxë i ngēma  
 duüxügü nax ngēmaäcü cuxçax  
 nadaugüxüçax! <sup>17</sup>iRü ěcü naxâneexëxë  
 nax ngēmaäcü guxügutáma  
 naxâneexüçax rü nayuexüçax! <sup>18</sup>iRü  
 ngēmaäcü tá nüxü nacuçxgü nax  
 cuxicatama yixixü i Cori ya Tupana

quixixü rü cuxicatama yixixü i  
 guxãétüwa cunexmaxü i ñoma i  
 naanewa!

**Choxü nangúchaũ nax  
 Tupanapatawa changexmaxü**

**84** <sup>1</sup>Pa Cori Pa Tupanax ya  
 Guxãétüwa Ücüx, rü  
 namexechi ya cupata ya üünene. <sup>2</sup>Rü  
 poraäcü choxü nangúchaũ nax  
 cupataãxtügu chaxücuxü. Rü guxüma i  
 chorü taãxëmax cuxçax chawiyaechaũ  
 Pa Tupana ya Guxüguma Maxücüx. <sup>3</sup>Rü  
 woo i chirugü rü togü i werigü rü  
 naxächica i ngēma cupatawa nax  
 ngëxma naxüxchiãxügüxüçax, Pa Chorü  
 Tupana Pa Chorü Äëxgacü ya  
 Guxãétüwa Ücüx. <sup>4</sup>Rü tataãxëgü ya  
 yíxema cupatawa ngëxmagüxe rü  
 guxüguma cuxü icuaxüxügüxë. <sup>5</sup>Rü  
 tataãxëgü ya yíxema cuxütagu túmaaru  
 ngüxëëxü iyangauxe rü yíxema yáxüwa  
 ne íxe nax yima curü maxpúnewa cuxü  
 tayarücuaxüügüxüçax. <sup>6</sup>Rü ngëxguma  
 ngēma ngatexü i pachitamaxü i  
 Naxgüxüetügu aëgaxüwa  
 tangupetütanügu rü cuma rü ngēma tá  
 cunamu ya pucü nax ngēmaäcü  
 nayimaxüçax ya bairawegü nax ngēma  
 taxaxëgüxüçax. <sup>7</sup>Rü wüxichigü i  
 ngunëxügu rü yexeraäcü tá tiporaetanü.  
 Rü ngëxguma curü maxpüne ya üünene  
 ya Chióüwa tangugügu, rü ngēma tá  
 cuxü tadaugü, Pa Tupanax. <sup>8</sup>Pa Cori Pa  
 Tupana ya Guxãétüwa Ngëxmacü ya  
 Iraétanüxügüarü Tupanax irü nüxü  
 naxínü i chorü yumüxë! <sup>9</sup>Pa Tupana i  
 Torü Poxüruxüx irü cuxü  
 nangechaxütümüxü ya yimá cuma nüxü  
 cuxunetacü nax Iraéanecüãxgüarü

ãêxgacü yixixüçax! <sup>10</sup>Rü ngêma 1,000 i ngunexü i nagu ngextámare changemaxüarü yexera rü narümemaie nixí nax wüxitama i ngunexü cupataãxtüwa changemaxü. Rü narümemaie nax cuaxpataarü dauruümare chixixü, Pa Tupanax, rü tama chixexü ínaxügüxüwa nax changemaxü. <sup>11</sup>Erü nüma ya Cori ya Tupana rü norü duüxügüxü nibáixmaxü rü ínanapoxü. Rü yíxema tama naxügüxe i ngêma chixexü rü nüma ya Tupana rü tüxü nangechaü rü tüxü nicuaxüxü rü tama tüxna nanachüxu i norü mexü. <sup>12</sup>Pa Cori Pa Tupana ya Guxáétüwa Ngêxmacüx, rü tataãxëgü ya yíxema aixcüma cugu yaxögüxe.

**iWenaxarü toxü rüngüxëxë, Pa Tupanax!**

**85** <sup>1</sup>Pa Corix, toma nax curü duüxügü i Acóbutanüxügü nax tixügüxü rü cuma rü poraäcü tomaxã cumecüma rü wenaxarü toxü cutaãxëxëxë. <sup>2</sup>Rü marü toxü nüxü curüngüma i torü chixexügü rü pecádugü ga cupexewa taxüxü. <sup>3</sup>Rü yema nax tomaxã cunuxü rü marü ícurüngüxmüxüchi. <sup>4</sup>Pa Tupana ya Torü Maxëxëeruxüx, rü ñuxma rü tanaxwaxe i wenaxarü toétüwa cuhogü. Rü tama name i tomaxã cunuecha. <sup>5</sup>¿Ëxna cuyadaxëxë nax guxügütáma tomaxã cunuechaxü? <sup>6</sup>¿Rü tama ëxna i wenaxarü toxü ícurüdagüxëxü nax ngêmaäcü cumaxã tataãxëgüxüçax i tomax i curü duüxügü nax tixügüxü? <sup>7</sup>Pa Cori Pa Tupanax itoxü nangechaxü rü toxü ínanguxüxëxë! <sup>8</sup>Rü ñuxma rü tá icharüxínü i ngêma nüxü yaxuxü ya Cori ya Tupana erü norü duüxügü i

naga ñnüexümaxã tá nüxü nixu nax marü namaxã inangüxmüxü. Natürü tama nanaxwaxe nax wena norü chixexüçax nawoeguxü. <sup>9</sup>Rü aixcüma nixí ya Tupana i tüxna nangaicamaxü nax tüxü nangüxëxüçax ya yíxema naga ñnüexe. Rü ngêmaäcü i ngêma norü üüne rü torü naanewa tá nangexma. <sup>10</sup>Rü ngêxguma Tupana norü duüxügütanüwa ngêxmagu, rü tá nügü nangechaügü rü tá nügümaxã nixaixcümagü rü tá nügümaxã inarüngüxmüxe rü tá meama niwëxgü i norü maxüwa. <sup>11</sup>Rü duüxügü rü tá nügümaxã nixaixcüma rü ngêma rü guxüwama tá nangox ñoma wüxi i nanetü i waixümüwa ngóxürüxü. Rü ngêma nax mea namaxëxü i duüxügü rü tá ta meama nangox ñoma üaxcü i caixanexüpechitawa ngóxürüxü. <sup>12</sup>Rü nümatama ya Cori ya Tupana rü tá pücü ínananguxëxë rü ngêma tóru naanewa rü tá mea narüxügü i tanetügü. <sup>13</sup>Rü ngêxguma tatanüwa nangexmagu ya Cori ya Tupana, rü tá aixcüma mea naxçax tamaxë. Rü nüma rü tá tüxü narüngüxëxë nax nacümagu ixüxü.

**Cuxicatama nixí i Tupana quixixü**

**86** <sup>1</sup>Pa Corix ichoxü nüxü naxínü i chorü yumüxë! Erü poraäcü ngüxü chinge rü guxchaxüwa changexma. <sup>2</sup>iRü choxna nadau! Erü choma rü cumaxã chixaixcüma. iRü choxü ínanguxuchixëxë! Erü cuma nixí i chorü Tupana quixixü rü cugu nixí i chayaxöxü. <sup>3</sup>iPa Cori Pa Tupanax, cuxü changechaxütümüxü! Erü guxüma i oragu rü chorü yumüxëwa rü cuxna chacaecha. <sup>4</sup>Pa Corix, choma nax curü

duũxũ chixĩxũ irũ ěcũ choxũ nataãxẽxẽxẽ! Erũ cumaxã nixĩ i chidexaxũ i chorũ yumũxẽwa. <sup>5</sup>Erũ cumax, Pa Corix, rũ cumecũma rũ nüxũ icurũngũma i torũ chixexũgũ. Rũ aixcũma tüxũ cungechaũ ya yĩxema curũ ngũxẽẽcax cuxna caxe. <sup>6</sup>Pa Corix ichoxũ nüxũ naxĩnũ i chorũ yumũxẽ! iRũ choxũ nangãxũ rũ choxna naxã i ngẽma cuxna naxcax chacaxũ! <sup>7</sup>Rũ ñuxma nax guxchaxũwa changexmaxũ, rũ cuxna chaca erũ cuma rũ guxũguma choxũ cungãxũga. <sup>8</sup>Rũ nataxuma i to i tupana i cumaxã wũxiguxũ, Pa Corix. Rũ taxũema tanaxũ i ngẽma taxũ i mexũgũ i cuma cuxũxũ. <sup>9</sup>Pa Corix, cuma nixĩ ga cunangóexẽxũ i guxũma i nachixũanegũ. Rũ ngẽma nachixũanegũ rũ tá cuxcax naxĩ nax cuxũ nataxẽẽgũxũcax rũ cuxũ yacuaxũũgũxũcax. <sup>10</sup>Erũ cuxicatama nixĩ nax Tupana quixĩxũ. Rũ cuma nixĩ i nüxũ cucuaxũchixũ rũ cunaxũxũ i ngẽma taxũ i mexũgũ i curũ poramaxã cuxũxũ. <sup>11</sup>Pa Corix ichoxũ nawex i ngẽma cumaxũ nax aixcũma nagu chixũxũcax! Rũ chanaxwaxe i choxũ cunangũchaũxẽxẽ nax cuxũ chicuaxũũxũcax. <sup>12</sup>Pa Cori Pa Chorũ Tupanax, rũ guxũma i chorũ maxũmaxã tá cuxũ chicuaxũxũ. Rũ guxũgutãma chanataxẽxẽ i cuẽga. <sup>13</sup>Rũ nataxũchi i curũ ngechaũ i chauxcax. Rũ marũ choxna cuyaxũgachixẽxẽ i ngẽma yu nax tama naxmaxũgu chixũcuchixũcax. <sup>14</sup>Pa Tupanax, rũ nangexma i ñuxre i duũxũgũ i tama cugu rũxĩnũexũ rũ nügũ icuaxũxũgũxũ rũ máxwaxegũxũ, rũ chauxchi aiexũ, rũ ngẽma rũ choxũ nimaxgũchaũ. <sup>15</sup>Natũrũ i cumax, Pa

Corix, rũ Tupana ya mecũmacũ rũ ngechaũwaxecũ quixĩ. Rũ cuma rũ yaxna tomaxã cuxĩnũ, rũ poraãcũ toxũ cungechaũ, rũ guxũguma tomaxã quixaixcũma. <sup>16</sup>iRũ choxũ nadawenũ nax curũ duũxũ chixĩxũ! iRũ cuxũ changechaxũtũmũxũ! iRũ pora choxna naxã! iRũ choxũ ínanguxchixẽxẽ naxmexwa i ngẽma duũxũgũ i choxũ imaxgũchaxũxũ! <sup>17</sup>iRũ choxũ rũngũxẽxẽ! iRũ choxna naxã i wũxi i cuaxruxũ nax ngẽmawa nangóxũcax nax chomaxã cumecũmaxũ rũ ngẽma chauxchi aiexũ naxãneexũcax i ngẽxguma nüxũ nadaugũgu! Erũ cumax, Pa Corix, rũ guxũguma choxũ curũngũxẽxẽ rũ choxũ cutaãxẽxẽxẽ.

**Tupanaarũ ñane ya  
Yerucharéũxũ nicuaxũxũgũ**

**87** <sup>1</sup>Rũ yima maxpũne ya Chióũgu nixĩ i naxũxũ ya yima Tupanaarũ ñane ya Yerucharéũ. <sup>2</sup>Rũ nũma ya Cori ya Tupana rũ poraãcũ nüxũ nangechaũ ya yima ñane guxũnema ya naigũ ya Iraéanearũ ñanearũ yexera. <sup>3</sup>Pa Tupanaarũ ñanex, rũ mexechixũ i ore cuchiga nixugũ. <sup>4</sup>Rũ natanũwa i ngẽma duũxũgũ i choxũ cuaxgũxũ rũ nangexma i duũxũgũ i Equítuanegu buexũ, rüexna Babiróniaanegu buexũ, rüexna Piritéugũanegu buexũ, rüexna Tíruarũ ñanegu buexũ rüexna Etiopíaanegu buexũ. Rũ wũxichigũ i ngẽmagũ rũ poraãcũ ngẽma ñane i nagu nabuxũmaxã nataãxẽ. <sup>5</sup>Natũrũ guxũarũ yexera nataãxẽgũ i ngẽma Yerucharéũgu buexũ. Erũ nümatama ya Tupana ya guxãétũwa ngẽxmacũ rũ nüxũ naxuneta ya yima ñane nax noxrũ yixĩxũ. <sup>6</sup>Rũ ngẽma

popera i nawa nangoxégagüxü i duüxügü, rü Tupana rü tá nüxü nawüneta i ngëma duüxüéagü i Yerucharéügu buexü. 7Rü ngëma Yerucharéüwa wiyaegüxü rü ngëma paxetägüxü rü ñanagürügü tá: “Guxüma i chorü taãxë rü cuwa nangexma, Pa Yerucharéüx”, ñanagürügü tá.

**Pa Corix ðtüxcüü tama choxü cucuáxchaxü?**

**88** 1Pa Corix, Pa Chorü Tupanax, Pa Chorü Maxëëruuxü, nguncü rü chütacü rü cuxna chaca nax choxü curüngüxëëxüçax. 2iRü choxü nüxü naxinü i chorü yumüxë, rü choxna naxã i ngëma cuxna naxçax chacaxaxü! 3Rü poraãcü taxü i guxchaxü chauétü nangu rü nagu charüxinü rü ngëmamaxã tá chayü. 4Rü duüxügüçax rü marü yuexütanüwa changexma erü marü nataxuma i chorü pora. 5Rü nua yuexütanüwa choxü nataxgü. Rü choma rü wüxi i duüxü i daigu yuxü rü itáxürüxü chixí. Rü ñoma wüxi i duüxü i nüxü cuxoxü rü nüxü icurüngümaxürüxü chixí. 6Rü ngëma äxmaxü i maçmaxüchixüwa choxü cutax i ngextá ínawaanexüchixüwa. 7Rü chauétü cunanguxëxë i ngëma curü nu. Rü poraãcü äücümaxüwa choxü cunanguxëxë ñoma dexágu ingugurüxü. 8Rü ngëma chomüçügüäëwa ícunanguxëxë nax choxna naxígiüçax. Rü wüxi i norü guxchaxëeruxü choxü quixíxëxë. Rü ñoma wüxi i poxcuxü i taxucürüwama íñaxürüxü chixí. 9Rü ngëma nax poraãcü chaxauxechaxüçagu rü düxwa chixoxetü. Rü guxüma i ngunexügu rü cuxçax

chaxunagümeçëäcúma cuxna chaca, Pa Corix, rü auxäcúma cumaxã nüxü chixu i chorü guxchaxü. 10¿Rü taxacüwa i choxü namexü i ngëma taxü i mexügü i curü poramaxã cuxüxü ega marü chayuxgux? ¿Rü ñuxäcü i wüxi i yuxü rü moxë cuxna naxã? 11Rü ngëxguma chayuxgu rü choxmaxüwa changexmagu ¿rü ñuxücürüwa duüxügümaxã nüxü chixu nax ñuxäcü quixaicümaxü rü toxü cungechaxüxü? 12Rü ngëma yuexütanüwa i ngextá ínaxëanexüwa ¿rü tayíxemaxü ya texé ya nüxü íxuxe nax quixaicümaxü rü taxü i mexügü cuxüxü? 13Natürü i chomax, Pa Corix, rü cuxna nixí i chacaxaxü rü guxüguma i paçmama rü cumaxã nixí i chidexaxü. 14¿Rü tüxcüü nixí i choxü cuxoxü, Pa Corix, rü tüxcüü nixí i çaxuxçaxwa iquicúxü? 15Rü changextüxügücürüwatama rü guxchaxüwa changexmaecha rü ngëmamaxã wixguxuchi chayü. Rü poraãcü yaxna namaxã chaxínü ga yema guxchaxügü ga cuma çaxuxçax ícunguxëëxü. Rü ñuxma rü düxwa marü tama namaxã chapora. 16Rü ngëma curü nu i äücümaxü rü marü chauétüwa nangu rü choxü narüporamae. 17Rü guxü i oragu rü ngëma curü nu rü choxü ínayáeguächi ñoma wüxi ya tacü ya mucürüxü. 18Rü cuma rü marü choxna cuyaxígachixëxë i guxüma i ngëma chomüçügü rü yema üpa namaxã chaxämüçügüxü. Rü ñuxma rü ngëma éanexüçicatama nixí i namaxã chaxämüçügü.

**Tupana rü Dabímaxã ínaxuneta**

**89** 1Pa Corix, guxügutáma chorü wiyaewa nüxü chixu nax cuma rü cumecümaxüchixü. Rü guxügutáma

duũxũgũmaxã nũxũ chixu nax cuma rü aixcũmacü quixĩxũ. <sup>2</sup>Rü tá namaxã chanacaeane nax cuma rü guxũguma toxũ cungechaxũxũ, rü ngẽma nax quixaixcũmaxũ rü taguma naxũchicũü ñoma daxũguxũ i naane taguma üchicũüxũrũxũ. <sup>3</sup>Rü cuma rü guma curü duũxũ ga cumatama cuyaxucü ga Dabĩmaxã icuxuneta rü ñacurũgü nũxũ: <sup>4</sup>“Rü tá cutaagũmaxã chanaxuegu nax nũmagü tá yixĩxũ i guxũgutãma cuchicũxü ãẽxgacũgü yixĩgũxũ i Iraétanũwa”, ñacurũgü. <sup>5</sup>Pa Tupanax, guxũma i ngẽma dauxũwa ngẽxmagũxũ rü cuxũ nicuaxũxũgũ naxcax i ngẽma taxũgü i mexũgü i curü poramaxã cuxũxũ. Rü ngẽma curü orearü ngeruũgü i dauxũcüãx rü tá cuxũ nicuaxũxũgü erü aixcũmacü quixĩ. <sup>6</sup>Rü nataxuma i taxacü i woo i daxũguxũ i naanewa i cumaxã wũxiguxũ, Pa Cori Pa Tupanax. <sup>7</sup>Erü cuma rü Tupana ya poracü rü ãücũmacü quixĩ. Rü curü orearü ngeruũgü i dauxũcüãx rü cuxũ ñnachomaeguãchi. <sup>8</sup>Pa Cori Pa Tupana ya Guxãétũwa Ngẽxmacũx, rü guxũma i pora rü guxũma i ore i aixcũma ixĩxũ rü cuwa ne naxũ. Rü nataxuma i taxacü i cumaxã wũxiguxũ. <sup>9</sup>Rü cuma rü namaxã icucuxax i ngẽma már i ãücũmaxũ rü ícuyachaxãchixẽxẽ i norü yuape ya taxũchicü. <sup>10</sup>Rü cuma rü cunanguxẽxẽ ga Equítuane ñoma wũxi i churara i poraxũ i daigu yuxũrũxũ. Rü cuchacũxü ya poraxũchinemaxã cunawoone i ngẽma cumaxã rüxuanũgũxũ. <sup>11</sup>Rü ngẽma daxũguxũ i naane rü ñoma i naane rü cuxrũgü nixĩ erü cumatama nixĩ i cunaxũxũ rü cunangoxẽxẽxũ namaxã i guxũma i ngẽma nawa

ngẽxmagũxũ. <sup>12</sup>Rü cuma nixĩ i cunangoxẽxẽxũ i nóрте rü súr. Rü yima maxpũnegü ya Tabú rü Ermóũ rü ngẽma cuéga taãxẽãcü nagu nicagũxũ. <sup>13</sup>Rü yima cuchacũxü rü naporaxũchi. Rü yima curü tügũnechacũxü rü napora rü yimamaxã nũxũ curüporamae i ngẽma cumaxã rüxuanũgũxũ. <sup>14</sup>Rü ngẽxguma curü tochicaxũwa curütoxgux nax cunangugũxũcax i wũxichigü i duũxũarü maxũ, rü guxũma wũxiguraxũãcũma cunangugü rü aixcũma nawexgu i ngẽma namaxã cuxueguxũ i wũxichigü. Rü cuma rü aixcũma ngechaxũwaxecü rü ixaixcũmacü quixĩ. <sup>15</sup>Pa Corix, nataãxẽgü i ngẽma duũxũgü i nũxũ cuáxũ nax taãxẽãcü cuxũ yacuaxũügũxũ rü aixcũma curü oregu namaxẽxũ nax ngẽmaãcü curü ngóonexũwa nangexmagũxũ. <sup>16</sup>Rü nataãxẽgü i ngẽma curü duũxũgü i guxũguma cumaxã taãxẽgũxũ rü naxcax daugũxũ nax cucũmagu naxĩxũ. <sup>17</sup>Rü aixcũma nixĩ i curü duũxũgũarü poraxẽeruxũ quixĩxũ rü cuma nixĩ i nũxũ curũngũxẽxẽxũ nax cucũmagu naxĩxũcax. Rü ngẽma yexeraãcü nax tiporaetanũxũ rü curü ngũchãũgagu nixĩ. <sup>18</sup>Rü nüma ya Cori rü tórü poxũrũxũ nixĩ. Rü nüma nixĩ i tórü ãẽxgacü ya üünecü i yixema i Iraétanũxũ nax ixĩgũxũ. <sup>19</sup>Rü nüxcũma rü curü duũxũgũxũ nũxũ cudaduxẽxẽ i ãxũgũxũ rü yemaacü namaxã quidexa, rü ñacurũgü nũxũ: “Choma rü nũxũ chaxuneta i wũxi i chorü duũxũ i poraxũ rü guxãétũwa chanangexmaxẽxẽ rü poraãcü nũxũ charũngũxẽxẽ. Rü nüma nixĩ ya yimã chorü duũ ya Dabí. Rü yexguma chorü chíxũ i üünexũmaxã

chanabaerugu rü nüxü chaxuneta nax chorü duüxügüarü ãëxgacü yixüçax. <sup>21</sup>Rü choma rü guxügutáma nüxü charüngüxë rü chorü poramaxá tá chanaporaxëxë. <sup>22</sup>Rü ngëma namaxá rüxuanüãxgüxü rü taxütáma naxçax ínayaxüãchi. Rü ngëma chixri maxëxü rü taxütáma nüxü narüporamaegü. <sup>23</sup>Rü ngëma namaxá rüxuanüãxgüxü rü choma rü tá nagu chayanaxoxëxë rü tá nüxna chayaxígachixëxë. Rü tá chanadai i ngëma naxchi aiexü. <sup>24</sup>Rü choma rü poraäcü tá nüxü changechaü, rü namaxá tá chixaixcüma. Rü tá yexeraäcü chayaporaxëëchigü. <sup>25</sup>Rü choma rü tá aixcüma nüxna chanaxá i pora nax namaxá inacúaxüçax i ngëma naane i Már i Mediteráneuwa ixügüxü rü ñuxmata natü i Eufrátewa nguxü. <sup>26</sup>Rü nüma rü tá ñanagürü choxü: ‘Cuma nixí i chaunatü quixü rü chorü Tupana ya choxü ípoxücü rü choxna daücü quixü’, ñanagürü tá. <sup>27</sup>Rü choma rü ñoma chaune ya yacürüxü tá namaxá chixí. Rü guxüma i nachixüanegüarü ãëxgacügüétüwa tá chanangexmaxëxë. <sup>28</sup>Rü ngëma chorü ngechaü rü guxügutáma naxütawa nangexma. Rü yema chorü uneta ga namaxá nüxü chixuxü rü tagutáma ínayarüxo. <sup>29</sup>Rü ngëma nataagü rü nachicüxü guxügutáma nüxí Iraéanecüãxgüarü ãëxgacügü nixígü ñuxmatáta nagü i naane. <sup>30-31</sup>Natürü ngëxguma chi nüxna yaxígachigu i ngëma chorü nguxëëtae rü tama nagu namaxëgu i ngëma chorü mugü rü chixri naga naxínegu i chorü ore rü tama yanguxëëgüãxgu i ngëma namaxá nüxü chixuxü, <sup>32</sup>rü aixcüma tá

chanapoxcue nagagu nax tama chauga naxínüexü rü poraäcü tá nüxna chanacuajçca. <sup>33</sup>Natürü taxütáma nüxü charüxo nax nüxü changechaüxü ya Dabí rü aixcümaxüchi tá chayanguxëxë i ngëma namaxá nüxü chixuxü. <sup>34</sup>Rü taxütáma chanangexrü i ngëma chorü uneta ga namaxá nüxü chixuxü rü aixcüma tá chayanguxëxë i guxüma i ngëma chorü ore. <sup>35</sup>Rü noxtacüma chorü üüneégagu ichaxuneta rü tagutáma chanawomüxëxë. <sup>36</sup>Rü ngëma nataagü rü nüxí nachicüxü guxügutáma Iraéanecüãxgüarü ãëxgacügü nixígü ñoma üaxcü ibáixechaxürüxü. <sup>37</sup>Rü ñoma tauemacü guxüguma ngóxürüxü rü ngëxgumarüxü guxügutáma Iraécüãxgüarü ãëxgacügü nixígü ñoma daxügüxü i naane ngëxmaechaxürüxü” ñacurügü. <sup>38</sup>Natürü i ñuxma rü nüxü cuxo rü tama nüxü cucuáxchaü ya yimá ãëxgacü ya cumatama nüxü cuxunetacü. Rü namaxá cunu. <sup>39</sup>Rü ngëma curü uneta ga curü duüxümaxá nüxü quixuxü rü marü cuyanaxoxëxë rü nüxna cunayaxu nax ãëxgacü yixü. <sup>40</sup>Rü ngëma norü ñanearü poxeguxü rü cuyangóxnaxëxë rü yima norü ígü rü cuyawaxgüxëxë. <sup>41</sup>Rü guxüma i ngëma togü i duüxügü i ngëma chopetüxü rü naxçax nangix i taxacü i nüma nanaxwaxëxü. Rü ngëma nachixüanegü i nüxna ngaicamagüxü rü nüxü nacugüe ya yima ñane. <sup>42</sup>Rü cuma rü cunangexrü i ngëma namaxá rüxuanüãxgüxü nax taãxëäcüma curü duüxügüxü nadajxü rü nüxü naporamaegüxü. <sup>43</sup>Rü ngëma curü duüxügüarü tara rü cuyatëcaxëxë, rü tama nüxü curüngüxëë i ngëxguma norü uanügümaxá nügü nadajxgux. <sup>44</sup>Rü



ngêma norü pora rü cunanguxêxê, rü ícunataxüchi ya yimá norü ãêxgacü.  
 45Rü marü cunanuxêxê i norü maxü, rü poraãcü cunaxãneexêxê. 46Pa Corix ñrü ñuxguxüratáta i nüxü curüchaxü nax iquicúxü? ¿Êxna guxügutáma wüxi ya üxü ya naiechanerüxü yixixü i curü nu?  
 47Pa Corix inüxna nacuaãxáchi rü ngêma chorü maxü rü nax nanuxüxü! Rü yimá duü ya cuma cuxücü rü tama namãx i norü maxü. 48Rü taxúema texé tamaxecha rü taguma tayu. Rü taxúema texé nawa ítanguxuchi i yuarü pora.  
 49Pa Corix ñngexü ga yema curü ngechaü ga noxri Dabímaxã nüxü quixuxü ga yexguma icuxunetagu nax aixcüma guxügutáma nüxü cungechaxüxü? 50Pa Corix idücac i toma nax curü duüxügü tixígüxü, rü togu nidauxcüraxügü i muxüma i duüxügü! Rü ngêma rü poraãcü chorü maxünewa nangux. 51Pa Corix, ngêmaãcü nixí i ngúxü toxü ningexêxê rü chixexü tomaxã yaxugüexü i ngêma curü uanügü. Rü ngêmaãcü ngextá ínaxüxüwa rü chixri nachiga nidexagü ya yimá cumatama nüxü cuxunetacü nax curü duüxü yixixü. 52Rü guxüguma namexechi ya Cori ya Tupana. Rü ngêmaãcü yixí.

**Tupana rü guxüguma namaxecha  
 natürü i duüxügü rü nayuewãxe**

**90** 1Pa Cori Pa Tupanax, cuma rü woetama torü poxürüxü quixí rü guxüguma cuxmexwa tangexmagü. 2Rü nüxcümaxüchima naxüpa nax cunaxüxü ga ñoma ga naane rü norü mãxpúnegü rü woetama marü Tupana quixí. Rü cuma rü guxügutáma

cungexmaecha. 3Rü cuma rü cuxü natauxcha nax wena waixümüxü cuyaxíxêxê ya duüxü i ngêxguma tomaxã cunaxueguxgu nax tayexü rü ñacuxgu: “iPa Duüxügüx, wena waixümüxü pixígüx!” ñacuxgu. 4Rü 1000 ya taunecü rü cuxçax rü ñoma wüxitama i ngunexü i ngupetüxürüxü nixí, rü ñuxre i ora i chütaxürüxü nixí. 5Rü cuma rü wüxi i paxaãchicãxmare toxna cunaxã i maxü rü paxama tixüpetü ñoma wüxi i pexächi üpetürüxü. 6Rü toma rü ñoma maxê i pãxama yauxatüxü natürü yáuanecü rüñêxêxü rü yuxürüxü tixígü. 7Rü aixcüma i ngêma curü nu rü toxü nada i rü toxü namüêxêxê. 8Rü torü pecádugü rü torü chixexügü i cúacü taxüxü rü cupexewa nangoxoma. 9Rü ngêmagagu i curü nu rü toétü nangu rü torü maxü rü paxama nangux. Rü ñoma wüxi i ngüãcüürüxü paxama naxüpetü ya torü taunecügü. 10Rü 70 ya taunecü nixí ya woetama nagu imaxêcü. Rü yíxema rüporamaegüxe rü 80 ya taunecüwa tangugü. Natürü yíxema máxarü maxüãgüxe rü tümacãx ínangu i ngúxügü rü guxchaxügü. Rü yima torü taunecügü rü torüxü paxama nangupetü. 11Pa Tupanax ñrü texé nüxü tacuãx nax ñuxãcü poraãcü naxãücümaxü i curü nu? ¿Rü texé nüxü tacuãx nax naxçax tamuüxü i ngêma curü nu? 12Pa Tupanax irü toxü nüxü nacuaãxêxê nax nanorexü ya torü ngunexügü! iRü toxü rüngüxêxê nax mea cuxçax tamaxêxü nagu ya yima taunecügü ya toxna cuxãcü! 13Pa Corix itoxçax natáegu! iRü taxú i cuyamáchigüxêxêxü nax toxçax

cutáeguxû! Rû toma nax curû duûxûgû tixîgûxû rû icuxû tangechaxûtümîxûgû! 14iRû guxûguma i noxri yangunegu rû toxna naxâ i curû ngechaxû! Rû ngêxguma i toma rû guxûgutâma taâxêâcûma cuxçax tawiyægû. 15Rû guma taunecûgû ga ngúxû nagu tingegücûexpûx irû toxna naxâ ya taunecûgû ya nagu tataâxêgücû! 16iRû toxû nüxû nadauxêxê i curû üüne rû wenaxarû toxçax naxû ga yema taxûgû ga mexûgû ga nüxcûma curû poramaxâ cuxûxû nax ngêmaâcü i toma rû totaagû nüxû daugûxûçax! 17Pa Cori Pa Torû Tupanax, rû tanaxwaxe i tomaxâ cumecûma rû toxû cungechaû. iRû êcü toxû rüngûxêxê nax mea ínganguxchixûçax i ngêma puracû i taxûxû! Rû tanaxwaxe i aixcûma ngêmaâcü mea ínganguxuchi.

Cori ya Tupana rû tórû poxûruxû nixi

**91** 1Rû tataâxê ya yíxema naxmexwa ngêxmaxe ya yimá guxâétüwa ngêxmacû ya Tupana, erû nüma rû tüxna nadau. 2Rû choma rû ñachagürû cuxû: “Pa Corix, rû cuxicatama nixî i chorû cuxchicaxû quixîxû, rû chorû poxûruxû quixîxû rû chorû Tupana ya cuxû chayaxöcü quixîxû”, ñachagürû cuxû. 3Rû Tupanaxicatama nixî ya cuxû ípoxûcü nüxna i ngêma âücûmaxû i cuechita duûxûgû cuxçax ixûgûxû, rû nüxna i ngêma daxaweane gû i yuwa tüxû gaxû. 4Rû nüma rû tá nügûpexátütüüwa cuxû nangexmaxêxê rû ngêma rû taxuxûtâma cuxû nangupetü. Rû nüma rû tá aixcûma cuxna nadau rû tá cuxû ínapoxû. 5Rû ñuxma rû marû

taxuçaxma naxçax cumuû i ngêma âücûmaxûgû i chütacû ngêxmaxû rû woo yima curû uanügüarû chuchigû ya ngunecû cuxçax yamugüne. 6Rû marû taxuçaxma naxçax cumuû i ngêma daxaweane i chütacû ínguxû rû woo ngêma âücûmaxû i ngunecû ínguxû. 7Rû woo curû toxoxwecûwagu tayuegu ya 1,000 rû curû tügünecûwagu tayuegu ya 10,000 natürü i cuxû rû taxuxûtâma nangupetü. 8Rû cuma rû tá nüxû cudau i ngêma duûxûgû i chixexûarû poxcu. Natürü i cuma rû taxuxûtâma cuxçax íngangu. 9-10Erû ñuxma nax cunayaxuxû ya Cori ya Tupana nax curû cuxchicaxû yixîxûçax rû curû poxûruxû yixîxûçax ñuxcürüwa taxacürü chixexû cuxna nangu rû woo taxacürü daxaweane cupatawa nguxgux? 11Rû nüma rû tá norü orearû ngeruûgû i daxücûâxû namu nax cuxna nadaugûxûçax i ngextâ ícuxûxûwa. 12Rû nümagû rû tá cuxû ningîgû rû ngêmaâcü tá cuxû nigagû nax tama guxchaxûgu cunguxûçax. 13Rû ngêxguma rû tá aitanügu quixû rû ngoxotanügu quixû rû âxtapetanügu quixû rû taxuxûtâma cuxû nangupetü. 14Erû nüma ya Cori ya Tupana rû ñanagürü: “Rû yíxema choxû ngechaxûxe rû choma rû tá tüxû íchapoxû rû tá tüxû chatachigaxêxê erû choxû tayaxö. 15Rû ngêxguma choxna tacaxgu rû choma rû tá tüxû changâxûga rû tá tümaxûtawa changexma. Rû ngêxguma guxchaxû tüxû üpetügu rû tá nawa tüxû íchanguxuchixêxê rû poraâcü tá tümamaxâ chataâxê. 16Rû tá chanamaxêxê i tümäärü maxû i ñoma i

naanewa. Rũ tá tũxna chanaxã i maxũ i taguma gũxũ erũ choxũ tayaxõ”, ñanagũrũ ya Cori ya Tupana.

### Wiyae i Tupanaxũ namaxã icuaxũxũ

**92** <sup>1</sup>Pa Corix ya Guxãétũwa Ngẽxmacũx, rũ name nixĩ nax moxẽ cuxna taxãgũxũ rũ torũ wiyæmaxã cuxũ ticuaxũũgũxũ. <sup>2</sup>Rũ wũxichigũ i paxmama rũ chũtaxũ tanaxunagũ nax cuma rũ cumecũmaxũ rũ quixaixcũmaxũ. <sup>3</sup>iRũ ngĩxã Tupanacax tawiyaegũ ãcũnũxũ i paxetaruũmaxã tũxũ napaxpexegũãcũma! <sup>4</sup>Pa Corix, cuma rũ ngẽma chauxcax cuxũxũmaxã choxũ cutaãxẽxẽxẽ. Rũ ngẽma mexũ i cuxũxũ rũ taãxẽ choxna naxã. <sup>5</sup>Pa Corix, namexechi i ngẽma cuxũxũ. Rũ curũ ñnũ rũ taxumaama nawũxigu. <sup>6</sup>Rũ ngẽma tama naãxẽxũ icuãxũxicatama nixĩ i tama nũxũ cuaxgũchaũxũ nax ñuxãcũ namexechixũ i curũ puracũ. <sup>7</sup>Rũ ngẽma chixexũgu rũxĩnũxũ rũ chixri maxẽxũ i duũxũgũ rũ nimu ñoma maxẽ i bacaxũrũxũ, natũrũ yixcũra rũ tá narũxoxochi. <sup>8</sup>Natũrũ i cumax, Pa Cori Pa Tupanax, rũ guxũguma guxãétũwa cungexmaecha. <sup>9</sup>Natũrũ i ngẽma curũ uanũgũ, Pa Cori Pa Tupanax, rũ tá inayarũxo. Rũ guxũma i ngẽma chixexũ ũgũxũ rũ tá nawoone. <sup>10</sup>Rũ cuma rũ yexeraãcũ choxũ quiporaxẽẽchigũ ñoma wũxi i tuirurũxũ. Rũ pumãramaxã choxũ cubaeru. <sup>11</sup>Rũ tá choxũ nũxũ cudauxẽxẽ nax ñuxãcũ poxcu namaxã cuxueguxũ i chorũ uanũgũ. Rũ choma rũ tá nũxũ chaxĩnũ i norũ axu i ngẽma chixri maxẽxũ. <sup>12</sup>Rũ ngẽma mea maxẽxũ i duũxũgũ rũ ñoma tema ya

bacacũrũxũ tá nixĩgũ. Rũ tá nimexechi yima ocayiwa ya Lĩbanuwa ngẽxmagũnerũxũ. <sup>13</sup>Rũ Cori ya Tupanapatawa tá nangexmagũ rũ ngẽma tá nataãxẽgũ. <sup>14</sup>Rũ woo ngẽxguma nayaegu rũ tá nixãxacũetanũama rũ guxũgutãma naporae. <sup>15</sup>Rũ tá nũxũ nixugũgũ rũ ñanagũrũgũ tá: “Nũma ya Cori ya yimã chorũ poxũrũxũ rũ nixaixcũma rũ nawa rũ nataxuma i taxacũrũ chixexũ”, ñanagũrũgũ tá.

### Cori ya Tupana rũ ãẽxgacũ nixĩ

**93** <sup>1</sup>Rũ nũma ya Cori ya Tupana rũ ãẽxgacũ nixĩ. Rũ norũ ũtũne nicũxcuchi rũ naporaxũchi. Rũ nũma rũ nachicagu nanaxũ i ñoma i naane nax tama ngẽma yaxũgachixũcax. <sup>2</sup>Rũ nũxcũmacũrũwa, Pa Corix, rũ ãẽxgacũ quixĩ rũ guxũguma woetama cuyexmaecha. <sup>3</sup>Pa Corix, rũ ngẽma taxtũgũ rũ naxãũgaxũchixũgũ rũ nata i norũ yuapegũ. <sup>4</sup>Natũrũ i cuma nax daxũwa cungexmaxũ, rũ yima taxtũgũarũ yuape i poraãcũ ãũgaxũarũ yexeraxũchi cupora. <sup>5</sup>Pa Corix, ngẽma curũ mugũ rũ taguma naxũchicũũ rũ taguma inarũxo. Rũ ngẽma curũ ũtũne rũ guxũguma yima cupata namaxã nangaxãẽ. ãẽxgacũgũ i guxchaxũarũ mexẽerũũtũtũwa nangexma ya Tupana.

**94** <sup>1</sup>iRũ cugũ inawex, Pa Cori Pa Tupanax! Erũ cuxmexwa nixĩ i nangexmaxũ nax poxcu namaxã cuxueguxũ i ngẽma chixexũ ũgũxũ. <sup>2</sup>Rũ cuma nixĩ i namaxã icucuãxũ i ñoma i naanecũãx i duũxũgũ. iRũ inachi rũ napoxcue i ngẽma nũgũ icuaxũxũgũxũ! <sup>3</sup>Pa Corix ãrũ ñuxguxũratãta

icuyachaxāchixēēgūxū nax nataāxēgūxū i ngēma chixexū ügūxū? <sup>4</sup>Rü guxūma i ngēma chixexū ügūxū rü nadauxcūraxūwaxegü rü togüētüwa nügi naxūgūxēxē rü norü poramaxā nügi nicuaxūxūgü. <sup>5</sup>Pa Corix, nūmagü rü curü duūxūgūxū nachixeāēgü rü tüxū nacugüe. <sup>6</sup>Rü tüxū nadai ya yíxema yutegüxe, rü yíxema taxcutagü, rü yíxema to i nachixūanecūāx ixīgüxe. <sup>7</sup>Rü nūmagü rü ñanagürügi: “Yimá Cori ya Acóbuarü Tupana rü tama nüxū nadau i ngēma ixūxū rü taxūtáma nüxū nacuaḡ”, ñanagürügi. <sup>8</sup>Pa Duūxūgi i Ngeāxēmaregūxū rü Tama Peāxēxū Icuāxex ĩrü ñuxguxūratáta i peāxēxū pecuáxū? <sup>9</sup>ĽRü pexcaḡ rü tama nüxū naxīnū ya yimá Tupana ya naxüci i pexmachixē? ĽRü pexcaḡ rü tama nüxū nadau ya yimá pexetiarü üruuxū? <sup>10</sup>ĽRü pexcaḡ rü yimá nachixūanegüarü poxcuruxū rü taxūtáma pexū napoxcu? ĽRü pexcaḡ rü taxūtáma nüxū nacuaḡ ya yimá duūxūgūxū ngüxēēcü nax naāxēxū yacuáxūcaḡ? <sup>11</sup>Dücax, rü nūma ya Cori ya Tupana rü nüxū nacuaḡ nax naechitamare namaxēxū i duūxūgü. <sup>12</sup>Pa Corix, rü tataāxē ya yíxema ucuxē tüxna cuxāxe rü yíxema tüxū cunguxēxēxē. <sup>13</sup>Erü ngēxguma aixcūma tanayaxūxgu i curü ucuxē rü tá túmaāxēxū tacuaḡ i ngēxguma guxchaxūgü túmacaḡ ínguxgu. Natürü ngēma chixexūarü üruuxū rü cuma rü naxcaḡ cunamexēxē i wüxi i āxmaxū nax ngēmagu yangucuchixūcaḡ. <sup>14</sup>Rü nūma ya Cori ya Tupana rü tagutáma ínanawogü i norü duūxūgü rü tagutáma nüxna nixū nax nüxica ngēma nawogūxūcaḡ. <sup>15</sup>Rü ngēma aixcūma mexū i nacūma rü tá wena duūxūgūcaḡ

natáegu. Rü guxūma i duūxūgü i mexūgu rüxīnūexū rü tá nagu naxī. <sup>16</sup>ĽRü texé tá choxū Ítapoxū nüxna i ngēma chixri maxēxū rü ngēma chixexūarü üruūgü? <sup>17</sup>Rü ngēxguma chi Cori ya Tupana tama choxū rüngūxēēgu rü choma rü chi marü chayü. <sup>18</sup>Rü ngēxguma ñachagu: “Pa Corix, ngēmatama chixexūgu changu”, ñachagu, rü cuma rü choxū cungechaūācūma choxū cürüngūxēxē. <sup>19</sup>Rü ngēxguma guxchaxūwa changexmagu rü chauāxē rü namaxā napaxgux, rü cuma rü choxū ícurüdaxēxē rü choxū cutaāxēxēxē. <sup>20</sup>Rü cumax, Pa Tupanax, rü tama namaxā cuxāmücü i ngēma āēxgacügi i guxchaxūarü mexēerüügi i chixri duūxūgūmaxā icuaxgūxū rü tama mea mugü nüxū ixugüācūma nanamexēxē i duūxūgūarü guxchaxūgü. <sup>21</sup>Erü ngēma duūxūgü rü nügūmaxā nagu narüxīnūe nax ñuxācü tüxū napoxcuexū ya yíxema taxuxūma i chixexū ügüchirēxe. Rü túmamaxā nanaxuegugü nax tayuxū. <sup>22</sup>Natürü nūma ya Cori nixī i chorü cuxchicaxū rü ñoma nutapechita icúxürüxū choxū ípoxücü. <sup>23</sup>Rü nūma ya Cori rü tá nanadai i ngēma chixri maxēxū i duūxūgü nagagu i ngēma chixexū i naxügūxū. Rü tórü Tupana rü aixcūmaxūchi tá nanadai i ngēma duūxūgü.

#### Taāxēácü Cori ya Tupanacaḡ tawiyaegü

**95** <sup>1</sup>iRü nua pexī rü taāxēácü naxcaḡ tawiyaegü ya Cori ya Tupana! iRü ngīxā naxcaḡ tawiyaegü ya yimá tórü poxüruxū rü tórü maxēxēeruxū! <sup>2</sup>iRü ngīxā naxcaḡ taxī rü moxē nüxna taxā rü wiyaegūmaxā nüxū ticuaxūxūgü!

<sup>3</sup>Erü nüma ya Cori ya Tupana rü naporaxüchi rü naétüwa naxü i guxüma i ngëma tupanagünetä ixügüxü. <sup>4</sup>Rü naxmexwa nangexma i guxüma i ngëma mairaxüarü aixepewa ngëxmagüxü rü yima maxpünegü ya máchanexüchigüne. <sup>5</sup>Rü ngëma már rü noxrü nixü yerü nümatama nanangoxëxë. Rü nümatama nixü ga naxmexmaxä naxüäxü ga ñoma ga naane. <sup>6</sup>iRü nua pexü rü ngixä napexegu tacaxápüxügü rü nüxü ticuaxixügü ya Cori ya Tupana ya tüxü ücü! <sup>7</sup>Rü nüma nixü i tórü Tupana yixixü rü yixema rü norü duüxügü tixigü. Rü yixema rü ñoma norü carnérugürüxü nüxü tixigü. iRü ñuxma rü nüxü iperüxünüe i ngëma pemaxä nüxü yaxuxü! <sup>8</sup>Erü nüma rü ñanagürü: “Tama name nax choxü pexoexü yema perü oxigü choxü oegurixü ga yexguma taxüema ixäpataxüwa nayexmagügu ga Merfbawa rü Máchawa. <sup>9</sup>Rü yéma nixü ga perü oxigü ga choxü naxügüxü rü woo nüxü nax nadaugüxü ga yema taxü ga mexügü ga napexewa chaxixü. <sup>10</sup>Rü 40 ga taunecü namaxä chanu ga yema duüxügü rü ñachagürü: ‘Ñaa duüxügü rü tama choxü inaxünüechaü i chorü ucyxëgü, rü ngëma nümatama nagu naxünüexügu naxü’ ñachagürü. <sup>11</sup>Rü yemacax chorü numaxä namaxä chanaxuegu nax taxütäma nawa nangugüxü i ngëma naane i nagu chanangügüxëechaüxü”, ñanagürü ya Tupana.

**iNgexwacaxüxü i wiyaegu Cori ya  
Tupanacax pewiyaegü!**

**96**

<sup>1</sup>iRü ngexwacaxüxü i wiyaegu Cori ya Tupanacax pewiyaegü i guxäma i pemax i ñoma i naanewa

maxëxü! <sup>2</sup>iRü naxcax pewiyaegü rü nüxü picuaxüxügü! iRü guxü i ngunexügügu penaxunagü nax nüma yixixü i tüxü namaxëxëxü! <sup>3</sup>iRü guxüma i nachixüanecüäxmaxä nüxü pixuchiga nax nüma rü naxüünexü rü naxüäxü i muxüma i mexügü i norü poramaxä naxüxü! <sup>4</sup>Erü nüma ya Cori ya Tupana rü guxäétüwa nangexma, rü ngëmacax name nax nüxüicatama icuaxüügüxü. Erü nüma rü naxäücumaxüchi rü guxüma i ngëma duüxügü namaxä tupanaáxüétüwa nangexma. <sup>5</sup>Rü ngëma togü i nachixüanegüarü tupanagü rü taxuxüma nixigü. Natürü nüma ya Cori ya Tupana nixü ga naxüxü i guxüma i ngëma dauxüwa nüxü idauxü. <sup>6</sup>Rü nüma ínangexmaxüwa rü nangóone. Rü napatawa nangexma i pora rü guxüma namexechi. <sup>7</sup>Pa Guxüma i Nachixüanecüäx irü nüxü pixuchigagü nax nüma ya Tupana rü nüxicatama nixü i aixcüma naporaxü rü naxüünexü! <sup>8</sup>iRü nüxü pengechaügüäcüma nüxü picuaxüxügü! Erü nüma rü guxäétüwa nangexma. iRü napataxtügu pechocuxü namaxä i perü ämaregü! <sup>9</sup>iRü nüxü picuaxüxügü nawa ya yima napata ya mexechine! Rü name nixü nax guxüma i duüxügü i ñoma i naanewa maxëxü rü napexegu nacaxápüxügü. <sup>10</sup>iRü guxüma i nachixüanecüäxgümaxä nüxü pixu rü ñapegügü: “Nüma ya Cori ya Tupana nixü i äëxgacü ya guxäétüwa ngëxmacü yixixü”, ñapegügü! Rü nüma rü wüxitama ga namaxügu nayaxüxëxë ga ñoma ga naane nax tama ngëma namaxüna yaxügachixücax. Rü nüma nixü i meama guxüma i

nachixũanegũmaxã inacuíxũ. <sup>11</sup>Rũ nataãxëgũ i daxũguxũ i naane rũ ñoma i naane. Rũ ngëxgumarũxũ ta norũ taãxëmaxã naxãũga i ngëma már, rũ naxãũgatanũ i guxũma i ngëma nawa ngëxmagũxũ. <sup>12-13</sup>Rũ nataãxë ta i naane rũ guxũma i nanetũgũ i nagu togũxũ. Rũ ngëma naigũ i naixnecũwa ngëxmagũxũ rũ name nixĩ i taãxëãcü nicuxcu napëxewa ya Cori ya Tupana ya núma ũcü. Erũ núma ya Cori ya Tupana rũ nua tá naxũ nax ñoma i naanemaxã inacuíxũcax. Rũ núma rũ aixcũma meama tá guxũma i nachixũanegũmaxã inacũax.

Nũma ya Cori nixĩ i ãëxgacũ yixĩxũ

**97** <sup>1</sup>Nataãxë, Pa Ñoma i Naanex! Rũ Pa Muxũ i Capaxũgũx irũ petaãxëgũ! Erũ núma ya Cori ya Tupana nixĩ i guxũarũ ãëxgacũ yixĩxũ. <sup>2</sup>Rũ pamũemaxũ i caixanexũmaxã ínanũmaeguãchi. Rũ núma nixĩ i ãëxgacũ i aixcũma mea nangugũxũ i wũxichigũ i duũxũgũarũ maxũ. Rũ aixcũma nawëxgu i ngëma namaxã naxueguxũ i wũxichigũ. <sup>3</sup>Rũ wũxi i ũxiema rũ napëxegu nixũ, rũ ngëmamaxã ínanagu i norũ uanũgũ i nacũwawa ngëxmagũxũ. <sup>4</sup>Rũ yimá norũ ãëmacũ rũ ñoma i naanewa nanguema. Rũ núma i ñoma i naane rũ nidũrxũx i ngëxguma nũxna nanguemagu. <sup>5</sup>Rũ napëxewa ya Cori ya ñoma i naanearũ yora ixĩcü rũ yima maxpũnegũ rũ inadëxgũ ñoma werarũxũ. <sup>6</sup>Rũ guxũma i ngëma dauxũwa nũxũ idauxũ rũ tũxũ nũxũ nacũaxëxë nax núma ya Tupana rũ ãëxgacũ ya mecũ yixĩxũ. Rũ guxũma i duũxũgũ i ñoma i naanecũãx rũ nũxũ

nadaugũ nax ñuxãcü naxũünexũ i nũmax. <sup>7</sup>Rũ Tupanapëxewa narũmaãchitanũ i ngëma duũxũgũ i namaxã taãxëgũxũ i tupananetachicũnaãxãgũ rũ nũxũ icuaxũũgũxũ. Erũ guxũma i ngëma duũxũgũ namaxã tupanaãxgũxũ rũ Cori ya Tupanapëxegu narũmaãchitanũ. <sup>8</sup>Pa Corix, yima íane ya Yerucharëũ rũ guxũma ya yima Yudáanearũ íanegũ rũ nataãxëgũ namaxã i curũ mugũ. <sup>9</sup>Erũ cumax, Pa Cori ya Guxãëtiwa Ngëxmaxex, rũ namaxã icucũax i guxũma i ñaa naane. Rũ cuma rũ guxũma i ngëma tupananetaguëtiwa cungexma. <sup>10</sup>Rũ núma ya Cori ya Tupana rũ tũxũ nangechaũ ya yíxema nũxũ oxë i ngëma chixexũ. Rũ tũxna nadau ya yíxema aixcũma naga ínũexë rũ tũxũ ínapoxũ naxmëxwa i ngëma chixri maxëxũ i duũxũgũ. <sup>11</sup>Rũ ngëma duũxũgũ i mea maxëxũcax nixĩ i yangunexũxũ. Rũ ngëma taãxë i aixcũma ixĩxũ rũ ngëma duũxũgũ i tama chixexũ ũgũxũcax nixĩ. <sup>12</sup>Pa Duũxũgũ i Mea Maxëxũx irũ namaxã petaãxëgũ ya Cori, rũ nũxũ picũaxũxũgũ! Erũ naxũüne.

Nũma ya Cori ya Tupana  
rũ guxũëtiwa naxũ

**98** <sup>1</sup>IRũ ngëxwacaxũxũ i wiyægu Cori ya Tupanacax pewiyægu! Yerũ muxũma ga mexũ ga taxũgũ norũ poramaxã naxũ. Rũ nachacũxũ ya ũünene rũ poranemaxã tóru uanũgũxũ narũporamae. <sup>2</sup>Rũ núma ya Cori rũ nanaxunagũ nax tóru uanũgũxũ naporamaexũ. Rũ guxũma i nachixũanegũxũ nũxũ nadauxëxë nax

ñuxăcũ tamaxă namecũmaxĩ. <sup>3</sup>Erũ nũma rũ tũxĩ nangechaũ rũ tama nũxĩ narũngũma ga norũ uneta ga tórũ oxĩgũmaxă nũxĩ yaxuxũ. Rũ yema nax tórũ uanũgũxĩ naporamaexũ rũ guxũ i naanewa nanguchiga. <sup>4</sup>Pa Duũxũgũ i Ñoma i Naanewa Maxėxũx irũ taăxėăcũ naxçax pewiyaegũ ya Tupana! iRũ tagaăcũ perũ wiyaegũmaxă nũxĩ picuăxũxũgũ! <sup>5</sup>iRũ árpamaxă pepaxetaguăcũma naxçax pewiyaegũ ya Cori! iRũ perũ paxetarũgũ iăcũnũxũmaxă pegũ pepaxpexegũăcũma naxçax pewiyaegũ! <sup>6</sup>iRũ perũ paxetarũgũ i picuegũxũmaxă taăxėăcũmaă ģėxgacũ ya Coripexewa pewiyaegũ! <sup>7</sup>Rũ name nixĩ nax norũ taăxėmaxă naxăũgaxũ i ngėma már rũ guxũma i nawa ngėxmagũxũ. Rũ ngėxgumarũxũ ta i ñoma i naane rũ guxũma i duũxũgũ i nawa maxėxũ rũ name nixĩ nax nataăxėgũxũ. <sup>8-9</sup>Rũ guxũma i natũgũ rũ name nixĩ i Cori ya Tupanaçax naxăũgatanũxũ ñoma napėxmėxgũxũrũxũ. Rũ guxũnema ya maçpũnegũ rũ name nixĩ i Tupanapexewa nataăxėgũ. Erũ nũma rũ nua naxũ nax ñoma i naanemaxă iyacuăxũçax. Rũ nũma rũ aixcũma tá guxũma i nachixũanecũăxmaxă meama inacuăx.

**Nũma ya Cori ya Tupana rũ guxũma iă ģėxgacũgũétũwa nangexma**

**99** <sup>1</sup>Nũma ya Cori rũă ģėxgacũ nixĩ. Rũ norũ tochicaxũ rũ ngėma taxre i daxũcũăxchicũnaçăgũ i ixăpexátũxũarũ ngăxũwa nangexma. Rũ napexewa rũ norũ muũmaxă nidũxrue i guxũma i nachixũanecũăxgũ

rũ woo i ñoma i naane rũ nidũxrũx. <sup>2</sup>Rũ nũma ya Cori ya maçpũne ya Chióũguăăchiũcũ rũ guxũétũwa nangexma. Rũ nũma nixĩ i guxũma i nachixũanecũăx i duũxũgũmaxă inacuăxũ. <sup>3</sup>Rũ name nixĩ i nũxũ ticuăxũũgũxũ ya yimă Cori ya guxămaxă icuăcũ rũăăcũmacũ erũ nũma rũ naxũũne. <sup>4</sup>Rũ cumax, Pa Corix, rũăăxgacũ ya poraxũchicũ quixĩ rũ curũ me nixĩ nax meama guxũma i duũxũgũmaxă icucuăxũ. Rũ cumatama nixĩ i nũxũ quixuxũ nax cupexewa rũ nawũxiguxũ i guxũma i duũxũgũ. Rũ toma nax Iraėtanũxũgũ tixĩgũxũ rũ cuma rũ aixcũma meama tomaxă icucuăx rũ ngėma mugũ ga toxna cuxăxũ rũ meama niwėx. <sup>5</sup>iRũ nũxũ picuăxũxũgũ ya yimă Cori ya tórũ Tupana ixĩcũ! iRũ napexegu pecaxăpũxũgũ! Erũ nũma rũ naxũũne. <sup>6</sup>Rũ guma Moichė rũ Aróũ nixĩ ga Tupanapexewa tórũ oxĩgũétũwa íchogũgũxũ. Rũ nũma ga Chamué ga Tupanaarũ orearũ uruxũ rũ norũ yumũxėwa Tupanaarũ ngũxėėçax ínaca. Rũ nũma ga Cori ya Tupana rũ nanangăxũga ga norũ yumũxė. <sup>7</sup>Rũ nũma ga Tupana rũ yema caixanexũwa Moichėmaxă rũ Aróũmaxă nidexa rũ nũmagũ rũ meama nayanguxėxė ga norũ mugũ ga nũxna naxăxũ. <sup>8</sup>Rũ cumax, Pa Cori Pa Torũ Tupanax, rũ cunangăxũgũxũ. Rũ cuma rũ yema torũ oxĩgũxũ cupoxcue ga yexguma chixexũ naxũgũgu, natũrũ nũxũ nũxũ icurũngũma ga norũ chixexũ ga yexguma Moichė rũ Aróũ naėtũwa chogũgũgu. <sup>9</sup>iRũ nũxũ picuăxũxũgũ ya yimă Cori ya tórũ Tupana ixĩcũ! iRũ yima napata ya norũ maçpũne ya

üünenewa ngexmanepexegu  
pecaxápüxügü! Erü nüma ya Cori ya  
tórü Tupana rü naxüüne.

**Cori ya Tupana rü tüxü  
nangóexêxê rü noxrügü tixígü**

**100** <sup>1</sup>Pa Duüxügü i Ñoma i  
Naanewa Maxêxüx irü  
taãxêácü naxçax pewiyaegü ya Cori ya  
Tupana! <sup>2</sup>iRü taãxêácü penataxêxê ya  
Cori! iRü taãxêácü naxçax pewiyaegü rü  
nüxü picuaxüxügü! <sup>3</sup>iRü nüxna  
pecuaxâchie nax nüma ya Cori rü  
Tupana yixíxü! Rü nüma nixí i tüxü  
nangoxêxê rü tama yigütama  
tangoxêxê. Rü norü duüxügü tixígü  
ñoma carnérugü i norü yoraarü  
nachitaxüwa ngëxmagüxürüxü. <sup>4</sup>iRü  
nua naxütawa pexí, rü napatagu  
pechocu, rü perü wiyaegümaxã nüxü  
picuaxüxügü rü moxê nüxna pexãgü!  
iRü nüxü pixu nax aixcüma  
namexechixü i nümax! <sup>5</sup>Erü nüma ya  
Cori rü namecüma rü ngëma norü  
ngechaü rü guxüguma nangexmaecha.  
Rü ngëma nax yaxaixcümaxü rü taguma  
inayacuax.

**Ãëxgacü ga Dabí rü  
Tupanamaxã inaxuneta**

**101** <sup>1</sup>Pa Cori Pa Tupanax, rü  
chorü wiyaemaxã cuxü  
chícuaxüxü naxçax nax toxü  
cungechaxüxü rü tomaxã mea icucuáxü.  
<sup>2</sup>Rü chanaxwaxe nax aixcüma mea  
cuxçax chamaxüxü. ¿Rü ñuxgu tá  
chauxütawa cuxü nax choxü  
curüngüxêxêxüçax? Rü ngëmaácü  
aixcüma tá name i chorü maxü  
napexewa i chopatacüãxgü. <sup>3</sup>Rü

taxütáma marü naxçax íchidau i  
taxacürü chixexü. Rü tama namaxã  
chataãxê i ngëma duüxügü i tama  
Tupanaga ñnüexü. Rü taxütáma  
chanayaxu. <sup>4</sup>Rü tá nüxü chaxo i ngëma  
ñnügü i chixexü i chauãxêwa íngugüxü.  
Erü taxuxüma i taxacürü chixexü  
chaxüxchaü. <sup>5</sup>Rü tá  
chayanangeaxgüxêxê i ngëma duüxügü i  
namücügüechita chixri tümachiga  
idexagüxü. Rü taxütáma yaxna namaxã  
chaxínü i ngëma duüxügü i  
toxguãxétüwa nügü úgüxêéchaüxü rü  
ngëma norü poramaxã nügü  
icuaxüügüxü. <sup>6</sup>Rü tá naxçax chadau i  
yatügü i aixcüma mea maxêxü nax  
chauxütawa nangexmagüxüçax rü chorü  
ngüxêëruügü yixígüxüçax. <sup>7</sup>Rü ngëma  
womüxêëwaxegüxü rü tá nangechica i  
chopatawa. Rü taxuxütáma idorataxáxü  
chauxütawa nangexma. <sup>8</sup>Rü wüxichigü i  
ngunexügu rü tá naxçax chadau i  
guxüma i ngëma chauchixüanewa  
chixexü ügüxü nax íchanawoxüxüçax  
nawa ya daa Cori ya Tupanaarü ñane.

**Naxíxachiãcüarü yumüxê**

**102** <sup>1</sup>Pa Corix, ichoxü nüxü  
naxínü i chorü yumüxê!  
iRü nayaxu i ngëma tagaácü cumaxã  
nüxü chixexü! <sup>2</sup>iRü taxü i çaxüxçaxwa  
iquicúxü i ngëxguma guxchaxüwa  
changexmagu! iRü choxü nüxü naxínü i  
chorü yumüxê! iRü paxa choxü nangãxü  
i ngëxguma cuxna chacagügu! <sup>3</sup>Erü ñaa  
chorü maxü rü ñoma caixanexürüxü  
paxa inarüxo. Erü poraácü chidaxawe rü  
ñoma üxüwa íngexmaxürüxü chinai nax  
chixaxünexü. <sup>4</sup>Rü chorü maxüne rü  
nayarümaãchi ñoma maxê



yarümaãchicürüxü. Rü ngëmacax  
 chaxobü rü tama chataiya. <sup>5</sup>Rü  
 chaxauxechamare. Rü ngëmacax düxwa  
 chixaxüchi rü chauxchaxmü rü  
 chauchinaxāwa nayaxüx. <sup>6</sup>Rü wüxi i  
 cüchana i chianexüwa ngëxmaxürüxü  
 chixĩ, rüexna ñoma cüchana i  
 ñanechitaxüwa ngëxmarüxü chixĩ. <sup>7</sup>Rü  
 tama chape. Rü ñoma wüxi i weri i  
 nüxicatama ñacaxwexwa axürüxü chixĩ.  
<sup>8</sup>Rü ngëma chomaxā rüxuanügüxü rü  
 taguma nüxü narüchaue nax chixri  
 chauchiga yadexagüxü rü chauégamaxā  
 naguxchigagüxü. <sup>9-10</sup>Rü ngëma nax  
 ngüxü chingexügü rü tama chataiya  
 rü düxwa tanimaca chanangõxmare. Rü  
 ngëma chorü axexü rü  
 chauxgüxüxetümaxā naxāexü erü  
 chomaxā cunuxüchi. Rü ãëxgacüwa  
 choxü cunguxëxë nax yixcüra choxü  
 curütāexüçax. <sup>11</sup>Rü ngëma chorü  
 ngunexügü rü paxa naxüpetü ñoma  
 wüxi i gauxchipetaxürüxü. Rü  
 chayarümaãchi ñoma wüxi ya  
 maxërüxü. <sup>12</sup>Natürü i cumax, Pa Corix,  
 rü guxüguma ãëxgacü quixĩ. Rü ngëma  
 cuéga rü guxügutāma nüxna  
 nacuaçāchie. <sup>13</sup>Pa Corix, iinachi rü cuxü  
 naxauxāchitümüxü ya curü ñane ya  
 Yerucharéü! Erü marü nawa nangu i  
 ngunexü nax tomaxā curüngüxmüxü rü  
 toxü nüxü icuyarüngümaxü i ngëma  
 torü chixexü. <sup>14</sup>Rü toma nax curü  
 duüxügü tixigüxü rü nüxü tangechaü ya  
 yima Yerucharéütapüxarü nutagü, rü  
 poraäcü toxü nangux nax ñuxäcü nagu  
 napogüexü. <sup>15-16</sup>Rü ngëxguma nüma ya  
 Cori norü üünemaxā taxçax nangoxgux  
 rü tüxü nangüxëëgux nax wena  
 tanamexëëxüçax ya yima norü ñane ya

Yerucharéü rü guxüma i  
 nachixüanecüãxgü rü norü ãëxgacügü  
 rü tá nüxü nicuaçüxügü. <sup>17</sup>Rü nüma ya  
 Cori ya Tupana rü tá nüxü naxĩntü i norü  
 yumüxë i ngëma ngëma wogümarexü rü  
 taxütāma nüxü naxo i ngëma naxçax  
 ñnacagüxü. <sup>18</sup>Rü ngëma taxçax naxüxü  
 ya Cori rü name nixĩ i naxümatüxü  
 naxçax i ngëma duüxügü i wixweama  
 ingóetanüxü nax nümagü rü ta Corixü  
 yacuaxgüxüçax rü woo i ngëma ñuxma  
 taxüta buexü. <sup>19-20</sup>Rü nüma ya Cori ya  
 Tupana rü ngëma dauxüwa ñatoxüwa  
 rü ñoma i naanegu nadawenü nax nüxü  
 nangüxëëxüçax i ngëma norü duüxügü i  
 togümexëwa ngëxmagüxü rü  
 ñanguxüxëëxüçax i ngëma yu namaxā  
 naxuegüxü. <sup>21</sup>Rü ngëmaäcü i norü  
 duüxügü rü tá Chióüwa Cori ya  
 Tupanaxü nixuchigagü rü  
 Yerucharéüwa rü tá ta nüxü  
 nicuaçüxügü. <sup>22</sup>Rü ngëxguma ngëma  
 togü i nachixüanecüãxgü nüxü  
 naxĩnüechigagu rü tá Yerucharéügu  
 nangutaquexegü nax nüxü  
 yacuaxüügüxüçax ya Cori ya Tupana.  
<sup>23</sup>Natürü i choma i ñuxmax rü  
 changearüporaçax. Rü taütama  
 chayayane rü nüma ya Cori rü  
 nananuxëxë i chorü maxü. <sup>24</sup>Rü  
 ngëmacax ñachagürü nüxü: “Pa Corix  
 itaxü i choxü quigaxü naxüpa nax  
 meama chayaxü!” ñachagürü nüxü. Pa  
 Corix, curü taunecü rü taguma nagux  
 erü guxüguma cungexmaecha. <sup>25</sup>Rü  
 noxriarü ügügu rü cuma cunaxü ga  
 ñoma i naane. Rü cumatama nixĩ ga  
 cunaxüxü ga guxüma i ngëma dauxüwa  
 nüxü idauxü. <sup>26</sup>Rü guxüma i ngëma rü  
 tá inayarüxo, natürü i cuma rü

guxũgutáma cunaxáixrũgumaraxũ. Rũ ñoma i naane rũ ngẽma dauxũwa nũxũ idaaxũ rũ wũxi i naxchirurũxũ tá nangau. Rũ cuma rũ tá cunaxũchicũxũ rũ ñoma wũxi i duũxũ i naxchiru i ngauxũ itáxũ rũ ngexwacaxũxũ i naxchirugu icũxũrũxũ tá nixĩ. <sup>27</sup>Natũrũ i cumax rũ cunaxáixrũgumaraxũ rũ curũ taunecũ rũ taguma nagux. <sup>28</sup>Rũ ngẽma nataagũ i curũ duũxũgũ rũ tá nũxna cudau. Rũ ngẽma naane i toxna cuxáxũwa tá nangexmagũecha.

### Tupanaxũ tá chicuaxũxũ

**103** <sup>1</sup>Rũ guxũma i chorũ ñnũmaxã rũ ñaa chauãẽmaxã tá nũxũ chicuaxũxũ ya nũma ya Cori ya Tupana ya üüneçũ. <sup>2</sup>Rũ guxũma i chorũ ñnũmaxã tá nũxũ chicuaxũxũ ya Cori ya Tupana rũ taxũtáma nũxũ icharũngũma i norũ ngũxẽegũ i chaũxçax naxũxũ rũ bai i wũxi. <sup>3</sup>Rũ nũma rũ choxũ nũxũ inayarũngũma i guxũma i chixexũ i chaxũxũ rũ chaũxçax nayataanexẽxẽ nawa i chorũ daxawegũ. <sup>4</sup>Rũ nũma nixĩ i yuwa choxũ ñanguxuchixẽxũ. Rũ nũma rũ poraãcũ choxũ nangechaũ rũ chomaxã nameçũma. <sup>5</sup>Rũ nũma nixĩ i guxũma i mexũgũ choxna naxãxũ. Rũ nũma rũ choxũ naporaxẽchigũama nax ñoma ñyũrũxũ chaporaxũçax. <sup>6</sup>Rũ nũma rũ aixçũma mea tũmamaxã inacuaçax ya yixema togũ chixri tũmamaxã icuaçxgũe. <sup>7</sup>Rũ nũma ga Tupana rũ Moichéxũ rũ yema Iraétanũxũxũ nũxũ nacuaçxẽxẽ ga yema nagu naxĩnũxũ rũ napexewa inanawex ga muxũma ga mexũgũ ga norũ poramaxã naxũxũ. <sup>8</sup>Rũ nũma ya Cori rũ nameçũma rũ nũxũ

tangechaũtũmũxũgũ rũ yaxna tamaxã naxĩnũ rũ poraãcũ tũxũ nangechaũ. <sup>9</sup>Rũ tama taxchi naxai rũ tama tamaxã nanuecha. <sup>10</sup>Rũ woo nax nataxũ i ngẽma chixexũ i íxũxũ natũrũ i nũmax rũ tama nanangexgumaraxũ i ngẽma poxcu i tũxna naxãxũ. <sup>11</sup>Erũ ngẽma norũ ngechaũ rũ taguma inayagux tũmacax ya yixema naga ñnũexe. Erũ norũ ngechaũ rũ nataxũchi ngẽma daxũguxũ i naane rũ ñoma i naanexũ yadũxũxũrũxũ. <sup>12</sup>Rũ ngẽma tóru chixexũgũ rũ marũ tũxna nanayáxũguxẽxẽ ñoma éste rũ oéste nũgũna nax nanayáxũguxẽxũrũxũ. <sup>13</sup>Rũ nũma ya Cori rũ tũxũ nangechaũ ya yixema naga ñnũexe ñoma wũxi i papá naxacũgũxũ ngechaũxũrũxũ. <sup>14</sup>Erũ nũma rũ meama nũxũ nacuaçax nax taçacũwa tũxũ naxũxũ rũ nũxũ nacuaçax nax waixũmũtẽxe ixĩgũxũ. <sup>15</sup>Rũ duũxũgũarũ maxũ rũ tama namax. Rũ ñoma wũxi i natũanerũxũ nixĩ rũ ñoma wũxi i putũra i naixnecũcũax i boxchacuxũrũxũ nixĩ. <sup>16</sup>Rũ ngẽxguma buanecũ nagu nguxgu i ngẽma putũrachacu rũ ngẽxma narũxo rũ taguma texé wena nũxũ tadau. <sup>17-18</sup>Natũrũ ngẽma Tupanaarũ ngechaũ tũmacax ya yixema naga ñnũexe rũ taguma inayacuaçax. Rũ tũmaxacũgũwa naxũe nax guxũguma Tupana tũmamaxã mecũmaxũ ya yixema mea yanguxẽegũxe i norũ uneta rũ tama nũxũ irũngũmaexe nax naga taxĩnũxũ i norũ mugũ. <sup>19</sup>Rũ nũma ya Cori ya Tupana rũ daxũguxũ i naanewa nanangexmaxẽxẽ i norũ tochicaxũ rũ ngẽma namaxã inacuaçax i guxũma. <sup>20</sup>Pa Daxũcũax i Orearũ Ngeruxũ i Poraexũ i

Yanguxêégüxe i Ngêma Tupana Pexũ  
Muxũx irũ mexũ Corimaxã pexuegugũ!  
21Rũ guxãma i pemax, Pa Daxũcüãx ya  
Coriaxũ Puracüexe rü Norũ Ngúchaũ  
Ügüxex irũ mexũ Corimaxã pexuegugũ!  
22Rũ guxãma i pema ya Cori ya Tupana  
pexũ ngoxexéxex irũ Cori ya Tupanaxũ  
picuaxũxũgũ i guxũma i norũ naanewa!  
Rũ choma rü tá ta guxũ i chorũ  
maxũmaxã Cori ya Tupanaxũ  
chicuaxũxũ.

Nũxũ ticuaxũxũgũ ya yimá  
guxũxũ ngoxéecũ

**104** 1Rũ guxũma i chorũ  
ĩnũmaxã tá nũxũ  
chicuaxũxũ ya Cori ya Tupana. Erũ  
cumax, Pa Cori Pa Chorũ Tupanax, rü  
guxũétũwa cunxexma rü cuxũũne rü  
cunangóonexéxẽ. 2Rũ cuma rü curũ  
ngóonexũarũ ngãxũwa cunxexma. Rũ  
cuma rü cuyangéechi ga daxũguxũ ga  
naane ñoma wüxi i tüeruxũ  
ingéechixũrũxũ. 3Rũ dexãétũwa  
cunxexma rü ngẽxma dauxũgu  
cuxãchiũ. Rũ ngẽma caixanexũ rü  
cuwexũxũ cuyaxixéxẽ. Rũ yima buanecũ  
nixĩ ya nagu quixũcü. 4Rũ yima  
buanecũ nixĩ i yangegüci i cuga. Rũ  
ngẽma üxüema nixĩ i naxũxũ i curũ  
ngúchaũ. 5Rũ cuma rü wüxitama ga  
namaxũgu cunaxũ ga ñoma ga naane  
nax tama ngẽma yaxũgachixũçax. 6Rũ  
noxriarũ ügũgu rü yema már ga  
mátamaxũ rü waixũmüétũgu nixũ rü  
woo ga guma ma xpũnegũ rü naétũgu  
nixũ. 7Natürũ ga cuma rü cunamu ga  
yema dexá ga már ixĩxũ nax wüxiwa  
naxũxũçax. Rũ yexguma nũxũ naxĩnũgu  
ga cuga ga ñoma duruanexũrũxũ ixĩxũ

rü paxa wüxiwa naxũxũchixũ. 8Rũ  
nangóe ga guma ma xpũnegũ rü  
ngatexũgũ yerũ ga yema dexá rü  
wüxiwa naxũxũchixũ. Rũ yemaacũ ga  
yema dexá rü yema nachica ga namaxã  
nũxũ cuxunetaxũwa naxũ. 9Rũ yema  
namaxã cuxunetaxũgu narũxiãchi ga  
yema dexá nax tama wenaxarũ  
waixũmüétũgu yaxũxũçax. 10Rũ ngẽma  
bairawegüarũ dexá rü natũgũ i  
ma xpũneanewa ne dagũxũwa  
cunamugũ. 11Rũ ngẽma dexáwa  
naxaxegũ i guxũma i naexũgũ. Rũ  
ngẽmawa naxaxegũ i ngẽma búrugũ i  
naixnecücüãx. 12Rũ natücutũgũgu  
nixũãchixaũ i ngẽma werigũ. Rũ ngẽma  
naxae natanũwa ya yima naigũ. 13Rũ  
cuma rü yéa dauxũwa ícunxexmaxũwa  
cunamu ya pucũ nax ma xpũneétũgũgu  
napuxũçax. Rũ yima pucũmaxã  
cuyawaimüanexéxẽ i ñoma i naane.  
14Rũ ngẽmaacũ cunaxũgũxéxẽ ya maxẽ  
naxçax i naxũnagũ. Rũ ngẽxgumarũxũ  
ta cunaxũgũxéxẽ i nanetũgũ i ñuxma  
duũxũgũ namaxã toegũxũ nax  
ngẽmaacũ nũxũ nangexmaxũçax i nabũ  
i ngóxũ. 15Rũ ngẽmaacũ duũxũgũna  
cunaxã i norũ poraxẽeruxũ i paũ rü  
norũ taãxẽẽeruxũ i bínu rü norũ  
mexẽeruxũ i chíxũ. 16Rũ ngẽma naigũ  
rü ngẽma dexáwa naxaxegũ. Rũ woo ya  
yima ocayiwa gũ ya taxũne ya Cori ya  
Tupana Líbanuanegu togũne rü ngẽma  
dexáwa naxaxegũ. 17Rũ yima ocayiwa gũ  
nixũxchiãũ i ngẽma werigũ i íraxũ. Rũ  
yima pínutaniüwa namaxẽ i cówa gũ.  
18Rũ ma xpũneanewa nangexmagũ i  
ngẽma naexũgũ i naixnecücüãx. Rũ  
ngẽma ma xpũnearũ ãxmaxũwa namaxẽ  
i ngẽma chigugũ rü ngagũ. 19Rũ yima

tauemacü rü cunangoxêxê nax yimawa nangugüxîcax i ngunexügü. Rü yimá üaxcü rü nüxü nacuax i norü ora i nagu yanaxücuxü. <sup>20</sup>Rü cuma rü cunaxêanexêxê i ngêxguma nachütagu. Rü ngêxguma i ngêma naexügü rü naixnecüwa ínachoxü. <sup>21</sup>Rü ngêma aigü rü nawemüçax ngêma naxae. Rü ngêmaâcü Tupanana nacagüe nax norü ðna nüxna naxâxüçax. <sup>22</sup>Natürü i ngêxguma yangunegu rü üaxcü íbâxigu rü naxmaxüwa naxî rü ngêma nayapee. <sup>23</sup>Rü ngêxguma i nüma i duüxügü rü norü puracüwa naxî. Rü napuracüe ñuxmata nachüta. <sup>24</sup>Rü namuxüchi i ngêma cuxüxü, Pa Corix. Rü guxüma i ngêma cuxüxü rü namexechi erü cumatama curü cuaxmaxâ cunaxü. Rü guxüma i ngêma cuxüxü rü namaxâ nanapá i ñoma i naane. <sup>25</sup>iRü dücax i ngêma már! Rü natacutüxüchi, rü namaxüchi rü nawa namaxê i naguxüraxüxü i choxnigü rü naexügü i taxü rü íxíraxü. <sup>26</sup>Rü ngêmagu narüxîxü ya wapurugü ya taxüchine. Rü ngêmawa nangexma i ngêma Leviatâü i taxüchixü i cumatama cuxüxü nax curü íñucaxwaxeruxü yixîxüçax. <sup>27</sup>Rü guxüma i ngêma cuxüxü rü cuxü ínanangüxêégü nax cuma cunachibüexêxüçax i ngêxguma nataiyae. <sup>28</sup>Rü cuma rü nüxna cunaxâ rü nümagü rü nanayauxgü. Rü mea cunaxüwemü rü nümagü rü mea nachibüe. <sup>29</sup>Natürü ngêxguma ícunawogügu rü nümagü rü nanaxîxâchiâégü. Rü ngêxguma nüxna cunayaxügu ya buanecü rü nayue rü wenaxarü waixümüxü nixîgü. <sup>30</sup>Natürü ngêxguma nüxna cuxâxgu i maxü rü

niimu rü ngêmaâcü cuyangexwacaxüchigüxêxê i guxüma i ngêma ñoma i naanewa maxêxü. <sup>31</sup>Rü ngêma Cori ya Tupanaarü üüne rü taguma inayacuax. Rü nüma rü poraâcü nataâxê namaxâ i ngêma nüma naxüxü. <sup>32</sup>Rü ñoma i naane rü nidüxruç i ngêxguma nüma nüxü nadawenügu. Rü ngêxguma yima maçpünegüxü yangógügu rü nicaixquegü. <sup>33</sup>Rü choma rü ñuxma nax chamaxüxü rü tá chorü Cori ya Tupanacax chawiyae. <sup>34</sup>Rü chierü Cori namaxâ taâxêgu i ngêma nagu charüxîñüxü. Erü naxütaguxica nixî i nüxü ichayangaxü i chorü taâxê. <sup>35</sup>iRü noxtacüma iyanaxo i ngêma duüxügü i chixri maxêxü i ñoma i naanewa! Rü name nixî i nataxuma i ngêma duüxügü i chixexü ügüxü. Rü guxüma i chauâêmaxâ rü tá nüxü chicuaxüxü ya Cori ya Tupana. Rü name i Cori ya Tupanaxü ticuaxüxügü.

**Yema mexügü ga taxügü ga  
Iraétanüxüçax naxüxü ga Tupana**

**105** <sup>1</sup>iRü moxê nüxna pexägü ya Cori ya Tupana! iRü guxüwama nüxü pixuchiga! iRü guxüma i duüxügümaxâ nüxü pixu i ngêma mexügü i pexçax naxüxü! <sup>2</sup>iRü perü wiyaegümaxâ nüxü picuaxüxügü! iRü pegümaxâ nüxü pixu i ngêma taxü i mexügü i naxüxü! <sup>3</sup>iRü pegü namaxâ picuaxüxügü ya yimá üüñecü! Rü pema nax naxçax pedaügüxü irü petaâxêgü! <sup>4</sup>iRü naxçax pexî ya Corix ya Tupana, rü norü poraçax pedaügü! iRü guxüguma norü ngüxêçax pedaügü! <sup>5-6</sup>iRü nüxna pecuaxâchie ga yema mexügü ga taxügü ga norü poramaxâ

naxüxü rü ngëma norü mugü ga pemaxã nüxü yaxuxü i pema nax Tupanaarü duü ya Abráútaagü pixigüxü rü Acóbutaagü i Tupana pexü unetagüxe pixigüxü! 7Rü nüma nixi i Cori ya tóru Tupana yixixü. Rü nüma nixi i ñoma i naanemaxã inacuíxü. 8-10Rü woo chi 1000 i natücumü i tataagü ngupetügu, rü nüma ya Tupana rü tagutáma nüxü inayarüngüma i norü uneta ga noxri Abráúmaxã nüxü yaxuxü, rü nawena nane ga Ichaámaxã nüxü yaxuxü, rü yemawena Acóbumaxã rü ta nüxü yaxuxü nax guxügutáma nüxü nangüxëxü i nataagü i Iraétanüxügü. 11Rü yemacax Acóbumaxã nüxü nixu rü ñanagürü: “Choma rü tá cuxna chanaxã i guxüma i ñaa Canaáüane nax guxügutáma cuxrü rü cutaagüaru yixixücax”, ñanagürü. 12-15Rü nümagü ga tóru oxigü rü woo noxretama nixigü ga noxri rü toxnamanacüãx nixigü, rü woo ñuxre ga nachixüanegüwa nichopetüetanü, rü ñuxre ga ãëxgacügümexëwa íningüxüetanü nax ñaa naanewa nangugüxücax, natürü nüma ga Tupana rü tama nanaxwaxe nax texé chixri namaxã icuíxü. Rü yemacax yema ãëxgacügü ga naxmexwa nayexmagüxümaxã nüxü nixu rü ñanagürü nüxü: “Tama chanaxwaxe i ngëma choma nüxü chaxunetaxü i duüxügü rü chixri namaxã ipecuax. Rü ngëma chorü orearü urüügü rü tama chanaxwaxe i ngüxü nüxü pingexëégü”, ñanagürü. 16Rü nüma ga Tupana rü yema naanewa nanangebüanexëxë rü yemacax íngu ga taxü ga taiya. 17Natürü Tupana rü naxüpa Equítuanewa nanamu ga Yúche. Rü

guma nixi ga naeneegü namaxã taxecü nax togümexëwa nayexmaxücax ga Equítuanewa. 18Rü poxcupataügu nanapoxcu. Rü fiéruwa nayachotanaxägü rü cadénamaxã nayachotaparagü, rü yemaacü nanapíxcutü. 19Rü yemaacü Tupana Yúchexü naxü rü ñuxmata yangu ga yema ore ga Yúche nüxü ixuxü. 20Rü yemawena ga Equítuanecüãxaru ãëxgacü ga muxüma ga duüxügümaxã icuícü rü nanamu nax Yúchexü poxcupataüwa ínguguchigüxëxücax. 21Rü nüma ga ãëxgacü rü nüxü naxuneta nax norü ngüxëerüxü yixixücax. Rü naxmexgu nanaxü ga guxüma ga napata rü guxüma ga norü yemaxügü nax nüma namaxã inacuíxücax. 22Rü nüma ga ãëxgacü rü guxüma ga norü ngüxëerüügüétüwa rü norü ucüxëerüügüétüwa nanaxúxëxë ga Yúche nax nüma namaxã inacuíxücax rü nangúxëxëxücax nax cuax nüxü yexmagüxücax. 23Rü yemawena rü Equítuanewa nangu ga Acóbu ga Tupana Iraégu naxüégacü. Rü yexma Equítuanegu naxáchiü. Rü yemaacü Canaáüanewa nayexma, natürü guxügüma nagu narüxínü nax noxrütama naanecax nawoegüxü ga nataagü. 24Rü Tupana rü nayamuxëxë ga yema norü duüxügü rü düxwa Equítuanecüãxgüaru yexera narüporamaegü. 25Rü yemawena ga Tupana rü yema Equítuanecüãxgüna naxínü nax yema Tupanaarü duüxügüchi naxaixücax. Rü yemacax ga Equítuanecüãxgü nagu narüxínü nax ñuxácü naxüáxü nax tama tímüxücax ga guxema Tupanaarü

duïxügü. <sup>26</sup>Rü yemawena ga Tupana rü nanamu ga norü duï ga Moiché rü naenexê ga Aróü ga nümatama ga Tupana nüxü unetacü. <sup>27</sup>Rü nümagü ga Moiché rü Aróü rü Tupanaarü poramaxã ínananguxêëgü ga cuaxruüügü ga äücümaxü ga Equítuanewa. <sup>28</sup>Rü nüma ga Tupana rü guxüwama ga Equítuanewa ínananguxêë ga éanexü. Natürü yema Equítuanecüäxgü rü tama naga naxĩnüe. <sup>29</sup>Rü nagüxü nayanguxuchixêë ga natügiarü dexá rü yemaçax nayue ga choxni. <sup>30</sup>Rü cururugü yema nachixüanewa ínangugüxêë. Rü woo äëxgacüarü pechicaxügu rü naxígü. <sup>31</sup>Rü Tupana rü nanamu ga muxüchixü ga murenügü rü naxchigü. Rü guxüma ga Equítuane rü namaxã nanapá. <sup>32</sup>Rü pucüchicüxü yema nachixüaneétügu nanayixêë ga gáuxü. Rü äëmacü inaxüxêë. <sup>33</sup>Rü yemaacü nanachixexêë ga norü úbanecügü rü norü iguéranecügü. Rü guxüwama nanabüütanüxêë ga norü naigü ga Equítuanewa. <sup>34</sup>Rü Tupana naxçax naca ga muxüchixü ga munügü. Rü taxucürüwa texé tayaxugü ga norü mu. <sup>35</sup>Rü nayawaatü ga nanetügü ga naanegüwa yexmagüxü rü guxüma ga yema nachixüanewa rüxügüxü. <sup>36</sup>Rü yemawena rü wüxichigü ga Equítuanecüäxpatawa rü nanadai ga nüxíraxüxü ga nane. <sup>37</sup>Rü yemaacü ga Tupana rü Equítuanewa ínanagaxü ga norü duïxügü. Rü nayana ga taxü ga úiru rü diêrumügü. Rü taxuxüma nidaxawee ga norü duïxügü rü taxuxüma natura. <sup>38</sup>Rü nümagü ga Equítuanecüäxgü rü nataäxêgü ga yexguma nüxü nadaugüga ga nax

inaxíächixü, yerü poraäcü naxçaxwa namüë. <sup>39</sup>Rü Tupana rü naétüwa nanayexmaxêë ga wüxi ga caixanexü nax yema yadüxétüxüçax naxçaxwa ya üaxcüema. Rü chütacü rü wüxi ga üxüemamaxã nanangóonetanüxêë. <sup>40</sup>Rü yexguma namachicax ínacagügu, rü nüma ga Tupana rü ngugagü naxçax ínayachööchixêë. Rü paü ga dauxüwa rüyíxümaxã nanachibüexêë. Rü yemaacü meama nüxü ningugü. <sup>41</sup>Rü yexguma Tupana nuta nangúxtexêëgu rü taxü ga dexá yéma nayagoxüchixü. Rü yema dexá rü ñoma wüxi ga natürüxü ínachianexüwa nayax. <sup>42</sup>Rü yemaacü aixcüma nayanguxêë ga yema norü uneta ga üünexü ga nüxcüma norü duï ga Abráümaxã nüxü yaxuxü. <sup>43</sup>Rü yemaacü nixí ga Tupana ga Equítuanewa ínagaxü ga norü duïxügü ga nüma nüxü naxunetaxü. Rü yexguma ínagaxüägu rü poraäcü nataäxêgü. <sup>44</sup>Rü togü ga duïxügiarü naane nüxna naxã. Rü nabü ga togüarü puracüwa ne üxümaxã nanachibüexêë. <sup>45</sup>Rü yemaacü Tupana nüxü narüngüxêë ga yema duïxügü yerü nanaxwaxe nax nagu namaxêxü ga norü mugü rü nagu naxíxü ga norü ngüxêëtae ga nüma namaxã nüxü yaxuxü. Rü name i Cori ya Tupanaxü ticuaxüxügü.

**Iraétanüxügü rü guxüguma chixri  
Tupanaga naxĩnüe**

**106** <sup>1</sup>Rü name i Cori ya Tupanaxü ticuaxüxügü. iRü moxê nüxna pexã! Erü nüma rü namecüma rü ngëma norü ngeçauü rü taguma inayacuax. <sup>2</sup>¿Rü texé nüxü tacuax nax nüxü tixuxü i guxüma i

ngēma nūma norū poramaxā naxūxū?  
 ¿Rū texé nūxū tacuax nax nūma  
 nanaxwaxexūācūma nūxū ticuaxūxūxū?  
 3Rū tataāxēgū ya yíxema aixcūma  
 mexūgu rūxīnūxe rū naxūgūxe i ngēma  
 aixcūma wexguxū. 4-5iRū choxna  
 nacuaxāchi, Pa Corix, i ngēxguma nūxū  
 curūngūxēēgu i curū duūxūgū! Rū  
 ngēxguma nūma cuxūxgu nax  
 ícunanguxūxēxūcax irū choxū rū ta  
 natanūwa nangemaxēxē nax ngēmaācū  
 nūxū chadauxūcax i norū taāxē i ngēma  
 curū duūxūgū i cuma quidexechixū, rū  
 ngēmaācū choma rū ta wūxigu curū  
 duūxūgūmaxā chataāxēxūcax! 6Rū toma  
 rū cupexewa poraācū chixexū taxū torū  
 oxigūrūūtama. Rū nūxna ítachocu i curū  
 mugū nax toxrūtama ngūchaū i  
 chixexūgu tamaxēxūcax. 7Rū nūma ga  
 torū oxigū rū tama aixcūma nagu  
 narūxīnūe ga yema taxūgū ga mexūgū  
 ga curū poramaxā cuxūxū. Rū nūxū  
 inayarūngūmae nax cuma rū nūxū  
 cungechaūxū. Rū yema Már ga  
 Dauchiūxūcutūwa rū cumaxā nayanūe.  
 8Natūrū nūma ga Tupana rū  
 Equítuanecūāxarū āēxgacūmexēwa  
 ínananguxūxēēma yerū taxucūrūwama  
 inayanaxoxēxē ga norū uneta ga marū  
 Abrāūmaxā nūxū yaxuxū. 9Rū nūma ga  
 Tupana rū yema Már ga Dauchiūxūxū  
 namu nax yapayexūcax. Rū ñoma wūxi i  
 naxnecū i paxūrūxū nixī. Rū yemawa  
 nayachoūxēxē ga tórū oxigū. 10Rū  
 yemaacū nixī ga norū uanūgū ga naxchi  
 aiexūmexēwa ínanguxūxēēaxū. 11Rū  
 yexguma tórū oxigūwe yachoūgu ga  
 túmaarū uanūgū rū nūma ga dexá rū  
 naétūwa nayax. Rū guxūma ga túmaarū  
 uanūgū rū yexma nayue rū bai ga wūxi

ga maxūxū ga íyaxuxū. 12Rū  
 yexgumaama ga tórū oxigū rū dūxwa  
 nayaxōgū ga Tupanaarū unetagū rū  
 norū wiyægūmaxā nūxū nicuaxūxūgū.  
 13Natūrū paxama nūxū  
 inayarūngūmaexū ga yema taxū ga  
 mexūgū ga Tupana naxcax ūxū. Rū  
 tama ínananguxēēgū ga yema Tupana  
 nagu rūxīnūxū. 14Rū yema  
 ínachianexūwa rū Tupanaxū naxūgū ga  
 tórū oxigū. Rū naxcax ínacagū nax  
 Tupana paxa nūxū naxūxūcax ga yema  
 nūmatama ga duūxūgū nagu rūxīnūxū.  
 15Rū nūma ga Tupana rū naga naxīnū,  
 rū nanaxū ga yema naxcax ínacagūxū.  
 Natūrū yemawena rū naxcax  
 ínananguxēxē ga daaweane ga namaxā  
 nayuexū. 16Rū yéma ínapegūxūwa rū  
 yema duūxūgū rū tama guma Moichéga  
 rū guma Tupana nūxū unetacū ga  
 Aróūga naxīnūechaū yerū naxcax  
 nixauxāchie nax norū āēxgacū yixīgūxū.  
 17Rū yemacax Tupana nanapoxcue. Rū  
 naxcax nayangexēxē ga naane rū  
 yemagu nayicu ga Datāū rū Abiráū  
 namaxā ga namūcūgū. 18Rū yema  
 namūcūgū ga tama Tupanaga ínūexū rū  
 Tupana naxcax yéma nanamu ga  
 ūxūema nax yemamaxā yaxaexūcax ga  
 yema chixexū ūgūxū. 19Rū guma  
 maxpūne ga Oréxwa rū nūma ga  
 Iraétanūxūgū nanaxūgū ga wūxi ga  
 wocaxacūchicūnaxā ga úirunaxcax. Rū  
 yemaxū nicuaxūxūgū. 20Rū yemaacū  
 Tupana ya ūnecūxū naxūchicūūgū  
 namaxā ga wūxi ga woca i maxē i  
 ngóxūchicūnaxā. 21-22Rū nūxū  
 inayarūngūmae ga Tupana ga norū  
 poxūruxū íxīcū ga naxīcū ga taxū ga  
 guxchaxūgū ga Equítuanewa rū

bajxāchixēēruūgū ga Cáuichixūānewa rü  
 āñcūmaxū ga Már ga Dauchiūxūwa.  
 23Rü nūma ga Tupana rü nüxū nixu rü  
 tá nanadai ga yema duūxūgū. Natürü ga  
 nūma ga Moiché rü naétüwa  
 nachogüama rü yemaçax narüngüxmü  
 ga Tupana rü tama nanadai. 24Rü  
 yemawena rü nüxū naxoe ga yema  
 naane ga mexechixū yerü tama  
 nayaxōgū ga yema Tupanaarü uneta.  
 25Rü nachüüwachigü rü chixri Cori ya  
 Tupanachiga nidexagü rü tama naga  
 naxīñue ga yema norü mugü. 26Rü  
 yemaçax ga nūma ga Cori ya Tupana rü  
 namaxā nanaxuegu rü tá nadaiaxū yema  
 ínachianexūgu. 27Rü yexgumarūxū ta ga  
 nataagümaxā rü nanaxuegu rü tá  
 nadaiaxū rü to ga nachixūānegü ga  
 tama nüxū yaxōgūxūgu nawooneāxū.  
 28Rü yema tórü oxigü rü tupananela ga  
 Baámexēwa nügü nayexmagüxēxē. Rü  
 nanangōxgü ga ðna ga yema norü  
 tupanantachicünaxāgü i ngearü  
 maxūáxūçax nadajūxū. 29Rü yemaacü  
 norü chixexūgümaxā Tupanaxū  
 nanuxēēgü. Rü yemaçax ga nūma ga  
 Tupana rü natanüwa ínanguxēxē ga  
 daaweane ga nawa iyuxū. 30Natürü  
 nūma ga chacherdóte ga Finée rü  
 inaxūāchi rü nayamaçax ga yema duūxū  
 ga chixexū üxū. Rü yexguma  
 ínayachaxāchi ga yema daaweane. 31Rü  
 yema Finée üxū rü Tupanapexewa  
 name, rü name nax guxūguma  
 wüxichigü i papá nanegūmaxā nüxū  
 yaxuxū. 32-33Rü yema tórü oxigü rü  
 Meribawa rü ta Tupanaxū nanuxēēgü ga  
 yexguma Moichéxū nachixewegügu nax  
 dexá nüxna naxāxūçax. Rü yema  
 duūxūgūgagu guxchaxū Moichéxū

nangupetü. Yerü düxwa Moichéxū  
 nanuxēēgü rü yemaçax naechita chixri  
 nidexa. 34Rü yema tórü oxigü rü tama  
 nanadai ga yema Canaāñcūçax ga  
 Tupana namaxā nüxū ixuxū nax  
 nadaiaxūçax. 35Natürü namaxā  
 naxāmücügüama, rü namaxā nixātegü,  
 rü namaxā naxāxmagü ga yema  
 duūxūgü ga tama Tupanaaxū yaxōgūxū.  
 Rü nacūmagü ga chixexūgüçax nangúe.  
 36Rü yema duūxūgüarü  
 tupanantachicünaxāgūxū nicuaxūxūgü  
 rü yemagagu chixexūgu nayi. 37Rü tüxū  
 ínagügu ga naxacüegü nax yema  
 ngoxogüçax tüxū ínaguxūçax. 38Rü  
 yemaacü yema Canaāñnearü  
 tupanantagüçax tüxū nadai ga guxema  
 nanegü rü naxacüegü ga taxuxūma ga  
 chixexū ügüxe. Rü ñoma ga naane rü  
 guma tūmagümaxā naxāñāchi. 39Rü  
 yemaacü ga yema duūxūgü rü  
 Tupanapexewa yexeraxū ga chixexū  
 naxūgü ga yexguma yema  
 tupanantagüwe naxixgu. 40Rü nūma ga  
 Tupana rü poraācū namaxā nanu ga  
 yema norü duūxūgü. Rü yemaçax  
 noxtacüma nüxū naxo. 41Rü yema  
 uanügü ga tama yaxōgūxūna nanawogü  
 nax yema namaxā icuaxgūxūçax. 42Rü  
 yema norü uanügü rü nüxū  
 narüporamae rü chixri namaxā  
 inacuaxgü. 43Rü nūma ga Tupana rü  
 muexpūxcünama ínanguxūxēxē.  
 Natürü ga nūmagü rü tama nüxū  
 inarüxīñuechañ ga yema Tupana nagu  
 rüxīñüxū rü norü chixexū nüxū  
 narüyexera. 44-45Natürü yexguma  
 Tupana nüxū ínügü ga norü axu rü  
 nüxū nadauxgu nax taxū ga  
 guxchaxūwa nayexmagüxū, rü nūma ga



Tupana rü nüxna nacuaxāchi ga norü uneta ga namaxā nüxü yaxuxü. Rü yemacax nüxü nangechaütümüxü erü nataxüchi i norü ngechaü. <sup>46</sup>Rü yema norü duüxügüarü uanügüaxēwa ínananguxēxē nax mea namaxā inacuaxgüxüçax. <sup>47</sup>Pa Cori Pa Torü Tupanax itoxü rüngüxēxē rü toxü ínanguxüxēxē naxmexwa i ngēma to i nachixüanegü nax ngēmaäcü nüxü ticuaxüügüxüçax i cuéga i üünexü! Erü tanaxwaxe i taāxēäcuma cuxü ticuaxüügü. <sup>48</sup>iRü guxüguma namexechi ya yimá tórü Cori ya Iraétanüxüarü Tupana! Rü name nixi i guxüma i duüxügü rü: “Ngēmaäcü yixi”, ñanagürügü. iRü ngixā tórü Cori ya Tupanaxü ticuaxüügü!

**Cori ya Tupana rü guxüguma  
tüxü nangechaü**

**107** <sup>1</sup>iRü moxē nüxna pexāgü ya Cori! Erü nüma rü namecüma rü norü ngechaü rü taguma inayacuax. <sup>2-3</sup>Rü ngēxgumarüxü ta rü name nixi i Tupanana moxē naxāgü i guxüma i ngēma duüxügü ga norü uanügümexēwa Cori ínguxüxēxü. Erü nümagü rü ngexta ínawoonexüwa ga nórtewa rü súrwa rü éstewa rü oéstewa rü Tupana rü wena nananutaquexexēxē rü nachixüanecax nanawoeguxēxē. <sup>4</sup>Rü nümagü rü ínachianexüwa ga ngextá taxúema íxāpataxüwa nachopetü nax naxçax nadaugüxüçax ga wüxi ga íane ga nagu naxāchiügüne. Natürü ínatüe rü tama nüxü inayangaugü ga nama ga wüxi ga íanewa nadaxü. <sup>5</sup>Rü yexguma yema namacax nadaugügu rü natyaiye rü nitaxawae. Rü yemacax naturae rü

yexma nayuechaü. <sup>6</sup>Natürü yema nax ngüxü yangegüxügagu rü düxwa Cori ya Tupanana nacagüe. Rü nüma ya Tupana rü ínananguxüxēxē nawa ga yema norü íxāchiäégü. <sup>7</sup>Rü yemawena rü mexü ga namagu nayamugü nax nawa nangugüxüçax ga guma íane ga nagu tá naxāchiügüne. <sup>8</sup>Rü name nixi i Cori ya Tupanana moxē naxāgü naxçax i norü ngechaü rü norü ngüxēxē i nüxna naxāxü. <sup>9</sup>Erü nüma rü tüxü naxaxexēxē ya yíxema itaxawaxe rü taxü i ñna tüxna naxā ya yíxema taiyaxe. <sup>10-11</sup>Rü yema duüxügü rü poraäcü chixexüwa namaxē rü ngēmagagu ñoma éanexüwa nangexmagüxürüxü nixigü. Rü ngēma norü chixexü rü nayanaxgü ñoma cadénamaxā yanaxgüxürüxü. Rü nanaxixāchiäégü yerü tama naga naxínüechaü ga Cori ya Tupana, rü tama nanaxügüchaü ga yema nüma nagu naxínüxü. <sup>12</sup>Rü yemacax ga Tupana rü taxü ga puracüwa nanawogü. Rü naxwetaarü yamaxā nayayitanü rü taxúema nüxü tarüngüxēxē. <sup>13</sup>Natürü yema nax ngüxü yangegüxügagu rü düxwa Cori ya Tupanana nacagüe. Rü nüma ga Cori ya Tupana rü yema norü guxchaxüwa ínananguxüxēxē. <sup>14</sup>Rü yema taxü ga guxchaxüwa ínananguxüxēxē ñoma éanexüwa ínanguxüxēxēxürüxü. Rü nüxü nanamexēxē ga yema norü guxchaxügü ñoma cadéna íyawegüxürüxü. <sup>15</sup>Rü name nixi i Cori ya Tupanana moxē pexāgü naxçax i norü ngechaü rü norü ngüxēxē i pexna naxāxü. <sup>16</sup>Yerü nüma rü nayapuxēxē ga yema poxcupataüarü íax ga bróúchenaxçax rü nanapuxāchixēxē ga yema norü fiérumenaxāgü. <sup>17-18</sup>Rü

nümagü i ngëma duüxügü ga norü chixexügüga rü norü pecádugügüga idaxaweexü, rü nanaxixächiäëgü. Rü woo ga yema norü önagü rü tama nüxü nachixëgagü yerü naturae rü marü nayuechaü. <sup>19</sup>Natürü naétüwa ga yema norü guxchaxügü rü Cori ya Tupanana nacagüe. Rü nüma ga Cori ya Tupana rü yema norü guxchaxüwa ínananguxüxëxë. <sup>20</sup>Rü namaxã nanaxuegu nax naxçax yataanëgüxü. Rü naxçax nitaanëgü. Rü yemaacü ga Tupana rü yuwa ínananguxüxëxë ga yema duüxügü. <sup>21</sup>Rü name nixí i Cori ya Tupanana moxë pexägü naxçax i norü ngechaü rü norü ngüxëë i pexna naxãxü. <sup>22</sup>Rü name nixí i nüxü picuaxüügüäcüma moxë nüxna pexägü rü taãxëäcü nüxü pixugüchiga i ngëma mexügü i naxüxü. <sup>23</sup>Rü yema taxetanüxügü ga márgu yarüxüxüxü, rü yáxüwa naxí nagu ga norü wapurügü. <sup>24</sup>Rü yema már-arü ngãxütüwa nüxü nadaugü ga yema mexü ga Cori ya Tupana üxü. <sup>25</sup>Rü nüma ga Cori ya Tupana rü nanamu nax inaxüxüçax ga buanecü rü yexguma rü tacü ga yuape ínaxü. <sup>26</sup>Rü yexguma ga guma wapurügü rü poraäcü naxexnagütanüãxü rü narüyixüxügü. Rü yema nagu íxü rü nidüxrue norü muümaxã. <sup>27</sup>Rü nichüxatanücüxü ñoma nangãxëxürüxü. Rü tama nüxü nacuax nax ñuxäcü íyachaxächixëëgüãxü ga norü wapurügü. <sup>28</sup>Natürü yema guxchaxüwa nayexmagügu rü Cori ya Tupanana nacagüe, rü nüma ga Cori ya Tupana rü yema norü guxchaxüwa ínananguxüxëxë. <sup>29</sup>Rü guma buanecü ga tacü rü íxracü ga buanecüxü

nananguxuchixëxë, rü narüxo ga yuape. <sup>30</sup>Rü yexguma nüxü nadaugügu ga nax naxoxü ga guma yuape rü nataãxëgü. Rü Tupana rü yema ínaxüxüwa nanangugüxëxë. <sup>31</sup>Rü ngëma duüxügü rü name nixí i Cori ya Tupanana moxë naxägü naxçax i norü ngechaü rü norü ngüxëë i nüxna naxãxü. <sup>32</sup>Rü name nixí i moxë nüxna naxägü i duüxügüarü ngutaquexewa rü äëxgacügüarü ngutaquexewa. <sup>33</sup>Rü nüma ya Cori ya Tupana rü nayachegüxëxë i natügü rü natüxacügü, rü naxnecümarexü nayanguxuchixëxë, rü nipagüane. <sup>34</sup>Rü ngëma mairaxü i nanetü nawa bacaxü rü Tupana rü mairaxü i chixexüxü nananguxuchixëxë nagagu i norü chixexü i ngëma duüxügü i nagu ächiügüxü. <sup>35</sup>Natürü ngëma naane i taguma dexááxü rü naxtaxaacügü nawa nayanguxuchixëxë. Rü ngëma naane i pagüanexü rü nibaixraweäx. <sup>36</sup>Rü ngëxma tüxü namugü ya yíxema ingearü ngëmaxüáxe. Rü ngëxma tümaarü íanëgü taxügü. <sup>37</sup>Rü ngëxma tixüanëgü rü úbamaxã tatoegü rü muxüchixüma i tümanetüarü o tibuxgü. <sup>38</sup>Rü nüma ya Cori ya Tupana rü tüxü narüngüxëxë nax timuxüçax. Rü nayamuxëxë i tümaarü wocagü. <sup>39-40</sup>Rü ngëxguma tümaarü uanügü chixri tümamaxã icuaxgügu rü ngüxü tüxü yangexëëgügu rü ngëmagagu tiyuetanü rü tinoxreetanü, natürü Tupana rü tá tüxü naxütanü rü tá nüxü naxoqx i ngëma tümaarü uanügü. Rü ínachianexügu tá ínayatüexëxë nax nu ne naxímarexüçax i norü uanügü. <sup>41</sup>Rü yíxema ingearü ngëmaxüãxgüxe rü nüma ya Cori ya Tupana rü tüxü

ínanguxũxêxê nawa i túmaarũ ngechaũ. Rũ túxũ nimuxêxê ñoma carnérugürũxũ. <sup>42</sup>Rũ ngẽmaxũ nadaugũgu i ngẽma duũxũgũ i Tupanapexewa mexũ rũ tá nataãxêgũ. Natürũ ngẽma chixexũarũ üruũgũ rũ tá nariungeaxgũmare. <sup>43</sup>Rũ yíxema túmaãêxũ cuáxe rũ name nixĩ i nagu tarüxínũxũ i ñaa túmamaxã nüxũ chixuxũ nax ngẽmaãcü nüxũ tacuáxũcax nax ñuxãcü poraãcü túxũ nangechaũxũ ya tórũ Cori ya Tupana.

**Íchamemare nax Tupanacax chawiyaexũ**

**108** <sup>1-2</sup>Ñuxma rũ íchame, Pa Chorũ Tupanax, rũ íchame nax chorũ wiyaemaxã cuxũ chicuaxũxũ. Rũ paxmama tá ícharũda rũ chorũ paxetaruũgũmaxã tá chapaxeta. Rũ ngẽmaãcü tá nüxũ charũmoxê i ngẽma ngexwacaxũ i ngunexũ. <sup>3</sup>Pa Cori Pa Tupanax, rũ chorũ wiyaegũmaxã tá cuxũ chicuaxũxũ napexewa i guxũma i nachixũanecũãx i duũxũgũ. <sup>4</sup>Erũ ngẽma curũ ngechaũ rũ daxũguxũ i naanearũ yexerawa nangu. Rũ ngẽxgumarũxũ ta i curũ aixcũma rũ yauxtũweanexũarũ yexerawa nangu. <sup>5</sup>Pa Chorũ Tupanax, cuma rũ daxũguxũ i naanemaxã icucuax rũ curũ üüne rũ ñoma i naane namaxã nanapá. <sup>6</sup>iRũ toxũ nangãxũ rũ curũ poramaxã toxũ ínanguxũxêxê i toma nax toxũ cungechaũxũ! <sup>7</sup>Rũ cumax, Pa Tupanax, rũ cupatawa quidexa rũ ñacurũgũ: “Taãxêãcüma tá pexna chanaxã i guxũma i ngẽma naane i oéstewaama Chiquéúwa ixũgũxũ rũ ñuxmata éstewaama Sucóxaru ngatexũwa nguxũ. <sup>8</sup>Rũ ngẽxgumarũxũ ta i Garaáxaru naane rũ Manachéaru naane i natũ i

Yudáũaru éstewaama ngẽxmagũxũ rũ choxrũ nixĩ. Rũ ngẽma Efraíaru naane i churaragũ i poraxũ nawa ne íxũ rũ choxrũ nixĩ. Rũ ngẽxgumarũxũ ta i ngẽma Yudáaru naane i Iraétanũxũarũ ãêxgacũgũ nawa ne íxũ rũ choxrũ nixĩ. <sup>9</sup>Rũ ngẽma Moáane rũ Edóũane rũ chautũũwa nangexmagũ. Rũ ngẽma Piritéutanũxũgũ rũ choma rũ tá nüxũ charũporamae”, ñanagürũ ya Tupana. <sup>10-11</sup>Pa Tupanax, ¿rũ texé tá Edóũanewa choxũ taga? ¿Rũ texé tá norũ ñane ya poranegu choxũ taxüxcuxêxê i ñuxma nax toxũ cuxoxũ rũ marũ tama torũ churaragũxũ íquixũmücũxũ? <sup>12</sup>iRũ torũ uwanugũchaxwa toxũ rüngũxêxê nax nüxũ tarũporamaegũxũcax! Erũ taxuwama toxũ name i toxrũxũ i duũxũgũarũ ngũxêxê. <sup>13</sup>Natürũ curũ ngũxêxêmaxã Pa Tupanax, rũ tá nüxũ tarũporamae i ngẽma torũ uanũgũ, erũ cuma rũ tá cuyayitanũxêxê.

**Tupanaarũ ngũxêcax ínaca**

**109** <sup>1</sup>Pa Tupanax itaxũ i choxũ nüxũ cuxoxũ i chorũ yumũxê! <sup>2</sup>Erũ duũxũgũ i chixri maxêxũ i dorataãxgũxũ rũ chauchiga nidexagũ. Rũ wüxi i doramare nixĩ i ngẽma chauchiga i nüxũ yaxugũxũ. <sup>3</sup>Rũ chauchi naxaieãcüma nidexagũ. Rũ natũcaxmamare chixexũ chauchiga nixugũ. <sup>4</sup>Rũ ngẽma chorũ ngechaũ i naxcax ichaxãxũ rũ chixexũmaxã choxũ nanaxütanũgũ. Natürũ i chomax rũ naxcax chayumũxêama. <sup>5</sup>Rũ ngẽma mexũ i naxcax chaxũxũ rũ chixexũmaxã nanatáeguxêgũ. Rũ choma nüxũ changechaũyane rũ chauchi naxaie. <sup>6</sup>Pa Tupanax irũ ñuxma rũ ngẽma chixexũ

üxũcax nüxũ naxuneta i wüxi i ãêxgacü  
 i chixecüma nax ngẽma nüxna  
 çaxaxũcax i norü chixexũchiga! iRü  
 ngêxgumarüxũ ta nüxũ naxuneta i wüxi  
 i norü uaxũruxũ i naxçax íçaxaxũ nax  
 napoxcuxũcax! <sup>7</sup>Rü ngêxguma ãêxgacü  
 nüxna caxgu i norü chixexũchiga rü  
 name nixĩ i noxtacüma poxcu namaxã  
 naxueguxũ. Rü ngêxguma nügüçax  
 ínacaxgu nax tama napoxcuxũcax rü  
 name nixĩ i noxtacüma yexeraãcü  
 nanapoxcuama. <sup>8</sup>iRü nanuxêxẽ i norü  
 maxũ rü noxtacüma nayux nax  
 ngẽmaãcü togü noxtacüma nayaxuxũcax  
 i norü puracü! <sup>9</sup>Rü ngẽmaãcü i  
 naxacügü rü noxtacüma nataxcue rü  
 naxmax rü noxtacüma yutexe tixĩ. <sup>10</sup>Rü  
 ngẽmaãcü i naxacügü rü nu ne  
 nanaxĩmare rü íxraxũ i diêrucax  
 nacaxũwaxegü. iRü noxtacüma nawa  
 ínawoxũ ya yima napatachicawa! <sup>11</sup>iRü  
 guxũma i ngẽma norü ngẽmaxũgü, rü  
 ngẽma diêru naxũtawa nayaxuxũ  
 noxtacüma yana! iRü togümare i  
 duũxũgü nüxũ yana i ngẽma norü  
 puracütanü! <sup>12</sup>Rü name nixĩ i  
 taxúeaxũma nangechaũtümüxũ rü woo i  
 naxacügü i taxcuexũ. <sup>13</sup>iRü noxtacüma  
 guxũ yue i nataagü nax ngẽmaãcü  
 yanaxoxochixũcax i napexéegagü! <sup>14</sup>Rü  
 cumax, Pa Corix, irü nüxna nacuaxãchi i  
 nanatüarü chixexũ rü tagutáma ínapı i  
 ngẽma naéarü pecádu! <sup>15</sup>iRü guxũguma  
 nüxna nacuaxãchi i ngẽma chixexũ i  
 naxũxũ! iRü duũxũgüãxêwa ínapı i  
 naéga! <sup>16</sup>Rü nüma i ngẽma chixexũ üxũ  
 rü taguma nüxũ tangechaũtümüxũ ya  
 yíxema ingearü diêruãxgüxe rü yíxema  
 tama tügü icuaxũügüxe rü yíxema  
 guxchaxũmaxã naxixãchiãégüxe. Rü

nüma rü chixri tümamaxã inacuax rü  
 ngẽmaãcü tüxũ nadai. <sup>17</sup>Rü nüma rü  
 naxçax nadau nax chixexũ naxüxũ. iRü  
 ngẽmacax noxtacüma chixexũ namaxã  
 yaxugüe i duũxũgü! Rü taguma naxçax  
 nadau nax taxacürü mexũ naxü. iRü  
 ngẽmacax noxtacüma taguma texé  
 mexũ nachiga ixu! <sup>18</sup>iRü ngẽma nacüma  
 i chixexũ, rü noxtacüma yadüxã i  
 naxũne ñoma wüxi i naxchirumaxã  
 idüxüxürüxũ! iRü naanügu rü  
 naxchinaxãgu, rü noxtacüma naxücu i  
 ngẽma chixexũ i nagu naxĩnũxũ ñoma  
 dexá rüxna chíxũ tagu ücuxürüxũ!  
<sup>19</sup>Rü ngẽma nacüma i chixexũ irü  
 noxtacüma yadüxã i naxũne ñoma wüxi  
 i naxchiru naxũne idüxüxürüxũ, rü  
 noxtacüma nüxna nanái ñoma wüxi i  
 goyexürüxũ! <sup>20</sup>Rü name nixĩ i Cori ya  
 Tupana ngẽmaãcü nüxũ nanaxütanü i  
 ngẽma chomaxã rüxuanüãxgüxũ rü  
 chixri chauchiga idexagüxũ. <sup>21</sup>Natürü  
 cumax, Pa Corix rü chanaxwaxe i choxũ  
 curüngüxê rü mea choxna cudau nax  
 ngẽmaãcü natachigaxũcax i cuéga. iRü  
 curü mecümagagu choxũ  
 ínanguxuchixêxê nawa i ngẽma  
 chixexũgü! <sup>22</sup>Choma rü poraãcüxüchi  
 guxchaxũwa changexma rü  
 chanaxixãchiãxê rü chorü maxũnewa rü  
 poraãcü nangux. <sup>23</sup>Rü ngẽma chorü  
 guxchaxũgümaxã rü inixü nax  
 chixachigüxũ ñoma wüxi i  
 gauxchípetaxũ ixüxchigüxürüxũ. Rü  
 ñuxma rü marü chixaxüchi, rü  
 ngẽmacax ya yima buanecü rü choxũ  
 niga ñoma wüxi i munüxü yagaxürüxũ.  
<sup>24</sup>Rü ngẽma nax tama chachibüxũcax rü  
 chidüxruxéapüxü rü chixachigü. <sup>25</sup>Rü  
 duũxũgüarü cugürüxũ chixĩ. Rü

ngëxguma choxũ nadaunügu rü nanexáerugü rü choxũ nacugüe. 26-27 ¡Choxũ rüngũxëxë, Pa Cori Pa Chorü Tupanax! ¡Rü curü ngechaũgagu choxũ ínganguxichixëxë nawa i chorü guxchaxũgü nax ngëmaãcü duũxũgü nüxũ cuáxüçax nax aixcüma cuma yixixũ i choxũ curüngũxëxë! 28Rü ñuxma nax choxũ curüngũxëxë rü nüétama nixí ega woo chixexũ chomaxã yaxugüegu i ngëma chomaxã rüxuanüãxgüxũ. Rü name nixí nax naxãneexũ. Natürü i choma nax curü duũxũ chixixũ rü chataãxë. 29Rü ngëma chorü uanügu rü name nixí nax poraãcü naxãneexũ. ¡Rü ngëma norü ãne rü noxtacüma yadüxã i naxüne ñoma wüxi i naxchirumaxã idüxüxürüxũ! 30Rü ñaa chauaxmaxã rü guxũgutáma Cori ya Tupanana moxë chaxã. Rü muxũ i duũxũgütanüwa tá nüxũ chicuaxüxũ. 31Erü nüma ya Tupana rü tümaétüwa nachogü ya yíxema ngearü ngëmaxũãxgüxe. Rü namxëxwa tüxũ ínapoxũ i ngëma tüxũ íxuaxũgüxũ.

**Nüma ya Cori rü ãëxgacüna pora naxã**

**110** 1Rü nüma ya Tupana rü chorü Corixũ ñanagürü: “¡Chorü tügüncëwawa rüto rü ñuxmatáta i ngëma curü uanügu rü curü chicutüxũ chayaxixëëgü!” ñanagürü. 2Rü nüma ya Tupana rü Yerucharëüwa cuxũ naxuneta nax ãëxgacü quixixüçax rü namaxã icucuáxüçax i ngëma curü uanügu. 3Rü ngëma ngunexũ i curü uanügüxũ curüporamaegu rü curü duũxũgü rü tá cuxmëxwa nügü nangexmagüxëxë. Rü nimexchiruãcüma tá cupëxewa nangugü. Rü ngëma curü

pora rü guxũgutáma nitachigü ñoma pucü ya guxũguma paçmama rüngucürüxũ. 4Rü nüma ya Tupana rü cuxũ naxuneta nax Melquisedérixũ guxũguma chacherdóte quixixũ. Rü nüma rü taxütáma inayanaxoxëxë i ngëma nüxũ yaxuxũ. 5Rü nüma ya Tupana rü curü tügüncëwawa nangexma nax cuxũ ínapoxüxüçax. Rü ngëma ngunexũ i nagu nanuxũgu rü tá nanadai i muxũma i ãëxgacügü. 6Rü ngëma nachixüãnegüçax rü tá poxcu naxuegu. Rü ngëxma tá nayue i muxüchixũ i duũxũgü. Rü guxüwama i ñoma i naanewa rü muxütama i ãëxgacügü tá ínawoxũ. 7Natürü nümatama ya Tupana rü ngëma namacüwawa ngëxmaxũ i natüxaciärü dexáwa tá naxaxe. Rü ngëma dexá rü tá nayaporaxëëchigü.

**Nüxũ ticuaxüxũgü ya Cori ya Tupana erü mexũ taxçax naxü**

**111** 1Name nixí i Cori ya Tupanaxũ ticuaxüxũgü. Rü choma rü guxüma i chorü maxünemaxã tá Cori ya Tupanaxũ chicuaxüxũ ngëma duũxũgü i mexügu rüxñüexüärü ngutaquëxewa rü guxüma i duũxũgüpëxewa. 2Rü guxüma i ngëma Cori ya Tupana üxũ rü nataxüchi. Rü yíxema aixcüma namaxã taãxëxe i ngëma Tupana üxũ rü nawa tangux. 3Rü ngëma Tupanaarü puracü rü namexechi. Rü nüma rü guxũguma mea tamaxã inacuax. 4Rü yema mexü ga naxüxũ rü taxucürüwama nüxũ itarüngümae. Erü nüma ya Cori rü namecümáxüchi rü nüxũ tangechaütümüxũ. 5Rü tüxũ naxüwemü ya yíxema nüxũ

icuaxüüğüxe. Rü nüma rü taguma nüxü inarüngüma i ngéma norü uneta ga nüxü yaxuxü. <sup>6</sup>Rü nüma rü norü duüxügüpexewa inanawex ga norü pora ga yexguma nüxna naxäagu ga ñaa Iraéane woo muxüma ga totücumü ga duüxügü ga tama yaxögüxü nawa namaxëchirex. <sup>7</sup>Rü guxüma i ngéma nüma naxüxü rü name rü aixcüma niwex i norü mugü. Rü ngëmacax name nax nagu yaxöxü. <sup>8</sup>Rü ngéma norü mugü rü taguma inayarüxo erü guxüma rü aixcüma nixü rü nawexgu. <sup>9</sup>Rü nüma rü inananguxüxëxë ga norü duüxügü naxmexwa ga norü uanügü. Rü yema norü uneta rü namaxä nüxü nixu nax tagutáma iyanaxoxü. Erü nüma ya Tupana rü naxüüne rü naxäücümaxüchi. <sup>10</sup>Rü yíxema aixcüma cuax tüxü ngëxmaxe rü Cori ya Tupanaxü ticuaxüxügü. Rü yíxema Cori ya Tupanaxü icuaxüüğüxe rü aixcüma túmaäxü ticuax. Rü name nixü i guxüguma nüxü ticuaxüxügü.

**Nataäxë ya yimá yatü  
ya mexügu rüxínücü**

**112** <sup>1</sup>Name nixü i Cori ya Tupanaxü ticuaxüxügü. Rü nataäxë ya yimá yatü ya Cori ya Tupanaxü ngechaücü rü norü mugügu imaxücü. <sup>2</sup>Rü yimá yatü ya mexügu rüxínücü rü Tupana tá nüxü narüngüxëë i ngéma naxacügü rü tá naporae i ñoma i naanewa. <sup>3</sup>Rü napatawa ya yimá yatü rü namuarü ngëmaxüäxgü. Rü guxüguma norü ngëmaxügümaxä tōxguäxü narüngüxëë. <sup>4</sup>Rü yimá yatü rü ñoma wüxi i omü i éanexüwa ibáxixürüxü nixü naxcax i ngéma togü i

duüxügü i mexü. Rü nüma rü namecüma rü nangechaüwaxe rü nixaixcüma. <sup>5</sup>Rü yimá yatü ya mecümacü rü norü ngëmaxügümaxä togüxü narüngüxëë. Rü mea namaxä inacuax i guxüma i ngéma nüxü ngëxmaxü. <sup>6</sup>Rü yimá yatü rü taxütáma nagu nayarüchixe woo norü uanügü chixexü namaxä üxgux. Rü duüxügü rü guxügutáma nüxna nacuaxächigü naxcax i ngéma mexü i naxüxü. <sup>7</sup>Rü nüma rü taxucaxma naxcax nabaijáchi i taxacürü chixexü i ore i nachiga i nüxü naxínüxü, erü nüxü nacuax nax Tupana aixcüma nüxna dauxü. <sup>8</sup>Rü nüma ya yimá yatü rü taxucaxma norü uanügüxü namuü. Rü nüxü nacugüama erü Tupanagu nayaxö. <sup>9</sup>Rü yíxema tüxü nataxúxe rü guxüguma norü ngüchaümaxä tüxna nanaxámare i diéru. Rü ngéma nacüma i mexü rü taguma nüxü narüchau nax naxüäxü. Rü taxucaxma naxäne erü aixcüma nagu namaxü i ngéma nüxü yaxuxü. <sup>10</sup>Rü ngéma chixexü ügüxü rü nanue ega nüxü nadaugügu. Rü norü numaxä nixüxchapütagü. Natürü ngéma norü ñnü i ngéma chixexüarü ürüügü rü tá nagu nayarüchixe.

**Norü mecümacax Tupanaxü ticuaxüxügü**

**113** <sup>1</sup>Name nixü i Cori ya Tupanaxü ticuaxüxügü. Pa Norü Duüxügüx rü inüxü picuaxüxügü! <sup>2</sup>Rü name i ñuxma rü guxüguma mea nachiga idexagüxü. <sup>3</sup>Rü guxäma i pema i éstewa ngëxmagüxe rü ñuxmata pema i oéstewa ngëxmagüxe irü nüxü picuaxüxügü ya Cori ya Tupana! <sup>4</sup>Rü nüma ya Cori ya Tupana rü guxüma i

nachixũanegũmaxã inacuãx. Rũ norũ pora rũ daxũguxũ i naaneẽtuwa nangu. <sup>5-6</sup>Rũ taxũema namaxã tawũxigu ya tũrũ Cori ya Tupana ya daxũguxũ i naanewa ãẽxgacũ ixĩcũ, natũrũ ngẽma nũxũ nadawenũ i daxũguxũ i naane rũ ñoma i naane. <sup>7-8</sup>Rũ tũxũ narũngũxẽẽ ya yĩxema ngearu diẽruãxe. Rũ yĩxema taxũema tũxũ rũngũxẽẽxe rũ tũxũ ñarũdaxẽẽ rũ tũmaaru ñanearũ ãẽxgacũgũtanũwa tũxũ narũtoxẽẽ. <sup>9</sup>Rũ yĩxema ngexe ya ngexacũxe rũ nũma ya Tupana rũ tũxũ nataãxẽẽ rũ tũxũ narũngũxẽẽ nax taxãxacũçax. Pa Duũxũgũx, rũ ingĩã nũxũ ticuãxũgũ ya Cori ya Tupana!

**Nũxna nacuãxãchie ga yexguma Equĩtuanewa ñachoxũxgu ga Iraẽtanũxũ**

**114** <sup>1-2</sup>Rũ nũxcũma ga yexguma Equĩtuanewa ñachoxũxgu ga tũrũ oxĩgũ ga Iraẽtanũxũgũ ga Acõbutaagũ, rũ Yudãanegu nixĩ ga naxũgũãxũ ga guma Tupanapata. Rũ nũma ga Tupana rũ yẽma nixĩ ga tũrũ oxĩgũmaxã inacuãxũ. <sup>3</sup>Rũ yexguma yema Mãr ga Dauchiũxũ yema Iraẽtanũxũxũ dũxgu rũ niyauxyexũchixũ. Rũ yexgumarũxũ ta ga yema natũ ga Yudãũ rũ tũrũ oxĩgũcãx ñayachaxãchixũchixũ. <sup>4</sup>Rũ yexguma ga guma imãchanexũchine ga mãxpũnegũ rũ guma rũnuxmaegũne ga mãxpũnegũ rũ Tupanaaru poramaxã nayuxnagũtanũ ñoma carnẽruxacũgũ rũ chĩbuxacũgũ yuxnagũtanũxũrũxũ. <sup>5</sup>¿Rũ taxacũ cuxũ nangupetũ, Pa Mãr i Dauchixũxũ, nax quiyauyexũchixũ? ¿Rũ taxacũ cuxũ nangupetũ, Pa Natũ Pa Yudãũ nax ícuyachaxãchixũchixũ?

<sup>6</sup>¿Rũ taxacũ pexũ nangupetũ, Pa Imãchanexũchine ya Mãxpũnegũx rũ pemax Pa Rũnuxmaegũne ya Mãxpũnegũx, rũ piyuxnetanũcũxũ ñoma carnẽruxacũgũ rũ chĩbuxacũgũ yuxnagũtanũxũrũxũ? <sup>7</sup>Rũ cumax, Pa Ñoma i Naanex irũ Acõbuaru Tupanapexewa curũ muũmaxã idũxru! <sup>8</sup>Yerũ ga nũma rũ nutatanũwa nanangoxẽẽ ga puchugũ rũ nuta ya tacũwa inayagoxũchixũxẽẽ ga dexã.

**Tũrũ Tupana rũ daxũguxũ i naanewa nangexma**

**115** <sup>1</sup>Pa Cori Pa Tupanax icugũtama icuãxũxũ rũ taxũ i toxũ quicuãxũxũ! iRũ cugũ icuãxũxũ naxcãx i curũ ngechaũ rũ naxcãx i ngẽma nax quixaixcũmaxũ! <sup>2</sup>¿Rũ tũxcũũ i ngẽma tama yaxõgũxũ rũ ñacagũ rũ ñanagũrũgũ: “¿Ngexcũ nixĩ ya perũ Tupana?” ñanagũrũgũ? <sup>3</sup>Natũrũ tanangãxũ rũ ñatagũrũgũ: “Torũ Tupana rũ daxũguxũ i naanewa nangexma. Rũ nũma rũ nanaxũ i guxũma i taxacũ i nũma nanaxwãxexũ”, ñatagũrũgũ. <sup>4</sup>Rũ ngẽma norũ tupanagũ i ngẽma tama yaxõgũxũ, rũ nũmatama i duũxũgũ naxmẽxmaxã nanaxũgũ. Rũ ñurumũ rũ diẽrumũnaxcãx nixĩ. <sup>5</sup>Rũ nũxũ nangexma i naxãx natũrũ tama nidexagũ rũ nixãxetũ natũrũ tama taxacũxũ nadau. <sup>6</sup>Rũ naxãchinũ natũrũ tama taxacũxũ naxĩnũe. Rũ naxãxmaraxũ natũrũ taxuxũma nũxũ napa. <sup>7</sup>Rũ nixãxmẽx natũrũ tama tũxũ ningõgũgũ. Rũ nixãcutũ natũrũ tama inaxĩ. Rũ bai i wũxi i naga i naxãxgũwa íxũxũxũ. <sup>8</sup>Rũ ngẽma duũxũgũ i nũgũcãxtama naxchicũnãxãgũ ãgũxũ rũ

nüxú yaxōgüxü rü naxrüütama nixīgü nax taxuwama yamexü. <sup>9</sup>Pa Iraétanüxügüx irü Cori ya Tupanagu peyaxōgü! Erü nüma rü tüxü narüngüxēē rü tüxna nadau. <sup>10</sup>Pa Chacherdótegüx irü Cori ya Tupanagu peyaxōgü! Erü nüma rü tüxü narüngüxēē rü tüxna nadau. <sup>11</sup>Rü pemax, Pa Duüxügü i Cori ya Tupanaxü Ngechaxügüxex irü nagu peyaxōgü! Erü nüma rü tüxü narüngüxēē rü tüxna nadau. <sup>12</sup>Rü nüma ya Cori ya Tupana rü tagu narüxīnū rü tá tüxü narüngüxēē. Rü tá nüxü narüngüxēē i guxüma i Iraétanüxügü rü norü chacherdótegü. <sup>13</sup>Rü tá mexü tümamaxā naxuegu ya yíxema nüxü ngechaügüxe woo yaxe rü buxe. <sup>14</sup>Rü chanaxwaxe, Pa Iraétanüxüx, nax Cori ya Tupana pexü imuxēēxü rü yamuxēēāxü i pexacügü. <sup>15</sup>Rü nüma ya Cori ya Tupana i daxügüxü i naane rü ñoma i naanearü üruxü rü aixcüma tá pexna nanaxā i norü ngüxēē. <sup>16</sup>Rü Cori ya Tupanaarü nixi i daxügüxü i naane, natürü duüxügüna nanaxā i ñoma i naane. <sup>17</sup>Rü ngēma marü yuexü i naxmaxüwa ngēxmagüxü rü taxucürüwama Cori ya Tupanaxü nicuaxüxügü i ñoma i naanewa. <sup>18</sup>Natürü i yixema i ñuxma nax imaxēxü rü tá nüxü ticuaxüxügü i ñuxmax rü guxügutáma iRü ngixā nüxü ticuaxüxügü ya Cori ya Tupana!

#### Yumüxēwa Tupanana moxē taxā

**116** <sup>1-2</sup>Rü Cori ya Tupanaxü changechaü erü nüxü naxīnū i ngēma chorü yumüxē. Rü ñuxma nax chamaxüxügu rü guxügutáma namaxā chidexa i chorü

yumüxēwa. <sup>3</sup>Rü ngēma yu rü choxü niyauxchirex rü wixguxuchi choxü nima. Rü chabaixächi rü chamuü. <sup>4</sup>Rü yexguma ga choma rü Cori ga Tupanaçax aita chaxü rü ñachagürü: “iPa Corix, choxü namaxēxē!” ñachagürü. <sup>5</sup>Rü nüma ya Cori ya Tupana rü aixcümacü nixi rü nüxü tangechaütümüxüwaxe. Erü nüma rü woetama guxüguma namecümaxüchi. <sup>6</sup>Rü nüma ya Cori ya Tupana rü tüxna nadau ya yíxema taxuxüma ixīgüxe. Rü yexguma chaturagu ga nax chayuxchaüxü rü choxü ínarüdaxēēama. <sup>7-8</sup>Rü ñuxma rü wenaxarü chataāxē yerü nüma ga Cori ya Tupana rü chomaxā namecüma rü choxü ínapoxü nax tama chayuxüçax rü tama axu ínguxüçax rü tama chixexügu changuxüçax. <sup>9</sup>Rü ñuxma rü Cori ya Tupanaga tá chaxīnū natanüwa i ngēma duüxügü i ñoma i naanewa maxēxü. <sup>10</sup>Rü choma rü chayaxōōma woo chorü ínūwa rü ñachagürü: “Nataxüchi i chorü guxchaxü”, ñachagürü. <sup>11</sup>Rü chorü íxächiaēgagu rü ñacharügü: “Guxüma i duüxügü rü nidorataçaxgü”, ñacharügü. <sup>12</sup>¿Ñuxācü tá Cori ya Tupanaaxü chanaxütanü naxçax i guxüma i ngēma mexü i çauxçax naxüxü? <sup>13</sup>Rü napexewa tá chanange i chorü āmare i bñuchixü rü tá nüxü chicuaxüxü yerü yuwa choxü ínapoxü. <sup>14</sup>Rü guxüma i norü duüxügüipexewa tá nüxü chicuaxüxü yema namaxā nüxü chixuxürüxü. <sup>15</sup>Rü nüma ya Cori ya Tupana rü poraäcü nüxü nangechaü i norü duüxügü, rü poraäcü nüxü nangux i ngēxguma nayuegu i ngēma norü duüxügü i nüxü ngechaügüxü. <sup>16</sup>Pa Cori



Pa Tupanax, choma rü curü duũxũ chixĩ, rü curü duũxũ tũmane chixĩ. Rü cuma nixĩ i choxũ ícunguxuchixẽẽxũ nawa ga yema guxchaxũgü ga choxũ ináixũ. <sup>17</sup>Rü ngẽmacax tá moxẽ cuxna chaxã rü naxũnagü tá cuxçax chadai rü íchanagu. Rü ngẽmaãcü tá cuxũ chicuaxũxũ Pa Cori Pa Tupanax. <sup>18-19</sup>Rü Yerucharéüwa ngexmane ya cupataaxtíwa rü guxũma i curü duũxũgüpexewa tá chayanguxẽxẽ i ngẽma chorü uneta ga cumaxã nüxũ chixuxũ. Pa Duũxũgũx, ingĩxã nüxũ ticuaxũxũgü ya Cori ya Tupana!

#### Tupanaxũ ticuaxũxũgü

**117** <sup>1</sup>iPa Guxũma i Nachixũanecüãxgũx, rü Pa Guxũma i Íanecüãxgũx, rü Tupanaxũ picuaxũxũgü! <sup>2</sup>Erü nüma rü poraãcü tüxũ nangechaũ rü guxũguma nixaixcũma rü nayanguxẽxẽ i ngẽma nüxũ yaxuxũ. iRü ngĩxã tórü Corixũ ticuaxũxũgü!

#### Cori ya Tupanaarü pora rü taguma inayagux

**118** <sup>1</sup>Pa Duũxũgũx, irü Cori ya Tupanana moxẽ pexãgü! Erü nüma rü namecũmaxũchi rü guxũguma tüxũ nangechaũ. <sup>2</sup>Pa Iraétanũxũgũx, rü name nixĩ i ñapegürügü: “Cori ya Tupanaarü ngechaũ rü taguma inayagux.” <sup>3</sup>Rü ngẽxgumarũxũ ta i pemax, Pa Chacherdótegũx, rü name nixĩ i ñapegürügü: “Cori ya Tupanaarü ngechaũ rü taguma inayagux.” <sup>4</sup>Rü ngẽxgumarũxũ ta i pemax i tórü Cori ya Tupanaxũ ngechaũgũxe, rü name nixĩ i

ñapegürügü: “Cori ya Tupanaarü ngechaũ rü taguma inayagux”, ñapegürügü. <sup>5</sup>Rü yexguma taxũ ga guxchaxũwa chayexmagu rü Cori ya Tupanaarü ngũxẽẽçax íchaca. Rü nüma rü choxũ naxĩnũ rü nawa choxũ ínanguxuchixẽxẽ ga yema chorü guxchaxũgü. <sup>6</sup>Rü nüma ya Cori ya Tupana rü nachauxũtagu rü ngẽmacax tama chamuũ. ðRü ñuxma rü texé tapora nax taxacürü chixexũgu choxũ tanguxẽẽxũ? <sup>7</sup>Rü nüma ya Cori ya Tupana rü nachauxũtagu, rü nüma nixĩ i choxũ nangũxẽẽxũ. Rü tá nüxũ chadau nax ñuxãcü Tupana tá nüxũ rüporamaexũ i ngẽma chauxchi aiexũ. <sup>8</sup>Rü name nixĩ nax Cori ya Tupanagu yaxõgũxũ rü tama i duũxũgũgu. <sup>9</sup>Rü name nixĩ nax Cori ya Tupanagu yaxõgũxũ rü tama i ãẽxgacũgü i poraexũgu. <sup>10</sup>Rü guxũma ga yema togü ga nachixũanecüãxgü rü çauxçax ínayaxüãchi rü choxũ ínachomaeguãchi nax choxũ yamaçgũxũçax. Natürü Tupanaégagu nüxũ charüporamae. <sup>11</sup>Rü guxũwama choxũ ínachomaeguãchi, natürü Tupanaégagu nüxũ charüporamae. <sup>12</sup>Rü ñoma máxegürũxũ choxũ ínachomaeguãchi ga chorü uanügü. Natürü yema nax nanuexũ rü ñoma taxacü i axũ rü paxama ixoxürũxũ nixĩgü. Yerü Tupanaégagu nüxũ charüporamae. <sup>13</sup>Rü norü numaxã çauxçax nibuxmü nax choxũ yamaçgũxũçax, natürü nüma ya Cori ya Tupana rü choxũ ínapoxũ. <sup>14</sup>Rü ngẽmacax chorü wiyaemaxã Cori ya Tupanaxũ chicuaxũxũ erü nüma nixĩ i choxũ naporaxẽẽxũ. Rü nüma nixĩ i choxũ namaxẽẽxũ. <sup>15</sup>Rü ngẽma

Tupanaarü duũxũgü rü napatagüwa taãxãcũma nawiyaegü i ngẽxguma nüxũ naxĩnũegu nax ñuxãcü Tupana naporamaegüxẽxũ nüxũ i ngẽma namaxã rüxuanũãxgũxũ. Rü ñanagürügü: “Nüma ya Cori ya Tupana rü norü poramaxã tüxũ ínapoxũ nüxna i ngẽma tamaxã rüxuanũãxgũxũ. <sup>16</sup>Erü ngẽma norü pora ya Tupana rü taxuxũma i to i poramaxã nawüxigu. Rü ngẽma norü poramaxã nixĩ i nüxũ nayexeraxũ i ngẽma tamaxã rüxuanũãxgũxũ”, ñanagürügü. <sup>17</sup>Rü ñuxma rü taxütãma paxa chayü. Rü tá chamaxũ nax ngẽmaãcü nüxũ chixuxũcax i guxũma i taxacü i naxixũ ya Cori ya Tupana. <sup>18</sup>Rü nüma ya Cori ya Tupana rü poraãcü choxũ naxü natürü tama choxũ ínatãx nax chayuxũcax. <sup>19</sup>iRü peyawãxnãx i ngẽma Tupanapataarü íãx! Rü ngẽxma chaxücuchaũ nax Cori ya Tupanana moxẽ chaxãxũcax. <sup>20</sup>Rü ngẽma napataarü íãxwa nixĩ i yachocuxũ i ngẽma aixcũma norü duũxũgü ixĩgũxũ. <sup>21</sup>Pa Corix, moxẽ cuxna chaxã erü choxũ nüxũ cuxĩnũ i chorü yumüxẽ rü choxũ cungãxũga. Erü cuma rü chorü maxẽeruxũ quixĩ. <sup>22</sup>Rü yima nuta ya ípataarü ürũgü nüxũ oecü rü yima nixĩ ya ñuxma nüxĩra yaxücuhigüãcü. <sup>23</sup>Rü Cori ya Tupana nixĩ ya ngẽmaãcü naxücü rü ngẽmacãx tataãxëgü erü wüxi i mexechixũ nixĩ. <sup>24</sup>Rü ñaa nixĩ i ngẽma ngunexũ i nagu Tupana mexũ taxcãx üxũ. iRü ngĩãx poraãcü tataãxëgü! <sup>25</sup>Pa Corix ipaxa torü uanügümexëwa toxũ ínanguxũxëxë! iRü toxũ rüngũxëxë nax mea toxũ nangupetüxũcax! <sup>26</sup>Rü Tupana rü namaxã nataãxë ya yimã naégagu

nüma ücü. Rü toma rü Tupanapatawa mexũ pemaxã taxuegu. <sup>27</sup>Rü nüma ya Cori nixĩ i tórü Tupana yixixũ. Rü nüma nixĩ i tüxũ yabáixmaxũxũ. iRü ngĩãx napatawa ngẽxmaxũ i ãmarechicagu tayanü i ngẽma naitanügü i nüxna ixãmaregũxũ! <sup>28</sup>Rü cuxna moxẽ chaxã, Pa Corix, rü cuxũ chicuãxüxũ erü cuporaxüchi rü chorü Tupana quixĩ. <sup>29</sup>iRü nüxna moxẽ pexãgü ya Cori ya Tupana! Erü nüma rü namecũmaxũchi rü ngẽma norü ngechaũ rü taguma inayagux.

#### Tupanaarü mugũmaxã tataãxëgü

**119** <sup>1</sup>Rü tataãxëgü ya yíxema aixcũma nagu maxëxe i Tupanaarü mugü rü tama nüxũ rüngũmaexë. <sup>2</sup>Rü tataãxëgü ya yíxema naga ñnüexe i norü mugü rü guxũ i tũmaarü maxũmaxã Tupanacãx daugüxe. <sup>3</sup>Rü tataãxëgü ya yíxema taxuxũma i chixexũ ügüxe rü aixcũma Cori ya Tupanamaxũgu íxe. <sup>4</sup>Cumax, Pa Tupanax, toxna cunaxã i curü mugü nax aixcũma naga taxĩnüexũcax. <sup>5-6</sup>Chierüna guxũgu mea naga chaxĩnũgu i ngẽma curü mugü nax ngẽmaãcü taxucãxma chaxãnexũcax i ngẽxguma chayanguxëxëgu i curü mugü. <sup>7</sup>Rü ngẽxguma mea nawa changuxgux i ngẽma curü mugü i aixcũma wëxguxũ, rü guxũma i chorü maxũmaxã tá cuxũ chicuãxüxũ. Rü choxũ nangũchaũ nax nagu chamaxũxũ i ngẽma curü mugü iRü taxú i choxũ ícutãxũ! <sup>9</sup>Pa Tupanax ¿rü ñuxãcü tá wüxi ya ngextüxücü inamexũ i norü maxũ i cupëxewa? Rü ngẽxguma curü ore naxwãxexũãcüma namaxũxguxicatama. <sup>10</sup>Rü ngẽmacãx i

choma rü guxũma i chorü maxũmaxã  
 cuxçax chadau. iRü choxna nadau nax  
 tama nüxna chixũgachixũçax i curü  
 mugü! <sup>11</sup>Rü chauãëgu namaxã  
 changuxũ i curü ore nax tama cupexewa  
 chixexũ chaxũxũçax. <sup>12</sup>Cumexechi i  
 cumax, Pa Cori Pa Tupanax. iRü choxũ  
 nanguxëxë i curü mugü! <sup>13</sup>Rü  
 chauaxmaxã tá nüxũ chixu i guxũma i  
 ngëma curü mugü i nüxũ quixuxũ. <sup>14</sup>Rü  
 muxũma i ngëmaxũgüarü yexera rü  
 curü mugũmaxã chataãxë. <sup>15</sup>Rü tá nagu  
 charũxĩnüecha i curü mugü rü tá nagu  
 chixü i ngëma cuma cunaxwaxexũ. <sup>16</sup>Rü  
 curü mugũmaxã tá chataãxë, rü  
 tagutãma nüxũ icharũngũma i curü ore.  
<sup>17</sup>Rü choma nax curü duũxũ chixĩxũ irü  
 choxna nadau nax tama chayuxũçax rü  
 ngëmaãcü naga chaxĩnüxũçax i curü  
 ore! <sup>18</sup>iRü choxũ idaau chixëxë nax  
 ngëmaãcü meama nüxũ chadauxũçax i  
 ngëma curü orewa nüxũ quixuxũ i  
 mexũgü! <sup>19</sup>Choma rü tama ñoma i  
 naanecũax chixĩ. iRü ngëmacax taxú i  
 chauxchaxwa icuyacũxũ i curü mugü!  
<sup>20</sup>Rü wüxichigü i oragu rü chaxoégaãxë  
 naxçax i ngëma nüxũ nax  
 chacuáxchaũxũ i curü mugü. <sup>21</sup>Rü  
 cumax rü nüxũ cuxoregü i ngëma  
 duũxũgü i nügü icuaxũgũgũxũ rü chixexũ  
 ügũxũ rü tama naga ñnüexũ i curü  
 mugü. <sup>22</sup>iRü naxchaxwa choxũ  
 ixũgachixëxë i ngëma duũxũgü i chixri  
 chauchiga idexagũxũ rü choxũ cugüexũ  
 nagagu nax curü oregu chamaxũxũ!  
<sup>23</sup>Rü woo poraxëũ i ãëxgacügü rü  
 chixexũ chomaxã naxügüchaũgu, natürü  
 i choma nax curü duũxũ chixĩxũ rü tá  
 curü mugügu charũxĩnüama. <sup>24</sup>Erü  
 ngëma curü mugü rü chorü

taãxëxëeruxũ nixĩgü. Rü chorü  
 ucuxëxeruxũ nixĩgü. <sup>25</sup>Rü marü chatura rü  
 chayuxchaũ. iRü maxũ choxna naxã i  
 ngëma chomaxã nüxũ quixuxũrũxũ!  
<sup>26</sup>Rü yema chaucũma ga chixexũ, rü  
 marü cumaxã nüxũ chixu, rü cuma rü  
 marü choxũ cungãxũ rü nawa choxũ  
 ícunguxuchixëxë. iRü ñuxma rü choxũ  
 nanguxëxë i curü mugü! <sup>27</sup>iRü cuax  
 choxna naxã nax naga chaxĩnüxũçax i  
 curü mugü! Erü meama tá nagu  
 charũxĩnü i ngëma mexũgü i cuma  
 cuxũxũ. <sup>28</sup>Rü poraãcü chaxaxu erü  
 ngũxũ chinge. iRü choxũ naporaxëxë, rü  
 choxũ nataãxëxëxë yema chomaxã  
 icuxunetaxũrũxũ! <sup>29</sup>iRü naxchaxwa  
 choxũ ixũgachixëxë i ngëma doramare  
 ixĩxũ rü choxũ nanguxëxë i curü ore i  
 aixcũma ixĩxũ! <sup>30</sup>Erü choma rü marü  
 chanayaxu i cucũma i aixcũma ixĩxũ rü  
 nagu chixũxchaũ i ngëma curü mugü.  
<sup>31</sup>Pa Cori Pa Tupanax, rü curü  
 mugüguama charũxĩnü. iRü taxú i ãne  
 choxũ quingexëxëxũ! <sup>32</sup>Rü pora chaxü  
 nax ngëmaãcü chayanguxëxëxũçax i curü  
 mugü erü cuma rü taãxëmaxã  
 cunapaxëxë i chorü maxũ. <sup>33</sup>Pa Corix  
 ichoxũ nanguxëxë i curü mugü nax nagu  
 chixũxũçax ñuxmatãta ngëmagu  
 chayumare! <sup>34</sup>iRü cuax choxna naxã  
 nax ngëmaãcü tama nüxũ  
 charũngũmaxũçax i curü mugü! Rü  
 aixcũmaxũchi guxũgutãma naga  
 chaxĩnüchaũ. <sup>35</sup>iRü choxũ naporaxëxë  
 nax nagu chixũxũçax i ngëma curü  
 mugü! Erü ngëmagu nixĩ i nüxũ  
 chayangauxũ i chorü taãxë. <sup>36</sup>iRü choxũ  
 rüngũxëxë nax ngëma diëru i chixëacü  
 yaxuxũarü yexera choxũ  
 nangüchaũxũçax i curü mugü! <sup>37</sup>iRü

choxna yaxūgachixēxē i ngēma ĩnū i natūxçamamare ixīxū nax ngēmaācū curū ĩnūgurica chixūxūçax! <sup>38</sup>Rū choma nax curū duūxū chixīxū irū yanguxēxē nax nūxū chadauxūçax i ngēma curū unetagū i tūmacax ixīxū ya yīxema curū duēxēgū ixīgūxe! <sup>39</sup>iRū choxna yaxīgachixēxē i ngēma duūxūgū i muū choxna āgūxū i curū mugūgagu choxū cugūexū! Erū ngēma curū mugū rū namexechi. <sup>40</sup>Rū ngēmacax choxū nangūchaū. iRū choxū namaxēxē! Erū cuma rū quixaixcūmaxūchi. <sup>41</sup>Pa Cori Pa Tupanax irū ngēma icuxunetaxūrūūtama choxū nangechaū rū choxū ĩnanguxuchixēxē nax tama chayuxūçax! <sup>42</sup>Rū ngēmaācū tá curū oremaxā chanangāxūga i ngēma chorū uanū i cugagu choxū cugūexū. Erū nagu chayaxō i curū ore. <sup>43</sup>iRū taxū i chauaxwa choxna cunapuxū i ngēma curū ore i aixcūma ixīxū! Erū ngēma curū orewa nūxū quixu nax cuma rū tá choxū curūngūxēxēxū. <sup>44</sup>Rū chanaxwaxe i guxūgutāma nagu chamaxecha i ngēma curū nguxēētae. <sup>45</sup>Rū ngēmaācū taxuçaxtāma taxacūçax chamuū erū naga chaxīnū i ngēma curū mugū. <sup>46</sup>Rū āēxgaciūgūpexewa tá nūxū chixu i curū mugū rū taxuçaxtāma chaxāne. <sup>47</sup>Erū nūxū changechaū i ngēma curū mugū rū namaxā chataāxē. <sup>48</sup>Rū nūxū changechaū rū choxū nangūchaū i ngēma curū mugū. Rū poraācū nagu charūxīnū. <sup>49</sup>iRū nūxna nacuaçaxāchi ga yema ore ga chomaxā nūxū quixuxū i choma nax curū duūxū chixīxū! Rū yemawa nūxū quixu nax choxū tá curūngūxēxēxū. <sup>50</sup>Rū ngēxguma changechaūgu, rū ngēma curū uneta

nixī i choxū taāxēxēxēxū. Erū curū unetawa nūxū quixu nax maxū tá choxna cuxāxū. <sup>51</sup>Rū ngēma duūxūgū i nūgū icuaçxūūgūxū rū taguma nipae nax choxū nachixexēgūchaūxū. Natūrū i chomax rū taguma nūxna chixūgachi i ngēma curū ore i choxū cunguxēxēxū. <sup>52</sup>Rū nūxna chacuaçxāchi ga yema curū mugū ga choxna cuxāchiréxū, Pa Cori Pa Tupanax, rū ngēmagūgu nixī i nūxū ichayangaxūxū i chorū taāxē. <sup>53</sup>Rū ngēma duūxūgū i chixri maxēxū rū nūxū oexū i curū nguxēētae, rū choma rū poraācū namaxā chanu. <sup>54</sup>Rū ñoma i naanewa nax paxaāchi chamaxūxūgu, rū ngēma curū mugū nixī i chorū wiyae ixīxū, erū choxū nataāxēxēxē. <sup>55</sup>Pa Cori Pa Tupanax, rū woo chūtacū rū cugu charūxīnū. Erū chanaxwaxe i nagu chamaxū i curū nguxēētae. <sup>56</sup>Rū ngēma cuga nax chaxīnūxūgagu rū chanayaxu i taāxē i taxū. <sup>57</sup>Rū cumax, Pa Corix, nixī i chorū Tupana quixīxū. Rū choma rū marū cumaxā nūxū chixu nax nagu tá chamaxūxū i ngēma curū ore. <sup>58</sup>Rū guxūguma cuxna chaca nax choxū curūngūxēxēxū nax curū ngūchaū chaxūxūçax. iRū cuxū changechaūtūmūxū i ngēma curū orewa chomaxā icuxunetaxūrūxū! <sup>59</sup>Rū nūxū chīcuaxāchi i ngēma chaucūma i tama mexū, rū wenaxarū ichanaxūgū nax naga chaxīnūxū i ngēma curū mugū. <sup>60</sup>Rū ñuxāēācū chaugū chatāegu, rū paxama ichanaxūgū ga nagu nax chamaxūxū ga yema curū mugū. <sup>61</sup>Rū yema chixexū ga duūxūgū rū chixexūgu choxū nanguxēgūchaū, natūrū i choma rū tama nūxū charūngūma i curū mugū. <sup>62</sup>Rū ngāxūcūxū ícharūda nax moxē

cuxna chaxãxũcax naxcax i ngẽma curũ mugũ i aixcũma mexũ. <sup>63</sup>Rũ yĩxema cuxũ ngechaũgũxe rũ cuga ñnũxe rũ chauenexẽ tixĩgũ. <sup>64</sup>Pa Cori Pa Tupanax, rũ ngẽma curũ ngechaũ rũ guxũwama nangu i ñoma i naanewa. iRũ choxũ nanguxẽxẽ i ngẽma curũ mugũ! <sup>65</sup>Pa Cori Pa Tupanax, choma nax curũ duũxũ chixĩxũ, rũ mea choxna cudau, ngẽma chomaxã icuxunetaxũrũxũ. <sup>66</sup>iRũ choxũ nanguxẽxẽ nax mea chauãẽxũ chacuáxũcax! Erũ nagu chayaxõ i ngẽma curũ mugũ. <sup>67</sup>Rũ naxũpa ga choxũ nax cuxucuxẽxũ rũ muxũma ga chixexũ chaxũ. Natürũ i ñuxma rũ naga chaxĩnũ i ngẽma curũ mugũ. <sup>68</sup>Rũ cuma rũ cumecũma, rũ mexũ cuxũ. irũ choxũ nanguxẽxẽ i curũ mugũ! <sup>69</sup>Rũ ngẽma duũxũgũ i nũgũ icuaxũũgũxũ, rũ natũcaxmamare choxũ nixugũe. Natürũ i chomax rũ guxũguma chayanguxẽxẽ i ngẽma curũ mugũ. <sup>70</sup>Rũ nũmagũ rũ nachixeãẽgũmare, natürũ i chomax rũ namaxã chataãxẽ i ngẽma curũ nguxẽetae. <sup>71</sup>Rũ choxũ rũ name ga yema choxũ nax cuxucuxẽxũ. Erũ yemaacũ nixĩ i nũxũ chacuáxũ nax naga chaxĩnũxũ i ngẽma curũ mugũ. <sup>72</sup>Rũ ngẽma curũ ucuxẽgũ i choxna cuxãxũ, rũ chaũxcax rũ muxũma i úiru rũ diẽruarũ yexera narũmemaexũchi. <sup>73</sup>Rũ cumatama nixĩ ga choxũ cungoxẽxũ rũ maxũ choxna cuxãxũ. Rũ ngẽmacax chanaxwaxe nax choxna cunaxãxũ i cuax nax choxũ natauxchaxũcax nax naxcax changũxũ i curũ mugũ. <sup>74</sup>Rũ yĩxema cuxũ ngechaũgũxe rũ tataãxẽgũ i ngẽxguma choxũ tadaugũgu erũ nagu chayaxõ i curũ ore. <sup>75</sup>Pa Cori Pa Tupanax, choma rũ nũxũ chacuax i

ngẽma curũ mugũ rũ meama niwex. Rũ tama ícutũ i ngẽxguma choxũ icuyarũwexãchixiẽẽgu. <sup>76</sup>Rũ ngẽma curũ ngechaũ rũ chanaxwaxe nax chorũ taãxẽxẽeruxũ yixĩxũ, yema chomaxã icuxunetaxũrũxũ. <sup>77</sup>iRũ chomaxã namecũma rũ choxũ namaxẽxẽ! Erũ namaxã chataãxẽ i ngẽma curũ nguxẽetae. <sup>78</sup>iRũ naxãneexẽxẽ i ngẽma duũxũgũ i nũgũ icuaxũũgũxũ rũ natũcaxmamare ngũxũ choxũ ingexẽgũxũ! Natürũ i choma rũ chanaxwaxe i nagu charũxĩnũama i curũ mugũ. <sup>79</sup>Rũ chanaxwaxe i nua chauxũtawana nangexmagũ i ngẽma cuxũ ngechaũgũxũ rũ curũ mugũxũ cuaxgũxũ. <sup>80</sup>iRũ choxũ rüngũxẽxẽ nax mea chayanguxẽxũcax i curũ mugũ nax taxucaxma chaxãnexũcax! <sup>81</sup>Rũ poraãcũ cuxũ íchananguxẽxẽ nax choxũ ícupoxũxũcax erũ nagu chayaxõ i curũ ore. <sup>82</sup>Rũ düxwa marũ chipaxetũ nax íchananguxẽxũ i ngẽma curũ uneta, rũ ñachagiürũ: “¿Ñuxgu tá nua cuxũxũ nax choxũ cuyataãxẽxẽxũcax?” ñachagiürũ. <sup>83</sup>Rũ woo marũ wũxi i yaxguax chixĩ rũ taxuwama mexe chixĩ rũ nua taxmare chixĩ, natürũ tama nũxũ charũngũma i curũ mugũ, Pa Tupanax. <sup>84</sup>¿Rũ ñuxrexpũxcũna tá nixĩ i cunaxwaxexũ nax yaxna chaxĩnũxũ? ¿Rũ ñuxguxüratáta nixĩ i cunapoxcuxũ i ngẽma chowe ingẽxũtanũxũ? <sup>85</sup>Rũ ngẽma duũxũgũ i nũgũ icuaxũũgũxũ rũ tama curũ nguxẽetaegu íxũ, rũ chomaxũgu nanaxũgũ i wũxi i ãxmaxũ nax ngẽmagu chingucuchixũcax. <sup>86</sup>Pa Tupanax iChoxũ rüngũxẽxẽ! Erũ ngẽma chorũ uanũgũ rũ chowe ningẽxũtanũ woo taxuxũma i chixexũ chaxiũyane. Rũ

guxũma i ngẽma curũ mugũ rũ aixcũma nawexgu. <sup>87</sup>Rũ ngẽma chauxchi aiexũ rũ wixgutaax choxũ nimaxgũ, natũrũ tama choxũ narũporamaegũ erũ naga chaxĩnũ i curũ mugũ. <sup>88</sup>iRũ curũ ngechaũgagu choxũ namaxẽẽ! Rũ tá chayanguxẽẽ i ngẽma curũ mugũ i cuaxwa íchoxũxũ. <sup>89</sup>Pa Cori Pa Tupanax, rũ ngẽma curũ ore rũ guxũgucax nixĩ, rũ daxũguxũ i naanewa naxũmatũ rũ tagutáma naxũchicũxũ. <sup>90</sup>Rũ cuma nax quixaixcũmaxũ rũ guxũguma ngẽmaãcũ quixĩ. Rũ cuma nixĩ ga cunaxũxũ ga ñoma ga naane, rũ ngẽmacax nachicawatama nangexmaecha. <sup>91</sup>Rũ ñuxma rũ ta rũ guxũma i ngẽma cuxũxũ rũ nanaxajrxrũgumagũraxũ, yema curũ mugũwa namaxã cunaxuegugũxũrũxũ. Rũ guxũma i ngẽma cuxũxũ, rũ cunangoxẽẽ nax curũ ngũchaũ naxũgũxũcax. <sup>92</sup>Rũ ngẽxguma chi ngẽma curũ mugũ taxũchima taãxẽ choxna ãxgu, rũ chi chorũ ngechaũmaxã chayũ. <sup>93</sup>Rũ tagutáma nũxũ icharũngũma i ngẽma curũ mugũ, erũ ngẽmagagu nixĩ i maxũ choxna cuxãxũ. <sup>94</sup>iChoxũ ínapoxũ, Pa Tupanax! Erũ curũ duũxũ chixĩ rũ nagu chixũ i ngẽma curũ mugũ. <sup>95</sup>Rũ ngẽma chauxchi aiexũ rũ naxcax nadaugũ nax ñuxãcũ choxũ yamaxgũxũcax. Natũrũ i choma rũ curũ mugũgu chayaxõõma. <sup>96</sup>Rũ nũxũ chacuax rũ guxũma i taxacũ i ngẽmaxũ rũ nayarũxo. Natũrũ ngẽma curũ mugũ rũ taguma inayarũxo. <sup>97</sup>Rũ poraãcũ choxũ nangũchaũ i curũ ucuxẽgũ, rũ wũxichigũ i ngunexũgu rũ nagu charũxĩnũ. <sup>98</sup>Rũ ngẽma curũ mugũ rũ guxũguma chauãẽxũ choxũ nacuaxẽẽ.

Rũ ngẽmacax chorũ uanũgũarũ yexera choxũ nangexma i cuax. <sup>99</sup>Rũ guxũma i chorũ nguxẽẽruũgũarũ yexera nũxũ chacuax, erũ poraãcũ nagu charũxĩnũ i ngẽma curũ mugũ. <sup>100</sup>Rũ ngẽma curũ mugũga nax chaxĩnũxũgagu, rũ ngẽma yaxguãxgũxũ nũxũ charũcuaxmae. <sup>101</sup>Rũ guxũma i chixexũgũna chixũgachi nax ngẽmaãcũ naga chaxĩnũxũcax i curũ ore. <sup>102</sup>Natũrũ tama nũxna chixũgachi i ngẽma curũ mugũ erũ cuma nixĩ i choxũ cuxucuxẽẽxũ. <sup>103</sup>Rũ ngẽma curũ uneta rũ taxacũ i maixcuraxũchixũarũ yexera choxũ name. <sup>104</sup>Rũ curũ mugũwa chanayaxu i cuax, rũ ngẽmacax naxchi chaxai i guxũma i ngẽma nacũma i chixexũ. <sup>105</sup>Rũ ngẽma curũ ore rũ ñoma wũxi i omũrũxũ nixĩ i chauxcax rũ choxũ nibáixmaxũ. <sup>106</sup>Rũ cumaxã rũ marũ ichaxuneta rũ ngẽma rũ tá aixcũma chayanguxẽẽ. Rũ tá nagu chixũ i ngẽma curũ mugũ. <sup>107</sup>Pa Corix Pa Tupanax, rũ poraãcũ chanaxĩxãchiãxẽ. iRũ choxna naxã i maxũ, ngẽma chomaxã nũxũ quixuxũrũxũ! <sup>108</sup>iRũ choxũ nayaxu nax moxẽ cuxna chaxãxũ! iRũ choxũ nanguxẽẽ i curũ mugũ! <sup>109</sup>Rũ guxũguma ãcũcũmaxũ i yuwa changexma. Natũrũ taguma nũxũ charũngũma i ngẽma curũ ucuxẽgũ. <sup>110</sup>Rũ ngẽma chixexũ ũgũxũ rũ chopexegu guxchaxũ naxũgũ, natũrũ i choma rũ tama nũxna chixũgachi i curũ mugũ. <sup>111</sup>Rũ ngẽma curũ mugũ nixĩ i chorũ ãmare i guxũgucax ixĩxũ. Erũ ngẽmagũ nixĩ i taãxẽ choxna ãxũ. <sup>112</sup>Rũ guxũma i chorũ ngũchaũmaxã guxũgutáma nagu chixũ i curũ mugũ ñuxmatáta chayumare. <sup>113</sup>Rũ nũxũ

chaxo i ngēma duũxũgũ i nũgũ  
 írúmegünetaxũ natürũ nüxũ changechaũ  
 i curũ ucuxēgũ. <sup>114</sup>Rũ cuma nixĩ i choxũ  
 curũngũxēxũ rũ choxna cudauxũ. Rũ  
 curũ ore nixĩ i nagu chayaxōxũ. <sup>115</sup>iRũ  
 choxna pixĩgachi, Pa Chixexũarũ  
 Ūruxũgũ! Erũ choma rũ  
 chayanguxēēchaũ i chorũ Tupanaarũ  
 mugũ. <sup>116</sup>Pa Tupanax ichoxũ  
 naporaxēxē ngēma chomaxã  
 icuxunetaxũrũxũ! rũ tá chamaxũ. iRũ  
 taxũ i choxũ cuwomũxēēxũ! <sup>117</sup>iChoxũ  
 rũngũxēxē nax tama choxũ  
 yamãxgũxũcãx i chorũ uanũgũ! Rũ  
 ngēmaãcũ i choma rũ tá guxũguma  
 nagu chamaxũ i curũ mugũ. <sup>118</sup>Rũ cuma  
 rũ nüxũ cuxo i ngēma tama naga ñnüexũ  
 i curũ mugũ. Erũ ngēma nagu  
 naxĩnüexũ i nümagũ rũ taxuwama  
 name. <sup>119</sup>Rũ ngēma duũxũgũ i chixexũ  
 ũgũxũ i ñoma i naanewa rũ cuxcãx rũ  
 wũxi i guxchirerũxũ nixĩgũ. Natürũ i  
 chomax rũ nüxũ changechaũ i curũ  
 mugũ. <sup>120</sup>Rũ cupexewa i choma rũ  
 chorũ muũmaxã chidũxruux rũ aixcũma  
 nagu chixũxchaũ i ngēma curũ mugũ.  
<sup>121</sup>Rũ taguma nüxũ icharũchau nax  
 chanaxũxũ i ngēma cupexewa aixcũma  
 mexũ. Rũ ngēmacãx tama chanaxwãxe i  
 choxũ ícutãx nax naxmẽxgu  
 changũxũcãx i ngēma choxũ  
 chixexēēgũchaũxũ. <sup>122</sup>iRũ chauétũwa  
 nachogũ nax taxuxũma i chixexũ choxũ  
 naxũpetũxũcãx rũ tama chixexũgu  
 choxũ nanguxēēgũxũcãx i ngēma nügũ  
 icuãxũũgũxũ! <sup>123</sup>Rũ dũxwa marũ  
 chipaxetũ nax íchananguxēēxũ nax  
 choxũ curũngũxēēxũ rũ choxũ  
 ícunguxuchixēēxũ ngēma chomaxã  
 icuxunetaxũrũxũ. <sup>124</sup>Rũ choma nax curũ

duũxũ chixĩxũ, rũ ichoxũ nangechaxũ rũ  
 chomaxã namecũma! iRũ choxũ  
 nanguxēxē i curũ mugũ! <sup>125</sup>Rũ aixcũma  
 curũ duũxũ chixĩ, rũ ngēmacãx  
 chanaxwãxe i chauãēxũ choxũ  
 cucuãxēxē erũ nüxũ chacuãxchaũ i curũ  
 mugũ. <sup>126</sup>Pa Corix, rũ marũ nawa nangu  
 nax chauétũwa cuhogũxũ, erũ ngēma  
 chorũ uanũgũ rũ tama naga naxĩnüe i  
 curũ mugũ. <sup>127</sup>Natürũ i chomax rũ  
 ngēma úrũuarũ yexera nüxũ changechaũ  
 i curũ mugũ. <sup>128</sup>Rũ ngēmacãx nixĩ i mea  
 naga chaxĩnüxũ i curũ mugũ rũ nüxũ  
 chaxo i guxũma i nacũma i chixexũgũ.  
<sup>129</sup>Rũ ngēma curũ mugũ rũ namexechi  
 rũ ngēmacãx naga chaxĩnü. <sup>130</sup>Rũ  
 ngẽxguma texé curũ orexũ ixuxgu rũ  
 nangoxēēgu rũ yĩxema nüxũ ñnüexũ rũ  
 tũmaãēxũ tũxũ nacuãxēxē woo  
 taxuxũma cuãxe tixĩgũgu. <sup>131</sup>Rũ ñoma  
 õna i chixichixũcãx ichoxũrũxũ rũ  
 choxũ nangũchaũ i curũ mugũ. <sup>132</sup>iRũ  
 choxũ nadawenũ rũ cuxũ  
 changechaũtũmũxũ, ngēma cuxũ  
 ngechaũgũxũcãx cuxũxũrũxũ! <sup>133</sup>Rũ  
 chanaxwãxe i choxũ cunatauxchaxēxē  
 nax nagu chamaxũxũcãx i curũ ore. Rũ  
 tama chanaxwãxe nax ngēma  
 chixexũama chomaxã icuãxũ. <sup>134</sup>iRũ  
 naxmẽxwa choxũ ínanguxuchixēxē i  
 ngēma duũxũgũ i choxũ imãxgũchaũxũ!  
 Erũ chayanguxēēchaũ i curũ mugũ.  
<sup>135</sup>Rũ ñũxma nax curũ duũxũ chixĩxũ  
 írũ cuxũ changechaũtũmũxũ! iRũ choxũ  
 nanguxēxē i curũ mugũ! <sup>136</sup>Rũ porãcũ  
 chaxaxu erũ ngēma togũ rũ tama naga  
 naxĩnüe i curũ mugũ. <sup>137</sup>Pa Corix, cuma  
 rũ quixaixcũma, rũ ngēma curũ  
 mugũwa nüxũ quixuxũ i poxcu rũ  
 aixcũma tá ningũ. <sup>138</sup>Erũ guxũma i

ngēma curū mugū rū aixcūma name rū aixcūma tá ningugū. <sup>139</sup>Rū ngēma curū mugū rū poraācū chayanuxū. Rū choxū nangux nax tama naga naxīnūexū i ngēma chorū uanūgū. <sup>140</sup>Rū choma nax curū duūxū chixixū rū marū meama chanangugū i ngēma curū mugū nax taxuwama nachixexū rū ngēmacax nūxū changechaū. <sup>141</sup>Pa Tupanax, choma i cupexewa rū taxuxūma chixī rū duūxūgū rū choxū naxoe. Natūrū tama nūxū charūngūma i curū mugū. <sup>142</sup>Rū guxūma i ngēma nūxū quixuxū rū guxūgūtāma name. Rū ngēma curū nguxēētae rū nixaixcūma. <sup>143</sup>Rū yexguma taxū ga guxchaxūwa chayexmagu, rū curū mugū choxū nataāxēxēxē. <sup>144</sup>Erū ngēma curū mugū rū guxūguma name. iRū choxna naxā i cuax nax ngēmaācū nagu chamaxūxūcax i ngēma curū mugū! <sup>145</sup>Pa Corix, chorū ngúchaūmaxā cuxna chaca. iRū choxū nangāxū! Erū chayanguxēēchaū i curū mugū. <sup>146</sup>Pa Corix, cuxna nixī i chacaxaxū. iRū choxū rūngūxēxē nax choxū natauxchaxūcax nax chayanguxēēxū i curū mugū! <sup>147</sup>Rū naxūpa nax yangunexū rū ícharūda nax curū ngūxēēcax cuxna chacaxaxūcax. Rū nagu chayaxō i ngēma curū uneta. <sup>148</sup>Rū naxūpa nax nachūtaxū rū daa chauxetūgū rū ínamemare nax inadauxē nax ngēmaācū mea nagu ícharūxīnūxūcax i curū unetagū. <sup>149</sup>Pa Corix, ngēma nax choxū cungechaūxūgagu irū choxū naxīnū! iRū choxna naxā i maxū ngēma chomaxā icuxunetaxūrūxū! <sup>150</sup>Erū ngēma chixexū i duūxūgū i chowe ingēxūtanūxū rū

choxna nangaicamagū. Natūrū taxucūruwa i taxacū chomaxā naxūgū erū tama naga naxīnūe i curū mugū. <sup>151</sup>Cumax, Pa Corix, rū choxna cungaicama. Rū guxūma i curū mugū rū aixcūma nixīgū. <sup>152</sup>Rū nūxcūmamata nūxū chacuax i curū mugū i cumatama cuxueguxū nax guxūguma nangexmagūechaxūcax. <sup>153</sup>iRū nūxū nadau nax nūxācū chanaxīxāchīāēxū rū nawa choxū ínanguxuchixēxē! Erū taguma nūxū ícharūngūma i ngēma curū ucuxē. <sup>154</sup>iRū chauétūwa nachogū rū chorū uanūgūmexēwa choxū ínanguxuchixēxē! iRū choxna naxā i maxū ngēma cuma chomaxā icuxunetaxūrūxū! <sup>155</sup>Cuma rū tama nūxū curūngūxēē i ngēma duūxūgū i chixexū ūgūxū erū nūmagū rū tama naga naxīnūe i curū mugū. <sup>156</sup>Pa Corix, cuma rū poraācū cumecūmaxūchi. iRū choxna naxā i maxū ngēma cuma cunaxwaxexūrūxū! <sup>157</sup>Rū ngēma chorū uanūgū i chauxchi aiexū rū namuxūchi. Natūrū i choma rū tama íchanangex i curū mugū. <sup>158</sup>Rū tama yaxna namaxā chaxīnū i ngēma taechitawaxegūxū i tama naga nūxūxū i curū mugū. <sup>159</sup>Pa Corix idūcax, choxū nadau nax nūxācū nūxū changechaūxū i curū mugū! iRū curū ngechaūgagu choxna naxā i maxū! <sup>160</sup>Rū guxūma i curū ore rū aixcūma nixī. Rū curū mugū rū namexechi rū taguma inayarūxo. <sup>161</sup>Rū āēxgacūgū i poraexū rū chowe ningēxūtanū woo taxuxūma i chixexū chaxūyane. Natūrū i choma rū naga chaxīnū i curū mugū. <sup>162</sup>Rū choma rū namaxā chataāxē i curū uneta noma wūxi i duūxū i taxū i diēru iyangauxūrūxū. <sup>163</sup>Rū nūxū chaxo i



ngẽma ore i dora ixĩxũ. Rũ tama chanayaxu. Natĩrũ nũxũ changechaũ i ngẽma curũ ucũxẽgũ. <sup>164</sup>Rũ guxũ i oragu cuzũ chĩcuaxũxũ naxcax i curũ mugũ i aixcũma mexũ. <sup>165</sup>Rũ yĩxema curũ ucũxẽgũga ĩnũexe rũ tataãxẽgũ. Rũ taxuxũtama i taxacũ i chixexũgu tũxũ nayĩxẽxẽ. <sup>166</sup>Pa Corix, cuzũ íchanangũxẽxẽ nax choxũ ícupoxũxũ. Erũ marũ nagu chamaxũ i ngẽma curũ mugũ. <sup>167</sup>Choma rũ meama naga chaxĩnũ i curũ mugũ, rũ guxũma i choriũ ngũchaũmaxã nũxũ changechaũ. <sup>168</sup>Rũ choma rũ meama naga chaxĩnũ i curũ ucũxẽgũ rũ curũ mugũ. Rũ cuma rũ meama nũxũ cucuax i guxũma i chaucũma. <sup>169</sup>Pa Corix, ngẽma choriũ yumũxẽgũ rũ cuzũtawa nangugũ. iRũ choxna naxã i cuax ngẽma chomaxã icuxunetaxũrũxũ! <sup>170</sup>Rũ cupexewa nangu i choriũ yumũxẽ. iRũ choriũ uanũgũmexẽwa choxũ ĩnanguxuchixẽxẽ ngẽma chomaxã icuxunetaxũrũxũ! <sup>171</sup>iRũ choxũ natauxchaxẽxẽ nax cuzũ chĩcuaxũxũxũ! Erũ cumatama nixĩ i choxũ cungũxẽxẽxũ i ngẽma curũ mugũ. <sup>172</sup>iRũ choxũ natauxchaxẽxẽ nax chawiyaẽcũma nũxũ chixu i curũ unetagu! Erũ guxũma i curũ mugũ rũ namexechĩ. <sup>173</sup>Ëcũ ĩnamemare ya cuzmex nax choxũ nangũxẽxẽxũ. Erũ curũ mugũama nixĩ i guxũarũ yexera choxũ ngũchaũxũ. <sup>174</sup>Pa Corix, chanaxwaxe i paxa choxũ curũngũxẽxẽ rũ choxũ ícupoxũ. Erũ choma rũ poraãcũ namaxã chataãxẽ i ngẽma curũ ucũxẽgũ. <sup>175</sup>Rũ ñũxma nax chamaxũxũ rũ chanaxwaxe i cuzũ chĩcuaxũxũ nax ngẽmaãcũ curũ mugũmaxã choxũ curũngũxẽxẽxũcax. <sup>176</sup>Choma rũ ñoma

wũxi i carnẽru irũtaxuxũrũxũ chixĩ. iRũ nua naxũ nax chauxcax cuyadauxũcax! Erũ tama nũxũ charũngũma i curũ mugũ.

**Yumũxẽ i ngẽxguma  
ãñcũmaxũwa ingexmagu**

**120** <sup>1</sup>Rũ ngẽxguma ãñcũmaxũwa changexmagu, rũ nũxna chaca ya Cori ya Tupana. Rũ nũma rũ choxũ nangãxũ. <sup>2</sup>Pa Corix ichoxũ ĩnanguxuchixẽxẽ nũxna i ngẽma duũxũgũ i dorataxagũxũ i chixriãcũ chauchiga idexagũxũ! <sup>3</sup>¿Rũ taxacũ tá nixĩ i curũ poxcu, Pa Conũx i Dorataxaxũ? <sup>4</sup>Rũ cuma rũ tá naxne ya ãmagunemaxã quingóxnatachinũ. Rũ áxwe ya naicũmaxã tá quixa. <sup>5</sup>Rũ chaugũmaxã changechaũ erũ norũ ngãxũwa changexma i ngẽma choriũ uanũgũ i Mechécũãxgũ rũ ngẽma Chedátanũxũgũ i tama Tupanaxũ cuzũgũxũ. <sup>6</sup>Rũ marũtama nixĩ nax norũ ngãxũwa changexmaxũ i ngẽma chauxchi aieũ i nuegu rũxĩnũxũ. <sup>7</sup>Rũ ngẽxguma ngũxmũchiga namaxã chidexagu, rũ nũmagũ rũ daichigagu nidexagũ.

**Tupana rũ curũ poxũrũxũ nixĩ**

**121** <sup>1</sup>Rũ ngẽxguma maxpũnegu chadawenũgu rũ chaugũna chaca rũ ñachagũrũ: “¿Rũ ngextã tá nixĩ i ne naxũxũ i choriũ ngũxẽxẽ?” ñachagũrũ. <sup>2</sup>Rũ ngẽma choriũ ngũxẽxẽ rũ tá naxũtawa ne naxũ ya Cori ya Tupana i daxũgũxũ i naanearũ urũxũ rũ ñoma i naanearũ urũxũ ixĩcũ. <sup>3</sup>Rũ nũma rũ tagutãma nanaxwaxe nax cuyangũxũ rũ tagutãma nape ya yimã cuzna daucũ.

<sup>4</sup>Rü nüma rü guxũguma ínadau rü naxuãxê. Rü taguma nape ya yimá Iraétanũxũna daucü. <sup>5</sup>Rü nüma ya Cori ya Tupana nixĩ i cuxna nadauxũ rü cuxũ ínapoxũxũ, erü guxũguma cuxũtawana nangexma nax cuxũ nangũxêêxũcax. <sup>6</sup>Rü ngunecü rü yima üaxcü rü taxuxũtáma chixexũ cumaxã naxü rü woo ya taumacü i chütacü. <sup>7</sup>Rü nüma ya Cori ya Tupana rü naguxũraũxũ i ãũcumaxũwa cuxũ ínapoxũ erü nüma nixĩ i nüxna nadauxũ i curü maxũ. <sup>8</sup>Rü ngêmaãcü i nüma ya Cori ya Tupana rü guxũwama cuxũ ínapoxũ i ñuxma rü guxũgutaama.

#### Yerucharéũxũ nicuaxũxũ

**122** <sup>1</sup>Rü chataãxê i ngêxguma choxũ nangĩxãgũgu nax Cori ya Tupanapatawa chomaxã naxĩxũ. <sup>2</sup>Pa ñane ya Yerucharéũx, marü curü íxãxaru aixepewa tangexmagü. <sup>3</sup>Pa Yerucharéũx, cuxũ naxũgü nax cuwa nangutaquexegũxũ i Tupanaarü duũxũgü. <sup>4</sup>Rü cuwa nixĩ i naxĩxũ i guxũma i Tupanaarü duũxũgü i Iraétanũxũ nax Cori ya Tupanaxũ yacuaxũũgũxũcax ngêma nüma namaxã nüxũ yaxuxũrũxũ. <sup>5</sup>Rü Yerucharéũwa nixĩ i nangexmaxũ i ngêma tochicaxũgü i ãêxgacügü i guxchaxũaru mexêêruũgü nawa rütogũxũ. Rü ngêma tochicaxũgü rü ãêxgacü ga Dabípatawa nixĩ i nangexmagũxũ. <sup>6</sup>Rü guxũnema ya perü maxũnemaxã Tupanana peca nax Yerucharéũwa nangexmaxũcax i taãxê! Rü namaxã nüxũ pixu ya yima ñane rü ñaperügü: “Tanaxwaxê i cuwa mea namaxê i ngêma cuxũ ngechaũgũxũ”, ñaperügü. <sup>7</sup>Pa Yerucharéũx, chanaxwaxê i cuwa nangexma i taãxê rü curü

ãêxgacügüpatawa nax nataxuxũ i guxchaxũgü. <sup>8</sup>Rü ñuxma rü chauenegegũcax rü chomücügũcax chanaxwaxê i cuwa nangexma i taãxê, Pa Yerucharéũx. <sup>9</sup>Rü yima tórü Cori ya Tupanapatagagu cuxçax chayumixê nax mea cuxũ naxüpetũxũcax, Pa Yerucharéũx.

#### Tupanaarü ngechaũcax itaca

**123** <sup>1</sup>Pa Cori Pa Tupana ya Dauxũwa Ngêxmaciux, cuxçax chadaunagü nax cumaxã chidexaxũcax. <sup>2</sup>Rü wüxi i puracütanũxũ norü corimexêgu idawenũxũ nax nüxũ nacuáxũcax i taxacü nanaxwaxexũ rü ngêxgumarũxũ tixĩgü nax tórü Cori ya Tupanacax tadaunagügü nax namaxã idexagũxũcax rü tamaxã nüxũ yaxuxũcax nax nüxũ ingechaũtümũxũgũxũ. Rü ngêxgumarũxũ i wüxi i pacü i ngĩrü chiũraxũ ídawenũchigũxũcü nax nüxũ nacuáxũcax i taxacü nanaxwaxexũ, rü ngêxgumarũxũ ta tixĩgü i yixema nax Tupanaxũtawana ínanguxêêxũ nax nüxũ ingechaũtümũxũgũxũ. <sup>3</sup>Pa Cori Pa Tupanax icuxũ tangechaũtümũxũgü! Rü tanaxwaxê i cuxũ tangechaũtümũxũgü erü marü tama yaxna namaxã taxĩnie i ngêma norü guxchigagü i ngêma tomaxã rüxuanũãxgũxũ. <sup>4</sup>Rü ngêma diêruãxgũxũ rü toxũ nacugüe rü ngêma nügü icuaxũũgũxũ rü toxchi naxaie. Rü ngêmacax poraãcũxũchima ngũxũ tingegü.

#### Tupana rü Iraétanũxũaru poxũruxũ nixĩ

**124** <sup>1</sup>Rü yexguma chi Cori ya Tupana tama tüxũ ípoxũgu rü tórü uanügü rü chi tüxũ nadai, rü

name nixi i ngēma ñapegürügü, Pa Iraétanüxügüx. <sup>2-3</sup>Rü yexguma chi Cori ya Tupana tama tüxü rüngüxēēgu ga yexguma taxçax iyaxüächigu ga yema tüxü daxçhaüxü rü chi norü numaxä tüxü naguxēxē. <sup>4-5</sup>Rü ñoma wüxi i natüarü dexá i poraxüchixüxü tüxü ichagüxēēxü rü taétüwa yaxpetüxürüxü chi tamaxä nixigü nax tüxü nadaixü. <sup>6</sup>Rü namexechi ya Cori ya Tupana ya tama naxwaxecü nax törü uanügü naxnemaxä tüxü daixü. <sup>7</sup>Rü yemaacü nawa itanguxü ga yema äncümaxü ga törü uanügü taxçax mexēxü ñoma wüxi i weri i norü yaxruüwa inaxürüxü. Rü yema yaxruxü ga törü uanügü taxçax mexēxü rü narügáu rü tibuxmü. <sup>8</sup>Rü yimá Tupana ya daxügüxü i naanearü üruxü rü ñoma i naanearü üruxü, rü yimá nixi ya tüxü rüngüxēxēcü.

#### Tupana rü norü duüxügüna nadau

**125** <sup>1</sup>Rü yima maxpüne ya Chióü ya taxúema ixügachixēxēnerüxü nixigü i ngēma Cori ya Tupanaaxü yaxögüxü nax taguma texe naxüchicüüxü i norü inü. <sup>2</sup>Rü yima ñane ya Yerucharéü ya maxpünegümaxä íxümaeguächine, rü ngēxgumarüxü ta i nüma ya Cori ya Tupana rü guxügutáma norü poramaxä ínanapoxexü i norü duüxügü. <sup>3</sup>Rü ngēma chixecümaxü i äxgacü rü taxütáma guxügu duüxügümaxä inacuáxecha nawa i ñaa naane i Tupana norü duüxügüxü nagu namugüxü. Erü nüma ya Tupana rü tama nanaxwaxe nax norü duüxügü nagu maxēxü i ngēma nacüma i chixexü. <sup>4</sup>Pa Corix inüxü rüngüxēxē i ngēma duüxügü

i mea maxēxü rü aixcüma mexügu rüxünüxü! <sup>5</sup>Natürü ngēma duüxügü i chixexü i nacümagu íxü irü pocxu namaxä naxuegu! Erü ngēmatama nixi i woetama naxçax íxüxü i ngēma chixexü ügüxü. iRü Iraétanüxüna naxä i taāxē!

#### Toma nax to i nachixüanewa tagagüxü rü tanaxwaxe i toxü cuwoeguxēxē

**126** <sup>1</sup>Rü yexguma Tupana Yerucharéüçax tüxü woeguxēēgu rü taxçax rü ixanegüxürüümare nixi. <sup>2</sup>Rü yexguma ga yixema rü törü taāxēmaxä tacugüe rü aita taxüe. Rü yemaçax ga yema tama Tupanaaxü yaxögüxü rü ñanagürügü: “Nüma ya Cori ya Tupana rü taxü i mexü naxçax naxü i ngēma norü duüxügü”, ñanagürügü. <sup>3</sup>Rü aixcüma Cori ya Tupana rü taxü i mexü taxçax naxü rü ngēmacax poraäcü tataāxégü. <sup>4</sup>Natürü, Pa Corix, nangexma i tomüçügü i ñuxma rü ta to i nachixüanegüwatama ngēxmagüxü. Rü ngēma rü ta tanaxwaxe nax Yerucharéüçax cunawoeguxēxü nax nümagü rü ta nataāxégüxüçax ñoma paanexü i pucümaxä taāxēxürüxü. <sup>5</sup>Rü yixema auxäcüma toegüxe rü taāxēäcüma tanayaxu i tümanetüarü o. <sup>6</sup>Rü yixema auxäcüma yangexpüxüxe i tümaarü nanetüchire nax tayatoxüçax rü ngēxguma yaxoxgu rü tayabuxgügu i tümaarü nanetü rü wiyaeäcüma tá itayangepüxü i muxüchixü i tümaarü nanetüarü o.

#### Tupana nanangoxēxē i guxüma

**127** <sup>1</sup>Rü ngēxguma chi tama Tupanaarü ngüxēēmaxä yixigü nax naxüxü ya wüxi ya ipata rü

natüçaxmamare chi nixí i nawa napuracüexü i ngēma norü üruüügü. Rü ngēxguma chi nüma ya Cori tama nüxna nadauxgu ya wüxi ya ñane rü natüçaxmamare chi nixí i nüxna nadaugüxü i ngēma norü dauruügü. <sup>2</sup>Rü taxuwama name ega texé puracügu tügü imaxgu ñuxmata üaxcü tüxü yarüxücumare nax ngēmaäcü ngüxü tingeäcüma tüxü nangexmaxü i tümaarü ñna. Erü yíxema norü duüxügü ixígüxe rü Tupana tüxna nanaxá i ngēma tüxü taxuxü woo ítapeeyane. <sup>3</sup>Rü ngēma taxacügu rü wüxi i ngüxē i taxü i Tupana tüxna äxü nixígü. <sup>4</sup>Rü ngēma taxacügu i ngextüxügutama tüxü ngēxmagüxü rü tórü poxüruügü nixígü ñoma churaragüne rü norü poxüruxü yixixürüxü nixígü. <sup>5</sup>Rü nataäxē ya yimá duü ya muxacüü erü ñoma namuxnexüchixürüxü nixí. Rü taxütáma namuü ega äëxgacüpepewa norü uanümaxá ngü ínaxuaxügügu.

#### Cori ya Tupanaarü ngüxēchiga

**128** <sup>1</sup>Rü cutaäxē i cumax erü nüxü quicuaxüxü rü naga cuxínü ya Cori ya Tupana. <sup>2</sup>Rü cuma rü tá cunangōx i ngēma curü puracüwa ne üxü i cunetiärü o. Rü tá cutaäxē rü mexü tá cuxü naxüpetü. <sup>3</sup>Rü cupatawa i cuxicatama cuxmaxmaxá ícungexmaxüwa rü tá itaäxē. Rü ñoma wüxi i úba i oxochixürüxü tá nimu i cuxacügu. Rü ñoma oríbuchacüxü i ngexwacax rüxügüxürüxü tá naporae i ngēma cuxacügu i curü mechacüwawa rütogüxü. <sup>4</sup>Rü ngēmaäcü Tupana tá nüxü narüngüxē ya yimá duü ya Tupanaxü ngechaücü. <sup>5</sup>iRü Cori ya

Tupana ya Chióügu äpatacü cuxü rüngüxēxē! iRü Tupana cuxü rüngüxēxē nax guxüma i curü maxügu nüxü cudauxü nax ñuxäcü nüma ya Tupana Yerucharéüxü nangüxēxü! <sup>6</sup>iRü Tupana cuxü namaçxē i curü maxü nax ngēmaäcü nüxü cudauxü i cutaagü! iRü Tupana tüxü rüngüxēxē nax nua Iraétanüwa nangexmaxü i taäxē rü tórü uanügü tama tüxü chixewexü!

#### Tupana rü Iraéanexü ínanguxuchixēxē nüxna i norü uanügü

**129** <sup>1</sup>Rü ñuxma i Iraéane rü ñanagürü: “Choma rü muxüma ga ngüxüwa chaxüpetü noxritama changextüxügu. <sup>2</sup>Rü aixcüma muxüma ga ngüxüwa chaxüpetü noxritama changextüxügu, natürü taxuxüma choxü narüporamae i chorü uanügü. <sup>3</sup>Rü poraäcü choxü nacuaixgu rü choxü nanapixēēgü. <sup>4</sup>Natürü nüma ya Cori ya aixcüma mecümacü rü choxü ínanguxuchixēxē naxmexwa i ngēma chorü uanügü i chixexügu maxēxü”, ñanagürü i Iraéane. <sup>5</sup>Rü ngēma Yerucharéüarü uanügü rü chanaxwaxe nax yaxānetanüächixü rü taxçaxwa yabuxmüxü. <sup>6</sup>Rü name nixí nax yanamaächigüxü i ngēma norü uanügü ñoma wüxi ya maxē ya ñaçaxwewa üaxcü paxa rümaächixēcürüxü. <sup>7</sup>Rü name nixí i ñoma trígu i taguma norü owa ngxü rü taguma ibuxarü oóxürüxü nixígü. <sup>8</sup>Rü ngēxguma texé nüxü dauxgu rü taxúematáma ñatagürü nüxü: “iTupana pexü rüngüxēxē! iRü Cori ya Tupanaégagu mexü pexü ngupetü!” ñatagürü nüxü.

## Cori ya Tupanagu tayaxōgū

**130** <sup>1</sup>Rū ñuxma nax taxũ i guxchaxũgū chauétuwa ngēxmaxũ, rü curü ngũxēēcax íchacaama, Pa Cori Pa Tupanax. <sup>2</sup>iRü choxũ nüxũ naxĩnü i chorü yumüxē, Pa Cori Pa Tupanax, rü choxũ nangãxũ namaxã i ngēma tagaãcü naxcax íchacaxaxũ! <sup>3</sup>Pa Cori Pa Tupanax, rü ngēxguma chi nüxũ cudawenügu i ngēma chixexũgü i cupexewa taxũxũ źrü texe chi cupexewa tame? <sup>4</sup>Natürü i cumax rü toxũ nüxũ icurüngüma i ngēma torü chixexũgü i cupexewa taxũxũ nax ngēmaãcü cuxũ ticuaxũügũxũcax. <sup>5</sup>Rü guxũma i chorü maxũmaxã cuxũ íchananguxēxē, Pa Corix, rü nagu chayaxō i ngēma curü ore. <sup>6-7</sup>Choma rü ñoma dauxũtaegũxũ i ngóonexũ ínanguxēēgũxũarü yexera cuxũ íchananguxēxē, Pa Cori Pa Tupanax. Rü Pa Iraéanecüãxgũx, rü ngēma dauxũtaegũxũ i ngóonexũ ínanguxēēgũxũrũxũ rü name nixĩ i ípenanguxēxē i norü ngũxēē ya Cori ya Tupana. Erü nüma rü tüxũ nangechaũ rü tüxũ ínanguxũxēxē naxmexwa i tóru uanügü. <sup>8</sup>Rü nüma tá nixĩ i Iraétanüxũxũ ínanguxũxēēxũ guxũma i norü chixexũgüwa.

## Cori ya Tupanagu tayaxō

**131** <sup>1</sup>Pa Cori Pa Tupanax, choma rü tama chaugü chicuaxũxũ rü tama choxũ nangúchaũ i guxũma i ngēma nüxũ chadauxũ. Rü tama naxcax chadau i ngēma taxucürüwa choxũ ngēxmaxũ. <sup>2</sup>Natürü chachianemare rü ñoma wüxi i buxũ i

maiwa nüxũ rüchaxũ i naéchacüxi caxũrũxũ charümeweemare. Rü ngēmaãcü wüxi i buxũ i ngexwacax maiwa rüchaxũrũxũ chixĩ. <sup>3</sup>Pa Iraétanüxũx, rü name nixĩ i ñuxma rü guxũguma Cori ya Tupanaarü ngũxēē ípenanguxēxē.

## Dabímaxã inaxuneta ga Tupana

**132** <sup>1-2</sup>Pa Cori Pa Acóbuarü irü nüxna nacuxãchi ya Dabí rü norü oégaãxē naxcax ga guma cupata! iRü nüxna nacuxãchi ga yema norü uneta ga cumaxã nüxũ yaxuxũ ga yexguma ñaxgu: <sup>3-5</sup>“Choma rü taxũtáma chopatagu charũxãxũ rü taxũtáma ichaca nax icharüngũxũcax, rü taxũtáma chapexetü, rü bai i ñuxgu tá chapexũ ñuxmatáta chanaxü ya wüxi ya ípata naxcax ya Cori ya Acóbuarü Tupana ya poraxüchicü nax ngēma nangexmaxũcax i ngēma baú i norü mugüchixũ”, ñaxgu! <sup>6</sup>Rü noxri rü nüxũ taxĩnüechiga nax Efrátawa nayexmaxũ ga yema baú ga Tupanaarü mugüchixũ. Rü yixcúra rü Yáaarü íanepemagu nüxũ itayangau. <sup>7</sup>iRü ñuxma rü ngĩxã Tupanapatagu tachocu nax ngēma napexewa nüxũ yarücuaxũügũxũcax! <sup>8</sup>iRü inachi, Pa Cori Pa Tupanax, rü cupatagu naxücu namaxã i curü mugüchixũ i curü poraarü cuaxruxũ ixĩxũ nax ngēma cupatawa cungexmaxũcax! <sup>9</sup>Rü ngēma chacherdótegü i curü puracütanüxũgü rü tá nicómüchiru rü ngēma curü duũxũgü rü norü taãxēmaxã tá aita naxüe. <sup>10</sup>Rü curü duũ ga Dabígagu irü taxũ i choxũ cuxoxũ i choma i nachicüxi choxũ cuxunetaxũ nax ãēxgacü chixĩxũcax!

<sup>11</sup>Yerü cumax, Pa Corix, rü chaunatü ga Dabímaxã icuxuneta namaxã i wüxi i uneta i taxucürüwama cuxichicüüxü.

<sup>12</sup>Yerü ñacurügü nüxü: “Rü cuchicüxü tá wüxi i cunexü chaxuneta nax nüxí ãëxgacü yixixüçax. Rü ngëxguma cunegü chauga naxínüegu rü yanguxëëgüãgu i ngëma chorü mugü i namaxã nüxü chixuxü rü ngëma nanegü rü tá ta nüxí guxügutáma ngëma curü tochicaxüwa narütogü nax

Iraéanecüãxarü ãëxgacügü yixigüxüçax”, ñacurügü. <sup>13</sup>Rü nüma ga Cori rü nüxü naxuneta ga yima maxpüne ga Chióü nax yimagü naxächüxüçax. <sup>14</sup>Rü nüma ya Tupana rü ñanagürü: “Daa nixí ya yima maxpüne i chanaxwaxene nax guxüguma nawa changexmaxü. Rü ngëxma tá chaxächü erü chorü me nixí.

<sup>15</sup>Rü ngëma chorü duüxügüarü nanetügü rü tá poraãcü nüxü chayaxoxëxë nax ngëmaãcü tama nataiyaexüçax i woo i ngëma duüxügü i ngearü diëruãxgüxü. <sup>16</sup>Rü tá çax nuxna chaxã i Iraétanüxüarü chacherdótegü nax natanüxüétüwa nachogüexüçax i chopexewa. Rü ngëma chorü duüxügü rü norü taãxëmaxã tá aita naxüe. <sup>17</sup>Rü marü namaxã ichaxüga ga guma ãëxgacü ga Dabí ga choma nüxü chaxunetacü. Rü nataagü rü guxügutáma ãëxgacügü nixigü ñoma wüxi i omü i ngëma naiechaxürüxü. Rü Dabítaatanüwa tá chanangoxëxë ya wüxi ya ãëxgacü ya poraxüchicü. <sup>18</sup>Rü norü uanügü rü poraãcü tá chanaxãneexëxë. Natürü i nüma ya ãëxgacü rü tá chanataxëxë rü tá nüxü chüçaxüxü”, ñanagürü ga Cori ya Tupana.

**Wüxi i taãxë nixí ega Tupanaarü duüxügü nügü ngechaügügu**

**133** <sup>1</sup>Rü dücax nax ñuxãcü namexechixü i ngëxguma ngëma Tupanaarü duüxügü rü aixcüma wüxigu Tupanaga naxínüegu rü nügü nangechaügügu. <sup>2</sup>Erü ngëxguma ngëmaãcü nügü nangechaügügu rü ñoma pumára i yixichixü i namaxã chacherdótegüxü nabaerugüxü ñuxmata naxchinaguxgu rü naxchirugu irüyaexürüxü taãxë tüxna naxã. <sup>3</sup>Rü ñoma cherena ya maxpüne ya Ermóüétügu nguxü rü maxpüne ya Chióüétügu nguxürüxü tüxü nataãxëxëxë. Rü Chióüwa nixí i ne naxüxü i Tupanaarü ngüxëë nax namáxüçax i norü maxü i norü duüxügü.

**iCori ya Tupana cuxü rüngüxëxë!**

**134** <sup>1</sup>Pa Duüxügüx i Cori ya Tupanaarü Puracütanüxü Ixigüxex irü nüxü picuaxüxügü i guxãma i pemax i chütacü napatawa nax pengexmagüxü! <sup>2</sup>iRü ngëma nachica i ünexüguama pexuenümëxëgü rü Cori ya Tupanaxü picuaxüxügü! <sup>3</sup>iRü nüma ya Cori ya Tupana ya daxüguxü i naane rü ñoma i naanearü üruxü, rü yima maxpüne ya Chióüwa cuxçax ne nanamu i norü ngüxëxë!

**Ngëma taxü i mexügü i Tupana üxüchiga**

**135** <sup>1-2</sup>Name i nüxü ticuaxüxügü ya Cori ya Tupana. iRü nüxü picuaxüxügü i naëga i guxãma i pema i tóru Cori ya Tupanapatawa rü

napatax̄tūwa puracūtanūx̄ū ix̄īgūxe!  
 3iRū nūx̄ū picuax̄ūx̄ūgū ya Cori ya  
 Tupana erū nūma rū namecūma! iRū  
 wiyaegū i naégagu ixux̄ūgu pewiyaegū  
 erū nūma rū tamax̄ā namecūma! 4Rū  
 nūma rū nūx̄ū naxuneta ga Acóbu ga  
 Iraégu áégacū nax norū merux̄ū  
 yix̄ix̄ūcax̄. 5Rū choma rū meama nūx̄ū  
 chacuax̄ rū nūma ya tórū Cori ya tórū  
 Tupana rū gux̄ūma i ngēma duūx̄ūgū  
 namax̄ā tupanaáx̄ūétūwa nax̄ū. 6Rū  
 nūma ya Cori ya Tupana rū nanax̄ū i  
 gux̄ūma i tax̄acū i nūma nanax̄wax̄ex̄ū i  
 dax̄ūgux̄ū i naanewa rū ñoma i naanewa.  
 Rū ngēx̄gumarūx̄ū ta nanax̄ū i ngēma  
 nūma nanax̄wax̄ex̄ū i márwa rū  
 natamawa. 7Rū nūma rū gux̄ūwama i  
 ñoma i naanewa nayach̄ūx̄āchix̄ēx̄ē ya  
 cherenā. Rū nanayauneanecūūx̄ēx̄ē nax̄  
 ngēmawa nūx̄ū icuáx̄ūcax̄ nax̄  
 napux̄chaūx̄ū. Rū ngēma ngextá namax̄ā  
 íngangūx̄ūwa ya buanecū rū  
 inanamuáchi. 8Rū nūma nix̄ī ga nūxcūma  
 nadaiax̄ūga yema Equítuanecūāx̄ nanegū  
 ga nūx̄írax̄ūx̄ū rū nadaiax̄ūga yema  
 nūx̄írax̄ūx̄ū ga nax̄ūnax̄acūgū. 9Rū  
 Equítuanewa nanangox̄ēx̄ē ga tax̄ū ga  
 gux̄chax̄ūgū nax̄cax̄ ga Equítuanecūāx̄arū  
 āēx̄gacū rū norū ngūx̄ēēruūgū. 10-11Rū  
 nanadaiaūcu ga mux̄ūma ga  
 nachix̄ūanegū. Rū nanadaí ga āēx̄gacūgū  
 ga iporaex̄ū ga Cheūū ga  
 Amoréutanūx̄ūgiarū āēx̄gacū rū Ox ga  
 Bacháūanearū āēx̄gacū rū gux̄ūma ga  
 yema āēx̄gacūgū ga Canaáūanewa  
 yex̄magūx̄ū. 12Rū yema norū naanegū ga  
 yema āēx̄gacūgū rū nūma ga Tupana rū  
 norū duūx̄ūgū ga Iraétanūx̄ūgūna nanax̄ā  
 nax̄ gux̄ūgutáma nox̄rū yix̄ix̄ūcax̄. 13Pa  
 Cori Pa Tupanax̄, cuéga rū tagutáma

inayarūxo, rū gux̄ūgutáma i duūx̄ūgū rū  
 nūx̄na nacuax̄āchigū. 14Rū nūma ya Cori  
 ya Tupana rū aix̄cūmama mea namax̄ā  
 inacuax̄ rū mea nūx̄na nadau i norū  
 duūx̄ūgū. Rū nūx̄ū nangechaūtūmūx̄ūgū i  
 ngēma norū duūx̄ūgū. 15Rū ngēma tama  
 yax̄ōgūx̄ūarū tupananetagū rū úiru rū  
 diērumūnax̄cax̄gūmare nix̄ī. Rū  
 nax̄chicūnax̄āgū i duūx̄ūgū nax̄mēx̄max̄ā  
 ūmarex̄ū nix̄īgū. 16Rū nix̄āx̄chirex̄  
 natūrū tama nidex̄agū. Rū nix̄āx̄etūchirex̄  
 natūrū tama tūx̄ū nadau. 17Rū  
 nix̄āpachinūchirex̄ natūrū tama tūx̄ū  
 nax̄íntie. Rū nangearū max̄ūāx̄. 18Rū  
 ngēma duūx̄ūgū i ngēma nax̄chicūnax̄āgū  
 ūgūx̄ū, rū ngēma nax̄chicūnax̄ā i nagu  
 yax̄ōgūx̄ūrūx̄ū tax̄uwama name. 19Pa  
 Iraétanūx̄ūgūx̄ irū Cori ya Tupanax̄ū  
 picuax̄ūx̄ūgū! Rū pema Pa  
 Chacherdótegūx̄ irū Cori ya Tupanax̄ū  
 picuax̄ūx̄ūgū! 20Rū pema Pa  
 Lebítanūx̄ūgūx̄ irū Cori ya Tupanax̄ū  
 picuax̄ūx̄ūgū! Rū pema nax̄ Cori ya  
 Tupanax̄ū Pengechaūgūx̄ūx̄ irū nūx̄ū  
 picuax̄ūx̄ūgū ya Cori ya Tupana! 21Rū  
 namexechi ya Cori ya Tupana ya  
 max̄púne ya Chióūgu āchiicū i  
 Yerucharéūwa. Rū name nax̄ nūx̄ū  
 icuax̄ūūgūx̄ū.

**Tupana rū gux̄ūgutáma  
 Iraétanūx̄ūgūx̄ū nangechaū**

**136** 1iMox̄ē nūx̄na pex̄āgū ya  
 Cori ya Tupana! Erū nūma  
 rū namecūmax̄ūchi rū ngēma norū  
 ngechaū rū taguma inayagux̄. 2iMox̄ē  
 nūx̄na pex̄ā ya yimá Tupana ya gux̄ūma i  
 tupananetagūétūwa ngēx̄macū! Erū  
 ngēma norū ngechaū rū taguma  
 inayagux̄. 3iRū mox̄ē nūx̄na pex̄ā ya Cori

ya Tupana ya guxũma i corigiariũ  
 ãẽxgacũ ixĩcũ! Erũ ngẽma norũ ngechaũ  
 rũ taguma inayagux. <sup>4</sup>Rũ nũxicatama  
 nixĩ i naxũãxũ i taxũ i mexũgũ. Erũ  
 ngẽma norũ ngechaũ rũ taguma  
 inayagux. <sup>5</sup>Rũ nũma nixĩ i norũ  
 cuaxmaxã naxũãxũ i daxũguxũ i naane.  
 Erũ ngẽma norũ ngechaũ rũ taguma  
 inayagux. <sup>6</sup>Rũ nũma nixĩ ga dexaétiwa  
 nangoxẽẽãxũ ga waixũmũ. Erũ ngẽma  
 norũ ngechaũ rũ taguma inayagux. <sup>7</sup>Rũ  
 nũma nixĩ ga naxũãxũ ga uãxcũ rũ  
 tauemacũ. Erũ ngẽma norũ ngechaũ rũ  
 taguma inayagux. <sup>8</sup>Rũ nũma rũ nanaxũ  
 ga uãxcũ nax ngunecũ inabãxixũcãx. Erũ  
 ngẽma norũ ngechaũ rũ taguma  
 inayagux. <sup>9</sup>Rũ nũma rũ nanaxũ ga  
 tauemacũ rũ ẽxtagũ nax chũtacũ  
 inabaixgũxũcãx. Erũ ngẽma norũ  
 ngechaũ rũ taguma inayagux. <sup>10</sup>Rũ nũma  
 nixĩ ga nadaiaxũ ga nũxĩraxũgũxũ ga  
 nanegũ ga yema Equítuanecũãxgũ. Erũ  
 ngẽma norũ ngechaũ i Iraétanũxũcãx rũ  
 taguma inayagux. <sup>11-12</sup>Rũ nũma nixĩ ga  
 norũ poramaxã Equítuanewa  
 ínanguxũẽẽãxũ ga Iraétanũxũ. Erũ  
 ngẽma norũ ngechaũ i Iraétanũxũcãx rũ  
 taguma inayagux. <sup>13</sup>Rũ nũma nixĩ ga Már  
 ga Dauchiũxũ ga taxregu  
 yayauxyexũchixũãxũ. Erũ ngẽma norũ  
 ngechaũ i Iraétanũxũcãx rũ taguma  
 inayagux. <sup>14</sup>Rũ nũma nixĩ ga yema már  
 ga yayauxyexũchixũxũwa yachoũxẽẽãxũ  
 ga yema Iraétanũxũ. Erũ ngẽma norũ  
 ngechaũ i Iraétanũxũcãx rũ taguma  
 inayagux. <sup>15</sup>Rũ nũmatama nixĩ ga yema  
 Már ga Dauchixũxũgu nanguxẽẽãxũ ga  
 Equítuanecũãxaru ãẽxgacũ ga Faraóũ  
 namaxã ga norũ churagũ. Erũ ngẽma  
 norũ ngechaũ i Iraétanũxũcãx rũ taguma

inayagux. <sup>16</sup>Rũ nũxũchi nũma nixĩ ga  
 yema naane ga taxúema nagu ãpataxũgu  
 yagagũaxũ ga yema norũ duũxũgũ ga  
 Iraétanũxũ. Erũ ngẽma norũ ngechaũ i  
 Iraétanũxũcãx rũ taguma inayagux. <sup>17</sup>Rũ  
 nũma nixĩ ga nadaiaxũ ga to ga  
 nachixũanegũaru ãẽxgacũgũ ga poraexũ.  
 Erũ ngẽma norũ ngechaũ i Iraétanũxũcãx  
 rũ taguma inayagux. <sup>18</sup>Rũ woo nax  
 naporaxũ ga yema ãẽxgacũgũ natĩrũ  
 nũma ga Tupana rũ nanadaiaama. Erũ  
 ngẽma norũ ngechaũ i Iraétanũxũcãx rũ  
 taguma inayagux. <sup>19-20</sup>Rũ yemaacũ  
 nanadai ga ãẽxgacũgũ ga Cheũũ ga  
 Amoréutanũxũgũaru ãẽxgacũ rũ Ox ga  
 Bacháũanearũ ãẽxgacũ. Erũ ngẽma norũ  
 ngechaũ i Iraétanũxũcãx rũ taguma  
 inayagux. <sup>21-22</sup>Rũ Tupana nixĩ ga nũxũ  
 yanucũ ga yema ãẽxgacũgũaru naane  
 nũxũ ga Iraétanũxũ. Erũ ngẽma norũ  
 ngechaũ i Iraétanũxũcãx rũ taguma  
 inayagux. <sup>23</sup>Rũ nũma ya Tupana rũ tũxna  
 nacuaãchi ngẽxguma taxũ i guxchaxũwa  
 ingexmagũgux. Erũ ngẽma norũ ngechaũ  
 i taxcãx rũ taguma inayagux. <sup>24</sup>Rũ nũma  
 nixĩ i tũxũ ínapoxũxũ nũxna i tóru  
 uanũgũ. Erũ ngẽma norũ ngechaũ i  
 taxcãx rũ taguma inayagux. <sup>25</sup>Rũ nũma  
 nixĩ i duũxũgũxũ rũ naexũgũxũ  
 nachibũxẽẽxũ. Erũ ngẽma norũ ngechaũ  
 rũ taguma inayagux. <sup>26</sup>Rũ moxẽ nũxna  
 pexãgũ ya yimá Tupana ya dauxũwa  
 ngẽxmacũ! Erũ ngẽma norũ ngechaũ rũ  
 taguma inayagux.

**Babiróniaanearũ natũcutũgũwa  
 Yerucharéicãx taxauxe**

**137** <sup>1</sup>Rũ yexguma  
 Babiróniaanearũ  
 natũcutũgũwa tarũtogũgu rũ taxauxe



yerü nüxna tacuaxãchi ga Yerucharéü.  
<sup>2</sup>Rü Babiróniaanearü naitanügu  
 tanachogü ga torü paxetaruüügü ga  
 árpagü. <sup>3</sup>Rü yema Babiróniaanecüãx ga  
 yéma toxü gagüxü ga torü yemaxüügü  
 toxna puxüxü, rü toxü namu nax  
 taãxêäcü naxçax tawiyaegüxü nagu ga  
 wiyaegü ga Yerucharéücüãx. <sup>4</sup>¿Rü  
 ñuxãcü tá nagu tawiyaegü ya torü Cori  
 ya Tupanaarü wiyaegü i ngëxguma  
 ngëma naane i tama toxrü ixixüwa  
 tangexmagügu? <sup>5</sup>Rü ngëxguma chi  
 Tupanapexewa cuxü icharüngümagu, Pa  
 Yerucharéüx irü daa chorü  
 tügünechacüxü rü nüxü iyanangüma nax  
 cuxçax napaxetaxü! <sup>6</sup>Rü ngëxguma cuxü  
 charüngümagu rü tama choxrütama  
 taãxêétiwa cuxü chaxúxêxëgu, Pa  
 Yerucharéüx irü daa chorü conü rü nua  
 chauxmanaxãwa yaxü nax taguma wena  
 chawiyaexüçax! <sup>7</sup>Pa Cori Pa Tupanax irü  
 taxü i cunangupetüxêxëmarexü nax  
 cupoxcuxü i ngëma Edóütanüxü ga  
 Babiróniaanecüãxgüxü muxü nax  
 noxtacüma iyanaxoxüçax ga torü ñane ga  
 Yerucharéü! <sup>8</sup>Rü cumax, Pa Babiróniax,  
 rü tá icuyarüxó. Rü tá nataãxë ya yimá  
 cuxü iyarüxoxêécü naxçax ga yema  
 tomaxã cuxüxü. <sup>9</sup>Rü tá nataãxë ya yimá  
 curü buxüügüxü íyaxücü nax nutagu  
 yachixgüãcüma nadaiaxüçax.

Cori ya Tupanana moxë naxã ya Dabí

**138** <sup>1</sup>Rü guxüma i chorü  
 maxümaxã tá moxë cuxna  
 chaxã, Pa Cori Pa Tupanax. Rü ngëma  
 togü i nachixüãnegüarü ãëxgacügü i  
 tama cuxü cuaxgüxüpexewa tá cuxçax  
 chawiyae. <sup>2</sup>Rü yima cupata ya üinene  
 íngexmaxüguama chadaweniãcüma tá

ichacaápxü nax ngëmaäcü moxë cuxna  
 chaxãxüçax naxçax i curü ngechaü rü nax  
 aixcümácü quixixü. Erü cuma rü  
 cugüégagu icuxuneta, rü aixcüma  
 cuyanguxêxë i guxüma i ngëma nüxü  
 quixuxü. <sup>3</sup>Rü yexguma cuxna chacaxgux  
 nax choxü cuporaxêëxü rü cuma rü  
 choxü cüngãxüga rü aixcüma choxü  
 cuporaxêxë. <sup>4</sup>Rü guxü i nachixüãnegüarü  
 ãëxgacügü rü tá cuxü nicuaxüxüügü i  
 ngëxguma nüxü naxinüegu nax ñuxãcü  
 cuyanguxêëxü i ngëma nüxü quixuxü i  
 curü unetagü. <sup>5</sup>Rü nümagü rü aixcüma tá  
 Cori ya Tupanaxü nicuaxüxüügü naxçax i  
 ngëma mexüügü i taxüügü i naxüxü. Erü  
 nüma ya Tupana rü naporaxüchi. <sup>6</sup>Rü  
 woo dauxüwa nax nangemaxü ya Cori ya  
 Tupana natürü ngëma nüxü nadawenü i  
 ngëma tama nügü icuaxüüxü. Natürü i  
 ngëma nügü icuaxüüxü rü yáxügutama  
 nüxü nacuax i ñuxãcü nax yixixü. <sup>7</sup>Rü  
 ngëxguma äücümáxüwa changexmagu,  
 rü cuma rü choxü ícupoxü nax tama  
 choxü yamaçgüxüçax. Rü icunawex i  
 curü pora rü choxü ícunguxuchixêxë  
 naxmexwa i chorü uanügü i chomaxã  
 nuexü. <sup>8</sup>Rü nüma ya Cori ya Tupana rü  
 aixcüma tá nayanguxêxë i ngëma mexü i  
 chorü maxüçax nagu naxinüxü. Erü  
 cumax, Pa Corix, rü taguma inayagux  
 nax choxü cungechaüxü rü chomaxã  
 cumecümáxü. iRü taxü i choxü ícutáxü,  
 Pa Cori Pa Tupanax! Erü cumatama nixü i  
 choxü cungoxêëxü.

Guxüxüma nacuax ya Tupana

**139** <sup>1</sup>Pa Cori Pa Tupanax, cuma  
 rü marü choxü cüngügü rü  
 meama nüxü cucuax i chorü maxü. <sup>2</sup>Rü  
 cuma nüxü cucuax i guxüma i ngëma

chaxüxü. Rü woo curü yáxüwa changexmagu rü nüxü cucuaxama i ngêma nagu charüxînüxü. <sup>3</sup>Rü ngêma íchixügüxüwa rü cuma rü nüxü cucuax i guxüma i ngêma chaxüxü. <sup>4</sup>Rü woo taxüta namaxá chachonagüxü i ore, rü cumax, Pa Corix, rü marü nüxü cucuax i taxaciúmaxá tá chadexaächixü. <sup>5</sup>Rü chorü guxüciúwawa cungexma rü chauétü cuwéxmex. <sup>6</sup>Rü guxüma i ngêma cuax rü chauáxê rü tama ningü nax nüxü chacuáxü i ngêma. Rü ngêma nax nataxüchixü i ngêma cuax rü tama nüxü chacuax i ñuxácü nax yixíxü. <sup>7</sup>¿Rü ngextá tá chaxü naxchaxwa i cuáxê? ¿Rü ngextá tá chaña nax cuxna chayáxüxüçax? <sup>8</sup>Rü ngêxguma chi daxügüxü i naanegu chaxínagügu, rü ngêma cungexma i cumax. Rü ngêxguma chi mairaxütüügu chaxüçuxgu rü ngêma rü ta cungexma i cumax. <sup>9-10</sup>Rü ngêxguma chi chagonagügu rü üaxcü ne üxüwa chañaxgu rüexna üaxcü írúxüçuxügu chaxáchiügu, rü woo i ngêma rü chauétü cuwéxmex rü curü tügünemexê rü tagutáma choxü ningex. <sup>11-12</sup>Rü ngêxguma chi nagu charüxínügu nax éanexügu chicúxü rüexna ngêma ngóonexü rü éanexüxü yanguxuchigu, rü ngêma éanexü rü taxucürüwama cuxchaxwa choxü inicüx, erü ngêma éanexü rü ñoma nangunexürüütama nixí i cuxçax. Rü ngêma éanexü rü ngêma ngóonexü rü cuxçax rü nawüxigumare. <sup>13</sup>Rü cuma nixí ga cunaxüxü i ñaa chaxune. Rü cuma nixí ga chauéanüwa choxü cuxüxü. <sup>14</sup>Rü ngêmacax cuxü chicuaxüxü naxçax nax ñuxácü choxü cuxüxü, erü curü ü rü

namexechi. Rü ngêma rü meama nüxü chacuax. <sup>15</sup>Rü taxuxüma cuxçax naxêxügu ga yexguma chauéanüwa noxri chanaxíxichigu rü chiyachigügu ga taxúema choxü ídauxüwa. <sup>16</sup>Rü cuxetü rü nüxü nadau ga chaxune ga yexguma noxri chanaxíxichigu. Rü naxüpa nax chabuxü rü curü poperagu naxümatü ga ñuxácü tá nax choxü cuxüxü. Rü naxüpa nax chamaxüxü rü cuma nüxü cucuax i ñuxre i ngunexü tá choxü nangexmaxü. <sup>17</sup>Pa Tupanax, rü ngêma nagu curüxînüxü rü chorü cuax rü tama nawa nangu. Erü ngêma curü ñnügü rü taguma inayagux. <sup>18</sup>Rü ngêxguma chi chayaxugüxgu i ngêma curü ñnügü i chauxçax nagu curüxînüxü rü naxnecütexearü yexera chi nixí i norü mu. Rü woo ngêxguma paxmama chabaxüçhigu rü ngêxguma rü ta chaugu curüxínü. <sup>19-20</sup>Pa Tupanax, rü nüxna nayaxu i norü maxü i ngêma chixexü ügüxü! iRü choxna yaxíxgachixêxê i ngêma máetagüxü i chixexümaxá cuchigagu idexagüxü rü natüçaxma cumaxá nuexü! <sup>21</sup>Pa Cori Pa Tupanax ¿éxna taxütáma naxchi chaxaixü i ngêma duüxügü i cuxchi aixü rü nüxü chaxoxü i ngêma cumaxá nuexü? <sup>22</sup>Rü ngêmáacü guxü i chorü maxümaxá naxchi chaxai i ngêma duüxügü rü nüxü chacuax i ngêmagü rü chorü uanügü nax yixígüxü. <sup>23</sup>Pa Tupanax, inangügü i chorü maxü i ñuxácü nax yixíxü i cupexewa! iRü choxü naxü nax nangóxüçax rü aixcüma name i ngêma nagu charüxînüxü! <sup>24</sup>iRü choxü nadawenü rü ngoxi chixexü i namagu chixü! iRü ngêma nama i maxüwa choxü gaxügu choxü ixüxêxê!

Dabí rü Tupanaarü ngüxēēçax ínaca i  
norü yumüxēwa

**140** <sup>1-2</sup>Pa Cori Pa Tupanax  
inaxmexwa choxü  
ínanguxuchixēxē i ngēma chixexü  
ügüxü i duüxügü! iRü choxü ínapoxü  
nüxna i ngēma máxwaxegüxü rü ngēma  
chixexüçax daugüxü rü guxü i oragu rü  
dajxçax daugüxü! <sup>3</sup>Rü yima norü conü  
rü ñoma äxtapearü conürüxü naxāmagu.  
Rü ngēma norü dexa rü  
äxtapegucharüxü nixí. <sup>4</sup>Pa Corix  
ichoxna nadau naxçaxwa i ngēma  
chixri maxēxü i duüxügü! iRü choxü  
ínapoxü nüxna i ngēma máxwaxegüxü  
rü naxçax daugüxü nax ñuxácü  
chixexügu choxü nanguxēēgüxü! <sup>5</sup>Rü  
ngēma duüxügü i nügü icuaxüügüxü rü  
chopexegu nanaxügü i wüxi i norü  
yauruxü. Rü choxü niwaiyemaxügü  
namaxā i ngēma norü yauruxü rü norü  
bocupararuxü. <sup>6</sup>Rü choma rü marü  
cumaxā nüxü chixu rü ñachagürü cuxü:  
“Cuma nixí i chorü Tupana quixixü. iRü  
nüxü naxínü i ngēma cuxna naxçax  
chacaxü! <sup>7</sup>Pa Cori Pa Tupana Pa Chorü  
Maxēēruxü ya Poracüx, rü cuma nixí i  
choxü ícupoxüxü i daiwa”, ñachagürü  
cuxü. <sup>8-9</sup>Pa Cori Pa Tupanax irü taxú i  
nüxü cunatauxchaxēēxü i ngēma  
chixexüarü üruxü nax naxüäxüçax i  
noxrütama ngüçhaü! iRü nüxna  
nachuxu nax tama yanguxēēäxüçax i  
ngēma norü ínü i chixexü! Rü ngēma  
chorü uanügü i choxü íchomaeguächixü  
rü inachigü nax choxü yamaxgüxüçax.  
iNatürü naxçaxtama natāeguxēxē i  
ngēma chixexü i çaxçax naxügüxü  
nax nūmatama nagu nayixüçax! <sup>10</sup>iRü

naétügu nayixēxē i curü poxcu ñoma  
áxwe ya inaicürüxü! iRü wüxi i äxmaxü  
i taguma nawa ínachoxüxügu nawocu!  
<sup>11</sup>iRü taxú i cunamaxēxēchaxü i ñoma  
i naanewa i ngēma guxchigawaxexü!  
iRü ngēma máxwaxexü rü nüxna nangu  
i ngēma chixexü nax ngēma yamáxüçax!  
<sup>12</sup>Rü choma nüxü chacuax rü nüma ya  
Cori ya Tupana rü mea namaxā inacuax  
i ngēma ngearü diēruáxü. Rü tüxü  
ínapoxü ya yixema naxixächiäēgüxe.  
<sup>13</sup>Rü ngēma duüxügü i aixcūma mexü  
rü tá cuxü nicuaxüxügü. Rü cuxütawa tá  
nangexmagü i ngēma cupexewa  
ixaixcūmagüxü.

Cuxüicatama chadawenü, Pa Tupanax

**141** <sup>1</sup>Rü ñuxma nax cuxna  
chacaxaxü, Pa Cori Pa  
Tupanax, irü paxa choxü rüngüxēxē!  
iRü choxü naxínü i ñuxma nax cuxna  
chacaxaxü! <sup>2</sup>Rü ñaa chorü yumüxē i  
cumaxā nüxü chixuxü irü nayaxu ñoma  
pumáratexē i yáuanecü  
chaxunagüchacüxüäcūma cuxçax  
chiguxürüxü! <sup>3</sup>Pa Cori Pa Tupanax irü  
choxü rüngüxēxē nax tama ore i  
chixexüxü chixuxüçax i cuchiga! <sup>4</sup>iRü  
choxna nayaxu i ngēma chixexügu nax  
charüxínüxü! iRü taxú i choxü quingexü  
nax chixexügu chixüxüçax rü bai i  
natanü nax chaxäxüçax i norü õnawa i  
ngēma duüxügü i chixexü ügüxü! <sup>5</sup>Rü  
choxü rü wüxi i ngüxēē nixí ega  
ngēxguma choxü nawexächixēēgu i  
wüxi i duüxü i cupexewa mexü. Natürü  
ngēma norü ucuxē i ngēma chixexü  
ügüxü rü tama choxü name rü taxütáma  
naga chaxínü. Rü guxügütáma  
chayumüxē nax nüxü naxoexüçax i

ngêma chixexũ i nagu ínamaxêxũ. <sup>6</sup>Rü ngêma chixexũ ügüxũ i duũxũgüaru äëxgacügü rü tá nayaitanü ñoma ma xpúnewa nayixürüxũ. Rü ngêxgumama tá nüxna nacua xächie nax namexũ ga yema ore ga namaxä nüxũ chixuxũ. <sup>7</sup>Rü yima naxchina xägü i ngêma chixexũ ügüxũ rü naxmaxũxütäga tá nawoone ñoma mairaxũ i aixmüanexũ ngêxma woonexürüxũ. <sup>8</sup>Pa Cori Pa Tupanax, rü cuxũ nixĩ i chadawenüxũ. Rü cuxçax nixĩ i chiñaxũ nax choxũ ícupoxũxüçax. iRü taxú i choxna quixügachixũ! <sup>9</sup>iRü choxũ ínapoxũ nawa i ngêma yauxruxũ i çaxçax yanuagüxũ i ngêma chixexüaru üruügü! <sup>10</sup>Natürü nümatátama nagu nayi i ngêma yauxruxũ i çaxçax yanuagüxũ. Rü yoxni i chomax rü tá chiña.

Cuma nixĩ i chorü cuxchicaxũ,  
Pa Cori Pa Tupanax

**142** <sup>1</sup>Rü tagaäcü nüxna chaca ya Cori ya Tupana. Rü tagaäcü naxçax íchaca nax nüxũ changechaütümüxüçax. <sup>2-3</sup>Rü napexewa naxçax çayarüdexa i ngêma guxchaxügü i choxũ ngêxmaxũ. Rü ngêxguma chauétü nanguxgu i ngêma guxchaxügü rü napexewa nüxũ chixu nax ñuxäcü ngüxũ chingexũ. Pa Corix, cuma nüxũ cucua x i chomaxũ i nagu chixüxũ. Rü ngêma nama i nagu chixüxüwa rü chorü uanügü rü ngêxma chopexegu nanaxügü i wüxi i yauxruxũ. <sup>4</sup>Rü ngêxguma chorü tügünecüwagu chadawenügu rü tataxuma ya texé ya chorü ngüxêewa üxe. Rü tataxuma ya texé ya choxũ ípoxüxe. Rü tataxuma ya

texé ya çaxçax oegaxäxêxe. <sup>5</sup>Rü cuxna nixĩ i çaxçaxxũ, Pa Cori Pa Tupanax, rü cuxũ ñachagürü: “Cuma nixĩ i chorü cuxchicaxũ quixixũ. Rü cuma nixĩ i choxna cunaxäxũ i guxüma i taxacü i choxũ ngêxmaxũ i ñoma i naane i nawa çamaxüwa”, ñachagürü. <sup>6</sup>iRü naxçax irüxínü i chauga nax aita çaxüxü! Erü marü nataxuma i chorü pora. iRü nüxna choxũ ínanguxuchixêxê i ngêma chowe ingêxütanüxü! Erü nüma rü choxũ narüporamaegü. <sup>7</sup>iRü choxũ ínanguxuchixêxê nawa i ñaa chorü guxchaxügü nax ngêmaäcü cuxũ chicuaxüxüçax! Rü ñuxüchi i ngêma duũxügü i aixcüma mexügu rüxínüexũ rü tá choxũ ínachomaeguächi i ngêxguma chomaxä cumecümagu.

Pa Corix cugu nixĩ i çayaxöxũ

**143** <sup>1</sup>Pa Cori Pa Tupanax íchoxũ nüxũ naxínü i chorü yumüxê! iRü naxçax irüxínü i ngêma cuxna naxçax çaxçaxxũ! iRü êcü choxũ nangäxũ! Erü cumecüma rü aixcüma cuyanguxêxê i ngêma nüxũ quixuxũ. <sup>2</sup>iRü taxú i choxna naxçax cucaxaxũ i chorü chixexügü nax poxcu chomaxä cuxuegüçax! Erü cupexewa rü tataxuma ya texé ya tama nüxũ cuäxe nax chixexũ taxüxũ. <sup>3</sup>Rü ngêma chorü uanügü rü chowe ningêxütanü rü waixümüwa choxũ nayapotügü. Rü éanexügu choxũ napoxcu nax ngêma çamaxüxüçax naxrüxü ga yema nüxcüma yuexũ. <sup>4</sup>Rü ñuxma rü çayaxixächixüchi rü chauäewa poraäcü chamuũ. <sup>5</sup>Rü nagu çarüxínü ga yema mexügu ga taxü ga nüxcüma toxçax cuxüxü. Rü nüxna çacuaxächi

nax ñuxãcü poraãcü toxũ curüngũxêẽxũ.  
<sup>6</sup>Rü ngẽma nax chacuxwaxexuchixũ rü  
 cuxçax chaxunagümejë ñoma waixüümü  
 i paxũ i dexá naxwaxexuchixũrũxũ. <sup>7</sup>Pa  
 Cori Pa Tupanax ipaxa choxũ nangãxũ!  
 Erü ngẽmatama chayü. iRü taxũ i  
 cuxoxũ nax choxũ curüngũxêẽxũ! Erü  
 ngẽxguma tama choxũ curüngũxêẽgu rü  
 tá chayü naxrũxũ i ngẽma yuexũ. <sup>8</sup>iRü  
 paçmama choxũ nawex nax ñuxãcü  
 poraãcü choxũ cungechaũxũ! Erü cugu  
 nixĩ i chayaxõxũ. iRü choxũ nüxũ  
 nacuxãxêxê nax ñuxãcü cunaxwaxexũ  
 nax cupexewa chamaxũxũ! Erü cumaxã  
 nixĩ i nüxũ chixuxũ i ngẽma chorü  
 ngúchaũ. <sup>9</sup>Pa Cori Pa Tupanax inüxna  
 choxũ ínanguxuchixêxê i ngẽma chorü  
 uanügü! Erü cuxçax nixĩ i chiñaxũ nax  
 cuxũtagu chaugü chicúxũçax. <sup>10</sup>iRü  
 choxũ nanguxêxê nax chanaxũxũçax i  
 curü ngúchaũ! Erü cuma nixĩ i chorü  
 Tupana quixĩxũ. Rü chanaxwaxe i cuãxê  
 i iüñexũ rü mexũ i nacümagu choxũ  
 nixũxêxê. <sup>11</sup>Pa Corix, cuégagu cuxna  
 chaca nax choxũ cumaxêẽxũçax. iRü  
 choxũ ínanguxuchixêxê nawa i ñaa  
 ngúxũ i chingexũ! Erü cuma rü  
 cumecüma. <sup>12</sup>Rü cuma rü cuyanguxêxê i  
 ngẽma nüxũ quixuxũ. iRü ngẽmacax  
 nadai i ngẽma chorü uanügü! iRü êcü  
 guxũxũma nadai! Erü choma rü curü  
 duũxũ chixĩ.

Ãêxgacü ga Dabí rü Tupanana moxê naxã

**144** <sup>1</sup>Namexechi ya Cori ya  
 Tupana ya chorü poxũrũxũ.  
 Rü nüma nixĩ i choxũ nanguxêẽxũ rü  
 choxũ nüxũ nacuxãxêẽxũ nax ñuxãcü tá  
 daiwa chaxũxũ. <sup>2</sup>Rü nüma nixĩ i  
 aixcüma chomücü yixĩxũ rü chorü

poxũrũxũ yixĩxũ. Rü naxçax nixĩ i  
 chiñaxũ nax ngẽma chicúxũçax. Rü  
 nüma nixĩ i chorü nguxuchixêẽrũxũ rü  
 chorü tüpexerũxũ. Rü namaxã nixĩ i  
 chaugü chatüpexexũ. Rü nüma nixĩ i  
 choxmexwa nangexmagüxêẽãxũ i  
 íanegü. <sup>3</sup>Pa Cori Pa Tupanax ítaxacüwa  
 cuxũ name ya yimá duũ rü ngẽmacax  
 nagu curüxĩnũxũ? ¿Rü curü taxacü nixĩ  
 ya yimá duũ rü ngẽmacax poraãcü nüxũ  
 cungechaũxũ? <sup>4</sup>Rü yimá duũ rü wüxi i  
 ngũãcüürũxũ nixĩ i norü maxũ. Rü  
 ngẽma norü maxũ rü ñoma wüxi i  
 gauxchipeçax üpetũxũrüümare nixĩ.  
<sup>5</sup>Pa Corix iyawãxna i daxügũxũ i naane  
 rü ñoma i naanegu írũxĩ! iRü nüxũ  
 ingógü ya maçpünegü nax  
 yanaigüxũçax rü yacaixquegüxũçax!  
<sup>6</sup>iRü inacuxgü ya cuxnegü ya ãẽmacügü  
 ixĩgüne nax ngẽmachaxwa  
 yabuxmüxũçax i curü uanügü! <sup>7-8</sup>iRü  
 êcü çaxçax rüxue i daxügũxũ i  
 naanewa nax nawa choxũ  
 ícuyaxuchixũçax i ñaa taxũ i guxchaxũ i  
 nawa changexmaxũ! iRü choxũ napu  
 naxmexwa i ñaa chorü uanügü i  
 dorataçaxgũxũ i norü doramaxã choxũ  
 íxuaxũgũxũ! <sup>9</sup>Pa Corix, ngexwacaxũxũ i  
 wiyaeü tá cuxçax chawiyae chorü  
 paxetarüümaxã. Rü ngẽmaãcü chorü  
 wiyaeaxã tá cuxũ chicuaxũxũ. <sup>10-11</sup>Rü  
 cuma nixĩ i nachixũanegüarü  
 ãêxgacügũxũ curüngũxêẽxũ nax norü  
 uanügũxũ naporamaegüxũçax. Rü cuma  
 nixĩ ga curü duũ ga Dabíxũ  
 ícunguxuchixêẽxũ naxmexwa ga norü  
 uanügü. iRü ñuxma rü choxũ ínapoxũ  
 nax tama norü taramaxã choxũ  
 yamaçgüxũçax i chorü uanügü! iRü  
 choxũ napu naxmexwa i ñaa chorü

uanügü i dorataꝥgüxü i norü doramaxã  
 choxü íxuaxüügüxü! <sup>12</sup>Rü ngëxguma  
 Tupanaga íxĩnüegu rü aixcüma  
 tataãxëgü. Rü tanegü rü mea nayae  
 ñoma nanetügü i bacaxürüxü. Rü  
 taxacügü rü iyamexechi ñoma  
 Tupanapataarü caxtagürüxü. <sup>13</sup>Rü tóru  
 trígupataügü rü nixãacu namaxã i  
 naguxüraxüxü i nabü. Rü tóru  
 carnérugü rü poraãcü nimu i tóru  
 nachitaxüwa. <sup>14</sup>Rü tóru wocagü  
 nixãxacügü rü mea nabue i naxacügü.  
 Rü tóru íanemaxüguwa rü taxúema  
 ãücúmaxüggagu aita taxü. <sup>15</sup>Rü ngëma  
 duüxügü i guxüma i ñaa mexü nüxü  
 ngëmagüxü rü aixcüma nataãxëgü. Rü  
 ngëmatama taãxë nüxü nangexma i  
 ngëma duüxügü i Tupana namaxã  
 icuáxü.

Rü name nixĩ nax guxü i duüxügü rü  
 Cori ya Tupanaxü yacuaxüügüxü

**145** <sup>1</sup>Rü choma rü tá cuxü  
 chixuchiga nax ñuxãcü  
 nüxü cucuaxüchixü, Pa Tupana Pa  
 Chorü Æëxgacüx. Rü guxügutãma cuxü  
 chicuaxüxü. <sup>2</sup>Rü wüxichigü i ngunexügu  
 rü mexü i cuchigaxü tá chixu rü  
 guxügutãma cuxü chicuaxüxü. <sup>3</sup>Rü  
 nüma ya Cori ya Tupana rü nüxü  
 nacuaxüchi rü ngëmacax name nax  
 nüxü icuaxüügüxü. Rü ngëma tóru cuax  
 rü tama nawa nangu nax nüxü  
 icuáxüçax i ñuxãcü nüxü nacuaxüchixü i  
 nümax. <sup>4</sup>Rü papágü rü naxacügüwa tá  
 nananguxëëgü nax cuxü yacuaxüügüxü  
 naxçax i ngëma cuxüxü. Rü tá nüxü  
 nixugügü i ngëma mexügü i curü  
 poramaxã cuxüxü. <sup>5</sup>Rü choma rü tá  
 nüxü chixu nax ñuxãcü torü Æëxgacü ya

üü necü nax quixixü i cumax. Rü tá nüxü  
 chixu i ngëma mexügü i toxçax cuxüxü.  
<sup>6</sup>Rü duüxügü rü nachiga tá nidexagü i  
 ngëma ãücúmaxü i curü poramaxã  
 cuxüxü. Rü choma rü tá cuxü  
 chixuchiga nax ñuxãcü guxüétüwa  
 cungexmaxü. <sup>7</sup>Rü duüxügü rü tá cuxü  
 nixuchiga nax ñuxãcü  
 cumecúmaxüchixü. Rü tagaãcü tá nüxü  
 nixugügü nax cuma rü Æëxgacü i  
 aixcüma mea guxãmaxã icuácü quixixü.  
<sup>8</sup>Rü nüma ya Cori ya Tupana rü  
 namecüma rü nüxü tangechaütümüxü  
 rü yaxna tamaxã naxĩnü rü tüxü  
 nangechaü. <sup>9</sup>Rü nüma ya Cori ya  
 Tupana rü guxãmaama namecüma rü  
 ngëma naxüüwa inanawex nax ñuxãcü  
 poraãcü tüxü nangechaüxü. <sup>10</sup>Rü  
 guxüma i ngëma cuxüxü rü tá cuxü  
 nicuaxüxügü, Pa Cori Pa Tupanax. Rü  
 ngëma curü duüxügü rü tá cuxü  
 nicuaxüxügü. <sup>11</sup>Rü tá nüxü nixugügü  
 nax cuma rü aixcüma Æëxgacü ya  
 üü necü quixixü rü ñuxãcü namexechixü  
 i ngëma curü puracü i curü poramaxã  
 cuxüxü. <sup>12</sup>Rü ngëmaãcü tá duüxügü  
 nüxü nacuax nax ñuxãcü cuporaxüchixü  
 rü ñuxãcü Æëxgacü ya üü necü quixixü.  
<sup>13</sup>Rü cuma rü guxüguma Æëxgacü quixĩ  
 rü guxügutãma namaxã icucuax i  
 guxüma. <sup>14</sup>Rü nüma ya Cori ya Tupana  
 rü tüxü ínarüdagüxëxë ya guxãma ya  
 yíxema iyayitanüxe. Rü tüxü  
 naporaexëxë ya guxãma ya yíxema  
 turaexe. <sup>15</sup>Rü guxüma i ngëma cuxüxü  
 rü cuxü narüdaunü nax cuma  
 cunachibüexëxüçax i ngëxguma  
 nataiyaegu. <sup>16</sup>Rü cuma rü  
 cuyaxüwemügü rü curü ngúchaümaxã  
 mea cunataãxëxëxë i guxüma i ngëma

maxêxũ. <sup>17</sup>Rũ nũma ya Cori rũ guxũma i ngẽma nagu naxĩnũxũwa rũ aixcũma nawexgu. Rũ guxũma i ngẽma naxũxũwa rũ namecũma. <sup>18</sup>Rũ nũma ya Cori ya Tupana rũ tũxna nangaicama ya yĩxema aixcũma naga taxĩnũeacũma norũ ngũxêcax ícagũxe. <sup>19</sup>Rũ yĩxema nũxũ ngechaũgũxe, rũ tũxna nanaxã i ngẽma naxcax ítacaxũ. Rũ ngẽxguma norũ ngũxêcax nũxna tacagũegu, rũ nũma rũ tũxũ naxĩnũ rũ tũmaarũ guxchaxũwa tũxũ ínangũxũxê. <sup>20</sup>Rũ nũma ya Cori ya Tupana rũ tũxũ ínapoxũ ya yĩxema nũxũ ngechaũgũxe, natũrũ nanadai i ngẽma duũxũgũ i tama naga ínũechaũxũ. <sup>21</sup>Rũ Cori ya Tupanaxũ chicuaxũxũ. Rũ name nixĩ i guxũma i duũxũgũ nũxũ nicuaxũxũgũ ya yimã Üünecũ i ñuxma rũ guxũgutãma.

**Tupanaxũ ticuaxũxũgũ  
naxcax i ngẽma naxũxũ**

**146** <sup>1</sup>Name nixĩ i nũxũ ticuaxũxũgũ ya Cori ya Tupana. Rũ choma rũ guxũma i chorũ maxũmaxã tá Cori ya Tupanaxũ chicuaxũxũ. <sup>2</sup>Rũ ñuxma nax chamaxũxũ rũ Cori ya Tupanaxũ tá chicuaxũxũ. Rũ ñoma rũ ta chamaxũ rũ naxcax tá chawiyae ya yimã chorũ Tupana. <sup>3</sup>iRũ taxũ i nagu cuyaxõxũ i yatũgũ i nũgũ nũxũ cuaxêxũ! Erũ nũmagũ rũ duũxũgũmare nixĩgũ rũ tama maxũ tũxna naxã. <sup>4</sup>Rũ ngẽxguma nayuegu rũ wenaxarũ waixũmũxũ nixĩgũ. Rũ ngẽma ngunexũgutama inayarũxo i guxũma i taxacũ i nagu naxĩnũxũ. <sup>5</sup>Rũ tataãxê ya yĩxema Acóbuarũ Tupanaxũtawa nayaxúxe i tũmaarũ ngũxê rũ nagu

yaxõxe ya Cori ya Tupana. <sup>6</sup>Rũ nũma nixĩ i naxũãxũ i daxũgũxũ i naane rũ ñoma i naane, rũ ngẽma már, rũ guxũma i taxacũ i nawa ingexmachigũxũ. Rũ nũma rũ guxũguma nayangũxêxê i ngẽma nũxũ yaxuxũ. <sup>7</sup>Rũ nũma rũ tũmaétũwa nachogũ ya yĩxema togũ chixri tũmamaxã icuáxe. Rũ yĩxema taiyagu ímaxêxe rũ tũxũ nachibũxêxê. Rũ yĩxema poxcupataũwa ngẽxmagũxe rũ tũxũ ínangũxũxê. <sup>8</sup>Rũ yĩxema íngexetũxe rũ tũxũ nidauchigũxêxê. Rũ yĩxema ya iyayitanũxe rũ tũxũ ínarũdagũxêxê. Rũ nũma ya Cori rũ nũxũ nangechaũ i ngẽma duũxũgũ i mexũ ügũxũ. <sup>9</sup>Rũ nũma ya Cori ya Tupana rũ nũxna nadau i ngẽma duũxũgũ i tama Iraétanũxũ ixĩgũxũ i to i nachixũanewa ne íxũ. Rũ ngẽxgumarũxũ ta tũxũ narũngũxêxê ya taxcutagũ rũ yutegũxe. Natũrũ ngẽma duũxũgũ i chixexũ ügũxũarũ ínũ rũ nagu nayanachixexêxê. <sup>10</sup>Pa Yerucharéũx, rũ nũma ya Cori ya Tupana rũ guxũgutãma ãxgacũ nixĩ. Rũ yimã curũ Tupana rũ gucũ ya taunecũgu rũ tá pemaxã inacuax. iRũ ngĩxã nũxũ ticuaxũxũgũ ya Cori ya Tupana!

**Tupana rũ porãcũ  
Iraétanũxũ narũngũxêxê**

**147** <sup>1</sup>iRũ ngĩxã nũxũ ticuaxũxũgũ ya Cori ya Tupana! Rũ name nixĩ i naxcax tawiyægũ. Erũ wũxi i taãxê nixĩ nax nũxũ icuaxũgũxũ. <sup>2</sup>Rũ nũma ya Cori ya Tupana rũ wena ínanadaxêxê ya Yerucharéũ rũ nananutaquexe i ngẽma

Iraétanüxügü i to i nachixüanegügu woonexü. <sup>3</sup>Rü nüma rü tüxü nataãxëxëxë ya yíxema poraãcü ngechaü ingegüxe rü tüxü nananaxëxë ya yíxema ngúxü ingegüxe. <sup>4</sup>Rü nüma rü nüxü nacuax nax ñuxre yixü ya ëxtagü rü wüxichigü rü naégamaxã nüxna naca. <sup>5</sup>Rü nüma ya tórü Tupana rü äëxgacü ya guxüétüwa ücü nixí rü naporaxüchi. Rü norü cuax rü taguma inayagux. <sup>6</sup>Rü nüma rü nüxü narüngüxë i ngëma duüxügü i tama nügü icuaxüügüxü natürü nanaxãneexëxë i ngëma chixexü ügüxü. <sup>7</sup>iRü árpamaxã naxçax pewiyaegü rü moxë nüxna pexãgü ya tórü Tupana! <sup>8</sup>Rü nüma rü caixanexümaxã nanatüxchipeta i ñaa naane. Rü nanamexëxë ya pucü nax ñaa naanexü yawaixëëxüçax, rü maxpúnegüwa nanaxügüxëxë ya maxë. <sup>9</sup>Rü nüma rü nanachibüexëxë i naexügü. Rü ngëxgumarüxü ta nanachibüexëxë i ngëma ngurucucacügü i ngëxguma naxauxegu. <sup>10</sup>Rü tama ngëma cowuarü poramaxã nataãxë ya Tupana rü bai i yatügiarü poragu narüxínü. <sup>11</sup>Natürü ngëma aixcüma namaxã nataãxëxü nixí nax nüxü ticuaxüügüxü ya yíxema nagu yaxögüxe i norü ngechaü. <sup>12</sup>Pa Yerucharéücüaxgüx irü Cori ya Tupanaxü picuaxüxügü! Rü Pa Chióüx irü curü Tupanaxü icuaxüxü! <sup>13</sup>Erü nüma rü nanataixëxë i perü ñanearü ñax naxçaxwa i perü uanügü. Rü mea nüxna nadau i pexacügü i perü ñanewa. <sup>14</sup>Rü nüma nixí i pexü nangüxmüexëxü i pechixüanewa rü muxüchixü i trígumaxã pexü nataãxëxëgü. <sup>15</sup>Rü

nüma rü ñoma i naanewa nanamu i norü ore. Rü ngëma norü ore rü paxama guxüma i ñaa naanewa nangu. <sup>16</sup>Rü nüma rü nanangoxëxë i cherena i gáuxü i pamüemaxü i ñoma carnérutaxarüxü cómüxü. Rü ngëma gáuxü i ätexexümaxã nanagüane. <sup>17</sup>Rü nüma rü nanayixëxë i gáuxü i äpüxüxü. Rü ngëma gáuanexü i núma namuxümaxã rü ngëma dexá rü ínitai. <sup>18</sup>Natürü yixcüama ínananguxëxë ya buanecü ya naicü. Rü yimá buanecü rü inanadexëxë i ngëma gáuxü. Rü ngëxguma i ngëma dexá rü iniyax. <sup>19</sup>Rü nüma nixí ga Iraétanüxüxü nüxü nacuaxëxü ga norü ore rü norü mugü. <sup>20</sup>Natürü yema togütücumü ga duüxügü rü taguma nüxü nacuaxgü ga yema norü ore rü norü mugü. iRü ngíxã nüxü ticuaxüxügü ga Cori ya Tupana!

**Tupanaxü nicuaxüxügü i  
ngëma nüma naxüxü**

**148** <sup>1-2</sup>Rü name nixí i Tupanaxü ticuaxüxügü. Rü pemax, Pa Dauxücüax, rü name nixí i ngëma dauxüwa nüxü picuaxüxügü. Rü pemax, Pa Orearü Ngerüügü i Dauxücüax, rü name nixí i nüxü picuaxüxügü. Rü pemax, Pa Tupanaarü Churaragü i Dauxücüax, rü name nixí i nüxü picuaxüxügü. <sup>3</sup>Rü cumax, Pa Üaxcüx, rü cumax, Pa Tauemacüx, rü pemax, Pa Ëxtagüx, rü name nixí i nüxü picuaxüxügü. <sup>4</sup>Rü cumax, Pa Daxügüxü i Naanex, rü cumax, Pa Dexá i Caixanexüétüwa Ngëxmaxüx, rü name nixí i nüxü picuaxüxügü. <sup>5</sup>iRü nüxü pixuchiga ya Cori ya Tupana! Erü nüma nixí ga namaxã nadexaãchixü nax



nangóxúçax i guxũma i taxacü  
ingexmaxũ. <sup>6</sup>Rü yemaacü nanangoxêxê  
ga guxũma nax guxũgutáma nûma  
nanaxwaxexũâcûma nangexmaxúçax. Rü  
inanaxâ ga mugü ga taxúema üchicüüxũ.  
<sup>7</sup>iRü ñoma i naanewa rü nüxũ  
picuaxüxügü ya Cori ya Tupana, Pa  
Naexügü i Taxüchigüxũ i Mar-artü  
Mátamaxüwa Maxêxũ! <sup>8</sup>Rü name nixĩ i  
nüxũ picuaxüxügü, Pa Âemacü, rü  
Gáuxũ i Âpüxüxũ, rü Gáuxũ i Âtexexũ,  
rü Cherena, rü Tacü ya Buanecü ya  
Tupanaarü Ngúchaũ Ücüx. <sup>9-10</sup>Rü pemax  
ya maxpúnegü, rü máxpüxanegü, rü  
guxũma i naigü i taxũne, rü nanetügü,  
rü naxünagü, rü naexügü, rü werigü, rü  
guxũma i taxacü i natanecamaxâ ixixũ,  
rü name nixĩ i nüxũ picuaxüxügü. <sup>11</sup>iRü  
guxũma i âêxgacügü i wüxichigü i  
nachixüanemaxâ icuáxũ, rü guxũma i  
norü ngüxêêruügü i âêxgacügü, rü  
guxũma i norü duüxügümaxâ rü  
Tupanaxũ picuaxüxügü! <sup>12</sup>iRü yatügü rü  
ngexügü rü ngextüxücügü rü paxügü rü  
oxigü, rü Tupanaxũ picuaxüxügü! <sup>13</sup>Rü  
ngêmaâcü i guxâma i pema rü name nixĩ  
i nüxũ picuaxüxügü. Erü nûma ya  
Tupana rü guxâétüwa nangexma. Rü  
nûma rü namaxâ inacuax i guxũma i  
daxügüxũ i naanewa rü ñoma i naanewa  
ngêxmaxũ. <sup>14</sup>Rü nûma ya Tupana rü  
nüxũ narüngüxêê ga norü duüxügü ga  
Iraétanüxũ nax norü uanügüxũ  
naporamegüxüçax. Rü ngêmacax, Pa  
Iraétanüxũ i Aixcûma Tupanaarü  
Duüxügü Ixügüxex, rü name nixĩ i nüxũ  
picuaxüxügü. Erü nûmatama nixĩ i pexũ  
naxunetaxũ nax norü duüxügü  
pixügüxüçax. iRü ngixâ nüxũ  
ticuaxüxügü ya Cori ya Tupana!

Tupana ya guxüarü üruxũ rü âêxgacü nixĩ

**149** <sup>1</sup>iRü nüxũ picuaxüxügü ya  
Cori ya Tupana! iRü  
naxçax pewiyae nagu i wüxi i wiyae i  
ngexwacaxüxũ! iRü ngêmaâcü nüxũ  
picuaxüxügü i guxâma i pema nax  
norü duüxügü pixügüxũ! <sup>2</sup>Rü pemax,  
Pa Iraétanüxũ i Yerucharéüçüçax i  
Tupanaarü Duüxügü Pixügüxex irü  
namaxâ petaâxêgü! Erü nûma nixĩ i  
perü âêxgacü ga nügüxũ pexũ  
nangoxêêxũ. <sup>3</sup>Rü pemax, Pa  
Iraétanüxũx irü Tupanaégagu ípiyüxe  
rü ngêmaâcü nüxũ picuaxüxügü! iRü  
perü árpagümaxâ rü perü  
paüđerügümaxâ pepaxetagüâcûma  
naxçax pewiyaegü! <sup>4</sup>Erü nûma ya Cori  
ya Tupana rü namaxâ nataâxê i norü  
duüxügü i nüxũ icuaxüüügüxũ. Rü tüxũ  
namaxêxêxê ya yixema tama tügü  
icuaxüüügüxe. <sup>5</sup>Rü pemax, Pa Norü  
Duüxügüx irü Corimaxâ petaâxêgü!  
iRü woo i pechicawa rü naxçax  
pewiyaegü! <sup>6-7</sup>iRü peâxmaxâ nüxũ  
picuaxüxügü! iRü pexmexwa peyange i  
tara i guxüçüwawa téxũ nax  
ngêmamaxâ penadaxüçax i ngêma  
duüxügü i tama Tupanaxũ cuaxgüxũ,  
rü ngêmaâcü penapoxcuexüçax i  
ngêma togü i nachixüanegü! <sup>8-9</sup>Rü  
ngêma norü âêxgacügü rü norü  
ngüxêêruügü i poraxũ irü  
cadénamaxâ peyachotagü nax  
ngêmaâcü peyangüxêêxüçax i ngêma  
poxcu i Tupana namaxâ uegüxũ! Rü  
nûma ya Tupana rü aixcûma tá  
tûmamaxâ nataâxê ya guxâma ya  
yixema aixcûma naga ñnüexe. iRü  
nüxũ picuaxüxügü ya Cori ya Tupana!

Guxūma i ngēma Tupana  
ūxū rü nüxū nicuaxūxūgū

**150** <sup>1</sup>iCori ya Tupanaxū  
picuaxūxūgū! iRü  
napatawa rü nüxū picuaxūxūgū! iRü  
pema i daxūguxū i naanewa  
ngēxmagūxe i nüma ínangexmaxūwa rü  
nüxū picuaxūxūgū! <sup>2</sup>iRü nüxū  
picuaxūxūgū naxçax i ngēma mexū i  
norü poramaxā naxūxū! iRü nüxū  
picuaxūxūgū ertü guxūguma  
nangexmaecha rü nataxuma i norü ügü

rü norü gux! <sup>3</sup>iRü cornétamaxā rü  
árpamaxā rü árpaxacūmaxā nüxū  
picuaxūxūgū! <sup>4</sup>iRü paūdérugūmaxā  
ípiyūxeäcūma nüxū picuaxūxūgū! iRü  
wowerugūmaxā rü paxetaruūgū i  
ātūxūxūmaxā nüxū picuaxūxūgū! <sup>5</sup>iRü  
paxetaruūgū i ātachinūxū rü  
itagaxūmaxā nüxū picuaxūxūgū! iRü  
paxetaruūgū i ātachinūxū rü ígaxūmaxā  
nüxū picuaxūxūgū! <sup>6</sup>iRü guxūma i  
ngēma ingūātanücüxū rü Cori ya  
Tupanaxū yacuaxūxūgū! iRü ngīxā Cori  
ya Tupanaxū ticuaxūxūgū!

# PROVERBIOS

## (Ucuxëgüchiga)

### Ucuxëgü i aixcüma tüxü mexü

**1** <sup>1</sup>Naa nixí i norü ucuxëgü ya Dabí nane ya Charumóü ya Iraétanüxügüarü äëxgacü ixícü. <sup>2</sup>Rü nüma rü norü duüxügüçax nanaxümatü i ñaa ucuxëgü nax namaxã nangüexëëxüçax nax ñuxãcü tá nügü nangechaügüäcüma namaxëxüçax rü ñuxãcü tá nügümaxã namexëëgüaxüçax ega taxacürü guxchaxü nügüçax ínangüxëëgügu. <sup>3</sup>Rü nüma nanaxwaxe nax norü duüxügü rü mea naãxëxü yacuáxüçax nax ngëmaäcü Tupanapexewa yamexü rü mea duüxügüpexewa namaxëxüçax. <sup>4</sup>Rü nanaxwaxe nax ngëma tama ixüãëgüxü rü mea naãxëxü yacuáxüçax. Rü ngëma ngextüxügüxü i naechitamare maxëxü rü nüma nanaxwaxe nax ngëma cuax i aixcüma mexü nüxü ngëxmaxü. <sup>5</sup>Rü ngëma aixcüma naãxëxü icuáxü rü tá naga naxínü i ñaa ucuxëgü nax ngëmaäcü yexeraxü i cuax nüxü ngëxmaxüçax. <sup>6</sup>Rü ngëmaäcü tá nüxü nacuax i taxacüchiga yixixü i ngëma ucuxëgü rü ore i cuaxruügü i ngëma duüxügü i aixcüma nüxü icuaxüchixü

nüxü ixugüxü. <sup>7</sup>¿Rü texé tixí ya yíxema aixcüma cuax tüxü ngëxmaxe? Rü yíxema Tupanaga ñnüxe rü yíxema tixí ya aixcüma cuax tüxü ngëxmaxe. Natürü yíxema tama Tupanaga ñnüxe rü wüxi i ngeäxëmarexü tixí.

### Ucuxëgü i ngextüxügüxüçax ixixü

<sup>8</sup>Pa Chaunex inaga naxínü i ñaa cunatüarü ucuxë! iRü taxü i nüxü curüngümaxü i ngëma cué namaxã cuxü ngüxëëxü! <sup>9</sup>Erü ngëma ucuxëgü rü wüxi i curü meruxü nixí ñoma wüxi i cuchagü rüxna wüxi i curü ngaxcueruürüxü nixí. <sup>10</sup>Rü ngëxguma ngëma chixexüarü üruügü cuxü womüxëëgüchaügu irü taxütáma naga cuxínü, Pa Chaunex! <sup>11</sup>Erü ñanagürügü tá cuxü: “iNua naxü rü totanügu naxã! iRü ngíxã ítayacüxëügü nax yamaxgüxüçax rü nüxü ingíxëxüçax i ngexürüxü i ngëma üpetüxü! <sup>12</sup>Rü nüétama ega woo duüxügü i mexü yixügu rü tá tanadai. Rü ñoma wüxi i duüxü i yuxü i waixümü ígaxürüxü tá namaxã tixígü. <sup>13</sup>Rü guxüma i mexügü rü tá tüxü nangexmagü rü tachiügü rü tá tayapaxëxë namaxã i ngëma naxçax

ingĩxgũxũ. <sup>14</sup>iRũ nua naxũ rũ totanũgu naxã! Rũ toma rũ cumaxã tá tangau i ngẽma naxçax ingĩxgũxũ”, ñanagürũgũ tá. <sup>15</sup>iNatürũ taxũtãma namaxã cuxãmücü, Pa Chaunex! iRũ paxa nüxna ixũgachi i ngẽma duũxũgũ i ngẽmaäcü chixexũgu ruxĩnüexũ!

.....

**Ngẽma ucuxëgũ rũ poraäcü  
wũxi i mexũ tüxũ nixĩ**

**2** <sup>1</sup>Pa Chaunex inaga naxĩnü i ñaa chorũ ucuxë! iRũ cugüãëgu namaxã nanguxũ! <sup>2</sup>iËcü irũxĩnü i ñaa ore i cuax nawa iyaxuxũ! Rũ ngẽmawa tá cuax cuxũ nangexma. <sup>3</sup>Rũ ngëxguma cuyumüxëgu irũ guxũ i curũ ngũchaũmaxã naxçax ínaca i ngẽma cuax nax aixcüma cuãëxũ cucuáxũçax! <sup>4</sup>iRũ noxtacüma cugũ inaxã nax naxçax cudauxũ i ngẽma cuax ñoma diëru i irũtaxuxũçax cudauxũrũxũ! <sup>5</sup>Rũ ngëxguma rũ tá nüxũ cucuax i Cori ya Tupanaxũ nax cungechaũxũ, rũ tá nüxũ icuyangau nax ñuxäcü aixcüma Tupanaxũ cucuáxũ. <sup>6</sup>Erũ nüma ya Cori ya Tupana nixĩ i cuax tüxna naxãxũ, rũ naaxwa nixĩ i íyachoxũtanüncüüxũ i ngẽma cuax. <sup>7</sup>Rũ nüma ya Cori ya Tupana rũ tüxũ narüngũxëë rũ tüxna nadau ya yíxema aixcüma mea naxpëxewa maxëxë rũ taxuxũma i chixexũ ügũxe. <sup>8</sup>Rũ tüxna nadau ya yíxema mexũ i nacümagu íxe rũ tüxũ ínapoxũ ya yíxema aixcüma naga ñnüexe. <sup>9</sup>Rũ ngëxguma naga cuxĩnügu rũ tá nüxũ cucuax i ngẽma nacüma i aixcüma wëxguxũ rũ tá naxçax cudau i ngẽma aixcüma mexũ. <sup>10</sup>Rũ tá mea cuãëxũ cucuax rũ tá nüxũ cucuax nax

ñuxäcü taãxë cuxna naxãxũ i ngẽma cuax. <sup>11</sup>Rũ ngẽma nax mea napëxewa imaxëxũ rũ taãxëxũ icuáxũ rũ ngẽma nixĩ i guxũguma chixexũna tüxũ ípoxũxũ. <sup>12-15</sup>Rũ ngẽma mexũ i cuax rũ mexũ i ñnü rũ tá cuxũ ínapoxũ nax tama wũxi i nacüma i chixexũgu quixũxũçax, rũ tama naga cuxĩnüxũçax i ngẽma duũxũgũ i chixexũ i nüxũ rüxoexũ i nacüma i mexũ rũ chixexũ i nacümacax daugũxũ, rũ taãxëäcüma chixexũ ügũxũ rũ naxüchixügũxũ i ngẽma norũ chixexũ. <sup>16-17</sup>Rũ ngẽma cuax i Tupanawa ne üxüxicatama tá nixĩ i cuxũ ípoxũxũ nüxna i ngẽma ngexũ i ngeãëxũ i natexũ ítãxũ rũ tama Tupanaarũ mugüga ñnüxũ rũ norũ dexamaxã chixexũwa cuxũ gachaũxũ. <sup>18</sup>Rũ ngẽma nama i ngẽma ngexũchiüwa daxũgu texë ixũxgu, rũ ñoma yuwa taxũxũrũxũ tixĩ. <sup>19</sup>Rũ yíxema ngẽma ngexũpatagu chocuxe rũ marũ chixexũgu tügũ tayixëxë, rũ tüxũ naguxcha nax wena mexũ i maxũçax tadaugũxũ. <sup>20</sup>Pa Chaunex irũ ngẽma nama i mexũwa tüxũ gaxũgu ixũ! iRũ nagu ixũ i ngẽma nacümagũ i aixcüma Tupanapëxewa mexũ! <sup>21</sup>Erũ yíxema mea Tupanapëxewa maxëxe rũ tama chixexũ ügũxe, rũ tá namax i tümaarũ maxũ nawa i ñaa naane i Tupana tüxna äxũ. <sup>22</sup>Natürũ ngẽma duũxũgũ i chixexũ i tama Tupanaga ñnüexũ rũ tá ínawoxũ i ñaa Iraëanewa.

**Ucuxëgũ i cuax tüxna äxũ**

**3** <sup>1</sup>Pa Chaunex itaxũ i nüxũ icuyarüngümaxũ i chorũ ore i cuxũ changuxëëxũ! iRũ mea cugüãëgu namaxã nanguxũ i ñaa chorũ ucuxëgũ!

<sup>2</sup>Rü ngēmaācü tá namax i curü maxü rü aixcüma tá cutaāxē. <sup>3</sup>iRü taxú i nüxü curüxoñü nax cumecümaxü rü quixaixcümaxü! iRü nagu namaxü rü cugüāēgu namaxā nanguxü ñoma wüxi i nachagü yigü nagu ixüechaxürüxü! <sup>4</sup>Rü ngēmaācü ya Tupana rü duñxügü rü ta cumaxā nataāxē rü cuxü nicuaxüxügü. <sup>5</sup>iRü guxü i curü maxümaxā nagu yaxō ya Cori ya Tupana! iRü taxú i cuxrütama cuaxgu curüxñinüxü! <sup>6</sup>iRü guxüma i taxacü icuxüxüwa rü Tupanamexēgu naxü! Rü nüma rü tá cumaxā inacuax rü mea tá inanguxuchi i ngēma cuxüxü. <sup>7</sup>iRü taxú i nagu cuyaxōxü i cuxrütama cuax! iRü nüxna ixügachi i ngēma chixexü rü Tupanaga naxñü! <sup>8</sup>Rü ngēma nixí i üxüxü i aixcüma mexü nax cuporaxücax. <sup>9</sup>iRü Tupanamaxā nangau i curü ngēmaxügü rü nüxna naxā i ngēma nüxíraxüxü i norü o i curü nanetügü i nüxna üxü! <sup>10</sup>Rü ngēxguma ngēmaācü cunaxüxgux rü nüma rü tá nayamuxēxē i curü nanetügü nax napaācugüxücax i curü bínuchixügü rü ngēma curü chocagü rü tá naācugümaxā narügāugü. <sup>11</sup>Pa Chaunex itaxú i nüxü cuxoxü i ngēxguma Cori ya Tupana cuxü rüwexächixēēgu! iRü taxú i cunuāmaxü ega ngēxguma cuxü naxucüxēgu! <sup>12</sup>Erü nüma ya Cori ya Tupana rü tüxü naxucüxē ya yíxema tüxü nangechaxüxe ñoma wüxi ya papá ya nane ya nüxü nangechaücüxü naxucüxēxürüxü. ....

<sup>27</sup>Rü ngēxguma texé curü ngüxēēcax ícaxgu, rü tama name i tüxna cunachüxu ega cuxü nangexmagu i ngēma cuxna naxcax tacaxü. <sup>28</sup>Rü tama

name i moxücax ícunaxüxüchi i ngēma ngüxēē i ñuxmatama cuxü tauxchaxü nax cunaxüxü. <sup>29</sup>Rü tama name i nagu curüxñü i taxacürü chixexü tümamaxā cuxü ya yíxema cuxna rüyoexe. <sup>30</sup>iRü taxú i naxcax cudauxü nax texémaxā cunaxü ega taxüema taxacürü chixexü cumaxā üxgux! <sup>31</sup>iRü taxú i cuxü nangüchaüxü i nacüma i ngēma yatü i máxwaxexü rü taxú i nüxü cuyadauxüxü! <sup>32</sup>Erü nüma ya Cori ya Tupana rü nüxü naxo i ngēma chixexü ügüxü, natürü tüxü nanatauxchaxēxē nax namaxā taxämücüxü ya yíxema mexügu rüxñüexe. <sup>33</sup>Rü nüma ya Cori ya Tupana rü chixexü napatacüaxmaxā naxuegu i ngēma chixexü i duñxü, natürü mexü tümapatacüaxmaxā naxuegu ya yíxema napexewa mexe. <sup>34</sup>Rü nüma ya Cori rü nüxü nacugü i ngēma cugüwaxegüxü, natürü tümamaxā namecüma ya yíxema mecümagüxe ya tama tügü icuaxüügüxe. <sup>35</sup>Erü nüma ya Tupana rü tümamaxā nataāxē ya yíxema mexügu rüxñüexe, natürü nüxü naxo i ngēma tama naga ñnüechaxüxü.

.....

**Ucuxēgü nax mexü i nacümagu ixüxücax**

**4** <sup>18</sup>Rü ngēma mexü i duñxügücüma rü ñoma ngexwacax yangunegurüxü nixí nax nangóxü rü ngēmaācü yexera ningóchigü ñuxmata nangóonexüchi. <sup>19</sup>Natürü ngēma nacüma i ngēma duñxügü i chixri maxexü nagu íxü, rü ñoma éanexürüxü nixí. Rü ngēmacax tama nüxü nadaugü nax taxacürü äücümaxü napexewa ngēxmaxü. <sup>20</sup>Pa Chaunex inaga naxñü i

ñaa chorü ore i cumaxã nüxũ chixuxũ rü nagu namaxũ! <sup>21</sup>iRü taxú i nüxũ cuyarüngümaxũ! iRü mea cugüãëgu namaxã nanguxũ! <sup>22</sup>Erü ngëma chorü ore rü aixcüma maxũ tüxna naxã ya guxãma ya yíxema naga ñnüexe. Rü tümaxüneçax rü ñoma wüxi i üxüxürüxü nixí. <sup>23</sup>Rü ñoma i naanewa rü ngëma guxüarü yexera nüxna cudauxũ tá nixí i curü ñnü, erü ngëma curü ñnü nixí i maxüwaama cuxü gaxü. <sup>24</sup>iRü cugüna nadau nax tama doraxü quixuxüçax rüëxna texéxü cuwomüxëëxüçax!

.....

**Ucuxë nax tama nai i ngemaxã taxünearü ngúchaügu inguxüçax**

**5** <sup>1</sup>Pa Chaunex ichoxü irüxüñü i ñaa ucuxë i cumaxã nüxũ chixuxũ! Erü choma rü nüxũ chacuçax nax tüxcüü cumaxã nüxũ chixuxũ. <sup>2</sup>Rü ngëmaäcü tá cuxuãxë rü nüxũ cucuáäcüma tá quidexa. <sup>3</sup>Rü ngëma ngexü i ngeãëxü rü mexechixü i dexamaxã nidexa erü nüxü nacuçüchi nax ñuxäcü tüxü íyapuxëëxü. <sup>4</sup>Natürü ngëxguma naga cuxüñügu rü yixcama rü poraäcü tá cuxü nangux ñoma wüxi i tara i taxrecüwawa téxügu cunguxürüxü. <sup>5</sup>Rü ngëma ngexü i ngeãëxüga nax cuxüñüxü rü yuwa nixí i cuxü nagaxü, rü ngëmaäcü tá nawa cingu i ngëma poxcu i tagutãma gúxü.

.....

<sup>8</sup>iRü nüxna ixügachi i ngëma ngexü, rü bai i íxrarüwa nachüña cungaicamaxü!

.....

<sup>18</sup>Rü name nixí i taãxëäcü ngímaxã cumaxü i ngëma cuxmaxüchi. Rü wüxi i taãxë nixí i ngëma pexacügu i ngímaxã cuxü ngëxmaxü. <sup>19</sup>Rü name nixí i ngürü

meãxëmaxã cutaãxë. iRü ngëma curü ngúchaü rü ngímaxãxicatama naxü! <sup>20</sup>Pa Chaunex ¿Rü tüxcüü namaxã cumaxü i wüxi i ngexü i ngeãëxü? ¿Rü tüxcüü nüxna cunapax i wüxi i ngexü i tama cuxmax ixüxü? <sup>21</sup>Rü nüma ya Cori ya Tupana rü cuxü ñnadawenü rü meama nüxü nadau i ngëma cuxüxü. <sup>22</sup>Rü ngëma norü chixexü inaxüxügagu tá napoxcu i ngëma duüxü i chixexü üxü. Rü ngëma norü chixexütama nixí i yanáixü ñoma wüxi i taxacümaxã yanáixürüxü. <sup>23</sup>Rü ngëma tama ucuxë i mexü nax naxüñüchaüxügagu rü tá yuwa naxü. Rü ngëma nax nangeãxëmarexügagu rü tá inayarütaxu.

.....

**Ngëma cuçax i mexü rü ngëma ngeãë rü tama namaxã nawüxigu**

**9** <sup>8</sup>Rü ngëxguma cunaxucuxëgu i ngëma tama ucuxë irüxüñüchaüxü rü tá cumaxã nanuama. Natürü ngëxguma cunaxucuxëgu i ngëma naãxëxü cuáxü rü tá cumaxã nataãxë. <sup>9</sup>Rü ngëxguma cunanguxëëgu i ngëma duüxü i cuçax nüxü ngëxmaxü, rü yexeraäcü tá nüxü nacuçax. Rü ngëxguma cunanguxëëgu i wüxi i duüxü i mecümaxü rü tá yexeraäcü cuçaxwa nangu. <sup>10</sup>Rü yíxema cuçax tüxü ngëxmaxe rü Tupanaga taxüñü. Rü ngëma Tupanaga nax taxüñüxüwa nüxü tacuçax nax aixcüma tümaãëxü tacuáxü.

.....

<sup>13</sup>Rü ngëma ngexü i ngeãxëmarexü rü naxoregütaçax rü nidexaechamare. Rü tama naãxëxü nacuçax, rü tama naxãne ega taxacürü chixexü naxüxgu. <sup>14</sup>Rü napataçaxwa narüto i ngextã guxüma i

duïxügü nüxü ídauxüwa. <sup>15</sup>Rü tümacaç naca ya yíxema ngéma chopetüxe, rü ñanagürü: <sup>16-17</sup>“Pa Ngextüxcügü i Tauxta Ngeäxü Cuaxgüxü irü ngíxã chauchiüwa taxí! Rü ngéma dexá i naxçaç ingíxü rü narüchixmae rü ngéma paü i cúacu ingóxü rü nachix”, ñanagürü tüxü ya yíxema tama ixüäëgüxe. <sup>18</sup>Natürü i tümagü rü tama nüxü tacuaxgü nax yuwa taxíxü ga guxema tüxna naxugüxe.

.....

**Nacüma i mexüchiga rü  
nacüma i chixexüchiga**

**12** <sup>16</sup>Rü wüxi i duïxü i tama naäxëxü cuáxü rü nanuächiwaxe. Natürü ngéma duïxü i naäxëxü cuáxü rü nüxü nanataxuraxümare ega woo texé nangaxgu. <sup>17</sup>Rü yimá yatü ya íxaixcümacü rü ore i aixcümaxü nixu. Natürü ngéma duïxü i dorataxáxü rü doraxü nixu. <sup>18</sup>Rü nangexma i duïxü i norü dexamaxá tüxü chixexëxü, natürü ngéma duïxü i aixcüma nüxü cuáxü rü norü dexamaxá tüxü nataäxëxë.

.....

<sup>22</sup>Rü nüma ya Cori ya Tupana rü nüxü nawaxtümüxü i ngéma idorataaxgüxü. Natürü tümamaxá nataäxë ya yíxema aixcümaxü ixugüxe.

.....

<sup>25</sup>Rü ngéma íxächíäxë rü yatüxü narümaächixëxë. Natürü ngéma ore i mexü rü nanataäxëxë.

.....

<sup>28</sup>Rü ngéma mexü i nacümagü rü maxüwa tüxü naga. Natürü ngéma chixexü i nacümagü rü yuwa tüxü naga.

**Ngéma nüxü cuáxüarü ucuxë rü name**

**13** <sup>1</sup>Rü wüxi i nane i naäxëxü cuáxü rü mea nanatüarü ucuxë nayaxu. Natürü ngéma tama íxínüchaüxü rü nüxü naxo i ngéma ucuxë i mexü.

.....

<sup>18</sup>Rü texé ya nüxü oxe i ucuxë i mexü rü tagutáma cuaxwa tangu rü duïxügü rü chixri tá tümachiga nidexagü rü tangearü ngëmaxüäx. Natürü yíxema naga ínixe i ucuxë i mexü rü duïxügü rü tá mea tümachiga nidexagü. <sup>19</sup>Rü ngëxguma texé taxacü tüxü ngüchaügu rü tanayaxuxgu i ngéma nagu tarüxínüxü, rü tüxü rü wüxi i taäxë nixí. Natürü ngéma duïxügü i naechitamare maxëxü rü taxucürüwa nüxna nixígachi i ngéma chixexü i naxügüxü. <sup>20</sup>Rü ngëxguma duïxügü i nüxü cuáxümaxá cuxãmücügu rü naxütawa tá cunayaxu i cuax. Natürü ngëxguma ngéma duïxügü i naechitamare maxëxümaxá cuxãmücügu rü naxrüxü tá icuyarütaxu.

.....

<sup>24</sup>Rü texé ya tama tümanexü ucuxëxe rü tama nüxü tangechaü. Natürü yíxema nüxü ngechaxüxe rü tayanawëxächixëxë. <sup>25</sup>Rü yimá yatü ya aixcüma mexügu rüxínücü rü guxüguma nüxü nangexma i taxacü nax nangóxü. Natürü ngéma duïxü i chixexügu rüxínüxü rü nüxü nataxu i norü öna.

.....

**Duïxügü i naäxëxü ícuáxü rü  
duïxügü i naechitamare maxëxü**

**15** <sup>1</sup>Rü ngéma ngäxüga i memarexü rü nu inarüxoxëxë. Natürü ngéma ngäxüga i nuäcü íxíxü

rü nanayexeraxêxê i ngêma nu. <sup>2</sup>Rü ngêma duũxũgü i naãxêxũ icuáxũq̄xwa rü ínaxũxü i mexũ i ore i cuq̄x nawa iyaxuxũ. Natürü ngêma duũxũgü i naechitamare maxêxũq̄xwa rü ínaxũxü i dexe i chixexũ. <sup>3</sup>Rü nüma ya Cori ya Tupana rü guxãxũma nadau erü guxũwama nangexma rü tüxũ nangugü ya yíxema mea maxêxe rü nanangugü ta i ngêma chixri maxêxũ.

.....

<sup>8</sup>Rü nüma ya Cori ya Tupana rü tama nanayaxu i norü ãmare i ngêma duũxũgü i chixexũ ügüxũ. Natürü taãxêácü nanayaxu i túmaarü yumüxê ya yíxema aixcúma mea maxêxe. <sup>9</sup>Rü nüma ya Cori ya Tupana rü tama nacümamaxã nataãxê i ngêma duũxũgü i chixexũ ügüxũ, natürü tüxũ nangechaũ ya yíxema mea napexewa maxũxe. <sup>10</sup>Rü yíxema nüxũ rüxoxe nax nagu tixũxü i ngêma mexũ i nacüma rü Tupana rü poraãcü tá tüxũ inayarüwexãchixêxê. Rü yíxema tama nayaxúxe i ucuxê i mexũ rü tá tayu.

.....

<sup>16</sup>Ngêma muarü ngêmaxũq̄xgüxũ rü guxchaxũgu ínamaxũ naxçax i norü ngêmaxũgü. Rü ngêmacax i yixema rü narümemaie i namaxã tataãxê i ngêma noxre i tórü ngêmaxũgü i tüxũ ngêxmaxũ rü Tupanaga taxĩnüe.

.....

<sup>29</sup>Rü nüma ya Cori ya Tupana rü nüxna nixügachi i ngêma chixexũ ügüxũ. Natürü tüxũ nüxũ naxĩnü i túmaarü yumüxê ya yíxema aixcúma mexũ ügüxe.

.....

**Tupanaarü ínü rü  
yatügüarü ínüétüwa nangexma**

**16** <sup>1</sup>Rü wüxichigü ya yatü rü nagu narüxĩnü nax taxacü naxüxchaũxũ, natürü Tupana nixĩ ya nüxũ cuácü nax ñuxácü tá ínganguxichixĩ i ngêma yatü nagu rüxĩnüxũ. <sup>2</sup>Rü wüxichigü ya yatü rü naxçax name i guxũma i ngêma naxüxũ, natürü Cori ya Tupana nixĩ ya nangugücü i ngêma norü ínügü ya yimá yatü. <sup>3</sup>Rü ngêma cuxüxchaũxũ irü Cori ya Tupanamexêgu naxú! Rü ngêmaãcü i ngêma nagu curüxĩnüxũ rü tá mea cuxú ínganguxuchi.

.....

<sup>9</sup>Rü name nixĩ i meama nagu tarüxĩnüe i taxacü tá taxü. Rü ñuxüchi tanaxwaxe i Tupanamexêgu tanaxú nax nüma namaxã inacuáxũçax.

.....

<sup>18</sup>Rü ngêma nax yigü icuaxũüügüxũgagu rü guxchaxũgu tayi. Rü ngêma nax inuexũgagu rü chixexũgu tayi. <sup>19</sup>Rü tama name nax ngêma diëruãxgüxũ i nügü icuaxũüügüxũrũxũ yigü tixĩgüxêxê. Rü narümemaie nixĩ i ngêma ngearü diëruãxgüxũ i tama nügü icuaxũüügüxũrũxũ yigü tixĩgüxêxê. <sup>20</sup>Rü Tupana tüxũ narüngüxêxê ya yíxema naga ínüexe. Rü nataãxê ya yimá yatü ya Cori ya Tupanagu yoxöcü.

.....

<sup>25</sup>Rü nangema i nacümagü i duũxũgüçax mexũ, natürü ngêma nawa tüxũ nagagüxũ rü yu nixĩ.

.....

<sup>33</sup>Rü nüma ya yatü rü nümatama nagu naxĩnüxũãcüma nanaxü i ngêma naxüxchaũxũ. Natürü ngêma Cori ya



Tupana naxwaxexũãcü tá nixĩ i  
ínanguxuchixũ i guxũma.

**Ínügü i Tupanapexewa mea iwéxũ**

**17** <sup>1</sup>Rü taxuwama name i guxũ i  
ngunexũgu taxũ i ðna  
nangõxgũxũ ega nueãcüma nügũmaxã  
namaxëgu i ngëma duũxũgü. Rü  
narümemaie nixĩ i nügü  
nangechaũgũãcüma íxraxũ i ðna  
nügũmaxã nangõxgü.

.....

<sup>5</sup>Rü texé ya yíxema ngearü  
diëruáxexũ cugũxe, rü Tupana ya tüxũ  
ngoxëëcüpexewa chixexũ taxũ. Rü  
yíxema taãxëxe ega ngëxguma  
guxchaxũ tüxũ üpetügu ya yíxema  
ngearü diëruáxe, rü tá tapoxcu.

.....

<sup>9</sup>Rü ngëxguma texé tümamüciãxũ  
nüxũ rüngũmagu i ngëma guxchaxũ i  
naxüxũ, rü nüxũ tangechaũ. Natürü texé  
ya nagu rüxĩnüechaxe i ngëma chixexũ i  
togü tümamaxã üxũ rü aigu tarüxĩnü, rü  
tümamüci tügiina taxígachixëxë.

.....

<sup>17</sup>Rü ngëma aixcüma tamüci ixĩxũ, rü  
guxũguma tüxũ nangechaũ. Rü  
ngëxguma guxchaxũ taxçax ínguxgu rü  
ñoma wüxi i taenexëxũchirüxũ nixĩ.

.....

<sup>27</sup>Rü yíxema çax tüxũ ngëxmaxe rü  
nanoxre i tümaarü dexa. Rü yíxema  
tümaãëxũ cuáxe rü tangeçxmare rü  
yaxna tümamüciãmaxã taxĩnü.

.....

**18** <sup>8</sup>Rü ngëma oregütax rü ñoma  
wüxi i maixcuraxürüxũ nixĩ, rü  
tauxchaãcü duũxũgüarü maxũwa nixücu.

.....

<sup>21</sup>Rü yimá torü conü nüxũ ixuxũ i  
oregagu nixĩ nax imaxëxũ rüexna  
iyuexũ. Rü yíxema idexaxüchixe rü  
tümaarü oregagu ngúxũ tinge. <sup>22</sup>Rü  
ngëma nax wüxi ya ngecü icuyangauxũ  
cuxmaxruxũ rü ngëma rü guxũarü  
yexera rümemaexũ nixĩ i nüxũ  
cuyangauxũ. Rü ngëmawa nüxũ cucuçax  
nax Tupana cuxũ rüngüxëxũ.

.....

**19** <sup>11</sup>Rü wüxi i duũxũ i naãxëxũ  
cuáxũ rü yaxna namaxã naxĩnü  
ega texé namaxã nuxgu. Rü norü  
meruxũ nixĩ nax nüxũ iyanangũmaxũ i  
ngëma guxchaxũ.

.....

<sup>14</sup>Rü tórü papá rü tórü mamáxütawa  
tanayaxu ya ípata rü ngëmaxũgü,  
natürü Tupanaxütawa ngĩxũ tayaxu i  
taxmçax i aixcüma ngĩãxëxũ çuçxcü.

.....

<sup>18</sup>Rü nüxna nachogü ya cune ñomarüta  
cuxũ natauxcha nax cunawëxãchixëxũ!  
Natürü ngëma nax cunawëxãchixëxũ rü  
tama name nax cuyamçxüchixũ.

.....

**Ngëma ngúxũ i nacuchixü  
rü duũxũgüxũ nanuexëxë**

**20** <sup>1</sup>Rü ngëma ngúxũ i nacuchixü  
rü duũxũgüxũ nuxica  
naxuegaxëxë. Rü ngëma ngúxũ i  
axchixügü rü duũxũgüxũ nanuexëxë. Rü  
ngëxguma nangãxegu rü taxüema  
tümaãëxũ tacuáãcüma tidexa.

.....

<sup>3</sup>Rü wüxi ya yatü ya naãxëxũ cuácü rü  
tama nachoxũgawaxe. Natürü ngëma yatü  
i tama naãxëxũ cuáxũ rü nucçax nadau.

.....

<sup>9</sup>Rü taxucürüwa texé tügü tixu rü ñatarügü: “Chorü maxü rü name rü changearü pecáduãx”, ñatagürü.  
.....

<sup>19</sup>Rü ngēma oregütaxáxü rü tama namaxā nanguxü i ngēma guxchaxü i tama mexü nax guxā nüxü cuáxü. Rü ngēmacax tama name i namaxā cuxāmüci i ngēma oregütaxáxü.  
.....

<sup>24</sup>Rü nüma ya Cori ya Tupana nixi i tamaxā inacúaxü. Rü taxúema nüxü tacuax nax taxacü tá tüxü ngupetüxü.  
.....

**Tupanapexewa rü nawüxigu i ngēma diēruáxü rü ngēma ngearü diēruáxü**

**22** <sup>2</sup>Rü ngēma muarü diēruáxü rü ngēma ngearü diēruáxü rü nawüxigu i Cori ya Tupanapexewa erü ngēma taxre rü nüma nanaxü.  
.....

<sup>5</sup>Rü ngēma nama i ngēma duüxügü i chixri maxēxü nagu ixü rü äücümáxümaxā nanapá. Natürü ya yíxema tümaarü maxüna dáuxe rü tama ngēmagu tangu. <sup>6</sup>Rü nabuxgutama mexü i nacüma nanguxēxē ya bucü, rü ngēxguma nayaxgu rü tagutáma nüxü inarüngüma.  
.....

<sup>9</sup>Rü yimá yatü ya mecümacü rü Tupana rü mexü tá namaxā naxuegu erü yíxema ngearü diēruáxgüxemaxā nangau i norü ñna. <sup>10</sup>Rü ngēxguma noxtacüma cuyamugachigu i ngēma tama ixinüchaüxü, rü marü nataxutáma i nu i duüxügütanüwa, rü tá inayarüxo nax nügüna nangaexü rü nügümáxā naguxchigagüxü. <sup>11</sup>Rü nüma ya äēxgacü

rü tümamaxā nataãxē ya yíxema ixaixcümáguixe. Rü tümamaxā naxámüci ya yíxema mexü i oremaxā idexáguixe. <sup>12</sup>Rü nüma ya Cori ya Tupana rü nüxna nadau i ngēma duüxü i naãxēxü icuáxü natürü inayanaxoxēxē i ngēma idorataxáxü nüxü ixuxü i ore.  
.....

<sup>22-23</sup>Rü tama name i chixri namaxā icucuax i ngēma ngearü diēruáxü i taxucürüwa nügüetüwa idexaxü. Rü tama name i äēxgacüxütawa ícunaxuáxü i ngēma tama nüxü cuáxü nax nügüetüwa yadexaxü. Erü nüma ya Cori ya Tupana rü norü poxüruxü nixi rü tá cuxü napoxcu. <sup>24-25</sup><sup>1</sup>Rü taxü i namaxā cuxāmüciüxü i ngēma duüxügü i newaxexü rü chixecümáxü! Erü ngürüächi tá nacümacax cudauxütai rü ngēmaäcü äücümáxüwa tá cugü cungexmaxēxē.  
.....

**Tama name i texé tügütama ticuaxüxü**

**27** <sup>1</sup>iRü taxü i cugü quicuaxüüxü naxçax i ngēma moxü cuxüxchaüxü! Erü tama nüxü cucuax i taxacü tá cuxü ngupetüxü i moxüarü ngunexügu. <sup>2</sup>Rü tama name i cugütama quicuaxüxü. Rü narümemaie i togu cuxü nicuaxüxügü.  
.....

<sup>15</sup>Rü ngēma ngexü i nuxwaxexü rü oregütaxáxü rü ñoma wexweanexü i tama íyachaxächixürüxü nixi nax tama ínayachaxächixü i norü dexawa. <sup>16</sup>Rü taxucürüwa nüxü nüxü tarüxoxēxē i nacüma i chixexü, erü ñoma buanecü ya taxucürüwa íyachaxächixēecürüxü nixi. Rü ñoma chíxü i ächixüxü i

taxucürüwama taxmexwa  
ingemaxẽxũrũxũ nixĩ.

.....

**Mexũ tayaxu ega mea imaxẽgu**

**28** <sup>1</sup>Rũ ngẽma chixexũ üxũ rü niña ega woo taxúema nawe ngẽchigügu. Natürü ngẽma aixcúma mexũ rü ñoma wüxi i airixũ taxucaxma namuũ. <sup>2</sup>Rũ ngẽxguma wüxi i nachixũanearü ãẽxgacü chixri norü duũxũgümaxã icuaxgu, rü ngẽma norü duũxũgü rü nanue. Rũ ngẽmacax ngẽma norü ãẽxgacüxũ ñnataxüchigü rü toxũ naxunetagu. Natürü ngẽma ãẽxgacü i aixcúma mexũ i mea norü duũxũgümaxã icuaxũ rü norü duũxũgü rü namaxã nataãxẽgü.

.....

<sup>9</sup>Rũ yíxema tama naga ñnüchaxũxe i Tupanaarü mugü, rü nüma ya Tupana rü taxütãma tüxũ nüxũ naxĩnũ i tümaarü yumüxẽ. <sup>10</sup>Rũ ngẽma duũxũ i chixexũwa tüxũ gagüxũ ya yíxema mexũgu rüxĩnüxe, rü norü guxchaxũgu tátama nangu. Natürü ngẽma yatügu i Tupanapexewa mea rümaxũãxgüxũ, rü mexũ tá nayauxgü.

.....

<sup>13</sup>Rũ ngẽma duũxũ i norü pecádu icúxũ rü taxütãma mexũ nüxũ naxüpetü. Natürü ngẽma duũxũ i nüxũ ixuxũ i norü pecádu rü nüxũ rüxoxũ, rü Tupana rü tá nüxũ nüxũ ñnayarüngüma.

.....

<sup>23</sup>Rũ ngẽma duũxũ i tüxũ icuaxüüxũarü yexera mexũ tamaxã naxü i ngẽma duũxũ i tüxũ ixuxũ ega nüxcüra mea nagu rüxĩnügu.

.....

**Nataãxẽ i ngẽma duũxũgü i  
Tupanaarü mugügu imaxẽxũ**

**29** <sup>1</sup>Rũ yíxema tama nayaxúxe i ucuxẽ rü paxa tá chixexũgu tangu rü marü tataxutãma nax texé tüxũ rüngüxẽxũ.

.....

<sup>18</sup>Rũ ngextã duũxũgü tama Tupanaga ñnaxĩnüexũwa rü taxuxũma mea inixũ. Natürü ngẽma duũxũgü i aixcúma Tupanaga ñnüexũ rü nataãxẽgü.

.....

<sup>25</sup>Rũ ngẽma nax yatügugamare ixĩnüexũ rü wüxi i ãücúmaxũ nixĩ. Natürü ngẽma nax Tupanaga ixĩnüexũ rü ngẽmawaxi nixĩ i aixcúma mexũ.

.....

**Agúruarü ucuxẽgü**

**30** <sup>1</sup>Rũ nüma ga Agúru rü Yáque ga Machácüãx nane nixĩ. Rũ ñaa nixĩ ga Agúruarü ore ga Itíexmaxã rü Ucámaxã nüxũ yaxuxũ. <sup>2</sup>Rũ norü orewa rü ñnagiürü: “Rü choma rü taxuxũma chacuax natanüwa i ñaa duũxũgü. Rü chowa rü nataxuma i duũxũgüarü cuax. <sup>3</sup>Rũ ngẽxguma tama nüxũ chacuaxgu i ngẽma duũxũgüarü cuax ¿rü ñnüxãcü tá nüxũ chacuax nax ñnüxãcü yixĩxũ ya Tupana ya üünecü? <sup>4</sup>¿Rü texé tixĩ ya yíxema marü daxüxgüxũ i naanegu ñnagüxe rü ngẽma írüxixe? ¿Rü texé tügümexẽgu tayayauxema ya buanecü? ¿Rü texé tümachirugu tananuquepüüchixü i taxũ i taxtü? ¿Rü texé tanaxü ga ñoma ga naane, rü nüxũ tixu nax ngexta yacuáxũ? ¿Rü tama ãxna Tupana yixĩxũ ga naxücü? Rü ngẽxguma nangexmagu i to ¿rü taxacü yixĩxũ i naéga rü naneéga ega nüxũ

cucuaḡgu? <sup>5</sup>Rü nüma ya Cori ya Tupana rü tüxǘ ñapoxǘ ya yíxemagü nagu yaxöḡgüxe. Rü guxǘma i norü uneta i tamaxã nüxǘ yaxuxǘ rü aixcüma nixí rü name nax yaxöxǘ. <sup>6</sup>Rü tama name i cunaxüétü i ngëma Tupanaarü ore i nüxǘ yaxuxǘ. Erü ngëxguma cunaxüétügu rü nüma rü tá cuxǘ nanga rü ngëmaäcü tá dorataḡaxǘ cuxǘ nixíxëxë. <sup>7</sup>Pa Tupanax, rü taxre i ngǘxëëxicatama nixí i cuxna naxçax chacaxǘ. iRü choxna naxã i ngëma taxre naxǘpa nax chayuxǘ! <sup>8</sup>iRü choxǘ rüngǘxëxë nax tagutáma chidoraxǘçax rü tama texéxǘ chawomǘxëëxǘçax! Rü tama chanaxwaxe nax chamuarü diëruáxǘ rüexna changearü diëruáxǘ. iRü ëcü choxna naxã i ngëma nagu mexǘ nax choxǘ nangexmaxǘçax i wüxichigü i ngunexǘarü òna! <sup>9</sup>Erü ngëxguma chi chamuarü diëruáḡgu rü íyaxüḡgu rü ngürüächi ngëmagagu chi cuxǘ icharüngüma. Rü ngëxguma chi changearü diëruáḡgu rü ngürüächi changíx rü ngëmagagu chi chixri cuchiga nidexagü i duǘxügǘ”, ñanagürü.

.....

Ngǘxǘ nicuaxǘxǘ i ngëma nge i mecü

**31** <sup>10</sup>Rü tama natauxcha nax ngíxǘ iyarüngaǘxǘ i wüxi i nge i

aixcüma ngǘxëxǘ cuaxcü. Rü ngüma rü ñoma ntugǘ ya ngaxãëruǘarü yexera iyixí nax namexechixǘ. <sup>11</sup>Rü ngíte rü aixcümmama ngíxna narüyoe. Rü ngüma rü nüxǘ irüngǘxëë nax ngëmaäcü taxuxǘma nüxǘ taxuxǘçax. <sup>12</sup>Rü ngüma rü guxǘ i ngunexǘgu nax namaxǘyǘ ya ngíte rü inataḡxëxëxë.

.....

<sup>20</sup>Rü ngüma rü guxǘguma taḡacǘ tüxna ixã ya yíxema ingearü diëruáḡgüxe rü yíxema taḡacǘ tüxǘ taxúxe.

.....

<sup>25</sup>Rü ngüma rü wüxi i nge i poraãëcü rü mecü iyixí, rü tama naxçax ixoegaãxë i moxǘarü ngunexǘ.

.....

<sup>28</sup>Rü ngëma ngíxacügǘ rü ngíte rü ngíxǘ nicuaxǘxügǘ rü ñanagürügǘ: <sup>29</sup>“Rü imuxüchi i nge i mecümacü, natürü i cumax rü guxcüma i ngecügǘ curümeccümmae”, ñanagürügǘ. <sup>30</sup>Rü ngëma ngürü pa i wüxi i nge rü paxaächimare nixí rü ngëma ngürü mechametü rü ta ningupetüchigǘ. Natürü ngëma nge i Tupanaga ñüücü rü name nax ngíxǘ icuaxǘüḡgǘxǘ.

.....

# ECLESIASTÉS

## (Nguxětaeruŭarü ore)

**Guxŭma i ngúchaŭ rü  
natüçaxmamare nixĩ**

**1** <sup>1-2</sup>Rü ñaa nixĩ i norü ore ga nüxŭ yaxuxŭ ga guma orearu uruxŭ ga Dabĩ nane ga Yerucharéŭwa ãëxgacü ixĩcü: “Rü guxŭma i ngëmaxŭgü rü natüçaxmamare nixĩ, rü guxŭma rü nayacuax. <sup>3</sup>¿Rü taxacürü mexŭ nayaxu ya wüxi ya yatü nawa nax poraäcü napuracüxŭ i ñoma i naanewa? <sup>4</sup>Rü duŭxŭgü rü nibuetanü rü togü rü niyuetanü, natürü ñoma i naane rü nanaxaxrügumaraxŭmare.

.....

**Orearü uruŭxŭ ngupetüxŭchiga**

<sup>13</sup>Nagu charüxĩnü rü ngugüxŭ icharüxãŭx. Rü naxçax changux i guxŭma i ñoma i naanewa ixixŭ. Rü taxŭ i guxchaxŭ nixĩ i yatügüétü naxŭnagüxŭ ya Tupana nax ngëmatüŭwa nangexmagüxŭçax. <sup>14</sup>Erü guxŭma i taxacü ixixŭ i ñoma i naanewa rü wüxi i natüçaxmamare nixĩ erü ñoma wüxi ya buanecü ya taxacürüwama texé yayauxemacürüxŭ nixĩ.

.....

<sup>16-17</sup>Rü yexguma rü chaugünatama chaca rü ñachagürü: ‘Ñuxmax rü duŭxŭgü rü nüxŭ nixugü nax choma rü nüxŭ chacuaxüchixŭ norü yexera ga yema nüxıra ãëxgacügü ixigüxŭ ga Yerucharéŭwa. Yerü chaugü ichaxã nax naxçax chadauxŭ nax cuax choxŭ yexmaxŭ nax nüxŭ chacuaxŭçax i taxacü nixĩ i aixcüma mexŭ rü taxacü nixĩ i natüçaxmamare ixixŭ.’ Natürü nüxŭ chicuaxãchi rü guxŭma i ngëma nagu charüxĩnüxŭ rü ñoma buanecüxŭ yayauxchaücürüŭmare nixĩ. <sup>18</sup>Rü ngëxguma yexera nüxŭ icuaxgux, rü yexera tachixeãxë. Rü ngëxguma yexeraxŭ i cuax tüxŭ ngëxmagux, rü yexera ngüxŭ tinge.”

**Ngëma ngúchaŭ rü ngëma cuax rü ñnü i  
natüçaxmamare ixigüxŭ nixĩ**

**2** <sup>1</sup>“Rü chaugümamaxã ñachagürü: ‘Ñuxma rü tá nüxŭ chaxü i ngëma duŭxŭgü nagu maxëxŭ rü namaxã nataãxëgüxŭ, rü chaugüxŭ tá chanadetaquexe i muxŭma i ngëmaxŭgü.’ Natürü woo i ngëma ñnü rü natüçaxmamare nixĩ. <sup>2</sup>Rü ngëmawa

nüxü chacuax i ngēma cugü rü wüxi i natüçaxmamare yixüü, rü ngēma chaxunearü ngüchaüügü rü taxuwama namexü. <sup>3</sup>Rü chauäxēwa nagu charüxinü rü tá nüxü chaxü ya yima bínu ya ngüchiaciáru pora. Rü namaxä chaugü changäxēxē nax ngēmaäcü nüxü chacuáxüçax rü name nax ngēma naxüü ya yatü nagu i ngēma ngunexüügü i ñoma i naanewa nax namaxüü. <sup>4</sup>Rü taxü ga puracü chaxü. Rü íchanaxüü ga äëxgacüpata ga taxüchine rü mexechine. Rü choxrütama úbanecü choxü nayexma. <sup>5</sup>Rü choma íchanato ga nanetügü rü chorü putüranecügü. Rü yexma chanatogü ga naguxüraxüü i nanetü i orüxnaxçax. <sup>6</sup>Rü puchu íchaxüxüxēxē nax yema dexámaxä yamegüxüçax ga yema nanetügü ga chatogüxēxē. <sup>7</sup>Rü duüxügü ga puracütanüxüruxü ga yatüxü rü ngexü rü naxçax chataxe. Rü choxü nayexma ta ga togü ga chorü duüxügü ga chauchiügutama buexü. Rü yexgumarüxü ta rü yema Yerucharéüwa nüxíra äëxgacü ixügüxüaru yexera choxü nayexma ga wocagü rü carnérugü. <sup>8</sup>Rü choxü nayexma ga muxüma ga úiru rü díerümü ga togü ga nachixüanegüaru äëxgacügüxütawa rü chorü íanegüwa chayaxuxü. Rü choxü nayexma ga duüxügü ga iyatüxü rü ngexü ga chäuxçax wiyægüxü. Rü chorü ngüchaü chaxü rü choxü nayexma ga ngexügü ga namaxä chamaxmarexü. <sup>9</sup>Rü yemaacü nata ga chauchiga. Rü guxüma ga yema nüxíra Yerucharéüwa äëxgacü ixügüxüaru yexera choxü nayexma. Rü woo yemaacü nixü natürü taguma choxna nixügachi ga cuax. <sup>10</sup>Rü guxüma

ga yema choxü ngüchaüxü rü chanaxü. Rü taguma chaugüna chanachüxu ga taxacürü taäxē. Rü guxüma ga chorü puracümaxä chataäxē. Rü yema taäxē nixü ga chorü natanü ga yema chaxüü. <sup>11</sup>Rü yemawena rü chanangugü ga guxüma ga yema chaxüü rü yema puracü ga guxchaxäcü chaxüü. Rü yemawa nüxü chacuax ga natüçaxmamare nax yixüü ga yema rü ñoma buanecü ya yauxemachaüctürüümare nixü. Rü taxüüma i taxacü i mexü yixüü i ngēma ñoma i naanewa ngëxmaxü. <sup>12</sup>Rü yemawena rü meama nagu charüxinü rü nügümaxä chanangu i ngēma cuax rü ngēma natüçaxmamare ixüü. ¿Rü taxacü i to i puracü tá naxü i ngēma chowena äëxgacü ixüü? ¿Rü ëxna ngēma marü üxütátama naxüü? <sup>13</sup>Rü ñuxma rü nüxü chacuax rü ngēma taäxēxü nax icuáxü rü nüxü narümemae i ngēma nax taechitamare imaxüü, ngëxgumarüxü i ngēma ngóonexü rü ngēma éanexüxü nax namemaexü. <sup>14</sup>Rü ngēma duüxü i naäxëxü cuáxü rü mea nanangugü ega taxacü naxüxgu, natürü ngēma naechitamare maxüü rü tama aixcüma mea nagu naxüüäcüma taxacü naxü. Natürü chanangugü i ngēma naäxëxü cuáxü rü ngēma naechitamare maxüü rü ngëmatátama nixü i norü gux. <sup>15</sup>Rü chaugümaxä ñachagürü: 'Ngēma naechitamare maxüxüüütátama chayü i chomax. ¿Rü taxacüwa choxü namexü i guxüma i ngēma chorü cuax? Rü ngēma rü ta rü natüçaxmamare nixü. <sup>16</sup>Erü tagutáma texé nüxna tachuaxächi i ngēma duüxü i cuax nüxü ngëxmaxü rü ngēma duüxü i

naechitamare maxũxũ. Rũ ngẽxguma nangupetũxgu i ngunexũgũ rũ guxũxũ tarũngũma, rũ ngẽma nũxũ cuáxũ rũ ngẽma naechitamare maxũxũ rũ ta nayue.’

.....

<sup>20</sup>Rũ ngẽxguma nũxna chacuaxáchigu ga yema chaxũxũ ga ñoma ga naanewa, rũ chaugũmaxã chixauxáchi nax yemaacũ poraãcũ chapuracũxũ. <sup>21</sup>Erũ ngẽxguma texé ya nũxũ cuáxe rũ taxuããcũma mea puracũxe nax tangemaxũáxũcax rũ natũcaxmamare tapuracũ, erũ guxũma i ngẽma tayaxuxũ i tũmaarũ puracũwa rũ togũ i tama naxcax ixõõxẽxũarũ tá nixĩ. Rũ ngẽmaãcũ i tũmaarũ puracũ rũ natũcaxmamare nixĩ erũ tũmaarũ ngẽmaxũgũ rũ togũarũ tá nixĩ. <sup>22</sup>¿Rũ taxacũwa nũxũ namexũ ya yatũ nax poraãcũ napuracũxũ rũ naxcax naxoegaãẽxũ i ñoma i naanewa? <sup>23</sup>Rũ guxũguma i ñoma i naanewa nax namaxũxũ rũ ngũxũ ninge, rũ nachixeãxẽ. Chũtacũ rũ taguma narũngũ i naãxẽ. Ngẽma rũ ta wũxi i ñnũ i natũcaxmamare ixĩxũ nixĩ. <sup>24</sup>Rũ ngẽma rũmemaxũ nũxũ ya yimá yatũ nixĩ nax nachibũxũ rũ naxaxexũ rũ nangõõxũ i ngẽma norũ puracũtanũ. Erũ guxũma i ngẽma rũ ta Tupanawa ne naxũ. <sup>25</sup>¿Rũ texé ẽxna tachibũ rũ ẽxna tataãxẽ ega taxũchima Tupanagagu yixĩxgu? <sup>26</sup>Rũ aixcũma nixĩ i Tupana tũmaãẽxũ tũxũ cuaxẽẽxũ rũ tũxna naxããxũ i cuax rũ taãxẽ ya yixema tũmamaxã nataãxẽxe. Natürũ yixema chixexũarũ ùruxũ ixĩxe, rũ nũma ya Tupana rũ tũxũ nayixerũ nax tũgũ tamuarũ ngẽmaxũgũãxẽẽxũ, natürũ

yixcũama ya Tupana rũ tũxna nanade i tũmaarũ ngẽmaxũgũ nax yixema tũmamaxã nataãxẽxena naxããxũcax. Rũ yixema chixexũ úxe rũ guxũma i ngẽma tayaxuxũ rũ natũcaxmamare nixĩ erũ tũmaarũ ngẽmaxũgũ rũ ñoma buanecũ ya yaxemachaũcürũxũ nixĩ.”

**Guxũma i taxacũ i ngẽmaxũ rũ nũxũ nangexma i norũ ngunexũ nax nawa nanguxũ**

**3** <sup>1</sup>Rũ ñoma i naanewa rũ guxũma i taxacũ i ngẽmaxũ rũ nawa nangu i norũ ngunexũ, rũ nangexma i wũxi i ora i tá nagu ñanguxũ. <sup>2</sup>Rũ nangexma i ngunexũ i nagu ibuxũ, rũ nangexma i ngunexũ i nagu iyuxũ. Rũ nangexma i ngunexũ i nagu itoexũ, rũ nangexma i ngunexũ i nagu nabéxũ i ngẽma itoxũ. <sup>3</sup>Rũ nangexma i ngunexũ i nagu namáetagũxũ, rũ ngunexũ i nagu tũxũ yaxũxũxũgũxũ. Rũ nangexma i ngunexũ i nagu napogũexũ, rũ ngunexũ i nagu naxũpatagũxũ. <sup>4</sup>Rũ nangexma i ngunexũ i nagu ixaxuxũ, rũ ngunexũ i nagu icugũexũ. Rũ nangexma i ngunexũ i nagu iyutanũxũ, rũ ngunexũ i nagu ipetaexũ. <sup>5</sup>Rũ nangexma i ngunexũ i nagu nutamaxã nagũanexũ, rũ ngunexũ i nagu nuta nadexũ. Rũ nangexma i ngunexũ i nagu yigũna ñaĩxãchigũxũ, rũ ngunexũ i nagu yigũna toxnamana ixĩxũ. <sup>6</sup>Rũ nangexma i ngunexũ i nagu taxacũcax idauxũ, rũ ngunexũ i nagu irũchaxãchixũ nax taxacũcax idauxũ. Rũ nangexma i ngunexũ i nagu namaxã inguxũxũ i ngẽmaxũgũ, rũ ngunexũ i nagu ñawogũxũ. <sup>7</sup>Rũ nangexma i ngunexũ i nagu naxchirugu igáugũxũ, rũ ngunexũ i nagu nangaĩxtaxũ. Rũ

nanxexma i ngunexũ i nagu  
iyarũchianegũxũ, rũ ngunexũ i nagu  
idexagũxũ. <sup>8</sup>Rũ nanxexma i ngunexũ i  
nagu yigũ ingechaũgũxũ, rũ ngunexũ i  
nagu yigũchi ixaieũ. Rũ nanxexma i  
ngunexũ i nagu yigũ idaixũ, rũ ngunexũ  
i nagu yigũmaxã rũngũxmũexũ. <sup>9</sup>¿Rũ  
taxacũwa nũxũ namexũ ya yatũ nax  
puracũgũxicatama naxĩxũxũ? <sup>10</sup>Rũ mea  
nagu charũxĩnũ i ngẽma nagũxũraũxũ i  
puracũ i yatũgũna naxãxũ ya Tupana  
nax ngẽmagu inachoxũcax. <sup>11</sup>Rũ  
yexguma norũ ngunexũwa nanguxgu rũ  
Tupana nanaxũ ga guxũma. Rũ  
namexechi ga yema naxũxũ. Rũ ñuxũchi  
ga nũma ga Tupana rũ duũxũgũxũ nũgũ  
nacuaxẽxẽ woo i duũxũgũ rũ tama nawa  
nangugũ nax nũxũ nacuaxgũxũcax i  
guxũma i ngẽma Tupana marũ ùxũ, rũ  
ngẽma yixcũra tá naxũxũ. <sup>12-13</sup>Rũ ñuxma  
rũ nũxũ chacuax rũ ngẽma duũxũgũcax  
rũmemaexũ nixĩ nax nataãxẽxũ rũ mexũ  
naxũgũxũ. Rũ ngẽma nax nachibũexũ,  
rũ naxaxegũxũ, rũ nayauxgũãxũ i norũ  
puracũtanũ, rũ guxũma i ngẽma rũ  
name erũ Tupanawa nixĩ i ne naxũxũ.  
<sup>14</sup>Rũ ngẽxgumarũxũ ta nũxũ chacuax i  
guxũma i taxacũ i Tupana ùxũ rũ  
guxũgutãma nangexmaecha. Rũ  
taxucũrũwa tanaxũetũ i ngẽma Tupana  
ùxũ, rũ taxucũrũwa itanaxoxẽxẽ i ngẽma  
nũma naxũxũ. Rũ Tupana rũ ngẽmaãcũ  
nanaxũ nax guxãma nũxũ  
ngechaũgũxũcax. <sup>15</sup>Rũ woetama marũ  
nũxcũma nayexmagũ i ngẽma ñuxma  
ngẽxmagũxũ. Rũ taxuxũtãma yixcũra  
nangox i taxacũ i tama ñuxma  
ngẽxmaxũ. Rũ nũma ya Tupana rũ nũxũ  
natauxcha nax natãeguxẽãxũ ga yema  
marũ ngupetũxũ.

### Taxũ i chixexũ i ñoma i naanewa

<sup>16</sup>Rũ ngẽma to i nũxũ chadauxũ nixĩ  
nax nangexmaxũ i taxũ i chixexũ i ñoma  
i naanewa i ngextã chi ñnaxwaxexũwa  
nax mea nũgũmaxã inacuaaxgũxũ i  
duũxũgũ rũ mexũgu nũgũmaxã  
ñnaxĩnũexũ. <sup>17</sup>Rũ chaugũ ñncharũgũ:  
‘Nawa tá nangu i ngunexũ i nagu  
Tupana tá nũxna nacaxũ ya yimã yatũ  
ya mexũ ùcũ rũ ngẽma yatũ i chixexũ  
ùxũ. Erũ tá nangexma i norũ ngunexũ i  
nagu tá nangóxũ i ngẽma marũ  
ngupetũxũ rũ ngẽma cúãcũ ùxũ.’”

.....

### Natũcaxmamare nixĩ nax yigũ imuarũ diẽruãxẽxũ

**5** <sup>10</sup>“Rũ ngẽma duũxũ i diẽru nũxũ  
ngũchaũxũ rũ guxũguma yexeraxũ  
i diẽru nanaxwaxe. Rũ ngẽma norũ  
diẽruguma rũxĩnũxũ, rũ nũgũcax rũ  
taguma nũxũ ningu. Rũ ngẽma rũ ta rũ  
wũxi i ñnũ i natũcaxmamare nixĩ. <sup>11</sup>Erũ  
ngẽxguma yexera tũxũ nangexmagu rũ  
yexera tanaxaiyaxũ. ¿Rũ taxacũwa tũxũ  
name i ngẽma muxũ i diẽru nax nũxũ  
idawenũxũmaxãxicatama itaãxẽxũ?  
<sup>12</sup>Rũ yĩxema puracũxe rũ nangexma i  
ngunexũ i nagu ñraruwa tachibũxũ, rũ  
nangexma i ngunexũ i nagu mea  
tachibũxũ, natũrũ guxũguma mea tape.  
Natũrũ ngẽma diẽruãxũchixũ rũ norũ  
diẽrugagu taguma mea nape. <sup>13</sup>Rũ wũxi  
i nacũma i aixcũma ngechaũ tũxna  
ãxũxũ chadau i ñoma i naanewa. Rũ  
ngẽma nacũma nax imuarũ  
ngẽmaxũãxũ rũ norũ yorana tãtama  
guxchaxũ naxã. <sup>14</sup>Erũ ngẽxguma tama  
mea tũxũ ñnanguxuchigu ega taxacũcax



tataxegu, rü ngürüãchi ngëxma tá nagux i guxũma i tũmaarü diëru. Rü ngëxguma nangexmagu ya wüxi ya tũmane, rü taxuxũtãma naxçax ngëma tataç. <sup>15</sup>Rü yema taxuũma ga taxacũmaxã ñoma ga naanewa nax nanguxũ, rü ngëmaãcü tátama natáegu. Rü yema noxri nabuxgu rü nax nangexchiruxürüxü tátama nixĩ i ngëxguma nayuxgu. Rü taxuxũtãma ga yema norü puracũtãnuwa nayaxuxũ rü tá ninge.

.....

<sup>18</sup>Rü ngëmacax nagu charüxĩnũ rü ñuxma nax paxaãchi ñoma i naanewa Tupana tũxũ maxëxëxũ, rü ngëma rümemaexũ rü taãxë tũxna ãxũ nixĩ nax nangóxũ rü yaxaxũxü i ngëma tóru puracũtanü i ñoma i naanewa poraãcü naxçax ipuracũxũ. <sup>19</sup>Rü ngëxgumarüxũ ta ya guxãma ya yíxema Tupana muxũ i tũmaarü ngëmaxũgü tũxna ãxë, rü nüma ya Tupana tũxũ namu nax tanangóxũ rü tayaxaxũxü i ngëma tũxna üxũ. Erü ngëma nax tanangóxũ rü tayaxaxũxü rü Tupanawa ne naxü. <sup>20</sup>Rü ngëma nax Tupana tũxũ taãxëxëxũgagu rü tũma rü tama poraãcü naxçax taxoégaãxë nax nanuxũxü i tũmaarü maxũ i ñoma i naanewa.”

.....

**11** <sup>1</sup>“Rü name nixĩ i togüxü curüngüxëë, erü yixcũra i nümagü rü tá cuxü narüngüxëëgü.

.....

<sup>4</sup>Rü yíxema guxũguma buanecüxü ínanguxëxëxë nax nangupetüxü, rü tagutãma tãtoe. Rü yíxema guxũguma pucüxü ínanguxëxëxë nax

iyanaxoxũçax, rü tagutãma tanabuxu i tũmanetüarü o. <sup>5</sup>Rü ngëxgumarüxü nax tama nüxũ cucuáxũ nax ngextá naxüxü ya buanecü rü tama nüxũ cucuáxũ nax ñuxãcü tangóxũ ya wüxi ya buxe i tũmaéanuwa, rü ngëxgumarüxü ta tama nüxũ cucuax nax ñuxãcü taxacü naxüxü ya Tupana ya guxũarü üruxü ixĩcü. <sup>6</sup>Rü itoechigüama erü tama nüxũ cucuax nax ngexnerüne ya naxchire tá cuxü rüxüxü, rüxna guxüne tá rüxü.

.....

#### Ucuxëgü i ngextüxücügüçax ixixü

<sup>9</sup>iRü nataãxë Pa Ngextüxücüx, rü ñoma rü ta cupora! iRü nataãxë namaxã i ngëma cuxü mexü ñoma rü ta cuxü natauxcha! iRü naxü i ngëma nagu curüxĩnũxü, natürü nüxna nacuaxãchi nax guxũma i ngëma cuxüxüçax rü Tupana tá cuxna naxçax naca! <sup>10</sup>iRü cugü nüxü rüngümaxëxë ixoegaãëgü, rü cugüwa nüxü naxoox i guxchaxũgü! Erü ngëma mexechixü i ngunexũgü i nagu íngextüxüxü rü wüxi i paxaãchimarë nixĩ.”

.....

**12** <sup>1</sup>“Rü ñuxma nax cungextüxüxü, rü inũxna nacuaxãchi ya yimã Tupana ya cuxü ngoxëëcü rü ñoma rü ta taũta cuxçax ínangugü i ngunexũgü namaxã i norü guxchaxũgü! Erü tá cuxçax ínangugü ya taunecügü ya nagu ñacucü: ‘Rü taxuwama choxü name nax chamaxũxü’, ñacuxü. <sup>2</sup>iRü nüxna nacuaxãchi ya Tupana ya cuxü ngoxëëcü ñoma rü ta nabaxi ya üaxcü, rü tauemacü, rü ëntagü, rü naxũpa nax naxëãchianexü rü rapuxü! <sup>3</sup>Erü tá ínangu i ngunexũgü i nagu cuyaxü rü

cuxune rü tá niduxrux, rü guma  
 cuparagü ga poraene rü tá  
 nanaturaächitanü, rü noxretátama ya  
 cupüta ínayaxügü nax cuchibüxüçax, rü  
 taxütáma yáxügu cudau. <sup>4</sup>Rü ngëxguma  
 ngëma ngunexüğüwa nanguxgu rü  
 ngëma cuxmachixë rü taxütáma  
 taxacüxü naxínü, rü ngëma naga ya  
 yima iwichi rü cuxçax tá nixígachigü.  
 Rü ngëma werigü rü tá naxae natürü  
 taxütáma nüxü cuxínü. <sup>5</sup>Rü daxü nax  
 cuxixü rü tá cumuü, rü cumaxüwa rü tá  
 cuxü naxäücüma. Rü wüxi i yaxguax i  
 puxeruxü rü turaxü, rü nügü itúmarexü  
 tá quixi. Rü cuxmaççax rü nataxutáma i

curü ngúchaü rü taxuwatáma cume. Rü  
 ngëma nax yuwa cuxüxü rü ïanearü  
 namawa rü tá nüxü taxínü nax  
 naxauxexü i duüxügü erü marü cuyu.  
 .....

<sup>13</sup>Rü ngëxma nayacuax i chorü dexa  
 rü marü nüxü cuxínü. Rü marü  
 guxüxüma chixu. iRü Tupanaxü  
 nangechaxü rü naga naxínü i norü  
 mugü! Rü ngëma nixi i guxüma i ngëma  
 Tupana tüxü naxwaxexü. <sup>14</sup>Erü nüma rü  
 tá tüxna naca naxçax i guxüma i taxacü  
 ixüxü rü mexü rüçxna chixexü woo  
 cúäcü naxüxgu” ñanagürü ga  
 Charumóü.

# CANTARES

## (Charumóũarü wiyae)

.....

### Charumóũarü wiyae

**3** <sup>6</sup>¿Rü texé tixĩ ya yíxema ngéma ínachianexũwa duũxũgü tũxũ ne ngetaxũgũxe naemagu i nagúxũraxũxũ i pumáragũarü caxixũ? <sup>7</sup>Rü dũcax, rü yimá rü Charumóũ nixĩ ya duũxũgü yangetaũgũcü. Rü ínayaxũmũcũgü i 60 i churaragü i rüporamaegũxũ i Iraéanewa. <sup>8</sup>Rü guxũma i ngéma churaragü rü tarawa meama daixũ icuáxũ nixĩ. Rü nũmagü rü nüxũ nicuaxũchi nax norü ãëxgacũna nadaugũxũ. Rü wũxichigü i nũma rü nügũcüwawa nanatuxchixũxẽxẽ i norü tara nax ngẽmamaxã norü ãëxgacũxũ ínapoxũgũxũcax ega ãũcũmaxũwa nangexmagũgu i chũtacü. <sup>9</sup>Rü nũma ga ãëxgacü ga Charumóũ rü Líbanucũx i ocayiwawa nanaxü ga wũxi ga nawexũ nax namaxã yangetaũgũaxũcax. <sup>10</sup>Rü guma napawerugü ga guma nawexũ rü diêrumũnaxcax nixĩgü. Rü yema norü ngũxcaxwexũruxũ rü úirunaxcax nixĩ. Rü yema norü tochicaxũ rü naxchiru i dauxracharaxũmaxã natüétü. Rü naxũmawa rü Yerucharéũcüx ga

pacügü rü meama inangaxãëgü yerü nüxũ ingechaũgü. <sup>11</sup>Pa Pacügü i Chióũcüx irü ípechoxũ nax ípeyadaugũxũcax ya ãëxgacü ya Charumóũ rü nüxũ pedax i ngéma ngaxcueruxũ ga naé nüxũ üxũ ga yexguma yangĩxgu rü nawa nanguxgu ga yema ngunexũ ga taãxẽ nagu nayaxuxũ!

.....

**4** <sup>7</sup>Rü Charumóũ rü ñanagürü: “Cuma rü cumexechi, Pa Choxmax, rü cuxũ changechaũ rü nataxuma i taxacü i chixexũ i cuwa ngẽxmaxũ. <sup>8</sup>iRü Líbanuwa rüxue rü chowe rüxũ, Pa Choxmax! Rü ngĩxã maxpũne ya Amaná rü Chení rü Ermóũtapexegu taxĩgü nax ngéma nagu rüdaunxũcax i ngatexũ i nagu naxãxmaũgũxũ i aigü i leóũ, rü aigü i yowaruna. <sup>9</sup>Pa Mexechicü Pa Choxmax, rü choxũ cugü cungũchaũxẽxẽ i wũxitama i curü dawenũmaxã, rü wũxichimũũtama i cuchagũmaxã. Rü marü tama yaxna chaxĩnü nax choxũ cungũchaũxũ”, ñanagürü ga Charumóũ.

.....

## Naxmaxarü dexa

**6** <sup>3</sup>Rü naxmax rü ngĩgürügü: “Rü choma rü chautearü chixĩ, rü nũma ya chaute rü choxrü nixĩ. Rü nũma rü putũranecũwa nanagagü i ngẽma norü carnérügü”, ngĩgürügü.

.....

**8** <sup>6</sup>Rü ngĩma rü ngĩgürügü: “iCurü maxũnewa choxũ nangexmaxẽxẽ rü ñoma cugũchacũügu choxũ quigaxũrũxũ choxũ ixixẽxẽ! Erü ngẽma ngechaũ rü ñoma yurũxũ naporaxũchi. Rü ngẽma ngũchaũ rü natora ñoma yuwa

cunagaxũrũxũ. Rü ngẽma ngechaũ i poraxũ i tawa ínguxũ rü Tupanaxũtawawa nixĩ i ne naxũxũ. <sup>7</sup>Rü ngẽma dexá i guxũma i márwa ngẽxmaxũ rü tama ningu nax yanaxoxẽẽaxũcax i ngẽma ngũchaũ i tũxũ ngẽxmaxũ, rü woo guxũma i natũgũarü dexá rü taxucũrũwama nayanaxoxẽxẽ. Rü ngẽxguma chi texé ya diẽruãxũchixe gucũma ya tũmaarü diẽrumaxã naxcax tataxechaũgu i ngẽma ngũchaũ, rü taxucũrũwatãma tũxna nangu”, ngĩgürügü.

.....

# ISAÍAS

## (Ichaía)

### Duñxügü ga Yudáanecüãx rü poraãcü chixexü naxügü

**1** <sup>1</sup>Ñaa nixí ga ore ga Amú nane ga Ichaíaãxêwa Tupana ínguxêëxü ga yexguma Yudáanecüãxarü âëxgacügü yixíxgu ga Uchía, rü Yotáü, rü Acáa rü Echequía. Rü yema orewa nüxü nixu nax taxacü tá nüxü ngupetixü ga Yudáane rü ñane ga Yerucharéü. <sup>2</sup>Rü ñanagürü ga yema ore: “Pa Daxüguxü i Naane rü Ñoma i Naane irü iperüxínüie i ñaa chorü ore i ñaxü: ‘Yema chaunegü ga mea chayaexêëxü rü ñuxma rü tama chauga naxínüie! <sup>3</sup>Rü ngêma woca rü norü yoraxü nacuaç, rü ngêma búru rü nüxü nacuaç i norü chibüchica i norü yora naxçax ngêxma üxü, natürü ngêma chorü duñxügü i Iraétanüxü rü woo poraãcü nüxü charüngüxêë rü tama choxü nacuaçgüchaü rü tama naãxêxü nicuaç’”, ñanagürü ga Tupana. <sup>4</sup>Rü nüma ga Ichaía rü ñanagürü: “Wüxi i taxü i ngechaü nixí i pexçax, Pa Duñxügü i Chixexüarü Üruxügü rü Poraãcü Chixri Maxêxüx, erü pema rü chixexüarü ürüügü nane pixígü, rü nanegü i pecáduãxgüxü pixígü. Pema rü

marü nüxna pixígachi ya tórü Cori ya Tupana ya üünecü rü ípenataç.

.....

<sup>11</sup>Rü nüma ya Cori ya Tupana rü ñanagürü pexü: ‘¿Taxacüçax chauxütawa penagagü i ngêma muxü i pexünagü nax chauxçax penadaixüçax? Rü marü nüxü charüchau i ngêma carnérugü i chauxçax ípeguxü rü ngêma wocaxacügüarü chíxü i ípeguxü. Rü yimá nagü i ngêma tuiru rü carnéru, rü chífbuxacü rü nawa chanaxoxéga.

.....

<sup>15</sup>Rü ngêxguma pema pexunagümexëgügu nax peyumüxëgüxüçax, rü choma rü tá pexçaxwa chidaugachi. Rü woo namaxgu i perü yumüxë, natürü i choma rü taxütama pexü chaxínü. Erü pema rü pemáetagü, rü pexmexgü rü nagümaxá nixãüächí’, ñanagürü ya Cori ya Tupana.

.....

<sup>18</sup>Rü ñuxüchi nüma ya Cori ya Tupana rü ñanagürü: ‘íËcü nua pexí rü ngíxã perü chixexüchiga tidexagü! Rü perü chixexügü rü woo poraãcü nadauxuchigu, natürü i choma rü ñoma

gáuxũchara i cómuxũchixũrũxũ tá chayaxĩxẽxẽ. Rũ woo wũxi i naxchiru i wãxũchixũrũxũ yixĩxgu i perũ pecádugũ, natũrũ i choma rũ ñoma wũxi i carnérutaşa i cómuxũchixũrũxũ tá chayaxĩxẽxẽ. <sup>19</sup>Rũ ngẽxgumachi penaxwãxegu nax chauga pexĩnũxũ, rũ mexũwa tá pengexmagũ. Rũ tá penangõx i guxũma i nanetũarũ o i rũmemaegũxũ i ñoma i naanewa yaexũ. <sup>20</sup>Natũrũ ngẽxguma taxũtãma chauga pexĩnũegu, rũ perũ uanũgũmexẽgu tá peyue. Rũ nũma ya Cori ya Tupana nixĩ ya ñacũ.”

.....

**Cori ya Tupana rũ tá guxũma i nachixũanegũcüãx nũgũmaxã inanangũxmũexẽxẽ**

**2** <sup>1</sup>Rũ ñaa nixĩ ga to ga ore ga Amú nane ga Ichaíaãxẽwa Tupana ínguxẽxũ nachiga ga Yudaanecũãx rũ ñane ga Yerucharẽücüãx. <sup>2</sup>Rũ nũma ga Ichaía rũ ñanagũrũ: “Ngẽma ngunexũgũ i nawa iyacuãxgũxũgu, rũ daa Yerucharẽũ rũ Cori ya Tupanapata rũ tá poraãcü guxũ i nachixũanecũãx i duũxũgũaxũ nangũchaũ nax íyadaugũãxũ. Rũ muxũma i nachixũanegũcüãx i duũxũgũ rũ nua daa ma\_xpũnewa tá naxĩ nax Cori ya Tupanaxũ yanacuãxũgũxũcãx. <sup>3</sup>Rũ muxũtãma i duũxũgũ ínanugũ rũ ñanagũrũgũ tá: ‘ÍNgĩxã, rũ daa ma\_xpũne i Cori ya Tupana íngexmaxũgu taxĩgũ rũ yima Iraétanũxũarũ Tupanapatana tangaicamagũ nax nũma ngẽma tũxũ nangũxẽxẽxũcãx i norũ ngũchaũ rũ ngẽmaãcü nũma nanaxwãxexũãcüma

imaxẽxũcãx!’, ñanagũrũgũ tá. Erũ nua ma\_xpũne ya Chióũwa tá nangõx i Cori ya Tupanaarũ nguxẽẽtae rũ daa Yerucharẽũwa tá ínaxũxũ i norũ ore. <sup>4</sup>Rũ nũma ya Cori ya Tupana rũ tá nanamexẽxẽ i guxũma i nachixũanegũarũ guxchaxũgũ. Rũ ngẽma nachixũanegũ i nũgũmaxã nuexũ rũ Cori ya Tupana rũ tá nũgũmaxã nanangũxmũexẽxẽ. Rũ ngẽma naxnegũ i namaxã nũgũ nadãixũ rũ norũ puracũrũxũ tá nayaxĩgũxẽxẽ. Rũ taxuxũtãma i íanegũ daigu nũgũmaxã narũxĩnũe rũ bai tá i dãixcãx nũgũ nax nangũxẽxẽxũ. <sup>5</sup>Pa Iraétanũxũgũx i Duũxũgũx, irũ ngĩxã, Cori ya Tupanaga taxĩnũe rũ nũma nanaxwãxexũãcüma nagu tamaxẽ i norũ ore!

.....

**Tupana rũ tá nanapoxcue i ngẽma nũgũ icuãxũgũxũ**

<sup>10</sup>Rũ ngẽma duũxũgũ i chixexũ ügũxũ rũ nutatanũgu rũ waixũmũarũ ãmaxũgu tá nũgũ nicũxgũ naxchãxwa ya Cori ya Tupana ya iũnecũ rũ poraãcü ãũxcũmacũ. <sup>11</sup>Rũ ngẽma ngunexũ i nagu ínangũxũ ya Cori ya Tupana, rũ ngẽma nũgũ icuãxũgũxũ rũ napexewa tá naxãnee, rũ ngẽma nũgũ írũtagũxũ rũ napexewa rũ tá taxuwama nime. Rũ nũxicatama ya Cori ya Tupana rũ tá inanawex i norũ pora i ngẽma ngunexũgu. <sup>12</sup>Rũ ngẽma ngunexũgu rũ nũma ya Cori ya Tupana rũ tá nanaxãneexẽxẽ rũ taxuwatãma nime i ngẽma nũgũ icuãxũgũxũ rũ ngẽma nũgũ írũtagũxũ.”

.....

**Úbanecügü ixuxü ga ore nachiga ga  
Yudáanecüãx ga duúxügü**

**5** <sup>1</sup>“Rü ngëma chomücü irümemaexüégu tá chawiyae. Rü ngëma wiyae rü norü úbanecüchiga nixí. Rü ngëma chomücü rü wüxi ga naane ga mexüwa nüxü nayexma ga wüxi ga úbanecü. <sup>2</sup>Rü nanaxaiegumüane rü ínananugü ga nutagü rü yema rümemaexü ga úba yexma natogü. Rü yemanecügu nanaxü ga wüxi ga dauxütaechica rü wüxi ga nachica ga bínu nawa naxüxü. Rü nüma ga chomücü rü nagu narüxínü nax yema úba rü chi yamaixcuraxü ga norü o, natürü ga yema úbagü rü ningúchiãx ga norü o. <sup>3</sup>Rü ñuxmax rü ñanagürü pexü ya Tupana: ‘Pa Ìane ya Yerucharéücüãxgü rü ñaa Yudáanecüãxgüx irü nüxü pixu!, ¿rü texégagu nixí i ngëma úbanecü i nangúchixáxü i norü o? ¿Rü nagagutama rü ëxna chaugagu? <sup>4</sup>¿Ëxna nangexmaxü i taxacü i tama chaxüxü nax tama nangúchixaxüçax i ngëma chorü úbanecüaru o? ¿Rü nangemaxü i taxacü i tama naxçax chaxüxü? Choma rü íchananguxëxë nax namaixcuraxü i norü o. ¿Rü taxacüçax i ñuxma i nangúchixáxü i norü o? <sup>5</sup>Rü dücax, rü ñuxma rü tá pemaxã nüxü chixu i ngëma nagu charüxínüxü namaxã i ngëma chorü úbanecü. Rü tá íchanapoxgü i ngëma norü poxeguxü nax ngëmaãcü duúxügü nagu pogüexüçax i ngëma úbanecü. Rü ngëma norü poxeguxü rü tá chanangúxcuxëxë nax duúxügü nagu pügüexüçax i ngëma úbanecü. <sup>6</sup>Rü

ñuxüchi tá íchanatax i ngëma úbanecü. Rü taxúxetáma tayayoatü rü taxúxetáma tanangixcanecü rü ngëmaãcü tá chuxchuxügü rü chixexü i natüane nanecüwa narüxügü. Rü tá nüxna chaxãga i caixanexü nax tama nanecügu napuxüçax’, ñanagürü ya Tupana. <sup>7</sup>Rü ngëma norü úbanecü i nüxü ngúchaüxü ya Cori ya Tupana ya guxãxétüwa ngëxmacü, rü ngëma nixí i Iraétanüxü i Yudáanewa ngëxmagüxü. Rü nüma ya Cori ya Tupana rü nanaxwaxë i nagu naxixü i ngëma norü mugü. Natürü ngëma Iraétanüxügü rü máetaguxicatama narüxínüe. Rü nüma ya Tupana rü ínananguxëxë nax nügü nangechaügüxü, natürü ngëma natanüwa nüxü ñnüxüxicatama nixí nax ngúxümaxã aita naxüexü.”

.....

**Tupana rü Ichaíaxü nayaxu nax nüxü  
napuracüxüçax**

**6** <sup>1</sup>“Rü guma taunecü ga ãëxgacü ga Uchía nagu yucü rü nüxü chadau ga Cori ya Tupana ga wüxi ga tochicaxü ga daxüwa yexmaxüwa nax natoxü. Rü yema norü üünemaxã nanapá ga yema ínayexmaxüwa. <sup>2</sup>Rü naétüwa nayexmagü ga daxücüãx ga íyauxratanücüxü. Rü wüxichigü ga yema rü nüxü nayexma ga 6 ga naxpexátü. Rü taxre ga naxpexátümaxã rü nügü nidüxchiwegü, rü guma náí ga taxre ga naxpexátümaxã nügü nidüxparagü, rü guma náí ga taxremaxã rü nixüüxü. <sup>3</sup>Rü guxüma ga yema daxücüãx rü nügü ñanagürügü: ‘Naxüüne, naxüüne, naxüüne ya Cori ya Tupana ya guxãétüwa ngëxmacü.’ Rü

ngêma norü üüne rü ñoma i naane namaxã nanapã. <sup>4</sup>Rü yema nagamaxã rü guma Tupanapataarü ïãx rü naxïãxãchi. Rü nümatama ga guma Tupanapata rü caixanexũmaxã nanapã. <sup>5</sup>Rü yexguma ga chomax rü ñaxũgu charüxĩnũ: ‘Ñuxma waxi rü chaugũmaxã changechaũ erü tá chayü. Erü choma nax duũxũ chixĩxũ rü chauzetũmaxã nüxũ chadau ya yimã ãẽxgacü ya Cori ya guxãétiwa ngẽxmacü. Rü chauãx rü naxãũãchi rü duũxũgü i ãũãchiarü dexããxgũxũtanüwa chamaxũ.’ <sup>6</sup>Rü yexguma rü wüxi ga yema daxücüãx rü nigoe rü ãmarearü guchicaxũwa wüxi ga ãchataxũmaxã wüxi ga áxwe chaũxçax nayaxu. <sup>7</sup>Rü guma áxwe rü chauãxwa nayaxũxãchixẽxẽ, rü ñanagürü choxũ: ‘iDüac! daa áxwe rü cuãxwa nixũxãchi rü ngẽmacax i curü chixexũ rü marü inayarüxo. Rü ngẽma curü chixexũgü rü Tupana rü marü cuxũ nüxũ narüngũma’, ñanagürü. <sup>8</sup>Rü yexguma rü nüxũ chaxĩnũ ga naga ga Cori ya Tupana ga ñaxũ: ‘¿Rü texéxũ tá ichamuãchixũ i ñuxmax? ¿Rü texé tá tixĩ ya yixema tóru orearü ngeruxũ ixĩxe?’, ñanagürü. Rü yexguma ga chomax rü chanangãxũ rü ñachagürü: ‘Daxe chixĩ, Pa Corix. Eẽcü, ichoxũ inamuãchi!’ ñachagürü. <sup>9</sup>Rü nüma rü ñanagürü choxũ: ‘iEẽcü inaxũãchi rü chorü duũxũgũmaxã nüxũ ixu i ñaa ore!: Rü woo nüxũ nax naxĩnũexũ i chorü ore rü taxütãma nüxũ nacuãxgü nax taxacüchiga yixĩxũ. Rü woo nüxũ nax nadaugũxũ i ngẽma mexũ i chaxixũ rü taxütãma nüxũ nacuãxgüéga nax taxacüchiga yixĩxũ. <sup>10</sup>Rü ngexrũma nax chorü oremaxã cuyaxucũxẽgũxũ i

ngẽma duũxũgü i norü ñnügutama rüxĩnũexũ, erü taxütãma cuga naxĩnũe. Rü nüétama ega nügü yangauxchixexẽégu naxchaxwa i chorü ucũxẽgü nax tama nüxũ naxĩnũexũçax Rü nüétama ega nügü yangexetũxgu naxchaxwa i ngẽma mexũ i naxçax chaxixũ nax tama nüxũ nadaugũxũçax rü ngẽmaãcü tama chaũxçax nawoeguxũçax nax choma naxçax chayataanexẽéguixũçax’, ñanagürü choxũ. <sup>11-12</sup>Rü yexguma ga choma rü nüxna chaca rü ñachagürü: ‘¿Ñuxre i ngunexũ tá nixĩ i ngẽmaãcü yixĩxũ, Pa Cori?’ ñachagürü. Rü yexguma ga nüma rü choxũ nangãxũ rü ñanagürü: ‘Rü ngẽmaãcü tá nixĩ ñuxmatãta yima ñanegü rü nagu napogüe, rü taxuxütãma i duũxũ íyaxü rü ñuxmatãta ya yima ípatagü rü yangearü duũxũãxgü rü naanegü rü nabãianemare rü ñuxmatãta íchanamuxũ i ngẽma duũxũgü i norü naanewa, rü ngẽmaãcü i nachixũane rü nangeãcumare. <sup>13</sup>Rü woo chi 100 tanüwa rü 10 i duũxũgü íyaxũxgu nawa ya yima ñane rü ngẽma rü ta nadai ñoma wüxi i nai i daxüchixürũxũ. Natürü ngẽma nachimewa rü tá narüxü i wüxi i ngexwacãxũxũ i nane i mexũ’, ñanagürü ga Tupana.”

.....

#### Ichaía rü nüxũ nixu i Emanuëarü buxchiga

**7** <sup>14</sup>“Rü nümatãtama ya Cori ya Tupana rü tá pexũ nüxũ nadauxẽxẽ i wüxi i cuãxruxũ: ‘Rü ngẽma pacü i taguma yatũxũ cuãxcü rü tá ngürü ixãxacü. Rü yimã ngĩne rü tá Emanuëgu inaxüéga.’”  
.....



**Tupana Nane ya  
ngüxmüxêëruüarü buxchiga**

**9**<sup>1</sup>“Rü nüma ya Tupana rü woo oöxêwa nayexmaxêëgu ga Gariréaane ga noxri Chaburóüane rü Netaríane ixíxü, natürü nawena rü nanatachigaxêxê i ngêma naane i natü ya Yudáüarü tocutüwa ixügüxü, rü ñüxmata márwa nguxü i duüxügü i tama yaxögüxü íxächíügüxüwa. <sup>2</sup>Rü ngêma Gariréaane ga noxri éanexüwa yexmagüxü rü nüxü nadaugü ga wüxi ga taxü ga omü ga ngóonexêëruüxü. Rü yema omü rü poraäcü tüxü nangóonetanüxêxê ga guxema éanexüwa yexmagüxe. <sup>3</sup>Rü ñüxmax, Pa Cori Pa Tupanax, rü poraäcü taãxê toxçax ícungüxêxê rü ngêma taãxê rü aixcüma nataxüichi. Rü guxâma tataãxêgü i cupexewa ñoma tonetüarü o tibxügügurüxü rü ñoma churaragü i norü uanügüarü ngêmaxügü nügümaxâ itoyegurüxü.

.....

<sup>6</sup>Erü tatanügu nabu i wüxi i öxchana. Rü nüma ya Tupana rü tüxna nanamu ya yimá nane. Rü yimána nixí i naxããxü i pora nax tamaxã inacüãxüçax. Rü ñaagü tá nixí i naégagü i namaxã naxügüãxü: Rü Mexechicü ya Ucüxêruüxü, rü Tupana ya Poraxüchicü, rü Tanatü ya Taguma Yücü, rü Tupana Nane ya Ngüxmüxêëruüxü ixícü. <sup>7</sup>Rü nüma rü tá âëxgacü ya Dabíchicüxü ingucuchicü nixí. Rü ngêma norü pora nax âëxgacü yixíxü rü guxü i nachixüanegüwa tá nangu. Rü ngêma nügümaxâ nax inangüxmüxêëãxü i duüxügü rü tagutâma inayarüxo. Rü

ngêma nax âëxgacü yixíxü rü mea tá duüxügümaxâ inacüax, rü mexügu tá narüxínü rü guxâarü mexüçax tá nadau i guxüguma. Rü ngêmaäcü tá nanaxü erü ngêma nixí i norü ngúchaü i nagu naxínüxü ya yimá Cori ya Tupana ya guxâétüwa ngêxmacü.”

.....

**Ore i Tupana nane ya  
ngüxmüxêëruüchiga**

**11**<sup>1</sup>“Rü ñoma wüxi i naichime irüxüürüxü tá nixí nax Dabínatü ga Ichaíwa nangóxü i wüxi i nataxa i guxâarü âëxgacü tá ixíxü. <sup>2</sup>Rü Cori ya Tupanaãxê rü guxügutâma namaxâ inacüax. Rü tá nüxna nanaxã i cuax nax mea naãxêxü nacüáxüçax. Rü tá nüxna nanaxã i tauxcha nax naxuãêxüçax. Rü tá nüxna nanaxã i pora rü tá nüxü narüngüxêë nax Tupanaarü ngúchaüxü nacüáxü rü naga naxínüxü. <sup>3</sup>Rü nüma rü ngêxguma duüxügüna nacaxgu i norü maxüchiga, rü taxütâma ngêma norü düxétüwa ngóxüçaxicatama nüxna naca. Natürü ngêma norü ínüwa ngêxmaxüçax tá nixí i nüxna nacaxü. Rü taxütâma nanapoxcu naxçax i ngêma togü nüxü ixügümarexü, natürü ngêma chixexü i naxügüxüçax tá nixí i napoxcuexü. <sup>4</sup>Rü yíxema togümexêwa ngêxmagüxe rü ngêxguma tümaarü maxüchiga tüxna nacaxgu rü mea tá tümamaxâ nanamexêxê. Rü tümaétüwa tá nachogü ya yíxema ngearü diëruãxgüxe i tümaarü âëxgacü chixri tümamaxâ cuaxgüxe. Rü ngêma norü ore rü ñoma wüxi i cuaxruüxü tá nixí naxçax i ngêma chixexü ügüxü. Rü wüxi i

naqxmaxã cue ñaxũmaxã tá nanadai i ngẽma duũxũgũ i chixexũ ügũxũ. <sup>5</sup>Rũ nũma ya yimá ãẽxgacũ rũ meama guxũma i norũ duũxũgũmaxã tá inacuax. Rũ ngẽma ore i aixcũma ixĩxũicatama tá nixu. <sup>6</sup>Rũ ngẽxguma yangucuchigu ya yimá ãẽxgacũ, rũ ngẽma airu i naixnecũcũãx rũ carnérumaxã rũ taxũtãma nũgũchi naxaie. Rũ ngẽma ai rũ tá chĩbuxacũmaxã wũxigu nacagũ. Rũ ngẽma wocaxacũ rũ ngẽma aixacũ rũ tá wũxigu nayae. Rũ wũxi i buxũ tá namaxã inacuax. <sup>7</sup>Rũ ngẽma woca rũ ngẽma ócha i dũraxũ rũ nũgũmũcũ tá nixĩgũ rũ naxacũgũ rũ wũxigu tá nacagũ. Rũ ngẽma ai i leóũ rũ wocarũxũ tá maxẽ nanangõx. <sup>8</sup>Rũ ngẽxguma i wũxi ya buxe ya maixe nawũmaxũétiwa naxĩnũcãxwãxegu, rũ woo ngẽma ãxtapemaxũgu yaxũcuchimẽxẽgu rũ taxũtãma nũxũ naxãũcũma. <sup>9</sup>Rũ guxũnema ya yima maãxpũne ya chopata nawa ngexmanewa rũ tataxuma ya texé ya chixexũ üxe. Erũ ñoma már i dexãmaxã napaxũrũxũ rũ ñoma i naane rũ ngẽma duũxũgũ i choxũ cuãxgũxũmaxã tá nanapá. <sup>10</sup>Rũ ngẽxguma yimá Dabĩtaxa ingucuchigu nax ãẽxgacũ yixĩxũcãx rũ tá wũxi i cuãxruxũ nixĩ naxcãx i guxũma i duũxũgũ. Rũ guxũ i nachixũanegũcũãx rũ tá naxcãx nayadaugũ rũ naxcãx nangutaquexegũ. Rũ ngẽma nachica i nawa nangexmaxũ rũ tá naxũũne.

**Iraétanũxũ rũ tá nachixũanecãx nawoegu**

<sup>11</sup>Rũ ngẽxguma yimá Dabĩtaxa ingucuchigu nax ãẽxgacũ yixĩxũcãx rũ nũma ya Cori ya Tupana rũ tá wena

inanawex i norũ pora. Rũ wena tá nanangutaquexexẽxẽ i norũ duũxũgũ i Achĩriaanewa, rũ Equĩtuaneua, rũ Pátuaneua, rũ Etiopíaanewa, rũ Erãũanewa, rũ Chináruanewa, rũ Amáanewa rũ nachixũanegũ i márcutũwa ngẽxmagũxũwa. Rũ tá wena Iraéanecãx nanawoeguxẽxẽ. <sup>12</sup>Rũ nũma ya Cori rũ guxũ i nachixũanegũxũ tá nũxũ nadauxẽxẽ i wũxi i cuãxruxũ. Rũ tá nanangutaquexexẽxẽ i ngẽma Iraétanũxũgũ i woonexũ. Rũ naanearũ guxũcũwawa tá ne nanagagũ nax nanutaquexẽaxũ i ngẽma duũxũgu i Yudáanecũãx ga woonemarexũ”, ñanagũrũ ga Ichaía.

.....

**Iraétanũxũgũ rũ tá Babiróniaanecũãx ya ãẽxgacũxũ nacugũe**

**14** <sup>3-4</sup>“Rũ pemax, Pa Duũxũgũ i Iraétanũxũgũx, rũ ngẽxguma nũma ya Cori ya Tupana pexũ ínguxũxẽẽgu naxmẽxwa i ngẽma Babiróniaanearũ ãẽxgacũ i ngũxũ pexũ ingegũxẽẽxũ rũ ngechaũ pexna ãxũ, rũ ñaa oremaxã tá nũxũ pecugũe rũ penaxuchixe: ‘Dũcax łtaxacũwa cunyu i cuma nax cuchixecũmaxũ? rũ łtaxacũgu nayagux i ngẽma nax cugũ quicuaxũxũ?’ ñapegũrũgũ tá nũxũ. <sup>5</sup>Erũ nũma ya Cori ya Tupana rũ nagu nayanachixexẽxẽ i norũ pora i ngẽma chixecũmaxũ. Rũ íxraxũgu nanabũũgũ ya yima naxne i ngẽma chixexũarũ üruxũ.

.....

<sup>12</sup>¿Rũ ñuxãcũ icurũnguxũ Pa Babiróniaanearũ ãẽxgacũx i Ñoma Ngunetũxũarũ Woramacurirũxũ

Ibaixchiréxex? Rû ñuxma rû curütáe i cumax nax guxû i nachixûianegümaxã icucaxchiréxû. <sup>13</sup>Rû cumax rû cugü curütupana rû cugüãêwa ñacurügü: ‘Choma rû daxüguxû i naanegu i Tupanaarü êxtagüétügu tá chaxínagü nax ngéma charütöxûçax. Rû yima ma xpúne ya nórtewaama üxûne i nagu nangutaquexene i ngéma tupanagü i duûxügü namaxã tupanaáxû rû yimawa tá chanangexmaxêxê i chorü tochicaxû’, ñaxûgu curüxînü. <sup>14</sup>Rû cuma rû ñacurügü: ‘Rû ngéma caixanexûarü yexeragu tá chaxínagü rû naxrûxû tátama chixí ya yimá Tupana ya guxáétüwa ngêxmacü’, ñacurügü. <sup>15</sup>Natürü tama ngéma cuma nagu curüxînüxûãcü cuxû ínanguxuchi, erü nagu curütáe i ngéma maxüchixû i ãmaxû i yuexügü nawa ngêxmagüxû”, ñanagürü ga Ichaía.  
.....

**Ichaía rû wiyamaxã  
Tupanaxû nicuaxûxû**

**25** <sup>1</sup>“Pa Corix, cuma nixí i chorü Tupana quixíxû. Rû choma rû cuxû chicuaxûxû rû mexûmaxã cuxû chixuchiga. Erü ngéma nagu curüxînüxû rû aixcüma cuyanguxêxê rû nüxcümacürüwatama cunaxáixrügumaraxû. Rû taguma cuxüchicüxü.  
.....

<sup>4</sup>Rû yíxema ngearü poraãxgüecax rû cumax, Pa Corix, rû túmaarü poxüruxû quixí. Rû cuma rû túmaarü ngüxêëruxû quixí ya yíxema taxúema tüxû rüngüxêëgüxe. Rû cuma rû túmaétüwa cuhogü ya yíxema guxchaxüwa

ngêxmagüxe. Rû cuma rû túmaarü düxpechitaruxû quixí ya yíxema üaxcüarü naiemaxû tüxû iguxe. Rû nüxna tüxû ícupoxû i ngéma duûxügü i chixexû i ñoma taxüchicü ya pucü i ítapüx i waixümünaxcax idexêxêcürüxû ixígüxû”, ñanagürü ga Ichaía.  
.....

**Norü nguxüchigagu nawiyaegü i  
Yudáanecüãxgü**

**26** <sup>1</sup>“Rû ngéma ngunexû i nagu ínanguxüxügu i norü uanügümexêwa i ngéma Yudáanecüãxgü, rû tá nawiyaegü nagu i ñaa wiyae: ‘Rû tüxû nangexma ya daa tórü ñane ya porane ya tüxû ipoxüne nüxna i tórü uanügü. Erü nüma ya Cori ya Tupana rû tüxû narüngüxêë rû tórü uanügüchaxwa ínanapoxegu ya daa tórü ñane namaxã i poraxû i nextapüx. <sup>2</sup>iRû peyawãxnax i ngéma norü íaxgü ya daa ñane nax nachocuxüçax i ngéma duûxügü i Tupanapexewa mexû rû aixcüma nüxû yaxögüxû! <sup>3</sup>Rû cumax, Pa Corix, rû mexügu tüxû curüxînüexêxê ya yíxema íaixcümagüxe, erü cuxna tarüyoû. <sup>4</sup>iRû nüxna perüyoû ya Cori ya Tupana! Erü nüma nixí i guxüguma pexna nadauxû’, ñanagürügü tá.”  
.....

<sup>7</sup>Rû ñanagürü ga Ichaía: “Yíxema aixcüma Tupanapexewa mexe, rû Tupana tüxû narüngüxêë nax mea tüxû naxüpetüxüçax. Rû cumax, Pa Cori Pa Tupanax, rû mea icuyawexêxê i túmaarü maxû. <sup>8</sup>Düçax, Pa Corix, wüxi i torü taãxêmaxã tanaxü i curü ngúchaü. Rû ngéma toðxêwa nagu tarüxînüexü nixí nax cuxû ticuaxüügüxû. <sup>9</sup>Rû

chütacü rü guxũma i choru  
ngúchaũmaxã chauãẽwa guxũguma  
cugu charũxĩnũ. Rü ngẽxguma cuma  
ñoma i naanewa cuxũxgu nax nũxna  
cuçaxũcax i duũxũgũ naxcax i norũ  
maxũ, rü ngẽxguma tá nixĩ i nũxũ  
yacuaxãchitanũxũ i ngẽma maxũ i  
aixcũma cupexewa mexũ”, ñanagürü ga  
Ichaía.

.....

**Tupana nayaxucuxê i duũxũgũ i tama  
naga ñnuechaũxũ**

**29** <sup>9</sup>Rü ñanagürü ta ga Ichaía: “Rü  
pemax, Pa Duũxũgũ i Tama  
Ixĩnuechaxũxũ, rü woo nũxũ pedaxgu  
i ngẽma Tupana üxũ rü namaxã  
pebaxãchiãegũgu, natürü tama  
peyaxõgũchaũ. Rü pema rü ñoma  
pingexetũrũxũ pixĩgũ erü tama nũxũ  
pecuax i ngẽma nũxũ pedaxũ. Rü  
ñoma ngãxẽxũrũxũ pixĩgũ nax  
pichũxatanücũxũ i perũ õwa woo  
taxuũma i ngúchiáxũ pixaxgũchirexgu.  
<sup>10</sup>Rü ngẽmacax i nũma ya Cori ya  
Tupana rü yaxta i poraxũ pexcax ngẽma  
namu. Rü ngẽma perũ orearü  
uruũgũchirex nixĩ i pemaxã icuaxgũxũ.  
Natürü tama aixcũma pemaxã nũxũ  
nixugüe i ngẽma tá pexũ ngupetũxũ, erü  
nũma ya Cori ya Tupana rü düxwa  
nayatüxetü nax tama nũxũ  
nacuaxgũxũcax.

.....

<sup>13</sup>Rü nũma ya Cori ya Tupana rü  
ñanagürü choxũ: ‘Ñaa duũxũgũ rü norũ  
dexawaxicatama nũgũ nixugüe nax  
chorü duũxũgũ yixĩgũxũ, natürü tama  
chauga naxĩnue. Rü naaxwaxicatama  
choxũ nicuaxũxũgũ natürü norü

maxũnewa rü tama chaugu narũxĩnue.  
Rü ngẽma norü cuaxũxũgũ rü ngẽma  
mugü i duũxũgũ nagu ìxũwa  
nanayauxgü. <sup>14</sup>Rü ngẽmacax i choma rü  
taxũ i cuaxruũgũ i chorü poramaxã  
chaxũxũ tá ichawex nax ngẽmamaxã  
íchanabaxgüexũcax. Rü ngẽma norü  
ucuxẽruũgũ i cuax nũxũ ngẽmagũxũ rü  
tá chayanatauxẽxê i norü cuax’,  
ñanagürü ya Tupana. <sup>15</sup>Rü tũgũmaxã  
tangechaxũgũ ya yixema Cori ya  
Tupanachaxwa icuxgüe namaxã i  
tũmaarü ñnũ i chixexũ i ãnaxũwa  
taxũgũxũ! Erü ñanagürügü: ‘Taxúema  
tũxũ tadau rü taxúema nũxũ tacuax i  
ngẽma ixũgũxũ’, ñatarügügü. <sup>16</sup>¿Rü  
tũxcũü ípeyatõxẽxê i ngẽma mexũ i  
Tupana pexcax üxũ? Rü ngẽma  
waixũmü i üwechiruxũ rü  
taxucüruwama ngẽma duũxũ i tũxũ  
nawa üxũmaxã nawũxigu. Rü wüxi i  
ngẽmaxũ rü taxũta norü üruxũxũ  
ñanagürü: ‘Cuma rü tama nixĩ i choxũ  
cuxũxũ’ ñanagürü. Rü wüxi i tũxũ rü  
taxucüruwama norü ürũxũ ñanagürü:  
‘Cuma rü tama cuaxẽxũ cucuax nax  
ñuxãcü choxũ cushũxũ’, ñanagürü.”  
.....

**Cori ya Tupana rü Yerucharẽcũcũax i  
duũxũgũxũ nataãxẽxê**

**40** <sup>3-4</sup>“iRü iperũxĩnue i Tupanaarü  
orearü uruxũ i tagaãcü ñaxũ:  
‘Cori ya Tupanacax penamexẽxê i perũ  
maxũ, ñoma wüxi i nama i chianexũwa  
dapetũxũ imexẽxũrũxũ! Rü ngẽma  
ínawũxũwa irü ipeyanawexãchixẽxê! Rü  
ngẽma ínangatexũwa irü penagũtagü  
nax mea yawẽxũcax! Rü ngẽma  
ínangũchitaeruxũwa irü

ipeyanawexächimüanexëxë! Rû ngëma ínangücureanexüwa írû mea penabaixmaxëxë!’ ñanagürü. <sup>5</sup>Rû ngëxguma i nûma ya Cori ya Tupana rû tá nügü nangoxëxë nax ñuxácü naxüünexü. Rû guxüma i duüxügü rû tá nûxü nadaugü i ngëma norü üüne. Rû nûmatama ya Cori ya Tupana nixí i ngëma ñaxü. <sup>6</sup>Rû wüxi i naga rû tagaäcü ñanagürü: ‘iAita naxü!’ ñanagürü. Rû choma rû ñachagürü: ‘¿Rû taxacümaxã tá aita chaxüxü?’ ñachagürü. Rû choxü nangãxü rû ñanagürü: ‘Rû guxüma i duüxügü rû ñoma wüxi i natüanerüxü paxaächitama nixí. Rû wüxi i putüra i paxaächi boxüxürüxü nixí. <sup>7</sup>Rû ngëma natüane rû nipa rû ngëma putüra rû narüñexe ngëxguma Cori ya Tupana nagu cue ñaxgu. Rû aixcüma nixí i duüxügü rû ñoma natüanerüxü yixígüxü. <sup>8</sup>Rû ngëma natüane rû nipa rû ngëma putürachacu rû narüñexe. Natürü ngëma Tupanaarü ore rû taguma inayarüxo rû guxügütama nangexmaecha’, ñanagürü.”

.....

<sup>27</sup>Rû ñanagürü ta ga Ichaía: “Pa Iraéanecüãxgü Pa Acóbutanüxügüx, ¿rû taxacücax pidexagüxü rû ñaperügügüxü: ‘Cori ya Tupana rû tama nüxü nacüax nax taxacü tüxü üpetüxü. Rû nûma ya Tupana rû tama tagu narüxínü’, ñapegügüxü? <sup>28</sup>Rû pema nagu perüxínüegu rû tama nüxü nacüaxü, rû tama nüxü naxínüxü. Rû nûma ya Cori ya Tupana ya guxüguma ngëxmacü rû naanearü ürüxü ixícü, rû taguma nanaxíxächiãxë rû taguma nipa. Rû ngëma norü cuax rû taguma inayagux.

<sup>29</sup>Dücax, rû yíxema ipaxe rû pora tüxna naxã. Rû yíxema turáxe rû tüxü ínanaporaächixëxë. <sup>30</sup>Rû ñoma i naanewa rû woo i ngëma ngextüxügüxü rû woetama nipae rû nanaxíxächiãëgü. Rû woo i ngëma poraechirëxü rû düxwa narüpaë. <sup>31</sup>Natürü yíxema aixcüma Cori ya Tupanaaxü yaxóxe rû guxügütama tüxü ningexwacaxüchigü i tümaarü pora. Rû ñoma íyügürüxü rû tá taporaama. Rû woo ngëxguma poraäcü itañaächigu rû taxütama nagux i tümaarü pora. Rû woo ngëxguma yáxüwa taxüxgu, rû taxütama tipa”, ñanagürü.

.....

**Tupana rû Iraétanüxügümaxã inaxuneta nax nüxü nangüxëxü tá**

**41** <sup>10</sup>“iTaxú i pemuüexü, Pa Iraétanüxüx! Erü choma rû chapexütagu. iRü taxú i pemuüexü! Erü choma rû perü Tupana chixí. Choma rû pora pexna chaxã rû pexü charüngüxëë. Rû choma rû chorü tügünechacüümaxã pexü chingí. <sup>11</sup>Rû guxüma i ngëma pexchi aiexü rû tá naxãnee rû tá inayarümaachitanü. Rû ngëma pemaxã nügü daixü rû tá inayarüxo. <sup>12</sup>Rû naxcax tá pedaugü i perü uanügü, natürü taxütama nüxü ipeyangau. Rû ngëma pexü daixchaxü rû ñoma taguma nangóexürüxü tá nixígü. <sup>13</sup>Erü choma ya Cori nax perü Tupana chixíxü rû pexmëxgu chingí. Rû marü pemaxã nüxü chixu rû ñachagürü: ‘iTaxú i pemuüexü! Erü choma tá pexü charüngüxëë’, ñachagürü. <sup>14</sup>Rû choma ya Cori ya Tupana rû aixcüma pemaxã nüxü chixu, Pa Iraétanüxüx Pa

Acóbutanüxüx, rü woo nax penoxrexüü  
rü perü uanügüpexewa peturaexüü,  
natürü itaxú i pemuüexü! Erü choma rü  
tá pexü charüngüxêê. Rü choma ya perü  
Tupana ya üü necü nax chixixü rü perü  
ngüxêêruxü chixi.”

.....

**Cori ya Tupanaarü Duü ya Cristu**

**42** <sup>1</sup>“Rü daa nixi ya yimá chorü  
duü ya chaporaxêêcü rü nüxü  
chaxunetacü rü namaxá chataãxêcü. Rü  
nüxna nixi i chanamuxü i Chauãxê i  
Üünexü nax ngêmaäcü guxü i  
nachixüanegümaxá mea inacuáxüçax.  
<sup>2</sup>Rü nüma rü tá namecüma. Rü  
tagutáma nipura, rü taxwexütáma  
nanga i ñanemaxüğüwa. <sup>3</sup>Rü nüma rü  
taxütáma tüxü naxo ya yíxema tümaarü  
õwa turáxe. Rü taxütáma tüxü  
ínayaxõõchixêxê ya yíxema ngexwacax  
yaxóxe. Rü aixcúmaxüchi tá mea  
guxámaxá inacuax. <sup>4</sup>Rü nüma rü  
tagutáma inarüngü ñuxmatáta mexüxica  
nawa ngexmax i ñoma i naane. Rü woo  
ngêma nachixüanegü i yáxüwa  
ngêxmagüxü i már- arü tocutüwa rü tá  
mea nanayauxgü i norü nguxêêtae.”

.....

**Cori ya Tupanaxicatama nixi ya  
maxêêêruxü ixücü**

**43** <sup>1</sup>“Natürü i ñuxmax, Pa  
Iraétanüxügü i Acóbuarü  
Duüxügü Ixigüxex, rü yimá Cori ya  
Tupana ya pexü ngoxêêcü rü ñanagürü  
pexü: ‘iTaxú i pemuüexü! Erü choma  
nixi i pexü íchangüxüxêxü. Rü choma  
nixi i peégamaxá pexna chacaxaxü rü  
pema rü chorü duüxügü pixigü. <sup>2</sup>Rü

ngêxguma guxchaxüwa pechopetüxgu  
ñoma dexá i mátamaxüwa  
pichoügurüxü, rü choma rü tá  
chapetanügu. Rü ngêxguma  
ãücúmaxüwa pengexmagügu ñoma  
wüxi i natü i poraxüchixüwa  
pichoügurüxü rü taxütáma ngêxma peyi.  
Rü ngêxguma taxü i guxchaxüwa  
pechopetüxgu rü ñoma wüxi i  
üxüxetüwa pechopetügurüxü pixigü, rü  
taxütáma pixae rü yima üxü rü  
taxütáma niyauxra i petanüwa. <sup>3</sup>Rü  
choma nixi i perü Cori ya perü  
maxêêêruxü chixixü, Pa Iraétanüxügüx.  
Rü choma nixi i perü Tupana ya üü necü  
chixixü. Rü choma nixi ga ãêxgacü ga  
Chírumexëgu chayixêêxü ga perü  
uanügü ga Equítuanecüãxgü rü  
Etiopíaanecüãxgü rü Chabáanecüãxgü  
nax yemaacü naxmexwa ípengüxüxüçax  
ga pemax. <sup>4</sup>Rü yemaacü pexü íchapoxü  
yerü poraäcü choxü pengüchaü rü  
choxü peme rü pexü changechaü. Rü  
yemaacü norü uanügümexëgu  
chanayixêxê ga yema perü uanügü nax  
pexü chamaxêêêxüçax rü choxrü  
pixigüxüçax i pemax. <sup>5</sup>iRü taxú i  
pemuüexü! Erü choma rü chapetanügu.  
Rü yíxema üaxcü ne üxügu woonexe  
rü tá pexü chanutaquexë nax wenaxarü  
ña pechixüanecax pewoegüxüçax nax  
nua wüxiwa pengexmagüxüçax.”

.....

**Tupana rü nüxü naxoox nax  
naxchicünaxägüxü yacuaxüügüxü**

**44** <sup>6</sup>“Rü choma ya Cori ya Tupana  
rü perü ãêxgacü chixi rü perü  
ngüxêêruxü chixi, Pa Iraétanüxügüx. Rü

choma ya guxúétiwa ngëmxaxe rü ñachagürü: ‘Choma rü woetama changexmaecha rü taguma icharüxo. Rü nataxuma i to i Tupana’, ñachagürü.  
.....

<sup>10</sup>Rü yíxema naxchicünaxã tügücax úxe nax ngëmamaxã tatupanaáxúcax rü natúcaxmamare nixí i ngëma taxúxü.  
.....

<sup>15</sup>Rü ngëxguma texé natuxugu ya wüxi ya nai rü tümaarü üxüruxü tayaxíxëxë nax ngëmawa tügü tanaxíxúcax ega gáuane ixíxgu. Rü togü i naxchipexe rü tümaarü paüartü guruxü nixí. Rü to i naxchipexe rü tümaarü tupanachicünaxã nawa taxü. Rü ngëmapexegu tacaápüxü rü nüxü ticuaxüxü. <sup>16</sup>Rü ngëma norü ngãxü i ngëma nai rü tümaarü üxüxü tayaxíxëxë, rü ngëmawa tayagu i tümaarü namachi. Rü ngëxguma nangëxëxgu rü tanangõx. Rü mea tüxü ningu rü tataãxë. Rü ngëxgumarüxü ta ngëxguma nagáuanegu rü yima üxüwa tügü tanaxí, rü ñatagürü: ‘Chataãxë erü chanáíwe’, ñatarügü. <sup>17</sup>Rü ngëma nai i tüxü íyaxüxüwa tanaxü i tümaarü tupanachicünaxã. Rü nüxna taca rü ñatagürü nüxü: ‘iChoxü ínapoxü! Erü cuma nixí i chorü tupana quixíxü’, ñatarügü. <sup>18</sup>Rü ngëma duüxügü i ngëma ügüxü rü tama naãxëxü nicuax. Rü ñoma yangexetüürüxü nixígü. Rü ngëma nax tama Cori ya Tupanaxü nacuaxgüchaügüxü, rü ñoma nawãtaxürüxü nixí i norü cuax. <sup>19</sup>Rü taxúema mea nagu tarüxínü nax ngëma rü wüxi i naimare yixíxü. Rü tama tügümaxã ñatarügü: ‘Ngëma norü ngãxü i ngëma nai rü chorü üxüxürüxü

chayaxíxëxë rü ngëmawa chayagu i chorü paü rü chayagu i chorü namachi rü ñüxüchi chanangõx. Rü ngëma íyaxüxüwa i ngëma nai rü chanaxü i ñaa naxchicünaxã i natúcaxmamare ixíxü. Rü ngëma ñüxma nüxü chicuaxüüxü rü wüxi i naichipexmare nixí’, ñatarügü. <sup>20</sup>Rü ngëma duüxügü i naechitamare maxëxü rü nagu rüxínüexü nax naxchicünaxãmarexü yacuaxüüxügüxü rü ningeãxëmare. Rü nügü namaxã nawomüxëëgü i wüxi i ñnü i doramare ixíxü. Rü ngëma duüxügü rü taxucürüwama nügütama ínanguxüxëxë nawa i ngëma nagu naxínüexü. Rü tama nüxü nacuaxgüéga i ngëma naxügüxü rü wüxi i doramare nax yixíxü.

**Cori ya Tupana rü Iraétanüxüaxü nüxü inarüngüma i norü chixëxügü**

<sup>21</sup>Pa Iraétanüxügü i Acóbuarü Duüxügü Ixígüxex, irü nüxna pecuaxächie nax chorü duüxügü pixígüxü! Yerü choma pexü changóexëxë. iRü taxú i choxü iperüngümaexü! <sup>22</sup>Rü choma nixí i pexü ichayanaxoxëëxü i perü guxchaxügü rü perü chixëxügü ñoma caixanëxü iyarüxoxgurüxü. iRü ëcü chaüxçax pewoegu! Erü choma nixí i pexü íchanguxüxëxë nawa i perü chixëxü, ñanagürü ya Tupana.”

.....

**Babiróniaanecüaxgü rü norü uanügü tá nüxü narüporamae**

**47** <sup>54</sup>“Rü nüma ya Cori ya Tupana rü ñanagürü: ‘iBexma iperüicho, Pa Babiróniaanecüaxgüxü, rü ëanëxüwa

pebuxmü! Erü marü tagutáma wena ngẽma togü i nachixüanegüétüwa pexügü. <sup>6</sup>Rü yexguma namaxã chanuxgu ga yema chorü duüxügü ya Iraétanüxügü rü pexna chanawogü nax namaxã ipecuáxüçax. Natürü ga pemax, Pa Babiróniaanecüãxgüx, rü tama pexü nangechaütümüxügü rü woo ga guxema norü yaxguãxgü rü chixri tümamaxã ipecuax.’ <sup>7</sup>Rü peãxëwa nagu perüxínüe rü ñaperügügü: ‘Guxügutáma ngẽma togü i nachixüanegüétüwa taxügü’, ñaperügügü. Natürü tama nagu perüxínüe rü tá iyagüxü nax ngẽma togü i nachixüanegümaxã ipecuáxü. <sup>8</sup>Rü ngẽmacax i ñuxmax, Pa Babiróniaanecüãxgüx i Ñoma Ngecü i Ngürü Meruxüguxica Rükünücürükü Pixígüx, rü pema rü petaãxë nax wüxi i mexüwa pengexmagüxü. Rü pegüãxëwa ñaxügü perüxínüe: ‘Tataxuma ya texé ya taxrükü poraxe. Rü yixicatátama tagutáma guxchaxüwa tangexmagü rü tagutáma taturae.’ Rü ngẽma nixi i perüxínüe. <sup>9</sup>Natürü pemaxã nüxü chixu rü ngürüãchi wüxitama i ngunexügu tá pexçax ínangu i ngẽma taxre i chixexü nax nayuexü i perü ãëxgacügü i poraexü rü nayuexü i pexacügü. Rü ñoma wüxi i ngexü i yutexürükü tá pixígü rü woo nax peyüüechirékü rü naguxüraxükü i ëxüguxü i chixexükü nax pecuáxü, ñanagürü ya Tupana.”

.....

**Tupana rü nanataãxëxëxë i**

**Yerucharéücüãx**

**51** <sup>4</sup>Rü ñanagürü ta ga Tupana: ‘Pa Chorü Duüxügüx irü choxü iperüxínüe! iRü chauga pexínüe, Pa Iraétanüxüx! Rü choma rü tá

chanangoxëxë i ngẽma chorü ore. Rü chorü mugü rü guxü i nachixüanegüarü ngóonexëëruxü tá nixi. <sup>5</sup>Rü choma rü paxa tá chorü duüxügüétüwa chachogü. Rü paxa tá íchananguxüxëxë naxmexwa i norü uanügü. Rü chorü poramaxã tá guxü i nachixüanegümaxã ichacuax. Rü ngẽma nachixüanegü i yáxüwa már-arü tocütüwa ngëxmagüxü rü tá choxü ínananguxëëgü rü tá chorü porana narüyoü. <sup>6</sup>iRü dücax, rü dauxügu perüdaunü rü ñoma i naanegu perüdaunü! Erü guxüma i ngẽma dauxüwa nüxü pedauxü rü ñoma caxixürükü tá inarütaxu rü ñoma i naane rü wüxi i naxchiru i ngauxürükü tá nagux. Rü ngẽma duüxügü i nawa maxëxü rü ñoma murenü yuexürükü tá nayue. Natürü ngẽma maxü i chorü duüxügüna chaxãxü rü taguma nagux. Rü ngẽma chorü ngüxëë rü guxügutáma nangexmaecha’”, ñanagürü.

.....

**Yerucharéücüãxgü rü norü  
uanümexëwa ínanguxü**

**52** <sup>7</sup>Rü wüxi i taãxë nixi nax maxpüneanewa taxçax ne naxükü ya yimá orearü ngerükü i mexü i ore taxçax nua ngecü rü tamaxã nüxü ixücü nax Tupana tükü rüngüxëëxü rü tükü ínanguxüxëëxü naxmexwa i tóru uanü. Rü tamaxã nüxü nixu nax Tupana rü tóru ãëxgacü yixükü i ñuxmax.

.....

**Ngükü tá ninge ya yimá Tupanaarü duü  
ya Cristu natürü tá nüxü narüyexeraama**

<sup>13</sup>Rü nüma ya Cori ya Tupana rü ñanagürü: ‘Yimá chorü duü ixücü rü tá



norü uanüxü nariüporamae rü tá chanatachigaxëxë. <sup>14</sup>Natürü muxüma i duüxügü rü tá namaxã nabajächie i ngëxguma nüxü nadaugügu i nachiwe i poraäcü napíxü rü äuxü rü ngëmagagu marü tama nanaduëxëchametüraxü.

<sup>15</sup>Rü ngëxgumarüxü ta rü muxüma i duüxügü i to i nachixüanecüãxgü rü tá namaxã nabajächie. Rü ngëma äëxgacügü rü ngëxguma nüxü nadaugügu i ngëma naxüxü rü tá napëxewa nachianegümare rü taxuxütama nixugüxe, erü tá nüxü nadaugü i ngëma taguma nüxü nadaugüxü rü tá nüxü nacuaçgü i ngëma taguma ñuxgu texéwa nüxü naxinüexü', ñanagürü ga Tupana."

**53** <sup>14</sup> ¿Texé tá tayaxö ga yema ore ga nüxü ixuxü? ¿Rü texëçax nixi ga nangoxëxëãxü ga norü pora ya Cori ya Tupana? <sup>2</sup>Rü nüma ya Cori ya Tupana rü nanaxwaxë ya yimá norü duü rü ñoma wüxi i nanetü i ngexwacax rüxüxü rü naxchúmaxã i waixümü i paanewa ixücuxürüxü nax yixixü. Rü nüma rü tama namechiwe rü ngëmacax taxüxeaxüma nangúchaü. <sup>3</sup>Rü ga duüxügü rü tama naga naxinüechaü, rü nüxü naxoe. Rü nüma rü wüxi ga duü ga poraäcü ngüxü ingecü nixi, rü namaxã nixü nax ngüxü yangexü. Rü yixema rü yexguma nüxü idaugügu rü tama nüxü tacuaçgüchaü rü ñoma wüxi i duüxü i taxuwama mexürüxü tayaxixëxë. Rü yemaacü nüxü taxoe rü tama tanayauxgüchaü. <sup>4</sup>Natürü ga nüma rü nayange ga tóru daxaweanegü rü tóru guxchaxügü rü yemagagu nixi ga ngüxü yangexü. Rü yixema nagu rüxünüegü rü noxrütama chixexügüga

nixi ga Tupana ngüxü nüxü ingexëëxü rü napoxcuãxü rü ñne nüxü yangexëëxü.

<sup>5</sup>Natürü tóru chixexügüga nixi ga napixëëgüãxü. Rü tóru pecádugagu nixi ga ngüxü yangexü. Natürü yema ngüxü nax yangexügüga nixi ga Tupana tamaxã rüngüxmüxü. Rü yema norü oxrigügüga nixi ga taxçax yataanegüxü.

<sup>6</sup>Rü guxãma ga yixema rü itarütaxe ñoma carnérugü irütaxeürüxü. Yerü wüxichigü ga yixema rü nagu taxí ga tóxrütama ngúchaü. Natürü nüma ga Cori ya Tupana rü gumá norü duüçüxü nayangexëxë ga guxüma ga tóru chixexügü. <sup>7</sup>Rü nanacuajçgü, natürü nüma rü nügü inaxã rü tama nügüétüwa nidexa. Rü ñoma carnéru i maxwa nagagüxürüxü namaxã nixigü. Natürü nüma rü nachianemare ñoma wüxi i carnéru i yoxtaxawa nagagüxürüxü. <sup>8</sup>Rü maxwa nanagagü woo taxuxüma ga chixexü naxü, rü tataxuma ga texé ga ínapoxüxe. Rü taxúema texé naétüwa tachogü. Rü ínanataxüchigü ga ñoma ga naanewa. Rü chautanüxügüari chixexügüga nayamaxgü. <sup>9</sup>Rü duüxügü ga ichixexüxütüga nanataçgü. Rü duüxügü i chixri maxëxü

ítaçgüxütanügu nanataçgü. Rü yemaacü namaxã nixigü woo taguma namáeta rü taguma doramaxã texëxü nawomüxëxë.

<sup>10</sup>Rü Cori ya Tupanaarü ñnü nixi nax ngüxü yangexü. Rü nüma rü nügü naxã naxçax ga tóru chixexügü. Rü ngëmacax nüxü nangexma i maxü i taguma gúxü rü tá tamuxüchi ya yixema noxrü ixigüxe. Rü nagagu nixi i mea ínanguxuchixü i ngëma Tupana nagu rüxünüxü. <sup>11</sup>Natürü nawena ga yema poraäcü ngüxü nax yangexü rü nayuxü

rü wena tá namaxũ. Rü yimá Tupanaarü duũ rü tá nataãxê erü tá tüxũ nadau ya muxetama ya marü Tupanapexewa imexe nagagu nax tümaarü chixexũcax nayuxũ. <sup>12</sup>Rü ngëmacax i nüma ya Tupana rü tá nanatachigaxêxê, rü tá ngëma iporaexüchixũtanüwa nanangexmaxêxê, yerü nügü inaxã nax pecáducax nayuxũcax. Rü nüma ga duũxũgü rü ñoma wüxi i máetaxũrürü nayaxĩxêxê, natürü ga nüma rü guxũma ga duũxũgüarü pecádu ninge nax yemaacü naétüwa nachogüxũcax ga yema pecáduãxgüxũ.”

.....

**Taxũ i ngũxêxũ nixu ya Cori ya Tupana**

**55** <sup>1</sup>“iRü guxãma ya texé ya itaxawaexe rü nua taxĩ rü tayaxaxegü! iRü yixema ngearü diëruãxgüxe rü nua taxĩ rü trígu rü bínu rü léchecax tadaugü rü ngetanüacü tanangõxgü rü taxaxegü! <sup>2</sup>¿Rü taxacücax i diërumaxã penaxütanü i ngëma tama õna ixĩxũ? ¿Rü taxacücax penaxütanü i ngëma tama nawa itaãxêxũ? iRü mea choxũ íperüxĩnüe rü tá mexũ i õna pengõxgü rü õna i chíxũmaxã tá pengaxpütüwe!

.....

<sup>6</sup>iRü naga pexĩnüe ya Cori ya Tupana rü ñoma rü ta pexna naxu! iRü nüxna peca rü ñoma rü ta pexna nangaixcama! <sup>7</sup>Rü ngëma duũxũ i chixecümaxũ, rü name nixĩ i nüxũ narüxo i ngëma nacüma i chixexũ. Rü ngëma duũxũ i chixexũgu rüxĩnüxũ, rü name nixĩ i nüxũ narüxo i ngëma chixexũ i nagu naxĩnüxũ. iRü Cori ya Tupanacax pewoegu! Rü tá nüxũ

pengechaũtümüxũgü. iRü naxcax pewoegu ya tóru Tupana! Erü nüma rü ínamemare nax pexũ nüxũ nangümaxũ i perü chixexũgü. <sup>8</sup>Erü nüma ya Tupana rü ñanagürü: ‘Ngëma choma nagu charüxĩnüxũ rü tama perü ínümamaxã nawüxigu. Rü ngëma choma chaxüxũ rü tama pema pexüxũmaxã nawüxigu. <sup>9</sup>Rü ngëxgumarüxũ i daxügüxũ i naane rü ñoma i naaneétiwa nax nangexmaxũ, rü ngëxgumarüxũ ta nixĩ i ngëma chorü ñnü rü perü ñnüétiwa nangexma rü ngëma chaxüxũ rü ngëma pexüxũétiwa nangexma. <sup>10</sup>Rü yima pucü rü ngëma gáuxũ rü dauxüwa narüyi rü tama wena dauxüwa naxĩ, natürü nayawaixêxê i waixümü nax naxügüxũcax i nanetügü rü ngëmaacü nangexmaxücax i naxchire nax inatoxücax rü norü o nax nangõxücax. <sup>11</sup>Rü ngëxgumarüxũ ta nixĩ i ngëma chorü ore i chauaxwa íxüxüxũ. Rü taxütãma ngëmaacümare chauxcax natãegu. Rü ngëma chorü oregagu rü tá ningü rü naxü i ngëma choma chanaxwaxexũ rü ngëma nüxũ chixuxũ’, ñanagürü ya Tupana.”

.....

**Iraétanüxũgü rü norü  
chixexũgagu napoxcxe**

**59** <sup>1</sup>“Rü ngëma Tupanaarü pora rü guxũguma nanaxaixrügumaraxũ rü guxũguma ningü nax chixexüwa tüxũ ínanguxüxêxücax. Rü ngëxgumarüxũ ta i nüma rü tama nangauxchixê, rü ngëmacax guxũguma tüxũ naxĩnü ega nüxna icaxgu. <sup>2</sup>Natürü yema perü chixexũgü ga pexüxũ rü Tupanachaxwa pexũ nitoxyepexe. Rü ngëma perü

pecádugügagu pexchaxwa nügü  
nidüxchametü ya Tupana nax ngëmaäcü  
tama pexü naxínüxüçax.”

.....

### Tupanaarü ngüxëçax ínaca i Ichaía

**64** <sup>1</sup>“iĒcü ínangegü i ngëma  
caixanexü i dauxüwa  
ngëxmaxü, Pa Tupanax, nax ngëma  
ícurüxüçax rü  
cunaxüxächitanüxëxüçax ya  
maxpúnegü i ngëxguma ícunguxgu! <sup>2</sup>Rü  
ngëxguma núma cuxüxgu rü ñoma üxü i  
chuchuxüñecü íxaxexëxüürüxü tá nixí,  
rü ñoma dexá i docachiüxüürüxü tá nixí.  
Rü ngëxguma i ngëma curü uanügü rü  
tá nüxü nacuaxgü nax aixcüma  
cungexmaxü rü ngëma nachixüanegüarü  
duüxügü rü tá cupexewa nidüxrue. <sup>3</sup>Rü  
yexguma guma maxpúnegügu  
ícurüxüxgu rü Moichépepexewa  
cunaxüxgux ga yema äücümaxü ga tama  
duüxügü nagu íruxínüexü, rü guma  
maxpúnegü rü cupexewa rü  
nixíaxtanüçüxü. <sup>4</sup>Rü taguma texé  
nachiga taxínü rü texé nüxü tadau nax  
nangexmaxü i to i tupana i naxüxü i  
ngëma cuma cuxüxü tümacax ya  
yíxema cugu yaxögüxe. <sup>5</sup>Rü cuma rü  
tüxü cuyaxu ya yíxema tümaarü  
taaxëmaxá mexü üxe rü nüxna  
cuaxächixe nax tanaxüxü i ngëma cuma  
cunaxwaxexü. Natürü i ñuxma i cuma  
rü tomaxá cunu erü cupexewa chixexü  
taxügü rü nüxcümacürüwatama tama  
cuga taxínüe. <sup>6</sup>Rü guxáma i toma rü  
cupexewa rü duüxügü i íxäüächixü  
tixígü. Rü woo i ngëma taxüxü i toxçax  
rümexü, rü cupexewa rü ñoma wüxi i  
wexá i äüächixüürüxü nixí. Rü guxáma

chixexügu tayitanü ñoma naixatügü i  
pagüxü írüyixüürüxü. Rü ngëma tórü  
chixexügü rü ñoma buanecü taxacü  
cuenagütanüxüürüxü chixexüwa tüxü  
nagagü. <sup>7</sup>Rü tataxuma ya texé ya  
cumaxá idexáxe rü pora üxe nax  
cuxütawa ngüxëçax ítaçaxaxü. Rü  
ngëma torü chixexügagu nixí i  
toxçaxwa iquicüxü rü toxü ícuwogüxü.  
<sup>8</sup>Natürü ngëmaétüwa, Pa Corix Pa  
Tupanax, rü cuma nixí i Tonatü quixüxü.  
Toma rü waixümü tixígü rü cuma nixí i  
torü üruxü quixüxü. Rü guxáma i tomax  
rü cumatama toxü cuxü. <sup>9</sup>Pa Corix Pa  
Tupanax ítaxü i tomaxá cunuxüchixü!  
iRü taxü i nüxna cucuaxächixü ga yema  
chixexü ga taxüxü! iRü dücax, nagu  
rüxínü nax curü duüxügü tixígüxü!”  
.....

### Cori ya Tupana rü duüxügümaxá mexü naxuegu

**65** <sup>17</sup>“ Rü Cori ya Tupana rü  
ñanagürü: ‘Rü Dücax, rü  
guxüma i ngëma dauxüwa nüxü idauxü  
rü ngexwacaxüxü tá chaxü. Rü  
ngëxgumarüxü ta i ñoma i naane rü to i  
ngexwacaxüxü tá chaxü. Rü ngëma  
nüxíraxüxü rü marü tá nüxü itarüngüma  
rü taxüxetáma texé ñuxgu nüxna  
tacuaxächi. <sup>18</sup>Rü name nixí nax  
guxügüma namaxá petaaxëgüxü i  
ngëma tá chaxüxü. Erü tá chanaxü ya  
wüxi ya ngexwacaxüne ya Yerucharéü i  
taxuxüma i chixexü nawa ngexmane. Rü  
ngëma duüxügü i nawa maxëxü rü tá  
aixcüma nataaxëgü. <sup>19</sup>Rü choma rü tá ta  
namaxá chataaxë ya yima ñane ya  
Yerucharéü rü tá namaxá chataaxë i  
ngëma chorü duüxügü i nawa maxëxü.

Rü yima ñanewa rü marü taxütáma nüxü taxínü i axu rü taxúxetáma ngúxü tinge rü ngëmagagu aita taxü. <sup>20</sup>Rü ngëma rü tataxuma ya buxe ya noxretama i ngunexü tamaxü rü paxa yúxe, rü bai ya yaxguãx ya tama mea yarüyaexe. Rü yíxema 100 ya taunecü tüxü ngëxmaxe yuxe rü tá ngextüxütama nixí. Rü yíxema tama 100 ya taunecüwa nguxe nax tayuxü rü tümaarü chixexügagutama paxa tayu.

.....

<sup>23</sup>Rü taxütáma natüçaxma naxüane i duñxügü, rü nataxutáma i naxacügü i paxa yuexü. Erü nümagü rü ngëma duñxügü i Tupana nüxü rüngüxëxütaxa nixígü. Rü ngëxgumarüxü tá ta Tupana

nüxü narüngüxëë i ngëma nataagütanüxügü. <sup>24</sup>Rü naxüpa nax nüma choxna nacagüexü, rü choma ya Tupana rü marü nüxü changãxü. Rü naxüpa nax yanachianegüxü nax choxna nacagüexü, rü choma rü marü nüxü chaxínü. <sup>25</sup>Rü ngëma airu i naixnecücuãx rü tá carnérumaxã wüxiwa nachibüe. Rü yima ai ya leóü rü wocarüxü tá maxë nangox. Rü ngëma äxtape rü marü taxütáma tüxü nangox, erü ngëma waixümü tá nixí i nawemü. Rü guxünema ya yima m̄xpúne ya chopata nawa ngexmane rü tataxuma ya texé ya chixexü üxe', ñanagürü ya Cori ya Tupana.”

.....

# JEREMÍAS

## (Yeremía)

### Cori ya Tupana rü Yeremíaxü naxuneta norü puracüçax

**1** <sup>1</sup>Rü ñaa nixí ga Tupanaarü uçuxê ga Yeremíamaxã nüxü yaxuxü. Rü nüma ga Yeremía rü chacherdóte ga Irichía nane nixí. Rü ñane ga Anatógu naxächíü ga Bëyamítanüxüarü naanewa. <sup>2</sup>Rü yexguma Amú nane ga Yochía rü marü 13 ga taunecü äëxgacü yixíxgu ga Yudáanewa, rü nüma ga Tupana rü Yeremíamaxã nidexa. <sup>3</sup>Rü yexgumarüxü ta Yeremíamaxã nidexa ga Cori ya Tupana ga yexguma Yochía nane ga Yoachíü äëxgacü ixíxgu ga Yudáanewa. Rü yemaacü namaxã nidexa ñuxmata nai ga Yochía nane ga Chedequía rü 11 ga taunecü yanguxêxêã nax äëxgacü yixíxü ga Yudáanewa. Rü yexguma guma tauneciäarü 5 ga taumacüwa nanguxgu nixí ga Yerucharéüçüx ga duüxügü ga to ga nachixüanewa nagagiäaxü. <sup>4</sup>Nüma ga Cori ya Tupana rü chomaxã nidexa rü ñanagürü choxü: <sup>5</sup>“Rü yexguma taxüta cuxü changoxêëgu rü woetama marü choma cuxü chaxuneta nax choxrü quixíxü. Rü naxüpa nax cubuxü rü choma rü marü

cuxü chayaxu rü nachixüanegiäarü orearü uruxü cuxü chixíxêxê”, ñanagürü. <sup>6</sup>Rü yexguma ga chomax rü chanangäxü rü ñachagürü: “Dücax, Pa Corix, Pa Tupanax, choma rü changextüxüxüchi rü tama nüxü chachuax nax ñuxäcü chidexaxü”, ñachagürü. <sup>7</sup>Natürü nüma ga Cori ya Tupana rü choxü ñanagürü: “iTaxü i nüxü quixuxü nax cungextüxüxü! Rü chanaxwaxë i choma cuxü íchamuxüwa nax cuxüxü. Rü tá nüxü quixu i ngëma choma cuxü chamuxü nax nüxü quixuxü. <sup>8</sup>iRü taxü i texéxü cumuüxü! Erü choma rü tá chacuxütagu nax cuxü íchapoxüxüçax. Rü choma ya Cori ya Tupana nixí i cumaxã nüxü chixuxü i ñaa chorü ore”, ñanagürü. <sup>9</sup>Rü ñuxüchi nüma ga Cori ya Tupana rü chauax ningógü rü ñanagürü choxü: <sup>10</sup>“Rü ñuxma i choma rü cuxna chanaxã i chorü ore nax ngëmamaxã cuyaxucuxëgüxüçax i ngëma äëxgacügü rü duüxügü i guxü i nachixüanecüäxgü. Rü ngëxguma tama naga naxínegu i ngëma chorü ore i namaxã nüxü quixuxü, rü choma rü choxü nangexma i pora nax chanamuxüçax i norü uanügü

nax nagu napogüexüçax i norü ñanegü rü ñawoxüãäxüçax i norü duüxügü rü ngëmaäcü iyanaxoxüçax i nachixüñanegü. Natürü ngëma naga ñnüexü i chorü ore i namaxã nüxü quixuxü rü ngëxgumarüxü ta choxü nangexma i pora nax wena ichanachixëxü rü chanatachigaxëxü”, ñanagürü ga Tupana.

.....

<sup>13</sup>Rü nüma ya Cori rü wena chomaxã nidexa rü choxna naca rü ñanagürü: “¿Taxacü nixi i nüxü cudauxü?” ñanagürü. Rü choma rü chanangãxü rü ñachagürü: “Nüxü chadau ya wüxi ya buetare ya idocacü rü nórteguama baäcuchaücü i Yudáaru naanewa”, ñacharügü. <sup>14</sup>Rü yexguma ga nüma ga Cori ya Tupana rü chomaxã nüxü nixu rü ñanagürü: “Ngëma taxü i guxchaxü i nórteawaama ixügüxü rü tá nüxna nangu i guxütáma i duüxügü i nua Yudáanewa maxëxü. <sup>15</sup>Rü choma i Cori ya Tupana rü aixcüma nüxü chixu rü tá naxçax changema i guxüma i nachixüñanegüarü äëxgacügü i nórteawaama ngëxmagüxü. Rü nua Yudáanewa tá naxi. Rü ngëma äëxgacügü rü Yerucharéüçax íxücuxügu tá nananu i norü tochicaxügu napexegu ya yima ñanearü poxeguxü rü napexegu ya yima náigü ya ñanegü ya Yudáanewa ngëxmagüne. <sup>16</sup>Rü ngëma tá nixi i ngëma poxçu i namaxã chaxueguxü i ngëma duüxügü i chixexü ügüxü rü choxna ixígachixü. Erü nüxü nicuaxüxügü i ngëma tupanachicünaçägü i to i nachixüñanecüãxgü ügüxü rü ñmare naxçax ínagugü. <sup>17</sup>iRü ñüxma i cumax, rü inachi rü cugü naporaxëxë, rü ngëma

duüxügütanüwa naxü rü namaxã nüxü yarüxu i ngëma choma cumaxã nüxü chixuxü! iRü taxü i nüxü cumuüxü! Erü ngëxguma taxütáma ngëma cumaxã nüxü chixuxüäcüma cunaxüxgux, rü choma rü tá ngëma duüxügüpeçewa cuxü chamuüxëxë. <sup>18</sup>Rü ñüxma i chomax, rü pora cuxna chaxã. Rü ñoma wüxi ya ñane ya meama ípoxegunerüxü rü wüxi ya caxta ya fiérunaxçaxrüxü, rü ñoma poxeguxü i bróüchenaxçaxrüxü cuxü chixixëxë nax ngëmaäcü tama cumuüäcüma cuxunagüxü i chorü ore napëçewa i Yudáanecüãxaru äëxgacügü rü chacherdótegü rü guxüma i duüxügü i Yudáanewa ngëxmagüxü. <sup>19</sup>Rü nümagü rü tá cumaxã nanueama, natürü taxütáma cuxü narüporamaegü. Erü choma rü tá chacuxütagu rü cuxna chadau rü cuxü íchapoçü. Rü chomatama ya Cori ya Tupana nixi i nüxü chixuxü i ñaa chorü ore.”

#### Iraétanüxügü rü tama Tupanaga naxinüe

**2** <sup>1</sup>Rü yexguma ga nüma ga Cori ya Tupana rü chomaxã nidexa rü ñanagürü: <sup>2</sup>“iDüçax, ngëma naxü rü namaxã idexa i ngëma Yerucharéüçax i duüxügü! iRü nataga nax mea nüxü naxinüexüçax i ñaa chorü ore i ñaxü!: ‘Rü choma ya Tupana rü nüxna chacuaxächi rü yexguma noxri peyaxögügu rü mea chauga pexinüe. Rü yexguma noxri chorü duüxügü pexü chixixëëgu, rü choxü pengeçhaügü ñoma wüxi i nge i ngexwacax ätecü rü ngítexü ngeçhaüçürüxü. Rü yema choxü nax pengeçhaüxügü rü chowe perüxi i ngextá ínachianexüwa ga taxuxüma íruxüxüwa. <sup>3</sup>Rü pemax, Pa Iraétanüxügü

rü aixcümama chaugu perüxínüie ga yexguma, rü pema nixĩ ga mexũ ga chorü ògütanüxũgü pixĩgüxũ. Rü ngëxguma texé chixexũ pemaxã üxgux rü choma rü pexçax tüxũ chapoxcu, rü tümacax yéma chanamu i guxchaxũgü. Rü chomatama ya Cori ya Tupana nixĩ i nüxũ chixuxũ i ngëma ore”, ñanagürü. <sup>4</sup>iPa Acóbutaagü i Iraétanüxũgüx, rü iperüxínüie i norü ore ya Cori ya Tupana! <sup>5</sup>Rü nüma ya Cori ya Tupana rü ñanagürü pexũ: “¿Taxacürü chixexũ chowa nüxũ inayangaugü ga perü oxigü rü yemacax choxna yaxĩgachixũ rü nawe naxĩxũ ga tupananchicünaxãgü ga ngearü maxũãxgüxũ? Rü yemagagu taxuwama nügü namexëgü. <sup>6</sup>Rü nüma ga perü oxigü rü choxũ inarüngümae nax choma ya Cori ya Tupana yixĩxũ ga Equítuanewa íchangüxũxëxũ. Rü choma nixĩ ga íchayagagüxũ nagu ga yema naane ga chianexũ ga taxuxüma nawa rüxüxũ. Rü yéma ínamáxpüxanexüwa ga íngearü dexáãxüwa chanagagü ga ínaxãücümáxüwa rü taxüema nagu áchiüxüwa, rü taxüema ixüpetüxüwa. <sup>7</sup>Rü choma nixĩ i ñaa naane i guxũ nawa rüxüxüwa chanagagüxũ nax yemaacü nangõxgüaxüçax ga nanettiariü ogü ga rümemagüxũ, natürü i pemax rü nua pexĩ rü chixexũ nawa pexügü i ñaa chorü naane rü ngëmaacü naxchi choxũ pexaixëxë i ñaa naane i choxrü ixĩxũ. <sup>8</sup>Rü ngëma perü chacherdótegü rü tama chauxçax nadaugü, rü ngëma perü ucuxëruüügü rü tama choxũ nayauxgü. Rü ngëma perü äëxgacügü rü chomaxã nanue, rü ngëma perü orearü uruüügü rü Baáchigaxüama nixugüie rü

ngëma ngearü maxũáxũ i naxchicünaxãwe narüxĩ.

**Tupana rü nayadaxëxë nax nanuxũ namaxã i Iraétanüxũgü**

<sup>9</sup>Rü ngëmacax i chomax ya Cori ya Tupana rü pemaxã nüxũ chixu rü ngëma perü chixexũgagu tá pemaxã chanuecha i pemax rü woo penegü rü petaagü. <sup>10-11</sup>I Rü ëcü ngëma nachixüanegü i yáxüwa ngëmagüxüwa pexĩ, rü peyangugü rü ngoxi ngëma nachixüanecüãxgü rü norü tupanachicünaxãgüxũ naxoe, ngëma pema choxũ nax pexoexürüxü! Rü woo ngëma capaxügü i oéstewa ngëmagüxüwa pexĩ, rüexna Chedáruarü chianexũ i éstewa ngëmaxüwa pexĩ, rü ngëma rü taxütáma nüxũ ipeyangau nax ngëma nachixüanecüãxgü, rü norü tupanachicünaxãgüxũ naxoexũ woo tama chauxrüxũ Tupanaxüchi nax yixĩxũ. Natürü i chomax nax perü Tupana ya üünecü chixĩxũ rü choxũ ípetax naxçax i ngëma tupanachicünaxãgümare i taxuwama mexũ”, ñanagürü ya Tupana.

.....

**Cori ya Tupana rü Iraéanecüãxmaxã rü Yudáanecüãxmaxã nüxũ nixu nax nüxũ naxoexüçax i norü chixexügü**

**3** <sup>6</sup>Rü yexguma Yochía äëxgacü ixĩxgu ga Yudáanewa rü yexguma nixĩ ga Cori ga Tupana ga choxũ ñaxũ: “¿Nüxũ cudadüxũ i ngëma naxügüxũ i ngëma Iraéanecüãxgü i tama ixĩnüiechaxüxũ? Rü nümagü rü maxpünegüwa rü naixtüügüwa rü

tupanachicünaxãxũ nicuaxũxũgũ rü ngẽmaãcü choxna nixĩgachi ñoma wüxi i nge i ngĩtena ngeãxẽcürũxũ. <sup>7</sup>Rü choma nagu charũxĩnũgu rü chi yema chixexũ nax naxũgũxũguwena rü chauxcax nawoegu i ngẽma Iraéanecüãxgũ, natürü tama chauxcax nawoegu. Rü natanũxũgũ ga Yudáanecüãxgũ ga tama yaxõgũxũ rü yemaxũ nadaugũ. <sup>8</sup>Rü yexgumarũxũ ta nüxũ nadaugũ nax choma rü nüxũ chaxoxũ rü íchanawogũxũ ga yema Iraéanecüãxgũ naxcax ga yema chixexũ ga naxũgũxũ. Natürü nümagũ ga yema Yudáanecüãxgũ rü yema Iraéanecüãxgürũxũ chixexũ naxũgũ rü tama choxũ namuũe. Rü nümagũ rü ta rü nagu namaxẽ ga yematama chixexũ. <sup>9</sup>Rü tama naxcax nachixe ga yema chixexũ ga naxũgũxũ rü yemaacü norü taãxẽmaxã nanaxũgũ. Rü tama chauga naxĩnüechaũ rü yemacax nutanaxcax ga norü tupanachicünaxã rü nainaxcax ga norü tupanachicünaxãxũ nicuaxũxũgũ. <sup>10</sup>Rü yemaétüwa rü ngẽma Yudáanecüãxgũ i duũxũgũ i tama chauga ñnüexũ rü woo nagu narũxĩnüe nax chauxcax nawoeguxũ, natürü tama aixcũma chauxcax nawoegu rü choxũ nawomüxẽẽgũmare. Rü chomatama ya Cori ya Tupana nixĩ i nüxũ chixuxũ i ngẽma.

.....

<sup>22</sup>iRü chauxcax pewoegu, Pa Chauxacügũ ya Tama Ixĩnüechaxũxex! Rü choma rü tá pexũ nüxũ icharũngũma i ngẽma perü pecádugũ”, ñanagürü ya Cori ya Tupana. Rü nümagũ rü Tupanaxũ nangãxũgũ rü ñanagürügũ: “Daxegũ tixĩgũ. Rü cuxcax taxĩ erü

cuma nixĩ i torü Cori ya Tupana quixĩxũ”, ñanagürügũ.

.....

**Yeremía rü tupauca ga taxũnewa nüxũ nixu ga Tupanaarü Ore**

**7** <sup>1</sup>Rü nüma ga Cori ya Tupana rü Yeremíamaxã nidexa rü ñanagürü nüxũ: <sup>2-3</sup>“iNgẽxma chopataarü ñãxgu nachi rü ngẽma duũxũgũmaxã nüxũ ixu i ñaa ore: ‘Pa Duũxũgũ i Yudátanũxũgũ i Ñaa Ñãxwa Ichocuxũ nax Corixũ Peyarücuaxũũgũxũcax, rü dücax, rü iperũxĩnüe i norü ore ya tórü Cori ya Tupana ya Yudátanũxũétüwa ngẽxmacü!’ Rü nüma rü ñanagürü: ‘iPenamexẽxẽ i perü maxũ rü nüxũ perüxoe i pecũma i chixexũ i chopexewa pexũgũxũ! Rü ngẽmaãcü tá nixĩ i ñoma i naanewa i nüxũ chamãxnetaxũ i perü maxũ.’ <sup>4</sup>iRü taxũ i nüxũ peyaxõgũxũ i ngẽma duũxũgũ i pexũ womüxẽẽgũxũ rü ñagũxũ: ‘Nua Yerucharéüwa nangexma ya yima Cori ya Tupanapata rü ngẽmacax taxucürüwa Tupana nanapoxcu ya daa ñane woo chixexũ ixũgũxgu’, ñagũxũ! <sup>5-7</sup>Natürü ngẽxguma chi penamexẽẽxgu i perü maxũ rü nüxũ perüxoegu nax chixexũ pexũgũxũ, rü chi wüxichigũ pegũ pengechaũgũgu rü aixcũmaxũ pegũmaxã pixuxgu, rü chi mea nüxũ penaxütanũgu i ngẽma to i nachixũanecüãxgũ i pexũ puracüexũ, rü chi mea namaxã ipecuãxgux i ngẽma taxcutagũ rü yutegũxe, rü chi tama ñaa nachicagu natücaxmamare tüxũ pimãxgu ya yixema tama chixexũ ügũchiréxe, rü chi nüxũ perüxoegu nax nüxũ picuaxũũgũxũ i ngẽma tupanachicünaxã i ngeartü maxũãxũ i



pegütama namaxã pechixexêégüxü, rü ngêxguma i choma rü tá nawa pexü chamaxêxêxê i ñaa naane ga perü oxigüna chaxáxü nax guxügutáma noxrü yixüçax. <sup>8</sup>Rü pemax, Pa Yerucharéüçüãxgüx, rü ngêma nax daa perü ñanewa nangexmaxüçax ya chopata, rü ngêmacax nagu perüxînüe rü marü taxütáma pexü chapoxcue naxçax i perü chixexü. Natürü pegütama nagu pewomüxêégümare i ngêma perü ñnü. <sup>9</sup>Erü pengíe, rü pemáetagü, rü nai i ngemaxã pemaxê, rü natüçxma chauéga penaxuxuchi rü pidorae, rü Baáçax pumáratexe pigügüxü, rü naxçax pingutaquexegüxü i tupananetagü i ngearü maxüáxü. <sup>10</sup>Rü ngêmaétüwa rü nua chopexewa pengügü nawa ya daa ngutaquexepataxü ya çauxçax ixixüne. Pema nagu perüxînüegu i nua rü taxuxütáma pexü nangupetü, rü marü taxütáma pexü chapoxcu ega woo penaxügüechaxgu i ngêma chixexü i choma tama namaxã chataãxêxü. <sup>11</sup>¿Rü êxna nagu perüxînüegu ya daa ngutaquexepataxü ya çauxçax ixixüne rü ngítaaxgüxüpataxü nixí? Rü guxüma i ngêma chixexü i pexüxü rü nüxü chadau i chomax. Rü chomatama ya Cori ya Tupana nixí i nüxü chixuxü i ngêma ore”, ñanagürü.

.....

<sup>30</sup>Rü Cori ya Tupana rü ñanagürü: “Rü ngêma duüxügü i Yudátanüxü rü choxü nanuxêégü namaxã i ngêma naxügüxü. Rü daa ngutaquexepataxü ya çauxçax ixixünegu nananucu i naxchicünaçagü i nüxü chaxoxü rü ngêmaäcü chixexü nua chopatawa naxügü”, ñanagürü.

.....

**8** <sup>3</sup>Rü nüma ya Tupana rü ñanagürü: “Ngêxguma nua chanamüxgux i perü uanügü i chixexügü nax pexü nadaixüçax, rü ngêma íyaxügüxü rü tá to i nachixüanegu chanawoonexêxê. Rü ngêma rü tá nagu narüxînüe rü chi narümemaie ga noxtacüma nax nayuexü rü tama namaxêxü. Rü chomatama ya Cori ya Tupana ya guxáétüwa ngêxmaxe nixí i nüxü chixuxü i ngêma ore”, ñanagürü.  
.....

#### Ngêma Tupana namaxã taãxêxüchiga

**9** <sup>23</sup>Rü nüma ya Cori ya Tupana rü ñanagürü: “Rü yíxema cuax tüxü ngêxmaxe rü tama name i tügü namaxã ticuaxüxü i ngêma tümaarü cuax. Rü woo yíxema nüxü cuáxe nax duüxügümaxã itacuáxü rü tama name i ngêmamaxã tügü ticuaxüxü. Rü woo ya yíxema diêruáxe rü tama name i tümaarü diêrumaxã tügü ticuaxüxü. <sup>24</sup>Natürü ngêxguma texé tügü icuaxüxüçauügu rü êcü tügü ticuaxüxü naxçax nax choxü tacuáxü i choma i tümaarü Cori ya Tupana chixixü rü ñoma i naanewa tüxü changechaüxü rü mea tümamaxã nax ichacuáxü rü aixcüma nawexguxü i chorü ñnü. Rü ngêxguma ngêmaäcü çauxçax tügü ticuaxüxüçauügu rü chataãxê. Rü chomatama ya Cori ya Tupana nixí i nüxü chixuxü i ngêma”, ñanagürü.  
.....

#### Naxunagü i norü poxcu i ngêma chixexü ügüxü

**15** <sup>1</sup>Rü nüma ya Cori ya Tupana rü ñanagürü choxü: “Rü woo chi Moiché rü Chamué nua chauxütawa

ixgu nax naétüwa yachogüexüçax i ñaa duüxügü, rü marü taxüchima nüxü ichaxinü nax choxü nangechaütümüxügüxü i ñaa duüxügü. iRü namaxã nüxü iXu: 'Rü choxna yaxigachitanü!' 2Rü ngëxguma chi cuxna nacagügu rü ngextá tá nax naxixü rü ñaa nixí i chorü ore. iRü namaxã nüxü iXu: 'Rü ngëma marü namaxã ueguxü nax daxaweanemaxã nayuexü, rü daxaweanemaxã tá nayue. Rü ngëma marü namaxã ueguxü nax daigu nayuexü rü daigu tá nayue. Rü ngëma marü namaxã ueguxü nax taiyamaxã nayuexü rü tá taiyamaxã nayue. Rü ngëma marü namaxã ueguxü nax inawoxüxü i ñaa nachixüanewa rü tá inawoxü.'

.....

6Rü pemax, Pa Yerucharéüciüçax, rü choxü ípetax rü tama choxü pecuáxchaü. Rü choma ya Cori ya Tupana nixí i nüxü chixuxü i ngëma. Rü ngëma perü chixexügü rü choma rü marü chipa nax pemaxã yaxna chaxinüxü, rü ngëmacax düxwa pexü chapoxcu nax perüxoexüçax", ñanagürü ga Tupana.

.....

#### Yeremía rü ngechaüäcuma nidexa

10Poraäcü changechaü, Pa Máx, nax ñoma i naanewa choxü cungoxëëxü. Rü narümema chi nixí ga nax chayuxü ga noxritama chabuxgu, erü guxüwama i ngextá íchaxüxüwa rü duüxügü rü chauxchi naxaie. Rü woo taguma texéaxü chananangetanü rü taguma texé choxü tanangetanü, natürü guxüma i duüxügü rü chixexü chomaxã nixugüe.

11Natürü nüétama, Pa Corix, nax chixexü chomaxã yaxugüexü. Erü cuma rü meama nüxü cucuax nax aixcüma mea chayanguxëëxü i ngëma puractü i choxna cuxäxü rü poraäcü cupexewa naétüwa chachogüxü i ngëma chorü uanügü nax ícunanguxüxëëxüçax nawa i ngëma norü guxchaxügü i nagu namaxëxü.

#### Tupana nanaxunagü nax Iraétanüxügüxü napoxcuxü

12Rü Tupana rü ñanagürü: "¿Texé tá nüxü tarüporamae i ngëma duüxügü i Cadéuanecüçaxü i ñoma fiéru rü bróucherixü poraxüchixü? 13Rü ngëma perü pecädugügü, Pa Iraétanüxü, rü ngëmagagu tá perü uanügüna chanana i perü ngëmaxügü, rü perü diërugü, rü guxüma i pexü ngëmaxü i perü naanewa nax nüma yanamareäxüçax. 14Rü ñuxma rü tá perü uanügü mexëwa pexü changemagüxëxë, rü wüxi i naane i tama nüxü pecuáxüwa tá pexü nagagü. Erü poraäcüxüchima pemaxã chanu rü ñoma wüxi ya üxu ya tüxü iguxünerixü tá pexü chaguxëxë", ñanagürü ya Tupana.

#### Yeremía rü Tupanana nacaama

15Rü yexguma ga Yeremía rü Tupanaxü nangäxü rü ñanagürü: "Pa Corix, Pa Tupanax, cuma nüxü cucuax nax cuxü changechaüxügü nixí i ngúxü chingexü. Rü ñaa duüxügü rü chowe ningëxütanü nagagu nax nüxü chixuxü i curü ore. iRü taxü i choxna quixügachixü erü tá choxü nimaxgü! iRü naxmexwa choxü inanguxuchixëxë rü ëcü cuma napoxcue! 16Rü yexguma chomaxã quidexagu rü choma rü chanayaxu ga

yema curü ore. Rü yema curü ore nixĩ ga choxũ poraxẽẽxũ rü choxũ taãxẽẽẽxũ erü curü duũxũ chixĩ, Pa Corix, Pa Tupana ya Guxũétüwa Ngẽxmacüx. <sup>17</sup>Rü choma rü tama namaxã chaxãmücü i ngẽma duũxũgü i norü petaguxicatama rüxinüexũ. Rü yexguma cuma choxũ cuyaxũxgucürüwatama rü marü chaxicatama ichayarüxũũxũ yerü cuma naxchi choxũ cuxaixẽxẽ i ngẽma norü chixexũ”, ñanagürü ga Yeremía.

.....

#### Ore i muxũguma ixuxũ

**17** <sup>5</sup>Rü nüma ya Cori ya Tupana rü ñanagürü: “Äücumaxũ tümamaxã chaxuegu ya yíxema choxna ixũgachixe nagagu nax tümarixũ duũxũgünamare tarüyoexũ rü ngẽmaarü ngũxẽẽcãx tadauxũ. <sup>6</sup>Rü yíxema duũxẽ rü ñoma wüxi i nai i dexcuxũ i naxnecütexewa i nutatanüwa rüxüxũrũxũ tixĩ nax taguma texé tüxna dauxũ. Rü ñoma wüxi i nai i ínayucüraanexũwa rü taxúema íxãpataxũwa rüxüxũrũxũ tixĩ ya yíxema duũxẽ ya choxna ixũgachixe. <sup>7</sup>Natürü mexũ tümamaxã chaxuegu ya yíxema choxna rüyoexe rü chauxütawa tümaarü ngũxẽẽcãx ícãxaxe. <sup>8</sup>Rü yíxema duũxẽ ya choxna rüyoexe rü ñoma wüxi ya nai ya natücutüwa rüxüxũne rü dexáwa nadagüchúmaxãnerüxũ tixĩ. Rü yima nai rü tagutãma nagüatü i ngẽxguma yapaanegu. Rü natanü rü guxũgutãma nabaca rü guxũgutãma naxoecha.

#### Duũxũarü ínühiga

<sup>9</sup>Rü nataxuma i tãxaci i tórü maxünerüxũ idorataxãxũ rü chixexüchixũ. <sup>¿</sup>Rü texé tá nüxũ cuáxe i

ngẽma nawa ngẽxmaxũ? <sup>10</sup>Rü choma ya Tupanaxicatama nixĩ i aixcuma chanangugüxũ i norü ínü i wüxichigü i duũxũ, rü chaxicatama nixĩ i nüxũ chacuáxũ nax tãxaciügu naxínüxũ. Rü ngẽma ñuxãcü tamaxũxũãcütama tá tüxũ chanaxütanü ya wüxíechigü”, ñanagürü ya Tupana.

.....

#### Üwechirüũgu ixuxũ i ore

**18** <sup>1</sup>Rü nüma ga Cori ya Tupana rü chomaxã nidexa rü ñanagürü: <sup>2</sup>“iËcü, íruxĩ rü yéa üwechixũpatawa naxü! Rü ngẽma tá cumaxã nüxũ chixu i wüxi i ore”, ñanagürü. <sup>3</sup>Rü yexguma ga choma i Yeremía rü ícharüxĩ rü üwechixũpatawa chaxü. Rü yexma nüxũ ichayangau ga guma üwechixũ ga máquinawa waixümü ímexẽẽcü. <sup>4</sup>Rü yexguma tama mea nüxũ ínganguxuchigu ga yema nawechi ga naxüxũ rü wenaxarü nanaxü yema waixümüwatama rü ñuxmata yema nüma nanaxwãxexũãcúma nüxũ ínganguxuchi. <sup>5</sup>Rü yexguma ga nüma ga Cori ya Tupana rü ñanagürü choxũ: <sup>6</sup>“Dücax, Pa Iraétanüxũgüx çtama èxna inamexũ i ngẽma üwechixũ waixümümaxã üxürüxũ pemaxã chanaxüxũ? Rü ngẽma waixümü i üwechixũ namaxã inacuãx rü ngẽxgumarüxũ ta nixĩ i chomax i pemaxã ichacuáxũ. Rü chomatama ya Cori ya Tupana nixĩ i nüxũ chixuxũ i ngẽma. <sup>7</sup>Rü ngẽxguma choma chanaxwãxegu rü choxũ natauxcha nax chanaxoxẽẽxũ i wüxi i nachixũane rü íchanataxüchixũ i ngẽma norü ãẽxgacü. <sup>8</sup>Natürü ngẽxguma chi ngẽma

nachixũane rü nüxna yaxũgachigu i ngẽma chixexũ i nagu ínamaxũxũ, rü marũ taxũchima naxçax ngẽma chanamu i ngẽma poxcu i naxçax íchamexẽẽxũ. <sup>9</sup>Rü ngẽxgumarũxũ ta ega choma chanaxwaxegu rü choxũ natauxcha nax chanaporaxẽẽxũ rü chanataxẽẽxũ i wüxi i nachixũane.

<sup>10</sup>Natürü ngẽxguma chi ngẽma nachixũane chixexũ naxũxgu rü marũ tama naga naxĩnũgu i ngẽma chorü ucuxẽ, rü ngẽma mexũgu i namaxã chaxueguxũ rü marũ taxũtãma nüxna chanaxã. <sup>11</sup>Dũcax, Pa Yeremíax, irü namaxã nüxũ ixu i guxũma i Yudáanecũãxgũ rü Yerucharéũcüãx i duũxũgũ rü choma ya Cori ya Tupana rü ñacharũgũ nüxũ: ‘Ñũxma rü marũ nagu charũxĩnũ nax pexũ chapoxcuexũ! iRü nüxũ perũxoe i ngẽma chixexũ i nagu pemaxẽxũ rü mexũgu perũxĩnũe rü mexũ pexũgũ!’, ñacurũgũ tá nüxũ!

<sup>12</sup>Natürü i nũmagũ rü tá ñanagürũgũama cuxũ: ‘iTaxũ i natũçaxmamare tomaxã nüxũ quixuechaxũ! Erü tanaxwaxe nax toma nagu tarũxĩnũexũãcũma tamaxẽxũ, rü ngẽmaãcü taxũegama nax taxĩnũexũ erü ngẽma nixĩ i nagu tarũxĩnũexũ’, ñanagürũgũama tá cuxũ.”

.....

### Ore i tũxũ ipuxũgu ixuxũ

**19** <sup>1</sup>Rü nüma ya Cori ya Tupana rü ñanagürü choxũ: “iNgĩçax nataxe i wüxi i tũxũ rü ñũxũchi naxçax nangema i ñuxre ya yimã ñanearü ãẽxgacũgũ rü chacherdótegiarü ãẽxgacũgũ! <sup>2</sup>iRü ñũxũchi Béũ-inóũiarü ngatema naxũ rü daa ñanearü ñãx i

ngẽma ngatexũwaama üxũwa namaxã nüxũ ixu i ngẽma ore i tá cumaxã nüxũ chixuxũ! <sup>3</sup>iRü ñacurũgũ tá: ‘Pa Yudáanecũãxaru ãẽxgacũgũ rü Pa Yerucharéũcüãxgũ, rü iperũxĩnũe ya yimã tórü Tupana ya guxãétũwa ngẽxmacũaru ore i ñaxũ: Rü ñaa naanewa tá chanamu i wüxi i taxũ i guxchaxũ rü guxãtãma ya yĩxema nüxũ ñnũchigaxe rü tá tabãxãchi! <sup>4</sup>Erü ngẽma Iraetanũxũgũ i Yudáanewa ngẽxmagũxũ, rü choxna nixĩgachi rü ñaa ngatexũwa togũmare i tupanacax pumáratexe nigugũ, rü ngẽmaãcü nüxũ nicuãxũxũ i ngẽma tupananetagũ i tama pexçax ixĩxũ, rü bai i perũ oxigũçax, rü bai i Yudáanecũãxaru ãẽxgacũgũçax. Rü yema tupananetapexewa tũxũ ñagu ga guxema naxacũgũ ga taxuxũma ga chixexũ ügũxe. <sup>5</sup>Rü yema ãmarearü guchicaxũgũ ga naxũgũxũwa rü naxacũxe tũxũ ñagu naxçax ga Baá. Rü ngẽma nacũma i chixexũ rü tama choma chanamu rü taguma namaxã nüxũ chixu rü bai i ñuxgu chauãewa ínguxũ nixĩ ga yema. <sup>6</sup>Rü ngẽmacax rü tá nawa nangu i ngunexũgũ i ñaa nachica i ngatexũ rü marũ taxũtãma Topéarü ngate i Béũ-inóũgu naxãéga. Rü tá ngatexũ i Máetachicagu naxãéga. Rü chomatama ya Cori ya Tupana nixĩ i nüxũ chixuxũ i ngẽma ore. <sup>7</sup>Rü ñaa ngatexũgu tá inayarũxo i ngẽma Yudáanecũãxgũ, rü Yerucharéũcüãxgũ nagu rüxĩnũexũ. Rü norü uanũgũmexẽgu tá chanayixẽxẽ nax nadaiaxũçax, rü ngẽmaãcü ngurucugũ rü õxchagũ rü aigũ namaxã ãwemũgũxũçax. <sup>8</sup>Rü ngẽmaãcü ya daa ñane rü tá wüxi i chianexũxũ

chananguxuchixêxê. Rû ngêxguma duûixûgû ngêmaxû nadaugûgu rû tá nabajixâchie. Rû guxâma ya texê ya nawa üpetuxe rû namaxâ tá tabajixâchie nax ñuxâcü nachixexû. <sup>9</sup>Rû daa ñane ya Yerucharéüwa tá chanamugû i norü uanügû rû tá nüxû ñinachomaeguâchi. Rû ngêmacax taxucürüwa ngextá naxî ya yimá ñanecüâx. Rû ngêmagagu taiya tá naxçax ñangu rû ngêmacax i ngêma duûixûgû rû düxwa tá naxacüegû tüxû nangõxgû, rû nügütátama nangõxcue', ñacurügû tá nüxû. <sup>10</sup>Rû ñaa orexû quixuxguwena irü yapuxêxê i ngêma tüxû napexegu i ngêma âëxgacügû i cuxû ümücügüxû! <sup>11</sup>iRû nüxû ñacurügû tá: 'Cori ya Tupana ya guxâétüwa ngêxmacü rû ñanagürü: Rû daa ñane rû tá chanapuxâchixêxê ñoma wüxi i tüxû ngîxû ipuâchixêëxürüxû i taxuacüma wena ngîxû imexêëcürüxû! Rû nüma i duûixûgû rû tá ñaa ngatexû i Topégu nanatxgû i norü yuexügû erü marü taxugu nanatxgüéga. <sup>12</sup>Rû ngêmaâcü tá namaxâ chanaxü ya daa ñane rû norü duûixügû. Rû ngêma nax Topéxû naxoexürüxû rû duûixügû rû tá nüxû naxoe ya daa Yerucharéü nagagu i ngêma muxichixû i yuexû i nagu taxgüxû.' Rû chomatama ya Cori ya Tupana nixî i nüxû chixuxû i ngêma ore. <sup>13</sup>Rû ngêma ngatexû i Topérüxû rû chopexewa rû nixâüâchi ya yima îpatagü ya Yerucharéücüâx rû yima Yudáanecüâxarü âëxgacüpatagü rû ngêma îâxtügü ga nawa woramacurigüçax pumáratexe yagugüxû, rû guma bínu ga norü âmarexû yexma nabagücü naxçax ga to ga norü tupanenetagü", ñanagürü ya

Tupana. <sup>14</sup>Rû yemawena rû nüma ga Yeremía rû ñixû ga Topéwa ga Cori ya Tupana namaxâ idexaxûwa. Rû Tupanapataxtügu nayachi rû yéma guxûma ga duûixügümaxâ nidexa rû ñanagürü nüxû: <sup>15</sup>"Rû Cori ya tórü Tupana ya guxâétüwa ngêxmacü, rû ñanagürü: 'Rû daa ñanewa rû guxûnema ya norü ngaicamagune ya ñanegüwa tá chanamu i guxûma i ngêma poxcu i pemaxâ nüxû chixuxû erü tama naga pexînüechaü i ngêma chorü ore'", ñanagürü ya Tupana.

#### Yeremía rû ngüxû ninge

**20** <sup>1-2</sup>Rû nüma ga Pachúru ga Imé nane ga tupaucaarü âëxgacü ga chacherdóte ixîcü, rû yexguma nüxû naxînúgu ga yema ore ga Yeremía nüxû ixuxû, rû norü duûixügüxû namu nax yayauxgüaxüçax rû nacuaixgüaxüçax. Rû Bëyamígu âëgaxû ga îâxütawa yexmaxû ga poxcurüüwa nayachotaparagü ga tupaucaarü ngaicamána. <sup>3</sup>Rû moxûâcütama rû nüma ga Pachúru rû norü duûixügüxû namu nax Yeremíaxû íyachogüparagüxû. Rû yexguma ga nüma ga Yeremía rû ñanagürü nüxû: "Nüma ya Cori ya Tupana rû nanaxüchicüxü i cuéga, rû Magúru-michabígu cuxû naxüéga. (Rû ngêma naéga rû 'yatü i muüâcü maxüxû' ñaxüchiga nixî.) <sup>4</sup>Erü nüma ya Cori ya Tupana rû ñanagürü: 'Rû muü tá cuxçax rû cumücügüçax íchanguxêxê. Rû cuxetümaxâ tá nüxû cudau nax cupexegu taramaxâ cumücügüxû nadajüxû i norü uanügü. Rû ngêma Yudáanecüâx rû Babiróniaanecüâx ya

ãêxgacümexêgu tá nayi. Rü nüma rü tá Babiróniaanewa nanagagü ya daa ñanecüãx i duũxũgü norü puracütanũxü rü ngêxma tá nayadai. <sup>5</sup>Rü ngêxgumarũxü ta rü curü uanüguina tá chanana i guxüma ya daa ñanearü diêrugü rü norü ngêmaxügü i tatanũxü rü guxüma i diêru i Yudañanecüãxarü ãêxgaciãrü ixĩxü nax Babiróniaanewa nanaaxũcãx. <sup>6</sup>Rü cumax, Pa Pachúru, rü Babiróniaanewa tá cuxü nagagü wüxigu namaxã i cuxacügü rü cuxmax rü cumücügü. Rü ngêxma tá nixĩ i cuyuxü, rü ngêxma tá cuxü nataxgũxü i cuxmax rü guxüma i cumücügü ga dora ga orexü namaxã quixuxü”, ñanagürü ga Yeremía.

#### Yeremía rü Tupanamaxã narüxutaga

<sup>7</sup>Rü nüma ga Yeremía rü Tupanamaxã narüxutaga rü ñanagürü nüxü: “Pa Corix, Pa Tupanax, cuma rü choxü cuwomüxêxê, erü chomaxã icuxunetachirex nax choxü curüngũxêxêxü. Rü cumax rü choxü cumuama nax namaxã nüxü chixuxũcãx i curü ore erü cuxrütama ngúchaü nixĩ i ngêma, rü tama i choxrü. Natürü i ñuxma rü daa ñanearü cogüruxü chixĩ, rü chaugu nidauxcüraxũgü. <sup>8</sup>Rü guxũguma i ngêxguma chidexagu rü chanaxunagü nax cuma rü tá cunadãixü i daa ñanecüãx. Rü ngêmacãx guxũguma taxacü chomaxã nixugüe rü choxü nacugüe erü nüxü chixu i curü ore. <sup>9</sup>Rü ngêxguma chi nagu charüxĩnügü nax nüxü charüxoxü nax nüxü chixuxü i curü ore, rü chi ngêma curü ore i chorü aixepena ngêxmaxü, rü ñoma üxü ya choxü iguxũnerixü nixĩ, rü ngêma norü

pora rü ñuxmata chauxchinãxãwa nangu. Rü yaxna taax namaxã chaugü chaxĩnũxêxê nax tama nüxü chixuxũcãx i ngêma curü ore, natürü tama namaxã chapora. <sup>10</sup>Natürü guxũwama nüxü chaxĩnü i chauchiga nax yadexagũxü rü choxü naxãxünegũxü i duũxũgü rü ngêmacãx chamuü. Rü ñanagürügü: ‘Rü cuxü tá ítaxuaxũgü’, ñanagürügü. Rü woo i ngêma tama chomücü ixĩgũxü rü choxü nangugügü, rü ñananguxêêgü nax ngürüãchi chixexü chaxixü. Rü ñanagürügü: ‘Rü nügütátama nixĩ i chixexügu nanguxêêxü, rü ngêxguma i yixema rü tá tayayauxgü rü yixema inaxwãxexü tá namaxã taxü’, ñanagürügü. <sup>11</sup>Natürü i cumax, Pa Corix, Pa Tupanax, rü chauxütawa cunxema, rü chorü poxüruxü quixĩ rü guxũxü curüporamae. Rü ngêma chowe ingêxütanũxü rü cuxmexgu tá nayi, rü tagutãma choxü narüporamaegü. Rü ngêma norü ñnügü rü chixri tá nüxü ñnanguxuchi rü tá naxãnee. Rü ngêma chixexü i naxügũxü rü tagutãma nüxna inarüxo. <sup>12</sup>Pa Corix, Pa Tupana ya Guxãétüwa Ngêxmacüx, cuma rü aixcüma nüxü cucuãx nax mea cunangugũxü i guxüma i norü maxü i wüxichigü i duũxũgü. iRü choxü nüxü nadauxêxê nax ñuxãcü tá cunapoxcuxü i ngêma duũxũgü! Erü cuxmexgu nixĩ i chanaxũxü i ngêma guxchaxũgü i nagu charüxĩnũxü. <sup>13</sup>Rü ñuxma rü tá chorü wiyaemaxã cuxü chicuãxũxü rü moxê cuxna chaxã, Pa Cori Pa Tupanax. Rü woo chaturaxgu, natürü i cuma rü choxü ícupoxü nüxna i chorü uanügü”, ñanagürü ga Yeremía.

.....

Nuxácü tá nixí i Iraécüãxgü i yixcüama

**23** <sup>1</sup>Rü nüma ya Cori ya Tupana rü nüxü nixu rü ñanagürü: “Rü nügümaxã nangechaügü ya yimá orearü uruügü ya tama mea nüxna daucü i chorü duüxügü rü nawoonexëẽmareãcü”, ñanagürü. <sup>2</sup>Rü nüma ya Cori ya Tupana rü ñanagürü nüxü i ngẽma ãëxgacügü i Iraéanecüãxgümaxã icuáxü: “Pema rü penawoonexëẽmare i chorü duüxügü, rü penaxígüxëẽmare rü tama aixcüma nüxna pedaugü. Dücax, rü ñuxma i choma rü tá ngẽma chixexü i pecümacax pexü chapoxcue. Rü chomatama ya Cori ya Tupana nixí i pemaxã nüxü chixuxü i ngẽma. <sup>3</sup>Rü chomatátama chayagagü i ngẽma chorü duüxügü ga togü ga nachixüanegügu chawoonexü. Rü tá chanaxítaquexexëẽ nax wena nachixüanecax nawoeguxüçax, rü ngẽmaãcü ngẽma yamuxüçax. <sup>4</sup>Rü natanügu tá chanamugü i ãëxgacügü i aixcüma mea nüxna dauxü nax ngẽmaãcü taxucaxma namuüexüçax, rü taxuxüma iyarütaxuxüçax. Rü chomatama ya Cori ya Tupana nixí i nüxü chixuxü i ngẽma.” <sup>5</sup>Rü nüma ya Cori ya Tupana rü nüxü nixu rü ñanagürü: “Rü wüxi i ngunexü rü wüxi ya nataaxüchi ya Dabí rü tá Iraétanüxügüarü ãëxgacü nixí. Rü nüma rü tá mea chorü duüxügümaxã inacuaç, erü aixcüma tá cuçax nüxü nangexma. Rü nüma rü aixcüma tá inayanawexãchixëẽ i norü guxchaxügü i ngẽma duüxügü i ñoma i naanewa maxëxü. <sup>6</sup>Rü ngëxguma nüma ãëxgacü yixíxgu rü Yudáane rü taxütáma to i nachixüane namaxã inacuaç rü ngẽma Iraéanearü duüxügü

rü taxucaçtáma namuüe. Rü ngẽma naéga i tá namaxã naxugüãxü ya yimá ãëxgacü rü Cori ya Tamaxã Rüporamaecü tá nixí”, ñanagürü ga Tupana.

.....

**Tupana rü Yeremíaxü nüxü nadauxëxë ga taxre ga pexchi ga ígumaxã ããcucü**

**24** <sup>1</sup>Rü Babiróniaanecüãxaru Babiróniaanewa nanaga ga Yudáanecüãxaru ãëxgacü ga Yeconía ga Yoachü nane ixícu. Rü wüxigu namaxã yéma nanaga ga Yeconíaaru ngüxëeruügü ga ãëxgacügü, rü norü puracütanüxügü. Rü yemawena ga Tupana rü choxü nüxü nadauxëxë ga taxre ga pexchi ga ígumaxã ixããcucü ga Tupaucaarü toxmãxtagu nücü. <sup>2</sup>Rü wüxi ga guma pexchiwa rü nayexmagü ga ígu ga mexü ga nüxíra idauxü. Rü guma nai ga pexchiwa rü nayexma ga ígugü ga poraãcü ichixexü rü taxuacüma imúxü. <sup>3</sup>Rü nüma ga Cori ya Tupana rü choxna naca rü ñanagürü: “Pa Yeremíax çtaxacü yixíxü i ngẽma nüxü cudauxü?” ñanagürü. Rü choma rü chanangãxü rü ñachagürü: “Nüxü chadau i orix i ígu i mexechixü rü togü i chixexüchixü i taxuacüma ingóxü”, ñachagürü. <sup>4</sup>Rü yexguma ga nüma ga Cori ya Tupana rü ñanagürü choxü: <sup>5</sup>“Choma ya Cori ya perü Tupana rü ñachagürü: ‘Rü ngẽma ígu i mexürüüãcü tá nüxü chadau i ngẽma duüxügü i Iraétanüxü i Yudáanecüãxgü ga ñaa naanewa íchawoxüxü rü Cadéugüchixüanewa chamugüxü. Rü ngëmagü rü tá namaxã chataãxë rü tá nüxü charingüxëxë. <sup>6</sup>Rü ngẽma naanewa

rü nüxna tá chadau rü ñaa nachixüanecax tá chanawoeguxêxê. Rü nua tá nüxü charüngüxêxê rü tagutáma wena chanadai. Rü nua tá chanangexmagüxêxê rü tagutáma wena íchanawoxü. <sup>7</sup>Rü cuax tá nüxna chaxá nax ngémaacü choxü yacuaxächigüxüçax nax choma chixixü ya Cori ya Tupana. Rü nümagü rü chorü duüxügü tá nixügü, rü choma rü tá norü Tupana chixí erü guxü i norü maxümaxá tá çauçax nawoegu. <sup>8</sup>Natürü i ngéma Yudaanecüaxarü äëxgacü i Chedequía rü norü ngüxêëruügü i äëxgacügü, rü ngéma Yerucharéüçüxgü i tama íchoxüxü, rü ngéma duüxügü i Equítuanewa maxêxü, rü ngéma ígu i chixexü i taxuacüma ingóxürüüacü tá namaxá chixí nax nüxü chaxoxü. <sup>9</sup>Rü poraacü tá chanapoxcue i ngéma duüxügü rü ngëmacax i ngéma togü i nachixüanecüaxgü rü ngëxguma ngëmaxü nadaugügu rü tá poraacü namaxá nabaixächie. Rü ngéma nachixüanegü i nawa nabuxmüxüwa, rü duüxügü rü tá nagu nidauxcüraxügü rü nüxü nacugüe rü nüxü naxoe rü chixexü namaxá nixugüe. <sup>10</sup>Rü ngéma tá naxçax íchanguxêxê i ngéma Yerucharéüwa yaxügüxü, rü ngëxma tá nixí nax nadaiaxü, rü taiya naxçax íngugüxü ñuxmatáta taxuxütáma íyaxü nawa i ñaa naane ga nüxna chaxäxü, rü norü oxígüna chaxäxü”, ñanagürü ga Cori ya Tupana. ....

**Yudaanecüaxgü rü 70 ya taunecü tá Babirónianecüaxarü äëxgacümexêwa nangexmagü**

**25** <sup>8</sup>Rü Cori ya Tupana ya guxäétüwa ngëxmacü rü ñanagürü: “Rü ñuxma i pemax nax tama

naga pexinüechaüxü i ngéma chorü ucuxê rü tá pexü chapoxcue. <sup>9</sup>Rü naxçax tá changema i guxüma i nachixüanegü i nórtewa ngëxmagüxü rü Nabucudonochó ya Babirónianecüaxarü äëxgacü. Rü nümagü rü tá nua naxí rü tá pexçax ínayaxüächi, rü tá pexü nadai, rü tá nanadai i guxüma i nachixüanegü i perü ngaicamána ngëxmagüxü. Rü ngémaacü tá pexü chaguxêxê. Rü guxügutáma pechicaxica ngéma nangox rü ngémaacü i ngéma duüxügü i nüxü daugüxü rü tá poraacü namaxá nabaixächie rü namuüe. <sup>10</sup>Rü ngémaacü i nua perü íanegüwa rü taxuxütáma i wiyaexü taxínü, rü taxúetáma tapetae rü tataaxêgü, rü taxuxütáma äxmaxarü wiyaexü taxínü. Rü ngéma tríguarü carüügü rü marü taxütáma napuracüe rü guxüwatáma naxëanemare erü omügü rü tá nixogü. <sup>11</sup>Rü ñaa nachixüane rü guxüwatáma nachixe, rü nachitaüxicatama ngéma nayaxü. Rü ngéma norü duüxügü rü 70 ya taunecü rü Babirónianecüaxarü äëxgacümexêwa tá nangexmagü. <sup>12</sup>Rü ngëxguma 70 ya taunecü ínguxgu nax ngéma nangexmagüxü i ngéma duüxügü, rü choma rü tá nüxna chaca i Babirónianecüaxarü äëxgacü i norü chixexüchiga. Rü ngéma nachixüane i ngéma Babirónianecüaxgü rü ñoma taxúema ngëxma ächiüxürüxü tá nixí i nachica. Rü chomatama ya Cori ya Tupana nixí i nüxü chixuxü i ngéma ore. <sup>13</sup>Rü ngéma nachixüanewa tá chananguxêxê i guxüma i ngéma guxchaxügü rü ngechaügü ga Yeremía chauégagu nüxü ixuxü naxçax i guxüma



i ngêma nachixûanegü i chixexû ügüxû.  
 14Erü muxûtáma i nachixûanegü, rü  
 poraexû i âëxgacügü tá ngêma  
 Babiróniaanemaxá inacuax yema nüma  
 ga Babiróniaanecüâxgü rü chorü  
 duüxügümaxá inacuaxgüxürüxû. Rü  
 choma rü tá yema ñuxácü chorü  
 duüxügümaxá nax inacuaxgüxürüüâcü  
 tátama namaxá chixí i ngêma  
 Babiróniaanecüâxgü”, ñanagürü ga Cori  
 ya Tupana.

.....

**Popera ga Yeremía ümatüxû naxçax ga  
 duüxügü ga Babiróniaanewa gagüxû**

**29** 1-2Rü nüma ga Nabucudonochó  
 ga Babiróniaanecüâxarü  
 âëxgacü rü Babiróniaanewa nanagagü  
 ga Yudáanecüâxarü âëxgacü ga Yeconía  
 wüxigu naémaxá, rü yema napatawaarü  
 puracütanüxümaxá rü yema Yerucharéü  
 rü Yudáanecüâxarü âëxgacügümaxá rü  
 yema corapínagü rü yema togü ga  
 puracütanüxümaxá. Rü yemawena rü  
 nüma ga Yeremía rü Yerucharéüwa  
 nanaxümatü ga wüxi ga popera naxçax  
 ga yema Yudíugü ga Yudáanecüâxarü  
 âëxgacügü, rü chacherdótegü, rü orearü  
 uruügü rü guxüma ga duüxügü ga  
 Babiróniaanewa nagagüxû. 3Rü yema  
 popera rü Erácha ga Chapáü nane rü  
 Guemaría ga Ichía nanena naxá nax  
 Babiróniaanewa nangegüaxüçax. Yerü  
 yemagüxü nixí ga namuxü ga  
 Yudáanecüâxarü âëxgacü ga Chedequía  
 nax Babiróniaanewa naxíxüçax, rü  
 âëxgacü ga Nabucudonochóna  
 yaxägüaxüçax. Rü yema popera rü  
 ñanagürü: 4“Pa Guxáma ya  
 Yerucharéüwa Íchoxüxe rü

Babiróniaanewa Pexü Nagagüxex, rü  
 nüma ya Cori ya tórü Tupana ya  
 guxüétüwa ngëxmacü rü ñanagürü  
 pexü: 5“iRü pixüpatagü rü yimawa  
 pemaxê! iRü nanetü petogü rü  
 ngëmaarü o pengöxgü! 6iRü  
 pixâxmaçgü, rü pixânegü, rü  
 pixâxácügü, rü ngêma penegü rü tá  
 yaxâxmaçgü nax yaxâxácüxüçax, rü  
 ngëmaâcü pimuxüçax i ngêma  
 ípengexmagüxüwa nax tama  
 pinoxretanüxüçax! 7iRü naxçax  
 pepuracüe ya yima ñane ya Babirónia ya  
 nawa pexü nagagüne rü naxçax  
 peyumüxëgü! Erü ngëxguma mexü  
 naxçax ínguxgu ya yima ñane, rü pexçax  
 rü ta mexü ínangu.’ 8Rü choma ya Cori  
 ya perü Tupana ya guxâétüwa  
 ngëxmacü, rü pexü chaxucüxë: ‘Rü tama  
 chanaxwaxe nax pegü  
 penawomüxëëgüxëxü i ngêma orearü  
 urüügüneta rü ngêma iyüüexü i  
 petanüwa ngëxmagüxü. iRü taxú i naga  
 pexínüexü ega pemaxá nüxü yaxuxgu i  
 ngêma nanegügü! 9Rü ngêma nüma  
 chauégagu pemaxá nüxü yaxugüxü rü  
 wüxi i doramare nixí. Erü tama choma  
 chanamu nax nüxü yaxugüxüçax.’ Rü  
 chomatama ya Cori ya Tupana nixí i  
 pemaxá nüxü chixuxü i ngêma. 10Rü  
 choma ya Cori ya Tupana rü ñachagürü:  
 ‘Ngëxguma 70 ya taunecü marü  
 ínguxgux nax Babiróniaanewa  
 pengexmagüxü rü ngëxguma i choma rü  
 tá pexü charüngüxëxë rü tá  
 chayangüxëxë i ngêma chorü uneta ga  
 pemaxá nüxü chixuxü nax wena tá pexü  
 chawoegüxëxü naxçax i ngêma naane i  
 pexna chaxáxü. 11Rü choma rü nüxü  
 chacuax i ngêma pexçax nagu

charüxínüxü. Rü ngëma chorü inü rü perü mexçax nixí rü tama i perü chixexüçax. Erü choma rü tá chapexütagu ñuxmatáta naxüpetü i ngëma guxchaxüğü i ñuxma pexü ngëxmaxü, rü ngëmawena rü tá pexna chanaxā i wüxi i taãxē i aixcüma ixüxü.’ Rü chomatama ya Cori ya Tupana nixí i nüxü chixuxü i ngëma. <sup>12</sup>‘Rü ngëxguma marü wena naxçax pewoeguxgux i ngëma naane i pexna chaxāxü, rü ngëma perü yumüxëwa tá choxna pecaxgu, rü choma rü tá pexü chaxínü. <sup>13</sup>Rü çaxçax tá pedaugü rü tá choxü ipyangau erü aixcümaxüchi tá choxü peyaxögüäcüma çaxçax pedaugü’”, ñanagürü ga Tupana.

.....

#### Ngexwacaxüxü i Tupanaarü uneta

**31** <sup>31</sup>Rü nüma ga Cori ya Tupana rü nüxü nixu rü ñanagürü: “Rü wüxi i ngunexügu rü ngexwacaxüxü i uneta tá pemaxā chaxü, Pa Iraéanecüäxgü rü Yudáanecüäxgü. <sup>32</sup>Ngëma uneta rü taxütáma yema nüxíraxüxü ga uneta ga perü oxigümaxā chaxüürüxü tá nixí, yerü yexguma Equítuanewa tüxü íchangüxüxëegu rü tümagü rü tama aixcüma tayangüxëxë ga yema chorü uneta woo tümaarü yora nax chixixü ga chomax. Rü chomatama ya Cori ya Tupana nixí i nüxü chixuxü i ngëma. <sup>33</sup>Rü ñaa tá nixí i ngëma ngexwacaxüxü i chorü uneta i Iraétanüxümaxā chaxüxü: ‘Rü naãxëwa tá chanangexmaxëxē i chorü mu rü ngëma tá nangexma nax tama nüxü iyanangümaexüçax. Rü choma tá nixí i norü Tupana chixixü, rü nümagü rü tá

chorü duüxügü nixügü.’ Rü chomatama ya Cori ya Tupana nixí i nüxü chixuxü i ngëma. <sup>34</sup>Rü ngëxguma rü tá marü taxuçaxtáma texé toguexü tangüxëxë nax choxü tacuáxüçax, rü bai i tümamücü, rü bai i tümatanüxü. Erü ngëxguma rü tá guxāma ya yaxe rü woo buxe rü tá choxü tacuaxgü. Rü choma rü tá tüxü nüxü icharüngüma i tümaarü chixexü rü marü tagutáma nüxna chacuaxāchi i tümaarü pecädugü. Rü chomatama ya Cori ya Tupana nixí i nüxü chixuxü i ngëma”, ñanagürü.

.....

#### Iraétanüxümaxā inaxüga ga Tupana rü wena tá nüxü nangüxëxü

**33** <sup>1</sup>Rü yexguma Yeremía äëxgacüpataxütuwa yexmaxü ga poxcuchicaxüwa nayexmagu, rü nüma ga Cori ya Tupana rü namaxā nidexa rü ñanagürü nüxü: <sup>2</sup>“Choma ya Cori ya Tupana ga bopüxüäcü nangoxëëcü i ñaa naane rü nachicagu naxücü nax tama ngëma yaxügachixüçax, rü chomatama nixí i ñachaxü cuxü: <sup>3</sup>‘iRü choxna naca rü tá cuxü changāxü! Rü tá cuxü nüxü chacuaxëxē i taxacü i taxü i ëxüguxü i taguma nüxü cudaduxü’”, ñanagürü ga Tupana.

.....

#### Yeremía rü Barüxü namu nax naxümatüaxüçax i Tupanaarü ore

**36** <sup>1</sup>Rü yexguma Yoachüü ga Yochía nane rü marü ägümücü ga taunecü Yudáanearü äëxgacü yixixgu, rü Cori ya Tupana rü Yeremíamaxā nidexa rü ñanagürü nüxü: <sup>2</sup>“iËcü nayaxu i ngëma popera i dixpütaxü rü ngëmagu

naxümatü i guxüma i ngëma ore i cumaxã nüxü chixuxü i Iraéanecüãxgüchiga, rü Yudáanecüãxgüchiga, rü ngëma togü i nachixüanecüãxgüchiga! iRü ngëxma naxümatü i ngëma ore ga cumaxã nüxü chixuxü ga yexguma Yochía ãëxgacü ixixgu rü ñuxmatáta nawa nangu i ngëma ore i ñuxma cumaxã nüxü chixuxü! <sup>3</sup>Rü ngëxguma ngëma Yudáanecüãxgü nüxü nacuáchigagügu i ngëma poxcu i naxçax íchanguxëëchaüxü rü bexmana tá nüxü naxoe i nacüma i chixexü, rü choma rü tá nüxü nüxü charüngüma i ngëma norü chixexügü rü norü pecádugü”, ñanagürü ga Tupana. <sup>4</sup>Rü nüma ga Yeremía rü Nería nane ga Barúxçax nangema rü gumamaxã nüxü nixuchigü ga Tupanaarü ore nax naxümatüaxüçax. <sup>5</sup>Rü ñuxüchi nüma ga Yeremía rü Barúxü naxucuxë rü ñanagürü: “Düçax, ñuxma choma nax chapoxcuxü rü taxucürüwa Tupanapatawa chaxü. <sup>6</sup>Rü ngëmacax i ngëxguma marü nawa nanguxgu nax wena naxaurexü i duüxügü rü name i cumax ngëma Tupanapatawa cuxü nax ngëma namaxã nüxü cudaumatüxüçax ga yema ore ga poperagu cuxü chaxümatüxëëxü. Erü ngëma ngunexügu rü tá nangexmagü i muxüma i duüxügü i guxüwama i Yudáanewa ne íxü, rü ngëmaäcü tá nüxü naxinüe i Cori ya Tupanaarü ore. <sup>7</sup>Rü bexmana ngëxguma ngëmaxü naxinüegu i ngëma duüxügü rü Tupanaçax tá nawoegu, rü nüxü naxoe i norü chixexügü rü Tupanana nacagüe nax norü chixexügüxü iyanangümaxüçax naxüpa nax napoxcuxü. Erü ngëma poxcu i Tupana namaxã ueguxü i ngëma duüxügü rü poraäcü naxäücumaxüchi”,

ñanagürü ga Yeremía. <sup>8</sup>Rü nüma ga Barúx rü nanaxü ga yema Yeremía namaxã nüxü ixuxü. Rü Tupanapatawa tagaäcü duüxügüpexewa nüxü nadaumatü ga yema ore ga yema poperagu ümatüxü.

.....

**Barúx rü ãëxgacügüpexewa nüxü nadaumatü ga popera**

<sup>11</sup>Rü nüma ga Micaía rü nüxü naxinü ga yema Tupanaarü ore ga Barúx nüxü ixuxü. Rü Micaía rü Yemaría nane nixü rü Chapáütaxa nixü. <sup>12</sup>Rü nüma ga Micaía rü ãëxgacüpatawa naxü rü nagu naxücu ga yema ucapu ga nawa nayexmagüxü ga yema ãëxgacüarü ngüxëëruügü. Rü yéma nayexmagü ga Ericháma ga ãëxgacüarü poperaarü daruxü, rü Deraía ga Chemaía nane, rü Enatáü ga Abúru nane, rü Yemaría ga Chapáü nane, rü Chedequía ga Ananía nane rü guxüma ga togü ga ãëxgacüarü ngüxëëruügü. <sup>13</sup>Rü nüma ga Micaía rü yema ãëxgacüarü ngüxëëruügümaxã nüxü nixu ga yema ore ga Barúx duüxügüpexewa nüxü ixuxü.

.....

<sup>16</sup>Rü yexguma yagüegagu ga Micaía nax nüxü yaxuxü ga yema ore, rü nümagü ga yema ãëxgacüarü ngüxëëruügü rü poraäcü namuüe. Rü ñanagürügü: “Rü name nixü i ãëxgacümaxã nüxü tixu i ñaa ore”, ñanagürügü.

.....

**Ãëxgacü ga Yoachüü rü nayagu ga yema poperapüta**

<sup>22</sup>Rü nüma ga ãëxgacü ga Yoachüü rü wüxi ga norü ucapuwa nayexma, rü yéma üxüéütawa nügu inanaixü yerü

gáuanexĩarũ taumacũwa nangu. <sup>23</sup>Rũ nũma ga Yeudĩ ga ãẽxgacũarũ ngũxẽerũxũ rũ ãẽxgacũcax nũxũ nadaumatũ ga yema popera. Rũ yexguma tomaepũxchimũxũ rũexna ãgũmũcũchimũxũ nagũxuchixẽẽgu ga nũxũ nax nadaumatũxũ, rũ nũma ga ãẽxgacũ rũ norũ cũxchi tũxũ nayaxu rũ ĩnanawĩe ga yema marũ nũxũ nadaumatũxũ, rũ ũxũwa nayataxchuchi, rũ ñuxmata rũ yemaacũ nagũx ga gũxũma ga yema poperapũta. <sup>24</sup>Rũ woo nũma ga ãẽxgacũ rũ norũ ngũxẽerũũgũ ga nũxũ ĩnũexũ ga yema ore ga Yeudĩ nawa ngũxũ rũ tama namũe, rũ bai ga nax nangechaũgũxũ. <sup>25</sup>Rũ nũmagũ ga Enotáũ rũ Deraía, rũ ãẽxgacũxũ nacãaxũgũ nax tama yagũãxũcax ga yema popera, natũrũ ga nũma ga ãẽxgacũ rũ tama ĩnaxĩnũ. <sup>26</sup>Rũ yemacax nũma ga ãẽxgacũ rũ nanamu ga Yeramĩ ga natanũxũxũchi ĩxĩcũ rũ Cheraía ga Arié nane rũ Cheremía ga Adeé nane nax wena Yeremíaxũ yayauxgũxũcax wũxigu namaxã ga norũ ngũxẽerũxũ ga Barũx. Natũrũ nũma ga Cori ya Tupana rũ ĩnayacũxgũ.

**Yeremía rũ wena Barũxũ namu nax popera i dixpũtaxũgu naxũmatũãxũcax i Tupanaarũ ore**

<sup>27</sup>Rũ yexguma ãẽxgacũ yema nũxĩraxũxũ ga poperapũta ĩgũxguwena, rũ nũma ga Cori ya Tupana rũ Yeremíaxũ ñanagũrũ: <sup>28</sup>“ĩRũ to i poperapũtacax nadau, rũ ngẽxma wena naxũmatũ i ngẽma ore ga nũxĩraxũxũ ga poperapũta ga ãẽxgacũ ga Yoachĩũ ĩgũxũgu cuxũmatũxũ!” ñanagũrũ.

.....

<sup>32</sup>Rũ yexguma ga Yeremía rũ to ga poperapũta nayaxu. Rũ Barũxũ wena namu ga yemagu nax naxũmatũãxũcax ga yema ore ga nũxĩraxũxũ ga poperagu naxũmatũxũ. Rũ yema nũxĩra naxũmatũxũxũ narũmãxmae ga yema ore.

**Chedequía rũ Yeremíana naxcax ĩnaca**

**37** <sup>1</sup>Rũ Nabucudonochó ga Babiróniaanecũãxaru ãẽxgacũ rũ Chedequía ga Yochía nanexũ ningucuchixẽxẽ nax Yudáanecũãxaru ãẽxgacũ yixĩxũcax, nachicũxũ ga Yeconía ga Yoachĩũ nane. <sup>2</sup>Natũrũ woo ga Chedequía rũ norũ ngũxẽerũũgũ, rũ woo ga duũxũgũ rũ tama ĩnarũxĩnũe ga yema ore ga Cori ya Tupana Yeremíawa namaxã nũxũ ĩxuxũ.

.....

<sup>12</sup>Rũ nũma ga Yeremía rũ Yerucharéũarũ ĩanewa ĩnaxũxũchaũ nax Bẽyamíanewa naxũxũcax nax yema ĩyadauãxũcax ga wũxi ga naane ga nũxna ũxũ. <sup>13</sup>Natũrũ yexguma Yerucharéũarũ ĩãx ga Bẽyamĩgu ãégaxũwa nanguxgu, rũ yema nadauxũtae ga Iría ga Cheremía nane ga Ananĩataxa. Rũ nũma ga Iría rũ yema Yeremíaxũ nayachaxãchixẽxẽ, rũ ñanagũrũ nũxũ: “Cuma rũ quiña nax natanũwa cuxũxũcax i ngẽma torũ uanũgũ i Babiróniaanecũãxgũ”, ñanagũrũ nũxũ. <sup>14</sup>Rũ Yeremía nanangãxũga rũ ñanagũrũ: “Aixcũmaxũ chixu rũ taxũtãma Babiróniaanecũãxtanũwa chaxũ”, ñanagũrũ. Natũrũ ga Iría rũ tama ĩnaxĩnũ rũ Yeremíaxũ niyaxama rũ ãẽxgacũgũpexewa nanaga. <sup>15</sup>Rũ nũma

ga yema ãëxgacügü rü poraãcü Yeremíamaxã nanue. Rü norü churaragüxü namu nax nacuaixgüãxüçax. Rü ãëxgacüarü poperaarü daruxü ga Yonataüpatagu nanapoxcugü yerü guma ípata rü poxcupataxü nayaxíxëëgü. <sup>16</sup>Rü yemaacü ga Yeremía rü yema poxcuchica ga waixümütüüwa yexmaxügu nayataxcuchigü. Rü yemaacü muxüma ga ngunexü yéma nayexma. <sup>17</sup>Rü nüma ga ãëxgacü ga Chedequía rü norü churaragüxü namu nax ãëxgacüpatawa Yeremíaxü nagagüxüçax. Rü yexguma Yeremía ãëxgacüpeçewa nguxgu rü nüma ga ãëxgacü rü bexma Yeremíana naca rü ñanagürü: “¿Nangexmaxü nax ngexwacax cumaxã yadexaxü ya Cori ya Tupana?” ñanagürü. Rü nüma ga Yeremía rü nanangãxü rü ñanagürü: “Ngü, ngëmaacü nangexma. Rü Tupana rü ñanagürü: ‘Rü cumax Pa ãëxgacü rü naxmëxëgu tá cingu i ngëma Babiróniaanecüãxarü ãëxgacü’”, ñanagürü. <sup>18</sup>Rü ñuxüchi nüma ga Yeremía rü ãëxgacü ga Chedequíana naca rü ñanagürü: “¿Taxacürü chixexü cumaxã chaxü, Pa ãëxgacüx, rü taxacürü chixexü namaxã chaxü i curü ngüxëëruügü, rü taxacürü chixexü namaxã chaxü i duüxügü rü ngëmacax choxü pepoxcuxü? <sup>19</sup>¿Rü ngëxügü yixüxü i ñuxma ga yema orearü uruügü ga cumaxã nüxü ixugüexü ga Babiróniaarü ãëxgacü rü taxütama pëçax rü pechixüanëçax íyaxüãchixü? <sup>20</sup>iRü irüxínü, Pa ãëxgacüx, Pa Chorü Corix! Rü cuxü chacaxü nax tama wena ngëma poxcupataüwa choxü

cumuxüçax nax tama ngëxma chayuxüçax”, ñanagürü. <sup>21</sup>Rü yexguma ga ãëxgacü ga Chedequía rü norü churaragüxü namu nax tama yema noxri nagu napoxcuxü ga poxcupataügu namugüaxüçax. Rü yema ãëxgacüpataxtüwa yexmaxü ga poxcuchicaxügu nayamugü. Rü yexguma guma íanewa taxüta naguxgu ga paü, rü wüxichigü ga ngunexügu rü yexwacaxüxü ga paü nüxna naxãgüxü. Rü yemaacü yema ãëxgacüpataxtüwa yexmaxü ga poxcuchicaxügu nanamugü.

#### ãxmaxügu Yeremíaxü nitaxcuchigü

**38** <sup>1</sup>Rü ãëxgacüarü ngüxëëruügü ga Chepatía ga Matáü nane rü Yedaría ga Pachúru nane rü Yucá ga Cheremía nane, rü Pachúru ga Maraquía nane rü Yeremíaxü naxínüe ga yexguma duüxügüpeçewa ñaxgu: <sup>2</sup>“Nüma ya Cori ya Tupana rü ñanagürü: ‘Rü texé ya íanegu rüxáüxe rü tá tayu nagu i dai, rüçna taiyamaxã tayu, rüçna daxawëanëmaxã tayu. Natürü yíxema íñaxe rü Babiróniaanecüãxgüna tügü yaxãxe rü tá tügü ítapoxü nax tama tayuxüçax.’ <sup>3</sup>Rü nüma ya Cori ya Tupana rü ñanagürü: ‘Daa íane rü Babiróniaanecüãxarü ãëxgacüarü churaragümëxëgu tá nangu. Rü nüma rü tá nagu nachocu, rü taxüetáma ítanapoxü’”, ñaxgu ga Yeremía. <sup>4</sup>Rü yexguma yemaxü naxínüegu ga yema ãëxgacüarü ngüxëëruügü, rü ñanagürügü ãëxgacüxü: “Pa ãëxgacüx, name nixí i tayamaç i ñaa yatü erü ngëma dexa i nüxü yaxuxümaxã rü nananüexë i duüxügü, rü tóru

churaragü i nua tóru ñanewa yaxügüxü. Rü ñaa yatü rü tama daa ñanearü mexüçax nadau, natürü norü chixexüçax nixi i nadauxü”, ñanagürügü. <sup>5</sup>Rü nüma ga ãëxgacü ga Chedequía rü nanangäxü rü ñanagürü: “Marü name nax ngëma yatümaxä penaxüxü i ngëma pema penaxwaxexü. Choma rü taxucürüwa pexna chanachüxu i ngëma”, ñanagürü. <sup>6</sup>Rü yexguma ga nümagü ga norü ngüxëerüügü rü Yeremíaxü niyaxügü rü wüxi ga äxmaxü ga dauxütaepataxtüwa yexmaxügu nayataxcuchigü. Rü yema äxmaxü rü ãëxgacü nane ga Maquíaarü nixi. Rü wüxi ga napanaxämaxä ínanachüxüegü. Rü yema äxmaxü rü nangearü dexáäx natürü naxächarama rü yemaçax yéma narüwax ga Yeremía. <sup>7-8</sup>Rü ãëxgacüpatawa nayexma ga wüxi ga Etiopíaanecüäx ga ãëxgacü nüxü ngechaücü ga Ebemerégu äégacü. Rü nüma rü nüxü nacuáchiga nax äxmaxügu Yeremíaxü yataxcuchigüxü. Rü yema ga ngunexügu rü ãëxgacü rü Yerucharéuarü iäx ga Bëyamígu äégaxüwa duüxügümaxä nangutaquexe. Rü yemaçax nüma ga Ebemeré rü yéma naxü nax ãëxgacümaxä nüxü nax yanaxuxüçax ga yema Yeremíamaxä üpetüxü. <sup>9</sup>Rü ñanagürü nüxü: “Pa Chorü Äëxgacüx, rü ngëma Yeremíamaxä naxügüxü i ngëma yatügü rü poraäcü nachixe erü äxmaxügu nayataxcuchigü. Rü ñuxma rü tá taiyamaxä ngëxma nayu erü marü wixgutaax nataxu i ñna i nua ñanewa”, ñanagürü. <sup>10</sup>Rü yexgumatama nüma ga ãëxgacü rü Ebemeréxü namu nax 30 ga yatügü yagagüxüçax nax

Yeremíaxü ínamuxüchigüxüçax ga äxmaxüwa naxüpa ga nax nayuxü. <sup>11</sup>Rü nüma ga Ebemeré rü nayagagü ga 30 ga yatügü. Rü ãëxgacüpatawa yexmaxü ga ucapu ga naxchiru nagu nucuxüwa naxü, rü yéma wexáta nayaxu rü ínayana nax yema Yeremíaçax naixnütagu ínachüxüegüxüçax. <sup>12</sup>Rü nüma ga Ebemeré rü Yeremíana naca rü ñanagürü: “iNgëma wexágümaxä cugü napépacütüxü nax tama cuxü napixëexüçax i napanaxä!” Rü nüma ga Yeremía rü yemamaxä nügu napépacütüxü. <sup>13</sup>Rü yema yatügü ga Ebemeré yéma gagüxü rü naxçax nanachüxüegü ga napanaxä rü yemagu nanatúnagügü. Rü yexguma ínanguxuchiguwena rü nüma ga Yeremía rü poxcupataxüäxtügu narüxäüx.

#### Äëxgacü ga Chedequía rü Yeremíaçax nangema

<sup>14</sup>Rü nüma ga ãëxgacü ga Chedequía rü Tupanaarü orearü uruxü ga Yeremíaçax nangema. Rü tupaucawa namaxä nangutaquexe nawa ga norü tomaepüx ga iäx. Rü yéma rü nüma ga ãëxgacü rü ñanagürü nüxü: “Ñuxma rü tá cuxna chaca, rü chanaxwaxe nax chomaxä aixcümamaxü quixuxü nax choxü cüngäxüxü”, ñanagürü. <sup>15</sup>Rü nüma ga Yeremía rü nanangäxü rü ñanagürü: “Pa Äëxgacüx, ngëxguma chi aixcüma ixixü i oremaxä cuxü changäxügu, rü cuma rü chi cunamu nax choxü yamaçgüxüçax. Rü ngëxgumachi wüxi i ucuxë cuxna chaxäxgu rü taxüchima chauga cuxinü”, ñanagürü. <sup>16</sup>Natürü nüma ga ãëxgacü ga Chedequía rü bexma nüxicatama

Yeremíamaxã ñanagürü: “Yimá tüxü maxëxëcü ya Cori ya Tupanaégagu cumaxã nüxü chixu rü taxütáma texéxü chamu nax cuxü yamáxücax, rü taxütáma ngëma cuxü imaxgüchaüxümexëgu cuxü changuxëxë”, ñanagürü. <sup>17</sup>Rü nüma ga Yeremía rü Chedequíaxü nangãxü rü ñanagürü: “Nüma ya Iraétanüxüarü Tupana ya guxüétüwa ngëxmacü rü ñanagürü: ‘Ngëxguma chi cugü nüxna cuxãxgu ya yimá Babiróniaanearü ãëxgacüarü churaragüarü ãëxgacügü, rü cuma rü guxüma i cutanüxügü rü tá pemaxë, rü daa ñane rü taxütáma nayagügü. <sup>18</sup>Natürü ngëxguma taxütáma cugü cuxãxgu nüxna i ngëma Babiróniaanecüãxaru churaragü, rü nümagü rü tá nagu nachocu ya daa ñane rü tá nayagügü. Rü cuma rü taxucürüwa tá quiña’”, ñanagürü. <sup>19</sup>Rü nüma ga ãëxgacü ga Chedequía nanangãxü rü ñanagürü: “Choma rü nüxü chamuü i ngëma Yudüügü i Babiróniaanecüãxtanüwa choüxü, erü ngëxguma naxmëxgu changuxgu rü tá choxü nacuaixgu rü ngëmaäcü ngüxü tá choxü ningexëëgü”, ñanagürü. <sup>20</sup>Rü nüma ga Yeremía rü nanangãxü rü ñanagürü: “Natürü, Pa ãëxgacüx, rü taxütáma naxmëxgu cingu. Rü name nixü, Pa ãëxgacüx, i naga cuxünü ya Cori ya Tupanaarü ore i cumaxã nüxü chixuxü. Rü ngëxguma naga cuxünügu rü taxuxütáma cuxü nangupetü, rü tá cumaxü. <sup>21</sup>Rü nüma ya Cori ya Tupana rü marü choxü nüxü nadauxëxë, Pa ãëxgacüx, i ngëma tá cuxü ngupetüxü ega cuma taxütáma cugü icuxãxgu nüxna i Babiróniaanecüãxaru churaragü. <sup>22</sup>Rü

guxütáma i ngëma ngexügü i cupatawa ngëxmagüxü, Pa ãëxgacüx, rü tá nayagagü rü Babiróniaanecüãxgüarü churaragüarü ãëxgacügüna tá nanamugü. Rü nümagü i ngëma ngexügü rü norü ngechaümaxã tá cumaxã nanue rü ñanagürügü tá cuxü: ‘Dücax, Pa ãëxgacüx, rü ngëma curü ngüxëëruügü i namaxã cuxãmücügüxü rü cuxcax rü mexü i cumücügü nixügü, rü marü wüxi i taxü i womüxëxë cumaxã naxügü rü cuxü narüyexeragü rü ngëmaäcü chixexügu cuxü nanguxëëgü rü tama aixcüma cuxü ínapoxügü’, ñanagürügü tá cuxü i ngëma ngexügü.” <sup>23</sup>Rü nüma ga Yeremía rü ãëxgacüxü ñanagürüchigü: “Rü guxüma i ngëma ngexügü rü cunegü, Pa ãëxgacüx, rü tá Babiróniaanecüãxgüna nanamugü. Rü cumax, Pa ãëxgacüx, rü taxütáma quiña, rü Babiróniaanecüãxgüarü ãëxgacüna tá cuxü namugü. Rü daa ñane rü tá nayagügü”, ñanagürü. <sup>24</sup>Rü nüma ga ãëxgacü ga Chedequía rü Yeremíaxü nangãxü rü ñanagürü: “Ngëxguma aixcüma cugü cungechaüxgu irü taxütáma texémaxã nüxü quixu i ñaa chomaxã nüxü quixuxü!” ñanagürü. ....

<sup>28</sup>Rü nüma ga Yeremía rü yema ãëxgacüpataxüwa yexmaxü ga poxcuchicaxüwa nayexma ñuxmata nawa nangu nax Yerucharéü rü Babiróniaanecüãxgümëxëgu nanguxü.

**Norü uanügümëxëgu  
nangu ga Yerucharéü**

**39** <sup>1</sup>Rü yexguma 9 ga taunecü marü ãëxgacü yixixgu ga Chedequía ga Yudáanewa rü guma

taunecüarü ügügu, rü nüma ga Nabucudonochó rü norü churaragümaxã Yerucharéücaç inayaxüächi rü nüxü inachomaeguächi. <sup>2</sup>Rü yexguma 11 ga taunecü marü äëxgacü yixügu ga Chedequía rü meama norü ägümücü ga tauemacü (yúniu) arü 9 ga ngunexügu rü nayapoxnagü ga norü poxeguxü ga guma ñane rü yemaacü nachocu. <sup>3</sup>Rü yemaacü guxüma ga yema Babiróniacüäxgüarü churaragüeru rü nachocu rü yema ñax ga ngãxüwa üxügu nügu ninu. Rü natanüwa nayexma ga Negári-Chariché rü Chaüganébu. Rü yéma nayexma ta ga Charichequü rü to ga Negári-Chariché ga äëxgacüarü ngüxëruüerugü ixüguxü. <sup>4</sup>Rü yexguma nüma ga äëxgacü ga Chedequía rü norü churaragü nüxü daugügu ga yema ngupetüxü rü nibuxmü nawa ga guma ñane. Rü chütacü inachoxü nawa ga yema äëxgacüpataarü putüranecüwa dapetüxü ga nama. Rü yema ñax ga taxre ga naxtapüxarü ngãxüwa yexmaxüwa inachoxü, rü nama ga Yudáuarü ngatewa nadaxüwaama naxí. <sup>5</sup>Natürü nüma ga Babiróniacüäxgü rü Chedequíawe nangëgü, rü Yericüarü metachinüxüanegu nayayauxgüx. Rü Amáanewa yexmane ga ñane ga Díbarawa nanagagü yerü yéma nayexma ga äëxgacü ga Nabucudonochó. Rü nüma ga Nabucudonochó rü yéma namaxã nanaxuegu ga poxcu. <sup>6</sup>Rü ñuxüchi Chedequífaxü inadawenüxëxë nax ñuxäcü tüxü nadaüxü ga nanegü rü guxãma ga natanüxügü ga äëxgacügü ixüguxü ga Yudáanewa. <sup>7</sup>Rü yemawena rü ñuxüchi Chedequífaxü nacaxüxëtügü rü cadénamaxã yanaxgüäcüma Babiróniawa nanagagü. <sup>8</sup>Rü yoxni ga

yema togü ga Babiróniacüäxgü ga churaragü rü nagu nanangixgü ga guma Yerucharéü namaxã ga guma äëxgacüpata. Rü nagu napogüe ga naxtapüx ga guma ñanearü poxeguxü. <sup>9</sup>Rü nüma ga yema churaragüeru ga Nabucharadáü, rü Babiróniawa nanagagü ga yema yéma yaxügüxü ga duüxügü, rü yema nawaama nügu ügüxëxü. <sup>10</sup>Natürü guxüma ga Yudáaru naanewa rü yéma tüxü nawogü ga guxema ñuxre ga yexeraäcü ngearü diëruäxgüxe. Rü tüxna nanaxägü ga naanegü rü úbanecügü. ....

#### Yeremía rü Yedarfaxütagu narüxäüx

**40** <sup>1</sup>Rü nüma ga Babiróniaanecüäxarü churaragüeru ga Nabucharadáü rü Ramáwa nanaga ga yema Yerucharéücüäxgü rü Yudáanecüäxgü ga Babiróniawa gagüchaüxü. Rü yexguma Ramáwa nangugügu rü yematanüwa Yeremíaxü inayangau ga cadénamaxã ichotacü. Rü nüma ga Nabucharadáü rü inananguxuchixëxë. Rü yemawena rü nüma ga Cori ya Tupana rü Yeremíamaxã nidexa. <sup>2</sup>Rü nüma ga churaragüeru rü nüxrüguma Yeremíamaxã nixü, rü ñanagürü nüxü: “Nüma ya curü Cori ya Tupana rü marü ñaa perü naanewa nananguxëxë i ñaa guxchaxü ga marü pemaxã naxunagüxü. <sup>3</sup>Rü ñuxma rü marü ningu ga yema guxchaxü ga namaxã pexü naxäxünexü. Erü ngëma cutanüxügü rü Cori ya Tupanapexewa chixexü naxügü, rü ngëmacax nixü i ngëmaäcü pexü nangupetüxü erü tama naga pexinüe. <sup>4</sup>Dücax, ñuxmatátama



íchayawē ya yima cadéna ya namaxã  
 quichotacü. Rü ngëxguma cunaxwaxegu  
 nax chowe curüxüxü i Babiróniawa irü  
 ngixã rü chowe rüxü! Rü choma rü tá  
 cuxna chadau. Natürü ngëxguma tama  
 ngëma cuxüxchaügu rü marü name i  
 nuxã curüxãüx. Rü ñaa nixi i cuchixüane,  
 rü cuma i nüxü cucuáxü nax ngextá tá  
 cungexmaxü i nawa. <sup>5</sup>Rü ngëxguma  
 cunaxwaxegu nax nuxã cuchixüanegu  
 curüxãüxü irü êcü Yedaría ya Aicãü nane  
 ya Chapáütaaxütawa naxü! Rü yimáxü  
 nixi i naxunetaxü ya  
 Babiróniaanecüãxarü äëxgacü nax  
 Yudáanewa ngëxmagüene ya ñanegüarü  
 äëxgacü yixixüçax. Rü name nixi nax  
 yimáxütawa cungexmaxü namaxã i  
 cutanüxü. iRü ngextá cuma  
 ícunaxwaxexüwa naxü!” ñanagürü. Rü  
 ñuxüchi nüma ga churaragüeru  
 Yeremiana ãmare naxã, rü ðnagü rü ta  
 nüxna naxã, rü yemaacü nüxü narümoxë.  
<sup>6</sup>Rü nüma ga Yeremía rü Yedaríamaxã  
 Míspawa naxí. Rü yéma naxütawa  
 nayexma natanüwa ga yema duüxügü ga  
 yéma nachixüanewa yaxügüxü.  
 .....

**Barúxmaxã inaxuneta ya Cori ya Tupana**

**45** <sup>1</sup>Rü yexguma ägümücü ga  
 taunecü marü  
 Yudáanecüãxarü äëxgacü yixixgu ga

Yoachíü ga Yochía nane, rü nüma ga  
 Tupanaarü orearü uruxü ga Yeremía,  
 rü namücü ga Barúx ga Nería  
 nanemaxã nüxü nixuchigü ga  
 Tupanaarü ore nax naxümatüãxüçax.  
 Rü yexgumayane rü nüma ga Yeremía  
 rü Barúxü naxucuxë rü ñanagürü nüxü:  
<sup>2-4</sup>“Dücax, Pa Barúx, rü cuma rü  
 ñacurügü: ‘Nüma ya Cori ya Tupana rü  
 taxuxüma i ngüxëë choxna naxã. Rü  
 ngëma choxna naxãxü nixi i  
 guxchaxügü rü ngüxüxícatama. Rü  
 ngëmacax marü düxwa chipa nax  
 chaxaxuxü rü taguma wüxi i taãxë  
 chayaxu’, ñacurügü. Natürü nüma ya  
 Cori rü choxü namu nax cumaxã nüxü  
 chixuxüçax i cuchiga rü ñanagürü:  
 ‘Choma rü ichayanaxoxëxë i ngëma  
 chomatama chaxüxü, rü chanabëx i  
 ngëma ichatogüxü. Rü ngëmatátama  
 namaxã chaxü i guxüma i ñaa naane.  
<sup>5</sup>¿Rü cuxçax rü name nax naxçax  
 ícucaxü i taxacü i cügüçaxícatama  
 ixixü? iRü taxü i naxçax ícucaxü! Erü  
 choma rü tá íchananguxëxë i  
 guxchaxügü naxçax i guxüma i ñaa  
 duüxügü. Natürü i cuma rü tá cuxna  
 chadau nax tama cuyuxüçax i ngextá  
 ícuxüxüwa. Rü chomatama ya Tupana  
 nixi i ngëma ñachaxü cuxü’, ñanagürü  
 ga Tupana”, ñanagürü ga Yeremía.  
 .....

# LAMENTACIONES

## (Auxexũchiga)

### Nũxíraxũxũ ga auxechiga

**1** <sup>1</sup>Rũ ñuxma rü nangeãcumare ya daa ñane ya Yerucharéũ ga ũpa muãcuchiréne. Rũ ñoma wũxi i ngexũ i yutexũrũxũ nixĩ ya daa ñane ga guxũnema ga ñanegũétũwa üchiréne. Rũ guma ñane ga tachirénearũ duũxũgũ rü ñuxma rü norũ uanũgũmexẽwa nangexma nax ngẽmagũ poraãcü napuracũexẽexũcax. <sup>2</sup>Rũ daa ñanecũãx rü ñuxma rü poraãcü ngechaũ nüxũ nangux, rü chütacũ rü naxauxe. Rũ guxũma ga yema nachixũanegũ ga noxri daa ñane nüxũ ngũchaũgũxũtanũwa rü nataxuma i wũxi i nataãxẽxẽxũ rü bai i wũxi. Rũ guxũma ga yema nachixũanegũ ga noxri daa ñanemaxã ãmücũgũxũ rü ñuxma rü tama ñanapoxũgũ rü norũ uanũgũ nügũ nixĩgũxẽxẽ.

.....

<sup>8</sup>Rũ norũ duũxũgũ ya daa ñane ya Yerucharéũ rü poraãcü chixexũ naxũe rü ngẽmacax i ngẽma togũ i nachixũanegũ rü düxwa nüxũ naxoe. Rũ ngẽma nachixũanegũ ga ũpa namaxã taãxẽgũxũ rü ñuxma rü tama nüxũ

nacuãxgũchaũ erũ nüxũ nadaugũ nax ñuxãcü poraãcü chixexũgu nanguxũ ya daa ñane. Rũ ngẽmacax i ñuxma i daa ñanearũ duũxũgũ rü naxauxe rü naxãnee rü ngẽma togũ i nachixũanecũãxgũna naxãcaxwegũmare. <sup>9</sup>Rũ daa ñanecũãx rü chixexũna nügũ naxãgũ rü tama nagu narũxĩnũe nax yixcũra ya Tupana rü tá ngẽma norũ chixexũcax napoxcuxũ. Rũ wũxi i taxũ i ngechaũ nixĩ nax ñuxãcü poraãcü chixexũgu nayĩxũ rü nataxuma i texé nax nataãxẽxẽxũ. Rũ ñuxma ya daa ñanecũãx rü Tupanaxũ ñanagũrũgũ: “Dũcax, Pa Corix, nax ñuxãcü toxũ nacugũexũ i ngẽma torũ uanũgũ i nügũ írũtagũxũ”, ñanagũrũgũ.

.....

<sup>18</sup>Rũ daa ñanecũãx rü ñanagũrũgũ ta: “Nũma ya Cori ya ixaixcũmacũ rü tagagutãma tũxũ napoxcue erũ chixexũ taxũgũ rü tama naga taxĩnũechaũ i norũ mugũ. iRũ dũcax, Pa Guxũma i Nachixũanegũcũãx, rü toxũ iperũxĩnũe rü nüxũ pedãux nax ñuxãcü ngũxũ tingexũ! Rũ torũ ngextũxũcũgũ rü ngẽma torũ pacũgũ rü yãxũguxũ i nachixũanewa nanagagũ i torũ uanũgũ. <sup>19</sup>Rũ norũ ngũxẽcãx ítaca i ngẽma

nachixũanegũ ga noxri tomaxã  
 taãxẽgũxũ, natũrũ i nũmagũ rũ tama  
 toxũ narũngũxẽẽgũ rũ torũ uanũgũxũ  
 nũgũ nixĩgũxẽxẽ. Rũ yema torũ  
 chacherdõtegũ rũ torũ ãẽxgacũgũ rũ  
 taxuwama naxcax ne naxũ ga norũ  
 ngũxẽẽ rũ yemacax nu ne nanaxĩmare  
 nax norũ õnacax nadaugũxũcax nax  
 yemaacũ namaxẽxũcax natũrũ dũxwa  
 daa ãanegu nayue. <sup>20</sup>Rũ dũcax, Pa Corix,  
 i ñuxãcũ ngẽma guxchaxũgũ rũ poraãcũ  
 ngũxũ toxũ ningexẽẽgũ rũ ngẽmacax  
 poraãcũ taxoẽgaãẽgũ. Rũ ngẽxguma  
 nagu tarũxĩnũegu nax ñuxãcũ tama  
 cuga taxĩnũexũ, rũ poraãcũ  
 tanaxixãchiãẽgũ. Rũ torũ ãanearũ  
 poxeguxũarũ dũxõtũwa rũ taramaxã  
 toxocũgũxũ nadai. Rũ nua ãanearũ  
 aixepewa rũ taiyamaxã rũ  
 daxaweanemaxã tayue”, ñanagũrũgũ.  
 .....

#### Norũ tomaepũx ga auxechiga

**3** <sup>1</sup>Rũ choma nixĩ ga chayangexũ ga  
 yema ngũxũ ga Tupana norũ  
 numaxã ãnguxẽẽxũ.

.....

<sup>7</sup>Rũ nũma rũ wũxi ga poxcuchicaxũ  
 ga ngearũ õxũchicaxũxũgũ choxũ  
 nitacuchi rũ cadenamaxã choxũ nichota.  
<sup>8</sup>Rũ woo tagaãcũ nũxna chaca nax  
 choxũ nangũxẽẽxũcax natũrũ ga nũma  
 rũ tama choxũ nũxũ naxĩnũchaũ ga  
 chorũ yumũxẽ.

.....

<sup>12</sup>Rũ nũma rũ ngũxũ choxũ ningexẽxẽ,  
 ñoma norũ wũramaxã choxũ  
 namaxũxũrũxũ. <sup>13</sup>Rũ ngẽma ngũxũ rũ  
 ñoma naxne ya poraãcũ ãngaxinerũxũ  
 nixĩ. <sup>14</sup>Rũ ñuxma i guxũma i chorũ

ãanecũãx rũ choxũ nacugũe rũ guxũ i  
 oragu chauchiga narũcutanũxũ. <sup>15</sup>Rũ  
 nũma ya Cori rũ taxũ i guxchaxũgũ  
 choxũ ningexẽxẽ rũ ngẽmagagu poraãcũ  
 choxũ nangux. <sup>16</sup>Rũ ñoma  
 waixũmũtẽxegu chopũtẽxemaxã choxũ  
 naãaxũrũxũ rũ chayagatẽxẽachi. <sup>17</sup>Rũ  
 ngẽma chorũ taãxẽ rũ choxna  
 nixũgachi, rũ marũ dũxwa nũxũ  
 icharũngũma i guxũma i ngẽma taãxẽ  
 ga noxri choxũ yexmaxũ. <sup>18</sup>Rũ  
 ngẽmagagu marũ dũxwa nagu  
 charũxĩnũ nax Corixũ ãchatãxchaũxũ.  
<sup>19-20</sup>Rũ chauãẽwa nangu i ngẽma  
 ngechaũ rũ ngũxũ i chingexũ rũ ñuxãcũ  
 chaxica nua nax chatãxũ rũ taxũema  
 choxũ rũngũxẽẽxũ. Rũ ngẽxguma  
 ngẽmagu charũxĩnũgu rũ chorũ  
 ngũchaũ rũ ñaxtũwa naxũ. <sup>21</sup>Natũrũ  
 nangexma i wũxi i ãnũ i guxũguma  
 chauãẽwa ngẽxmaxũ rũ poraãcũ choxũ  
 rũngũxẽẽxũ. <sup>22</sup>Rũ ngẽma ãnũ nixĩ nax  
 Coriarũ ngechaũ rũ taguma iyacuãxũ rũ  
 norũ mecũma rũ taguma nagũxũ. <sup>23</sup>Rũ  
 wũxichĩgũ i ngunexũgu rũ choxna nũxũ  
 nacuãxãchixẽxẽ nax ñuxãcũ aixcũma  
 yanguxẽẽãxũ i ngẽma nũxũ yaxuxũ.  
<sup>24</sup>Rũ ngẽmacax chaugũmaxã ñachagũrũ:  
 “Nũma ya Cori ya Tupana rũ chomaxã  
 ãnacax, rũ ngẽmacax nagu chayaxõ”,  
 ñachagũrũ. <sup>25</sup>Rũ nũma ya Cori ya  
 Tupana rũ tũmamaxã namecũma ya  
 yĩxema nagu yaxõgũxe rũ naxcax  
 daugũxe. <sup>26</sup>Rũ name nixĩ i bexma mea  
 ãtananguxẽẽgũ ya Cori ya Tupanaarũ  
 ngũxẽẽ.

.....

<sup>37</sup>Rũ ngẽxguma texe tũxũ ixuxgu  
 rũẽxna taxacũ tũxũ ngupetũgu rũ  
 ngẽmaãcũ nixĩ erũ woetama Tupana

nanaxuegu nax ngēmaācü yixixũ.  
<sup>38</sup>Rü ngēxgumarixũ i ngēma mexũgũ  
 rü ngēma guxchaxũgũ rü ínangugũ  
 erü ya Tupana rü woetama ngēmaācü  
 nanaxuegü. <sup>39</sup>¿Rü tũxcũũ i yixema  
 nax iduũemarexũ rü Tupanamaxã  
 tarũxutaga ega tórü chixexũgagu tũxũ  
 íyanawexãchixẽegu? <sup>40</sup>Rü ngēmacax  
 ingĩxã aixcũma nagu tarũxĩnũe i  
 tacũma i mexũ rüexna chixexũ, rü  
 ngĩxã Cori ya Tupanacax tawoegu rü  
 aixcũma naga taxĩnũe! <sup>41</sup>iRü ngĩxã  
 Tupana ya daxũwa ngēxmacũmaxã  
 tidexagũ i tórü yumũxẽwa rü namaxã  
 nüxũ tixu i ngēma nagu rüxĩnũexũ!  
<sup>42</sup>Pa Corix, toma rü chixexũ taxũ rü  
 tama cuga taxĩnũe. Rü cuma i ngēma  
 rü tama cunangupetũxẽẽmare. <sup>43</sup>Rü  
 cuma rü toétũgu cunanguxẽxẽ i curũ  
 nu rü towe quingẽchigũ, rü tama  
 cuxũ tangechaũtũmũxũĩacũma toxũ  
 cudai. <sup>44</sup>Rü cuma rü wũxi ga  
 caixanexũgu cugũ quicux nax tama  
 nüxũ cuxĩnũxũcax i torũ yumũxẽgũ.  
<sup>45</sup>Rü guxũma i togũ i  
 nachixũanegũpexewa, rü ñoma wũxi i  
 guxchirerũxũ toxũ ícuwogũ. <sup>46</sup>Rü  
 guxũma i tórü uanũgũ rü  
 chixexũmaxã tochiga nidexagũ. <sup>47</sup>Rü  
 ngēmacax poraācü tamuũe erü toxũ  
 ínayauxũ rü taxúema toxũ ítapoxũ rü  
 tochicaxica nixĩ i ngēma yaxũxũ. Rü  
 ngēma nixĩ i nawa tangemaxũ.  
<sup>48-50</sup>Rü ñoma dexã iyaxũrũxũ nixĩ i

chauxgũxũetũ erü naxcax chaxaxu ya  
 yima chorũ ñane ya nüxũ  
 changexaxũne rü ñuxma nagu  
 napogũene. Rü taguma nüxũ  
 charũchau nax chaxauxechaxũ erü  
 nataxuma nax texé choxũ taãxẽxẽxũ  
 ñuxmatáta daxũguxũ i naanewa  
 taxcax nadaue ya Cori ya Tupana.  
<sup>51</sup>Rü poraācü chorũ maxũwa nangux i  
 ngēxguma nüxũ chadauxgu i ngēma  
 guxchaxũgũ i naxcax ínguxũ i ngēma  
 paxũgũ i Yerucharẽũcũax. <sup>52</sup>Rü  
 taxuxũma namaxã chaxũyane i ngēma  
 chorũ uanũgũ rü ñoma wũxi i weri  
 iyaxuxũrũxũ choxũ niyauxgũ. <sup>53</sup>Rü  
 wũxi i achiũxũ i ãmaxũgu choxũ  
 nitaxcuchigũ rü nutamaxã choxũ  
 narũxũtaũgũ nax taxuwama  
 íchaxũxũcũcax. <sup>54</sup>Rü guxũma ga  
 chaxune rü dexáwa nangexma, rü  
 nagu charũxĩnũ nax marũ chayuxũ.  
<sup>55</sup>Rü chomax, Pa Corix, Pa Tupanax,  
 rü ñaa ãmaxũwa changexmayane rü  
 cuxna chacagũ. <sup>56</sup>Rü cuma rü choxũ  
 cuxĩnũ i ngēxguma cuxna chacaxgu  
 rü choxũ cunayaxu i chorũ yumũxẽ.  
<sup>57</sup>Rü ngēma ngunexũ i nagu cuxna  
 chacaxũgu rü chauxũtawa cuxũ, rü  
 ñacugürũ choxũ: “iRü taxucaxma  
 cumuũ!” ñacurũgũ. <sup>58</sup>Rü cumax, Pa  
 Corix, Pa Tupanax, rü choxũ ícupoxũ  
 nüxna i chorũ uanũgũ rü nawa choxũ  
 ícunguxuchixẽxẽ i ngēma yu.  
 .....

# EZEQUIEL

## (Echequié)

Echequié nangoxetü rü Tupanaxü nadau

**1** <sup>1-3</sup>Rü yexguma marü 5 ga taunecü Babiróniaanewa nayexmagu ga ãëxgacü ga Yoachíü ga yéma nax nagagüaxü, rü choma i chacherdóte i Echequié ya Búchi nane rü yema Yudfugü ga Babiróniaanewa nagagüxütanüwa chayexma ga natü ga Quebáracutüwa. Rü yexguma ga choma rü 30 ga taunecü choxü nayexmagu rü wüxi ga ngunexü meama norü ägümücü ga tauemacü (yúniu) arü 5 ga ngunexügu rü ngürüächi cháxçax ningena ga daxüguxü ga naane rü Tupanaxü chadau. <sup>4</sup>Rü to ga nüxü chadauxü nixí ga wüxi ga buanecü ga ixãüxemacü ga nórtewaama ne ücü. Rü wüxi ga taxü ga caixanexüwa nangox ga wüxi ga üxüema ga ãëmacürüxü ixüxü. Rü norü guxücüwawa rü poraäcü nangóone. Rü yema üxüemaarü ngãxüwa rü yéma nayexma ga wüxi ga taxacü ga ñoma bróücherüxü iyäxracüüxü. <sup>5</sup>Rü yemaarü ngãxüwa rü nayexma ga ägümücü ga taxacü ga naduüxügüraxüxü. <sup>6</sup>Rü wüxichigü ga yema rü naxägümücüpexátü rü naxägümücüchametü.  
.....

<sup>10</sup>Rü nachiwegü ga yema ägümücü ga naduüxügüraxüxü rü ñaäcü nixí: rü yema nachametü ga napexewaama üxü rü nanaduüechiweraxü, rü yema norü tügünecüwawaama üxü rü nanaxaichiweraxü, rü yema norü toxoxwecüwawaama üxü rü nanatuiruchiweraxü, rü yema naxçaxwena üxü rü nanaxiyüchiweraxü. <sup>11</sup>Rü taxre ga naxpexátü rü nangenagü rü nügüwa nayaxüxgü rü guma náí ga taxre rü naxünearü düxrxüxü nixígü. <sup>12</sup>Rü yexguma inaxixgu rü nügüpexewaama naxí yema Tupanaarü pora ínamugüxüwaama. Rü tama nügüweama naxí.  
.....

<sup>15</sup>Rü yexguma nüxü chadawenügu ga yema naduüxügüraxüxü, rü wüxichigüxütawa rü nüxü chadau nax yexma waixümüanegu naxüxü ga wüxi ga bochicuxü.  
.....

<sup>20</sup>Rü yema naduüxügüraxüxü rü ngextá Tupanaarü pora ínamugüxüwaama naxíxchitanü. Rü yema bochicuxü rü wüxigu namaxã nayachüxächitanü yerü yema bochicuxü

rü yema naduũxũgüraxũxũxũnearü datama nixĩgü. <sup>21</sup>Rü yexguma naxĩãxãchitanügu ga yema naduũxũgüraxũxũ rü yema bochicuxũ rü ta naxĩãxãchitanü. Rü yexguma íyachaxãchitanügu ga yema naduũxũgüraxũxũ, rü yema bochicuxũ rü ta ínayachaxãchigü. Rü yexguma yachũxãchitanügu ga yema naduũxũgüraxũxũ, rü yema bochicuxũ rü ta wüxĩgu namaxã nayachũxãchitanü, yerü yema bochicuxũ rü yema naduũxũgüraxũxũxũnearü datama nixĩgü. <sup>22</sup>Rü naétüwa ga yema ägümücü ga naduũxũgüraxũxũ rü ga naanetüwe rü nichipetümare rü guxüma namexechi.

.....

<sup>26</sup>Rü yema naanetüweétüwa nüxü chadau ga wüxi ga taxacü ga natochicaxũraxũxũ ga nuta ga mexechicü ya chafírunaxçax ixixũ. Rü yema tochicaxüwa narüto ga wüxi ga naduũxũraxũxũ. <sup>27</sup>Rü yema naayearü daxüwaama rü niyauxra ñoma wüxi i bróuche i iguxürüxü. Rü naayetüüwaama rü ñoma wüxi i üxiemarüxü nixĩ. Rü guxücüwawa rü poraacü nangóone. <sup>28</sup>Rü yema norü yauxra rü ñoma chirapaema i pucügu nüxü idauxürüxü nixĩ. Rü yemaacü nixĩ ga chauxçax nangóxü ga norü üüne ya Cori ya Tupana. Rü yemaxü chadauxgu rü ñaxtüanegu chanangücuchi.

**Tupana rü Echequiéxü nayaxu norü puracütanüxürüxü**

**2** <sup>1</sup>Rü ñüxüchi nüxü chaxĩnü ga wüxi ga naga ga ñaxü choxü: “Pa Yatüx iinachi erü tá cumaxã chidexa!” ñaxü.

<sup>2</sup>Rü yexguma chomaxã iyadexayane rü choxna nangu ga Tupanaãxë, rü choxü inachixëxë. <sup>3</sup>Rü nüma ga Tupana rü ñanagürü choxü: “Cumax, Pa Yatüx, rü tá cuxü natanüwa chamu i ngëma cutanüxügü i Iraétanüxü i tama chauga inüexü. Rü nümagü rü ñuxma rü ta nüxcüma ga norü oxigürüütama tama chauga naxĩnüe. <sup>4</sup>Rü nümagü i ngëma duüxügü rü yema norü oxigü ga tama chauga inüexürüxü tama choxü nacuauxgüchaü. Rü ngëmatanüwa tá nixi i cuxü chamuxü nax namaxã nüxü cuyarüxuxüçax i ñaa chorü ore. <sup>5</sup>Rü ngëma duüxügü i tama irüxĩnüechaüxü rü ngëxguma cuxü inaxĩnüegu rüexna tama cuxü inaxĩnüegu natürü tá nüxna nacuauxãchie nax natanüwa marü nangexmaxü i chorü orearü uruxü. <sup>6</sup>Rü cumax, Pa Yatüx irü taxü i nüxü cumuüxü, rü taxü i naxçax cumuüxü ega cuxü naxãxünegügu rü woo cuxü nanguxgu i ñoma wüxi i tuxchinawe cuxü chixgurüxü! iRü taxü i curümaächixü ega nuchiweäcü cuxna nadaugügu i ngëma duüxügü i tama irüxĩnüechaüxü! <sup>7</sup>iRü cumax rü namaxã nüxü ixuama i ngëma chorü ore rü woo tama cuxü inaxĩnüegu! Erü nüma rü tama irüxĩnüechaüxü nixĩgü”, ñanagürü choxü.

.....

**Tupana rü Echequiéxü namu nax dauxütaeruxü yixixüçax**

**3** <sup>16</sup>Rü yexguma 7 ga ngunexüguwena rü nüma ga Cori ya Tupana rü chomaxã nidexa rü ñanagürü: <sup>17</sup>“Pa Yatüx, choma rü cuxü ichamu nax dauxütaeruxü quixixüçax natanüwa i

ngēma Iraétanüxügü. Rü ngēxguma taxacürü orexü cumaxā chixuxgu irü namaxā nüxü ixu i ngēma chorü ore nax ngēmaäcü nüxü nacuxgüxüçax!

<sup>18</sup>Düçax, rü ngēxguma chi chomax cumaxā nüxü chixuxgu nax wüxi i duüxü i chixri maxüxümaxā chaxueguxü i poxcu rü cumax rü tama cunaxucuxēgu nax nüxü naxoxüçax i ngēma norü chixexü, rü nüma rü tá nayu nagagu i norü chixexü. Natürü i chomax rü tá cuxna chaca naxçax i ngēma duüxü erü tama cunaxucuxē. <sup>19</sup>Natürü ngēxguma chi cuma rü ngēma duüxü i chixri maxüxü cuxucuxēgu nax nüxü naxoxüçax i ngēma nacüma i chixexü rü nüma rü tama nüxü naxoxchaügu, rü ngēma norü pecádugagu tátama nayu. Natürü i cuma rü taxuçxtáma cuxna chaca rü tá cumaxü. <sup>20</sup>Rü ngēxguma chi wüxi i duüxü noxri mea maxüxü natürü yixcüama rü nüxü naxoxgu i ngēma maxü i mexü, rü ngēxguma cuma rü tama cunaxucuxēgu rü nüma rü norü chixexügu tá nayu. Rü yema mexü ga noxri naxüxü rü chopexewa rü taxütáma ínanapoxü. Rü nüma rü norü chixexügagu tá nayuama, natürü i choma rü tá cuxna chaca naxçax i ngēma duüxü erü tama cunaxucuxē. <sup>21</sup>Natürü i cumax, rü ngēxguma chi cunaxucuxēgu ya yimá duü nax tama chixexü naxüxüçax rü nüma rü cuxü inaxínügu nax tama wena chixexü naxüxü rü tá namaxü erü cuga naxínü. Rü cuma rü tá ta cumaxü”, ñanagürü choxü ga Tupana. ....

**5** <sup>5</sup>Rü nüma ya Cori ya Tupana rü ñanagürü choxü: “Düçax ya yima íane ya Yerucharéü. Rü choma nixí ga

chanataxēxü natanüwa ya yima naigü ya íanegü ya togü i nachixüanecüçax. <sup>6</sup>Natürü yema norü duüxügü ya yima íane ya Yerucharéü rü chomaxā nanue rü tama naga naxínüechaü i chorü mugü rü ucuxégü. Rü guxünema ya yima naigü ya íanegü ya pexna ngaicamanearü duüxügüarü yexera chixri namaxē rü tama naga naxínüe i ngēma chorü mugü rü chorü ucuxégü. <sup>7</sup>Rü ngēmaçax i chomax ya Cori ya Tupana rü ñachagürü: ‘Pemax rü guxü i togü i duüxügü i pexna ngaicamaxüarü yexera tama ipexínüechaü rü tama naga pexínüe i ngēma chorü mugü rü bai peyanguxēgüchaü i ngēma togü i nachixüanegüarü mugü.’ <sup>8</sup>Rü ngēmaçax i choma ya Cori ya Tupana rü nüxü chixu rü ñachagürü: ‘Choma rü tá ta pemaxā chanu, Pa Yerucharéüçüçaxgüx, rü tá pexü chapoxcue napexewa i ngēma togü i nachixüanecüçaxgü. <sup>9</sup>Rü ngēmaçax tá perü chixexügügagu poraäcü pexü chapoxcue. Rü ñaa poxcu i ñuxma tá pexçax íchanguxēxü rü yema poxcu ga üpama namaxā pexü chapoxcuxüarü yexera tá nixí rü ñaawena rü nataxutáma i nangexgumaraxüxü i poxcu. ....

<sup>14</sup>Rü chomax, Pa Yerucharéüçüçaxgü rü tá nagu chapogü ya yima perü íane. Rü ípatagü ya rüyitaxünexicatama tá nixí ya nüxü pedauxüne. Rü ngēmaäcü tá guxü i togü i nachixüanepexewa pexü chaxāneexēxē nax pexü nadaugüxüçax i guxüma i nua chopetüxü. <sup>15</sup>Rü ngēxguma ngēma perü chixexügagu poraäcü pexü chapoxcuegu rü guxüarü cugüruxü tá pixígü. Rü guxüma i ngēma

togü i nachixũane i pexna  
 ngaicamaxũarü dauxcüraxũruxũ tá  
 pixĩgü. Rü choma ya Cori ya Tupana rü  
 nüxũ chixu i ngẽma. <sup>16</sup>Rü choma rü  
 taxũtama i taiya tá pexçax íchanguxẽxẽ  
 rü ñoma chuxchi ya pexũ cúxũnerũxũ tá  
 pexũ nadai. Rü ngẽma taiya rü tá  
 poraãcü nitachigü rü ngẽmagagu tá  
 düxwa pengebüe. <sup>17</sup>Rü aixcũma pexçax  
 tá íchananguxẽxẽ i taiya rü daweanerü  
 yu. Rü ngẽma tá chanamugü i aigü i  
 pexacügü tüxũ ngõxcuxũ. Rü ngẽmaãcü  
 tá tagux ya pexacügü. Rü  
 ngẽxgumarũxũ ta ngẽma tá chanamugü  
 i perü uanügü nax muxema i pema rü  
 daigu peyuexũçax. Rü Choma ya Cori ya  
 Tupana chanaxunagü i ngẽma.’”

.....

**7**<sup>5-6</sup>“Rü choma ya Cori ya Tupana rü  
 nüxũ chixu rü ñachagürü: ‘Dücaç,  
 Pa Yerucharéücüãxgüç, rü marü  
 ningaica i ngẽma guxchaxũgü i nügüwe  
 ägũxũ i tá pexçax íchanguxẽxẽxũ. Erü  
 nataxũchi i perü chixexũgü rü  
 ngẽmacax i ñuxma rü düxwa poxcu  
 pemaxã chaxuegu.

.....

**Tupana rü Yerucharéücüãxgüna naca  
 norü chixexũçax**

<sup>23</sup>Rü cumax, Pa Echequiéç irü wüxi  
 ya cadéna ínamexẽxẽ naxçax i chorü  
 duũxũgü i Yerucharéücüãxgü! Erü tá  
 chanapoxcue naxçax nax poraãcü  
 namáetagũxũ. Rü yima norü ñane ya  
 Yerucharéü rü poraãcü chixexũmaxã  
 nanapá. <sup>24</sup>Rü choma tá ngẽma  
 chanamugü i to i nachixũanecũãx i  
 duũxũgü i chixecũmaxũ nax  
 ngẽmamaxã yayoraãxũçax ya napatagü

i ngẽma Yerucharéücüãxgü. Rü  
 ngẽmaãcü tá chayanaxoxẽxẽ nax nügü  
 yacuaxũüügũxũ i ngẽma yatügü i muarü  
 ngẽmaxũãxgũxũ. Rü ngẽma  
 Yerucharéücüãxgüarü nachicagü i nawa  
 norü tupanachicũnaçagũxũ  
 yacuaxũüügũxũ, rü tá chanamu i ngẽma  
 norü uanügü nax nagu napogüexũçax.  
<sup>25</sup>Rü nüma i Yerucharéücüãxgü rü  
 poraãcü tá namuũe. Rü ngẽmacax tá  
 naxçax nadaugü nax norü uanügü  
 namaxã irüngüxmüexũ. Natürü ngẽma  
 norü uanügü rü taxũtama naga naxĩnue.  
<sup>26</sup>Rü nügüwe tá naxãgü i ngẽma  
 chixexũgü i Yerucharéücüãxgüçax  
 ínguxũ. Rü ngẽxgumarũxũ ta i ngẽma  
 nachicagü i chixexũ rü tá nügüwe  
 naxãgü. Rü tá naxçax nadaugü i wüxi i  
 chorü orearü uruxũ nax ngẽma namaxã  
 nüxũ ixuxũçax nax taxacũchiga yixĩxũ i  
 ngẽma ngupetũxũ. Natürü i ngẽma rü  
 tá natũçaxmamare nixĩ. Rü nataxutãma  
 i chacherdótegü i nangüexẽxẽxũ rü bai i  
 yaxguãxgü i tayaxucuxẽgũxũ. <sup>27</sup>Rü  
 nüma ya Yudaánecüãxarü äẽxgacü rü  
 ñoma nayutanũxũrũxũ tá ngechaũ nüxũ  
 nangu. Rü ngẽma äẽxgacü nane i  
 duũxũgũmaxã icuaxũ rü tá ta ngechaũ  
 nüxũ nangu. Rü nüma i  
 Yerucharéücüãx i duũxũgü rü norü  
 muũmaxã tá niduxrue. Rü ngẽma nax  
 ñuxãcü tama mea namüçügũmaxã  
 inacuaxgũxũãcü tátama namaxã  
 ichacuax. Rü ngẽmatama poxcu i  
 namüçügũmaxã naxuegugũxũãcü  
 tátama chanapoxcue. Rü ngẽmaãcü tá  
 nixĩ i nüxũ nacuaxgũxũ nax choma rü  
 Cori ya Tupana nax chixĩxũ’”,  
 ñachagürü.

.....



**Tupana rü Echequiéxü nanawex nax  
ñuxácü tá napoxcuáxü ya  
Yerucharéücüâxgü**

**9**<sup>1</sup>Rü yema ñaxguwena rü nüxü chaxĩnũ ga wüxi ga naga ga tagaxũ ga choxmaxchiéwa ñaxũ: “Marü ínangugü i ngẽma tá naxçax íyaxüâchixũ ya yima ñane nax nagu napogüexüçax. Rü wüxichigü i ngẽma norü uanügüarü churaragü rü naxmexgu nayange ya naxne ya namaxã tá nadaiane ya yima ñanearü duüxũgü”, ñaxũ. <sup>2</sup>Rü ñuxüchi nüxü chadau ga 6 ga yatügü ga guma Tupanapatagu chocuxũ nawa ga yema norü ñax ga dauxchitawaama üxü ga nórtewa. Rü wüxichigü ga yema yatü rü nayange ga wüxi ga mæxeruxũ. Rü yemaarü ngäxütanügu nixüchigü ga wüxi ga yatü ga línuchimaxã äxchiruxũ. Rü norü goyexüwa nayangacuchiweü ga norü ümatüruxũ. Rü yema yatügü rü Tupanapatawa nichocu, rü yema amarearü guchicaxũ ga bróüchenaxçaxütawa nayachaxächitanü. <sup>3</sup>Rü Tupanaarü üüne rü nüxna nayachüxächi ga yema taxre ga ixäxpeçátüxü ga noxri norü ngäxüwa nayexmaxü, rü Tupanapataarü ñaxwaama naxü. Rü nüma ga Cori ya Tupana rü naxçax naca ga yema yatü ga línuchimaxã äxchiruxũ ga norü goyexügu ümatüruxũ ingexü. <sup>4</sup>Rü ñanagürü nüxü: “iÉcü, nagu ixüâgüchigü ya daa ñane ya Yerucharéü rü yaxüégacatü i guxüma i ngẽma duüxũgü i ñaa ñanearü chixexügagu ngechaügüxü rü ngúxü ingegüxü!” ñanagürü. <sup>5</sup>Rü yemawena nüxü chaxĩnũ

ga Cori ya Tupana nax yema togü ga yatügüxü ñaxü: “iRü ngẽma yatüwe pixixütanü nawa ya daa ñane! Rü guxüma i ngẽma duüxũgü i ngeégacatüxü irü penadaix. iRü tauxütama nüxü pengechaxü rü bai tá i pexü nax nangechaütümüxügüxü! <sup>6</sup>iRü chopatawa tá ipenaxügü nax penadaix rü guxütama pedai rü yaxguâxgü, rü ngextüxüxügü, rü paxügü, rü buxügü, rü ngexügü! iNatürü taxütama nüxü pedau i ngẽma äégacatüxü!”, ñanagürü. Rü yemaacü inanaxügüe nax nadaiaxü ga yema yaxguâxgü ga Tupanapatamaxã icuaxgüxü. <sup>7</sup>Rü yemawena rü nüma ga Cori ya Tupana rü yema yatügüxü namu rü ñanagürü nüxü: “iRü nagu pichocu ya yima chopata rü yuexümaxã penaxãüâchixëxë! Rü duüxũgü i yuexümaxã penapaxëxë i naäxtü!” ñanagürü. Rü nüma ga yema yatügü rü ínachoxü rü inanaxügüe ga nax nadaiaxü ga yema ñanecüâx ga duüxũgü. <sup>8</sup>Rü yema ínaxügüyane rü chaxicatama íchayaxü. Rü yexguma ga choma rü ñaxtüanegu chanangücuchi rü poraäcü changechaüâcüma aita chaxü rü ñachagürü: “Pa Corix, rü ñuxma nax yima ñane ya Yerucharéücüâxgümaxã nax cunuxü çrü tá cunadaixü i ngẽma noxretama i Iraétanüxü i ngẽma yaxügüxü?” ñachagürü. <sup>9</sup>Rü nüma ga Cori ya Tupana rü choxü nangäxüga rü ñanagürü: “Ngẽma Iraéanecüâxgü rü ngẽma Yudáanecüâxgüarü pecádu rü nataxüchi. Rü ngẽma nachixüane rü máetagüxümaxã nanapá. Rü yima ñane ya Yerucharéüwa rü norü duüxũgü rü chixeäcü nügümaxã inacuaçgü. Rü nüma nagu naxĩnüegu rü marü nüxna

chixũ i ngẽma nachixũane, rü ngẽmacax tama nüxũ chadau i ngẽma naxügüxũ.

<sup>10</sup>Natürü taxütáma choxũ nangechaütümüxũ i ngẽma duũxügü, rü nüxna tá chaca naxçax ga yema ñuxácü chixri nax namaxẽxũ”, ñanagürü.

.....

#### Yerucharéücüãx i duũxügüarü poxcu

**11** <sup>1</sup>Rü nüma ga Tupanaãxẽ i Üünexũ rü choxũ nayachüxächixẽxẽ rü Tupanapataarü iãx ya éstewaama üxüwa choxũ naga ga Yerucharéüwa. Rü yema iãxwa nayexmagü ga 24 ga yatügü. Rü yematanüwa nüxũ chacuáxũ nixĩ ga Yaachanía ga Achúru nane rü ga Peratía ga Benaía nane. Rü nümagü rü Yerucharéücüãxarü ãëxgacügü nixĩgü.

.....

#### Tupana rü Echequiémaxã nüxũ nixu nax wena táxarü nachixũanecax nanawoeguxẽãxũ i Iraétanüxügü

<sup>14</sup>Rü nüma ga Cori ya Tupana rü wenaxarü chomaxã nidexa rü ñanagürü choxũ: <sup>15</sup>“Rü ngẽma Iraétanüxũ i Yerucharéüwa yaxügüxũ rü nidexagü nachiga i ngẽma natanüxũ i Iraéanecüãxgü i to i nachixũanegu woonexũ rü ñanagürügü: ‘Rü ngẽma tatanüxügü i to i nachixũanewa gagüxũ rü Tupana ngẽxma nanawoone yerü poraãcü chixri namaxẽ. Rü ñuxma i ngẽma norü naane rü tóxrü nixĩ erü Cori ya Tupana tüxna nanaxã’, ñanagürügü. <sup>16</sup>Natürü i cumax, Pa Echequiéx, rü tá ngẽma Iraétanüxũ i to i nachixũanegüwa gagüxümaxã nüxũ quixu i chorü ore i ñaxũ: ‘Rü woo

ngẽma to i nachixũanegügu pexũ chawoone, natürü taxütáma guxüguçax nixĩ. Erü ngẽma nachixũanegü i naga pewoonexüwa rü chomatátama nixĩ i pemaxã changemaxũ’, ñachagürü.

<sup>17</sup>iRü ngëxgumarüxũ ta namaxã nüxũ ixu i ñaa to i chorü ore i ñaxũ! ‘Ngẽma nachixũanegü ga naga nawoonexüwa rü tá chananutaquexẽ rü wena tá nüxna chanaxã i ngẽma Iraéane nax noxrü yixüçax. <sup>18</sup>Rü nümagü rü tá nawoegu rü tá naga napogüe i guxüma i ngẽma naxchicünaxägü ga üpa nüxũ yacuaxüüügüxũ. Rü ngẽmaãcü tá nüxũ narüxoe i ngẽma nacüma i chixexũ.

<sup>19</sup>Rü choma rü tá chanaxüchicüxü ya yima norü maxüne ya taixüne ñoma nutarüxũ. Rü nüxna tá chanaxã ya wüxi ya maxüne ya ngexwacaxüne rü ngexwacaxüxũ i naãxẽ tá nüxna chaxã.

<sup>20</sup>Rü ñuxüchi tá naga naxünüe i chorü mugü rü tá naga namaxẽ. Rü nümagü rü tá chorü duũxügü nixĩgü, rü choma rü tá norü Tupana chixĩ. <sup>21</sup>Natürü ya yíxema naga maxëamaxe i ngẽma nacüma i chixexũ i naxchi chaxaixũ, rü choma rü tá ngẽmacax tüxna chaca. Rü choma ya Cori ya Tupana nixĩ i ngẽma ñachaxũ.’”

#### Cori ya Tupanaarü üüne rü Yerucharéüna nixügachi

<sup>22-23</sup>Rü yema ixãpxexátüxũ rü naxügü rü yema ibochicüxũ rü nawe nayachüxächitanü. Rü yema Tupanaarü üüne ga naétügu chüxüxũ rü nüxna nixügachi ga guma ñane ga Yerucharéü. Rü norü éstewaama yexmane ya maxpüneétiwa nayachaxãchi. <sup>24</sup>Rü ñuxüchi ga yema Tupanaãxẽ i Üünexũ

rü choxũ niga rü Babiróniaanecax choxũ natáeguxêxê natanüwa ga yema chautanüxũgü ga yéma gagüxũ. Rü guxũma i ngêma ñuxma nüxũ chixuxũ rü yema nixĩ ga Tupanaãxê i Üünexũ choxũ nüxũ dauxêxũ ga yexguma choxũ nangoxetüxêégu. Rü yemawena rü inayarütaxu. <sup>25</sup>Rü ñuxũchi ga choma rü yema chautanüxũgü ga Babiróniaanewa gaguxũmaxã nüxũ chixu ga guxũma ga yema Tupana choxũ nüxũ dauxêxũ.

.....

**Yerucharéücüãxgü rü tama  
Tupanamaxã nixaixcumagü**

**16** <sup>1</sup>Rü nüma ga Cori ya Tupana rü chomaxã nidexa rü ñanagürü: <sup>2</sup>“Rü cumax, Pa Yatüx, rü chanaxwaxe ya yima ñane ya Yerucharéümaxã quidexa nachiga i ngêma taxũ i chixexũ i naxüxũ. <sup>3</sup>Rü ñacurügü tá nüxũ ya yima ñane ya Yerucharéü: ‘Rü ñaa nixĩ i ngêma Cori ya Tupana cumaxã nüxũ ixuxũ. Rü yexguma noxri cunoxgu, Pa Yerucharéüx, rü Canaãüarü naanewa nixĩ ga cunoxũ. Rü cunatü rü Amoréutanüxũ tixĩ, rü cué rü Itítatanüxũ tixĩ. <sup>4</sup>Rü yema ngunexũ ga nagu cunoxũgu rü taxúema cuxũ tiwéxũ rü taxúema cuxũ taxaiya, rü taxúema yucüramaxã cuxũ tachaxüne, rü taxúema cuxũ tinajãpetünaxã. <sup>5</sup>Rü taxúeaxũma cungechaütümüxũ, rü taxúema cuxçax taxoégaãxê ga mea cuxũ nax tamexêégüxüçax. Rü yema ngunexũ ga nagu cunoxũgu rü yéa naanewa cutaxmare yerü ga duüxũgü rü cuwa naxãüxãxgü. <sup>6</sup>Natürü ga chomax rü cuxütawa chaxüpetü rü cuxũ chadau

ga nagüetü nax cuxüxũ rü yemaçax choxũ cungechaütümüxũ rü cuxũ chamaxêxê.

.....

<sup>8</sup>Rü yemawena rü wena cuxütawa chaxüpetü rü cuxũ chadau ga marü nax cuyaxũ rü âmücügu nax curüxínüxũ. Rü ñuxũchi wüxi ga mámüxũ ga naxchirumaxã cuxũ chidüxü yerü cunexchiru. Rü ñuxũchi cumaxã chaxüga rü cumaxã nüxũ chixu nax choxrü quixixũ. Rü choma ya Cori ya Tupana nixĩ i cumaxã nüxũ chixuxũ i ngêma.

.....

<sup>13</sup>Rü yemaacü, Pa Yerucharéüx, rü cugü ícurüme namaxã i úiru rü diêrumü. Rü yema cuxchirugü rü chédanaxçax nixĩ, rü línuchi ga meama ixümatüxũ nixĩ. Rü yema òna ga cunoxũ rü imexũ nixĩ. Rü yemaacü yexera cumexechi rü ãëxgacü naxmaxwa cunü. <sup>14</sup>Rü guxũ i nachixüanewa rü cutachiga erü cumexechi. Rü taxuwama cunañuxraxũ erü chomatama nixĩ ga cuxũ changaxãxũ. Rü choma ya Cori ya Tupana nixĩ i cumaxã nüxũ chixuxũ i ngêma. <sup>15</sup>Natürü ga cumax rü curü memaxã cugü quicuaxüxũ. Rü yemaacü yema cuchiga ga mexũmaxã wüxi ga nge ga ngeãxêcü cugü quixixêxê, rü guxũma ga duüxũgü ga yéma chopetüxüna cugü cuxã.

.....

<sup>38</sup>Rü ñuxma nax choxna cungeãxũ rü cumáetaxũ, rü ngêmaçax cumaxã chanu rü tá cuxna chixügachi nax cuyuxüçax’ ”, ñanagürü.

.....

Wüxichigü i duüxü rü nanaxwaxe nax  
Tupanapexewa norü maxüna nadauxü

**18** <sup>1</sup>Rü nüma ga Cori ya Tupana  
chomaxā nidexa rü ñanagürti:  
.....

<sup>4</sup>Rü guxüma i duüxügüarü maxü rü  
choxmexwa nangexmagü woo yaxü rü  
buxügü. Rü yíxema chixexü úxe rü  
tümaarü chixexügagu tátama tayu. <sup>5</sup>Rü  
yíxema aixcüma mexe, rü guxāmaxā  
tixaixcüma rü aixcüma wexguxü taxü.  
.....

<sup>9</sup>Rü nagu tamaxü i chorü mugü rü  
aixcüma tayanguxēxē. Rü yíxema tixí ya  
aixcüma mexe, rü ngēmacax taxütáma  
tüxü chapoxcu. Rü choma ya Cori ya  
Tupana nixí i nüxü chixuxü i ngēma.  
<sup>10-13</sup>Natürü ngēxguma chi yimá yatü ya  
mecü nüxü nangexmagu ya wüxi ya  
nane ya tama nanatürüxü mea maxüci,  
natürü wüxi ya nuxwaxecü rü  
máxwaxecü yixíxgu, rü yima nane rü  
norü chixexügagu tátama napoxcu. Rü  
yima nane rü ngēxguma chi natanügu  
naxāxgu i ngēma maxpúnetapexegüwa  
chibüexü rü ngēmaäcü norü  
tupanachicüna<sup>ā</sup>güxü icuaxüü<sup>g</sup>güxü,  
rü chi toguexü yapuxmaxgu,  
rü chi yíxema ngearü diēruāxgüxe  
rü tüxü nataxuxemaxā chixri  
inacuaxgu,  
rü chi toguexaxü nangíxgu,  
rü chi tama tüxü natáeguxēxāxgu i  
tümaarü ngēmaxü i ngēma  
tümaarü ngetanücax nüxna  
taxāgüxü,  
rü chi tupanenetagügu yaxoōxgu,  
rü chi naxüāxgu i ngēma chixexü i  
naxchi chaxaixü,

rü chi norü diēru toguena ngíxü  
naxāxgu nax ngēmaäcü tüxü  
nangíxücax rü tacü i ngürü  
üétücax inacaxücax,

rü yima nane ya ngēmaäcü chixri  
maxüci rü ngēmacax aixcüma tá nayu  
rü nagagu tátama nixí i ngēma.

<sup>14</sup>Natürü ngēxguma chi yimatama yatü  
ya chixri maxüci nüxü ngēxmagu i  
wüxi ya nane ya nüxü daücü i guxüma i  
nanatüarü chixexügü, natürü tama nagu  
yaxüxgu i ngēma nanatüciüma rü  
taxucürüwa nanatüarü chixexügügagu  
nayu. <sup>15-17</sup>Rü yimá nane rü ngēxguma  
chi tama nanatürüxü natanügu naxāxgu  
i ngēma maxpúnetapexegüwa chibüexü  
rü ngēmaäcü norü

tupanachicüna<sup>ā</sup>güxü icuaxüü<sup>g</sup>güxü,  
rü chi tama nagu yaxoōxgu i ngēma  
Iraeanecüāxgüarü tupanagünetu,  
rü chi tama toguexü yapuxmaxgu,  
rü chi taxúemaxā nachixecümagu,  
rü ngēxguma chi texé diērucax  
nüxna caxgu rü nüma rü tama  
norü diēruchicüxü tümaarü  
ngēmaxücax inacaxgu,  
rü chi tama texéaxü nangíxgu,  
rü chi tüxü nachibüxēēgu ya yíxema  
taiyaxe,  
rü chi tüxü naxüxchirugu ya yíxema  
ngexchiruxe,  
rü chi taxúemaama guxchaxü  
naxüxgu,  
rü chi ngearü üétüäcüma diēru  
ngíxü inaxāxgu,  
rü chi chorü mugüga naxínügu rü  
nagu namaxügu,  
rü nüma rü taxütáma nanatüarü  
chixexügagu nayu. Rü tá namaxü.  
<sup>18</sup>Natürü ya yima nanatü rü norü

chixexũgũgagu tátama nayu erü nachixecüma rü nangĩx rü chixexũ naxü i natanüxũgũtanüwa. <sup>19</sup>Rü pema tá choxna peca rü ñaperügügü tá: ‘¿Tũxcüũ ya yimá nane rü tama nanatüarü chixexũgagu napoxcu?’, ñapegürügü tá. Dücax, rü tá pexũ changãxũ. Erü yimá nane rü aixcüma mexũ naxü rü nayanguxẽxẽ ga chorü mugü rü nagu namaxũ. Rü ngẽmacax taxucürüwama nanatüarü chixexũgagu nayu. <sup>20</sup>Rü yĩxema chixexũ üxexicatama tá tixĩ ya tümaarü chixexũgagu poxcúxe. Rü nüma ya yimá nane ya mecü rü taxütáma nanatüarü chixexũ naxütanü. Rü wüxi i papá i mexũ rü taxütáma nanearü chixexũ naxütanü. Rü yĩxema mexũ úxe rü tá tanayaxu i tümaarü ãmare naxçax i ngẽma mexũ i taxüxũ. Rü yĩxema chixexũ úxe rü tá tanayaxu i tümaarü poxcu naxçax i ngẽma chixexũ i taxüxũ.

**Tupana rü nanapoxcue i duũxũgü i ngẽma ñuxãcü nax namaxẽxũãcütama**

<sup>21</sup>Natürü ngẽxguma wüxi ya yatü ya noxri chixri maxücü rü nüxũ naxoxgu i nacüma i chixexũ, rü naga naxĩnũgu i ngẽma chorü mugü, rü aixcüma mexũ naxũxgu rü tá namaxũ rü taxütáma nayu. <sup>22</sup>Rü guxũma i norü chixexũgü rü choma rü tá nüxũ nüxũ icharüngüma, rü nüma rü tá namaxũ erü nayanguxẽxẽ i chorü mugü. <sup>23</sup>¿Rü pema nagu perüxĩnũegu rü chataãxẽxũ i ngẽxguma nayuxgu i duũxũ i chixri maxũxũ? Pemaxã nüxũ chixu rü tama chataãxẽ. Rü ngẽma choma chanaxwaxexũ nixĩ nax çaxçax natãeguxũ, rü nüxũ naxoxũ i ngẽma nacüma i chixexũ nax

nüxũ nangexmaxũcax i maxũ. <sup>24</sup>Natürü ngẽxguma chi wüxi i duũxũ i mea maxchiréxũ nüxũ rüxoxgu nax mea namaxũxũ, rü naxüãxgu i guxũma i chixexũ i tama namaxã chataãxẽxũ çrü namexũ yixĩxũ nax tama napoxcuxũ? Rü pemaxã nüxũ chixu rü tá napoxcu. Rü guxũma ga yema mexũ ga noxri naxüxũ rü choma rü tá nüxũ icharüngüma. Rü nüma rü tá nayu nagagu i ngẽma norü chixexũgü. Rü choma ya Cori ya Tupana nixĩ i ngẽma ñachaxũ.”

.....

**Tupana rü Echequiémaxã nüxũ nixu nax ñuxãcü tá Tírucüãxgüarü ãẽxgacüxũ napoxcuxũ**

**28** <sup>1</sup>Rü nüma ya Cori ya Tupana rü chomaxã nidexa rü ñanagürü choxũ: <sup>2</sup>“Cumax, Pa Echequiéx irü ñacuxũ tá nüxũ ya ñane ya Tírucüãxgüarü ãẽxgacü! Rü choma ya Cori ya Tupana rü ñachagürü: ‘Cumax, Pa Tírucüãxgüarü ãẽxgacüx, rü cugü quicuãxũxũ rü cugü ícurütupanaxũ. Rü ngẽmacax curü tupananetachicawa curüto, rü cuxçax rü taxucürüwa curü uanügü cuxũ narüporamae erü márcutüwa cungexma. Natürü i cumax rü tama wüxi i tupana quixĩ, rü wüxi i duũxũmare quixĩ woo nagu curüxĩnũgu nax curü tupananetaarü cuçax cuxũ ngẽxmaxũ. ....

<sup>4</sup>Rü cuma rü ngẽma curü cuçaxmaxã rü ngẽma cucüma i mexcüraxũmaxã cuxũ natauxcha nax cunanutaquexexũ i muxũma i curü ngẽmaxũgü. Rü ngẽmaãcü úirumaxã rü diërumümaxã cunapagüxẽxẽ i ngẽma curü

diêruchixûgû. <sup>5</sup>Rû ngêma nûxû nax cucuaxû nax ñuxâcû cutaxexû rû ngêmagagu nimu i curû ngêmaxûgû. Rû ñuxma rû ngêma curû ngêmaxûgûmaxâ cugû quicuaxûxû. <sup>6-7</sup>Rû ngêmacax i choma ya Cori ya Tupana nax chixixû rû ñachagürû cuxû: ‘Rû ñuxma nax cugûgu curûxîñûxû rû wüxi i curû tupananaetarû cuax nax cuxû nangexmaxû, rû ngêmacax to i nachixûñanecûax i duûxûgû i chixecûmaxû tá cuxçax nua chamugû. Rû norû taramaxâ tá cuxçax ñayaxüächi. Rû ngêmagûpexewa rû taxuwatâma name i ngêma curû cuax rû curû ngêmaxûgû’”, ñanagürû ga Cori ya Tupana.

.....

**Ngechaûgaâcûma Tîrucûâxgûarû  
âêxgacûçax nawiyae**

<sup>11</sup>Rû nûma ga Cori ya Tupana rû chomaxâ nidexa rû ñanagürû choxû:  
<sup>12</sup>“Cumax, Pa Yatûx irû ngechaûgaâcûma Tîrucûâxgûarû âêxgacûçax nawiyae rû ñacuxû tá nûxû: ‘Rû ñanagürû ya Cori ya Tupana cuxû: Cumax, Pa Âêxgacûx, rû duûxûgûpexewa rû cumexechi rû meama cungâxâê. <sup>13</sup>Rû noxri ga cumax rû wüxi ga nachica ga mexechixû ga Edêürûxû choma cuxçax chamexêêxûwa cuyexmachirex. Rû cuma cungâxâxê ga naguxûraxûcû ga nuta ga ngâxâêruûgû ga rubí rû crisólitu, rû yáde rû topáchiu, rû cornalína rû yáspe, rû chafêru rû granáte rû esmeráda. Rû yema curû ngaxâêgû rû cuxmachinûgû rû úirunaxçax nixî. Rû guxûma ga yema curû ngaxâêxûgû rû marû cuxçax

ínamemare ga yexguma noxritama cungoxgu. <sup>14</sup>Rû choma rû wüxi ga chorû orearû ngeruxû ga daxûcûâxmexêwa cuxû chayexmaxêxê nax cuxna nadauxûçax. Rû wüxi ga maxpûne ga choma chaxûünexênewa cuyexma. Rû ngextá ícuxûxûwa rû ñoma woramacuritanûgu ícuxûxûgurûxû cugû quixixêxê. <sup>15</sup>Rû yema cucûma rû meama iniwexchirex ga yexguma noxri cungoxgu ñuxmata yema ngunexû nax cuwa nangóxû ga chixexû. <sup>16</sup>Rû ngêma nax cumuarû ngêmaxûâxûchixûgûgagu cutoôxê rû ngêmacax chixexûgu cungu. Rû yemagagu chaugûxûtawa cuxû íchataxûchi nawa ya yima chorû maxpûne. Rû ngêma chorû orearû ngeruxû i daxûcûâx ga cuxna dauchiréxû rû cuxû ínamuxûchi nawa ga yema nachica ga ngóonexû ga nawa cuyexmaxû. <sup>17</sup>Rû yema nax cumexechixûgûgagu cugû quicuaxûxû rû yemaçax cuxna chanayaxu ga curû cuax. Rû yema nachica ga mexechixûwa cuxû charûtáe nax wüxi i cugiuruxû quixixûçax napexewa i ngêma to i nachixûñanecûâx i âêxgacûgû’”, ñanagürû ga Cori ya Tupana!  
.....

**Carnêrugûarû dauruxû ya mecû**

**34** <sup>11</sup>Rû choma ya Cori ya Tupana rû nûxû chixu: “Rû chomatátama namaxâ ichacuax rû tá nûxna chadau i ngêma chorû duûxûgû. <sup>12</sup>Rû ngêxgumarûxû ya yimá mecû ya carnêrugûarû dauruxû rû naxçax naxoegaâxê i norû carnêrugû i ngêxguma nawoonemaregu, rû

ngëxgumarüxü nixi i chomax i naxçax chaxoégaãëxü i ngëma chorü duüxügü. Rü tá chayagagü i ngextá ínawoonexüwa, rü ínaxëanexüwa, rü buanecü ítaxüwa. <sup>13</sup>Rü ngëma to i nachixüanegü i nagu nawoonexüwa rü tá chayagagü rü wüxigu tá chanangutaquexexë, rü norü naanewatátama chanagagü. Rü ngëma norü naane i Iraéanearü mǎxpúnegüwa tá chanamugü nax ngëma nachibüexüçax rü natügüwa naxaxegüxüçax. Rü ngëmaäcü waixümü i mexü íngexmaxüwa tá nangexmagü i ngëma chorü duüxügü.”

.....

<sup>17</sup>Rü choma ya Cori ya Tupana rü ñachagürü: “iIperüxínüe, Pa Chorü Duüxügü i Iraétanüxü! Pema i chorü duüxügü nax pixígüxü rü tá pexü íchaxopü nüxna i ngëma togü i chixri pemaxá icuaxgüxü. Natürü i nümagü rü tá chanapoxcue”, ñachagürü.

.....

#### Naxchinaxá ya ipagünechiga

**37** <sup>1</sup>Rü nüma ya Cori rü chaugu naxüxmex rü choxü naporaxë namaxá i norü pora. Rü yema Naãxë i Üünexü rü chomaxá inacuax, rü wüxi ga metachinüxü ga naxchinaxámaxá napaxüwa choxü naga. <sup>2</sup>Rü nüma ga Cori ya Tupana rü natanügu choxü nixügüchigüxëxë ga guma naxchinaxágu ga yema metachinüxüwa namaxá napaxüne. Rü namuxüchi natürü nipagümare. <sup>3</sup>Rü yexguma ga nüma ga Cori ya Tupana rü choxna naca rü ñanagürü: “¿Cuyaxöxü yixixü i cumax, rü daa naxchinaxágu rü

tá wena namaxëxü?” ñanagürü. Rü yexguma ga chomax rü chanangäxü rü ñachagürü: “Pa Corix, cucicatama nüxü cucuax i ngëma”, ñachagürü. <sup>4</sup>Rü yexguma ga nüma ga Cori ya Tupana rü ñanagürü choxü: “iChauégagu namaxá idexa ya daa naxchinaxágu! Rü ñacugürü tá nüxü: ‘Pa Naxchinaxágu ya Ipagünex irü iperüxínüe i ñaa Cori ya Tupanaarü ore! <sup>5</sup>Rü nüma ya Cori ya Tupana rü ñanagürü pexü: Rü pegu tá chanaxücuxëxë i maxü nax pingüätanücüüxüçax rü wena pemaxëxüçax. <sup>6</sup>Rü wena tá chanaxüxëxë i perü tarumagü, rü tá pexü chaxümachi, rü tá pexü chaxüxchaxmüxü, rü tá pexna chanaxá i perü ngüäcüxü nax wena pemaxëxüçax. Rü ngëxguma i pema rü tá nüxü picuaxächie nax choma chixixü ya Cori ya Tupana’”, ñanagürü. <sup>7</sup>Rü yexguma ga choma i Echequé rü yema Cori ya Tupana chomaxá nüxü ixuxüäcü guma naxchinaxágümaxá nüxü chixu. Rü yexguma namaxá íchidexayane rü nüxü chaxínü ga nax naxíxäächianexü. Rü guma naxchinaxágu rü inanaxügü nax wüxichigü nügüçax naxixü. <sup>8</sup>Rü nüxü chadau ga ngürü nax yatarumaáxü rü naxámachixü rü naxáxchaxmüxü. Natürü nangearü maxüãxgüxü. <sup>9</sup>Rü yexguma ga nüma ga Cori ya Tupana rü ñanagürü choxü: “iRü chauégagu naxçax naca ya buanecü i maxü nawa ngëxmacü, rü ñacuxü tá nüxü: ‘Pa Buanecü i Guxücüwawa ne Ücüx irü nua naxü nax cunamaxëxëxüçax i ñaa naxüne i yuexü!’” ñanagürü ga Cori ya Tupana. <sup>10</sup>Rü yexguma ga chomax rü Cori ya Tupanaégagu guma

buanecūmaxā chidexa yema nūma  
 choxū namuxūrūxū, rü guma buanecū  
 rü ínangu rü yema naxūnegūgu naxūcu.  
 Rü nūma ga yema naxūnegū rü  
 wenaxarū namaxē rü inachigū. Rü  
 yemaacū namuxūchi ga yema  
 írūdagūxū. <sup>11</sup>Rü yexguma ga Cori ya  
 Tupana rü ñanagürü choxū: “Rü ngēma  
 Iraétanūxūgū rü daa naxchinaxāgürūxū  
 nixīgū. Rü nügūmaxā ñanagürügū: ‘Rü  
 yixemagū rü ñoma naxchinaxāgū ya  
 ipagünerūxū tixīgū erü nataxuma i tóru  
 ngūxēerūxū, rü ngēmacax tagutáma  
 wenaxarū tachixūanecax tawoegu’,  
 ñanagürügū. <sup>12</sup>Natürü i choma rü cuxū  
 chamu nax chauégagu namaxā  
 quidexaxū irü ñacurügū tá nüxū! ‘Rü  
 nūma ya Cori ya Tupana rü ñanagürü  
 pexū: Pa Chorü Duūxūgū i  
 Iraétanūxūgūx, rü tá pexū  
 íchangūxūxēxē nawa i ngēma  
 nachixūanegū i nagu pepocxuexū, rü tá  
 perü naanecax pexū chawoeguxēxē.  
<sup>13</sup>Rü ngēxguma choma ngēmaacū pexū  
 charüngūxēēgu nax ípengūxūxūcax  
 nawa i ngēma nachixūanegū, rü tá nüxū  
 picuaxāchitanü, Pa Chorü Duūxūgūx,  
 nax choma yixixū i perü Cori ya  
 Tupana. <sup>14</sup>Rü choma rü tá pexna  
 chanamu i ngēma Chauāxē i Üünexū, rü  
 pema rü tá íperūdagū. Rü tá perü  
 naanewa tátama wena pexū  
 changexmagūxēxē. Rü ngēxguma tá nixī  
 i nüxū pecuāxū nax choma ya Cori ya  
 Tupana chixixū i pemaxā nüxū chixuxū  
 i ngēma, rü choma nixī ichayanguxēxū.

Rü choma ya Cori ya Tupana nixī i  
 ngēma ñachaxū.’

.....

<sup>24</sup>Rü yimá chorü duū ya Dabítaxa tá  
 nixī ya chorü duūxūgüaru āēxgacū ixīcū  
 rü nüxica tátama nixī i norü dauruxū  
 yixixū. Rü nümagū rü tá chauga  
 naxīnue rü tá nagu namaxē i chorü  
 mugū rü ucuxēgū. <sup>25</sup>Rü nümagū rü  
 nawa tá namaxē i ngēma nachixūane ga  
 norü oxigū nawa maxēxū ga chorü duū  
 ga Acóbuna chaxāxūwa. Rü ngēma tá  
 nixī i guxūgutáma nangexmagūxū i  
 nümagū, rü naxacūgū, rü nataagū. Rü  
 yimá chorü duū ya Dabítaxa tá nixī ya  
 guxūgutáma norü āēxgacū ixīcū. <sup>26</sup>Rü  
 ngēma chorü duūxūgūmaxā tá  
 chanaxuegu nax norü uanügū namaxā  
 rüngūxmüexūcax, rü ngēmaacū aixcūma  
 tá nataāxēgūxūcax. Rü ngēma namaxā  
 chaxueguxū rü tagutáma inayacuax. Rü  
 choma rü tá nüxū charüngūxēxē nax  
 yamuxūcax. Rü natanüwa tá  
 chanangexmaxēxē ya chopata ya  
 üünene nax guxūgutáma ngēma  
 nangexmaechaxūcax. <sup>27</sup>Rü choma rü  
 natanüwa tá changexma. Rü choma tá  
 nixī i norü Tupana chixixū rü nümagū  
 rü tá chorü duūxūgū nixīgū. <sup>28</sup>Rü  
 ngēxguma yima chopata ya üünene  
 natanüwa ngēxmagu, rü ngēma togū i  
 nachixūanegū rü tá nüxū  
 nicuaxāchitanü nax chanadexū i ngēma  
 Iraétanūxū nax chortü duūxūgū i üünexū  
 yixīgūxūcax.”

.....



# DANIEL

## (Danié)

Nabucudonochó rü íane ga  
Yerucharéúçax ínayagoóchi rü nayana ga  
Tupanapataarü yemaxügü ga çuxuxü

**1** <sup>1</sup>Rü yexguma marü tomaepüx ga taunecü âêxgacü yixixgu ga Yoachíü ga Yudáanewa, rü nüma ga Nabucudonochó ga Babiróniaanearü âêxgacü rü Yerucharéúçax ínayagoóchi norü churaragümaxã. <sup>2</sup>Rü nüma ga Cori ya Tupana rü Nabucudonochóaxü nanatauxchaxêxê nax Yoachíüxü yayaxuxü rü Babiróniaanewa nagaaxü muxüma ga natanüxügümaxã. Rü yexgumarüxü ta nayana ga Tupanapataarü yemaxügü ga çuxuxü, rü norü tupanapatagu nananucu ga Babiróniaanewa.

Daniéü nigagü nax âêxgacüarü  
ngüxêêruxü yixixüçax

<sup>3</sup>Rü ñuxüchi nüma ga Nabucudonochó rü norü ngüxêêruxü ga Apenáxü namu nax yema Yudáanearü âêxgacütanüxüwa yadexechiãxüçax ga yema ngextüxüxügü ga Yudíugü ga rümemaexü nax norü ngüxêêruxü yixixüçax. <sup>4</sup>Rü yema ngextüxüxügü

ga yadexechixü rü nimechametu rü taxuwama nichixe rü meama naãxêxü nicuax, rü meama poperaxü icuáxü nixigü. Rü yemaacü nime nax âêxgacüpatawaarü ngüxêêruxü yixixüçax. Rü ñuxüchi ga âêxgacüarü duüxügü rü yema ngextüxüxügüxü nangúexêxê ga naga ga Babiróniaanecüãxgü ga Cadéugü rü nacümagü ga ümatixü. <sup>5</sup>Rü nüma ga Nabucudonochó rü norü duüxügüxü namu nax guxüma ga ngunexügügu yema ngextüxüxügüna naxágüaxüçax ga yematama óna ga nümatama nangóxü rü bínu ga nümatama yaxaxäcü. Rü yemaacü tomaepüx ga taunecü meama nanangúexêxê nax yemawena âêxgacüaxü napuracüexüçax.

Danié rü namücügü rü  
âêxgacüpatawa nayexmagü

<sup>6</sup>Rü yema ngextüxüxügütanüwa nayexmagü ga Danié rü Ananía rü Michaé rü Acharía. Rü nümagü rü Yudátanüxü nixigü. <sup>7</sup>Rü nüma ga yema âêxgacüarü duüxügüeru rü nanaxüchicüxü ga Daniéga rü Betachágu nanaxüéga, rü ga Ananía rü

Chadrágu nanaxüéga, rü ga Michaé rü Mechágu nanaxüéga, rü ga Acharía rü Abenégu nanaxüéga. <sup>8</sup>Natürü nüma ga Danié rü tama nanangóxchaũ ga yema òna rü guma bínu ga ãëxgacü nüxna naxäcü, yerü nagu narüxínü nax Tupanapexewa naxäüächixü ga yema. Rü yemaçax ãëxgacüarü duüxügüeruna naca nax tama yema òna ga ãëxgacü nüxna äxü nüxü nangõxëëxüçax. <sup>9</sup>Rü Tupana rü yema ãëxgacüarü duüxügüeruaxëwa nananguxëxë nax ãëxgacü ga Betachá Daniémaxä namecümáxüçax. <sup>10</sup>Natürü yema ãëxgacüarü duüxügüeru rü norü ãëxgacüxü namü rü Daniéxü ñanagürü: —Nüxü chamü ya yimá chorü cori ya ãëxgacü. Rü nüma rü marü chomaxä nüxü nixu nax taxacürü òna rü axexü tá pexna chaxäxü. Rü ngëxguma tá pexü nadauxgu rü ngëma togü i ngextüxüxügüarü yexera tá pixaegux rü nüma ya ãëxgacü rü tá choxü nimax —ñanagürü. <sup>11</sup>Rü nüma ga ãëxgacüarü duüxügüeru rü nüxü naxuneta ga wüxi ga duüxü nax nüxna nadauxüçax ga Danié rü Ananía rü Michaé rü Acharía. Rü nüma ga Danié rü yema norü dauruëmaxä nidexa rü ñanagürü nüxü: <sup>12</sup>—Toma i curü duüxügü nax tixígüxü rü cuxna taca nax 10 i ngunexü towa nüxü cuxüxü nax toxna cunaxäxü i nanetü i ämaxügüxicatama rü ñuxüchi dexá. <sup>13</sup>iRü ngëma 10 i ngunexügüwena rü toxü nangugü namaxä i ngëma togü i ngextüxüxügü i nangõxgüxü i ngëma ãëxgacüwemü! Rü ñuxüchi i cuma rü tá nüxü cucuax i taxacürü òna tá toxna cuxäxü —ñanagürü. <sup>14</sup>Rü nüma ga yema norü dauruxü rü: —Ngü

—ñanagürü. Rü 10 ga ngunexügü rü nanetü i ämaxügüxicatama rü dexámare nixü ga nüxna naxäxü. <sup>15</sup>Rü yexguma 10 ga ngunexügü marü ngupetügu rü nümagü ga yema ägümücü ga ngextüxüxügü rü tama nidaxawee rü narüpormaegü nüxü ga yema togü ga ngextüxüxügü ga ãëxgacüwemü ngõxgüxü. <sup>16</sup>Rü nüma ga yema norü dauruxü rü nügüxü nayange ga yema ãëxgacüwemü rü guma bínu ga yema ägümücü ga ngextüxüxügüçaxchirex ixücü. Rü ñuxüchi nanetü ga ämaxügüxicatama nüxna naxä. <sup>17</sup>Rü yema ägümücü ga ngextüxüxügü, rü Tupana rü cuax nüxna naxä nax yemaacü nüxü nacuaxgüxüçax ga naguxüraxüxü ga cuax ga poperagu ümatüxü. Rü nüma ga Tupana rü naétü Daniéxü narüngüxëë nax nüxü nacuáxüçax nax taxacüchiga yixüxü ega Tupana texéxü nüxü dauxëëgux i taxacü i ëxügüxü rüxna texé änegügux. <sup>18</sup>Rü yexguma marü yanguxgu ga yema uenü ga ãëxgacü ga Nabucudonochó nagu unetaxü ga napexewa nax nagagüaxüçax ga guxüma ga yema ngextüxüxügü ga ãëxgacüarü puracüçax ngüxü, rü nüma ga yema ãëxgacüarü duüxügüeru rü ãëxgacüpexewa nanagagü ga yema ngextüxüxügü. <sup>19</sup>Rü nüma ga ãëxgacü rü namaxä nidexa ga guxüma ga yema ngextüxüxügü. Rü natanüwa rü nataxuma ga wüxi ga Danié, rü Ananía, rü Michaé, rü Acharíamaxä wüxigüxü ga norü cuaxwa. Rü yemaçax ga nüma ga ãëxgacü rü nanade ga yema ägümücü ga ngextüxüxügü nax norü ngüxëëruügü yixígüxüçax. <sup>20</sup>Rü nüma ga ãëxgacü rü

yexguma norü ucuxêcax nüxna nacaxgux nax mea nachixüanemaxã inacuáxüçax rü nawa nüxü inayangau nax 10 expüxcüna guxüma ga norü ucuxêruügü ga yuüexüarü yexera yixigüxü nax nüxü yacuaxüchixü ga Danié rü namücügü.

.....

### Naxânegü ga Nabucudonochó

**2** <sup>1</sup>Rü yexguma taxre ga taunecü marü âêxgacü yixixgu ga Nabucudonochó rü ñuxrexpüxcüna naxânegü. Rü yemacax naxoegaãxê rü taguma mea naxchaxwa nape. <sup>2</sup>Rü yemacax naxçax nangema ga norü ucuxêruügü ga iyuüxü rü yema êxügüxüxü cuaxgüxü rü napexearü üxü cuaxgüxü rü yema cuax nüxü yexmagüxü nax yemagü namaxã nüxü ixugüexü ga taxacüchiga nax yixixü ga yema nagu naxânegüxü. Rü nüma ga yema iyuüxü rü âêxgacüxütawa naxí. <sup>3</sup>Rü nüma ga âêxgacü rü ñanagürü: —Ngewax rü chaxânegü rü ngëmacax poraäcü chaxoégaãxê. Rü nüxü chacuáxchaü nax taxacüchiga yixixü i ngëma —ñanagürü. <sup>4</sup>Rü nüma ga yema iyuüxü ga nüxü icuaxüchigüxü rü âêxgacüxü nangãxü rü ñanagürügü: —iGuxüguma namaxü Pa Äêxgacüx! iRü tomaxã nüxü ixu i cunegü! Rü toma nax curü ngüxêëruügü tixigüxü rü tá cumaxã nüxü tixu nax taxacüchiga yixixü —ñanagürügü. <sup>5</sup>Rü nüma ga âêxgacü rü nanangãxüga rü ñanagürü: —Ngëxguma taxütãma chomaxã nüxü pixuxgu nax taxacügu chaxânegüxü rü taxacüchiga nax yixixü, rü tá pexü chadai rü íxraxügu tá pexü nachexe. Rü

pepatagü rü tá nagu napogüe rü caxtaxicatama ngéma tá ninuagü. <sup>6</sup>Natürü ngëxguma chomaxã nüxü pixuxgu nax taxacügu chaxânegüxü rü taxacüchiga nax yixixü, rü tá pexna chanaxã i amaregü rü tá pemaxã chataãxê. Rü ngëmaäcü tá pemaxã chanaxü ega chomaxã nüxü pixuxgu i ngëma chaunegü —ñanagürü. <sup>7</sup>Rü nüma ga yema yatügü ga cuax nüxü yexmagüxü rü wena nanangãxüga rü ñanagürügü: —Pa Äêxgacüx itomaxã nüxü ixu i ngëma cunegü! Rü toma rü tá cumaxã nüxü tixu nax taxacüchiga yixixü —ñanagürügü. <sup>8</sup>Rü nüma ga âêxgacü nanangãxü, rü ñanagürü: —Ñuxma rü meama nüxü chacuax nax taxacüçax tama paxa chomaxã nüxü pixuxchaüxü erü ípenangüxêxê nax choxna nanguxü i ngëma äücümamaxü i nagu chaxânegüxü. <sup>9</sup>Rü ngëmacax ngëxguma tama chomaxã nüxü pixuxgu nax taxacügu chaxânegüxü rü taxacüchiga nax yixixü rü guxätãma i pemax rü tá pexna nangu i ngëma poxcu i chaxuegüxü. Rü pemax rü wüxigu pegü pixucüxëgü nax doraxü chomaxã pixuxüçax nax ngëmaäcü nüxü charüngümaxü i ngëma chaunegü rü tama pexü chapoxcuxüçax. iRü êcü chomaxã nüxü pixu i ñuxäcü nax yixixü i ngëma chaunegü! Rü ngëmawa tá nüxü chacuax nax nüxü pecuáxü nax chomaxã nüxü pixuxü nax taxacüchiga yixixü —ñanagürü. <sup>10</sup>Rü nüma ga yema yatügü ga cuax nüxü yexmagüxü rü nanangãxügü rü ñanagürügü: —Ñoma i naanewa rü tataxuma ya texe ya nüxü cuáxe nax nüxü tixuxü i ngëma nüxü cucuáxchaüxü, Pa Äêxgacüx. Rü

ngêxgumarixũ ta rü taguma ñuxgu wüxi ga nachixũanearü äëxgacü ga poracü norü ucuxêruũgüna naxçax naca i ngêma ñuxma cuma toxna naxçax cucaxaxũruxũ ixixũ. <sup>11</sup>Pa Äëxgacüx, rü ngêma naxçax ícucaxũ rü poraäcü naguxchaxüchi rü tataxuma ya texé ya nüxũ cuáxe nax nüxũ tixuxũ nax taxacüchiga nax yixixũ i ngêma nagu cuxãnegüxũ. Rü ngêma tachixũanearü tupanagüxicatama nixĩ i nüxũ cuáxũ nax taxacüchiga nax yixixũ, natürü nümagü rü tama duũxũgütanüwa nangexmagü —ñanagürügü. <sup>12</sup>Rü yemaxũ naxĩnügü ga äëxgacü rü poraäcü nanu rü nanamu nax nadaiaxũçax ga guxũma ga yema norü ucuxêruũgü ga Babiróniaanecüãxgü. <sup>13</sup>Rü yexguma marü naxunagügu ga yema äëxgacüarü mu rü norü churaragü rü Daniéçax rü namücügüçax rü ta nadaugü nax nadaiaxũçax.

**Danié nüxũ nixu ga äëxgacü  
nagu änegüxũ rü nanangoxêxé  
nax taxacüchiga yixixũ**

<sup>14</sup>Rü yexguma yéma naxüxgu ga äëxgacüarü churaragüeru ga Ariú nax yadaiaxũçax ga yema äëxgacüarü ucuxêruũgü rü Danié rü naxçax nixü rü meama namaxã nidexa. <sup>15</sup>Rü nüma ga Danié rü nüxna naca rü ñanagürü: —¿Taxacüçax nanuxüchi ya yimá äëxgacü rü ngêmacax naxunagüãxũ i ñaa mu nax cunadajxũçax i guxũma i norü ucuxêruũgü? —ñanagürü. Rü nüma ga Ariú rü nüxũ nixu nax taxacüçax yixixũ. <sup>16</sup>Rü yexguma ga nüma ga Danié rü äëxgacüxütawa naxü nax nüxna yacaxaxũçax, rü ñanagürü

nüxũ: —iPa Äëxgacüx, choxna naxã i ñuxre i ngunexũ! Rü choma rü tá cumaxã nüxũ chixu nax ñuxü ñaxũ i ngêma cunegü rü taxacüchiga yixixũ —ñanagürü. <sup>17-18</sup>Rü yemawena rü napatawa naxü. Rü namücügü ga Ananía rü Michaé rü Acharíamaxã nüxũ nixu ga guxũma ga yema nax äëxgacü nanadaixchaũxũ rü yemaacü Tupana ya daxügücüarü ngüxêçacx ínacagüxũçax nax nüma ya Tupana naxçax nangoxêëxũçax ga yema äëxgacü nagu änegüxũ, rü yemaacü tama nadaiaxũçax wüxigu namaxã ga yema togü ga ucuxêruũgü ga Babiróniaanecüãx ixĩgüxũ. <sup>19</sup>Rü yema ga chütaxügu rü Tupana Daniéçax nanangoxêxé ga taxacüchiga nax yixixũ ga yema äëxgacü nagu änegüxũ. Rü yemaçax nüma ga Danié rü Tupanaxũ nicuaxxüxũ rü ñanagürü: <sup>20</sup>“Rü guxũguma namecümamaxüchi ya Tupana, erü noxrü nixĩ i guxũma i cuax rü guxũma i pora. <sup>21</sup>Rü nüma rü namaxã inacuax i guxũma i taxacü i ngupetüxũ. Rü nüma nixĩ i yamucuchiaxü rü ínamuxüchiaxũ i äëxgacügü. Rü nüma nixĩ i cuax tüxna naxãxũ ya yíxema tümaãxêxũ icuáxe rü tüxũ nüxũ nacuaxêëxũ ya yíxema idoeruxe. <sup>22</sup>Rü nüma rü tüxũ nüxũ nacuaxêxé i ngêma cuax i êxũgüxũ. Rü nüxũ nacuax i ngêma éanexüwa üxũ erü ngêma ngóonexũ rü nawa nangexma. <sup>23</sup>Rü moxê cuxna chaxã rü cuxü chicuaxxüxũ, Pa Chaunatügüarü Tupanax, erü cuax choxna cuxã rü choxü cuporaxêxé. Rü ñuxmax rü choxü nüxũ cucuaxêxé i ngêma cuxna naxçax tacaxaxũ, rü toxü nüxũ cucuaxêxé i ngêma nanegü i äëxgacü naxçax

oégaãêxũ”, ñanagürü. <sup>24</sup>Rü yemawena ga Danié rü Ariúxütawa naxü yerü yema nixí ga ãêxgacü muxü nax nadaiaxüçax ga guxüma ga yema ãêxgaciariü ucuxëruügü ga Babiróniaanecüãxgü. Rü yemacax nüxna nayachogü rü ñanagürü nüxü: —iTaxú i cunadaixü i ngëma ucuxëruügü! iRü ãêxgacixütawa choxü naga! Rü choma tá namaxã nüxü chixu i ngëma nanegü —ñanagürü. <sup>25</sup>Rü yexgumatama ga Ariú rü Daniéxü ãêxgacü ga Nabucudonochóxütawa naga, rü ñanagürü nüxü: —Pa ãêxgacüx, rü ngëma Yudúgü ga nachixüanewa ígaxüxütanügu nüxü ichayangau i wüxi i yatü i tá cumaxã nüxü ixuxü i taxacüchiga yixixü i ngëma cunegü —ñanagürü. <sup>26</sup>Rü yexguma ga nüma ga ãêxgacü rü Danié ga Betachámaxã naxugüãcüxü ñanagürü: —¿Cuxü natauxchaxü nax chomaxã nüxü quixuxü ga yema nagu chaxãnegüxü rü taxacüchiga yixixü ga yema chaunegü? —ñanagürü. <sup>27</sup>Rü nüma ga Danié nanangãxüga rü ñanagürü: —Pa ãêxgacüx, rü nataxuma i wüxi i duüxü i nüxü cuáxü rü bai i wüxi i êxüguxüxü cuáxü, rüexna yuüxü, rüexna woramacuriwa ngüexü i nüxü cuáxü i ngëma cunegü i cuma nüxü cucuáxchaüxü. <sup>28</sup>Natürü nangexma ya wüxi ya Tupana i daxüguxü i naanewa ya nüxü cuáci i êxüguxü i ore, Pa ãêxgacüx, rü nüma nixí i cuxü nüxü nacuaxëêxü i ngëma tá yixcüra ngupetüxü. Rü tá cumaxã nüxü chixu, Pa ãêxgacüx, ga yema nüxü cudauxü ga cunegüwa ga yexguma cupeyane. <sup>29</sup>Rü cumax, Pa ãêxgacüx, rü curü pechicawa

cuyexma rü nagu curüxínü ga taxacü tá nax ngupetüxü ga yixcüra. Rü yexguma cuxãnegügux rü nüma ya Tupana ya nangoxëêcü i ngëma êxüguxü rü cuxü nüxü nacuaxëêxë i ngëma tá ngupetüxü. <sup>30</sup>Rü ngëxgumarüxü ta ya Tupana rü chauxcax nanangoxëêxë ga yematama cuma nagu cuxãnegüxü. Natürü tama ngëma togüariü yexera nüxü charücuaxmaexüçax nixí i choxü nüxü nacuaxëêxü i ngëma. Rü chauxcax nanangoxëêxë nax cumaxã nüxü chixuxüçax nax taxacüchiga yixixü ga yema cunegü nax ngëmaãcü cuma rü ta nüxü cucuáxüçax. <sup>31</sup>Rü yema cunegüwa, Pa ãêxgacüx, rü nüxü cudau nax cupexegu nachixü ga wüxi ga naxchicünaxã ga taxü ga iyaxracüüxü ga namaxã ibaxüächixü. <sup>32</sup>Rü naeru rü úirunaxcax nixí, rü naremüwaama rü nachacüügü rü diërumünaxcax nixí, rü naxüne rü naperemagü rü bróuchenaxcax nixí. <sup>33</sup>Rü guma naparagü rü fiërunaxcax nixí. Rü ngãxü ga nacutügü rü fiërunaxcax nixí rü to ga norü ngãxü ga guma nacutügü rü waixümünaxcax nixí. <sup>34</sup>Rü yemaxü ícudawenüyane, Pa ãêxgacüx, rü wüxi ga maxpúnewa narüdixi ga wüxi ga nuta taxüema nüxü cuxnetayane, rü meama yema naxchicünaxãcutüwa nadixi rü nayapuxãchixëêxë. <sup>35</sup>Rü yexguma ga yema fiëru rü waixümü rü bróuche rü diërumü rü úiru rü wüxixücüütama nixãtëxëächi. Rü ñoma trígu icuexechitëxegurüxü nixí ga buanecü yangexü, rü taxuxüma yéma nayaxüächi ga yema naxchicünaxã. Natürü guma nuta ga yema naxchicünaxãétüwa dixpütacü rü wüxi

ga taxüne ga məxpúnexũ nanacaxichi rü guxũma ga ñaa naane rü namaxã nanapá. <sup>36</sup>Rü yema nixĩ ga yema cunegü. Rü nũxmax, Pa Āēxgacũx, rü tá cumaxã nüxũ chixu nax taxacũchiga yixĩxũ ga yema cunegü. <sup>37</sup>Rü cuma nixĩ, Pa Āēxgacũx, i guxũma i togü i āēxgacügüētüwa cuxũxũ i ñũxmax, erü nüma ya Tupana ya daxũgucü rü cuxũ inamu nax āēxgacü quixĩxũcax rü cuporaxũcax rü guxũma i nachixũanegü cuxũ cuaxgũxũcax. <sup>38</sup>Rü ngēmacax i ñũxma rü guxũma i duũxũgũmaxã rü naexũgũmaxã rü werigũmaxã icucuax. Erü nüma ya Tupana rü cumxexwa nanangexmagũxēxē. Rü cuchiga nixĩ, Pa Āēxgacũx, i ngēma naxchicũnaaxæru i úirunaxcax. <sup>39</sup>Rü cuwena, Pa Āēxgacũx, rü tá nangexma i to i nachixũanecũax i āēxgacü i nüxĩ tá ichixũ rü togü i nachixũanegũmaxã icuáxũ, natürü taxütáma curü poramaxã nawũxigu. Rü ngēmawena tá nangexma i to i āēxgacü i muxũma i nachixũanegũmaxã icuáxũ. Rü ngēmachiga nixĩ i ngēma naxchicũnaaxũne i bróuchenaxcax. <sup>40</sup>Rü ngēmawena rü tá inangu i to i āēxgacü i poraxũ i ñoma fiérurũxũ taixũ. Rü ngēxgumarũxũ i ngēma fiéru rü guxũma i taxacũxũ napuxãchixēxē rü inanaxoxēxē, rü ngēxgumarũxũ tá nixĩ i ngēma āēxgacü rü tá nax nadaiaxũ rü iyanaxoxēēaxũ i guxũma i ngēma togü i āēxgacügü. <sup>41-42</sup>Rü cumax, Pa Āēxgacũx, rü yexgumarũxũ ta nüxũ cudau ga guma nacutümexē rü nümáne rü waixümünaxcax nixĩ rü náigü rü fiérunaxcax nixĩ. Rü ngēma tamaxã nüxũ nixu rü ngēma nachixũane rü woo ñoma fiérurũxũ natai, natürü ngēma

norü duũxũgü rü tama wũxigu narũxĩnũe rü taxũ i guxchaxũgü nügũmaxátama ínaxũgü. Rü yexgumarũxũ ga guma nacutümexē rü nümáne rü waixümünaxcax nixĩ rü náigü rü fiérunaxcax nixĩ rü ngēxgumarũxũ ta i ngēma nachixũane rü wũxiwa rü tá napora rü towa rü tá natura. <sup>43</sup>Rü ngēma cunegüwa nüxũ cudauxũ, Pa Āēxgacũx, i ngēma fiéru rü waixümũmaxã nax naxãēxũxũ, rü ngēxgumarũxũ ta i ngēma nachixũanearü āēxgacügü rü tá nügũcax naxĩ nax ngēmaācü nügü nangũxēēgũxũcax rü nügũxacũmaxã yaxãmaxgũxũcax. Natürü woo ngēmaācü tá nanaxũgü rü taxütáma napora i ngēma nachixũane, erü ngēma fiéru rü waixümũmaxã rü taxuacũma nügũmaxã tanaxũéxũ. <sup>44</sup>Rü ngēma āēxgacügü rü ñoma i naanemaxã icuaxgũguyane rü nüma ya Tupana ya daxũwa ngēxmacü rü tá nayamucuchi i wũxi i āēxgacü i tagutáma texé iyanaxoxēēcü rü tagutáma to i nachixũane nüxũ rüyexeracü. Rü nüma rü tá inyanaxoxēxē i guxütáma i ngēma togü i āēxgacügüarü ñnũ rü ngēmaācü i nüma rü guxũgutáma āēxgacü nixĩ. <sup>45</sup>Rü yimã āēxgacũchiga nixĩ ga guma nuta ga nüxũ cudaucü ga taxúema nüxũ cuxnetaācũma məxpúnewa yarüdidicü rü íraxũgu napocü ga yema naxchicũnaaxã ga fiérunaxcax, rü bróuchenaxcax, rü waixümünaxcax rü úirunaxcax. Rü yemaacü ga nüma ga Tupana ya poraxũchicü rü cuxũ nanawex, Pa Āēxgacũx, i ngēma yixcũra tá ngupetũxũ. Rü yema cunegüwa nüxũ

cudauxũ rü aixcũma nixĩ, rü ngẽma cumaxã nüxũ chixuchigaxũ rü aixcũma tá ningu —ñanagürü ga Danié. <sup>46</sup>Rü yexguma nüma ga ãëxgacü ga Nabucudonochó nüxũ ñnũgu ga yema ore rü Daniépegegu nacaxápũxü rü waixũmũgu nayangücuchi. Rü norü duũxũgũxũ namu nax Daniéna naxãguaxũcax ga norü ãmaregü rü pumáratexegü. <sup>47</sup>Rü yemawena rü Daniéxũ ñanagürü: —Aixcũmaxũchima ya yimá perü Tupana nixĩ ya guxũma i togü i tupanagũxũ rüporamaectü. Rü nüma rü guxũma i ãëxgacügüarü Cori nixĩ. Rü nüma rü inanawex i ngẽma ëxũgũxü rü ngẽmacax cuxũ nüxũ nacuxãxëxë i ngẽma chaunegü —ñanagürü. <sup>48</sup>Rü ñuxũchi ga nüma ga ãëxgacü ga Nabucudonochó rü Daniéxũ tacü ga ãëxgacüxũ ningucuchixëxë. Rü muxũma ga mexechixũ ga ãmare nüxna naxã. Rü naétüwa nüxũ naxuneta nax Babiróniaanecüãxaru ãëxgacü yixĩxũcax rü naeru yixĩxũcax ga guxũma ga yema ãëxgacüarü ucuxëruũgü ga yema nachixũanewa yexmagüxũ. <sup>49</sup>Rü nüma ga Danié rü ãëxgacüna naca nax nüxũ naxunetaxũcax ga namücügü ga Chadrá rü Mechá rü Abenégu nax yemagü norü ngũxëëruũgü yixĩxũcax ga Babiróniaanewa. Rü nüma ga Danié rü ãëxgacüpatawatama nayexma nax yéma nüxũ nangũxëëxũcax.

**Ãëxgacü nanamu nax úirunaxcax ga naxchicünaxãxü yacuaxũgũxũcax**

**3** <sup>1</sup>Rü nüma ga ãëxgacü ga Nabucudonochó rü norü duũxũgũxũ namu nax naxügüaxũcax ga wüxi ga naxchicünaxã ga úirunaxcax.

Rü yema naxchicünaxã rü nüxũ nayexma ga 30 métru ga norü máchane, rü norü taxüne rü 3 métru nixĩ. Rü ñuxũchi nüma ga ãëxgacü rü norü duũxũgũxũ namu nax metachinũxũ ga Dúragu áëgaxũgu nachixëëgüãxũcax ñane ga Babiróniawa. <sup>2</sup>Rü yemawena rü naxcax nangema ga guxũma ga ãëxgacügü ga wüxichigü ga naaneétüwa yexmagüxũ. Rü naxcax nangema ta ga norü churaragüerugü, rü wüxichigü ga ñanearü ãëxgacügü, rü ãëxgacügü ga ucuxëruũgü, rü ãëxgacügü ga diërumaxã icuaxgũxũ, rü ãëxgacügü ga nachiũanearü mugũmaxã icuaxgũxũ, rü togü ga ãëxgacü ga wüxichigü ga ñanewa yexmagüxũ. Rü yema ãëxgacügü nixĩ ga naxcax nangemaxũ nawa ga norü ãxũchi ga yema naxchicünaxã ga ãëxgacü norü duũxũgũxũ üxëëxũ. <sup>3</sup>Rü guxũma ga yema ãëxgacügü ga yema nachiũanecüãx rü nangutaquexegü napexegu ga yema naxchicünaxã nax naxüchigagüaxũcax ga norü ãxũchi. <sup>4</sup>Rü yema namaxã icuaxũ ga yema ãxüchichigaarü ügü rü tagaxäcü duũxũgũxũ ñanagürü: —Iperüxĩnue Pa Duũxũgü i Guxũ i Ñanecüãxgü, rü Guxũ i Nachixũanecüãxgü, rü Guxãma i Pemax i To i Nagawa Ixagüchigüxex! <sup>5</sup>Rü ngëxguma tá nüxũ pexĩnuegu nax yacuegüãxü rü napaxgüãxü i ngẽma paxetarüũgü rü pemax, Pa Duũxũgüx, rü tá napexegu pecaxápũxügü i ngẽma naxchicünaxã i ãëxgacü ya Nabucudonochó duũxũgũxũ üxëëxũ. <sup>6</sup>Rü guxãma ya texé ya tama napexegu caxápũxügüxë, rü nüxũ icuaxũgüxë, rü noxtacüma tá ngẽma poxcuchicaxü i ñyaxraxũgu tawocu —ñanagürü. <sup>7</sup>Rü

yemaacü ga yexguma nüxü naxĩnüegu  
ga yema paxetaruügu ga nax  
yacuegüãxü rü guxüma ga yema  
muxüma ga duüxügu ga yexma  
ngutaquexexü rü napexegu  
nacaxgüãpüxü, rü nüxü nicuaxüxügu ga  
yema naxchicünaxã ga úirunaxçax.

<sup>8</sup>Natürü ñuxre ga Cadéuanecüãxgü rü  
nayoxniegü nax Nabucudonochópexewa  
Yudíugüxü ínaxuaxügu xü rü  
ñanagürügü:

.....

<sup>12</sup>—Düçax, Pa Æ̃xgacüx, rü  
nangexma i ñuxre i Yudíugü i cumax  
ã̃xgacüxü cumucuxü nawa ya daa ñane  
ya Babirónia. Rü ngëmagü rü tama cuga  
naxĩnüechaü, Pa Æ̃xgacüx, rü  
ngëmacax tama nüxü nicuaxüxügu i  
ngëma tórü tupanagü rü woo i ngëma  
naxchicünaxã i úirunaxçax i cumax  
duüxügu xü cuxüxëxü. Rü ngëma  
yatügü rü Chadrá, rü Mechá rü Abenégü  
nixĩ —ñanagürügü. <sup>13</sup>Rü nüma ga  
Nabucudonochó rü poraãcü nanu. Rü  
yemaçax norü duüxügu namu nax  
naxütawa nagagüaxüçax ga Chadrá, rü  
Mechá, rü Abnégu. Rü yexguma marü  
naxütawa nangugü rü nüxna naca rü  
ñanagürü: <sup>14</sup>—¿Aixcüma yixixü i pemax  
i tama nüxü picuaxüügu xü i ngëma  
chorü tupanachicünaxãgü rü woo i  
ngëma naxchicünaxã i máchanexü i  
choma duüxügu chaxüxëxü? <sup>15</sup>Rü  
ngëxguma yacuegüãxgu i ngëma  
paxetaruügu çrü pemax rü  
ípememarexü nax napexegu  
pecaxápüxügu xü rü nüxü picuaxüügu xü  
i ngëma naxchicünaxã i choma  
duüxügu chaxüxëxü? Erü ngëxguma  
taxütáma ñuxmatama nüxü

picuaxüügu, rü ngëma poxcuchicaxü i  
íyaxraxügu tá pexü çhawocu. ¿Rü  
taxacürü tupana tá pexü nawa  
ínanguxüxëxë i ngëma? —ñanagürü.  
<sup>16</sup>Rü yexguma ga yema tomaepüx ga  
ngextüxügu rü nanangãxügü rü  
ñanagürügü: —Pa Æ̃xgacüx, rü  
taxuçaxma tüxcüü yigü naxçax  
tachoxügü i ngëma. <sup>17</sup>Rü yimá torü  
Tupana ya nüxü ticuaxüügu rü nüxü  
natauxcha nax toxü ínanguxüxëxü  
nawa ya yima üxü rü nawa i guxüma i  
ngëma poxcu i tomaxã cuxuegüxü, Pa  
Æ̃xgacüx. <sup>18</sup>Natürü ngëxguma chi woo  
taxüchima toxü nangüxëxü rü cumaxã  
nüxü tixu, Pa Æ̃xgacüx, rü toma rü  
taxütáma nüxü ticuaxüxügu i ngëma  
curü tupanagü, rü taxütáma napexegu  
tacaxápüxügu i ngëma naxchicünaxã i  
úirunaxçax —ñanagürügü.

**Yema tomaepüx ga ngextüxügu  
rü tama nixae nawa ga guma  
üxü ga nawa yawocune**

<sup>19</sup>Rü yema orexü naxĩnügu ga  
Nabucudonochó, rü nanadeächichiwe  
yerü yema tomaepüx ga  
ngextüxügümaxã poraãcü nanu. Rü  
norü duüxügu namu nax 7 expüxcüna  
naxüxüguaxüçax ga yema  
poxcuchicaxü ga íyaxraxü nax  
yemaacü nanaixichixüçax. <sup>20</sup>Rü ñuxüchi  
norü çhuragü ga rüporamaegüxü  
namu nax Chadrá rü Mechá rü  
Abnégu yanaxgüxüçax, rü yemaacü  
yema poxcuchicaxü ga iyaxraxüwa  
yawocuaxüçax. <sup>21</sup>Rü yema tomaepüx ga  
ngextüxügu rü yamexchirüãcütama  
rü nayanaxgü rü yema poxcuchicaxü ga  
iyaxraxügu nanawocu. <sup>22</sup>Rü yema



poxcuchicaxũ rü poraãcü nanaixichi  
 yerü yemaacü norü duũxũgũxũ namu ga  
 ãẽxgacü. Rü yemaçax ga yema  
 churaragü ga yema tomaepũx ga  
 ngextũxũgũxũxũ yéma iwocuxũ rü nixae  
 rü nayue. <sup>23</sup>Rü nümagü ga Chadrá rü  
 Mechá rü Abenégü rü inaixgũxũ yexma  
 nawocu nagu ga yema poxcuchicaxũ ga  
 íyauçraxũ. <sup>24</sup>Rü yexguma nüxũ  
 nadaçuxgu ga nüma ga Nabucudonochó,  
 rü paxa inachi rü poraãcü  
 nabaiçachiãxẽ. Rü yema norü  
 ucuxẽruũgũna naca rü ñanagürü:  
 —¿Tama ẽxna yima üxüxetüwa  
 yawocuxũ i tomaepũx i yatü i  
 naiçgũxũ? —ñanagürü. Rü yema norü  
 ucuxẽruũgü nanangãxũgü rü:  
 —Ngẽmáacüx, tomaepũx nixĩ  
 —ñanagürügü. <sup>25</sup>Rü ñuxũchi ga nüma  
 ga ãẽxgacü rü ñanagürü: —Natürü  
 ngẽma nüxũ chadau i ágümcü i yatü  
 íwegũxũ i üxüxetügu íxĩxũ rü  
 taxuũma nüxũ ngupetüxũ. Rü ngẽma  
 norü ágümcü i yatü rü  
 nanadaxüçũçraxũ —ñanagürü. <sup>26</sup>Rü  
 yema ñaxguwena rü nüma ga  
 Nabucudonochó rü yema poxcuchicaxũ  
 ga íyauçraxũçax nixũ rü yéma tagaçcü  
 ñanagürü: —Pa Chadrá, rü Mechá, rü  
 Abénegü ya Tupana ya Guxãétüwa  
 Ücüaru Duũxũgü Ixĩgũxũx, rü ípechoxũ  
 rü nua pexĩ! —ñanagürü. Rü yema  
 tomaepũx rü ínachoxũ nawa ga guma  
 üxü. <sup>27</sup>Rü guxũma ga yema ãẽxgacügü  
 ga yéma yexmagũxũ rü naxçax naxĩ ga  
 yema tomaepũx ga yatügü. Rü nüxũ  
 nadaugü ga taxuwama nax yaxaexũ ga  
 naxũnewa, rü woo ga nayae rü naxchiru  
 rü tama nax yaxaxũ rü bai ga nax  
 natauçxacaemagũxũ. <sup>28</sup>Rü yexgumatama

ga nüma ga Nabucudonochó rü  
 ñanagürü: —iNgĩxã nüxũ ticuaxũxũgü  
 ya norü Tupana i Chadrá rü Mechá rü  
 Abenégü ya nüma namucü i ngẽma  
 daxüçũçax nax íyapoxũãxũçax i norü  
 duũxũgü i tama ãẽxgacüga ínuechaũxũ!  
 Yerü yema tomaepũxçax rü narümemae  
 nax nayuexũ naxũpa nax togümare ga  
 tupanaxũ yacuaxũügũxũ. <sup>29</sup>Rü  
 ngẽmacax i ñuxma rü chanaxunagü rü  
 ngexerüüxe ya duũxẽ ya nachiga chixri  
 idexáxe ya norü Tupana i ñaa tomaepũx  
 i ngextũxũxũgü rü noxtacüma  
 ágümcügu tá tüxũ tarüchexte, rü  
 tümapata rü tá naachinaxãgũxica  
 nügüétü nayi. Rü nüétama ega woo  
 ngexnerüxünemare ya íanecüãx tixĩxgu,  
 rü ngexürüxũ i nachixũanecüãx  
 tixĩxgu, rü ngexürüxũ i nagawa  
 tidexagux. Erü nataxuma i to i tupana i  
 ngẽmaãcü norü duũxũgũxũ ípoxũxũ  
 —ñanagürü. <sup>30</sup>Rü yemawena ga nüma  
 ga ãẽxgacü rü yexera rümemaxũ ga  
 puracü yema tomaepũx ga  
 ngextũxũxũgũna naxã ga  
 Babiróniaanewa.

.....

#### Wenaxarü naxãnegü ga Nabucudonochó

**4** <sup>1</sup>—Choma i ãẽxgacü i  
 Nabucudonochó rü taãxẽacüma  
 pexũ chartimoxẽ, Pa Guxũma i  
 Nachixũanecüãxgü i Ñoma i Naanewa  
 Maxẽxũ rü Togü i Nagawa Idexagũxũx.  
 Rü chanaxwaxe i mea pexũ nangupetü.  
 .....

<sup>4</sup>Rü choma i Nabucudonochó rü  
 íchataãxẽ ga chopatawa rü poraãcü  
 mexũ choxũ naxüpetü. <sup>5</sup>Natürü wüxi ga  
 chütaxũgu ga marü chapexgu rü

chaxãnegü. Rü namaxã chabãixãchi ga yema nagu chaxãnegüxü yerü yema chaunegüwa nüxü chadauxü rü naxãücumaxüchi, rü yemaçax poraãcü chamuü. <sup>6</sup>Rü yemaçax naxçax changema ga guxüma ga chorü ucuxëruügü ga Babiróniaanecüãx nax nua choxü íyadaugüxüçax rü chomaxã nüxü yaxugüxüçax nax taxacüchiga yixüxü ga yema nagu chaxãnegüxü. <sup>7</sup>Rü guxüma ga yuüxügü rü ëxüxü gücuxü rü nüxü icuaxüchixü rü woramacuriwa ngüexü ga Babiróniaanecüãxgü rü chauxütawa naxí. Rü choma rü namaxã nüxü chixu ga yema nagu chaxãnegüxü, natürü tama nüxü nicuax nax taxacüchiga yixüxü ga yema nagu chaxãnegüxü. <sup>8</sup>Rü Danié ga chorü tupanaégagu Betachágu chaxüégaxüwa inayacuax ga nax chauxütawa naxüxü. Rü ngëma norü maxü ya Danié rü Tupana ya üü necüãxë namaxã inacuax. Rü namaxã nüxü chixu ga yema nagu chaxãnegüxü rü ñachagürü: <sup>9</sup>“Pa Betachá i Guxü i Chorü Ucuxëruügüerux, rü choma nüxü chacuax rü yimá Tupana ya üü necüãxë cumaxã inacuax rü ngëmacax nüxü cucuax i guxüma i ëxüxü gücuxü. Rü chanaxwaxë i curüxüni i ngëma cumaxã tá nüxü chixuxü i chaunegüwa nüxü chadauxü rü ñüxüchi chanaxwaxë i chomaxã nüxü quixu nax taxacüchiga yixüxü. <sup>10</sup>Rü ñaa nixí ga chaunegüwa nüxü chadauxü ga yexguma ichacayane. Rü nüxü chadau ga wüxi ga nai ga máchanexüchixü ga meama ñaa naanearü ngãxüwa rüxüxü. <sup>11</sup>Rü yema nai rü naya rü natamenaxãxüchi, rü natanügü rü daxüxü gücuxü ga naanewa

nangu rü yáxügu nüxü tadau i ñaa naanewa. <sup>12</sup>Rü naátügü rü nimexechi rü yema nax namuxü ga norü o rü guxüma ga duüxü gücuxü rü ningü. Rü norü ga uxchipe taxüçax natüügu nayacagü ga naxünagü, rü werigü rü nachacüügügu nixüxüchiãügü. Rü guxüma i ñoma i naanecüãx i duüxü gücuxü ningü ga norü o. <sup>13</sup>Rü ngürüãchi nüxü chadau ga wüxi ga daxücüãx ga dauxütaeruxü ixüxü ga daxüxü gücuxü ga naanewa íruxüxü. <sup>14</sup>Rü yema rü tagaxãcü ñanagürü: ‘iRü penatuxux i ngëma nai rü penadaüchacüxüx, rü penabuxatü, rü ngëma norü o rü namaxã penawoone nax ngëmaãcü yabuxmüxüçax i ngëma naxünagü i norü ga uxpechitacax natüügu rüchoxü rü ngëma werigü i nachacüügu ixüãchiãü gücuxü! <sup>15</sup>iNatürü ngëma nachime rü naxchúmaxã rü ngëma waixümüwa penaxüxëxë! iRü fiérunaxçax rü bróuchenaxçax ya cadënamaxã peyachota! Rü ngëma naanearü maxëtëxewa penatax nax ngëmaãcü cherena nagu ngüxüçax rü wüxigu naexü gümaxã maxëtëxewa nangexmaxüçax. <sup>16</sup>Rü tá naxãüãxë rü ñoma wüxi i naexürüãcü tá namaxü. Rü ngëmaãcü tá nixí i 7 ya taunecü. <sup>17</sup>Rü yema nixí ga yema naimaxã naxuegüxü ga yema ixüünexü ga daxücüãx ga dauruxü ixüxü. Yerü nanaxwaxëgü nax guxüma i duüxü gücuxü nüxü cuaxgüxü nax nüma ya Tupana ya guxãétüwa ngëxmacü rü nüxü nangexmaxü i pora nax namaxã inacuáxü i ngëma nachixüanegüiarü äëxgacügü i ñoma i naanewa ngëxmagüxü. Rü nüma nixí i nüxü naxunetaxü i äëxgacügü i nüma

nanaxwaxexũ nax nüxũ naxunetaxũ. Rü nüma rü nüxũ nangexma i pora nax nachixũanearũ ãëxgacüxũ yangucuchixëëãxũ i duũxũ i noxri taxuxũma ixixũ', ñanagürü ga yema daxücüãx. <sup>18</sup>Rü yema nixĩ, Pa Betacháx, ga yema chaunegü ga choma i ãëxgacü ya Nabucudonochó nagu chaxãnegüxũ. iRü ñuxma rü chomaxã nüxũ ixu nax taxacüchiga yixixũ ga yema chaunegü! Erü taxuxũma i ngëma togü i chorü ucuxëruũgü i nüxũ cuaxüchichirëxũ nüxũ nacuaçgü i ngëma. Natürü i cumax rü tá nüxũ cucuaç nax taxacüchiga yixixũ erü cuwa nangexma i naãxë ya yimá Tupana ya üüneccü", ñachagürü. <sup>19</sup>Rü yexguma ga nüma ga Danié ga Betachámaxã naxugüãcü rü paxaãchi yexma narüchiane yerü poraãcü namuũ naxçax ga yema ñnü ga naãxëwa ngxüx. Natürü chomax i ãëxgacü rü ñachagürü nüxũ: "Pa Betacháx itaxú i cuxoégaãxëxũ naxçax i ngëma chaunegü rü taxacüchiga yixixũ!" ñachagürü. Rü nüma ga Betachá rü nanangãxũ rü ñanagürü choxũ: "Pa ãëxgacüx, chierü guxũma ga yema cunegüwa nüxũ cudauxũ, rü curü uanügüçax yixixgux. <sup>20-21</sup>Rü yema nüxũ cudauxũ ga nai ga máchanexũ rü tanexũ ga daxügüxũ ga naanewa ngutanüxũ ga yáxũanewa duũxũgü nüxũ dauxũ ga meátüxüchixũ rü yemaçax norü gauxpechitacax natüũgu narücho ga naexügü, rü werigü rü nachacüügügu nixãxchiãũ. Rü norü o rü namuxüchi, rü meama ningu nax guxũma nangóxũ, <sup>22</sup>rü yema nai ga taxüchixũ ga cunegüwa nüxũ cudauxũ, rü cuchiga nixĩ, Pa ãëxgacüx. Rü cuma i ñuxmax

rü cuporaxüchi rü ngëma curü ngëmaxügü rü cunanutaquexe ñuxmata dauxügüxũ i naanewa nangu, rü ngëmaãcü guxũ i nachixũanegümaxã icucuãx. <sup>23</sup>Pa ãëxgacüx, rü yema to ga nüxũ cudauxũ ga yema cunegüwa, rü nüxũ cudauxũ ga wüxi ga üünexũ ga daxücüãx ga dauruxũ ixixũ ga daxügüxũ ga naanewa íruxixũ ga ñaxũ: 'iRü penatuxux ya yima nai rü nagu pechëxgü! iNatürü ngëma nachime rü naxchúmaxägü rü nüétama ngëma waixümüwa nangexmax! iRü fiéru rü bróuchenaxçax ya cadénamaxã penangãxũ rü ngëma naanearü maxëanewa penatáx nax cherena nagu ngxüçax! rü wüxigu naxünagümaxã maxë nangóóxüçax i 7 ya taunecü', ñaxũ. <sup>24</sup>Rü yema cunegüwa nüxũ cudauxũ, Pa ãëxgacüx, rü cuchiga nixĩ. Rü ngëmawa yimá Tupana ya guxãéttiwa ngëxmacü cuxũ nanawëx i ngëma poxcu i cumaxã naxueguxũ. <sup>25</sup>Erü cumax, Pa ãëxgacüx, rü taxütáma duũxügütanüwa cungexma, rü naxünagütanüwa tá cumaxũ rü wocagürüxũ tá maxë cunangöx, rü cherena rü tá cuxũ niwaixëxë. Rü ngëmaãcü tá cumaxũ i 7 ya taunecü ñuxmatáta naxçax íquicuãx nax texé yixixũ ya yimá namaxã icuácü i guxũma i ãëxgacügü i ñoma i naanewa ngëxmagüxũ. Erü nüma nixĩ i tüxũ yamucuchixũ ya yixëma nüma natümawaxëxe nax ãëxgacü tixixüçax. <sup>26</sup>Rü yema daxücüãxarü ore nax yema nachime rü nachumãxã yéma waixümüanewa yaxügüxëxũ rü ngëma rü nüxũ nixu, Pa ãëxgacüx, nax wena táxarü cuchixüanemamaxã icucuáxũ i

ngêxguma nüxna cucuaxāchigu nax nūma ya Tupana yixixū ya guxāétüwa ngêxmacü. <sup>27</sup>Rü ngêmacax, Pa Æ̃xgacüx iirixīnū i ñaa chorü ucuxē rü mea namaxā inacuax i duūxūgü! iRü taxū i pecádu cuxūxü rü ngêxmatama yacuaxēxē nax cunaxūxü i ngēma chixexū i cuāxēwa ínguxū! iRü nagu rüxīnū nax nüxū curüngūxēēxū i ngēma duūxūgü i ngearü ngēmāxūāxgūxū! Rü bexmana ngēmaācü ya Tupana i taxūtāma cuxna nanguxēēāxū i ngēma chixexū i cumaxā naxueguxū”, ñanagürü choxū —ñanagürü ga Nabucudonochó.

#### Yema nagu naxānegūxū rü ningü

<sup>28</sup>Rü guxūma ga yema ã̃xgacü ga Nabucudonochómaxā ueguxū rü ningü. <sup>29-30</sup>Rü wüxi ga taunecü nawena ga yema rü nūma ga ã̃xgacü rü napataétügu ínixūāchixū ga ñane ga Babiróniawa, rü nügūmaxā ñanagürü: “Dücax nax ñuxācü nataxū ya daa Babirónia ga choma chorü cuaxmaxā chaxūxūne nax nawa ã̃xgacü chixixūcax, rü ngēmawa duūxūgü nüxū daugūxūcax nax cuax choxū ngêxmaxū” ñanagürü. <sup>31</sup>Rü yexguma íyadexayanetama ga nūma ga ã̃xgacü rü nüxū naxīnū ga wüxi ga naga ga daxūwa ínaxūxū ga ñaxū: “iDücax, irixīnū, Pa Æ̃xgacü Pa Nabucudonochó! Rü ngēma nax ã̃xgacü quixixū rü ñuxma rü ngêxma nayacuax. <sup>32</sup>Rü duūxūgūna tá quixūgachi rü naxūnataniüwa tá cumaxū, rü wocagürüxū tá maxēmaxā cuxāwemü i 7 ya taunecü. Rü ngēmaācü tá quixī ñuxmatáta nüxna cucuaxāchi

nax Tupana yixixū ya yimá nüxū nangexmacü i pora nax namaxā inacuáxū i guxūma i nachixūanegü i ñoma i naanewa ngêxmagūxū. Rü nūma nixī i tüxū yangucuchixēēxū nax ã̃xgacü tixixū ya yíxema nūma norü me ixíxe”, ñanagürü. <sup>33</sup>Rü yexgumatama ningü ga yema Tupana namaxā ueguxū. Rü nūma ga Nabucudonochó rü naxāūāxē. Rü duūxūgūna nixūgachi rü wocagürüxū maxē nanangōx rü cherenamaxā niwaxine. Rü nayáe rü narüxü, rü ñoma dawūāxmürüxū nixī, rü napatü rü ñoma dawūpatürüxū nixī.

#### Nabucudonochóçax nitaane

<sup>34</sup>—Rü yexguma marü yanguxgu ga guma 7 ga taunecü nax Tupana choxū poxcuxū, rü choma ga Nabucudonochó rü daxūgu chadawenü rü nüxū chicuaxāchi nax çauçax mea yataanexū nawa ga nax chaxūāxēxū. Rü ñuxūchi mexū nachigaxū chixu ya yimá Tupana ya guxāétüwa ngêxmacü ya guxūguma maxūcü. Rü ñaa dexamaxā nüxū chicuaxūxū rü ñachagürü: “Pa Tupanax, curü pora rü taguma inayacuax rü cuma rü guxūgutāma ã̃xgacü quixī. <sup>35</sup>Rü ngēma duūxūgü i ñoma i naanewa maxēxū rü cupexewa, Pa Tupanax, rü taxuxūma nixīgü. Rü cuma cunaxwaxexūācü namaxā icucuax i daxūguxū i naane rü ñoma i naane. Rü tataxuma ya texé ya curü poraxū rüyexeráxe. Rü tataxuma ya texé ya tüxū nangexmaxe i pora nax cuxna taçaxū rü ‘tūxūcü cunaxü i ngēma cuxūxū?’ ñagūxe. <sup>36</sup>Rü yexgumatama çauāxēxū chicuaxāchi rü wenaxarü Tupana choxū narüngūxēē

rü chauchicacaxtama choxĩ  
 natæguxëxë nax ãëxgacü chixixĩ. Rü  
 duũxũgü rü chomaxã nataãxëgü, rü  
 noxrirüũtama namaxã ichacuax rü  
 chapora. Rü yema chorü ucuxëruũgü rü  
 chorü ngũxëëruũgü rü chauxcax  
 nayadaugü nax wenaxarü  
 chauchixũanearü ãëxgacüxü choxĩ  
 yangucuchixëëgüxũcax. Rü noxrirü  
 yexera pora choxũ nayexma. <sup>37</sup>Rü  
 ngëmacax i ñuxmax i chomax i  
 Nabucudonochó rü nüxũ chicuaxũxü rü  
 chanataxëxë ya yimá Tupana i  
 daxũguxũ i naanewa ãëxgacü ixĩcü, erü  
 guxũma i ngëma naxũxü rü aixcũma  
 name, rü nüxũ natauxcha nax tüxü  
 naxãnexëëxü ya yíxema tügü írütaxe”  
 —ñachagürü.

#### Ore ga íxtapũxgu ümatüxü

**5** <sup>1</sup>Rü nüma ga Berchachá ga nüxi  
 Babiróniaanecüãxaru ãëxgacü  
 ixĩcü, rü nüxna naxu ga 1,000 ga  
 ãëxgacügü ga yema nachixũanecüãxgü  
 naxcax ga wüxi ga ñna ga taxũ. Rü  
 yema chibüwa rü nüma ga ãëxgacü rü  
 yema nüxna naxuxü rü poraãcü bínu  
 nayaxaxgü. <sup>2-3</sup>Rü yema bínuxmã nax  
 nangãxũxü ga ãëxgacü ga Berchachá rü  
 norü duũxũgüxü namu nax  
 yanúxũãxũcax ga yema naxpáxũgü ga  
 úirunaxcax rü diërumünaxcax ga nanatü  
 ga Nabucudonochó Yerucharéüwa  
 yexmane ga tupaucawa ne naxũ. Rü  
 nayanuxü ga yema naxpáxũgü ga  
 üünexü rü nawa naxaxegü ga ãëxgacü  
 rü naxmaxgü rü naxütaxũgü rü guxũma  
 ga yema chibüwa yéma ixü. <sup>4</sup>Rü  
 guxũma ga yema yéma yexmagüxü rü  
 bínu nixaxgü rü nüxü nicuaxũxũgü ga

norü tupanachicünaxãgü ga úirunaxcax,  
 rü diërumünaxcax, rü bróüchenaxcax,  
 rü fiërunaxcax, rü nainaxcax rü  
 nutanaxcax ixĩgüxü. <sup>5-6</sup>Rü yexguma  
 ínaxaxegüyane rü yema ucapuarü  
 íxtapũx ga cómüxüwa nangox ga wüxi  
 ga naxmëx ga omüema íxtapũxgu  
 ínachixüwa iwüacüxüne. Rü guma  
 naxmëx ga yéma iwüacüxünexü  
 nadãuxgu ga guma ãëxgacü rü  
 nabãixãchi rü nanachoxõchi rü norü  
 muũmaxã niyoyoxüne. <sup>7</sup>Rü ñuxüchi  
 tagaãcü aita naxü ga ãëxgacü ga  
 Berchachá, rü naxcax nangema ga yema  
 norü ucuxëruũgü ga ëxũgüxũxü  
 cuaxgüxü, rü yema cuax nüxü yexmaxü,  
 rü yema Babiróniaanecüãxgü ga  
 woramacuriwa ngüexü. Rü ñanagürü  
 nüxü: —Rü yíxema nüxü daumatüxe i  
 ngëma ngëxma ümatüxü rü nüxü ixuxe  
 nax taxacüchiga yixixü, rü naxchiru i  
 dauxracharaxũgu tá tüxü chixüxëxë, rü  
 úirunaxcax ya cadënamaxã tá tüxü  
 chaxüchagü, rü tüma tá tixi i choweama  
 i norü tomaepũxwa taxüxü nax ãëxgacü  
 tixixü —ñanagürü. <sup>8</sup>Rü guxũma ga  
 yema norü ucuxëruũgü ga nüxü  
 icuaxüchixü ga yéma yexmagüxü rü  
 nichocu nawa ga yema ucapu. Natürü  
 taxüxüma ga yema yatügü ga nüxü  
 cuaxüchigüxü rü nüxü nacuaxgü nax  
 ãëxgacümaxã nüxü yaxugüxü nax  
 taxacüchiga yixixü ga yema yexma  
 ümatüxü. <sup>9</sup>Rü yexguma nüma ga  
 ãëxgacü ga Berchachá rü poraãcü  
 namuü rü nanachoxõchi. Rü yema  
 natanüxü ga ãëxgacügü rü tama nüxü  
 nacuaxgü nax taxacü tá naxügüxü.  
<sup>10</sup>Natürü ga naé rü yéma íña, yerü nüxü  
 ixĩnü ga aita nax naxüxü ga guma ngñe

rü yema ãëxgacügü ga namaxã yexmagüxü. Rü yemaçax yéma ixü rü ngïgürügü nüxü ga ngïne ga Berchachá: —iGuxüguma namaxü, Pa ãëxgacüx! iRü taxü i cuxoégaãxëxü rü taxü i cubajãchixü! <sup>11</sup>Erü nua cumexwa nangexma i wüxi i yatü ya Tupana ya Üünecüãxë nawa ngëxmaxü. Rü yexguma guma cunatü ya Nabucudonochó ãëxgacü ixïxgu, rü yema yatü inanawex nax tupanagürüxü aixcüma naãxëxü nacuáxü. Rü yemaçax ga guma cunatü rü guxüma ga norü ucuxëruüügeru nayaxixëxë. <sup>12</sup>Rü nüma rü Danié nixï. Rü nüma ga guma cunatü rü Betachágu nanaxüéga. Rü ngëma yatü rü poraãcü cuax nüxü nangexma rü nüxü natauxcha nax nangoxëëãxü i wüxi i nanegü, rü nangoxëëãxü i taxacü i cúxü, rü namexëëãxü i taxü i guxchaxügü. iRü naxçax nangema ya yimá yatü ya Danié! Rü nüma tá nixï i cumaxã nüxü yaxuxü nax taxacüchiga yixixü i ngëma ngëxma ümatüxü! —ngïgürügü. <sup>13</sup>Rü yexgumatama ãëxgacüpexewa Daniéxü nagagü. Rü nüma ga ãëxgacü rü nüxna naca, rü ñanagürü: —¿Cuma quixixü i Danié i Yudíu quixixü ga chaunatü ga Nabucudonochó Yudáanewa pexü ne gagüxü?

.....

<sup>16</sup>Rü nüxü chaxínüchiga rü cuma rü cuxü natauxcha nax cunangoxëëxü i wüxi i nanegü rü cunamexëëxü i taxü i guxchaxügü. Rü ngëxguma chi chauxçax nüxü cudaumatügu i ngëma ore i ïtapüxgu ümatüxü rü chomaxã nüxü quixuxgu nax taxacüchiga yixixü, rü choma rü naxchiru i

dauxrcharaxügu tá cuxü chicuxëxë, rü úirunaxçax ya cadënamaxã tá cuxü chaxüchagü, rü cuma tá quixï i chautüüwa norü tomaepüxwa cuxixü nax ãëxgacü quixixü —ñanagürü. <sup>17</sup>Rü yexguma ga nüma ga Danié rü nanangãxü rü ñanagürü: —Pa ãëxgacüx, tama chanaxwaxe i ngëma ãmaregü. iRü togüxümare naxuneta nax cumaxã ãëxgacüxü cupatawa nangexmaxüçax! Natürü, Pa ãëxgacüx, rü tá cumaxã nüxü chixu i taxacüchiga yixixü i ngëma dexagü i ïtapüxgu ümatüxü. <sup>18</sup>Rü nüma ya Tupana ya guxãétüwa ngëxmacü, rü cunatü ga Nabucudonochóna nanaxã nax nüma ãëxgacü ga poracü rü cuax nüxü ngëxmacü nax yixixüçax. <sup>19</sup>Rü yema pora ga Tupana nüxna ãxügagu rü guxüma ga ïanecüãxgü rü nachixüanecüãxgü naguxüraxüxü ga nagawa idexagüxü rü naga naxínüe rü nüxü namuüë. Rü naxmexwa nayexma nax tüxü yamáxü rüexna tüxü namaxëëxü ga guxema norü me ixixe. Rü tümáxe rü tüxü nataxëxë, rü toguxe rü tüxü naxãneexëxë. <sup>20</sup>Natürü yexguma nügü yacuãxüügu rü taxüegama naxínügu, rü Tupana rü nüxna nanayaxu ga norü pora, rü ïnataxüchi ga ãëxgacü nax yixixü. <sup>21</sup>Rü duüxügüna nixügachi rü yema norü ïnü rü naxünagüarü ïnü nixï. Rü naixnecücüãx ga búrugütanüwa namaxü. Rü wocagürüxü maxë nanangöx rü cherenamaxã niwaixine. Rü yemaacü nüxü nangupetü ñuxmata düxwa nüxna nacuãxãchi nax yimá Tupana ya guxãétüwa ngëxmacü nüxü ngëxmaxü i pora nax namaxã inacuáxü i guxüma i

ãĕxgacügü i ñoma i naanewa ngĕxmagüxũ. Rũ nũma rũ ãĕxgacüxũ tüxũ nixixĕxĕ ya yixema nũma norũ me ixixĕ nax ãĕxgacü tixixũcax. <sup>22</sup>Rũ cumax, Pa Berchacháx nax nachicüxü quingucuchixũ ga cunatũ ga Nabucudonochó, rũ nüxũ cucuax ga yema nüxũ ngupetüxũ. Natürü cuma rũ ta narũütama cugü quicuaxüxũ. <sup>23</sup>Dücax, Pa ãĕxgacüx, cuma rũ Cori ya Tupana ya daxüwa ngĕxmacügu quidauxcüraxũ. Erü curü duũxũgüxũ cuyanuxũxĕxĕ i ngĕma naxpáxũgü ga Tupanapataarũ ixixũ. Rũ ngĕma nüxna cuxuxũmaxã wüxigu ngĕma naxpáxũgüwa peyaxaxü ga bínu, rũ nüxũ picuaxüxũgü i ngĕma perü tupanachicünaxãgü i úirunaxcax, rũ diĕrumünaxcax, rũ bróũchenaxcax, rũ fiĕrunaxcax, rũ nainaxcax rũ nutanaxcax i ngearü maxũáxũ, rũ tama tüxũ dauxũ, rũ tama tüxũ ñnũxũ rũ taxuxũma cuáxũ. Natürü tama nüxũ quicuaxüxũ ya yimá Tupana ya naxmĕxwa nangexmacü i curü maxũ rũ namaxã icuácü i guxũma i taxacü icuxüxũ. <sup>24</sup>Rũ ngĕmacax nixĩ i nũma ya Tupana i cuxcax nangoxĕxĕãxũ ya yima naxmĕx i ĩxtapüxgu naxümatüne i ngĕma dexagü. <sup>25</sup>Rũ ñaagü nixĩ i ngĕma dexagü: MÉNE rũ MÉNE rũ TEKÉL rũ PÁRSIN. <sup>26</sup>Rũ ngĕma dexagü rũ ñaxũchiga nixĩ: MÉNE: Tupana rũ marü nayaxugü nax ñuxre i ngunexũ tá ãĕxgacü quixixũ, Pa ãĕxgacüx, rũ marü nüxũ naxuneta i ngĕma ngunexũ i tá nagu cuyuxũ. <sup>27</sup>TEKÉL: Pa ãĕxgacü, rũ Tupana rũ norü ngugürũwa cuxũ inangu, rũ ngĕma curü chixexũ rũ mexüxũ narüyamae. <sup>28</sup>PÁRSIN: Rũ

ngĕma cuchixũane, Pa ãĕxgacüx, rũ marü niyauxye rũ tá Médiaanecüãxgüna rũ Pérchiaanecüãxgüna nanaxã —ñanagürü ga Danié. <sup>29</sup>Rũ yexgumatama ga nũma ga ãĕxgacü ga Berchachá rũ norü duũxũgüxũ namu nax Daniéxũ dauxracharaxũ ga naxchirugu yacuxĕĕgüaxũcax, rũ wüxi ga cadéna ga úirunaxcaxmaxã naxüchagügüaxũcax. Rũ guxãmaama nüxũ nixu nax nũma ya Danié yixixũ ga norü tomaepüxwa naxixũ nax ãĕxgacü yixixũ. <sup>30</sup>Rũ yema chütaxũgu nixĩ ga yamãxgüaxũ ga Berchachá (ga Babiróniaanecüãx) ga Cadéguiãrũ ãĕxgacü ixicü. <sup>31</sup>Rũ Darü ga Médiaanecüãxgüãrũ ãĕxgacü rũ Berchacháchicüxü nixücu nax ãĕxgacü yixixũcax. Rũ nũma ga Darü rũ 62 ga taunecü nüxũ nayexma ga yexguma.

#### Aigü ga leóütanügu nitaxcuchi ga Danié

**6** <sup>1</sup>Rũ nũma ga ãĕxgacü ga Darü rũ nüxũ naxuneta ga 120 ga ãĕxgacügü nax norü ngũxĕĕruũgü yixigüxũcax, rũ wüxichigü ga yema nachixũanearü ñanegũmaxã inacuaxgüxũcax. <sup>2</sup>Rũ yema 120 ga ãĕxgacügüĕtũwa nüxũ naxuneta ga tomaepüx ga naerugü nax nüxũ yadaugüxũcax ga wüxichigü ga yema ñanegüãrũ ãĕxgacügüãrũ puracü, rũ yemaacü ga nũma ga Darü rũ taxuxũma ga guxchaxũ nüxũ yexmaxũcax. Rũ wüxi ga yema tomaepüx ga naerugü rũ Danié nixĩ. <sup>3</sup>Rũ nũma rũ guxũma ga yema togü ga ãĕxgacügüãrũ yexera nüxũ nacuaxüchi. Rũ yemaçax ga nũma ga ãĕxgacü rũ nagu narüxĩnü nax namücüxũ nüxũ

naxunetaxũ nax yema  
 Babiróniaanemaxã inacuáxũcax. <sup>4</sup>Rũ  
 yemaçax ga yema togũ ga ãẽxgacũgũ rũ  
 naxçax nadaugũ ga wũxi ga guxchaxũ  
 nax yemaacũ Darĩupexewa Daniéxũ  
 ínaxuaxũgũxũcax. Natürũ nũma ga  
 Danié rũ wũxi ga yatũ ga aixcũma mecũ  
 nixĩ, rũ taxuxũma ga chixexũ nawa  
 ínayangaugũ. <sup>5</sup>Natürũ nũmagũ ga yema  
 ãẽxgacũgũ rũ nagu narũxĩnũe nax  
 ñuxãcũ Daniéxũ chixexũgu  
 nanguxẽẽgũxũ rũ yemaçax dũxwa  
 ñanagürũgũ: —Taxucürũwa taxacürũ  
 chixexũgu tananguxẽẽ i Danié. Natürũ  
 ngẽma naxçax tá ínaxuaxũxũ nixĩ nax  
 noxrũtama Tupanaguama naxĩnũxũ rũ  
 ngẽmacaxicatama tũxũ natauxcha  
 —ñanagürũgũ. <sup>6</sup>Rũ yemaacũ ga yema  
 120 ga ãẽxgacũgũ rũ naétũ ga yema  
 taxre ga Daniémũcũgũ rũ nũgũmaxã  
 ínaxũgagũ ga ãẽxgacũ ga Darĩumaxã  
 nax yanadexagũxũcax. Rũ yexguma  
 marũ napexewa nangugũgu rũ  
 ñanagürũgũ nũxũ: —iGuxũguma  
 namaxũ, Pa ãẽxgacũ! <sup>7</sup>Rũ guxũma i  
 toma i ãẽxgacũgũ i cutũũwa namaxã  
 icuaxgũe i ñaa nachixũane rũ  
 tangutaquexegũ. Rũ ngẽma  
 ngutaquexewa nagu tarũxĩnũe nax  
 cumax, Pa ãẽxgacũx, rũ cunaxunagũxũ i  
 wũxi i mu nax ngẽmaãcũ 30 i  
 ngunexũgu nachuxuxũ nax texé  
 taxacürũ tupanana rũexna yatũna  
 ngũxẽẽcax tacaxũ rũ cunaxicatama  
 name nax tacaxũ. Rũ texé ya tama naga  
 ñnũxe i ngẽma mu rũ tá aigũ ya  
 leóũtanũgu titaxcuchi. <sup>8</sup>Rũ ngẽmacax,  
 Pa ãẽxgacũx, ega cuxũ namexgu i  
 ngẽma mu rũ inagu cugũ nawũega nax  
 ngẽmaãcũ taxũema naxũchicũxũcax!

Erũ ngẽxguma cumax, Pa ãẽxgacũx,  
 cuxunagũgu rũ taxucürũwa texé  
 itayanaxoxẽẽ erũ ngẽmaãcũ nixĩ i nũxũ  
 yaxuxũ i tóru mugũ i yixema i  
 Médiaanecũãxgũ rũ Pérchiaanecũãxgũ  
 —ñanagürũgũ. <sup>9</sup>Rũ nũma ga ãẽxgacũ ga  
 Darĩu rũ nagu nũgũ nawũega ga yema  
 mugũpane. <sup>10</sup>Rũ yexguma Danié nũxũ  
 cuaxgu nax nũmax ga ãẽxgacũ rũ marũ  
 nũgũ nagu nawũegaxũ ga yema mu, rũ  
 napatawa naxũ rũ nayawãxna ga norũ  
 ucapuarũ iãxgũ ga Yerucharẽũ  
 íyexmaxũwaama ũgũxũ. Rũ wũxichigũ  
 ga ngunexũgu rũ tomaepũxcũna  
 ínacaxãpũxũ nax Tupanana moxẽ  
 naxãxũcax rũ namaxã yadexaxũcax  
 aixrũgumarũũtama. <sup>11</sup>Rũ yexguma  
 yema yatũgũ ga ínaxuaxũgũxũ nũxũ  
 cuaxgũgu rũ Daniéchiũgu nachocu rũ  
 yexma nũxũ ínayangaugũ ga nax  
 ínayumũxẽxũ rũ Tupanaxũ  
 íyacuaxũxũ. <sup>12</sup>Rũ yexgumatama norũ  
 ãẽxgacũ ga Darĩuxũtawã naxĩ nax  
 namaxã yanadexagũxũcax nachiga ga  
 yema mu. Rũ ñanagürũgũ nũxũ: —Pa  
 ãẽxgacũx, cuma rũ marũ cunaxunagũ i  
 wũxi i mu i nawa nũxũ quixuxũ rũ texé  
 ya ñaa 30 i ngunexũgũgu naxũamaxe  
 nax tũmaarũ tupanaarũ ngũxẽẽcax  
 ítacaamaxũ rũexna ngexũrũxũmare i  
 yatũna tacaxũ rũ tama i cuxna, Pa  
 ãẽxgacũx, rũ tá aigũ ya leóũtanũgu  
 titaxcuchi. ¿Rũ tama exna i ngẽma ñaxũ  
 yixĩxũ i ngẽma mu? —ñanagürũgũ. Rũ  
 nũma ga ãẽxgacũ rũ nanangãxũ rũ  
 ñanagürũ: —Ngemãacũ ngẽma ñaxũ  
 nixĩ. Rũ ngẽma mu rũ nanaxwaxe nax  
 yanguxũ erũ yixema i Médiaanecũãxgũ  
 rũ Pérchiaanecũãxgũ rũ taxuacũma texé  
 tayanaxoxẽẽ i tóru mugũ —ñanagürũ.



<sup>13</sup>Rü yexguma ga nümagü rü ñanagürügü: —Ngëma Danié i Yudíu ga ãëxgacü ga Nabucudonochó nua gaxü rü tama cuga naxínü, Pa ãëxgacüx, rü tama naga naxínü i ngëma mu i cuxunagüxü. Rü toma rü marü nüxü tadau nax tomaepüxcüna nayumüxéxü i wüxichigü i ngunexügu —ñanagürügü. <sup>14</sup>Rü yemaxü naxínügu ga ãëxgacü rü poraãcü nangechaü rü naguxüraxüãcü naxçax nadautaax nax ñuxãcü Daniéxü ñnanguxuchixëëxü ñuxmata yanaxücumare ga üaxcü. <sup>15</sup>Natürü ga yema yatügü ga Daniéxü íxuaxügüxü rü wenaxarü ãëxgacüxütawa naxí rü ñanagürügü nüxü: —Pa ãëxgacüx, cuma nüxü cucuax nax ñuxãcü nax yixíxü i tórü mugü i yixema Médiaanecüãxgü rü Pérchiaanecüãxgü rü guxüma i mugü i ãëxgacü nagu nügü wüégaxü rü marü taxucürüwama texé itayanaxoxëë —ñanagürügü. <sup>16</sup>Rü yexguma ga nüma ga ãëxgacü rü norü duüxügüxü namu nax Daniéxü yagagüxüçax rü aigü ga leóütanügu yatäxcuchigüãxü. Rü nüma ga ãëxgacü rü ñanagürü Daniéxü: —iYimá curü Tupana ya aixcümama naxçax cumaxücü curü ípoxü! —ñanagürü. <sup>17</sup>Rü nüma ga Danié rü aigü ga leóütanügu nayatäxcuchigü rü wüxi ga nutamaxã nanangüxtaügü. Rü nüma ga ãëxgacü rü norü ánera yexma ngíxü naxü cuaxruxü nax aixcüma marü yanguxü ga yema mu. <sup>18</sup>Rü yemawena rü nüma ga ãëxgacü rü napatawa naxü rü tama nachibüãcüma nayape. Rü yema aixrügumaãcü naxüxü ga norü taãxë rü marü tama nanaxü. Rü naétü ga yema chütaxü rü tama yéma

napexchaü. <sup>19</sup>Rü yexguma noxritama yangunegu ga moxüãcü rü ínarüda rü paxa yema ai ímugüxüwa naxü. <sup>20</sup>Rü yexguma nüma ga ãëxgacü marü ngaicamána nanguxgu rü nangechaügaãcü Daniéna naca rü ñanagürü: —iPa Danié ya Tupana ya Maxücüaru Duüxüx, rü yimá curü Tupana ya aixcümama naxçax cumaxücü rü marü curü ínapoxüxü natanüwa i ngëma aigü ya leóügü? —ñanagürü. <sup>21</sup>Rü nüma ga Danié nanangãxü rü ñanagürü: —iGuxügüma namaxü, Pa ãëxgacüx! <sup>22</sup>Rü yimá chorü Tupana rü nua nanamu i wüxi i norü orearü ngeruxü i daxücüãx. Rü ngëma nixí i yachotaaxgüxü i ñaa aigü ya leóügü nax tama choxü nangöxgüxüçax. Erü nüma ya Tupana rü nüxü nacuax nax taxuxüma i chixexü cumaxã chaxüxü, Pa ãëxgacüx —ñanagürü. <sup>23</sup>Rü yexguma ga nüma ga ãëxgacü rü poraãcü nataãxë rü norü duüxügüxü namu nax Daniéxü ínamuxüchigüxüçax aigü ga leóütanüwa. Rü yexguma marü ñnanguxuchigu ga Danié, rü nüxü nadaugü ga taxuwama nax napíxü yerü aixcümama norü Tupanaaxü nayaxö. <sup>24</sup>Rü yemawena ga nüma ga ãëxgacü rü norü duüxügüxü namu nax yéma nagagüaxüçax ga yema yatügü ga Daniéxü íxuaxügüxü. Rü wüxigu naxmaxgümaxã rü naxacügümaxã leóütanügu nanawocu. Rü taütama mea nangucuyane rü nüma ga leóügü rü marü naxçax nibuxmü, rü nüxna nayuxgü rü nagu nawagüe. <sup>25</sup>Rü yexguma ga nüma ga ãëxgacü ga Darfú rü wüxi ga popera naxümatü naxçax ga guxüma ga nachixüanecüãxgü rü ngëma

to ga nagawa idexagũxĩ ga duũxũgũ.  
 Rũ yema poperawa rũ nũma ga ãëxgacũ  
 rũ ñanagũrũ: “Rũ chanaxwãxe nax  
 petaãxëgũxĩ rũ pegũ pengechaũgũxĩ.  
 26Rũ pemaxã nũxũ chixu rũ pexũ chamu  
 rũ guxũma i ñaa naane i chomax  
 namaxã ichacuãxũwa rũ chanaxwãxe i  
 nũxũ pengechaũ rũ nũxũ picuãxũxũgũ  
 ya yimã Daniëarũ Tupana. Erũ yimã  
 Tupana rũ maxũcũ nixĩ, rũ guxũguma  
 nangexmaecha. Rũ ngẽma nũma nax  
 ãëxgacũ yixĩxũ rũ taguma inarũxo, rũ  
 ngẽma norũ pora rũ taguma inayagux.  
 27Nũma rũ tórũ poxũruxũ nixĩ, rũ tórũ  
 ngxũxëëruuxũ nixĩ. Rũ nũma inanawex i  
 cuãxruũgũ i mexũ i daxũguxũ i  
 naanewa rũ ñoma i naanewa. Rũ nũma  
 nixĩ ga Daniëxũ ínapoxũxũ natanũwa ga  
 leóũgũ”, ñanagũrũ. 28Rũ nũma ga Danië  
 rũ ãëxgacũ ga Darfuarũ ngũxëëruuxũ nixĩ  
 rũ yexgumarũxũ ta Pérchiaanearũ  
 ãëxgacũ ga Chíruarũ ngũxëëruuxũ nixĩ.  
 .....

#### Danië rũ natanũxũgũcãx nayumũxë

**9**<sup>1</sup>—Rũ nũma ga Darũ ga Achuëru  
 nane ga Médiaanecũãx rũ ãëxgacũ  
 nixĩ ga Babiróniaanewa. 2Rũ guma  
 taunecũ ga nagu yangucuchicũgu ga  
 Darũ rũ choma ga Danië rũ nawa  
 íchangux ga yema popera ga orearũ  
 uruxũ ga Yeremía ùmatũxũ. Rũ yema  
 ore ga nawa changũxũ rũ nũxũ nixu nax  
 70 ya taunecũ tá ninge nax chixexũwa  
 nangexmaechaxũ ya Yerucharëũ, yerũ  
 yemaacũ nixĩ ga Cori ya Tupana  
 Yeremíamaxã nũxũ yaxuxũ. 3Rũ  
 yemaçãx chayumũxë rũ Cori ya  
 Tupanana chaca nax toxũ  
 ínanguxũxëëxũcãx naxmëxwa i torũ

uanũgũ rũ wena torũ naanewa toxũ  
 nawoëguxëëxũcãx. Rũ yemaacũ tama  
 chachibũãcũma chayumũxë rũ témũxũ  
 ga naxchirugu chicux rũ  
 tãnimacatëxewa charũto. 4Rũ yema  
 chorũ yumũxëwa rũ Tupanamaxã nũxũ  
 chixu ga chorũ pecãdugũ rũ  
 chautanũxũgũiarũ pecãdugũ rũ  
 ñachagũrũ: “Pa Cori Pa Tupanax, cuma  
 rũ guxãétũwa cungexma rũ cuporaxũchi  
 rũ guxũguma cuyanguxëxë i curũ  
 unetagũ. Rũ ngẽmawa tũxũ cunawëx  
 nax tũxũ cungechaũxũ ya yíxema  
 aixcũma cuga ínũexe rũ nagu maxëxe i  
 curũ mugũ. 5Rũ toma rũ poraãcũ  
 pecãdu cupëxewa taxũe rũ chixexũ  
 taxũe. Rũ tamaxëmare rũ tama cugu  
 tarũxĩnũe. Rũ nũxũ tarũxoe i curũ mugũ  
 rũ curũ ucuxëgũ. 6Rũ guma curũ orearũ  
 uruũgũ ga nawa quidexacũ namaxã ga  
 torũ ãëxgacũgũ rũ torũ oxĩgũ, rũ  
 guxũma i tomãx i Iraëtanũxũgũ, rũ tama  
 naga taxĩnũechaũ ga yexguma tomãxã  
 nũxũ yaxugũegu ga curũ ore. 7Rũ  
 cumãx, Pa Cori Pa Tupanax, rũ  
 aixcũmacũ quixĩ. Rũ ngẽmacãx poraãcũ  
 cupëxewa taxãnee i toma i  
 Yerucharëũcũãxgũ, rũ ngẽma togũ i  
 totanũxũ i Iraëtanũxũgũ i ngaicamawa  
 rũ yãxũwa to i nachixũãnegu  
 cuwoonexũ nagagu nax tama cuga  
 naxĩnũexũ. 8Rũ ñuxma i tomãx, Pa Cori  
 Pa Tupanax, rũ naxrũũtama i ngẽma  
 torũ ãëxgacũgũ rũ torũ oxĩgũ rũ taxãnee  
 erũ cupëxewa chixexũ taxũgũ. 9Natũrũ i  
 cumãx, Pa Torũ Tupanax, rũ woetama  
 cucũma nixĩ nax cumecũmaxũ rũ toxũ  
 nũxũ curũngũmaxũ i torũ chixexũ. Rũ  
 ngẽmacãx cupëxewa tangugũ erũ toma  
 rũ poraãcũ chixexũ taxũ. 10Rũ tama

cuga taxĩnũe rũ nũxũ tacugũe ga curũ mugũ ga curũ duũxũgũ ga orearũ uruũgũwa tomaxã nũxũ quixuxũ. <sup>11</sup>Rũ guxũma i chautanũxũ i Iraétanũxũgũ rũ tama naga naxĩnũe i curũ mugũ. Rũ cuxna nixĩgachi rũ tama naga naxĩnũe i curũ ucuxẽgũ. Rũ yemaçax ga yema poxcu ga curũ duũ ga Moichéwa nũxũ quixuxũ rũ togu nangu. <sup>12</sup>Rũ yema nax toxçax núma cunamuxũ ga yema taxũ ga guxchaxũ rũ yemamaxã cuyanguxẽxẽ ga yema poxcu ga tomaxã rũ torũ ãẽxgacũgũmaxã cuxueguxũ, yerũ yema poxcu ga Yerucharéũna cunguxẽẽxũ, rũ taguma yemaacũ cunapoxcu ga to ga ãane. <sup>13</sup>Rũ guxũma ga yema chixexũ rũ toxna nangu yematama Moiché ùmatũxũ ga mugũwa nũxũ ixuxũrũxũ. Natürũ ga toma rũ tama cuxçax tadaugũ, Pa Cori Pa Torũ Tupanax. Rũ tama nũxũ tarĩxoe ga yema torũ chixexũgũ, rũ tama nagu tamaxẽ ga curũ ore i aixcũma ixĩxũ. <sup>14</sup>Rũ yemaçax, Pa Cori Pa Tupanax, rũ toxçax ícunanguxẽxẽ ga yema taxũ ga guxchaxũ ga cumatama tomaxã cuxueguxũ. Erũ cuma rũ aixcũma cuyanguxẽxẽ i ngẽma nũxũ quixuxũ. Natürũ i toma rũ tama cuxũ itarĩxĩnũeçax. <sup>15</sup>Natürũ ga cumax, Pa Cori Pa Torũ Tupanax, rũ nũxcũma ícunawex ga yema taxũ ga curũ pora ga yexguma Equítuanewa ícunguxũxẽẽgu ga curũ duũxũgũ. Rũ yemaacũ cugũ cutachigaxẽxẽ ñuxmata ñoma i ngunexũwa nangu. Natürũ ga toma rũ poraãcũ cupexewa chixexũ taxũ. <sup>16</sup>Pa Cori Pa Tupanax, nũxũ tacuax rũ cuma rũ cumecũmaxũichi. Rũ ngẽmaçax cuxna taca nax namaxã icurũngũxmũxũçax ya

yima ãane ya Yerucharéũcũãxgũ. Erũ yima ãane rũ cuxrũ nixĩ, rũ ngẽma nangexma ya curũ maçpũne ya ùnene. Rũ ñuxma rũ guxũma i ngẽma togũ i nachixũanecũãxgũ i duũxũgũ rũ nũxũ nacugũe i ngẽma curũ duũxũgũ rũ yima Yerucharéũ, nagagu i ngẽma chixexũgũ i toma taxũgũxũ rũ torũ oxigũ ùgũxũ. <sup>17</sup>Pa Torũ Tupanax irũ chomax nax curũ duũxũ chixĩxũ, rũ nũxũ naxĩnũ i chorũ yumũxẽ i nawa cuxũ chacaxũxũ! iRũ cuégagagu nũxũ nangechaũãcũma nũxũ nadau nax ñuxãcũ wũxi i taxũ i ngechaũ yixĩxũ nax nachixexũ ya yima cupata! <sup>18</sup>Pa Chorũ Tupanax itoxũ nayaxu rũ choxũ nũxũ naxĩnũ i ñaa chorũ yumũxẽ erũ curũ duũxũ chixĩ! iRũ mea nangugũ i ngẽma torũ guxchaxũgũ rũ ngẽma norũ chixexũ ya yima ãane ya Yerucharéũ ya cuxrũ ixĩxũne! Rũ tama taxacürũ mexũ i cupexewa taxũxũgagu nixĩ i cuxũ tacaxaxũxũ, natürũ cuxna taca erũ cuma rũ cuxũ nangexma i taxũma i curũ ngechaũ i toxçax. <sup>19</sup>Pa Corix irũ toxũ naxĩnũ rũ toxũ nũxũ irũngũma i torũ chixexũ rũ toxũ rũngũxẽxẽ! iRũ paxa toxũ nangaxũ, Pa Corix! Erũ cuxrũtama ngũchaũ nixĩ i ngẽma rũ cuma rũ nũxũ cungechaũ ya yima curũ ãane ya Yerucharéũ rũ ngẽma curũ duũxũgũ”, ñachagürũ.

**Tupana namaxã nũxũ nixu  
ga yema 70 ga yũxũgũchiga**

<sup>20</sup>Rũ choma rũ íchayadaxẽxẽ ga nax chayumũxẽxũ rũ Tupanamaxã nũxũ chixexũ ga chorũ chixexũgũ rũ chautanũxũ ya Iraétanũxũgũarũ chixexũgũ. Rũ Cori ya Tupanaxũ chacaxũ naxçax ya yima norũ ãane

ya Yerucharéü ya norü ma xpúne ya üünenewa ngexmane. <sup>21</sup>Rü yexguma íchayumüxëyane rü chauxcax nangox ga Tupanaarü orearü ngeruxü ya dauxücüâx ga Gábi ga üpa chauxcax ngócü ga yexguma Tupana taxacüxü choxü nadauxëëgu. Rü yagoeácüma yema íchayexmaxüwa nangu. Rü yema ora ga yáuanecü nagu Tupanacax chayaguxchaüxü ga âmaregügu nixí ga chauxütawa nanguxü. <sup>22</sup>Rü ñanagürü choxü: “Pa Daniéx, nua chaxü i ñuxmax nax cuxü nuxü chayacuaxëxüçax ga yema Tupana nagu rüxínüxü. <sup>23</sup>Rü yexguma noxritama icunaxügügu ga nax cuyumüxëxü rü Tupana rü marü cuxü nangäxü. Rü ngëmacax i chomax rü nua chaxü nax cumaxä nüxü chayarüxuxüçax nax marü cuxü nangäxüxü, erü nüma ya Tupana rü poraäcü cuxü nangechaü. Rü ñuxma rü imea irüxínü i ngëma tá cumaxä nüxü chixuxü nachiga ga yema nüxü cudauxü ga yexguma taxacü ga ëxüguxü cuxü nadauxëëgu! <sup>24</sup>Rü 70 i yüxügü ngupetüguwena rü yima curü ñane ya Yerucharéü rü ngëma curü duüxügü i Iraétanüxügü rü düxwa tá Tupanaga naxínüe, rü Tupana tá nüxü inanaxoxëxë i ngëma norü chixexügü, rü tá nüxü nüxü inarüngüma i ngëma norü chixëxü ga noxri naxügüxü. Rü tá ningucuchi ya yimá Üüneçü ya aixcüma mecü nax guxüguma norü duüxügümaxä meama inacuáxüçax rü ngëmaäcü yanguxü ga yema Tupana cuxü dauxëëxü”

—ñanagürü choxü.

.....

**Taxtü ga Tígricutüwa Tupana Daniéxü nüxü nadauxëxë i taxacü tá nax ngupetüxü**

**10**<sup>1</sup>—Rü guma norü tomaepüx ga taunecü äëxgacü yixígu ga Chíru ga Pérchiaanecüâx, rü choma ga Danié ga Betachámaxä choxü naxugüe rü Tupana choxü nüxü nadauxëxë i taxacü tá ngupetüxü. Natürü yema nüxü chadauxü rü poraäcü naguxchaxüchi nax nüxü icuáxü nax taxacüchiga yixíxü. Natürü ga choma rü meama chanangugü nax taxacüchiga yixíxü rü yemaacü nüxü chacuaxama ga yema nüxü chadauxü. <sup>2</sup>Rü yexguma yemaxü chadauxgu rü choma ga Danié rü tomaepüx ga yüxü poraäcü changechaü. <sup>3</sup>Rü tama chanangöx ga maixcuraxü, rü tama chanangöx ga namachi, rü tama chayaxaxü ga bínu, rü tama chaugü chamexëxë ñuxmata yema tomaepüx ga yüxü ngupetügu. <sup>4</sup>Rü wüxi ga ngunexü meama guma taunecüarü nüxíraxü ga tauemacü (abril)arü 24 ga ngunexügu, rü taxtü ga Tígricutüwa chayexma. <sup>5</sup>Rü ngürüächi nüxü chadau ga wüxi ga yatü ga línuchimaxä äxchiruxü rü úrumaxä goyëüáxü. <sup>6</sup>Rü yema naxüne rü ñoma nuta ya topächirüxü niyauxracüxü, rü yema nachiwë rü ñoma baixbeanexürüxü nixí. Rü guma naxetügü rü ñoma üxüemagürüxü nixí, rü guma nachacüügü rü nacutügü rü ñoma bróuche iyauxracüüxürüxü nixí. Rü yema naga rü ñoma muxü i duüxügü idexagüxürüxü nixí. <sup>7</sup>Rü chaxicatama nixí ga nüxü chadauxü ga yema Tupana chauxcax ngoxëëxü. Rü

yema togü ga chomücügü rü taxuxüma nadaugü, yerü norü muümaxã nibuxmü rü nicuxgü. <sup>8</sup>Rü yemaacü chaxicatama yéma chayexma ga yexguma yemaxü chadauxgu. Rü chabaxächiaxê rü chanachoxöchi rü chaturaxüne. <sup>9</sup>Rü yexguma nagaxü chaxínügu ga nax yadexaxü, rü chiyuâchi rü ichayangu. <sup>10</sup>Natürü wüxi ga naxmex rü choxna natüxie rü choxü nangenagü ñuxmata choxmexmaxã rü chauápüxümaxã ichachuxenü. <sup>11</sup>Rü ñuxüchi ñanagürü choxü: “Pa Daniéx, Tupana rü cuxü nangechaü. iRü mea irüxínü i ngêma tá cumaxã nüxü chixuxü! iRü inachi! Erü choxü nixi i cuxütawa namuxü ya Tupana”, ñanagürü. Rü yexguma yagüegagu nax yadexaxü rü choma rü chiduxruxácüma ichachi. <sup>12</sup>Rü yexguma ga nüma rü ñanagürü: “iTaxü i choxü cumuüxü, Pa Daniéx! Yerü yema ngunexü ga nagu nüxü cucuáxchaüxü ga yema Tupana nagu rüxínüxü rü napexewa cugü icurüxíra, rü nüma rü cuxü nüxü naxínü ga curü yumüxêgü. Rü ngêmacax nua cuxütawa chaxü. <sup>13</sup>Natürü ngêma naãxê i chixexü i Pérchiaanecüãxarü ãëxgacümaxã icuáxü rü 21 ga ngunexü rü choxü nanaguxchaxêxê. Natürü nüma ya Miguére i ãëxgacü i tacü ixü i daxücüãxtanüwa rü nua naxü rü choxü narüngüxêxê. Yerü ga choma ga noxri rü chaxicatama chaugümaxã chawüxicax natanüwa ga yema Pérchiaanecüãxarü

ãëxgacügü. <sup>14</sup>Rü ngêmacax i ñuxma rü nua chaxü nax cumaxã nuxü chayarüxuxüçax i ngêma tá ngupetüxü i yixcüra namaxã i cutanüxü i Iraétanüxügü. Rü yema nüxü cudauxü ga yexguma Tupana cuxçax nangoxêëgu, rü ngêma tá yixcüra cutanüxümaxã ngupetüxüchiga nixi” —ñanagürü choxü.

.....

**Nawa tá nangu nax ínanguxü i taxü i guxchaxügü**

**12** <sup>1</sup>—Rü ñanagürüama: “Rü ngêxguma ngêma taxü i guxchaxügü ínguxgu, rü nüma ya Miguére ya dauxücüãxarü ãëxgacü ya Tupanaarü duüxügüna daucü, rü tá nangox. Rü ngêma ngunexügu rü tá nangexma i taxü i guxchaxügü i taguma ñuxgu nüxü idauxü. Natürü ngêxguma ngêmawa nanguxgu rü guxüma i ngêma Tupanaarü duüxügü i norü poperagu ümatüégaxü rü tá namaxê naétüwa i ngêma guxchaxügü. <sup>2</sup>Rü guxüma i marü yuexü rü tá ínarüdagü. Rü tümáxe rü maxü i taguma gúxüçax tá ítarüda, rü toguegü rü ãnecax rü poxcuçax tá ítarüdagü. <sup>3</sup>Rü ngêma duüxügü i cuçax nüxü ngêxmaxü rü muxema mexüwa tüxü gagüxü, rü ñoma üaxcürixü tá inabaixgü rü ñoma woramacurígürüxü tá ngêma nanaigüecha” —ñanagürü choxü.

.....

# OSEAS

## (Ochéa)

### Ochéa naxmax rü nanegü

**1** <sup>1</sup>Rü ñaa nixí ga ore ga Cori ya Tupana nüxü ixuxü namaxã ga Ochéa ga Béri nane ga yexguma Yudáanewa ãëxgacügu yixügu ga Uchía rü Yotáü rü Acáa rü Echequía. Rü yexguma nixí ga Yeruboáü ga Yoá nane ga ãëxgacü yixüü ga Iraéanewa. <sup>2</sup>Rü ñaa nixí ga yema nüxíraxüü ga ore ga Cori ya Tupana Ochéamaxã nüxü ixuxü. Rü ñanagürü nüxü: —Ngëma Iraéanecüãxgü rü ñoma wüxi i ngexü i natena ngeãxëxürüxü choxna nixígachi. Rü cumax, Pa Ochéax, rü wüxi i cuaxruxü tá quixí naxcax i ngëma duüxügu. iRü ngëmacax i ñuxma rü wüxi i nge i chixri maxücümaxã naxãxmax rü ngíwa naxãxacü! Rü ngëmaäcü i ngëma cuxacügu rü wüxi i nge i ngeãxëcücügü tá nixígü —ñanagürü. <sup>3</sup>Rü yemawena ga Ochéa rü ngímaxã naxãxmax ga Gomé ga Dibráñacü. Rü ngíma rü nüxü ixãxacü rü nayatü. <sup>4</sup>Rü ñuxüchi ga nüma ga Cori ya Tupana rü ñanagürü Ochéaxü: —Yimá cune rü Yechereé tá nixí i naéga. Erü paxaxüchítama chanapoxcue

i ngëma nataagü ya yimá ãëxgacü ya Yeú naxcax ga yema taxü ga máeta ga naxüxü nawa ga guma ñane ga Yechereé. Rü ngëxma tá chayacuaxëxë nax nümagütama i Iraéanecüãxgü nügümaxã inacuaxgüxü. <sup>5</sup>Erü ngëma ngunexügu rü yima ñane ya Yechereéarü ngatexü i metachinüanexügu tá chanadai i ngëma norü churaragü i Iraéanecüãxgü rü ngëxma tá nagu i norü pora —ñanagürü. <sup>6</sup>Rü yexguma ga ngíma ga Gomé rü wena ixãxacü, rü nange ga ngíxacü. Rü nüma ga Cori ya Tupana rü Ochéaxü ñanagürü: —Ngëma ngíéga i ngëma cuxacü rü Duruáma tá nixí. (Rü ngëma naéga rü: “tama choxü nangechaütümüxügu”, ñaxüchiga nixí.) Erü ñuxmawena rü marü taxütáma choxü nangechaütümüxügu i Iraéanecüãxgü. Rü marü taxütáma nüxü nüxü icharüngüma i ngëma norü chixexügu. <sup>7</sup>Natürü ngëma Yudáanecüãxgü rü tá choxü nangechaütümüxügu rü chomatama i norü Tupana nax chixüxü rü tá norü uanügüna íchanapoxü. Natürü taxütáma taxacürü churaragümaxã rüexna naxnegümaxã rüexna ngëma churaragü

i cowa<sup>u</sup>áxũmaxã —ñanagürü ga  
Tupana. <sup>8</sup>Rü yexguma Gomé marü  
Duruáma ngixũ yamaieguwena, rü wena  
ixãxaci, rü nayati. <sup>9</sup>Rü yexguma ga  
nüma ga Cori ya Tupana rü Ochéaxũ  
ñanagürü: —Ngëma cune rü Duamígu  
naxüéga, erü pema i Iraéanecüãxgü rü  
marü tama chorü duũxügü pixígü rü  
choma rü marü tama perü Tupana chixĩ  
—ñanagürü.

.....

#### Tupanana nixígachi ga Iraéanecüãxgü

**2** <sup>2</sup>Rü nüma ya Cori ya Tupana rü  
ñanagürü: —iPa Iraéanecüãxgü,  
ípenaxuaxũ i ngëma pechixũane i ñoma  
peérüxũ ixixũ! Norü duũxügü rü marü  
choxna nixígachi, rü ngëmacax i  
pechixũane rü marü tama choxrü nixĩ rü  
choma rü marü tama norü Tupana chixĩ.  
Rü name nixĩ nax norü duũxügü nüxũ  
naxoexũ nax ñoma wüxi i ngexũ i  
ngeãxëcürüxũ yixixũ, rü nüxna nax  
yaxígachixũ i ngëma norü  
tupananchicünaxãgü i nüxũ  
nangechaügüxũ. <sup>3</sup>Rü ngëxguma  
taxútama nüxũ naxoegu i ngëma  
tupanachicünaxãgü rü tá nüxna  
chanayaxu i guxũma i ngëma norü  
ngëmaxügü i nüxũ ngëxmaxũ rü ñoma  
wüxi i nge i ngexchirucürüxũ tá  
chayaxixëxë. Rü ngëma nachixũane rü  
noxri nangoxgurüxũ tá chayaxixëxë rü  
ñoma mairaxũ i paxũ rü ngearü  
dexááxürüxũ tá chayaxixëxë nax  
ngëmaäcü taxawamaxã nayuexücax i  
ngëma choxna ixígachixũ.

.....

<sup>13</sup>Rü ngëma cuchixüanecüãx i  
duũxügü rü guma ñuxre ga taunecügü

ga nagu nüxũ yacuaxüügüci ga yema  
tupanachicünaxãgü, rü ngëmacax tá  
chanapoxcue. Yerü marü choxũ  
inarüngümae rü norü  
tupanachicünaxãgücax pumáratexë  
ínagügü ga yexguma áneramaxã rü  
nachagümaxã nügü yangaxãégügu nax  
yemaacü yema tupanachicünaxãgüxũ  
yacuaxüügüxücax. Rü chomax i Cori ya  
Tupana nixĩ i nüxũ chixuxũ i ngëma.

#### Tupana rü Iraéanecüãxgüxũ nangechaüama

<sup>14</sup>Natürü i chomax, rü wena táxarü  
ngëma Iraéanecüãxgü rü chaugiina  
chayapuexëxë. Rü chianexüwa tá  
chanagagü nax ngëma mea namaxã  
chidexaxücax rü wenaxarü choxũ  
nangechaügüxücax. <sup>15</sup>Rü ngëma norü  
úbanecügü rü tá wena chanamexëxë  
nax mea naxügüxücax rü nabacaxücax i  
norü úbagü. Rü ngëma ngatexũ i  
metachinüanexũ ga noxri  
Guxchaxüchicagu áégaxũ rü  
Taãxëchicaxũ tá chayanguxuchixëxë. Rü  
ngëma naanewa tá choxũ nangechaügü  
i ngëma Iraéanecüãx ga yexguma  
Equítuanewa ínaxoxügürüxũ. <sup>16</sup>Rü  
ngëxguma rü tá “Pa Cuxũ  
Tangechaxüci”, ñanagürügü choxũ rü  
tama “Pa Torü Yora i Baáx”,  
ñanagürügü. Rü choma i Cori ya  
Tupana nixĩ i nüxũ chixuxũ i ngëma.  
<sup>17</sup>Rü tá nüxna chanachuxu nax  
tagutáma wena namaxã  
nadexaächigüxücax i ngëma  
tupananchicünaxãgü. <sup>18</sup>Rü ngëma  
ngunexügügu rü ngëma  
Iraéanecüãxgüxũ tá charüngüxëxë. Rü  
ngëma naexügü i düraexũ, rü werigü, rü

ãxtapegü rü tá ichanangüxmüexêxê nax  
tama ngêma duũxügüxü  
nachixeãxêgüxüçax. Rü tá ichanaxoxêxê  
ya würagü rü taragü. Rü ngêma norü  
uanügü rü tá ichanangüxmüexêxê nax  
tama wena naxçax íyaxüãchixüçax, rü  
ngêmaäcü i chorü duũxügü rü  
nataãxêgüxüçax. <sup>19</sup>Rü ngêmaäcü, Pa  
Iraéanecüãxgüxü, choma rü tá wena pexü  
chade nax guxügütáma choxrü  
pixígüxüçax. Rü ngêmaäcü tá  
aixcümáxüchi choxrü pixígü ngêma  
mugü nüxü ixuxüäcü, erü poraäcü pexü  
changechaü. <sup>20</sup>Rü chorü duũxügüxüchi  
tá pexü chixígüxêxê, rü tagutáma pexü  
íchawogü. Rü pema rü tá choxü pecuax  
nax perü Tupana chixixü —ñanagürü.  
.....

**Ochéa rü naxmaxarü  
chixexüxü narüngüma**

**3** <sup>1</sup>Rü yexguma ga Cori ya Tupana rü  
ñanagürü choxü: —iNgéma naxü  
rü wenaxarü ngíxçax yadau i cuxmax rü  
cugüxütawa ngíxü naga rü ngíxü  
nangechaxü, rü woo i ngíma rü ngírü  
me nixí i nai i yatümaxá nax namaxüxü!  
Erü choma ya Cori ya Tupana rü  
ngêxgumarüxü ngêma Iraéanecüãxgüxü  
changechaüama rü woo i nümagü rü  
choxna nixígachi rü naxçax narümemae  
nax ngêma tupanachicünaxägüwe  
naxíxü rü nangõxgüaxü i ngêma  
maixcuraxügü i namaxá nüxü  
yacuaxüügüxü —ñanagürü ga Tupana.  
<sup>2</sup>Rü yexguma ngíxü ichayangauxgu rü  
yema ngírü yoraxütawa wenaxarü  
ngíxçax chataxe. Rü 15 tachinü ga diêru  
rü 330 lítrugü ga chebádagu nixí ga  
naxátanüxü. <sup>3</sup>Rü ñachagürü ngíxü:

—Mucütáma ya taunecü choxrü quixí.  
Rü tama name nax cungeãxêxü rü nai i  
yatüna cugü nax cuxãxü. Rü choma rü  
tá ta cumaxá chixaixcüma nax mea  
chamaxüxü —ñachagürü. <sup>4</sup>Rü  
ngêmaäcü ya Tupana rü ngêma  
Iraéanecüãxgüxü nüxü nacuaxêxê rü  
mucü ya taunecü rü to i  
nachixüanegügu tá nawoone rü to i  
nachixüanearü ãêxgacü rü tá namaxá  
inacuax. Rü ngêmacax i ngêma  
Iraéanecüãxgü rü tá nüxü nataxuma i  
noxrütama ãêxgacü, rü bai i ãêxgacü  
nane, rü bai i norü chacherdótegü, rü  
bai i norü chacherdótegüchiru, rü bai i  
norü ãmarechicagü, rü bai i norü  
tupanenetachicünaxägü. <sup>5</sup>Natürü  
ngêmawena i nüma i Iraéanecüãxgü rü  
nachixüanecax tá nawoegu rü tá Cori ya  
Tupanaçax nadaugü. Rü tá Dabítaçax  
nadaugü nax norü ãêxgacü yixíxüçax.  
Rü ngêma ngunexügü i nawa  
iyacuaxgüxügü rü Cori ya Tupanaçax tá  
naxí, rü nüxü tá nicuaxüxügü naxçax i  
guxüma i norü ngüxêégü.  
.....

**Cori ya Tupana rü  
Iraéanecüãxgümaxá nanu**

**4** <sup>1</sup>Pa Iraéanecüãxgüxü iiperüxíntie i  
ngêma pemaxá nüxü yaxuxü ya  
Cori ya Tupana! Nüma rü pemaxá nanu,  
erü petanüwa rü marü tataxuma ya texé  
ya tümamücümáxá ixaixcümáxe, rü bai  
ya texé ya aixcüma naxúxe i ngêma  
Tupanamaxá nüxü tixuxü, rü bai ya texé  
ya aixcüma Tupanaxü cuáxe. <sup>2</sup>Rü  
tamuxüchi ya natüçaxma Tupanaégagu  
ixunetaxe rü nataxüchi i dora, rü máeta,  
rü ngíx, rü namu i nai i ngemaxá



ipegüxü, rü nügü dajixü, rü máetaguéchaxü. <sup>3</sup>Rü ngëmacax i ñaa nachixüane rü poraäcü ngechaü nüxü nangux rü naanegüwa rü taxuxüma narüxü. Rü duüxügü rü nidaxawee rü nayue, rü ngëxgumarüxü ta i ngëma naexügü i naixnecücüãx rü werigü rü choxnigü i márcüãx rü nigüetanü.

**Cori ya Tupana rü  
chacherdótegüxü nixugü**

<sup>4</sup>Rü nüma ya Cori ya Tupana rü ñanagürü: —Dücac, Pa Chacherdótex, cugagu nixí i ngëma guxchaxü i nagu nanguxü i ngëma cuchixüane. Rü tama name i toguena cunaxu i ngëma chixexü. <sup>5</sup>Rü cuma rü ngunecü tátama nagu cingu i ngëma guxchaxü. Rü nüma ya yima orearü uruünetá rü chütacü cuxrüxü tátama nagu nangu. Rü ngëxguma i choma rü taxütáma pexü íchapoxü nax perü uanügü pexü dajixüçax rü pexna napuãxüçax i ñaa pechixüane. <sup>6</sup>Rü chorü duüxügü rü chixexügu nayí rü nayue erü tama chorü mugüxü nacuaxgü. Rü ngëma rü cugagu nixí, Pa Chacherdótex, erü cuma rü ta nüxü cuxo i chorü mugü. Rü ngëmacax i choma rü ta cuxü chaxo nax chorü orearü uruxü quixixü. Erü cumax rü nüxü icurüngüma i chorü ucuxëgü rü ngëmacax i chomax rü tá ta nüxü icharüngüma i ngëma cutaagü. <sup>7</sup>Rü ngëxguma yexera yamuxgu i ngëma chacherdótegü, rü yexera chixexü chopexewa naxügü. Nümagü rü choxna nixígachi nax nawe naxixüçax i ngëma norü tupanachicünaxägü. Rü ngëmacax i choma rü taxütáma namaxá chataãxë rü tá nüxü chaxo. <sup>8</sup>Rü nüma i ngëma

chacherdótegü rü duüxügüariü pecádumaxá nataãxëgü erü ngëxguma ngëma duüxügüaxü naxüãxgu nax norü tupanachicünaxägüçax nadaiaxü rü ínaguaxü i ámaregü, rü nüma i duüxügü rü meama ngëma chacherdótegüaxü nanaxütanü. <sup>9</sup>Rü ngëmacax i choma rü ngëma duüxügüxü chapoxcuxürüxü tátama chanapoxcue i ngëma chacherdótegü naxçax i norü chixexügü —ñanagürü ga Tupana.

.....

**Iraéanecüãxgü rü nüxü nixugüe nax Cori  
ya Tupanacax nawoeguxü**

**6** <sup>1</sup>Pa Duüxügüx irü nua pexí ya guxáma rü ngíxá Cori ya Tupanacax tawoegu! Rü woo nümatama tüxü nawoone rü guxchaxü tüxna naxá, natürü wena táxarü tüxü nawoeguxëxë nax ngëmaäcü itaãxëgüxüçax. Rü nüma rü ngúxü tüxü ningegüxëxë, natürü wena táxarü taxçax nayataanegüxëxë. <sup>2</sup>Rü ngëmaäcü paxa tá wena taxçax nayataanegüxëxë rü tá tüxü ínarüdagüxëxë nax mea napexewa imaxëxüçax. <sup>3</sup>iRü ngíxá pora taxüe nax aixcüma Cori ya Tupanaxü icuáxüçax rü naga ixíñüexüçax! Rü nüma ya Cori ya Tupana rü aixcüma tá tüxna nangu ñoma üaxcü guxügüma ínguxürüxü rü ñoma pucü guxügüma waixümü iwaixmüanexëëcürüxü.

**Cori ya Tupanaarü ngãxüga**

<sup>4</sup>Rü nüma ya Cori ya Tupana rü ñanagürü: —¿Taxacü tá pemaxá chaxü Pa Efraítanüxügüx? ¿Rü taxacü tá pemaxá chaxü Pa Yudáanecüãxgüx? Rü ngëma choxü nax pengechaüxü rü ñoma

caixanexũ i exũwa paxaãchi ngóxũrũxũ nixĩ, rü yima charena ya ngunetũxũ paxaãchi rüngucürũxũ nixĩ. <sup>5</sup>Rü yema chorũ orearũ uruũgũ ga petanũwa chamugũxũwa pemaxã nüxũ chixu nax pexũ tá chapocuxũ, natürũ ga pema rü tama iperũxĩnũe rü yemacax pexũ chadaix. Rü yemaacũ ga chorũ poxcu rü aixcũma pewa nangu ñoma ngóonexũ irügoxũrũxũ. <sup>6</sup>Rü ngẽma choma pexũ chanaxwaxexũ nixĩ nax choxũ pengechaũxũ, rü tama taxacürũ naxũnagũ chauxcax pedaixũ. Rü ngẽma chanaxwaxexũ nixĩ nax aixcũma choxũ pecuáxũ nax perũ Tupana chixĩxũ rü ngexrũma i taxacürũ ãmare i chauxcax nax ípeguxũ —ñanagürũ ga Tupana. ....

**Tupana rü Efraítanũxũgũmaxã nanu**

**9** <sup>17</sup>Rü ñaa duũxũgũ rü tama chorũ Tupanaga naxĩnũechaũ, rü ngẽmacax i nũma ya Tupana rü tá nüxũ naxo. Rü togũ i nachixũanegũgu tá nawoone, rü tá nu ne nanaxĩmare. ....

**Nagu tá napogũe i ngẽma ãmarearũ guchicaxũgũ i Iraéanecũãxgũ norũ tupanachicũnaãxãgũcax naxũgũxũ**

**10** <sup>1</sup>Ngẽma Iraéanecũãxgũ rü ñaa úba i muarũ oóxũrũxũ nixĩ, natürũ ngẽxguma yexera namuxgu i norũ ngẽmaxũgũ rü yexera norũ tupanachicũnaãxãcax ãmarearũ guchicaxũ ínixũxũgũ. Rü ngẽxguma yexera nanetũarũ o inaxãxgu i norũ naane rü yexeraxũ i mexũ i naxchicũnaãxãgũ ínixũxũgũ. <sup>2</sup>Ngẽma Iraéanecũãxgũ rü taxregu narũxĩnũe i norũ maxũwa rü

tama Tupanaguxica narũxĩnũe. Rü ngẽmacax i ñuxma rü ngẽma norũ chixexũgagu rü tá napoxcue. Rü nũma ya Cori ya Tupana rü tá inanaxoxẽxẽ i ngẽma ãmarearũ guchicaxũgũ i norũ tupanachicũnaãxãgũcax üxũ rü tá nayapuexẽxẽ i ngẽma nutagũ i nüxũ yacuãxũũgũxũ. <sup>3</sup>Natürũ nũma i ngẽma duũxũgũ rü ñanagürũgũ tá: “Rü nataxuma ya tórũ ãẽxgacũ nagagu nax tama Cori ya Tupanaxũ ingechaũgũxũ. Natürũ nüétama erũ ãtaxacürũ mexũ chi taxcax naxũxũ ya ãẽxgacũ? <sup>4</sup>Rü yexũcürũ nidexaechamare rü natũcaxmamare tamaxã inaxuneta rü nanaxunagũ i mugũ natürũ taguma nayanguxẽẽgũ. Rü ngẽmacax i tatanũwa rü duũxũgũ rü nügũmaxã nanue rü ñoma wũxi i nanetũ i nawa iyuxũrũxũ nangexma i chixexũ i tatanũwa”, ñanagürũgũ. <sup>5</sup>Rü ñuxma i ngẽma Chamáriaanecũãx i duũxũgũ rü niduxrue, rü naxaxue naxcax i ngẽma wocaxacũchicũnaãxã i Betawéũwa rütaxuxũ. Rü naxcax nangechaũgũ i duũxũgũ rü ngẽma chacherdótegũ erũ marũ narũtaxu ga yema namaxã nataãxẽgũxũ. <sup>6</sup>Rü ngẽma wocaxacũchicũnaãxã i Iraéanecũãxgũ nüxũ icuãxũũgũxũ rü Achíriaarũ churaragũ rü nachixũanewa tá nanangegũ nax norũ ãẽxgacũna naxãgũaxũcax. Rü tá naxãnee i ngẽma Efraítanũxũgũ erũ marũ nataxu i norũ naxchicũnaãxã i nüxũ yaxõgũaxũ. Rü ngẽxgumarũxũ ta i guxũma i ngẽma Iraéanecũãxgũ rü ãne tá ningegũ. <sup>7</sup>Rü ngẽma Chamáriaanearũ ãẽxgacũ rü tá narũtaxu ñoma wũxi i naixtũchi i dexã ichaxẽxũrũxũ. <sup>8</sup>Rü ngẽma norũ tupanachicũnaãxãchicagũ ga

Iraéanecüãxgü chixexü nawa ügüxü, rü tá nahu napogüe. Rü ngëma norü ãmarearü guchicaxügüétüwa tá narüxügü i chuchxügü rü toragü. Rü nüma i ngëma duüxügü rü tá ngëma ngüchitaerugüxü ñanagürügü: “iToétüwa pebuemügü!” Rü yima maxpünegüxü tá ñanagürügü: “iToétügu peyixi!” ñanagürügü.

.....

<sup>12</sup>Rü nüma ya Tupana rü ñanagürü: —Choma rü marüchirex pemaxã nüxü chixu rü ñachagürü pexü: “iMexü pexüx rü ngëmaäcü tá pexna nangu i chorü ngechaü! iRü penamexëxë i perü maxü! Erü marü nawa nangu nax chauxçax pedaügüxü ñuxmatáta petanüwa changu nax peétügu chayabaxüçax i chorü pora i namaxã pexü íchapoxüxü.” <sup>13-14</sup>Natürü i pemax rü nahu pemaxë i chixexü, rü ngëma ne naxü nax chixri pegümaxã ípecuáxü rü doragu nax pemaxëxü. Rü pema rü nahu peyaxó i ngëma muxü i perü churaragü rü yima peweügü ya daiwa namaxã pexixüne —ñanagürü ga Tupana. ....

**Tupana rü nüxü nangechaüama i norü duüxügü woo tama naxinüegux**

**11** <sup>1</sup>—Rü yexguma ñoma buxürüxü tauta cuaxwa nangugüga ga chorü duüxügü ga Iraéanecüãxgü, rü choma rü nüxü changechaü yerü chaucügü nixigü rü yemacax íchananguxüxëxë ga Equítuanewa. <sup>2</sup>Natürü yexguma yexeraäcü naxçax chacaxgu nax chowe naxixüçax rü nüma rü yexeraäcü choxna nixigachi. Rü ngëma chorü duüxügü rü norü tupanachicünaxägüçax ínanagu i

ãmaregü rü ngëmachicünaxägüçax ínanagu i pumáratexe. <sup>3</sup>Choma nixi ga yema Efraítanüxümaxã ichacuáxü ga yexguma noxri tauta nüxü nacuaxgügu ga ñuxäcü tá napugüáxü ga ñaa naane. Rü chanangüexëxë nax ñuxäcü tá inaxixü. Rü choxmexmaxã nüxü chingí natürü ga nümagü rü tama nüxü nacuaxgü nax choma yixixü ga nüxna chadauxü. <sup>4</sup>Rü nüxü changechaüãcuma chaugüçax chayagagü nax chaugüchametüwa chayapaxëëgüxüçax ñoma buxügü i maixürüxü. Rü naxçax ichayarümaxächí nax chanachibüexëxüçax.

.....

<sup>7</sup>Rü nüma i ngëma chorü duüxügü rü nanaxügüama nax choxna yaxigachixü. Rü tagaäcü nayumüxëgüchirex, natürü taxúema tanangãxü erü nawe narüxíama i ngëma tupanaretagü i taxucürüwa nüxü rüngüxëxü. <sup>8</sup>Natürü taxucürüwa pexna chixügachi, Pa Efraítanüxügüx. Rü taxucürüwa pexü íchawogü, Pa Iraéanecüãxgüx. Rü taxucürüwa pexü chadai yexgumarüxü ga yema Admácüãxgüxü chadaixgurüxü. Rü taxucürüwama pexü charüxoxëxë guma íane ga Chebofúxü charüxoxëxürüxü. Erü daa chorü maxünewa rü pexü changechaü rü íchamemare nax choxü pengechaütümüxügüxü —ñanagürü ga Tupana.

.....

**Ochéa rü Iraéanecüãxgüxü naxçaxü nax Cori ya Tupanacax nawoeguxü**

**14** <sup>1</sup>Pa Iraéanecüãxgüxü nax Perü Chixexügagu Peyixixüxü irü naxçax pewoegu ya Cori ya perü

Tupana! <sup>2</sup>Rü ñaãcü peyumüxëgü: “iPa Torü Cori ya Tupanax, rü toxú nüxü irüngüma i guxüma i torü chixexügü! iRü mea toxú nayaxu i ñaa torü cuaxüxü i cuxna taxãxü! <sup>3</sup>Rü marü nüxü tadaugü rü ngëma Achíriaanecüãxgü rü tama aixcüma toxü ínapoxü, rü woo chi cowaruétügu taxíxgu rü taxüchima tamaxë. Rü ngëmacax i ñuxma rü marü taxütáma namaxã tatupanaãx i taxacü i tomatama taxüxü. Erü toma nax tangearü yoraáxü rü cuxicatama nixí i aixcüma cuxü tangechaütümüxügüxü” ñaperügü tá.

**Cori ya Tupana rü Iraéanecüãxgümaxã inaxuneta nax ngexwacaxüxü i maxü tá nüxna naxãxü**

<sup>4</sup>Rü ñanagürü ya Cori ya Tupana: —Ngëma duüxügü i tama chauga ñnüexü rü tá chaugümaxã ichanangüxmüexëxë. Rü tá nüxü changechaüama woo tamachirex ngëma nixí i norü natanü. Erü marü nangupetü nax namaxã chanuxü. <sup>5</sup>Rü ñuxma i choma rü tá nüxü charüngüxëë i ngëma Iraéanecüãxgü ñoma cherena

nanetügüxü iwaixëëcürüxü. Rü ngëma Iraéanecüãxgü rü tá nataãxëgü ñoma putüra i líriu meama ixächacuxürüxü. Rü yima maxpúne ya Líbanu guxügüma ngëxmaechanerüxü tá nixí i ngëma Iraéanecüãxgü nax guxügutáma nachixüanewa nangexmagüxü. <sup>6</sup>Rü ñoma orübu itaetaxü rü ibacaxürüxü rü tá meama nüxü naxüpetü i ngëma Iraéanecüãxgü i nachixüanewa. Rü ngëma nachixüane rü duüxügüaru taãxëëerüxü tá nixí ñoma Líbanuarü ocayiwaemarüxü —ñanagürü ga Tupana.

.....

**Norü gux i ñaa ore**

<sup>9</sup>Rü yíxema cuax tüxü ngëxmaxe rü yíxema aixcüma túmaãxëxü cuáxe rü ëcü naga taxínie i ñaa ore: “Rü ngëma nacüma ya Cori ya Tupana rü aixcüma nawexgu. Rü ngëma aixcüma Tupanaga ñnüexü i duüxügü rü ngëma nacümagu naxí. Natürü ngëma chixexügu rüxíñnüexü i duüxügü rü ngëma Tupanacüma rü nüxü rü wüxi i guxchaxü nixí.”

# JOEL

(Yoé)

## Munügü rü Iraétanüxüarü nanetü nangõxgü

**1** <sup>1</sup>Ñaa nixí ga Cori ya Tupanaarü ore ga Petué nane ga Yoémaxã nüxü yaxuxü: <sup>2-4</sup>“Guxüma ga perü nanetügü rü munü pexü nanangõx. Rü yema íyaxüxëégüxü rü togü ga munü nanangõxgü. Rü dücax, Pa Yaxguãxgü rü Guxãma i Pemax i Ñaa Nachixüanecüãxgüx, rü pexna chaca ¿rü ñuxgu nüxü pedauxü ga wüxi ga chixexü ga ñaarüxü ixixü? Rü nüxcüma ga penatügü rü taguma nüxü tadau i ngëma ñuxma pexü ngupetüxü. Rü ngëmacax name i pexacügümaxã nüxü pixu i ngëma ñuxma pexü ngupetüxü, rü nümagü rü tá naxacügümaxã nüxü nixugügü, rü petaagü rü naxacügümaxã ta nüxü nixugügü. <sup>5</sup>Pa Ngãxëwaxexüx írü pebajüxãchie! iPexauxe, Pa Bínuarü Axruügüx! Erü ngëma úbatüxü rü tá pexna nanayauxgü. <sup>6</sup>Erü ngëma munügü rü ñoma muxüchixü i churaragü i poraexürüxü chauchixüanegu nachocu. Rü napütägü rü ñoma ai ya leóüpütarüxü nixígü. <sup>7</sup>Rü ngëma munügü rü tórü úbanecügu rü

tórü iguéraneçügu nawagüe rü nayangeatüxëxë rü ngëmaäcü nachoxtanümare i nachacüxü. <sup>8-9</sup>Rü chacherdótegü rü naxauxe ñoma wüxi i paxü iyutëxü i nateçax axuxürüxü erü Tupanapatawa rü marü nataxuma i nawemügü rü bínu nax ngëma Tupanana naxãmaregüxüçax. <sup>10</sup>Rü ngëma naanegü rü nachianemare rü waixümügü rü nipagümare. Rü ngëma trígugü rü nayue rü ngëma úbanecü rü nipagü rü ngëma oríbunecü rü narüñëxgü. <sup>11</sup>Rü pemax nax naanewa pepuracüxü rü penatoxü ga úbagü rü trígugü rü chebádagü rü poraäcü pengechaügüäcüma pexauxe. Yerü yema trígu rü chebáda ga petogüxü rü pexü nayue, rü yemaçax taxuxüma pibuxgü. <sup>12</sup>Rü perü úbanecü rü nipagü rü yexma narüxo ga perü iguérägü. Rü nipagü ga perü orüxgü ga boxragü, rü cucugü, rü mansánagü rü guxüma ga perü nanetügü ga peanewa yexmagüxü. Rü yemaacü nüxü inayarütaxu ga norü taãxë ga guxüma ga duüxügü. <sup>13</sup>Rü pemax, Pa Chacherdótegü i Tupanaarü Ámarearü Guchicaxümaxã Icuaxgüxex, rü name nixí i naxchiru i témüxügü

picuxgü, rü pexauxe erü yima  
 Tupanapatawa rü marü nataxuma i  
 trügu rü bínu i perü ãmareruxü ixixü.  
 14iRü naxçax pengema i duüxügü nax  
 aureácüma nayumüxëgüxüçax! iRü Cori  
 ya Tupanapatagu penangutaqexexë i  
 perü ãëxgacügü i yaxguãxgü, rü  
 guxüma i duüxügü i ñaa  
 nachixüanecüãxgü! iRü ngéma perü  
 yumüxëwa Tupanana peca nax pexü  
 nangüxëxüçax! 15Erü marü ningaica i  
 Tupanaarü poxcu. Rü ngéma ngunexü  
 rü poraãcü tá naxãücüma erü yimá  
 Guxãétüwa Ngëxmacü rü tá taxü i  
 poxcu taxçax ínguxëxë. 16Rü yema  
 munügü rü tapexewatama tüxna nanapu  
 ga tawemü rü yemaacü inarüxo ga  
 Tupanapatawa nax itaãxëgüxü. 17Rü  
 guma nanetüchire rü nayue ga yema  
 ínatogüxüwa, rü yema trügu rü  
 inayarüxo rü guma ípatagü ga nanetü  
 nagu gücune rü marü ningeäcu rü  
 nichixe.”

.....

**Nüma ya Cori ya Tupana rü nüxü  
 nangechaütümüxü i duüxügü**

**2** 11Rü nüma ya Cori ya Tupana rü  
 napexegu nixü i ngéma munügü i  
 ñoma muxüchixü i churagarürüxü ixixü.  
 Rü nüma ya Tupana rü tagaãcü nanamu  
 i ngéma munügü, rü nüma rü naga  
 naxínüe. Rü ngéma nax namuxüchixü rü  
 taxucürüwama texé tayaxugü. Rü  
 poraãcü naxãücüma i ñaa ngunexü i  
 nagu Tupana tüxü poxcuexü rü taxüema  
 tapora nax ítayachaxächixëxü.  
 12Natürü nüma ya Cori ya Tupana rü  
 ñanagürü: “iGuxüma i perü  
 ngüchaümaxã çauxçax pewoegu

ñomarüta pexü íchananguxëxë! iRü  
 çauxçax pexaureegü rü pegümaxã  
 pengechaxügü rü pexauxe!” ñanagürü.  
 13Rü ngëmacax i ñuxma rü name nixü i  
 naxçax pewoegu ya Cori ya Tupana.  
 Natürü tama nanaxwaxe i pegüchirugu  
 pegáugüe nax ngëmaãcü penewëxü i  
 perü ngechaü erü ngéma nüma  
 nanaxwaxëxü nixü nax penaxüchicüüxü  
 i perü maxü. Erü nüma ya Cori ya  
 Tupana rü namecüma rü nüxü  
 pengechaütümüxü, rü yaxna pemaxã  
 naxínü, erü pexü nangechaü. Rü nüma  
 rü ínamemare nax íyachaxächixëxü i  
 ngéma poxcu i pemaxã naxuegüxü. 14Rü  
 ngëxguma chi aixcüma naxçax  
 pewoeguxgux rü bexmana tá  
 ínayachaxächi nax pexü napoxcuexü, rü  
 tá pexü narüngüxëxë nax wena  
 naxügüxüçax i perü trügu rü úbagü nax  
 ngëmamaxã nüxü picuaxüügüxüçax.  
 15Rü pemax, Pa Chacherdótegüx irü  
 yima ma xpüne ya Tupanapata nawa  
 ngexmanewa peyacue ya perü cornéta  
 rü naxçax peca i duüxügü! iRü  
 penaxunagü nax aureácüma  
 nayumüxëgüxüçax! 16iRü  
 penangutaqexexë i ngéma  
 Tupanaarü duüxügü, Pa  
 Chacherdótegüx, nax Tupanapexewa  
 peyamexëgüxüçax i yaxügü, rü buxügü  
 rü woo i ngéma buxügü i maixü! iRü  
 ngëxgumarüxü ta i ngéma ngexwacax  
 ingügüxü, rü norü ucapuwa  
 ípenachoxüxëxë! 17iRü pexauxe, Pa  
 Chacherdótegüx i Tupanaarü  
 Puracümaxã Icuaxgüxex, rü ãmarearü  
 guchicaxüpexewa ñapegü i perü  
 yumüxëwa: “Nüxü nangechaxü i ñaa  
 curü duüxügü, Pa Torü Corix ya

Tupanax! iRü taxú i cunangexrúxũ nax taxúema nüxũ cugüexũcax! iRü taxú i cunangexrúxũ nax togü i nachixũanecüãxgü namaxã icuáxũcax! iRü taxú i cunangexrúxũ i ngëma tama yaxögüxũ nax curü duüxũgüxũ nacugüexũ ñaxũmaxã: ‘¿Ngexcü ya yimá perü Tupana?’ ñaxũmaxã!”<sup>18</sup>Rü ñuxũchi ga nüma ga Cori ya Tupana rü nüxũ nangechaütümüxũgü yerü poraãcü nüxũ nangechaũ.<sup>19</sup>Rü nüma rü ñanagürü nüxũ: “Rü tá pexna chanaxã i trígu rü bínu rü chíxũ ñuxmatáta mea pexũ yangu. Rü marü taxútáma wena pexũ changexrü nax pexũ nacugüexũcax i ngëma togü i nachixũanecüãxgü i tama choxũ cuãxgüxũ.<sup>20</sup>Rü tá pexna chayaxígachixëxë i ngëma munügü ga nörtewaama ne íxũ, rü tá ngextá ínachianexũwa chanamugü. Rü ngëma napexegu íxũ rü nataxa i ngearü maxũáxũwa tá chanawoũ. Rü ngëma wixweama ügüxũ rü már i Mediteráneuwa tá chanawoũ. Rü ngëxma tá niyixe rü tá ngëma nayixanegü. Rü ngëmaãcü tá poraãcü pexũ charüngũxëë”, ñanagürü ga Cori ya Tupana.<sup>21</sup>Rü ngëmacax, Pa Duüxũgü rü Guxũma i Taxacü i Ñoma i Naanewa Maxëxũx, irü petaãxëgü rü taxú i pemuüexũ! Erü nüma ya Cori ya Tupana rü taxũ i mexũgü tá pexcax naxü.<sup>22</sup>iRü taxú i pemuüexũ Pa Naexũgüx! Erü ngëma pebüchitaxũ rü tá wena narüxügü rü nabaca. Rü ngëma nanetügü i orıxgü rü tá nixo. Rü tá namuxũchi i iguéragü rü úbagü.<sup>23</sup>iRü petaãxëgü, Pa Yerucharéücüãxgüx! iRü namaxã petaãxëgü ya Cori ya Tupana! Yerü pexcax nanapuxëxë ga yexguma

meama nawa nanguxgu nax mucücax napuxëëãxũ rü taunecüçax napuxëëãxũ yema noxri mea napuxëëãxgürüxũ.<sup>24</sup>Rü ngëmaãcü tá mea pexũ nixo i trígu rü poraãcü tá nata ya perü bínu rü chíxũ.<sup>25</sup>Rü nüma ya Cori ya Tupana rü ñanagürü pexũ: “Choma rü tá pexũ chanatáeguxëxë ga yema penetügü ga ñuxre ga taunecü pexũ nax nangödxũ ga yema munügü ga yéma chamugüxũ.<sup>26</sup>Rü ñuxma rü tá meatáma pechibüe i pemax ñuxmatáta mea pengãxpütüwegü. Rü choxũ tá picuãxüxũgü naxcax ga yema taxũ ga mexũ ga pexcax chaxüxũ. Rü tagutáma wena texé pexũ taxãneexëxë Pa Chorü Duüxũgüx.<sup>27</sup>Rü pemax, Pa Iraétanüxũgüx, rü tá nüxũ picuãxãchitanü nax choma ya Cori rü aixcüma petanüwa changexmaxũ rü chaxicatama yixixũ i perü Tupana chixixũ. Rü tagutáma wena texé pexũ taxãneexëxë, Pa Chorü Duüxũgüx.

**Tupana rü ñoma i naanewa tá  
naanamü i Naãxë i Üünexũ**

<sup>28</sup>Rü ñaawena rü tá guxũma i duüxũgüçax núma chanamu i Chauãxë. Rü ngëma penegü rü pexacügü rü tá chorü orexũ nixugüe. Rü ngëma yaxũ i duüxũgü rü tá nixãnegügü. Rü ngëma ngextüxüxũgü rü tá nüxũ nadaugü i ëxũgüxũ i taguma texé nüxũ dauxũ.<sup>29</sup>Rü woo i perü puracütanüxũ rü pexütaxügü rü tá nüxna chananguxëxë i Chauãxë i Üünexũ i ngëma ngunexũgügu.<sup>30</sup>Rü daxüwa rü tá chanangoxëxë i taxacü i taguma texé nüxũ dauxũ. Rü ñoma i naanewa rü tá poraãcü nagü inaba, rü tá nixa ya

ĩanegü rü taxũ i caxixũ tá  
 naxĩnagüema. <sup>31</sup>Rü yima üaxcü rü tá  
 nixu rü yima tauemacü rü ñoma  
 nagürüxũ tá naduema naxũpa i ngẽma  
 ngunexũ i nagu tá ñanguxũ i chorü  
 poxcu i ñoma i naanewa. Rü ngẽma  
 ngunexũ rü tá poraãcü naxãücüma.”  
<sup>32</sup>Natürü guxãma ya texé ya aixcüma  
 chauga ññuxe rü taxütãma tapoxcue.

Erü yima ma xpúne ya Chióũ ya  
 Yerucharéũ nawa ngexmanewa tá  
 nangox ya yimá Maxẽxẽeruxũ yema  
 choma ya Cori ya Tupana pemaxã  
 ichaxunetaxürüxũ. Rü yíxema choma  
 tũxũ chidexechixe rü taxütãma  
 tapoxcue”, ñanagürü ya Cori ya  
 Tupana.  
 .....



# AMÓS

---

Tupana rü tá nanapoxcu i ngêma togü i nachixüanegü i Iraéanena ngaicamagüxü

**1** <sup>1</sup>Rü ñaa nixí ga yema ore ga guma carnérugüarü dauruxü ga Amú ga Tecóacüãxmaxã nüxü yaxuxü ga Tupana ga Iraéanecüãxgüchiga. Rü yema nangupetü taxre ga taunecü naxüpa ga yema ñãxãchiane ga yexguma Uchía Yudáanewa ãëxgacü ixíxgu, rü Yeruboáü ga Yoá nane ãëxgacü ixíxgu ga Iraéanewa. <sup>2</sup>Nüma ya Cori ya Tupana rü ngëxguma yima maxpúne ya Chióü ya Yerucharéü nawa ngexmanewa yadexaxgu, rü naga rü ñoma duruanexürüxü nixí. Rü ngëxguma ya yima maxë ya carnérugüchitaxüwa ngëxmacü rü nipagü rü yima maxë ya maxpúne ya Carméruwa ngëxmacü rü ta nipagü. <sup>3</sup>Rü Cori ya Tupana rü nüxü nixu rü ñanagürü: “Ngêma Damácucüãxgü rü poraãcü chixexü naxügü rü ngëmacax taxütáma íchayachaxãchi nax chapoxcuexü, yerü nüma rü nanadai ga chorü duüxügü ya Garaáxcüãxgü ñoma fiérumenaxãmaxã taxacü ipoxürüxü”, ñanagürü ya Cori ya Tupana.

.....

Iraéanecüãxgüarü poxcuchiga

**2** <sup>6</sup>Rü ñanagürü ya Cori ya Tupana: “Rü pema i Iraéanecüãxgü rü poraãcü chixexü pexügü. Rü tümamaxã petaxe ya yíxema taxuxüma i chixexü üchiréxe. Rü ngëxgumarüxü ta wüxi i chapatutanüxepüx tümamaxã petaxe ya yíxema ngearü diëruáxe. Rü ngëmacax taxütáma íchayachaxãchi nax pexü chapoxcuxü, Pa Iraéanecüãxgüx.

.....

<sup>10</sup>Rü choma nixí ga Equítuanewa pexü íchagaxüxü, rü 40 ga taunecü ínachianexügü pexü chigagü nax pexna chanaxãxüçax ga Amoréutanüxügüarü naane. <sup>11</sup>Rü pemax, Pa Iraéanecüãxgüx, rü taxuacüma ipeyacux nax petanüwa nüxü chaxunetaxü ga chorü orearü uruügü rü chaugüçax chanade ga ñuxre ga perü ngetüxüçügü nax Nacharéügü yixíxüçax rü tama bínu yaxaxgüaxüçax. Rü choma nixí i pemaxã nüxü chixexü i ngêma. <sup>12</sup>Natürü yema Nacharéügü rü pema penamu nax bínu yaxaxgüaxüçax. Rü yema chorü orearü uruügü rü nüxna penachüxu nax chorü orexü yaxugüexü. <sup>13</sup>Rü ngëmacax i chomax rü tá gúxü pexü chingegüxëxë rü ngëmamaxã tá pixãñetanüçüxü ñoma wüxi i caretíya i

trígumaxã ããcuxũ rü norü yamaxã  
ãgaxũrũxũ. <sup>14</sup>Rü woo yíxema ibuxmüxe  
rü taxuacüma ngëma poxcuchaxwa  
tibuxmü. Erü yíxema rüporamaechiréxe  
rü tá tangearü poraãx rü taxúetáma  
tügü ítapoxũ woo ya yíxema tama  
muüxe.”

.....

**Tupanaarü orearü uruüarü puracüchiga**

**3** <sup>1</sup>Pa Iraéanecüãxgüx rü Pa  
Yudáanecüãxgüx ga Cori ya  
Tupana Equítuanewa Ígaxũxũx, rü name  
nixĩ i guxãma i pemax rü iperüxĩnüe i  
ñaa ore i nüma pemaxã nüxũ yaxuxũ i  
ñaxũ: <sup>2</sup>“Dücax, rü natanüwa i guxũma i  
duüxũgü i ñoma i naanewa maxëxũ rü  
pexũxicatama nixĩ ga chaxunetaxũ nax  
chorü duüxũgü pixĩgüxũcax. Rü  
ngëmacax yexeraãcü tá pexna naxcax  
chaca i guxũma ga yema chixexũ ga  
pexügüxũ”, ñanagürü ya Tupana. <sup>3</sup>Rü  
ngëxguma taxre wüxigu íxgu rü  
ngëmawa nüxũ tacuax nax wüxigu  
naxĩnüexũ. Natürü i pema rü tama  
wüxigu chomaxã perüxĩnüe, rü  
ngëmacax taxucürüwa wüxigu taxĩ.

.....

**Nagu tá napogüe ya íane ya Chamária**

<sup>11</sup>Rü nüma ya Cori ya Tupana rü  
ñanagürü pexũ: “Wüxi i to i  
nachixũiane rü tá pemaxã narüxuanü.  
Rü norü churaragü rü tá pechixũanegu  
nachocu. Rü tá perü íanexũ  
ínachomaeguãchi. Rü ngëma perü  
poxũchica rü tá nagu napogüe rü yima  
ãëxgacüpatagü rü tá nanadeãcu”,  
ñanagürü.

.....

**Rü woo nax napoxcuechirëxũ i  
Iraéanecüãx rü tama inaxĩnüechaũ**

**4** <sup>7</sup>Rü nüma ya Cori ya Tupana rü  
ñanagürü: “Choma rü tomaepüx ga  
tauemacü naxüpa nax peyabuxgüxũ ga  
penetü rü pexchaxwa  
íchayachaxächixëxë ga pucü. Rü wüxi  
ga íanewa rü chanapuxëxë rü nái ya  
íanewa rü tama. Rü wüxi ga naanewa  
rü napu rü to ga naanewa rü nipamare  
yerü nataxuma ga dexá. <sup>8</sup>Rü duüxũgü  
rü íanëgügu nixĩgüetanü nax dexácax  
nadaugüxũ, natürü taxuxũma ga taxũ ga  
dexáxũ inyangaugü nax yemaacü nüxũ  
yanguxũcax nax yataxawaexũ. Natürü  
woo yema pexũ nax ngupetüxũ ga  
pemax rü tama chauxcax pewoegu. Rü  
choma i Cori ya Tupana nixĩ i nüxũ  
chixuxũ i ngëma. <sup>9</sup>Rü buanecü ga  
naiëmacü rü naweanegü pexcax  
íchanguxëxë rü yemaacü narüñëxgü ga  
penetügü rü perü úbanecü. Rü munügü  
nanangõx ga perü iguéranecü rü perü  
oríbunecü. Natürü ga pemax rü woo  
yema pexũ nax ngupetüxũ rü tama  
chauxcax pewoegu. Rü choma i Cori ya  
Tupana nixĩ i nüxũ chixuxũ i ngëma.  
<sup>10</sup>Rü pexcax íchanangugüxëxë ga  
naweane yexgumarüxũ ga Equítuanecax  
íchanguxëëgurüxũ. Rü chanayexrü ga  
perü ngextüxücügü nax perü uanügü  
daigu nadãixũcax. Rü pexũ chayexrü  
nax perü uanügü yagagixũcax ga perü  
cowarugü. Rü pexũ chanapaxëxë ga  
yema yuexüarü yixixũ ga yema pegü  
ípedãixüwa. Natürü ga pema rü tama  
chauxcax pewoegu. Rü choma i Cori ya  
Tupana nixĩ i nüxũ chixuxũ i ngëma.  
<sup>11</sup>Rü wüxi ga íxãxãchianemaxã

chanadai ga ñuxre ga petanüxügü yema Chodómawa rü Gomórawa duüxügüxü chadaixgurüxü. Rü pema rü wüxi ga üxü ga marü ixaxü rü íyaxuchixürüxü pixigü. Natürü ga pema rü tama chauxçax pewoegu. Rü choma i Cori ya Tupana nixi i nüxü chixuxü i ngëma. <sup>12</sup>Rü ngëmacax, Pa Iraéanecüãxgüx, rü ngëxgumarüxü tá pemaxã chanaxü. Rü ñuxma nax ngëmaäcü tá pexü chapoxcuexü, rü name nixi i pegü pemexëëgü nax ngëmaäcü perü Tupanaxü peyangauxüçax”, ñanagürü ya Cori ya Tupana. ....

**Tupana nüxna naxü nax naxçax  
nawoeguxüçax**

**5** <sup>12</sup>Rü nüma ya Cori ya Tupana rü ñanagürü: “Choma rü nüxü chacuax nax nataxü i perü chixexügü, Pa Æëxgacügüx. Rü ngëma perü pecádugü rü tama inayacuax. Rü ngëxguma duüxügü pepexewa norü guxchaxügü yamexëëgüchaügu, rü yixema aixcümaxü ixuxe rü tama tüxü ipexinüe natürü nüxü ipexinüe i ngëma diërumaxã pexü naxütanüxü nax naëtüwaama pechogüxüçax. Rü ngëmaäcü i pemax, Pa Æëxgacügüx, rü ngëxma tüxü ipeyanaxoxëxë i ngëma guxchaxü i pexütawa naxçax taxüxü nax tüxü penamexëëxüçax. ....

<sup>14</sup>Rü dücax, Pa Æëxgacügüx, rü name nixi i mexü pexü rü nüxü perüxoe i ngëma chixexü. Rü ngëxguma tá pexü nangexma i maxü. Rü ngëmaäcü tá aixcüma Tupanapexewa pime ngëma pegü pixugüxürüxü, rü choma ya Cori

ya Tupana ya guxãétüwa changexmaxü rü aixcüma petanüwa tá changexma”, ñanagürü ya Tupana. ....

<sup>20</sup>Rü ngëma ngunexü i Tupana nagu pexü poxcuexü rü wüxi i ngunexü i éanexü tá nixi i pexçax, rü marü taxütáma ngóonexüwa pengexmagü. Rü poraäcü tá pexçax nawaanexüchi rü bai i wüxi i taxacürü ngóonexü tá nangexma. <sup>21</sup>Rü Cori ya Tupana rü ñanagürü pexü: “Choma rü naxchi chaxai rü nüxü chaxo i ngëma taxü i peta i chauégagu pexügüxü, rü tama namaxã chataãxë i ngëma perü ngutaquexegü. <sup>22</sup>Rü tama chanaxwaxe i naxünagü chauxçax nax ípeguxü, rü woo i ngëma perü ãmare i trígu rü tama chanaxwaxe. Rü taxütáma chanayaxu i ngëma wocaxacügü i ngüexü i chauxçax nax pedaixü nax ngëmamaxã choxü perüngüxmüexëëxüçax. <sup>23</sup>iRü choxna pixigachi namaxã i ngëma perü wiyægü i namaxã choxü penaxocáümarexü! Tama nüxü chaxinügachaü i ngëma perü paxetaruxü i árpagü. <sup>24</sup>Natürü ngëma pexü chanaxwaxexü nixi nax guxüguma pemüçigümaxã pixaixcümaxü ñoma natü i nagoxüchixüechaxürüxü. Rü chanaxwaxe i ñoma dexá i chuchuxü i taguma gúxürüxü guxüguma mexü nax pexüxü. <sup>25-26</sup>Rü dücax, Pa Iraéanecüãxgüx, rü yexguma 40 ga taunecü ínachianexüwa peyexmagügu, rü tama chauxçaxicatama penadai ga naxünagü rü tama choxnaxicatama ãmare pexägü. Natürü peyangegüama ta ga yema perü tupananetachicünaxägü ga pematama pexüxü ga Chicú rü perü

woramacurichicünaxã ga Quiyú nax nûxû picuaxûüügüxûcax. Rû ñuxma rû ta rû ngémaacü penaxü. <sup>27</sup>Rû ngëmacax i choma rû ñane ya Damácuarü yáxûwa tá pexû chawogü. Rû choma ya Cori ya Tupana ya guxãétüwa ngëmacü nixi i ngëma ñachaxû. Rû ngëma nixi i chauéga.”

**Chixexû naxcax ínangu i Iraéanecüãxgü**

**6** <sup>1</sup>Rû pegümaxã pengechaxûgü, Pa Yerucharéücüãx! Rû pema rû perü diêruna perüyoõ rû petaãxëgü erü nagu perüxînüe rû taxuxûtáma pexû nangupetü. Rû ngëxgumarüxû ta ipegümaxã pengechaxûgü i pema i Chamáriaarü ñanena rüyoõxe! Pema rû nagu perüxînüe nax naporaxû ya yima ñane rû ngëmacax taxuxûtáma pexû nangupetü. Rû duïxûgü rû ngëma ñanearü ãëxgacügücax naxi erü nagu narüxînü rû tá ínanapoxûgü.

.....

<sup>4</sup>Pema rû pepatagü ya mexechinewa pepetae rû perü toruxû i mexechixûgu pecagü rû ngëxma perüngügü. Rû ngëma penangõx i õna i mexechixû i carnéruxacümachi rû wocaxacü i ngüexûmachi. <sup>5</sup>Rû perü árpagümaxã pepaxetagü natürü tama pexû naxuegu. Rû Dabíxû peyadauxû nax perü paxetarüügü ípexüxûxû. <sup>6</sup>Rû taxû i pexpáüwa peyaxaxgü ya bínu, rû pumára i yixichixûmaxã pegü peyixemagü. Natürü tama nagu perüxînüe i ngëma pechixûane nax chixexûgu nanguxû. <sup>7</sup>Rû pexíra tá nixi i to i nachixûanewa pexû nagagüxû i perü uanügü nax norü puracütanüxû pixígüxûcax. Rû ngëxma ta nayacuax

nax penaxüxû i taxû i perü õna i nawa picuxcuxû.

.....

**Taxúetáma nawa tiña  
i Tupanaarü poxcu**

**9** <sup>1</sup>Rû nûxû chadau ga Cori ya Tupana. Rû nüma rû ngëma tupanenetachicünaxãarü ñmarearü guchicaxûxûtagu naxi, rû ñanagürü choxû: “íDaa tupanenetapataarü caxtagü rû nagu napogü nax yawaxgüxûcax rû ngémaacü duïxûgüétü nangutaïxûcax i naaxû rû ngëxma nayuexûcax! Rû ngëma maxëxû rû woo yabuxmügu rû tá chanamu i norü uanügü nax taramaxã nadaiaxûcax. Rû ngémaacü taxuxûtáma niña. <sup>2</sup>Rû woo waixümüarü áxmaxügu yacuxgügu rû ngëma tá íchanawoxûama. Rû woo maxpúnetapexegu naxígügu rû ngëma rû tá íchanaxígüxëxëama. <sup>3</sup>Rû woo maxpúnetapexe ya Carmérugu yanacuxgügu, rû choma rû tá ngëxma naxcax chayadauama. Rû ngëxguma mártamagu yanacuxgügu, rû choma rû tá chanamu i naexû i taxüchixû i düraxû i márcüãx nax ngëxma nagu nawagüxûcax”, ñanagürü ya Tupana.

.....

<sup>8</sup>Rû nüma ya Cori rû nûxû nadawentü i Iraéanecüãxarü ãëxgacügü i chixexûgu ímaxëxû rû ngëmacax ñanagürü: “Choma rû tá ñaa naanewa ichayanaxoxëxë i ngëma ãëxgacügü. Natürü taxûtáma ichayanaxoxëxëxüchi i ngëma Iraéanecüãxgü. Rû choma ya Cori ya Tupana nûxû chixu i ngëma.”

.....

**Tupana tá wena ínanadaxêxê i Iraéane  
nax noxrirüxü wena naporaxüçax**

<sup>11</sup>Rü Cori ya Tupana rü ñanagürü: “Pa Iraéanecüâxgüx, rü yema pechixüane ga yexguma âëxgacü ga Dabí namaxā icuaxgu, rü naporaxüchi, natürü i ñuxma rü ñoma wüxi ya ípata ya rüngutaxünerüxü nixí. Natürü tá nawa nangu i ngunexü nax wena íchanadaxêxêxü nax noxrirüxü wena naporaxüçax. <sup>12</sup>Rü ngêmaäcü, Pa Iraéanecüâxgüx, rü pexrü tá nixí i ngêma Edóüane i ñuxma íyaxüxü rü guxüma i ngêma nachixüanegü ga üpa chorü duüxügümexêwa chayexmagüxêxêxü. Rü choma ya Cori ya Tupana nixí i ngêma ñachaxü, rü choma rü tá chayanguxêxê i ngêma. <sup>13</sup>Rü ngêma ngunexügügu rü tá poraäcü nixo i perü trígu. Rü ngëxguma taxüta yagüegu nax penabuxuxü i perü trígu rü

ngêma perü naane rü marü táxarü name nax wena nagu petoexü. Rü ngëxguma taxüta yagüegu nax penabuxuxü i perü úbagü rü ngêma perü naane rü marü íname nax perü trígu nagu petoxü. Rü guxünema ya yima ma xpünegüwa rü ngüchitaeruxügüwa rü tá narüyaetüxü i perü úbagü ñoma dexárüxü. <sup>14</sup>Rü choma rü tá wena nachixüanecax chanawoeguxêxê i ngêma chorü duüxügü i Iraétanüxügü. Rü nümagü rü tá nayamexêxê ya yima norü íanegü ga nagu nüxü napogüene rü yimawa tá namaxê. Rü tá norü úbanecü naxügü rü ngêma úbatüxü i bínuwa tá naxaxegü. Rü nanetümaxā tá natoegü rü ngêmaarü o tá nangōxgü. <sup>15</sup>Rü norü naanewaxüchi tá chanangexmagüxêxê i ngêma Iraétanüxügü, rü tagutáma texé nawa ítanawoxü i ngêma norü naane i choma nüxna chaxāxü. Rü choma ya Cori ya Tupana nixí i nüxü chixuxü i ngêma.”

# ABDÍAS

## (Abdía)

**Tupana rü tá Edóüanecüãxũ naxãneexêxê**

<sup>1-2</sup>Rü yexguma taxacü ga êxũguxũ Abdíaxũ nadauxêëgu ga Tupana rü namaxã nüxũ nixu nax taxacü tá nüxũ ngupetüxũ ga yema Edóüane. Rü nüma ga Abdía rü duũxũgümaxã nüxũ nixu rü ñanagürü: “Rü marü nüxũ taxĩnue ga Tupanaarü ore yerü guxũ ga nachixüanewa nanamu ga norü oreatü uruxũ nax namaxã nüxũ yaxuxüçax rü ñanagürü: ‘IËcü ipexĩächi nax Edóüanecüãxmaxã pegü pedajüxüçax!’ ñanagürü. Rü nüma ya Tupana rü Edóüanecüãxũ ñanagürü: ‘Tá pexũ chaxãneexêxê napexewa i ngêma togü i nachixüanegü rü tá pexũ charüña. <sup>3</sup>Rü Pemax, Pa Edóüanecüãx, rü pegütama pewomüxêxê erü perü poramaxã pegü picuaxüxũ. Pema rü ínanutaanexüwa pengexmagü i maxpüneanewa. Rü ngêmacax nagu perüxĩnue rü taxúetáma pexũ tarüporamae. <sup>4</sup>Natürü woo ñoma ñyürüxũ daxüwaxüchi pengexmagügu rü maxpünetapexegu pexächüügu ñoma ñyürüxũ, rü ngêma tá pexũ charüyixêxê.

.....

**Nagagutama chixexügu nayi ga Edóüanecüãxgü**

<sup>10</sup>Rü pemax, Pa Edóüanecüãxgüx, rü tá poracü pexãnee erü tá pexũ ichayarüxoxêxê. Yerü chixri namaxã pechopetü ga petanüxũ ga Iraétanüxüügü rü penadai. <sup>11</sup>Rü yexguma norü uanügü ga churragü Yerucharéüarü poxeguxüarü ñaxgu pogüegu, rü nachocuxgu nax nadeaxüçax ga norü yemaxüügü, rü pema rü yéma nüxũ perüdaunümare, rü tama naétüwa pechogüe. Rü yexguma norü uwanügü nügümaxã natoyeägu ga yema nadexũ rü pema rü natanüxũ pixüügü.

.....

<sup>15</sup>Rü yema chixexü ga petanüxũ ga Iraétanüxüügümaxã pexüxũ rü ngêmaächü tátama pemaxã nangupetü. Erü ngêma nixĩ i perü natanü naxçax ga yema pexüxũ.’ Rü Cori ya Tupana rü ñanagürü: ‘Marü ningaica i ngêma ngunexü i choma tá nagu chapoxcuxü i guxüma i nachixüanegü.

.....

<sup>17</sup>Natürü Chióüarü maxpüne ya chopata nawa yexmane rü wüxi i

nachica i üünexĩ nixĩ. Rũ ngẽma tá naxĩ      rü wena táxarü nanayauxgü i norü  
i duũxũgü nax ngẽma ãücũmaxũwa      naanegü', ñanagürü ya Cori ya Tupana.”  
yabuxmũxũcax. Rũ ngẽma Iraétanũxũgü      .....

# JONÁS

## (Yoná)

### Tupanachaxwa nixú ga Yoná

**1** <sup>1</sup>Rü nüma ga Cori ya Tupana rü Amitái nane ga Yonámaxā nidexa rü ñanagürü: <sup>2</sup>—iĒcū inaxūāchi rü nawa naxū ya yima ñane ya taxūne ya Nínibe rü norü duūxūgūmaxā nüxū ixu rü tá chanapoxcue! Erü chauxūtawa nanguchiga nax poraācū chixexū naxūgūxū —ñanagürü. <sup>3</sup>Natürü nüma ga Yoná rü tama Tupanaga naxīnū, rü naxçax nadau nax ñuxācū naxçaxwa yaxūxū. Rü yemaçax Yópearü türewa naxū, rü yexma nüxū inayangau ga wüxi ga wapuru ga ixūāchichaxūne ga Tárchiawa ūxūne. Rü gumawa nanaxütanü nax yexma yaxūxūçax. <sup>4</sup>Natürü nüma ga Cori ya Tupana rü wüxi ga buanecü ga tacü inanaxūxēxē ga yexguma már-arü ngāxūtüwa nanguxgu. Rü guma wapuru rü ñoma yapuxchaūxūrūxū nixī, yerü nataxūchi ga yuape. <sup>5</sup>Rü yema norü duūxūgū ga guma wapuru rü poraācū namuūe, rü yemaçax wüxichigü norü tupananetaarü ngūxēçax ínaca. Rü yema nax iyanguāchixūçax ga guma wapuru rü ínanawoxū ga guxūma ga yema naācu.

Natürü nüma ga Yoná rü guma wapuruarü aixepegu naxūcu rü yéma nayape. <sup>6</sup>Rü nüma ga wapuruarü capitáñ rü yéma Yoná ípexūwa naxū rü ñanagürü nüxū: —¿Taxacü ngéma cuxü Pa Pexwaxexūx? Írūda rü curü Tupanana naca! Rü bexmana nüxū ingechaütümüxūgü nax tama iyuexūçax —ñanagürü. <sup>7</sup>Rü yoxni ga yema norü duūxūgū ga guma wapuru rü nügūmaxā ñanagürügü: —Ngīxā tanañanagü i wüxi i diēru nax ngémaācū nüxū icuāxūçax nax texégagu yixīxū nax guxchaxū tüxū ngupetüxū —ñanagürügü. Rü nanañanagügü rü Yonágu nangu nax nagagu yixīxū ga yema nüxū ngupetüxū. <sup>8</sup>Rü nümagü rü nüxna nacagüe rü ñanagürügü nüxū: —iTomaxā nüxū ixu rü taxacüçax nixī i taxçax ínanguxū i ñaa guxchaxū! ¿Rü taxacü nixī i curü puracü i naxçax nua cuxūxū? ¿Rü ngextácūx quixī? ¿Rü taxacü nixī i cuchixūane? ¿Rü taxacürü duūxū quixī? —ñanagürügü. <sup>9</sup>Rü nüma ga Yoná rü nanangāxū rü ñanagürü: —Choma rü Iraétanūxū chixī. Rü Cori ya Tupana i daxūguxū i naanearü üruxū rü már-arü üruxū rü ñoma i naanearü ürūāxū nixī



i chayaxōxũ rü nüxũ chicuaxũüxũ  
 —ñanagürü. <sup>10</sup>Rü ñuxũchi nüma ga  
 Yoná rü meama guma wapuruarü  
 duũxũgũmaxã nüxũ nixu nax Cori ya  
 Tupanachaxwa nax yaxũxũ. Rü  
 yexguma yemaxũ naxĩnüegu ga  
 nümagü, rü nüxũ nadaugü ga yema már  
 ga nax yexeraãcü nayuapexũ, rü  
 poraãcü namuũe. Rü nüxna nacagüe rü  
 ñanagürügü: <sup>11</sup>—¿Tũxcũü ngẽmaãcü  
 cunaxü? ¿Rü taxacü tá cumaxã taxüexũ  
 i ñuxmax nax íyachaxãchixũcax ya yima  
 yuape? —ñanagürügü. <sup>12</sup>Rü nüma ga  
 Yoná rü nanangãxũ rü ñanagürü: —iËcü  
 choxũ ípetãe nachĩüwa i ñaa már! Rü  
 ngëxguma rü tá ínayachaxãchi ya  
 yuape. Rü choma rü nüxũ chacuax nax  
 chaugagu yixĩxũ ya daa buanecü ya tacü  
 i nuxã pexũ naxũxũ —ñanagürü. <sup>13</sup>Rü  
 nümagü ga yema wapuruarü duũxũgü  
 rü poraãcü inixãgü nax naxãnacüwa  
 nangugũxũcax, natürü tama yéma  
 nangugü yerü ga már rü yexeraãcü  
 poraãcü nayuape. <sup>14</sup>Rü yexguma ga  
 nümagü rü Cori ya Tupanana nacagüe  
 rü ñanagürügü: “Pa Cori Pa Tupanax  
 iTaxú i nuxã toxũ cuyuexẽexũ nagagu i  
 ñaa yatü! Rü ngëxguma chi taxuxũma i  
 chixexũ naxũxgux rü itaxú i  
 cuyatoguãchixẽexũ nax nayuxũ! Erü  
 cumax, Pa Corix, Pa Tupanax, rü  
 cunaxü i taxacü i cuma  
 cunaxwaxexũãcũma”, ñanagürügü. <sup>15</sup>Rü  
 yema ñagüguwena rü márwa Yonáxũ  
 natãegü, rü ínayachaxãchi ga yuape.  
<sup>16</sup>Rü yexguma yemaxũ nadaugüga ga  
 yema wapuruarü duũxũgü rü poraãcü  
 Cori ya Tupanaxũ nicuaxũxũgü rü  
 naxcax nayamaxgü ga wüxi ga naxũna  
 rü nayagugü. Rü Tupanamaxã

inaxunetagu nax naga tá naxĩnüexũ.

<sup>17</sup>Rü yoxni ga nüma ga Cori ya Tupana  
 rü yéma nanamu ga wüxi ga choxni ga  
 taxüchixũ nax Yonáxũ ínagaxũcax. Rü  
 nüma ga Yoná rü tomaepũx ga ngunexũ  
 rü tomaepũx ga chütaxũ yema  
 bayénaãnüwa nayexma.

#### Yonáarü yumüxëchiga

**2** <sup>1</sup>Rü nüma ga Yoná rü yéma choxni  
 ga taxüchixũãnüwa Cori ya  
 Tupanamaxã nidexa rü ñanagürü: <sup>2</sup>“Pa  
 Corix, yexguma poraãcü ãücũmaxũwa  
 chayexmagu, rü cuxna chaca nax choxũ  
 curüngũxẽexũcax. Rü cuma rü choxũ  
 cungãxũ. Rü yexguma márwa  
 chayexmagu rü nagu charüxĩnũ rü marü  
 tá chayü. Natürü yéma cuxna chaca rü  
 choxũ cuxĩnũ. <sup>3</sup>Rü yéa már  
 ímatamaxũwa choxü cutãe, rü yema  
 dexáarü poraxũchixũxũgu changu. Rü  
 guma yuape ga taxüchicü ga  
 icunaxũxẽecü rü chauétügu  
 niñaxũchixü. <sup>4</sup>Rü nagu charüxĩnũ rü  
 marü cugüxütawa choxũ ícutaxüchi. Rü  
 nüxũ chacuaxgu rü tagutãma wena  
 nüxũ chadau ya cupata ya üinene. <sup>5</sup>Rü  
 dexáarü ngãxũwa chayexma rü chauétü  
 niñaxũchiüxüchi ga dexá. Rü yema norü  
 mureru rü chaueruwa nayaxũxgü. <sup>6</sup>Rü  
 yema mártamagu changu rü choma  
 nagu charüxĩnũgu rü marü taguchima  
 yéma íchanguxuchi. Natürü cumax, Pa  
 Cori Pa Chorü Tupanax, rü choxũ  
 ícuyaxuchi nawa ga yu. <sup>7</sup>Rü yexguma  
 nagu charüxĩnũgu ga marü nax  
 chingoxõchixũ nax chayuxũcax, rü  
 cuxna chacuaxãchi, Pa Cori Pa Tupanax,  
 rü cumaxã chidexa. Rü yema chorü  
 yumüxë rü yima cupata ya üinene ya

nawa cungexmanewa nangu. <sup>8-9</sup>Rü ngëma duïxügü i naxchicünaxägüxü icuaxüügüxü, rü tama cumaxã nixaixcümagü. Natürü i chomax rü tá moxë cuxna chaxã rü tá cuxçax chayagu i âmaregü. Rü tá chayanguxëxë ga yema cumaxã ichaxunetaxü. Rü cucicatama nixí, Pa Corix, Pa Tupanax, i nüxü cucuáxü nax choxü cumaxëëxü” ñanagürü. <sup>10</sup>Rü yexguma ga nüma ga Cori ya Tupana rü yema choxni ga taxüchixüxü nanaxóégaxëxë nax Yonáxü ínoxochixüçax márpechinügu.

**Nínibecüãxgü rü nüxü narüxoe ga nacümagü ga chixexü rü Tupanacax nadaugü**

**3** <sup>1</sup>Rü wenaxarü Yonámamaxã nidexa ga Cori ya Tupana rü ñanagürü nüxü: <sup>2</sup>—iËcü yima taxüne ya ñane ya Nínibewa naxü rü duïxügümaxã nüxü ixu i ngëma tá cumaxã nüxü chixuxü! —ñanagürü. <sup>3</sup>Rü nüma ga Yoná rü Tupanaga naxínü rü inaxüächi nax Nínibewa naxüçax. Rü guma Nínibearü ñane rü tomaepüx ga ngunexü ninge nax nagu yaxüägüchigüxü. <sup>4</sup>Rü nüma ga Yoná rü guma ñanegu naxücu rü guxüma ga yema ngunexü rü nagu nixüägüchigü, rü tagaäcü ñaxümaxã yexma nicaechigü: —Rü 40 i ngunexüwa nanguxgu rü Tupana tá nayanaxoxëxë ya daa ñane ya Nínibe —ñanagürü. <sup>5</sup>Rü yexguma yemaxü naxínüegu ga yema Nínibecüãx ga duïxügü ga iyaexü rü buxügü, rü Tupanaaxü nayaxögü. Rü nanaxunagügü nax Tupanacax naxaurexü rü nagu yacüxgüxü ga naxchirügü ga témüxü, yerü poraäcü

nügümaxã nangechaügü. <sup>6</sup>Rü yexguma Nínibearü äëxgacüxütawa nanguxgu ga yema dexa, rü nüma rü norü tochicaxüwa inachi rü ínacuxuchi ga norü äëxgacüchiru rü témüxü ga naxchirugu nicüx rü waixümüarü ätexexüwa narütomare. <sup>7</sup>Rü ñuxüchi nüma ga äëxgacü rü norü ngüxëëruügüxü namu nax naxunagügüaxüçax ga aurechiga. Rü ñanagürügü: “iTaxüetáma texé tachibü! iRü ngëxgumarüxü ta rü taxüetáma texé tanachibüexëxë rü tayaxaxegüxëxë i tümaarü wocagü rü carnérugü!”, ñanagürügü. <sup>8</sup>Rü yexgumarüxü ta nanaxunagü ga äëxgacüarü ore ga ñaxü: “iGuxãma i pemax, Pa Duïxügüx, rü témüxü i naxchirugu picüxgü rü ngëmaäcü ípenawëx nax pegümaxã pengechaügüxü! iRü aixcüma Tupanana pecagü rü namaxã nüxü pixu i perü chixexügü! iRü wüxichigü i pemax rü nüxü perüxoe i pecüma i chixexü rü ngëma nax pegü pedajüxü rü pemáetawaxegüxü! <sup>9</sup>Rü bexmana ngëxguma ya Tupana rü tá nüxü ingechaütümüxügü rü tá narüngüxmü nax tamaxã nanuxü, rü taxütáma tüxü nadai”, ñanagürügü. <sup>10</sup>Rü Tupana rü nüxü nadau ga yema Nínibecüãx ga duïxügü ügüxü nax ñuxäcü nüxü naxoxëxü ga nacüma ga chixexü. Rü yemaçax ga nüma ga Tupana rü ínayachaxächi ga yema poxçu ga noxri namaxã naxuegüxü.

**Nanu ga Yoná**

**4** <sup>1</sup>Rü tama Yonáxëwa name ga yema mexü ga Nínibecüãxmaxã naxüxü ga Tupana rü poraäcü nanu.

<sup>2</sup>Rü yemacax ñaãcü nayumüxê: “Dücax, Pa Cori Pa Tupanax, rü ngêma ñuxma Nínibewa ngupetüxü nixí ga yema nüxü chixuxü ga yexguma chauchixüanewatama chayexmagu. Rü yemacax nixí ga cuxchaxwa chixüxütáax nax Tárchiawa chaxüxüçax, yerü nüxü chacuax rü cuma rü wüxi ya Tupana ya mecümacü rü ngechaxüwaxecü quixí rü tama paxa cunu. Rü ngêma curü ngechaü rü nataxüchi, rü ngêmacax woo texêmaxã poxcu cuxueguxgu rü paxama nagu curüxünü, rü tama tüxü cupoxcu ega nüxü tarüxoegu i tümacüma i chixexü. <sup>3</sup>Rü ngêmacax Pa Cori Pa Tupanax, rü chanaxwaxe nax noxtacüma choxna cunayaxuxü i ñaa chorü maxü. Erü chauxcax narümemae nax chayuxü rü tama nax chamaxechaxü” ñanagürü. <sup>4</sup>Natürü nüma ga Cori ya Tupana rü nanangäxü rü ñanagürü: —¿Rü cuxü namexü nax ngêmaãcü cunuxü? —ñanagürü. <sup>5</sup>Rü nüma ga Yoná rü ínaxüxü nawa ga guma ñane rü üaxcü ne íxüxüwaama naxü rü yexma nanaxü ga norü düxenü ga naixatünaxçax. Rü yéma nüxü nadawenü rü tá taxacü nüxü ngupetü ga guma ñane. <sup>6</sup>Rü nüma ga Tupana rü naxçax yéma nanaxüxêxê ga wüxi ga nanetü ga áatüxü nax yemamaxã nagauxchipetaxüçax, rü tama nangechaüxüçax. Rü nüma ga Yoná rü poraãcü yemamaxã nataãxê.

<sup>7</sup>Natürü ga moxüãcü yangunegu rü Tupana yéma nanamu ga wüxi ga õxmi nax yema yawaemaxüãxüçax, rü narüñexe. <sup>8</sup>Rü yexguma üaxcü ngunagügu rü Tupana yéma nanamu ga wüxi ga buanecü ga naiemacü ga üaxcü ne íxüxüwaama ne bucü. Rü nüma ga üaxcü rü Yonáerugu nabaxi rü yemaacü poraãcü nüxü nanguxema rü namaxã nayuéga yerü poraãcü nanguxema. Rü yemacax ñanagürü: “Narümemae nixí nax noxtacüma chayuxü rü tama nax chamaxüxü” ñanagürü. <sup>9</sup>Natürü nüma ga Tupana rü nanangäxü rü ñanagürü: —¿Cuxçax rü namexü nax ngêmaãcü cunuxü nagagu nax nayumaxüxü i ngêma nanetü? —ñanagürü. Rü nüma ga Yoná rü Tupanaxü nangäxü rü ñanagürü: “Ngêmaácux, chauxcax name i ngêma, erü ngêma chorü numaxã chayuxchaü” ñanagürü. <sup>10</sup>Rü yexguma ga nüma ga Cori ya Tupana rü nanangäxü rü ñanagürü nüxü: —Cuma rü tama icunato ga yema nanetü rü tama cunayaxêxê. Rü wüxitama ga chütaxü rü nangox rü to ga chütaxü rü marü nayu. Natürü i cumax rü cuxü nangux nax nayuxü. <sup>11</sup>Rü dücax, choma rü yexeraãcü choxü nangux nax nayuxü i ngêma duüxügü i Nínibecüãxgü, erü yima ñanewa nangexmagü i 120,000 i buxügü i taxuxüma i chixexü ügüxü rü muxüma i naxümagü —ñanagürü.

# MIQUEAS

## (Miquéa)

Miquéa nüxü nixu nax Tupana tá napoxcuxü ga Chamáriacüãxgü

**1** <sup>1</sup>Rü yexguma Yudáanecüãxaruãxgacügü yixigügu ga Yotáü rü Acáa rü Echequía, rü yexguma nixí ga Cori ya Tupana ga Miquéa ga Morechécüãxü nawéãxü ga yema Chamáriacüãxgücax rü Yerucharéücüãxgücax tá ínguxü. <sup>2</sup>Rü ñuxüchi nüma ga Miquéa rü ñanagürü: —iPa Guxüma i ñaa Nachixüãnearü Ñanecüãxgüx, rü Pa Guxüma i Duüxügü i Ñaa Nachixüãnewa Ngëxmagüxüx, rü iperüxínüe i ñaa ore! Rü nüma ya Cori ya Tupana rü napata ya üünenewa pexü nixugüchiga.

.....

<sup>5</sup>¿Rü tÿxcüü pexü nixugü? Rü pexü nixugü erü nüma rü nüxü nacuax i ngëma chixexü i pexüxü rü tama naga nax pexínüexü i pemax, Pa Acóbutaagü i Iraétanüxügüx. Rü bexmana pema rü ñaperügügu: “¿Rü ngextá nixí i tama Tupanaga taxínüexü i toma i Iraétanüxügü?” ñaperügügu. Rü pemaxá nüxü chixu rü yima ñane ya Chamáriawatama nixí. Rü pema rü

bexmana ñaperügügu: “¿Rü ngextá nixí i tupananchicünaxägüxü ticuaxüügüxü?” ñaperügügu. Rü pemaxá nüxü chixu rü Yerucharéüwatama. <sup>6</sup>Rü ngëmacax i nüma ya Cori ya Tupana rü ñanagürü: “Yima ñane ya Chamária rü tá nagu chapogü rü naxtapüxgü i nügüétügu yixixüxica tá ngëma tadau. Rü ngëma nachica rü naanexü tá nananguxuchi rü úbagü nagu natogü. Rü yima nutagü ya namaxá ínapoxegune ya yima ñane, rü tá ngatexügu nawoonemare. Rü ngëmaacü tá nangox ya yima nutagü ya naxtapüxaru ügü. <sup>7</sup>Rü guxüma i ngëma norü tupanachicünaxägü rü tá nipue rü tá ínagu i ngëma norü naigü i namaxá natupanaãxgüxü. Rü ngëma diëru i ngëma Iraétanüxügü norü tupanachicünaxägüxü namaxá icuaxüügüxü, rü norü uanügü rü nachixüãnewa tá nananagü nax ngëma norü tupanachicünaxägüxü namaxá yacuaxüügüxü”, ñanagürü ya Tupana.

**Miquéa rü norü ngechaümaxá naxaxu**

<sup>8</sup>Rü ngëmacax taxü i chorü ngechaümaxá tá chaxaxu, rü ngearü

chapatuáxê rü ngexchiruxe tá chixü, rü airu i dauxchitacüãxrixü tá chaxaxu rü weri i abetrúxacürüxü aita tá chaxü.

<sup>9</sup>Erü ngëma Chamáriacüãxgüarü guxchaxü rü nataxüchi rü taxúema tanamexêxê. Rü yima ñane rü tagutáma wena noxrirüxü nixí. Rü ngëma norü guxchaxü rü Yudáanewa nangu rü ñuxmata nawa nangu ya yima ñane ya Yerucharéü i chautanüxügü nagu áchiüine.

.....

**Ore i ãëxgacügü i chixri duüxügümaxá icuaxgüxüchiga**

**2** <sup>6</sup>Rü pemax, Pa ãëxgacügü i Chixri Chorü Duüxügümaxá Icuaxgüxüx, rü ñaperügügü: “Tama torü me nixí i tomaxá nua nüxü cuyarüxu i ngëma ore i chixexü. Erü ngëma guxchaxü i nüxü quixuxü rü tagutáma towa nangu.

<sup>7</sup>¿Ëxna toma i Iraétanüxü nax tixígüxü rü Tupana rü chixexü tomaxá naxuegu? ¿Ëxna ya Tupana rü marü nüxü narüxo nax yaxna tomaxá naxínüxü? ¿Rü ngëmaacü ëxna yixixü i nacüma ya Tupana? ¿Tama ëxna i tüxü nangüxêëxü i ngëma Tupanaarü ore ya yíxema aixcüma mea nagu maxêxe?”

ñaperügügü. <sup>8</sup>Natürü ga Tupana rü ñanagürü pexü: “Pemax, Pa ãëxgacügüx, rü namaxá perüxuanü i ngëma chorü duüxügü rü chixexü namaxá pexü. Rü yíxema churaragü i daiwa ne ìxe rü tataãxêgü erü nagu tarüxínüe rü tümapatawa rü marü taxuxütáma taxacürü guxchaxü tüxü nangupetü. Natürü ngëxguma ítangügügu rü pemax rü tüxna penapu i ngëma tümachiru i tatanüxü. <sup>9</sup>Rü

yíxema yutegüxe rü pema nax ãëxgacügü pixígüxü rü tüxna penapu ya yima tümapata ya nügümaxá tüxü wüxicane. Rü yíxema tümaxacügü rü ngëmaacü tüxü pengepatagüechaxêxê erü tüxna penapu i ngëma chorü ngüxêê i tüxna chaxáxü. <sup>10</sup>iRü êcü ipechigü rü ípechoxü i nua! Erü ñaa ñane rü taxütáma nawa pengexmagü. Erü ngëma chixexü i nua pexüxü rü nataxüchi, rü ngëmacax i guxüma i ñaa ñane rü nachixe. <sup>11</sup>Rü ngëxguma chi ínanguxgu i wüxi i orearü uruünetá i doraxümare ixuxü, rü ñaxgu: ‘Rü ñuxma rü choma rü chanaxunagü rü marü name i peyaxaxüxü i bínu rü tooma i axchiügü’ ñaxgu, rü pexçax rü ngëma nixí i wüxi i mexüma i orearü uruxü íxixü”, ñanagürü ya Tupana.

.....

**Chixexü i ãëxgacügüchiga**

**3** <sup>1</sup>iRü iperüxínüe, Pa Iraétanüxügüarü ãëxgacügüx! ¿Rü tama ëxna pexna naxüxü nax nüxü pecuáxü i taxacü nixí i mexü rü taxacü nixí i chixexü? <sup>2-3</sup>Natürü i pemax rü naxchi pexai i ngëma mexü rü perü me nixí i ngëma chixexü. Rü pema rü ñoma woca imáxürüxü pixígü namaxá i chorü duüxügü. Rü pema rü ñoma woca icauçxaxmüxürüüãcü namaxá ipecuax. Rü peyacuáixgü rü ñoma namachi i íxraxügu chexexü nax imuxraxürüxü namaxá pechopetü i ngëma chorü duüxügü. <sup>4</sup>Rü wüxi i ngunexü rü tá nüxna pecagü ya perü Cori ya Tupana natürü i nüma rü taxütáma pexü nangáxüga. Rü ngëxguma i nüma rü tá pexçaxwa inicux nagagu i ngëma

chixexũ i pexügüxũ. <sup>5</sup>Rü ngẽma chorü duũxũgü rü nacüma i chixexũgu naxĩ nagagu i ngẽma orearü uruũgüneta i doramaxã nangüexẽexũ. Rü yixema naxüwemüxe rü taãxẽ tümamaxã naxuegu. Natürü yixema tama naxüwemüxe rü dai tümamaxã naxuegu.

.....

<sup>11</sup>Rü daa ãanearü ãẽxgacügü i guxchaxũarü mexẽeruxũ rü ngẽma nüxũ naxütanüxũgaxica naxĩnü. Rü ngẽma chacherdótegü rü ngẽxguma nüxũ tanaxütanüguxicatama tüxũ nangüexẽexẽ. Rü ngẽma orearü uruũgü rü ngẽxguma nüxũ naxãtanügu rü taãxeruxũ i orexũ nixu. Natürü guxũma i nümagü rü ñanagürügüneta: “Rü Cori ya Tupana rü nataxütägu rü taxuxütäma i chixexũ tüxũ nangupetü”, ñanagürügüneta. <sup>12</sup>Rü ngẽmacax, Pa ãẽxgacügüx, rü pegagu tá nixĩ nax ïchicüxũ yanguxuchixũ rü nachipexica ngẽma inuãgüxũ ya yima ãane ya Yerucharẽü ya m̃axpüne ya Chióüwa ngexmane. Rü yima m̃axpüne ya Tupanapata nawa ngexmane rü wüxi i naane i ngẽxma rüxümarexürüxũ tá nixĩ.

**Tupana rü tá duũxũgüxũ  
inarüngüxmüexẽxẽ**

**4** <sup>1</sup>Rü yixcúra rü tá nawa nangu nax yima m̃axpüne ya Tupanapata nagu üxüne rü tá guxünema ya náigü ya m̃axpünegiarü yexera natachiga. Erü ngẽma Tupanapatawa tá naxĩ i guxũma i nachixüanecüãxgü i duũxũgü nax nüxũ yacuãxüügüxũcax. <sup>2</sup>Rü muxüchixütäma i duũxũgü tá ngẽma nangugü rü ñanagürügü tá: “iRü nua pexĩ rü ngĩã

daa m̃axpüne nax nawa ingugüxũcax ya yima Iraétanüxũgiarü Tupanapata nax nüma tüxũ nangüexẽexũcax i ngẽma mexũ i nacüma nax ngẽmagu ixixũcax!” ñanagürügü tá. Erü daa m̃axpüne ya Chióüwa tá nixĩ ya Cori ya Tupana i tüxũ nangüexẽexũ. Rü Yerucharẽüwa tá nixĩ i ne naxüxũ i norü ore. <sup>3</sup>Rü nüma ya Cori ya Tupana tá nixĩ i namexẽããxũ i nachixüanegiari guxchaxũgü rü woo i ngẽma nachixüanegü i yãxüwa ngẽxmagüxũarü guxchaxũgü. Rü ngẽma duũxũgü rü aiegümüaneruxũ tá nayaxigüxẽxẽ i norü taragü, rü yima norü wocaegü, rü tríguarü buxuruxũ tá nayaxigüxẽxẽ. Rü taxuxütäma to i nachixüane rü wena naxãxnegü nax togümaxã nügü nadãixũcax rü taxüetäma texé tanangüexẽxẽ i daixchiga. <sup>4</sup>Rü guxãtäma taxütäma müẽeãcü tamaxẽ. Rü wüxixechigü rü tá tümäärü úbapechitagu, rü tümäärü iguérapechitagu tarüngü. Rü ñaa ore rü noxrütäma nixĩ ya yimã Cori ya Tupana ya guxãétüwa ücü. <sup>5</sup>Rü ngẽma togü i nachixüanecüãx i duũxũgü rü woo noxrütäma tupanagünetaga naxĩüegu, natürü i yixema rü guxügutäma naga taxĩnüe ya yimã tóru Cori ya Tupana.

**Tupana tá ñanangüxũxẽxẽ i  
norü duũxũgü**

<sup>6</sup>Rü nüma ya Cori ya Tupana rü ñanagürü: “Yixcúra rü tá nachixüanecax chanawoegüxẽxẽ i ngẽma chorü duũxũgü i Iraétanüxũgü. Rü wüxiwa tá chanangexmagüxẽxẽ i ngẽma noxri to ga nachixüanegu woonexũ rü turaexũ rü ipaexũ. <sup>7</sup>Rü ngẽma woegüxũmaxã wüxigu namaxã i ngẽma Yerucharẽüwa

yaxügüxümaxã tá wena ichanachixêxê i wüxi i nachixüane i poraxü. Rü choma ya Tupana rü guxügütáma namaxã ichacuax i ngêma chorü duüxügü nawa ya yima maxpúne ya Chióú. <sup>8</sup>Rü cumax, Pa Yerucharéú i Iraétanüxügüarü Poxüchicaxü Ixíe i Maxpúne ya Chióúwa, rü wena táxarü guxü i Iraéanearü íanegüétüwa cungexma rü cuwa tá nixí i nangexmaxü i ñaa nachixüanearü ãëxgacüpata”, ñanagürü ya Tupana.

.....

**Tupana rü tá Iraétanüxügüxü  
naxüarü ãëxgacüãx**

**5** <sup>2</sup>Rü cumax, Pa Beréú i Efráta íxíex, rü woo wüxi ya ñane ya íxrane quixí natanüwa ya guxünema ya Yudáanecüãx ya íanegü, natürü cugu tá nixí i nabuxü ya yimá Iraéanecüãxgüarü ãëxgacü ya woetama marü ngëxmaechacü. <sup>3</sup>Rü ñuxma ya Cori ya Tupana rü norü duüxügüna nixügachi nax norü uanügü namaxã icuáxüçax ñuxmatáta naxíraxacü i ngêma nge i wüxi ya ngíne tá ngíxü ngëxmacü. Rü ngëxguma tá nixí i ngêma Iraétanüxügü i to i nachixüanegügu woonexü rü tá nachixüanecax nawoeguxü nax wüxiwa nangexmagüxüçax namaxã i natanüxügü ga nachixüanewatama yaxügüxü. <sup>4</sup>Rü nüma ya yimá Iraétanüxügüarü ãëxgacü ya ínguchaücü rü Cori ya Tupanaartü poramaxã rü norü üünemaxã tá ngêma norü duüxügümaxã inacuax. Rü ngêma norü duüxügü rü taxucaxtáma namuüe erü guxütáma i duüxügü i ñoma i naanewa ngëxmagüxü rü tá Cori ya Tupanaxü nicuaxüxügü. <sup>5</sup>Rü nüma ya yimá ãëxgacü rü tá nanangüxmüexêxê i duüxügü. Rü

ngëxguma ngêma Achíriaanecüãxgü tachixüanegu chocuxgu rü ãëxgacüpatagügu chocuxgu rü yimá ãëxgacü rü naxütawa tá nanamugü i 7 i duüxügüarü dauruügü rü 8 i ãëxgacügü nax nüxü naporamaegüxüçax. <sup>6</sup>Rü nümagü rü norü taramaxã tá nixí i Nimróchixüane i Achíriamaxã inacuaxgüxü. Rü tá tüxü ínangüxüxêxê naxmexwa i ngêma Achíriacüãxgü i tóru naanegu chocuxü rü tüxna yapugüxü.

.....

**Ngêma Cori ya Tupana  
duüxügüaxü naxwaxexü**

**6** <sup>6</sup>¿Rü taxacümaxã tá nüxü chayarücuaxüxü ya yimá Cori ya Tupana ya daxücüãx? ¿Éxna wocaxacü i wüxi i taunecü nüxü ngëxmaxü tá naxçax chiguxü nax ngëmamaxã nüxü chicuaxüüxüçax?

.....

<sup>8</sup>Rü nüma ya Cori ya Tupana rü marü cumaxã nüxü nixu, Pa Duüxüx, i taxacü nixí i napexewa mexü rü taxacü nixí i ngêma cuxü nanaxwaxexü. Rü ngêma cuxü nanaxwaxexü nixí nax mexü cuxüxü rü quixaixcümáxü rü tama cügü quicuaxüxüãcüma naga cuxínüxü ya curü Tupana.

.....

**Iraétanüxüarü ãëxgacügü rü chixri norü  
duüxügümaxã inacuax**

**7** <sup>2</sup>Rü ñoma i naanewa rü marü nataxuma i duüxü i mexügu rüxínüxü rü Tupanamaxã íxaixcümáxü. Rü ngëxguma guxchaxü ngëxmagu, rü guxüma rü ínamemare nax nügü nadaixü. Rü wüxichigü rü naxçax nadau nax

ñuxãcü guxchaxũ toguęçax naxiuxũ. <sup>3</sup>Rü nümagü rü nüxũ nicuaxüchi nax naxügüãxũ i guxchaxũgü. Rü ngẽma ãęxgacügü rü naxçax ínacagü nax nüxũ naxütanügüaxũ. Rü ãęxgacügü i guxchaxũarü mexẽeruxũ rü ngẽma nüxũ naxütanüxũétüwaama naxü. Rü ngẽma ãęxgacügü i nachixũanemaxã icuaxgüxũ rü tümamaxã inacuaxgü ya norü duęxęgü i ngẽma nüma nanaxwaxexũãcüma, rü ngẽmaãcü nanachixexẽxẽ ya norü ñane.  
.....

<sup>6</sup>Rü ngẽma nanegü rü tauxütáma nanatüga naxínüe, rü ngẽma ingexũ i naxacügü rü naémaxã tá nanue. Rü ngẽma naneaxgü rü naxęgüchi tá naxai. Rü ngẽma túmaarü uanü ixıgüxũ rü tümatanüxütama nixıgü.

**Tupana rü tüxũ narüngüxẽxẽ**

<sup>7</sup>Natürü i chomax rü Cori ya Tupanaarü ngüxẽçax tá chadau. Rü

tá nagu chayaxõ ya yimá Tupana ya chorü poxũruxũ ixıcü, erü nüma rü tá choxũ naxínü. <sup>8</sup>Pa Torü Uanügüx itaxú i petaãxęgüxũ nax guxchaxũ toxũ ngupetüxũ! Erü woo itayayixgu rü wena táxaru ítarüdagüama. Rü woo ãanexüwa tangexmagügu i ñuxmax, rü nümatama ya Cori ya Tupana rü torü omü nixı. <sup>9</sup>Rü aixcüma chixexũ taxü Cori ya Tupanapęxewa, rü ngẽmacax ñuxma nax toxũ napoxcuxũ rü tá yaxna namaxã taxínüe. Rü nüma rü tá toxũ ínapoxũ nüxna i guxũma i torü uanügü, rü tá nanapoxcue naxçax i ngẽma chixexũ i tomaxã naxügüxũ. Rü nüma ya Tupana rü tá ãanexüwa toxũ ínanguxũxẽxẽ rü ngóonexüwa tá toxũ nagagü. Rü tá toxũ nanawęx nax ñuxãcü torü uanügüxũ naporamaexũ —ñanagürü ga Miquéa.  
.....



# NAHÚM

## (Naú)

### Nanu ga Tupana

**1** <sup>1</sup>Rü ñaa nixí ga yema ore ga Naú ga ñane ga Ércucüâx Tupanaxûtawa nayaxuxû ga yexguma nüxû nüxû nacuxâêêgu. Rü yema ore rü ñane ga Nínibearü poxcuchiga nixí. <sup>2</sup>Rü nüma ya Cori ya Tupana rü poraâcü nüxû tachuxu ya yíxema nüxû ngechaüğüxe rü ngêmacax tüxû napoxcue ya yíxema tama naga ñnüxe. Rü ngêma norü uwanügümaxã rü nanu. <sup>3</sup>Rü nüma ya Cori ya Tupana rü woo nax naporaxû natürü yaxna duüxügümaxã naxíni. Natürü yíxema chixexû úxe rü tama nüxû narüngüma nax tüxû napoxcuxû. Rü nüma rü inanawex i norü pora nawa ya yima poracü ya buanecü. Rü ngêma caixanexügü rü ñoma nacutügüaru çajixâchitexexürüxû nixígü.

.....

<sup>6</sup>¿Rü texé tá yaxna namaxã taxíni ega tümamaxã nanuxgu ya Tupana? ¿Rü texé tá naétüwa tamaxama i ngêma norü nu? Erü ngêma norü nu rü üxüemaarü naiemaxürüxû nixí. Rü ngêxguma nanuxgu rü yima nutagü ya taxüchicü rü narüngúxtegü. <sup>7</sup>Rü nüma

ya Cori ya Tupana rü namecüma. Rü ngêxguma guxchaxû ínguxgu rü nüma nixí i tüxna nadauxû. Rü nüma rü tüxû ínapoxûxû ya guxâma ya yíxema nagu yaxöğüxe. <sup>8</sup>Natürü ya yíxema norü uanügü rü tá tüxû nadai ñoma dexá tümaétü iñaxüchiüxürüxû, rü éanexüwa tá tangexmagü. <sup>9</sup>¿Rü taxacürü chixexû nixí i Cori ya Tupanapexewa nagu perüxínüexü? Rü nüma rü noxtacüma tá pexû inayarüxoxêxê. Rü ngêxma tá nayacux nax namaxã perüxuanügüxû. ....

**2** <sup>1</sup>Pa Nínibecüâxgüx, rü ngêma pexû yadajxû rü marü pexçax inaxíâchi. iRü perü daxütaeruüchicawa rü penamugü i daxütaeruügü! iRü perü namagüwa rü pedauxütaegü! iRü pegüxünegu penaxú i ngêma perü tara! iRü penanútaquexe i perü churaragü nax perü uanügümaxã pegü pedajxüçax! <sup>2</sup>Yerü ga pemax rü penadeäcu ga Iraéane rü Yudáane rü ñoma úba ga ngechacüxürüüâcü yéma penawogü. Natürü nüma ya Cori ya Tupana rü tá wena ínanadagüxêxê nax noxrirüxü naporaexüçax ga yexguma noxri tauta penadeäcugurüxû. <sup>3</sup>Rü ngêma perü

uanügüarü poxüruxü rü nadátachinü,  
 rü nidáuxchiru i norü churaragü. Rü  
 ínamemare nax pexü nadaixü rü yima  
 naweügü rü ñoma üxüarü  
 yauxraemarüxü nixigü, rü ngēma norü  
 cowa rugü rü nanaxixächixētānū.

.....

<sup>5</sup>Rü nūma ya perü āēxgacü rü norü  
 churaragüeruçax naca rü nūma i ngēma  
 norü churaragüeru rü ñuxāēācū  
 inaxüāchi. Rü nügūmaxā narixü nax  
 naxtapūxna nax yadaugüxūçax. <sup>6</sup>Natürü

yema norü uanügüçax rü marü  
 natauxcha nax nachocuxü erü ngēma  
 naxtapūxarü iāx i natüwaama üxü rü  
 niwāxna, rü marü taxucürüwama  
 ítayachaxächixēxē i ngēma dexá, rü  
 ngēmacax ya yima āēxgacüpata rü  
 niwax. <sup>7</sup>Rü ngēma āēxgacü naxmax rü  
 to i nachixüanewa ngixü nagagü  
 namaxā i ngixütaxügü. Rü ñoma  
 muxtucurüxü iyaxaxunetanügü rü ngīgü  
 napaxremügüācūma ixauxe.

.....

# HABACUC

## (Abacú)

**Abacú rü naxçax nidexa  
nax chixexü ngupetüxü**

**1** <sup>1</sup>Ñaa nixí ga yema ore ga Cori ya Tupana rü orearü uruxü ga Abacúxü nawéxü. <sup>2</sup>Rü nüma ga Abacú rü ñanagürü: —Pa Corix çñuxguxüratáta nixí i choxü cuxínüxü nax yexüçürü tagaäcü cuxna chacaechaxü nax toxü curüngüxëxüçax natürü i cuma rü tama choxü cuxínü? çRü ñuxguxüratáta i tagaäcü cumaxã nüxü chixuechaxü naxçax nax yanaxoxüçax i ngëma dai i totanüwa ngëxmaxü natürü i cuma rü tama nua cuxü nax nawa toxü ícunguxüxëxüçax? <sup>3</sup>çRü tüxcüü choxü nüxü cudauxëxë i ñaa taxü i guxchaxü rü chixexü i guxüwama ngëxmaxü? Rü choxü ínachomaegu i duüxügü i chixexü ügüxü rü máetagüxü. Rü guxüwama i duüxügü rü nügümaxã nanue rü nügü nadai. <sup>4</sup>Rü duüxügü rü tama aixcüma nagu namaxë i ngëma tochixüanearü mugü. Rü ngëma mugü i duüxügüétüwa idexaxü rü tama naga naxínüe. Rü ngëma duüxügü i chixri maxëxü rü tüxü napoxcu ya yíxema mexü ügüxe. Rü

ngëmaäcü ínatatóxëëgü i ngëma aixcüma wëxguxü —ñanagürü.

**Cori ya Tupanaarü ngäxüga**

<sup>5</sup>Rü nüma ga Cori ya Tupana rü Abacúxü nangäxü rü ñanagürü: —iDüçax, nüxü pedau i ngëma nachixüanegü i pexü íchomaeguächixü nax taxacü nüxü ngupetüxü! iRü nüxü pedau rü pebäixächie! Erü ngëma tá chaxüxü rü pema rü taxüchima peyaxögü woo ega texé pemaxã nüxü ixuxgu. <sup>6</sup>Rü choma rü tá ichanachigüxëxë i ngëma Cadéuanecüäxgü (i Babiróniaanecüäx) nax guxüwama dai naxügüxüçax. Rü nümagü rü duüxügü i tama togü i duüxügüxü ngechaügüxü nixígü, rü ínamemaregü nax nayauxanegüaxüçax i ngëma naanegü i tama noxrü ixixü —ñanagürü ga Tupana.

.....

**Abacú rü wenaxarü**

**Tupanamaxã narüxutaga**

<sup>12</sup>—Düçax, Pa Corix, Pa Chorü Tupanax çtama çxna i cuma i guxüguma cungexmaechaxü? Erü cuma

rü üü necü rü taguma yucü quixĩ. Pa Corix, Pa Chorü Poxũruxũx, cuma nixĩ i pora nüxna cuxãxũ i ngẽma Cadéugü nax nawa cuyanguxẽxũçax i ngẽma curü poxcu i toxçax ixixũ. <sup>13</sup>Rü cumax, Pa Tupanax, nax aixcũma üü necü nax quixixũ rü tama yaxna namaxã cuxĩnũ i ngẽma chixexũ rü tama namaxã cutaãxẽ i ngẽma duũxũgü i chixexũ ügũxũ. ¿Rü ñuxũcürüwa i cunangexrũ rü taxu ñacurügũmare i ñuxma nax toxũ nadajũxũ i ngẽma Cadéuanecũãxgü i tori yexera chixexũ ügũxũ? —ñanagürü ga Abacú.

.....

**Ore ga Cori ya Tupana  
Abacúxũ nüxũ çaxẽxũ**

**2** <sup>1</sup>Rü nüma ga Abacú rü ñanagürü: —Choma rü ñoma wüxi i dauxũtaexũrũxũ tá ichaxuãxẽ, rü tá ichadawenũ nax ngẽmaãcü nüxũ chacuãxũçax rü taxacũmaxã choxũ nangãxũ ya Tupana naxçax i ngẽma nax namaxã charũxutagaxũ —ñanagürü. <sup>2</sup>Rü nüma ga Cori ya Tupana rü choxũ nangãxũ rü ñanagürü: —iWüxi i mürapewatachinügu naxümatü i ngẽma tá cuxũ chawéxũ nax ngẽmaãcü tauxchaãcü duũxũgü nüxũ daumatũxũçax! <sup>3</sup>Rü ñuxma rü taxũta nawa nangu nax yanguxũ ga yema cuxũ chawéxũ. Natürü taxũtãma nangupetũmare nax yanguxũ. iCumax rü mea ínanguxẽxẽ ega woo tama paxa yanguxgu! Erü aixcũma tá ningu i ngẽxguma norü ngunexũwa nanguxgux. <sup>4</sup>iRü naxümatü i ñaa ore! “Ngẽma duũxũgü i chixexũ ügũxũ rü nügu nicuãxũxũgü. Natürü yíxema

chopexewa imexe rü tá tamaxẽ erü chomaxã tixaixcũmagü” —ñanagürü ga Tupana.

.....

**Ngẽma Cadéucũãxgũmaxã tá ngupetũxũ**

<sup>8</sup>Düçax, Pa Cadéucũãxgü, pema rü muxũma ga nachixũanegũmaxã poraãcü chixexũ pexü, rü penadeãcu ga norü ñanegü. Natürü i ñuxmax rü ngẽma nachixũanegü rü tá pexçax nügu nanutaquexẽ rü tá nüxĩ perü ñanegü nadeãcugü yema pema penadeãcuxũrũxũ. Rü ngẽmaãcü tá nüxũ peyangutanũxẽxẽ ga yema máeta ga norü ñanegüwa pexũxũ.

.....

<sup>12</sup>Rü wüxi i taxũ i ãũcũmaxũwa pengexmagü, Pa Cadéucũãxgũx, yerü penadai ga duũxũgü rü penapuxũ ga norü yemaxũgü nax yemaacü perü ñanegü pexũgũxũçax. <sup>13</sup>Rü napexewa ya Cori ya Tupana ya guxãétüwa ngẽxmacü rü ngẽma perü puracü i nagu pipaexũ rü natũçaxmamare nixĩ. Erü guxũma i ngẽma pexũxũ rü üxüwa tá nayagu.

.....

<sup>20</sup>Natürü nüma ya Cori ya Tupana rü napata ya üünenewa nangexma. Rü guxãma i pema i ñoma i naanecũãx rü name nixĩ i napexewa pechianegũmare.

**Abacúarü yumüxẽ**

**3** <sup>1</sup>Rü ñaa nixĩ ga norü yumüxẽ ga orearü uruxũ ga Abacú: <sup>2</sup>“Pa Corix, Pa Tupanax, rü ngẽma nüxũ chaxĩnũxũ i cuchiga rü nachiga ga guxũma ga yema cuxũxũ rü poraãcü choxũ nagu narũxĩnũxẽxẽ nax ñuxãcü cuxüünexũ. iRü

torü maxüwa naxü i ngëma mexü ga yema üpa cuxüxü nax ngëmaäcü i toma rü ta nüxü tacuáxüçax! Rü woo tomaxã nax cunuxü natürü itoxü nawexama nax ñuxäcü cuxü tangechaütümüxügüxü! <sup>3</sup>Rü nüxü chadau ya Cori ya Tupana i Temáüanewa ne naxüxü nawa ya yima Paráüaru maxpüne. Rü daxügüxü i naane rü norü üünemaxã nanapá. Rü güxü i ñoma i naanewa rü nüxü nicuaxüxügü. <sup>4</sup>Rü iyaxracüemagu ngëma ne naxü. Rü naxmexwa ínaxüxü i omüema. Rü ngëmawa nangox i ngëma norü pora.

.....

<sup>13</sup>Rü cuma rü dauxüwa ícuxüxü nax curü duüxügüxü ícupoxüxüçax, rü nüxü nax curüngüxëxüçax ya yimá äëxgacü ya cumatama nüxü cuxunetacü. Rü cuma rü cuyamax i ngëma duüxü i chixexü üxü ñoma wüxi ya ípatagu ipogüxürüxü.

.....

<sup>16</sup>Rü yexguma nüxü chaxñügu ga yema äücümaxü ga cuxüxü rü chamüü,

rü poraäcü chiduxruchicüra. Rü taxucürüwa ichachi rü güxüma i chauxune rü inayaturaächi. Natürü woo ngëmaäcü nax yixüxü rü mea tá íchananguxëxë i ngëma ngunexü i Tupana tá nagu guxchaxü naxçax ínguxëxü i ngëma churaragü i chixexü tamaxã ügüxü. <sup>17-18</sup>Rü woo i ngëma iguéra rü yangechacugu, rü woo i ngëma úba rü ngëma oríbu rü nangeartü oõxgu, rü ngëma naanegü rü taxuxüma nawa rüxüxgu, rü woo nayuegu i ngëma carnérugü i nachitaüwa, rü marü nataxuxguma i ngëma wocagü i naxpüüwa, natürü i chomax rü Cori ya Tupana ya chorü maxëruümaxã tá chataäxë. <sup>19</sup>Erü nüma ya Cori ya Tupana rü pora choxna naxã, rü ñoma wüxi i cowü i poraxürüxü choxü naporaxëxë. Rü wüxi ya maxpüneétiwa tá choxü naga rü ngëma tá choxna nadau nax taxuxüma choxü naxüpetüxüçax.”

# SOFONÍAS

## (Chofonía)

**Tupana rü Yudáanecüãxgüxü tá napoxcu**

**1** <sup>1</sup>Rü ñaa nixí ga ore ga Cori ya Tupana Chofoníamaxã nüxü ixuxü ga yexguma Yochía ga Amóú nane ãëxgacü ixíxgu ga Yudáanewa. Rü nüma ga Chofonía rü Cúsi nane nixí, rü Cúsi rü Yedaría nane nixí, rü Yedaría rü Amaría nane nixí, rü Amaría rü Echequía nane nixí. <sup>2</sup>Rü ngëma norü ore i Cori ya Tupana rü ñanagürü: “Noxtacüma tá ichayanaxoxëxë i guxüma i taxacü i ñoma i naanewa ngëxmagüxü. <sup>3</sup>Rü tá ichayanaxoxëxë i duüxügü, rü naexügü, rü ngëxgumarüxü tá ta i werigü, rü choxnigü. Rü tá naxcax íchayagoöchi i ngëma chixexüarü üruügü, rü tá chanadai. Rü tá ichayanaxoxëxë i guxüma i duüxügü i ñoma i naanewa rü taxuxütáma ínayaxü.” Rü ngëma nixí i nüxü yaxuxü ya Cori ya Tupana. <sup>4</sup>Rü nüma ya Cori ya Tupana rü ñanagürü ta: “Yudáanecüãxétü tá poxcumaxã chawéxmex. Rü ngëxgumarüxü tá ta poxcumaxã naétü chawéxmex i guxüma i duüxügü i Yerucharéüwa maxëxü. Rü tá ichayanaxoxëxë i ngëma tupananeta i

Baáchicünaxã namaxã i norü tupaucagü rü norü chacherdótegü. Rü ngëmacü rü woo i naégagü i ngëma chacherdótegü rü taxúetáma nüxna tacuaxáchi. <sup>5</sup>Rü tá chanadai i ngëma duüxügü i norü íarü dauxnagu ígüxü nax nüxü yacuaxüügüxücax ya üaxcü rü tauemacü rü woramacurigü. Rü ngëxgumarüxü tá ta chanadai i ngëma chauégagu norü tupananeta i Mircóúxü icuaxüügüxü. <sup>6</sup>Rü ngëxgumarüxü tá ta ichayanaxoxëxë i ngëma duüxügü i choxna ixígachixü, rü tama chaüxcax daugüxü rü tama choxna cagüexü ega taxacü nanaxwaxegügu”, ñanagürü. <sup>7</sup>iRü Cori ya Tupanapexewa perüchiane! Erü ngëma norü ngunexü i äücümaxü i nagu tá tüxü napoxcuexü rü marü ningaica. Rü nüma rü ínanamexëxë nax nadaiaxücax i ngëma nüxna ixígachitanüxü. Rü nüma rü marü nüxna naxu i ngëma tá nadaixü. <sup>8</sup>Rü nüma ya Cori ya Tupana rü ñanagürü: “Ngëma ngunexü i nagu tá nadaiaxü i ngëma duüxügü rü tá chanapoxcue i ngëma Yudáanearü ãëxgacügü rü ngëma ãëxgacügü nanegü rü guxüma i ngëma chorü duüxügü i to i

nachixũanearü tupanaxetaxũ  
icuaxũügũxũ.

.....

<sup>12</sup>Rü ngẽma ngunexũgu rü omũmaxã  
guxũwama i Yerucharẽüwa tá mea  
naxçax chadau i ngẽma duũxũgü i  
chixexũ ügũxũ. Rü tá chanapoxcue i  
ngẽma duũxũgü i ñoma bínu ya  
ichaxchixũmarecürüxũ ixĩgũxũ. Rü  
nũmagü rü inarũchomare rü taxuxguma  
narũxĩnũe rü nũgũmaxãtama  
ñanagürügü: ‘Nũma ya Cori ya Tupana  
rü taxuxũtãma i mexũ rüexna chixexũ  
tamaxã naxũ’ ñanagürügü”, ñanagürü  
ya Tupana.

.....

**2** <sup>1</sup>iRü pengutaquexegũx, Pa  
Duũxũgü i Tama Æneexũ  
Cuaxgũxũx, rü Tupanaçax pedaugü!  
<sup>2</sup>iRü nüxũ perũxoe i ngẽma chixexũ i  
Tupanapexewa pexũgũxũ! iRü naga  
pexĩnũe ñoma rü ta nangema i ngunexũ  
naxũpa nax pexũ ñawogũxũ ñoma  
maxẽchapaxa buanecü ngexta  
cuexũrũxũ, rü naxũpa nax nawa  
nanguxũ i ngẽma ngunexũ i ãcũmaxũ i  
norü numaxã nagu pexũ napoxcuexũ!  
<sup>3</sup>Rü ngẽmacax name nixĩ i naxçax  
pedaugü, Pa Guxãma i Aixcũma  
Napexewa Mecũmagũxe rü Naga  
Ïnũexex. iRü mea napexewa pemaxẽ!  
Rü bexmana ngẽmaãcü nũma tá pexũ  
ñapoxũ i ngẽma ngunexũ i nagu poxcu  
ñguxgu.

.....

<sup>8-9</sup>Rü nũma ya Cori ya Iraetanũxũarü  
Tupana ya guxãetũwa ngẽxmacü rü  
ñanagürü: “Marü nüxũ chaxĩnax  
ñuxãcü ngẽma Moátanũxũgü rü  
Amóũtanũxũgü chorü duũxũgũchiga

chixri yadexagũxũ. Erü nũmagü rü  
chorü duũxũgũmaxã naguxchigagü rü  
tũmaarü naanegu nachocu. Rü  
ngẽmacax i choma rü chauégagutama  
nüxũ chixu rü tá chayanaxoxẽxẽ i  
ngẽma Moátanũxũgü rü Amóũtanũxũgü  
guma ñanegü ga Chodómarũxũ rü  
Gomórarũxũ. Rü ngẽma norü naane rü  
tá chuxchuxũnecü chayanguxuchixẽxẽ.  
Rü tá nayucũraane rü taxuxũtãma i  
taxacürü nanetü nawa narũxũ, rü  
guxũgutãma nachipetũanemare. Rü  
ngẽma chorü duũxũgü i to i  
nachixũanewa gagũxũwa ñyaxũgũxũ rü  
tá nanayauxgü i ngẽma Moátanũxũ rü  
Amóũtanũxũarü naanegü rü noxrü tá  
nixĩ.”

.....

**Ngẽma duũxũgü i Yerucharẽüwa  
yaxũgũxũ rü tá Tupanaaxũ nayaxögü**

**3** <sup>12</sup>Rü nũma ya Cori ya Tupana rü  
ñanagürü: “Pa Yerucharẽüx, cuwa  
tá chayaxũgũxẽxẽ i duũxũgü i  
mecũmaxũ i chauga ñnũexũ. Rü nũmagü  
rü tá chaugu nayaxögü. <sup>13</sup>Rü ngẽma  
Iraetanũxũgü i Yerucharẽüwa yaxũgũxũ  
rü taxũtãma chixri natanũxũgũmaxã  
inacuax, rü taxũtãma doraxũ nixugũe rü  
tagutãma texẽxũ nawomũxẽẽgü. Rü  
mea tá ñnachibũe, rü tama  
namũeãcũma tá inarũngũgü”,  
ñanagürü.

**Tupana rü tá nanataãxẽxẽxẽ i  
Yerucharẽücüãxgü**

<sup>14</sup>iRü pewiyaegü, Pa Duũxũgü i  
Chióũcüãx! iRü taãxẽãcü picagũxũ, Pa  
Iraeanecũãxgũ! iRü petaãxẽ, Pa  
Yerucharẽücüãxgũx, rü guxũnema ya

perü maxĩnemaxã petaãxẽgũ! <sup>15</sup>Eri  
 nüma ya Cori ya Tupana rü marü  
 ínayachaxãchi nawa i ngẽma poxcu i  
 pemaxã naxueguxũ rü marü ínanafoxũ  
 i ngẽma perü uanũgũ. Rü nüma ya Cori  
 ya Tupana ya perü ãẽxgacü rü  
 petanüwa nangexma, rü ngẽmacax  
 marü taxucaxma pemuũe. <sup>16</sup>Rü ngẽma  
 ngunexũgu rü duũxũgũ rü  
 Yerucharẽücüãxmaxã tá nüxũ nixu rü  
 ñanagürügü tá: “iPetaãxẽgũ, Pa  
 Chióücüãxgũx, rü taxú i muũmaxã  
 piduxruexũ! iRü taxú i pegü  
 peturaexẽxũ! <sup>17</sup>Eri nüma ya Cori ya  
 perü Tupana ixícü, rü petanüwa  
 nangexma, rü nüma rü poracü nixĩ, rü  
 pexũ tá namaxẽxẽ. Rü nüma ya Cori  
 ya Tupana rü tá pemaxã nataãxẽ. Rü

ngẽma pexũ nax nangechaũxũgagu rü  
 ngexwacaxũxũ i maxũ tá pexna naxã.  
 Rü ngẽma nax pemaxã nataãxẽxũ rü  
 norü taãxẽmaxã tá nawiyae”,  
 ñanagürügü tá.

.....

<sup>20</sup>Rü nüma ya Cori ya Tupana rü  
 ñanagürü pexũ: “Rü ngẽma  
 ngunexũgũgu rü pechixũanegu tá pexũ  
 chanutaquexexẽ. Rü ngẽma perü  
 naanewa rü tá pexũ charũngũxẽe nax  
 wena mea pexũ nangupetũxũcax. Rü  
 ngẽmaãcü tá petachiga napexewa i  
 guxũma i duũxũgũ i ñoma i naanewa  
 ngẽxmagũxũ. Rü choma ya Cori ya  
 Tupana nixĩ i nüxũ chixuxũ i ngẽma”,  
 ñanagürü pexũ.

.....



# HAGEO

## (Aguéu)

Tupana nüxna namaxã nacuaxãchi nax  
naxügüaxüçax ya napata

**1** <sup>1</sup>Rü yexguma taxre ga taunecü  
ãëxgacü yixixgu ga Daríu, rü norü  
6 ga tauemaciáru ügügu, rü nüma ga  
Cori ya Tupana rü norü orearü uruxü ga  
Aguéuwa nidexa. Rü nüxna nanaxã ga  
ore ga Yudáanecüãxaruãëxgacü ga  
Chorobabé ga Charatié nanecax ixixü rü  
chacherdótegüaruãëxgacü ga Yochué  
ga Yochadá nanecax ixixü. <sup>2-3</sup>Rü ñaa  
nixí ga yema ore ga Aguéuwa nüxü  
yaxuxü ga nüma ga Cori ya Tupana ya  
guxüétüwa ngëxmacü, rü ñanagürü:  
“Ñaa duüxügü rü nüxü nixugüe nax  
taxüta nawa nanguxü nax wena  
naxügüaxüçax ya chopata. <sup>4</sup>¿Ëxna  
pexicatama penaxwaxexü nax mexüne  
ya ípatawa pemaxëxü, rü yoxni ya yima  
chopata rü naxtapüx nügüétügu yixü  
nax nachixexü? <sup>5</sup>Rü chomax ya Cori ya  
Tupana ya guxãétüwa ngëxmaxë rü  
pemaxã nüxü chixu: iMea penangugü i  
pecümagü! <sup>6</sup>Rü pema rü muxüma i  
penetü petogü natürü noxretama i norü  
o pibuxgü, pechibüe natürü tama pexü  
ningu, rü pexaxegü natürü

pitaxawaeama, rü pegü pidüxgü natürü  
taguma penaiwe. Rü yíxema puracixe  
rü tanayauxtanü i túmaaru puracü  
natürü paxama tüxü nagu erü ñoma  
chacu irügáuxügu tananúcuxürüxü nixí.  
<sup>7</sup>Rü choma ya Cori ya Tupana ya  
guxãétüwa ngëxmaxë, rü pemaxã nüxü  
chixu: iMea penangugü i pecümagü!  
<sup>8</sup>iRü dauxchitawa pexí rü ngéma  
mürapewa peyaxüx! iRü nua penana rü  
ngëmamaxã wena penaxüx ya yima  
chopata! Rü choma rü tá taãxëcü  
ngéma changexma rü ngéma tá  
ichanawëx i chorü üüne. <sup>9</sup>Rü pemax rü  
poraäcü pepuracüe nax pexü  
nangexmaxüçax i muxü i perü  
nanetüaru o, natürü noxretama nixí i  
ngéma pibuxgüxü. Rü ngéma penetüaru  
o i pechiügu namaxã penguxüxü rü  
wüxi i cue ñaxümaxã ichayanatauxëxë.  
¿Rü tüxücüü ngémaäcü nixí? Erü yima  
chopata rü naxtapüxica nügüétü nayi  
nax nachixexü rü pemax rü  
pepataçaxica pexoégaãxë. Rü choma ya  
Cori ya Tupana nixí i nüxü chixuxü i  
ngéma. <sup>10</sup>Rü ngëmacax nixí i tama  
pexçax chanapuxëxü rü ngéma  
waixümü rü tama mea pexü nayaxëëxü

i penetügü. <sup>11</sup>Rü choma nixĩ ga íchananguxëëxũ ga nax yapagüanexũ ga peanewa rü maıxpünegüwa, rü tríguncü, rü úbanecü, rü oríbunecü rü guxũma ga taxacü ga petogüxüncüwa. Rü yema nax yapagüanexügüga rü pexçax ínangu ga taiya rü perü wocagüçax rü ta”, ñanagürü ga Tupana. <sup>12</sup>Rü nüma ga Chorobabé rü Yochué rü guxũma ga togü ga duũxügü rü aixcüma Tupanaga naxĩnüe yerü namuüe ga yexguma nüxũ naxĩnüegu ga yema ore ga Cori ya Tupana Aguéuwa nüxũ ixuxũ. <sup>13</sup>Rü yexguma ga nüma ga Aguéu ga Cori ya Tupanaarü orearü uruxũ, rü Cori ya Tupanaégagu duũxügümaxã nidexa rü ñanagürü: “Nüma ya Cori ya Tupana rü ñanagürü pexũ: ‘Choma ya Cori ya Tupana rü pexütawa changexma’”, ñanagürü. <sup>14</sup>Rü yemaacü nüma ga Cori ya Tupana rü nanataãxëxëxë ga Chorobabé ga Yudáanecüãxarü ãëxgacü, rü Yochué ga chacherdótegüarü ãëxgacü rü guxũma ga yema togü ga duũxügü. Rü yexguma ga nümagü rü yéma naxĩ rü inanaxügüe nax naxügüãxũ ga guma napata ga Cori ya Tupana ya guxãétüwa ngëxmacü. <sup>15</sup>Rü yexguma taxre ga taunecü Pérchiaarü ãëxgacü yixĩxgu ga Darü, rü meama norü 6 ga tauemacüarü (setiembre) 24 ga ngunexũ nixĩ ga inaxügüãxũ ga nax wena namexëëgüaxũ ga guma Tupanapata.

**Ngexwacaxũne ya  
Tupanapata rü namexechi**

**2** <sup>1</sup>Rü guma 7 ga tauemacü (octúbre) rü norü 21 ga ngunexügü, rü nüma ga Cori ya Tupana rü wenaxarü orearü

uruxũ ga Aguéumaxã nidexa. <sup>2</sup>Rü nanamu nax Chorobabémaxã, rü Yochuémaxã, rü guxũma ga yema togü ga duũxügümaxã nüxũ yaxuxüçax ga norü ore ga ñaxũ: <sup>3</sup>“¿Texé i petanüwa rü nüxna cuaxächixũ ga nax nañuxraxüxũ ga chopata ga noxrix? Rü guma rü namexechi. Natürü ñuxma nax nüxũ pedauxü rü taxuwama name. <sup>4</sup>iNatürü nataãxë, Pa Chorobabé! iRü nataãxë, Pa Yochué ya Chacherdótegüarü ãëxgacü! iRü petaãxëgü Pa Guxũma i Duũxügü! iRü pora pexüe rü pepuracüe! Erü choma ya perü Cori ya Tupana rü pexütawa changexma. <sup>5</sup>Rü yexguma Equítuanewa ínachoxügü ga perü oxigü rü ichaxuneta rü ngëma Chauãxë rü guxũgutáma pexũ naxümücü. Rü ngëmacax taxuçaxma pemuüe i ñuxmax. <sup>6-8</sup>Erü írxarũ nataxu nax chanaxiãxächixëxëxũ i daxüguxũ i naane, rü ñoma i naane, rü ngëma már, rü tá chanamuüexëxë i guxũma i nachixüanegü. Rü ngëma togü i nachixüanegüarü duũxügü rü nua tá nanana i norü diërugü rü úirugü. Rü ngëmaacü ya daa chopata rü tá namexechi. Rü choma ya Cori ya Tupana ya guxãétüwa ngëxmaxë nixĩ i nüxũ chixuxũ i ngëma erü choxrü nixĩ i guxũma i diërugü rü úirugü. <sup>9</sup>Rü ñuxma nax wena namexëëxũ ya daa chopata rü yexguma noxri naxüxguarü yexera tá namexechi. Rü ngëxguma rü tá ichayanaxoxëxë i guxũma i nu i ñaa nachicawa, rü nua tá petaãxëgü. Rü choma ya Cori ya Tupana ya guxãétüwa ngëxmaxë nixĩ i nüxũ chixuxũ i ngëma. ....

<sup>18-19</sup>Rü ñuxma daa tauncü rü norü 9  
ya tauemacüarü (diciembre) 24 i  
ngunexũgu nixĩ i ipenaxügũxũ nax  
penanúcuxũ ya yima nutagü ya namaxã  
inaxügüne ya chopata. iRü dücax, rü  
mea penangugü! Rü woo i ñuxmax rü

nangearü oxõx i perü trígu, rü úbagü, rü  
iguérágü, rü boxragü rü orfbugü, natürü  
i ñuxmawena rü tá pexũ charüngũxẽẽ rü  
tagutáma pexũ nataxu i ngẽma  
penetüarü o”, ñanagürü ya Tupana.  
.....

# ZACARÍAS

## (Chacaría)

Cori ya Tupana rü norü duũxũgũna naxu  
nax naxçax nawoeguxũçax

**1** <sup>1</sup>Rü yexguma marü taxre ga taunecü ãëxgacü yixixgu ga Darü rü meama norü 8 ga tauemacügu (noviémbr) rü nüma ga Cori ya Tupana rü Chacaríamaxã nidexa. Rü nüma ga Chacaría rü Berequía nane nixĩ rü Ídu nixĩ ga norü oxĩ. Rü Tupana rü ñanagürü nüxũ: <sup>2</sup>“Choma ya Cori ya Tupana ya guxãétüwa ngëxmaxe, rü poraãcü namaxã chanu ga yema perü oxigü. <sup>3</sup>Rü ngëmacçax i ñuxma rü chanaxwaxe i cutanüxũgũmaxã nüxũ quixu i ñaa chauga i ñaxũ: ‘iChaxçax pewoegü! Rü choma rü tá pexçax chatáegu.’ Rü chomax i Cori ya Tupana ya guxãétüwa ngëxmaxe nixĩ i ngëma ñachaxũ. <sup>4</sup>Rü tama name nax yema perü oxigürüxũ pixigüxũ. Yerü yexguma nüxna chaxãgagu ga chorü orearü uruũgü nax namaxã nüxũ yaxuxũçax ga chauga nax nüxũ naxoexũçax ga chixexũ ga nacümagü rü chixri nax namaxëxũ, natürü ga nümagü rü tama chauga naxĩnuechaũ rü tama choxũ nacuxgüchaũ. Rü choma i Cori ya

Tupana ya guxãétüwa ngëxmaxe nixĩ i nüxũ chixuxũ i ngëma. <sup>5</sup>¿Natürü i ñuxma rü ngexũgü yixixũ ga yema perü oxigü? Rü chorü orearü uruũgü rü ta rü marü nayue. <sup>6</sup>Natürü yema chorü ore rü yema chorü mugü ga chorü orearü uruũgümexëgu chaxixũ, rü perü oxigüwa nangu. Rü ñuxre ga nümagü rü chaxçax nawoegu, rü naxçax ínicuxgü ga chixexũ nax naxügüxũ, rü ñanagürügü: ‘Aixcüma nüma ya Cori ya Tupana ya guxãétüwa ngëxmacü rü ngëma tórü chixexũãcütama tamaxã nanangupetüxëxë’, ñanagürügü”, ñanagürü ga Tupana.

**Tupana rü Chacaríaxũ nanawex i wüxi i  
daxücüax i cowaruétüwa rütogüxũ**

<sup>7</sup>Rü yexguma marü taxre ga taunecü ãëxgacü yixixgu ga Darü rü meama norü 11 ga tauemacügu (febréro) rü nüma ga Cori ya Tupana rü chomaxã nidexa i chomax i orearü uruxũ i Chacaría i Berequía nane ya Ídutaxa nax chixixũ. <sup>8</sup>Rü wüxi ga chütaxügu rü Tupana choxũ nüxũ nadauxëxë ga wüxi ga norü orearü ngeruxũ ga daxücüax ga cowaru ga dauxüétügu aunagüxũ. Rü

wüxi ga ngatewa yexmaxû ga naixtanüpechitagu norü cowaumaxã nachi. Rü yemaweama nayexmagü ga wüxítücumü ga cowaumaxã ga idauxû, rü to ga idáuxraxû rü to ga icómuxû. <sup>9</sup>Rü choma rü yema daxücüâx ga cowaumaxã aunagüxüna chaca rü ñachagürü: “Pa Corix ðtaxacügü nixí i ngëma cowaumaxã augüxü?” ñachagürü. Rü nüma ga yema daxücüâx ga chomaxã idexaxû, rü choxû nangãxüga rü ñanagürü: “Choma rü tá cuxû chanawex i taxacü nax yixigüxü”, ñanagürü. <sup>10</sup>Rü yexguma ga yema daxücüâx ga naixtanüpechitagu chixû rü ñanagürü choxû: “Ñaaügü nixí i Cori ya Tupana nua mugüxü nax ñoma i naanegu íyachoegüxüçax”, ñanagürü. <sup>11</sup>Rü yexguma ga yema togü ga cowaumaxã augüxü, rü Cori ya Tupanaarü orearü ngeruxü ga naixtanüpechitagu chixümaxã nidexagü rü ñanagürü: “Guxüwama i ñoma i naanegu íyachoegu, rü guxüma i duüxügü rü nügümaxã ínataaxëgü, rü taxuxüma i taxacü i guxchaxüxü itayangaugü”, ñanagürü. <sup>12</sup>Rü nüma ga yema Cori ya Tupanaarü orearü ngeruxü ga daxücüâx rü ñanagürü: “Pa Corix, Pa Tupana ya Guxãétüwa Ngëxmacüx, rü marü 70 ya taunecüwa nangu nax Yerucharéüçügümaxã rü ngëma togü i Yudaanearü ñanecüçügümaxã cunuxü. ¿Rü ñuxre ya taunecü taxuxü nax wenaxarü cuxü nangechaütümüxügüxü?” ñanagürü. <sup>13</sup>Rü nüma ga Cori ya Tupana rü nüxü nangechaüñcüma mea yema daxücüâx ga chomaxã idexaxüxü nangãxüga. <sup>14</sup>Rü yexguma ga nüma ga daxücüâx rü

choxü namu nax chaxunagüxü. “Rü ñaa nixí ya Cori ya Tupana ya guxãétüwa ngëxmacü nüxü ixuxü: ‘Chomax rü nüxü changechaüxüchi ya Yerucharéü rü yima maxpüne ya Chioü. <sup>15</sup>Rü yexguma íxrariwatama chanapoxcuchaüga ga yema Yerucharéüçügü, natürü yema togü ga nachixüanegüçügü ga yema chamugüxü rü nanangupetüxëxë ga yema poxcu ga Yerucharéüçügümaxã chaxuegüxü. Rü ngëmacax namaxã chanu i ngëma nachixüanegü i nügü írüporeaü rü taxüguma rüxünüxü. <sup>16</sup>Natürü ngëma nax choxü nangechaütümüxügüga ya Yerucharéüçügü, rü naxçax chatáegu. Rü tá nüxü chanangüchaxüxëxë i duüxügü nax wena namexëégüxüçax ya chopata, rü guxünema ya yima ñane’, ñanagürü ga Tupana.” <sup>17</sup>Rü yema daxücüâx rü ñanagürü ta choxü: “Ñaa tá nixí i to i ore i tá nüxü quixuxü rü nüma ya Cori ya Tupana ya guxãétüwa ngëxmacü rü ñanagürü: ‘Rü choma rü tá wena nüxü charüngüxëxë ya yima chorü ñanegü nax yamexüçax rü mea iyaxüçax. Rü wena tá chanataaxëxëxë ya yima maxpüne ya Chioü. Rü wena tá chanaxunagü nax chorü ñane yixüxü ya Yerucharéü’, ñanagürü ya Tupana.”

.....

### Wüxi i ngexwacaxüxü i naxchiru i Yochuéna naxãxüchiga

**3** <sup>1</sup>Rü yexguma nüma ga Cori ya Tupana rü choxü nanawex ga Yochué ga chacherdótegüarü ãëxgacü. Rü nüma ga Yochué rü Cori ya Tupanaarü duüxüpexegu nachi. Rü Yochuéarü tügüneçüwawa nayexma ga

Chataná ga nüxü ixugüchaüxü. <sup>2</sup>Rü nüma ga yema Tupanaarü orearü ngeruxü i daxücüâx rü Chatanáxü ñanagürü: “iNüma ya Cori ya Tupana cuxü nangax! iRü yimátama Cori ya Tupana ya Yerucharéüxü ngechaücü rü cuxü nangax! Erü ñaa yatü rü ñoma wüxi ya áxwe ya üxüétüwa yaxuxcürüxü Babiróniaanewa táeguxü nixí”, ñanagürü. <sup>3</sup>Rü nüma ga Yochué rü poraäcü naxäüächichiru rü yemaäcü Cori ya Tupanaarü düüxüpegegu nachi. <sup>4</sup>Rü yexguma ga yema daxücüâx ga orearü ngeruxü rü norü ngüxëëruügüxü namu rü ñanagürü: “Ngëma äüächixü i Yochuéchiru irü ípenacuxuchixü!” Rü ñuxüchi Yochuéxü ñanagürü: “Dücac, rü marü cuxna chanayaxu i ngëma curü pecádu rü ngaxäëchirugu cuxü chicuxëxë”, ñanagürü. <sup>5</sup>Rü yexgumatama norü ngüxëëruügüxü namu ga Yochuéxü yanäixerugüxüçax namaxä ga wüxi ga ngëmataxü ga naxchirutachinü. Rü yemawena rü petachirugu nayacuxëëgü. Rü nüma ga yema daxücüâx rü yexmatama nachiecha. <sup>6</sup>Rü ñuxüchi ga nüma ga Cori ya Tupanaarü orearü ngeruxü ga daxücüâx rü Yochuéxü ñanagürü: <sup>7</sup>“Cori ya Tupana ya guxäétüwa ngëxmacü rü ñanagürü cuxü: ‘iChaucümagu ixü rü yanguxëxë i guxüma i ngëma cumaxä nüxü chixuxü! Rü ngëxguma ngëmaäcü cunaxüxgux, rü cumëxgu tá chanaxü ya chopata rü naxäxtü nax nüxna cudauxüçax, rü tá cuxna chanaxä i cuchica i natanüwa i ñaa chorü orearü ngeruxü i daxücüâx i choxü puracüexü. <sup>8</sup>iRü dücac, Pa Yochuéx, rü mea iperüxïnüe i guxäma i pemax nax

chacherdótegüwa pexügüxü! Rü pema rü wüxi i cuaxruxü pixigü naxçax i ngëma mexü i tá ínguxü. Erü paxa tá nua petanüwa chanangoxëxë i wüxi i Dabítaxa i chorü düüxü ya perü äëxgacü tá ixücü (Cristu). <sup>9</sup>Rü chomax rü Yochuépegegu chanaxü ya wüxi ya nuta ya 7 i nacüwa nüxü ngëxmacü. Rü choma tátama yima nutagu chanaxümatü. Rü ñuxüchi i choma rü wüxítátama i ngunexügu nüxna chanayaxu i norü pecádu i ñaa nachixüane. <sup>10</sup>Rü ngëxguma ngëma ngunexüwa nanguxgu rü tá pegüna pixigü nax perü úbagüpechitawa, rü perü iguéragüpechitawa pegümaxä petaäxëgüxüçax. Rü choma ya Cori ya Tupana ya guxäétüwa ngëxmaxe nixí i nüxü chixuxü i ngëma’, ñanagürü.”

**Chacaríá nüxü nadau ga wüxi ga omüarü úruxü rü taxre ga oríbugü**

**4** <sup>1</sup>Rü yema daxücüâx rü wena çaxçax natáegu, rü choxü ínabaixgü ñoma pewa íbaxächigürüxü. <sup>2</sup>Rü choxna naca rü ñanagürü: “¿Taxacüxü cudauxü?” ñanagürü. Rü choma rü chanangäxüga rü ñachagürü: “Choma rü nüxü chadau i wüxi i omü i úrunaxçax. Rü norü queruyínupáüwa ne nadagü i 7 i naxchiraxü. <sup>3</sup>Rü ngëma omüxütawa narüxügü i taxre i oríbu rü wüxi i norü tügüneçüwawa rü to i norü toçwecüwawa”, ñachagürü. <sup>4</sup>Rü yexguma ga choma rü nüxna chaca ga yema daxücüâx ga chomaxä ídexaxü rü ñachagürü: “Pa Chorü Corix ¿taxacüchiga nixí i ngëma?” ñachagürü. <sup>5</sup>Rü nüma ga daxücüâx rü choxü nangäxüga rü ñanagürü. “¿Tama ëxna i

nüxũ cucuáxũ nax taxacüchiga yixixũ?” ñanagürü. Rü choma chanangãxũga rü ñachagürü: “Tama nüxũ chacuax, Pa Corix”, ñachagürü. <sup>6</sup>Rü nüma ga daxücüãx rü nayadaxëxë ga nax yadexaxũ rü ñanagürü: “Ñaa nixĩ i Cori ya Tupanaarü ore i Chorobabéçax ixixũ i ñaxũ: “Tama churaragüarü poramaxã rü bai i taxacü rü to i poramaxã, natürü Chauãxëarü poramaxã tá ningu i ngëma chanaxwaxexũ”, ñanagürü ya Cori ya Tupana ya guxãétüwa ngëxmacü. <sup>7</sup>Rü woo ñoma taxüne ya maxpünerüxũ yixixgu i guxchaxügu nax tama naxügüaxüçax ya yima Tupanapata, natürü Chorobabéçaxewa rü tá inayarüxo i ngëma guxchaxügu ñoma wüxi ya maxpüne rüdxöchixëxürüxũ. Rü nümatama ya Chorobabé rü tá nayaxücuchi ya yima nuta ya nawa inaxügüçü nax yanguxüçax ya yima Tupanapata. Rü ngëxguma yanguxgu rü nüma i duüxügu rü tagaäcü ñanagürügu tá: ‘iNamexechi, namexechi ya yima Tupanapata!’ ñanagürügu tá.” <sup>8</sup>Rü yemawena ga nüma ga yema daxücüãx rü chomaxã nüxũ nixu ga to ga ore ga Tupanawa ne üxũ ga ñaxũ: <sup>9</sup>“Rü Chorobabé nixĩ ga inanücü ga guma nuta ga naxtapüxaru ügü ya daa Tupanapata rü nüma tátama nixĩ i yanguxëëxũ. Rü ngëmawa tá nüxũ pecuax i pemax nax Cori ya Tupana ya guxãétüwa ngëxmacü yixixũ ya yimá núma choxũ mucü. <sup>10</sup>Rü yema tama aixcüma yaxögücüraxüxũ ga yexguma noxri inaxügüga ga yema puracü, rü ñuxma nax nüxũ nadaugüxü i Chorobabé nax yanguxëëxũ i ñaa puracü, rü tá nataãxëgü”, ñanagürü. Rü

yemawena ga yema daxücüãx rü ñanagürü ta: “Rü ñaa 7 i omügü rü Cori ya Tupanaxetügüchiga nixĩ i guxũ i ñaa naanegu rüdaunüne”, ñanagürü. <sup>11</sup>Rü choma rü nüxna chaca rü ñachagürü: “¿Taxacüchiga nixĩ i ñaa taxre ya oríbune i ñaa omüçuwawa ngëxmagüxũ?” ñachagürü.

.....

<sup>14</sup>Rü nüma ga yema daxücüãx rü choxũ nangãxũga rü ñanagürü: “Yima taxre ya oríbune rü nachiga nixĩ i ngëma taxre i duüxügu i marü chíxümaxã ibáeruxũ nax naxügüaxüçax i norü puracü ya Tupana ya yimá ñoma i naanearü yora ixicü”, ñanagürü.

.....

#### Cori ya Tupanaarü uneta

**8** <sup>1</sup>Rü nüma ga Cori ya Tupana ya guxãétüwa ngëxmacü rü ñaa orexü chomaxã nixu rü ñanagürü: <sup>2-3</sup>“Ñaa nixĩ i ore i chomax i Cori ya Tupana ya guxãétüwa ngëxmaxe nüxũ chixuxũ: ‘Rü nüxũ changechaü ya yima maxpüne ya Chióü rü ngëmacax poraäcü choxü nachuxu. Rü Yerucharéüçax tá chatáegu nax ngëma chamaxüxüçax. Rü ngëxguma chatáeguxgux rü yima ñane ya Yerucharéü rü ñane ya Aixcüma Chauga Ñünemaxã tá nanaxügü. Rü ngëxgumarüxü ta ya yima chorü maxpüne ya Chióü rü Maxpüne ya Üünenemaxã tá nanaxügü. <sup>4</sup>Rü choma i Cori ya Tupana ya guxãétüwa ngëxmaxe rü ñachagürü: Wena táxaru norü caxüxümaxã Yerucharéüaru plazagüwa tá naxĩ i yaxguãxgü i yatüxügu rü ngëxgü nax ngëma yanatogüxüçax rü nataãxëgüxüçax. <sup>5</sup>Rü ngëxgumarüxü tá i

buxûgü i yatûxûgü rü ngexûgü, rü tá nanapáxêxê i Yerucharéüaru plazagü rü ngéma tá naxînúcaxwaxegü. <sup>6</sup>Rü ngêxguma ngémaäcü wena namexgu ya Yerucharéü rü chorü duûxûgü i núma yaxûgûxü rü tá nabaixâchie, erü taguma nagu narûxinüe nax wena tá namexü ya yima ïane. Natürü chauxcax rü taxuxüma naguxcha i ngéma. Rü choma i Cori ya Tupana ya guxâétüwa ngêxmaxe nüxü chixu i ngéma. <sup>7</sup>Rü choma rü tá íchananguxûxêxê i ngéma chorü duûxûgü i petanûxûgü naxmexwa i ngéma nachixüane i perü éstewaama ngêxmaxü rü ngéma nachixüane i perü oéstewaama ngêxmaxü. <sup>8</sup>Rü Yerucharéüwa tá chanagagü nax ngéma namaxêxûcax. Rü nümagü rü tá chorü duûxûgü nixî, rü chomax rü tá norü Tupana ya íxaixcümäcü rü mea namaxâ icuäcü chixî”, ñanagürü. <sup>9</sup>Rü nüma ya Cori ya Tupana ya guxâétüwa ngêxmacü rü ñanagürü pexü: “Pema rü yexguma noxritama nanucugu ga guma nutagü ga chopataarü ügü rü yexgumaxücüutama nixî ga nüxü pexînüexü ga chauga ga chorü orearü uruügüwa pemaxâ nüxü chixuxü. iRü ñuxma rü pora pexüe nax mea peyanguxêxûcax i ngéma puracü! <sup>10</sup>Rü yexguma taxüta inaxügüga ga chopataarü puracü rü nataxuma i perü natanü naxcax i perü puracü rü perü wocagüarü puracü. Rü yema perü uanügügagu rü äücümäxüwa pengexmagü rü chomatama rü pegümaxâ pexü chanuexêxê. <sup>11</sup>Natürü i ñuxma rü tümacax ya yíxema daa ïane ya Yerucharéüwa íyaxügüxe, rü taxütâma yema ngunexûgü ga

ngupetügüxürüxü nixî. Rü choma ya Cori ya Tupana ya guxâétüwa ngêxmaxe nixî i nüxü chixuxü i ngéma. <sup>12</sup>Erü ngéma taâxê rü tá petanüwa nangexma. Rü ngéma perü úbanecü rü tá meama nixo. Rü daxüguxü i naanewa tá narüngu ya pucü nax ngémaäcü i penetügü i peanewa ngêxmagüxü namuarü oóxûcax”, ñanagürü.

.....

<sup>20</sup>Rü nüma ya Cori ya Tupana ya guxâétüwa ngêxmacü rü ñanagürü: “Muxüma i togü i nachixüanegüarü ïanegücüâx rü tá nua naxî nax choxü yacuaxüüügüxûcax. <sup>21</sup>Rü ngéma duûxûgü i wüxi ya ïanecüâxgü rü náí ya ïanecüâxgüna tá naxugüe rü ñanagürügü tá: ‘iNgîxâ naxcax tadaugü ya Cori ya Tupana ya guxâétüwa ngêxmacü, rü ngîxâ norü ngüxêcax ítacagü!’ ñanagürügü tá. Rü ngéma togü i duûxûgü rü tá nanangâxügü rü ñanagürügü tá: ‘Toma rü tá ta ngéma taxî’, ñanagürügü tá. <sup>22</sup>Rü ngémaäcü tá muxütâma i duûxûgü i muxü i nachixüanewa ne íxü rü Yerucharéüwa tá naxî nax chauxcax yadaugüxûcax nax nüxü charüngüxêxûcax”, ñanagürü ga Cori ya Tupana ya guxâétüwa ngêxmacü.

.....

#### Iraétanüxügüarü äêxgacü rü tá ínangu

**9** <sup>9</sup>iRü poraäcü petaâxêgü, Pa Chióücüâxgüx! iRü perü taâxêmaxâ pewiyaegü, Pa Yerucharéücüâxgüx! Erü pexcax ínangu ya perü äêxgacü ya poracü ya mea pemaxâ icuäcü. Natürü i nüma rü tama nügü nicuaxüxüâcüma ínangu. Rü wüxi i búrucacüetügumare



ínangu. <sup>10</sup>Rü nüma rü tá inayanaxoxêxê i Efraítanüxüarü churaragüweü, rü ngêma Yerucharéücüãxgüarü churaragüarü cowarugü, rü yima würagü ya dai namaxã naxügiene. Rü guxü i nachixüanegücax tá nanaxunagü i taãxê. Rü tá namaxã inacuçax i ngêma naane i már i Mediteráneuwa ixügüxü rü ñuxmata már i Dauchiüxüwa nangu. Rü ngêma naane i taxtü i Eufrátewa ixügüxümaxã tá inacuçax rü ñuxmata guxüwama i ñoma i naanewa nangu. ....

**12** <sup>10</sup>Rü ñanagürü ga Tupana: “Ngêma Dabítaagütanüwa rü Yerucharéücüãxgütanüwa tá chanamu i Chauãxê nax yamecümamaxücax rü yumüxêgu naxínüexücax. Rü ngêxguma nüxü nadaugügu ya yima nacanapacütüxügüãcü rü tá nangechaügü. Rü naxcax tá naxauxe ñoma wüxi i nane i nügümaxã wüxicacücax naxauxexürüxü. Rü ñoma nüxíraxücü ya nane yuxgucax naxauxegurüxü tá naxcax naxauxe”, ñanagürü ga Tupana. ....

**Yerucharéücax tá ínayaxüächi  
i norü uanügü**

**14** <sup>1</sup>Rü marü ningaica i Cori ya Tupanaarü poxcu, Pa

Yerucharéücüãxgüx. Rü ngêxguma ínanguxgu, rü perü uanügü rü pepexewa tátama nügu nayanu i perü ngêmaxügü i pexna napuxüxü. <sup>2</sup>Rü dücax, Pa Yerucharéücüãxgüx, rü ngêma ngunexügu rü nüma ya Cori ya Tupana rü tá guxü i nachixüanecüãxü nangutaquexexêxê nax pemaxã nügu nadaixücax. Rü nagu tá nachocu ya yima perü ñane, rü wüxichigü ya ípatagü rü tá nanadeäcu. Rü ngeaxgü rü tá tüxü ínayauxü rü tá tümamaxã namaxê. Rü ngãxü i petanüxügü rü tá nayagagü. Rü ngêma norü to i ngãxüxica tá ngêma nayaxügü.

**Tupana rü tá Yerucharéücüãxgüarü  
uanügüxü narüporamae**

<sup>3</sup>Natürü ngêmawena i nüma ya Cori ya Tupana rü tá ngêma nachixüanegümaxã nügu nadai ñoma churaragü norü uanügümaxã nügu ñaxgurüxü. ....

<sup>9</sup>Rü ngêma ngunexügu rü nüma ya Cori ya Tupana rü äëxgacü tá nixí i guxüwama i ñoma i naanewa. Rü nüxicatátama äëxgacü nixí rü nataxutáma i to i naéga i duüxügü nüxü icuçüxügüxü. ....

# MALAQUÍAS

## (Maraquía)

Iraétanüxügüxü nangechaü ya Tupana

**1** <sup>1</sup>Rü ñaa nixí i ore i Cori ya Tupana  
Iraétanüxügümaxā nüxü ixuxü  
nawa ya orearü uruxü ya Maraquía.  
<sup>2-3</sup>Rü nüma ya Cori ya Tupana rü  
ñanagürü: “Choma rü pexü  
changechaü”, ñanagürü. Natürü i  
pemax rü penangäxüga rü ñapegürügü  
nüxü: “¿Ñuxäcü nüxü tacuax nax toxü  
cungechaxüxü?” ñapegürügü nüxü. Rü  
nüma ya Cori ya Tupana rü pexü  
nangäxüga rü ñanagürü: “Choma rü  
guma nüxcümaxücü ga perü oxi ga  
Acóbuxü changechaü rü ngēmawa pexü  
chanawex nax ñuxäcü poraäcü pexü  
changechaxüxü. Rü woo nügüeneegü  
nax yixigüxü natürü Acóbuxü  
changechaü rü Echaüxü chaxo. Rü  
yema perü oxi ga Acóbuxü  
changechaüxürüxü nixí i pexü  
changechaüxü. Rü tama Echaúmaxā  
chataaxē rü yemaçax norü naane i  
maçpúneane nax yixixü rü chianexüxü  
chananguxuchixēxē, rü naexügü i  
düraexü nawa changexmagüxēxē”,  
ñanagürü.  
.....

Cori ya Tupana rü  
chacherdótegüxü ningagü

<sup>6</sup>Rü nüma ya Cori ya Tupana ya  
guxüétüwa ngēxmacü rü  
chacherdótegüxü ñanagürü: “Rü buxügü  
rü nanatügüxü nangechaü, rü ngēma  
naxütaxügü rü norü coriga naxinü. Rü  
choma nax Penatü chixixü ¿rü tüxcüü i  
tama choxü pengechaüxü? Rü choma  
nax perü Cori chixixü ¿rü tüxcüü i tama  
chauga pexinüexü? Natürü i pemax rü  
choxü pexo, rü naétü ñaperügügü:  
‘¿Taxacüwa i cuxü taxoxü?’ ñaperügügü.  
<sup>7</sup>Rü pema rü chorü amaregüarü  
guchicaxüwa penana i amaregü i tama  
imexü, rü ngēxguma rü ípeca rü  
ñaperügügüama: ‘¿Taxacüwa i chixexü  
cumaxā taxüexü?’ ñaperügügü. Dücax,  
pema rü chixexü chomaxā pexüe erü  
chorü amarechicawa penana i amare i  
tama imexü. <sup>8</sup>¿Ēxna tama pexçax  
nachixe ega woo naxüna i ngexetüxü  
rüexna ngemaeparaxü rüexna idawexü  
chauxçax piguxgu? iRü ecü perü  
ãëxgacügüxütawa penana nax  
ngēmaäcü nüxü pecuáxüçax ngoxi  
taãxëäcü pexü nayauxgüä i ngēma perü

ãmaregü!” ñanagürü. <sup>9</sup>iRü dücax, Pa Chacherdótegüx, rü Tupanana peca nax nüxü pengechaütümüxüçax! Natürü ngëxguma chixemarexü i ãmaregü nüxna pixägügu irü taxütáma nagu perüxíniue nax ngëmamaxã nataãxëxü i nümax!

.....

#### Tupana rü chacherdótegüxü naxucuxë

**2** <sup>1</sup>Rü Tupana ya guxãétüwa ngëxmacü rü ñanagürü: “Ñuxmax, Pa Chacherdótegüx, rü ñaa nixí i chorü ucuxë i pexçax ixíxü: <sup>2</sup>Rü dücax, rü name nixí i chauga pexíniue rü chanaxwaxe i aixcüma choxü pengechaügü. Rü ngëxguma taxütáma chauga pexíniuegu rü choma rü tá guxchaxü pemaxã chaxuegu. Rü ñuxma nax tama aixcüma choxü pengechaügüxü rü choma rü ngëma perü natanü i peyaxgüxü naxçax nax chacherdótegü pixíxüxü rü tá perü guxchaxüruxü chayanguxuchixëxë’”, ñanagürü ya Cori ya Tupana ya guxãétüwa ngëxmacü. <sup>3</sup>Rü ñanagürüama: “Choma rü tá pexna chanayaxu i ngëma puracü ga pexna chaxãxü. Rü pechiwegu tá chanawogü ya yima naxünaügü i ngëma naxünagü i chauxçax pedaxü. Rü wüxigu yima naügümaxã tá pexü íchawogü i pemax. <sup>4</sup>Rü ngëmaãcü düxwa tá nüxü pecuax nax chomax yixíxü i pexna chaxãxü i ñaa ucuxë nax naxçax pewoeguxüçax i ngëma chorü mugü ga perü oxí ga Lebímaxã nüxü chixuxü. Rü choma ya Cori ya Tupana ya guxãétüwa ngëxmaxe nixí i nüxü chixuxü i ngëma. <sup>5</sup>Rü yema chorü uneta ga Lebímaxã chaxueguxü

rü nüxna chanaxã nax duüxügüaxü nangexmaxüçax i maxü rü taãxë. Rü Levína chanaxã ga yema uneta yerü chanaxwaxe nax chauga naxínüxü rü choxü namuüxü. Rü nüma rü aixcüma chauga naxínü rü choxü nangechaü. <sup>6</sup>Rü nüma ga Lebí rü mexümaxã nanangüexëxë ga duüxügü rü taguma chixexümaxã nayaxucuxë. Rü nüma rü aixcüma chomaxã naxãmücü rü togümaxã tataãxëgü. Rü tamu ga guxema duëxëgü ga chixexüna tüxü ínganguxüxëxë. <sup>7</sup>Rü wüxi i chacherdótearü puracü nixí nax duüxëgü tüxü nangüexëxëxü nax choxü tacuaxgüxüçax. Rü ngëmacax name nax guxüma i duüxügü naxütawa íxü nax tüxü nangüexëxëxüçax, erü choma nax guxãétüwa changexmaxü rü nüxü chaxuneta nax chorü orearü uruügü yixígüxüçax. <sup>8</sup>Natürü i pemax, Pa Chacherdótegüx, rü nüxna pixígachi i ngëma ore i mexü. Rü ngëma perü nguxëëtae i chixexümaxã muxema ya duüxëgü chixexügu tüxü peyixëxë. Rü ngëmaãcü i pemax rü ípeyatóxëxë ga yema uneta ga Lebímaxã nüxü chixuxü. <sup>9</sup>Rü ngëmacax i chomax rü chixexü pemaxã chaxuegu nax guxüma i duüxügü rü chixexümaxã pexü nadaunüxüçax rü pexü naxoexüçax. Erü ngëxguma duüxügüxü pexucuxëgügu rü tama mea wüxigu pegü pexucuxëgü. Rü ngëma ñachagürü i chomax ya Cori ya Tupana ya guxãétüwa ngëxmaxe.”

#### Tama Tupanamaxã nixaixcümagü ga Iraétanüxügü

<sup>10</sup>¿Ëxna tama i yimatama yixíxü ya Tanatü ya guxãxüma ücü? ¿Rü tüxücüü i

ñuxma yigü tawomüxëxë ya wüxírechigü, rü ngëmaãcü tama tayanguxëxë i ngëma mugü ga Tupana tóru oxigümaxã nüxü ixuxü? <sup>11</sup>Rü ngëma Yudáanecüãxgü rü tama Tupanaga naxínüe, rü taxü i chixexü naxügü i Yerucharéüwa rü Iraéanewa. Rü ngëma Yudáanecüãx rü nanaxãüächixëxë ya yima Tupanapata ya üinene ya nüma nüxü nangechaxüne, erü ngëma yatügü i Yudáanecüãx rü ngëxügü i tupananetaxü icuaxüüügüxümaxã nixãxmaxgü. <sup>12</sup>Rü nüma ya Cori ya Tupana rü chierüna iyanaxoxëëãgu i ngëma duüxügü i nua tachixüanewa ngëma chixexü ügüxü, rü nüétama ega woo taxacürü duüxü yixíxgu rü woo ãmare ngëma Tupanapatawa nangexgu. <sup>13</sup>Rü pema nax ngëxügü i tupananetaxü icuaxüüügüxümaxã ixãxmaxgüxe, rü naétü pegüxüéütümaxã peyawaixëxë i Cori ya Tupanaarü ãmarearü guchicaxü rü taxü i perü ngechaümaxã pexauxe erü nüma ya Cori ya Tupana rü tama namaxã nataãxë i ngëma perü ãmare. <sup>14</sup>Rü pemax rü ípecagüama rü ñaperügügü: “¿Tüxcüü tüxna nixügachi ya Tupana?” ñaperügügü. Rü pemaxã tá nüxü chixu nax tüxcüü nax yixíxü, erü nüma ya Cori ya Tupana rü nüxü nadau i ngëma chixexü i cuxüxü namaxã ga yema uneta ga ngïmaxã nüxü quixuxü ga yema nge ga ngïmaxã quingcü ga yexguma cüngextüxügu. Rü cumücü iyixí, rü nüxü quixu nax ngïmaxã tá quixaixcümamaxü. <sup>15</sup>¿Rü tama ëxna yimátama Tupana yixíxü ya naxücü i taxüne rü taãxë? ¿Rü taxacü nixí i pexü nanaxwaxëxü ya Tupana? Rü ngëma

pexü nanaxwaxëxü nixí nax noxrü yixíxügü i ngëma pexacügü. iRü mea nüxna pedax i perü maxü! Rü tama name i nüxü icuyarüngüma ga yema uneta ga cuxmaxmaxã nüxü quixuxü ga yexguma cüngextüxügu ngïmaxã cuxãxmaxgu. <sup>16</sup>Rü nüma ya Cori ya Iraétanüxügüaru Tupana ya guxáétüwa ngëxmacü rü ñanagürü: “iNüxna pedax i perü maxü! Rü tama name nax pidoraexü. Rü chomax rü tama namaxã chataãxë i ngëma yatü i naxmaxü ítáxü rü ngëmaãcü nachixexëëxü i norü maxü”, ñanagürü.

#### Tupana rü tá nanapoxcue i ngëma chixexü ügüxü

<sup>17</sup>Rü pema rü perü dexamaxã marü düxwa peyapaxëxë ya Tupana. Rü ngëmaétiwa i pemax rü ípecagüama rü ñaperügügü: “¿Rü ñuxü ñatarügügü i tomax rü ngëmacax tayapaxëëxü nax toxü naxínüxü?” ñaperügügü. Rü dücax, pema rü ñaperügügü: “Nüma ya Cori ya Tupana rü namaxã nataãxë i ngëma duüxügü i chixexü ügüxü rü taxütama nanapoxcue”, ñaperügügü. ¿Tama ëxna peyaxögü nax Tupana rü aixcümäcü yixíxü?

**3** <sup>1</sup>iDücax, rü mea iperüxínüe! Erü nüma ya Cori ya guxáétüwa ngëxmacü rü ñanagürü pexü: “Choma rü chaugüpexe tá chayamu i chorü orearü ngeruxü nax yoxni chauxüpa nügü iyamexëëgüxüçax i duüxügü”, ñanagürü. Rü yimá Cori ya naxçax pedaxcü rü ngürüächi tá napatagu naxücu. Rü ngëmaãcü tá ínangu ya yimá perü maxëxëëxüxü ga Tupana nüxü ixücü ga yexguma perü oxigümaxã

inaxunetagu. <sup>2</sup>¿Natürü texé tá namaxã tapora ya yimá Cori i ngẽma ngunexũ i nagu ínanguxũ? ¿Rü texé tá napexegu tachíama? Erü ngẽxguma ínanguxgu rü ñoma üxiema i úiruxũ mexẽxũrũxũ tá tüxũ nanamexẽxẽ i tórü maxũ, rü ñoma wüxi ya chaúrũxũ tá nixĩ nax guxũma i tórü ãũächixũ ínayixẽxũ. <sup>3</sup>Rü nüma ya Cori rü tá nanamexẽxẽ i ngẽma chacherdótegü i Lebítaagiärü maxũ ñoma diérumü rü úiru norü üxaxũcax üxiwa iguxũrũxũ. Rü ngẽmawena rü tá marü name i ngẽma chacherdótegü nax Cori ya Tupana naxwaxexũãcü ngẽma napexewa nangegüãxũ i norü ãmaregü. <sup>4</sup>Rü ngẽxguma i nüma ya Cori ya Tupana rü tá namaxã nataãxẽ i ngẽma Yudáanecüãxgiärü ãmaregü rü Yerucharéücüãxgiärü ãmaregü yexguma noxri duũxũgiärü ãmaregümaxã nataãxëgurũxũ. <sup>5</sup>Rü nüma ya Cori ya Tupana ya guxãétüwa ngẽxmacü rü ñanagürü: “Choma rü tá aixcüma pexna chaca i perü chixexũcax. Rü choma tátama nüxũ chixugüe i ngẽma yuüexũ, rü ngẽma nai i ngemaxã maxẽxũ, rü ngẽma chauégamaxã nügü ípoxũxũ, rü ngẽma norü puracütanüxũgümaxã rü yutegüxemaxã, rü taxcuxemaxã chixri cuaxgũxũ. Rü tá nüxũ chixugüe i ngẽma chixri tümamaxã maxẽxũ ya duũxëgü ya to i nachixũanecüãxgi rü ngẽma tama chauga ínüexũ.

**Ngẽma diézmö rü ãmaregü  
i Tupanaarü ixĩxũ**

<sup>6</sup>Choma nixĩ ya Cori ya Tupana chixixũ. Rü taguma naxüchicüxü i chorü ínü. Rü ngẽmacax i pemax Pa

Iraétanüxũgüx, rü tama iperüxoxũ erü guxũguma choxũ pengechaũtümüxũgü. <sup>7</sup>Pema rü chorü mugüna pixigachitanü, yema nüxcümaxũixũ ga perü oxigü choxna ixigachixürũxũ. Rü tama naga pexĩnüechaũ i ngẽma chorü mugü. Natürü i ñuxma i chomax i Cori ya Tupana ya guxãétüwa ngẽxmaxe rü ñachagürü pexũ: ‘iChauxcax pewoegu! Rü choma rü tá pexcax chatáegu’, ñachagürü. Natürü i pemax rü ñaperügügü: ‘¿Ñuxãcü chi i cuxcax tawoeguxũ?’ ñaperügügü. <sup>8</sup>Rü ñuxma i choma rü pexna chaca: ¿Ëxna namexũ yixixũ i wüxi i duũxũ rü choxũ nangíxũ? Rü dücax i pemax, rü aixcüma nixĩ i choxũ pengíexũ. Rü ngẽxguma rü ta rü ípecagüamaxũ rü ñapegügüxũ: ‘¿Rü taxacüwa i cuxũ tangíexũ?’ ñapegügüxũ. Rü dücax, rü choxũ pengíe nawa i ngẽma diézmögü rü ãmaregü i choxrü ixixũ. <sup>9</sup>Rü guxãma i pemax i ñaa nachixũanecüãx ixigüxe rü choxũ pengíe, rü ngẽmacax tá chixexũ pemaxã chaxuegu. Rü choma i Cori ya Tupana ya guxãétüwa ngẽxmaxe nüxũ chixu i ngẽma. <sup>10</sup>iRü chopataarü diêruchiügu peyaxú i ngẽma diêru i choxrü ixixũ! Rü ngẽmaãcü tá nangema i õna i chopatawa. iRü dücax, choxũ pexüx! Rü ngẽmaãcü tá nüxũ pedau nax daxügüxũ i naanearü íãx chiwãxnaxũ rü peétügu chanabaxũ i ngẽma mexũ. <sup>11</sup>Rü penetü rü tá mea nixo erü choma tá nüxna chadau nax taxuxũtãma i naweane rü daweane nachixexẽxũ i ngẽma penetügüarü o. <sup>12</sup>Rü guxũtãma i togü i nachixũanegü rü tá pexũ nixuchigagü nax ípetaãxëgüxũ erü pemax rü tá pexũ nangexma i wüxi i nachixũane i

mexechixũ. Rũ choma i Cori ya Tupana ya guxãétuwa ngẽxmaxe nũxũ chixu i ngẽma.”

**Tupanaaxũ nangechaũtũmũxũ i norũ duũxũgũ**

<sup>13</sup>Rũ nũma ya Cori ya Tupana rũ ñanagũrũ: “Pemax rũ poraãcũ chixexũ chomaxã pixugũe. Rũ ngẽxguma rũ ta ípecaama: ‘¿Taxacũrũ chixexũ nixĩ i cumaxã tixugũxũ?’ ñapegũrũgũ. <sup>14</sup>Rũ ñaa nixĩ i ngẽma nũxũ pixuxũ: ‘Taxuwama name i Tupanaaxũ nax ipuracũexũ. ¿Rũ taxacũrũ mexũ tayaxu i ngẽxguma naxũxgu i ngẽma nũma tũxũ namuxũ? ¿Rũ taxacũwa tũxũ name nax ingechaũgũxũ ega taxacũrũ chixexũ ixũgũgu i napexewa ya Cori ya Tupana ya guxãétuwa ngẽxmacũ? <sup>15</sup>Rũ yixema rũ nũxũ tadau i ngẽma duũxũgũ i nũgũ írũtagũxũ rũ nataãxẽgũ. Rũ ngẽma chixexũiarũ írũũgũ rũ guxũma i taxacũ i naxũgũxũwa rũ mea nũxũ ínanguxuchi. Rũ woo Tupanaxũ naxũgũgu rũ taxuxũma i poxcu naxcax ínangu’, ñaperũgũgũ”, ñanagũrũ ga Tupana. <sup>16</sup>Rũ yexguma ga yema duũxũgũ ga Tupanaga ñnũexũ rũ wũxichigũ namũcũmaxã nidexa ga Cori ya Tupanachiga. Rũ nũma ga Cori ya Tupana rũ inarũxinũ ga yema nũxũ yaxugũxũ. Rũ napexewa ga Tupana rũ wũxi ga poperagu nanaxũmatũ ga naéga ga yema duũxũgũ ga naga ñnũexũ rũ namaxã taãxẽgũxũ nax taguma texé nũxũ rũngũmaxũcax. <sup>17</sup>Rũ nũma ya Cori ya Tupana ya guxãétuwa ngẽxmacũ rũ ñanagũrũ: “Chomax rũ íchanamexẽxẽ i wũxi i ngunexũ i nagu tá wena chorũ duũxũgũ yixĩgũxũ. Rũ ñoma wũxi i

papá i nane i nũxũ puracũxũxũ ngechaũxũrũxũ, rũ ngẽmaãcũ tá choxũ nangechaũtũmũxũgũ. <sup>18</sup>Rũ ngẽxguma i pemax rũ tá nũxũ picuaxãchitanũ nax ñuxãcũ tama nawũxiguxũ i ngẽma mexũ ũgũxũ namaxã i ngẽma chixexũ ũgũxũ. Rũ ngẽxgumarũxũ ta i ngẽma choxũ icuaxũũgũxũ rũ tama namaxã nawũxigu i ngẽma tama choxũ icuaxũũgũxũ”, ñanagũrũ ya Tupana.

**Ngunexũ i Cori ya Tupana nagu tá ínguxũchiga**

**4** <sup>1</sup>Rũ nũma ya Cori ya Tupana ya guxãétuwa ngẽxmacũ rũ ñanagũrũ: “Rũ ningaica i ngẽma ngunexũ i ãũcũmaxũ i nagu tá chanapoxcũexũ i ngẽma chixexũ ũgũxũ ñoma ũxũemawa yaxaexũrũxũ. Rũ guxũma i ngẽma duũxũgũ i nũgũ írũtagũxũ rũ chixexũ ũgũxũ rũ ñoma maxẽ i pacũ i ũxũxétuwa yataxcuchichapaxacũrũxũ tá nixĩgũ. Rũ ngẽma ngunexũgu rũ guxũtãma nixae rũ taxuxũtãma ínayaxũgũ. <sup>2</sup>Natũrũ i pemax nax aixcũma choxũ pengechaũgũxũ rũ ngẽma chorũ ũũne rũ ñoma ũaxcũ i pexũ baxixũrũxũ tá maxũ pexna naxã, rũ tá petaãxẽgũ. Rũ pemax rũ taãxẽmaxã tá piyuxnagũtanũ ñoma wocaxacũgũ naxpũũwa iyayixũrũxũ. <sup>3</sup>Rũ ngẽma ngunexũ i ãũcũmaxũ i nagu chapoxcũexũ i ngẽma chixexũ ũgũxũ rũ pema rũ nawa tá pengagũ i ngẽma chixexũ ũgũxũ ñoma waixũmũtẽxewa pengagũxũrũxũ. <sup>4</sup>Rũ nũxna picuaxãchi ga yema mugũ ga chorũ duũ ga Moichéna chaxãxũ ga m̃axpũne ga Chinaíwa! Rũ yema ucũxẽgũ rũ mugũ rũ guxũma ga Iraétanũxũgũcax nixĩ nax

nümagü naga naxĩnüexũçax. <sup>5</sup>Rü dücax,  
 nua tá pexçax chanamu ya chorü  
 orearü uruxũ ya Ería naxũpa i ngẽma  
 ngunexũ i ãücümaxũ i nagu  
 chapoxcuxũ i ngẽma chixexũ ügüxũ.  
<sup>6</sup>Rü nüma ya Ería rü duũxũgümaxã tá  
 nüxũ nixu i chorü ore nax papágü rü  
 nanegümaxã nangüxmüexũçax, rü

nüma i nanegü rü nanatügümaxã  
 nangüxmüexũçax. Erü ngẽxguma tama  
 nüxũ naxoegu i norü chixexũgü rü  
 choma rü tá ngẽma chaxü rü  
 noxtacüma tá chanapoxcue i ngẽma  
 nachixũanecüãx i duũxũgü, rü  
 noxtacüma tá chayanaxoxẽ”,  
 ñanagürü ya Cori ya Tupana.